

四部
備要
集部

宋別集

(一)

歐陽文忠集

074

中華書局行

四部備要集部

歐陽文忠全集

四部備要

集部

上海中華書局據祠堂本

校刊

桐鄉 陸費達 總勘

杭縣 高時顯 輯校

杭縣 吳汝霖 校

丁輔之 監造

版權所有不許翻印

乾隆二十四年欽奉

御製歐陽修小像詩并序

侍郎表曰修典試江南道滁州見醉翁亭故蹟彼有藏歐陽修小像者攜以來舉沈德潛為乞文徵明題辭故事允其請書以還之

是誰三鬢儼圖諸太守風流憶治滁題詠名高宋人物幅間有李端叔晁悅之所題贊操絃韻軼古樵漁謂蘇軾醉翁操翁之樂者山林也像亦何妨水月如使節新從釀泉過依然鄉井下風餘

詹事府臣金銜恭和

聖韻

曠世遭逢信有諸當年遷謫始來滁溪山託興傳遺像雲漢流光照夜漁八代起衰良可繼千秋定論更誰如輶軒到處憑搜訪風雅都沾

睿藻餘

歐陽修嗣孫臣安世恭和

聖韻

我祖遭逢洵美諸爭傳使節道於滁廬陵今日昭雲漢潁水當年想佃漁天語燭人光燦燦神容遺世靄如如豈惟舊守承恩寵奕葉孫枝拜慶餘

居士集序

門人翰林學士承旨左朝奉郎知制誥兼侍讀蘇軾撰

夫言有大而非夸達者信之衆人疑焉孔子曰天之將喪斯文也後死者不得與於斯文也孟子曰禹抑洪水孔子作春秋而子距楊墨蓋以是配禹也文章之得喪何與於天而禹之功與天地並孔子孟子以空言配之不已夸乎自春秋作而亂臣賊子懼孟子之言行而楊墨之道廢天下以爲是二字一作是爲固然而不知其功孟子既沒而申商韓非之學違道而趣利殘民以厚主其說至陋也而士以是罔其上上之人僥倖一切之功靡然從之而世無大人先生如孔子孟子者推其本末權其禍福之輕重以救其感改其學遂行秦以是喪天下陵夷至於勝廣劉項之禍死者十八九天下蕭然洪水之患蓋不至此也方秦之未得志也使復有一孟子則申韓爲空言作於其心害於其事作於其政者必不至若是烈也使楊墨得志於天下其禍豈滅於申韓哉由此言之雖以孟子配禹可也太史公曰蓋公言黃老賈誼晁錯明申韓錯不足道也而誼亦爲之子以是知邪說之移人雖豪傑之士有不免者况衆人乎自漢以來道術不出於孔氏而亂天下者多矣晉以老莊亡梁以佛亡莫或正之五百餘年而後得韓愈學者以愈配孟子蓋庶幾焉愈之後三百有餘年而後得歐陽子其學推韓愈孟子以達於孔子著禮樂仁義之實以合於大道其言簡而明信而通引物連類折之於至理以服人心故天下翕然師尊之自歐陽子之存世之不說者譁而攻之能折困其身而不能屈其言士無賢不肖不謀而曰歐陽子今之韓愈也宋興七十餘年民不知兵燹而教之至天聖景祐極矣而斯文終有愧於古士亦因陋守舊論卑而氣弱自歐陽子出天下爭自濯磨以通經學古爲高以救時行道爲賢以犯顏納說爲忠長育成就至嘉祐末號稱多士歐陽子之功爲多嗚呼此豈人力也哉非天其孰

能使之歐陽子沒十有餘年士始爲新學以佛老之似亂周孔之實識者憂之賴天子明聖詔修取士法風厲學者專治孔氏黜異端然後風俗一變考論師友淵源所自復知誦習歐陽子之書予得其詩文七百六十六篇於其子棐乃次而論之曰歐陽子論大道似韓愈論事似陸贄記事似司馬遷詩賦似李白此非子言也天下之言也歐陽子諱修字永叔既老自謂六一居士云元祐六年六月十五日敘篇本作三年十二月是時任翰林學士

歐陽修字永叔吉州廬陵人四歲而孤母鄭氏親誨之學及冠嶷然有聲宋興且百年而文章體裁猶仍五季餘習鏗刻駢偶泖忽弗振士因陋守舊論卑氣弱蘇舜元舜欽柳開穆修輩咸有意作而張之而力不足韓愈遺藁闕於世學者不復道修游隨得於廢書篋中讀而心慕焉晝停深夜忘寐苦志探蹟必欲并轡絕馳而追與之並舉進士試南宮第一擢甲科調西京推官留守錢惟演器其材不櫻以吏事修以故欲得盡力於學入朝爲館閣校勘范仲淹以言時事貶在廷多論救司諫高若訥獨以爲當黜修詒書責之謂不知世間有羞恥事若訥上其書坐貶夷陵令稍徙乾德令武成節度判官仲淹使陝西辟掌書記修笑而辭曰昔者之舉豈以爲利哉同其退不同其進可也久之復校勘進集賢校理慶曆二年知諫院時仁宗更用大臣杜衍富弼韓琦仲淹皆在位增諫官員修首在選中每進見勸帝延問執政咨所宜行既多所張弛小人翕翕不便修慮善人必不勝數爲帝分別言之又上朋黨論其略以謂小人無朋惟君子則有之小人所好者利祿所貪者財貨當同利之時暫相黨引及見利而爭先則反相賊害雖兄弟親戚不能相保故曰小人無朋君子則不然所守者道義所行者忠信所惜者名節以之修身則同道而相益以之事國則同心而共濟終始如一故曰君子有朋紂有臣億萬惟億萬心可謂無朋矣而紂用以亡武王有臣三千惟一心可謂大朋矣而周用以興蓋君子之朋雖多而不厭故也修天性疾惡論事無所回隱人視之如仇而愈奮勵不顧帝獨獎其敢言面賜五品服顧侍臣曰如歐陽修者何處得來同修起居注遂知制誥故事必試而後命詔特除之奉使河東自西方用兵議者欲廢麟州以省餽餉修曰麟州天險不可廢廢之則河內郡縣民皆不安居矣不若分其兵駐並河諸堡緩急得以應援而平時可省轉輸於策爲便由是州得

存又言忻代背風多禁地廢田願令民得耕之不然將爲虜有朝廷下其議久乃行歲得粟數百萬斛使還會保州兵亂以爲龍圖閣直學士河北都轉運使陞辭帝曰勿爲久留計有所欲言言之對曰臣在諫職得論事今越職而言罪也帝曰但言之毋以中外爲間賊平大將李昭亮通判馮博文私納婦女修捕博文繫獄昭亮懼立出之兵之始亂也招以不死既而皆殺之脅從二千人分隸諸郡富弼爲宣撫使恐後生變將使同日誅之與修遇於丙黃夜半屏人告之故修曰禍莫大於殺已降况脅從乎既非朝命脫一郡不從爲變不細弼悟而止杜衍等相繼罷去修上疏曰此四人者天下皆知其有可用之賢而不聞其有可罷之罪小人欲廣陷良善必指爲朋黨欲動搖大臣必誣以顛權蓋善人少過唯指以爲黨則可一時盡逐今四人一旦罷去臣爲朝廷惜之於是邪黨益怠修因其孤甥張氏獄傳致以罪左遷知制誥知滁州居二年徙揚州頴州復學士召判流內銓時在外十一年矣帝見其髮白問勞甚至又有詐爲修奏乞汝內侍爲姦利者其羣皆怒譖之出知同州帝納吳充言而止遷翰林學士於是富弼韓琦復用慶曆政臣稍集士大夫知天子有致治之意相賀於朝修乞蔡州去帝復納劉敞趙抃之言而止奉使契丹其主命貴臣四人押燕曰此非常制以卿名重故爾知嘉祐二年貢舉時士子尙爲險怪奇澀之文號太學體修痛排抑之凡如是者輒黜舉事向之羣薄者伺修出聚謀於馬首街邏不能制然場屋之習從是遂變如龍圖閣學士知開封府承包拯威嚴之後簡易循理不求赫赫名京師亦治旬月改羣牧使在翰林八年知無不言河決商胡北京留守賈昌朝欲開橫壠故道回河使東有李仲昌者欲導入六塔河議者莫知所從修以爲河水重濁理無不淤下流既淤上流必決以近事驗之決河非不能力塞故道非不能力復但勢不能久耳橫壠功大難成雖成將復決六塔狹小而以全河注之濱隸德博必

被其害不若因水所趨增隄峻防疏其下流縱使入海此數十年之利也宰相陳執中主昌朝文彥博主仲昌竟爲河北患狄青爲樞密使有威名帝不豫訛言籍籍修請出之於外以保其終嘉祐元年水災修上疏曰陛下臨御三紀而儲宮未建昔漢文帝初卽位以羣臣之言卽立太子而享國長久爲漢太宗唐明宗惡人言儲嗣事不肯早定致秦王之亂宗社遂覆陛下何疑而久不定乎其後建立英宗蓋原於此五年拜樞密副使六年參知政事英宗未親政皇太后御簾大臣奏事間有未可修必力抗是非臺諫官至政事堂所論或矯異他執政未及言已面折其短朝士建白利害及凡所求請必明告之曰某事可行某事不可行以是怨誹益衆帝將追崇濮王命有司訂議皆謂當稱皇伯改封大國修引喪服記以爲爲人後者爲其父母服降二年爲期而不沒其父母之名以見服可降而名不可沒也若本生之親改稱皇伯歷考前世皆無典據進封大國則又禮無加爵之道故中書之議不與衆同太后出手書許帝稱親尊王爲皇王夫人爲后帝不敢當於是御史呂誨等六人爭論不已指修爲主議皆被逐惟蔣之奇之說合修意修薦爲御史衆目爲姦邪之奇患之則思所以自解修婦弟薛宗孺有憾於修造帷薄不根之謗推辱之展轉達於中丞彭思永思永以告之奇即上章劾修神宗初卽位欲深譴修訪於故宮臣孫思恭思恭爲辨釋修杜門請推治帝使詰思永之奇問所從來辭窮皆坐黜修亦罷爲觀文殿學士知亳州明年移青州改宣徽南院使判太原府辭不拜徙蔡州修本以風節自持既數困汙穢纔年六十卽連乞謝事帝輒優詔弗許及守青又以擅止散青苗錢爲王安石所詆故求歸愈切熙寧四年以太子少師致仕五年薨年六十六贈太子太師諡曰文忠修始在滁州號醉翁晚更號六一居士天資剛勁見義勇爲雖機穽在前觸發之不顧放逐流離至于再三志氣自若不悔也爲文天材自然豐約中度其

學推韓愈孟軻以達於孔氏著禮樂仁義之實以合於大道其言簡而明信而通引物連類折之於至理以服人心超然獨騫衆莫能及故天下翕然師尊之獎引後進如恐不及賞識之下率爲聞人曾鞏王安石蘇洵洵子軾轍布衣屏處未爲人知修卽游其聲譽謂必顯於世薦於朋友生則振掖之死則調護其家好古嗜學凡周漢以降金石遺文斷篇殘簡一切掇拾研稽異同立說於左的的可表證謂之集古錄奉詔修唐書紀志表自撰五代史記法嚴詞約多取春秋遺旨始與史漢相上下蘇軾敏其文曰論大道似韓愈論事似陸贄記事似司馬遷詩賦似李白識者以爲各言中子葉葉字叔弼廣覽彊記能文詞年十三時見修著鳴蟬賦侍於側不去修撫之曰兒異時必能爲此因書以遺之用廢爲祕書省正字登進士乙科念父老不肯仕強之乃調陳州判官終不行修所爲文須人代者多出其手修薨代草遺表神宗讀而愛之意修自作也免喪始爲審官主簿官制局檢詳官太常博士主客考功員外郎議者患選人員多請令二十五歲而試於銓又守選三年而後仕進士特奏名者予之官而不使調選葉曰是非朝廷所以立議本意也且所爲議冗官者欲利士人耳今加年而使守選是反害之也所謂特奏名者非他儒人老於場屋者也閱其無成而老故予之徵官使澹祿而後歸今乃授之虛名是終窮之也遂得不變元祐初以集賢校理爲著作郎判登聞鼓院復徙職方禮部員外郎知襄州會布執政其婦兄魏泰恃聲勢來居襄規占公私田園強市買與民爭利郡縣莫敢誰何至是指州門東偏官邸廢址爲天荒而請之吏具成牘至葉曰孰謂州門之東偏而有天荒乎卻之衆共白曰秦橫於漢南久今求地而緩與之且不可而又可卻邪葉竟持不與泰怒譖於布徙之滕州旋又罷去奪校理元符末還朝歷吏部右司二郎中以直祕閣知蔡州蔡地薄賦重轉運使又爲覆折之令多取於民民不堪命會有詔禁止而佐史惲

使者不敢以詔旨從事。棐曰：州郡之於民，詔令苟有未便，猶將建請。今天子德意深厚，知覆折之病民，手詔止之。若有憚而不行，何以爲長吏？命卽日行之。未幾，坐黨籍廢十餘年。卒年六十七。史臣曰：由三代以降，薄乎秦漢文章，雖與時盛衰而藹如其言，曄如其光，皦如其音。蓋均有先王之遺烈，涉晉魏而弊至，唐韓愈氏乃復起唐之文，涉五季而弊至，修復起闕百川之類，波導之東注。斯文正傳，追步前古匹夫而爲百世師，一言而爲天下法。此兩人足以當之，愈不極於用，修用矣而不極其至。然國朝文風彬彬至今，修之功學士大夫相與尸而祝之可也。

歐陽文忠公集自汴京江浙閩蜀皆有之前輩嘗言公作文揭之壁間朝夕改定今觀手寫秋聲賦凡數本劉原父手帖亦至再三而用字往往不同故別本尤多後世傳錄既廣又或以意輕改殆至訛謬不可讀廬陵所刊抑又甚焉卷帙叢勝略無統紀私竊病之久欲訂正而愚寡陋未能也會郡人孫謙益老於儒學刻意斯文承直郎丁朝佐博覽羣書尤長考證於是徧搜舊本傍采先賢文集與鄉貢進士曾三異等互加編校起紹熙辛亥春迄慶元丙辰夏成一百五十三卷別爲附錄五卷可繕寫模印惟居士集經公決擇篇目素定而參校衆本有增損其辭至百字者有移易後章爲前章者皆已附注其下如正統論吉州學記瀧岡阡表又迥然不同則收竄外集自餘去取因革粗有據依或不必存而存之各爲之說列於卷末以釋後人之惑第首尾浩博隨往隨刻歲月差互標注抵牾所不能免其視舊本則有間矣旣以補鄉邦之闕亦使學者據舊鑒新思公所以增損移易則雖與公生不同時殆將如升堂避席親承指授或因是稍悟爲文之法此區區本意也六月己巳前進士周必大謹書

廬陵歐陽文忠公年譜

真宗景德四年丁未

是歲皇考崇國公觀為綿州軍事推官六月二十一日寅時公生

大中祥符元年戊申

大中祥符二年己酉

大中祥符三年庚戌

是歲崇公終於泰州軍事判官公叔父暉時任隨州推官因卜居

焉公母夫人鄭氏年方二十九攜公往依之遂家于隨貧無資以

荻畫地教公書字稍長多誦古人篇章使學為詩叔父後歷閬州

推官江陵府掌書記仕至二千石終都官員外郎

大中祥符四年辛亥

是歲葬崇公于吉州吉水縣瀧岡其後至和元年析吉水縣之報

恩鎮置永豐縣遂隸永豐

大中祥符五年壬子

大中祥符六年癸丑

大中祥符七年甲寅

大中祥符八年乙卯

大中祥符九年丙辰

公年十歲在隨家益貧借書抄誦州南大姓李氏子好學公多遊

其家於故書中得唐韓昌黎文六卷乞以歸讀而愛之為詩賦下

筆如成人都官曰奇童也它日必有重名

天禧元年丁巳

天禧二年戊午

天禧三年己未

天禧四年庚申

天禧五年辛酉

乾興元年壬戌

二月仁宗即位

仁宗天聖元年癸亥

是歲公應舉隨州試左氏失之誣論其略云石言于晉神降于莘

內蚺鬪而外蚺傷新鬼大而故鬼小人已傳誦坐賦逸官韻黜

天聖二年甲子

天聖三年乙丑

天聖四年丙寅

公年二十自隨州薦名禮部

天聖五年丁卯

是春試禮部不中

天聖六年戊辰公年二十二

是歲公攜文謁胥學士偃於漢陽胥公大奇之留置門下冬攜公

泛江如京師

天聖七年己巳公年二十三

是春公從胥在京師試國子監為第一補廣文館生秋赴國學解

試又第一

天聖八年庚午公年二十四

正月試禮部翰林學士晏公殊知貢舉公復為第一三月御試崇

政殿公甲科第十四名五月授將仕郎試秘書省校書郎充西京

留守推官

天聖九年辛未公年二十五

三月公至西京錢文僖公惟演為留守幕府多名士與尹洙師魯

梅堯臣聖俞尤善日為古文歌詩遂以文章名冠天下初胥公許

以女妻公是歲親迎于東武

明道元年壬申公年二十六

是春及秋兩遊嵩嶽秋盡從通判謝絳奉御香告廟也禮畢同遊五人皆見峭壁大書神清之洞詳見附錄後謝希深與梅聖俞書公又嘗行縣視旱蝗

明道二年癸酉公年二十七

正月以吏事如京師因省叔父于漢東三月還洛夫人胥氏卒時生子未踰月九月莊獻劉后莊懿李后祔葬定陵公至鞏縣陪祭十二月進階承奉郎

景祐元年甲戌公年二十八

三月西京秩滿歸襄城五月如京師會前留守王文康公曙入樞府薦召試學士院閏六月乙酉授宣德郎試大理評事兼監察御史充鎮南軍節度掌書記館閣校勘三館秘閣所藏書多脫謬七月甲辰詔委官編定倣開元四部著為總目公預焉是歲再娶諫議大夫楊公大雅女

景祐二年乙亥公年二十九

是歲七月公同產妹之夫張龜正死於襄城謁告視之九月夫人楊氏卒

景祐三年丙子公年三十

是歲天章閣待制權知開封府范仲淹言事忤宰相落職知饒州公切責司諫高若訥若訥以其書聞五月戊戌降為峽州夷陵縣令公自京師沿汴絕淮泝江奉母夫人赴貶所十月至夷陵

景祐四年丁丑公年三十一

三月謁告至許昌娶薛簡肅公奎女是夏叔父都官卒九月還夷陵十二月壬辰移光化軍乾德縣令

寶元元年戊寅十一月改元

三月赴乾德是歲胥夫人所生子天

寶元二年己卯公年三十三

二月知制誥謝希深絳出守鄧州梅聖俞將宰襄城與希深偕行五月公謁告往會留旬日而還六月甲申復舊官權武成軍節度判官廳公事公自乾德奉母夫人特次於南陽冬暫如襄城康定元年庚辰二月改元公年三十四

是春赴滑州時范文正公起為陝西經略招討安撫使辟公掌書記辭不就六月辛亥召還復充館閣校勘仍修崇文總目十月轉太子中允癸巳同修禮書是歲子發生

慶曆元年辛巳公年三十五

五月庚戌權同知太常禮院以見修崇文總目辭許之八月乙酉許州對公事回依舊供職十一月丙寅祀南郊攝太常博士引終獻十二月加騎都尉己丑崇文總目成改集賢校理

慶曆二年壬午公年三十六

正月丁巳考試別頭舉人三月丙辰御試進士應天以實不以文賦公擬進一首賜勅書獎諭四月丙子復差同知禮院契丹遣汎使求關南地宰相呂夷簡薦富弼報聘人皆危之公上書引顏真卿使李希烈事乞留弼不報五月復應詔上書極陳弊事八月請外九月通判滑州十月至

慶曆三年癸未公年三十七

是歲仁宗廣言路修政事人多薦公宜為臺諫三月召還癸巳轉太常丞知諫院四月至京九月戊辰賜緋衣銀魚己巳同詳定國朝勳臣各次丙戌同修三朝典故十月戊申擢同修起居注十二月己亥召試知制誥公辭辛丑有旨不試直以右正言知制誥仍供諫職丁未同詳定編勅是月立春祭西太一宮為獻官尋例賜紫章服

慶曆四年甲申公年三十八

三月庚午兼判登聞檢院四月乙未押伴契丹賀生辰人使御筵

於都亭驛己亥命公使河東計度廢麟州及盜鑄鐵錢并鑿課虧額利害七月還京師八月甲午保州軍叛契丹聲言討西夏癸卯除公龍圖閣直學士河北都轉運按察使九月二朝典故成書以公嘗預編纂賜詔獎諭十一月南郊恩進階朝散大夫封信都縣開國子食邑五百戶

慶曆五年乙酉公年二十九

是春真定帥田况移秦州公權府事者三月時二府杜正獻范文正韓忠獻富文忠公以黨論相繼去公上書辨之小人素已憾公會公孤甥張氏犯法諫官錢明逸因以財產事及公下開封鞠治府尹楊日嚴觀望傳會上命戶部判官蘇安世入內供奉官王昭明監勘得無他八月甲戌猶落龍圖閣直學士罷都轉運按察使降知制誥知滁州十月甲戌至郡是歲子奕生

慶曆六年丙戌公年四十

公在滁自號醉翁

慶曆七年丁亥公年四十一

十二月以南郊恩加上騎都尉進封開國伯加食邑二百戶是歲子業生

慶曆八年戊子公年四十二

閏正月乙卯轉起居舍人依舊知制誥徙知揚州二月庚寅至郡皇祐元年己丑公年四十三

正月丙午移知潁州二月丙子至郡樂西湖之勝將卜居焉四月丙戌轉禮部郎中八月辛未復龍圖閣直學士是歲子辯生

皇祐二年庚寅公年四十四

七月丙戌改知應天府兼南京留守司事己酉至府十月己未明堂覃恩轉吏部郎中加輕車都尉是歲約梅聖俞買田於潁

皇祐三年辛卯公年四十五

皇祐四年壬辰公年四十六

三月壬戌丁母夫人憂歸潁州四月起復舊官公固辭八月許之皇祐五年癸巳公年四十七

八月自潁州護母喪歸葬吉州之瀧岡胥楊二夫人附焉是冬復至穎

至和元年甲午三月改元公年四十八

五月服闋除舊官職赴闕六月癸巳朝京師乞郡不許七月甲戌權判流內銓會小人詐爲公奏請汰內侍其徒怨怒以胡宗堯不當改官事中公戊子出知同州判吏部南曹吳充爲公辨明不報知諫院范鎮一再極言而參知政事劉沆方提舉修唐書亦乞留公修書八月丙午沆拜相戊申詔公修唐書九月辛酉遷翰林學士壬戌兼史館修撰又差勾當三班院十月乙巳朝饗景靈宮天興殿攝侍中捧盤取水十二月庚戌臘饗孝惠孝章淑德章懷皇后廟攝太尉行事

至和二年乙未公年四十九

三月同孫抃考試諸司寺監人吏六月己丑上書論宰相陳執中已而乞外改翰林侍讀學士集賢殿修撰出知蔡州侍御史趙抃知制誥劉敞上疏留公七月戊午復領舊職八月辛丑假右諫議大夫充賀契丹國母生辰使將持送仁宗御容會虜主殂癸丑改充賀登位國信使十二月庚戌宿虜界松山

嘉祐元年丙申九月改元公年五十

二月甲辰使還進北使語錄閏三月丁亥判太常寺兼禮儀事孟夏薦饗攝太尉行事五月癸未未知通進銀臺司兼門下封駁事乙未免勾當三班院六月甲子奉勅祈晴醴泉觀八月壬戌知益州張方平除三司使甲子詔公權發遣三司公事以俟其至而命李淑代知銀臺司乙亥車駕詣景靈宮朝拜天興殿充贊導禮儀使

又朝謁真宗及章懿太后神御殿攝太常卿九月辛卯大慶殿行
恭謝禮為贊引太常卿禮成加上輕車都尉進封樂安郡開國侯
加食邑五百戶十二月被差押伴契丹賀正旦人使御筵於都亭
驛

嘉祐二年丁酉公年五十一

正月癸未權知禮部貢舉賜御書文儒二字乙巳磨勘轉右諫議
大夫三月癸卯為狄青發哀苑中攝太常卿六月丙寅福康公主
進封充國公主七月壬午命公攝禮部侍郎以印授冊使乙未兼
判尚書禮部九月己卯兼判秘閣秘書省十一月辛巳權判史館
丙申權知審刑院候胡宿回依舊辛丑免十二月辛亥權判三班
院癸亥權奉安明德元德章穆三后御容於啓聖院車駕行酌獻
禮充禮儀使是月被差押伴契丹賀正旦人使御筵于都亭驛

嘉祐三年戊戌公年五十二

正月壬午上幸興國寺及啓聖院朝謁太祖太宗神御殿攝太常
卿二月癸卯契丹遣使告其國母哀差公館伴二月辛未兼侍讀
學士以員多固辭不拜癸未充宗正寺同修玉牒官甲午同陳旭
考試在京百司等人六月庚戌加龍圖閣學士權知開封府

嘉祐四年己亥公年五十三

二月戊辰免開封轉給事中同提舉在京諸司庫務是月充御試
進士詳定官賜御書善經二字四月丁卯奏告今冬太廟親行裕
饗之禮癸酉孟夏薦饗並攝太尉行事丙子兼充羣牧使六月甲
申刪定景祐廣樂記九月丁酉奉勅祈晴相國寺十月壬申車駕
朝饗景靈宮癸酉裕饗太廟並攝侍中行事丁丑加護軍食實封
三百戶

嘉祐五年庚子公年五十四

四月丁卯孟夏薦饗太廟攝太尉行事七月戊戌上新修唐書二

百五十卷庚子推賞轉禮部侍郎九月丁亥兼翰林侍讀學士十
月庚午下元節車駕朝拜景靈宮天與殿朝謁真宗及章懿太后
神御殿攝侍中十一月辛丑拜樞密副使加食邑五百戶食實封
二百戶甲寅同修樞密院時政記十二月被差押伴契丹賀正旦
人使御筵於都亭驛

嘉祐六年辛丑公年五十五

三月戊申侍上幸後苑賞花華景亭釣魚涵曦亭遂宴太清樓閣
八月辛丑轉戶部侍郎參知政事進封開國公加食邑五百戶食
實封二百戶公辭轉官許之九月庚申同修中書時政記十二月
丙戌臘享太廟攝太尉行事

嘉祐七年壬寅公年五十六

正月己酉朔太慶殿朝賀攝侍中承旨宣制三月乙卯祈雨南郊
攝太尉行事辛酉提舉三館秘閣寫校書籍同譯經潤文四月壬
午上嘉祐編勅七月庚戌差充明堂鹵簿使九月壬申文德殿奏
請致齋攝侍中奏中殿外辦己酉朝饗景靈宮庚戌朝饗太廟並
攝司徒辛亥大饗明堂己未進階正奉大夫加柱國仍賜推忠佐
理功臣十二月丙申上幸龍圖天章閣召輔臣至待制三司副使
以上臺諫官皇子宗室駙馬都尉管軍觀三聖御書又幸寶文閣
親飛白書分賜羣臣公得雙幅大書歲字下有御押加以御寶王
珪夾題八字云嘉祐御札賜歐陽修仍於絹尾書翰林學士臣王
珪奉聖旨題賜名又出御製觀書詩一首令羣臣屬和遂宴羣玉
殿庚子再召近臣及三館臣僚赴天章閣觀三朝瑞物太宗真宗
御集次赴寶文閣觀御飛白書賜公金花牋字復燕羣玉殿後數
日公以狀進詩謝

按兩宴皆有賜書而實錄及范蜀公東齋記事止載丙申有賜

當時王政公親奉詔為序亦不及庚子再賜而實錄及序又不

及館職預召惟東齋記事言之公記陸子履家藏飛白字明言羣玉殿所賜時子履任集賢校理與東齋記事合但不知是日公得何字其爲金花牋則無疑然陳無已六一堂圖書詩乃云黃絹兩大字又何也韓忠獻公謝詩云鸞拂宮綉緝胡文恭公亦有謝御飛白扇子詩得非預坐者衆所賜或不同耶實錄二十三日丙申二十七日庚子而政公序乃作戊申壬子不應差誤如此殆傳寫訛耳

是月差押伴契丹賀正旦人使御筵於都亭驛

嘉祐八年癸卯公年五十七

二月乙亥奉勅充沈貴妃冊禮使不及行禮四月壬申英宗卽位甲戌奉勅書大行皇帝哀冊證寶甲申覃恩轉戶部侍郎進階金紫光祿大夫加食邑五百戶食實封二百戶仍賜推忠協謀佐理功臣乙酉奉勅篆受命寶其文曰皇帝恭膺天命之寶五月戊辰爲皇帝祈福於南郊攝太尉行事七月戊申押伴契丹祭吊人使御筵於都亭驛八月癸巳奉勅篆大行皇帝證寶其文曰神文聖武明孝皇帝之寶十月乙酉增修太廟成命告七室十二月庚午伴押契丹賀正旦人使御筵於都亭驛

英宗治平元年甲辰公年五十八

四月甲午奉勅祈雨社稷閏五月戊辰特轉吏部侍郎八月辛丑奉勅祈晴太社十二月壬子差押伴契丹賀正旦人使御筵於都亭驛

治平二年乙巳公年五十九

是春上表乞外不允四月辛丑景靈宮奉安仁宗御容車駕行酌獻之禮攝侍中八月以大雨水再乞避位不允九月辛酉提舉編纂太常禮書百卷成詔各太常因革禮賜銀絹十一月庚午車駕朝饗景靈宮辛未饗太廟壬申祀南郊攝司空行事進階光祿大

夫加上柱國食邑五百戶

治平三年丙午公年六十

三月二日賜上巳宴時初頒明天曆適值丁巳是月以言者指濮議爲邪說力求去不允七月癸酉薦饗太廟攝太尉行事十二月癸未奉勅篆皇帝尊號寶其文曰體乾膺曆文武廣孝皇帝之寶乙巳押伴契丹賀正旦人使御筵於都亭驛

治平四年丁未公年六十一

正月丁巳神宗卽位戊辰覃恩轉尚書左丞進階特進加食邑五百戶食實封二百戶仍賜推忠協謀同德佐理功臣二月第三子棐登進士第是月御史彭思永蔣之奇以飛語汙公上察其誣斥之公力求去三月壬申除觀文殿學士轉刑部尚書知亳州改賜推誠保德崇仁珣戴功臣閏三月辛巳宣發書駐泊公事陸辭乞便道過潁少留許之五月甲辰至亳六月戊申視事

神宗熙寧元年戊申公年六十二

是歲連上表乞致仕不允八月乙巳轉兵部尚書改知青州充京東東路安撫使九月丙申至青十一月丁亥郊祀恩加食邑五百戶食實封二百戶是歲築第於潁

熙寧二年己酉公年六十三

三月內侍王延慶便道傳宣撫問仍賜香藥一銀合又遞賜新校定前漢書以公嘗預刊定也冬乞壽州便私記不允

熙寧三年庚戌公年六十四

四月壬申除檢校太保宣徽南院使判太原府河東路經略安撫監牧使兼并代澤路麟府嵐石路兵馬都總管公堅辭不受七月辛卯改知蔡州九月甲寅至蔡是歲更號六一居士

熙寧四年辛亥公年六十五

公在蔡累章告老六月甲子以觀文殿學士太子少師致仕七月

歸穎八月將祀明堂詔赴顯陪位公上章乞免從之禮成賜衣帶

器幣牲饗

熙寧五年壬子公年六十六

閏七月庚午公薨八月丁亥贈太子太師

熙寧七年八月諡文忠議議見附錄

熙寧八年九月乙酉葬開封府新鄭縣旌賢鄉

元豐三年十二月以子升朝遇太禮贈太尉

元豐八年十一月贈太師追封康國公

紹聖三年五月追封文國公

崇寧三年追封秦國公政和二年追封楚國公皆以子斐遇郊恩

宋文忠公小影



像讚

門人蘇軾題

賢哉文忠直道大節知進知退既明且哲陸贄議論韓愈文章李杜
歌詩公無不長當世大儒邦家之光

又

宋李端叔題

霜空無雲秋天澄霧昭然政通何勞鍾籛儼然望之希世一遇萬邦
方春逢坡益注

又

宋晁悅之題

惟我昭陵公乃得升天下無朋國有魏公公乃得容不朋以忠風波
既散高山獨見小人是嘆昔賢在是寧論厥似聞其百世

又

清瀏從孫玄百拜謹撰主蕭

文在兩間與世推移道之將興文必先知八代萎靡韓歐繼作讀者
瞻之寔啓濂洛五季鉅筆素王微權本論拳拳慶曆七篇人心既正
士習斯淳黃河泰華我公其人

累代校刊姓名

宋元祐六年男發 奕 棊 辯 同集

門人蘇 軾 僧第蘇 轍 編次

紹興五年郡人孫謙益 桂陽軍教授丁朝佐 鄉進士曾三異

登仕郎 胡 柯

慶元二年州縣學職葛 濂 王伯芻 朱 岑 胡 柄

清江主簿曾 煥 鄉進士胡 煥 鄉進士劉 贊

郡人羅 泌

明天順辛巳郡太守程諱宗 教授 鄭 綱

弘治辛亥郡 太守 顧諱福 江南姑蘇人

正德壬申郡 太守 劉諱喬 直隸慈谿人

嘉靖丙申郡 司馬 李諱本 浙江會稽人

嘉靖乙卯行人司行人 陳諱珊 逸士羅 良

左 參 政 潘諱恩 馬諱森

左 參 議 傅諱頤 湖北沔陽人

右 參 議 王諱喬齡 張諱思誠

江西撫都院陳上虞人 巡按御史吳海寧人

南昌郡守陸諱九成 司馬黃諱持衡

別駕任諱佐 司理王諱元春 浙江仁和人

臨 江 司 馬 顧諱言 杜諱完

南新二縣宰 張諱于遠 湖北安陸人

嘉靖庚申江西撫都院 何諱遷 湖北夷陵人

萬曆元年郡 太守 雷諱以仁 浙江歸安人

萬曆己卯首定八大家古文 茅諱坤 本郡吉水人

國朝康熙壬子合刊歐文二集 會諱弘 汪諱份

又累刊八大家文 孫諱琮 呂諱葆中

乾隆丙寅 廬陵嗣孫鈞溪副貢生教諭

太學生肇相 浚 坦 安世

邑庠生煌 銷 謙益 分居水波岸

東澤明 白沂庠生淮 寧溪國學章

安福湛塘庠生夔 字江庠生枚

桂里孝廉知縣質 蜀江孝廉知縣彥

龍南孝廉知縣龍 泰山任廣豐教諭恭

貴州倚文縣瑤 龍泉後巷恩貢教諭恭

太學生法詢 宜黃陽坊孝廉知縣易

邑庠生逢韶 桂 瀏陽國學啓遠

集古錄目序

物常聚於所好而常得於有力之彊有力而不好好之而無力雖近且易有不能致之象犀虎豹蠻夷山海殺人之獸然其齒角皮革可聚而有也玉出崑崙流沙萬里之外經十餘譯乃至乎中國珠出南海常生深淵採者腰絙而入水形色非人往往不出則下鮑蛟魚金礦于山鑿深而穴遠篝火餒糧而後進其崖崩窟塞則遂葬於其中者率常數十百人其遠且難而又多死禍常如此然而金玉珠璣世常兼聚而有也凡物好之而有力則無不至也湯盤孔鼎岐陽之鼓岱山鄒嶧會稽之刻石與夫漢魏已來聖君賢士桓碑彝器銘詩序記下至古文籀篆分隸諸家之字書皆三代以來至寶怪奇偉麗工妙可喜之物其去人不遠其取之無禍然而風霜兵火湮淪磨滅散棄於山崖墟莽之間未嘗收拾者由世之好者少也幸而有好之者又其力或不足故僅得其一二而不能使其聚也夫力莫如好好莫如一予性顛而嗜古凡世人之所貪者皆無欲於其間故得一其所好於斯好之已篤則力雖未足猶能致之故上自周穆王以來下更秦漢隋唐五代外至四海九州各山大澤窮崖絕谷荒林破塚神仙鬼物詭怪所傳莫不皆有以爲集古錄以謂轉一作傳寫失真故因其石本軸而藏之有卷帙次第而無時世之先後蓋其取多而未已故隨其所得而錄之又以謂聚多而終必散乃撮其大要別爲錄目因并載夫可與史傳正其闕繆者以傳後學庶益於多聞或譏予曰物多則其勢難聚聚久而無不散何必區區於是哉予對曰足吾所好玩而老焉可也象犀金玉之聚其能果不散乎予固未能以此而易彼也廬陵歐陽脩序

昔在洛陽與余遊者皆一時豪儁之士也而陳郡謝希深善評文章河南尹師魯辨論精博余每有所作二人者必伸紙疾讀便得余深意以示他人亦或時有所稱皆非余所得者也宛陵梅聖

俞善人君子也與余共處窮約每見余小有可喜事懽然若在諸己自二君之亡余亦老且病矣此敘之作既無謝尹之知音而集錄成書恨聖俞之不見也悲夫嘉祐八年歲在癸卯七月二十四日書

錄目記

集古錄既成之八年家君命棊曰吾集錄前世埋沒失落之文獨取世人無用之物而藏之者豈徒出於嗜好之僻而以爲耳目之玩哉其爲所得亦已多矣故嘗序其說而刻之又跋於諸卷之尾者二百九十六篇序所謂可與史傳正其闕繆者已粗備矣若撮其大要別爲目錄則吾未暇然不可以闕而不備也棊退而悉發千卷之藏而考之曰嗚呼可謂詳矣蓋自文武以來迄于五代咸衰得失賢臣義士姦雄賊亂之事可以動人耳目者至於釋氏道家之言莫不皆有然分散零落數千百年而後聚於此則亦可謂難矣其聚之既難則其久也又將遂散而無傳宜公之惜乎此也於是各取其書撰之人事迹之始終所立之時世而著之爲一十卷以附於跋尾之後夫事必簡而不煩然後能傳於久遠今此千卷之書者刻之金石託之山崖未嘗不爲無窮之計也然必待集錄而後著者豈非以其繁一作多而難於盡傳哉故著其大略而不道其詳者公之志也熙寧二年二月記

右集古錄序成於嘉祐末年其云有卷帙次第無時世先後蓋取多而未已故隨其所得而錄之此公述千卷不以世代爲序之意也又云撮其大要別爲錄目因載夫可與史傳正其闕繆者以傳後學此公述錄目跋尾之意也至熙寧二年公之子叔弼記其後云公命棊曰吾跋諸卷之尾者二百九十六篇若撮其大要別爲錄目則吾未暇棊乃盡發千卷著其大略自今觀之公序明言別

爲錄目而裴乃記公未暇之語世傳集古跋十卷四百餘篇而裴
乃謂二百九十六篇雖是時公尙無恙後二年方薨然續跋纔十
餘耳不應多踰百篇得非寫本誤以三百爲二百或裴記在熙寧
之前耶裴又云爲十卷附跋尾之後今錄目自爲一書乃二十卷
不過列碑石所在及其名氏歲月初無難者何未暇之有是皆可
疑姑以裴所記附公本序

濮議序

觀文殿學士行刑部尚書知亳州軍州事臣歐陽脩撰進

臣某頓首死罪言臣聞事固有難明於一時而有待於後世者伯夷叔齊是已夫君臣之義父子之道至矣臣不得伐其君子不得絕其父此甚易知之事也方武王之作也人皆以爲君可伐濮議之興也人皆以爲父可絕是大可怪駭者也盟津之會諸侯不召而至者蓋八百國是舉世之人皆以爲君可伐矣彼夷齊者眇然孤竹之二羈臣也以其至寡之力欲抗舉世之人而力不能勝言不見察二子以謂吾言廢則君臣之義廢而後世之亂無時而止也乃相與務爲高絕之行以警世於是不食周粟而餓死首陽之下然世亦未之知也後五百餘年得孔子而稱其仁然後二子之道顯使孱王弱主得立於後世而臣不敢伐其君者二子之力也夫以其易知之事二子爲之至艱如此猶須五百年得聖人而後明然則濮園之議其可與庸人以口舌一日爭耶此臣不得不述其事以示後世也方濮議之興也儒學奮筆而論臺諫廷立而爭閭巷族談而議是舉國之人皆以爲父可絕矣世又無夷齊以抗之雖然賴天子聖明仁孝不惑羣議據經酌禮置園立廟不絕父子之恩以爲萬世法是先帝之明也今士大夫達於禮義者渙然釋其疑蓋十八九一本作三四矣固不待夷齊餓死孔子復生而後明也然有不可不記者小人之誣罔也蓋自漢以來議事者何嘗不立同異而濮園之議皆當世儒臣學士之賢者特以爲人後之禮世俗廢久卒然不暇深究其精微而一議之失出於無情未足害其賢惟二數任言職之臣挾以他事發於憤恨厚誣朝廷而歸惡人主借爲奇貨以買一作賣名而世之人不原其心迹不辨其誣罔翕然稱以爲忠使先帝之志鬱鬱不明於後世此臣子之罪也臣得與其事而知其詳者故不得已而述焉臣某謹序

內制集序

昔錢思公嘗以謂朝廷之官雖宰相之重皆可雜以它才處之惟翰林學士非文章不可思公自言爲此語頗取怒於達官然亦自負以爲至論今學士所作文書多矣至於青詞齋文必用老子浮圖之說祈禳秘祝往往近於家人里巷之事而制詔取便於宣讀常拘以世俗所謂四六之文其類多如此然則果可謂之文章者歟余在翰林六年中間進拜二三大臣皆適不當直而天下無事四夷和好兵革不用凡朝廷之文所以指麾號令訓戒約束自非因事無以發明矧余中年早衰意思零落以非工之作又無所遇以發焉其屑屑應用拘牽常格卑弱不振宜可羞也然今文士尤以翰林爲榮選余旣罷職院吏取余直草以日次之得四百餘篇因不忍弃况其上有朝廷內及宮禁下暨蠻夷海外事無不載而特政記日曆與起居郎舍人有所略而不記未必不有取於斯焉嗚呼余且老矣方買田淮潁之間若夫涼竹簟之暑風曝茅簷之冬日睡餘支枕念昔平生仕宦出處顧瞻玉堂如在天上因覽遺藁見其所載職官名氏以較其人咸衰先後孰在孰亡足以知榮寵爲虛名而資談笑之一噓也亦因以誇於田夫野老而已嘉祐六年秋八月二日廬陵歐陽修序

歐陽文忠公全集總目

居士集五十卷

卷第一 文集一

古詩三十八首

卷第二 文集二

古詩二十首

卷第三 文集三

古詩三十一首

卷第四 文集四

古詩二十四首

卷第五 文集五

古詩一十八首

卷第六 文集六

古詩二十五首

卷第七 文集七

古詩二十二首

卷第八 文集八

古詩二十一首

卷第九 文集九

古詩三十首

卷第十 文集十

律詩六十首

卷第十一 文集十一

律詩五十七首

卷第十二 文集十二

律詩五十六首

卷第十三 文集十三

律詩五十五首

卷第十四 文集十四

律詩六十五首

卷第十五 文集十五

賦五首

卷第十六 文集十六

論三首

卷第十七 文集十七

論六首

卷第十八 文集十八

經旨十一首

卷第十九 文集十九

詔冊七首

卷第二十 文集二十

神道碑銘三首

卷第二十一 文集二十一

神道碑銘四首

卷第二十二 文集二十二

神道碑銘二首

卷第二十三 文集二十三

神道碑銘二首

卷第二十四 文集二十四

墓表八首

卷第二十五 文集二十五

墓表六首

卷第二十六 文集二十六

墓誌銘四首

卷第二十七 文集二十七

墓誌銘五首

卷第二十八 文集二十八

墓誌銘六首

卷第二十九 文集二十九

墓誌銘六首

卷第三十 文集三十

墓誌銘四首

卷第三十一 文集三十一

墓誌銘五首

卷第三十二 文集三十二

墓誌銘三首

卷第三十三 文集三十三

墓誌銘四首

卷第三十四 文集三十四

墓誌銘五首

卷第三十五 文集三十五

墓誌銘三首

卷第三十六 文集三十六

墓誌銘七首

卷第三十七 文集三十七

墓誌銘一十七首

卷第三十八 文集三十八

行狀二首

卷第三十九 文集三十九

記十首

卷第四十 文集四十

記八首

卷第四十一 文集四十一

序七首

卷第四十二 文集四十二

序九首

卷第四十三 文集四十三

序七首

卷第四十四 文集四十四

序六首 傳一首

卷第四十五 文集四十五

通進司上書一首

卷第四十六 文集四十六

準詔言事上書一首

卷第四十七 文集四十七

與人書八首

卷第四十八 文集四十八

策問十二首

卷第四十九 文集四十九

祭文二十首

卷第五十 文集五十

祭文十七首

外集二十五卷

卷第一 文集五十一

樂府七首	古詩四十首
卷第二	文集五十二
古詩二十七首	
卷第三	文集五十三
古詩三十首	
卷第四	文集五十四
古詩三十七首	聯句三首
卷第五	文集五十五
律詩五十八首	
卷第六	文集五十六
律詩七十三首	
卷第七	文集五十七
律詩七十首	
卷第八	文集五十八
古賦四首	辭二首
頌一首	贊一首
章一首	
卷第九	文集五十九
論一十一首	辨二首
卷第十	文集六十
經旨一十三首	
卷第十一	文集六十一
神道碑銘一首	墓誌銘六首
卷第十二	文集六十二
墓誌銘六首	石柳銘一首
墓表一首	

卷第十三	文集六十三
記二十首	
卷第十四	文集六十四
序一十二首	
卷第十五	文集六十五
序七首	傳一首
卷第十六	文集六十六
書八首	
卷第十七	文集六十七
書一十一首	
卷第十八	文集六十八
書一十二首	
卷第十九	文集六十九
書一十四首	
卷第二十	文集七十
策問五首	謚議一首
齋文一首	祭文六首
卷第二十一	文集七十一
歐陽氏譜圖	
卷第二十二	文集七十二
硯譜	牡丹記
卷第二十三	文集七十三
雜文二十七首	
卷第二十四	文集七十四
近體賦一十三首	官題詩二首
卷第二十五	文集七十五

論三首

策八首

易童子問三卷

卷第一

文集七十六

問答二十一章

卷第二

文集七十七

問答一十五章

卷第三

文集七十八

問答一章

外制集三卷

卷第一

文集七十九

勅二首

制四十七首

卷第二

文集八十

制五十首

文集八十一

卷第三

制五十首拾遺一十五首附

內制集八卷

卷第一

文集八十二

詔七首

國書二首

勅書二首

批答一首

口宣一十五首

春帖子詞二十首

青詞七首

密詞一首

齋文三首

祝文五首

功德疏右語一首

卷第二

文集八十三

制一首

詔四首

勅書一首

批答五首

口宣一十五首

端午帖子詞二十首

上梁文一首

青詞九首

密詞一首

齋文四首

祭文四首

卷第三

文集八十四

制一首

詔三首

國書四首

勅書四首

御札一首

口宣一十七首

表一首

青詞六首

密詞一首

齋文三首

祝文二首

祭文四首

功德疏右語一首

卷第四

文集八十五

制一首

詔八首

詔勅四首

勅書七首

批答二首

口宣一十三首

青詞五首

密詞二首

齋文一首

文集八十六

卷第五

文集八十六

詔八首

詔勅三首

國書三首

勅書二首

批答一首

口宣一十三首

青詞三首

密詞二首

默表一首

齋文一首

祝文三首

文集八十七

制四首 詔一十一首

國書二首 批答六首

口宣五首 端午帖子二十首

青詞六首 密詞三首

表六首 默表一首

冊文三首

卷第七 文集八十八

制二首 詔一十首

國書二首 勅書四首

批答二首 口宣七首

青詞六首 齋文二首

祝文二首 功德疏語五首

內中御侍賀節詞語二首

卷第八 文集八十九

制三首 詔一十二首

勅書八首 批答六首

口宣二首 表三首

密詞一首 齋文二首

祝文一首 祭文三首

表奏書啓四六集七卷

卷第一表奏 文集九十

表一十八首 狀五首

劄子一首

卷第二表奏 文集九十二

表九首 狀一十二首

劄子九首

卷第三表奏 文集九十二

表一十三首 劄子一十首

卷第四表奏 文集九十三

表一十一首 狀一首

劄子二十首御札二首附

卷第五表奏 文集九十四

表一十二首 狀二首

劄子一十五首

卷第六書啓 文集九十五

書二首 啓三十六首

卷第七書啓 文集九十六

書三十二首 啓七首

奏議集十八卷

卷第一 文集九十七

劄子六首 狀四首

卷第二 文集九十八

劄子九首

卷第三 文集九十九

劄子六首 狀三首

卷第四 文集一百

劄子十首 狀一首

卷第五 文集一百一

劄子八首

卷第六 文集一百二

劄子九首 狀一首

卷第七 文集一百三

劄子十首

卷第八

文集一百四

劄子十首

狀一首

卷第九

文集一百五

劄子十首

卷第十

文集一百六

劄子六首

狀一首

卷第十一

文集一百七

狀四首

卷第十二

文集一百八

劄子四首

狀二首

書一首

卷第十三

文集一百九

劄子二首

狀三首

卷第十四

文集一百十

疏一首

狀五首

劄子六首

卷第十五

文集一百十一

劄子十一首

疏一首

書一首

卷第十六

文集一百十二

狀九首

劄子三首

卷第十七

文集一百十三

劄子八首

卷第十八

文集一百十四

劄子六首

狀一首

雜著述二十九卷

卷第一

文集一百十五

河東奏草上

卷第二

文集一百十六

河東奏草下

卷第三

文集一百十七

河北奏草上

卷第四

文集一百十八

河北奏草下

卷第五

文集一百十九

奏事錄

卷第六

文集一百二十

濮議一

卷第七

文集一百二十一

濮議二

卷第八

文集一百二十二

濮議三

卷第九

文集一百二十三

濮議四

卷第十

文集一百二十四

崇文總目敘釋

卷第十一

文集一百二十五

于役志

卷第十二

文集一百二十六

歸田錄上

卷第十三

文集一百二十七

歸田錄下

卷第十四 文集一百二十八

詩話

卷第十五 文集一百二十九

筆說

卷第十六 文集一百三十

試筆

卷第十七 文集一百三十一

長短句一

卷第十八 文集一百三十二

長短句二

卷第十九 文集一百三十三

長短句三

集古錄跋尾一十卷

卷第一 文集一百三十四

周

秦

前漢

後漢

卷第二 文集一百三十五

後漢

卷第三 文集一百三十六

後漢

卷第四 文集一百三十七

魏

吳

晉

宋

齊

南齊

梁

陳

後魏

北齊 後周 東魏

卷第五 文集一百三十八

隋

唐

卷第六 文集一百三十九

唐

卷第七 文集一百四十

唐

卷第八 文集一百四十一

唐

卷第九 文集一百四十二

唐

卷第十 文集一百四十三

唐

五代

書簡一十卷

卷第一 文集一百四十四

五十一首

卷第二 文集一百四十五

五十六首

卷第三 文集一百四十六

四十八首

卷第四 文集一百四十七

四十一首

卷第五 文集一百四十八

六十二首

卷第六 文集一百四十九

四十五首

卷第七

四十四首

卷第八

三十三首

卷第九

四十九首

卷第十

二十三首

附錄

卷第一

制詞

卷第二

祭文

卷第三

墓誌銘

神道碑

卷第四

神清洞書記

卷第五

事迹

居士集卷第一 集一

古詩二十八首

顏跖

顏回飲瓢水陋巷臥曲肱盜跖厭人肝九州恣橫行回仁而短命跖
壽死免兵愚夫仰天呼禍福豈足憑跖身一腐鼠死朽化無形萬世
尚遭戮筆誅甚刀刑思其生所得豺犬飽臭腥顏子聖人徒生知自
誠明惟其生之樂豈減跖所榮死也至今在光輝一作輝光如日星
譬如埋金玉不耗精與英生死得失間較量誰重輕善惡理如此毋
尤天不平

猛虎

猛虎白日行心閑貌揚揚當路擇人肉一作熊豬不形相頭垂尾
不掉百獸自然降暗禍發所忽有機埋路傍徐行自踏之機齧矢穿
腸怒吼震林邱瓦落兒墮床已死不敢近目睛射餘光虎勇一作猛
恃其外爪牙利鉤鉞人形雖羸弱智巧一作巧智乃中藏恃外可摧
折藏中難測量英心多決烈自信不猜防老狐足姦計安居一作身
安穴垣墻窮冬聽冰渡思慮豈不長引身入投中將死猶跳跟狐姦
固堪笑虎猛誠可傷

仙草

世說有仙草得之能隱身仙書已怪妄此事况無文嗟爾得從誰不
辨僞與真持行入都市自謂術通神白日攫黃金磊落揀奇珍旁人
掩口笑縱汝暫懼忻汝方矜所得謂世盡盲昏非人不見汝乃汝不
見人

遊龍門分題十五首

上山

躡躡上高山探險慕幽賞初驚瀟芳早忽望巖扉敞林窮路已迷但
逐樵歌響

下山

行歌翠微裏共下山前路千峯返照外一鳥投巖去渡口晚無人繫
舸芳洲樹

石樓

高灘復下灘風急刺舟難不及樓中客徘徊川上山一作山上看一
作山上山夕陽洲渚遠唯見白鷗鷺

上方閣

聞鐘渡一作動寒水共步尋雲嶂還隨孤鳥下却望層林上清梵遠
猶聞日暮空一作千山響

伊川泛舟

春谿漸生溜演漾迴舟小沙禽獨避人飛去青林杪

宿廣化寺

橫槎渡深澗披露採香薇樵歌雜梵響共向松林歸日落寒山慘淨
雲隨客衣

自菩提步月歸廣化寺

春巖瀑泉響夜久山已寂明月淨松林千峯同一色

八節灘

亂石瀉溪流跳波濺如雪住來川上人一作寒川上朝暮愁灘闊更
待浮雲散孤舟弄明月

白傅墳

芳荃莫蘭酌共弔松林裏溪口望山椒但見浮雲起

晚登菩提上方

野色混晴嵐蒼茫辨烟樹行人下山道猶向都門去

山槎

古木臥山腰危根老盤石山中苦霜嚴歲久無春色不如崖下桂開
花獨留客

石笋

巨石何亭亭孤生此巖側白雲與翠霧誰見瓊玕色惟應山鳥飛百轉時來息

鴛鴦

畫舫一作船鳴兩槳日暮芳洲路泛泛風波為雙雙弄紋羽愛之欲移舟漸近還飛去

魚一作漁翁

春水弄春沙蕩漾流不極冬管苦難滿終日沙頭客向暮卷空罾棹歌菱浦北

魚鷺

日色弄晴一作清川時時錦鱗躍輕飛若下韞豈畏風灘惡人歸晚渚靜獨傍漁舟落

伊川獨遊

東郊漸微綠驅馬忻獨往梅繁野渡晴泉落春山響身閑愛物外趣遠諧心賞歸路逐樵歌落日寒川上

三遊洞

一本作夷陵九詠一三遊洞二下牢溪三蝦蟆碇四勞亭驛五龍溪六黃溪夜泊七黃牛峽祠八松門九下牢津

居士集本古律各從其類今從之

漾漾泝清川捨舟緣翠嶺探奇冒層峻因以窮人境弄舟一作川終日愛雲山徒見青蒼杳靄問誰知一室烟霞裏乳竇雲腴凝石髓蒼崖一徑橫查渡翠壁千尋當戶起昔人心賞為誰留人去山阿跡更幽青蘿綠桂何岑寂山鳥嚶嚶不驚客松鳴澗底自生風月出林間

來照席仙境難尋復易迷山回路轉幾人知惟應洞口春花落流出巖前百丈谿即下牢溪也

下牢溪

隔谷聞溪聲尋溪度橫嶺清流涵白石靜見千峯影巖花無時歇翠

柏鬱何整安能繼潏潏俯仰弄雲景

蝦蟆碇今工人寫作背字音佩

石溜吐陰崖泉聲滿空谷能邀弄泉客繫舸留巖腹陰精分月窟水味標茶錄共約試春芽槍旗幾時綠

黃牛峽一本無峽字祠

大川雖有神一作固神靈淫祀亦其一作本風俗石馬繫祠門山颯噪叢木潭潭村鼓隔溪聞楚巫歌舞送迎神畫船百丈山前路上下峽長來去江水東流不暫停黃牛千古長如故峽山侵天起青嶂崖崩路絕無由上黃牛不下江頭飲行人未向舟中望朝朝暮暮一作行行終日見黃牛徒使行一作誰使人人過此愁山高更遠望猶見不是黃牛一作灘中滯客舟語曰朝見黃牛暮見黃牛一朝一暮黃牛如故言江惡難行久不能過也

千葉紅梨花峽州署中舊有此花前無賞者知郡朱郎中始

加欄檻命坐客賦之

紅梨千葉愛者誰白髮郎官心好奇徘徊繞樹不忍折一日千匝看無時夷陵寂寞千山裏地遠氣偏時節異愁煙若霧少芳菲野卉蠻花鬪紅紫可憐此樹生此處高枝絕一作紅豔無人顧春風吹落復吹開山鳥飛來自飛去根盤樹老幾經春真賞今纔遇使君風輕絲雪罽前舞日暖繁香露下聞從來奇物產天涯安得移根植帝家猶勝張騫為漢使辛勤西域徙榴花

金雞五言十四韻

蠻荆鮮人秀厥美為物怪禽為得之多山雞粟其粹衆綵爛成文真色不可繪仙衣霓紛披女錦花綵輝輝華日光亂眩轉目晴燼高田啄秋粟下澗飲寒瀨清唳或相呼舞影還自愛豈知文章累遂使網羅掛及禍誠有媒求友反遭賣有身乃吾患斷尾亦前戒不羣世所驚甚美衆之害稻梁雖云厚樊繫豈為泰山林歸無期羽翮日已鏹

用晦有前言書之可爲誠

和丁寶臣遊甘泉寺在臨江一山上真懸解相對

江上孤峯蔽綠蘿懸樓終日對嵯峨叢林已廢姜祠在事迹難尋楚語訛寺有清泉一泓俗傳爲姜詩泉亦有姜詩祠按詩廣漢人疑泉不在此空餘一派寒巖側澄碧泓涵玉色野僧豈解惜清泉蠻俗那知爲勝迹西陵老一作縣令好尋幽時共登臨向此遊畎危一逕穿林機盤石蒼苔留客歇山深雲日變陰晴澗柏巖松度歲青谷裏花開知地暖林間鳥語作春聲依依渡口夕陽時却望層巒在翠微城頭暮鼓休催客更待橫江一作孤舟弄月歸

送京西提點刑獄張駕部

太華之松千歲青嘗聞其下多茯苓地靈山秀草木異往往變化爲人形神仙不欲世人採覆以雲氣常冥冥臺即何年一作處得真訣服餌既久毛骨清汝陽昔見今十載丹顏益少方瞳明郡齋政成罇俎樂高談日接無俗情詔書忽下褒美績使車朝出行屬城職清事簡稱雅一作高意叢書古篋一作靈丸蒲筒晨裝輕洛陽花色笑春日錦衣晝歸閭里驚自云就欲一作欲就謝官去烏紗白髮西臺卿他年我一作茲亦老蒿少願乞仙粒分餘馨

贈杜默一本注云默師太學先生石守道介

南山有鳴鳳其音和且清鳴於有道國出則天下平杜默東土秀能吟鳳凰聲作詩幾百篇長歌仍短行攜之入京邑欲使衆耳驚來時上師堂再拜辭先生先生領首遣教以勿驕矜贈之二豪篇而我濫一名杜子來訪我欲求相和鳴顧我文字卑未足當豪英豈如子之辭鏗鏗間鏞笙淫哇俗所樂百鳥徒一作方嚶嚶杜子卷舌去歸衫翩以輕京東聚羣盜河北點新兵飢荒與愁苦道路日以盈子盍引其吭發聲通下情上聞天子聰次使宰相聽何必九包禽始能端一作鳴堯庭子詩何時作我耳久已傾願以白玉琴寫之朱絲繩

送呂夏卿夏卿父造字公初有名進士也一本云送呂先輩赴端州高要尉

使吾尚幼學弄筆羣兒爭誦公初文嗟我今年已白髮公初相見猶埃塵傳家尚喜有二子始知靈珠出淮濱一作海濱一作淮濱去年束書來上國欲以文字驚衆人驚駭羣馬斂足避天衢讓路一作騰踏先駢麟尚書禮部奏高第斂衣襍視趨嚴宸曠曠春日轉黃傘藹藹賦筆擲青雲我時寓直殿廡外衆中迎子笑以忻明朝一作晨失意落人後我爲沮氣羞出門得官高要幾千里猶幸海遠一作遠海無惡氛英英帝國多鸞鳳一作鳳上下羽翼何續紛期子當呼丹山鳳爲瑞相與來及羣

憶山示聖俞

吾思夷陵山山亂不可究東城一埃餘高下漸岡阜羣峯迤邐接四顧無前後憶嘗祗吏役鉅細悉經觀是時秋卉紅嶺谷堆纈繡林枯松鱗皴山老石脊瘦斷徑履頽崖孤泉聽清溜深行得平川古俗見耕耨澗荒鶯聲奔日出飛雉雉盤石屢歌眠綠巖堪解綬幽尋嘆獨往清興思誰侑其西乃三峽峻怪愈奇富江如自天傾一作瀉岸立兩崖鬪黔巫望西屬越嶺通南秦時時懸樓對雲霧昏白晝荒烟下牢戍百仞寒溪激蝦蟇噴水簾甘液勝飲酎亦嘗到黃牛泊舟聽猿狄巉巖起絕壁蒼翠非刻鏤陰崖下攢叢岫穴穹空透遙岑聳孤出可愛欣欲就惟思得君詩古健寫奇秀今來會京師車馬逐塵齏頽冠各白髮舉酒無情袖繁華不可幕幽賞亦難違徒爲憶山吟耳熱助嘲詬

送唐生一本作送唐秀才歸永州

京師英豪域車馬日紛紛唐生萬里客一影隨一身出無車與馬但路車馬塵日食不自飽讀書依主人夜夜客枕夢一作冷北風吹孤雲翩然動歸思旦夕來叩一作叩我門終年少人識逆旅一作旅意

惟我親來學婉道一作賦贈歸慚一作嗟囊貧勉之期不止多獲
由力耘指家大嶺北重湖浩無垠飛鷹不可到書來安得一作能頻

送任處士歸太原時天兵方討趙元昊

一虜動邊陲用兵三十萬天威豈不嚴賊首猶未獻自古王者師有
征而不一一作無戰勝敗繫人謀得失由廟筭是以天子明咨詢務周
徧直欲採奇謀不為人品限公車百千輩下不遺僕賤况於儒學者
延納宜無間如何任生來三月不得見方茲急士時論擇豈宜慢任
生居太原白首勤著撰閉戶不求聞忽來誰所薦人賢固當用舉繆
不加譴一作賢固當用舉繆亦不加譴賞罰兩無文是非奚以辨遂
令拂衣歸安使來者勸一本作其餘苟盡然所責胡由辨兩句嗟吾
筆與舌非職不敢諫

聖俞會飲時聖俞赴湖州一本作送梅堯臣赴湖州

傾壺豈徒量君飲解帶且欲留君談洛陽舊友一時散十年會合無
二三京師早久塵土熱忽值晚雨涼纖纖一作靈靈滑公井泉釀最
美赤泥印酒新開緘更吟君句勝啜禽杏花妍媚春酣酣君詩有春
風酣酣杏正妍之句吾交豪俊天下選誰一作難得衆美如君兼一
本有鏗鏘文律金玉寫森羅武庫戈戟鉞兩句詩工鐫刻露天骨將
論縱橫輕玉鈐遺編最愛孫武說往往曹杜遺夷艾關西幕府一作
下不能辭隴山一作西敗一作大將死可慚嗟余身賤不敢薦四十
白髮猶青衫吳興太守詩亦好往一作助奏玉瑄和英咸盃行到手
莫辭醉明日一作發舉棹天東南

送胡學士知湖州一本云送胡宿武平學士

武平天下才四十滯鉛槧忽乘使君舟歸榜一作榜不可纜都門春
漸動柳色綠將暗掛帆千里風水闊江濤澹吳興水精宮樓閣在寒
鑑橘柚秋苞繁為程春食醞清談越客醉屢舞吳娘豔寄詩毋憚煩
一作煩以慰離居念

哭一作弔石曼卿

嗟我識君晚君時猶壯夫信哉天下奇落落不可拘軒昂懼驚俗自
一作以隱酒之徒一飲不計斗傾河竭岷嶺作詩幾百篇錦組聯環
琚時時出險語意外研精籟窮奇變雲烟搜怪蟠蛟魚詩成多自寫
筆法頗與虞旋弃不復惜所存今幾餘往往落人間藏之比明珠又
好一作愛題屋壁虹霓隨卷舒遺蹤處處在餘墨潤不枯胸山頃歲
出我亦斥江湖垂離一作廢四五載人事忽焉一作有殊歸來見京
師心老貌已癯但驚何其衰豈意今也無才高不少下關若與世疎
驛驢當少時其志萬里塗一旦老伏櫪猶思玉山芻天兵宿西北狂
兒尚稽誅而今壯士死痛惜無賢愚歸魂渴上田露草荒春蕪

送曇穎歸廬山

吾聞廬山久欲往世俗拘昔歲貶夷陵扁舟下江湖八月到湓口停
帆望香爐香爐雲霧間杳靄疑有無忽值秋日明彩翠淨空虛信哉
奇且秀不與濤霍俱偶病不得往中流但踟躕今思尚髣髴恨不傳
畫圖曇穎十年舊風塵客京都一旦不辭訣飄然卷衣一作長裾山
林往不返古亦有吾儒西北苦兵戰江南仍旱枯新秦又攻寇京陝
募兵夫聖君念蒼生賢相思良謨嗟我無一說朝紳拖舒舒未能膏
鼎鑊又不老菰蒲羨子識所止雙林歸結廬

送孔秀才遊河北

吾始未識子但聞揚公賢及子來叩門手持贈子篇賢愚視所與不
待交子一作傳交一言子文諧律呂子行潔琅玕行矣慎所遊惡草
能敗蘭

送黎生下第還蜀

黍離不復雅孔子修春秋扶王貶吳楚大法加諸侯妄儒泥於魯甚
者云黜周大旨既已矣安能討一作計源流遂令學者迷異說相交
鉤黎生西南秀挾策來東遊一作州有司不見採春霜滑歸騎自云

喜三傳力一作方欲探微幽凡學患不彊苟至將焉度聖言簡且直
慎勿迂其求經通道自明下筆如戈矛一敗不足卹後功掩前差

居士集卷第一

Blank writing area with vertical lines.

古詩二十首

送楊闢秀才

吾奇會生者始得之太學初謂獨軒然百鳥而一鶚既又得楊生羣
獸出麟角乃知天下才所識慚未博楊生初誰師仁義而禮樂天姿
樸且茂美不待追琢始來讀其文如渴飲醴一作醴醴既坐即之談
稍稍吐鋒鏑非唯富春秋固已厚天爵有司選羣材繩墨困量度胡
爲謹毫分而使遺磊落至寶異常珍夜光驚把握駭者弄諸塗竊拾
充吾囊其於獲二生厥價玉一較嗟吾雖得之氣力獨何弱帝閣啓
巖巖一作巖巖欲獻前復却遽令扁舟下飄若吹霜揮世好競辛鹹
古味殊淡泊一作薄否泰理有時惟窮見其確

送孔生一本生作監簿再遊河北

志士惜白日高車無停輪孔生東魯儒年少勇且仁大軸獻理賦長
裾弊街塵門無黃金聘家有白髮親寒風八九月北渡大天津玉塞
積精甲金戈耀秋雲孔生力數斗其智兼千人短褐不自暖高談吐
陽春北州多賢侯待一作得士誰最勤一見贈雙璧再見延上賓丈
夫患不遇豈患長賤貧

送慧勤歸餘杭

越俗僭宮室傾貨事雕牆佛屋尤其侈耽耽擬侯王文彩瑩丹漆四
壁金焜煌上懸百寶蓋宴坐以方牀胡爲弃不居棲身客京坊辛勤
營一室有一作乃類蕭梁南方精飲食菌一作菌笋鄙羔羊飯以
玉粒粳調之甘露漿一饌費千金百品羅成行農興未飯僧日昃不
敢嘗乃茲隨北客枯粟充飢腸東南地秀絕山水澄清一作鮮光餘
杭幾萬家日夕焚清香烟霏四面起雲霧雜芬芳豈如車馬塵鬢髮
染成霜三者孰苦樂子奚一作令勤四方乃云慕仁義奔走不自違
始知仁義力可以治膏盲有志誠可樂一作嘉及時宜自彊人情重

懷土飛鳥思故鄉夜枕聞北鴈歸心逐南檣歸兮能來否送子以短
章

讀張李二生文贈一本作謝張續李常寄石先生先生石介

先生二十年東魯能使魯人皆好學其間張續與李常剖珉石一
作如剖珉石一作如剖衆石得天璞大圭雖不假雕琢一作鑄但未
磨礪出圭角二生固是天下寶豈與先生私楮囊先生示我何矜誇
手攜文編謂新作得之數日未暇讀意欲百事先一作前屏却夜歸
獨坐南窗下寒燈青熒如燭燭病眸昏澁乍開緘燦若月一作日星
明錯落辭巖意正質非俚一作高且簡古味雖淡醇不薄千年佛老
一作若佛賊中國禍福依憑羣黨惡拔根掘窟期必盡有勇無前力
何筭乃知二子果可用非獨詞一作特言堅由志確朝廷清明天子
聖陽德彙進羣陰剝大烹養賢有列一作味別鼎豈久師門共藜藿
一作有先生在魯魯皆化苟用於朝其利博兩句又一本在作居朝
作時子一作我慚職諫未能薦有酒且慰先生酌

絳守居園池

嘗聞紹述絳守居偶來覽登一作登覽周四隅異哉樊子恠可吁心
欲獨出無古初窮荒搜幽入有無一作無有一語詰曲百盤紆孰云
己出不剽襲句斷欲學盤庚書一本有方言爾雅不訓詰幾欲否譯
從象胥兩句荒煙古木蔚遺墟我來嗟祗一作止得其餘柏槐端莊
偉丈夫蒼顏鬱鬱老不枯靚容新麗一何殊清池翠蓋擁紅蕖胡髯
虎搏豈足道記錄細碎何區區慮氏八卦畫河圖禹湯臯虺一作陶
暨唐虞豈不古奧萬世模嫉世狡巧一作好習卑汙以奇矯薄駭羣
愚用此猶得追韓徒我思其人爲躊躇作詩聊謔爲坐娛

晉祠一本作過并州晉祠泉

古一作故城南出十里間鳴渠夾路一作石渠夾道何潺潺行人望

祠下馬謁退即祠下窺水源地靈草木得餘潤鬱鬱古一作松柏舍
蒼烟并兒自古事一作重豪俠戰爭五代幾百年天開地闢真主出
猶須再駕方凱旋頑民盡遷高壘削秋草自綠埋空垣一作自綠空
塞垣并人昔遊晉水上清鏡照耀涵朱顏晉水今入并州裏稻花漢
漢澆平田廢與鬻鬻無舊一作故老氣象寂寞餘山川惟存祖宗聖
功業干戈象舞被管絃我來覽登一作登覽為歎息暫照白髮臨清
泉鳥啼人去廟門闔還有山月來娟娟

登絳州富公嵩亭示同行者

羣峯擁軒檻竹樹陰漠漠公胡苦思山規構自心作惟予一作予亦
愛山者初仕即京洛嵩峯三十六終日對高閣陰晴無朝暮紫氣常
浮泊雄然九州中氣象壓寥廓亦嘗步其巔培樓視一作觀四岳其
後竄荆蠻始識峽山惡長江瀉天來巨石忽開拓始疑茫昧初渾沌
死鑄鑿神功夜催就萬仞成一作或一削尤奇十二峯隱見入冥窺
人蹤斷攀緣異物宜所託顧瞻但徘徊想像逢綽約嵩山近可愛泉
石吾已諾終朝友幽人白首老雲壑荆巫惜還荒詭恠香難逸至今
清夜思魂夢輒飛愕偶來玩茲亭塵眼刮昏膜况逢秋雨霽濃翠新
染濯峯端上明月且可留幽酌

水谷夜行寄子美聖俞一本題上有補成字

寒一作晨雞號荒林山壁月倒掛披衣起視夜攬轡念行一作遐邁
我來夏云初素節今已屆高河瀉長空勢落九州外微風動涼襟曉
氣清餘睡一作色清餘睡緬懷京師友文一作有酒逸一作數高會
其間蘇與梅二子可畏愛篇章富縱橫聲價相磨一作磨蓋子美氣
尤雄萬駭號一憶有時肆顛狂醉墨洒霽滯管一作勢如千里馬一
作足已發不可殺盈前盡珠璣一一難東汰梅翁事清切石齒漱寒
瀨作詩三十年視我猶後一作後猶無輩文詞愈清新心意雖一作
難老大譬如妖韶女老自有餘態近詩尤古硬一作淡咀嚙苦難嚼

初如食橄欖真味久愈在蘇豪以氣轢一作傑舉世徒一作盡驚駭
梅窮獨我知一作我獨奇古貨今難賣一作物今難買二子雙鳳凰
百鳥之嘉瑞雲烟一翺翔羽翮一摧鍛安得相從遊終日嗚嗚噉問
胡一作相問苦思之對酒把一作把酒對新蟹

病中代書奉寄聖俞二十五兄一本無奉及下四字

憶君去年來自越值我傳車催去闕是時新秋蟹正肥恨不一醉與
君別今年得疾一作別病因酒作一春不飲氣彌劣飢腸未慣飽甘
脆一作平生乍得飽甘肥九蟲寸白一作腹蟲不慣爭為擊一飽猶
能致身患寵祿豈無神所罰乃知賦子分有涯適分自然無天闕昔
在洛陽年少時春思每先花亂發萌芽不待楊柳動探春馬蹄常踏
雪到今年纔三十九怕見新花羞白髮顏侵塞下風霜色病過鎮陽
桃李月兵閑事簡居可樂心意自衰非屑屑日長天暖惟欲睡一作
眠睡美尤厭春鳩聒北潭去城無百步淥水冰銷魚撥刺經時曾未
著脚到好景但聽遊人說官榮雖厚世味薄始信衣纓乃羈絆故人
有幾獨思君安得見君憂暫豁公廚酒美遠莫致念君賈一作價飲
衣屢脫郭生書來猶未想到想見新詩甚飢渴少年事事今已去惟有
愛詩心未歇君閑可能為我作莫辭自書藤紙滑少低筆力容一作
留我和無使難追韻高絕

鎮陽殘杏一本有寄聖俞字

鎮陽二月春苦寒東風力弱冰雪頑北潭跬步病不到即常山宮後
池也州之勝游惟此何暇騎馬尋郊原鵬一作雁邱新晴暖已動砌
下流水來潄潄鴈邱水在州西十五里以長渠引走城中但聞簷間
鳥語變不覺桃杏開已闌人生一世浪自苦感衰桃杏開落間西亭
昨日偶獨到一作往往猶有一樹當南軒殘芳爛漫看更好皓若春雪
團枝繁無風已恐自零落長條可愛不可攀猶堪攜酒醉其下誰肯
伴我頽巾冠

班班林間鳩寄內

班班林間鳩穀命其匹迨天之未雨與汝勿相失春原洗新霽綠
 葉暗朝日鳴聲相呼和一作呼相諧應答如吹一作若呂應嘉律深
 棲柔桑暖下啄高田實人皆笑汝拙無巢以家室易安由寡求吾羨
 拙之佚吾雖有室家出處會不一一本有豈如鳴鳩樂天性免飛鳴
 兩句荆蠻昔窺逐奔走若鞭扶山川瘴霧深江海波濤颯跬步子所
 同淪弃甘共沒投身去人眼已廢誰復嫉山花與野草我醉子鳴瑟
 但知貧賤安不覺歲月忽還朝今幾年官祿露兒姪身榮貴愈重器
 小憂常溢今年來鎮陽留滯見春物北潭新漲涼魚鳥相擊恥魚乙
 切一作權聲遠我意不在春所憂空自咄一官誠易了報國何時畢
 高堂母老矣衰髮不滿櫛昨日寄書言新陽發舊疾藥食一作石子
 雖動豈若我在膝又云子亦病蓬首不加鬚書來本慰我使我煩憂
 鬱思家春夢亂妄意占凶吉却思夷陵囚其樂何可述前年辭諫署
 朝議不容乞孤思一許國家事豈復一作暇卸橫身當眾怒見者旁
 可慄近日讀除書朝廷更輔弼君恩優大臣進退禮有秩小人妄希
 旨論議爭操筆又聞說朋黨次第推甲乙而我豈敢逃不若先自劾
 上賴天子聖必未一作未必加斧鑕一身但得貶羣口息啾唧公朝
 賢彥衆避路一本作讓當揣質苟能因諫去引分思藏密還爾禽鳥
 性樊籠免驚怵子意其謂何吾謀今已必一本有誠思憂與樂便可
 齊升黜兩句子能一作如甘藜藿我易解簪紱嵩峯三十六蒼翠爭
 聳出安得攜子去耕桑老蓬華

暮春有感

幽憂無以銷春日靜愈長薰風入花骨花枝午低昂往來採花蜂清
 蜜未滿房春事已爛爛落英漸飄揚蝶無所為飛飛助其忙啼鳥
 亦屢變新音巧調篋遊絲最無事百尺拖晴光天工造化萬物感
 春陽我獨不知春久病臥空堂時節去莫挽浩歌自成傷

洛陽牡丹圖

洛陽地脈花最宜牡丹尤為天下奇我昔所記數十種於今十年半
 忘之開圖若見故人面其閒數種昔未窺客言一作云近歲花特異
 往往變出呈新枝洛人驚誇立名字買種不復論家賞比新較舊難
 一作莫優劣爭先擅價各一時當時絕品可數者魏紅窈窕姚黃妃
 壽安細葉開尚少一作早朱砂玉版人一作猶未知傳聞千葉昔未
 有只從左紫名初馳四十年間花百變最後最好潛溪緋今花雖新
 我未識未信與舊誰妍媸當時一作年所見已云絕豈有更好一作
 妍此可疑古稱天下無正色但恐世好隨時移輕紅鶴翎豈不美斂
 色如避新來姬何況遠說蘇與賀有類異世誇嬾施造化無情宜一
 概偏此著意何其私又疑人心愈巧偽天一作各欲關巧窮精微不
 然元化朴散久豈特近歲尤澆漓爭新一作先關麗若不已更後百
 載知何為但應新花日愈好惟有我老年年衰

鎮陽讀書

春深夜苦短燈冷焰不長塵蠹文字細病眸澁無光坐久百骸倦中
 遭羣慮戕尋前顧後失得一念一作而十忘乃知學在少老大不可
 彊廢書誰與語歎息自悲傷因憶石夫子徂徠有茅堂前年來京師
 講學居上庠青衫綴朝士而有一作乃奔數畝桑不耐羣兒喧束書
 歸故鄉却尋茅堂在高臥泰山傍聖經日陳前弟子羅兩廂大論叱
 佛老高聲一作言誦虞唐賓朋足棗栗兒女飽糟糠雖云待官闕便
 欲解朝裳有似蠶作繭縮身思自藏嗟我一何愚貪得不自量平生
 事筆硯自可娛文章開口攬時事論議爭煌煌退之嘗有云各聲暫
 羶香誤蒙天子知侍從列班行官榮日已寵事業闕不彰器小以一
 作而任大躋顛理之常聖君雖不誅在汝一作爾豈自違不能雖欲
 止悅一作恍若失其方却欲尋舊學舊學已榛荒有類邯鄲步兩失
 皆茫茫便欲乞身去君恩厚須償又欲求一州俸錢買歸裝譬如歸

巢鳥將棲少徊翔自覺誠未晚收愚老練細

留題鎮陽潭園

官雖鎮陽居身是鎮陽客北園潭上花安問誰所植春風無先後爛
漫爭紅白一花聊一醉盡醉猶須百而我病不飲對花空歎息朝來
不能歸暮看不忍摘謂言花縱落滿地猶可席不來纔幾時人事已
非昔芳枝結青杏翠葉新奕奕落絮風卷盡春歸不留迹空餘綠潭
水尚帶餘春色疑一作思春竟何之意謂追可得東西遶潭行蜂鳥
已寂寂惘然無所依歸駕不停輒寓興誠可樂留情豈非惑至今清
夜夢猶遠北潭北

讀一本有聖俞字蟠桃詩寄子美

韓孟於文詞兩雄力相當一本有偶以惟自戲作詩驚有崖兩句篇
章綴談笑雷電擊幽荒衆鳥誰一作不敢和鳴鳳呼其皇孟窮苦疊
疊韓富浩穰穰窮者啄其精富者爛文章發生一為宮擊斂一為商
二律雖不同合奏乃鏘鏘天之產奇恠希世不可常寂寥二百年至
寶埋無光郊死不為島聖愈發其藏患世愈不出孤吟夜號一作夜
號清霜霜寒入毛骨清響哀一作乃愈長玉山禾難熟終歲苦飢腸
我不能飽之更欲不自量引吭和其音力盡猶勉彊一本有嗟我於
韓徒足未及其壻而子得並骨英靈空北邙四句誠知非所敵但欲
繼前芳近者蟠桃詩有傳來北方發我衰病思藹如得春陽忻然便
欲和洗硯坐中堂墨筆不能下况况一作恍恍若有亡老難斮爪硬
未易犯其場不戰先一作輒自知雖奔一作然未甘降更一作便欲
呼子美子美隔濶江其人雖憔悴其志獨軒一作昂昂氣力誠當對
勝敗可交相安得二子接揮鋒兩交銜我亦願助勇鼓旗讓其旁快
哉天下樂一醕宜百觴乖離難會合此志何由償

初伏日招王幾道小飲

北園數畝官墻下嗟我官居如傳舍濶池北渡馬踏一作歸冰西山

病歸花已謝落英不見空繞樹細草初長猶可藉空園一鎖不復窺
不覺芳蹊繁夏夏隔墻時時聞好鳥如得嘉一作佳客聽清話今朝
試去繞園尋綠李橫枝礙行馬蒲萄憶見初引蔓翠葉陰一作成陰
還滿架紅榴一作榴花最晚子已繁猶有殘花藏葉罅一本有雖無
桃李競繁華固有竹相資瀟瀟雨雨句人生有酒復何求官事無了須
偷暇古云伏日當早歸况今著令許休假能來解帶相就飲為子掃
月開風樹

白髮喪女師作一本無下四字

吾年未四十三斷哭子腸一割痛莫忍屢痛誰能當割腸痛連心心
碎骨亦傷出我心骨肉灑為清淚行淚多血已竭毛膚冷無光自然
鬚與鬢一作鬚與鬢未老先蒼蒼

永陽大雪

清流關前一尺雪鳥飛不渡人行絕冰連一作近谿谷麋鹿死風勁
野田桑柘折江淮卑濕殊北地歲不苦寒常疫癘老農自言身七十
曾見此雪纔三四新陽漸動愛日輝微和習習東風吹一尺雪幾尺
泥泥深麥苗春始肥老農爾豈知帝力聽我歌此豐年詩

送童生東歸

窮山一作廬荒僻人罕顧子以一身千里來問子之勤何所欲自慚
報子無瓊瑰非徒多難學久廢世事漸懶由心哀吳興先生富道德
侏侏弟子皆賢材鄉閭禮讓已成俗餘風漸被來江淮子年方少力
可勉往與夫子為顏回

居士集卷第二

古詩三十一首

啼鳥

窮山候至陽氣生百物如與時節爭官居荒涼草樹密擦亂紅一作
 亂紅殿紫開繁英花深葉暗輝朝日一作一暖來鳥皆嚶鳴鳥言
 我豈解爾意綿蠻但愛聲可聽南窗睡多春正美百舌未曉催天明
 黃鸝顏色已可愛舌端啞啞如嬌嬰竹林靜啼一作啼盡青竹笋深
 處不見惟聞聲陂田遠郭白水滿戴勝穀穀催春耕誰謂鳴鳩拙無
 用雄雌各自知陰晴雨聲蕭蕭泥滑滑草深苔綠無人行獨有花上
 提葫蘆勸我沽酒花前傾其餘百種各嘲啗異鄉殊俗難知名我遭
 讒口身落此每聞巧舌宜可憎春到山城苦寂寞把盞常恨無娉婷
 花開為語輒自醉醉與花鳥為交一作友朋花能嬌然顧我笑鳥勸
 我飲非無情身閑酒美惜光景惟恐為散花飄零可笑靈均楚澤畔
 離騷憔悴愁獨醒

遊瑯琊山

南山一尺雪雪盡山蒼然澗谷深自暖梅花應已繁使君厭騎從車
 馬留山前行歌招野叟共步青林間長松得高蔭盤石堪醉眠止樂
 聽山鳥攜琴寫幽泉愛之欲忘返但苦世俗牽歸時始覺遠明月高
 峯巔

讀徂徠集

徂徠魯東山石子居山阿魯人之所瞻子與山嵯峨今子其死矣東
 山復誰過精魄已埋沒文章豈能磨壽命雖不長所得固已多舊業
 偶自錄滄溟之一蠹其餘誰付與散失存幾何存之警後世古鑑照
 妖魔予生誠多難憂患靡不懼音羅官學二十年六經老研摩問胡
 所專心仁義邱與軻揚雄韓愈氏此外豈知他尤勇攻佛老奮筆如
 揮戈不量敵衆寡膽大身么麼往年遭母喪泣血走岷峨垢面跣雙

足鋤犂事田坡至今鄉里化孝悌勤蠶禾昨者來太學青衫踏朝靴
 陳詩頌聖德厥聲續猗那羔鴈聘黃晞晞驚走鄰家施為可怪駭世
 俗安委蛇誇口由此起中之若飛梭上賴天子聖不挂網者羅憶在
 太學年大雪如翻波生徒日盈門飢坐列鴈鷺絃誦聒鄰里唐虞虞
 詠歌常續最高第翫游各名科豈止學者師謂宜國之瞻天壽反仁
 鄙誰尸此偏頗不知敬敬者又忍加詆訶聖賢要久遠毀譽暫諱
 生為舉世疾死也一作者魯人嗟作詩遺魯社祠子以為歌

大熱二首

四時成萬物寒暑迭鈞陶壯陽當用事大夏蒸炎歊造化本無情怨
 咨徒爾勞身微天地闊四顧無由逃九門闔闔開萬仞崑崙高積雪
 寒凜凜清風吹寥寥嗟我雖欲往而身無羽毛

陽暉燦四野萬里纖雲收羲和困路遠正午當空留枝條不動影草
 木皆含愁深林虎不嘯臥喘如吳牛蝴蝶一何微嗟爾徒啾啾

幽谷泉

踏石弄泉流尋源入幽谷泉傍野人家四面深篁竹漑稻滿春疇鳴
 渠遠茅屋生長飲泉甘蔭泉栽美木潺湲無春冬日夜響山曲自言
 今白首未慣逢朱轂顧我應可怪每來聽不足

百一作柏子坑賽龍

嗟龍之智誰可拘出入變化何須與壇平樹古潭水黑沉沉影響疑
 有無四山雲霧忽晝合營起直上擎空虛龜魚帶去半空落雷鞠電
 走先後驅傾崖倒澗聊一戲頃刻萬物皆涵濡青天却掃萬里靜但
 見綠野如雲敷明朝老農拜潭側鼓聲坎坎鳴山隅野巫醉飽廟門
 闔狼藉烏鳥爭殘餘

憎蚊

擾擾萬類殊可憎非一族甚哉蚊之微豈足汗簡牘乾坤量廣大善
 惡皆含育荒茫一作荒三五前民物交相躡禹鼎象神姦蛟龍遠潛

伏周公驅猛獸人始居川陸爾來千百年天地得清肅大患已云除
 細微遺不錄蠅蠹蚤虱蟻蜂蝎蛇蝮惟爾於其間有形纔一粟雖
 微無奈衆雖小難防毒嘗聞高郵間猛虎死凌辱良哉露筋女萬古
 雖不復水鄉自宜爾可怪窮邊俗晨食下惟憐感暑泥駒橫我來守
 窮山地氣尤卑溽官閑懶所便惟睡官偏足難堪爾類多枕席厭緣
 撲燻簷一作之苦烟埃燎壁疲照燭荒城繁草樹旱氣飛炎燭羲和
 驅日車當午不轉穀清風得夕涼如赦脫囚桎掃庭露青天坐月蔭
 嘉木汝寧無他時一作日忍此見一作見此迫促期期伺昏黑稍稍
 出壁屋填空來若翳聚隙多可掬叢身疑陷圍聒耳如遭哭猛攫欲
 張拳暗中甚一作疑飛鏃手足不自救其能營背腹盤冷勞扇拂立
 寐僵僮僕端然窮百計還坐瞑雙目於吾固不較在爾誠爲酷誰能
 推物理無乃乖人欲駟虞鳳皇麟千載不一矚思之不可見惡者無
 由逐

重讀徂徠集

我欲哭石子夜開徂徠編開編未及讀涕泗已連連勉盡三四章收
 淚輒忻懼切切一作昭昭一作昭晰善惡戒丁寧仁義言如聞子談
 論疑子立我前乃知長在世誰謂已一作子沉泉昔也人事乖相從
 常苦艱今而每思子開卷子在顏我欲貴子文刻以金玉聯金可燦
 而銷玉可碎非堅不若書一作傳以紙大經皆紙傳但當書百本一
 作傳十以爲百傳百以爲千或落於四夷或藏在一作於深山待彼
 謗焰一作蠱燄放此光芒懸人生一世中長短無百年無窮在其後
 萬世在其先得長多幾何得短未足憐惟彼不可朽名聲文行然議
 誣不須辨亦止百年間百年後來者憎愛不相緣公議然後出自然
 見熾妍孔孟困一生毀逐遭百端後世苟不公至今無聖賢所以忠
 義士恃此死一作輕死此不難當子病方革謗辭正騰喧衆人皆欲
 殺聖主獨保全已埋猶不信僅免斲其棺此事古未有每思輒長歎

我欲犯衆怒爲子記此冤下紆冥冥忿仰叫昭昭天書於蒼翠石立
 彼崔嵬顛詢求子世家恨子兒女頑經歲不見報有辭未能銓一作
 註忽開子遺文使我心已寬子道自能久吾言豈須鑄

汝嬰答仲儀

君嗟汝嬰多誰謂汝土惡汝嬰雖云苦汝民居自樂鄉閭同飲食男
 女相媒灼習俗不爲嫌譏嘲豈知性汝山西南險平地猶磽确一作
 确拳一作磚簪一作确斲汝樹生擁一作羶腫根株浸溪壑山川固
 已然風氣宜其濁接境化襄鄧餘風被伊雒思子昔曾遊所見可驚
 愕嗶嗶聞語笑纍纍滿城郭偃婦懸瓊盎嬌嬰包卵敷無由辨肩頸
 有類龜縮殼噫人粟最靈反不如鳧鶴駢枝雖形累小小固一作故
 可略癘瘍暫蓄聚決潰終當涸贅疣附支體幸或不爲虐未若此窺
 然所生非所託咽喉繫性命鉞石難砭一作破削農皇古神聖爲世
 名百藥豈不有方書頑然莫銷燦一作鑠温湯汝靈泉亦不能涸淪
 君官雖謫居政可瘳一作瘳民瘼奈何不哀憐而反恣詞一作嘲謔
 文辭聘新工醜怪極名貌汝士雖多奇汝女少纖弱翻思太守宴誰
 與唱清角乖離南北殊魂夢山波遞握手未知期寄詩一作書聊一
 噱

滄浪亭

子美寄我滄浪吟邀我共作一作賦滄浪篇滄浪有景不可到使我
 東望心悠然荒灣野水氣象古高林翠阜相回環新篁抽笋添夏影
 一作景老柁亂發爭春妍水禽閑暇事高格山鳥日夕相啾喧不知
 此地幾興廢仰視喬木皆蒼煙堪嗟人迹到不遠雖有來路會無緣
 窮奇極怪誰似子搜索幽隱探神仙初尋一徑入蒙密豁目異境無
 窮邊風高月白最宜夜一片鑿淨鋪瓊田清光不辨水與月但見空
 碧涵漪連一有姑蘇臺邊人舉絕夜靜在在聞鶯燕兩句清風明月
 本無價可惜抵賣四萬錢又疑此境一作景天乞與壯士憔悴天應

憐鷓夷古亦有獨往江湖波濤翻天崎嶇世路欲脫去反以身試
蛟龍淵豈如一作知扁舟任飄瓦紅渠綠浪搖醉眠丈夫身在豈長
弃新詩美酒一作詩新酒美聊窮年雖然不許俗客到莫惜佳句人
間傳

寶劍

寶劍匣中藏暗室夜常一作尚明欲知天將雨鋒爾劍有聲神龍本
一物氣類感則鳴常恐躍匣去有時暫開鑄疑止當作屬煌煌七星
文照耀三尺冰此劍在人間百妖夜夜收形姦兇仗媚膽破骨亦驚
試以向星月飛光射攙搶藏之武庫中可息天下兵奈何狂胡兒尙
敢邀金繒

秋晚凝翠亭探韻作

黃葉落一作落葉滿空城青山遶官解風雲淒已高歲月驚何邁陂
田寒未收野水淺生派晴林紫榴坼霜日紅梨曬蕭疎喜竹勁寂寞
傷蘭敗叢菊如有情幽芳慰孤介嘉客日可攜寒醅美新醅音價登
臨無厭頻冰雪行即屆

菱溪大一本無大字石

新霜夜落秋水淺有石露出寒溪溪根苔昏土蝕禽鳥啄出沒溪水秋
復春溪邊老翁生長見疑我來視何殷動愛之遠徙向幽谷曳以三
犢載兩輪行穿城中罷市看但驚可怪誰復珍荒烟野草埋沒久洗
以石竇清冷泉朱欄綠竹相掩映選一作邀致佳處當南軒南軒旁
列千萬峯曾未有此奇嶙峋乃知異物世所少萬金爭買傳幾人山
河百戰變陵谷何爲落彼荒溪濱山經地誌不可究遂令異說爭紛
紜皆云女媧初鍛鍊融結一氣凝精純仰視蒼蒼補其缺染此紺碧
瑩且温或疑古者燧人氏鑽以出火爲炮燔苟非神聖親手迹不爾
孔竅一作穴誰雕剜又云漢使把漢節西北萬聖窮崑崙行經于闐
得寶玉流入中國隨河源沙磨水激自穿穴所以鑄鑿無瑕痕嗟予

有口莫能辨嘆息但以兩手捫盧仝韓愈不在世彈壓百怪無雄文
爭奇鬪異各取勝遂至荒誕無根原天高地厚靡不有一作有定醜
好萬狀奚足論惟當掃雪席其側日與嘉客陳清醴

送姜秀才遊蘇州

憶從太學諸生列我尙弱齡君秀發同時並薦幾存亡一夢十年如
倏忽壯心君未減青春多難我今先白髮山花撩亂鳥綿蠻更盡一
罇明日別

送孫秀才

高門煌煌燦如精勢利聲名爭借假一作假借嗟哉子獨不顧之訪
我千山一羸馬明珠渡水覆舟失贈我璣貝猶滿把生攜文數十篇
見訪渡江而失遲遲顧我不欲去問我無窮慚報夏時之所弃子獨
嚮無乃與世異取捨

新霜二首

天雲慘慘秋陰薄臥聽北風鳴屋角平明鷺鳥四散飛一夜新霜羣
木落南山鬱鬱舊可愛千仞巉巖如刻削林枯山瘦失顏色我意豈
能無寂寞衰顏得酒猶暄發可醉豈須嫌酒濁泉傍菊花芳爛漫短
日寒輝相照灼無情木石尙須老有酒人生何不樂

荒城草樹多陰暗日夕霜雲意濃淡長淮漸落見洲渚野潦初清一
作晴收嫩澗蘭枯蕙死誰復弔殘菊籬根爭豔豔青松守節見臨危
正色凜凜不可犯芭蕉支荷不足數狼藉徒能污池檻時行收斂歲
將窮冰雪嚴凝從此漸啣兒女感時節愛惜朱顏厚窺鑑惟有壯
士獨悲歌拂拭塵埃磨古劍

豐樂亭小飲

造化無情不擇物春色亦到深山中山桃溪杏少意思一作有誰顧
自趁時節開春風看花遊女不知醜古粧野態爭花紅人生行樂在
一作當勉強有酒莫負瓊瓏鍾主人忽笑花與人嗟爾自是花前翁

四月九日幽谷見緋桃感開

經年種花滿幽谷花開不暇把一卮一作枝人生此事尙難必況欲
功名書鼎彝深紅淺紫看雖好一作美顏色不奈東風吹緋桃一樹
獨後發意若待我留芳非清香嫩藥含不吐日日怪我來何遲無情
草木不解語向我有意偏依依羣芳落盡始爛熳榮枯不與衆豔隨
念花意厚何以報唯有醉倒花東西感開比落猶數日清一作芳罇
尙可三四攜

秋懷二首寄聖俞一本擬孟郊體秋懷

孤管叫秋月清砧韻霜風天涯遠夢歸一作歸遠夢驚斷山千重羣
物動已息百憂感從中日月矢雙流四時環無窮陰陽老物摧折
壯士胸壯士亦何爲素絲悲青銅

羣木落空原南山高龍從巉巖想詩老瘦骨寒愈聳詩老類秋蟲吟
秋聲百種披霜一作芳撥孤英泣古弔荒冢現玕叩金石清響聽生
悚何由幸見之使我潸煩冗飛鳥下東南音書無日捧

希真堂東一本無東字手種菊花十月始開

當春種花唯恐遲我獨種菊君勿謂春枝滿園爛張錦風雨須臾落
顛倒看多易厭情不專鬪紫誇紅隨俗好豁然高秋天地肅百一作
萬物衰零誰暇弔君看金盞正芬敷曉日浮霜相照耀一本有後時
草與作栢榮媚世不爭桃李笑兩句煌煌正色秀可餐藹藹清香寒

愈峭高人避喧守幽獨淑女靜一作觀容修一作羞窈窕方當搖落
看轉佳慰我寂寥何以報時攜一罇相就飲如得貧交論久要我從
多難壯心衰迹與世人殊靜躁種花勿一作不種兒女花老大安能
逐年少

拒霜花

芳菲能幾時顏色如自愛鮮鮮弄霜曉裊裊含風態蕙蘭頌秋香桃
李媚一作嬌春醉時節雖不同感衰終一致莫笑黃菊花離根守惟

悴

懷嵩樓晚飲示徐無黨無逸一本作奉和徐生見示懷嵩樓
晚飲一本無見示字

滁山不通車滁水不載舟舟車路所窮嗟誰肯來遊念非吾在此二
子來何求不見忽三年見之忘百憂問其別後學初若繭緒抽縱橫
漸組織文章爛然浮引伸無窮極卒斂以軻邱少進日如此老退誠
可羞弊邑亦何有青山遠城樓冷冷谷中泉吐溜彼一作被山幽石
醜駭溪怪天奇瞰龍湫子初如可樂久乃歎以飲云此譬圖畫暫看
已宜收荒涼一作村草樹間暮館南城陬破屋仰見星窗風冷如鏤
歸心中夜起輾轉臥不周我爲辦酒肴羅列蛤與蚌酒酣微探之仰
笑不領頭曰予非此儂又不負譴尤自非世不容安事此爲凶幸以
主人故崎嶇幾摧斲一來勤已多而况欲久留我語頓遭屈顏慚汗
交流川塗冰已壯一作霜雪行將稠羨子兄弟秀雙鴻翔高秋噫
噫飛且鳴歲暮憶南州飲子今日歡重我明日愁來既辱已厚贈言
媿非酬

瑯琊山大題一本作山中大題在云瑯琊山中

歸雲洞

洞門常自一作似起烟霞洞穴傍穿透谿谷朝看石上片雲陰夜半
山前春雨足

瑯琊谿

空山雪消谿水漲遊客渡谿橫古槎不知谿源來遠近但見流出山
中花

石屏路

石屏自倚浮雲外石路久無人跡行我來攜酒醉其下臥看千峯秋
月明

班春亭

信馬尋春踏雪泥醉中山水弄清輝野僧不用相迎送乘興閑來興盡歸

庶子泉

庶子遺蹤留此地寒露徒倚弄飛泉古人不見心可見一片清光長皎然

惠覺方丈

青松行盡到山一作松門亂峯深處開方丈已能宴坐老山中何用聲名傳海上

居士集卷第三

居士集卷第四 集四

古詩二十四首

贈無為軍李道士二首名景山

無為道士三尺琴中有萬古無窮音音如石上瀉流水瀉之不竭由源深彈雖在指聲在意聽不以耳而以心意既得形骸忘不覺天地白日愁雲陰

李師琴紋一作形如臥蛇一彈使我三吞嗟五音商羽主肅殺颯颯坐上風吹沙忽然黃鍾回暖律當冬草木皆萌芽郡齋日午公事退荒涼樹石相交如李師一彈鳳凰聲空山百鳥停嘔啞我怪李師年七十面目明秀光如霞問胡以然一作試問胡胡然笑語我慎勿辛苦求丹砂惟當養其根自然輝其華一本無上二句又云理身如理琴正聲不可干以邪我聽其言未云足野鶴何事還思家抱琴揖我出門去獵獵歸袖風中斜

拜教一作勅

拜教一作勅古州南山火明烈烈州人共喧喧兩非扶白髮丁寧天語深曠蕩皇恩闕乃知天地施幽遠無間別欣欣草木意喜氣消殘

雷

彈琴效買島體

古人不可見古人琴可彈彈為一作琴間古曲聲如與一作聞古人言琴聲雖可聽琴意誰能論橫琴置牀頭當午曛背眠夢見一丈夫嚴嚴古衣冠登牀取之坐一作我琴調作南風絃一奏風雨一作南來再鼓變雲烟鳥獸盡嚶鳴草木亦滋蕃乃知太古時未遠可追還方彼夢中樂心知口難一作難口傳既覺失其人起坐涕洟瀾

酬學詩僧惟晤

詩三百五篇作者非一人羈臣與弃一作幾委桑濮乃淫奔其言苟一作或可取瓊雜不全純子雖一作之為佛徒未易廢其言其言在

合理但懼學不臻子佛一作之與吾儒異轍難同輪一作共轡子何獨吾慕自忘夷其身苟能知所歸固有路自新誘進或可至拒之賊不仁維詩於文章太山一浮塵又如古衣裳組織一作繡爛成文捨其裁剪餘未識衮服尊嗟子學雖一作已勞徒自苦骸筋一作自遠涉江津勤動袖卷軸一歲三及門惟一作何求一言榮歸以耀一作輝其倫與夫榮其庸不若啓一作豈若習其源韓子亦嘗謂收斂加

一作以冠巾

別後奉寄聖俞二十五兄一本作飲別寄聖俞兼酬進道堂

夜話見寄之作

長河秋雨多夜插寒潮一作潮入歲暮孤舟遲客心飛鳥急君老志卑窮文字或綴緝余生苦難厄一作拙世險蹈已習離合二十年乖睽多聚集常時飲酒別今別輒飲泣君曰吾老矣不覺兩袖濕我年雖少君白髮已揖揖即入反憶初京北門送我馬暫立自茲遭權弄一落誰引汲顛危偶脫死藏鼠甘自繫一作繫但令身尚在果得手重執聞來喜迎前貌改驚作揖別離纔幾時舊學廢百十殘章一作編與斷囊草草各收拾空窗一作堂語青燈夜雨聽戩戩一作戩戩

明朝解舟南路翼縱莫戢還期明月飲幸此中秋及酒酣弄篇章四坐困供給歡言正喧譁別意忽於邑日暮北亭上濁醪聊一作猶共挹輕一作歸橈動翻翻晚水明熠熠行心一作貪前去雖迫訣語出猶澁歸來錄君詩卷軸多幟幟誰一作雖云已老矣意氣何業衰惜哉方壯時千里足常帶知之莫子深力不足呼吸歎吁偶成篇聊用綴君什

紫石屏歌一本作月石硯屏歌寄蘇子美

月從海底來行上天東南正當天中時下照千丈潭潭心無風月不動倒影射入紫石巖月光水潔石瑩淨一作徹感此陰魄來中潛自從月入此石中天有兩曜分爲三清光萬古不磨滅天地至寶難藏

四二

緘天公呼雷公夜持巨斧鑿巖巖此一片落千仞皎然寒鏡在玉
匣蝦蟇白兔走天上空留桂影猶杉杉一作蒼蒼景山得之一作號
州刺史惜不得贈我意與一作比千金兼自云每到月滿時石在暗
室光出簷大哉天地間萬怪難悉談嗟予不度量每事思窮探欲將
兩耳目所及而與造化爭毫纖煌煌三辰行日月尤尊嚴若令下與
物爲比去聲擾擾萬類將誰瞻不然此石竟何物有口欲說嗟如鉗
吾奇一作如蘇子胸羅列萬象中包含不惟胸寬膽亦大屢出言語
驚愚凡自吾得此石未見蘇子心懷慚不經老匠先指決有手誰敢
施鑄錢呼工畫石持寄似一作此幸子留意其無謙

聚星堂前紫薇花

亭亭紫薇花向我如有意高烟晚溟濛清露晨點綴豈無陽春月所
得時節異靜女不爭寵幽姿如自喜音戲將期誰顧眄獨伴我憔悴
而我不強飲繁英行亦墜相看兩寂寞孤詠聊自慰

獲麟贈姚闢先輩

世已無孔子獲麟意誰知我嘗爲之說聞者未免非而子獨曰然有
如墳應箴惟麟不爲瑞其意乃可推春秋二百年文一作辭約義甚
夷一從聖人沒學者自爲師嶢嶢衆家說平地生嶮巖相訟益迂怪
各闢出新奇爾來千餘歲一作千載餘一作千歲餘舉世不知述悼
哉聖人經照耀萬世疑自從衆來說日月遭蔽虧常患無氣力掃除
浮雲披還其自然光萬物皆見之子昔已好古此經手常持超然出
衆見不爲俗牽卑近又脫賦一作賦格飛黃擺銜羈聖門開大道夷
路肆騰嬉便可勦衆說旁通一作異端塞多岐正途趨一作常簡易
慎勿事崑崎著述須待老積勳宜少時苟思垂後世大禹尚胼胝顧
我今老矣兩瞳一作目一作眼蝕昏眵大書難久視心在力已衰因
思少自奔今縱悔何追戒我以勉子臨文但吁噎

喜雨

大雨雖霧霽隔輒分晴陰小雨散浸淫爲潤廣且深浸淫苟不止利
澤何窮已無言雨大小一作言雨大小異小雨農尤喜宿麥已登實
新禾未抽秧一作穗及時一日雨終歲飽豐穰夜響流厥霖晨暉霽
蒼涼川原淨如洗草木自生光童稚喜瓜芋耕夫望陂塘誰云田家
苦此樂殊未央

飛蓋橋詠月一本題上有六月十四夜

天形積輕清水德本虛靜雲收風波止始見天水性澄光與粹容上
下相涵映乃於其兩間皎皎掛寒鏡餘暉所照曜萬物皆鮮瑩矧夫
人之靈豈不醒視聽而我於此時脩一作修然發孤詠紛昏洗滌
俯仰恣涵泳一本無上二句人心曠而閑月色高愈一作逾迴惟恐
清夜欄時時瞻斗柄

竹間亭

啾啾竹間鳥日夕相鳴嗚悠悠水中魚出入藻與萍水竹魚鳥家伊
誰作斯亭翁來無車馬非與彈弋并潛者入深淵飛者散縱橫奈何
翁屢來浪使飛走驚忘爾榮與利脫爾冠與纓還來尋魚鳥傍此水
竹行鳥語弄蒼翠魚遊翫清澄而翁乃何爲獨醉還自醒三者各自
適要歸亦同情翁乎知此樂無厭日來登

答呂公著見贈一本作奉答通判太傅爲子不飲見贈之作

晉人歌蟋蟀孔子錄於詩因知聖賢心豈不惜良時行樂不及早朱
顏忽焉衰馳光如解裹一去不可追今也不彊飲後雖悔奚爲二年
謫永陽陷窅不知危種樹滿幽谷疏泉瀉清池新陽染山木撥亂發
枯枝無人歌青春自醜白玉危今者荷寬宥一作恩乞一作得州從
爾宜西湖舊已聞既見又過之藹藹間紅綠驚鷺浮渺瀰四時花與
竹罇俎一作酒動可隨况與賢者同蕭然襲一作偉蘭芝醲醲寒且
驟清唱婉而遲一作奇四坐各已醉臨觴獨何疑昔人逢麴車流涎
尚垂頤况此盃中趣久得樂無涯多憂衰病早心在良可噫一作噎

譬若臥擬馬聞聲一作鼓向鳴悲春膏已動脈一作忽已動百卉漸
蕤丹砂得新方舊疾庶可治尙可執鞭珥周旋以忘疲

送榮陽魏主簿廣一本作送魏廣

卓犖東一作魏都子姓名聞十年窮冬雪塞空千里至我門子足未
及闕我衣驚倒頭僕童一作童僕相視疑寮吏或不然俛首鵠鶴啄
進趨鳧鴈聯青衫靴兩一作兩靴脚色情一作情以温於公門豈
少乃獨得公權受知固不易知士誠尤難我思屈童吏欲辯難以言
觴豆及嘉節高堂列羣賢文章看落筆論議馳後先破石出至寶決
高瀉長川光暉相磨掩浩渺肆波瀾寮吏媿我嘆僕童一作童僕恪
生顏我顧寮吏嗜士豈以此觀此聊爲戲耳以驚僕童一作童僕昏
士欲見其守視其居賤貧欲知其所趨試以義利于我始識其面已
窺其肺肝禮有來必往木瓜報瓊珎十年思見之一日捨我還何用
慰離居贈子以短篇

青松贈林子國華一本作贈林國華秘校

青松生而直繩墨易爲功一作女良玉有天質少加一作假磨與
子誠懷美材一作君實有美才但未遭良工養育既堅好英華充厥
中於誰以成之孟韓荀暨淮

人日聚星堂燕集探韻得豐字

汗池以其下衆流之所鍾尺水無長瀾蛟龍豈其容顧子誠鄙薄羣
俊任高蹤得一不爲少雖多肯辭豐譬如登園壇羅列璧與琮又若
饗鈞天左右間笙鏞文章爛照耀應和相撞春而予處其間眩晃不
知從退之亦嘗云青蒿倚長松新陽發羣枯生意漸手茸暮雪浩一
作皓方積醖醖寒更濃毋言輕此樂此樂難屢逢

橄欖

五行居四時維火威南訛炎焦陵木氣橄欖得之多酸苦不相入初
爭久方和霜苞入中州萬里來江波幸登君子席得與衆果羅中州

衆果佳珠圓玉光瑤瑰茲微陋質以遠不見訶錫鉛兒女甜遺味久
則那夏藥不甘口厥功見沉痾忠言初厭之事至悔若何世已無採
詩詩成爲君哦

鸚鵡螺

大哉滄海何茫茫天地百寶皆中藏牙贖一作戴甲角爭光銜腥風
怪雨灑幽荒珊瑚玲瓏巧綴裝珠宮貝闕爛煌煌泥居殼屋細莫詳
紅螺行沙夜生光一本作珠宮貝闕爛煌煌泥居殼至細莫詳珊瑚
玲瓏巧綴粧腥風怪雨麗幽荒紅螺行沙夜生光負材自累遭剗腸
匹夫懷璧古所傷濃沙剝蝕隱文章一本注胡人謂稱沙爲濃沙出
本章磨以玉粉緣一作鉛金黃清罇旨酒列華堂隴鳥回頭思故鄉
美人清歌蛾眉揚一醺凜冽回一作爲春陽物雖微遠用則彰一螺
千金價誰量豈若泥下追含漿

食糟民

田家種糯官釀酒權利秋毫升與斗酒沽得錢糟弃物一作不弃大
屋經年堆欲朽酒醅澆澆如沸湯東風來吹酒食香纍纍罌與瓶惟
恐不得嘗官沽味釀村酒薄日飲官酒誠可樂不見田中種糯人釜
無糜粥度冬春還來就官買糟食官吏散糟以爲德嗟彼官吏者其
職稱長民衣食不蠶耕所學義與仁仁當養人義適一作識宜言可
聞達力可施上不能寬國之利下不能飽爾一作民之飢我飲酒爾
食糟爾雖不我責我責何由逃

送焦千之秀才

焦生獨立士勢利不可恐誰言一身窮自待九鼎重有能揭之行可
謂仁者勇呂侯一作侔相家子德義勝華龍焦生得其隨道合若膠
鞏始生及吾門徐子喜驚踊曰此難致寶一失何由踵自吾得二生
一作子榮榮獲雙珠奈何奪其一使我意紛靡吾嘗愛生材抽擢方
鬱翁音委勇反一作翁猶須老霜雪然後見森聳况從主人賢高行

可傾竦讀書趨簡要言說去雜冗新文時我寄庶可獨煩壅

伏日贈徐焦二生一本作徐焦二子伏日遊西湖余以病不能往因以贈之

徐生純明白玉璞魚子皎潔寒泉冰清光瑩爾互輝映當暑自可消
炎蒸平湖綠波漲渺渺高樹一作樹古木陰層層嗟哉我豈不樂此
心雖欲往身未能俸優食飽力不用官閑日永一作心樂睡莫興不
思高飛慕鴻鵠反此愁臥償蚊蠅三年永陽子所見山林自放樂可
勝清泉白石對斟酌巖花野鳥一作草爲交朋崎嶇欄谷窮上下追
逐猿狖爭超騰一作世酒美賓佳足自負飲酣氣橫猶驕矜奈何乖
離纔幾日蒼顏非舊白髮增彊歡徒勞歌且舞勉飲寧及合與升行
措眼眇一作睫旋看物坐見樓閣先愁登頭輕目明脚力健羨子志
氣將飄凌只今心意已如此終竟事業知一作將何稱少壯及時宜
努力老大無堪還可憎

寄生槐一本題上有答張推官庭槐

檜惟凌雲材槐實凡木賤奈何柔脆質累此孤高幹龍鱗老蒼蒼鼠
耳光粲粲因緣初莫原感咤徒自歎偷生由附託得勢爭葱蒨方其
榮盛時曾莫見真履欲知窮悴節宜試以霜霰萌芽起微蘖辨別乖
先見剪除初非難長養遂成患雖然根性殊常恐枝葉亂惟應植者
深幸不習而變含容固有善勤絕須明斷惟當審斤斧去惡無傷善

韓公一本公作定州閔古堂

兵閑四十年士不識金革水旱數千里民流誰繫關公初來視之嘻
此乃予責將法多益辦萬千由十百整齊一作容談笑間進退有寸
尺曰此易爲耳在吾繩與墨天成而地出古所重民食貯儲非一朝
人命在旦夕惟茲將奈何敢不竭吾力木牛尚可運玉磬一作磬猶
走糴因難乃見才不止將有得公言初未信終歲考成績驕僿識恩
威謳吟起羸瘠獲狝著行伍倉廩飽堆積文章娛閑暇一作弄閒散

傳記尋一作觀往昔英英文與武粲粲圖四壁酒令列諸將談鋒摧

辯客周旋顧視間是不爲無益循吏一州守將軍萬夫敵於公豈止
然事業本夔稷富壽及黎庶威名懾夷狄當歸廟堂上有位久一作
尤虛席大匠不揮斧衆工隨指畫從容任羣材文武各以職

永州萬石亭寄知永州王顧一本上有寄題在云柳子厚亭

天於生子厚稟予獨艱哉超凌驟拔擢過威輒傷摧苦其危慮一作
厲心常使鳴聲哀投以空曠地縱橫放天才山窮與水險下上極沿
洄故其於文章出語多崔嵬人迹所罕到遺蹤久荒頽王君好奇士
後二百年來翦薙發幽蒼搜尋得瓊瑰感物不自貴因人乃爲材惟
知古可慕豈免今所哈我亦奇子厚開編每徘徊作詩示同好爲我
銘山隈

居士集卷第四

居士集卷第五 集五

古詩一十八首

答原父一作答劉廷評

炎歊鬱然蒸午景熾方駸子來清風興蕭蕭吹几簟又如沃壤漿遽
飲不知厭嗟子學苦晚白首困鉛黠危疑奚一作何所質孔孟久已
空羣儒室自私惟子通且瞻幸時巧贏餘屢得飽飢歉嚴嚴一作落
落春秋經大法誰敢規一本有譬猶天之蒼乃欲學而染兩句三才
失綱紀一作紀綱五代極昏墊盜竊恣怙一作發篋英雄爭奮劍與
亡兩倉卒事迹多遺欠一作貶纒能紀成敗豈暇誅姦僭聞見患孤
寡一作陋是非誰證驗嘗欣同好惡遂乞指瑕玷反蒙華袞褒如譽
嫫母豔救非當在早已暴一作暴惡何由斂苟能哀瘵痼其可惜針
砭風矧或許邀湖綠方灑灑

蟲鳴

葉落秋水冷衆鳥聲已停陰氣入牆壁百蟲皆夜鳴蟲鳴催歲寒唧
唧機杼聲時節忽已換壯心空自驚平明起照鏡但畏白髮生

奉答子華學士一作答韓絳安撫江南見寄之作一本無下

四字

百姓病已久一言難遽陳良醫將治之必究病所因天下久無事人
情貴因循優游以爲高一作政寬縱以爲仁今日廢其小皆謂不足
論明日壞其大又云力難振旁窺各陰拱當職自逡巡歲月侵曠頽
紀綱遂紛紜坦坦萬里疆虫虫九州民昔而安且富今也迫以貧疾
小不加理浸淫將偏身湯劑乃常藥未能去深根鍼艾有奇功暫痛
勿吟呻痛定支體胖乃知鍼艾神猛寬相濟理古語六經存蠹弊革
僥倖濫官絕貪昏牧羊而去狼未爲不仁人俊又沉下位惡去善乃
伸賢愚各得職不治未之聞此說乃其要易知行每艱遲疑與果決
利害反掌間捨此欲有爲吾知力徒煩家至與戶到飽飢而衣寒三

王所不能言特今所一作獨今爲難我昔忝諫列日常趨紫宸聖君
堯舜心閑閱極憂勤子華當來時玉音耳嘗親上副明主意下寬斯
人屯江南彼一方巨細到可詢一作論論以上恩德當冬反陽春吾
言乃其槩豈一作非止一方云

送張洞推官赴永興經略司一本云送張推官掌機宜

自古天下事及時難必成爲謀於未然聰者或莫聽患至而後圖智
者有不能未遠前日悔可爲來者銘熙熙彼西人老死織與耕狂羗
一作氏一朝叛烽火四面驚用兵五六年首惡竟逃刑仰賴天子聖
乾坤量包并苗頑不率德舜羽舞于庭謂此雖異類有生亦含情藩
籬被觸突譬若稀與糲馴擾以芻豢可呼隨指令稱藩效臣職冠帶
復人形四海得休息瘡痍肉新生敢問前執失恃安而弛兵酒肴爲
善將循默乃各卿慮患謂生事高談笑難行一方兵遽起愚智共營
營上煩天子仁盱食憂吾氓謀議及臺阜幽棲訪巖扃小利不足爲
涓流助滄溟大功難速就倉卒始改更徒自益紛擾何由集功名乃
知深遠畫施設在安平今也實其時鑑前豈非明嚴嚴經略府罇俎
集豪英千營飽而嬉萬馬牧在壩相公黃閣老與國爲長城張子美
而秀文章博羣經從軍古云樂知己士所榮感激報恩義當來請長
纓

寄聖俞一作因馬察院至云見聖俞於城東觀書長韻奉寄

凌晨有客至自西爲問詩老來何稽京師車馬曜朝日何用擾擾隨
輪蹄面顏憔悴暗塵土文字光彩垂虹霓空腸時如秋蚓叫苦調或
作寒蟬嘶語言雖巧身事拙捷徑取蹈行非迷我今俸祿飽餘贖念
子朝夕勤鹽齏舟行每欲載米送汴水六月乾無泥乃知此事尙難
必何況仕路如天一作并梯朝廷樂善得賢衆臺閣俊彥聯簪犀朝
陽鳴鳳爲時出一枝豈惜容其棲古來磊落材與知窮達有命理莫
齊悠悠百年一瞬息俯仰天地身醜雜其間得失何足校况與鳧鷖

爭稗穉憶在洛陽年各一作各年少對花把酒傾玻璃二十年間幾
人在在者愛患多乖睽我今三載病不飲眼眩不辨驕與驪壯心銷
盡憶閑處生計易足纒疏畦優游琴酒逐漁釣上下林壑相攀躋及
身疆一作壯健始為樂莫待衰病須扶携行當買田清潁上與子相
伴把鋤犁

有馬示徐無黨

吾有千里馬毛骨何蕭森疾馳如奔風白日無留陰徐驅當大道步
驟中五音馬雖有四足遲速在吾心六轡應吾手調和如瑟琴東西
與南北高下山與林惟意所欲適九州可周尋至哉人與馬兩樂不
相侵伯樂識其外徒知價千金王良得其性此術固已深良馬須善
馭吾言可為箴

天辰

天形如車輪晝夜常不息二辰隨出沒曾不差分刻一本有其行一
何勤乾健貴於易兩句北辰居其所帝座嚴尊極衆星拱而環大小
一作小大各有職不動以臨之任德不任力天辰主下土萬物由生
殖一動與一靜同功而異域惟王知法此所以治萬國

再和聖俞見答

兩畿相望東與西書來三日猶為稽短篇投子譬瓦礫敢辱報之金
裏蹄文章至寶被埋沒氣象往往干雲霓飛黃伯樂不世一作並出
四顧驥首空長嘶嗟哉我豈敢一作能知子論詩一作經賴子初指
迷子言古淡有真味大莩豈須調以齏憐我區區欲彊學跛鼈曾不
離汗泥問子初何得臻此豈能直到無階梯如其所得自勤苦何憚
入海求靈犀周旋二紀陪唱和凡翼每並鸞皇樓有時爭勝不量力
何異弱魯攻彊齊念子京師苦憔悴經年陋巷聽朝音朝一作晨難
兒啼妻噤一作嚙午未飯得米寧擇糝與稊石上紫蒙一作毫家故
有刻藤瑩滑如玻璃追惟平昔念少壯零落生死嗟分睽一揮累紙

恣奔放駿一作有若駕駱仍駮驪腹雖枵虛氣豪橫猶勝韶笑病夏
畦名聲不朽豈易得仕宦得路終當躋年來無物不可愛花發有酒
誰同攜問我居留亦何事方春苦旱憂民犁

感春雜言一本題下有和呂公著

鳩鳴兮屋上雀噪兮簷間百鳥感春陽有如動機關雄雌相呼白日
夕聒聒不得閑砌下兩株樹枯條有誰繫春風一夜來花葉何班班
乃知天巧奪人力能使枯木生紅顏奈何人為萬物靈不及草木與
飛翾自從春來何所覺但惟睡美不覺白日高南山行逢百花不着
眼豈念四氣如回環却思年少憶一作念前事雖有駟駿難追還奈
何來日尙可樂會不勉彊相牽拔淥酒如春波黃金為誰慳人生一
世中一步一作笑百險艱俟河之清不可得聊自歌此譏愚頑

廬山高贈同年劉中允歸南康

廬山高哉幾千仞兮根盤幾百里截然屹立乎長江長江西來走其
下是為揚瀾左里一作轟兮洪濤巨浪日夕相舂撞雲消風止水鏡
淨泊舟登岸而遠望兮上摩青蒼一作雲霄以瞻鶴下壓后土之鴻
龐試往造乎其間兮攀緣石磴窺空豁千巖萬壑響松檜懸崖巨石
飛流淙水聲聒聒亂人耳六月飛雪灑石缸仙翁釋子亦往往而逢
兮吾嘗惡其學幻而言嘵但見丹霞翠壁遠近映樓閣晨鍾暮鼓香
霧羅幡幢幽花野草不知其名兮風吹露濕香澗谷時有白鶴飛來
雙幽尋遠去不可極便欲絕世遺紛瘵君買田築室老其下插秧
盈疇兮釀酒盈缸欲令浮嵐暖翠千萬狀坐臥常對乎軒窗君懷磊
砢有至寶世俗不辨珉與珎策名爲吏二十載青衫白首困一邦龍
榮聲利不可以苟屈兮自非青雲白石有深趣其氣兀肆何由降丈
夫壯節似君少嗟我欲說安得巨筆如長杠

送徐生一作徐無黨之灑池

河南地望雄西京相公好賢天下稱吹噓死灰生氣談笑暖律回

嚴凝會陪鐘俎被顧盼羅列臺閣皆名卿一作才能徐生南國後來
秀得官古縣依嶠陵脚靴手板實卑賤賢備未可吏事繩擣文百篇
赴知己西望未到氣已增我昔初官便伊洛當時意氣尤驕矜主人
樂士喜文學幕府最咸多交朋園林相映花百種都邑四顧山千層
朝行綠槐聽流水夜飲翠幙張紅燈爾來飄流二十載鬢髮蕭索垂
霜冰同時並遊在者幾舊事欲說無人應一作舊文章無用等畫虎
名譽過耳如飛蠅榮華萬事不入眼憂患百慮來填膺羨子年少一
作少年正得路有如扶桑初日昇名高場屋已得傳世有龍門今復
登出門相送親與友何異離鷗瞻雲鵬嗟吾筆硯久已格感激短章
一作章句因子興

葛氏鼎一本有歌字

大河昔決東南流蕭條東郡今遺湫我從故老問其由云古五鼎藏
高邱地靈川秀草木稠鬱鬱佳氣蒸常浮惟物伏見數有周秘藏奇
恠神所搜天昏地慘鬼哭幽至寶欲出風雲愁蕩搖山川失維陬九
龍大戰驅蛟虬割然岸裂蘿雲霧滑人夜驚鳥嘲啁婦走抱兒扶白
頭蒼生仰叫黃屋憂聚徒百萬如蚍蜉千金一掃隨浮樞天旋海沸
動九州此鼎始出人間留滑人得之不敢收奇模古質非今侔器大
難用識者不以示世俗遭擲撤明堂會朝饗諸侯饗官百品供王羞
調以五味烹全牛時有用捨吾無求二子學雕琳球見之始驚中
歎愀披荒斲古爭窮蒐苦語難出聲咿嚶馬圖出河龜一作龍負疇
自古恠說何悠悠嗟吾老矣不能休勉彊作詩數勸尤

太白戲聖俞一作讀李白集効其體

開元無事一作太平二十年五兵不用太白閑太白之精下人間李
白高歌蜀道難蜀道之難難於上青天李白落筆生雲烟千奇萬險
不可攀却視蜀道猶平川宮娃扶來白已醉醉裏詩成醒不記忽然
一作來乘興登山龍咆虎嘯松風寒山頭婆娑弄明月九域塵土

一作下看塵世悲人實吹笙飲酒紫陽家紫陽真人駕雲車空山流
水空流花飄然已去凌青霞下看一作堪笑區區郊與島螢飛露濕
吟秋草

邊戶

家世爲邊戶年年常備胡兒僮習鞍馬婦女能彎弧胡塵朝夕起虜
騎蔑如無避逅輒相射殺傷兩常俱自從澶州盟南北結歡娛雖云
免戰鬪兩地供賦租將吏戒生事廟堂爲遠圖身居界河上不敢界
河漁

梅聖俞寄銀杏一作和聖俞銀杏見寄代書之什

鵝毛贈千里所重以其人鴨脚雖百箇得之誠可珍問予得之誰詩
老遠且貧霜野摘林實京師寄時新封包雖甚微採掇皆躬親物賤
以人貴人賢棄而論開誠重嗟惜詩以報懇勸

與子華原父小飲坐中寄同州江子學士休復

歲晚忽不樂相過偶乘閑百年纔幾時一笑得亦艱有酒醉嘉客無
錢買嬌鬢問子官何爲侍從聯朝班朝廷多賢材何用廟與菅白髮
垂兩鬢黃金腰九環奈何章綬榮飾此木石頑於國略無補有歎常
在顏幸蒙二三友相與文字間江子獨捨我一作是高鴻去難攀秋
風動沙苑郡閣當南山吟詠日多暇詔條寬可領寒雲雪一作暮紛
揉幽鳥春絲蠻勝事日向好思君何時還

述懷

歲律忽其周陰風慘澹憂孤懷念時節朽質驚衰病憶始來京師街
槐綠方映清霜一以零衆木少堅勁物理固如此人生寧久感當時
不樹立後世猶譏評顧我實孤生飢寒談孔孟壯年猶勇爲刺口論
時政中間蒙選擢官實居諫諍豈知身愈危惟恐職不稱十年困風
波九死出檻甕再生君父恩知報犬馬性歸來見親識握手相弔慶
丹心皎雖存白髮生一作日已迸慙無羽毛彩來與鸞皇並鍛翮追

羣翔孤唳驚衆聽嚴嚴玉堂署清禁肅而靜職業愧論思文章慙詰
命厚顏難久居歸計無荒逕偷閑就朋友笑語雜嘲詠歡情雖索寞
得酒猶豪橫羣居固可樂寵祿尤難幸何日早收身江湖一漁艇

和劉原父澄心紙一作奉賦澄心堂紙

君不見曼卿子美真奇才久已零落埋黃埃子美生窮死愈貴殘章
斷藁如瓊瑰曼卿醉題紅粉壁壁粉已剝昏烟煤河傾崑崙勢曲折
雪壓太華高崔嵬自從二子相繼沒山川氣象皆低摧君家雖有澄
心紙有敢下筆知誰哉宣州詩翁餓一作飢欲死黃鵠折翼鳴聲哀
有時得飽好言語似聽高唱傾金罍二子雖死此翁在老手尙能工
翦裁奈何不寄反示我如棄正論求俳詠嗟我今衰不復昔空能把
卷闔且開百年干戈流戰血一國歌舞今荒臺當時百物盡精好往
往遺弃淪蒿萊君從何處得此紙純堅瑩膩卷百枚官曹職事喜一
作樂閑暇臺閣唱和相追陪文章自古世不乏間出安知無後來

居士集卷第五

居士集卷第六 集六

古詩二十五首

奉使契丹道中答劉原父桑乾河見寄之作

憶昨初受命同下紫宸朝問君當何之笑指北斗杓共念到幾時春
風約回鑣所持既異事前後忽相遠歲月坐易一作若失山川行知
遙回頭二千里雙闕在紫雲我老倦鞍馬安能事吟嘲君才綽有餘
新句益一作亦飄飄前日逢呂郭解鞍憩山腰僮僕相問喜馬鳴亦
蕭蕭出君桑乾詩寄我慰寂寥又喜前見君相期駐征軺雖知不久
留一笑樂亦聊歸路踐冰雪還家脫狐貂君行我即至春酒待相邀

書素屏

我行三千里何物與我親念此尺素屏曾不離我身曠野多黃沙當
午白日昏風力若牛弩飛砂還射人暮投山椒館休此車馬動開屏
置牀頭輾轉夜向晨臥聽穹廬外北風驅雪雲勿愁明日雪且擁狐
貂温君命固有嚴羈旅誠苦辛但苟一夕安其餘非所云

馬齧雪

馬飢齧雪渴飲一作行路冰北風卷地來一作葉崢嶸馬悲躑躅人
不行日暮塗遠千山橫我謂行人止歎聲馬當勉力無悲鳴白溝南
望如掌平十里五里長一作長亭與短亭臘雪銷盡春風輕火燒原
頭青草生遠客還家紅袖迎樂哉人馬歸有程男兒雖有四方志無
事何須一作煩動遠征

風吹沙一本題上有北字

北風吹沙千里黃馬行確犖悲摧藏當一作窮冬萬物慘顏一作無
色冰雪射日生一作爭光芒一年百日風塵道安得朱顏長美好攬
鞍鞭一作起鞭歸馬行勿遲酒熟花開二月時

重贈劉原父一作憶昨呈劉原父

憶昨君當使北時我往別君飲君家愛君小鬟初買得如手未觸新

開花醉中上馬不知夜但見九陌燈火人誼譁歸來不記與君別酒
醒起坐空咨嗟自言我亦隨往矣行即逢君何恨那豈知前後不相
及歲一作日月忽忽行無涯古北嶺口踏新雪馬孟山西看落霞風
雲一作雪暮慘失道路瀾谷夜靜聞響屨行迷方嚮但看日度盡山
險方逾一作行沙客心漸遠誠易感見君雖晚喜莫加我後君歸祇
一作纔十日君先躍馬未足誇新年花發見回鴈歸路柳暗藏嬌鴉
而今一作今來春物已爛漫念昔草木冰未芽人生每苦勞事役老
去尚能憐物華從今有暇即相過安得載酒長盈車

贈沈遵一作贈沈博士歌并序

一本序云予昔於滁州作醉翁亭於琅琊山有記刻石往往傳
人間太常博士沈遵好奇之士也聞而往遊焉愛其山水歸而
以琴寫之作醉翁吟一調惜不以傳人者五六年来去年冬予
奉使契丹沈君會子恩冀之間夜闌酒半出琴而作之子既嘉
君之好尚又愛其琴聲乃作歌以贈之

羣動夜息浮雲陰沈夫子彈醉翁吟醉翁吟以我名我初聞之喜且
驚宮聲三疊何冷泠酒行暫止四坐傾一本有為君屏百慮各以兩
耳聽兩句有如風輕日暖好為語夜靜山響春泉鳴坐思千巖萬壑
醉眠處寫君三尺膝上橫沈夫子恨君不為醉翁客不見翁醉一作
醉翁山間亭翁歡不待絲與竹把酒終日聽泉聲有時醉倒枕谿石
青山白雲為枕屏花間百鳥喚不覺日落山風吹自醒一本有沈夫
子君過滁陽今幾時滁人皆喜醉翁醉至今人人能道之長記山間
逢太守盤饗醑酌插花歸六句我時四十猶彊力自號醉翁聊戲客
爾來憂患十年間一本客字下作爾來纔十年遇酒飲不得軒裳外
飾誠可榮鬢髮未老嗟先白滁人思我雖未忘見我今應不能識沈
夫子愛君一罇復一琴萬事不可干其心自非曾是醉翁客莫向俗
耳求知音一本末兩句作高懷所得貴自適俗耳何用求知音可笑

人生不飲酒惟知白首戀黃金

答聖俞一本題下有高車見過

人皆喜詩翁有酒誰肯一醉之嗟我獨無酒數往從一作就翁何所
為翁居南方我北走世路離合安可期汴渠千艘日上下來及水門
猶未知五年不見勞夢寐三日始往何其遲城東賺河有名字萬家
弃水為汙池人居其上苟賢者我視此水猶漣漪入門下馬解衣帶
共坐習習清風吹溼薪熒熒薄茗四顧壁立空無遺萬錢方丈飽
則止一瓢飲水樂可一作何涯况出新詩數十首珠璣大小光陸離
他人欲一不可有一作得君家篋篋滿莫持才大一作多名高乃富
貴豈比金紫包愚癡貴賤同為一邱土聖賢獨一作長如星日垂道
德內樂不假物猶一作所須朋友并良時蟬聲漸已變秋意得酒安
問醇與醜玉堂官閑無事業親舊幸可從其私與翁老矣會有幾當
奔百事勤追隨

感興五首齋於醴泉宮作

奉祠嚴秘館攝事罄精誠歲晏悲木落天寒聞鶴鳴念昔邱壑趣豈
知朝市情弱齡嬰仕宦壯節慕功名多病慙厚祿早衰歎餘生未知
犬馬報安得遂歸耕懷祿不知慙人雖不吾責貧交重意氣握手猶
感激煌煌腰間金兩鬢風已白有生天地間壽考非金石古人報一
飯君子不苟得愛來自悲歌涕淚下沾臆清夜雖云長白日亦易晚
循環百刻中勢若丸走坂盈虧自相補得失何足算餐霞可延年飲
酒誠自損未知辛苦長孰若適意短二者一何偷百年皆不免顏回
不著迷後世存愈遠聖賢非虛名惟善為可勉仕宦希寸祿庶無飢
寒迫讀書事一作為文章本以代耕織學成頗自喜祿厚愈多責挾
山以超海事有非其力君子貴量能無輕食人食
唧唧復唧唧夜數曉未息蟲聲急愈失病耳聞若刺壯士易為老良
時難再得日月相隨東天行自西北二者不相謀萬古無窮極安知

人間世歲月忽已易

吳學士石屏歌一作和張生醜樹屏一無和字

晨光入林衆鳥驚臙脾羣飛鴉亂鳴穿林四散投空去黃口巢中飢
待哺雌者下啄雄高盤雄雌相呼飛復還空林無人鳥聲樂古木參
天枝屈蟠下有惟石橫樹一作其間烟埋草沒苔辭班借問此景誰
圖寫乃是吳家石屏者號工剗山取山骨朝鑿暮斲非一日萬象皆
從石中出吾嗟人愚不見天地造化一作造物之初難乃云萬物生
自然豈知鑄鑱刻畫醜與妍千狀萬態不可殫神愁鬼泣畫一作日
夜不得閑不然安得巧工妙手儻精竭思不可到若無若有縹緲生
雲烟鬼神功成天地惜藏在號山深處石惟人有心無不獲一作乃
知人為天地賦天地雖神一作公有物藏不得又疑鬼神好勝憎吾
儕欲極奇性窮吾才乃一作故傳張生自西來吳家學士見且哈醉
點紫毫淋墨煤君才自與鬼神鬪嗟我老矣安能陪

初食車螯一本題上云京師

纍纍盤中蛤來自海之涯坐客初未識食之先歎嗟五代昔乖隔九
州如剖瓜東南限淮海邈不通夷華於一作于時北州人飲食陋莫
加雞豚為異味貴賤無等差自從聖人出天下為一家南產錯交廣
西珍富叩巴水載每連軸陸輪動盈車谿潛細毛髮海恠雄鬚牙豈
惟貴公侯閭巷鮑魚鰕此蛤今始至其來何晚邪螿蛾聞二名車螯
一名車蛾久見南人誇璀璨殼如玉斑斕點生花含漿不肯吐得火
遽已呀共食惟恐後爭先屢成譁但喜美無厭豈思來甚遐多慙海
上翁辛苦斲泥沙

送裴如晦之吳江一本無下三字注云席上分得已字

雞鳴車馬馳夜半聲未已皇皇走聲利與日爭寸晷而我獨何為閑
宴奉君子京師十二門四方來萬里顧吾坐中人暫聚浮雲爾念子
一扁舟片帆如鳥起文章富千箱吏祿求斗米白玉有時沽青衫豈

須取人生足愛患合歡乃常理惟應當歡時飲酒如飲水

盤車圖一本上題和聖俞下注呈楊直講

淺山嶙嶙亂石叢叢山石磴聲車碌碌山勢盤斜隨澗谷側轍傾輻如欲覆出乎兩崖之隘口忽見百里之平陸坡長坂峻牛力疲天寒日暮人心速楊生忍飢官大學得錢買此纔盈幅愛其樹老石硬山回路轉高下曲直橫斜隱見妍媸嚮背各有態遠近分毫皆可辨自言昔一作古有數家筆畫古一作久傳多名姓失後來見者知謂誰乞詩梅老聊稱述古畫畫意不畫形梅詩詠物無隱情忘形得意知者寡不若見詩如見畫乃知楊生真好奇此畫此詩兼有之樂能自足乃一作卽爲富豈必金玉名高賞朝看畫暮讀詩楊生得此可不飢

答梅一作和無梅字聖俞莫登樓在禮部貢院鎖試進士上

元夜作

莫登樓樂哉都人方競遊樓闕夜氣春烟浮玉輪東來從海陬纖靄洗盡當空留燈光月色爛不收火龍噴山祝千秋綠竿踏索雜幻優鼓喧管咽耳欲啾清風嫋嫋夜悠悠瑩蹄文一作輪蹄交角車如流姪姘扶欄車兩頭鬢髮垂鬢嬌未羞念昔年少追朋儔輕衫駿馬今則不中年病多昏兩眸夜視曾不如鶴鷗足雖欲往意已休惟思睡眠擁衾稠人心利害兩不謀春陽稍愆天子憂安得四野陰雲油甘澤以時豐麥麩遊騎踏泥非我愁

答聖俞莫飲酒此已下皆貢院中作

子謂莫飲酒我謂莫作詩花開木落蟲鳥悲四時百物亂我思朝吟搖頭暮感眉離肝琢腎聞退之此翁此語還自違豈如飲酒無所知自古不飲無不死惟有爲善不可遲一作遺功施當世聖賢事不然文章千載垂其餘酪酏一罇酒萬事崢嶸皆可齊衛腸糟肉兩家說計較層層何其卑死生壽夭無足道百年長短纔幾時但飲酒莫作

詩子其聽我言非癡

思白兔雜言戲答公儀憶鶴之作

君家白鶴白雪毛我家白兔白玉臺誰將贈兩翁謂此二物皎潔勝瓊瑤已憐野性易馴擾復愛仙格何孤高玉兔四蹄不解舞不如雙鶴能清嘯低垂兩翅趁節拍一作拍節婆娑弄影誇嬌嬈兩翁念此二物者久不見之心甚勞京師少年殊好尙意氣橫出爭雄豪清罇美酒不輒飲千金爭買紅顏詔莫令少年聞我語笑我乖僻遭譏嘲或被偷開兩家籠縱此二物令逍遙兔奔滄海却入明月窟鶴飛玉山千仞直上青松巢索然兩衰翁何以慰無擾纖腰綠鬢既非老者事玉山滄海一去何由招

戲答聖俞

鶴行而啄青玉背枯松脚兔蹲而疊尖兩耳攢四蹄往往於人家高堂淨屋一作室會見之錦裝玉軸掛壁垂仁見拭目猶驚疑羽毛慘澹眼睛活若動不動如風吹主人矜誇百金買云此絕筆人間奇畫師畫生不畫死所得百分之二爾豈如翫物翫其真凡物可愛惟精神况此二物物之珍月光臨靜夜雪色凌晨二物於此時瑩無一點纖埃塵不惟可醒醉翁醉能使詩老詩思添清新醉翁謂詩老子勿謂我愚老弄兔兒憐鶴雛與子俱老其衰乎奈何反捨我欲向一作去東家看舞姝須防舞姝見客笑白髮蒼顏君自照

和梅龍圖公儀謝鵬

有詩鶴勿喜無詩鵬勿悲人禽固異性所趣各有宜朝戲青竹林暮棲高樹枝啣呦山鹿鳴格磔野鳥啼聲音不相通各以類自隨使鶴居籠中垂頭以一作似聽詩鷄鷓草鐘鼓魚鳥見西施鵬鷗不宜爭所爭良可知蚍蜉與蟻子爲物固已微當彼兩交鬪勇如聞鼓擊有心皆好勝未免爭是非於我一何薄於彼一何私欄檻啄花卉叫號驚睡兒跳跟兩脚長落泊雙翅垂何足充翫好於何定妍媸鵬口不

能言夜夢以告之主人起謝鵬從我今幾時僮奴謹守護出入煩提攜逍遙遂棲息飲啄安雄雌花底弄日影風前理毛衣豈非主人恩報效爾宜思主人今白髮把酒無翠眉養鶴鷗又妬我言堪解頤

和聖俞感李花

昨日摘花初見桃今日摘花還見李晴風暖日苦相催春物所餘知有幾中年多病壯心衰對酒思歸未得歸不及牆根花與草春來隨處自芳菲

折刑部海棠戲贈聖俞二首

搖搖牆頭花笑笑弄顏色荒涼衆草間露此紅的礫草木本無情及時如自得青春不可恃白日忽已昃繞之重吟哦歸坐成歎息人生浪自苦得酒且開釋不見宛陵翁作詩頭早白

搖搖牆頭花豔豔爭青娥朝見開尚少暮看繁已多不惜花開繁所惜時節過昨日枝上紅今日隨流波物理固如此去一作古來知奈何達人但飲酒壯士徒悲歌

刑部看竹效孟郊體

花妍兒女姿零落一何速竹色君子德倚倚寒更綠京師多名園車馬紛馳逐春風紅紫時見此蒼翠玉凌亂迸青苔蕭疎拂華屋森森日影閑濯濯生意足幸此接清賞寧辭薦芳醲黃昏人去一作黃昏寂寂一作寂寂人去鎖空廊枝上月明春一作看鳥宿

居士集卷第六

居士集卷第七 集七

古詩二十二首

贈沈博士歌遠 一作醉翁吟

沈夫子胡爲醉翁吟醉翁豈能知爾琴滁山高絕滁水深空巖悲風
夜吹林山 一作泉溜白玉懸青岑一瀉萬仞源莫尋醉翁每來喜登
臨醉倒石上遺其簪雲荒石老歲月侵子有三尺徽 一作暉黃金寫
我幽思窮崎嶇自言愛此萬仞水謂是太古之遺音泉宗石亂到不
平指下嗚咽悲人心時時弄餘聲言語軟滑如春禽嗟乎沈夫子爾
琴誠工彈且止我昔被謫居滁山各雖 一作雖名爲翁實少年坐中
醉客誰最賢杜彬琵琶皮作絃自從彬死世莫傳玉練鎖東坡詩云
新客從翻玉連鎖練疑當作連聲入黃泉死生聚散日零落耳冷心
衰翁索莫國恩未報歎祿厚世事多虞嗟力薄顏摧鬢改真一翁心
以 一作已憂醉安知樂沈夫子謂我翁言何苦悲人生百年間飲酒
能幾時攬衣推琴起視夜仰見河漢西南移

和聖俞李侯家鴨腳子

鴨腳生江南名實未相浮絳囊因入貢銀杏貴中州致遠有餘力好
奇自賢侯因令江上根結實賈門秋始摘纔三四金奩獻凝旒公卿
不及識天子百金酬歲久子漸多疊疊枝上稠主人名好客贈我比
珠投博望昔所徙蒲萄安石榴想其初來時厥價與此侔今也偏中
國羅根及牆頭物性久雖在人情逐時流惟當記其始後世知來由
是亦史官法豈徒續君諷京師無鴨腳樹駙馬都尉李和文自南方
移植其地

送吳生南歸 一作送吳孝京字子京

自我得會子於茲二十年今又得吳生既得喜且歎古士不並出百
年猶比肩區區彼江西其產多材賢吳生初自疑所擬豈其倫我始
見會子文章初亦然崑崙傾黃河渺漫盈百川決疏以道 一作導之

漸斂收橫瀾東溟知所歸識路到不難吳生始見我袖藏新文篇一
作編忽從布褐中百寶寫 一作瀉我前明珠雜幾貝磊砢或不圓問
生久懷此奈何初無聞吳生不自隱欲吐羞俛顏少也不自重不爲
鄉人憐中雖知自悔學問苦賤貧自謂久而信力行因彌堅今來決
疑惑幸冀蒙洗滌我笑謂吳生爾其聽我言世所謂君子何異於衆
人衆人爲不善積微成滅身君子能自知改過不遂巡惟於斯二者
愚智遂以分顏回不貳過後世稱其仁孔子過而更日月披浮雲子
路初來時雞冠佩玃豚駝射白額後卒爲名臣子既悔其往人誰
禦其新醜夫祀上帝孟子豈不云臨行贈此言庶可以書紳

樂哉襄陽人送劉太尉從廣 一作景元赴襄陽 一本無丁二
字景元蓋字

嗟爾樂哉襄陽人萬屋連葦清漢濱語言輕清微帶秦南通交廣西
峨岷羅敷織麗藥物珍枇杷甘橘薦清罇磊落金盤爛瑤瑤槎頭縮
項昔所聞黃橙擣 一作橙擣新盞香復辛春雷動地竹走根錦苞玉
筍味爭新鳳林花發南山春掩映谷口藏山門樓臺金碧瓦鱗鱗峴
首高亭倚浮雲漢水如天瀉沅沔斜陽返照白鳥羣兩岸桑柘難耕
耘文王遺化已寂寞千載誰復思其仁荊州漢魏以來重古今相望
多名臣嗟爾樂哉襄陽人道扶白髮抱幼孫遠迎劉侯朱兩 一作望
朱輪劉侯年少氣甚淳詩書學問若寒士罇俎談笑多嘉賓往時邢
洛 一作臺有善政至今遺愛留其民誰能持我詩以往爲我先賀襄
陽人

奉酬楊州劉舍人見寄之作原父 一作酬劉原父見寄

別君今幾時歲月如插羽悠悠寢與食忽忽朝復暮紛紛竟何爲凜
凜還自懼朝廷無獻納倉廩徒耗蠹風霜苦見侵衰病日增故江湖
豈不思懇悃布已屢美哉廣陵公風政傳道路優游侍從臣左右天
子顧君來一何遲我請亦有素何當兩還分尚冀一相遇把手或未

能尺書幸時寓

西齋手植菊花過節始開偶書奉呈聖俞

秋風吹浮雲寒雨灑清曉鮮鮮牆下菊顏色一何好好色豈能常得時仍不早文章損精神何用覲天巧四時悲代謝萬物惜凋槁豈知寒檻中兩鬢甚秋草東城彼詩翁學問同少一作年小風塵世事多日月良會少我有一罇酒念君思共倒上浮黃金藥送以清歌莫爲君發朱顏可以卻君老

於劉功曹家見楊直講姝女奴彈琵琶戲作呈聖俞

大絃聲遲小絃促十歲嬌兒彈啄木啄木不啄新生枝惟啄槎牙一作牙槎枯樹腹花繁蔽日鎖空園樹老參天杳深谷不見啄木鳥但聞啄木聲春風和暖百鳥語山路磽確人行啄木飛從何處來花間葉底時丁丁林空山靜啄愈響行人舉頭飛鳥驚嬌兒身小指撥硬功曹廳冷絃索鳴繁聲急節傾四坐爲爾飲盡黃金觥楊君好雅心不俗太學官卑飯脫粟嬌兒兩幅青布裙三腳木牀坐調曲奇書古畫不論價感以錦囊裝玉軸披圖掩卷有時倦臥聽琵琶仰看屋客來呼兒旋梳洗滿額花鈿貼黃菊雖然可愛眉目秀無奈長饑頭頸縮宛陵詩翁勿謂渠人生自足乃爲娛此兒此曲翁家無

長句送陸子履學士通判宿州一本作亳州非

古人相馬不相皮瘦馬雖瘦骨法奇世無伯樂良可嗤千金市馬惟市一作其肥駸驥伏櫪兩耳垂夜聞秋風仰秣嘶一朝絡以黃金羈日刷一作發吳越暮燕睡丈夫可憐憔悴時世俗庸庸皆見遺子履自少聲名馳落筆文章天下知開懷吐胸不自疑世路迫窄多穿機鬢毛零落風霜摧十年江湖千首詩歸來京國舊遊非大笑相逢索酒卮酒酣猶能弄蛾眉山川搖落百草腓愛君不改青松枝念君明當整驂駢贈以瑤華期早歸豈惟朋友相追隨坐使臺閣生光輝

送公期得假歸絳

風吹積雪銷太行水暖河橋楊柳芳少年初仕卽京國故里幾歸成鬢霜山行馬瘦春泥滑野飯天寒錫粥香留連芳一作風物佳節過束帶還來朝未央

送宋次道學士赴一作知太平州敏求

古堤老柳藏一作楊柳排春烟桃花水下清明前江南太守見之笑擊鼓插旗催解船一作打鼓插旗催發船侍中令德宜有後學士清才方少年文章秀粹得家法筆畫點綴多餘一作逾妍藏書萬卷復強記故事累朝能口傳來居侍從乃其職遺置州郡誰謂本多作爲然交游一時盡英一作豪俊車馬兩岸來聯翩船頭朝轉暮千里有酒胡不爲一作爲不留連

謝觀文王尚書惠西京牡丹舉正

京師輕薄兒意氣多豪俠爭誇朱顏事年少肯慰白髮將花插尚書好事與俗殊憐我霜毛苦蕭颯贈以一作寄贈洛陽花滿盤鬪麗爭奇紅紫雜兩京相去五百里幾日馳來足何捷紫檀金粉香未吐綠萼紅苞露猶滷謂我嘗爲洛陽客頗向此花會涉獵憶昔進士初登科始事相公沿吏牒河南官屬盡賢俊洛城池一作苑鑿相連接我時年纔二十餘每到花開如蛺蝶姚黃魏紫腰帶輕潑墨齊頭藏綠葉鶴翎添色又其次此外雖妍猶婢妾爾來不覺三十年歲月纔如熟羊胛無情草木不改色多難人生自摧拉見花了了雖舊識感物依依幾杖賤念昔逢花必沽酒起坐驪呼屢傾榼而今得酒復何爲愛花繞之空百匝心衰力懶難勉彊與昔一何殊勇怯感公意厚不知報墨筆淋漓口徒囁

送朱職方提舉運鹽一本表臣

齊人謹一作拜鹽筴伯者之事爾計口收其餘登耗以生齒民充國亦富繁若有條理惟一作雖非三王法儒者猶爲取後世益不然惟奪由漢始權量自持操屑屑已甚矣穴窻如蜂房熬波銷海水豈知

戴白民食淡有至死物艱利愈厚令出姦隨起良民陷盜賊峻法難
禁止問官得幾何月課煩答筆公私兩皆然巧拙可知已英英職方
郎文行粹而美連年宿與泗有政皆可紀忽來從辟書感激赴知己
悶然哀遠人吐策獻天子治國如治身四民猶四體奈何室其一無
異缺厥趾工作而商行一作與商賈本末相表裏臣請通其流爲國
掃泥滓金錢歸府藏滋味飽閭里利害難先言歲月可較比鹽官皆
謂然丞相曰可喜適時乃爲才高論徒譎詭夷吾苟今一作復出未
以彼易此墮堤樹穆穆汗水流瀾瀾子行其勉旃吾黨方傾耳

嘗新茶呈聖俞

建安二千里京師二月嘗新茶人情好先務取勝百物貴早相矜誇
年窮臘盡春欲動蟄雷未起驅龍一作龍未起驅蟄地夜聞擊鼓滿
山谷千人助叫聲喊呀萬木寒癡睡不醒惟有此樹先萌芽乃知此
爲最靈物宜一作疑其獨得天地之英華終朝採摘不盈掬通犀鈿
小圓復窳鄙哉穀兩槍與旗多不足貴如刈麻建安太守急寄我香
菊包裹封題斜泉甘器潔天色好坐中揀擇客亦嘉一作佳新香嫩
色如始造不似來遠從天涯停匙側盞試水路拭目向空看乳花可
憐俗夫把金錠一作挺一作銀茶錄多用挺字爲古按集韻錠字去
聲訓錠錠字上聲訓銅鐵樣猛火炙背如蝦蟇由來真物有真賞坐
逢詩老頻咨嗟須與共起索酒飲何異奏雅終淫哇

次韻再作一本云茶歌

吾年向老世味薄所好未衰惟飲茶建谿苦遠雖不到自少嘗見閩
人誇每唯江浙凡茗草叢生狼藉惟藏地今江浙茶園俗言多地豈
如含膏入香作金餅蜿蜒兩龍戲以呀其餘品第亦奇絕愈小愈精
皆露芽泛之白花如粉乳乍見紫面生光華手持心愛不欲碾有類
弄印幾成窠論功可以療百疾輕身久服勝一作如胡麻我謂斯言
頗過矣其實最能祛睡邪茶官貢餘偶分寄地遠物新來意嘉親烹

屢酌不知厭自謂此樂真一作誠無涯未言久食成手鷄已覺疾飢
一作病生眼花客遭水厄疲捧碗口吻無異蝕月暮僮奴傍視疑復
笑嗜好乖僻誠堪嗟更蒙酬句恠可駭兒曹助噪聲哇哇

樂郊詩爲劉原甫作一本注原父鄆州東園也

樂郊何所樂所樂從公遊三日公不出其民蹙然愁一聞車馬音從
者如雲浮吾問鄆之人無乃失業不云惟安其業然後樂其休樂郊
何所有胡不考公詩有山在其東有水出逶夷有臺以臨望有沼以
游嬉俯仰迷上下朱欄映清池草木非一種青紅隨四時其餘雖瑣
屑處置各有宜樂郊何以名吾爲本其意自古賢哲人所存非一世
當時偶然迹來者因不廢鄆非公久留公去民孰賴此亭公所登此
樹公所憩俾民百年思豈取一日醉

洗兒歌爲聖俞作一本云前日送酒遂助洗兒輒成短歌更

實一笑呈聖俞

月暈五色如虹霓深山猛虎夜生兒虎兒可愛一作憐光陸離開眼
已有百步威詩翁雖老神骨秀想見嬌嬰目與眉木星之精爲紫氣
照山生玉水生犀兒一作此翁不比他兒翁三十年各天下知材高
位下衆所惜天與此兒聊慰之翁家洗兒衆人喜不一作莫惜金錢
散閭一作隣里宛陵他日見高門車馬煌煌梅氏子

鳴鳩崇政殿後考試所作

天將陰鳴鳩逐婦鳴中林鳩婦怒啼無好音天雨止鳩呼婦歸鳴且
喜婦不亟歸一作急還呼不已逐之其去恨不早呼不肯來固其理
吾老病骨知陰晴每愁天陰聞此聲日長思睡不可得遭爾聒聒何
時停衆鳥笑鳴鳩爾拙固無匹不能娶巧婦以共營家室寄巢生子
四散飛一身有婦長相失夫婦之恩重太山背恩棄義須與問心非
無情不得已物有至拙誠可憐君不見人心百態巧且艱臨危利害
兩相關朝爲親戚暮仇敵自古常嗟交道難

代鳩婦言一本注聞士有欲弃妻者作

班然錦翼花簇簇雄雌相隨樂不足抱雛出卵翅羽成豈料一朝還
反目人言嫁雞逐雞飛安知嫁鳩被鳩逐古來有戚必有衰富貴莫
忘貧賤時女棄父母嫁一作婦曰歸中道捨君何所之天生萬物各
有類誰謂鳥獸為無知雖無仁義有情愛苟聞此言寧不悲

看花呈一作有韓子華內翰崇政殿後考試作

老雖可憎還可嗟病眼眵昏愁看花不知花開桃與李但見紅白何
交加春深雨露洗新濯日暖金碧相輝華浮香著物收不得含意欲
吐情無涯可愛疎簾靜相對最宜落日初西斜時傾賜壺共斟酌及
此蜂鳥方諠譁凡花易見不足數禁禦難到堪歸誇老病對此不知
厭年少何用苦思家

啼鳥崇政殿後考試舉人卷子作

提葫蘆提葫蘆不用沽美酒宮一作官壺日賜新醖醉老病足以扶
衰朽百舌子百舌子莫道泥滑滑宮花正好愁雨來暖日方催花亂
發苑樹千重綠暗春珍禽綵羽自成羣花間祇慣迎黃屋鳥語初驚
見外人千聲百轉忽飛去一作來枝上自落紅紛紛畫簾陰陰隔宮
燭禁漏杳杳深千門可憐枕上五更聽不似滁州山裏聞

和聖俞一本二字作入唐書局後叢莽中得芸香一本之作

用其韻

有芸黃其華在彼衆草中清香濯曉露秀色搖春風幸依華堂陰一
顧曾不蒙大雅彼君子偶來從學宮文章高一世論議一作議論伏
羣公多識由博學新篇匪雕蟲唱酬爛衆作光輝發幽叢在物苟有
用得時寧久窮可嗟凡草木糞壤自青紅

答劉原父舍人見過後中夜酒定復追昨日所覽雜記并簡

梅聖俞之作

君子忽我顧一作顧我貧家復何有虛堂來清風佳果薦濁酒簡編

記遠逸論議相可否欲知所書人其骨多已朽前者既已然後來寧
得久所以昔人云杯行莫停手

居士集卷第七

居士集卷第八 集八

古詩二十一首

有贈余以端谿綠石枕與蘄州竹簟皆佳物也余既喜睡而得此二者不勝其樂奉呈原父舍人聖俞直講

端谿作出缺月樣蘄州織成雙水一作錦紋呼兒置枕展方簟赤日正午天無雲黃琉璃光綠玉潤瑩淨冷滑無埃一作纖塵憶昨開封暫陳力屢乞殘骸避煩劇聖君哀憐大臣閱察見衰病非虛飾猶蒙不使如一作加罪去特許遷官還舊職選材臨事不堪用見利無慙惟苟得一從儼舍一作屏居城南官不坐曹門一作閑少客自然唯與睡相宜以懶遭一作投閑何恆適從來贏齋苦疲困況此煩歎正炎赫少壯喘息人莫聽中年鼻軒尤惡聲癡兒掩耳謂雷作竈婦驚窺疑釜鳴蒼蠅蟻任緣撲蠹一作詩書懶架拋縱橫神昏氣濁一如此言語思慮何由清嘗聞李白好飲酒欲與鐘杓同生死一作死生我今好睡又過之身與一物為三爾江西得請在旦暮收拾歸裝從此始終當卷簾搗枕去築室買田清賴尾

夜聞風聲有感奉呈原父舍人聖俞直講

夜半羣動息有風生樹端颯然飄我衣起坐為長歎苦暑君勿厭初涼君勿歡暑在物猶感涼歸歲將寒清霜忽以飛零落亦溥溥霜露一作四時本無情豈肯私蕙蘭不獨草木爾君形安得完櫛髮變新白鑑容銷一作無故丹風埃共侵迫心志亦摧殘萬古一飛隼兩曜雙跳丸擾擾賢與愚流沙逐驚湍其來固如此獨久知誠難服食為藥悞此言真不刊但當飲美酒何必被輕統

答梅聖俞大雨見寄

夕雲若頽山夜雨如決渠俄然見青天酸醎升蟾蜍倏忽陰氣生四面如吹噓狂雷走昏黑驚電照曠野尋起龍蟄下擊墓與墟雷聲每軒轟雨勢隨疾徐初若浩莫止俄收聞無餘但掛千丈虹紫翠橫

空虛頃刻百變態晦明誰卷舒豈知下土人水潦沒襟裾擾擾泥淖中無異鴨與豬嗟我來京師庇身無弊廬閉坊僻古屋卑陋雜里閭鄰注湧溝竇街流溢庭除出門愁浩渺閉戶恐為豬牆壁豁四達幸家無貯儲蝦蟇囂竄下老婦但歎歎九門絕來新朝變欲毀車壓溺委性命焉能顧圖書乃知生堯時未免憂為魚梅子猶念我寄聲憂我居慰我以新篇現現比瓊瑤官閑行能薄補益愧空疎歲月行晚矣江湖盍歸歟吾居傳郵爾此計豈躊躇

答聖俞白鸚鵡雜言

憶昨滁山之人贈我玉兔子粵明年春玉兔一有子字死日陽晝出月夜明世言兔子望月生謂此瑩然而白者譬夫水之為雪而為冰皆得一陰凝結之純精常恨處非大荒窮北極寒之曠野養違其性天厭齡豈知火維地荒絕漲海連天沸天一作火一作炎熱黃冠黑距人語言有為玉衣尤皎潔乃知物生天地中萬殊難以一理通海中洲一作州鳥窮人迹來市廣州纔八國其間注輩來最稀一作遠此鳥何年隨海舶誰能徧歷海上峯萬怪千奇安可極免生明月月在天玉兔不能久人間況爾來從炎瘴地豈識中州霜雪寒渴雖有飲飢有啄羈縶終知非爾樂天高海闊路一作繁茫茫嗟爾身微羽毛弱爾能識路知所歸吾欲開籠縱爾飛爾歸詫宛陵詩此老詩名聞四夷

清明前一日韓子華以靖節斜川詩見招遊李園既歸遂苦

風雨三日不能出窮坐一室家人輩倒殘壺得酒數杯泥深道路無人行去市又遠索於篋宮一作篋得枯魚乾餒數種

疆飲疾醉昏然便寐既覺索然因書所見奉呈聖俞

少年喜追隨老大厭諠譁慙愧二三子邀我行看花花開豈不好時節亦云嘉因病既不飲衆歡獨成一作我嗟管絃暫過耳風雨愁還家三日不出門堆厖類寒鴉妻兒強我飲釘釘果與瓜濁酒傾殘壺

枯魚雜乾蝦小婢立我前赤腳兩髻丫軋軋鳴雙絃正如臙嘔啞坐
令江湖心浩蕩思無涯龍祿不知報鬢毛今已華有田清潁間尙可
事桑麻安得一黃犢幅巾駕柴車

李荅原甫見過寵示之作

不作流水聲行將二十年吾生少戢屢憂患憶昔有罪初南遷飛帆
洞庭入白浪墮淚三峽聽流泉援琴寫得入此曲聊以自慰窮山間
中間承陽亦如此醉臥幽谷聽潺湲自從還朝戀榮一作寵祿不覺
鬢髮俱凋殘耳衰聽重手漸顛自惜指法將誰傳偶欣日色曝書畫
試拂塵埃張斷絃嬌兒癡女遠翁膝爭欲彊翁聊一彈紫微閣老適
我過愛我指下聲冷然戲一作語君此是伯牙曲自古常歎知音難
君雖不能琴能得琴一作其意斯爲賢自非樂道甘寂寞誰肯顧我
相留連與蘭束帶索馬去卻鎖塵匣包青氈

會飲聖俞家有作兼呈原父景仁聖從

憶昨九日訪君時正見堦前兩叢菊愛之欲繞行百匝庭下不能容
我足折花卻坐時嗅之已醉還家手猶馥今朝我復到君家兩菊堦
前猶對東枯莖槁葉苦風霜無復滿叢金間綠京師誰家不種花碧
砌朱欄敞華屋奈何來對兩枯株共坐窮簷何局促詩翁文字發天
葩豈比青紅凡草木凡草開花數日間天葩無根長在日遂令我每
飲君家不覺長餅臥牆曲坐中年少皆賢豪莫怪我今雙鬢禿須知
朱顏不可恃有酒當歡一作飲且相屬

依韻李剛聖俞二十五兄見贈之作

與君結交遊我最先衆人我少既多難君家常苦貧今爲兩衰翁髮
白面亦皴念君懷中玉不及市上珉珉賤易爲價玉棄久埋塵惟能
吐文章白虹射星辰幸同居京城遠不隔重闔朝罷二三公隨我如
魚鱗君聞我來喜置酒留逡巡不待主人請自脫頭上巾歡情雖漸
鮮老意益相親窮達何足道古來茲理均

小飲坐中贈別祖擇之赴陝府無擇

明日君當千里行今朝始共一罇酒豈惟明日難重持試思此會何
嘗有京師九衢十二門車馬煌煌事奔走花開誰得屢相遇盞到莫
辭頻舉手驪情落莫酒量減置我不須論老朽奈何公等氣方豪雲
夢正當吞八九擇之名聲重當世少也多奇晚方偶西州政事謫風
謠右掖文章煥星斗待君歸日我何爲手把鋤犁汝陰叟

李荅聖俞達頭魚之作

吾聞海之大物類無窮極蟲蝦淺水間羸蜺如山積毛魚與鹿角一
倫一作拾數千百收藏各有時嗜好無南北其微一作小既若斯其
大有一作其大固一作大者固莫測波濤浩渺中島嶼生頃刻俄而
沒不見始悟一作久始出背脊有時隨潮來暴死疑遭謫海人相呼
集刀鋸爭剖一作斫析骨節駭專車鬚芒一作牙侔劍戟腥聞數十
里餘臭久乃息始知百川歸固有含容德潛奇與祕寶萬狀一作物
不一識嗟彼達頭微誰傳到一作偶傳到一作偶傳入京國乾枯少
滋味治平聲洗費炮炙聊茲知異物豈足薦佳客一旦辱一作得君
詩虛名從此得京師人不識此魚滄州向防禦見黃以分聖俞辱以
詩答

送刁紡推官一本無二字歸潤州

翹超名家子自少能慷慨嘗從幕府辟躍馬臨窮塞是時西邊兵屢
戰輒一作無功屢奔潰歸來買良田俛首學耒家爲白酒醉門掩
青山對優游可以老世利何足愛奈何從所知又欲向并代主人忽
南遷此計亦一作乃中悔彼在吾往一作乃從彼去吾亦退與人交
若此可以言節槩

夜坐彈琴有感二首呈聖俞

吾愛陶靖節有琴常自隨無絃人莫聽此樂有誰知君子篤自信衆
人喜隨時其中苟有得外物竟何爲寄謝伯牙子何須鍾子期

鍾子忽已死伯牙其已乎絕絃謝世人知音從此無瓠巴魚自躍此
事見於書師曠嘗一鼓羣鶴舞空虛吾恐二三說其言皆過歟不然
古今人愚智邈已殊奈何人有耳不及鳥與魚

二月雪

寧傷桃李花無損杞菊吾所嗜惟恐食不足花開少年事不
入老夫目老夫無遠慮所急在口腹風晴日暖雪初銷踏泥自採籬
邊綠

歸田四時樂春夏二首秋冬二首命聖俞分作

春風二月三月時農夫在田居者稀新陽晴暖動膏脉野水泛灘生
光輝鳴鳩聒聒屋上啄布穀翩翩桑下飛碧山遠映丹杏發青草暖
眠黃犢肥田家此樂知者誰吾獨知之胡不歸吾已買田清潁上更
欲臨流作釣磯

南風原頭吹百草草木叢深茅舍小麥穗初齊稚子嬌桑葉正肥蠶
食飽老翁但喜歲年熟餉婦安知時節好野棠黎密啼晚鶯海石榴
紅轉山鳥田家此樂知者誰我獨知之歸不早乞身當及彊健時顧
我蹉跎已衰老

明妃曲和王介甫作

胡人以鞍馬爲家射獵爲俗泉甘草美無常處鳥驚獸駭爭馳逐誰
將漢女嫁胡兒風沙無情貌如玉身行不遇中國人馬上自作思歸
曲推手爲琵卻手琶胡人共聽亦咨嗟玉顏流落死天涯琵琶一作
此曲卻傳來漢家漢宮爭按新聲譜遺恨已深聲更苦纖纖女手生
洞房學得琵琶不下堂不識黃雲出塞路豈知此聲能斷腸

盆池

西江之水何悠悠經歷巖石險且回餘波拗怒猶一作獨涵去澹奔
濤擊浪常喧逐有時夜上滕王閣月照淨練一作綠無纖埃楊柳左
里在其北無風浪起傳古來老蛟深處厭窟穴蛇身微行見者猜呼

龍漚酒未及祝五色粲一作照爛高崔嵬忽然遠引千丈去百里水
面中分開收蹤滅跡莫知處但有兩鬣隨風雷千奇萬變聊一戲豈
一作首顧溺死爲可哀輕人之命若螻蟻不止山嶽將傾頽此外魚
鰓何足道厭厭且覺腥盤杯壯哉豈不快耳目胡爲守此空牆隈陶
盆斗水仍下漏四岸久雨生莓苔遊魚撥撥不盈寸泥潛日炙愁暴
鯁魚誠不幸此踞促我能決去反徘徊

再和明妃曲

漢宮有佳一作美人天子初未識一朝隨漢使遠嫁單于國絕色天
下無一失難再得誰能殺畫工於事竟何益耳目所及尙如此萬里
安能制夷狄漢計誠已拙女一作美色難自誇明妃去時淚灑向枝
上花狂風日暮起飄泊落誰家紅顏勝人多薄命莫怨春風當自嗟
奉送原甫侍讀出守永興一作奉送永興安撫劉侍

酌君以荊州魚枕之蕉贈君以宣城鼠須之管酒如長虹飲滄海筆
若駿馬馳平坂愛君尙一作年少力方豪嗟我久衰歡漸鮮文章驚
世知一作聞名早意氣論交相得晚魚枕蕉一舉十分當覆盞鼠須
管爲物雖微情不淺新詩醉墨時一揮別後寄我無辭遠

哭聖俞

昔逢詩老伊水頭青衫白馬渡伊流灘聲入節響石樓坐中辭氣凌
清一作高秋一飲百盞不言休酒酣思逸語更道河南丞相稱賢侯
後車日載枚與鄒我年最少力方優明珠白璧相報投詩成希深擁
鼻謳師魯卷舌藏戈矛三十年間如轉眸屈指十九歸山邱凋零所
餘身百憂晚登玉墀侍珠旒詩老靈鹽太學秘乖離會合謂無由此
會天幸非人謀領鬚已白齒根浮子年加我貌則不歡猶可彊閑屢
偷不覺歲月成淹留文章落筆動九州釜甑過午無饋饋良時易失
不早收篋積一作檀瓦礫遺琳瑯薦賢轉石古所尤此事有職非吾
差命也難知理莫求名聲赫赫掩諸幽翻然素旆歸一舟送子有淚

流如溝

居士集卷第八

居士集卷第九 集九

古詩三十首

寄題劉著作義叟家園效聖俞體

嘉子治新園乃在太行谷山高地苦寒當樹所宜木羣花媚春陽開
落一何速凜凜心節奇惟應松與竹毋栽當暑暄種深秋菊菊死
抱枯枝槿豔隨昏旭黃楊雖可愛南土氣常燠未知經雪霜果自保
其綠顏色苟不衰始知根性足此外衆草花徒能悅凡目千金買姚
黃慎勿同流俗

西齋小飲贈別陝州冲卿學士分得黃字爲韻

今日胡不樂衆賓會高堂坐中瀛洲客新佩太守章豈無芳罇酒笑
語共一觴亦有嘉一作佳菊叢新苞弄微黃所嗟時易晚節物已凄
涼羣鷺方感集離鴻獨高翔山川正搖落行李怯風霜君子樂爲政
朝廷須僞良歸來紫微閣遺愛在甘棠

奉答原甫九月八日見過會飲之作

老大惜時節少年輕別離我歌君當和我酌君勿辭豔豔庭下菊與
君吟繞之損其黃金藥泛此白玉卮君勿愛此花問君此何時秋風
日益高霜露漸離披芳歲忽已晚朱顏從此衰念君將捨我車馬去
有期君行一何樂我意獨不怡飛兔不戀羣奔風誰能追老驥但伏
櫪壯心良可悲

予作歸鴈亭於滑州後十有五年梅公儀來守是邦因取余

詩刻于石又以長韻見寄因以答之一作和滑州公儀龍圖

歸鴈亭長句

風吹城頭秋草黃仰見鳴鴈初南翔秋草風吹春復綠南鴈北飛聲
蕭蕭城下臺邊桃李蹊憶初披荒手植之雪消冰解草木動因記鴻
一作欲記南鴈將歸時爾來十載空遺迹飛鴈年年自南北臺傾餘
址草荒涼樹老無花春寂歷東州太守詩尤美組織文章爛如綺長

篇大句琢方石一日都城傳百紙我思古人無不然慷慨一作感粟
功名垂百年沉碑身後念陵谷把酒泣下悲山川一時留賞雖邂逅
後世傳之因不朽

寄題洛陽致政張少卿靜居堂

洛人皆種花花發有時闌君家獨種玉種玉產瓊玕子弟守家法名
聲聳朝端歲時歸拜慶閭里亦相歡西臺有道氣自少服靈丸春酒
養眉壽童顏如渥丹清談不倦客妙思喜揮翰壯也已吏隱與餘方
掛冠臨風想高誼懷祿愧盤桓

鬼車

嘉祐六年秋九月二十有八日天愁無光月不出浮雲蔽天衆星沒
舉手嚮空如抹漆天昏地黑有一物不見其形但聞其聲其初切切
淒淒或高或低乍似玉女調玉笙衆管參差而不齊既而咿啞啞啞
若軋若抽又如百兩江州車回輪轉軸聲啞啞嘔嘔鳴機夜織錦江上羣
鴈驚起蘆花洲吾謂此何聲初莫窮端由老婢撲燈呼兒曹云此怪
鳥無疋儻其名爲鬼車夜載百鬼凌空遊其聲雖小身甚大翅如車
輪排十頭凡鳥有一口其鳴已啾啾此鳥十頭有十口口插一舌連
一一作十喉一口出一聲千聲百響更相酬昔時周公居東周厭聞
此鳥憎若讎夜呼庭氏牽其屬鸞弧俾逐出九州射之三發不能中
天遣天狗從空投自從狗噬一頭落斷頸至今青血流爾來相距三
千秋晝藏夜出如鶻鷂每逢陰黑天外過乍見火光驚輒墮有時餘
血下點汚鳥臥反所遭之家家必破我聞此語驚且疑反祝疾飛無
我禍我思天地何茫茫百物巨細理莫詳吉凶在人不在物一蛇兩
頭反爲祥呼老婢炷燈火捲簾開戶清華堂須臾雲散衆星出夜
靜皎月流清光

感二子

黃河一千年一清岐山鳴鳳不再一作載鳴自從蘇梅二子死天地

寂默收雷聲百蟲坏戶不啓蟄萬木逢春不發萌豈無百鳥解言語
喧啾終日無人聽二子精思極搜抉天地鬼神無遁情及其放筆騁
豪俊筆下萬物生光榮古人謂此觀天巧命短疑爲天公憎昔時李
杜爭橫行麒麟鳳凰世所驚二物非能致太平須時太平然後生開
元天寶物咸極自此中原疲戰爭英雄白骨化黃土富貴何止浮雲
輕唯有文章爛日星氣凌山岳常崢嶸賢愚自古皆共盡空兀空留
後世名

讀書

吾生本寒儒老尚把書卷眼力雖已疲心意殊未倦正經首唐虞僞
說起秦漢篇章異句讀解詁及箋傳是非自相攻去取在勇斷初如
兩軍一作兵交乘勝方一作多酣戰當其旗鼓催不覺人馬汗至哉
天下樂終日在几一作書案念昔始從師力學希仕宦豈敢取聲名
惟期脫貧賤忘食日已脯燃薪夜侵旦謂言得志一作意後便可焚
筆硯少償辛苦時惟事寢與飯歲月不我留一生今過半中間嘗忝
竊內外職文翰官榮日清近虞給亦豐羨人情慎所習耽毒比安宴
漸追時俗流稍稍學營辦盃盤窮水陸賓客羅俊彥自從中年來人
事攻百箭非惟職有憂亦自老可欺形骸苦衰病心志亦退懦前時
可喜事閉眼不欲見惟尋舊讀書備編一作編簡多朽斷古人重溫
故官事幸有閒乃知讀書勤其樂固無限少而干祿利老用忘憂患
又知物貴久至寶見百鍊紛華暫時好俯仰浮雲散淡泊味愈長始
終殊不變何時乞殘骸萬一免罪譴買書載舟歸築室一作屋賴水
岸平生願論述銓次加點竄庶幾垂後世不歎死芻豢信哉蠹書魚
韓子語非訛

鶉鷄詞効王建作

龍樓鳳闕一作閣鬱崢嶸深宮不聞更漏聲紅紗蠟燭愁夜短綠窗
鶉鷄催天明一聲兩聲人漸起金井曉鐘聞汲水三聲四聲促展柱

紅靴玉帶奉君王萬年枝軟風露濕上下枝間聲轉急南衙促仗三
衛衝九門放鑰千官入重城禁籞鎖池臺此鳥飛從何處來君不見
潁河東岸村一作春陂闊山禽野鳥常一作時嘲啗田家惟聽夏雞
聲鶉鷄京西村人謂之夏鷄夜夜攏頭耕曉月可憐此樂獨吾知眷
戀君恩今白髮

初食鷄頭有感一本無有感字

六月京師暑雨多夜夜南風吹艾蒿凝祥池鎖會靈園僕射荒陂安
可擬京師寶五岳宮及鄭州鷄頭最為佳爭先園客採新苞剖蚌得
珠從海底都城百物貴新鮮厥價難酬與珠比金盤磊落何所薦滑
臺撥醅如玉醴自慙竊食萬錢廚滿口飄浮嗟病齒卻思年少在江
湖野艇高歌菱苳裏香新味全手自摘玉潔沙磨軟還美一瓢固不
羨五鼎萬事適情爲可喜何時遂一作益買潁東田歸去結茅臨野
水

雙井茶

西江水清江石老石上生茶如鳳爪窮臘不寒春氣早雙井芽生先
百草白毛囊以紅碧紗十斤茶養一兩芽長安富貴五侯家一啜猶
須三日誇寶雲日注非不精爭新棄舊世人情豈知君子有常德至
寶不隨時變易君不見建溪龍鳳團不改舊時香味色

贈李士寧

蜀狂士寧者不邪亦不正混世使人疑詭譎非一行平生不把筆對
酒時高詠初如不著意語出多奇勁傾財解人難去不道名姓一無
上天句金一作千錢買酒醉高樓明月空床一作清風眠不醒一身
四海卽爲家獨行萬里聊乘興既不採藥賣都市又不點石化黃金
進不干公卿退不隱山林與之游者一本四字作世之人但愛其人
而莫一作不見其術安知其心吾聞有道之士游心太虛逍遙出入
一本二句止作逍遙太虛常一作動與道俱故能入火不熱一作蕭

入水不濡嘗聞其語一作吾雖聞其語夫而未見其人也豈斯人之徒與不然言不純師行不純德一作表而一本無而字滑稽玩一作傲世其東方朔之流乎

明妃小引

漢宮諸女嚴粧罷共送明妃溝水頭溝上水聲來不斷花隨水去不回流上馬即知無返日不須出塞始堪愁

感事四首

老者覺時速閑人知日長日月本無情人心有閑忙努力取功名斷碑埋路傍道遙林下土邱壠亦相望長生既無藥濁酒且盈觴
空山一道土辛苦學延齡一旦隨物化反言仙已成開墳見空棺謂已超青冥尸一作或解如蛇蟬換骨蛻其形既云須變化何不任死生

仙境不可到誰知仙有無或乘九班虬或駕五雲車朝倚扶桑枝暮遊崑崙墟往來幾萬里誰復遇諸塗富貴不還鄉安事富貴歟神仙人不見魑魅與爲徒人生不免死魂魄入幽都仙者得長生又云超太虛等爲不在世與鬼亦何殊得仙猶若此何況不得乎寄謝山人辛勤一何愚

莫笑學仙人山中苦求寂試看青松鶴何似朱門客朱門炙手熱來者無時息何嘗問寒暑豈暇謀寢食疆顏悅憎怨擇語防仇敵衆欲苦無厭有求期必獲敢辭一身勞豈塞天下責風波卒然起禍患藏不測神仙雖杳茫富貴竟何得

新春有感寄常夷甫

余生本羈孤自少已非壯今而老且病何用苦惆悵誤蒙三聖知貪得過其量恩私未知報心志已凋喪軒裳德不稱徒自取譏謗豈若常夫子一瓢安陋巷身雖草莽間名在朝廷上惟余服德義久已慕恬曠矧亦有吾廬東西正相望不須駕柴車自可策藜杖坐驚顏鬢

日摧頹及取新春歸去來共載一舟浮野水焦陂四面百花開

昇天宮

青牛西出關老聃始著五千言白鹿去昇天爾來忽已三千年當時遺迹至今在隱起蒼檜猶依然惟能乘變化所以爲神仙驅鸞駕鶴須臾間飄忽不見如雲烟奈何此鹿起平地更假草木相攀緣乃知神仙事茫昧真僞莫究徒自傳雪霜不改終古色風雨有聲當夏寒境清物老自可愛何必詭怪窮根源

憶焦陂一本無憶字注汝陰作

焦陂荷花照水光未到十里聞花香焦陂八月新酒熟秋水魚肥鱸如玉清河兩岸柳鳴蟬直到焦陂不下船笑向漁翁酒家保金龜可解不須錢明日君恩許歸去白頭酣詠太平年

贈許道人

洛城三月亂鶯飛潁陽山中花發時往來車馬遊山客貪看山花踏山石紫雲仙洞鎖雲深洞中有人人不識飄飄許子旌陽後道骨仙風本仙曹多年洗耳避世喧獨臥寒巖聽山溜至人無心不算心無心自得無窮壽忽來顧我何慙勸笑我白髮老紅塵子歸爲築巖前室待我明年乞得身

送龍茶與許道人

潁陽道士青霞客來似浮雲去無蹟夜朝北斗太清一作虛壇不道姓名人不識我有龍團古蒼壁九龍泉深一百尺憑君汲井試烹之不是人間香味色

馴鹿

朝渴飲清池暮飽眠深柵慙媿主人恩自非殺身難報德主人施恩不待報哀爾胡爲網羅獲南山藹藹動春陽吾欲縱爾山之傍巖崖雪盡飛泉溜澗谷風吹百草香飲泉鬪草當遠去山後山前射生戶

留題齊州舜泉

岸有時而爲谷海有時而爲田虞舜已殳三千年耕田淩井雖鄙事
至今遺迹存依然歷山之下有寒泉向此號泣于旻天無情草木亦
改色山川慘淡生雲烟一朝垂衣正南面臯夔稷契來聯翩功高德
大被萬世今人過此猶留連齊州太守政之暇鑿渠開沼疏清漣遊
車擊轂惟恐後衆卉亂發如爭先豈徒邦人知樂此行客亦爲留征
軒

山齋戲書絕句二首

蜜脾未滿蜂採花麥壠已深鳩喚一作叫雨正是山齋睡足時不覺
花間日亭午

石裂
經春老病不出門坐見羣芳爛如雪正當年少惜花時日日春風吹

嘲少年惜花

紛紛紅糝落泥沙少年何用苦咨嗟春風自是無情物肯爲汝惜無
情花今年花落明年好但見花開人自老人老不復少花開還更
作復新使花如解語應笑惜花人

出郊見田家蠶麥已成慨然有感

誰謂田家苦田家樂有時車昌邁切鳴緜白繭麥熟鸚鵡田家此
樂幾人知幸獨知之未許歸逢時得寵已逾分報國無能徒爾爲收
取玉堂揮翰手卻尋南畝把鋤犁

射生戶予初至州獵戶有獻狼豹者

射生戶前日獻一豹今日獻一狼豹因傷我牛狼因食我羊狼豹誠
爲害人物縣官賞之縑五疋射生戶持縑歸爲人除害固可賞貪功
趨利爾勿爲弦弓毒矢無妄發恐爾不識麒麟兒

戲石唐山隱者

石唐山室紫雲深頰陽真人此算心真人已去升寥廓歲歲巖花自
開落我昔曾爲洛陽客偶向巖前坐盤石四字丹書萬仞崖神清之

洞鎖樓臺雲深路絕無人到鸞鶴今應待我來

居士集卷第九

居士集卷第十 集十

律詩六十首

送王汲宰藍田

喧喧動車馬共出古都門落日催行客東風吹酒罇樹搖秦田綠花入輞川繁若遇西來旅時應問一作望故園

徽安門曉望

都門收宿霧佳氣鬱葱曉日寒川上青山白霧一作霧中樓臺萬瓦合車馬九衢通恨乏登高賦徒知京邑雄

送孟都官知蜀州

名郎出粉闈佳郡古關西幾驛秦亭盡千山蜀為啼朱輪照耕野綠芊覆秋畦向闕應東望雲深隴樹迷

南征回京至界上驛先呈城中諸友

朝雲來少室日暮向箕山以無心出寧隨倦客還春歸伊水綠花晚洛橋閑誰有餘罇酒相期一解顏

逸老亭一本注彭城公白蓮庄

上相此志榮怡然物外情池光開小幌山翠入重城野鳥窺華袞春壺勞耦耕枕前雙鴈沒雨外一川晴解組金龜重調琴赤鯉驚雖懷安石趣豈不為一作念蒼生

廣愛寺

都人布金地紺宇巋然存山氣蒸經閣鐘聲出國門老杉春自綠古壁雨先昏應有幽人屐來留石辭痕

弔黃學士二首名鑑

麗正籙書久蘭臺約史成迎親就江水厭直出承明世德無雙譽詩豪第一評風流今頓盡響像憶平生

沈約多清瘦文園仍病瘠共疑天上召更欲水邊招金馬人相弔長沙物易妖秋風吹越樹歸旆自飄飄

自古蘭衰早因令蕙歎深書遺茂陵藥病作越鄉吟萬里無春色閨山蔽夕陰空嗟埋玉樹齋志永沉沉

兩後獨行洛北

北闕望南山明嵐雜紫烟歸雲向嵩嶺殘雨過伊川樹繞芳隄外橋橫落照前依依半荒苑行處獨聞蟬

陪府中諸官遊城南一本注西京作

一雨郊圻迥新秋榆棗繁田荒溪溜入禾熟雀聲喧燒出空槎腹人耕廢廟垣閑追向城客落日隱高原

智蟾上人遊南岳

終日念雲壑南歸心浩然青山入楚路白水望湖田野渡惟浮鉢山家少施錢到時春尚早收茗綠巖前

送左殿丞一作直入蜀

傳聞蜀道難行客若登天紫竹深無路黃花忽見川聞鳥嗟異域問俗訪耆年欲識京都遠惟應望日邊

秋郊曉行一作望

寒郊桑柘稀秋色曉依依野燒侵河斷山鴉向日飛行歌採樵去荷鍤刈一作治田歸秋一作村酒家家熟相邀白竹扉

被牒行縣因書所見呈寮友

周禮恤凶荒輶車出四方土龍朝祀雨田火夜驅蝗木落孤村迴原高百草黃亂鷗鳴古堞寒雀聚空倉桑野人行鱉魚陂鳥下梁晚烟茅店月初日叢林霜墮戶催寒候叢祠禱歲穰不妨行覽物山水正蒼茫

綠氏縣作

亭候徹郊畿人家嶺坂西青山臨古縣綠竹繞寒溪道上行收穗桑間晚漑畦東臯有深趣便擬卜幽棲

又行次作

秋色滿郊原人行禾黍間雉飛橫斷澗燒響入空山野水蒼烟起平林夕鳥還嵩嵐久不見寒碧更展顏

送梅秀才歸宣城

從學方年少還家罄囊金久為江北客能作洛生吟罷亞霜前稻鉤轡竹上禽歸帆何處落應拂野梅林

鞏縣陪祭獻懿二后回孝義橋道中作

落日漢陵道初寒慘暮颯遙看山口火暗渡洛川橋不見新園樹空聞引葬蕭林鴉棲已定猶一作獨此倦征鏤

送謝學士歸闕

供帳拂朝烟征鞍去莫攀人醒風外酒馬度雪中關舊府誰同在新年獨未還遙應行路者偏識綵衣斑

河南王尉西齋

寒齋日蕭索天外敞簷楹竹雪晴猶覆山窗夜自明禽歸窺野客雲去入重城欲就陶潛飲應須載酒行

張主簿東齋

官舍掩寒扉聊同隱者棲溪流穿竹過一作迥山鳥入城啼賓主高談勝心冥外物齊惟應朝枕夢長厭隔隣一作林雞

留守相公禱雨九龍祠應時獲澍呈府中同寮

古木鬱沉沉祠亭相袞臨雷驅山外響雲結日邊陰履屨來初合依微勢稍深土膏潛動脈野氣欲成霖隴上連雲色田家擊壤音明光應奏瑞黃屋正焦心帝邑三川美離宮萬瓦森廢溝鳴故苑紅籬發

青林南畝猶須勸餘春尚可尋應容後車一作車後客時作洛生吟

春日獨遊上林院後亭見櫻桃花奉寄希深聖俞仍酬遞中

見寄之什

昔日尋春地今來感歲華人行已荒徑花發半枯槎高樹林端出殘陽水外斜聊持一罇酒徒倚憶天涯

獨至香山憶謝學士一作希深

伊水弄春沙山臨水上斜曾為謝公客偏一作偏入梵王家陰澗初生草春苔自落花却尋題石處歲月已堪嗟

春晚同應之偶至普明寺小飲作

偶來林下徑共酌竹間亭積雨添方一作芳沼殘花點綠萍野陰侵席潤芳氣襲人醒禽鳥休驚顧都忘兀爾形

黃河八韻寄呈聖俞

河水激箭險誰言航葦遊堅冰馳馬渡伏浪卷沙流樹落新摧岸湍驚忽改洲擊龍時退鯉漲潦不分牛萬里通槎漢千帆下漕舟怨歌今罷築故道失難求灘急風逾響川寒霧不收詎能窮禹跡空欲問張侯

和應之同年兄秋日雨中登廣愛寺閣寄梅聖俞

經年都洛與君交共許詩中思最豪舊社更誰能擁鼻新秋有客獨登高徑蘭欲謝悲零露籬菊空開乏凍醪縱使河陽花滿縣亦應留滯感潘毛

晚過水北

寒川消積雪凍浦漸流通流日暮人歸盡沙禽上釣舟

罷官西京回寄河南張主簿

歸客下三川孤郵暫解鞍鳥聲催暮急山氣欲晴寒已作秋霖詠猶懷祖帳歡更聞溪溜響疑是石樓灘

寄西京張法曹

幕府三年客羣居幾日親初分闕一作關口路猶見洛陽人壠麥晴將秀田花晚自春向家行漸近豈復倦征輪

離彭婆值雨投臨汝驛回寄張九屯田司錄

投館野花邊羸驂晚不前山橋斷行路溪雨漲春田樹冷無棲鳥村深起暮烟洛陽山已盡休更望伊川

朱家曲一本有并引字

朱家曲自許縣北門上赤坂岡分道西行入小巷三十里有村
市臨古河商賈之販京師者舟車皆會此居民繁雜宛然如江
鄉子以事偶至此宿旅邸明日遂赴京師

行人傍衰柳路向古河窮桑柘田疇美漁商市井通新歌晚入浦舟
子夜乘風旅舍孤烟外天京王氣中山川許國近風俗楚鄉同宿客
雞鳴起驅車猶更東

行至棧澗作

霜後葉初鳴羸驂遠澗行川原人遠近禾黍日晴明病質驚殘歲歸
塗厭一作歷暮程空林聚寒雀疑已作春聲

送謝希深學士北使

漢使入幽燕風烟兩國間山河持節遠亭障出疆閑征馬聞笳躍雕
弓向月彎禦寒低便面贈客解刀環鼓角雲中壘牛羊雪外山穹廬
鳴朔吹凍酒發一作啟朱顏塞草生侵磧春榆綠滿關應須鴈北嚮
方值使南還

送賈推官赴絳州

白雲汾水上人北鴈南飛行李山川遠風霜草木腓郡齋賓榻掛幕
府羽書稀最有題與客偏思玉塵揮

送張如京知安肅軍

相逢舊從事新命忽臨戎界上山河壯軍中鼓角雄朔風馳駿馬塞
雪射驚鴻試取封侯印何如筆硯功

送威勝軍張判官

北地不知春惟看榆葉新岑多武士玉塵重嘉賓野燧一作燒驚
行客烽烟入遠一作暮塵繫書沙上厲時寄日邊人

送同年史褒之武功尉

久作遊邊客常悲入塞笳今茲一尉遠猶困折腰嗟白馬關中道青

天一作烟棧外家過秦應弔古惟有故山斜

送祝熙載之東陽主簿

吳江通海浦畫舸候潮歸疊鼓山間響高帆鳥外飛孤城秋枕水千
室夜鳴機試問還家客遼東今是非

鄭十一先輩赴四明暮一本莊初發洋川辭不行

梁漢褒斜險夫君畏遠遊家臨越山下帆入海潮頭岸柳行稍盡江
蕩歸漸秋故鄉看衣錦寧羨李膺舟

送丁元珍峽州判官一作送朱處仁

為客久南方西游更異鄉江通蜀國遠山閉楚祠荒油幕無軍事清
猿斷客腸惟應陪主諾不費日飛觴

送楚建中潁州法曹

冠蓋感西京當年相府榮會陪鹿鳴宴偏一作偏識洛陽生共歎長
沙隨空存許劭評堪嗟桃李樹何日見陰成

送王尚恭隰州幕

去國初游宦從軍苦寂寥愁雲帶一作傍城起畫角向山飄秋勁方
馳馬春寒正襲貂遙知為客恨應賴酒盃消

送王尚詰三原尉

初仕便西轅驪駒兩佩環山河識天府風雨度函關桑柘千疇富人
烟萬井閑欲為京洛詠應苦簿書閒

送餘姚陳寺丞景

銅墨佩腰間中流望若一作似仙鳴蟬汴河柳畫鷁越鄉船下瀨逢
江鴈瞻氛落海鷲山川仍客思盡入隱侯篇

送廖八下第歸衡山

曾作關中客嘗窺百二疆自言秦隴一作嶺水能斷楚人腸失意倦
京國羈愁成鬢霜何如伴征鴈日日向衡陽

夏侯彥濟武陟尉

風烟地接懷井邑富田垓河近聞冰坼山高見雨來官閑同小隱酒
美足銜盃好去東籬菊迎霜正欲開

遠山

山色無遠近看山終日行峯巒隨處改行客不知名

宋宣獻公挽詞三首

望繫朝廷重文推天下工清名畏楊綰故事問胡公物議垂為相風
流頓已窮仁言博哉利獻替有遺忠

識度推明哲風猷藹縉紳何言止中壽遂不乘洪鈞翰墨時爭寶詞
章晚愈新哭哀文伯母悲感路傍人

結髮一作叢蓬明王馳聲著兩朝奠楹先有夢升屋豈能招贈服三
公姿兼榮七葉貂春風笳鼓咽松柏助蕭蕭

初出真州泛大江作

孤舟日日去無窮行色蒼茫香霧中山浦轉帆迷向背夜江看斗辨
西東艤田漸下雲間鴈霜日初丹水上楓蓴菜鱸魚方有味遠來猶
喜及秋風

江行贈厲

雲間征鴈水間樓繪繖方多羽翼微歲晚江湖同是客莫辭伴我更
南飛

松門已下五首一本屬夷陵九詠

島嶼松門數里長懸崖對起碧峯雙可憐勝境一作景當窮塞飜使
留一作流人戀此邦亂石驚灘喧醉枕淩沙明月入船窗因遊始覺
南來遠行盡荆江見蜀江

下牢津

依依下牢口古戍鬱嵯峨入峽江漸曲轉灘山更多白沙飛白鳥青
障一作障合青蘿遷客初一作嘗一作多經此愁詞作楚歌

龍溪

潯潯出亂峯演漾綠蘿風淺瀨寒難涉危樑路不通朝雲起潭側飛
雨徧江中更欲尋源去一作上山深不可窮

勞停驛

孤舟轉山曲豁爾見平川樹杪帆初落峯頭月正圓荒烟幾家聚瘦
野一刀田行客愁明發驚難為道前

黃溪夜泊

楚人自古登臨恨暫到愁腸已九回萬樹蒼烟三峽暗滿川明月一
猿哀非鄉況復驚殘歲慰客偏宜把酒盃行見江山一作山河且吟
詠不因遷謫豈能來

望州坡

聞說夷陵人為愁共言遷客不堪遊崎嶇幾日山行倦却喜坡頭見
峽州

居士集卷第十

居士集卷第十一 集十一

律詩五十七首

初至夷陵答蘇子美見寄

三峽倚岩甕一作甕遷地最造物華雖可愛鄉思獨無聊
江水流清嶂猿聲在碧霄野望抽夏笋叢橘長春條
未臘梅先發經霜葉不凋江雲愁一作懸蔽日山霧晦連朝
斫谷爭收棹梯林鬪摘椒巴賚船賈集一作巴江船賈至蠻市酒旗招
時節同荆俗民風載楚謠一作歌成調笑擦
一作燕鬼聚喧囂夷陵之俗多淫奔又好祠祭每遇祠時里民數百共餞其餘里語謂之孫鬼因此多成鬪訟得罪宜投裔
包羞分折腰光陰催晏歲牢落慘驚飆白髮新年出朱顏異域銷縣樓朝見虎官舍夜聞鶉寄信無秋鴈思歸望斗杓須知千里夢長繞洛川橋

冬後三日陪丁元珍遊東山寺

幕府文書日已希清罇歲晏喜相攜
寒山帶郭穿松路瘦馬尋春踏雪泥
翠蘚蒼崖森古木綠蘿盤石暗深溪
爲貪賞物來猶早迎臘梅花吐未齊

送前巫山宰吳殿丞字照卿

俊域當年仰下風天涯今日一罇同
高文落筆妙天下清論揮犀服坐中江上掛帆明月峽雲間謁帝紫微宮
山城寂寞少嘉客喜見瓊枝一作林慰病翁

龍興寺小飲呈表臣元珍

平日相從樂會文博臬靈馬占朋分罰籌多似昆陽矢酒令嚴於細柳軍蔽日雪雲猶豔豔欲晴花氣漸氤氳
一罇萬事皆毫末蝶蠹螟蛉豈足云

縣舍不種花惟栽楠木冬青茶竹之類因戲書七言四韻

結綬當年仕兩京自憐年少體猶輕
伊川洛浦尋芳徧魏紫姚黃照

眼明客思病來生白髮山城春至少紅英
芳叢密葉聊須種猶得蕭蕭聽雨聲

至喜一作虛白堂新開北軒手植楠木兩株走筆呈元珍表

臣

爲憐碧砌宜佳樹自斷蒼苔選綠叢
不向芳菲趁一作赴開落直須霜雪見
青葱披條泣轉清晨露響葉蕭騷
半夜風時掃濃陰北窗下一枰閑且伴衰翁

戲答元珍一本下云花時久雨之什

春風疑不到天涯二月山城未見花
殘雪壓枝猶有橘凍雷驚筍欲抽芽
夜聞歸鶻生鄉思病入新年一作鳥聲漸變知芳節人意無聊感物華會是洛陽花
下客野芳雖晚不須嗟

初晴獨遊東山寺五言六韻

日暖東山去松門數里斜山林隱者趣
鐘鼓梵王家地僻遲春節風晴變一作別
物華雲光漸容與鳥啞已交加冰下泉初動
烟中茗未芽自憐多病客來探欲開花

夷陵歲暮書事呈元珍表臣一本作元珍判官表臣推官

蕭條雞犬亂山中時節崢嶸忽一作歲已窮
遊女鬢風俗古野巫歌舞歲年豐夷陵俗朴陋
惟歲暮祭鬼則男女數百相從而樂飲婦女競爲野服以相遊嬉
夷陵俗下一本有古字平時都邑今爲陋敵國江山昔最雄
三國時吳蜀戰爭於此荆楚先賢多勝迹不辭攜酒問鄰翁處士何參居縣舍西好學多知荆楚故事

夷陵書事寄謝三舍人一作代書寄舍人三丈

春秋楚國西偏境陸羽茶經第一州紫羅青林長蔽日綠叢紅橘最宜秋
道塗處險人多負邑屋臨江俗善泐臘市漁一作魚鹽朝暫合淫祠蕭鼓歲無休
風鳴燒入空城響雨惡江崩斷岸流月出行歌聞調笑花開啼鳥亂鉤鞞一本有訟庭畫地通人語邑政觀風聞徑

十俗難輕人自樂山川信笑客偏愁四句黃牛峽口經新歲白玉京
中夢舊遊曾是洛陽花下客欲誇風物向君羞

戲一作寄贈丁判官

西陵江口折寒梅爭勸行人把一一作酒盃須信春風無遠近維舟
處處有花開

寄梅聖俞一本注夷陵作

青一作春山四顧亂無涯雞犬蕭條數百家楚俗歲時多雜鬼蠻鄉
一作風言語不通華繞城江急舟難泊當縣山高日易斜擊鼓踏歌
成夜市邀龜卜雨趁燒一作春禽叢林白晝飛妖鳥庭砌非時見異
花惟有山川為勝絕寄人堪作畫圖誇

離峽州後回寄元珍表臣一本作元珍判官表臣推官

經年遷謫厭荆蠻惟有江山興未闌醉裏人歸青草渡夢中船下武
牙灘野花零落一作亂風前亂一作舞飛雨蕭條江上寒荻筍時魚
方有味恨無佳客共盃盤

再至西都一作寄謝希深

伊川不到十年間魚鳥今應怪我一作我字還浪得浮名銷壯節差
將一作看白髮見一作對青山野花向客開如一作異花向我情猶
笑芳草留人意自閑卻到一作行至謝公題壁處向風清淚獨一作
臨風清淚落潯潯

過錢文僖公白蓮莊

城南車馬地行客過徘徊野水寒猶入餘花晚自開命賓曾授簡開
府最多才今日西州路何人更獨來

謝公挽詞三首

始見行春旆俄聞引葬蕭笑言猶在耳寬魄遂難招天象奎星暗辭
林玉樹獨朔風吹霰雪銘旌共飄飄

前日賓齋宴今晨奠柩觴死生公自達存沒世徒傷舊國難歸葬餘

貲不給喪平生公輔志所一作可得在文章

樂事與良辰平生愛洛濱泉臺一閉夜蒿里不知春翰墨猶新澤園
書已素塵堪憐寢閉哭猶有舊時賓

愁牛嶺

邦人盡一作自說畏愁牛一作牛愁不獨牛愁我亦愁終日下一作
遠山行百轉卻從山脚望山頭

寄子山待制二絕一本後篇作別鎮陽寄沈待制

留滯西山獨可嗟殘春過盡始還家落花縱有那堪醉一作看一作
愛何況歸時無落花

聞君屢醉賞紅英落盡殘花酒未醒嗟我落花無分看莫嫌狼藉掃
中庭

寄秦州田元均

由一作近來邊將用儒臣坐以威名撫漢軍萬馬不嘶聽號令諸蕃
無事著一作樂耕耘夢回夜帳聞羌笛詩就高樓對隴一作暮雲莫
忘一作望鎮陽遺愛在一作地北潭桃李正氛氲一作春深桃李正
細細

送沈待制陝西都運使

幾歲瘡痍近息兵經營方喜得時英從來漢粟勞飛輓嘗使秦人自
戰耕道左旌旗諸將列馬前弓一作冠劍六蕃迎知君材力多閑暇
剩聽陽關醉後聲

樂城遇風効韓孟聯句體

歲暮氛霾惡冬餘氣候爭吹噓回煖律號令發新正遠響來猶漸狂
奔勢益橫頽城屢戰鼓掠野過陰兵掃蕩無餘竊顛摧鮮立莖五山
搖岌業九鼎沸煎烹玉石焚罔裂波濤卷海傾遙聽午合市爭呼夜
驚營慘極雲無色陰窮火自生電鞭時著劃雷軸助喧轟孔竅千聲
出陰幽百怪呈狐妖憑蒼蒼鬼焰走青燄奮怒神憎悚中休耳暫清

胡兵占月暈江客候暹鳴飄葉千艘失飛空萬瓦輕獵豪添馬健船
穩想帆征畏壓頻移席陰祈屢整纓凍消初醒蟄枯活欲抽萌病體
愁山館春寒賴酒鐺雞號天地白登壇看晴明

過中渡二首

中渡橋邊十里堤寒蟬一作梅落盡柳條衰年年塞下春風晚誰見
輕黃弄色時

得歸還自歎淹留中渡橋邊柳拂頭記得來時橋上過斷冰殘雪滿
河流

自河北貶滁州初入汴河聞鶯

陽城旋裏新來鶯趁伴南飛逐一作何事來隨南越船野岸柳黃霜
正白五更驚破客愁眠

自勉

引水澆花不厭勤便須已有鎮陽春官居處處如郵傳誰得二年作
主人

席上送劉都官

都城車馬日喧喧雖有離歌不慘顏豈似客亭臨野岸暫留罇酒對
青山天街樹綠騰歸騎玉殿霜清綴曉班莫忘西亭會醉處月明風
溜響潺潺

寄劉都官

別後山光寒更綠秋深酒美色仍清繞亭黃菊同君種獨對殘芳醉
不成

書王元之畫像側在瑯琊山

偶然來繼前賢迹信矣皆如昔日言諸縣豐登少公事一家飽暖荷
君恩想公風采常如在顧我文章不足論名姓已光青史上壁間容
貌任塵昏公貶滁州謝上表云諸縣豐登苦無公事一家飽暖共荷
君恩

送京西提刑趙學士

題輿嘗屈佐留京攬轡今行一作來按屬城楚館尙看淮月色嵩雲
應過虎關迎春寒酒力風中醒日暖梅香雪後清野俗經年留惠愛
莫辭臨別醉冠傾

寄題宣城縣射亭

作邑三年事事勤宣城風物自君新已能爲政留遺愛何必栽花遺
後人藹若芝蘭芳可襲温如金玉粹而純友朋欣慕自如此何況斯
民父母親

豐樂亭遊春三首

綠樹交加山一作新陰野鳥啼晴風蕩漾落一作晚晴斜日雜花飛
鳥歌花舞太守醉明日一作月酒醒春已一作色歸

春雲淡淡日輝輝草惹行襟絮拂衣行到亭西逢太守監輿酪酌插
花歸

紅樹青山日欲斜長郊草色綠無涯遊人不管春將老一作盡來往
一作空遶亭前踏落花

謝判官幽谷種花

淺深紅白宜相間先後仍須次第栽我欲四時攜酒去莫教一日不
花開

畫眉鳥一作郡齋聞百舌

百轉千聲隨一作任意移山花紅紫樹高低始知鎖向金籠聽不及
林間自在啼

懷嵩樓新開南軒與郡僚小飲

繞郭雲烟一作開烟雲匝幾重昔人曾此感懷嵩霜林落後山爭出
野菊開時酒正濃解帶西風飄畫角倚欄斜日照青松會須乘醉攜
嘉客踏雪來看羣玉峯

送張生

一別相逢十七春，顏頰衰髮互相詢。江湖我再為遷客，道路君猶困旅人。老驥骨奇心尚壯，青松歲久色逾新。山城寂寞難為禮，一作客濁酒無辭舉爵頻。

田家

綠桑高下映平川，一作穡罷田神笑語諠。林外鳴鳩春雨歇，屋頭初日杏花繁。

別滁

花光濃爛柳輕明，酌酒花前送我行。我亦且一作抵如常日醉，莫教絃管作離聲。

答謝判官獨遊幽谷見寄

聞道西亭偶獨登，悵然懷我未忘情。新花自向遊人笑，啼鳥猶為舊日聲。因拂醉題詩句在，應憐手種樹陰成。須知別後無由到，莫厭頻攜野客行。

招許主客

欲將何物招嘉客，惟有新秋一味涼。更一作簾掃廣庭寬一作開白敞，少容明月放一作吐清光。樓頭破鑑看將滿，瓊面浮蛆撥已香。仍一作更約多為詩準備，共防梅老敵難當。

金鳳花

憶繞朱欄手一作喜自栽，綠一作繁叢高下幾番開。中庭雨過無人迹，狼籍深紅點綠苔。

鷺鷥

風格孤高塵外物，性情閑暇水邊身。盡日獨行溪淺處，青苔白石見纖纖。

野鶻

鮮鮮羽毛耀朝輝，紅粉墻頭綠樹枝。日暖風輕言語軟，應將喜報主人知。

木芙蓉

種處雪消春始動，開時霜落鴈初過。誰栽金菊叢相近，織出新番蜀錦窠。

樵者

雲際依依認舊林，斷崖荒磴路難尋。西山望見朝來雨，南澗歸時渡處深。

詠雪

至日陽初復，豐年瑞遽臻。飄飄初未積，散漫忽無垠。萬木青烟滅，千門白晝新。往來衝更高，下著何勻望。好登長樹平，堪走畫輪馬。塞毛縮蝟弓，勁力添鈞客。醉看成眩兒，嬌一作驕且擊虛堂明。永夜高閣照清晨，樹石詩翁對川原。獵騎陳陳，狐迷舊穴，飢一作饑雀噪空。困此土偏宜稼，而予盪長人應須待和暖，載酒共行春。

送楊先輩登第還家

解榻方欣待傳英，掛帆千里忽南征。錦衣白日還家樂，鶴髮高堂獻壽榮。殘雪楚天寒料峭，春風淮水浪崢嶸。知君歸意先飛鳥，莫惜停舟酒屢傾。一作餞行

初至潁州西湖一作到潁治事之明日行西湖上種瑞蓮黃楊一作因與郡官小酌其上聊書所見寄淮南轉運呂度支

發運許主客

平湖十頃碧琉璃，四面清陰乍合時。柳絮已將春去遠，海棠應恨我來遲。啼一作鳴禽似與遊人語，明一本作好月閑撐野一作小艇隨。每到最佳堪樂處，卻思君共把芳卮。

三橋詩皇祐元年新作三橋而名之既而又為之詩

朱欄明綠水，古柳照斜陽。何處偏宜望，清蓮對女郎。青蓮閣名後改，作去思堂。

右宜遠

鳴騶入遠樹飛蓋渡長橋水關鷺雙起波明魚自跳

右飛蓋

輕舟轉孤嶼幽浦漾平波回看望佳處歸路逐漁歌

右望佳

答通判呂太博

千頃芙蓉蓋水平 鄂伯荷花四望極目揚州太守舊多情畫盆圍處
花光合予嘗探蓮千朵插以畫盆圍繞坐席紅袖傳來酒令行又嘗
命坐客傳花人摘一葉葉盡處飲以爲酒令舞踏落暉留醉客歌遲
檀板換新聲如今寂寞西湖上雨後無人看落英

祈雨曉過湖上

清晨驅馬思悠然渺渺平湖碧玉田曉日未昇先起霧綠陰一本作
雲初合自生烟身閑始覺時光好春去猶餘物色妍更待四郊甘雨
足相隨簫鼓樂豐年

居士集卷第十一

居士集卷第十二 集十二

律詩五十六首

送一作寄謝中舍二首

滁南一作陽幽谷抱山斜我鑿清泉子種花故事已傳遺一作留傳
父老說世人今一作分作畫圖誇金闈引籍子方壯白髮盈簪我可
嗟試問弦歌爲縣政一作意何如罇俎樂無涯
喜聞嘉譽藹淮壖又看吳一作送征帆解畫船龍啟遺民談善政江
山餘思入新篇人生白首一作憂傷白髮吾今爾仕路一作官青雲
子勉旃舉棹南風吹酒醒離觴莫惜少一作更留連

酬張器判官泛溪

園林初夏有清香人意乘閒味愈長日暖魚跳波面靜風輕鳥語樹
陰涼野亭飛蓋臨芳草曲渚迴舟帶夕陽所得平時爲郡樂况多嘉
客共銜觴

西園石榴感開

荒臺野徑共躋攀正見榴花出短垣綠葉晚驚啼處密紅房初日照
時繁最憐夏景鋪珍暈尤愛晴香入睡軒乘興便當攜酒去不須旌
騎擁車轍

西湖戲作示同遊者一作初泛西湖

菡萏香清一作綠菱紅蓮畫舸浮使君寧一作不復憶揚州都將二
十四橋月換得西湖十頃秋

夢中作

夜涼吹笛千山月路暗迷人百種花棋罷不知人換世酒闌無奈客
思家

秀才歐世英惠然見訪於其還也聊以贈之

相逢十年舊暫喜一罇同昔日青衫令今爲白髮翁侯時君子守一
作處求士有司公况子之才美焉能久困窮

送楊君之任永康

劍峯雲棧未嘗行圖書會看已可驚險若登天懸鳥道下臨無地瀉
江聲折腰莫以微官恥爲政須通異俗情况子多才兼笑行薦章期
卽達承明

紀德陳情上致政太傅杜相公二首二云與丞相太傅杜公

唱和一十二首自此而下

儉節清名世絕倫坐令風俗可還淳貌先年老因憂國事與心違始
乞身四海儀刑瞻舊德一罇談笑作閑人鈴齋幸得親師席東向時
容問治民

事國一心勤以一作且率還家五福壽而康風波已出憑忠信松柏
難凋耐雪霜昔日青衫遇知己今來白首再升堂里門每入從千騎
賓主俱榮道路光

太傅杜相公索聚星堂詩謹成一本云太傅相公寵答佳篇

仍索拙詩副本謹吟成四韻以敘鄙懷

楚肆固知難銜玉邱門安敢輒論詩藏之十襲真無用報以雙金豈
所一作自宜已恨語言多猥冗况因不盡杓一作酌正淋漓願投几格
資吟噤欲展須於欲睡時

和太傅杜相公寵示之作一本屢賜嘉篇感惜謹依元韻聊

述愧佩之意

平生孤拙荷公知敢向公前自銜詩憂患飄流誠已甚文辭衰落固
其宜非高僅比巴音下少味還同魯酒滴兩辱嘉篇永爲寶豈惟榮
耀詫當時

太傅杜相公有答兗州待制之句其卒章云獨無風雅可流

傳因輒成一本作因成四韻

南都已見成新集東魯休嗟未作詩霖雨曾爲天下福甘棠何止郡
人思元劉事業時無取姚宋篇章世不知二美惟公所兼有後生何

者欲攀追

依韻答杜相公寵示之作一本云伏蒙寵示佳篇以不赴東

國之會某亦經春多病誠有可嗟謹依元韻輒紆鄙素一本

於經春多病下又有略無少暇四字

醉翁豐樂一閑身憔悴今來汴水濱每聽鳥聲知改節因吹柳絮惜

殘春蓋經春罕見花也平生未省降詩敵近數和難韻甚覺率雅到

處何嘗訴酒巡壯志銷磨都已盡看花翻作飲茶人

依韻和杜相公喜雨之什

歲時豐儉若循環天幸非由一作因拙政然一雨雖知為美澤三登

猶未一作未足補凶年京東累歲不熟桑陰蔽日交垂路麥穗含風

秀滿田千里郊原想如畫正宜攜酒望晴川

謝太傅杜相公寵示嘉篇

凜凜節奇霜澗柏昭昭心瑩玉壺冰正身尚可清風俗嘗暑何須厭

鬱蒸塵柄屢揮容一作會請益龍門雖峻忝先登立朝行己師資久

寧止篇章此服膺

答杜相公寵示去思堂詩

當年丞相倦洪鈞再節初來潁水濱惟以琴罇樂嘉客能將富貴比

浮雲西溪水色春長綠北渚花光暖一作老自薰去思堂在北渚之

北臨西溪溪晏公所開也得載公詩播人口去思從此四夷聞

答太傅相公見贈長韻

蹤跡本羈單登門二十年平生任愚拙自進取因緣憂患經多矣疲

驚尚勉旃凋零鷺谷友修與尹師魯蘇子美同出門下憔悴鴈池邊

忽忽良時失區區俗慮闌公齋每偷暇師席屢攻堅善誨常一本作

嘗無倦餘談亦可編每接公論議皆立朝行己之節至於談笑之間

亦多記朝廷故事皆可紀錄以貽後生仰高雖莫及希驥豈非賢報

借觀五老詩次韻為謝一本注云即丞相杜公太子賓客王

傑光祿卿畢世長兵部郎中朱實尚書郎馮平

脫遺軒冕就安閑笑傲邱園縱倒冠白髮憂民雖種種丹心許國尚

桓桓鴻冥得路高難慕松老無風韻自寒聞說優游多倡和新篇何

惜盡一作為傳一作畫圖看

答杜相公惠詩一本云近以藥苗茶具為獻伏蒙報以嘉篇

二云謹於別韻課成一首

藥苗本是山一作仙家味茶具偏於野客宜敢以微誠將薄物少資

清興入新詩言無俗韻精而勁筆有神鋒老更奇二寶收藏傳百一

作在世豈惟榮耀詫當時

去思堂手植雙柳今已成陰因而有感

曲欄高柳拂層簷却憶初栽映碧潭人昔共遊今孰在樹猶如此我

何堪壯心無復身從老世事都銷酒半酣後日更來知有幾攀條莫

惜駐征驂

和陸子履再遊城西李園

京師花木類多奇常恨春歸人不歸車馬喧喧走塵土園林處處鎖

芳菲殘紅已落香猶在羈客多傷涕自揮我亦悠然無事者約君聯

騎訪郊圻

內直對月寄子華舍人持國廷評一作呈原父

禁署一作省沉沉玉漏傳月華雲表溢金盤纖埃不隔光初滿萬物

無聲夜向闌蓮燭燒殘愁夢斷蕙爐薰歛覺衣單水精宮鎖黃金闕

故比人間分外寒

答子華舍人退朝小飲官舍一作和子華朝退寒甚陪諸公

飲

玉階朝罷卷晨班官舍相留一笑間與世漸疎嗟已老一作緣老態

得朋為樂偶偷閑紅牋擲管吟紅藥綠酒盈罇舞綠鬢自是風情年

少事多慙白髮與蒼顏

內直晨出便赴奉慈齋宮一作宿馬上口占一本云呈子華

子履

凌晨更直九門開驅馬悠悠望禁街霜後樓臺明曉日天寒烟霧著
宮樓山林未去猶貪寵罇酒何時共放懷已覺蕭條悲晚歲更憐衰
病怯清齋

景靈朝謁從駕還宮

琳館清晨謁瑞氛玉旒朝罷奏韶鈞綠槐夾路飛黃蓋翠輦鳴鞘向
一作入紫宸金闕日高猶泣露綵旗風細不驚塵自慙白首追時彥
行近儲胥忝侍臣

憶滁州幽谷

滁南一作豐山幽谷抱千峯高下山花遠近紅當日辛勤皆手植而
今閑落任春風主人不覺悲華髮野老猶能說醉翁誰與援琴親寫
取夜泉聲在翠微中

和韓學士襄州聞喜亭置酒一作和飲聖學士聞喜置酒即

事

截薛高城漢水邊登臨誰與共躋攀清川萬古流不盡白鳥雙飛意
自閑可笑沉碑憂岸谷誰能把酒對江山少年我亦曾遊目風物今
思一夢還

寄題梅龍圖滑州溪園一作西溪

聞說溪園景漸佳遙知清興已無涯飲闌歸騎多一作去乘月雪後
尋春自探花百轉黃鸝消永日雙飛白鳥避鳴笳平生喜接君酬一
作嗟予每許陪高唱不得罇前詠落霞

奉使道中五言長韻

初旭一作日瑞霞烘都門祖帳供親持使者節曉出大明宮城闕青
煙起樓臺白霧中繡轡一作鞍驕躍躍貂袖紫蒙蒙朔野驚颯慘邊

城畫角雄過橋分水回首羨南鴻地里山川隔天文日月同兒童
能走馬婦女亦腰弓度險行愁失盤高路欲窮一作斗絕誇天險高
盤長路窮山深聞喚鹿林黑自生一作成風松壑寒逾響冰溪一作
溪流咽復通望平愁驛迴野曠覺天穹駿足來山北輕禽出海東合
圍飛走盡移帳水泉空講信鄰方睦尊賢禮亦隆研一作研冰燒酒
赤凍一作斫膾縷霜紅白草經春在黃沙盡日濛新年風漸變歸路
雪初融祇事須疆力嗟予乃病翁深歎漢蘇武歸國不論功

奉使契丹初至雄州一作澶塞

古關衰柳聚寒鴉駐馬城頭日欲斜一作駐馬關頭見落霞猶去西
樓二千里行人到此莫思家

奉使契丹回出上京馬上作

紫貂裘暖朔風驚潢水冰光射日明笑語同來向公子馬頭今日向
南行

送滑州王龍圖

漢軍一作兵十萬控山河玉帳優游暇日多夷狄從來懷信義廟堂
今不用干戈吟餘畫角吹殘月醉裏紅燈炫綺羅此樂直須年少壯
嗟余心志已蹉跎

李留後家聞箏坐上作余少時嘗聞一鈞容老樂工箏聲與

時人所彈絕異云是前朝教坊舊聲其後不復聞至此始復

一聞也

不聽哀箏二十年忽逢纖指弄鳴絃絃蠻巧轉花間舌鳴咽交流冰
下泉嘗謂此聲今已絕問渠從小自誰傳樽前笑我聞彈罷白髮蕭
然涕泫然

送鄆州李留後

北州遺頌謫嘉聲東土還聞政有成組甲光寒圍夜帳綵旗風暖看
春耕金斂墜鬢分行立玉塵高談四坐傾富貴常情誰不羨愛君風

韻有餘清

子華學士傷直未滿遠出館伴病夫遂當輪宿輒成拙句奉

呈

萬釘寶帶爛腰錢賜一作錫宴新陪一笑歡金馬並遊年最少玉堂
初直夜猶寒自嗟零一作流落凋顏費晚得飛翔接羽翰今日遽聞
催遞宿不容多病養衰殘

禮部貢院閣進士就試自此而下二十首皆禮部貢院唱和

一本云凡二十二首蓋二首見外集

紫案焚香暖吹輕廣庭清曉席羣英無譁戰士銜枚勇下筆春蠶食
葉聲鄉里獻賢先德行朝廷列爵待公卿自慙衰病心神耗賴有羣
公鑒裁一作擇又作識精

和梅聖俞元夕登東樓

遊豫恩同萬國懽新年佳節候初還華燈燦燦春風裏黃金亭亭瑞
霧間可愛清光澄夜色遙知喜氣動天顏自憐曾預一作與稱觴列
獨宿冰廳夢帝關

再和

禁城車馬夜喧喧閑繞危欄一作樓去復還遙望觚稜烟靄外似聞
天樂夢魂間豈無罇酒當佳節況有朋歡慰病顏待得歸時花在否
春禽簷際已關關

又和

憑高寓目偶乘閑袂服遊人見往還明月正臨雙闕上行歌遙聽九
衢間黃金絡一作束馬追朱憶紅燭籠紗照玉顏與世漸一作已疎
嗟老矣佳辰樂事豈相關

憶鶴呈公儀一作和公儀憶鶴

一笑相驩一作從樂得朋誦君雙鶴句尤清高懷自喜凌雲格俗耳
誰思警露聲所好與時雖異趣累心於物豈非情歸休約我攜琴去

共看婆娑舞月明

答王禹玉見贈一作和禹玉書事

昔時叨入武成宮曾看揮毫氣吐虹夢寐閑思十年舊一作事笑談
今此一罇同喜君新賜黃金帶顧我宜為白髮翁自古薦賢為報國
幸依精識士稱公

答王內翰范舍人一本云敘懷謝景仁禹玉

相從一笑歡無厭屢獲新篇喜可涯自昔居前諂稊秕幸容相倚媿
兼葭白麻詔令追三代一本注禹玉年前方入翰林書史文章自一
家一本注景仁修撰又同書局我亦諫垣新忝命君恩未報髮先華
禹玉新除學士景仁新兼修撰

戲答聖俞持燭之句

辱君贈我言雖厚聽我酬君意不同病眼自憎紅蠟燭何人肯伴白
鬚翁花時浪過如春夢酒敵先甘伏下風惟有吟哦殊不倦始知文
字樂無窮

小桃一作和公儀正月桃

雪裏花開人未知摘來相顧共驚疑便當索酒花前醉初見今年第
一枝

戲書

支離多病歎衰顏賴得一作有羣居一笑歡人老思家甚年少身閑
泥酒過春寒來時御柳一作水天街凍歸去梨花禁鑿殘縱使開門
佳節晚未妨雙鶴舞霜翰一作朝鎖漢臺空張望欲將春恨託飛翰

春雪一本上有和聖俞字

逗曉一作戶風聲惡寒簾雪勢斜應憐未歸客故勒欲開花病思寒
添睡春愁夢在家誰能慰寂寞惟有酒如霞

和梅公儀嘗茶

溪山擊鼓助雷驚逗曉靈芽發翠莖摘處兩旗香可愛貢來雙鳳品

尤精寒侵病骨惟思睡花落春愁未解醒喜共紫甌吟且酌羨君蕭洒有餘清

和較藝書事 一作奉答馬玉再示之作

相隨懷詔下天關一鎖南宮隔幾旬玉塵清談消永日金罇美酒惜餘春杯盤錫粥春風冷池館榆錢夜雨新猶是人間好時節歸休過我莫辭煩

和一作戲答公儀贈白一本無白字隲

梅公憐我髭如雪贈以雙禽 一作鷓鴣意有云但見尋常思白兔便疑不解醉紅裙吟齋雖喜留閑客野性寧忘在嶺雲我有銅臺方尺瓦歎非玉案欲酬君

再和用其韻 一作依韻再答公儀白隲

佳翫能令百事忘豈惟閑伴倒餘缸珍奇來自海千里皎潔明如壁一雙日暖朝籠青石砌春寒夜宿碧紗窗蠻煙瘴霧雖生處何必區區憶陋邦

和聖俞春雨

簷瓦蕭蕭雨勢疎寂寥官舍與君俱身遭鎖閉如鸚鵡病識陰晴似鶉鴝年少自愁花爛熳春寒偏著老肌膚莫嫌來往傳詩句不爾須當泥酒壺

出省有日書事

凌晨小雨壓塵輕閑憶登高望禁城樹色連雲春泱泱風光著草日晴明看榆吐莢鶯將落見鵲移巢忽已成誰向兒童報歸日爲翁寒食少 一作且留錫

和一本有馬玉字較藝將畢

槐柳來時綠未勻開門節物一番新踏青寒食追遊騎賜火清明忝侍臣拂面蜘蛛占喜事入簾蝴蝶報家人在李賀詩莫嗔年少思歸切白髮衰翁尚惜春

喜定號和馬玉內翰用其韻 一作和馬玉喜定號

衡鑿慙叨選英豪此所鍾古今參雅鄭善惡雜舉共揮翰飄飄思懷奇落落胸披文驚可畏奏下始開封但喜真才得寧 一作何處橫議攻欲知儒學感首善本三廳

和出省國朝之制禮部考定卷子奏上字號差臺官一人折

封出勝 一作和公儀上馬有作

僮奴 一作奴僮襍被莫相催待報霜臺御史來晴陌便當聯騎去春風任放百花開文章紙貴爭 一作看馳譽朝野人言慶得才共向丹墀侍 一作待臨選莫驚鱗鬣化風雷

居士集卷第十二

居士集卷第十三 集十三

詩五十五首

送鄭革先輩賜第南歸一本注革以累舉年老恩賜出身

少年鄉譽歎才淹六十猶隨貢士函握手親朋驚白髮還家閭里看
青衫閣酒空翠連衡阜門枕寒江落楚帆試問塵埃勤斗祿何如琴
酒老雲巖

和原父揚州六題六一作五

時會堂二首造貢茶所也

積雪猶封蒙頂樹驚雷未發建溪春中州地暖萌芽早入貢宜先百
物新

憶昔嘗修守臣職余嘗守揚州歲貢新茶先春自探兩旗開誰知白

首來辭禁得與金鑾賜一杯

自東門泛舟至竹西亭登岷邱入蒙谷戲題春貢亭

岷邱蒙谷接新亭畫舸悠悠春水生欲覓揚州使君處但隨風際管
絃聲

竹西亭

十里樓臺歌吹繁揚州無復似當年古來興廢皆如此徒使登臨一
慨然

岷邱臺

訪古高臺半已傾春郊誰一作隨從綵旗行喜聞車馬人同樂慣聽
笙歌鳥不驚

蒙谷

一徑崎嶇入谷中翠條紅刺春叢花深時有人相應竹密初疑路
不通

內直奉寄聖俞博士

千門鑰一作鎖入斷人聲樓閣一本作關沉沉夜氣生獨直偏知宮

漏永稍寒尤一作猶覺玉堂清霜雲映月鱗鱗色風葉飛空撼撼鳴
犬馬力疲恩未報坐驚時節已崢嶸

送梅龍圖公儀知杭州

萬室東南富且一作號富繁羨君風力有餘閑漁樵人樂江湖外一
作上談笑詩成罇俎間日暖梨花催美酒天寒桂子落空山郵筒不
絕如飛翼一作雖然不得陪佳賞莫惜新篇屢往還一作應有新篇
慰病顏

送沈學士知常州康

舊館芸香鎖寂寥齋於東下入秋濤江晴風暖旌旗颺木落霜清鼓
角高吟就綵牋賓已醉舞翻紅袖飲方豪平生粗得為州樂因羨君
行首重搔

聖俞在南省監印進士試卷有兀然獨坐之歎因思去歲同

在禮闈慨然有感兼簡子華景仁

南宮官舍苦蕭條常憶羣居接僑寮古屋醉吟燈豔豔畫廊愁聽雨
蕭蕭殘春共約無虛擲一歲那知忽復銷顧我心情又非昨祇思相
伴老漁樵

奉答聖俞歲日書事

積雪照清晨東風冷著人年光向一作隨老速物意逐時新賞酒閑
邀客披裘共一作自探春猶能自一作略勉彊顧我莫辭頻

夜聞春風有感奉寄同院子華紫微長文景仁

閨後春深雪始銷東風凌鑠勢方豪陽生草木黃泉動冰破江湖白
浪高未報國恩嗟病骨可憐身事一漁初少年自與芳菲競莫笑衰
翁擁弊袍

病告中懷子華原父

狂來有意與春爭老去心情漸不能世味惟存詩淡泊生涯半為病
侵陵花明曉日繁如錦酒撥浮醅綠似灑自是少年豪橫過而今癡

鈍若寒蠅

奉酬長文舍人出城見示之句

春分臘雪未全銷，凜冽春寒氣尚驕。攝事初欣迎社鷺，尋芳因得過溪橋。清浮酒蟻醅初撥，暖入鸞篁舌漸調。興味愛君年尚少，莫嫌齋禁一作齋館暫無膠。

唐崇徽公主手痕和韓內翰

故鄉飛鳥尚啁啾，何況悲笳出塞愁。青冢埋魂知不返，翠崖遺迹爲誰留。玉顏自古爲身累，肉食何人與國謀。行路至今空歎息，巖花澗草自春秋。

答和閣老劉舍人雨中見寄

花間鳥語愁泥滑，屋上鳩鳴厭雨多。坐見殘一作芳春一如此，可憐吾意已蹉跎。蕭條兩鬢霜後草，澹灑十分金卷荷。此物猶能慰衰老，一作病稍晴相約屢相過。

寄閣老劉舍人

夢寐江西未得歸，誰憐蕭颯鬢毛衰。莓苔生壁圖書室，風雨閉門桃李時。得酒雖能陪笑語，老年其實厭追隨。明朝雨止花應在，又踏春泥向鳳池。

詳定幕次呈同舍嘉祐四年御試進士時詳定卷子幕次在

崇政殿後

來時宮柳綠初勻，坐見紅芳幾番新。蜂窠滿房花結子，還家何處覓殘春。

禁中見輕紅牡丹落花之奇者也

咸遊西洛方年少，晚落南譙號醉翁。白首歸來玉堂署，一作上君王殿後見輕紅。

和江鄰幾學士桃花用其韻時在崇政殿後詳定幕次

草上紅多枝上稀，芳條一作苞綠萼憶來時。見桃著子始歸後，誰道

仙花開落遲

送襄陵令李君

綠髮襄陵新長官，面顏雖老渥如丹。君服何首烏，鬚髮皆黑顏容如少時。折腰聊爲五斗屈，把酒猶能一笑歡。紅棗林繁欣歲熟，紫檀皮軟禦春寒。民淳政簡居多樂，無苦思歸欲掛冠。

景靈宮致齋

攝事衰年力不彊，誰憐岑寂臥齋坊。一作房青苔點點無人迹，綠葉陰陰覆砌涼。玉宇清風來處遠，仙家白日靜中長。卻視九衢車馬客，自然顏鬢易蒼蒼。

夏享太廟攝事齋宮聞鷺寄原甫

四月田家麥穗稠，桑枝生椹鳥啁啾。鳳城綠樹知多少，何處飛來黃栗留。田家謂麥熟時鳴者爲黃栗留，出詩義。

送王平甫下第安國

歸袂搖搖心浩然，曉船鳴鼓轉風灘。朝廷失士有司恥，貧賤不憂君子難。執手聊須爲醉，一作酒別還家何以慰。親懽自慙知子不一作未能薦白首，胡爲侍從官。

對雪十韻

對雪無佳句，端居正杜門。人閑見初一作初見，落風定不勝繁。可喜輕明質，都無剪刻痕。鋪平失池沼，飄急響窗軒。惜不搖嘉樹，衝宜走畫轅。寒欺白酒嫩，暖一作老愛紫貂溫。遠靄銷如洗，愁雲晚更屯。兒吟鸛鳳語，翁坐凍鴟蹲。病思驚殘歲，朋歡賴酒一作一罇。稍晴春意動，誰與探名園。

和武平學士歲晚禁直書懷五言二十韻用其韻

多病淹殘歲，初寒臥直廬。朝廷務清靜，鈴索少文書。嚮學今爲感，優賢古莫如。靚深嚴禁署，一作闈閑宴樂羣。居賜馬聯金絡，清塵侍玉輿。討論三代盛，獻納萬機餘。號令存寬大，文章復古初。笑談揮翰墨，

俄頃列瓊瑤夜漏銷宮燭春暉上玉除歌詩唐李杜言語漢嚴徐自顧追時彥多慙不鄙予無鹽煩刻畫寒谷借吹嘘朋友飛鷗鷺君臣在藻魚食榮同衛鶴取笑類黔驢皎皎心雖在蕭蕭髮已疎未知論報効安得遂樵漁雲破西山出江橫畫閣虛餘生歎勞止搔首念歸歎引綬誇民吏椎牛會里閭一麾終得請此計豈躊躇

答西京王尚書寄牡丹

新花來遠喜開封呼酒看花與未窮年少曾爲洛陽客眼明重見魏家紅卻思初赴青油幕自笑今爲白髮翁西望無由陪勝賞但吟佳句想芳叢

應制賞花釣魚

絳闕晨霞一作光照霧開輕塵不動翠華來魚遊碧沼涵靈德花馥清香薦壽杯夢聽鈞天聲杳默日長化國景徘徊自懸擊壤音多野帝所廣歌亦許陪

清明賜新火

魚鑰侵晨放九門天街一騎走紅塵桐華應候催佳節榆火推恩忝侍臣多病正愁錫粥冷清香但愛蠟烟新自憐憤識金蓮燭輪苑會經七見春

明堂慶成

辰火天文次阜門路寢闕奉親昭孝德惟帝饗精誠禮以三年講時因萬物成九筵嚴太室六變導和聲象魏中天起風雷大號行歡呼響山岳流澤浹根莖寶墨飛雲動金文耀日晶從臣才力薄無以頌休明

羣玉殿賜宴一本作謝上賜飛白書

至治臻無事豐年樂有成圖書開祕府宴飲一作飲集羣英論道皇墳奧貽謀一作謀寶訓明九重多暇豫八體極研精筆力千鈞勁毫端萬象生飛牋金灑落拜賜玉鐙鳴威際崇儒學愚臣濫寵榮惟能

同舞獸聞樂識和聲

承昭陵挽詞三首仁宗

與子雖天意知人昔帝難一言謀早定九鼎勢先安大舜仁由性成湯治以寬孤臣恩未報清血但沈瀾
干戈不用臻無事朝野多歡樂有年便坐看揮飛白筆侍臣新和柏梁篇衣冠忽見藏原廟蕭一作笳鼓愁聞向洛川寂寞秋風羣玉殿還同恍惚夢鈞天

行殿沉沉書製重淒涼挽鐸出深宮攀號不悟龍胡遠侍從猶穿豹尾中日薄山川長起霧天寒松柏自生風斯民四十年涵煦耕鑿安知荷帝功

續作承昭陵挽詞五首

王者居尊本無外由來天下以爲家六龍白日乘雲去何用金錢買道車

苦霧

苦霧霏霏著彩旗猶排吉仗雜凶儀常時鳳輦行遊處今日龍輜獨哭隨

都人

都人擾擾塞康莊西送靈車過苑牆金鼎藥成龍已去人間惟有鼠拖腸

素幕

素幕悠悠逗曉風行隨哀挽出深宮妃嬪莫向蒼梧望雲覆昭陵洛水東

叨陪

叨陪法從最多年慣聽梨園奏管絃從此無因瞻黼坐惟應魂夢到鈞天

赴集

赴集禮宮祈雪追憶從先皇駕幸泫然有感
琳闕岩岩倚瑞烟憶陪遊豫入新年雲深曉日開宮殿水閣春風颺管絃千騎清塵回輦路萬家明月放燈天一朝人事淒涼改惟有靈光獨巋然

夜宿中書東閣

翰林平日接羣公文酒相歡慰病翁
白首歸田徒墨蹟作生有約黃
扉論道愧無功攀髯路斷三山遠
憂國心危百箭攻今夜靜聽丹禁
漏尚疑身在玉堂中

送王學士赴兩浙轉運京本作送王勝之兩浙運使

漢家財利析秋毫暫屈清才豈足勞
岳屋連雲盈萬井舳艫銜尾列
千艘春寒欲盡黃梅雨海浪高翻
白鷺濤平昔壯心今在否江山猶
得助詩豪

早朝

闔闔初開瑞霧中丹霞曉日上蒼龍
鳴鞭響徹廊千步佩玉聲趨戟
百重雪後朝寒猶凜冽柳梢春意已
丰茸少年自結芳菲侶老病惟
添睡思濃

下直

宮柳街槐綠未齊春陰不解宿雲低
輕寒漠漠侵鮑裼小兩班班作
鶯泥報國無功嗟已老歸田有約
一作計一何稽終當自駕柴車去
獨結茅廬頹水西

齋宮尚有殘雪思作學士時攝事于此嘗有聞鸞詩寄原父

因而有感四首

雪壓枯條脈未抽春寒慘慄作春愁
卻思綠葉清陰下來此曾聞黃
栗留
老來何與青春事閑處方知白日長
自恨乞身今未得齒牙浮動費

蒼浪

兩京平日接英髦不獨詩豪酒亦豪
休把青銅照雙鬢君謨今已白
刁騷
詩篇自覺隨年老酒力猶能助氣豪
興味不衰惟此爾其餘萬事一
牛毛

攝事齋宮偶書一作齋夕感事

齋宮岑寂偶偷閑猶覺閑中興未闌
美酒清香銷晝景冷風殘雪作
春寒丹心未死惟憂國白髮盈簪
盍掛冠誰爲寄聲清頹客此生終
不負漁竿

早朝感事

疎星牢落曉光微殘月蒼龍闕角西
玉勒爭門隨仗入牙牌當殿報
班齊羽儀雖接鸞兼鷺野性終存鹿
與麀笑殺汝陰常處士墨蹟作
雲林高臥客十年騎馬聽朝音嘲鷄

集禧謝雨

十里長街五鼓催泥深雨急馬行遲
臥聽竹屋蕭蕭響卻憶滁州睡
足時

下直呈同行三公

午漏聲初轉歸鞍路偶同天清黃道日
街闌綠槐風萬國舟車會中
天象魏雄哉戈清四海論道屬三公
自愧陪羣彥從來但樸忠時平
容竊祿歲晚歎衰翁買地淮山北垂
竿頹水東稻梁雖可戀吾志在
冥鴻

東閣雨中

直閣時偷暇幽懷坐獨哦綠苔人迹少
黃葉雨聲多雲結愁陰重風
傳禁漏過瑤圖新嗣聖玉塞久包戈
相府文書簡豐年氣候和還將
鳳池句聊雜野人歌

四月十七日景靈宮奉迎仁宗皇帝御容有感

行殿峨峨出綠槐琳房芝闕聳一作
棘崔嵬管絃飄落人間去幢節
疑從天上來基業百年傳聖子黔黎
四紀樂春臺孤臣不得同鍼虎
未死心先冷若灰

居士集卷第十三

居士集卷第十四 集十四

律詩六十五首

馬上默誦聖俞詩有感一作偶題

興來筆力千鈞勁一作重酒醒一作醉後人間萬事空
蘇梅二子今亡矣索寞滁山一醉一作惆悵除陽一病翁

定力院七葉木

伊洛多佳木娑羅舊得名常於佛家見宜在月宮生
鉤砌陰鋪靜虛堂子落聲夜風疑雨過朝露炫霞明
車馬王都感樓臺梵宇闕惟應靜者樂時聽野禽鳴

秋陰

秋陰積不散夜氣凜初清雨冷侵燈暈風愁送葉聲
國因歉未報歲晚念餘生却憶滁州睡村醪自解醒

秋懷

節物豈不好秋懷何黯然西風酒旗市細雨菊花天
感事悲雙鬢一作貪榮食萬錢鹿車終自駕歸去賴東田

初寒

多病淹殘歲初寒悄獨吟雲容乍濃淡秋色半晴陰
籬菊催佳節山泉響夜琴自能知此樂何必戀腰金

寄渭州王仲儀龍圖一作送王素之渭州

羨君二作臨邊守慣聽胡笳不慘然弓勁秋風鳴
白角帳寒春雪壓青檀威行四境烽烟斷響入千山
號令傳翠幕紅燈照羅綺心情何似十年前

崇政殿試賢良晚歸

槐柳依依禁籞長初寒人意自淒涼鳳城斜日留殘照
玉闕浮雲結夜霜老負漁竿貪國寵病須樽酒送年光
歸來解帶西風冷衣袖猶霑玉案香

聞潁州通判國博與知郡學士唱和頗多因以奉寄知郡陸

經通判楊褒

一自蘇梅閉九泉始聞東潁播新篇金樽留客史一作使君醉玉塵
高談別乘賢十里秋風紅菡萏一溪春水碧漪漣政成事簡何爲樂
終日吟哦雜管絃

南郊慶成

祀教民昭孝天惟德是親太宮殿大饗吉土兆精禋禮樂三王感
梓航萬國賓恩霑羣動洽慶與一陽新奉冊尊長樂均釐及衆臣不須
雲物瑞和氣浹人神

和昭文相公上巳宴

一雨初消九陌塵乘蘭修禊及芳辰恩深始錫龍池宴節正須一作
方知鳳曆新是歲始頒明天新曆三月三日丁巳紅琥珀傳盃嫩醴
碧琉璃瑩水齋論上林未放花齊發留待鳴鞘出紫宸

三日赴宴口占

賜飲初逢禊節佳昆池新漲碧無涯九門寒食多遊騎三月春陰正
養花共喜流鶻修故事自憐雙鬢惜年華鳳城殘照歸鞍晚禁籞無
風柳自斜

讀楊蟠章安一本有詩字集

蘇梅久作黃泉客我亦今爲白髮翁臥讀楊蟠一千首乞渠秋月與
春風

蘇主簿挽歌洵

布衣馳譽入京都丹旌俄驚一作聞反舊聞諸老誰能先買誼君王
猶未識相如三年弟子行喪禮千兩鄉人會壟車我獨一作獨我空
齊掛塵榻遺編時閱子雲書

寄題沙溪寶錫碑本作積院

爲愛江西物物佳作詩嘗向北人誇青林霜日換一作染楓葉白水

秋風吹稻花釀酒烹雞留醉客鳴機織墨蹟作緝字徧山家野僧獨
得無生藥終日焚香坐結廬

宋司空一作元憲公挽辭

文章天下無雙譽伯仲人間第一流出入兩朝推舊德周旋三事著
嘉謀從容進退身各泰寵錫哀一作衰榮禮數優棠棣從來敦友愛
九原相望接松楸

感事於平丁未正月二十有六日

故園三徑久成荒賢路胡為此坐妨病骨瘦便花藥暖嘉祐八年于
闐國王遣使來朝貢恩賜宰臣已下于闐所獻花藥布柔剛潔白如
凝脂而禦風甚温不減臙禍也煩心渴喜鳳團香先朝舊例兩府輔
臣歲賜龍茶一斤而已余在仁宗朝作學士兼史館修撰嘗以史院
無國史乞降一本以備檢討遂命天章閣錄本付院仁宗因幸天章
見書史方錄國史思余上言亟命賜黃封酒一瓶果子一合鳳團茶
一斤押賜中使語余云上以學士校新寫國史不易遂有此賜然自
後月一賜遂以為常後余忝二府猶賜不絕號弓但灑孤臣血憂國
空餘兩鬢霜何日君恩憫衰朽許從初服返耕桑

大行皇帝靈駕發引挽歌辭

享國年雖近斯民澤已深儉勤成禹聖仁孝本虞心方慶逢千載俄
驚遽八音天愁嵩嶺外雲慘洛川潯仗動千官衛神行萬象陰孤臣
恩未報清血但盈襟

其一

文景孜孜儉與恭慨然思就太平功興隆學校皇家威放斥嬖嬙永
巷空威懾一作攝黜堯方問罪丹成仙鼎忽遺弓霜清日薄蕭笳咽
萬國悲號慘澹中

其二

千齡應運叶天人四海方欣政日新忽見九門陳羽衛猶疑五載欲

時巡觚稜月暗翔金鳳葦道霜清臥石麟白首舊臣瞻畫翬秋風淚
灑屬車塵

其二

奉答子履學士見贈之作

誰言頽水似瀟湘一笑相逢樂未央歲晚君尤耐霜雪興闌吾欲返
耕桑銅槽旋壓清樽美玉塵閑揮白日長豫約詩一作書簡屢來往
兩州雞犬接封疆

送道州張職方

桂籍青衫憶共遊憐君華髮始為州身行南鴈不到處山與北人相
對愁莫為高才輕遠俗當令遺老識賢侯三年解組來歸日吾已先
耕頽水頭

再至汝陰二絕

黃栗留鳴桑椹美紫櫻桃熟麥風涼朱輪昔愧無遺愛白首重來似
故鄉

十載榮華貪國寵一生憂患損天真頽人莫怪歸來晚新向君前乞
得身

水味甘於大明井魚肥恰似新開湖十四五年勞夢寐此時才得少
踟躕余時將赴亳社恩許枉道過頽也

郡齋書事寄子履

使君居處似山中吏散焚香一室空兩過紫苔惟鳥迹夜涼蒼檜起
天風白醪酒嫩迎秋熟紅棗林繁喜歲豐寄語灑洲未歸客醉翁今
已作仙翁

答子履學士見寄

頽毫相望樂未央吾州仍得治仙鄉夢回枕上黃梁熟身在壺中白
日長每恨老年才已盡怕逢時敵力難當知君欲別西湖去乞我橋
南菡萏香

寄襄人行書贈子履學士

秋來紅蕖壓枝繁堆向君家白玉盤甘辛楚國赤萍實磊落韓嫣黃金丸聊効詩人投木李敢期佳句報琅玕嗟予久苦相如渴却憶冰梨熨齒寒

贈隱者

五岳嵩當大地中聞君仍在最高峯山藏六月陰崖雪潭養千年蛻骨龍物外自應多至樂人間何事忽相逢飲罷飄然不辭決孤雲飛去杳無蹤

戲書示黎教授

古郡誰云毫陋邦我來仍值歲豐穰烏銜覆實園林熟一本作蜜蜂採檜花村落香世治人方安壠畝興闢吾欲反耕桑若無賴水肥魚蟹終老仙鄉作醉鄉

書懷一作思頴寄常處士

齒牙零落鬢毛疎賴水多年已結廬解組便爲閑處士新花莫笑病尙書青衫仕至千鍾祿白首歸乘一鹿車况一作幸有西鄰隱君子輕裘短一作披蓑帶笠伴春鋤常夷浦也

過河龍潭

碧潭風定影涵虛神物中藏岸不枯一夜四郊春雨足却來閑臥養明珠

遊太清宮出城馬上口占

擁旆西城一據鞍耕夫初識勸農官鴉鳴日出林光動野闊風搖麥浪寒漸暖綠楊纔弄色得晴丹杏不勝繁牛羊雞犬田家樂終日思歸盍掛冠

太清宮燒香

清晨琳闕聳巒岵珥節齋坊暫整冠玉案拜時香裊裊畫廊行處珮珊珊壇場夜雨蒼苔古樓殿春風碧瓦寒我是蓬萊宮學士朝真便

合列仙宮

謝提刑張郎中寄筇竹拄杖

玉光瑩潤錦爛斑霜雪經多節愈堅珍重故人相贈意扶持衰病過殘年

七言二首答黎教授

撥覆浮醅新釀熟得霜寒菊始開齊養丹道士顏如玉愛酒山公醉似泥不惜藥從蜂採去尙餘香有蝶來棲莫嫌學舍官閑冷猶得芳樽此共攜

共坐欄邊日欲斜更將金藥泛流霞欲知却老延齡藥百草枯時始見花

見花

又寄許道人

綠髮方一作青瞳瘦骨輕飄然乘鶴去吹笙郡齋獨坐風生竹疑是孫登長嘯聲

扶溝知縣周職方錄示白鶴宮蘇才翁子美贈黃道士詩并感作二絕見索拙句輒爲四韻奉酬

能基好飲一道士醉墨狂吟二謫仙道士不聞乘白鶴謫仙今已揜黃泉古來豪傑皆如此誰拂塵埃爲惘然華髮郎官才調美更將新句續遺篇

曉發齊州道中二首後一首五言

東州幾日倦征軒千騎驂驪白草原鴈入寒雲驚曉角雞鳴蒼一作滄海浴朝暎國恩未報身先老客思無慘一作聊歲已昏誰得平時爲郡樂自憐瘠渴馬文園

歲晚勞征役一作晚歲倦征軒二齊舊富閑人行桑下路日上一作出海邊山軒冕非吾志風霜犯客顏惟應思頴夢先過穆陵關

表海亭

望海亭亭古堞間獨憑危檻俯人寰苦寒冰合分一作雙流水南洋

北洋河也一在州中一在城外欲雪雲垂四面山州城四面皆山東西二面山差遠唯此亭高盡見之醃肉已消嗟病骨凍醜猶可慰愁顏頰田二頃春蕪沒安得柴車自駕還

歲晚書事

一麾新命古三齊白首滄洲願已違軒冕從來爲外物山川信美獨思歸長天極目無飛鳥積雪生光射落暉臘候已窮春欲動勤耕猶得覽郊圻

謁廟馬上有感

旌旆曉悠悠行驚歲已道霜雲依日薄野水帶冰流富庶齊三服山川禹九州自憐思頰意無異旅人愁

球場看山

爲愛南山紫翠峯偶來仍值雪初融自嫌前引朱衣吏不稱閑行白髮翁向老光陰雙轉轂此身天地一飄蓬何時粗報君恩了去逐冥冥物外鴻

殘臘一作雪

殘雪初銷一作融上古臺桑郊向日綵旗開山橫南陌城中見春逐東風海上來老去每驚新歲換病多能使壯心摧自嗟空有東陽瘦覽物慙無八詠才

歲暮書事

東州負海圻風物老依依歲熟鴉聲樂天寒鴈過稀跨鞍驚髀骨數帶減腰圍却羨常夫子終年獨掩扉

聞沂州盧侍郎致仕有感

少年相與探花開老病惟愁節物催蹉跎歸計荒二徑牢落生涯酌一杯頰上先生招不起沂州太守亦歸來自媿國恩終莫報尙貪榮祿此徘徊

春晴書事

莫笑青州太守頑三齊人物舊安閑晴明風日家家柳高下樓臺處處山嘉客但當傾美酒青春終不換頰頰惟慙未報君恩了昨日盧公衣錦還

遊石子澗富相公創亭

截辭高亭古澗隈偶攜嘉客共一作此徘徊席間風起聞天籟雨後山光入酒杯一作朝英元老今華表巖壁遺文已綠苔泉落斷崖春響響花藏深嶂過春開一作新雨亂泉逢石響過春深谷尚花開響聲一作林間禽鳥莫驚顧太守不將車騎來

讀易

莫嫌白髮擁朱輪恩許東州養病臣飲酒橫琴銷永日焚香讀易過殘春昔賢軒冕如遺屣世路風波偶脫身寄語西家隱君子奈何名姓已驚人

水磨亭子

多病山齋厭鬱蒸經時久不到東城新荷出水雙飛鷺喬木成陰百轉驚戴酒未妨佳客醉憑高仍見老農耕使君自有林泉趣不用絲篁亂水聲

寄題相州榮歸堂一本此篇已下條酬答安陽驛侍中五詠

白首三朝社稷臣壺漿夾道擁如雲金貂爭看真丞相竹馬猶迎舊使君豈止軒裳誇故里已將鍾鼎勒元勳不須授簡樽前客好學平原津自有文

畫錦堂

昔憇甘棠長舊圃重來城郭數人非隨車仍是爲霖雨被袞何如衣錦歸公前出自西樞以武康之節鎮相臺今罷釣軸以司徒侍中再鎮

觀魚軒

當年下澤驅羸馬今見犀兵擁碧油位望愈隆心愈靜每來臨水翫

游儉

狎鷗亭

險夷一節如金石勳德俱高映古今豈止忘機鷗鳥信陶鈞萬物本無心

休逸臺

清談終日對清樽不似崇高富貴身已有山川資勝賞更將風月醉嘉賓

青州書事

年豐千里無夜警吏一作公退一室焚清香青春固非老者事白日自爲閑人長祿厚豈惟飽食餘仍足一作得買輕裝君恩天地不違物歸去行歌潁水傍

留題南樓二絕一本前一首題作偶書

偷得青州一歲閑四時一作案頭終日面孱顏須知我是愛山者無一詩中不說山

山橫

答和王宣徽一作答王宣徽見贈

相逢莫恠我嵒然出處參差四紀間有道方令萬物遂無能擬乞一身閑花前獨酌罇前月淮上扁舟枕上山此樂想公應未暇且持金盞醉紅顏

答和呂侍讀

昔日題輿媿屈賢今來還見擁朱轡笑談二紀思如昨名望二朝老更算野徑冷香黃菊秀平湖斜照白鷗翻此中自有忘言趣病客猶堪奉一罇

奉答子履學士見寄之作

憶昨初爲亳守行暫休車騎汝陰城喜君再共罇俎樂憐我久懷邱

整情累牘已嘗陳素志新春應許遂歸耕老年雖不堪東作猶得酣歌詠太平

謝景平挽詞

憶見奇童髡兩髦遽驚名譽衆推高東山子弟家風在西漢文章筆力豪方看凌雲馳駿驥已嗟埋玉向蓬蒿追思陽夏曾遊處撫事傷心涕滿袍

答資政郡諫議見寄二首

豪橫當年氣吐虹蕭條晚節鬢如蓬欲知潁水新居士卽是滁山舊醉翁所樂藩籬追尺一作斥鷃敢言寥廓逐冥鴻期公歸輔殿廊上顧我無忘吠畝中

欲知歸計久遷延三十篇詩二十年受寵不思身報効乞骸惟冀上哀憐相如舊苦中瘡渴陶令猶能一醉眠材薄力殫難勉強豈同高士愛林泉

居士集卷第十四

居士集卷第十五 集十五

賦五首雜文五首附

黃楊樹子賦并序

夷陵山谷間多黃楊樹子江行過絕險處時從舟中望見之鬱鬱山際有可愛之色獨念此樹生窮僻不得依君子封殖備愛賞而樵夫野老又一無又字不知其惜作小賦以歌之

若夫漢武之宮叢生五柞景陽之井對植雙桐高秋羽獵之騎半夜嚴粧之鍾鳳蓋朝拂銀牀暮空固已蕪蕪近日日的燦一作灼燦含風婆娑萬戶之側生長深宮之中豈知綠蘚蒼苔蒼崖翠壁枝蒼鬱以含霧一作露根屈盤而帶石落落非松亭亭似柏上臨千仞之盤薄下有驚湍之瀆激澗斷無路林高暝色偏依最險之處獨立無人之跡江已一作有轉而猶見峯漸回而稍隔嗟乎日薄雲昏烟霏一作飛露滴負勁節以誰賞抱孤心而誰識徒以竇穴風吹陰崖雪積噴山鳥之嘲啾裊驚猿之寂歷無遊女兮長攀有行人兮暫息節既晚而愈茂歲已寒而不易乃知張騫一見須移海上之根陸凱如逢堪寄隴頭之客

鳴蟬賦并序

嘉祐元年夏大雨水奉詔祈晴于醴泉宮聞鳴蟬有感而賦云
肅祠庭以祗事兮瞻玉宇之崢嶸收視聽以清慮兮齋予心以薦誠
因一作默以靜而求一作動兮見乎萬物之情於時朝雨驟止微風不興四無雲以青天雷曳曳一作隱隱其餘聲乃席芳葍臨華軒
古木數株空一作荒庭草間爰有一物鳴于樹顛引清風以長嘯抱纖柯而永歎嘒嘒非管冷冷若絃裂方號而復咽凄欲斷而還連吐孤韻以難律含五音之自然吾不知其何物其名曰蟬豈非因物造形能變化者邪出自糞壤慕清虛者邪凌風高飛知所止者邪嘉木茂樹喜清陰者邪呼吸風露能尸解者邪綽約雙鬢修嫵媚者邪其

爲聲也不樂不哀非宮非徵胡然而鳴亦胡然而止吾嘗悲夫萬物莫不好鳴若乃四時代謝百鳥嚶兮一氣候至百蟲驚兮嬌兒婉女語鶯庚兮鳴機絡緯響蟋蟀兮轉喉啣舌誠可愛兮引腹動股豈勉彊而爲之兮至於汚池濁水得雨而聒兮飲泉食土長一無長字夜而歌兮彼蝦蟇固若有欲而蚯蚓又何求兮其餘大小萬狀不可悉名各有氣類隨其物形一有而字不知自止有若爭能忽時變以物改咸漠然而無聲嗚呼達士所齊萬物一類人於其間所以爲貴蓋已巧其語言又能傳於文字是以窮彼思慮耗其血氣或吟哦其窮愁或發揚其志意雖共盡於萬物乃長鳴於百世予亦安知其然哉聊爲樂以自喜方將一作吾方考得失較同異俄而陰雲復興雷電俱擊大雨既作蟬聲遂息一本賦後有跋云予因學書起作賦草他兒一視而過獨小子禁守之不去此兒他日必能爲吾此賦也因以予之

秋聲賦

歐陽子方一無方字墨蹟止作余無上四字夜讀書聞有聲自西南來者悚然而聽之曰異哉初淅瀝以蕭颯忽奔騰而砰湃如波濤夜驚風雨驟一作風驟雨而至其觸於一無於字物也鏗鏗錚錚金鐵皆鳴又如赴敵之兵銜枚疾走不聞號令但聞人馬之行聲墨蹟無聲字余謂童子此何聲也汝出視之童子曰星月一作月星皎潔明河在天四無人聲聲在樹間余曰噫嘻悲哉一作天此秋聲也胡爲而來哉蓋夫秋之爲狀也其色慘淡烟霏雲斂其容清明天高日晶其氣慄冽砭人肌骨其意蕭條山川寂寥故其爲聲也淒淒切切呼號憤發豐草綠縟而爭茂佳木葱蘢而可悅草拂之而色變木遭之而葉脫其所以摧敗零落者墨蹟無者字乃其一無一字氣之餘烈夫秋刑官也於時爲陰又兵象也於行爲金是謂天地之義氣常以肅殺而爲心墨蹟有大哉字天之於物春生秋實故其在樂也商

聲主西方之音夷則為七月之律商傷也物既老而悲傷夷戮也物過盛而當殺嗟乎草木一有之字無情有時一有而字飄零人為動物惟物之靈一作人惟動物為物之靈百憂感其心萬事勞其形有動于中必搖其精而况思其力之所不一有能字及憂其智之所不能一有行字宜其渥然丹者為槁木黝一本作黝墨蹟同然黑者為星星奈何以一無以字非金石之質一有而字欲與草木而爭榮念誰為之戕賊亦何恨乎秋聲童子莫對垂頭而睡但聞四壁蟲聲唧唧如一作以助余之歎息

病暑賦和劉原父作

吾將東走乎泰山兮履崔嵬之高峯陰白雲之搖曳兮聽石溜之玲瓏松林一作竹仰不見白日陰壑慘慘多悲風邈哉不可以坐致兮安得仙人之術解化如飛蓬吾將西登乎崑崙兮出於九州之外覽星辰之浮沒視日月之隱蔽披闔闔之清風飲黃流一作河之巨派羽翰不可以插余之兩腋兮畏舉身而下墜既泛乎南溟兮瘴毒流膏而鑠骨何異避喧之一作而趨市兮又如惡影之就日又欲臨乎北荒兮飛雪層冰之所聚鬼方窮髮一作傲無人迹兮乃龍蛇之雜處四方上下皆不得以往兮顧此大熱吾不知夫所逃萬物並生於天地豈余身之獨遭任寒暑之自然兮成歲功而不勞惟衰病之不堪兮譬燎枯而灼焦翎空廬之湫卑兮甚龜蝸之縮縮飛蚊幸余之露坐兮壁蝨伺余之入屋一作蠅蚊幸余之虛坐兮蠹蝸伺余於壁屋賴有客之哀余兮贈端石與蘄竹得飽食以安一作以晝寢兮鑿枕冰而簟玉知其無可奈何而安之兮乃聖賢之高躅惟冥心以息慮兮庶可忘於煩酷

憎蒼蠅賦

蒼蠅蒼蠅吾嗟爾之為生既無蜂蠶之毒尾又無蚊蚋之利嘴幸不為人之畏胡不為人之喜爾形至矜爾欲易盈杯盃孟殘歷砧几餘腥

所希杪忽過則難勝苦何求而不足乃終日而營營逐氣尋香無處不到頃刻而集誰相告報其在物也雖微其為害也至要若乃華樓廣廈珍簾方牀炎風之燠夏日之長神昏氣蹙流汗成漿委四支而莫舉耗兩目其茫茫洋惟高枕之一覺冀煩厭之暫忘念於爾而何負乃於吾而見殃尋頭撲面入袖穿裳或集眉端或沿眼眶目欲瞑而復警臂已痺而猶擗於此之時孔子何由見周公於髣髴莊生安得與蝴蝶而飛揚徒使蒼頭丫髻巨扇揮颺成頭垂而腕脫每立寐而顛僵此其為害者一也又如峻宇高堂嘉賓上客沽酒市脯鋪筵設席聊娛一日之餘閑奈爾衆多之莫敵或集器皿或屯几格或醉醇酎因之沒溺或投熱羹遂喪其魄諒雖死而不悔亦可戒夫貪得尤忌赤頭號為景迹一有冠汗人皆不食奈何引類呼朋搖頭鼓翼聚散倏忽往來絡繹方其實主獻酬衣冠儼飾使吾揮手頓足改容失色於此之時王衍何暇於清談賈誼堪為之太息此其為害者二也又如醞醞之品醬醬之制及時月而收藏謹餅饜之固濟乃衆力以攻鑽極百端而窺覘至於大藏肥性嘉肴美味蓋藏稍露於罅隙守者或時而假寐纔稍怠於防嚴已輒遺其種類莫不養息蕃滋淋漓敗壞使親朋卒至索爾以無歡臧獲懷憂因之而得罪此其為害者三也是皆大者餘悉難名嗚呼止棘之詩垂之六經於此見詩人之博物比興之為精宜乎以爾刺讒人之亂國誠可嫉而可憎

雜文五首

醉翁弁序一作醉翁述

余作醉翁亭于滁州一作余於滁作醉翁亭有太常博士沈遵一有者字好奇之士也聞而一止作書往遊焉愛其山水歸而以琴寫之作醉翁吟三疊去年秋一無秋字余奉使契丹沈君一作子會余一作子一有於字因翼之間夜闌酒半一無此四字援琴而作之有其聲而無其辭乃為之辭以贈一作遺之其辭曰

始翁之來一作翁之來今獸見而深伏為見而高飛翁醒而往兮醉而歸朝醒暮醉兮無有四時為鳴樂其林獸出遊其蹊呼嚶啁啾於翁前兮醉一有而字不知有心不能以無情兮有合必有離水滂滂兮翁忽去而不顧山岑岑兮翁復來而幾時風嫋嫋兮山木落春年年兮山草菲嗟我無德於其人兮有情於山禽與野麋賢哉沈子兮能寫我心而慰彼相思

山中之樂并序一本題下云三章送慧動上人

佛者慧動餘杭人也少去父母長無妻子以衣食于佛之徒往來京師二十年其人聰明材智亦嘗學問于賢士大夫今其南歸遂將窮極吳越甌閩江湖海上之諸山以肆其所適予嘉其嘗有聞於吾人也於其行也一本無四字為作山中之樂三章一本有以送之既極道山林間事以動蕩其心意而卒反之於正其辭曰

江上山兮海上峯鶻青蒼兮杳巖叢霞飛霧散兮邈乎青空天鏡鬼削兮壁立於鴻蒙崖懸磴絕兮險且窮穿雲渡水兮無兮字忽得路而不知其深之幾重中有平田廣谷兮與世隔絕猶有太古之遺風泉甘土肥兮鳥獸離離其人麋鹿兮既壽而豐不知人間之幾時今但見草木華落為春冬嗟世之人兮曷不歸來乎山中之樂不可見今子其往兮誰逢其一丹茲翠蔓兮巖壑玲瓏水聲聒聒兮花氣濛濛石巉巖兮橫一作當路風颯颯兮吹松雲冥冥兮雨霏霏白猿夜嘯兮青楓朝日出兮林間澗谷紛以青紅千林靜兮秋月百草香兮春風嗟世之人兮曷不歸來乎山中之樂不可得今子其往兮誰從其一梯崖構險兮佛廟仙宮耀空山兮鬱穹隆彼之人兮固一無固字亦目明而耳聰寵辱不干其慮兮仁義不被其躬隆長一作喬松之蒼蔚兮藉纖草之丰茸苟其中以自足兮忘其躬胡而顛童自古智能魁傑之士兮固亦絕世而逃蹤惜天材之甚良兮而一無而字自棄於無庸嗟彼之人兮胡為老乎山中之樂不

可久遲子之返兮誰同其二

雜說三首一有并序二字

夏六月暑雨既止歐陽子坐於樹間仰視天與月星一作日月星辰行度見星有殞者夜既久露下聞草間蚯蚓之聲益急其感於耳目者有動乎其中作雜說

蚋食土而飲泉其為生也簡而易足然仰其穴而鳴若號若呼若嚙若歌一作若歌若嚙其亦有所求邪抑其求易足而自鳴其樂邪若一作抑敷其生之陋而自悲其不幸邪將自喜其聲而鳴其類邪豈其時至氣作不自知其所以然而不能自止者邪何其聒然而不止也吾於是乎有感一本此屬次篇

星殞于地腥穢醜化為惡石其昭然在上而萬物仰之者精氣之聚爾及其斃也瓦礫之不若也人之死骨肉臭腐蠅蟻之食爾其貴乎萬物者亦精氣也其精氣不奪于物則蘊而為思慮發而為事業著而為文章昭乎百世之上而仰乎百世之下非如星之精氣隨其斃而滅也可不貴哉而生也利慾以昏耗之死也臭腐而棄之而一無而字惑者方曰足乎利慾所一無所字以厚吾身吾於是乎有感天西行日月五星皆東行日一歲而一周月疾於日一本無二字一月而一周天又疾於月一日而一周星有遲有速有逆有順是四者各自行而若不相為謀其動而不勞運而不自古以來未嘗一刻息也是何為哉夫四者所以相須而成晝夜四時寒暑者也一刻而息則四時不得其平萬物不得其生蓋其所任者重矣人之有君子也其任亦重矣萬世之所治萬物之所利故曰自彊不息又曰死而後已者其知所任矣然則君子之學也其可一日而息乎吾於是乎有感一本此屬首篇

居士集卷第十五

論三首或問一首附

正統論三首

序論

臣修頓首死罪言伏見太宗皇帝時嘗命薛居正等撰梁唐一作後唐晉漢周事為五代史凡一百五十篇又命李昉等編次前世年號為一篇一作卷藏之秘府而昉等以梁為偽梁為一無此字偽則史不宜為帝紀一本有而後唐之事當續劉昫唐史為一書或比二漢離為前後二十二字一前字作先而一作則亦無曰五代者於理不安今又一作又司天所用崇天曆承後唐書天祐至十九年而盡黜梁所建號援之於古惟張軌不用東晉太興而虛稱建興非可以為後世法蓋後唐務惡梁一有其字而欲黜之歷家不識古義但用有司之傳遂不復改至於昉等初非著書第採次前世名號以備有司之求因舊之失不專是正乃與史官戾不相合皆非是臣愚因以謂正統王者所以一民而臨天下三代用正朔後世有建元之名然自漢以來學者多言三代正朔一作改正朔之事而恠仲尼嘗修尚書春秋與其學徒論述堯舜二代間事甚詳而於正朔尤大事乃獨無明言頗疑二代無有其事及於春秋得十月隕霜殺菽二月無冰推其時氣乃知周以建子為正一有月字則三代固嘗改正朔而仲尼曰行夏之時又知聖人雖不明道正朔之事其意蓋非商周之為云其與也新民耳目不務純以德而更易虛名至使四時與天不合不若夏時之正也及秦又以十月為正漢始稍分後元中元至於建元遂各年以為號由是而後一無此四字而有太初之元年復用夏正其後遂不復改十五字直以建元之號加於天下而已所以同萬國而一民也而後世推次以為王者相繼之統若夫上不戾於天下可加於人則名年建元便於三代之改歲然而後世僭亂假稱者多

則名號紛雜不知所從於是正閏真偽之論作而是非多失其中焉然堯舜三代之一天下也不待論說而明自秦昭襄訖周顯德千有餘年治亂之迹不可不辨而前世論者靡有定說伏惟大宋之興統一天下與堯舜三代無異臣故曰不待論說而明謹採秦以來訖于顯德終始興廢之迹作正統論臣愚不足以知願下學者考定其是非而折中焉

正統論上

傳曰君子大居正又曰王者大一統正者所以正天下之不正也統者所以合天下之不一也由不正與不一然後正統之論作堯舜之相傳三代之相代或以至公或以大義皆得天下之正合天下於一是以君子不論也其帝王之理得而始終之分明故也及後世之亂僭偽興而盜竊作由是有居其正而不能合天下於一者周平王之有吳徐是也有合天下於一而不得居其正者前世謂秦為閏是也由是正統之論興焉自漢而下至于西晉又推而下之為宋齊梁陳自唐而上至於後魏又推而上之則為夷狄其帝王之理舛而始終之際不明由是學者疑焉而是非又多不公自周之亡迄於顯德實千有二百一十六年之間或理或亂或取或傳或分或合其理不能一概大抵其可疑之際有三周秦之際也東晉後魏之際也五代之際也秦親得周而一天下其迹無異禹湯而論者黜之其可疑者一也以東晉承西晉則無終以隋承後魏則無始其可疑者二也五代之所以得國者雖異然同歸於賊亂也而前世議者獨以梁為偽其可疑者三也夫論者何為疑者設也堯舜三代之始終較然著乎萬世而不疑固不待論而明也後世之有天下者帝王之理或舛而始終之際不明則不可以不疑故曰由不正與不一然後正統之論作也然而論者衆矣其是非予奪所持者各異使後世莫知夫所從者何哉蓋於其一作其於可疑之際又挾自私之心而瀾一作入於非

聖之學也自西晉之滅而南爲東晉宋齊梁陳北爲後魏北齊後周隋私東晉者曰隋得陳然後天下則推其統曰晉宋齊梁陳隋私後魏者曰統必有所授一作發下同則推其統曰唐受之隋隋受之後周後周受之後魏至其甚相戾也則爲南史者詆北曰虜爲北史者詆南曰夷此自私之偏說也自古王者之興必有盛德以受天命或其功澤被于生民或累世積漸而成王業豈偏名於一德哉至于湯武之起所以拯弊拯民蓋有不得已者而曰五行之運有休王一以彼衰一以此勝此歷官術家之事而謂帝王之興必乘五運者繆妄之說也不知其出於何人蓋自孔子歿周益衰亂先王之道不明而人人異學肆其性奇放蕩之說後之學者不能卓然奮力而誅絕之反從而附益其說以相結固故自秦推五勝以水德自名由漢以來有國者未始不由於此說此所謂溺於非聖之學也惟天下之至公大義可以祛人之疑而使人不得遂其私夫心無所私疑得其決則是非之異論息而正統明所謂非聖人之說者可置而勿論也

正統論下

凡爲正統之論者皆欲相承而不絕至其斷而不屬則猥以假人而續之是以其論曲而不通也夫居天下之正合天下於一斯正統矣堯舜夏商周秦漢唐是也始雖不得其正卒能合天下於一夫一天下而居正則是天下之君矣斯謂之正統可矣晉隋是也天下大亂其上無君僭竊並興正統無屬當是之時奮然而起並爭乎天下有功者彊有德者王威澤皆被于生民號令皆加乎當世幸而以大并小以彊兼弱遂合天下於一則大且彊者謂之正統猶有說焉不幸而兩立不能相并一作兼考其迹則皆正較其義則均焉則正統者將安予奪乎東晉後魏是也其或終始不得其正又不能合天下於一則可謂之正統乎魏及五代是也然則有不幸而丁其時則正統有時而絕也故正統之序上自堯舜歷夏商周秦漢而絕晉得之而

又絕隋唐得之而又絕自堯舜以來三絕而復續惟有絕而有續然後是非公子奪當而正統明然諸儒之論至於秦及東晉後魏五代之際其說多不同其惡秦而黜之以爲閎者誰乎是漢人之私論溺於非聖曲學之說者也其說有三不過曰滅棄禮樂用法嚴苛與其興也不當五德之運而已五德之說可置而勿論其二者特始皇帝之事爾然未原秦之本末也昔者堯傳於舜舜傳於禹夏之衰也湯代之王商之衰也周代之王周之衰也秦代之王其興也或以德或以功大抵皆乘其弊而代之初夏世衰而桀爲昏暴湯救其亂而起稍治諸侯而誅之其書曰湯征自葛是也其後卒以攻桀而滅夏及商世衰而紂爲昏暴周之文武救其亂而起亦治諸侯而誅之其詩所謂崇密是也其後卒攻紂而滅商推秦之興其功德固有優劣而其迹豈有異乎秦之紀曰其先大業出於顓頊之苗裔至孫伯翳佐禹治水有功唐虞之間賜姓嬴氏及非子爲周養馬有功秦仲始爲命大夫而襄公與立平王遂受岐豐之賜當是之時周衰固已久矣亂始於穆王而繼以厲幽之禍平王東遷遂同列國而齊晉大侯魯衛同姓擅相攻伐共起而弱周非獨秦之暴也秦於是時既平犬夷因取周所賜岐豐之地而繆公以來始東侵晉地至于河盡滅諸戎拓國千里其後關東諸侯強僭者日益多周之國地日益蹙至無復天子之制特其號在爾秦昭襄王五十二年周之君臣稽首自歸於秦至其後世遂滅諸侯而一天下此其本末之迹也其德雖不足而其功力尚不優於魏晉乎始秦之興務以力勝至於始皇遂悖棄先王之典禮又自推水德益任法而少恩其制度文爲一作云爲一作文章皆非古而自是此其所以見黜也夫始皇之不德不過如桀紂桀紂不廢夏商之統則始皇未可廢秦也其私東晉之論者曰周遷而東天下遂不能一然仲尼作春秋區區於尊周而黜吳楚者豈非以其正統之所在乎晉遷而東與周無異而今黜之何哉曰是有說

焉較其德與迹而然耳周之始興其來也遠當其盛也規方天下爲大小之國衆建諸侯以維王室定其名分使傳子孫而守之以爲萬世之計及厲王之亂周室無君者十四年而天下諸侯不敢僥倖而窺周於此然後見周德之深而文武周公之作真聖人之業也况平王之遷國地雖蹙然周德之在人者未厭而法制之臨人者未移平王以子繼父自西而東不出王畿之內一本在西南之地八百里東周六百里以井田之法計之通爲千里之方則正統之在周也推其德與迹可以無疑夫晉之爲晉與乎周之爲周也異矣其德法之維天下者非有萬世之計聖人之業也直以其受魏之禪而合天下於一推較其迹可以曰正而統耳自惠帝之亂一有晉政已亡四字至于愍懷之間晉如綫爾惟嗣君繼世推其迹曰正焉可也建興之亡晉於是而絕矣夫周之東也以周而東晉之南也豈復以晉而南乎自愍帝死賊庭琅邪起江表位非嗣君正非繼世徒以晉之臣子有不忘晉之心發於忠義而功不就可爲傷已若因而遂竊正統之號其可得乎春秋之說君弑而賊不討則以爲無臣子也使晉之臣子遭乎聖人適當春秋之誅况欲干天下之統哉若乃國已滅矣以宗室子自立於一方卒不能復天下於一則晉之琅邪與夫後漢之劉備五代漢之劉崇何異備與崇未嘗爲正統則東晉可知焉耳其私後魏之論者曰魏之興也其來甚遠自昭成建國改元承天下衰弊得奮其力並爭乎中國七世至于孝文而去夷即華易姓建都遂定天下之亂然後修禮樂興制度而文之考其漸積之基其道德雖不及於三代而其爲功何異王者之興今特以其不能并晉宋之一方以小不備而黜其大功不得承百王之統者何哉曰質諸聖人而無疑也今爲魏說者不過曰一作於功多而國彊耳此聖人有所不與也春秋之時齊桓晉文可謂有功矣吳楚之僭迭彊於諸侯矣聖人於春秋所尊者周也然則功與彊聖人有所不取也論者又曰秦起

夷狄以能滅周而一天下遂進之魏亦夷狄以不能滅一作并晉宋而見黜是則因其成敗而毀譽之豈至公之篤論乎曰是不然也各於其黨而已周秦之所以興者其說固已詳之矣當魏之興也劉淵以匈奴慕容以鮮卑符生以氐弋仲以羌赫連禿髮石勒季龍之徒皆四夷之雄者也其力不足者弱有餘者彊其最彊者符堅當堅之時自晉而外天下莫不爲秦休兵革興學校庶幾刑政之方不幸未幾而敗亂其又彊者曰魏自江而北天下皆爲魏矣幸而傳數世而後亂以是而言魏者纔優於符堅而已豈能干正統乎五代之得國者皆賊亂之君也而獨僞梁而黜之者因惡梁者之私論也唐自僖昭以來不能制命於四海而方鎮之兵作已而小者并於大弱者服於彊其尤彊者朱氏以梁李氏以晉共起而窺唐而梁先得之李氏因之借名討賊以與梁爭中國而卒得之其勢不得不以梁爲僞也而繼其後者遂因之使梁獨被此名也夫梁固不得爲正統而唐晉漢周何以得之今皆黜之而論者猶以漢爲疑以謂契丹滅晉天下無君而漢起太原徐驅而入汴與梁唐晉周其迹異矣而今乃一概可乎曰較其心迹小異而大同爾且劉知遠晉之大臣也方晉有契丹之亂也竭其力以救難力所不勝而不能存晉出於無可奈何則可以少異乎四國矣漢獨不然自契丹與晉戰者三年矣漢獨高拱而視之如齊人之視越人也卒幸其敗亡而取之及契丹之北也以中國委之許王從益而去從益之勢雖不能存晉然使忠於晉者得而奉之可以冀於有爲也漢乃殺之而後入以是而較其心迹其異於四國者幾何矧皆未嘗合天下於一也其於正統絕之何疑

或問

或問子於史記本紀則不僞梁而進之於論正統則黜梁而絕之君子之信乎後世者固當如此乎曰孔子固嘗如此也平桓莊之王於春秋則尊之書曰天王於詩則抑之下同於列國孔子之於此三王

者非固算於彼而抑於此也其理當然也梁賊亂之君也欲干天下之正統其爲不可雖不論而可知然謂之僞則甚矣彼有梁之土地臣梁之吏民立梁之宗廟社稷而能殺生賞罰以制命於梁人則是梁之君矣安得曰僞哉故於正統則宜絕於其國則不得爲僞者理當然也豈獨梁哉魏及東晉後魏皆然也堯舜桀紂皆君也善惡不同而已凡梁之惡余於史記不沒其實者論之詳矣或者又曰正統之說不見於六經不道於聖人而子論之何也曰孔孟之時未嘗有其說則宜其不道也後世不勝其說矣其是非予奪人人自異而使學者惑焉莫知夫所從又有偏主一德之說而益之五勝之術皆非聖之曲學也自秦漢以來習傳久矣使孔孟不復出則已其出而見之其不爲之一辨而止其紛紛乎此余之不得已也嗚呼堯舜之德至矣夏商周之起皆以天下之至公大義自秦以後德不足矣故考其終始有是有非而參差不齊此論之所以作也德不足矣必據其迹而論之所以息爭也或者又曰論必據迹則東周之時吳徐楚皆王矣是正而不統也子獨不論何也曰東周正統以其不待較而易知是以不論也若東晉後魏則兩相敵而子奪難故不可以不論吳徐楚非周之敵雖童子之學猶知子周也何必論哉

居士集卷第十六

論六首

本論中

佛法為中國患千餘歲世之卓然不惑而有力者莫不欲去之已嘗去矣而復大集攻之暫破而愈堅撲之未滅而愈熾遂至於無可奈何是果不可去邪蓋亦未知其方也夫醫者之於疾也必推其病之所自來而治其受病之處病之中人乘乎氣虛而入焉則善醫者不攻其疾而務養其氣氣實則病去此自然之効也故救天下之患者亦必推其患之所自來而治其受患之處佛為夷狄去中國最遠而有佛固已久矣堯舜三代之際王政修明禮義之教充於天下於此之時雖有佛無由而入及三代衰王政闕禮義廢後二百餘年而佛至乎中國由是言之佛所以為吾患者乘其闕廢之時而來此其受患之本也補其闕修其廢使王政明而禮義充則雖有佛無所施於吾民矣此亦自然之勢也昔堯舜三代之為政設為井田之法籍天下之人計其口而皆授之田凡人之力能勝耕者莫不有田而耕之斂以什一差其征賦以督其不動使天下之人力皆盡於南畝而不暇乎其他然又懼其勞且怠而入於邪僻也於是為制性牢酒醴以養其體弦一作笙匏俎豆以悅其耳目於其不耕休力之時而教之以禮故因其田獵而為蒐狩之禮因其嫁娶而為婚姻之禮因其死而為喪祭之禮因其飲食羣聚而為鄉射之禮非徒以防其亂又因而教之使知算卑長幼凡人之大倫一有者字也故凡養生送死之道皆因其欲而為之制飾之物采而文焉所以悅之使其易趣也順其情性而節焉所以防之使其不過也然猶懼其未也又為立學以講明之故上自天子之郊下至鄉黨莫不有學擇民之聰明者而習焉使相告語而誘勸其愚嚚嗚呼何其備也蓋一有堯舜二字二代之為政如此其慮民之意其精治民之具其備防民之術甚周誘

民之道甚篤行之以勤而被於物者洽浸之以漸而入於人者深故民之生也不用力乎南畝則從事於禮樂之際不在其家則在乎庠序之間耳聞目見無非仁義一有禮字樂而趣之不知其倦終身不見異物又奚暇夫外慕哉故曰雖有佛無由而入者謂有此具也及周之衰秦并天下盡去三代之法而王道中絕後之有天下者不能勉彊其為治之具不備防民之漸不周佛於此時乘間而出千有餘歲之間佛之來者日益衆吾之所為者日益壞井田最先廢而兼并游惰之姦起其後所謂蒐狩婚姻喪祭鄉射之禮凡所以教民之具相次而盡廢然後民之姦者有暇而為佻其良者泯然不見禮義之及已夫姦民有餘力則思為邪僻良民不見禮義則莫知所趣佛於此時乘其隙一無此大字方鼓其雄誕之說而牽一作率之則民不得不從而歸矣又况王公大人往往倡而殿之曰佛是真可歸依者然則吾民何疑而不歸焉幸而有一不惑者方艱然而怒曰佛何為者吾將操戈而逐之又曰吾將有說以排之一有何其不思之甚也七字夫千歲之患徧於天下豈一人一日之可為民之沈酣入於骨髓非口舌之可勝然則將奈何曰莫若修其本以勝之昔戰國之時楊墨交亂孟子患之而專言仁義故仁義之說勝則楊墨之學廢漢之時百家並興董生患之而退修孔氏故孔氏之道明而百家一有自字息此所謂修其本以勝之之効也今八尺之夫被甲荷戟勇蓋三軍然而見佛則拜聞佛之說則有畏慕之誠者何也彼賊壯佼其中心茫然無所守而然也一介之士眇然柔懦進趨畏怯然而聞有道佛者一無此字則義形於色非徒不為之屈又欲驅而絕之者何也彼無佻焉學問明而禮義熟中心有所守以勝之也然則禮義者勝佛之本也今一介之士知禮義者尚能不為之屈使天下皆知禮義則勝之矣此自然之勢也

本論下

昔荀卿子之說以爲人性本惡著書一篇以持其論予始愛之及見世人之歸佛者然後知荀卿之說繆焉甚矣人之性善也彼爲佛者棄其父子絕其夫婦於人之性甚戾又有蠶食蟲蠹之弊然而民皆相率而歸焉者以佛有爲善之說故也嗚呼誠使吾民曉然知禮義之爲善則安知不相率而從哉奈何教之論之之不至也佛之說熟於人耳入乎其心久矣至於禮義之事則未嘗見聞今將號於衆曰禁汝之佛而爲吾禮義則民將駭而走矣莫若爲之以漸使其不知而趣焉可也蓋鯨之治水也鄩之故其害益暴及禹之治水也導之則其患息蓋患深勢盛則難與敵莫若馴致而去一有其害二字之易也今堯舜三代之政其說尙傳其具皆在誠能講而修之行之以勤而浸之以漸使民皆樂而趣焉則充乎天下而佛無所施矣傳曰物莫能兩大自然之勢也奚必曰火其書而廬其居哉昔者戎狄蠻夷雜居九州之間所謂徐戎白狄荆蠻淮夷之類是也三代既衰若此之類並侵於中國故秦以西戎據宗周吳楚之國一作君皆僭稱王春秋書用鄩子傳記被髮於伊川而仲尼亦以不左衽爲幸當是之時佛雖不來中國幾何其不夷狄也以是而言王道不明而仁義廢則夷狄之患至矣及孔子作春秋尊中國而賤夷狄然後王道復明方今九州之民莫不右衽而冠帶其爲患者特佛爾其所以勝之道非有甚高難行之說也患乎忽而不爲爾夫郊天祀地與乎宗廟社稷朝廷之儀皆天子之大禮也今皆舉而行之至於所謂蒐狩婚姻喪祭鄉射之禮此郡縣有司之事也在乎講明而頒布之爾然非行之以勤浸之以漸則不能入於人而成化自古王者之政必世而後仁今之議者將曰佛來千餘歲有力者尙無可奈何何用此迂緩之說爲是則以一日之功不速就而棄必世之功不爲也可不惜哉昔孔子歎爲俑者不仁蓋歎乎啓其漸而至於用殉也然則爲佛者不猶甚於作俑乎當其始來未見其害引而內之今之爲害著

矣非待先覺之明而後見也然而恬然不以爲怪者何哉夫物極則反數窮則變此理之常也今佛之威久矣乘其窮極之時可以反而變之不難也昔三代之爲政皆聖人之事業及其久也必有弊故三代之術皆變其質文而相救就使佛爲聖人及其弊也猶將救之况其非聖者乎夫姦邪之士見信於人者彼雖小人必有所長以取信是以古之人君惑之至於亂亡而不悟今佛之法可謂姦且邪矣蓋其爲說亦有可以惑人者使世之君子雖見其弊而不思救豈又善惑者歟抑亦不得其救之之術也救之莫若修其本以勝之捨是而將有爲雖黃育之勇孟軻之辯太公之陰謀吾見其力未及施言未及出計未及行而先已陷於禍敗矣何則患深勢盛威難與敵非馴致而爲之莫能也故曰修其本以勝之作本論

朋黨論在諫院進一本以論爲議

臣聞朋黨之說自古有之惟幸人君辨其君子小人而已大凡君子與君子以同道爲朋小人與小人以同利爲朋此自然之理也一無此六字然臣謂小人無朋惟君子則有之其故何哉小人所好者祿利也所貪者財貨也當其同利之時暫相黨引以爲朋者僞也及其見利而爭先或利盡而交疎則反相賊害雖其兄弟一作弟兄親戚不能相保故臣謂小人無朋其暫爲朋者僞也君子則不然所守者道義所行者忠信所惜者名節以之修身則同道而相益以之事國則同心而共濟終始如一此君子之朋也故爲人君者但當退小人之僞朋用君子之真朋則天下治矣堯之時小人共工讎兜等四人爲一朋君子八元八凱十六人爲一朋舜佐堯退四凶小人之朋而進元凱君子之朋堯之天下大治及舜自爲天子而舉夔稷契等二十二人並列于朝更相稱美更相推讓凡二十二人爲一朋而舜皆用之天下亦大治書曰紂有臣億萬惟億萬心周有臣三千惟一心紂之時億萬人各異心可謂不爲朋矣然紂以亡國周武王之臣三

千人爲一大朋而周用以興後漢獻帝時盡取天下名士囚禁之目爲黨人及黃巾賊起漢室大亂後方悔悟盡解黨人而釋之然已無救矣唐之晚年漸起朋黨之論及昭宗時盡殺朝之名士或一作咸投之黃河曰此輩清流可投濁流而唐遂亡矣夫前世之主能使人異心不爲朋莫如紂能禁絕善人爲朋莫如漢獻帝能誅戮清流之朋莫如唐昭宗之世然皆一有以字亂亡其國更相稱美推讓而不自疑莫如舜之二十二臣舜亦不疑而皆用之然而後世不諂舜爲二十二人朋黨所欺而稱舜爲聰明之聖者以辨君子與小人也周武之世舉其國之臣三千人共爲一朋自古爲朋之多且大莫如周然周用此以興者善人雖多而不厭也夫興亡治亂之迹爲人君者可以鑒矣一有作朋黨議四字

魏梁解一作論

予論正統辨魏梁一作不黜魏而辨梁注曹魏朱梁不爲僞議者或非予一作其大失春秋之旨以謂魏梁皆負篡弒之惡當加誅絕而反進之是疑篡也非春秋之志也予應之曰是春秋之志耳魯桓公弒隱公而自立者宣公弒子赤而自立者鄭厲公逐世子忽而自立者衛公孫剽逐其君行而自立者聖人於春秋皆不絕其爲君此子所以不黜魏梁者用春秋之法也魏梁之惡三尺童子皆知可惡予不得聖人之法爲據依其敢進而不疑乎然則春秋亦疑篡乎曰惟不絕四者之爲君於此見春秋之意也聖人之於春秋用意深故能勸戒切爲言信然後善惡明夫欲著其罪於後世在乎不沒其實其實嘗爲君矣書其爲君其實篡也書其篡各傳其實而使後世信之則四君之罪不可得而揜耳使爲君者不得揜其惡則人之爲惡者庶乎其息矣是謂用意深而勸戒切爲言信而善惡明也凡惡之爲名非徒君子嫉之雖爲小人者亦知其可惡也而小人常至於爲惡者蓋以人爲可欺與夫幸人不知而可揜耳夫位莫貴乎國君而

不能逃大惡之名所以示人不可欺而惡不可揜也就使四君因聖人誅絕而其惡彰焉則後世之爲惡者將曰彼不幸遭逢聖人黜絕而一作之不得爲君遂彰其惡耳我無孔子世莫我黜則冀人爲可欺而惡可揜也如此則僥倖之心啓矣惟與其爲君使不得揜其惡者春秋之深意也桀紂不待貶其爲王而萬世所共惡者也今匹夫之士比之顏閔則喜方之桀紂則怒是大惡之君不及一善之士也春秋之於大惡之君不誅絕之者不害其喪善貶惡之旨也惟不沒其實以著其罪而信乎後世與其爲而君不得揜其惡以息人之爲惡能知春秋之此旨然後知予不黜魏梁之是也

爲君難論上

語曰爲君難者孰難哉蓋莫難於用人夫用人之術任之必專信之必篤然後能盡其材而可共成事及其失也任之欲專則不復謀於人而拒絕羣議是欲盡一人之用而先失衆人之心也信之欲篤則一切不疑而果於必行是不審事之可否不計功之成敗也夫違衆舉事又不審計而輕發其百舉百失而及於禍敗此理之宜然也然亦有幸而成功者人情成是而敗非則又從而贊之以其違衆爲獨見之明以其拒諫爲不惑羣論以其偏信而輕發爲決於能斷使後世人君慕此二者以自期至其信用一失而及於禍敗則雖悔而不可及此甚可歎也前世爲人君者力拒羣議專信一人而不能早悟以及於禍敗者多矣不可以徧舉請試舉其一二昔秦苻堅地大兵強有衆九十六萬號稱百萬蔑視東晉指爲一隅謂可直以氣吞之耳然而舉國之人皆言晉不可伐更進互說者不可勝數其所陳天時人事堅隨以強辯折之忠言讜論皆沮屈而去如王猛苻融老成之言也不聽太子宏少子說至親之言也不聽沙門道安堅平生所信重者也數爲之言不聽惟聽信一將軍慕容垂垂之言曰陛下內斷神謀足矣不煩廣訪朝臣以亂聖慮堅大喜曰與吾共定天下

者惟卿爾於是決意不疑遂大舉南伐兵至壽春晉以數千人擊之大敗而歸北至洛陽九十六萬兵亡其八十六萬堅自此兵威沮喪不復能振遂至於亂亡近五代時後唐清泰帝患晉祖之鎮太原也地近契丹特兵跋扈議欲徙之於鄆州舉朝之士皆諫以爲未可帝意必欲徙之夜召常所與謀樞密直學士薛文遇問之以決可否文遇對曰臣聞作舍道邊三年不成此事斷在陛下何必更問羣臣帝大喜曰術者言我今年當得一賢佐助我中興卿其是乎即時命學士草制徙晉祖於鄆州明日宣麻在廷之臣皆失色後六日而晉祖反書至清泰帝憂懼不知所爲謂李崧曰我適見薛文遇爲之肉顛欲自抽刀刺之崧對曰事已至此悔無及矣但君臣相顧涕泣而已由是言之能力拒羣議專信一人莫如二君之果也由之以致禍敗亂亡亦莫如二君之酷也方苻堅欲與慕容垂共定天下清泰帝以薛文遇爲賢佐助我中興可謂臨亂之君各賢其臣者也或有詰予曰然則用人者不可專信乎應之曰齊桓公之用管仲蜀先主之用諸葛亮可謂專而信矣不聞舉齊蜀之臣民非之也蓋其令出而舉國之臣民從事行而舉國之臣民便故桓公先主得以專任而不貳也使令出而兩國之人不從事行而兩國之人不便則彼二君者其肯專任而信之以失衆心而斂國怨乎

爲君難論下

嗚呼用人之難難矣未若聽言之難也夫人之言非一端也巧辯縱橫而可喜忠言質樸而多訥此非聽言之難在聽者之明暗也諛言順意而易悅直言逆耳而觸怒此非聽言之難在聽者之賢愚也是皆未足爲難也若聽其言則可用然用之有輒敗人之事者聽其言若不可用然非如其言不能以成功者此然後爲聽言之難也請試舉其一二戰國時趙將有趙括者善言兵自謂天下莫能當其父奢趙之名將老於用兵者也每與括言亦不能屈然奢終不以括爲能

也歎曰趙若以括爲將必敗趙事其後奢死趙遂以括爲將其母自見趙王亦言括不可用趙王不聽使括將而攻秦括爲秦軍射死趙兵大敗降秦者四十萬人坑於長平蓋當時未有如括善言兵亦未有如括大敗者也此聽其言可用用之輒敗人事者趙括是也秦始皇欲伐荆問其將李信用兵幾何信方年少而勇對曰不過二十萬足矣始皇大喜又以問老将王翦翦曰非六十萬不可始皇不悅曰將軍老矣何其怯也因以信爲可用即與兵二十萬使伐荆王翦遂謝病退老於頻陽已而信大爲荆人所敗亡七都尉而還始皇大慚自駕如頻陽謝翦因強起之翦曰必欲用臣非六十萬不可於是卒與六十萬而往遂以滅荆夫初聽其言若不可用然非如其言不能以成功者王翦是也且聽計於人者宜如何聽其言若可用用之宜矣輒敗事聽其言若不可用捨之宜矣然必如其說則成功此所以爲難也予又以謂秦趙二主非徒失於聽言亦由樂用新進忽棄老成此其所以敗也大抵新進之士喜勇銳老成之人多持重此所以人主之好立功名者聽勇銳之語則易合聞持重之言則難入也若趙括者則又有說焉子略考史記所書是時趙方遣廉頗攻秦頗趙名將也秦人畏頗而知括虛言易與也因行反間於趙曰秦人所畏者趙括也若趙以爲將則秦懼矣趙王不悟反間也遂用括爲將以代頗藺相如力諫以爲不可趙王不聽遂至於敗由是言之括虛談無實而不可用其父知之其母亦知之趙之諸臣藺相如等亦知之外至敵國亦知之獨其主不悟爾夫用人之失天下之人皆知其不可而獨其主不知者莫大之患也前世之禍亂敗亡由此者不可勝數也

居士集卷第十七

攷本論初有上中下二篇此卷所載即中下二篇其上篇編居士集時雖削去而傳於世今附外集

經旨十一首辨一首附

易或問三首

或問大衍之數易之緼一作數乎學者莫不盡心焉曰大衍易之末也何必盡心焉一無此字也易者文王之作也其書則六一無此字經也其文則聖人之言也其事則天地萬物君臣父子夫婦人倫之大端也大衍筮占一作卜筮之一法耳非文王之事也然則不足學乎曰得其大者可以兼其小未有學其小而能至其大者也知此然後知學易矣六十四卦自古用焉夏商之世筮占之說略見于書文王遭紂之亂有憂天下之心有慮萬世之志而無所發以謂一作為卦爻起於奇耦之數陰陽變易交錯而成文有君子小人進退動靜剛柔之象而治亂盛衰得失吉凶之理具焉因假取以寓其言而名之曰易至其後世用以占一作卜筮孔子出於周末懼文王之志不見于後世而易專為筮占一作卜筮用也乃作象象發明卦義必稱聖人君子王后以當其事而常以四方萬國天地萬物之大以為言蓋明非止於卜筮也所以推原本意而矯世失然後文王之志大明而易始列乎六經矣易之論于卜筮非止今世也微孔子則文王之志沒而不見矣夫六爻之文占辭也一有文王之作也五字大衍之數占法也一作昔古所用也文王更其辭而不改其法故曰太衍非文王之事也所謂辭者有君子小人進退動靜剛柔之象治亂盛衰得失吉凶之理學者專其辭於筮占一作卜筮猶見非於孔子況遺其辭而執其占法欲以見文王作易之意不亦遠乎凡欲為君子者學聖人之言欲為占者學大衍之數惟所擇之一一無此字焉耳或問繫辭果非聖人之作前世之大儒君子不論何也曰何止乎繫辭辭之塗廩浚井不載於六經不道於孔子之徒蓋俚巷人之語也及其傳也久孟子之徒道之事固有出於繆妄之說其初也大儒君

子以世莫之信置而不論及其傳之久也後世反以謂更大儒君子而非是實不誣矣由是曲學之士溺焉者多矣自孔子歿周益衰王道喪而學廢接乎戰國百家之異端起十異之說不知起於何人自秦漢以來大儒君子不論也或者曰然則何以知非聖人之作也曰大儒君子之於學也理達而已矣中人已下指其迹提其耳而譬之猶有感焉者溺於習聞之久曲學之士喜為奇說以取勝也何謂子曰者講師之言也吾嘗以譬學者矣元者善之長亨者嘉之會利者義之和貞者事之幹此所謂文言也方魯穆姜之道此言也在襄公之九年後十有五年而孔子生左氏之傳春秋也固多浮誕之辭然其用心亦必欲其書之信後世也使左氏知文言為孔子作也必不以追附穆姜之說而疑後世蓋左氏者不意後世以文言為孔子作也孟子曰盡信書不如無書孟子豈好非六經者黜其雜亂之說所以尊經一有也字

或問一有曰字大衍筮占之事也其於筮占之說無所非乎曰其法是也其言非也用著四十有九分而為二掛一揲四歸奇再劫其法是也象兩象三至于乾坤之策以當萬物之數者其言皆非也傳曰知者創物又曰百工之事皆聖人之作也筮者上古聖人之法也其為數也出於自然而不測四十有九是也其為用也通於變而無窮七八九六是也惟不測與無窮故謂之神惟神故可以古今為大衍者取物合數以配著是可測也以九六定乾坤之策是有限而可窮也矧占之而不効夫奇耦陰陽之數也陰陽天地之正氣也二氣升降有進退而無老少且聖人未嘗言而雖繫辭之殘雜亦不道也問者曰然則九六何為而變曰夫著四十有九無不用也昔之言大衍者取四揲之策而捨掛劫之數兼知掛劫之多少一又有多少字則九六之變可知矣著數無所配合陰陽無老少乾坤無定策知此然後知筮占矣嗚呼文王無孔子易其淪於卜筮乎易無王弼其淪於

異端之說乎因孔子而求文王之用心因弼而求孔子之意因子言而求弼之得失可也

明用

乾之六爻曰初九潛龍勿用九二見龍在田九三君子終日乾乾夕惕若厲无咎九四或躍在淵九五飛龍在天上九亢龍有悔又曰用九見羣龍无首吉者何謂也謂以九而各爻也乾爻七九九變而七無爲易道占其變故以其所占者各爻不謂六爻皆常九也曰用九者釋所以不用七也及其筮也七常多而九常少有無九者焉此不可以不釋也曰羣龍无首吉者首先也主也陽極則變而之他故曰无首也凡物極而不變則變則通故曰吉也物無不變變無不通此天理之自然也故曰天德不可爲首又曰乃見天則也坤之六爻曰初六履霜堅冰至六二直方大不習无不利六三含章可貞或從王事无成有終六四括囊无咎无譽六五黃裳元吉上六龍戰于野其血玄黃又曰用六利永貞者何謂也謂以六而各爻也坤爻八六大變而入無爲亦以其占者各爻不謂六爻皆常六也曰用六者釋所以不用八也及其筮也八常多而六常少有無六者焉此不可以不釋也陰柔之動或失於邪故曰利永貞也陰陽反復天地之常理也聖人於陽盡變通之道於陰則有所戒焉六十四卦陽爻皆七九陰爻皆六八於乾坤而見之則其餘可知也

春秋論上

事有不幸出於久遠而傳乎二說則奚從曰從其一之可信者然則安知可信者而從之曰從其人而信之可也衆人之說如彼君子之說如此則捨衆人而從君子君子博學而多聞矣然其傳不能無失也君子之說如彼聖人之說如此則捨君子而從聖人此舉世之人皆知其然而學春秋者獨異乎是孔子聖人也萬世取信一人而已若公羊高穀梁赤左氏一本氏作邱明三子者博學而多聞矣其傳

不能無失者也孔子之於經三子之於傳有所不同則學者寧捨經而從傳不信孔子而信三子甚哉其惑也經於魯隱公之事書曰公及邾儀父盟于蔑其卒也書曰公薨孔子始終謂之公三子者曰非公也是攝也學者不從孔子謂之公而從三子謂之攝其於晉靈公之事孔子書曰趙盾弑其君夷臯三子者曰非趙盾也是趙穿也學者不從孔子信爲趙盾而從三子信爲趙穿其於許悼公之事孔子書曰許世子止弑其君買三子者曰非弑之也買病死而止不嘗藥耳學者不從孔子信爲弑君而從三子信爲不嘗藥其捨經而從傳者何哉經簡而直傳新而奇簡直無悅耳之言而一無此字新奇多一作有可喜之論是以學者樂聞而易惑也予非敢曰不惑然信於孔子而篤者也經之所書予所信也經所不言予不知也難者曰子之言有激而云爾夫三子者皆學乎聖人而傳所以述經也經文隱而意深三子者從而發之故經有不言傳得而詳爾非爲二說也予曰經所不書三子者何從而知其然也曰推其前後而知之且其有所傳而得也國君必即位而隱不書即位此傳得知其攝也弑君者不復見經而盾復見經此傳得知弑君非盾也君弑賊不討則不書壅而許悼公書壅此傳得知世子止之非實弑也經文隱矣傳曲而暢之學者以謂三子之說聖人之深意也是以從之耳非謂捨孔子而信三子也予曰然則妄意聖人而惑學者三子之過而已使學者必信乎三子子不能奪也使其惟是之求則予不得不爲之辨

春秋論中

孔子何爲而修春秋正名以定分求情而責實別是非明善惡此春秋之所以作也自周衰以來臣弑君子弑父諸侯之國相屠戮而爭爲君者天下皆是也當是之時有一人焉能好廉而知讓立乎爭國之亂世而懷讓國之高節孔子得之於經宜如何而別白之宜如何而褒顯之其肯沒其攝位之實而雷同衆君誣以爲公乎所謂攝者

臣行君事之名也伊尹周公共和之臣嘗攝矣不聞商周之人謂之王也使息姑實攝而稱號無異於正君則各分不正而是非不別夫攝者心不欲爲君而身假行君事雖行君事而其實非君也今書曰公則是息姑心不欲之實不爲之而孔子加之失其本心誣以虛名而沒其實善夫不求其情不責其實而善惡不明如此則孔子之意疎而春秋繆矣春秋辭有同異尤謹嚴而簡約所以別嫌明微慎重而取信其於是非善惡難明之際聖人所盡心也息姑之攝也會盟征伐實刑祭祀皆出於己舉魯之人皆聽命於己其不爲正君者幾何惟不有其名爾使其名實皆在己則何從而知其攝也故息姑之攝與不攝惟在爲公與不爲公別嫌明微繫此而已且其有讓桓之志未及行而見殺其生也志不克伸其死也被虛名而違本意則息姑之恨何申於後世乎其甚高之節難明之善亦何望於春秋乎今說春秋者皆以名字氏族子奪爲輕重故曰一字爲褒貶且公之爲字豈不重於名字氏族乎孔子於名字氏族不妄以加人其肯以公妄加於人而沒其善一作實乎以此而言隱實爲攝則孔子決不書曰公孔子書爲公則隱決非攝難者曰然則何爲不書即位曰惠公之終不見其事則隱之始立亦不可知孔子從二百年後得其遺書而修之闕其所不知所以傳信也難者又曰謂爲攝者左氏耳公羊穀梁皆以爲假立以待桓也故得以假稱公子曰凡魯之事出於己舉魯之人聽於己生稱曰公死書曰薨何從而知其假

春秋論下

弑逆大惡也其爲罪也莫贖其於人也不容其在法也無赦法施於人雖小必慎況舉大法而加大惡乎既輒加之又輒赦之則自侮其法而人不畏春秋用法不如是之輕易也三子說春秋書趙盾以不討賊故加之大惡既而以盾非實弑則又復見于經以明盾之無罪是輒加之而輒赦之爾以盾爲無弑心乎其可輕以大惡加之以盾

不討賊情可責而宜加之乎則其後頑然未嘗討賊既不改過以自贖何爲遽赦使同無罪之人其於進退皆不可此非春秋意也趙穿弑君大惡也盾不討賊不能爲君復讎而失刑於下二者輕重不較可知就使盾爲可責然穿焉得免也今免首罪爲善人使無辜者受大惡此決知其不然也春秋之法使爲惡者不得幸免疑似者有所辨明一有此字所謂是非之公也據三子之說初靈公欲殺盾盾走而免穿盾族也遂弑而盾不討其迹涉於與弑矣此疑似難明之事聖人尤當求情責實以明白之使盾果有弑心乎則自然罪在盾矣不得曰爲法受惡而稱其賢也使果無弑心乎則當爲之辨明必先正穿之惡使罪有所歸然後責盾縱賊則穿之大惡不可幸而免盾之疑似之迹獲辨而不討之責亦不得辭如此則是非善惡明矣今爲惡者獲免而疑似之人陷于大惡此決知其不然也若曰盾不討賊有幸弑之心與自弑同故寧捨穿而罪盾此乃逆詐用情之吏矯激之爲爾非孔子忠恕春秋以王道治人之法也孔子患舊史是非錯亂而善惡不明所以修春秋就令舊史如此其肯從而不正之乎其肯從而稱美又教人以越境逃惡乎此可知其繆傳也問者曰然則夷臯孰弑之曰孔子所書是矣趙盾弑其君也今有一人焉父病躬進藥而不嘗又有一人焉父病而不躬進藥而二父皆死又有一人焉操刃而殺其父使吏治之是三人者其罪同乎曰雖庸吏猶知其不可同也躬藥而不知嘗者有愛父之孝心而不習於禮是可哀也無罪之人爾不躬藥者誠不孝矣雖無愛親之心然未有殺父之意使善治獄者猶當與操刃殊科况以躬藥之孝反與操刃同其罪乎此庸吏之不爲也然則許世子止實不嘗藥則孔子決不書曰弑君孔子書爲弑君則止決非不嘗藥難者曰聖人借止以垂教爾對曰不然夫所謂借止以垂教者不過欲人之知嘗藥耳聖人一言明以告人則萬世法也何必加孝子以大惡之名而嘗藥之事卒不見

于文使後世但知止為弑君而莫知藥之當嘗也教未可垂而已陷人於大惡矣聖人垂教不如是之迂也果曰責止不如是之刻也難

者曰然則盾曷為復見于經許悼公曷為書壘曰弑君之臣不見經此自三子說爾果聖人法乎悼公之壘且安知其不討賊而書壘也

自止以弑見經後四年吳敗許師又有八年當定公之四年許男始見于經而不名許之書于經者略矣止之事迹不可得而知也難

者曰三子之說非其臆出也其得於所傳如此然則所傳者皆不可信乎曰傳聞何可盡信公羊穀梁以尹氏卒為正卿左氏以尹氏卒

為隱母一以為男子一以為婦人得於所傳者蓋如是是可盡信乎

春秋或問 或問春秋何為一無此字始於隱公而終於獲麟曰吾不知也問者曰此學者之所盡心焉不知何也曰春秋一有之字起止吾所知也

子所問者始終之義吾不知也吾無所用心乎此一有也字昔者孔子仕於魯不用去之諸侯又不用困而歸且老始著書得詩自關雎

至于魯頌得書自堯典至于費誓得魯史記自隱公至于獲麟遂刪修之其前遠矣聖人著書足以法世而已不窮遠之難明也故據其

所得而修之孔子非史官也一無此字不常職乎史故盡其所得修之而止耳魯之史記則未嘗止也今左氏經可以見矣曰然則始終

無義乎曰義在春秋不在起止春秋謹一言而信萬世者也予厭衆說之亂春秋者也

或問子於隱攝盾止之弑據經而廢傳經簡矣待傳而詳可廢乎曰吾豈盡廢之乎夫傳之於經勤矣其述經之事時有賴其詳焉至其

失傳則不勝其戾也其述經之意亦時有得焉及其失也欲大聖人而反小之欲尊經而反卑之取其詳而得者廢其失者可也嘉其尊

大之心可也信其卑小之說不可也問者曰傳有所廢則經有所不通奈何曰經不待傳而通者十七八因傳而惑者十五六日月萬物

皆仰然不為盲者明而有物蔽之者亦不得見也聖人之意皎然乎經惟明者見之不為他說蔽者見之也

泰誓論

書稱商始咎周以乘黎乘黎者西伯也西伯以征伐諸侯為職事其伐黎而勝也商人已疑其難制而惡一作患之使西伯赫然見其不

臣之狀與商並立而稱王如此十年商人反晏然不以為怪其父師老臣如祖伊微子之徒亦默然相與熟視而無一言此豈近於人情

邪由是言之謂西伯受命稱王十年者妄說也以紂之雄猜暴虐嘗醢九侯而脯鄂侯矣西伯聞之竊歎遂執而囚之幾不免死至其叛

己不臣而自王乃反優容而不問者十年此豈近於人情邪由是言之謂西伯受命稱王十年者妄說也孔子曰三分天下有其二以服

事商使西伯不稱臣而稱王安能服事於商乎且謂西伯稱王者起於何說而孔子之言萬世之信也由是言之謂西伯受命稱王十年者妄說也伯夷叔齊古之知義之士也方其讓國而去顧天下皆莫

可歸聞西伯之賢共往歸之當是時紂雖無道天子也天子在上諸侯不稱臣而稱王是僭叛之國也然二子不以為非依之久而不去

至武王伐紂始以為非而棄去彼二子者始顧天下莫可歸卒依僭叛之國而不去不非其父而非其子此豈近於人情邪由是言之謂

西伯受命稱王十年者妄說也書之泰誓稱十有一年說者因以謂自文王受命九年及武王居喪二年并數之爾是以西伯聽虞芮之

訟謂之受命以為元年此又妄說也古者人君即位必稱元年常事爾不以為重也後世曲學之士說春秋始以改元為重事然則果常

事數固不足道也果重事數西伯即位已改元矣中間不宜改元而又改元至武王即位宜改元而反不改元乃上冒先君之元年并其

居喪稱十一年及其滅商而得天下其事大於聽訟遠矣又不改元由是言之謂西伯以受命之年為元年者妄說也後之學者知西伯

生不稱王而中間不再改元則詩書所載文武之事粲然明白而不
誣矣或曰然則武王畢喪伐紂而泰誓曷謂稱十有一年對曰畢喪
伐紂出於諸家之小說而泰誓六經之明文也昔者孔子當衰周之
際患衆說紛紜以惑亂當世於是退而修六經以爲後世法及孔子
既沒去聖稍遠而衆說復興與六經相亂自漢以來莫能辨正今有
卓然之士一取信乎六經則泰誓者武王之事也十有一年者武王
卽位之十有一年爾復何疑哉司馬遷作周本紀雖曰武王卽位九
年祭於文王之墓然後治兵于孟津至作伯夷列傳則又載父死不
葬之說皆不可爲信是以吾無取焉取信于書可矣

縱凶論

信義行於君子而刑戮施於小人刑入于死者乃罪大惡極此又小
人之尤甚者也竇以義死不苟幸生而視死如歸此又君子之尤難
者也方唐太宗之六年錄大辟囚三百餘人縱使還家約其自歸以
就死是以君子之難能期小人之尤者以必能也其囚及期而卒自
歸無後者是君子之所難而小人之所易也此豈近於人情或曰罪
大惡極誠小人矣及施恩德以臨之可使變而爲君子蓋恩德入人
之深而移人之速有如是者矣曰太宗之爲此所以求此名也然安
知夫縱之去也不意其必來以冀免所以縱之乎又安知夫被縱而
去也不意其自歸而必獲免所以復來乎夫意其必來而縱之是上
賊下之情也意其必免而復來是下賊上之心也吾見上下交相賊
以成此名也烏有所謂施恩德與夫知信義者哉不然太宗施德於
天下於茲六年矣不能使小人不爲極惡大罪而一日之恩能使視
死如歸而存信義此又不通之論也然則何爲而可曰縱而來歸殺
之無赦而又縱之而又來則可知爲恩德之致爾然此必無之事也
若夫縱而來歸而赦之可偶一爲之爾若屢爲之則殺人者皆不死
是可爲天下之常法乎不可爲常者其聖人之法乎是以堯舜三王

之治必本於人情不立異以爲高不逆情以干譽

怪竹辯

謂竹爲有知乎不宜生於廡下謂爲無知乎乃能避檻而曲全其生
其果有知乎則有知莫如人人者萬物之最靈也其不知於物者多
矣至有不自知其一身者如駢拇枝指懸疣附贅皆莫知其所以然
也以人之靈而不自知其一身使竹雖有知必不能自知其曲直之
所以然也竹果無知乎則無知莫如枯草死骨所謂著龜者是也自
古以來大聖大智之人有所不知者必問於著龜而取決是則枯草
死骨之有知反過於聖智之人所知遠矣以枯草死骨之如此則安
知竹之不知也遂以著龜之神智而謂百物皆有知則其他草木
瓦石叩之又頑然皆無所知然則竹未必不無知也由是言之謂竹
爲有知不可謂爲無知亦不可謂其有知無知皆不可知然後可萬
物生於天地之間其理不可以一槩謂有心然後有知乎則蚓無心
謂凡動物皆有知乎則水亦動物也人獸生而有知死則無知矣著
龜生而無知死然後有知也是皆不可窮詰故聖人治其可知者置
其不可知者是之謂大中之道

居士集卷第十八

詔冊七首

請皇太后權同聽政詔

門下朕承大行之遺命嗣列聖之不基踐祚之初銜哀罔極遂罹疾恙未獲痊和而機政之繁裁決或壅皇太后母儀天下子育朕躬輔佐先朝練達庶務因請同於聽覽蒙曲賜於矜從俾緩憂勤冀速康復候將來聽政日皇太后權同處分文武百官並放朝參候朕平愈日如故故茲詔示想宜知悉

皇太后還政議合行典禮詔

勅中書門下朕頃以嗣承大統方執初喪過自摧傷遂嬰疾恙皇太后尊居母道時違家艱閔余哀荒俯徇誠情勉同聽覽用適權宜賴保護之勤劬獲清明而康復恭惟坤德之至靜實厭事機之久煩殆此彌年荐承諄誨顧實繁於庶政難重浼於睿慈然而方國多虞則共濟天下之務惟時無事亦宜享天下之安先民有言無德不報雖日以三牲之養未足盡於予心而刑于四海之風必務先於孝治惟是事親之禮蓋存有國之規當極尊崇以稱朕意應合行儀範等事令中書門下樞密院參議以聞故茲詔示想宜知悉

賜大正宗司詔

勅夫明德以親九族正家而刑萬邦古先哲王罔不由此朕嗣守丕業率循舊章惟皇屬之敦和命宗正而董正而累聖承繼百年感隆荷宗社之慶靈茂本支而蕃衍念其性本於仁厚宜廣學以勤修顧其日益於衆多必增員而統理故外已詔於儒學各選於經師而內仍擇於親賢共司於屬籍庶乎協贊其職並修厥官糾乃非違先以正而為率勉夫怠墮惟其善而是從式孚于休以副予意

賜夏國詔書

朕嗣守不圖日新庶政方推大信以協萬邦思與藩屏之臣永遵帶

礪之約矧勤王而述職固奕世以推誠而近年以來將命之使或不體朝廷之意或罔循規矩之常多於臨時率爾改作既官司之有守致事體以難從且下修奉上之儀本期効順而君有錫臣之寵所以隆恩豈宜一介於其間輒以多端而生事在國家之撫御固廓爾以無疑想忠孝之傾輸亦豈欲其如此故特申於旨諭諒深認於眷懷今後所遣使人更宜精擇不令妄舉以紊彝章所有押賜押伴使臣等亦已嚴行戒勵苟有違越必實典刑載惟信誓之文炳若丹青之著事皆可守言貴弗違毋開間隙之萌庶敷悠久之好

英宗遺制

詔內外文武百寮等朕蒙先帝之遺休荷高穹之眷命獲主大器于茲五年樂與羣公講求至治先身以儉冀臻四海之富康勵志之勤未嘗一日而暇逸而憂勞積慮疾恙踰時有加無瘳遂至大漸皇太子瑱睿哲之性天資夙成儲兩之明人望攸屬可於極前即皇帝位尊皇太后為太皇太后皇后為皇太后諸軍賞給並取嗣君處分喪服以日易月山陵制度務從儉約在外羣臣止於本處舉哀不得擅離治所成服三日而除應緣邊州鎮皆以金革從事不用舉哀於戲死生之理聖智所同惟賴宗社之靈臣隣協德輔我元子永康王家咨爾多方當體予意主者施行

尊皇太后冊文

維治平二年歲次乙巳十一月丁巳朔十有六日壬申嗣皇帝臣瑱謹稽首再拜言曰臣聞昔者明王之以孝治天下者非家至而日見也蓋有要道焉推所以行於己者為天下率盡所以奉其親者為天下先而四海靡然而承風矣洪惟有宋受命造邦百年四聖而小子獲承之以繼我仁考之遺休餘烈方與羣公卿士夙夜以思勉其不逮庶幾如我仁考付畀之意以申罔極欲報之心此固慄慄祗懼不敢違寧者已顧惟眇末之質提攜鞠育慈仁咻煦至于有成自我聖

母嗣位之始哀迷在疚而憂勞艱難一日萬務協和綏靖保佑扶持
功施邦家亦惟我聖母永惟至恩大德無物可稱是以稽參典禮率
籲羣心合志一辭懇懇惓惓不勝大願謹遣攝太尉具官臣韓琦司
徒具官臣胡宿奉玉冊金寶上尊號曰皇太后恭惟皇太后聖善明
哲柔閑靜專粵自正位中宮內助先帝陰禮修而教行儉德著而下
化遂及萬國先於正家逮夫玉几受遺遭時多難勉徇勤請權同聽
決而明識遠慮動懷謙畏深鑒漢家母后之失訖不踐於外朝及歸
政冲人合於易之進退不失其正之聖是惟全節鉅美固已超出前
古而垂法後世宜乎威烈播于聲詩尊名光於典冊惟末小子獲奉
溫清嗚呼殫九州之富以爲養未足盡於孝心享萬壽之福而無疆
期永承於慈訓臣瓊誠懼誠忭稽首再拜謹言

居士集卷第十九

碑銘

金部郎中贈兵部侍郎閻公神道碑銘并序

惟閻氏世家于鄆其先曰太原王寶以武顯於梁晉之間實佐莊宗戰河上取常山功書史官爵有王士鄆之諸閻皆王後也周廣順二年以鄆州之鉅野鄆城爲濟州閻氏今爲濟州鉅野人也公生漢晉之間遭世多虞雖出將家而不喜戰鬪獨好學通三禮頗習子史爲文辭是時鉅野大賊有衆千餘人以公鄉里儒者掠致賊中問以謀略公毅然未嘗有所言而爲人狀貌奇偉舉止嚴重有威儀賊皆憚之莫敢害賊平公還鄉里以三禮教授弟子大宋受命天下將平公乃出以三禮舉中建隆某年某科歷漢州之金堂號州之湖城二縣尉遷濮州濮陽令皆有吏績太宗皇帝遣使者行視天下使者還言公可用召見奏事語言粲然殿中皆聳動太宗奇之拜太子洗馬知岳州一有遷殿中丞知均州一作鄆州吳越忠懿王再朝京師籍其所有浙東西之地納之有司天子以爲新附之邦乃以禁兵千人屬公安撫其人遂知蘇州一有又知婺州五代之際江海之間分爲五大者竊名號其次擅征伐故皆峻刑法急聚斂以制命於其民越雖名爲臣屬之邦然闕於江淮與中國隔不相及者久矣公以齊魯之人悉能知越風俗而揉以善政或摩以漸或革以宜推凡上之所欲施寬凡民之所不堪恩涵澤濡民以蘇息政成召還以國子博士知濟州又知晉州入拜尚書水部員外郎廣平郡王府翊善賜緋衣銀魚居六年廣平封陳王出閣公以司門員外郎求知黃州陳王徙封許乃詔公還遷庫部員外郎賜金紫侍講許王府王薨公出知棣州居歲餘以淮陽近鉅野乃求知淮陽軍公雖居許王府而真宗素知其賢數詔訪以經術謂之閻君子真宗即位問公何在左右具言所以然即時召之已在道拜金部郎中知青州其後鄆州守臣某臨遣

對殿上真宗問鄆去青遠近守臣對若干真宗曰爲吾告之將召也已而見召行至鉅野遇疾使者臨問慰賜滿百日賜告下濟州伺疾少間趨一作趣就道已而疾病一作亟一作革以某年某月某日薨于濟州享年七十有七贈兵部侍郎葬于鉅野大有一有閻字徐村公諱象字某會祖諱某某官祖諱某某官考一作父諱某某官公娶孫氏封富春縣君用子貴追封泗水縣太君子男三人長曰某某官次曰某某官次曰某某官女三人皆適士族孫五人一早亡次皆已任曾孫十人仕者五人嗚呼士患不逢時時逢矣患人主之不知知矣而不及用者命也惟公履道純正生於多艱而卒遇太平以奮其身又遭人主之知嘗用矣而不暇於大用以歿歿而無章焉則其遂不見於後世乎景祐五年冬其子光祿君自光化罷還鄉閻乃謀刻其先德於墓之碑而以其辭屬修詞曰

閻世將家大纛高牙有封太原王功桓桓公不勇力而勇於學奮身逢時卒有成業不大其榮繼世而卿挺一作挺其後世多有孫曾有墓于里有碑其隧鄉人無傷鄉之君子

太子太師致仕贈司空兼侍中文惠陳公神道碑銘并序

頽川公既葬于新鄭其子尚書主客郎中述古等七人具公之行事及太常之狀祁伯之銘以來告曰唯陳氏世有顯人我先正文惠公歷事太宗真宗而相今天子其出處始終之大節可考不誣如此故敢請以墓隧之碑予爲考其世次得其所以墓于初感于中有子終而大施于其後者曰信哉陳氏載德晦顯以時其畜厚來遠故能發大而流長自公五世以上爲博州人皇高祖翔當五代時爲王建掌書記建欲帝蜀以逆順禍福譬之不聽棄官于閩州之西水遂爲西水人皇會祖齊國公諱翊皇祖楚國公諱昭汶皇考秦國公諱省華皆開府儀同三司太師尚書令兼中書令自翔已下三世不顯于蜀至秦公始事聖朝爲左諫議大夫其配曰燕國太夫人馮氏公其次

子也諱堯佐字希元舉進士及第累贈大常丞知開封府錄事參軍用理獄有能績遷府推官以言事切直貶通判潮州自潮還獻詩數百篇而大臣亦薦其文學得直史館知壽廬二州提點府界諸縣公事丁秦公憂服除判三司都察院兩浙轉運使徙京西河東河北三路糾察在京刑獄天禧三年編次御試進士坐誤差其第貶監鄂州茶場未至丁燕國太夫人憂明年河決滑州天子念非公不可塞乃起公知滑州乾興元年作永定陵徙公京西轉運使以辦其事入爲三司戶部副使徙副度支拜知制誥兼史館修撰同知天聖二年貢舉知通進銀臺司遷龍圖閣直學士知河南府徙并州知審官院開封府拜翰林學士兼龍圖閣學士七年拜樞密副使其年八月參知政事居三歲間凡三請罷明道二年罷知永興軍行過鄭州爲狂人所詛御史中丞范諷辨公無罪徙知廬州又徙同州復徙永興又徙鄭州累官至戶部侍郎景祐四年四月召拜同中書門下平章事公爲人剛毅篤實好古博學居官無大小所至必聞一有其仁足以庇民者足以利物忠足以事上誠足以信于人潮州惡谿鱷魚食人不可近公命捕得鳴鼓于市以文告而戮之鱷一作其患并息潮人歎曰昔韓公論鱷而聽今公戮鱷而懼所爲雖異其能使異物醜類革化而利人一也吾潮間三百年而得二公幸矣在潮修孔子廟韓公祠率其州民之秀者就于學知壽州遭歲大飢公自出米爲糜以食餓者吏民以公故皆爭出米其活數萬人公曰吾豈以是爲私惠邪蓋以令率人不若身先而使其從之樂也錢塘江堤以竹籠石而潮噬之不數歲輒壞而復理公歎曰堤以捍患而反病民乃議易以薪土而害公政者言于朝以爲非便是時丁晉公參知政事主言者以黜公公爭不已乃徙公京西而籠石爲堤數歲功不就民力大困卒用公議堤乃成河東地寒而民貧奏除石炭稅減官冶鐵課歲數十萬以便民曰轉運征利之官也利有本末下有餘則上足吾豈爲俗

史哉太行山當河東河北兩路之界公以謂晉自前世爲險國常先叛而後服者恃此也其在河東澤州路後徙河北黎懷州路而太行之險通行者德公以爲利公曰吾豈爲今日利哉河決壞滑州水力悍甚每歸下湍激奔人以沒不見蹤跡者不可勝數公躬自暴露晝夜督促勸爲木龍以巨木駢齒浮水上下殺其暴堤乃成又爲長堤以護其外滑人得復其居相戒曰不可使後人忘我陳公因號其堤爲陳公堤開封府治京師公以謂治煩之術任威以擊彊盡察以防姦譬於激水而欲其澄也故公爲政一以誠信每歲正月夜放燈則悉籍惡少年禁錮之一本有歲以爲常公召少年論曰尹以惡人待汝汝安得爲善吾以善人待汝汝其爲惡邪因盡縱之凡五夜無一人犯法者太常博士陳詒知祥符縣縣吏惡其明察欲中以事而詰公廉事不可得乃欲以苛動京師自錄事已下空一縣皆逃去京師果誼言詰政苛暴是時章獻明肅太后猶聽政怒詒欲加以罪公爲樞密副使力爭之以謂罪詒則姦人得計而沮能吏詒由是獲免公十典大州六爲轉運副使一無副守一無副使字常以方嚴肅下一作方嚴肅蕭蕭下使人知畏而重犯法至其過失則多保佑之故未嘗按黜一下吏公貶潮州其所言事蓋人臣所難言者其平生奏疏尤多悉焚其藁其他文章有文集三十卷又有野廬編潮陽編愚邱集多慕韓愈爲文與修真宗寶錄又修國史故事知制誥者常先試其文辭天子以公文學天下所知不復命試自國朝以來不試而知制誥者惟楊億及公二人而已公居官不妄進取爲太常丞者十三年不遷爲起居郎者七年不遷自議錢塘堤爲丁晉公所絀後晉公益用事專威福故人子弟以公久于外多勉以進取公曰惟久然後見吾守如是十五年今天子即位晉公事敗投海外公乃見召用公初作相以唐劉蕡所對策進曰天下治亂自朝廷始朝廷賞罰自近始凡蕡之所究言者皆當今之弊此臣所欲言而陛下之所宜行

且臣等之職也天子嘉納之公在相位不久其年冬雷地震星象數變公言王隨位在臣上而病不任事程琳等位皆在下乃引漢故事以災異自責求罷章凡四上明年三月拜淮康軍節度使檢校太傅同中書門下平章事判鄭州康定元年五月以太子太師致仕詔大朝會立宰相班遂居于鄭其起居飲食康寧如少者後四年年八十有二以疾卒于家公居家以儉約爲法雖已貴常使其子弟親執賤事曰孔子固多能鄙事作爲箴箴以戒子孫臨卒口占數言自誌其墓公前娶曰杞國夫人宋氏後娶曰沂國夫人王氏子男十人長曰述古次曰比部員外郎求古主客員外郎學古虞部員外郎道古大理評事館閣校勘博古殿中丞修古祕書省正字履古光祿寺丞游古大理寺丞襲古太常寺太祝象古秦公三子長曰堯叟爲樞密使同中書門下平章事季曰堯咨爲武信軍節度使皆舉進士第一人一人字及第一無第字三子已貴秦公尚無恙每賓客至其家公及伯季侍立左右坐客感隨不安求去秦公笑曰此學一作兒子輩耳故天下皆以秦公教子爲法而以陳氏世家爲榮公之孫四十一人曾孫二人合伯季之後若子若孫若曾孫六十有八人女若孫曾五十有四人而仕于朝者多以材稱於時一無於時嗚呼可謂盛矣

銘曰

陳氏高節在汚全潔闕德潛光有俟而發其發惟時自公啓之英英伯季踵武偕來相車崇崇武節之雄高幢巨數四世六公惟世有封秦楚及齊尚書中書儀同太師祖考在前孫曾盈後公居于中伯季左右惟勤其始以享其終惟能其約以有其豐休庸顯聞播美家邦有遠其貽有大其繼刻詩垂聲以質來裔

資政殿學士戶部侍郎文正范公神道碑銘并序

皇祐四年五月甲子資政殿學士尚書戶部侍郎汝南文正公薨于徐州以其年十有二月壬申葬于河南尹樊里之萬安山下公諱仲

淹字希文五代之際世家蘇州事吳越太宗皇帝時吳越獻其地公之皇考從錢俶朝京師後爲武寧軍掌書記以卒公生二歲而孤母夫人貧無依再適長山朱氏既長知其世家感泣去之南都入學舍掃一室晝夜誦其起居飲食人所不堪而公自刻益苦居五年大通六經之旨爲文章論說必本於仁義祥符八年舉進士禮部選第一遂中乙科爲廣德軍司理參軍始歸迎其母以養及公既貴天子贈公會祖蘇州糧料判官諱夢齡爲太保祖祕書監諱贊時爲太傅考諱墉爲太師妣謝氏爲吳國夫人公少有節於富貴貧賤毀譽歡戚不一動其心而慨然有志於天下常自誦曰士當先天下之憂而憂後天下之樂而樂也其事上遇人一以自信不擇利害爲趨捨其所有爲必盡其方曰爲之自我者當如是其成與否有不在我者雖聖賢不能必吾豈苟哉天聖中晏丞相薦公文學以大理寺丞爲祕閣校理以言事忤章獻太后旨通判河中府一作陳州久之上記其忠召拜右司諫當太后臨朝聽政時以至日大會前殿上將率百官爲壽有司已具公上疏言天子無北面且開後世弱人主以彊母后之漸其事遂已又上書請還政天子不報及太后崩言事者希旨多求太后時事欲深治之公獨以謂太后受託先帝保佑聖躬始終十年未見過失宜掩其小故以全大德初太后有遺命立楊太妃代爲太后公諫曰太后母號也自古無代立者由是罷其冊命是歲大旱蝗奉使安撫東南使還會郭皇后廢率諫官御史伏閣爭不能得貶知睦州又徙蘇州歲餘即拜禮部員外郎天章閣待制召還益論時政闕失而大臣權倖多忌惡之居數月以公知開封府開封素號難治公治有聲事日益簡暇則益取古今治亂安危爲上開說又爲百官圖以獻曰任人各以其材而百職修堯舜之治不過此也因指其遷進遲速次序曰如此而可以爲公可以爲私亦不可以不察由是呂丞相怒至交論上前公求對辨語切坐落職知饒州明年呂公

亦罷公徙潤州又徙越州而趙元昊反河西上復召相呂公乃以公爲陝西經略安撫副使遷龍圖閣直學士是時新失大將延州危公請自守鄜延扞賊乃知延州元昊遣人遺書以求和公以謂無事請和難信且書有僭號不可以聞乃自爲書告以逆順成敗之說甚辯坐擅復書奪一官知耀州未逾月徙知慶州既而四路置帥以公爲環慶路經略安撫招討使兵馬都部署累遷諫議大夫樞密直學士公爲將務持重不急近功小利於延州築青澗城墾營田復承平永平廢寨熟羌歸業者數萬戶於慶州城大順以據要害一本有奪賊地而耕之六字又城細腰胡蘆於是明珠滅滅等大族皆去賊爲中國用自邊制久墮至兵與將常不相識公始分延州兵爲六將訓練齊整諸路皆用以爲法公之所在賊不敢犯人或疑公見敵應變爲如何至其城大順也一日引兵出諸將不知所向軍至柔遠始號令告其地處使往築城至於版築之用大小畢具而軍中初不知賊以騎三萬來爭公戒諸將戰而賊走追勿過河已而賊果走追者不渡而河外果有伏賊一有旣字失計乃引去於是諸將皆服公爲不可及公待將吏必使畏法而愛己所得賜賚皆以上意分賜諸將使自爲謝諸蕃質子縱其出入無一人逃者蕃酋來見召之臥內屏人徹衛與語不疑公居三歲士勇邊實恩信大洽乃決策謀取橫山復靈武而元昊數遣使稱臣請和上亦召公歸矣初西人籍其鄉兵者十數萬旣而諱以爲軍惟公所部但刺其手公去兵罷獨得復爲民其於兩路旣得熟羌爲用使以守邊因徙屯兵就食內地而紓西人饋輓之勞其所設施去而人德之與守其法不敢變者至今尤多自公坐呂公貶羣士大夫各持二公曲直呂公患之凡直公者皆指爲黨或坐竄逐及呂公復相公亦再起被用於是一公雖然相約勦力平賊天下之士皆以此多二公然朋黨之論遂起而不能止上旣賢公可大用故卒置羣議而用之慶曆二年春召爲樞密副使五讓不許

乃就道旣至數月以爲參知政事每進見必以太平責之公歎曰上用我者至矣然事有先後而革弊於久安非朝夕可也旣而上再賜手詔趣使條天下事又開天章閣召見賜坐授以紙筆使疏于前公惶恐避席始退而條列時所宜先者十數事上之其詔天下興學取士先德行不專文辭革磨劬例遷以別能否減任子之數而除濫官用農桑考課守宰等事方施行而磨勘任子之法僥倖之人皆不便因相與騰口而嫉公者亦幸外有言喜爲之佐佑會邊奏有警公卽請行乃以公爲河東陝西宣撫使至則上書願復守邊卽拜資政殿學士知邠州兼陝西四路安撫使其知政事纔一歲而罷有司悉奏罷公前所施行而復其故言者遂以危事中之賴上察其忠不聽是時夏人已稱臣公因以疾請鄧州守鄧三歲求知杭州又徙青州公益病又求知潁州肩昇至徐遂不起享年六十有四方公之病上賜藥存問旣薨輟朝一日以其遺表無所請使就問其家所欲一有爲贈以兵部尙書所以哀卹之甚厚公爲人外和內剛樂善汎愛喪其母時尙貧終身非賓客食不重肉臨財好施意豁如也及退而視其私妻子僅給衣食其爲政所至民多立祠畫像其行己臨事自山林一作精神處士里閭田野之外至夷狄莫不知其名字而樂道其事者甚衆及其世次官爵誌于墓譜于家藏于有司者皆不論著著其繫天下國家之大者亦公之志也歟銘曰

范於吳越世實陪臣倣納山川及其士民范始來北中間幾息公奮自躬與時偕逢事有罪功言有違從豈公必能天子用公其艱其勞一其初終夏童跳邊乘吏怠一作殮安帝命公往問彼驕頑有不聽順鋤其穴根公居三年怯勇躋完兒憐獸擾卒俾來臣夏人在廷其事方議帝趣公來以就子治公拜稽首茲惟難一作繫哉初匪其難在其終之羣言營營卒壞于成匪惡其成惟公是傾不傾不危天子之明存有顯榮歿有贈諡藏其子孫寵及後世惟百有位可勸無怠

碑銘四首

尚書戶部郎中贈右諫議大夫會公神道碑 一作墓誌銘并序

公諱致堯字某撫州南豐人也少知名江南一本作少有大志以文
 行知名當李氏時不就鄉里之舉李氏亡太平興國八年一有始字
 舉進士及第為符離主簿累遷光祿寺丞監越州酒稅數上書言事
 獻文章太宗奇之召拜著作佐郎直史館使行視汴河漕運稱旨遷
 秘書丞為兩浙轉運使諫議大夫魏庠知蘇州特舊恩多不法吏莫
 敢近公一本有曰此吾職也劾其狀以聞太宗驚曰是敢治魏庠可
 畏也卒為公罷庠洛苑使楊允恭以言事見幸無不聽事有下公常
 厝不行允恭以訴太宗遣使問公公具言其不可一本下有事卒不
 行公既繩其大而人所難者至其小易則務為寬簡歲終其課為最
 徙知壽州壽近京師諸豪大商一作姓交結權貴一本作豪又有恃
 其聲勢號為難治公居歲餘諸豪斂手莫一不敢犯公法人亦莫
 見其以何術而然也一本下有夫敢以法加諸豪乃疆吏之所能爾
 使諸豪不敢干其法此為法之本意而人之難也故公於壽尤有惠
 愛既去壽人遮留數日以一騎從二卒逃去過他州壽人猶有追之
 者再遷主客員外郎判三司鹽鐵勾院是時李繼捧以銀夏五州歸
 朝廷其弟繼遷亡入磧中為寇太宗遽遣繼捧往招之至則誘其兄
 以陰合卒復圖而囚之自陝以西既苦兵矣真宗初即位益欲來以
 恩德許還其地使聽約束公獨以謂繼遷反覆一有如此字不可予
 繼遷已得五州後二年果叛圍靈武議者又欲予之公益爭以為不
 可言雖不從真宗知其材將召以知制誥而大臣有不可者乃已出
 為京西轉運使王均伏誅奉使安撫西川誤留詔書于家其副潘惟
 岳一作吉教公上言渡吉柏江舟破亡之一有可字以自解公曰為

臣而欺其君吾不能為也乃上書自劾釋不問其後惟岳一作吉入
 見禁中道蜀事具言公所劾者真宗嗟歎久之繼遷兵既久不解
 丞相張齊賢略瓊慶以西署公判官以從公曰西兵十萬皆屬王
 超超材既不可專任一有以事而兵多勢重非易可指麾若不得節
 度諸將事必不集真宗難其言為詔陝西聽經略使得自發兵而已
 一無而已公度言終不合乃辭行會召賜金紫公謝曰臣嘗言丞相
 某事未効不敢受賜由是貶黃州團練副使公已貶而王超兵敗繼
 遷破清遠軍朝廷卒亦棄靈州公貶逾年復為戶部員外郎知泰州
 丁母憂服除拜吏部員外郎知泉州徙知蘇州又徙知揚州上疏論
 事語斥大臣尤切當時皆不悅又徙知鄂州坐知揚州一有日字悞
 入添支俸多一月雖嘗自言猶貶監江寧府酒稅用封禪恩累遷戶
 部郎中大中祥符五年五月某日卒于官享年六十有六遺戒無以
 佛汚我家人如其言公之曾祖諱某某官曾祖妣某氏某縣君祖諱
 某某官祖妣某氏某縣君考諱某某官妣某氏某縣君子男七人曰
 某一本曰某二字作某某等女若干人用其子易占恩再遷右諫議大
 夫初葬南豐之東園水壞其墓某年月日改葬龍冶一作津鄉之源
 一作原頭慶曆六年夏其孫鞏稱其父命以一有公之事來請曰願
 有述遂為之述曰維曾氏始出於鄭鄭為姒姓之國微不知其始封
 春秋之際莒滅鄭而子孫散亡其在魯者自別為曾氏蓋自鄭遠出
 於禹歷商周千有餘歲常微不顯及為曾氏而歲參元西始有聞于
 後世而後復及晦復千有餘歲而至于公一作千有餘歲而又顯於
 公焉夫晦顯常相反覆一作復而世德之積者久則其發也宜非一
 二世而止矧公之有不得盡施而有以遺其後世乎是固不宜無銘
 者已公當太宗真宗時言事屢見聽用自言西事不合而出遂以卒
 于外然在外所言一本作然其在外所言尤多如在朝廷而任言責
 者一本無者至其難言則人有所不敢言者予於其論議既不能盡

載而亦有所不得載也取其初不見用久而益可思者一本有將特詳焉所以見公之志也銘曰

公於事明由學而知先知逆決一本作逆決臧否有若善龜告而不欺不顧從違初雖不信後必如之公所論議一作議論敢人之難古稱君子有德有言德畜不施言猶可聞銘而不朽公也長存

尚書度支郎中天章閣待制王公神道碑銘并序

公諱質字子野其先大名莘人自唐同光初公之皇曾祖魯公舉進士第一顯名當時官至右拾遺歷一有仕字晉漢周而皇祖晉公益以文章有大名逮事太祖太宗官至兵部侍郎當真宗時伯父文正公居中書二十餘年天下稱爲賢宰相今天子慶曆三年公與其弟素皆待制天章閣自同光至慶曆蓋百有二十餘年王氏更四世世一作代有顯人或以文章或以功德公生累世富貴而操履甚於寒士性篤孝悌厚於朋友樂施與以賙人而妻子常不自給視榮利淡若無意平居苦疾病退然如不自勝及臨事介然一有不可回奪字有仁者之勇君子之剛樂人之善如自己出初范仲淹以言事貶饒州方治黨人甚急公獨扶病率子弟餞于東門留連數日大臣有以讓公曰長者亦爲此乎何苦自陷朋黨公徐對曰范公天下賢者願某何敢望之然若得爲黨人公之賜某厚矣聞者爲公縮頸其爲待制之明年出守于陝又明年小人連搆大獄坐貶廢者十餘人皆公素所賢者聞之悲憤歎息或終日不食一本有語于入曰魯人若此吾不樂在世矣因數劇飲大醉公既素病益以酒遂卒公初以廕補太常寺太祝監都進奏院獻其文章召試賜進士及第校勘館閣書籍遂爲集賢校理通判蘇州州守黃宗旦負材自喜願以新進少公議事則曰少年乃與丈人爭事耶公曰受命佐君事有當爭職也宗旦雖屢屈折而政常得無失稍德公助己爲之加禮宗旦得盜鑄錢者百餘人以訖一作託公公曰事發無跡何從得之曰吾以術一有

除字鉤出之公愀然曰仁者之政以術鉤人實之死而又喜乎宗旦慚服悉緩出其獄始大稱公曰君子也判尚書刑部吏部南曹知蔡州始至發大姦吏一人去之繩諸豪猾以法與轉運使爭曲直事有下而不便者皆格不用既去其害政者然後崇學校一以仁恕臨下其政知寬猛必使吏畏而民愛其爲他州州率大而難治必常有善政皆用此入爲開封府推官已而其兄雍爲三司判官公曰省府皆要職吾豈可兄弟居之求知壽州徙廬州盜有殺其徒而并其財者獲之實于法大理駁曰法當原公以謂盜殺其徒而自首者原之以疑壞其黨而開其自新若殺而不首既獲而亦原則公行爲盜而第殺一人既得兼其財又可以贖罪不獲則肆爲盜一本公行爲盜以相殺兼其財不獲則爲盜獲則引以自原如此盜不可止非法意疏三上不能爭公嘆曰吾不勝法吏矣乃上書自劾請不坐在吏公坐貶監靈仙宮其後議者更定不首之罪一作其後韓某知審刑院議正首之罪卒用公言一作議爲是而公貶猶不召資政殿學士鄭戩翰林學士葉清臣訟公無罪始起知秦一本作秦州遷荆湖北路轉運使當用一作治兵西方急於財用之時獨不進羨餘其賦斂近寬平治以常法故他路不勝其弊而荆湖之人自若一作獨若平日權知荆南府民有訟婚者訴曰貧無貲故後期間其用幾何以俸錢與之使婚獲盜竊人衣者曰一本有平生不爲過迫於飢寒而爲之公爲之哀憐取衣衣之遣去荆人比公爲子產召爲史館修撰遂拜天章閣待制判吏部流內銓號爲稱職而於選法未嘗有所更易人或問之公曰選法具備如權衡在執者不欺其輕重耳何必屢更其法一作器是歲天子開天章閣召大臣問天下事以手詔責范公等一本作是時天子感悟黨人說進用范公等在左右而議事者爭言天下利害務欲更革諸事公獨無一言問之則曰吾病未能也公於榮利既薄臨禍福不爲喜懼其視世事若無一可以動其心者惟以

天下善人君子亨否爲己休戚遂以此卒此其爲志豈小哉豈有一作以病而不能者哉公誠素病而任之以事所至必皆有爲使其壽且不死而用其必一作如有所爲一本而任之大用其必大有爲於事豈其不欲空言而已一本已作無益者哉嗚呼公享年一作公年止四十有五官至度支郎中階朝奉大夫勳上護軍爵平晉男娶周氏某縣君生子某曾祖諱某祖諱某皆贈太師尚書中書令考諱某官至兵部郎中有賢行贈戶部尚書公以某年某月某日卒于陝某年某月某日塋于某所先塋之次銘曰

仕不爲利以行其仁處豐自薄而清厥身其仁誰思不在吏民其清孰似一作嗣以遺子孫一有生雖有止歿也長存銘以昭之以告後人

袁州宜春縣令贈太師中書令兼尚書令冀國公程公神道

碑銘并序

上卽位之十有六年一有以字今鎮安軍節度使檢校太師同中書門下平章事程公自三司使吏部侍郎爲參知政事乃詔有司寵其祖考於是贈其皇考故袁州宜春縣令爲太子少師公在政事遷尚書左丞又贈太子太師其爲資政殿學士工部尚書又贈太師中書令其爲宣徽北一作南院使武昌軍節度使又贈兼尚書令其爲武勝軍節度使同中書門下平章事追封定國公徙鎮鎮安一作徙鎮安軍又追封冀國公惟冀國一無此三字公諱某字某少舉明經仕不得志退居于家畜德不施貽其後世而相國大師實爲之子初以文學舉進士高第歷館閣掌制命僑德偉望顯于朝廷遂爲中丞執國之憲尹正京邑有聲蜀都乃由三司入與大政公亦自大常博士累贈兵部侍郎遂遷太師中書尚書令位皆一品有國定冀以啓其封雖發不自躬而其施益遠晦於一時而顯於百世蓋夫享于身者有時而止施于後者其耀無窮表于其鄉以勸爲善可謂仁人之利

博矣惟程氏之先自重黎歷夏商周而程伯休父始見於詩書其後世遠而分至唐定氏族而程氏之望分爲七中山之程蓋出於魏安鄉侯昱之後也公世爲中山博野人曾祖諱某祖諱某贈太師祖妣齊氏吳國夫人考諱某贈太師中書令妣吳氏秦國夫人當唐末五代天下亂於兵程氏再世不仕後唐長興三年公之皇考以神童舉官至太子贊善大夫宋興一本有天下於今百年而程氏亦再顯太平興國初公之從祖羽佐太宗自晉王卽皇帝位爲明文殿學士官至兵部侍郎今相國太師出入將相爲時名臣子孫蕃昌世族昭著推其所自來者遠矣初公與其仲父象明同舉春秋皆中第是時從祖以給事中知開封府召公及象明謂曰吾新被寵天子待罪于此不欲子弟並登科一有選字使其自擇去就公因讓其從父自引去從祖頗賢之其後累舉不中從祖謂曰由我因汝退而使人察公無悔色由是大嗟異之以爲不可及太平興國五年遂以明經中第爲虔州贛縣尉蔡州上蔡主簿袁州宜春令所至皆有惠愛公事母至孝與其兄弟怡怡爲鄉里所稱而仕宦不求名譽爲贛縣尉七年不代既罷宜春遂不復仕退居于蔡州淳化三年七月某日一作甲子以疾卒于家享年四十有九以天聖十年十一月某日一作甲子塋于鄭州管城縣馬亭鄉之北田村夫人楚氏追封晉國夫人子男五人長曰瑾官至太常博士次曰瑗曰琬皆早卒次曰琳相國太師也次曰琰國子博士女一人適某人諸孫九人銘曰

遠矣程侯顓頊之苗始自重黎歷夏商周惟伯休父聲施孔昭世不絕聞感于有唐程分爲七三祖安鄉廣平中山以暨濟陽中山之程出自靈洗實昱裔孫仕于陳季陳滅散亡播而北遷公世中山爲博野人道德家潛孝第邦聞不耀自躬以貽後昆惟後有人將相文武有國寵章覆其考祖定冀之封實開土宇程世其隆公多孫子有畜其源發而孰禦刻銘高原以示來者

鎮安軍節度使同中書門下平章事贈太師中書令程公神道碑銘并序

惟文簡公既薨之二年其子嗣隆泣而言于一作於朝曰先臣幸得備位將相官階品階第一爵勳階第二請得立碑如今於是天子曰噫惟爾父琳有勞于我國家余其可忘乃大書曰旌勞之碑遣中貴人即賜其家曰以此名爾碑又詔史臣修曰汝爲之銘臣修與文簡公故往來知其人又嘗誌其墓又嘗述其世德以冀公太師之碑得其世次官封功行最詳乃不敢辭惟公字天球姓程氏曾祖諱新贈太師曾祖妣吳國夫人齊氏祖諱贊明贈太師中書令祖妣秦國夫人吳氏考諱元白袁州宜春令贈太師中書令兼尚書令冀國公妣晉國夫人楚氏公舉大中祥符四年服勤詞學高第試秘書省校書郎奉寧軍節度推官改善著作佐郎知并州壽陽縣祕書丞監佐藏庫天禧中詔選文學履行召試直集賢院今天子即位遷太常博士三司戶部判官會修真宗實錄而起居注闕命公追修大中祥符八年已後書成遂修起居注遷祠部員外郎提舉諸司庫務以本官知制誥同判吏部流內銓契丹嘗遣使賀上即位命公迓之使者妄有所言公折以理遂屈服其後又遣使賀天聖五年乾元節天子思公前嘗折其使乃以公爲館伴使使者果言契丹見中國使者坐殿上位次高而中國見契丹使者位下當遷議者以爲小故可許雖天子亦將許之公爭以謂契丹所以與中國好者守先帝約也一切宜用故事若許其小將啓其大天子是之乃止歲中遷右諫議大夫權御史中丞丞相張文節公少所稱許而最知公方除中丞文節嘗執筆喜曰不辱吾筆矣明年拜樞密直學士知益州公性方重寡言笑凡所處晝常先慮謹備所以條目巨細甚悉至臨事簡嚴僚吏莫能窺其際嘗夜張燈會五門大集州民而城中火起吏如公教不以白而隨即救止終宴民去始稍知火監軍得告者言軍謀變懼而入白公笑

曰豈有是哉監軍惶惑不敢去公曰軍中動靜吾自知之苟有謀者不能隱也已而卒無事其他多類此蜀妖人自名李冰神子署官屬吏卒以恐蜀人公捕斬之而謗者言公安殺人蜀且亂天子遣人馳視之使者還言蜀人便公政方安樂而誅妖人所以止亂由是天子益知公賢召爲給事中知開封府前爲府者苦其治劇或不一無不字滿歲罷不然被謗譏或以事去獨公居數歲久而治益精明盜訟稀少獄屢空詔書數下褒美遷工部侍郎龍圖閣一有直字學士守御史中丞久之天子思其治召爲翰林一有侍讀字學士復知開封府明年爲三司使不悅苟利不貪近功時議者患民稅多目吏得爲姦欲除其名而合爲一公以謂合而沒其名一時之便後有興利之臣必復增之是重困民也議者莫能奪其於出入尤謹禁中時有所取未嘗肯予宦官怒言陛下雖有一作所欲物在程某何可得公曰臣所以爲陛下惜爾天子以爲然累遷吏部侍郎景祐四年以本官參知政事一有遷尚書左丞公益自信不疑宰相有所欲私輒衆折之其語至今士大夫能道也初范仲淹以言事忤大臣貶饒州已而上海悟欲復用之稍徙知潤州而惡仲淹者遽誣以事語入上怒亟命置之嶺南自仲淹貶而朋黨之論起朝士牽連出語及仲淹者皆指爲黨人公獨爲上開說上意解而後已是時元昊叛河西朝廷多故公在政事補益尤多而小人僥倖皆不便遂以事中之坐貶爲光祿卿知潁州已而徙知青州又徙大名府居一歲中遷戶部吏部二侍郎尚書左丞資政殿學士北京建遂以爲留守宦者皇甫繼明方用事主治行宮務廣制度以市恩公爲裁抑之與繼明章交上天子遣一御史往視之還直公天子爲罷繼明獨委公以建都事公自知政事以論議不私見嫉被貶斥已稍復見用遂與繼明爭曲直由是益不妄合於世雖不復大用而契丹方遣使數有所求兵誅元昊未克西北宿重兵公於是時天子常委以河北陝西之重留守北京凡

四年遷工部尚書資政殿大學士河北安撫使慶曆六年拜武昌軍節度使陝西安撫使知永興軍府事明年加宣徽北院使鄜延路經略使馬步軍都部署判延州仍兼陝西安撫使皇祐元年加同中書門下平章事留守北京其於二方威惠信著尤知夷狄情僞山川險易行師制敵之要其在延州夏人數百驅畜產至界上請降言契丹兵至衙頭矣國且亂願自歸公曰契丹兵至元昊帳下當舉國取之豈容有來降者乎聞夏人方捕叛族此其是乎不然誘我也拒而不受已而夏人果以兵數萬臨界上公戒諸堡塞無得數一作輒出兵夏人以爲有備引去自此不復窺邊公於河北最久民愛之爲立生祠明年改武勝軍節度使猶在北京又改鎮安軍節度使在鎮四年猶上書鎮安一郡爾不足以自効願復守邊書未報得疾以至和三年一作嘉祐元年閏二月七日己丑薨于陳州之正寢享年六十有九天子輟視朝二日贈中書令諡曰文簡一本有以嘉祐二年十月十八日薨河南府伊闕縣神陰鄉張劉里明年祫享太廟推恩加贈公太師尚書令公累階至開府儀同三司勳上柱國廣平郡爵公封戶七千四百而實封貳仟壹伯賜號推誠保德守正翊戴功臣娶陳氏封衛一作陳國夫人子男四人曰嗣隆太常博士嗣弼殿中丞嗣恭太常博士嗣先大理寺丞女五人皆適良族謹按程氏之先出自重黎至休父爲周司馬國於程其後子孫遂以爲氏自秦漢以來世有其人程氏必顯而各以其所居著姓後世因之至唐尤盛號稱中山程氏者皆祖魏安鄉侯昱公中山博野人也世有積德至始大顯聞臣修以謂古者功德之臣進受國寵退而銘於器物非獨私其後世所以不忘君命示國有人而詩人又播其事聲於詠歌以揚無窮今去古遠爲制不同而猶有幽堂之石隧道之碑得以紀德昭烈而又幸蒙天子書而名之其所以照臨程氏恩厚寵榮出古遠甚而臣又得刻銘其下銘臣職也懼不能稱銘曰

程以國氏世遠支分因居著姓各以其人公世中山在昔有聞克大自公厥聲以振乃秉國鈞乃授將鉞出入其勤險夷一節帝曰噫歟余有勞臣何以旌之有爛其文惟此勞臣實余同德憂國在心匪勞以力二方有事諸將無功俾我舊老不遑居中閑息近藩庶休厥躬有請未一作舊其報奄云其終歿而後已茲可謂忠惟帝之褒其言甚簡銘以述之萬世丕顯

居士集卷第二十一

碑銘二首

太尉文正王公神道碑銘并序

至和二年七月乙未樞密直學士右諫議大夫王素奏事殿中已而泣且言曰臣之先臣旦相真宗皇帝十有八年今臣素又得待罪侍從之臣惟是先臣之訓其遺業餘烈臣實無似不能顯大而墓碑至今無辭以刻惟陛下哀憐不忘先帝之臣以假寵於王氏而勗其子孫天子曰嗚呼惟汝父且事我文考真宗叶德一心克終厥位有始有卒其可謂全德元老矣汝素以是刻于碑素拜稽首一有泣而出明日有詔史館修撰歐陽修曰王且墓碑未立汝可以銘臣修謹按故推誠保順同德守正翊戴功臣開府儀同三司守太尉充玉清昭應宮使上柱國太原郡開國公贈太師尚書令兼中書令追封魏國公一作上柱國魏國公食邑一萬三千戶食實封六千五百戶贈太師尚書令諡曰文正王公諱旦字子明大名莘人也皇曾祖諱言滑州黎陽令追封許國公皇祖諱徹左拾遺追封魯國公皇考諱祐尚書兵部侍郎追封晉國公皆累贈太師尚書令兼中書令曾祖妣姚氏魯國夫人祖妣田氏秦國夫人妣任氏徐國夫人邊氏秦國夫人公之皇考以文章自顯漢周之際逮事太祖太宗為名臣嘗論杜重威使無反漢拒盧多遜害趙普之謀以百口明符彥卿無罪故世多稱王氏有陰德公之皇考亦自植三槐于庭曰吾之後世必有為三公者此其所以志也公少好學有文太平興國五年進士及第為大理評事知臨一作平江縣監潭州銀場再遷著作佐郎與編文苑英華遷殿中丞通判鄭濠二州王禹偁薦其材任轉運使驛召至京師辭不受獻其所為文章得試直史館遷右正言知制誥知淳化二年禮部貢舉遷虞部員外郎同判吏部流內銓知考課院右諫議大夫趙昌言參知政事公以婿避嫌求解職太宗嘉之改禮部郎中集賢

殿修撰昌言罷復知制誥仍兼修撰判院事召賜金紫久之遷兵部郎中居職真宗即位拜中書舍人數日召為翰林學士知審官院通進銀臺封駁事公為人嚴重能任大事避遠權勢不可干以私由是真宗益知其賢錢若水名能知人常稱公曰真宰相器也若水為樞密副使罷召對苑中問誰可大用者若水言公可一有用字一有大用二字真宗曰吾固已知之矣咸平二年又知禮部貢舉居數日拜給事中知樞密院事明年以工部侍郎參知政事再遷刑部侍郎景德元年契丹犯邊真宗幸澶州雍王元份留守東京得暴疾命公馳自行在代元份留守二年遷尚書左丞三年拜工部尚書同中書門下平章事集賢殿大學士監修國史是時契丹初請盟趙德明亦納誓約願守河西故地二邊兵罷不用真宗遂欲以無事治天下公以謂宋興三世祖宗之法具在故其為相務行故事慎所改作進退能否賞罰必當真宗久而益信之所言無不聽雖他宰相大臣有所請必曰王某以謂如何事無大小非公所言不決公在相位十餘年外無夷狄之虞兵革不用海內富實羣工百司各得其職故天下至今稱為賢宰相公於用人不以名譽必求其實苟賢且材一作能矣必久其官而一無而字衆以為宜某職然後遷其所薦引人未嘗知冠準為樞密使當罷使人私一作告公求為使相公大驚曰將相之任豈可求邪且吾不受私請準深恨之已而制出除準武勝軍節度使同中書門下平章事準入見泣涕曰非陛下知臣何以至此真宗具道公所以薦準者準始媿歎以為不可及故參知政事李穆子行簡有賢行以將作監丞居千家真宗召見慰勞之遷太子中允初遣使者召之一無之字不知其所止真宗命至中書問王其然後人知行簡公所薦也公自知制誥至為相薦士尤多其後公薨史官修真宗實錄得內出奏章乃知朝廷之士多公所薦者公與人寡言笑其語雖簡而能以理屈人默然終日莫能窺其際及奏事上前羣臣異同

公徐一言以定今上爲皇太子太子諭德見公稱太子學書有法公曰諭德之職止於是邪趙德明言民飢求糧百萬斛大臣皆曰德明新納誓而敢違請以詔書責之真宗以問公公請勅有司具粟百萬於京師詔德明來取真宗大喜德明得詔書慚且拜曰朝廷有人大中祥符中天下大蝗真宗使人於野得死蝗以示大臣明日仇宰相有袖死蝗以進者曰蝗實死矣請示于一作於朝率百官賀公獨以爲不可後數日方奏事飛蝗蔽天真宗顧公曰使百官方賀而蝗如此豈不爲天下笑邪宦者劉承規一作珪以忠謹得幸病且死求爲節度使真宗以語公曰承規一作珪待此以瞑目公執以爲不可曰他日將有求爲樞密使者奈何至今內宦不過留後公任事久人有謗公於上者公輒引咎未嘗自辨至人有過失雖人主威怒可辨者辨之必得而後已榮王宮火延前殿有言非天災請置獄劾火事當坐死者百餘人公獨請見曰始失火時陛下以罪已詔天下而臣等皆上章待罪今反歸咎於人何以示信且火雖有迹寧知非天譴邪由是當坐者皆免日者上書言宮禁事坐誅籍其家得朝士所與往還占一作書問吉凶之說真宗怒欲付御史問狀公曰此人之常情且語不及朝廷不足罪真宗怒不解公因自取嘗所占問之書進曰臣少賤時不免爲此必以爲罪願并臣付獄真宗曰此事已發何可免公曰臣爲宰相執國法豈可自爲之幸於不發而以罪人真宗意解公至中書悉焚所得書既而真宗悔復馳取之公曰臣已焚之矣由是獲免者衆公累官至太保以病求罷入見滋福殿真宗曰朕方以大事託卿而卿病一作疾如此因命皇太子拜公公言皇太子威德必任陛下事因薦可爲大臣者十餘人其後不至宰相者李及凌策二人而已然亦皆爲名臣公屢以疾請真宗不得已拜公太尉兼侍中五日一朝視事遇軍國大事不以時入參決公益惶恐因臥不起以疾懇辭冊拜太尉玉清昭應宮使自公病使者存問日常三

四真宗手自和藥賜之疾亟遽幸其第賜以白金五千兩辭不受以天禧元年九月癸酉薨于家享年六十有一真宗臨哭輟視朝三日發哀于苑中其子弟門人故吏皆被恩澤卽以其年十一月庚申葬公於開封府開封縣新里鄉大邊村公娶趙氏封榮國夫人後公五年卒子男二人長曰司封郎中雍次曰贊善大夫冲次曰素女四人長適太子太一作少傅韓億次適兵部員外郎直集賢院蘇者次適右正言范令孫次適龍圖閣直學士兵部郎中呂公弼一本有諸孫十四人公事寡嫂謹與其弟旭相一無相字友悌尤篤任以家事一無所問而務以儉約率勵子弟使在富貴不知爲驕侈一作後兄子睦欲舉進士公曰吾常以大一作太威爲懼其可與寒士爭進至其薨也子素猶未官遺表不求恩澤有文集二十卷乾興元年詔配享真宗廟庭臣修曰景德祥符之際威矣觀公之所以相而先帝之所以用公者可謂至哉是以君明臣賢德顯名尊生而俱享其榮歿而長配於廟可謂有始有卒如明詔所褒昔者烝民江漢推大臣下之事所以見任賢使能之功雖曰山甫穆公之詩實歌宣王之德也臣謹考國史實錄至於摺紳故老之傳得公終始之節而錄其可紀者輒聲一無聲字爲銘詩昭示後世一無上四字以彰先帝之明以稱聖恩褒顯王氏流澤子孫與宋無極之意銘曰

烈烈魏公相我真宗真廟翼魏公配食公相真宗不言以躬時有大事事有大疑匪下匪筮公爲蒼龜公在相位終日如默問其夷狄包裹兵革問其卿士百工以職問其庶民耕織衣食相有一作所賞罰功當罪明相所一作有黜升惟否惟能執其權衡萬物之平孰不事君胡能必信孰不爲相其誰有終公薨于位太尉之崇天子孝思來薦清廟侑我聖考惟時元老天子念功報公之隆春秋從享萬祀無窮作爲詩歌以諡廟工

觀文殿大學士行兵部尙書西京留守贈司空兼侍中晏公

神道碑銘并序

至和元年六月觀文殿大學士行兵部尚書西京留守臨淄公以疾歸于京師八月疾少間入見天子曰噫予舊學之臣也乃留侍謹邇英閣詔五日一朝前殿明年正月疾作不能朝敕一作飭太醫朝夕往視有司除道將幸其家公歎曰吾無狀乃以疾病憂吾君即馳奏曰臣疾少間行愈矣乃止其月丁亥以公薨聞天子震悼亟臨其喪以不即視公爲恨贈司空兼侍中諡曰元獻有司請輟視朝一日詔特輟二日以其年三月癸酉葬公于許州陽翟縣麥秀鄉之北原既葬賜其墓隧之碑首曰舊學之碑既又勅史臣修考次公事具書于碑下臣修伏讀國史見真宗皇帝時天下無事天子方推讓功德祠祀天地山川講禮樂以文頌聲而儒學文章備賢偉異之人出公世家江西之臨川年始十四一日起田里進見天子時方親閱天下貢士會廷中者千餘人與夫宮臣衛官擁列圍視公不動聲氣操筆爲文辭立成以獻天子嘉賞賜同進士出身遂登館閣掌書命以文章爲天下所宗逮陛下養德東宮先帝選用臣屬即以公遺陛下由王官宮臣卒登宰相凡所以輔道聖德愛動國家有舊有勞自始至卒五十餘年公既薨而先帝之名臣與陛下東宮之舊人皆無在者宜其褒寵優異比公甘盤臣修幸得執筆史官奉明詔謹昧死上臨淄公事曰公諱殊字同叔姓晏氏其世次晦顯徙遷不常自其高祖諱墉唐咸通中舉進士卒官江西始著籍于高安其後二世不顯會祖諱延昌又徙其籍于臨川祖諱郇追封英國公考諱固追封秦國公自會祖已下皆用公貴累贈開府儀同三司太師中書令兼尚書令會祖妣張氏陳國太夫人祖妣傅氏許國太夫人妣吳氏唐一作越國太夫人公生十歲知學問一作始學知爲文章鄉里號爲神童故丞相張文節公安撫江西一作甫得公以聞真宗召見既賜出身後二日又召試詩賦論公徐啓曰臣嘗私習此賦不敢隱真宗益嗟

異之因賜以宅題以爲秘書省正字置之秘閣使得悉讀秘書命故僕射陳文僖公視其學明年獻其所爲文召試中書遷太常寺奉禮郎封祀太山推恩遷光祿寺丞數月充集賢校理明年遷著作佐郎丁父憂去官已而真宗思之即其家起復命淮南發運使具舟送之一作至京師從祀太清宮賜緋衣銀魚同判太常禮院又丁母憂求去官服喪不許今天子始封昇王公以選爲府記室參軍再遷左正言直史館今天子爲皇太子以戶部員外郎充太子舍人賜金紫知制誥判集賢院遷翰林學士充景靈宮判官太子左庶子兼判太常寺知禮儀院公既以道德文章佐佑東宮真宗每所諮訪多以方寸小紙細書問之由是參與機密凡所對必以其藁進示不洩其後悉閱真宗閣中遺書得公所進藁類爲八十卷藏之禁中人莫之見也初真宗遺詔章獻明肅太后權聽軍國事宰相丁謂樞密使曹利用各欲獨見奏事無敢決其議者公建言羣臣奏事太后者垂簾聽之皆毋得見議遂定乾興元年拜右諫議大夫兼侍讀學士遷給事中景靈宮副使判吏部流內銓以易侍講崇政殿遷禮部侍郎知審官院爲樞密副使遷刑部侍郎上疏論張耆不可爲樞密使由是忤太后旨坐以笏擊其僕誤折其齒罷留守南京大興學校以教諸生自五代以來天下學廢興自公始召拜御史中丞改兵部侍郎兼秘書監資政殿學士翰林侍讀學士知天聖八年禮部貢舉明年爲三司使復爲樞密副使未拜改參知政事遷尚書左丞太后謁太廟有請服袞冕者太后以問公公以周官后服對太后崩大臣執政者皆罷一有以字公爲禮部尚書知亳州徙知陳州遷刑部尚書復召爲御史中丞又爲三司使知樞密院事拜樞密使再加檢校太尉同中書門下平章事慶曆三年二月遂以刑部尚書居相位充集賢殿大學士兼樞密使自公復召用而趙元昊反師出陝西天下弊於兵公數建利害請罷監軍兼以陣圖授諸將使得應敵爲攻守及制財用爲

一無爲字出入之要皆有法天子悉爲施行自宮禁先以率天下而財賦之職悉歸有司卒能以謀臣元昊使聽約東乃還其王號公爲人剛簡遇人必以誠雖處富貴如寒士罇酒相對歡如也得一善稱之如己出當世知名之士如范仲淹孔道輔等皆出其門及爲相益務進賢材當公居相府時范仲淹韓琦富弼皆進用至於臺閣多一時之賢天子既厭西兵閉天下困弊奮然有意遂欲因羣材以更改治數詔大臣條天下事方施行而小人權倖皆不便明年秋會公以事罷而仲淹等相次亦皆去事遂已公既罷以工部尚書知潁州徙知陳州又徙許州三遷戶部尚書拜觀文殿大學士知永興軍充一路都部署安撫使徙知河南府兼西京留守累進階至開府儀同三司勳上柱國爵臨淄公食邑萬二千戶實封三千七百戶公享年六十有五自少篤學至其病亟猶手不釋卷有文集二百四十卷嘗奉勅修上訓及真宗實錄又集類古今文章爲集選二百卷其一作公爲政敏而務以簡便其民其於家嚴子弟之見有時事寒姊孝謹未嘗爲子弟求恩澤其在陳州上問宰相曰晏某居外未嘗有所請其亦有所欲邪宰相以告公公自爲表問起居而已故其薨也天子尤哀悼之賜子加等以其子承一作成下同裕爲崇文院檢討孫及甥之未官者九人皆命以官公初娶李氏工部侍郎虛己之女次孟氏屯田員外郎虛舟之女封鉅鹿郡夫人次王氏太師尚書令超之女封榮國夫人子八人長曰居厚大理評事早卒次承裕尚書屯田員外郎宜禮贊善大夫崇讓著作佐郎明遠祗德皆大理評事幾道傳正皆太常寺太祝女六人長適戶部侍郎同中書門下平章事富弼次適禮部侍郎三司使楊察其四尚幼孫十有二一作三人公既樂善而稱爲知人士之顯于朝者多公所薦達至擇其女之所從又得二人者如此一有焉呼字可爲賢也已銘曰

有妻之裔齊爲晏氏齊在春秋晏顯諸侯傳載桓子嬰稱子邱其後

無聞不亡僅存有煒自公厥聲以振公之顯聲實相天子天子曰噫予考真宗唯多名臣以臻威隆汝初事我王官東宮以暨相予始卒一躬輔我以德有勞子邦公疾在外來歸自洛天子曰留汝子舊學凡今在庭莫如汝舊孰以異予唯予聖考今既亡矣孰爲予老何以贈之司空待中禮則有加子思何窮有篆其文在其碑首天子之褒史臣有詔銘以述之永昭厥後

居士集卷第二十二

碑銘二首

忠武軍節度使同中書門下平章事武恭王公神道碑銘并序

惟王氏之先為常山真人後世藝河南密而密分入于管城遂為鄭州管城人其封國仍世于魯惟魯武康公事太宗皇帝秉節治戎出征入衛乃受遺詔輔真宗有勞有勤報卹追崇以有茲魯國是生魯武恭公公少以父任為西頭供奉官至道二年遣五將討李繼遷公從武康公出鐵門為先鋒殺獲甚眾軍至為白池諸將失期不得進公告其父曰歸師過險爭必亂乃以兵前守險號其軍曰亂行者斬由是士卒無敢先後雖武康公亦為之按轡追兵望其軍整不敢近武康公歎曰王氏有子矣後以御前忠佐為軍頭巡檢邢洛男子張洪霸聚盜二州間歷年吏不能捕公以駝車載勇士為婦人服威飾誘之邯鄲道中賊黨爭前邀劫遂皆就擒由是知名公以將家子宿衛真宗為內殿直殿前左班都虞候捧日左廂都指揮使累遷英州團練使今天子即位改博州團練使知廣信軍徙知冀州遷康州防禦使歷龍神衛捧日天武四廂都指揮使侍衛親軍步軍馬軍殿前都虞候步軍副都指揮使桂福二州觀察使是時章獻太后猶臨朝有詔補一軍吏公曰補吏軍政也敢挾詔書以干吾軍亟請罷之太后固欲與之公不奉詔乃止及太后上僊有司請衛士坐甲公以為故事無為太后喪坐甲又不奉詔於是天子知一作以公可任大事明道二年拜檢校太保簽書樞密院事遂為副使明年以奉國軍留後同知院事又明年領安德軍節度使又明年加檢校太尉宣徽南院使公為將善撫士而識與不識皆喜為之稱譽其狀貌雄偉動人雖里兒巷婦外至夷狄皆知其名氏御史中丞孔道輔等因事以為言乃罷公樞密拜武寧軍節度使言者不已即以為右千牛衛上

將軍知隨州士皆為之懼公舉止言色如平時惟不接賓客而已久之徒知一作公曹州而孔道輔卒客有謂公曰此害公者也公愀然曰孔公以職言事豈害我者可惜朝廷亡一直臣於是言者終身以為愧而士大夫服公為有量慶曆二年起公為保靜軍留後知青州未行而契丹聚兵幽涿遣使者有所求自河以北皆警乃拜公保靜軍節度使知澶州契丹使者過澶州見公喜曰聞公名久矣乃得見於此邪公為言已衰老中國多賢士大夫因指坐客歷陳其世家使者竦聽是歲徙真定府定州等路都部署改宣徽南院使判成德軍未行徙判定州兼二路都部署公治其軍無撓其私亦不貸其過居頃之士皆可用契丹使人覘其軍或勸公執而戮之公曰吾軍整而和使覘者得吾實以歸是屈人兵以不戰也明日大閱于郊公執桴鼓誓師號令簡明進退坐作肅然無聲乃下令曰具糗糧聽鼓聲視吾旗所鄉契丹聞之震恐會復議和兵解徙知陳州道過京師天子遣中貴人問公欲見否公謝曰備邊無功幸得蒙恩徒內地不敢見明年徙河陽不行以宣徽使奉朝請已而出判相州六年拜同中書門下平章事判澶州明年徙鄭州封祁國公又明年乞骸骨不許以為會靈觀使已而復判鄭州徙澶州除集慶軍節度使徙封冀國公皇祐三年遂以太子太師致仕大朝會許綴中書門下班居一歲天子思之起為河陽三城節度使同中書門下平章事判鄭州六年以本官為樞密使徙封魯國公既而上以富公弼為宰相是歲契丹使者來公與之射使者曰天子以公典樞密而用富公為相得人矣語聞上喜賜公御弓一矢五十公善射至老不衰嘗侍上射辭曰幸得備位大臣舉止為天下所視臣老矣恐不能勝弓矢上再三諭之乃手二矢再拜一發中之遂將釋復位上固勉之再發又中由是左右皆驩呼賜以襲衣金帶自寶元慶曆之間元昊叛河西兵出一無出字久無功士大夫爭進計策多所改作公笑曰奈何紛紛兵法不如

是也使士知畏愛而怯者勇勇者不驕以吾可勝因敵而勝之耳豈多言哉其在樞密亦嘗自請臨邊不許凡大謀議必以咨之其在外則遣中貴人詔問其言多見施用公自致仕復起掌樞密凡三歲以老求去位至六七十為之不得已以為景靈宮使徙忠武軍節度使

又以為同羣牧制置使五日一朝給扶者以子若孫一人是歲公年七十有八矣明年二月辛未以疾薨于家詔輟視朝二日發哀于一作於苑中贈太尉中書令其遺言曰臣有俸祿足以具死事不敢復

累朝廷願無遣使者護喪無厚賻贈天子惻然哀其志以黃金百兩白金三千兩賜其家固辭不許以其年五月甲申葬于管城明年有詔史臣刻其墓碑臣愚以謂自國家西定河湟北通契丹罷兵不用

幾四十年一日元昊叛幽燕亦犯約二邊騷動而老臣宿將無在者公於是時屹然為中國鉅人名將雖未嘗躬矢石攻堅摧敵而恩信已足撫士卒名聲已足動四夷遂登朝廷典掌機密以老還仕復起

于家保有富貴享終壽考雖古之將帥及于是者其幾何人至於出入勤勞之節與其進退綢繆君臣之恩意可以褒勸後世如古詩書所載皆應法可書一作紀謹按魯武恭公諱德用字元輔曾祖諱方

追封蔣國公祖諱玄追封邗一作邢國公皆贈中書令父諱超建雄軍節度使贈尚書令一有中書令追封魯國公諱曰武康公娶宋氏武勝軍節度使延渥之女初為安定郡夫人追封榮國公夫人五男

四女男曰咸熙東頭供奉官蚤卒次曰咸融西京左藏庫使果州團練使次曰咸庶一作度內殿崇班早卒次曰咸英供備庫副使次曰咸康內殿承制銘曰

魯始錫封以褒武康爰暨武恭乃克有邦桓桓武恭其容甚飭偉其名聲以動夷狄公治軍旅不寬不煩恩均令齊千萬一人公在朝廷

出守入衛乃登大臣與國謀議公曰老矣乞臣之身帝曰休哉汝子舊臣亟其強起乘我樞鈞禮不筋力老子敢侮公來在庭拜毋蹈舞

若子與孫助其興俯凡百有位誰其敢儻惟時黃耆天子之優富貴之隆亦有能保執享其終如公壽考公有世德載勳旂常刻銘有詔俾嗣其芳

贈刑部尚書余襄公神道碑銘并序

始興襄公既薨于曲江之明年其子仲荀走于毫以來告曰余氏世為閩人五代之際逃亂于詔自曾高以來晦迹嘉遁至于博士府君始有祿仕而襄公繼之以大曲江僻在嶺表自始興張文獻公有聲于唐為賢相至公復出為宋名臣蓋余氏徙詔歷四世始有顯仕而曲江寂寥二百年然後再有聞人惟公位登天臺正秩三品遂有爵土開國鄉州以繼美前哲而為詔人榮至於褒卹贈諡始終之寵威矣善褒有詔卹有物贈有告而謚行考功有議有狀合而誌之以闕諸幽有銘可謂備矣惟是螭首龜趺揭于墓隧以表見於後世而昭示其子孫者宜有辭而闕焉敢以為請謹按余氏詔州曲江人曾祖諱某祖諱某皆不仕父諱某太常博士累贈太常少卿公諱靖字安道官至朝散大夫守工部尚書集賢院學士知廣州軍州事兼廣南東路兵馬鈐轄經略安撫使柱國始興郡開國公食邑二千六百戶食實封二百戶治平元年自廣朝京師六月癸亥以疾薨于金陵天子惻然輟視朝一日賻以粟帛贈刑部尚書諱曰襄明年七月某甲子返葬于曲江之龍歸鄉成山之原公為人質重剛勁而言語恂恂不見喜怒自少博學強記至於歷代史記雜家小說陰陽律曆外暨浮屠老子之書無所不通天聖二年舉進士為贛縣尉書判拔萃改將作監丞知新建縣再遷祕書丞刊校三史充集賢校理天章閣待制范公仲淹以言事觸宰相得罪諫官御史不敢言公疏論之坐貶監筠州酒稅稍徙秦州已而天子感悟亟復用范公而因之以被斥者皆召還惟公以便親乞知英州遷太常博士丁母憂服除遂還為集賢校理同判太常禮院景祐慶曆之間天下怠於久安吏習因循

多失職及趙元昊以夏叛師出久無功縣官財屈而民重困天子赫然思振頹弊以修百度既已更用二三大臣又增置諫官四員使言天下事公其一人也即改右正言供職公感激奮勵遇事輒言無所迴避姦諛權倖屏息畏之其補益多矣然亦不勝其怨嫉也慶曆四年元昊納誓請和將加封冊而契丹以兵臨境上遣使言爲中國討賊且告師期請止毋與和朝廷患之欲聽重絕夏人而兵不得息不聽生事北邊議未決公獨以謂中國厭兵久矣北契丹之所幸一日使吾息兵養勇非其利也故用此以撓我爾是不可聽朝廷雖是公言猶留夏冊不遣而假公諫議大夫以報公從十餘騎馳出居庸關見虜於九十九泉從容坐帳中辯言一作折往復數十卒屈其議取其要領而還朝廷遂發夏冊臣元昊西師既解嚴而北邊亦無事是歲以本官知制誥史館修撰而契丹卒自攻元昊明年使來告捷又以公往報坐習虜語出知吉州怨家因之中以事左遷將作少監分司南京公怡然還鄉里闔門謝賓客絕人事凡六年天子每思之欲用者數矣大臣有不喜者第遷光祿少卿于家又以爲某一本作右領軍衛將軍壽州兵馬鈐轄辭不拜皇祐三年祀明堂覃恩遷衛尉卿明年知虔州丁父憂去官而蠻賊儂智高陷邕州連破嶺南州縣圍廣州乃即廬中起公爲秘書監知潭州即日疾馳在道改知桂州廣南西路經略安撫使公奏曰賊在東而徙臣西非臣志也天子嘉之即詔公經制廣東西賊盜乃趨廣州而智高復西走邕州自智高初起交趾請出兵助討賊詔不許公以謂智高交趾叛者宜聽出兵毋沮其善意累疏論之不報至是公曰邕州與交趾接壤今不納必忿而反助智高乃以便宜趣交趾會兵又募儂黃諸姓酋豪皆縻以職與之誓約使聽節制或疑其不可用公曰使不與智高合足矣及智高入邕州遂無外援既而宣撫使狄青會公兵敗賊於歸仁智高走入海邕州平公請復終喪不許諸將班師以智高尚在請留公廣

西委以後事遷給事中諫官御史列疏言公功多而賞薄再遷尙書工部侍郎公留廣西逾年撫緝完復嶺海肅然又遣人入特磨襲取智高母及其第一人俘于京師斬之拜集賢院學士久之徙知潭州又徙青州再遷吏部侍郎嘉祐五年交趾寇邕州殺五巡檢天子以謂恩信著於嶺外而爲交趾所畏者公也驛召以爲廣西體量安撫使悉發荆湖兵以從公至則移檄交趾召其臣費嘉祐詰責之嘉祐皇恐對曰種落犯邊罪當死願歸一本作留取首惡以獻即械五人送欽州斬于界上公還邕人遮道留之不得明年以尙書左丞知廣州英宗卽位拜工部尙書代還道病卒享年六十有五公經制五管前後十年凡治六州所至有惠愛雖在兵間手不釋卷有文集二十卷奏議五卷三史刊誤四十卷娶林氏封魯郡夫人子男三人伯莊殿中丞早卒仲荀今爲屯田員外郎叔英太常寺太祝女六人皆適士族孫一本有男四人孫女五人銘曰

余遷曲江仍世不顯奮自襄公有聲甚遠始興開國襲美于前兩賢相望三百年間偉歟襄公惟邦之直始登于朝官有言責左右獻納姦諛屏息慶曆之治實多補益逢時有事奔走南北功書史官各在夷狄出入艱勤險夷一德小人之纔公廢于里一方有警公起于家威行信結嶺海幽遐公之在焉帝不南顧朝召其遺殯于中路返柩來歸詔人負土伐石刻辭立于墓門以詒來世匪止詔人

居士集卷第二十三

墓表八首

石曼卿墓表

曼卿諱延年姓石氏其上世爲幽州人幽州入于契丹其祖自成始以其族間走南歸天子嘉一作喜其來將祿之不可乃家于宋州之宋城父諱補之官至太常博士幽燕俗勁武而曼卿少亦以氣自豪讀書不治章句獨慕古人奇節偉行非常之功視世俗屑屑無足動其意者自顧不合於世乃一混以一作于酒然好劇飲大醉頽然自放由是益與時不合而人之從其遊者皆知愛曼卿落落可奇而不知其才之有以用也年四十八康定二年二月四日以太子中允秘閣校理卒于京師曼卿少舉進士不中一有第字真宗推恩三舉進士皆補奉職曼卿初不肯就張文節公素奇之謂曰母老乃擇祿耶曼卿矍然起就之遷殿直久之改太常寺太祝知濟州金鄉縣數曰此亦可以爲政也縣有治聲一有用薦者三字通判乾寧軍丁母永安縣君李氏憂服除通判永靜軍皆有能名充館閣校勘累遷大理寺丞通判海州還爲校理莊獻明肅一有皇字太后臨朝曼卿上書請還政天子其後太后崩范諷以言見幸引嘗言太后事者遠得顯官欲引曼卿曼卿固止之乃已自契丹通中國德明盡有河南而臣屬遂務休兵養息天下然內外弛武三十餘年曼卿上書言十事不報已而元昊反西方用兵始思其言召見稍用其說籍河北一無二字河東陝西之民得鄉兵數十萬曼卿奉使籍兵河東還稱旨賜緋衣銀魚天子方思盡其才而且病矣既而聞邊將有欲以鄉兵扞賊者笑曰此得吾粗也夫不教之兵勇怯相雜若怯者見敵而動則勇者亦牽而潰矣今或不暇教不若募其政行者一有用字則人人皆勝兵也其視世事蔑若不足爲及聽其施設之方雖精思深慮不能過也狀貌偉然喜酒自豪若不可繩以法度退而質其平生趣一作

取舍大節無一悖于理者過人無賢愚皆盡忻歡一作歡忻及聞而可否天下是非善惡當其意者無幾人其爲文章勁健稱其意氣有子濟滋天子聞其喪官其一子使祿其家既卒之二十七日葬于太清之先塋其友歐陽修表於其墓曰

嗚呼曼卿寧自混以爲高不少屈以合世可謂自重之士矣士之所負者愈太則其自顧也愈重自顧愈重則其合愈難然欲與共大事立奇功非得一無得難合自重之士不可爲也古之魁雄之人未始不負高世之志故寧或毀身污迹卒困於無聞或老且死而幸一遇猶克少施於世若曼卿者非徒與世難合而不克所施亦其不幸不得至乎中壽其命也夫其可哀也夫

尙書屯田員外郎李君墓表

漢水東至乾德匯而南民居其衝水捍暴而岸善崩然其民尤富完其下南山一作山南之材治室屋聚居蓋數千家皆安然易漢而自若者以有石隄爲可恃也景祐五年余始爲其縣令既行漢上臨石隄問其長老皆曰吾李君之作也於是喟然而歎求李君者得其孫厚厚舉進士好學能自言其世云李氏貝州清河人君舉進士中淳化三年乙科鎮州真定主簿齊化基爲吏以強察自喜惡君廉直不爲屈多求事可釀爲罪者貴君理之君辨愈明不可污卒服其能反薦之遷威虜軍判官秩滿一無二字河北轉運使又薦爲冀州軍事判官逾年一無二字吏部考一無此字籍凡四較考者外皆召還公考當召是時契丹侵邊冀州獨乞留君督軍餉課爲最多遷大理寺丞乘傳治一作理壁州疑獄既還轉運使又請通判冀州督旁七縣軍餉課尤多而民不勞遭歲飢悉出庾粟以貸民且曰凶豐甚必復使豐而歸諸庾是化吾朽積而爲新乃兩利也轉運使以爲然因請君益貸貝魏滄冀諸州後歲果豐飢民德君粟歸諸庾無後者蓋賴而活者數十萬家一本有居三年轉運使上冀人言乞留許留一歲

就拜殿中丞歲滿將去冀民夜私入其府整其居若不可出君諭之乃得去通判河南一有府字未行契丹兵指邢洛天子擇吏之能者改君通判邢州其守一無二字趙守一嘗守邢以扞寇辭不任邢事天子曰李某佐汝可無患守一至邢悉以州事任君御史中丞王嗣宗辟推直官遂薦為御史以疾不拜求知光化軍作所謂石暉者孫何薦其材拜三司戶部判官改知建州皆以疾辭又求知漢陽軍居二歲而漢陽之獄空者二歲卒以疾解退居于漢旁大中祥符六年五月某日卒于家遂葬縣東遵教鄉之友于村子孫因留家焉君諱仲芳字秀之享年五十有二一作二官至尚書屯田員外郎君為人敦敏而材以疾中止一有魯不享其厚用不既其能余聞古之有德於民者歿則鄉人祭於其社今民既不能祠君于一作於漢之一無之字旁而其墓幸在其縣余今也不表以示民嗚呼其何以章乃德俾其孫刻石于隧以永君之揚一作賜

內殿崇班薛君墓表

公諱塾字宗道姓薛氏資政殿學士兵部尚書簡肅公之弟薛之世德終始有簡肅公之誌與碑公官至內殿崇班以某年某月某日卒官于蜀州其子仲孺以其喪歸葬于絳州之正平先塋而來乞銘以誌予幸嘗紀次簡肅公之德而又得銘公其銘曰公躬直清官以材稱惟賢是似不愧其兄既塋而仲孺又來請曰銘之藏誠一作者以永吾先君于不朽然不若碣于隧以表見于世之昭昭也予惟薛氏於絳為著姓簡肅公於公為兄弟而公之世德予既見之銘而其子又欲碣以昭顯于世可謂孝矣然予考古所謂賢人君子功臣烈士之所以銘見于後世者其言簡而著及後世衰言者自疑於不信始繁其文而猶患於不章又備其行事惟恐不為世之信也若薛氏之著于絳簡肅公之信于天下而予之銘公不愧於其兄則公之銘不待繁言而信也然其行事終始予亦不敢略而誌諸墓矣今之碣者

無以加焉則取其可以簡而著者書之以慰其子之孝思而信于絳之人云

連處士墓表

連處士應山人也以一布衣終于家而應山之人至今思之其長老教其子弟所以孝友恭謹禮讓而溫仁必以處士為法曰為人如連公足矣其矜寡孤獨凶荒饑饉之人皆曰自連公亡使吾無所告依而生以為恨嗚呼處士居應山非有政令恩威以親其人而能使人如此其所謂行之以躬不言而信者歟處士諱舜賓字輔之其先闕人自其祖光裕嘗為應山令後為磁鄆二州推官卒而反壘應山遂家焉處士少舉毛詩一不中而其父正以疾廢于家處士供養左右十餘年因不復仕進父卒家故多貲悉散以贖鄉里而教其二子以學曰此吾貲也歲饑出穀萬斛以糶而市穀之價卒不能增及旁近縣之民皆賴之盜有竊其牛者官為捕之甚急盜窮以牛自歸處士為之媿謝曰煩爾送牛厚遺以遺之嘗以事之信陽遇盜於西關左右告以處士盜曰此長者不可犯也捨之而去處士有弟居雲夢往省之得疾而卒以其柩歸應山應山之人去縣數十里迎哭爭負其柩以還過縣市市人皆哭為之罷市三日曰當為連公一作當與處士行喪處士生四子曰庶庶庸庸其二子教以學者後皆舉進士及第今庶為壽春令庶為宣城令處士以天聖八年十二月某日卒慶曆二年某月日葬于安陸蔽山之陽自卒至今二十年應山之長老識處士者與其縣人嘗賴以為生者往往尚皆在其子弟後生聞處士之風者尚未遠使更三四世至于孫曾其所傳聞有時而失則懼應山之人不復能知處士之詳也乃表其墓以告于後人一作云八年閏正月一日廬陵歐陽修述

尚書屯田員外郎張君墓表

君諱公字應之世為開封尉氏人曾祖節祖遇皆不仕父炳為鄭州

原武縣主簿因留家焉今爲原武人也君舉進士及第爲河陽河南主簿蘇州觀察推官開封府士曹參軍遷著作佐郎知陽武縣通判眉州累遷屯田員外郎復知陽武縣以疾致仕卒于家享年五十有九君爲人剛介一作毅好學問事父母孝與朋友信其爲吏潔廉所至有能稱其在河南時子爲西京留守推官與謝希深尹師魯同在一府其所與游雖他掾屬賓客多材賢少壯馳騁於一時而君居其間年尚少獨苦羸病肺唾血者已十餘年幸其疾少間輒亦從諸君飲酒諸君愛一作惜而止之君曰我豈久生者邪雖他人視君亦若不能勝朝夕者其後同府之人皆解去而希深師魯與當時少壯馳騁者喪其十八九而君癯然唾血如故後二十年始以疾卒君雖病羸而力自爲善居官爲吏未嘗廢學問多爲賢士大夫所知乃知夫康強者不可恃以久而羸弱者未必不能生雖其遲速長短相去幾何而疆者不自勉或死而泯滅於無聞弱者能自力則必有稱於後世君其是已君嘗謂予曰吾曰暮人耳無所取於世也尚何區區於仕哉然吾常哀祿之及於親者薄若幸得不死而官登于朝冀竊國家褒贈之寵以榮其親然後歸病于原武之廬足矣乃益買田治室於原武以待君自河南蘇州累爲各公卿所薦乃遷著作爲郎官贈其父太子中允一作舍母宋氏京兆一作司氏永安縣太君於是遂致仕歸于原武營其德政鄉之張固村原將塋其親卜以皇祐五年十一月某日用事前四日君亦卒遂以某日從塋于原上予與君遊久記其昔所謂予者且哀君之賢而不幸又嘉君之志信而有成於其塋也不及銘乃表於其墓君娶祝一作竹氏封華陽縣君有子曰損試將作監主簿至和二年三月七日翰林學士尚書吏部郎中知制誥充史館修撰歐陽修撰

龍武將軍薛君墓表

薛姓居河東者自唐以來族最盛宋興百年而薛姓五顯資政殿學

士尚書戶部侍郎贈兵部尚書簡肅公當天聖中參輔大政以亮直剛毅爲時名臣公絳州正平人也有子直孺早卒無後以其弟之子仲孺爲後然其兄第五人及其諸子皆用公廕祿仕以忠厚老謹多材能爲緯大族君諱某字某簡肅公之兄也少有高節仕而不得志退老于家以德行文學爲鄉善人君少好學工爲文辭應有司格既而曰是豈足學也哉乃棄而不爲其後簡肅公貴顯以恩例補君右班殿直君篤愛其第不得已爲強起就職居頃之卒棄去遂不復仕君居鄉里孝悌於其家忠信於其朋友禮讓於其長老鄉里之人始而愛久而化既既而猶思焉君以天聖二年十一月某日以疾卒于家享年六十有九以某年某月某日葬于正平縣清原鄉之周村原曾祖景贈太保祖溫瑜贈太傅父光化贈太師母曰鄭國夫人費氏子男二人長曰長孺今爲尚書虞部員外郎知絳州軍州事次曰良孺殿中丞女二人君以子恩累贈右龍武將軍夫人鄭氏正平縣太君君卒之若干年其子始以尚書郎來守是州子薛氏壻也且嘉君之隱德以終而有後乃爲表于其墓既又作詩以遺之曰

永春縣令歐君墓表

君諱慶字貽孫姓歐氏其上世爲韶州曲江人後徙均州之鄭鄉又徙襄州之穀城乾德二年分穀城之陰城鎮爲乾德縣建光化軍歐氏遂爲乾德人修嘗爲其縣令問其故老鄉閭之賢者皆曰有三人焉其一人曰太傅贈太師中書令鄧文懿公其一人曰尚書屯田郎中戴國忠其一人曰歐君也三人者學問出處未嘗一日不同其忠信篤於朋友孝悌稱於宗族禮義達于一作於鄉閭乾德之人初未

識學者見此三人皆尊禮而愛親之既而皆以進士舉于鄉里一無
里字而君獨黜于有司後二十年始以同三禮出身爲潭州湘潭主
簿陳州司法參軍監考城酒稅遷彭州軍事推官知泉州永春縣事
而鄧公已貴顯于朝君尚爲州縣吏所至上官多鄧公故舊君絕口
不復道前事至終其去不知君爲鄧公友也君爲吏廉貧宗族之孤
幼者皆養于家居鄉里有訟者多就君決曲直得一言遂不復爭人
至于今傳之嗟夫三人之爲道無所不同至其窮達何其異也而三
人者未嘗有動於其心雖乾德之人稱二人者亦不以貴賤爲異則
其幸不幸豈足爲三人者道哉然而達者昭顯于一時而窮者泯沒
於無述則爲善者何以勸而後世之來者何以考德於其先故表其
墓以示其子孫君有子世英爲鄧城縣令世勳舉進士君以天聖七
年卒享年六十有四葬乾德之西北廣節山之原一有云字

河南府司錄張君墓表 一作碣

故大理寺丞河南府司錄張君諱汝士字堯夫開封襄邑人也明道
二年八月壬寅以疾卒于官享年三十有七卒之七日葬洛陽北邙
山下其友人河南尹師魯誌其墓而廬陵歐陽修爲之銘以其葬之
速也不能刻石乃得金谷古壩命太原王顧以丹爲練書納于一作
於壙中嘉祐二年某月某日其子吉甫山甫改葬君子伊闕之教忠
鄉積慶里君之始葬北邙也吉甫纔數歲而山甫始生余及送者相
與臨穴視窆且封哭而去今年春余主試天下貢士而山甫以進士
試禮部乃來告以將改葬其先君因出銘以示余蓋君之卒距今二
十有五年矣初天聖明道之間錢文僖公守河南公王家子特以文
學仕至貴顯所至多招集文士而河南吏屬適皆當時賢材知名士
故其幕府號爲天下之感君其一人也文僖公善待士未嘗責以吏
職而河南又多名一無名字山水竹林一作蕙竹茂樹奇石怪石其
平臺清池上下荒墟草莽之間余得日從賢人長者賦詩飲酒以爲

樂而君爲人靜默修潔常坐府治事省文書尤盡心於獄訟初以辟
爲其府推官 一作察推既罷又辟司錄河南人多賴之而守尹屢薦
其材君亦工書喜爲詩間則從余遊其語言簡而有意味酒終日不
亂雖醉未嘗頽墮與之居者莫不服其德故師魯誌之曰飭身臨事
余嘗愧堯夫堯夫不余愧也始君之葬皆以其地不善又葬速一有
其字禮不備君夫人崔氏有賢行能教其子而二子孝謹克自樹立
卒能改葬君如吉卜君其可謂有後矣自君卒後文僖公得罪貶死
漢東吏屬亦各引去今師魯死且十餘年王顧者死亦六七年矣其
送君而臨穴者及與君同府而遊者十蓋八九死矣其幸而在者不
老則病且衰如予是也嗚呼感衰生死之際未始不如是是豈足道
哉惟爲善者能有後而託於文字者可以無窮故於其改葬也書以
遺其子俾碣于墓且以寫余之思焉吉甫今爲大理寺丞知緱氏縣
山甫始以進士賜出身云翰林學士右諫議大夫史館修撰歐陽修

撰

居士集卷第二十四

墓表六首

尙書屯田員外郎贈兵部員外郎錢君墓表

君諱治字良範姓錢氏世爲彭城人後徙吳興自君之七世祖寶又徙常州之武進會祖諱某祖諱某父諱某當唐末五代錢氏起餘杭據浙東西爲吳越王於是時常州或屬江南或屬吳越而武進錢氏獨不顯方以儒學廉讓行于鄉里連三世不仕宋興取江南常州歸于有司君始以州進士舉中景德二年甲科試祕書省校書郎爲揚州廣陵潮州海陽縣令遷寧國軍節度推官監黃州麻城茶場遂知縣事遷著作佐郎知蘄州蘄水懷安軍金堂縣又遷祕書丞知泰州如臯縣再遷屯田員外郎通判宣州未行明道二年六月十一日以疾卒于家享年五十有二君少好學能爲文辭家貧其母賢嘗躬織紵以資其學問每夜讀書一有不止字母爲滅燭止之君陽臥母且睡輒復起讀一有年二十三字州舉進士第一試禮部高第遂中甲科爲吏長於決獄歷六縣皆有能政潮州自五代時劉氏暴殘其民君爲海陽經年民歸業者千餘戶由是海陽升爲大縣潮之大姓某氏火迹其來自某家吏捕訊之某家號冤不服太守刁湛曰獄非錢君不可君問大姓得火所發牀足驗之疑里仇家物因率吏入仇家取牀折足合之皆是仇人即服曰火自我出然故遺其迹某家者欲自免也某家誠冤君即日出某家獄致仇人以法舉州稱爲一無此字神明其佐宣州數決大獄及旁近郡獄有疑者皆歸決於君工部侍郎凌策知宣州尤稱君文學曰吏事不足污子當以文章居臺閣欲薦其文未及而策卒初宣州官歲市茶于涇縣命君主之策子不肖以惡茶數千斤入于官君立焚之以白策策益以此知君策卒君歎曰世無知我者矣在麻城以茶課歲增五倍遂遷著作金堂故多盜君以伍保籍民察其出入凡爲盜者許其徒告以贖罪盜遂止會

甘露降其縣明年麥禾大稔麥一莖五歧禾一莖五穗者縣人以爲君政所致謂之錢公三瑞君歎曰吾知治民爾瑞豈吾致哉縣人爲君立生祠如臯民不農桑以鹽爲生君曰使民足以衣食鹽猶農也乃悉求鹽利害爲條目民便其利而鹽最增積以石數者至四十五萬君在如臯時年五十或歎其仕不達君曰使吾政行於民是達也蔡文忠公爲御史中丞數欲引君爲御史會君卒君平生所爲文章三百餘篇號曰晦書君之皇考贈殿中丞母諸葛氏封萬年縣太君徙封福昌娶蔣氏初封樂安縣君又封福清子男五人曰公鍊公瑾公輔公儀公佐蔣氏有賢行自君之卒日以君所爲最其五子以學蔣氏後君二十年以卒卒時公瑾公輔皆以進士及第公瑾爲新鄭尉公輔以文章知名當世爲太常丞集賢校理錢氏自其祖寶徙武進其居與葬皆在其縣之遵教鄉敦行里慶曆二一作二年九月庚申公鍊等葬君于其居之東北原皇里水之北至和二年三月壬午一無上八字以蔣夫人從歐陽修曰錢姓出陸蓋顯頊之苗裔始以士爲周官久而以爲姓自三代以來無其顯者至唐末錢氏多居東南及鏐乘亂世起餘杭有地十三州號兼吳越而王者幾百年而武進錢氏獨以隱德累世不顯豈以力者如彼而以德者如此哉豈其感衰遲速之理固有不同哉武進之錢自寶七世至君有聞又有賢子不墜益彰其勢執止蓋恃力者雖感而必衰以德者愈遲而終顯立石刻辭其示彌遠

太常博士周君墓表

有篤行君子曰周君者孝於其親友於其兄弟居父母喪與其兄某弟某居于倚廬不飲酒食肉者三年其言必戚其哭必哀除喪而殯然不能勝人事者蓋久而後復自孔子在魯而魯人不能行三年之喪其弟子疑以爲問則非魯而他國可知也孔子歿而其後世又可知也今世之人知事其親者多矣或居喪而不哀者有矣生能事而

死能哀或不知喪禮者有矣或知禮而以謂喪主於哀而已不必合於禮者有矣如周君者事生盡孝居喪盡哀而以禮者也禮之失久矣喪禮尤廢也今之居喪者惟仕宦婚嫁聽樂不爲此特法令之所禁爾其衰麻之數哭泣之節居處之別飲食之變皆莫知夫有禮也在上位者不以身率其下在下者無所望於其上其遂廢矣乎故吾於周君有所取也君諱堯卿字子俞道州永明縣人也天聖二年舉進士累官至太常博士歷連一作道衡二州司理參軍桂州司錄知高安寧化二縣通判饒州未行以慶曆五年六月朔日卒于朝集之舍享年五十有一皇祐五年某月日葬于道州永明縣之紫微岡曾祖諱某祖諱某父諱某贈某官母唐氏封某縣太君娶某氏封某縣君君學長於毛鄭詩左氏春秋家貧不事生產喜聚書居官祿雖薄常分俸以潤宗族朋友人有慢己者必厚爲禮以愧之其爲吏所居皆有能政有文集二十卷君有子七人曰諭鼎州司理參軍曰訖湖州歸安主簿曰謚曰諷曰諷曰諷曰諷曰諷曰諷曰諷曰諷曰諷也所以移於事君而忠仁於宗族而睦交於朋友而信始於一鄉推之四海表于金石示之後世而勸考君之所施者無不可以書也豈獨俾其子孫之不隕也哉

右班殿直贈右羽林軍將軍唐君墓表

嘉祐四年冬天子既受祫享之福推恩羣臣並進爵秩既又以及其親若在若亡無有中外遠邇於是天章閣待制尚書戶部員外郎唐君得贈其皇考驍衛府君爲右羽林軍一無某字 將軍府君諱拱字某一無某字其先晉原人後徙爲錢塘人曾祖諱休復唐天復中舉明經爲建威一作武軍節度推官祖諱仁恭仕吳越王爲唐山縣令累贈諫議大夫父諱謂官至尚書職方郎中累贈禮部尚書府君以父廕補太廟齋郎改三班借職再遷一作轉右班殿直監舒州孔城鎮澧州酒稅巡檢泰州鹽場漳州兵馬監押乾興元年七月某日以

疾卒于官享年四十有六府君孝弟於其家信義於其朋友廉讓於其鄉里其居於官各公鉅人皆以爲材而未及用也享年不永君子哀之有子曰介字子方舉進士皇祐中嘗爲御史以言事切直貶春州別駕當是時子方之風悚動天下已而天子感悟貶未至而復用之今列侍從居諫官自子方爲秘書丞始贈府君爲太子右清道率府率其爲尚書主客員外郎殿中侍御史裏行又贈府君爲右監門衛將軍其爲尚書工部員外郎直集賢院權開封府判官又贈府君爲右屯衛將軍其遷戶部員外郎河東轉運使又贈府君爲驍衛將軍蓋自登于朝以至榮顯遇天子有事于天地宗廟推恩必及焉府君初娶博陵崔氏贈仙游縣太君後娶崔氏贈清河縣太君皆衛尉卿仁冀之女生一男介也五女長適太子中舍盧圭次適歐陽昊早卒次適橫州推官高定次適進士陸平仲次適著作佐郎陳起慶曆三年八月某日以府君及一夫人之喪合葬于江陵龍山之東原後十有七年廬陵歐陽修乃表於其墓曰嗚呼余於此見朝廷所以褒寵勸勵臣子之意豈不厚哉又以見士之爲善者雖堙沒幽鬱其潛德隱行必有時而發而遲速顯晦在其子孫然則爲人之子者其可不自勉哉蓋古之爲子者祿不逮養則無以及其親矣今之爲子者有克自立則尙有榮名之寵焉其所以教人之孝者篤於古也深矣子方進用於時其所以榮其親者未知其止也姑立表以待焉

胡先生墓表

先生諱瓌字翼之姓胡氏其上世爲陵州一作京兆人後爲泰州如皋一作海陵人先生爲人師言行而身化之使誠明者達昏愚者勵而頑傲者革故其爲法嚴而信爲道久而尊師道廢久矣自景祐明道以來學者有師惟先生暨泰山孫明復石守道三人而先生之徒最感其在湖州之學弟子去來常數百人各以其經轉相傳授其教學之法最備行之數年東南之士莫不以仁義禮樂爲學慶曆四年

天子開天章閣與大臣講天下事始慨然詔州縣皆立學於是建太學於京師而有司請下湖州取先生之法以爲太學法至今爲著令後十餘年先生始來居太學學者自遠而至太學不能容取旁官署一作寺以爲學舍禮部貢舉歲所得士先生弟子十常居四五其高第者知名當時或取一作中甲科居顯仕其餘散在四方隨其人賢愚皆循循雅飭其言談舉止遇之一無二字不問可知爲先生弟子其學者相語稱先生不問可知爲胡公也先生初以白衣見天子論樂拜一有試字祕書省校書郎辟丹州軍事推官改密州觀察推官丁父憂去職服除爲保寧軍節度推官遂居湖學召爲諸王宮教授以疾免已而以太子中含致仕遷殿中丞於家皇祐中驛召至京師議樂復以爲大理評事兼大常寺主簿又以疾辭歲餘爲光祿寺丞國子監直講迺居太學遷大理寺丞賜緋衣銀魚嘉祐元年遷太子中允充天章閣侍講仍居太學已而病不能朝天子數遣使者存問又以太常博士致仕東歸之曰太學之諸生與朝廷賢士大夫送之東門執弟子禮路人嗟歎以爲榮以四年六月六日卒于杭州享年六十有七以明年十月五日葬于烏程何山之原其世次官邑與其行事蕭陽蔡君謨具一作且誌于幽堂嗚呼先生之德在乎人不待表而見於後世然非此無以慰學者之思乃揭于其墓之原六年八月三日廬陵歐陽修述

瀧岡阡表

嗚呼惟我皇考崇公卜吉于瀧岡之六十年其子修始克表於其阡非敢緩也蓋有待也修不幸生四歲而孤太夫人守節自誓居窮一作貧自力於衣食以長以教俾至于成人太夫人告之曰汝父爲吏廉而好施與喜賓客其俸祿雖薄常不使有餘曰毋以是爲我累故其亡也無一瓦之覆一壠之植碑本作植以庇而爲生吾何恃而能自守邪吾於汝父知其一二以有待於汝也自吾爲汝家婦不及事

吾姑然知汝父之能養也汝孤而幼吾不能知汝之必有立然知汝父之必將有後也吾之始歸也汝父免於母喪方逾年歲時祭祀則必涕泣曰祭而豐不如養之薄也間御酒食則又涕泣曰昔常一作吾不足而今有餘其何及也吾始一二見之以爲新免於喪適然耳既而後常常然至其終身未嘗不然吾雖不及事姑而以此知汝父之能養也汝父爲吏嘗夜燭治官書屢廢而歎吾問之則曰此死獄也我求其生不得爾吾曰生可求乎曰求其生而不得則死者與我皆無恨也一無也字矧求而有得邪以其有一本有字作求而得則知不求而死者有恨也夫常求其生猶失之死而世一作况常求其死也回顧乳者劍一作抱汝而立于旁因指而歎曰術者謂我歲行在戌將死使其言然吾不及見兒之立也後當以我語告之其平居教他子弟常用此語吾耳熟焉故能詳也其施於外事吾不能知其居于家無所矜飾而所爲如此是真發於中者邪嗚呼其心厚於仁者邪此吾知汝父之必將有後也汝其勉之夫養不必豐要於孝利雖不得博於物要其心之厚於仁吾不能教汝汝汝父之志也修泣而志之不敢忘先公少孤力學咸平三年進士及第爲道州判官泗綿二州推官又爲泰州判官享年五十有九葬沙溪之瀧岡太夫人姓鄭氏考諱德儀世爲江南名族太夫人恭儉仁愛而有禮初封福昌縣太君進封樂安安康彭城三郡太君自其家少微一作賤時治其家以儉約其後常不使過之曰吾兒不能苟合於世儉薄所以居患難也其後修貶夷陵太夫人言笑自若曰汝家故貧賤也碑本無六字吾處之有素矣汝能安之吾亦安矣自先公之亡二十年修始得祿而養又十有二年刻官于朝始得贈封其親又十年修爲龍圖閣直學士尚書一無尚書字吏部郎中留守南京太夫人以疾終一作卒于官舍享年七十有二又八年修以非才入副樞密遂參政事又七年而罷自登二府天子推恩褒其三世故一作蓋自嘉祐以來

逢國大慶必加寵錫皇會祖府君累贈金紫光祿大夫太師中書令曾祖妣累封楚國太夫人皇祖府君累贈金紫光祿大夫太師中書令兼尚書令祖妣累封吳國太夫人皇考崇公累贈金紫光祿大夫太師中書令兼尚書令皇妣累封越國太夫人今上初郊皇考賜爵爲崇國公太夫人進號魏一作韓國於是小子修泣而言曰嗚呼爲善無不報而遲速有時此理之常也惟我祖考積善成德宜享其隆雖不克有於其躬而賜爵受封顯榮褒大實有三朝之錫命是足以表見於後世而庇賴其子孫矣乃列其世譜具刻于碑旣又載我皇考崇公之遺訓太夫人之所以教而有待於修者並揭于阡俾知夫小子修之德薄能鮮遭世竊位而幸全大節不辱其先者其來有自熙寧三年歲次庚戌四月辛酉朔十有五日乙亥男推誠保德崇仁翊戴功臣觀文殿學士特進行兵部尚書知青州軍州事兼管內勸農使充京東東路安撫使上柱國樂安郡開國公食邑四千三百戶食實封一千二百戶修表

集賢校理丁君墓表

君諱寶臣字元珍姓丁氏常州晉陵人也景祐元年舉進士及第爲峽州軍事判官淮南節度掌書記杭州觀察判官改太子中允知劍縣徙知端州遷太常丞博士坐海賊儂智高陷城失守奪一官徙置黃州久之復得太常丞監湖州酒稅又復博士知諸暨縣編校秘閣書籍遂爲校理同知太常禮院君爲人外和怡而內謹立望其容貌進趨知其君子人也居鄉里以文行稱少孤與其兄篤於友悌兄亡服喪三年曰吾不幸幼失其親兄吾父也慶曆中詔天下大興學校東南多學者而湖杭尤盛君居杭學爲教授以其素所學問而自修於鄉里者教其徒久而學者多所成就其後天子患館閣職廢特置編校八員其選其精乃自諸暨召居秘閣君治州縣聽決精明賦役有法民畏信而便安之其始治劍也如此後治諸暨劍鄰邑也其民

聞其來謹曰此劍人愛而思之謂不可復得者也今吾民乃幸而得之而君亦以治劍者治之由是所至有聲及居閣下淡然不以勢利動其心未嘗走謁公卿與諸學士羣居恂恂人皆愛親之蓋其召自諸暨也以材行選及在館閣久而朝廷益知其賢英宗每論人物屢稱之國家自削除僭僞東南遂無事偃兵弛備者六十餘年矣而嶺外尤其山海荒闊列郡數十皆爲下州朝廷命吏常以一縣視之故其守無城其戍無兵一日智高乘不備陷邕州殺將吏有衆萬餘人順流而下潯梧封康諸小州所過如破竹吏民皆望而散走獨君猶率羸卒百餘拒戰殺六七人旣敗亦走初賊未至君語其下曰幸得兵數千人伏小湘峽扼至險以擊驕兵可必勝也乃請兵於廣州凡九請不報又嘗得賊覘者一人斬之賊旣平議者謂君文學宜居臺閣備侍從以承顧問而眇然以一儒者守空城提百十飢羸之卒當萬人卒至之賊可謂不幸而天子亦以謂縣官不素設備而貴守吏不以空手捍賊宜原其情故一切輕其法而君以嘗請兵不得又能拒戰殺賊則又輕之故他失守者皆奪兩官而君奪一官已而知其賢復召用後十餘年御史知雜蘇寀受命之明日建言請復治君前事奪其職而黜之天子知君賢不可以一嘗廢而先帝已察其罪而輕之矣又數更大赦且罪無再坐然猶以御史新用故屈君使少避而不傷之也乃用其校理歲滿所當得者即以君通判永州方待闕於晉陵以治平四年四月某甲子暴中風眩一夕卒享年五十有八累官至尚書司封員外郎階朝奉郎勳上輕車都尉會祖諱某祖諱某皆不仕父諱某贈尚書工部侍郎母張氏仙游縣太君君娶饒氏封晉陵縣君先卒子男四人曰隅曰除曰隣皆舉進士曰恩兒才一歲女一人適著作佐郎集賢校理胡宗愈君旣卒天子憫然推恩錄其子隅爲太廟齋郎君之平生履憂患而遭困厄處之安然未嘗見戚戚之色其於窮達壽夭知有命固無憾於其心然知君之賢哀

其志而惜其命止於斯者不能無恨也於是相與論著君之大節伐石紀辭以表見於後世庶幾以慰其思焉熙寧元年六月十四日廬陵歐陽修述

居士集卷第二十五

墓誌四首

虞部員外郎尹公墓誌銘

公諱仲宜姓尹氏尹氏世居太原無顯者由公之父贈刑部侍郎諱文化始舉毛詩登某科以材敏稱於當世任至尚書都官郎中於今人士語尹氏者往往能稱其名字由是始有聞人刑部察其父於河南今爲河南人公舉周易咸平三年中第歷梓州銅山鳳翔麟遊二主簿京兆府司理參軍潞州襄垣主簿遷汝州梁懷州武陟二令又遷蜀州軍事判官薦其能者數十一作十數人拜大理寺丞太子中舍殿中丞國子博士尚書虞部員外郎歷知汝州之葉鄭州之滎陽一有縣字又知大寧監通判華州又知資州皆有政一作能績最後知鄆州至州之二日晨起衣冠得疾一有及廢而三字卒實景祐四年三月七日也年七十一以五年十一月二十八日薨壽安母鄭氏德興縣太君妻張氏壽安縣君子七人源洙湘沖淑沂涑諸孫十餘人公既卒許州進士朱生遊資州資人一作州家家能道公之遺事及聞公喪皆巷哭其吏與民各以其類之浮屠發哀受弔朱生既得公善十餘事爲作遺愛錄以遺資人朱生未嘗識公者而言若茲信矣嗚呼善人之爲善也生不赫赫於當時則其遺風餘思在乎人者必有時而著公生而爲善歿也見思一作歿也見思可知也已銘者所以名其善功以昭後世也一有夫字銘曰

物塞而通必艱其初至于大亨乃燁而敷尹氏之先久室不耀自公再世始發其奧公不墜德有善在人孰當其興在子與孫一作在子孫

尚書兵部員外知制誥謝公墓誌銘

朝散大夫行尚書兵部員外郎知制誥知鄧州軍州事兼管內勸農使上輕車都尉陽夏縣開國男食邑三百戶賜紫金魚袋謝公諱絳

字希深其先出於黃帝之後任姓之別爲十族謝其一也其國在南陽宛三代之際以微不見至詩嵩高始言周宣王使召公營謝邑以賜申伯蓋謝先以失國其子孫散亡以國爲姓歷秦漢魏益不顯至晉宋間謝氏出陳郡者始爲戚族公之皇考曰太子賓客諱濤其爵陳留伯至公開國又爲陽夏男皆在陳郡故用其封復因爲陳郡人然其官邑卒葬隨世而遷其譜自八世而下可見曰八代祖汾爲河南緱氏人至五代祖希圖始遷而南或遷嘉興或遷麗水自皇考已上三代皆葬杭州之富陽公以寶元二年四月丁卯來治鄧其年十一月己酉以疾卒于官以遠不克歸于南即以明年八月得州之西南某山之陽遂以塋公享年四十有五初娶夏侯氏先卒今舉以附後娶高氏文安縣君三男六女男某皆將作監主簿女一早亡五尚幼公之卒其客歐陽修弔而哭于位退則歎曰初賓客之薨修獲銘其德納諸富陽之原今又哭公之喪哭者在位莫如修舊蓋嘗銘其世矣乃論次其終始曰公年十五起家試祕書省校書郎復舉進士中甲科以奉禮郎知潁州汝陰縣遷光祿寺丞上書論四民失業楊文公薦其材召試充祕閣校理再遷太常丞通判常州丁母晉陵郡君許氏憂服除遷太常博士用鄭氏經唐故事議昭武皇帝非受命祖不宜配享感生帝天聖中天下水旱而蝗河決壞滑州又上書用洪範五行京房傳推災異所以爲天謹告之意極陳時所闕失無所諱與修真宗國史遷祠部員外郎直集賢院通判河南府移書丞相言歲凶嵩山宮宜罷勿治又上書論妖人方術士不宜出入禁中請追所賜先生處士號歲滿權開封府判官再遷兵部員外郎爲三司度支判官上書論法一作詔禁密花透背詔書云自內始今內人賜衣復下有司取之是爲法而自戾無以信天下又言後苑作官市龜筒亦禁物民間非所有有之爲犯法因請罷內作諸器皆以其職言又言有司多一無此字求上旨一有多字從中出而數更且謂號令

數變則虧國體利害偏聽則惑聰明請者務欲各行而守者患於不一請凡詔令皆由中書樞密院然後行郭皇后廢上書用詩白華引申后褒姒以爲戒景祐元年丁父憂服除一本實客薨于京師以喪南歸三年召試知制誥判流內銓議者言李昭新定樂不可用下其議議者久不決公爲兩議曰宋樂用三世矣照之法不合古吾從舊乃署其一議曰從新樂者異署議者皆從公署公爲人肅然自修平

不爲甚異此其始終大節也一無也字下有者太史公世稱其文魯以多爲少今予不能乃不暇具書公之事而特著其大者略書之噫公之事何多歟繁予文而不克究使公而壽且用極其材則凡今所書又有不暇書而又著其尤大者爾將盡其嗣子某來乞銘銘曰壽吾不知命繫其偶不俾其隆安歸其咎惟德之明惟仁之茂惟力之爲而公之有

資政殿學士尚書戶部侍郎簡肅薛公墓誌銘

居温温不妄喜怒及其臨事敢言何其壯也雖或聽或否或論高而不能行或後果如其言皆傳經據古切中時病三代已來文章威者稱西漢公於制誥尤得其體世所謂常楊元白不足多也公既以文知名至於爲政無所不達自汝陰已有能名佐常州至今常人思之錢思公守河南悉以事屬之是時莊獻明肅太后莊懿太后起二陵於永安至於鐵石香鋪不取一物於民而足修國子學教諸生自遠而至者百餘人舉而中第者十八九河南人聞公喪皆出涕諸生畫像於學而祠之初吏部擬官以圭田有無爲均公取州縣田覆其實者準其方之物賈一作價差爲多少揭之省中它有各而無實者皆不用人以爲便天下之吏有定職而無定員故選者常患其多而久積吏緣以姦至公爲之選而集者有不逾旬而去天下皆稱其平其遇事冗劇一有處字尤若簡而有餘及求知鄧州其治益以寬靜爲本州遂無事先時有妖僧者以僞言誘民男女數百人往往晝夜爲會凡六七年不廢公則取其首惡二人寘之法餘一不問民始知公法可畏而安於不苛南陽堰引湍水溉公田水之來遠而少能及民而堰散勅列反墩破公議復召信臣故渠以罷鄧人歲役而以水與民大興學舍皆未就而卒始公來鄧食其廩者四十餘人或疑其多及其喪爲之制服其治衣櫛纒二婢至三從孤弟妹皆聚而食之卒之日廩無餘粟家無餘貲入哭其堂施無新衣然平生一有好施宗族喜賓客談宴怡怡如也自少而仕凡三十年間自守不回而外亦

明道二年尚書禮部侍郎參知政事河東公以疾告歸其政天子曰吾不可以數煩公乃詔優公不朝而使視事如故居歲中數以告乃得還第又數以告然後拜公爲資政殿學士戶部侍郎尚書都省罷其政事景祐元年八月庚申公薨于家年六十有八贈兵部尚書公諱奎字宿執姓薛氏薛氏之先出於黃帝之後任姓任姓之別爲十族薛者奚仲之始封也其後奚仲去遷邳而仲虺留居薛春秋之際以國見經而其子孫後以爲氏此其譜也隋唐之間薛姓居河東者爲最威公絳州正平人也曾王父贈太保諱某大王父贈太傅諱某王父殿中丞贈太師諱某三世皆不顯而以公貴初太宗皇帝伐并州太師以策干行在不見用罷公生十餘歲已能屬文辭太師顧曰是必大吾門吾復何爲乃不復事生業務施貸以調鄉閭曰吾有子矣後何患後五十年公始佐今天子參政事爲世名臣如其言公爲人敦篤忠烈果敢明達初舉進士爲州第一讓其里人王嚴而居其次於是鄉里皆稱之淳化三年再舉乃中授秘書省校書郎隰州軍事推官始至取州獄已成書活寃者四人徙儀州推官士爭薦其能丁太夫人憂服除用薦者拜大理寺丞知興化軍莆田縣悉除故時王氏無名租莆田人至今以爲德遷殿中丞知河南長水縣徙知興州州舊鑄鐵錢用功多人以爲苦公乃募民有力者弛其山使自爲利而收其鐵租以鑄悉罷役者人用不勞遷太常博士御史中丞

向敏中薦公材中御史就拜監察御史召爲殿中侍御史判三司都磨勘司賜緋衣銀魚出爲陝西轉運副使坐舉人免官居數月通判陝府歲餘召還臺安撫河北稱旨改尚書戶部員外郎淮南轉運使江淮制置發運使開揚州河廢其二堰以便漕船歲以八百萬石食京師其後罕及其多轉吏部員外郎丁太師憂去職不許居二歲入爲三司戶部副使與三司使李士衡爭事省中士衡扳時權貴人爲助公拜戶部郎中直昭文館出知延州遷吏部郎中入爲龍圖閣待制知開封府遷右諫議大夫御史中丞契丹使蕭從順來朝是時莊獻明肅太后垂簾聽政從順舉止多不遜以謂南使至契丹者皆見太后遂請見之朝議患之未有以決公獨以理折之從順乃止而嫉公者讒其漏禁中語由是拜集賢院學士出知并州改知秦州秦州宿重兵兵嘗慊食公爲勤儉積畜教民水種歲中遷樞密直學士知益州而秦之餘粟積者二百萬征算之行者三十萬覈民舊隱田數百頃所得芻粟又十餘萬秦州之民與其蕃一作夷落數千人詣轉運使請留不果公在開封以嚴爲治肅清京師京師之民至私以俚語目公且相戒曰是不可犯也固圍爲之數空而至今之人猶或目之及居蜀尤有善政民有得僞蜀時中書印者夜以錦囊掛之西門門一作闈者以白蜀人隨之者萬計皆恟恟一作詢詢出異語且觀公所爲公顧主吏藏之略不取視民乃止老嫗告其子不孝者子訴貧不能養公取俸錢與之曰用此爲生以養母子遂相慈孝里富人三女皆孤民或妾爭其產公析其貲爲二爲嫁其女於是人皆以公爲仁恩蜀人喜亂而易搖公旣鎮以無事又能順其風俗從容宴樂及其臨事破姦發伏逆見隨決如逢蒙之射而方朔之占無一不中蜀人一作甚後愛且畏之以比張尚書詠而不肯開封天子之畿益州蜀一都會皆世號尤難理者而公尤有名其猛寬之政前後異施可謂知其方矣入拜龍圖閣直學士權三司使遂拜參知政事公入

謝上曰先帝嘗言卿可用吾今用卿矣公益感激自勵而素剛毅守節不苟合既與政尤挺立無所牽隨然遂欲繩天下無細大一入於規矩往往不可其意則歸臥于家歎息憂愧輒不食家人笑其何必若此公曰吾慚不及古人而懼後世譏我也公嘗使契丹與其君臣語而以論議服其坐中其後契丹使來必問公所在及聞已用乃皆喜曰是得人矣邊吏得謀者言契丹欲奔約舉兵上亟召大臣議或欲選將增兵公曰契丹畏誓而貪利且無隙以開其端其必不動不宜失持重之勢而使其可窺已而卒無事他日上顧公曰果如公言於是益重之明道二年莊獻明肅太后欲以天子袞冕見太廟臣下依違不決公獨爭之曰太后必若王服見祖宗若何而拜乎太后不能奪爲改他服太后崩上見羣臣泣曰太后疾不能言而猶數引其衣若有所屬何也公遽曰其在袞冕也然服之豈可見先帝乎上大悟卒以後服葬於是益以公爲果可用也一無也字下有而不至乎大用終焉公先娶潘氏早卒後娶趙氏今封金城郡夫人子男一人直孺大理寺丞女五人長適故職方員外郎張奇其次適故開封府士曹參軍喬易從早亡次適太原王拱辰早亡次適廬陵歐陽修次又適王氏公旣貴贈其曾祖而下三室曰太保太傅太師追封曾祖妣某氏某夫人祖妣某氏某夫人妣某氏某夫人公性孝慈雖在大位家人勤儉不知爲驕奢諸子幼孤撫養不異平生所爲文章四一作二十卷直而有氣如其爲人五年某月某甲子其孤直孺奉其柩自京師塋于絳州以某年某月某甲子即事先期狀公之功行上之太常太常議曰諡法一德不懈曰簡執心決斷曰肅今其狀應法乃諡曰簡肅銘曰

薛夏之封以國爲姓其後河東隋唐最盛公世載德實河東人必大其門太師之云公之從事以難爲易參于大政不撓不牽屢決大議有言炳然公不爲相告病還家贈賻之榮尚書是加公有敏德悼其

行事公有令名有司之證事告之史證傳子孫又刻銘章納于墓門
贈尚書度支員外郎張君墓誌銘

君諱思字希聖青州人也曾祖諱庭實不仕祖諱昂贈尚書職方郎
中父諱從化尚書駕部員外郎贈秘書少監母河南縣太君朱氏君
天禧四年舉進士及第爲濰州司理參軍青州益都縣主簿開封府
倉曹參軍改秘書省著作佐郎知益都縣再遷秘書丞太常博士通
判閬州權知興元府景祐四年九月十七日以疾卒于官享年六十
有四君世以明經仕宦至君始爲辭章舉進士官雖卑專親能盡其
養不知其祿之薄也退與妻子惡衣蔬食無難色居親喪盡哀葬其
家三十餘喪鄉里稱其孝爲吏所至有能名京東歲大飢所在盜賊
起獨君所治益都無盜而賑卹飢人比他縣尤多安撫使以爲言詔
書褒美在閬州治嘉陵江石隈民至今賴之君爲博士時其弟愈猶
爲布衣君嘗歎曰吾年四十有七始以進士及第今且老吾志其衰
矣顧其三子曰是必大吾門因獨念其弟愈先君之所愛也乃欲致
其仕以冀一子恩得以命其弟顧貧未能去祿仕每以爲恨已而其
子唐卿舉進士第一君聞之喜且泣曰吾志其就矣乃上書求致仕
且欲官其弟愈未及而卒君娶王氏馮翊縣君後君二十二年以卒
子男三人唐卿將作監丞通判陝州唐輔孟州濟源縣尉皆早卒唐
民今爲秘書丞女二人長適屯田員外郎任沆次早卒孫男二人曰
危行果行孫女二人皆尚幼君以子恩贈尚書度支員外郎夫人王
氏亦以子恩封長壽縣太君以嘉祐四年十月十二日薨君夫人于
青州益都縣仁德鄉之南原銘曰

張有世序是爲青人君治益都有政于民仕也四方曷其子孫終必
返本斯之謂仁鄉人之思封樹長存

墓誌五首

翰林侍讀學士給事中梅公墓誌銘

翰林侍讀學士給事中一云行給事中知許州上柱國南昌郡開國公食邑二千二百戶實封六百戶賜紫金魚袋梅公既卒之明年其孤及其兄之子堯臣來請銘以葬曰吾叔父病且亟矣猶臥而使我誦子之文今其葬宜得子銘以藏公之名在人耳目五十餘年前卒一歲子始拜公於許公雖衰且一無此字病其言談詞氣尚足動人嗟予不及見其壯也然嘗聞長老道公咸平景德之初一遇真宗言天下事合意遂以人主為知己當時搢紳之士一無此二字望之若不可及已而擯斥流離四十年間白首翰林卒老一州嗟夫士果能自為材邪惟世用不用爾故予記公終始至於咸平景德之際尤為詳焉良以悲其志也公諱詢字昌言世家宣城年二十六進士及第試校書郎利豐監判官遷將作監丞知杭州仁和縣又遷著作佐郎舉御史臺推勸官時亦未之奇也咸平二年與考進士於崇政殿真宗過殿廡中一見以為奇材召試中書直集賢院賜緋衣銀魚是時契丹數寇河北李繼遷急攻靈州天子新即位銳於為治公乃上書請以朔方授潘羅支使自攻取是謂以蠻夷攻蠻夷真宗然其言問誰可使羅支者公自請行天子惜之不欲使蹈兵間公曰苟活靈州而罷西兵何惜一梅詢天子壯其言因遣使羅支未至而靈州沒于賊召還遷太常丞三司戶部判官數訪時事一有使得以書論於是屢言西北時事邊將皆守境不能出師公請一有出字大臣臨邊督戰募遊兵擊賊一有論曹瑋馬知節才可用又十字論傳潛楊瓊敗績當誅一有以正刑二字而田紹斌王榮等可責其効以贖過凡數十事其言甚壯天子益器其材數欲以知制誥宰相有言不一作未可者乃已其後繼遷卒為潘羅支所困而朝廷以兩鎮授德明德明

頓首謝罪河西平天子亦再幸澶淵一有以金帛二字盟契丹而河北之兵解天下無事矣公既見疎不用初坐斷田訟失實通判杭州徙知蘇州又徙兩浙轉運一有副字使還判三司開拆司遷太常博士用封禪恩遷祠部員外郎又坐事出知濠州以刑部員外郎為荆湖北路轉運使坐擅給驛馬與一作假人奔喪而馬死奪一官通判襄州徙知鄂州又徙蘇州天禧元年復為刑部員外郎陝西轉運使靈州弃已久公與秦州曹瑋得胡蘆河路一有無沙二字可出兵無沙行之阻而能徑一無此八字趨靈州遂請瑋居環慶以圖出師會瑋入為宜徽使不克而止遷工部郎中坐朱能反貶一作左遷懷州團練副使再貶一作改池州天聖元年拜度支員外郎知廣德軍徙知楚州遷兵部員外郎知壽州又知陝府六年復直集賢院又遷工部郎中改直昭文館知荆南府召為龍圖閣待制糾察在京刑獄判流內銓改龍圖閣直學士知并州未行遷兵部郎中樞密直學士以往就遷右諫議大夫入知通進銀臺司復判流內銓改翰林侍讀學士羣牧使遷給事中知審官院以疾出知許州康定二年六月某日卒于官公好學有文尤一無此五字喜為詩為人嚴毅修潔而材辯敏明少能慷慨見奇真宗自初召試感激言事自以謂君臣之遇已而失職逾二十年始復直於集賢一作始復直集賢院比登侍從而門生故吏曩時所考進士或至宰相居大官故其視時人常以先生長者自處論事尤多發憤其在許昌繼遷之孫復以河西叛朝廷出師西方而公已老不復言兵矣享年七十有八以終一無此二字梅氏遠出梅伯世久而譜不明公之皇曾祖諱超皇祖諱遠皆不仕父諱遼贈刑部侍郎夫人劉氏彭城縣君子五人長曰鼎臣官至殿中丞次曰寶臣皆一無曾字先公卒次曰得臣太子中舍次曰輔臣前將作監丞次曰清臣大理評事公之卒天子贈贈優恤一無此一字加一作拜得臣殿中丞清臣衛尉寺丞明年八一作九月某日葬公

宣州之某縣某鄉某原 一作董于宣城縣長安鄉西山里銘曰

士之所難有蘊無時偉歎梅公人主之知勇無不敢惟義之爲困于翼飛中垂以斂一失其塗進退而坎理不終窮既晚而通惟其壽考福祿之隆 一作終

尙書都官員外郎歐陽公墓誌銘

公諱曄字日華於檢校工部尙書諱託彭城縣君劉氏之室爲曾孫武昌縣令諱彬蘭陵夫人 一作蘭陵郡無夫人字蕭氏之室爲孫贈太僕少卿諱偃追封潘原縣太君李氏之室爲第二子於修爲叔父修不幸幼孤依于叔父而長焉嘗奉太夫人之教曰爾欲識爾父乎視爾叔父其狀貌起居言笑皆爾父也修雖幼已知太夫人言爲悲 一作哀 而叔父之爲親也歐陽氏世家江南僞唐李氏時爲廬陵大族李氏亡先君昆弟同時而仕者四人獨先君早世其後三人皆登于朝以歿公 一有以字咸平三年舉進士甲科歷南雄州判官隨闕二州推官江陵府掌書記拜太子中允太常丞博士尙書屯田都官二員外郎享年七十有九最後終于家以慶曆四年三月十日薨于安州應城縣高風鄉彭樂村於其壆也其素所養兄之子修泣而書曰嗚呼叔父之亡吾先君之昆弟無復在者矣其長養教育之恩既不可報而至於狀貌起居言笑之可思慕者皆不得而見焉矣惟勉而紀吾叔父之可傳于世者庶以盡修之志焉公以太子中允監興國軍鹽酒稅太常丞知漢州維縣博士知端州桂陽監屯田員外郎知黃州遷都官知永州皆有能政坐舉人奪官復以屯田通判歙州以本官分司西京許家于隨復遷都官于家遂致任景祐四年四月九日卒公爲人嚴明方質尤以潔廉自持自爲布衣非其義不輒受人之遺少而所與親善後或甚貴終身不造其門其泣官臨事長於決斷初爲隨州推官治獄之難決者三十六 一有人字大洪山奇峯寺聚僧數百人轉運使疑其積物多而僧爲姦利命公往籍之一

有官爲出入四字僧以白金千兩餽公公笑曰吾安用此然汝能聽我言乎今歲大凶汝有積穀六七萬石能盡以輸官而賑民則吾不籍汝僧喜曰諾飢民賴以全活陳堯咨以豪貴自驕 一有所居爲不法五字 官屬莫敢仰視在江陵用私錢詐爲官市黃金府吏持帖強僚佐署公呵吏曰官市金嘗有文符獨不肯署堯咨雖憚而止然諷轉運使出公不使居府中鄂州崇陽素號難治乃徙公治之至則決滯獄百餘事縣民王明與其同母兄李通爭產累歲明不能自理至貧爲人質春公折之一言通則具伏盡取其產鉅萬 一有一字歸于明通退而無怨言桂陽民有爭舟而相毆至死者獄久不決公自臨其獄出囚坐庭中去其桎梏而飲食之食訖悉勞而還于獄獨留一人于庭留者色動惶顧公曰殺人者汝也囚不知所以然公曰吾視食者皆以右手持匕而汝獨以左本死者傷在右肋汝殺之明也囚即涕泣曰我殺也不敢以累他人公之臨事明辨有古良吏決獄之術多如此所居人皆愛思之公娶范氏封福昌縣君子男四人長曰宗顏次曰宗閔其二早亡女一人適張氏亦早亡銘曰公之明足以決於事愛足以思於人仁足以施其族清足以潔其身而銘之以此足以遺其子孫

江寧府句容縣令贈尙書兵部員外郎王公墓誌銘代恕

王氏世家開封陳留之通許鎮咸平中分通許爲咸平縣故王氏今爲開封咸平人公諱某字某曾祖諱不祖諱祚父諱銳世以貴雄里中不樂仕宦而好施其有以調人之急及公而貲益衰乃歎曰吾聞施於爲政其利可以調天下貲安足道哉乃慨然以孔氏尙書舉於有司累不中因就他選曰可以爲政何擇焉初任萊州萊陽主簿會令坐事解去公署令事告其民曰令欲爲法簡而利民博者當何爲去其甚惡可也乃縛故吏唐權條其宿惡上于州杖其脊而還之縣之姦豪皆斂色屏氣指權相戒不可犯公法公曰使我爲令期年不

獨善人不懼惡人可使惡人爲善也已而河決東平公部縣丁夫數千召權署隊長權喜曰公許我自新矣卒以丁夫治河爲諸縣最歷婺州蘭溪尉陳州項城主簿會歲旱蝗州守風吏按田者言旱不爲災公與守爭至三四民得復乃已改潁州司法參軍州民藥氏爲盜會赦出入里閭操弓矢爲民害有朱氏者募客二人謀殺之法當死公曰爲法所以輔善而禁惡也今殺良民爲惡盜報仇豈法意邪乃狀列之朱氏得減死改華州司法遷蘇州之吳江江寧之句容二縣令遂老于京師以某年某月某日卒于家享年六十有九公好學善書喜賓客務調人緩急而爲性寬靜沈默一有及於吏事敢於所爲不屬其字左右丞史有不如意未嘗咎責諸子問之則曰刑法豈爲喜怒設邪公初娶趙氏永安郡太君後娶李氏陳留郡太君子男十人二早卒女二一作一人一無一字卒于家一適朱氏慶曆四年九月庚申葬于開封尉氏蔣成卿柏子原之新塋於其塋也長子拱璧右侍禁次拱之左班殿直次拱德衛州獲嘉縣令次拱安右班殿直次拱己守將作監主簿次拱式尉氏縣尉次拱辰右諫議大夫權御史中丞次拱著歙州司戶參軍以中丞之貴累贈尚書兵部員外郎將葬中丞君泣而語其伯仲曰吾家通許世有陰德于人而無與者至吾先君不有于其躬而以貽後世小子不佞幸得備員御史府進退大夫之後小子何有焉然懼乎後世徒見王氏之興而不知吾世積漸之所以來者若此其可無銘乃來求銘銘曰

張子野墓誌銘

吾友張子野既亡之二年其弟充以書來請曰吾兄之喪將以今年三月某日塋于開封不可以不銘銘之莫如子宜嗚呼子雖不能銘

然樂道天下之善以傳焉况若吾子野者非獨其善可銘又有平生之舊朋友之恩與其可哀者皆宜見於予文宜其來請於予也初天聖九年予爲西京留守推官是時陳郡謝希深南陽張堯夫與吾子野尚皆無恙於時一府之士皆魁傑賢豪日相往來飲酒歌呼上下角逐爭相先後以爲笑樂而堯夫子野退然其間不動聲氣衆皆指爲長者予時尚少心壯志得以爲洛陽東西之衝賢豪所聚者多爲適然耳其後去洛來京師南走夷陵並江漢其行萬三四千里山阻水厓窮居獨遊思從曩人邈不可得然雖洛人至今皆以謂無如嚮時之盛然後知世之賢豪不常聚而交遊之難得爲可惜也初在洛時已哭堯夫而銘之其後六年又哭希深而銘之今又哭吾子野而銘一有之字於是又知非徒相得之難而善人君子欲使幸而久在於世亦不可得一有也字嗚呼可哀也已子野之世曰贈太子太師諱某會祖也宣徽北院使樞密副使累贈尚書令諱遜皇祖也尚書比部郎中諱敏中皇考也會祖妣李氏隴西郡夫人祖妣宋氏昭化郡夫人孝章皇后之妹也妣李氏永安縣太君子野家聯后姻世久貴仕而被服操履甚於寒儒好學自力善筆札天聖二年舉進士歷漢陽軍司理參軍開封府咸平主簿河南法曹參軍王文康公錢思公謝希深與今參知政事宋公咸薦其能改善著作佐郎監鄭州酒稅知閩州閩中縣就拜祕書丞秩滿知亳州鹿邑縣寶元二年二月丁未以疾卒于官享年四十有八子仲郊社掌坐次從次幼未名女五人一適人矣妻劉氏長安縣君子野爲人外雖愉怡中自刻苦遇人渾渾不見圭角而志守端直臨事敢一作果決平居酒半脫冠垂頭童然秃且白矣子固已悲其早衰而遂止於此豈其中亦有不自得者邪子野諱先其上世博州高堂人自曾祖已來家京師而塋開封今爲開封人也銘曰

嗟夫子野質厚材良孰屯其享孰短其長豈其中有不自得而外物

有以我開封之原新里之鄉三世于此其歸其藏

孫明復先生墓誌銘并序

先生諱復字明復姓孫氏晉州平陽人也少舉進士不中退居泰山之陽學春秋著尊王發微魯多學者其尤賢而有道者石介自介而下皆以弟子事之先生年逾四十家貧不娶季丞相迪將以其弟之女一作子妻之先生疑焉介與羣弟子進曰公卿不下士久矣今丞相不以先生貧賤而欲託以子是高先生之行義也先生宜因以成丞相之賢名於是乃許孔給事道輔為人剛直嚴重不妄與人聞先生之風就見之介執杖屨侍左右先生坐則立升降拜則扶之及其往謝也亦然魯人既素高此兩人由是始識師弟子之禮莫不歎嗟之而季丞相孔給事亦以此見稱於士大夫其後介為學官語于朝曰先生非隱者也欲仕而未得其方也慶曆三年樞密副使范仲淹資政殿學士富弼言其道德經術宜在朝廷召拜校書郎國子監直講嘗召見邇英閣說詩一有且字將以為侍講而嫉之者言其講說多異先儒遂止七年徐州人孔直溫以狂謀捕治索其家得詩有先生姓名坐貶監處州商稅徙泗州又徙知河南府長水縣簽署應天府判官公事通判陵州翰林學士趙概等十餘人上言孫某行為世法經為人師不宜棄之遠方乃復為國子監直講居三歲以嘉祐二年七月二十四日以疾卒于家享年六十有六官至殿中丞先生在太學時為大理評事天子臨幸賜以緋衣銀魚及聞其喪惻然予其家錢十萬而公卿大夫朋友太學之諸生相與弔哭賻治其喪於是以其年十月二十七日塋先生於鄆州須城縣廬一作豐泉鄉之北厯原先生治春秋不惑傳註不為曲說以亂經其言簡易明於諸侯大夫功罪以考時之盛衰而推見王道之治亂得於經之本義為多方其病時樞密使韓琦言之天子選書吏給紙筆命其門人祖無擇就其家得其書十有五篇錄之藏于秘閣先生一子大年尚幼銘曰

聖既歿經更 焚逃藏脫亂僅傳 一作得存衆說乘之汨其原怪迂
百出雜偽真後生牽卑習前聞有欲惠之寡攻羣往往止療以膏薪
有勇夫子闢浮雲刮磨蔽蝕相吐吞日月卒復光破昏博哉功利無
窮垠有考其不在斯文

居士集卷第二十七

居士集卷第二十八 集二十八

墓誌六首

蔡君山墓誌銘

子友蔡君謨之弟曰君山爲開封府太康主簿時子與君謨皆爲館閣校勘居京師君山數往來其兄家見其以縣事決於其府府尹吳遵路素剛好以嚴憚下吏君山年少位卑能不憚屈而得盡其事之詳吳公獨喜以君山爲能子始知君山敏於爲吏而未知其他也明年君謨南歸拜其親覓京師大疫君山以疾卒于縣其妻程氏一男二女皆幼縣之人哀其貧以錢二百千爲其購程氏泣曰吾家素以廉爲吏不可以此汚吾夫拒而不受於是又知君山能以惠愛其縣人而以廉化其妻妾也君山間嘗語予曰天子以大科策天下士而學者以記問應對爲事非古取士之意也吾獨不然乃晝夜自苦爲學及其亡也君謨發其遺篋得十數萬言皆當世之務其後踰年天子與大臣講天下利害爲條目其所改更於君山之彙十得其五六於是又知君山果天下之奇才也君山景祐中舉進士初爲長谿縣尉縣媪二子漁於海而亡媪指某氏爲仇告縣捕賊縣吏難之皆曰海有風波豈知其不水死乎且雖果爲仇所殺若屍不得則於法不可理君山獨曰媪色有冤吾不可不爲理乃陰察仇家得其迹與媪約曰吾與汝宿海上期十日不得屍則爲媪受捕賊之責凡宿七日海水潮二屍浮而至驗之皆殺也乃捕仇家伏法民有夫婦偕出而盜殺其守舍子者君山亟召里民畢會環坐而熟視之指一人曰此殺人者也訊之果伏衆莫知其以何術得也長谿至今喜道君山事多如此曰前史所載能吏號如神明不過此也自天子與大臣條天下事而屢下舉吏之法尤欲官無大小必得其材方求天下能吏而君山死矣此可爲痛惜者也君山諱高享年二十有八以某年某月某日卒今年君謨又歸迎其親自大康取其柩以歸將以某年某月

某日葬于某所且謂予曰吾兄弟始去其親而來京師欲以仕宦爲親榮今幸還家吾弟獨以柩歸甚矣老者之愛其子也何以塞吾親之悲子能爲我銘君山乎乃爲之銘曰

嗚呼吾聞仁義之行於天下也可使父不哭子老不哭幼嗟夫君山不得其壽父母七十扶行送柩退之有言死孰謂天子墓子銘其傳不朽庶幾以此慰其父母

黃夢升墓誌銘

子友黃君夢升其先婺州金華人後徙洪州之分寧其曾祖諱元吉祖諱某父諱中雅皆不仕黃氏世爲江南大族自其祖父以來樂以家貲賑鄉里多聚書以招一有延字四方之士夢升兄弟皆好學尤以文章意氣自豪子少家隨一有州字夢升從其兄茂宗官于隨子爲童子一作子時爲童子無下四字立諸兄側見夢升年十七八眉目明秀善飲酒談笑子雖幼心已獨奇夢升一作已能知夢升爲可奇矣後七一作八九年子與夢升皆舉進士於京師夢升得丙科初任興國軍承興主簿快快不得志以疾一有解字去久之復調江陵府公安主簿時子一作子時謫夷陵令遇之于江陵夢升顏色憔悴初不可識久而握手噓噓相飲一作勞以酒夜醉起舞歌呼大噉一作自若子益悲夢升志雖衰而少時意氣尚在也後二年子徙乾德令夢升復調南陽主簿又遇之于鄧間常問其平生所爲文章幾何夢升慨然歎曰吾已諱之矣窮達有命非世之人不知我一有乃字我羞道於世人也求之不肯出遂飲之酒復大醉起舞歌呼因一有大字笑曰子知我者一作獨子知我乃肯出其文讀之一無二字博辨雄偉其一無此字意氣奔放猶一有若字不可禦子又益悲夢升志雖困而獨其一無二字文章未衰也是時謝希深出守鄧州尤喜稱道天下士子因手書夢升文一通欲以一本改飲以字爲勸示希深未及而希深卒子亦去鄧後之守鄧者皆俗吏一作庸人不復知

夢升夢升素剛不苟合負其所有常快快無所施一作憤憤無所發卒以不得志死于南陽夢升諱注以寶元二年四月二十五日卒享年四十有二其平生所為文曰破碎集公安集南陽集凡三十卷娶潘氏生四一作其娶潘氏生三男二女將以慶曆四年某月某日葬于董坊之先塋一作葬于先塋之側其弟渭泣而來告曰吾兄患世之莫吾知孰可為其銘予素悲夢升者因為之銘曰

子嘗讀夢升之文至於哭其兄子庠之詞曰子之文章電激雷震兩電忽止闐然滅泯未嘗不諷誦歎息而不已嗟夫夢升曾不及庠不震不驚鬱塞埋藏孰與一作子其有不使其施吾不知所歸咎徒為夢升而悲

大理寺丞狄君墓誌銘

距長沙縣西二十里新陽鄉梅溪村一作距某縣東南若干里某原有墓曰狄君之墓者迺予所記一作紀穀城孔子廟碑所謂狄君粟者也始君居穀城有善政嘗已見於予文及其亡也其子遵誼泣而請曰願卒其詳而銘之以終先君死生之賜為虛予哀狄君者其壽止於五十有六其官止於一鄉丞蓋其生也以不知於世而止於是若其歿而又無傳則後世遂將泯沒而為善者何以勸焉此予之所欲銘也君字仲莊世為長沙人幼孤事母鄉里稱其孝好一作力學自立年四十始用其兄裴蔭補英州真陽主簿再調安州應城尉能使其縣終君之去無一人為盜薦者稱其材任治民乃遷穀城令漢旁之民惟鄧穀為富縣尚書銓吏常邀厚賂以售貪令故省中私語一有鄧穀二字以一二數之惜為奇貨而二邑之民未嘗得廉吏其豪猾習以賂賄汚令而為自恣至君一切以法繩之姦民大吏不便君之政者往往訴於其上雖按覆率不能奪君所為其州所下文符有不如理必輒封還州吏亦切齒求君過失不可得君益不為之屈其後民有訟田而君誤斷者訴之君坐被劾已而縣籍疆壯為兵有

告訟田之民隱丁以規避者君笑曰是嘗訴我者彼寃民能自伸此令一有養民之所欲也吾豈挾此而報以罪邪因置之不問縣民繇是知君為愛我是歲西北初用兵州縣既大籍疆壯而詭言相驚一作警云當驅以備邊縣民數萬聚邑中會秋大雨霖米踊貴絕粒君發常平粟賑之有司劾君擅發倉廩君即具伏事聞朝廷亦原之又為其民正其稅籍之失而吏得歲免破產之患逾年政大洽乃修孔子廟作禮器與其邑人春秋釋奠而興于學時子為乾德令嘗至其縣與其民言皆曰吾邑不幸有生而未識廉吏者而長老之民所記纔一人而繼之者今君也問其一人者曰張及也推及之歲至于君蓋三十餘年是謂一世矣嗚呼使民更一世而始得一良令吏其可不慎擇乎君其可不惜其歿乎其政之善者可遺而不錄乎君用穀城之績遷大理寺丞知新州至則丁母夫人鄭氏憂服除赴京師道病卒于宿州寶慶曆五年七月二十四日也會祖諱崇謙連州桂陽令祖諱文蔚全州清湘令父諱杞不仕君娶梁陽鄭氏生子男二人遵誼遵微皆舉進士一無四字女四人長適進士胡純臣其三尚幼其一無其字銘曰

薛質夫墓誌銘

彊而仕古之道終中壽不為天善在人宜有後銘于石著不朽故大理寺丞薛君直孺字質夫資政殿學士贈禮部尚書簡肅公之子母曰金城一有郡字夫人趙氏質夫生四歲為殿直公為參知政事拜大理評事遷將作監丞景祐元年公薨天子推恩於其孤拜大理寺丞公以忠直剛毅顯于當世質夫為各臣子能純儉謹飭好學自立以世其家公葬絳州質夫自京師杖而行哭至于絳州行路之人皆哀嗟之質夫少多病後公六年以卒享年二十有四初娶向氏某人之孫某人之女再娶王氏某人之孫某人之女皆無子嗚呼簡肅公之世於是而絕孟子曰不孝有二無後為大此為舜娶妻而言

耳非萬世之通論也不娶而無後罪之大者可也娶而無子與夫不幸短命未及有子而死以正者其人可以哀不可以爲罪也故曰孟子之言非通論爲舜而言可也質夫再娶皆無子不幸短命而疾病以死其可哀也非其罪也自古賢一作聖人君子未必皆有後其功德名譽垂世而不朽者非皆因其子孫而傳也伊尹周公孔子顏回之道著于萬世非其家世之能獨傳乃天下之所傳也有子莫如舜而警不得爲善人卒爲頑父是爲惡者有後而無益爲善雖無後而不朽然則爲善者可以不懼爲簡肅公者可以無憾也使簡肅公無憾質夫無罪全其身終其壽考以從其先君子地下復何道哉某娶簡肅公之女質夫之妹也常哀質夫之賢而不幸傷簡肅公之絕世閉金城夫人之老而孤故爲斯言庶幾以慰其存亡者已悲夫銘曰死而有祀四世之間死而不朽萬世之傳簡肅之德質夫之賢雖其闕矣久也其存

隴城縣令贈太常博士呂君墓誌銘

君一本上有呂字諱士元字佐堯江寧人也咸平二年舉明經爲潭州醴陵尉廬州司理參軍寧州彭原廣州四會縣令又爲湖州司理泗州錄事參軍吉州太和秦州隴城縣令以疾卒于官享年六十有五娶閻氏生子四人曰淵曰溱曰淙曰淇閻氏年七十三後君十五年以卒子淙後其母三月卒以慶曆八年十二月二十日以閻氏之喪合葬于楊州江都縣東興鄉馬坊村先塋之次君爲人剛介有節長於爲政醴陵太和皆大邑民喜鬪訟往往因事申吏以法吏多不免而君曰與長吏爭曲直下爲邑民伺候終無毫髮過失可得而民卒愛思之四會近海俗雜蠻夷君尤知其人之利害事所經決後有欲輒改更者民必自言于廷曰此呂君所決豈可動邪後人亦莫能改也君仕三十餘年以一縣令之祿衣食其族四十餘口雖薄而必均夫人閻氏尤能爲勤儉子淵溱皆舉進士溱有賢材以文學選中

第一今淵爲祕書丞溱著作郎直集賢院以溱官得封贈君太常博士母夫人封天長縣太君嗚呼呂君官雖卑惠於其民足以爲政祿雖薄周於其族足以爲仁身雖不顯而有子以大其門足以彰爲善之効君之皇祖諱裕贈兵一作工部尚書皇考諱文膺官至太子左贊善大夫自宋興百年間呂姓之族五顯于世君之叔父刑部侍郎集賢院學士文仲實爲先朝名臣而今君有賢子又將顯呂氏之族于後於其墓也是宜銘以誌其銘一作墓曰善無不報報不必同或在其後或及其躬積久發遲逾一作愈遠彌昌如其不信考此銘章

尹師魯墓誌銘

師魯河南人姓尹氏諱洙然天下之士識與不識皆稱之曰師魯蓋其名重當世而世之知師魯者或推其文學或高其議論或多其材能至其忠義之節處窮達臨禍福無愧於古君子則天下之稱師魯者未必盡知之師魯爲文章簡而有法博學彊記通知今古一作古今長於春秋其與人言是是非非務窮盡道理乃已不爲苟止而妄隨而人亦罕能過也遇事無難易而一無此字勇於敢爲其所以見稱於世者亦所以取嫉於人故其卒窮以死師魯少舉進士及第爲絳州正平縣主簿河南府戶曹參軍邵武軍判官舉書判拔萃遷山南東道掌書記知伊陽縣王文康公薦其才召試充館閣校勘遷太子中允天章閣待制范公貶饒州諫官御史不肯言師魯上書言仲淹臣之師友願得俱貶貶監鄂州酒稅又徙唐州遭父喪服除復得太子中允知河南縣趙元昊反陝西用兵大將葛懷敏奏起爲經略判官師魯雖用懷敏辟而尤爲經略使韓公所深知其後諸將敗於好水韓公降知秦州師魯亦徙通判濠州久之韓公奏得通判秦州遷知涇州又知渭州兼涇原路經略部署坐城水洛與邊臣一作將異議徙知晉州又知潞州爲政有惠愛潞州人至今思之累遷官至

起居舍人直龍圖閣師魯當天下無事時獨喜論兵爲敘燕息戍二
篇行于世西兵起凡五六歲未嘗不在其間故其論議益一作亦
精密而於西事尤習其詳其爲兵制之說述戰守勝敗之要盡當今
之利害又欲訓士兵代戍卒以減邊用爲禦戎長久之策皆未及施
爲而元昊臣西兵解嚴師魯亦去而得罪矣然則天下之稱師魯者
於其材能亦未必盡知之也初師魯在渭州將吏有違其節度者欲
按軍法斬之而不一作未果其後更至京師上書訟師魯以公使錢
貸部將一作訟師魯自盜貶崇信軍節度副使徙監均州酒稅得疾
無醫藥昇至南陽求醫疾革隱一作憑几而坐顧稚子在前無甚憐
之色與賓客言終不及其私享年四十有六以卒師魯娶張氏某縣
君有兄源字子漸亦以文學知名前一歲卒師魯凡十年間三貶官
喪其父又喪其兄有子四人連喪其三女一適人亦卒而其身終以
貶死一子二歲四女未嫁家無餘貲客其喪于南陽不能歸平生故
人無遠邇一作近皆往賻之然後妻子得以其柩歸河南以某年某
月某日葬于先塋之次余與師魯兄弟交嘗銘其父之墓矣故不復
次其世家焉銘曰

藏之深固之密石可朽銘不滅

居士集卷第二十八

居士集卷第二十九 集二十九

墓誌六首

尚書主客郎中劉君墓誌銘并序

君諱立之字斯立姓劉氏吉州臨江人也曾祖諱遠祖諱璣當五代時避亂皆不仕父諱式官至尚書工部員外郎掌三司磨勘十餘年能其職世以其官名其家君少孤能自立舉進士為福州連江尉睦州青溪主簿宣州南陵令改大理寺丞知婺州金華縣大中舍知梓州中江縣通判瀘州瀘州接西南夷常用武人為守而夷數怨叛議者以謂武人不習夷情以生患宜得能吏通判州事君始以材選至則為明約束止侵欺曰必使信自我始夷人安之凡君之所更立至今用一作因以為法而夷亦至今不叛通判常州知高郵軍累遷殿中丞國子博士尚書虞部比部員外郎知潤州皆有能政以能選為提點福建路刑獄察獄之寃死者奏黜知泉州蘇壽與其通判張太冲福建七州皆震悚一作傑御史考其課為天下第一遷司勳員外郎開封府判官荆湖北路轉運使坐舉官免杜衍李若谷范仲淹等皆言方天下多事時一作方今天下多事如劉某者不宜久居于家一作外乃復起為比部員外郎知漣水軍言事者以謂自元昊反一方用兵而天下之民斃財絀於上而盜起於下然州縣吏猶習故態苟簡弛壞一作漫如無事時於是大選轉運使以按察諸路君以選為荆湖北路轉運使他路繩吏或過急而被按劾者多不服君所舉察簡而一作其賢否無不當時廣西湖南夔峽諸蠻皆叛亂君所部下溪辰州彭氏蠻亦折誓柱招集亡命移書州縣州縣使人往者一無者守輒囚辱侮慢一作侮慢辱囚辰鼎澧一作鼎澧辰三州守吏皆言蠻叛有迹請加兵詔書問君君曰蠻道辰溪落鶴水悍激可下不可上其必不敢輒出而辰州土丁勝兵者三萬人宜積粟利兵為備而已因言蠻類雖人宜為獸畜其小嘲啾按觸驅而遠之耳

若必擾伏制從至戾其性則嗥呼咆競駭起而奔突乃欲力追而捕之則散漫山林我弊而彼逸凡湖廣之患皆如此也天子以其言然下三州毋得妄動一聽君所為而蠻亦卒無事復為司勳員外郎判三司度支向院改鹽鐵判官假太常少卿接伴契丹使者遂送之明年遂使于契丹還言澶魏築河堤非其時必難成雖成必決不如因其所趣而導之利後河果決商胡君仕宦四十年不營產業自復為司勳員外郎遂不復求磨勘凡三遷皆為知者所薦為人沉敏少言笑與人寡合而喜薦士士由君薦者多為聞人天章閣待制杜杞田瑜是也轉運鹽鐵皆掌財賦而君常以民為先其調率有可免免之其不得已一有費守必為處畫使吏不能因緣而民不重費一作用其守官不為勢牽一作奪不為利奪一作董為青溪主簿時知州事李階通判朱正辭者皆一有世字號強吏喜負其能以折辱下士士皆承望奔走不暇獨君數以事爭而二人者常輒屈其始皆怒後卒歎服共薦之其通判瀘州州有鹽井蜀大姓王蒙正請歲倍輸以自占蒙正與莊獻明肅一有皇字太后連姻轉運使等皆不敢與奪君曰倍輸於國家猶秋毫耳奈何使貧民失業遂執不與鄂州官歲市茶五百一作十萬斤君為轉運使時三司請益一無益字市一百萬君上言曰鄂人利茶以為生今官市之多反以茶為病縱不能減奈何增之天子為君許寬一年君曰事苟可行何必一年如其不可雖寬十年不可也爭之不已後卒為君罷之君在鹽鐵次當舉官掌其事一作某人為三司使欲用其私人以空名狀請君署君不肯署而求舉者姓名三司使不悅卒命他判官舉之其後三司使竟坐所舉罷慶曆八年五月遷主客郎中益州路轉運使其年十一月七日卒于官享年六十有四夫人臨沂縣君王氏贈尚書右僕射礪之女先君若干年卒五子元卿真卿亦早亡敵今為大理評事敬鳳翔府推官皆賢而有文章放太廟齋郎尚幼四女三適人一尚幼以某年某

月某日葬于某縣某鄉某原銘曰

劉氏顯晦以時亂治有聲王朝自君再世惟德之貽是將久大曷知其然君實有子

翰林侍讀學士右諫議大夫楊公墓誌銘

慶曆八年春翰林侍讀學士右諫議大夫楊公年六十有九告老即以工部侍郎致仕歸于常州其行也天子召見宴勞賜以不拜公卿大夫咸出餞于東門瞻望咨嗟相與言曰楊公歸哉於公計爲可榮於國家計爲可惜其明年九月十三日公疾革出其兵論一篇示其子忱慙而授以言曰一有臣聞二字臣子雖死不敢忘其君父者天下之至恩大義也今臣偕不幸猶以垂閉之口言天下莫大之憂爲陛下無窮之慮者其事有五以畢臣志死無所恨惟陛下用臣言不必哀臣死也言訖而卒不及其私忱慙以其語并其兵論以聞天子震悼顧有司問可以寵公者有司舉故事以對天子曰此何足以慰吾思乃詔特贈公兵部侍郎公少師事种放學問爲文章長於議論好讀兵書知古兵法以謂士不兼文武不足任大事當四方無事時數上書言邊事後二十餘年元昊叛河西契丹舉衆違約三邊皆警天下繁於兵公於此時耗精疲神日夜思慮創作兵車陣圖刀楯之屬皆有法天子以步卒五百如公之法試于庭以爲可用而世多非其刀楯修嘗奉使河東得邊將王吉言元昊出兔毛川爲吉所敗者用楊公一有刀楯也蓋世未嘗用其術爾然公素剛一作剛直少合而議者不一故不得盡用其言夏竦經略陝西請益置土兵公言竦據內地無破賊之謀而坐請益兵蓋虞敗事則欲以兵少爲解竦復論公不忠沮計公不能忍以語詆之其後三路農民壯者咸墨爲兵公又言兵在精不在衆衆而不練則不整而易敗困國而難供時自將相大臣議者皆務多兵獨公之論能如此劉平兵敗元昊圍延州甚急而救兵不至公在河中乃僞爲書馳告延州救兵十萬至矣因

命旁郡縣具芻糧什器如其數以俟已而元昊亦解去後公守并州即詔公爲并代麟府路經略安撫招討等使兼兵馬都部署公執勅告其羣吏曰天子用我矣然任其事必圖其効欲責其効必盡其方乃列六事以請曰能用臣言則受命不然則已朝廷難之公論不已坐是徙知邢州公志之不就皆此類也公嘗爲御史章獻太后兄子劉從德爲團練使以卒其門人親戚廝養用從德拜官爵者數十人馬李良以劉氏壻爲龍圖閣直學士公上書言漢呂太后王祿產欲彊其族而反以覆宗唐武三思楊國忠之禍不獨其身幾亡其國太后大怒貶監舒州酒稅居二歲復召爲御史言事愈切公祥符元年進士及第以上書言事真宗奇之召試不赴拜著作佐郎累官至工部侍郎爲天章閣待制龍圖閣樞密直學士遂待講于翰林嘗爲審刑院詳議官知淮陽江陰軍三司度支判官知御史雜事判吏部流內銓三司度支副使河北河東都轉運使知河中府陝并邢滄杭五州所至皆有能績一作稱爲人廉潔一作平剛直少屈而難犯其仁心愛物至其有所能容人多所不及也公一有諱借二字字次公會祖諱偉祖諱某父諱守慶初娶張氏又娶李氏又娶李氏一無此人字又娶王氏太原郡君亦有六孫景略景亮景讓景道景直景彥十四字 直一作宣公卒之明年秋其子忱以其喪歸于河南又明年二月十七日葬于洛陽縣宣武管平洛鄉之先塋公有文集十卷兵書十五卷讀其書可以見公之志考其始終之節可以知公之心嗚呼可謂忠矣修爲諫官時嘗與公爭議一作言于朝者而且未嘗識公也及其塋也其子不以銘屬於他人而以屬修者豈以修言爲可信也歟然則銘之其可不信銘曰

遠矣楊氏有來其一作其來有始赤泉侯功與漢俱起震官太尉四世以公於陵正直僕射于唐師復理鄉振左拾遺文蔚獲嘉其後益衰避亂中州曾祖始一作遷南祖屈僞邦令于烏江又適南粵皇考

是生晦顯一作顯膺有時發于皇明在考司馬始仕坊州遂家中一
作內部道德之優司馬四子唯公克大非徒大之將又長之世有官
族孰無繁譜或絕於微或亡其序不絕不亡由屢有人誰如楊世愈
久而蕃次第一作後嗣弗迷昭穆絲聯公其歸此一作乎安千萬年

供備庫副使楊君墓誌銘

君諱琪字寶臣姓楊氏麟州新秦人也新秦近胡以戰射爲俗而楊
氏世以武力雄其一方其曾祖諱弘信爲州刺史祖諱重勳又爲防
禦使太祖時爲置建寧軍於麟州以重勳爲留後後召以爲宿州刺
史保靜軍節度使卒贈侍中父諱光展以西鎮供奉官監麟州兵馬
卒于官君其長子也君之伯祖繼業太宗時爲雲州觀察使與契丹
戰刃贈太師中書令繼業有子延昭真宗時爲莫州防禦使父子皆
爲名將其智勇號稱無敵至今天下之士至於里兒野豎皆能道之
君生於將家世以武顯而獨好儒學讀書史爲人材敏謙謹沈厚意
恬如也初以父卒于邊補殿侍後用其從父延昭任爲三班奉職累
官至供備庫副使階銀青光祿大夫爵原武伯李溥爲發運使以峻
法繩下吏凡溥所按行吏皆先戒以備而溥至多不免其黜廢者數
百人其聞溥來輒惶懼自失至有投水死者君時年最少爲奉職監
大通堰去溥治所尤近溥嘗夜率輕舟猝至按其文簿視其職事如
素戒以備者溥稱其才君所歷官無不稱職其後同提點河東京西
淮南三路刑獄公事君歎曰吾本武人豈足以知士大夫哉然其職
得以薦士亦吾志也其所舉者二百餘人往往爲世聞人嘗坐所舉
一人罰金君喜曰古人拔士十或得五而吾所薦者多矣其失者一
而已君少喪父事其母韓夫人以孝聞後以恩贈其一無此字父左
驍衛將軍母夫人南陽縣太君初娶慕容氏又娶李氏有子曰旼賢
而有文武材今爲尙書屯田員外郎直史館君以皇祐二年六月壬
戌卒于淮南年七十有一皇祐三年十月甲申改以其妻合慕容氏

之喪葬于河南洛陽杜澤原銘曰

楊世初微自河西彎弓馳馬耀一作羅邊陲桓桓侍中國并毗太師
防禦傑然奇名聲累世在羌夷時平文勝武力衰温温供備樂有儀
好賢舉善利豈私愷悌君子神所宜康寧壽考順全歸有旼爲子後
可知

太子中舍王君墓誌銘

王君之皇考曰贈衛尉少卿諱某皇妣曰南充縣太君胥氏皇祖諱
某皇曾祖諱某君諱汲字師黯娶胡氏一有曰字安定縣君子男二
人女五人男曰尙恭尙恭尙辭初天聖明道之間子爲西京留守推
官時王君寓家河南其二子始習業國子學日從諸生請學於予較
其藝常爲諸生先而尙恭尤謹飭儼然有儒者法度子固奇王君之
有是子也以故與君游而君性簡質重然諾臨事而敏與之游者必
愛其爲人其後二子者果皆以進士中第予亦罷去不復遇王君且
七年矣而尙恭來請曰不幸吾先人之亡將以今年某月甲子葬于
河南某縣某鄉之某原宜得銘于石以誌諸後世一有予嘗嘉尙恭
而從王君遺十字乃爲次其世而作銘以遺之云

惟王氏之先長安萬年四代之祖刺史壁州遭巢猾唐得果而留卒
墓西充爲鄉壁公王孟有蜀或家或祿三世不遷自君東還始家河
南廣文之生舉三不中任任以兄主簿之卑試原武密晉城是令政
專自出令政有稱遷理之丞藍田夏維三邑皆聞壽五十九終中舍
人在雖逢饑餉粟不殍褒功勸吏天子有詔維人染瘴窮之不避以
死勤民在法宜祀刻詩同藏惟世之揚

尙書工部郎中歐陽公墓誌銘

歐陽氏世爲廬陵人廬陵於五代時屬僞吳故歐陽氏在五代無聞
者淳化三年修仲父府君始以進士中乙科一作太宗時修仲父府
君始以進士中淳化三年乙科其後爲御史有能名真宗嘗自擇御

史府君以秘書丞一有召字見見者數人皆進自稱薦惟恐不用府君獨立握下無所說一作無言明一作翌日拜監察御史中丞王嗣宗指曰是獨立握下者真御史也一有會字絳州守齊化基犯法制劫其事化基嗣宗素所惡者諷之欲使蔓其獄府君一有處拒二字曰如詔一作如制所勅而已嗣宗怒及獄上奏用他吏覆之一有他吏二字索其家得一有金銀二字銅器十數府君坐鞠獄不盡免官明年復得御史監蘄州稅又明年遷殿中侍御史左巡使居二歲奏事殿中真宗識之勞曰御史久矣亦勞乎問何所欲府君謝不任一作稱職而已後數日真宗語宰相與轉運使宰相疑其有求而不先自已對以員無闕復使與一大郡宰相召至中書問御史家何在欲郡孰為便對曰無不便宰相怒與海州又移睦州天禧元年入遷侍御史二年出知泗州先是京師歲旱有浮圖人斷一有僧某者用浮屠術斷一臂禱雨官為起寺於一有淮上二字龜山自京師王公大臣皆禮下之其勢傾動一無動字四方又誘民男女投淮水死曰佛之法用此得大利而愚民歲死淮水者幾百一作常數十人至其臨溺時用其徒倡呼前後擁之以入至有自悔欲走者一無者字叫號不得免一作而叫號不得免者府君聞之驚一作大駭曰害有大一作甚於此邪盡捕其徒詰其姦民誅數一作十餘人遣還鄉里者數百人遂一作而毀其寺入轉尚書司封員外郎三司戶部判官六年為廣南東路轉運使前為使者以市舶物代俸錢其利三倍府君歎曰一作饋南書以市舶司物代轉運使俸錢其利三倍前為使者相襲久而不變府君至則數日利豈吾欲邪使直以錢為俸今上即位就轉工部郎中秩滿以一擊舟還無一海上物歸朝賜金紫為兩浙路轉運使以足疾求知江州天聖四年又求分司未得命以某年二月某日卒於江州之廨享年六十有八以某年某日某日葬某所曾祖諱某祖諱某僞唐吉州軍事判官父諱某僞唐屯田員外郎娶

朱氏封金壇縣君先府君以卒嗣子鑒一有今年為右侍禁武昌巡檢女二人長適某次未嫁府君諱載字則之性方直嚴謹一有美儀容治身儉薄簡言語為政務清淨平居斂色而一作常正衣獨坐如對大賓終日不少懈一作色不少弛人用憚之薦舉下吏人未嘗一作不之知後有知者來謝皆拒不納所至官舍未嘗窺園圃至果爛墮地家人無敢取者其清如此銘曰
唐隴盜猖土裂四一作食有一方鍾氏於洪入一作八州自王傳死子時敗臣于楊自梁迄周廬陵偽邦歐陽是家世以不章一作彰違命之侯廬陵王土歐陽有聞始我仲父以貢中科來者繼武仲父之材御史其能廉清儉恭直躬以行銘以藏之子孫之承
少府監分司西京裴公墓誌銘
君諱德裕一作谷字某姓裴氏河中萬泉人也其九世祖耀卿為唐名臣曾祖諱某祖諱某贈左千牛衛大將軍父諱濟以智勇事太宗皇帝從李繼隆擊契丹於唐河屢立戰功守鎮定十餘年威惠著于北邊咸平中李繼遷叛河西以內客省使順州防禦使守靈州繼遷連歲攻之城守堅不能下繼遷擊破清遠軍而糧道絕救兵不至城乃陷遂歿于賊贈鎮江軍節度使累贈尚書令兼中書令追封吳國公方其歿也詔錄其子孫君以長子自四門助教拜太子右贊善大夫累官至少府監階朝奉大夫勳上柱國爵開國侯以老分司西京許居千京師某年某日某日以疾卒於家享年七十有六君為人質重寬易居父喪盡哀宗族稱其孝得父金帛悉分諸弟不有其一錢其為史廉清不擾歷監藥蜜庫店宅務泗一作明州糧料院宿州酒稅知明州奉化興元南鄭二縣同判吏部南曹通判南京留守司知蓬絳解號澤沂六州皆有能政喜自晦默如不能言子嘗問其解之鹽池君解析織密自前世功利因革損益條布如在目前寶元中嘗上書論茶鹽利害多所施行其聽獄訟敏決數得疑獄皆強吏所不

能辨者及平居議法必以仁恕爲本君初名德昌前娶康氏後娶趙氏封平原郡君有賢行子男三人士倫士林大理寺丞士傑衛尉寺丞女八人長適右侍禁張用之次適大理寺丞薛寅集賢校理孫錫大理寺丞丁某殿中丞孫祖慶庫部員外郎張承懿集賢校理王益柔以某年某月某日薨君子河南登封縣之某原其孤士傑來請銘以葬銘曰

裴始絳人於唐顯聞偉歟文獻八世有孫守節蹈義厥聲以振忍生而耻亦終以死死義之榮令名不已豈惟令名報德之隆延延裴氏其賴無窮少府之賢寬恭信厚保身承家多其祿壽壽豐于躬祿及其嗣爰告後人俾知所自

居士集卷第二十九

墓誌四首

翰林侍讀學士右諫議大夫贈工部侍郎張公墓誌銘并序
 翰林侍讀學士朝散大夫右諫議大夫上柱國清河縣伯張公諱錫
 字貺之其先京兆長安人也其祖山甫從唐僖宗入蜀留不返蜀遭
 王孟再亂絕於中國中國更五代天下為宋而蜀平張氏留蜀蓋亦
 已五世矣始得去為漢陽人又二世而張氏遂以大顯公為人清方
 敏默為善不倦而喜自晦斂若不欲人知其遇人怡怡若無所不可
 及視其發施於事者其義有可畏其守有不可奪其能有不可及既
 已則若未嘗有所為者少喜讀書至其疾革猶不釋手自經史子集
 百家之說無不記覽通達而絕口不道於人故其一無此字晚始侍
 讀于中上嘗歎曰自吾得張錫日益有所聞以飛白為博學二字賜
 之曰錫老矣恨得之晚也公初舉進士中大中祥符元年甲科試秘
 書省校書郎知南昌縣遷萍鄉令改著作佐郎又知安遠縣徙知新
 州興學校以教新人新人有進士自公始再遷太常博士監染院詔
 選能吏治畿縣公以選知東明前為令者闔門重簾以壅隔廢治公
 至則闔門去簾告其人曰吾所治者三而已彊恃力富恃貲刑恃贖
 者吾所先也其人以謂公言簡必信法簡必嚴於是豪勢者屈而善
 弱者伸縣以大治工部侍郎李及薦公材堪御史上曰李及清慎人
 未嘗妄有所舉此可信也乃以為監察御史故相丁謂貶崖州至是
 議徙內地公疏言謂姦邪弄國罪當死無可憐且大臣竄逐本與天
 下棄之今復內還是違天下意由是止徙道州玉清昭應宮災坐火
 事劾當死者百餘人公疏言天災可畏不可反以罪人而重天怒願
 益修德以塞譴人乃獲免公於御史自監察歷殿中侍御史侍御史
 知雜事於尚書為員外郎郎中累官至諫議大夫於外為荆湖北路
 京東河北轉運使江淮一作南字兩浙荆湖發運制置使利夔路安

撫使知河中府滑州於三司為鹽鐵判官判句院歷鹽鐵度支戶部
 副使又嘗權知諫院判三班審官院太常寺國子監於侍從為天章
 閣待制龍圖閣直學士翰林侍讀學士雖其一作其雖自晦其所居
 人皆以為宜其在京東籍淄青齊濮濟鄆六州之人冒耕河墻地收
 租緡絹歲二十八萬而六州之民爭訟遂息其後言利者請稅天下
 橋渡以佐軍公建言津梁利人而反稅之以為害卒爭罷之平居退
 讓未嘗肯為人先妖賊王則反貝州兵圍久不克而自河以北軍餉
 調發益急轉運使受命者以疾留不行公自滑州權河北轉運使命
 至即日馳城下軍須皆如其期其於取舍緩急常如此公居家有常
 法雖貴顯衣服飲食如少賤時事母至孝與族兄甚相友愛人以為
 同產一有平生所為文章有集十卷公以皇祐元年七月十日遇疾
 卒于京師享年六十有八上聞震悼以白金三百兩賜其家特贈工
 部侍郎曾祖諱惟序不仕祖諱文翼復州錄事參軍贈太子中舍父
 諱龜從贈右諫議大夫母南陽郡太君鄧氏自皇祖中舍君家于漢
 陽遂塋之至公始塋汝州之襄城某鄉某原一作彰孝鄉係豐原實
 五年閏七月十七日也公初娶程氏再娶孫氏封樂安郡君先公五
 十日而卒公子五人曰子駿子充子雲一作子瑾下同子諒子真子
 真子充皆早卒於公之塋一作終也子駿子雲皆為大理評事子諒
 大理寺丞有孫十人女三人長適虞部員外郎杜樞次早卒幼適大
 理寺丞王緯銘曰
 自足乎其中不求乎其外斯惟公之善晦仁能勇於必為善有應而
 無遠故公晦其終顯難於自進以晚見嗟而壽胡不俾其遐嗚呼其
 奈何

兵部員外郎天章閣待制杜公墓誌銘

慶曆二年盜起京西掠商鄆均房叛兵燒光化軍逐守吏吏不能捕
 天子患之問宰相誰可任者宰相言度支判官尚書虞部員外郎杜

某名家子一有好字學通知古今宜可用乃以君爲京西轉運按察使居數月賊平叛兵誅死明年廣西歐希範誘白崖山蠻蒙趕襲破環州陷鎮寧帶溪普義有衆數千以攻桂管宰相又言前時杜某守橫州言蠻事可聽宜知蠻利害天子驛召君見便殿所對合意即除君刑部員外郎直集賢院廣南西路轉運按察安撫等使君至宜州得州人吳香及獄囚歐世宏脫其械使入賊峒說其酋蒙君乘其怠急擊之破其五峒斬首數百級復取環州因盡焚其山林積聚希範窮迫走荔波洞蒙趕率僞將相數十人以其衆降君與將佐謀曰夫蠻習險恃阻如捕猩狔而吾兵以苦暑難久是進退遲速皆不可爲故常務捐厚利以招之蓋威不足以制則恩不能以懷此其所以數叛也今吾兵雖幸勝然蠻特敗而來耳豈真降者邪啖之以利後必復動乃慨然歎曰蠻知利而不知威久矣吾將先威而後信庶幾信可立也一無此字乃擊牛爲酒大會環州戮其一作之坐中者六百餘人而釋其疴病脅從與其非因敗而降者百餘人後三日兵破荔波擒希範至并戮而醢之以醢賜諸溪峒於是叛蠻無噍類而君威震南海言事者論君殺降爲國失信於蠻貊天子置之不問詔書諭君賜以金帛君即上書引咎六年徙爲兩浙轉運使築錢塘堤自官浦至沙陘以除海患明年又徙河北轉運使召見奏事移刻天子益知其材賜金紫服以遣之是歲夏拜天章閣待制充環慶路兵馬都部署經略安撫使知慶州君言殺降臣也宜得罪將吏惟臣所使其勞未錄不敢先受命天子爲君悉錄將吏賞之乃受命自元昊稱臣聽誓而數犯約抄一作鏡邊邊吏避生事縱不敢爭君始至其會孟香率千餘人內附事聞詔君如約君言如約當還而孟香得罪夏人勢無還理遣之必反爲邊患議未決夏人以兵入界求孟香孟香散走自匿夏兵驅殺邊戶掠奪羊一作牛馬而求孟香益急朝議責君亟索而還之君言夏人違誓舉兵孟香不可與因移檄夏人不償所

掠則孟香不可得夏人不肯償所掠君亦不與孟香夏人後亦不復敢動君治邊二歲有威愛皇祐二年五月甲子疾卒于官享年四十六天子震悼賜卹其家以其子炤爲一有守字祕書省校書郎君以太子中舍知建陽縣除民無名租歲以萬計閩俗貪嗇有老而生子者父兄多不舉曰是將分吾貲君上書請立伍保俾民相察實之法由是生子得免閩人久之以君爲德多以君姓字名其子曰生汝者杜君也君諱杞字偉長世爲金陵人其曾伯祖昌業仕江南李氏爲江州節度使江南國滅杜氏北遷今爲開封府開封人也曾祖諱某贈給事中祖諱鑄官至龍圖閣學士尚書禮部侍郎父諱某贈尚書工部侍郎君初娶蔣氏封某縣君後娶徐氏封東海縣君女六人其二適人四尚幼子男一人炤也杜氏自君皇祖侍郎以博學爲世儒宗故其子孫皆守儒學而多聞人君尤博覽強記其爲文章多論當世利害甚辯有文集十卷奏議集十二卷其居官以精敏明幹所至有聲君學問之餘兼喜陰陽數術之說常自推其數曰吾年四十六死矣其親戚朋友莫不聞其說至其歲果然嗚呼可謂異矣所謂命者果有數邪其果可以自知邪皇祐六年某月日其兄駕部員外郎植與其孤壘君于某縣某鄉某原銘曰

尚書比部員外郎陳君墓誌銘

故尚書比部員外郎陳君卜以至和二年正月某日薨于京兆府萬年縣洪固鄉神禾原其素所知祕書丞李誦與其孤安期謀將乞銘於廬陵歐陽修安期曰吾不敢謂曰我能得之乃相與具書幣遣君之客賈繹自長安走京師以請蓋君以至和元年五月某日卒于長安享年四十有六其仕未達而所爲未有大見于時也然誦節義可信之士以誦能報君而君能知誦則君之爲人可知也已君諱漢卿

字師黯世居園中其先博州人因事僞蜀爲縣令遂留家焉其會叔祖省華官至諫議大夫生堯叟堯佐堯咨先後爲將而君自會祖而下三世不顯會祖諱省恭不仕祖諱堯封舉進士爲饒縣主簿王均亂蜀詣闕上書獻破賊策不報遂退老于嵩山父諱淵亦舉進士官至大理寺丞與其兄漸所謂金龜子者皆以文學知名君生一歲而孤年十三與其母入蜀過鳳翔謁其府尹而吏少君不爲之通君直入伏庭下曰陳某請見因責尹慢士戒吏不謹尹歎答吏以謝君君用叔祖堯咨蔭補將作監主簿累遷大理寺丞監沙苑監權知渭南縣民有兄弟爭田者吏常直其兄而弟訟不已君爲往視其田辨其券書而以田與弟其兄謝曰我悔欲歸弟以田者數矣直懼答而不敢耳弟曰我田故多然恥以不直訟兄今我直矣願以田與兄兄弟相持慟哭拜而去由是縣民有事多相持詰君得一言以決曲直又知登封縣縣有惡盜十人已謀未發而尉方以事出君募少年選手力夜往捕獲之明日召尉歸以賊與之曰得是可以用輪賞賞未及下而尉卒尉河南儒者魏景山也老而且貧君爲主其喪事買田宅于汝州以活其妻子通判嘉州治田訟三十年不決者一日決之秩滿嘉人詣轉運使乞留不得時文丞相守成都薦其材而薦者十有五人通判河中府有妖獄二百餘人君方以公事之他州提點刑獄司疑獄有冤召君還視之獨留其一人餘皆釋之累遷尚書虞部員外郎天子享明堂推恩遂遷比部通判寧州決疑獄活一家五人君好學重氣節嘗有負其錢數千萬輒毀其券棄之與人交久而益篤喜爲歌詩至於射藝書法醫藥皆精妙尤好古書奇畫每傾貲購之嘗自爲錄藏于家其材能好尚皆可嘉也母曰仁壽縣太君王氏初娶王氏生一子安期也後娶又曰王氏銘曰

在蜀僞時處昏不迷惟陳最微蜀亡而東高明顯融莫如陳宗惟陳有聲自其高曾君世不興惟興與伏有俟如畜其周必復實始自君

昌其子孫考銘有文

鎮安軍節度使同中書門下平章事贈中書令諡文簡程公

墓誌銘

嘉祐元年閏二月己丑鎮安軍節度使檢校太師同中書門下平章事使持節陳州諸軍事陳州刺史程公薨于位以聞詔輟視朝二日贈公中書令於是其孤嗣隆以狀上考功移于太常而博士起曰法宜諡乃諡曰文簡明年十月十八日塋公于河南伊闕之某鄉某原一作神陰鄉張留單其孤又以請于太史而史臣修曰禮宜銘乃考次公之世族官封爵號卒塋時日與其始終之大節合而誌於其墓且銘之曰惟程氏遠有世序自重黎以來其後居中山者出於魏安鄉侯昱之後公諱琳字天球中山博野人也曾祖贈太師諱新會祖妣吳國夫人齊氏祖贈太師中書令諱贊明祖妣秦國夫人吳氏考袁州宜春令贈太師中書令一有兼字尚書令冀國公諱元白妣晉國夫人楚氏公以大中祥符四年舉服勤辭學高第爲泰寧軍節度掌書記一作推官改著作佐郎知壽陽縣祕書丞監左藏庫天禧中詔舉辭學履行召試直集賢院今天子卽位遷太常博士三司戶部判官是時契丹所遣使者數出不遜語生事而主者應對多失辭上患之已而契丹來賀卽位乃選公爲接伴使而契丹使者言太后當遣使者通書公遽以禮折之乃已史官修真宗實錄而起居注嗣命公修大中祥符八年以後起居注遂修起居注遷祠部員外郎提舉在京諸司庫務以本官知制誥同判吏部流內銓天聖五年館伴契丹賀乾元節使使者言中國使至契丹坐殿上位次高而契丹使來坐次下當陞語甚切不已而上與大臣皆以爲小故不足爭將許之公以謂許其小必啓其大力爭以爲不可遂止河決滑州初議者言可塞役既作而後議者以爲不可乃命公往視之公言可塞遂塞之歲中遷右諫議大夫權御史中丞明年拜樞密直學士知益州蜀人

輕而喜亂公常先制於無事至其臨時如不用意而略其細治其大且甚者不過一二而蜀人安之自寮吏皆不能窺其所爲正月俗放燈吏民夜會聚遨嬉感天下公先戒吏爲火備有失火者使隨救之勿白以動衆既而大宴五門城中火吏救止卒宴民皆不知蓋其他設施多類此軍士見監軍告其軍有變監軍入白公笑遺之惶恐不敢去公曰軍中動靜吾自知之苟有謀者不待告也可使告者來監軍去而告者卒不敢來公亦不問遂止蜀州妖人有自號李冰神子者署官屬吏卒聚徒百餘人公命捕實之法而讒之朝者言公妄殺人蜀人恐且亂矣上遣中貴人馳視之使者入其境居人行旅爭道公善使者問殺妖人事其父老皆曰殺一人可使蜀數十年無事使者問其故對曰前亂蜀者非有智謀豪傑之才乃里閭無賴小人爾惟不制其始遂至於亂也使者視蜀既無事又得父老語還白於是上益以公爲能遷給事中知開封府禁中大火延兩宮宦者治獄得縫人火斗已誣伏而下府命公具獄公立辨其非禁中不得入乃命工圖火所經而後宮人多所居隘其炷竈近版壁歲久燥而焚曰此豈一日火哉乃建言此殆天災也不宜以罪人上爲緩其獄故卒得無死者公在府決事神速一歲中獄常空者四五遷工部侍郎龍圖閣直學士守御史中丞是歲以翰林侍讀學士復知開封府明年爲三司使治財賦知本末出入有節雖一金不可一作敢妄取累遷吏部侍郎景祐四年以本官參知政事司天言曰食明年正旦請移閏月以避之公以謂天有所謹非移閏可免惟修德政而已乃止范仲淹以言事忤大臣貶饒州已而上悔悟欲復用之稍徙知潤州而惡仲淹者復誣以事語入上怒亟命置之嶺南自仲淹貶而朋黨之論起朝士牽連一有一字出語及仲淹皆指爲黨人公獨爲上開說明其誣枉上意解而後已公爲人剛決明敏多識故事議論慨然及知政事益奮勵無所回避宰相有所欲私輒以語折之至今人往往能

道其語而小人僥倖多不得志遂共以事中之坐貶光祿卿知潁州已而上思之徙知青州又徙大名府居一歲間遷戶部吏部二侍郎尚書左丞資政殿學士北京建與宦者皇甫繼明爭治行宮事章交上上遣一御史視其曲直御史直公遂罷繼明是時繼明方信用其勢傾動中外自朝廷大臣莫不屈意下之而公被中傷方起未復而獨與之爭雖小故不少假也故議者不以公所直爲難而以能不爲繼明屈爲難也遷工部尚書資政殿大學士河北安撫使慶曆六年拜武昌軍節度使陝西安撫使知永興軍府事明年加宣徽北院使判延州夏人以兵三萬臨界上前三日公諫知其來戒諸堡寨按兵閉壁虜至以爲有備引去訖公去不復窺邊趙元昊死子諒祚立方幼三大將共治其國言事者謂可除其諸將皆以爲節度使使各有其所部以分弱其勢可遂無西患事下公公以謂幸人之喪非所以示大信撫夷狄而諒祚雖幼君臣和三將無異志雖欲有爲必無功而反生事不如因而撫之上以爲然皇祐元年加同中書門下平章事復判大名府兼北京留守自元昊反河西契丹亦犯約求地二邊兵興連歲不解而公方入與謀議更守西北二方尤知夷狄虛實情僞山川要害所以行師制勝營陣出入之法於河北尤詳其奏議頗多雖不能盡用其指畫規爲之際有可喜也再居大名前後十年咸惠信於其人人爲立生祠公自罷政事益不妄與人合亦卒不復用既徙鎮安居三歲上書曰臣雖老尚能爲國守邊未報而得疾享年六十有九公累階開府儀同三司勳上柱國開國廣平郡爵公食戶七千四百而實封二千一百賜號推誠保德守正翊戴功臣娶陳氏封衛國夫人子男四人曰嗣隆太常博士嗣弼殿中丞嗣恭太常博士嗣先大理寺丞女五人長適職方員外郎榮諱次適秘書丞韓縝次適都官員外郎晁仲約一作緯次適大理寺丞吳得次適將作監主簿王偁孫三人長曰伯孫次曰公孫皆太常寺太祝次曰昌孫守

秘一作校書郎有文集奏議六十卷公平生寡言笑慎於知人既已知之久而益篤喜飲酒引滿然人罕得其驪而與余尤相好也銘曰君子之守志於不奪不學而剛有摧必折毅毅程公其剛不屈公在政事有諤其言直雖不容志豈不完謂公不顯公位將相豈無謀謨胡不以訪老于輔藩一作藩輔白首猶壯公雖在外邦國之光奄其不存士夫曷望吉卜之從兆此新岡惟其休聲逾一作愈遠彌長

居士集卷第二十

墓誌五首

太子太師致仕杜祁公墓誌銘

故太子太師致仕祁國公贈司徒兼侍中杜公諱衍字世昌越州山陰人也其先本出於堯之後歷三代常為諸侯後徙其封于杜而子孫散適他國者以杜為氏自杜赫為秦將軍後三世御史大夫周及其子建平侯延年仍顯于漢又九世當陽侯預顯于晉又十有四世岐國公佑顯于唐又九世而至于祁公其為家有法其吉凶祭祀齋戒日時幣祝從事一用其家書自唐滅土喪其舊禮而一切苟簡獨杜氏守其家法不遷於世俗蓋自春秋諸侯之子孫歷秦漢千有餘歲得不絕其世譜而唐之威時公卿家法存於今者惟杜氏公自會高以來以恭儉孝謹稱鄉里至公為人尤潔廉自剋一作刻其為大臣事其上以不欺為忠推於人以行己取信故其動靜纖悉謹而有法至考其大節偉如也一作至考其始終之大節雖古君子有不能及也其立於朝廷天下國家以為重選而老也久而天子益厚之公享年八十官至尚書左丞方其六十有九歲且盡即上書告老明年以太子少師致仕累遷太子太保太師封祁國公於其家天子祀明堂遣使者召公陪祠將有所問以疾不至而歲時存問勞賜不絕公少舉進士高第為揚州觀察推官知平遙縣通判晉州知乾州遷河東京西路提點刑獄知揚州河東陝西路轉運使入為三司戶部副使拜天章閣待制知荆南府未行為河北路都轉運使遂知天雄軍召為御史中丞判流內銓知審官院拜樞密直學士知永興軍徙知并州遷龍圖閣學士復知永興軍權知開封府康定元年以刑部侍郎同知樞密院事即拜副使慶曆二年遷吏部侍郎樞密使明年以本官同中書門下平章事公治吏事如其為人其聽獄訟雖明敏而審覈愈精故屢決疑獄人以為神其簿書出納推析毫髮終

日無倦色至為條目必使吏不得為姦而已及其施於民者則簡而易行始居平遙嘗以吏事適他州而縣民爭訟者皆不肯決以待公歸知乾州未滿歲安撫使察其治行以公權知鳳翔府二邦之民爭於界上一曰此我公也汝奪之一曰今我公也汝何有焉夏人初叛命天下苦於兵而自陝以西尤甚吏緣侵漁調發督迫至民破產不能足往往自經投水以死於是時公在永興語其入曰吾不能免汝然可使汝不勞爾乃為之區處計較量物有無貴賤道里遠近寬其期會使以文一作得次第輸送由是物不踴貴車牛芻秣宿食來往如平時而吏束手無所施民比他州費省十六七至於繕治城郭器械民皆不知開封治京師常撓於權要有干其法而能不為之屈者世皆以為難至公能使權要不敢有所干凡其為治以聽斷盜訟為能否爾獨公始有餘力省其民事如治他州而畿赤諸縣之民皆被其惠開封比比出能吏而兼於民政者惟公一人吏部審官主天下吏員而居職者類以不久遷去故吏得為姦公始視銓事一日選者三人爭某闕公以問吏吏受丙賂對曰當與甲乙不能爭遂一作乃授他闕居數日吏教丙訟甲負其事不當得公悟召乙問之乙謝曰業已得他闕不願爭公不得已與丙而笑曰此非吏罪乃吾未知銓法爾因命諸曹各具格式科條以白問曰盡乎曰盡矣明日勅諸吏無得升堂使坐曹聽行文書而已由是吏不得與銓事與奪一出於公居月餘翕然聲動京師其在審官有以賄求官者吏謝不受曰我公有賢名不久見用去矣姑少待之慶曆之初上厭西兵之久出而民弊亟用今丞相富公樞密韓公及范文正公而三人者遂欲盡革衆事以修紀綱而小人權倖皆不悅獨公與相佐佑而公尤抑絕僥倖凡內降與恩澤者一切不與每積至十數則連封而面還之或詰責其人至慙恨涕泣而去上嘗謂諫官歐陽修曰外人知杜某封還內降邪吾居禁中有求恩澤者每以杜某不可告之而止者多於所

封還也其助我多矣此外人及杜某皆不知也然公與二人者卒皆以此罷去公多知本朝故實善決大事初邊將議欲大舉以擊夏人雖韓公亦以為為可舉公爭以為不可大臣至有欲以沮罪罪公者然

兵後果不得出契丹與夏人爭銀瓊族大戰黃河外而厲門麟府皆警范文正公安撫河東欲以兵從公以為契丹必不來兵不可妄出

范公怒至以語侵公公不為恨後契丹卒不來二公皆世俗指公與為朋黨者其論議之際蓋如此及三人者將罷去公獨以為為不可遂

一作故亦罷以尚書左丞知兗州歲餘乃致仕公自布衣至為相衣服飲食無所加雖妻子亦有常節家故饒財諸父分產公以所得悉

與昆弟之貧者俸祿所入分給宗族稠人急難至其歸老無屋以居寓於南京驛舍者久之自少好學工書畫喜為詩讀書雖老不倦推

獎後進今世知名士多出其門居家見賓客必問時事聞有善喜若己出至有所不可愛見於色或夜不能寐如任其責者凡公所以行

之終身者有能履其一君子以為人之所難而公自謂不足以名後世遺戒子孫無得紀述嗚呼豈所謂任重道遠而為善惟日一無此

字不足者歟曾祖太子少保一作節諱某贈太師祖鴻臚卿諱叔詹追封吳國公父尚書度支員外郎諱遂良追封韓國公皆贈太師中

書令兼尚書令娶相里氏封晉國夫人子男曰誦大理評事詠太常博士訥將作監主簿詒秘書省正字三子早卒女長適集賢校理蘇

舜欽次適祕閣校理李縱次適畢州團練推官張遵道公以嘉祐二年二月五日卒于家其子訴以其年十月十八日葬公于應天府宋

城縣之仁孝原銘曰翼翼祁公率履自躬一其初終惟德之恭公在于位士知貪廉退老

于家四方之瞻豈惟士大夫天子曰咨爾曲爾直繩之墨之正爾方圓有矩有規人莫之踰公無爾欺子左子右惟公是毗公雖告休受寵

不已宮臣國公即命于第奕奕明堂萬邦從祀豈無臣工為子執法

何以召之惟公舊德公不能來子其往錫君子愷悌民之父母公雖百齡人以為少不俾黃耇喪子元老寵祿之隆則有止期惟其不已既去而思銘昭于遠萬世之詒

太常博士尹君墓誌銘并序

君諱源字子漸姓尹氏與其弟洙師魯俱有名於當世其論議文章博學彊記皆有以過人而師魯好辯果於有為子漸為人剛簡不矜

飾能自晦藏與人居久而莫知至其一有所發則人必驚伏其視世事若不干其意已而推其情偽計其成敗後多如其言其性不能容

常人而善與人交久而益篤自天聖明道之間子與其兄弟交其得於子漸者如此其曾祖諱誼贈光祿少卿祖諱文化官至都官郎中

贈刑部侍郎父諱仲宣官至虞部員外郎贈工部郎中子漸初以祖廕補三班借職稍遷左班殿直天聖八年舉進士及第為奉禮郎累

遷太常博士歷知芮城河陽二縣簽署孟州判官事又知新鄭縣通判涇州慶州知懷州以慶曆五年三月十四日卒于官趙元昊寇邊

圍定川堡大將葛懷敏發涇原兵救之君遺懷敏書曰賊舉其一無此字國而來其利不在城堡而兵法有不得而救者且吾軍畏法見

敵必赴而不計利害此其所以數敗也宜駐兵瓦亭見利而後動懷敏不能用其言遂以敗死劉渙知滄州杖一卒不服渙命斬之以聞

一作甸坐專殺降知密州君上書為渙論直得復知滄州范文正公常薦君材可以居館閣召試用遂知懷州至嘉祐月大治是時天子

下事而權倖小人不便三公皆罷去而師魯與時賢士多被誣枉得罪君歎息憂悲發憤以一無此字謂生可厭而死可樂也往往被酒

哀歌泣下朋友皆竊怪之已而以疾卒享年五十至和元年十有二月十三日其子材葬君于一作於河南府壽安縣甘泉鄉龍一作龕

澗里其平生所為文章六十篇皆行於世子男四人曰材植機桴鳴

呼師魯常勞其智於事物而卒蹈憂患以窮死若子漸者曠然不有累其心而無所屈其志然其壽考亦不以不長豈其所謂短長得失者皆非此之謂歟其所以然者不可得而知歟銘曰

有韞于中不以施一憤樂死其如歸豈其志之將衰不然世果可嫉其如斯

太子中舍梅君墓誌銘

故太子中舍致仕梅君諱讓字克讓世爲宣城人常以文學仕進君獨不肯仕其弟詢勉之君曰士之仕也進而取榮祿易欲行其志而無媿於心者難吾豈不欲仕哉居其一無此字官不得行其志食其一無此字祿而有媿於其心者吾不爲也今吾居父母之邦事長老以恭接朋友以信守吾墳墓安吾里閭以老死而無恨此吾志也其弟後貴顯必欲官之君堅不肯乃奏任君大理評事致仕于家有子六人曰堯臣曰正臣曰彥臣曰禹臣曰純臣其一早卒其二子皆仕宦而堯臣有名當世今爲國子博士累以郊祀恩進君爲太子中舍君既老堯臣來歸朱服象笏侍君旁鄉人不榮其子而榮其父堯臣等皆以君年高願留養君不許曰此非吾意也顧其二子曰勉爾朝夕以輔吾老顧其二子曰勉爾名譽以爲吾榮居者養吾體仕者養吾志可也君享年九十有一一作二康彊無恙以皇祐元年正月朔卒于家其子堯臣泣請於其友廬陵歐陽修曰堯臣不肖仕不顯而無聞不足以成吾先人之志退託文字以銘後世又不敢以自私子乃爲之一本上四字作子其爲吾銘之銘曰

志之充樂也一作乎中壽以隆福有終銘無窮耀幽宮

湖州長史蘇君墓誌銘并序

故湖州長史蘇君有賢妻杜氏自君之喪布衣蔬食居數歲提君之孤子斂其平生文章走南京號泣于其父曰吾夫屈於生猶可伸於死其父太子太師以告於予予爲集次其文而序之以著君之大節

與其所以屈伸得失以深誚世之君子當爲國家樂育賢材者一有

惜字且悲君之不幸其妻卜以嘉祐元年十月某日葬君于潤州丹

徒縣義里鄉檀山里石門村又號泣于其父曰吾夫屈於人間猶可

伸於地下於是杜公及君之子泌皆以書來乞銘以葬君諱舜欽字

子美其上世居蜀後徙開封一有府字爲開封人自君之祖諱易簡

以文章有名太宗時承旨翰林爲學士參知政事官至禮部侍郎父

諱者官至工部郎中直集賢院君少以父蔭補太廟齋郎調榮陽尉

非所好也已而鎖其廳去舉進士中第改光祿寺主簿知蒙城縣丁

父憂服除知長垣縣遷大理評事監在京樓店務君狀貌奇偉慷慨

有大志少好古工爲文章所至皆有善政官于京師位雖卑數上疏

論朝廷大事敢道人之所難言范文正公薦君召試得集賢校理自

元昊反兵出無功而天下殆一作怠於久安尤一作而困兵事天子

奮然用三四大臣欲盡革衆弊以紓民於是時范文正公與今當丞

相多所設施而小人不便顧人主方信用思有以撼動未得其根以

君文正公之所薦而宰相杜公堦也乃以事中君坐監進奏院祠神

奏用市故紙錢會客爲自盜除名君各重天下所會客皆一時賢俊

悉坐貶逐然後中君者喜曰吾一舉網盡之矣其後三四大臣一有

相字繼罷去天下事卒不復施爲君携妻子居蘇州買木石作滄浪

亭日益讀書大涵肆於六經而時發其憤悶於歌詩至其所激往往

驚絕又喜行狎一作草書皆可愛故其雖短章醉墨落筆爭爲人所

驚天下之士聞其名而慕見其所傳而喜往揖其貌而竦聽其論而

驚以服久與其居而不能捨以去也居數年復一作一年後得湖州

長史慶曆八年十二月某日以疾卒于蘇州享年四十有一君先娶

鄭氏後娶杜氏三子長曰泌將作監主簿次曰液曰激二女長適前

進士陳紘次尚幼初君得罪時以奏用錢爲盜無敢辨其寃者自君

卒後天子感悟凡所被逐之臣復召用一有今字皆顯列于朝而至

今無復為君言者宜其欲求伸於地下也宜予述其得罪以死之詳而使後世知其有以也既又長言以為之辭庶幾并寫予之所以哀君者其辭曰

謂為無力兮孰擊而去之謂為有力兮胡不反子之歸豈彼能兮一作而此不為善百譽而不進兮一毀終世以顛擠荒執問兮香難知嗟子之中兮有韞而無施文章發耀兮星日光輝雖冥冥以掩恨兮不一作宜昭昭其永垂

翰林侍讀侍講學士王公墓誌銘并序

公諱洙字原叔其生始能言已知為詩指物一有輒字能賦既長學問自六經史記百氏之書至於圖緯陰陽五行律呂星官算法訓故字音一本上四字作方言訓詁兼錄八分無所不學學必通達如其專家其語言初如不出諸口已而辨別條理發其精微聽者忘倦決疑請益人人必得其所欲故自其少也一時名臣賢士皆稱慕之其名聲著天下初舉進士為廬州舒城尉坐事免官歸居南京故相臨淄晏公為留守奇其文章待以客禮久之復調賀州富川主簿未行臨淄公薦其才留居應天府學教諸生會一無此字詔舉經術士為學官京東轉運使舉公應詔召為國子監直講遷大理評事史館檢討知太常禮院天章閣侍講直龍圖閣同判太常寺慶曆中小人有不便大臣執政者欲排去之未知所發而杜丞相子塔蘇舜欽為集賢校理負時名所與交遊皆當世賢豪已而舜欽坐監進奏院祠神會客為御史所彈公以一作預坐客貶知濠州徙知襄陵毫二州范文正公富丞相皆言王某學問經術多識故事宜在朝廷復召為檢討同判太常寺侍講充史館修撰拜知制誥權判吏部流內銓至和元年九月為翰林學士三年以親嫌改侍讀學士兼侍講學士嘉祐二年九月甲戌朔以疾卒享年六十有一累官至尚書吏部郎中階朝散大夫勳輕車都尉爵開國伯食邑五百戶公為人寬厚樂易孝

於宗族信於朋友諸孤不能自立者皆為之嫁娶始舉進士時與郭稹同保人有告稹言一有祖字母禫者法當連坐主司召公問果保稹否不然可易也公言保之不可易也於是與稹俱罷公以文儒進用能因其所學為上開陳其言緩而不迫天子常喜其說意有所欲必以問之無不能對嘗以塗金龍水牋為飛白詞林二字以褒之至於朝廷他有司前言故實皆就以考正既領太常吉凶禮典撰定尤多嘗脩集韻校定史記前後漢書編國朝會要鄉兵制度祖宗故事三朝經武聖略皇祐中大享明堂翰林侍讀學士宋祁言明堂禮廢久必得通知古今之學者詔公共草其儀禮成撰大享明堂記又詔修雅樂晚喜隸書尤有古法著易傳十篇一無此五字其他一作所為文章子有餘篇其施於為政敏而有方襄州中廬戍兵驕前為守者患之不能制公至因事召之悉集于庭告曰某時為某事者非其人邪取其一二一人一無此字實于法餘悉不問一有由是二字兵始知懼是時妖賊反貝州州縣無遠近皆警動佐吏勸公毋給州卒教習者真兵公笑曰是欲防亂乎此所以使人不安也在徐州遭歲大饑免民舟筭緡使得糴旁郡而一有多字出公私米粟賑民所活尤多一作其粟有司上其最一有為京東第一五字降詔書褒美一作獎諭其在朝廷多所論議遇人恂恂惟謹及既歿而考其言皆當世要一作大務公知制誥夏竦卒天子以東宮舊恩賜諡文獻公曰此僖祖皇帝諡也封還其目不為草辭因曰前有司諡王溥為文獻章得象為文獻字雖異而音同皆當改於是太常更諡竦文莊而溥得象皆易諡又嘗論宗戚近幸冒法干恩澤以亂刑賞又言天下民田稅不均而姦民逃亡有司失其常稅請用郭諮孫琳千步開方為均田法領之州縣使因民訟稍稍均之可不擾而有司得復其常數近時選諫官御史有執政之臣嘗薦舉者皆以嫌不用公以謂士飭身勵行而大臣薦賢以報國以嫌廢一作貴之是疑大臣而廢賢材不

可及論河功邊食皆可施行方公病時八月開邇英閣侍臣並進講
讀而公獨病一作不在天子思之遣使者問公疾少間否能起而爲
子諱邪既而公病篤以卒天子震悼賻卹加等贈給事中特賜諡曰
文節以其年十月辛酉瘞于應天府虞一作宋城縣之孟諸鄉土山
原公應天宋城人也曾祖諱厚祖諱化贈大傅父諱礪贈太師中書
令兼尚書令公初娶董氏再娶胡氏皆先公卒又娶齊氏封高陽縣
君子男五人長曰叟臣早卒次曰力臣太常寺太祝次欽臣秘書省
正字次陟臣將作監主簿次會臣某官一無二字一女適太常博士
陳安道銘曰

惟王氏之先遠自三代下迄戰國商周齊魏其後之人皆以王爲氏
故其爲姓尤多於後世而太原之王出周王子公世可考實太原人
後家于宋遂以蕃延惟其皇考是生八子公實其季其德克嗣播其
休聲以顯于仕八支之威名譽材賢公考朝廷儒學之臣退食于家
說說子孫豈其不樂胡奪之年朝無咨詢士失益友送車國門出涕
引首于茲歸藏刻銘不朽

居士集卷第三十一

墓誌七首

尚書戶部侍郎參知政事贈右僕射文安王公墓誌銘并序
 公姓王氏其先太原祁人其六世祖某為唐輝州刺史遭世亂因留
 家陽山陽山近宋其後又徙宋州之虞城今為應天虞城人也公諱
 堯臣字伯庸天聖五年舉進士第一為將作監丞通判湖州召試以
 著作佐郎直集賢院知光州歲大飢羣賊發民倉廩吏法當死公曰
 此飢民求食爾荒政之所恤也乃請以減死論其後遂以著令至今
 用之丁父憂服除為三司度支判官再遷右司諫郭皇后廢居瑤華
 宮有疾上頗哀憐之方后廢時宦者閻文應有力及后疾文應又主
 監醫后且卒議者疑文應有姦謀公請付其事御史考按虛實以釋
 天下之疑事雖不行然自文應用事無敢指言者一有其字後文應
 卒以恣橫斥死后猶在殯有司以歲正月用故事張燈公言郭氏幸
 得蒙厚恩復位號乃天子后也張燈可廢上遽為之罷景祐四年以
 本官知制誥賜服金紫同知通進銀臺司兼門下封駁提舉諸司庫
 務遷翰林學士知審官院元昊反西邊用兵以公為陝西體量安撫
 使公視四路山川險易還言某路宜益兵若干某路賊所不攻某路
 宜急為備至於諸將材能長短盡識之薦其可用者二十餘人後皆
 為名將是時邊兵新敗於好水任福等戰死今韓丞相坐主帥失律
 奪招討副使知秦州范文正公亦以移書元昊不先聞奪招討副使
 知耀州公因言此兩人天下之選也其忠義智勇各動夷狄不宜以
 小故置之且任福由違節度以致敗尤不可深責主將由是忤宰相
 意并其他議多格不行明年賊入涇原戰定川殺大將葛懷敏乃公
 指言為備處由是始以公言為可信而前所格議悉見施行因復遣
 公安撫涇原路公曰陛下復用韓琦范仲淹幸甚然將不中御兵法
 也願許以便宜從事上以為然因言諸路都部署可罷經略副使以

重將權而偏將見招討使以軍禮置德順軍於籠竿城廢涇原等五
 州營田以其地募弓箭手其所更置尤多方公使還行至涇州而德
 勝寨兵迫其將姚貴閉城叛公止道左解裝為勝射城中以招貴且
 發近兵討之初吏白曰公奉使且還歸報天子爾貴叛非公事也公
 曰貴土豪也頗得士心然初非叛者今不乘其未定速招降後必生
 事為朝廷患貴果出降明年四月以學士權三司使自朝廷理元昊
 罪軍興而用益廣前為三司者皆厚賦暴斂甚者借內藏率富人出
 錢下至果菜皆加稅而用益不足公始受命則曰今國與民皆弊矣
 在陛下任臣者如何由是天子一聽公所為公乃推見財利出入盈
 縮曰此本也彼末也計其緩急先後而去其蠹弊之有根穴者斥其
 妄計小利之害大體者然後一為條目使就法度罷副使判官不可
 用者十五人更薦用材目賢者耆年民不加賦而用足明年以其餘
 償內藏所借者數百萬又明年其餘而積於有司者一有又字數千
 萬而所在流庸稍復其業公曰臣之術止於是矣且臣母老願解煩
 劇天子多公功以為翰林學士承旨兼端明殿學士羣牧使初宦者
 張永和方用事請收民房錢十之三以佐國事下三司永和陰遣人
 以利動公公執以為不可度支副使林澹附永和議不已公奏罷澹
 乃止益利夔二路轉運使皆請增民鹽井課歲可為錢十餘萬公亦
 以為不可而權倖因緣多見裁抑京師數為飛語及上之左右往往
 讒其短者上一切不問而公為之亦自若也及公既罷上慰勞之公
 頓首謝曰非臣之能惟陛下信用臣爾丁母憂去職服除復為學士
 羣牧使再遷給事中皇祐三年以本官為樞密副使公持法守正遂
 以身任天下事凡宗室宦官醫師樂工壁習之賤莫不關樞密而濫
 恩俸請隨其事可損損之可絕絕之至其大者則皆著為定令由是
 小人益怨構為飛書以害公公得書自請曰臣恐不能勝眾怨願得
 罷去上愈知公為忠為下令購為書者甚急公益感勵在位六年廢

職修舉皆有條理樞密使狄青以軍功起行伍居大位而士卒多屬目往往造作言語以相扇動人情以爲疑而青色頗自得公嘗以語衆折青爲陳禍福言古將帥起微賤至富貴而不能保首領者可以爲鑒戒青稍沮畏嘉祐元年二月拜戶部侍郎參知政事二年遷吏部侍郎八月二十一日以疾薨于位享年五十有六公在政事論議有所不同必反復切劘至於是而後止不爲獨見在上前所陳天下利害甚多至施行之亦未嘗自名其所設施與在樞密時特異豈政事者丞相府也其體自宜如是邪公爲人純質雖貴顯不忘儉約與其弟純臣相友愛世稱孝悌者言王氏遇人一以誠意無所矯飾善知人多所稱薦士爲時名臣者甚衆有文集五十一卷六十卷將終口授其弟純臣遺奏以宗廟至重儲嗣未立爲憂天子愍然臨其喪輟視朝一日贈左僕射太常諡曰文安曾祖諱化某官一無某官二字下同贈太傅妣戚氏封曹國太夫人祖諱礪某官父諱瀆某官皆贈大師中書令兼尚書令祖妣袁氏鄆一作鄭國太夫人妣仇氏徐國太夫人娶丁氏安康郡夫人子男三人同老大理評事周老太常寺太祝早卒朋老大理評事二女長適校書郎戚師道早卒次未嫁王氏自遷慶城由公會祖而下或葬雙金或葬土山皆在慶城嘉祐四年八月十日改葬公之皇考于宋城縣平臺鄉石落原而以公從葬焉銘曰

王爲邠人遭亂不還六世之祖初留礪山其後再遷慶宋之間遂安其居塋不遠卜宋多名家王實大族族大而振自公顯聞公初奮躬以學以文逢國多事有勞有勤利歸于邦怨不避身帝識其忠謂堪子弼俾副樞機出入惟密遂參政事實有謀謨誰中止之不俾相子帝有褒章賅飾之贈長于百寮考德惟稱維古載功在其廟器今亦有銘幽宮是闕

資政殿大學士尚書左丞贈吏部尚書正肅吳公墓誌銘

嘉祐四年十一月丁未資政殿大學士金紫光祿大夫尚書左丞知河南府兼西京留守司上柱國渤海郡開國公食邑二千八百戶食實封八百戶贈吏部尚書諡曰正肅吳公塋于鄭州新鄭縣崇義鄉朝村之原吳氏世爲建安人自高曾以來皆塋建州之浦城至公始塋其皇考于新鄭公諱育字春卿爲人明敏勁果彊學博辯能自付一作持度不可守不發已發莫能屈奪天聖中與其弟京方俱舉進士試禮部爲第一遂中甲科而京方皆及第當是時吳氏兄弟名聞天下公初以大理評事知臨安諸暨二縣遷本寺丞知襄城縣舉才識兼茂明於體用策入三等遷著作佐郎直集賢院通判蘇州同知太常禮院三司戶部度支二判官知諫院修起居注知制誥判太常大理二寺吏部流內銓史館修撰累遷起居舍人爲翰林學士久之遷禮部郎中以學士知開封府公爲政簡嚴所至民樂其不擾去雖久愈思之初秦悼王塋汝州界中其後子孫當從塋者與其歲時上冢者不絕故宗室宦官常往來爲州縣患公在襄城每裁折一作抑之宗室宦官怒或夜半叩縣門索牛駕車以動之公輒不應及旦徐告曰牛不可得也由是宗室宦官曰此不可爲也凡過其縣者不敢以鷹犬犯民田至他境矣然後敢縱獵其治開封尤先豪猾曰吾何有以及斯人去其爲害者而已居數日發大姦吏一人流于嶺外一府股栗又得巨盜積贓萬九千緡獄具而輒再變衆疑以爲冤天子爲遣他吏按之卒伏法由是京師肅清方元昊叛河西契丹亦乘間墮盟朝廷多故公數言事獻計畫自元昊初遣使上書有不順語朝廷亟命將出師而羣臣爭言塋子即可一作可即誅滅獨公以謂元昊雖名藩臣而實夷狄其服叛荒忽不常宜示以不足責外置之且其已僭名號誇其大勢必不能自削以取羞種落第可因之賜號若國主者且故事也彼得其欲宜不肯妄動然時方銳意於必討故皆以公言爲不然其後師久無功而一無此字元昊亦歸過自新天子

爲除其罪卒以爲夏國主由是議者始悔不用公言而虛弊中國公
在開封數以職事辨爭或有不得則輒請引去天子惜之慶曆五年
正月以爲諫議大夫樞密副使二月拜參知政事與賈丞相爭事上
前上之左右與殿中人皆恐色變公論辯不已既而曰臣所爭者職
也顧力不能勝矣願罷臣職不敢爭上顧一作多公直乃復以爲樞
密副使居歲餘大旱賈丞相罷去御史中丞高若訥用洪範言大臣
廷爭爲不肅故雨不時若因并罷公以給事中知許州又知蔡州州
故多盜公按令爲民立伍保而簡其法民便安之盜賊爲息京師有
告妖賊千人聚確山者上遣中貴人馳至蔡以名捕者十人使者欲
得兵自往取之公曰使者欲藉兵立威欲得妖人以還報也使者曰
欲得妖人爾公曰吾在此雖不敏然聚千人于境內安得不知使信
有之今以兵往是趣其爲亂也此不過鄉人相聚爲佛事以利錢財
爾一弓手召之可致也乃館使者日與之飲酒而密遣人召十人者
皆至送京師告者果伏辜拜資政殿學士徙知河南府兼西京留守
司又徙陝府還禮部侍郎徙承興軍丁父憂去官起復懇請終喪服
除加拜翰林侍讀學士且召之公辭以疾上惻然遣使者存問賜以
名藥遂以知汝州居久之又辭以疾卽以爲集賢院學士判西京留
守司御史臺疾少間一作愈復知陝府加拜資政殿大學士自公罷
去上數爲大臣言吳某剛正可用每召之輒以疾不至於是召還始
侍講禁中判通進銀臺司尙書都省明年拜宣徽南院使鄜延路經
略安撫使判延州龐丞相經略河東與夏人爭麟州界亟築柵於白
草公以謂約不先定而亟城必生事遽以利害牒河東移書龐公且
奏疏論之一有朝廷二字皆不報已而夏人果犯邊殺驍將郭恩而
龐丞相與其將校十數人皆以此得罪麟府遂警既而公復以疾辭
不任邊事且求解宣徽使乃復以爲資政殿大學士尙書左丞知河
中府遂徙河南公前在河南踰月而去河南人思之聞其復來皆驩

呼逆于路惟恐後其卒也皆聚哭公享年五十有五以嘉祐三年四
月十五日一作乙卯卒于位一有以開二字詔輟朝一日會祖諱進
忠贈大師妣陳氏吳國太夫人祖諱諒贈中書令妣葛氏越國太夫
人父諱待問官至禮部侍郎贈太保妣李氏楚國太夫人娶王氏太
原郡夫人子男十人安度安矩安素皆太常寺太祝安常大理評事
安正安本安序皆祕書省正字安厚太常寺奉禮郎安憲安節未仕
女三人長適集賢校理韓宗彥次適著作佐郎龐元英皆早卒次適
光祿寺丞任逸公在二府時太保公以列卿奉朝請父子在廷士大
夫以爲榮而公踈踏不安自言子班父前非所以示人以法顧不敢
以人子私亂朝廷之制願得罷去不聽天子數推恩羣臣子弟公每
先及宗族疎遠者至公之卒子孫未官者七人有文集五十卷尤長
於論議銘曰

顯允吳公有家于闐自我皇考卜茲新原厚壤深泉樂其寬閑今公
其從公志之安公昔尙少一作少時始來京師挾其二季名發聲馳
乃賜之策以承帝問語驚于一作天廷有偉其論乃登侍從乃任大
臣出入險夷周旋屈伸公所策事先其利害初有不從後無不悔公
於臨政簡以便人人失一作去而思愈久彌新帝曰廷臣汝剛而直
來汝子用斷余不惑公曰臣愚負薪之憂帝爲咨嗟公其少休優以
本邦寵其秩祿尙冀公來公卒不復史臣考德作銘幽宅

鎮潼軍節度觀察留後李公墓誌銘

嘉祐五年八月某日鎮潼軍節度觀察留後知潼州軍州事隴西李
公得暴疾薨于州之正寢其以疾聞也上方宴禁中爲止樂命中貴
人馳國醫往視未及行而以薨聞詔輟視朝一日賜其家黃金三百
兩贈公感德軍節度使已而又贈兼侍中太常諡曰某卽以其年某
月某日塋于開封府開封縣襄親鄉先塋之次公諱端懿字元伯開
封人也右千牛衛將軍贈太師尙書令兼中書令隴西元靖王諱崇

矩之曾孫連州刺史贈太師諱繼昌之孫鎮國軍節度使駙馬都尉贈尚書令兼中書令許和文公諱遵昂之子母曰齊國獻穆大長公主太宗之女真宗之妹今天子之姑屬親而尊禮秩崇顯其淑德美問彰于內外而和文公好學不倦折節下士喜交各公卿一時翕然號稱賢尉故李氏之威受寵二朝而天下之士不侈其榮而樂道其德公爲冢子於其家法習見安行不待教告少篤學問長而孝友喜爲詩工書畫至於陰陽醫術星經地理無所不通七歲爲如京副使歷文思副使供備庫使洛苑使新州刺史康懷二州團練使濟州防禦使坐知冀州失捕妖人降授單州團練使知均州未行改滑州兵馬鈐轄居歲中遷汝州防禦使蔡州觀察使天子祀明堂推恩徙華州觀察使獻穆大長公主薨起復爲鎮國軍節度觀察留後公泣血辭讓願終喪制上不許其讓許其終喪給以全俸服除拜鎮潼軍節度觀察留後累階金紫光祿大夫勳上柱國爵開國公食邑四千四百戶實封九百戶公爲兒時上在東宮真宗命公侍研席上尤親愛嘗解方玉帶賜之稍長出入宮禁禮如家人雖燕見語不及私數爲上陳朝廷闕失開說古今治亂多所補益退而未嘗言公既薨得其遺藁之未上者言宗室事甚詳其餘不傳公少自勉勵見士大夫有失節廢義者輒歎曰士起寒苦以學行自名至牽利欲遂亡其所守况驕佚易習而生長富貴間邪故常惕然痛自刮磨思立名節聞一善士傾身下之而賢士大夫亦樂與之遊以此多得名譽方大長公主在時數欲求外官以自効不可得久之出知冀州爲政循法度檢身束下民以不擾歲滿召還初在冀捕妖人李校校窮自經死驗得實矣後貝州妖賊王則閉城叛聲言校在以感衆公坐貶官已而則誅城開無李校者乃還公防禦使又知鄆州安撫京東之西路是歲京東水災民飢流亡公爲治室廬發倉廩而流人至者如歸咸賴以全活置弓手馬教其馬鬪皆如精兵治汶陽堤百餘里鄆人遂無水

患又知澶州發軍吏之姦者去之流其尤者於遠方然後明軍籍均其勞逸軍中稱平而畏其法始下令捕盜有登隣屋取一杓者逮寘之法以徇於市曰是固足以信吾令由是盜賊屏息公雖以公主子自少居京師常領職事其在三班院尤爲稱職三班掌諸使臣功過黜陟而主者皆顯官自重或貴家子食俸廩而已吏得因依爲姦而職廢久不省至公始躬治簿書考覈虛實賞罰必當後人多遵用其法及出爲三州又皆有治狀故雖享年不永不究其所施而士君子皆知其非安於富貴者也及聞其喪也莫不痛惜焉公自爲鎮潼留後十年不遷上以其久也以爲寧遠軍節度使公懇辭不拜及其薨也遂贈感德軍節度使公享年四十有八娶郭氏封仁壽郡君先公九年卒贈太原郡夫人西京左藏庫使昌州團練使中和之女子男五人長曰詵供備庫副使次曰諲曰詢皆右侍禁次曰諄曰詵尚幼女四人長適皇姪右屯衛大將軍吉州團練使建安郡公宗保早卒次適秘書丞夏倚次適皇姪左領軍衛大將軍宗景次適皇姪孫右監門衛將軍世逸公平生嘗語其子弟曰吾蒙國厚恩未有以報吾且死宜有遺言毋因以求恩澤及其薨也其家如其言銘曰

允矣和文惟時顯人蔚有士譽匪矜帝姻賚其子孫列爵啓國惟公承之克似其德士起寒家驕于滿盈紛其利欲敗節墮名公生感族赫奕高明都尉之子天子之甥惟謹惟恭其色不懈聞善如貪在得思戒聞亦寔見忠言告猷學而從政有惠二州享其多美獨不遐年高旌巨節以賁于泉島又贈之金璫附蟬籠渥名榮一作榮名惟有其實刻詩同藏其固其密

居士集卷第三十二

墓誌四首

尚書工部郎中充天章閣待制許公墓誌銘并序

公諱元字子春姓許氏宣州宣城人也許氏世以孝謹稱鄉里其父
 亡一子當官兄弟相讓久之曰吾弟材後必庇吾宗乃以公補郊社
 齋郎徙居海陵力耕以養其母調明州定海劍州順昌縣尉泰州軍
 事推官戍兵千人自海上亡歸州守聞變不知所為公為詰其所以
 來二三人出前對公叱左右執之曰惑衆者此爾其餘何罪勞其徒
 而遣之遷鎮東軍節度推官知潤州丹陽縣縣有練湖決水一寸為
 漕渠一尺故法盜決湖者罪比殺人會歲大旱公請借湖水溉民田
 不待報決之州守遣吏按問公曰便民罪令可也竟不能詰由是溉
 民田萬餘頃歲乃大豐再遷太子中舍監揚州博鹽和糴倉知泰州
 如臯縣所至民愛思之公為吏喜修廢壞其術長於治財自元昊叛
 河西兵出久無功而天下勞弊三司使言公材以主權貨公言先時
 賈人入粟塞下京師錢不足以償故錢償愈不足則粟入愈少而價
 愈高是謂內外俱困請高粟之價下南鹽以償之使東南去滯積
 而西北之粟盈曰此輕重之術也行之果便是時京師粟少而江淮
 歲漕不給三司使懼大臣以為憂參知政事范仲淹謂公獨可辦乃
 以公為江淮兩浙荆湖發運判官公曰以六路七十二州之粟不能
 足京師者吾不信也至則治千艘浮江而上所過州縣留二月食其
 餘悉發而州縣之廩遠近以次相補由是不數月京師足食既而歎
 曰此可為於乏時然歲漕不給者有司之職廢也乃考故事明約信
 令發歛轉徙至於風波遠近遲速賞罰皆有法凡江湖數千里外談
 笑治之不擾不勞而用以足公初以殿中丞為判官已而為副為使
 每歲終會計來朝天子必加恩禮特賜進士出身官至工部郎中天
 章閣待制凡在職十有三年已而曰臣憊矣願乞臣一州天子顧代

公者難其人其請至八九久之察其實病且老矣乃以知揚州居歲
 餘徙知越州公益病又徙泰州至州未視事以嘉祐二年四月某日
 卒于家享年六十有九曾祖諱稠池州錄事參軍祖諱規贈大理評
 事父諱遜尚書司封員外郎贈工部侍郎公娶馮氏封崇德縣君先
 公卒子男二人長曰宗旦真州楊子縣主簿次曰宗孟守將作監主
 簿女一人適大常寺太祝滕希雅先是江淮歲漕京師者常六百萬
 石其後十餘歲歲益不充至公為之歲必六百萬而常餘百萬以備
 非常方其去職有勸公進為羨餘者公曰吾豈聚斂者哉敢用此以
 希寵公為人善談論與人交久而益篤於其家尤孝悌所得俸祿分
 給宗族無親疎之異其孤宗旦等以某年某月某日葬公於真州楊
 子縣甘露鄉之某原其所與遊廬陵歐陽修誌於其墓曰嗚呼為天
 下者固常養材於無事之時蓋必有事然後材臣出自寶元慶曆以
 來兵動一方奔走從事於其間者皆號稱天下豪傑其智者出謀材
 者獻力訖不得少如其志而公遭此時用其所長且久於其官改得
 卒就其業而成此名此其可以書矣乃為之銘曰

材難矣有蘊而不得其時時逢矣有用而不盡其施功難成而易毀
 雖明哲或不能以自知公材之敏兮用適其宜志方甚壯兮力則先
 衰行著于家而勞施于國永幽其闕兮銘以哀之

墓誌銘

尚書刑部郎中充天章閣待制兼侍讀贈右諫議大夫孫公
 公諱甫字之翰許州陽翟人也初舉進士天聖五年得同學究出身
 為蔡州汝陽縣主簿八年再舉進士及第為一無此字華州觀察推
 官轉運使李紘薦其材遷大理寺丞知絳州翼城縣故丞相杜祁公
 與紘皆以清節自高尤難於取士聞公紘所薦也數招致之一見大
 喜已而祁公自御史中丞拜樞密直學士知永興軍辟公同錄凡事
 之繁猥者一以委之公歎曰待我以此可以去矣祁公為謝顧事非

他更不能者不敢煩公公乃從容爲陳當世之務所以緩急先後施設之宜又多薦士之賢而在下者於是祁公自以爲得益友歲滿知彭州永昌縣監益州文子務再遷太常博士祁公爲樞密副使薦于朝得祕閣校理是時諸將兵討靈夏久無功天下騷動盜賊數入州縣殺吏卒更多失職而民斃矣天子方銳意更用二三大臣乃極選一時知名士增置諫員使補闕失公以右正言居諫院上好納諫諍未嘗罪言者而至言宮禁事他人猶須委曲開諷而公獨曰所謂后者正嫡也其餘皆猶婢爾貴賤有等用物不宜過僭自古寵女色初不制而後不能制者其禍不可悔上曰用物在有司吾恨不知爾公曰世謂諫臣耳目官所以達不知也若所謂前世女禍者載在書史陛下可自知也上深嘉納之保州兵變前有告者大臣不時發之公因力言樞密使副當得罪使乃杜祁公也邊將劉滬城水洛于渭州部署尹洙以滬違節度將誅之大臣稍主洙議公以謂水洛通秦渭於國家利滬不可罪由是罷洙而釋滬洙公平生所善者也公在諫院所言補益尤多是三者其一人所難言其二人所難處者其後言宰相以某事當去者上亟爲罷之因以陳執中爲參知政事公又言執中不可用由是上難之公遂求解職於是小人不便大臣執政而朋黨之論起二三公相繼去位公亦在論中而辨諍愈切不自疑由是罷諫職以右司諫知鄧州徙知安州歷江南兩浙轉運使再遷兵部員外郎改直史館知陝府又徙晉州河東轉運使公素羸性淡然寡所好欲恂恂似不能言而內勁果遇事精明議者謂公道德文學宜在朝廷備顧問而錢穀刀筆非其職然公處之益辨至臨疑獄滯訟常立得其情大賊張海郭貌山攻劫商鄧新破南陽順陽公安輯有方常曰教民知戰古法也乃親閱縣弓手教之擊射坐作皆爲精兵盜賊爲息陝當東西衝吏苦廚傳而前爲守者顧毀譽不能有所損至公痛裁節之過客畏其清初無所望而亦莫之毀也陝人賴以

紓後遂以爲法其爲轉運使所至州縣視其職事修廢察其民樂否以此升黜官吏而不納毀譽遇下雖嚴而不害其在兩浙范文正公守杭州以大臣或便宜行事公曰范公貴臣也吾屈於此則不得伸於彼矣由是一切繩以法而常以監司自處范公遇公無倦色及退而不能無恨公遇范公不少下然退而未嘗不稱其賢也自河東召爲度支副使勤其職不以爲勞已而得疾嘉祐元年遷刑部郎中文章閣待制河北都轉運使不行疾少間乃留侍讀公博學彊記尤喜言唐事能詳其君臣行事本末以推見當時治亂每爲人說如其身履其間而聽者曉然如目見故學者以謂終歲讀史不如一日聞公論也所著唐史記七十五卷論議宏贍書未及成以嘉祐二年正月戊戌卒于家享年六十公既卒詔取其書藏于祕府贈右諫議大夫又有文集七卷公喜接士務揚人善所得俸廩多所施與撫諸孤兒教育如己子曾祖諱恕博州堂邑主簿祖諱賁尙書庫部員外郎考諱從革不仕以公貴累贈都官郎中母曰長安縣太君李氏娶程氏壽昌縣君子三人長曰宜滑州節度推官次曰寔曰寔皆將作監主簿女三人一適將作監主簿程著餘皆早亡以五年七月丁酉塋公于陽翟縣舊學鄉塢頭村之北原銘曰

梅聖俞墓誌銘并序

惟學而知方以行其義惟簡而無欲以遂其剛力雖弱兮志則彊積之厚兮發也光宜壽兮奄以藏有深其泉兮有崇其岡永安其固兮百世無傷

嘉祐五年京師大疫四月乙亥聖俞得疾臥城東汧陽坊明日朝之賢士大夫往問疾者騶呼屬路不絕城東之人市者廢行者不得往來咸驚顧相語一作謂曰茲坊所居大人誰邪一作茲坊大人誰也何致客之多也居八日癸未聖俞卒於是賢士大夫又走弔二字一作共哭如前日益多而其尤親且舊者相與聚而謀其後事自丞相

以下皆有以聘卹其家學六月甲申其孤一作子增一無此字載其
樞南歸以明年正月丁丑葬于某所一作宣州陽城鎮雙歸山聖俞
字也其名堯臣姓梅氏宣州宣城人也一作姓梅氏名堯臣宣州人
也自一無此字其家世頗一有皆字能詩而從一作叔父詢以仕顯
至聖俞遂以詩聞自武夫貴戚童兒一作兒童野叟皆能道其名字
雖妄愚人不能知詩義者直曰此世所貴也吾能得之用以自矜故
求者日踵門而聖俞詩遂行天下其初喜爲清麗閒肆平淡久則涵
演深遠間亦琢刻以出怪巧然氣完力餘益老以堅其應於人者多
故辭非一體至於他文章皆可喜非如唐諸子號詩人者僻固而狹
陋也聖俞爲人仁厚樂易未嘗忤於物至其窮愁感憤有所罵讎笑
謔一發一有之字於詩然用以爲驪而不怨懟可謂君子者也初在
河南一有時字王文康公見其文數曰二百年無此作矣其後大臣
屢薦宜在館閣嘗一召試賜進士出身餘輒不報嘉祐元年翰林學
士趙概等十餘人列言于朝曰梅某經行修明願得留與國子諸生
講論道德作爲雅頌一作風雅以誦詠聖化乃得國子監直講三年
冬袷于太廟御史中丞韓絳言天子且親祠當更制樂章以薦祖考
惟梅某爲宜亦不報聖俞初以從父蔭補太廟齋郎歷桐城河南河
陽三縣主簿以德興縣令知建德縣又知襄城縣監湖州鹽稅簽署
忠武鎮安兩軍節度判官監丞濟倉國子監直講累官至尙書都官
員外郎嘗奏其所撰唐載二十六卷多補正舊史闕繆乃命編修唐
書書成未奏而卒享年五十有九曾祖諱遠祖諱說皆不仕父諱讓
太子中舍致仕贈職方郎中母曰仙遊縣太君東氏又曰清河縣太
君張氏初娶謝氏封南陽縣君再娶刁氏封某一作平恩縣君子男
五人曰增曰堉曰坳曰龜兒一早卒女二人長適太廟齋郎薛通次
尙幼聖俞學長於毛氏詩爲小傳二十卷其文集四十卷注孫子十
三篇余嘗論其詩曰世謂詩人少達而多窮蓋非詩能窮人殆窮者

而後工也聖俞以爲知言銘曰

不戚其窮不困其鳴不躓于艱不履于傾養其和平以發厥聲震越
渾鐘衆聽以驚其清以播其英以成其名以告諸冥

江鄰幾墓誌銘

君諱休復字鄰幾其爲人外若簡曠而內行修飭不妄動於利欲其
疆學博覽無所不通而一無此字不以矜人至有問輒應雖好辯者
不能窮也已則默若不能言者其爲文章淳雅尤長於詩淡泊閒遠
往往造人之不至善隸書喜琴奕飲酒與人交久而益篤孝於宗族
事孀姑如母天聖中與尹師魯蘇子美遊知名當時舉進士及第調
藍山尉騎驢赴官每據鞍讀書至迷失道家家人求得之乃覺歷信潞
二州司法參軍又舉書判拔萃改大理寺丞知長葛縣事通判閩州
以母喪去職服除知天長縣事遷殿中丞又以父憂終喪獻其所著
書召試充集賢校理判尙書刑部當慶曆時小人不便大臣執政者
欲累以事去之君友蘇子美杜丞相壻也以祠神會飲得罪一時知
各士皆被逐君坐落職監蔡州商稅久之知奉符縣事改太常博士
通判睦州徙廬州復得集賢校理判吏部南漕登聞檢一作鼓院爲
羣牧判官出知同州提點陝西路刑獄入判三司鹽鐵局院修起居
注累遷刑部郎中君於治人則曰爲政所以安民也無擾之而已故
所至民樂其簡易至辨疑折獄則或權以術舉無不得而不常用亦
不自以爲能也君所著書號唐宜鑒十五卷春秋世論三十卷文集
二十卷又作神告一篇言皇嗣事以謂皇嗣國大事也臣子以爲嫌
而難言或言而不見納故假神告祖宗之意務爲深切冀以感悟又
嘗言昭憲太后杜氏子孫宜錄用故翰林學士劉筠無後而官沒其
貲宜爲立後還其貲劉氏一有因字得不絕君之論議頗多凡與其
遊者莫不稱其賢而在上位者久未之用也自其修起居注士大夫
始相慶以爲在上者知將用之矣而用君者亦方自以爲得而君亡

矣嗚呼豈非其命哉君以嘉祐五年四月乙亥以疾終于京師卽以其年六月庚申塋于某所一作陽夏鄉之原君享年五十有六方其亡恙時爲理一作治命數百言已而疾且革其子問所欲言曰吾已著之矣遂不復言曾祖諱濬殿中丞贈駕部員外郎妣李氏始一作隆平縣太君祖諱曰新駕部員外郎贈太僕少卿妣孫氏富陽縣太君考諱中古太常博士贈工部侍郎妣張氏仁壽縣太君夫人夏侯氏永安縣君金部郎中或之女先君數月卒子男三人長曰懋簡并州司戶參軍次曰懋相太廟齋郎次曰懋迪女三人長適祕書丞錢袞餘尙幼君姓江氏開封陳留人也自漢轅陽侯德居於陳留之圍城其後子孫分散一作居而君世至今居圍城不去自高祖而上七世塋圍南夏岡由大王父而下三世乃塋陽夏銘曰

彼馳而我後彼取而我不豈用力者好先而知命者不苟嗟吾鄰幾兮卒以不偶舉世之隨兮君子之守衆人所亡兮君子之有其失一世兮其存不朽惟其自以爲得兮吾將誰咎

居士集卷第三十三

居士集卷第三十四 集三十四

墓誌五首

尚書駕部員外郎致仕薛君墓誌銘并序

尚書駕部員外郎致仕薛君諱長孺字元卿絳州正平人也贈太傅諱溫瑜之曾孫殿中丞贈太師諱化光之孫右班殿直贈左驍衛大將軍諱睦之子尚書戶部侍郎贈司空簡肅公兄之子薛為絳大族簡肅公為時名臣君為薛氏良子弟少用簡肅公蔭補郊社齋郎將作監主簿太常寺太祝大理評事衛尉大理寺丞太子右一作左贊善大夫殿中丞國子博士尚書虞部比部駕部二員外郎歷知趙州臨城縣通判漢湖滑三州知彭州坐斷獄降監陽武縣稅會簡肅公夫人薨葬于絳州即起君知州事以辦葬歲滿通判成都府未行遂以疾致仕居于許州之鄆城嘉祐六年七月丙午以卒享年六十有一君在漢州州兵數百殺其軍校燒營以為亂君挺身徒步自壞垣入其營中以禍福語亂卒曰叛者立左脅從者立右於是數百人者皆趨立於右獨叛者十三人亡去州遂無事明年蜀大饑今韓丞相安撫兩川獨漢人不甚殍賜詔書獎諭其在絳也曰絳吾鄉里也長老乃吾父師子弟猶吾子弟也為立學置學官以教之為政有惠愛絳人大悅君為人謹默淳實平居似不能言而其臨事如此先娶李氏早亡後娶董氏封范陽縣君子男二人長曰延永興軍醴泉縣主簿次曰通蔡州司戶參軍孫男曰震孫女三人以治平三年二月乙酉葬于絳州正平縣清原一作源鄉周村原將葬其女弟之夫歐陽修為之銘曰

維聖有言兮仁勇而壽壽胡不多兮勇則信有為政州兮稱于長老匱車來歸兮鄉人奔走遺思在人兮刻銘不朽

國子博士薛君墓誌銘并序

君諱良孺字得之姓薛氏絳州正平人也少孤育於其叔父是為簡

肅公以公蔭為將作監主簿太常寺奉禮郎大理評事將作監丞大理寺丞遷太子右贊善大夫殿中丞嘗知秦州清水縣縣雜蕃夷君為簡其政令示之以信蕃夷畏愛歲滿罷去人甚思之其後發書通利軍判官公事與其軍守爭事坐停官久之復為殿中丞遷國子博士監陳州清酒務嘉祐八年二月甲午以疾卒于官舍享年四十有六宋興百年薛姓五顯而簡肅公以清德直節聞故其家法嚴而子弟多賢材君為人開爽明秀幼為簡肅公所愛若己一作過其子長工書作歌詩嘗一舉進士不中以蔭補例監庫務無所施其能一為

民政遂有聲平居喜飲酒談笑與其親戚朋友驩然未嘗有怨惡其在通利與其軍守所爭皆公事既廢無懟色至卒窮以死豁如也嗚呼可哀也已曾祖贈太傅諱溫瑜祖贈太師諱化光父右班殿直贈左驍衛大將軍諱睦君娶張氏故樞密直學士逸之女封仁壽縣君先君二歲而卒子男一人曰遜女二人長適大理評事王正甫次適太常寺太祝王端甫次尚幼治平三年二月乙酉其孤遜舉其喪合葬于絳州正平縣清原一作源鄉周村原將葬廬陵歐陽修曰余薛氏壻也與君遊而賢其人宜有以哀之乃為之銘曰

維古才子兮出于名族嗟吾得之兮既哲而淑有能不施兮不遐以趣卒困于艱兮泰乎自足絳水深長兮山岡起伏利我後人兮安于吉卜

徂徠石先生墓誌銘并序

徂徠先生姓石氏名介字守道兗州奉符人也徂徠魯東山而先生非隱者也其仕嘗位於朝矣魯之人不稱其官而稱其德以為徂徠魯之望先生魯人之所尊故因其所居山以配其有德之稱曰徂徠先生者魯人之志也先生貌厚而氣完學篤而志大雖在畎畝不忘天下之憂以謂時無不可為為之無不至不在其位則行其言吾言用功利施於天下不必出乎己吾言不用雖獲禍咎至死而不悔其

歐陽文忠全集 卷三十四

一八一

遇事發憤作爲文章極陳古今治亂成敗以指切當世賢愚善惡是是非非無所諱忌一作忌諱世俗頗駭其言由是謗議喧然而小人尤嫉惡之相與出力必一有欲字擠之死先生安然不惑不變曰吾道固如是吾勇過孟軻矣不幸遇疾以卒既卒而姦人有欲以奇禍中傷大臣者猶指先生以起事謂其詐死而北走契丹矣請發棺以驗賴天子仁聖察其誣得不發棺而保全其妻子先生世爲農家父諱丙始以仕進官至太常博士先生年二十六舉進士甲科爲鄆州觀察推官南京留守推官御史臺評主簿未至以上書論赦罷不召秩滿遷某軍節度掌書記代其父官于蜀爲嘉州軍事判官丁內外艱去官垢面跣足躬耕徂徠之下塋其五世未塋者七十喪服除召入國子監直講是時兵討元昊久無功海內重困天子奮然思欲振起威德而進退二三大臣增置諫官御史以求治之意甚銳先生躍然喜曰此盛事也雅頌吾職其可已乎乃作慶曆聖德詩以褒貶大臣分別邪正累數百言詩出太山孫明復曰子禍始於此矣明復先生之師友也其後所謂姦人作奇禍者乃詩之所斥也先生自閑居徂徠後官于南京常以經術教授及在太學益以師道自居門人弟子從之者甚衆太學之興自先生始其所謂文章曰某集者若干卷曰某集者若干卷其斥佛老時文則有怪說中國論曰去此三者然後可以有爲其戒姦臣宦女則有唐鑑曰吾非爲一世監也其餘喜怒哀樂必見於文其辭博辯雄偉而憂思深遠其爲言曰學者學爲仁義也一有仁急於利物義果於有爲十字惟忠能忘其身信篤於自信者乃可以力行也以是行於己亦以是教於人所謂堯舜禹湯文武周公孔子孟軻楊雄韓愈氏者未嘗一日不誦於口思與天下之士皆爲周孔之徒以致其君爲堯舜之君民爲堯舜之民亦未嘗一日少志于心至其違世驚衆人或笑之則曰吾非狂癡者也是以君子察其行而信其言推其用心而哀其志先生直講歲餘杜祁

公薦之天子拜太子中允今丞相韓公又薦之乃直集賢院又歲餘始去太學通判濮州方待次于徂徠以慶曆五年七月某日卒于家享年四十有一友人廬陵歐陽修哭之以詩以謂待彼謗焰熄然後先生之道明矣先生既沒妻子凍一作寒餒不自勝今丞相韓公與河陽富公分俸買田以活之後二十一無此字年其家始克塋先生于某所將塋其子師訥與其門人姜潛杜軾徐道等來告曰謗焰熄矣可以發先生之光矣敢請銘某曰吾詩不云乎子道自能久也何必吾銘道等曰雖然魯人之欲也乃爲之銘曰

徂徠之巖巖與子之德兮魯人之所瞻汶水之湯湯與子之道兮逾一作愈遠而彌長道之難行兮孔孟一有亦云二字遠遑一世之屯兮萬世之光曰吾不有命兮安在夫桓魋與臧倉自古聖賢皆然兮噫子雖毀其何傷

故霸州文安縣主簿蘇君一作趙郡蘇明允墓誌銘并序

有蜀君子曰蘇君諱洵字明允眉州眉山人也君之行義修於家信於鄉里聞於蜀之人一無此二字久矣當至和嘉祐之間與其二子軾轍偕至京師翰林學士歐陽修得其所著書二十二篇獻諸朝書既出而公卿士大夫爭傳之其二子舉進士皆在高等亦以文學稱于世眉山在西南數千里外一日父子隱然各動京師而蘇氏文章遂擅天下君之文博辯宏偉讀者悚然想見其人既見而温温似不能言及卽之與居愈久而愈可愛聞而出其所有愈叩而愈無窮嗚呼可謂純明篤實之君子也會祖諱祐祖諱某父諱序贈尚書職方員外郎三世皆不顯職方君三子曰澹曰渙皆以文學舉進士而君少獨不喜學年已壯猶不知書職方君縱而不問鄉閭親族皆怪之或問其故職方君笑而不答君亦自如也年二十七始大發憤謝其素所往來少年閉戶讀書爲文辭歲餘舉進士再不中又舉茂材異等不中退而歎曰此不足爲吾學也悉取所爲文數百篇焚之益閉

戶讀書絕筆不爲文辭者五六年乃大究六經百家之說以考質古
今治亂成敗聖賢窮達出處之際得其粹精一作精粹涵畜充溢抑
而不發久之慨然曰可矣由是下筆頃刻數千言其縱橫上下出入
馳驟必造於深微而後止蓋其稟也厚故發之遲志也愨故得之精
自來京師一時後生學者皆尊其賢學其文以爲師法以其父子俱
知名故號老蘇以別之初修爲上其書召試紫微閣辭不至遂除試
秘書省校書郎會太常修纂建隆以來禮書乃以爲霸州文安縣主
簿使食其祿與陳州項城縣一無此字令姚闢同修禮書爲太常因
革禮一百卷書成方奏未報而君以疾卒實治平三年四月戊申也
享年五十有八天子聞而哀之特贈光祿寺丞勅有司具舟載其喪
歸于蜀君娶程氏大理寺丞文應之女生三子曰景先早卒軾今爲
殿中丞直史館轍權大名府推官二女皆早卒孫曰邁曰遲有文集
二十卷證法三卷君善與人交急人患難死則卹養其孤鄉人多德
之蓋晚而好易曰易之道深矣汨而不明者諸儒以附會之說亂之
也去之則聖人之旨見矣作易傳未成而卒治平四年十月壬申塋
于彭山之安鎮鄉可龍里君生於遠方而學又晚成常歎曰知我者
惟吾父與歐陽公也然則非余誰宜銘銘曰

蘇顯唐世寶樂城人以宦留眉蕃蕃子孫自其高曾鄉里稱仁偉歎
明允大發於文亦既有文而又有子其存不朽其嗣彌昌嗚呼明允
可謂不亡

贈太子太傅胡公墓誌

太子少師致仕贈太子太傅胡公諱宿字武平其先豫章人也後徙
常州之晉陵世有隱德爲晉陵著姓公舉進士中天聖二年乙科爲
真州楊子尉縣大水漂溺居民令不能救公曰拯溺吾職也即率公
私舟活數千人歲滿調廬州合淝主簿張丞相士遜稱其文行薦諸
朝召試學士院爲館閣校勘與修北史改集賢校理通判宣州三遷

太常博士判吏部南曹賜緋衣銀魚一有出字知湖州爲政有惠愛
築石塘百里捍水患大興學校學者感於東南自湖學始公丁母夫
人憂去而州人思之各其塘曰胡公塘學者爲公立生祠于學中至
今祠之公居喪毀瘠過禮三年不居于內服除爲三司鹽鐵判官轉
尚書祠部員外郎判度支部院知蘇州兩浙路轉運使召遷修起居
注以本官知制誥兼勾當三班院已而兼判吏部流內銓入內都知
楊懷敏坐衛士夜盜入禁中驚乘輿斥出爲和州都監懷敏用事久
勢動中外未幾召復故職公封還辭頭不草制論曰衛士之變蹤跡
連懷敏得不窮治誅死幸矣豈宜復在左右其命遂止久之拜公翰
林侍讀學士遷翰林學士兼史館修撰判館事兼端明殿學士累遷
尚書左司郎中兼知通進銀臺司審刑院羣牧使提舉在京諸司庫
務醴泉宮判尚書禮部遂判都省再知禮部貢舉奉使契丹館伴北
朝人使亦皆再而虜人嚴憚之公爲人清儉謹默內剛外和羣居笑
語謹謹獨正容色温温不動聲氣與人言必思而後對故其涖官臨
事慎重不輒發發亦不可回止而其趣要歸於仁厚朝議在官年七
十而不致仕者有司以時按籍舉行公以謂養廉取厚風俗宜有漸
而欲一切以吏議從事殆非所以優老勸功之意當少緩其事一作
法使人得自言而全其美節朝廷嘉其言是至今行之皇祐新樂成
議者多異論有詔新樂用於常祀朝會而郊廟仍用舊樂公言書稱
同律而今舊樂高新樂下相去一律難並一作並用而新樂未施於
郊廟先用之朝會非先王薦上帝配祖考之意皆不可一作遂不行
近制禮部四歲一貢士議者患之請更爲間歲議已定公獨以爲不
然曰使士子廢業而奔走無寧歲不如復用三歲之制也衆皆以公
言爲非行之數年士子果以爲不便而卒用三歲之制仁宗久未有
皇子羣臣多以皇嗣爲言未省公以學士當作青辭禱詞一作祠于
山川卽建言儲位久虛非所以居安而慮危願擇宗室之賢者立之

以慰安天下之心語甚切至公學問該博兼通陰陽五行天人一作
災異之說南京鴻慶宮災公以謂南京聖宋所以受命建號而大
火主於商邱國家乘火德而王者也今不領於祠官而比年數災宜
修火祀事下太常歲以長吏奉祠商邱自公始慶曆六年夏河北河
東京東同時地震而登萊尤甚公以歲推之曰明年丁亥歲之刑德
皆在北宮陰生於子而極於亥然陰猶彊而未即伏陽猶微而未即
勝此所以震也是謂龍戰之會而其位在乾今西北二虜中國之陰
也宜爲之備不然必有內盜起於河朔明年王則以貝州叛公又以
爲登萊視京師爲東北隅乃一作易良少陽之位也今二州並置金
坑多聚民以鑿山谷陽氣損泄故陰乘而動縣官入金歲幾何小利
而大害可卽禁止以寧地道皇祐五年正月會靈宮災是歲冬至祀
天南郊以三聖並配明年大旱公曰五行火禮也去歲火而今又旱
其應在禮此殆郊邱並配之失也卽建言並配非古宜用迭配如初
詔其後并州議建軍爲節鎮公以星土考之曰昔高辛氏之二子不
相能也堯遷閼伯於商邱主火而商爲宋星遷實沉於臺駘主水而
參爲晉星國家受命始於商邱王以火德又京師當宋之分野而并
爲晉地參商仇讎之星今欲崇晉非國之利也自宋興平僭爲并最
後服太宗削之不使列於方鎮八十年矣謂宜如舊制公在翰林十
年多所補益大抵不爲苟止而妄隨故其言或用或不用或後卒如
其言然天子察公之忠欲大用者久矣嘉祐六年八月拜公諫議大
夫樞密副使公既慎靜而當大一作重任尤顧惜大體而羣臣方建
利害多更張庶事以革弊公獨厭之曰變法古人一作今之難不務
守祖宗成法而徒紛紛無益於治也又以謂契丹與中國通好六十
餘年自古未有也善待夷狄者謹爲備而已今三邊武備多弛牧馬
著虛名於籍可乘而戰者百無一二又謂倉州宜分爲二路以禦虜
此今急務也若其界上交侵小故乃城寨主吏之職朝廷宜守祖宗

之約不宜爭小利而墮大信深戒邊臣生事以爲功在位六年其論
議類皆如此英宗卽位拜一作遷給事中治平三年累上表乞致仕
未一作不允久之拜尙書吏部侍郎觀文殿學士知杭州爲政不略
細故或謂大臣不宜自勞公曰此民事也吾不敢忽以是民尤愛之
明年今上卽位遷左丞五月公以疾告遂除太子少師致仕命未至
而公以六月十一日薨于正寢享年七十有二一作卽以其年十
一月某日葬于某州某縣某鄉之某原一作常州晉陵縣萬安鄉之
隆亭公之曾祖諱持累贈太傅曾祖妣歐陽氏追封晉陵郡太夫人
祖諱徽累贈太師祖妣楊氏追封華陰郡太夫人余氏嘉興郡太夫
人余氏丹陽郡太夫人龔氏武陵郡太夫人父諱霖累贈太師兼中
書令妣沈氏追封東陽郡太夫人貝氏南陽郡太夫人李氏金城郡
太夫人公累階光祿大夫勳上柱國開國安定爵公食邑二千八百
戶食實封四百戶賜推誠保德翊戴功臣初娶吳氏追封蘭陵郡夫
人再娶何氏封南康郡夫人子男五人長曰宗堯今爲都官員外郎
次曰遵路早卒次曰宗質國子博士次曰宗炎著作佐郎次曰宗厚
祕書省正字早卒女四人皆適士族孫志修太常寺太祝行修守祕
書省校書郎簡修試祕書省校書郎世修德修安修奕修慎修益修
公自一無此字爲進士知名于時楊文公億得其詩題于祕閣歎曰
吾恨未識此人其舉進士也謝陽夏公絳薦公爲第一公名以此益
彰而謝公亦以此自負少嘗善一浮圖其人將死謂公曰我有祕術
能化瓦石爲黃金子其藝我我以此報子公曰爾之後事吾敢不勉
祕術非吾欲也浮圖歎曰子之志未可量也其篤行自勵至於責顯
常如布衣時有文集四十一有一字卷銘曰
允矣胡公順外剛中惟初暨終一德之恭公之燕居其氣溫溫舉必
可法思而後言公在朝廷正色侃侃蔚有嘉話一作謀憂深慮遠不
迎利趨不畏勢反有或不從後必如之久一作多而愈信一作篤執

不公思侍從之親樞機之密名望三朝清職峻秩愷悌之仁一作化
宜國黃耆七十而止孰云多壽惟善在人刻銘一作知名不朽

居士集卷第三十四

居士集卷第三十五 集三十五

墓誌三首 馮一首附

永州軍事判官鄭君墓誌銘

鄭君諱平字某衡州衡陽人也少儻有大志舉進士中天禧二年甲科爲郴州軍事推官監潭州茶場坐茶惡免官久之試秘書省校書郎知連州陽山縣爲道州軍事推官丁母憂服除調永州軍事判官監衡州茭源銀冶以疾去官慶曆二年七月某日卒于家享年五十有一以某年某月某日葬于某所曾祖諱某永州祁陽令祖諱某江寧府建寧縣令父諱某道州軍事判官君娶孫氏贈尚書工部侍郎寬之女子男六人絢總紀經維綯早卒總舉進士出身亦早卒孫七人皆幼君世仕不顯少孤而貧母夫人某氏賢母也教其二子以學皆有立君與其兄本第輩皆舉進士及第君初監茶場茶實不惡上官挾他事以罪中之君不自辯竭其貲以償解官而去無愠色及爲陽山有善政民甚愛之其既以疾廢慨然歎曰吾少力學而不幸廢以疾吾終不用於時矣安事空言哉即取其平生所爲文藁悉焚之嗚呼君之志可哀也已自二代詩書已來立言之士多矣其始無不欲其言之傳也而散亡磨滅泯然不復見於後世者何可勝數或暫見而終沒或其言雖傳而其人不可見於世者何可勝數諸躬而不可揜者不待自言而傳也君之不欲見於空言其可謂善慮於無窮者矣其志豈不遠哉雖然君之志既不自見於言而宜有爲之著者銘所以彰善而著無窮也乃爲之銘曰

夫惟自信者不疑知命者不惑故能得失不累其心喜愠不見其色嗚呼鄭君學幾於此斯可謂之君子

端明殿學士蔡公墓誌銘

公諱襄字君謨興化軍仙遊人也天聖八年舉進士甲科爲漳州軍事判官西京留守推官改著作佐郎館閣校勘慶曆二年以祕書丞

集賢校理知諫院兼修起居注是時天下無事士大夫弛於久安一日元昊叛師久無功天子慨然厭兵思正百度以修太平既已排羣議進退一作用二三大臣又詔增置諫官四員使拾遺補闕所以遇之甚寵公以材名在選中遇事感激無所回避一有是是二字權倖畏斂不敢撓法干政而上得益與大臣圖議明年屢下詔書勸農桑興學校革弊修廢而天下悚然知上之求治矣於此之時言事之臣無日不進見而公之補益爲尤多四年以右正言直史館出知福州以便親遂爲福建路轉運使復古五塘以溉田民以爲利爲公立生祠于塘側又奏減閩人五代時丁口稅之半丁父憂服除判三司鹽鐵勾院復修起居注今參知政事唐公介時爲御史以直言忤旨貶春州別駕廷臣無敢言者公獨論其忠人皆危之而上悟意解唐公得改英州遂復召用皇祐四年遷起居舍人知制誥兼判流內銓御史呂景初吳中復馬遵坐論梁丞相適罷臺職除他官公封還辭頭不草制其後屢有除授非當者必皆封還之而上遇公益厚曰有子如此其母之賢可知命特賜冠帔以寵之至和元年遷龍圖閣直學士知開封府二年以樞密直學士知泉州徙知福州未幾復知泉州公爲政精明而世一作於閩人一有尤字知其風俗至則禮其士之賢者以勸學興善而變民之故除其甚害往時閩人一作士多好學而專用賦以應科舉公得先生周希孟以經術傳授學者常至數百人公爲親至學舍執經講問爲諸生率延見處士陳烈尊以師禮而陳襄鄭穆方以德行者稱鄉里公皆折節下之閩俗重凶事其奉淫圖會賓客以盡力豐侈爲孝否則深自愧恨爲鄉里羞而姦民游手無賴子幸而貪飲食利錢財來者無限極住往至數百千人至有親亡秘不舉哭必破產辦具而後敢發喪者有力者乘其急時賤買其田宅而貧者立券舉責終身困不能償公曰弊有大於此邪卽下令禁止至於巫覡主病蠱毒殺人之類皆痛斷絕之然後擇民之聰明

者教以醫藥使治疾病其子弟有不率教令者條其事作五戒以教諭之久之閩人大便公既去閩人相率詣州請爲公立德政碑吏以法不許謝即退而以公善政私刻于石曰俾我民不忘公之德嘉祐五年召拜翰林學士權三司使三司開封世稱省府爲難治而易以毀譽居者不由以遷則由以敗而敗者十常四五公居之皆有能名其治京師談笑無留事尤喜破姦一有發字隱吏不能欺至商財利則較天下盈虛出入量力以制用必使下完而上給下暨百司因習蠹弊切磨剝剔久之簿書纖悉紀綱條目皆可法七年季秋大享明堂後數月仁宗崩英宗即位數大賞賚及作永昭陵皆梓辦於縣官經費外公應煩愈間暇若有餘而人不知勞遂拜三司使居二歲以母老求知杭州即拜端明殿學士以往三年徙南京留守未行丁母夫人憂明年八月某日以疾卒于家享年五十有六蔡氏之譜自晉從事中郎克以來世有顯聞其後中衰隱德不仕公年十八以農家子舉進士爲開封第一名動京師後官于閩典方州領使一路二一作而親尚皆無恙閩人瞻望咨嗟不榮公之貴而榮其父母母夫人尤有壽年九十餘飲食起居康彊如少者歲時爲壽母子鬢髮皆皓然而命服金紫煌煌如也至今閩人之爲子者必以夫人祝其親爲父母者必以公教其子也公以朋友重信義聞其喪則不御酒肉爲位以哭盡哀乃止嘗會飲會靈東園坐客有射矢誤一有中傷人者客遽指爲公矢京師喧然事既聞上一又有上字以問公公即再拜媿謝終不自辯退亦未嘗以語人公爲文章清道粹美有文集若干卷工於書畫頗自惜不妄爲人書故其殘章斷藁人悉珍藏而仁宗尤愛稱之御製元舅隴西王碑文詔公書之其後命學士撰温成皇后碑文又勅公書則辭不肯書曰此待詔職也公累官至禮部侍郎既卒翰林學士王珪等十餘人列言公賢其亡可惜天子新即位未及識公而聞其名久也爲之惻然特贈吏部侍郎官其子旻爲秘書

省正字孫傳一作傳及第之子均皆守將作監主簿而優以賻卹以旻尚幼命守吏助給其喪事會祖諱顯皇不仕祖諱恭贈工部員外郎父諱瑋贈刑部侍郎母夫人盧氏長安郡太君夫人葛氏永嘉郡君子男三人曰勻將作監主簿曰旬大理評事皆先公卒幼子旻也女二人一適著作佐郎謝仲規二尚幼以某年某月某日塋公於莆田縣某鄉將軍山銘曰

誰謂閩遠而多奇產產非物寶惟士之賢疑疑蔡公其人傑然奮躬當朝謹言正色出入左右彌縫補益一作闕問歸于閩有政在人食不畏盡喪不憂貧疾者有醫學者有師問誰使然孰不公思有高其墳有拱其木凡閩之人過者必肅

集賢院學士劉公墓誌銘

公諱敞字仲原父姓劉氏世爲吉州臨江人自其皇祖以尚書郎有聲太宗時遂爲名家其後多聞人至公而益顯公舉慶曆六年進士中甲科以大理評事通判蔡州丁外艱服除召試學士院遷太子中允直集賢院判登聞鼓院吏部南曹尚書考功於是夏英公既薨天子賜諡曰文正公曰此吾職也即上疏言諡者有司之事也且竦行不應法今百司各得守其職而陛下侵臣官疏凡三上天子嘉其守爲更其諡曰文莊公曰姑可以止矣權判三司開拆司又權度支判官同修起居注至和元年九月召試遷右正言知制誥宦者石全彬以勞遷宮苑使領觀察使意不滿退而愠有言居三日正除觀察使公封還辭頭不草制其命遂止二年八月奉使契丹公素知虜山川道里虜人道自古北口回曲千餘里至柳河公問曰自一有古字松亭趨柳河甚直而近不數日可至中京何不道彼而道此蓋虜人常故迂其路欲以國地險遠誇使者且謂莫習其山川不虞公之問也相與驚顧羞媿即吐其實曰誠如公言時順州山中有異獸如馬而食虎豹虜人不識以一有爲問公曰此所謂駁也爲言其形狀聲音

皆是庸人益數服二年使還以親嫌求知揚州歲餘遷起居舍人徙知鄆州兼京東西路安撫使居數月召還糾察在京刑獄修玉牒知嘉祐四年貢舉稱爲得人是歲天子卜以孟冬裕既廷告丞相用故事率文武官加上天子尊號公上書言尊號非古也陛下自寶元之郊止羣臣毋得以請迨今二十年無所加天下皆知甚感德奈何一旦受虛名而損實美上曰我意亦謂當如此遂不允羣臣請而禮官前裕請附郭皇后於廟自孝章以下四后在別廟者請毋合食事下議議者紛然公之議曰春秋之義不薨于寢不稱夫人而郭氏以廢薨按景祐之詔許復其號而不許其諡與祔謂宜如詔書又曰禮於裕未毀廟之主皆合食而無帝后之限且祖宗以來用之傳曰祭從先祖宜如故於是皆如公言公既驟屈廷臣之議議者已多仄目既而又論呂溱過輕而責重與臺諫異由是言事者亟攻之公知不容干時矣會永興軍府事長安多富人右族豪猾難治猶習故都時一撫使兼知永興軍府事長安多富人右族豪猾難治猶習故都時一無此字態公方發大姓范偉事獄未具而公召由是獄屢變連年吏不能決至其事聞制取以付御史臺乃決而卒如公所發也公爲三州皆有善政在揚州奪發運使冒占雷塘田數百頃予民民至今以爲德其治鄆永興皆承早歉所至必雨雪蝗輒飛去歲用豐稔流亡來歸令行民信盜賊禁止至路不拾遺公於學博自六經百氏古今傳記下至天文地理卜醫數術浮圖老莊之說無所不通其爲文章尤敏贍嘗直紫微閣一日追封皇子公主九人公方將下直爲之立馬卻坐一揮九制數千言文辭典雅各得其體公知制誥七年當以次遷翰林學士者數矣久而不遷及居永興歲餘遂以疾聞八年八月召還判三班院太常寺公在朝廷遇事多所建明如古渭州可棄孟陽河不可開樞密使狄青宜罷以保全之之類皆其語在士大夫間者若其親切人主直言逆耳至於從容進見開導聰明賢否人物

其事不聞于外廷者其補益尤多故雖不合於世而特被人主之知方嘉祐中嫉者衆而攻之急其雖危而得無害者仁宗深察其忠也及待英宗講讀不專章句解詁而指事據經因以諷諫每見聽納故尤奇其材已而復得驚眩疾告滿百日求便郡上曰如劉某者豈易得也復賜以告上每宴見諸學士時時問公少間否賜以新橙五十勞其良苦疾一有久字少間復求外補上張然許之出知衛州未行徙汝州治平三年召還以疾不能朝改集賢院學士判南京留司御史臺熙寧元年四月八日卒于官舍享年五十嗚呼以先帝之知公使其不病其所以用之者豈一翰林學士而止哉方公以論事忤於時也又有構爲謗語以怒時相者及歸自雍丞相韓公方欲還公學士未及而公病遂止於此豈非其命也夫公累官至給事中階朝散大夫勳上輕車都尉開國彭城縣公邑戶二千一百實食者二百曾祖諱瑛贈大理評事祖諱式尙書工部員外郎贈戶部尙書考諱立之尙書主客郎中贈工一作禮部尙書公再娶倫氏皆侍御史程之女前夫人先公早卒後夫人以公貴累封河南郡君子男四人長定國郊社掌座早卒次奉世大理寺丞次當時大理評事次安上太常寺太祝女三人長適大理評事韓宗直二尙幼公既卒天子推恩錄其兩孫望旦一族子安世皆試將作監主簿公爲人磊落明白推誠自信不爲防慮至其屢見侵害皆置而不較亦不介于胸中居家不問有無喜凋宗族既卒家無餘財與其弟效友愛尤篤有文集六十卷其爲春秋之說曰傳曰權衡曰說例曰文權一無三字曰意林合四十一一無此字卷又有七經小傳五卷弟子記五卷而七經小傳今盛行於學者二年十月辛酉其弟效與其子奉世等塋公於某所一作塋公符縣韓陵鄉附于先墓以來請銘乃爲之銘曰嗚呼維中原父學彊而博識敏而明坦其無疑一以誠見利如畏義必爭觸機履險危不傾畜大不施奪其齡惟其文章粲日星雖欲有

毀知莫能維古聖賢皆後亨有如不信考斯銘

零陵縣令贈尚書都官員外郎吳君墓碣銘并序

君諱舉字太冲姓吳氏興國軍永興人也曾祖諱瑗祖諱章父諱思迥五代之際自江以南爲南唐吳氏亦微不顯君當李煜時以明經爲彭澤主簿太祖皇帝召煜來朝煜不奉詔遣曹彬討之前鋒兵破池陽遣使招降郡縣使者至彭澤其令欲以城降君以大義責之且曰吾能爲李氏死爾乃共殺死者爲煜守煜已降君爲游兵執送軍中主將責以殺使者君曰固當如是爾主將義而釋之嘗是時嘗仕煜者皆隨煜至京師得復補吏君獨棄去不顧太平興國二年詔求李氏時故吏所在敦遣君始至京師以爲鄆州平陰主簿歷益州成都令陝州錄事參軍襄州之宣城洋州之真符福州之連江楚州之鹽城耀州之同官最後爲零陵令以祥符九年八月二十六日道卒于揚州享年七十有六夫人伏氏能讀書史有賢行後君十有四年以卒享年八十有二子男二人長曰晁早卒次曰中復今爲起居舍人以景祐三年十一月甲子合葬君夫人于南康軍都昌縣之長城君學春秋通三傳其臨大節知所守當五代時僭竊分裂喪君亡國不勝數士之不得守其節與不能守者世皆習而不恤君子此時獨區區志不忘李氏其義有足動人然而亦無爲君道者考君之出處自重不妄宜其世莫之知而潛德晦善顯於後世克有賢子爲時名臣君以子恩累贈尚書都官員外郎考於令品又得碣于其墓以昭令德而示子孫於是史官廬陵歐陽修曰此余職也乃爲之辭曰世逢屯兮廉恥道缺中國五禮兮九州分裂朝存夕亡兮士莫守節昧者習安兮懦夫志奪偉哉吳君兮凜矣其烈世莫我知兮不妄自伐有韜必昭兮後世而發嗚呼吳君兮寓銘斯碣

居士集卷第三十六 集三十六

墓誌七首 碣一首 附

南陽縣君謝氏墓誌銘

慶曆四年秋子友宛陵梅聖俞來自吳興出其哭內之詩而悲曰吾妻謝氏亡矣丐我以銘而壆焉予一有諾之二字未暇作居一歲中書七八至未嘗不以謝氏銘為言且曰吾妻故太子賓客諱濤之女希深之妹也希深父子為時聞人而世顯榮謝氏生於戚族年二十以歸吾凡十七一作八年而卒卒之夕斂以嫁時之衣甚矣吾貧可知也然謝氏怡然處之一作處之怡然治其家有常法其飲食器皿雖不及一作至豐侈而必精以旨其衣無故新而澣濯縫紉必潔以完所至官舍雖庫陋而庭宇灑掃必肅以嚴其平居語言容止必怡怡一作從容以和吾窮於世久矣一有不惟信於聖人以自守九字其出而幸與賢士大夫遊而樂入則見吾妻之怡怡而忘其憂使吾不以富貴貧賤累其心者抑吾妻之助也吾嘗與士大夫語謝氏多從屏竊聽之間則盡能商榷其人才能賢否及時事之得失皆有條理吾官吳興或自外醉而歸必問曰今日孰與飲而樂乎聞其賢者也則說否則歎曰君所交皆一時賢雋豈其屈已下之耶惟以道德一作得焉故合者尤寡一無此十七字今與是人飲而歡邪是歲南方旱仰見飛蝗而歎曰今西兵未解天下重困盜賊暴起於江淮而天旱且蝗如此我為婦人死而得吾壆我幸矣其所以能安居貧而不困者其性識明而知道理多此類一作類此嗚呼其生也迫吾之貧而沒也又無以厚焉謂惟文字可以著其不朽且其平生尤知文章為可貴歟而得此庶幾以慰其魂且塞予悲此吾所以請銘於子之勤也若此子忍不銘夫人享年三十七用夫恩封南陽縣君二男一女以其年七月七日卒于高郵梅氏世壆宛陵以貧不能歸也某年某月某日葬于潤州之某鄉某原銘曰

高崖一作岸斷谷今京口之原山蒼水深兮土厚而堅居之可樂兮卜者曰然骨肉雖一作歸土兮魂氣則一作升天何必故鄉兮然後為安

萬壽縣君徐氏墓誌銘并序

河東都轉運使天章閣待制施君卜以慶曆五年三月某日葬其夫人萬壽縣君于蘇州吳縣三讓鄉之陸公原以來請銘夫人姓徐氏世家通州之靜海七歲喪其母哀不自勝泣曰母女所恃以生者也無母其復能生因欲投水火一無火字其父兄力止之既長事其繼母則以孝聞年若干歸于施氏遠事其姑紉縫烹飪必以身蚤暮寒暑飲食必以時姑亡哀毀得疾逾年而後能起生五男一女男曰翬舉進士某官知開封府太康縣曰述曰造皆將作監主簿曰適曰遜尚幼女曰錦娘慶曆二年十一月甲子以疾卒于河東之官舍享年四十有三夫人之生也事其繼母及姑皆稱曰孝及其歿也其夫之稱曰吾妻助我而賢其子之幼者曰吾母慈我其長者之稱曰吾母不以愛怠一作殮我而以成人勗我使我至於有立凡施氏外內婚姻宗族之稱者曰夫人遇我有禮而仁至于妾媵左右之稱者亦曰夫人於我仁而均嗚呼夫人之行至矣其動而有法其施之各有宜可謂賢也已若夫男子見于外其善惡功過可舉而書至於婦德主內自非死節徇難非常之事則其幽閒淑女之行孰得顯然列而詩之以示後惟視其所稱與其所思則其賢可知矣施君各昌言一無此三字有以明識敏行守正敢言達於當世其稱曰助我則夫人之賢又從可知矣二十八字夫人曾祖諱某祖諱某父諱某以尚書都官員外郎致仕夫生而其善可稱未若沒而遺思之深也悲夫銘曰於惟夫人東海之華始來施氏有此室家為婦為母勤孝勞劬有女昔祿今婉其裾子綬煌煌第長相趨夫爵之高榮及親疎厥家已成而獨不居千里之遠歸魂東吳銘以哀之已矣嗚呼

長沙縣君胡氏墓誌銘并序

故太子中舍張君諱某之夫人曰一無此字長沙縣一有大字君一有曰字胡氏胡氏世為某一作世某郡某縣人父諱震官至刺史夫人年二十七以歸中舍君君時為融州司理參軍歷潭州寧鄉縣尉鳳州兩當福州寧德二一作兩縣令以卒夫人之為婦也以勤儉恭肅主張氏之祭饋而睦其內外之宗姻生子一無此字男二人女一人男曰大年大有皆舉進士一無此四字大年今為鄭州原武縣令大有秘書丞女適邵陽縣令錢柔夫人之為母也以禮義慈嚴教育其子故其一無此字男也有立而克嗣其世女也適於人而宜人之家為婦為母之道無不備而成其夫之家享其子之祿以某年某月某日以疾卒享年七十有五又用其子之恩追封長沙縣一有大字君嗚呼一有夫人二字可謂榮矣中舍君先以一無此二字某年某月日卒葬于某州某縣某鄉夫人一無此二字以某年某月某日一有奉夫人之喪合葬于中舍君之墓銘曰

婦德之備功施也一作于內銘昭其幽以法後世

長壽縣太君李氏墓誌銘

太中大夫尚書屯田郎中上柱國王公諱利之夫人曰李氏李氏世家湖南其父諱昭文官至國子博士贈工部侍郎夫人年二十二歸于王氏用夫封隆平縣君後以其子徙封長壽縣太君夫人為李氏女事後母以孝聞及為王氏婦一有以事父母者五字逮一無此字事其舅姑其舅姑嘗稱夫人以誠諸婦曰事我者當如此又以誠其諸女曰為人婦者當如此其為母也有三男三女及其老也鼎為職方員外郎震太子中舍復太常博士三子者皆有才行而復尤好古有文聞于當世女皆有歸孫男六人曰夷仲曰虞仲曰于仲曰南仲曰武仲曰延仲女五人一亦婦人矣餘尚幼夫人享年八十有六以慶曆七年七月十日終于京兆子復之官舍用明年二月十七日合

葬于河南洛陽大樊原王公之墓夫人於王氏積行累功其德備矣不可以徧書一作夫人之德可謂備矣書其舅姑之所嘗稱者以見其為婦之道書其子之賢而有立以見其為母之方書其子孫之衆壽考之隆以見其勤于其家至于有成而終享其福之厚嗚呼於夫人無不足矣而其子若孫皆曰未也謂必有以示永久而不沒一有者字庶幾以慰無窮之哀乃來請銘以葬其子之友廬陵歐陽修為之銘曰

家成于勤德隆以壽歸安其藏以昌厥後

廣平郡太君張氏墓誌銘并序

故右諫議大夫集賢院學士贈禮部尚書號略楊公之夫人曰廣平郡太君張氏其先青州人後徙為開封人也楊公諱大雅以文行知名於時號有清節夫人佐公以勤儉治其家教子弟和宗族皆有法公以明道元年四月某日薨後二十有四年至和二年六月某日夫人以疾卒于高郵以嘉祐元年十二月某日葬于杭州錢塘縣履泰鄉湖西村靈隱山祖塋之西夫人曾祖嗣當五代之亂不顯祖平舉三禮太宗皇帝為晉王署平押衙為人剛果有智謀以此尤見親信官至三司鹽鐵使父從古莊宅副使景德中以殿直從李繼隆軍擊契丹繼隆戰敗從古入見陳繼隆所以敗之狀其言甚辯稱旨會宜州蠻叛乃以從古為供奉官守宜州從古招降叛蠻秩滿罷去以內殿崇班馮勵代之蠻復叛攻宜州斬勵而去告邊吏曰得張侯守宜州我則聽命即復遣從古守宜州凡七年蠻無事徙知澧州而宜州人陳進反攻嶺南驛召從古以為巡撫副使與賊戰象州斬首萬餘級已破進留宜州以疾卒宜人為立廟于州北韓婆嶺慶曆中蠻賊區希範攻宜桂轉運使杜杞禱兵于廟下更其名曰制勝嶺至今宜人祠之蓋楊氏自漢以來世有令譽迨公千餘歲常有顯人而張氏威烈信于一方楊氏以德張氏以功合二族之美而夫人為淑女為

賢婦母享年六十以壽終公先娶漳南縣君張氏生子二人曰洎虞部員外郎曰濬殿中丞女二人長適國子博士袁成師次大理寺丞李巖次殿中丞温嗣良夫人生子男四人曰泳大理寺丞曰漸奉禮部郎中舍曰瀾衛尉寺丞有女一人歸于修女之適李氏者今封武原縣太君餘女及濬泳漸皆先夫人而亡孫男十四人嗚呼惟德與功與賢法皆宜銘銘曰

有邑清河遂開其邦又徙南陽皆以夫榮後用子封京兆廣平宜其夫子有淑其聲子孫之思考德有銘

渤海縣太君高氏墓碣

故尚書兵部員外郎知制誥鄧州軍州事陽夏公之夫人姓高氏宣州宣城人也父諱惠連官至兵部郎中母曰廣陵縣君勾氏陽夏公諱絳姓謝氏夫人有子曰景初景温景平景回女一早卒次適上虞縣令王存次適大理寺丞李處厚次若干人未嫁寶元二年陽夏公卒于鄧州以某年八月某日卒于官舍遂以某年某月某日合葬于官于某州以某年某月某日卒于官舍遂以某年某月某日合葬于公之墓夫人初以夫封文安縣君後以其子封渤海縣太君謝氏世為名族而陽夏公尤顯聞於時初公與子俱官于洛陽而公之父太子賓客諱濤尚無恙其子景初景温方為童兒景平始生二三女子皆幼子曰至其家進拜賓客見其鬢髮垂白衣冠肅潔貌厚而氣清壽考君子也退而與陽夏公遊見其年壯志威偉然方為一時名臣而諸儒女子戲嬉罇席之間者皆穎發而秀好於是時夫人以孝力事其舅為賢婦以柔順事其夫為賢妻以恭儉均一教育其子為賢母後二三年賓客薨于京師又五六年陽夏公卒于鄧又十餘年景初景温景平皆以進士及第景初為某官景温某官景平某官夫人於其舅與夫為婦之禮備於其子立家之道成享年若干以卒嗚呼子始銘賓客又銘陽夏公今又書夫人之事于碣始見謝氏更一世

矣其為之書也宜得其詳

北海郡君王氏墓誌銘

太常丞致仕吳君之夫人曰北海郡君王氏維州北海人也皇考二字一作父諱汀舉明經不中後為本州助教夫人年二十三歸于吳氏天聖元年六月二日以疾卒享年三十有七夫人為人孝順勤儉自其幼時凡於女事其保傅皆曰教而不勞組紉織維其諸女皆曰巧莫可及其歸于吳氏也其母曰自吾女適人吾之內事無所助而吳氏之姑曰自吾得此婦吾之內事不失時及其卒也太常君曰舉吾里中有賢女者莫如王氏於是娶其女弟以為繼室而今夫人戒其家曰凡吾吳氏之內事惟吾女兄之法是守至今而不敢失夫人有賢子曰奎字長文初舉明經為殿中丞後舉賢良方正直言極諫一有對策二字今為翰林學士尚書兵部員外郎知制誥夫人初用子恩追封福壽一作昌縣君其後長文貴顯以夫人為請天子曰近臣吾所寵也有請其可不從乃特追封夫人為北海郡君長文號泣頓首曰臣奎不幸竊享厚祿不得及其母而天子寵臣以此俾以報其親一有雖然二字臣奎其何以報當是時朝廷之士大夫吳氏之鄉黨鄰里皆咨嗟歎息曰吳氏有子矣嘉祐四年冬長文請告于朝將以明年正月丁酉葬夫人于鄆州之魚山一有以書來乞銘五字夫人生三男曰奎奄冒今夫人生一男曰參女三人孫男女九人曾孫女二人銘曰

長安郡太君盧氏墓誌銘

長安郡太君盧氏尚書刑部侍郎蔡公諱琇之夫人端明殿學士尚書禮部侍郎襄之母也以治平三年十月某日卒于杭州之官舍享年九十有二嗚呼可以為壽矣夫壽者洪範所謂五福也福者百順

之名也故離之雖爲五必合而不闕其一然後爲福之備也蓋五者其一在人曰德而其四在天必有其一於己然後能致其四而有諸己者或厚或薄故其所致亦有備有不備焉夫老而貧且病者是人之所哀非福也壽且富康而無德以將之謂之賊與不仁非福也三者具而又有德而死非其命者謂之不幸非福也故曰必不闕其一然後爲福之備者惟夫人有之夫人在父母家奉其親以孝其歸于蔡氏也其舅姑老事之如其親其歸寧於父母也能使其舅姑不見三日必涕泣而思其事長慈幼既儉且勤久而宗族和鄉黨化其亡也隨自餘杭至里閭親戚哭之往往有過乎哀者問之皆曰夫人於我有德而人人各有迷焉嗚呼可謂賢也已夫人生四子其三皆早卒而端明君第二子也獨顯赫爲時名臣自爲諫官知制誥翰林學士知開封府三司使間出知泉福二州福建路轉運使出入清要光華寵榮以爲其親之養而夫人享此者蓋三十有六年端明君已顯貴天子嘉之曰有子如此其母之賢可知於是有冠帔之錫夫人平生少疾病雖老而耳目聰明食生飲寒如壯者晚從端明君于杭州極東南富麗海陸之珍奇以爲娛樂之奉而奄然以其壽終其於五福可謂不闕一矣方夫人之盛時凡爲人子者舉觴壽其親莫不以夫人爲祝而不幸榮不及養者必仰天怨吁謂薄厚不均以不得如夫人爲恨蓋不知夫有諸己者厚故能致其福之備也夫人泉州惠安人也曾祖諱某祖諱某父諱某皆不仕其三子早卒者曰不不及仕曰高太康縣主簿曰爽福州司戶參軍女二人皆適士族孫六人曾孫三十餘人嗚呼盛矣蔡氏之後其又將大興乎銘者所以昭德而示後也於是端明君之友人廬陵歐陽修爲之銘曰

維治平四年十有一月某日孤子襄祔其母夫人盧氏于先君之墓其縣仙遊其里慈孝其岡半井其固其安其千萬年之永

居士集卷第三十七 集三十七

墓誌一十七首宗室

皇從姪衛州防禦使遂國公墓誌銘

惟遂昭裕公宗顏字希聖太宗皇帝之曾孫懿恭憲王元佐之孫鎮江軍節度使兼侍中郇國公允成之長子初除西頭供奉官歷內殿崇班禮賓崇儀副使六宅使改左屯衛大將軍封州刺史遷左金吾衛大將軍領復州團練使左衛大將軍領鄆州防禦使拜衛州防禦使公好學通王氏易喜爲詩藏書數萬卷性聰敏多能至於琴奕之藝佛老之說所學必通履行修謹未嘗有過失每燕見待上讀易賦詩數賜器幣詔書褒美嘗召宴太清樓賦裸玉詩爲諸皇子第一上尤嘉嘗賜繒綵二百段有詩集十卷至和二年九月壬戌以疾薨享年四十有八初其疾也上遣中貴人押國醫治之既薨輟視朝一日勅有司具駕將視其喪以雨不克遣中貴人厚加賻卹乃贈昭信軍節度使太常考行諡曰昭裕權厝于東法濟寺夫人太原郡君郭氏燕王從義之裔孫子男三人長曰仲連右千牛衛將軍次曰仲丹仲筠皆太子右內率府副率早卒女四人長適左侍禁潘若且今亡次適內殿承制閻門祗候郭士選次一作其二一有亦字亡以嘉祐五年十月乙酉塋于河南永安縣銘曰

學而通行益修中充實外譽優見於言帝所褒雖不克施於事斯可
以銘諸幽

皇從姪筠州團練使安陸侯墓誌銘

安陸侯宗訥字行敏太宗皇帝之曾孫懿恭憲王元佐之孫鎮江軍節度使兼侍中郇國公允成之第二子初除西頭供奉官歷內殿崇班承制改右千牛衛將軍領茂州刺史天子祀明堂推恩遷領筠州團練使至和元年八月癸卯以疾卒享年四十有六天子哀卹贈安州觀察使追封安陸侯權厝於薦嚴佛寺嘉祐五年十月乙酉塋於

河南永安縣夫人長樂郡君賈氏子男五人其二早卒次仲緘右千牛衛將軍二人尙幼未各女八人長適右侍禁蔚世庸再適右侍禁郭昭簡今亡次適右班殿直劉起次適陳敦今亡次適王整次適董昭遜次適張經今亡次適程翼皆右班殿直最幼入太和宮爲道士惟侯學知爲詩好義善施性端謹能修容止進退有法未嘗少懈銘曰
思無邪容則莊蔚然有儀人所望學而不止久愈彰銘昭厥美示不忘

皇從姪右領軍衛大將軍博平侯墓誌銘

惟太祖皇帝之長子曰吳懿王之曾孫右屯衛大將軍昌州團練使贈彰化軍節度使舒國公惟忠之孫萊州防禦使東萊侯從恪之第三子金紫光祿大夫檢校國子祭酒右領軍衛大將軍兼御史大夫輕車都尉天水郡開國侯世融字仲源幼好學不驕富貴以清節自勵尊重師友執經問道無倦色嘗自銘其器物起居飲食視之喜爲詩工書亦通浮屠說平居一室蕭然終日無所營欲世咸知其賢初爲殿直歷左右侍禁改太子右衛率府率遷右領軍衛將軍天子祀明堂推恩爲本衛大將軍當寶元康定間趙元昊叛西邊用兵侯率宗室七人詣闕自言願效用上深嘉獎至和二年七月癸未得疾神色怡然與諸昆弟談論不輟是日卒享年四十贈博州防禦使追封博平侯天子悲思不已爲飛白字六曰世融好學忠孝以褒之夫人金城縣君王氏子男七人五早亡在者二人曰令晏右千牛衛將軍令箴太子右監門率府率女二人長適右班殿直王戡次早卒以嘉祐五年十月乙酉塋于某所銘曰

富貴不動其心生死不渝其色惟性之安惟學之力孰云不壽永昭厥德

皇從姪康州刺史高密侯墓誌銘

惟高密侯宗師字靖之太宗皇帝之曾孫潤恭靖王元份之孫漢王允讓之第七子明道元年為右侍禁遷左侍禁改太子左清道率府副率累遷金紫光祿大夫檢校國子祭酒行太子左清道率府兼侍御史騎都尉封天水縣開國男食邑二百戶居三歲遷右監門衛將軍兼御史大夫轉勳上騎都尉進爵子加食邑三百戶天子祀明堂推恩遷右領軍衛大將軍轉勳輕車都尉進爵伯加食邑三百戶天子有事于南郊推恩轉勳上輕車都尉進爵侯加戶四百至和元年五月領康州刺史嘉祐元年十月甲子暴疾薨于家享年二十有九贈密州觀察使追封高密侯惟侯沈靜寡言寬仁好學未嘗有過失夫人濮陽郡君吳氏生男一人仲虞太子右內率府副率女二人尚幼以嘉祐五年十月乙酉葬于河南永安縣銘曰

好仁而靜敏學而明雖不永年而垂令名卜安于此其固其寧

皇從姪右監門衛將軍廣平侯墓誌銘

廣平侯宗沔字上善太宗皇帝之曾孫潤恭靖王元份之孫漢王允讓之第二十子初授銀青光祿大夫檢校國子祭酒行太子左監門率府率兼監察御史武騎尉遷太子左清道率府率兼侍御史轉勳上騎都尉天子祀明堂推恩遷左監門衛將軍轉勳輕車都尉天子有事于南郊推恩轉上輕車一有都尉二字天水縣開國男食邑三百戶明年二月甲辰以疾卒享年二十贈洛州防禦使追封廣平侯權厝于承天佛寺惟侯為人明敏好學能為文辭娶高氏封仁壽縣君子男二人仲足仲霄皆太子右內率府副率早卒以嘉祐五年十月乙酉葬于河南永安縣銘曰

性之明學有方壽不隆永以藏

皇從姪右監門衛將軍墓誌銘

太祖皇帝之長子曰吳懿王德昭之曾孫彰化軍節度使舒國公惟忠之孫萊州防禦使東萊侯從恪之子曰右監門衛將軍贈右武衛

大將軍世衡字夏卿母曰平原郡夫人米氏世衡生早孤而平原夫人教之以學性沈敏自為童兒不好弄既長好學問通周易孟子喜為詩暇則學射法而已在諸昆弟為最幼而尤以孝悌見稱初補殿直改太子右衛副率天子祀明堂推恩拜右監門衛將軍累遷至金紫光祿大夫檢校國子祭酒兼御史大夫柱國天水縣開國伯食邑九百戶嘉祐四年六月丙寅以疾卒享年三十有一娶王氏大原縣君子男二人令展令持皆率府副率早卒女一人尚幼嘉祐五年十月乙酉葬于河南永安縣銘曰

學問以為文孝悌以為本其華已榮而實斯碩銘以藏之以昭其韞

皇從孫右屯衛大將軍武當侯墓誌銘

惟武當侯世宣吳懿王德昭之曾孫彰國軍節度使舒國公惟忠之孫武勝軍節度觀察留後韓國公從諶之子母曰太寧郡君慕容氏惟侯生於富貴而不習為驕侈少好學喜購古書奇字遇人卑恭事親孝悌累官至左題目作右屯衛大將軍嘉祐三年五月己卯以疾卒享年三十有六初娶天水縣君王氏再娶金城縣君張氏子男六人長曰令鐸左千牛衛將軍次曰令進令禱令愔皆太子右內率府副率其二幼未名以嘉祐五年十月乙酉葬于河南永安縣以天水縣君祔焉銘曰

孝行之本謙德之躬壽胡不隆闕此幽宮

安陸侯夫人長樂郡君賈氏墓誌銘

夫人姓賈氏曾祖廷瓌累贈左神武大將軍祖官至四方館使昭州團練使父德滋前左班殿直夫人以選歸于安陸侯宗訥至和元年五月乙卯以疾卒享年三十有六權厝于薦嚴佛寺以嘉祐五年十月乙酉祔安陸侯以葬銘曰

配德惟諧卜藏斯吉其固其安于此幽室

雍國太夫人馮氏墓誌銘

雍國太夫人馮氏者皇兄右千牛衛大將軍贈永清軍節度觀察留
後臨汝侯惟和之夫人襄州觀察使襄陽侯從誨寧國軍節度觀察
留後宣城公從審之母曾祖暉靜難軍節度使衛王祖繼業定國軍
節度使贈中書令父訥西上閣門使馮氏自衛王仍世守西邊有功
載國史夫人生將家孝謹柔明動不踰禮以世族選爲臨汝侯諱本
有公字之配居十有二年而臨汝侯卒夫人居喪哀毀真宗嘉其行
特封譚國夫人以褒寵之夫人益自勵衣服飲食務爲儉薄居處嚴
潔未嘗下堂雖家人亦罕得見喜誦浮屠書皇祐五年正月癸亥以
疾卒享年六十有七追封雍國太夫人子男二人從誨從審也女五
人長適東頭供奉官宋宗顏次早亡次以疾廢爲比邱尼次適供備
庫使姚宗望次適西頭供奉官宋從政孫男十一人世遠世儀皆大
將軍世英世堅世及世開世卿世肱皆衛將軍世禕世總世仍皆太
子率府率重孫九人令駟令冕一作冕皆率府率令戈令甲令績一
作績令謀令浮令收令僉皆副率以嘉祐五年十月乙酉合葬于臨
汝侯之墓銘曰

世高勳選賢配進國爵褒行懿加大名由子貴壽考隆銘不墜

東萊侯夫人平原郡夫人米氏墓誌銘

皇從姪故萊州防禦使東萊侯從恪之夫人曰平原郡夫人米氏贈
太子太師承德之曾孫橫海軍節度使信之孫內殿崇班閣門祇候
繼豐之女夫人年十七選配東萊侯累封平陽郡君子男六人長曰
世安贈左一作右驍衛大將軍次曰世融贈博州防禦使追封博平
侯次曰世昌右屯衛大將軍次曰世規右監門衛將軍次曰世猷太
子右監門率府率早亡次曰世衡贈左武衛大將軍女三人長適左
侍禁劉希正次適內殿承制王說次適右侍禁陳宗誨孫男十二人
皆諸衛將軍夫人將家子有賢行東萊之亡諸孤尚幼夫人治家訓
子皆有法皇祐元年二月癸酉以疾卒享年五十有一追封平原郡

夫人權厝于奉先佛寺以嘉祐五年十月乙酉合葬于東萊侯之墓
銘曰

韓國公夫人太寧郡君慕容氏墓誌銘

夫人姓慕容氏贈太保章之曾孫贈中書令河南郡王延釗之孫太
子率府率德正之女河南王有功於國爲時名臣夫人以賢女選爲
韓國公從藹之配韓公彰化軍節度使舒公之子事其親以孝而夫
人承其夫以順事其舅姑以禮下其妾媵以仁撫其子無嫡庶以均
故其內外宗姻莫不稱其能封太寧郡君至和元年正月戊寅以疾
卒享年五十有六子男十人長曰世豐贈右驍衛大將軍次曰世宣
贈均州防禦使次曰世準世雄世本世綱皆諸衛將軍次曰世岳世
陔世庸一作膺皆太子率府副率女三人長適高允懷次適張承訓
次適鄭偃皆右侍禁餘皆幼以嘉祐五年十月乙酉舉夫人之喪合
葬于韓公之墓銘曰

承夫以順爲婦以勤逮下以恩愛子以均以成厥家以播其芬

右監門衛將軍夫人李氏墓誌銘

惟右監門衛將軍世堅之配曰李氏天雄軍節度使同中書門下平
章事兼侍中贈中書令隴西郡王繼勳之曾孫崇儀副使守微之孫
東頭供奉官舜舉之女惟李氏世爲將家功在國史餘烈遺德是生
賢女夫人年十五以選配世堅惟孝與順以事其親以佐其夫惟
禮與義以正其躬以全其節歸于世堅也凡若干年而世堅卒無子
夫人自誓不嫁宗族敦迫其守益堅凡七年當皇祐五年六月庚辰
以疾卒于寢享年二十有三以嘉祐五年十月乙酉合葬于世堅之
墓銘曰

婦德之休惟先順柔及其大節有不可奪刻銘幽陰以永芳烈

右監門衛將軍夫人金堂縣君錢氏墓誌銘

夫人姓錢氏餘杭人也曾祖吳越忠懿王俶祖衛州防禦使惟道父文思副使象與錢氏自五代以來尊中國效臣順世稱其忠子孫蕃昌至今不衰夫人生於戚族孝謹勤儉性巧慧喜字書年十有四以選爲右監門衛將軍世準之配封金堂縣君嘉祐二年九月庚子以疾卒享年二十有八子男二人令繼令烜皆太子右內率府副率早亡女三人皆尚幼以嘉祐五年十月乙酉塋于永安之原銘曰
生宜其室歿安其藏銘昭其昧以永不忘

右監門衛將軍夫人武昌縣君郭氏墓誌銘并序

夫人姓郭氏曾祖恕右千牛衛將軍祖遵式洛苑使父昭晦一作誨左侍禁夫人聰明孝謹能讀書史善書畫喜浮圖之說以選歸于皇從孫右監門衛將軍世軍封武昌縣君子男四人長曰令辟太子右內率府副率餘皆幼未賜名夫人以嘉祐二年十一月丁未以疾卒享年二十有二權厝于奉先佛寺以嘉祐五年十月乙酉塋于永安之原銘曰
行之修學以明德施於內銘告諸冥

右監門衛將軍夫人東陽縣君鄭氏墓誌銘

夫人姓鄭氏曾祖誠贈定國軍節度使祖崇勳贈左屯衛將軍父從範內殿崇班夫人以選歸于皇從孫右監門衛將軍世智封東陽縣君生子男二人長曰令唐太子右內率府副率早卒次未名卒次令祈太子右內率府副率夫人爲人孝謹節儉喜誦浮圖書至和元年八月戊戌以疾卒享年十有九以嘉祐五年十月乙酉塋于永安之原銘曰
儉以行其躬孝以事其親以是貽其子孫

右屯衛將軍夫人永安縣君慕容氏墓誌銘

永安縣君慕容氏者皇從孫贈右屯衛大將軍仲譽之配也曾祖隱贈左千牛衛大將軍祖興號州團練使父守恩左班殿直年十七選

爲屯衛之配有子二人長曰士潔太子右監門衛率府率早卒次士驥太子右內率府副率女一人尚幼夫人以嘉祐三年二月丙戌以疾卒享年二十有五嘉祐五年十月乙酉合塋于仲譽之墓銘曰
選以賢配封以夫貴歿而從之安此位

右監門衛將軍夫人周氏墓誌銘并序

皇從孫右監門衛將軍世哲之夫人曰永安縣君周氏曾祖景左領軍衛上將軍累贈尚書令祖瑩天平軍節度使宣徽南院使父普西染院使夫人以慶曆五年選爲監門之配勤孝柔仁克有婦道生一男曰太子右內率府率令儂女二人皆幼夫人以嘉祐二年二月庚午以疾卒享年二十有九五年十月乙酉塋于河南永安之原銘曰
山川旣佳日月惟吉惟永其安其藏其密

居士集卷第三十七

行狀二首

尙書戶部侍郎贈兵部尙書蔡公行狀

公諱齊字子思其先洛陽人皇祖以下始著籍於膠東公幼依外舅劉氏能自力爲學初作詩已有動人語今相國李公見之大驚謂公之皇考曰兒有大志宜善視之州舉進士第一以書薦其里人史防而居其次祥符八年真宗皇帝采賈誼置器之說試禮部所奏士讀至公賦有安天下意歎曰此宰相器也凡貢士當賜第者考定必召其高第數人並見又參擇其材質可者然後賜第一及公召見衣冠偉然進對有法天子爲無能過者亟以第一賜之初拜將仕郎將作監丞通判兗州太守諸本作原王臻治政嚴急喜以察盡一作盡察爲明公務爲裁損濟之以寬獄訟爲之不寬逾年通判離州民有告某氏刻僞稅印爲姦利者已逾十年蹤跡連蔓至數百人公歎曰盡利於民民無所逃此所謂法出而姦生者邪是爲政者之過也爲緩其獄得減死者十餘人餘皆釋而不問離人皆曰公德於我使我自新爲善人由是風化大行天禧二年還京師當召試時大臣有用事者意不悅公居數月不得召久而天子記其姓名趣使召試拜著作佐郎直集賢院階再加爲宣德郎勳騎都尉主判三司開拆司賜緋衣銀魚遷右正言階朝奉郎勳上騎都尉今天子卽位遷右司諫真宗新弃天下天子諒陰不言丁晉公用事專權欲邀致公許以知制誥公拒不往益堅已而寇萊公王文康公皆以不附已連黜公歸歎曰吾受先帝之知而至於此豈宜爲權臣所脅得罪非吾懼也既而晉公敗士嘗爲其用者皆恐懼獨公終無所屈未幾同修起居注又拜尙書禮部員外郎兼侍御史知雜事判流內銓賜服金紫改三司戶部度支二副使轉勳輕車都尉借給事中奉使契丹天聖八年拜起居舍人知制誥同知審官院會靈宮判官充翰林學士加侍讀學

士賜爵汝南縣開國子食邑五百戶太后修景德寺成詔公爲記而宦者羅崇勳主營寺事使人陰謂公曰善爲記當得參知政事公故遲之頗久使者數趣終不以進崇勳怒議之太后遷禮部郎中改龍圖閣直學士出爲西京留守是時魯肅簡公方參知一無此字政事爭之太后前卒不能留以親便求改密州遭歲旱除其公田之租數千石諸本作碩疑頓字訛又請悉除京東民租弛其鹽禁使民得賈海易食以救其飢東人至今賴之皆曰使吾人百萬口活而不飢者蔡公也徙南京留守進爵侯增邑戶五百爲一千階朝散大夫召遷拜右諫議大夫權御史中丞判吏部流內銓遷給事中勳護軍增邑五百爲千五百戶莊獻明肅皇太后崩議尊楊太妃爲太后垂簾聽政議決召百官賀公曰天子明聖奉太后十餘年今始躬親萬事以慰天下之心豈宜女后相繼稱制且自古無有固止不追班太妃卒不預政止稱太后至于宮中復爲龍圖閣直學士權三司使京師有指荆王爲飛語者內侍省得三司小吏鞠之連及數百人以上聞之大怒詔公窮治迹其所來無端而上督責愈急有司不知所爲京師爲之恐動公以謂繆妄之說起于小人不足窮治且無以慰安荆王危疑之心奏疏論之一夕三上上大悟乃可其奏止督數人而已中外之情乃安拜樞密副使進爵公增邑戶五百爲二千南海蠻酋虐其部人部人歎宜州自歸者八百餘人議者以爲叛蠻不可納宜還其部公獨以爲蠻去殘酷而歸有德且以求生宜內之荆湖賜以間田使自營今縱却之必不復還其一無此字部苟散入山谷嘗爲後患爭之不能得其後數年蠻果爲亂殺將吏十餘人宜桂以西皆警朝廷頗以爲憂景祐元年遷禮部侍郎參知政事二年賜號推忠佐理功臣進階正奉大夫勳柱國郭皇后廢京師富人陳氏女有色選入宮爲后公爭之以爲不可自辰至巳辨論不已上意稍悟遂還其家河決橫攏改而北流議者以爲當塞公曰水性下而河北地卑順其所

趣以導之可無澶滑墜瀆之患而具博數州得在河南於國家便但
理提護魏州而已從之澶滑果無患契丹祭天於幽州以兵屯界上
界上驚搔議者欲發大軍以備邊公獨料其必不動後卒無事公在
大位臨事不同無所牽畏而恭謹謙退未嘗自伐天下推之爲正人
搢紳之士倚以爲朝廷重三年煩表一有求字解職不許明年遂罷
以戶部侍郎歸班改賜推誠保德功臣勳上柱國久之出知潁州寶
元二年四月四日以疾卒于官公在潁州聞西方用兵惻然有憂國
心自以待罪外邦不得盡其所懷使其第稟言西事甚詳公之卒故
吏朱冢至潁潁之吏民見冢一有號字泣一有拜字於馬前指公嘗
所更歷施爲曰此公之迹也其爲政有仁恩所至如此平生喜薦士
一有所薦二字如楊偕郭勸劉隨龐籍段少連比比爲當世名臣公
爲人神色明秀鬚眉如畫精學博聞寬大沈默一言之出終身可復
其蒞官行己出處始終之大節可考不誣如此謹按贈兵部尚書於
今爲三品其法當證取告有司謹狀

司封員外郎許公行狀

君諱遜字景山世家歙州少仕僞唐爲監察御史李氏國除以族北
遷獻其文若干篇得召試爲汲縣尉冠氏主簿凡主簿二歲縣民七
百人詣京師願得君爲令遷秘書省校書郎知縣事數上書論北邊
事是時趙普爲相四方奏疏不可其意者悉投一覆中覆滿輒出而
焚之未嘗有所肯可獨稱君爲能曰其言與我多合一歲徙江華
令未行轉運使樊知古薦其材拜太僕寺丞磨勘錢帛糧草監丞城
和耀知海陵監三歲用監最遷大理寺丞賜緋衣銀魚監泗州排岸
司遷贊善大夫監丞興軍權貨務遷太常丞知鼎州州雜蠻蠻喜以
攻劫爲生少年百餘人私自署爲名號常伺夜出掠居人居人惡之
莫敢指君至而數曰夫政民之庇也威不先去其惡則惠亦不能及
人君政既行盜皆亡入他境約君去乃還遷國子博士奉使兩浙江

南言茶鹽利害省州縣之役皆稱旨出知興元府大修山河堰堰水
舊溉民田四萬餘頃世傳漢蕭何所爲君行壞堰顧其屬曰鄧侯方
佐漢取天下乃暇爲此以溉其農古之聖賢有以利人無不爲也今
吾豈宜憚一時之勞而廢古人萬世之利乃率工徒躬治木石石墜
傷其左足君益不懈堰成歲穀大豐得嘉禾十二莖以獻遷尚書主
客員外郎京西轉運使徙荆湖南路荆湖南接谿洞諸蠻歲出爲州
縣患君曰鳥獸可馴况蠻亦人乎乃召其酋豪諭以禍福諸蠻皆以
君言爲可信訖三歲不以蠻事聞朝廷君罷來朝真宗面稱其能會
有司言荆南久不治真宗拜君度支員外郎知府事荆南鈐轄北路
兵馬於荆湖爲大府故常用重人至君特選以材用員外郎自君而
始明年遷司封員外郎賜金紫徙知楊州州居南方之會世之仕宦
於南與其死而無歸者皆寓其家于楊州故其子弟雜居民間往往
倚權貴恃法得贖出入里巷爲不法至或破亡其家君捕其甚者答
之曰此非吏法乃吾代汝父兄教也子弟羞媿自悔稍就學問爲善
人風俗大化歲滿在道得疾卒于高郵君少孤事其母兄以孝謹聞
常戒其妻事嫂如姑而未嘗敢先其兄食衣雖弊兄不易衣不敢易
初違命侯遣其弟朝京師君之故友全一作金一作潘惟岳當從以
其家屬託君惟岳果留不返君善撫其家爲嫁其女數人李氏國亡
君載其家北歸京師以還惟岳歷官四十年不問家事好學尤喜孫
吳兵法初在僞唐數上書言事得校書郎遂遷御史王師圍金陵李
氏大將李雄擁兵數萬留上江陰持兩端李氏患之以謂非君不能
召雄君走上江以語動雄雄即聽命已而李氏以蠟書止雄於溧水
君曰此非柵兵之地留之必敗乃戒雄曰兵來慎無動待我一夕吾
當入白可與公兵俱入城君去王師挑之雄輒出戰果敗死君至收
其餘卒千人而去君少慷慨卒能自立於時其孝謹聞於其族其信
義著於其友其材能稱於其官是皆可書以傳謹狀

記十首

泗州先春亭記

景祐二年秋清河張侯以殿中丞來守泗上既至問民之所素病而治其尤暴者曰暴莫大於淮越明年春作城之外堤因其舊而廣之度爲萬有九千二百尺用人之力八萬五千泗之民曰此吾利也而大役焉然人力出於州兵而石出乎南山作大役而民不知是爲政者之私我也不出一力而享大利不可相與出米一千三百石以食役者堤成高三十三尺土實石堅捍暴備災可久而不壞既曰泗四達之州也賓客之至者有禮於是因前蔣侯堂之亭新之爲勞錢之所曰思邵亭且推其美於前人而志邦人之思也又曰泗天下之水會也歲漕必廩於此於是治常豐倉西門二夾室一以視出納曰某亭一以爲舟者之寓舍曰通漕亭然後曰吾亦有所休一有暇其勢三字乎乃築州署之東城上爲先春亭以臨淮水而望西山是歲秋子貶夷陵過泗上於是知張侯之善爲政也昔周單子聘楚而過陳見其道穢而川澤不陂梁客至不授館驛旅無所寓遂知其必亡蓋城郭道路旅舍寄寓皆二代爲政之法而周官尤謹著之以爲禦備今張侯之作也先民之備災而及于賓客往來然後思自休焉故曰善爲政也先時歲大水州幾溺前司封員外郎張侯夏守是州築堤以禦之今所謂因其舊者是也是役也堤爲大故子記其大者詳焉

夷陵縣至喜堂記

峽州治夷陵地濱大江雖一無此字有椒漆紙以通商賈而民俗儉陋常自足無所仰於四方販夫所售不過鱸魚腐鮑民所嗜而已富商大賈皆無爲而至地僻而貧故夷陵爲下縣而峽爲小州州居無郭郭通衢不能容車馬市無百貨之列而鮑魚之肆不可入雖邦君之過市必常下乘掩鼻以疾趨而民之列處竈廩屢井無異位一室

之間上父子而下畜豕其覆皆用一作以茅竹故歲常火災而俗信鬼神其相傳曰作一無此字瓦屋者不利夷陵者楚之西境昔春秋書荆以狄之而詩人亦曰蠻荆豈其陋俗自古然歟景祐二年尙書駕部員外郎朱公治是州始樹木增城闡辟南北之街作市門市區又教民爲瓦屋別竈廩異人畜以變其俗既又命夷陵令劉光裔治其縣起勅書樓飾廳事新吏舍三年夏縣功畢某有罪來是邦朱公於某有舊且哀其以罪而來爲至縣舍擇其廳事之東以作斯堂度爲疏絮高明而日居之以休其心堂成又與賓客偕至而落之夫罪戾之人宜棄惡地處窮險使其憔悴憂思而知自悔咎今乃賴朱公而得善地以偷宴安頑然使忘其有罪之憂是皆異其所以來之意然夷陵之僻陸走荆門襄陽至京師二十有八驛水道大江絕淮抵汴東水門五千五百有九十里故爲吏者多不欲遠來而居者往往不得代至歲滿或自罷去然不知夷陵風俗朴野少盜爭一作少盜事暫而令之日食有稻與魚又有橘柚茶筍四時之味江山美秀而邑居繕完無不可愛是非惟有罪者之可以忘其憂而凡爲吏者莫不始來而不樂既至而後喜也作至喜堂記藏其壁夫令雖卑而有士與民宜志其風俗變化之善惡使後來者有考焉爾一作使後來有考其歲月云爾

峽州至喜亭記

蜀於五代爲僭國以險爲虞以富自足舟車之迹不通乎中國者五十有九年宋受天命一海內四方次第平太祖改元之三年始平蜀然後蜀之絲枲織文之富衣被於天下而貢輸商旅之往來者陸輦秦鳳水道岷江不絕于萬里之外岷江之來合蜀衆水出三峽爲荆江傾折回直捍怒鬪激束之爲湍觸之爲旋順流之舟頃刻數百里不及顧視一失毫釐與崖石遇則糜潰漂沒不見蹤迹故凡一有西字蜀之可以充內府供京師而移用乎諸州者皆陸出而其羨餘不

急之物乃下于江若棄之然其爲險且不測如此夷陵爲州當峽口江出峽始漫爲平流故舟人至此者必灑酒再拜相賀以爲更生尙書虞部郎中朱公再治是州之三月作至喜亭于江津以爲舟者之停留也且誌夫天下之大險至此而始平夷以爲行人之喜幸夷陵固爲下州廩與俸皆薄而僻且遠雖有善政不足爲名譽以資進取朱公能不以陋而安之其心又喜夫人之去憂患而就樂易詩所謂愷悌君子者矣自公之來歲數大豐因民之餘然後有作惠于往來以館以勞動不違時而人有賴是皆宜書故凡公之佐吏因相與謀而屬筆於修焉

御書閣記

醴陵縣東二十里有宮曰登真其前有山世傳仙人王喬鍊藥於此唐開元間神仙道家之說興天子爲書六大字賜而揭焉太宗皇帝時詔求天下前世名山異迹而尤好書法聞登真有開元時所賜字甚奇乃取至京師閣焉已而還之又賜御書飛白字使藏焉其後登真大火獨飛白書存康定元年道士彭知一探其私笈一作篋以市工材悉復宮之舊建樓若干尺以藏賜書予之故人處士任君爲子言其事來乞文以志凡十餘請而不懈予所領職方悉掌天下圖書考圖驗之醴陵老佛之居凡八十而所謂登真者其說皆然乃爲之記夫老與佛之學皆行於世久矣爲其徒者常相訾病若不相容於世二家之說皆見斥於吾儒宜其合勢并力以爲拒守而乃反自相攻惟恐不能相弱者何哉豈其死生性命所持之說相整而然邪故其代爲興衰各繫於時之好惡雖善辯者不能合二說而一之至其好大宮室以矜世人則其爲事同焉然而佛能箝人情而鼓以禍福人之趣者常衆而熾老氏獨好言清淨遠去靈仙飛化之術其事冥深不可質究則其爲一無此字常以淡泊無爲爲務故凡佛氏之動搖輿作爲力甚易而道家非遭人主之好尙不能獨興其間能自力

而不廢者豈不賢於其徒者哉知一是已慶曆二年八月八日廬陵歐陽修記

畫舫齋記

子至滑之三月卽其署東偏之室治爲燕私之居而名曰畫舫齋齋廣一室其深七室以戶相通凡入子室者如入乎舟中其溫室之與則穴其上以爲明其虛室之疏以達則欄檻其兩旁以爲坐立之倚凡偃休於吾齋者又如偃休乎舟中山石齒翠佳花美木之植列於兩簷之外又似汎乎中流而左山右林之相映皆可愛者故因以舟名焉周易之象至於履險蹈難必曰涉川蓋舟之爲物所以濟險難而非安居之用也今子治齋於署以爲燕安而反以舟名之豈不戾哉矧予又嘗以罪謫走江湖間自汴絕淮浮于大江至于巴峽轉而入于漢沔計其水行幾萬餘里其羈窮不幸而卒遭風波之恐往往二字一作或叫號神明以脫須臾之命者數矣當其恐時顧視前後凡舟之人非爲商賈則必仕宦因竊自歎以謂非言利與不得已者孰肯至是哉賴天之惠全活其生今得除去宿負列官于朝以來是州一無此二字飽廩食而安署居追一作退思曩時山川所歷舟楫之危蛟鼉一有白鱉二字之出沒波濤之洶歟宜其寢驚而夢愕而乃忘其險阻猶以舟名其齋豈真樂於舟居者邪然予聞古之人有逃世遠去江湖之上終身而不肯反者其必有所樂也苟非冒利於險有罪而不得已使順風恬波傲然一無此二字枕席之上一日而一無此字千里則舟之行豈不樂哉一作誠可樂也顧予誠有所未暇而此八字一作今舟之制尤多舫者宴嬉之舟也姑以名予齋奚曰不宜子友蔡君謨善大書頗怪偉將乞其大字以題於楹懼其疑予之所以名齋者故具以云又因以一無此字置于壁壬午十二月十二日書

王彥章畫像記

太師王公諱彥章字子明鄆州壽張人也事梁爲宜義軍節度使以身死國葬於鄆州之管城晉天福二年始贈太師公在梁以智勇聞梁晉之爭數百戰其爲勇將多矣而晉人獨畏彥章自乾化後常與晉戰屢困莊宗於河上及梁末年小人趙巖等用事梁之大臣老將多以讒不見信一作用皆怒而有怠心而梁亦盡失河北事勢已去諸將多懷顧望獨公奮然自必不少屈懈志雖不就卒死以忠公既死而梁亦亡矣悲夫五代終始纔五十年而更有二君五易國而八姓士之不幸而出乎其時能不汗其身得全其節者鮮矣公本武人不知書其語質平生嘗爲人曰豹死留皮人死留名蓋其義勇忠信出於天性而然予於五代書竊有善善惡惡之志至於公傳未嘗不感憤歎息惜乎舊史殘略不能備公之事康定元年予以節度判官來此求於滑人得公之孫審所錄家傳頗多於舊史其記德勝之戰尤詳又言敬翔怒末帝不肯用公欲自經於帝前公因用笏畫山川爲御史彈而見廢又言公五子其二同公死節此皆舊史無之又云公在滑以讒自歸於京師而史云召之是時梁兵盡屬段凝京師羸兵不滿數千公得保鑿五百人之鄆州以力寡敗於中都而史云將五千以往者亦皆非也公之攻德勝也初受命於帝前期以三日破敵梁之將相聞者皆竊笑及破南城果三日是時莊宗在魏聞公復用料公必速攻自魏馳馬來救已不及矣莊宗之善料公之善一無此字出奇何其神哉今國家罷兵四十年一旦元昊反敗軍殺將連四五年而攻守之計至今未決予嘗獨持用奇取勝之議而歎邊將屢失其機時人聞予說者或笑以爲狂或忽若不聞雖予亦惑不能自信及讀公家傳至於德勝之捷乃知古之名將必出於奇然後能勝然非審於爲計者不能出奇奇在速速在果此天下偉男子之所爲非拘牽常筭之士可到也每讀其傳未嘗不想見其人後二年予復來通判州事歲之正月過俗所謂鐵槍寺者又得公畫像而拜

焉歲久磨滅隱隱可見亟命工完理之而不敢有加焉懼失其真也公一有九字善用槍當時號王鐵槍公死已百年至今俗猶以名其寺童兒牧豎皆知王鐵槍之爲良將也一槍之勇同時豈無而公獨不朽者豈其忠義之節使然歟畫已百餘年矣完之復可百年然公之不泯者不繫乎畫之存不存二字一作否也而予尤區區如此者蓋其希慕之至焉耳讀其書尙想乎其人況得拜其像識其面目不忍見其壞也畫既完因書予所得者于後而歸其人使藏之一有焉字

襄州穀城縣夫子廟記

釋奠釋菜祭之略者也古者士之見師以菜爲贄故始入學者必釋菜以禮其先師其學官四時之祭乃皆釋奠釋奠有樂無尸而釋菜無樂則其又略也故其禮亡焉而今釋奠幸存然亦無樂又不徧舉於四時獨春秋行事而已記曰釋奠必有合有國故則否謂凡有國各自祭其先聖先師若唐虞之夔伯夷周之周公魯之孔子其國之無焉者則必合於鄰國而祭之然自孔子沒後之學者莫不宗焉故天下皆尊以爲先聖而後世無以易學校廢久矣學者莫知所師一有則字又取孔子門人之高第曰顏回者而配焉以爲先師隋唐之際天下州縣皆立學置學官生員而釋奠之禮遂以著令其後州縣學廢而釋奠之禮吏以其著令故得不廢學廢矣無所從祭則皆廟而祭之荀卿子曰仲尼聖人之不得勢者也然使其得勢則爲堯舜矣不幸無時而沒特以學者之故享弟子春秋之禮而後之人不推所謂釋奠者徒見官爲立祠而州縣莫不祭之則以爲夫子之尊由此爲威甚者乃謂生雖不得位而沒有所享以爲夫子榮謂有德之報雖堯舜莫若何其謬論者歟祭之禮以迎尸酌鬯爲威釋奠薦饌直奠而已故曰祭之略者其事有樂舞授器之禮今又廢則於其略者又不備焉然古之所謂吉凶鄉射賓燕之禮民得而見焉者今皆

廢失而州縣幸有社稷釋奠風雷雨師之祭民猶得以識先王之禮器焉其牲酒器幣之數升降俯仰之節吏又多不能習至其臨事舉多不中而色不莊使民無所瞻仰見者怠焉因以為古禮不足復用可勝歎哉一無此四字大宋之興於今八十年天下無事方修禮樂崇一作尊儒術以文太平之功以謂王爵未足以尊夫子又加至聖之號以褒崇之講正其禮下於州縣而吏或不能論上一有之字意凡有司簿書之所不責者謂之不急非師古好學者莫肯盡心焉穀城令狄君要為其邑未逾時修文宣王廟易於縣之左大其正位為學舍於其旁藏九經書率其邑之子弟興於學然後一作后考制度一作圖記為俎豆邊籩罇爵簠簋凡若干一作凡百餘事以與其邑人行事一本大宋之興至謂之不急一段載于此下穀城縣政久廢狄君居之期月稱治又能載國典修禮興學急其有司所不責者認認然惟恐不及可謂有志之士矣

吉州學記

慶曆二年秋天子開天章閣召政事之臣八人問治天下其要有幾施於今者宜何先使坐而書以對八人者皆震恐失位俯伏頓首言此非愚臣所能及惟陛下所欲為則天下幸甚於是詔書屢下勸農桑責吏課舉賢才其明年二月遂詔天下皆立學置學官之員然後海隅徼塞四方萬里之外莫不皆有學嗚呼感矣學校王政之本也古者致治之盛衰視其學之興廢記曰國有學遂有序黨有庠家有塾此三代極盛之時大備之制也宋興蓋八十有四年而天下之學始克大立豈非感美之事須其久而後至於大備歟是以詔下之日臣民喜幸而奔走就事者以後為羞其年十月吉州之學成州舊有夫子廟在城之西北今知州事李侯寬之至也謀與州人遷而大之以為學舍事方上請而詔已下學遂以成李侯治吉敏而有方其作學也吉之士率其私錢一百五十萬以助用人之力積二萬二千工

而人不以為勞其良材堅瓠之用凡二十二萬三千五百而人不以為多學有堂庭齋講有藏書之閣有賓客之位有游息之亭嚴嚴翼翼壯偉闕耀而人不以為侈既成而來學者常三百餘人予世家于吉而一無此字濫官于朝一有廷字進不能贊揚一作明字天子之威美退不得與諸生揖讓乎其中然予聞教學之法本於人性磨揉遷革使趨於善其勉於人者勸其入於人者漸善教者以不倦之意須遲久之功至於禮讓興行而一無此字風俗純美然後為學之成今州縣之吏不得久其職而躬親於教化也故李侯之績及於學之立而不及待其成惟後之人毋廢慢天子之詔而殆一作息以中止幸子他日因得歸榮故鄉而謁於學門將見吉之士皆道德明秀而可為公卿問於其郊而少者扶其羸老壯者代其負荷於道路然後慈於其家行於其郊而少者扶其羸老壯者代其負荷於道路然後樂學之道成而得時從先生耆老席于衆賓之後聽鄉樂之歌飲獻酬之酒以詩頌天子太平之功而周覽學舍思詠李侯之遺愛不亦美哉故於其始成也刻辭于石而立諸其廡以俟

豐樂亭記

修既治滁之明年夏始飲滁水而甘問諸滁人得於州一作城西西南百步之近其上豐山聳然而特立下則幽谷窈然而深藏中有清泉滄然而仰一無此字出俯仰左右顧而樂之於是疏泉鑿石闢地以為亭而與滁人往遊於其間滁於五代干戈之際用武之地也昔太祖皇帝嘗以周師破李景兵十五萬於清流山下生擒其將皇甫暉姚鳳於滁東門之外遂以平滁修營考其山川按一作按其山水考其圖記升高以望清流之間欲求暉鳳就擒之所而故老皆無在者蓋天下之平久矣自唐失其政海內分裂豪傑並起而爭一有而字所在一有自字為敵國者何可勝數及宋受天命聖人出而四海一嚮之憑恃險阻剗削消磨百年之閒漠然徒見山高而水清欲問其

事而遺老盡矣今滁介於江淮之間舟車商賈四方賓客之所不至
民生不見外事而安於畎畝衣食以樂生送死而孰知上之功德休
養生息一作覆被休養涵煦百年之深也修之來此樂其地僻而事
簡又愛其俗之安閑既得斯泉于山谷之間乃一無此字日與滁人
仰而望山俯而聽泉掇幽芳而蔭喬木風霜冰雪刻露清秀四時之
景一作美無不可愛又幸其民樂其歲物之豐成而喜與予遊也因
爲本其山川道其風俗之美使民知所以安此豐年之樂者幸生無
事之時也夫宣上恩德以與民共樂刺史之事也遂書以名其亭焉
慶曆丙戌六月日右正言知制誥知滁州軍州事歐陽修記

醉翁亭記

環滁皆山也其西南諸峯林壑尤美望之蔚然而深秀者琅琊也山
行六七里漸聞水聲潺潺而瀉出于兩峯之間者醴泉也峯回路轉
有亭翼然臨于泉上者醉翁亭也作亭者誰山之僧曰一無此字智
僊也名之者誰太守自謂也太守與客來飲于此飲少輒醉而年又
最高故自號曰醉翁也醉翁之意不在酒在乎山水之間也山水之
樂得之心而寓之酒也若夫日出而林霏開雲歸而巖穴暝晦明變
化者山間之朝暮也野芳發而幽香佳木秀而繁陰風霜高潔水清
一作洞一作落而石出者山間之四時也朝而往暮而歸四時之景
不同而樂亦無窮也至於負者歌于塗行者休于樹前者呼後者應
偃偻提攜往來而不絕者滁人遊也臨谿而漁谿深而魚肥醴泉爲
酒泉香而酒冽一作泉冽而酒香山肴野蔌雜然而前陳者太守宴
也宴酣之樂非絲非竹射者中弈者勝觥籌交錯起坐而誼譁者衆
賓懼也蒼顏白髮頽然乎其間者太守醉也已而夕陽在山人影散
亂太守歸而賓客從也樹林陰翳鳴聲上下遊人去而禽鳥樂也然
而禽鳥知山林之樂而不知人之樂人知從太守遊而樂碑有而字
不知太守之樂其樂也醉能同其樂醒能述以文者太守也太守謂

誰廬陵歐陽修也

居士集卷第三十九

記八首

菱谿石記

菱谿之石有六其四為人取去其一差小而尤奇亦藏民家其最大者偃然僵臥於谿側以其難徙故得獨存每歲寒霜落水涸而石出谿旁人見其可怪往往祀以為神菱谿按圖與經皆不載唐會昌中刺史李濟為苻谿記云水出永陽嶺西經皇一作黃道山下以地求之今無所謂苻谿者詢於滁州人曰此谿是也楊行密有一作據淮南准人為諱其嫌名以苻為菱理或然也谿傍若有遺址云故將劉金之宅石即劉氏之物也金偽一作為吳時貴將與行密俱起合號二十六英雄金其一也金本武夫悍一作驍卒而乃能知愛賞奇異為兒女子之一作所好豈非遭逢亂世功成志得驕於富貴之佚欲而然邪想其陂池臺榭奇木異草與此石稱亦一時之盛哉今劉氏之後散為編民一作氓尚有居谿旁者予感夫人物之廢興一無此字惜其可愛而一有反字棄也乃以三年曳置幽谷又索其小者得於白塔民朱氏遂立于亭之南北亭負城而近以為滁人歲時嬉遊之好夫物之奇者弃沒於幽遠則可惜置之耳目則愛者不免取之而去嗟夫劉金者雖不足道然亦可謂雄勇一作勇悍之士其平生志意豈不偉哉及其後世荒堙零落至於子孫湮沒而無聞况欲長有此石乎用此一無此二字可為富貴者之戒而好奇之士聞此石者一作聞石而來可以一賞而足何必取而去也哉

海陵許氏南園一作園亭記

高陽許君子春治其海陵郊居之南為小園作某亭某堂于其間許君為江浙荆淮制置發運使其所領六路七十六州之廣凡賦斂之多少山川之遠近舟楫之往來均節轉徙視江湖數千里之外如運諸其一無此字掌能使人樂為而事集富國家用兵之後修前

人久廢之職補京師匱乏之供為之六年厥績大著自國子博士遷主客員外郎由判官為副使夫理繁而得其要則簡簡則易行而不違惟簡與易然後其力不勞而有餘夫以制置七十六州之有餘治數畝之地為園誠不足施其智而於君之事亦不足書君之美矣子特書其一節可以示海陵之人者君本歙人世有孝德其先君司封喪其父母事其兄如父戒其妻事其嫂如姑衣雖弊兄未易衣不敢易食雖具兄未食不敢先食司封之亡一子當得官其兄弟相讓久之諸兄卒以讓君君今遂顯于朝以大其門君撫兄弟諸子猶己子歲當上計京師而弟之子病君留不忍去其子亦不忍捨君而留遂以俱行君素清貧罄其家貲走四方以求醫而藥必親調食飲必親視至其矢溲亦親候其時節顏色所下一作疾如可理則喜或變動逆節則憂戚之色不自勝其子卒君哭泣悲哀行路之人皆嗟歎嗚呼子見許氏孝悌一有者字著于三一作四世矣凡海陵之人過其園者望其竹樹登一作觀其臺榭思其宗族少長相從愉愉而樂於此也愛其人化其善自一家而刑一鄉由一鄉而推之無遠邇一作近使許氏之子孫世久而一無此字愈篤則一作焉不獨化及其人將見其園間之草木有駢枝而連理也禽鳥之翔集于其間者不爭巢而棲不擇子而哺也嗚呼事患不為與夫怠而止爾惟力行而不怠以止然後知予言之可信也慶曆八年十二月二十七日廬陵歐陽修記

真州東園記

真為州當東南之水會故為江淮兩浙荆湖發運使之治所龍圖閣直學士弼君正臣侍御史許君子春之為使也得監察御史裏行馬君仲塗為其判官三人者樂其相得之懽而因其暇日得州之監軍廢營以作東園而日往遊焉歲秋八月子春以其職事走京師圖其所謂東園者來以示予曰園之廣百畝而流水橫其前清池浸其右

高臺起其一作起字北臺吾望以拂雲之亭池吾俯以澄虛之閣水吾泛以畫舫之舟飲其中以爲清譙之堂闢其後以爲射賓之圃芙渠芰荷之的歷幽蘭白芷之芬芳與夫佳花美木列植而交陰此前日之蒼烟白露而荆棘也高臺巨楹水光日景動搖而下上一作上下其寬閑深靚可以答遠響而生清風此前日之頽垣斷塹而荒墟一作墟也嘉時令節州人士女嘯歌而管絃此前日之晦冥風雨鼙鼙鳥獸之鳴音也吾於是信有力焉凡圖之所載蓋其一二之略也若迺升于高以望江山之遠近嬉于水而逐魚鳥之浮沉其物象意趣登臨之樂覽者各自得焉凡工之不能畫者吾亦不能言也其爲我書其大概焉又曰真天下之衝也四方之賓客往來者吾與之共樂于此豈獨私吾二人者哉然而一作其池臺日益以新草樹日益以茂四方之士無日而不來而吾二人者有時而皆去也豈不眷於是哉不爲之記則後孰知其自吾二人者始也予以謂三君子之材賢足以相濟而又協于其職知所後先使上下給足而東南六路之人無辛苦愁怨之聲然後休其餘閑又與四方之賢士大夫夫共樂于此是皆可嘉也乃爲之書廬陵歐陽修記

浮槎山水記

浮槎山在慎縣南二十五里或曰浮閣山一無此五字或曰浮巢二一無此字山其事出於浮圖老子之徒荒怪誕幻之說其上有泉自前世論水者皆弗道余嘗讀茶經愛陸羽善言水後得張又新水記載劉伯芻李季卿所列水次第以爲得之於羽然以茶經考之皆不合又新妄狂險譎之士其言難信頗疑非羽之說及得浮槎山水然後益以羽爲知水者浮槎與龍池山皆在廬州界中較其水味不及浮槎遠甚而又新所記以龍池爲第十浮槎之水弃而不錄以此知其所失多矣羽則不然其論曰山水上江次之井爲下山水乳泉石池漫流者上其言雖簡而於論水盡矣浮槎之水發自李侯嘉祐二

年李侯以鎮東軍一無此字留後出守廬州因遊金陵登蔣山飲其水既又登浮槎至其山上有石池涓涓可愛蓋羽所謂乳泉漫流者也飲之而甘乃考圖記問於故老得其事迹因以其水遺余於京師子報之曰李侯可謂賢矣夫窮天下之物無不得其欲者富貴者之樂也至於蔭長松藉豐草聽山溜之潺湲飲石泉之滴瀝此山林者之樂也而山林之士視天下之樂不一動其心或有欲於心顧力不可得而止者乃能退而獲樂於斯彼富貴者之能致物矣而其不可兼者惟山林之樂爾惟富貴者而不得兼然後貧賤之士有以自足而高世其不能兩得亦其理與勢之然歟今李侯生長富貴厭於耳目又知山林之爲樂至於攀緣上下幽隱窮絕人所不及者皆能得之其兼取於物者可謂多矣李侯折節好學喜交賢士敏於爲政所至有能名凡物不能自見而待人以彰者有矣其物未必可貴而因人以重者亦有矣故予爲志其事俾世知斯一作奇泉發自李侯始也三年二月二十有四日廬陵歐陽修記

有美堂記

嘉祐二年龍圖閣直學士尙書吏部郎中梅公出守于杭於其行也天子寵之以詩於是始作有美之堂蓋取賜詩之首章而各之以爲杭人之榮然公之甚愛斯堂也雖去而不忘今年自金陵遣人走京師命子誌之其請至六七而不倦予乃爲之言曰夫舉天下之至美與其樂有不得而兼焉者多矣故窮山水登臨之美者必之乎寬閑之野寂寞之鄉而後得焉覽人物之威麗夸都邑之雄富者必據乎四達之衝舟車之會而後足焉蓋彼放心於物外而此娛意於繁華二者各有適焉然其爲樂不得而兼也今天所謂羅浮天台衡嶽廬阜洞庭之廣三峽之險號爲東南奇偉秀絕者乃皆在平下州小邑僻陋之邦此幽潛之士窮愁放逐之臣之所樂也若乃四方之所聚百貨之所交物盛人衆爲一都會而又能兼有山水之美以資富貴

之娛者惟金陵錢塘然二邦皆僭竊於混世及聖宋受命海內爲一金陵以後服見誅今其江山雖在而頽垣廢址荒烟野草過而覽者莫不爲之躊躇而悽愴獨錢塘自五代時知算中國効臣順及其亡也頓首請命不煩干戈今其民幸富完安樂又其俗習一作習俗工巧邑屋華麗蓋十餘萬家環以湖山左右映帶而閩南海賈風帆浪舶出入於江濤浩渺烟雲香靄之間可謂盛矣而臨是邦者必皆朝廷公卿大臣若天子之侍從又有四方遊士爲之賓客故喜占形勝治亭一作臺樹相與極遊覽之娛然其於所取有得於此者必有遺於彼獨所謂有美堂者山水登臨之美人物邑居之繁一寓目而盡得之蓋錢塘兼有天下之美而斯堂者又盡得錢塘之美焉宜乎公之甚愛而難忘也梅公清慎好學君子也視其所好可以知其人焉四年八月丁亥廬陵歐陽修記

相州晝錦堂記

仕宦而至將相富貴而歸故鄉此人情之所榮而今昔之所同也蓋士方窮時困阨閭里庸人孺子皆得易而侮之若季子不禮於其嫂買臣見棄於其妻一旦高車駟馬旌旄導前而騎卒擁後夾道之人相與駢肩累迹瞻望咨嗟而所謂庸夫愚婦者奔走駭汗羞愧俯伏以自悔罪於車塵馬足之間一有而莫敢仰視五字此一介之士得志一有於字當時而意氣之盛昔人比之衣錦之榮者也惟大丞相衛國公則不然公相人也世有令德爲時名卿自公少時已擢高科登顯仕海內之士聞下風而望餘光者蓋亦有年矣所謂將相而富貴皆公所宜素有非如窮阨之人僥倖得志於一時出於庸夫愚婦之不意以驚駭而夸耀之也然則高牙大纛一作旆不足爲公榮桓圭衮冕不足爲公貴惟德被生民而功施社稷勒之金石播之聲詩以耀後世而垂無窮此公之志而士亦以此望於公也豈止夸一時而榮一鄉哉公在至和中嘗以武康之節來治相乃作晝錦之堂

于後圃既又刻詩於石以遺相人其言以快恩讎矜名譽爲可薄蓋不以昔人所夸者爲榮而以爲戒於此見公之視富貴爲如何而其志豈易量哉故能出入將相勤勞王家而夷險一節至於臨大事決大議垂紳正笏不動聲氣一作色而措天下於泰山之安可謂社稷之臣矣其豐功盛烈所以銘彝鼎而被弦歌者乃邦家之光非閭里之榮也余雖不獲登公之堂幸嘗竊誦公之詩樂公之志有成而喜爲天下道也於是乎書尙書吏部侍郎參知政事歐陽修記

仁宗御飛白記

治平四年夏五月余將赴亳假道于汝陰因得閱書於子履之室而雲章爛然輝映日月爲之正冠肅容再拜而後敢仰視蓋仁宗皇帝之御飛白一作帛也曰此寶文閣之所藏也胡爲於子之室乎子履曰曩者天子宴從臣於羣玉而賜以飛白余幸得與賜焉子窮於世久矣少不悅於時人流離竄斥十有餘年而得不老死江湖之上者蓋以遭時清明天子嚮學樂育天下之材而不遺一介之賤一作魯使得與羣賢並遊於儒學之館而天下無事歲時豐登民物安樂天子優游清閑不邇聲色方與羣臣從容於翰墨之娛而余於斯時竊獲此賜非惟一介之臣之榮遇亦朝廷一時之盛事也子其爲我志之余曰仁宗之德澤涵濡於萬物者四十餘年雖田夫野老之無知猶能悲歌思慕於壠畝之間而况儒臣學士得望清光蒙恩寵登金門而上玉堂者乎於是相與泫然流涕而書之夫玉韞石而珠藏淵其光氣常見於外也故山輝如白虹水變而五色者至寶之所在也今賜書之藏于子室也吾知將有望氣者言榮光起而屬天者必賜書之所在也一有觀文殿學士刑部尙書歐陽修謹記

峴山亭記一本題上有史光祿修

峴山臨漢上望之隱然蓋諸山之小者而其名特著於荊州者豈非以其人哉其人謂誰羊祜叔子杜預元凱是已方晉與吳以兵爭常

倚荊州以爲重而二子相繼於此遂以平吳而成晉業其功烈已蓋於當世矣至於風流餘韻藹然被於江漢之間者至今人猶思之而於思叔子也一作而於叔子思之尤深蓋元凱以其功一作力而叔子以其仁二子所爲雖不同然一作謂皆足以垂於不朽余一作而頗疑其反自汲汲於後世之名者何哉傳言叔子嘗登茲山慨然語其屬以謂此山常在而前世之士皆已湮滅於無聞因自顧而悲傷然獨不知茲山待已而名著也元凱銘功於二石一置茲山之上一投漢水之淵是知陵谷有變而不知石有時而磨滅也豈皆自喜其名之甚而過爲無窮之慮歟將自待者厚而所思者遠歟山故有亭世傳以爲叔子之所遊止也故其屢廢而復興者由後世慕其名而思其人者多也熙寧元年余友人史君中輝以光祿卿來守襄陽明年因亭之舊廣而新之既一無此字周以回廊之壯又大其後軒使與亭相稱君知名當世所至有聲襄人安其政而樂從其遊也因以君之官名其後軒爲一作日光祿堂又欲紀其事于石以與叔子元凱之名並傳于久遠君皆不能止也乃來以記屬於余余謂君知慕叔子之風而襲其遺迹則其爲人與其志之所存者可知矣襄人愛君而安樂之如此則君之爲政於襄者又可知矣此襄人之所欲書也若其左右山川之勝勢與夫草木雲煙之杳靄出沒於空曠有無之間而可以備詩人之登高寫離騷之極目者宜其覽者自得之至於亭屢廢興或有記或不必究其詳者一有則字皆不復道一有也字熙寧三年十月二十有二日六一居士歐陽修記

居士集卷第四十一 集四十一

序七首

章望之字序

校書郎章君一作望之嘗一無此字以其名望之一無二字來請字
 曰願有所教使得以勉焉而自昂者予爲之字曰表民而告之曰古
 之君子所以異乎衆人者言出而爲民信事行而爲世法其動作容
 貌皆可以表於民一作皆有以爲民表也故紘綆一作纓旒冕弁以
 爲首容佩玉玦環以爲行容衣裳黼黻一作設色以爲身容手有手
 容足有足容揖讓登降獻酬俯仰莫不有容又見其寬柔温厚剛嚴
 果毅之色以爲仁義之容服其服載其車立乎朝廷而正君臣出入
 宗廟而臨大事儼然人皆望而畏之曰此吾民之所尊也非民之知
 尊君子而君子者能自修而尊者也然而行不充于內德不備於人
 雖感其服文其容民不尊也一作民弗尊也已名山大川一方之望
 也山川之岳瀆一有則字天下之望也故君子之賢於一鄉者一鄉
 之望也賢於一國者一國之望也名烈著於天下者天下之望也功
 德被于後世者萬世之望也孝慈友悌達于一鄉一作於州閭古所
 謂鄉先生者一鄉之望也春秋之賢大夫若隨之季良鄭之子產者
 一作春秋諸侯之大夫若鄭之子產吳之季札之類一國之望也位
 于二字一作居中而姦臣賊子不敢竊一作輒發于外如漢之大將
 軍出入將相朝廷以爲輕重天下繫其一一作以爲安危如唐之裴丞
 相一有若此二字者天下之望也其人已沒一作死其事已久一作
 矣聞其名想其人若不可及者夔龍稷契是也其功可以及百一作
 被萬世其道可以師百王雖有賢一作後聖莫敢過之一作自謂莫
 及者周孔是也此萬世之望而皆所以爲民之表也傳曰其在一作
 在其賢者識其大者遠二字一作遠大者一有若此數者皆可自擇
 而勉焉者也今十四字章君儒其衣冠氣剛色仁好學而有志三字

一作志於古視其絮然修乎其外而輝然充乎其內以發乎一作爲
 文辭則又辯博放一作宏肆而無涯一作不流是數者皆可以自擇
 而勉焉者也一無此十三字是固一無此字能識夫一作其遠大者
 矣雖予何何字一作信可以最焉第一作敢因其志廣其說一作覆
 爲之言以塞請慶曆三年六月日序

釋祕演詩集序

予少以進士遊京師因得盡交當世之賢豪然猶以謂國家臣一四
 海休兵革養息天下以無事者四十年而智謀雄偉非常之士無所
 用其能者往往伏而不出山林屠販必有老死而世莫見者欲從而
 求之不可得其後得吾亡友石曼卿曼卿爲人廓然有大志時人不
 能用其材曼卿亦不屈以求合無所放其意則往往從布衣野老酣
 嬉淋漓顛倒而不厭予疑所謂伏而不見者庶幾狎而得之故嘗喜
 從曼卿遊欲因以陰求天下奇士浮屠二字一作僧祕演者與曼卿
 交最久亦能遺外世俗以氣節相高二人懽然無所間曼卿隱於酒
 祕演隱於浮屠皆奇男子也然喜爲歌詩以自娛當其極飲大醉一
 作臨水望月歌吟笑呼以適天下之樂何其壯也一時賢士皆願從
 其一作之游予亦時至其室十年之間祕演比渡河東之濟鄆無所
 合困而歸曼卿已死祕演亦老病嗟一作若夫二人者予乃見其威
 衰則余亦將老矣夫曼卿詩辭清絕尤稱祕演之作以爲雅健有詩
 人之意祕演狀貌雄傑其胸中浩然既習于佛無所用獨其詩可行
 于世而懶不自惜已老怯其囊尙得三四百篇皆可喜者曼卿死祕
 演漢然無所向聞東南多山水其巔崖岬嶂江濤洶涌甚可壯也遂
 欲往遊焉足以知其老而志在也於其將行爲敘其詩因道其感時
 以悲其衰慶曆二年十二月二十八日廬陵歐陽修序

釋惟儼文集序

惟儼姓魏氏杭州人少遊京師一作二十餘年雖學于佛而通儒

術喜為辭章與吾亡友曼卿交最善曼卿遇人無所擇必皆盡其忻
 歡惟儼非賢士不交有不可其意無貴賤一切閉拒絕去不少顧曼
 卿之兼愛惟儼之介所趣雖異而交合無所間曼卿嘗曰君子泛愛
 而親仁惟儼曰不然吾所以不交妄人故能得一作得待天下士若
 賢不肖混則賢者安肯顧我哉以此一時賢士多從其遊居相國淨
 園不出其戶十五年士嘗遊其室者禮之惟恐不至及去為公卿貴
 人未始一往于之然嘗竊怪平生所交皆當世賢傑未見一有卓
 卓著一作見功業如古人可記者因謂世所稱賢材若不啻兵走萬
 里立功海外則當佐天子號令賞罰於明堂苟皆不用則絕寵辱遺
 世俗自高而不屈尚安能酣養於富貴而無為哉醉則一作嘗或以
 此誚其坐人人亦復之以謂遺世自守古人之所易若奮身逢世欲
 必就功業此雖聖賢難之周孔所以窮達異也今子老於浮圖不見
 用於世而幸不踐窮亨之塗乃以古事之已然而責今人之必不然邪
 雖然惟儼四字一作儼雖傲乎退優於一室天下之務當世之利病
 聽其言終日不厭惜其將老也已曼卿死惟儼亦買地京城之東以
 謀其終乃斂平生所為文數百篇示予曰曼卿之死既已表其墓願
 為我序其文然及我之見也嗟夫惟儼既不用於世其材莫見一作
 顯於時若考其筆墨馳騁文章瞻逸之能可以見其志矣廬陵歐陽
 永叔序

詩譜補亡後序

歐陽子曰昔者聖人已沒六經之道幾熄於戰國而焚弃於秦自漢
 已來收拾亡逸發明遺義而正其訛繆得以粗備傳于一作於今者
 豈一有止守一人之力哉後之學者因迹前世之所傳而較其得失
 或有之矣若使徒抱焚餘殘脫之經俛俛於去聖千百年後不見先
 儒中間之說而欲特立一家之學者果有能哉吾未之信也然則先
 儒之論苟非詳其終始而抵牾質於聖人而悖理害經之甚有不得

已而後改易者何必徒為異論以相訾也毛鄭於詩其學亦已博矣
 子嘗依其箋傳考之於經而證以序譜惜其不合者頗多蓋詩述商
 周自生民玄鳥上陳稷契下迄一作訖陳靈公千五六百歲之間旁
 及列國君臣世次國地山川封域圖牒鳥獸草木魚蟲之名與其風
 俗善惡方言訓故一作詰感衰治亂美刺之由無所不載然則孰能
 無失於其間哉予疑毛鄭之失既多然不敢輕為改易者意其為說
 不止於箋傳而恨己一作己恨不得盡見二家之書未能徧通其旨
 夫不盡見其書而欲折其是非猶不盡人之辭一作辯而欲斷其訟
 之曲直其能果於自決乎其能使之必服乎世言鄭氏詩譜最詳求
 之久矣不可得雖崇文總目秘書所藏亦無之慶曆四年奉使河東
 至于絳州偶得焉其文有注而不見名氏然首尾殘缺自周公致太
 平已上皆亡之其國譜旁行尤易為訛舛悉皆顛倒錯亂不可復考
 凡詩雅頌兼列商魯其正變之風十有四國而其次比莫詳其義惟
 封國變風之先後不可以不知周召王豳同出於周邶鄘并於衛檜
 魏無世家其可考者陳齊衛晉曹鄭秦此封國之先後也豳齊衛檜
 陳唐秦鄭魏曹此變風之先後也周南召南邶鄘衛王鄭齊豳秦魏
 唐陳曹此孔子未刪詩之前周大師樂歌之次第也周召邶鄘衛王
 檜鄭齊魏唐秦陳曹豳此鄭氏詩譜次第也黜檜後陳此今詩次比
 也初子未見鄭譜嘗略考春秋史記本紀世家年表而合以毛鄭之
 說為詩圖十四篇今因取以補鄭譜之亡者足以見二家所說世次
 先後甚備因據而求其得失較然矣而仍存其圖庶幾以見予於鄭
 氏之學盡心焉耳夫盡其說而有所不通然後得以論正予豈好為
 異論者哉凡補其譜十有五補其文字二百七一本注云譜序自周
 公致太平已上皆亡其文字子取孔穎達正義所載之文補足因為之
 注自周公已下即用舊注云增損塗乙改正者二一作八百八十三
 而鄭氏之譜復完一有矣字

集古錄目序

物常聚於所好而常得於有力之彊有力而不好好之而無力雖近且易有不能致之象犀虎豹蠻夷山海殺人之獸然其齒角皮革可聚而有也玉出崑崙流沙萬里之外經十餘譯乃至乎中國珠出南海常生深淵採者腰絙而入水形色非人往往不出則下鮑蛟魚金礦于山鑿深而穴遠篝火餽糧而後進其崖崩窟塞則遂壅於其中者率常數十百人其遠且難而又多死禍常如此然而金玉珠璣世常兼聚而有也凡物好之而有力則無不至也湯盤孔鼎岐陽之鼓岱山鄒嶧會稽之刻石與夫漢魏已來聖君賢士桓碑彝器銘詩序記下至古文籀篆分隸諸家之字書皆三代以來至寶怪奇偉麗工妙可喜之物其去人不遠其取之無禍然而風霜兵火湮淪磨滅散弃於山崖墟莽之間未嘗收拾者由世之好者少也幸而有好之者又其力或不足故僅得其一二而不能使其聚也夫力莫如好好莫如一子性顛而嗜古凡世人之所貪者皆無欲於其間故得一其所好於斯好之已篤則力雖未足猶能致之故上自周穆王以來下更秦漢隋唐五代外至四海九州名山大澤窮崖絕谷荒林破塚神仙鬼物詭怪所傳莫不皆有以爲集古錄以謂傳一作傳寫失真故因其石本軸而藏之有卷帙次第而無時世之先後蓋其取多而未已故隨其所得而錄之又以謂聚多而終必散乃撮其大要別爲錄目因并載夫可與史傳正其闕謬者以傳後學庶益於多聞或譏予曰物多則其勢難聚聚久而無不散何必區區於是哉予對曰足吾所好玩而老焉可也象犀金玉之聚其能果不散乎予固未能以此而易彼也廬陵歐陽修序

蘇氏文集序

子友蘇子美之亡後四年始得其平生文章遺藁於太子太傅杜公之家而集錄之以爲十卷子美杜氏婿也遂以其集歸之而告于公

曰斯文金玉也弄擲埋沒糞土不能銷蝕其見遺于一時必有收而寶之于後世者雖其埋沒而未出其精氣光怪已能常自發見而物亦不能揜也故方其擯斥摧挫流離窮一本作困厄之時文章已自行于一作於天下雖其怨家仇人及嘗能出力而擠之死者至其文章則不能少毀而揜蔽一無此字之也凡人之情忽近而貴遠子美屈于今世猶若此其伸於後世宜如何也公其可無恨予嘗考前世文章政理之盛衰而怪唐太宗致治幾乎三王之盛而文章不能革五代之餘習後百有餘年韓李之徒出然後元和之文始復于古唐衰兵亂又百餘年而聖宋興天下一定晏然無事又幾百年而古文始感于今自古治時少而亂時多幸時治矣文章或不能純粹或遲久而不相及何其難之若是歟豈非難得其人歟苟一有其人又幸而及出于治世世其可不爲之貴重而愛惜之歟嗟吾子美以一酒食之過至廢爲民而流落以死此其可以歎息流涕而爲當世仁人君子之一無此字職位宜與國家樂育賢材者惜也子美之齒少於予而予學古文反在其後天聖之間予舉進士于有司見時學者務以言語聲偶擿裂號爲時文以相誇尚而子美獨與其兄才翁及穆參軍伯長作爲古詞詩雜文時人頗共非笑之而一無此字子美不顧也其後天子患時文之弊下詔書諷勉學者以近古由是其風漸息而學者稍趨於古焉獨子美爲於舉世不爲之時其始終自守不牽世俗趨舍可謂特立之士也子美官至大理評事集賢校理而廢後爲潮州長史以卒享年四十有一其狀貌奇偉望之昂然而即之温温久而愈可愛慕其材雖高而人亦不甚嫉忌其擊而去之者意不在子美也賴天子聰明仁聖四字一作聖明凡當時所指名而排斥二三大臣而不欲以子美爲根而累之者皆蒙保全今並列於榮寵雖與子美同時飲酒得罪之人多一時之豪俊亦被收采進顯于朝廷而子美獨不幸死矣豈非其命也悲夫廬陵歐陽修序

鄭荀改名序

三代之衰學廢而道不明然後諸子出自老子厭周之亂用其小見以爲聖人之術止於此始非仁義而詆聖智諸子因之益得肆其異說至於戰國蕩而不反然後山淵齊秦堅白異同之論興聖人之學幾乎其息最後荀卿子獨用詩書之言貶異扶正著書以非諸子尤以勸學爲急荀卿楚人嘗以學干諸侯不用退老蘭陵楚人尊之及戰國平三代詩書未盡出漢諸大儒賈生司馬遷之徒莫不盡用荀卿子蓋其爲說最近於聖人而然也樂陽鄭昊少爲詩賦舉進士已中第遂弃之曰此不足學也始從先生長者學問慨然有好古不及之意鄭君年尙少而性淳明輔一有文字以彊力之志得其是者而師焉無不至也將更其名數以請予使之自擇遂改曰荀於是又見其志之果也夫荀卿者未嘗親見聖人徒讀其書而得之然自子思孟子已下意皆輕之使其與游夏並進於孔子之門吾不知其先後也世之學者苟如荀卿可謂學矣而又進焉則孰能禦哉余旣嘉君善自擇而慕焉因爲之字曰叔希且以勗其成焉

居士集卷第四十一

序九首

韻總序

僿工於爲弓而不能射羿與逢蒙天下之善射者也奚仲工於爲車而不能御王良造父天下之善御者也此荀卿子所謂藝之至者不兩能信哉儒者學乎聖人聖人之道直以簡然至其曲而暢之以通天下之理以究陰陽天地人鬼事物之變化君臣父子吉凶生死凡人一作禍福之大倫則六經不能盡其說而七十子與孟軻荀楊之徒各極其辯而莫能殫焉夫以孔子之好學而其所道者自堯舜而後則詳之其前蓋略而弗道其亦有所不暇者歟儒之學者信哉遠且大而用功多則其有所不暇者宜也文字之爲學儒者之所用也其爲精也有聲形曲直毫釐之別音響清濁相生之類五方言語風俗之殊故儒者莫暇精之其有精者則往往不能乎其他是以學者莫肯捨其所事而盡心乎此所謂不兩能者也必待乎用心專者而或能之然後儒者有以取焉洛僧鑿聿爲韻總五篇推子母輕重之法以定四聲考求前儒之失辯正五方之訛顧其用心之精可謂入於忽微若櫛一有者字之於髮續一有者字之於絲雖細且多而條理不亂儒之學者莫能難也鑿聿通於易能知大演之數又學乎陰陽地理黃帝岐伯之書其尤盡心者韻總也世一作聿本儒家子少爲浮圖入武當山往來江漢之旁十餘年不妄與人交有不可其意雖王公大人亦莫肯顧聞士有一藝雖千里必求之介然有古獨行之節所謂用心專者也宜其學必至焉耳浮圖之書行乎世者數百萬言其文字雜以夷夏讀者罕得其真往往就一有聿字而正鑿一無此字聿之書一作韻非獨有取於吾儒亦欲傳於其徒也

送楊真一作送楊二赴劍浦序

子嘗有幽憂之疾退而閑居不能治也既而學琴於友人孫道滋受

宮聲數引久而樂之不知疾之在其體也一本有夫疾生乎憂者也

藥之毒者能攻其疾之聚不若聲之至者能和其心之所不平心而平不和者和則疾之忘也宜哉四十五字夫琴之爲技小矣及其至也大者爲宮細者爲羽操絃驟作忽然變之急者悽然以促緩者舒然以和如崩崖裂石高山出泉而風雨夜至也如怨夫寡婦之歎息雌雄雍雍之相鳴也其憂深思遠則舜與文王孔子之遺音也悲愁感憤則伯奇孤子屈原忠臣之所歎也喜怒哀樂動人心深而純古淡泊與夫堯舜三代之言語孔子之文章易之憂患一作思一作深詩之怨刺無以異其能聽之以耳應之以手取其和者道其埋鬱寫其憂思則感人之際亦有至者矣一有是不可以不學也七字子友楊君好學有文累以進士舉不得志及從廢調爲尉於劍浦區區在東南數千里外是其心固有不平者且少又多疾而南方少醫藥風俗飲食異宜以多疾之體有不平之心居異宜之俗其能鬱鬱以久乎然欲平其心以養其疾於琴亦將有得焉故予作琴說以贈其行且邀道滋酌酒進琴以爲別一無此二字而有說以贈其行舉道滋之琴而行曰是真可樂也行將學之二十二字

送曾鞏秀才序

廣文會生來自南豐一作自南豐來入太學與其諸生羣進於有司有司斂羣材操尺度槩以一法考其不中者而弃之雖有魁壘拔出之材其一彙彙不中尺度則弃不敢取幸而得良有司不過反問衆人歎嗟一作咨嗟而愛惜若取捨非己事者諉曰有司有法奈不中何一作奈何其不中也有司固不自任其責而天下之人一作士亦不以責有司皆由其不中法也一作其如不中法何不幸有司尺度一失手一作守則往往失多而得少一作失多於所得嗚呼二字一作噫有司所操果良法耶何其久而不思革也況若會生之業其大者固已魁壘其於一無此字小者亦可以中一作就尺度而有司一

有遺字弃之可性也然會生不非同進不罪有司告予以歸思廣其學而一有金字堅其守子初駭一作驚其文一有既字又壯其志夫農不咎歲而播種是勤其水旱則已使一有穫則豈不多耶會生囊其文數十萬言來京師京師之人無求會生者然會生亦不以干也一作而生亦不一往于之子豈敢一作若于者豈能求生而生辱以顧子是京師之人既不四字一作士大夫既莫能求之而有司又失之而獨余得也於其行也遂見於文使知一有會字生者可以弔有司一有之失二字而賀余之獨得也

送田畫秀才寧親萬州序

五代之初天下分為十三四及建隆之際或滅或微其在者猶七國而蜀與江南地最大以周世宗之雄三至淮上不能舉李氏而蜀亦恃險為阻秦隴山南皆被侵奪而荆人縮手歸峽不敢西窺以爭故地一本注云往時忠萬夔施皆屬荆南五代之際為蜀所侵及太祖受天命用兵不過一作及萬人舉兩國如一郡縣吏何其偉歟一作哉當此時文初之祖從諸將西平成都及南攻一作破金陵功最多於時一作最有功於時語名將者稱田氏田氏功書史官祿世子家至今而不絕及天下已定一作天下既平久矣將卒無所用其武士君子爭以文儒進故文初將家子反衣白衣從鄉進士舉於有司彼此一時亦各遭其勢而然也文初辭業通敏為人敦潔可喜歲之仲春自荆南西一作自荆南而西將拜其親於萬州維一作繫舟夷陵子與之登高以遠望一作望山川遂遊東山窺綠蘿溪坐磐石文初愛之一有留字數日乃去一作行夷陵者其地志云北有夷山以為一有之字各或曰巴峽之險至此地始平夷蓋今文初所見尚未為山川之勝者由此而上泝江湍入三峽險怪奇絕乃一作直可愛也當王師伐蜀時兵出兩道一自鳳州以入一自歸州以取忠萬以西今之所經皆王師嚮所用武處一作今文初所歷皆嚮時王師用武

廣覽其山川可以慨然而賦矣

謝氏詩序

天聖七年予始遊京師得吾友謝景山景山少以進士中甲科以善歌詩知名一作以好古龍文知名於時其後子於他所又得今舍人宋公所為景山母夫人之墓銘言夫人好學通經自教其子乃知景山出於甌閩數千里之外負其藝於大衆之一無此字中一買而售遂以名知一作知名於人者繫其母之賢也今年予自夷陵至一作之許昌景山出其女第希孟所為詩百餘篇然後又知景山之母不獨成其子之名而又以其餘遺其女也景山嘗學杜甫杜牧之文以雄健高逸自喜希孟之言尤隱約深厚一作切守禮而不自放有古幽閒淑女之風非特婦人之能言者也然景山嘗從今世賢豪者遊故得聞於當時而希孟不幸為女子莫自章顯於世昔衛莊姜許穆夫人錄於仲尼而列之國風一有使字今有傑然巨人能輕重時人而取信後世者一為希孟重之其不泯沒矣子固力不足者復何為哉復何為哉希孟嫁進士陳安國卒時年二一作三十四景祐四年八月一日守峽州夷陵縣令歐陽修序

送張唐民歸青州序

子讀周禮至於教民與學選賢命士之法未嘗不輟而歎息以謂三代之際士豈能素賢哉當其王道備而習俗成仁義禮樂達於學者慈友悌達於家居有教養之漸進有爵祿之勸苟一不勉則又有屏黜不齒一無二字戮辱之羞然則士生其間其勢不得不至於為善也豈必生知之賢及後世道缺學廢苟偽之俗成而忘其教養之具一作漸至於爵祿黜辱之法又失其方而不足以勸懼然則士生其間能自為善二字一作立卓然而不惑者非其生知之性天所賦子其孰能至哉則凡所謂賢者其可貴於三代之士遠矣故善人尤少幸而有則往往飢寒困踣之不暇其幸者或艱而後通夫賢者豈必

困且艱歟蓋高世則難合違俗則多窮一有困字亦其勢然也嗚呼
人事修則天下之人皆可使爲善士一無此字廢則雖天所賦予其
賢亦困於時夫天非不好善其不勝於人力者其勢之然歟此所謂
天人之理在於周易一有爲字否泰消長之卦能通其說則自古賢
聖窮達而禍福皆可知而不足怪秀才張生居青州其母賢而知書
三子喪其二獨生最賢行義聞於鄉而好學力爲古文是謂卓然而
不惑者也今年舉進士黜於有司母老而貧無以養可謂困且艱矣
嗟乎子力既不能一有以字周於生而生尤好一有學字易常以講
於子若歸而卒其業則天命之理人事之勢窮達禍福可以不動于
其心雖然若生者豈必一作終窮也哉安知其不艱而後通也哉慶
曆二年三月十九日序

送王陶序一作剛說送王先輩之岳陽

六經皆載聖人之道而易著者一作尤明聖人用吉凶得失動靜
進退易之事也其所以爲之用者剛與柔也乾健坤順剛柔之大用
也至於八卦之變六爻之錯剛與柔迭居其位而吉亨利无咎凶厲
悔吝之象生焉蓋剛爲陽爲德爲君子柔爲陰爲險爲小人自乾之
初九爲姤而上至於剝其卦五皆陰剝陽之卦也小人之道長君子
靜以退之時也自坤之初六爲復而上至於夬其卦五皆剛夬柔之
卦也小人之道消君子動以進而用事之時也夫剛之爲德君子之
常用也庇民利物功莫大焉其爲卦一有也字過泰之三而四爲大
壯一本畫卦五爲夬一本畫卦壯者壯也夬者決也四陽雖威而猶
有二陰然陽衆而陰寡則可用壯以一作以壯而攻之故其卦爲壯
五陽而一陰陰不足爲真可決之而已故其卦爲夬然則君子之用
其剛也審其力視其時知陰險小人之必不可去然後以壯而決之夫
勇者可犯也彊者可誅也聖人於壯決之用必有戒焉故大壯之彖
辭曰大壯利正其象辭曰君子非禮弗履夬之彖辭曰健而說決而

和其象辭曰居德則忌以明夫剛之不可獨任也故復始而亨臨浸
而長泰交而大壯以衆攻其寡夫乘其衰而決之夫君子之用其剛
也有漸而不失其時一作宜又不獨任必以正以禮以說以和而濟
之則功可成此君子動以進而用事之方也太原王陶字樂道好剛
之士也常嫉世陰險三字一作夫君子少而小人多居京師不妄與
人遊力學好古以一無此字自一作篤信自守今其初仕於易得君
子動以進之象故予爲剛說以贈之大壯之初九曰壯于趾征凶夫
之初九亦曰壯于趾往不勝爲咎以此見三字一作此皆聖人之戒
用剛也不獨於其一作者于彖象而又常深戒於其初嗚呼世之君
子少而小人多君之力學好剛以蓄其志未始施之於事也今其往
尤宜慎乎其初一有修述

孫子後序一作書孫子後

世所傳孫武十三篇多用曹公杜牧陳繹注號三家孫子余頃與撰
四庫書目所見孫子注者尤多一有至二十餘家五字武之書本於
兵兵之術非一而以不窮爲奇宜其說者之多也凡人之用智有短
長其施設各異故或膠其說於偏見然無出所謂三家者三家之注
繹最後其說時時攻牧之短牧亦慨然最喜論兵欲試而不得者其
學能道春秋戰國時事甚博而詳然前世言善用兵稱曹公曹公嘗
與董呂諸袁角其力而勝之遂與吳蜀分漢而王傳言魏之諸將出
兵千里一有公字每坐計勝敗授其成算諸將用之十不失一一有
違者兵輒敗北故魏世用兵悉以新書從事其精於兵也如此牧謂
曹公於注孫子尤略蓋惜其所得自爲一書是曹公悉得武之術也
然武嘗以其書于吳王闔閭闔閭用之西破楚北服齊晉而霸諸侯
夫使武自用其書止於疆伯及曹公用之然亦終不能滅吳蜀豈武
之術盡於此乎抑用之不極其能也後之學者徒見其書又各牽於
己見是以注者雖多而少當也獨吾友聖俞不然嘗評武之書曰此

戰國相傾之說也三代王者之師司馬九伐之法武不及也然亦愛其文略而意深其行師用兵料敵制勝亦皆有法其言甚有次序而注者汨之或失其意乃自爲注凡膠於偏見者皆挾一作排去傳以己意而發之然後武之說不汨而明吾知此書當與三家並傳而後世取其說者往往於吾聖愈多焉聖愈爲人謹質温恭一有仁厚而明四字衣冠進趨眇然儒者也後世之視其書者與太史公疑張子房爲壯夫何異

梅聖俞詩集序

予聞世謂詩人少達而多窮夫豈然哉蓋世所傳詩者多出於古窮人之辭也凡士之蘊其所有而不得施於世者多喜自放於山巔水涯一有之字外見蟲魚草木風雲鳥獸之狀類往往探其奇怪內有憂思感憤之鬱積其興於怨刺以道羈臣寡婦之所歎而寫人情之難言蓋愈窮則愈工然則非詩之能窮人殆窮者而後工也予友梅聖俞少以蔭補爲史累舉進士輒抑於有司困於州縣凡十餘年年今五十猶從辟書爲人之佐鬱其所畜不得奮見於事業其家宛陵幼習於詩自爲童子出語已驚其長老既長學乎六經仁義之說其爲文章簡古純粹不求苟說於世世之人徒知其詩而已然時無賢愚語詩者必求之聖俞聖俞亦自以其不得志者樂於詩而發之故其平生所作於詩尤一作最多世既知之矣而未有薦于上者昔王文康公嘗見而歎曰二百年無此作矣雖知之深亦不果薦也若使其幸得用於朝廷作爲雅頌以歌詠大宋之功德薦之清廟而追商周魯頌之作者豈不偉歟奈何使其老不得志而爲窮者之詩乃徒發於蟲魚物類羈愁感歎之言世徒喜其工不知其窮之久而將老也可不惜哉聖俞詩既多不自收拾其妻之兄子謝景初懼其多而易失也取其自洛陽至于吳興已來所作次爲十卷子嘗嗜聖俞詩而患不能盡得之遽喜謝氏之能類次也輒序而藏之其後十五年

聖俞以疾卒于京師余既哭而銘之因素于其家得其遺藁千餘篇並舊所藏掇其尤者六百七十七篇爲一十五卷嗚呼吾於聖俞詩論之詳矣故不復云廬陵歐陽修序

居士集卷第四十二

序七首

送秘書丞宋君歸太學序

陋巷之士甘藜藿而修仁義譽不干其守飢寒不累其心此衆人以爲難而君子以爲易生于高門世襲軒冕而躬布衣章帶之行其驕榮佚欲之樂生長于其間而不瀾其習日見于其外而不動乎其中心此雖君子猶或難之學行足以立身而進不止材能足以高人而志愈下此雖聖人亦以爲難也書曰不自滿假又曰汝惟不矜不伐一有夫字以舜禹之明一有且字猶以是爲相戒懼况其下者哉此誠可謂難也已廣平宋君宜獻公之子公以文章爲當世宗師顯于朝廷登于輔弼清德著于一時令名垂于後世君少自立不以門地驕于子既長學問好古爲一無此文章天下賢士大夫皆稱慕其爲人而君歎然常若不足于己者守官大學甘寂寞以自處日與寒士往來而從先生國子講論道德以求其益夫生而不瀾其習此蓋出其一作於天性其見焉而不動于中者由性之明學之而後至也學一作進而止高而愈下子自其幼見其長行而不倦久而愈篤可知其將無所不至焉也孟子所謂孰能禦之者歟予陋巷之士也遭時奮身竊位于朝守其貧賤之節其臨利害禍福之際常恐其奪也以予行君子之所易者猶若是知君行聖賢之所難者爲難能也歲之二三月來自京師拜其舅氏予得延之南齋聽其論議而慕其爲人雖與之終身久處而不厭也留之數日而去於其去也不能忘言遂爲之序廬陵歐陽修述

送徐無黨南歸序

草木鳥獸之爲物衆人之爲人其爲生雖異而爲死則同一歸於腐壤漸盡泯滅而已而衆人之中有聖賢者固亦生且死於其間而獨異於草木鳥獸衆人者雖死而不朽逾一作愈遠而彌存也其所以

爲聖賢者修之於身施之於事見之於言是三者所以能不朽而存也修於身者無所不獲施於事者有得有不得焉其見於言者則又必皆能言之士哉修於身矣而不施於事不見於言亦可也孔子弟子有能政事者矣有能言語者矣若顏回者在陋巷曲肱飢臥而已其羣居則默然終日如愚人然自當時羣弟子皆推尊之以爲不敢望而一作以及而後世更百千歲亦未有能及之者其不朽而存者固不待施於事况於一作其言乎予讀班固藝文志唐四庫書目見其所列自三代秦漢以來著書之士多者至百餘篇少者猶三四十篇其人不可勝數而散亡磨滅百不一二存焉子竊悲其人文章麗矣言語工矣無異草木榮華之飄風鳥獸好音之過耳也方其用心與力之勞一作動亦何異衆人之汲汲營營而忽焉以死者雖有遲有速一作其遲速雖異而一作然卒與二者同歸於泯滅夫言之不可恃也蓋如此今之學者莫不慕古聖賢之不朽而勤一世以盡心於文字間一無此字者皆可悲也東陽徐生少從子學爲文章稍稍見稱於人既去而與羣士試於禮部得高第由是知名一有而字其文辭日進如水涌而山出子欲摧其威氣而勉其思也故於其歸告以是言然予固亦喜爲文辭者亦因以自警焉

廖氏文集序

自孔子歿而一無此字周一有益字衰接乎戰國秦遂焚書六經於是中絕漢興蓋久而後出其散亂磨滅既失其傳然後諸儒因得措其異說於其間如河圖洛書怪妄之尤甚者余嘗哀夫學者知守經以篤信而不知僞說之亂經也屢爲說以黜之而學者溺其久習之傳反駭然非余以一人之見決千歲不可考之是非欲奪衆人之所信一作好徒自守而世莫之從也余以謂自孔子沒至今二千歲之間有一歐陽修者爲是說矣又二千歲焉知無一人焉與修同其說

也又二千歲將復有一人焉然則同者至于三則後之人不待千歲而有也同子說者既衆則衆人之所溺者可勝而二字一作以壽也夫六經非一世之書一有也字其將與天地無終極而存也以無終極視數千歲一作載於其間頃刻爾是則余之有待於後者遠矣非汲汲有求於今世也一作今之世矣衡山廖倚與余遊三十年已而出其兄侔之遺文百餘篇號朱陵編者其論洪範以為九疇聖人之法爾非有龜書出洛之事也余乃知不待千歲而有與余同於今世者一有矣字始余之待于後世也冀有因余言而同者爾若侔者未嘗聞余言蓋其意有所合焉然則舉今之世固有不相求而同者矣亦何待於數千歲一作載乎廖氏家衡山世以能詩知名於湖南而侔尤好古能文章其德行聞于鄉里一時賢士皆與之遊以其不達而早死故不顯于世嗚呼知一有有字所待者必有時而獲知一有有字所畜者必有時而施苟有志焉不必有求而後合余嘉與侔不相求而兩得也於是乎書嘉祐六年四月十六日翰林學士尚書吏部郎中知制誥充史館修撰歐陽修序

外制集序 一作慶曆制草

慶曆二年春丞相呂夷簡病不能朝上既更用大臣銳意天下事始用諫官御史疏追還夏竦制書既而召韓琦范仲淹於陝西又除富弼樞密副使弼仲淹琦皆惶恐頓首辭讓至五六不已手詔趣琦等就道甚急而弼方且入求對以辭不得見遣中貴人趣送閣門使即受命嗚呼觀琦等之所以讓上之所以用琦等者可謂聖賢相遭一作達萬世一遇而君臣之際何其盛也於是時天下之士孰不願為材邪顧予何人亦與其選夏四月召自滑臺入諫院冬十二月拜右正言知制誥是時夏人雖數請命而西師尚未解嚴京東累歲盜賊最後王倫暴起沂州轉劫江淮之間而張海郭貌山等亦起商鄧以驚京西州縣之吏多不稱職而民弊矣天子方慨然勸農桑興學校

破去前例以不次用人哀民之困而欲除其蠹吏知磨勘法久之弊而思別材不肖以進賢能惠百職之不修而申行賞罰之信蓋欲修法度矣予時雖掌誥命猶在諫職常得奏事殿中從容盡聞天子所以更張庶事憂閔元元而勞心求治之意退得載于制書以諷曉訓勅在位者然予方與修祖宗故事又修起居注又修編勅日與同舍論議治文書所省不一而除目所下率不一二時已迫丞相出故不得專一思慮工文字以盡導天子難諭之意而復詰命於三代之文嗟夫學者文章見用于世鮮矣况得施於朝廷而又遭人主致治之威若修之鄙使竭其材猶恐不稱而况不能專一其職此予所以常遺恨於斯文也明年秋予出為河北轉運使又明年春權知成德軍事事少閒發嚮所作制草而閱之雖不能盡載明天子之意於其所述百一作而得一二足以章示後世蓋王者之訓在焉豈以予文之鄙而廢也於是錄之為三卷子自直閣下儻直八十始滿不數日奉使河東還即以來河北故其所作纔一百五十餘篇云三月二十一日序

禮部唱和詩序

嘉祐二年春予幸得從五人者於尚書禮部考天下所貢士凡六千五百人蓋絕不通人者五十日乃於其間時相與作為古律長短歌詩雜言庶幾所謂羣居燕處言談之文亦所以宜其底滯而忘其倦怠也故其為言易而近擇而不精然綢繆反復若斷若續而時發於奇怪雜以詼嘲笑謔及其至也往往亦造於精微夫君子之博取於人者雖滑稽鄙俚猶或不遺而況於詩乎古者詩三百篇其言無所不有惟其肆而不放樂而不流以卒歸乎正此所以為貴也於是次而錄之得一百七十二篇以傳於六人者志氣可謂感矣然壯者有時而衰衰者有時而老其出處離合參差不齊則是詩也足以追惟平昔握手以為笑樂至於慨然掩卷而流涕噓噓者亦

將有之雖然豈徒如此而止也覽者其必有取焉廬陵歐陽修序

內制集序

昔錢思公嘗以謂朝廷之官雖宰相之重皆可雜以他才處之惟翰林學士非文章不可思公自言爲此語頗取怒一作怨於達官然亦自負以爲至論今學士所作文書多矣至於青詞齋文必用老子淨圖之說祈禳秘祝往往近於家人里巷之事而制詔一作請取便於宣讀常拘以世俗所謂四六之文其類多如此然則果可謂之文章者歟予在翰林六年中間進拜三三大臣皆適不當直而天下無事四夷和好兵革不用凡朝廷之文所以指麾號令訓戒約束自非因事無以發明矧予中年早衰意思零落以非工之作又無所遇以發焉其屑屑應用拘牽常格卑弱不振宜可羞也然今文士尤以翰林爲榮選子既罷職院吏取子直草以日次之得四百餘篇因不忍棄況其上自朝廷內及宮禁下暨蠻夷海外事無不載而時政記日曆與起居郎舍人有所略而不記未必不有取於斯焉嗚呼予且老矣方買田淮穎之間若夫涼竹簟之暑曝茅簷之冬日睡餘支枕念昔平生仕宦出處顧瞻玉堂如在天上因覽遺藁見其所載職官各氏以較其人感衰先後孰在孰亡足以知榮寵爲虛名而賔笑談一作談笑之一噓也亦因以詩於田夫野老而已嘉祐六年秋八月二日廬陵歐陽修序

帝王世次圖序

堯舜禹湯文武此六君子者可謂顯人矣而後世猶失其傳者豈非以其遠也哉是故君子之學不窮遠以爲能而闕其不知慎所傳以感世也方孔子時周衰學廢先王之道不明而異端之說並起孔子患之乃修正詩書史記以止紛亂之說而欲其傳之信也故略其遠而詳其近於書斷自唐虞以來著其大事可以爲世法者而已至於三皇五帝君臣世次皆未嘗道者以其世遠而慎所不知也孔子既

沒異端之說復興周室亦益衰亂接乎戰國秦遂焚書先王之道中絕漢興久之詩書稍出而不完當王道中絕之際奇書異說方充斥

而盛行其言往往反自託於孔子之徒以取信於時學者既不備見詩書之詳而習傳盛行之異說世無聖人以爲質而不自知其取捨真僞至有博學好奇之士務多聞以爲勝者於是盡集諸說而論次初無所擇而惟恐遺之也如司馬遷之史記是矣以孔子之學上述前世止於堯舜著其大略而不道其前遠遠出孔子之後而乃上述黃帝以來又詳悉其世次其不量力而務勝宜其失之多也遷所作本紀出於大戴禮世本諸書今依其說圖而考之堯舜夏商周皆同出於黃帝堯之崩也下傳其四世孫舜舜之崩也復上傳其四世祖禹而舜禹皆壽百歲稷契於高辛爲子乃同父異母之兄弟今以其世次而下之湯與王季同世湯下傳十六世而爲紂王季下傳一世而爲文王二世而爲武王是文王以十五世祖臣事十五世孫紂而武王以十四世祖伐十四世孫而代之王何其繆哉嗚呼堯舜禹湯文武之道百王之取法也其威德大業見於行事而後世所欲知者孔子皆已論著之矣其久遠難明之事後世不必知不知不害爲君子者孔子皆不道也夫孔子所以爲聖人者其智知所取捨皆如此

後序

余既略論帝王世次而見本紀之失猶謂文武與紂相去十五六世其繆較然不疑而堯舜禹之世相去不遠尙冀其理有可通乃復以尙書孟子孔安國皇甫謐諸書參考其壽數長短而尤乖戾不能合也據書及諸說云堯壽一百一十六歲舜壽一百一十二歲禹壽百歲堯年十六卽位在位七十年年八十六始得舜而試之二年乃使攝政時舜年三十居攝攝通三十年而堯崩舜服堯喪三年畢乃卽位在位五十年而崩方舜在位三十二年命禹攝政凡十七年而舜崩禹服舜喪三年畢乃卽位在位十年而崩由是言之當堯得舜之

時堯年八十六舜年二十以此推而上之是堯年五十七已見四世之玄孫生一歲矣舜居攝攝及在位通八十二年而禹壽百歲以禹百年之間推而上之禹即位及居舜喪通十二年又在舜朝八十二年通九十五年則當舜攝攝之初年禹纔六歲是舜爲玄孫年二十時見四世之高祖方生六歲矣至於舜娶堯二女據圖爲曾祖姑雖古遠世異與今容有不同然人倫之理乃萬世之常道必不錯亂顛倒之如此然則諸家世次壽數長短之說聖經之所不著者皆不足信也決矣

居士集卷第四十二

居士集卷第四十四 集四十四

序六首傳一首附

思頴詩後序

皇祐元年春予自廣陵得請來頴愛其民淳訟簡而物產美土厚水甘而風氣和於時慨然已有終焉之意也爾來俯仰二十年間一無此字歷事三朝竊位二府寵榮已至而憂患隨之心志索然而筋骸憊矣其思頴之念未嘗一有一日二字少忘于心一無此二字而意一作口之所存亦時時見於文字也今者幸蒙寬恩獲解重任使得待罪于毫既釋危機之慮而就閒曠之優其進退出處顧無所繫於事矣謂可以償夙志者此其時哉因假道于頴蓋將謀一有甚弊處以四字決歸休之計也乃發舊囊得自南京以後詩十餘篇皆思頴之作以見予拳拳於頴者非一日也不類勸飛之鳥然後知還惟恐勒移之靈却回俗駕爾治平四年五月三日廬陵歐陽修序

歸田錄序

歸田錄者朝廷之遺事史官之所不記與夫士大夫笑談之餘而可錄者錄之以備閑居之覽也有聞而誦余者曰何其迂哉子之所學者修仁義以為業誦六經以為言其自待者宜如何而幸蒙人主之知備位朝廷與聞國論者蓋八年于茲矣既不能因時奮身遇事發憤有所建明以為補益又不能依阿取容以徇世俗使怨嫉謗怒叢于一身以受侮于羣小當其驚風駭浪卒然起於不測之淵而蛟鱗龜鼉之怪方駢首而闖伺乃措身其間以蹈必死之禍賴天子仁聖惻然哀憐脫於垂涎之口而活之以賜其餘生之命曾不聞吐珠銜環效蛇雀之報蓋方其壯也猶無所為今既老且病矣是終負人主之恩而徒久費大農之錢為太倉之鼠也為子計者謂宜乞身于朝遠引疾去以深戒前日之禍十一字一作退避榮寵而優游田畝盡其天年猶足竊知止之賢名而乃裴回俯仰久之不決此而不思尚

何歸田之錄乎余起而謝曰凡子之責我者皆是也吾其歸哉子姑待治平四年九月乙未歐陽修序

仲氏文集序

嗚呼語稱君子知命所謂命其果可知乎貴賤窮享用捨進退得失成敗其有幸有不幸或當然而不然而皆不知其所以然者則推之於天曰有命夫君子所謂知命者知此而已蓋小人知在我故常無所不為君子知有命故能無所屈凡士之有材而不用於世有善而不知於人至於老死困窮而不悔者皆推之有命而不求苟合者也余讀仲君之文而想見其人也君諱訥字樓翁其氣剛其學古其材敏其為文抑揚感激勁正豪邁似其為人少舉進士官至尚書屯田員外郎而止君生於有宋百年全盛之際儒學文章之士得用之時宜其馳騁上下發揮其所奮振耀於當世而獨韜藏抑鬱久伏而不顯者蓋其不苟屈以合世故世亦莫之知也豈非知命之君子歟余謂君非徒知命而不苟屈亦自負其所有者謂雖抑於一時必將伸於後世而不可揜也君之既歿富春孫莘老狀其行以告于史臨川王介甫銘之石以藏諸幽而余又序其集以行於世然則君之不苟屈於一時而有待於後世者其不在吾三人者邪噫余雖老且病而言不文其可不勉觀文殿學士刑部尚書知亳州廬陵歐陽修序

續思頴詩序

皇祐二年余方留守南都已約梅聖俞買田于頴上其詩曰優游琴酒逐漁釣上下林壑相攀躋及身疆健始為樂莫待衰病須扶攜此蓋余之本志也時年四十有四其後丁家艱服除還朝遂入翰林為學士忽忽七八年間歸頴之志雖未違也然未嘗一日少忘焉故其詩曰乞身當及疆健時顧我蹉跎已衰老蓋歎前言之未踐也時年五十有二自是誤被選擇叨塵二府遂歷三朝蓋自嘉祐治平之間國家多事固非臣子敢自言其私時也而非才竊位謗咎已盈賴天

子仁聖聰明辨察誣罔始終保全其出處俯仰十有二年今其年六十有四蓋自有蹉跎之歎又復一紀矣中間在亳幸遇朝廷無事中外晏然而身又不當責任以謂臣子可退無嫌之時遂敢以其私言天子惻然閱其年猶未也謂尚可以勉故奏封十上而六被詔諭未賜允俞今者蒙上哀憐察其實病且衰矣既不責其避事又曲從其便私免并得蔡俾以偷安此君父廓大度之寬仁遂萬物之所欲覆載含容養育之恩也而復蔡穎連疆因得以爲歸老之漸冀少償其夙願茲又莫大之幸焉初陸子履以余自南都至在中書所作十有三篇爲思穎詩以刻于石今又得在亳及青十有七篇以附之蓋自南都至在中書十有八年而得十三篇在亳及青二年而得十有七篇以見余之年益加老病益加衰其日漸短其心漸迫故其言愈多也庶幾覽者知余有志於彊健之時而未償於衰老之後幸不譏其踐言之晚也熙寧三年九月七日六一居士序

江鄰幾文集序

余竊不自揆少習爲銘章因得論次當世賢士大夫功行自明道景祐以來名卿鉅公往往見於余文矣至於朋友故舊平居握手言笑意氣倜然可謂一時之盛而方從其遊遽哭其死遂銘其藏者是可歎也蓋自尹師魯之亡逮今二十五年之間相繼而歿爲之銘者至二十人又有余不及銘與雖銘而非交且舊者皆不與焉嗚呼何其多也不獨善人君子難得易失而交遊零落如此反顧身世死生感衰之際又可悲夫而其間又有不幸罹憂患觸網羅至困阨流離以死與夫仕宦連蹇志不獲伸而歿獨其文章尙見於世者則又可哀也歟然則雖其殘篇斷藁猶爲可惜況其可以垂世而行遠也故余於聖俞子美之歿既已銘其壙又類集其文而序之其言尤感切而殷勤者以此也陳留江君鄰幾常與聖俞子美遊而又與聖俞同時以卒余既誌而銘之後十有五年來守淮西又於其家得其文集而

序之鄰幾毅然仁厚君子也雖知名於時仕宦久而不進晚而朝廷方將用之未及而卒其學問通博文辭雅正深粹而論議多所發明詩尤清淡閑肆可喜然其文已自行於世矣固不待余言以爲輕重而余特區區於是者蓋發於有感而云然熙寧四年三月日六一居士序

薛簡肅公文集序

君子之學或施之事業或見於文章而常患於難兼也蓋遭時之士功烈顯於朝廷名譽光於竹帛故其常視文章爲末事而又有不暇與不能者焉至於失志之人窮居隱約苦心危慮而極於精思與其有所感激憤憤惟無所施於世者皆一寓於文辭故曰窮者之言易工也如唐之劉柳無稱於事業而姚宋不見於文章彼四人者猶不能於一無此字兩得況其下者乎惟簡肅公在真宗時以材能爲名臣仁宗母后時以剛毅正直爲賢輔其決大事定大議嘉謀讜論著在國史而遺風餘烈至今稱於士大夫公絳州正平人也自少以文行推於鄉里既舉進士獻其文百軸於有司由是名動京師其平生所爲文至八百餘篇何其盛哉可謂兼於兩得也公之事業顯矣其於文章氣質純深而勁正蓋發於其志故如其爲人公有子直孺早卒無後以其弟之子仲孺公期爲後公之文既多而往往流散於人間公期能力收拾蓋自公薨後三十年始克類次而集之爲四十卷公期可謂能世其家者也嗚呼公爲有後矣熙寧四年五月日序

六一居士傳

六一居士初謫滁山自號醉翁既老而衰且病將退休於潁水之上則又更號六一居士客有問曰六一何謂也居士曰吾家藏書一萬卷集錄三代以來金石遺文一千卷有琴一張有棋一局而常置酒一壺客曰是爲五一爾奈何居士曰以吾一翁老一作老翁於此五物之間是豈不爲六一乎客笑曰子欲逃名者乎而屢易其號此莊

生所誦畏影而走乎日中者也余將見子疾走大喘渴死而名不得
逃也居士曰吾固知名之不可逃然亦知夫不必逃也吾爲此名聊
以志吾之樂爾客曰其樂如何居士曰吾之樂可勝道哉方其得意
於五物也太山在前而不見疾雷破柱而不驚雖響九奏於洞庭之
野閱大戰於涿鹿之原未足喻其樂且適也然常患不得極吾樂於
其間者世事之爲吾累者衆也其大者有二焉軒裳珪組勞吾形于
外憂患思慮勞吾心於內使吾形不病而已悴心未老而先衰尙何
暇於五物哉雖然吾自一作方乞其身於朝者三年矣一日天子惻
然哀之賜其骸骨使得與此五物皆返於田廬庶幾償其夙願焉此
吾之所以志也客復笑曰子知軒裳珪組之累其形而不知五物之
累其心乎居士曰不然累於彼者已勞矣又多憂累於此者既佚矣
幸無患吾其何擇哉於是與客俱起握手大笑曰置之區區不足較
也已而歎曰夫士少而仕老而休蓋有不待七十者矣吾素慕之二
字一作志宜去一也吾嘗用於時矣而訖無稱焉宜去二也壯猶如
此今既老且病矣乃以難彊之筋骸貪過分之榮祿是將違其素志
而自食其言宜去三也吾負三宜去雖無五物其去宜矣復何道哉
熙寧三年九月七日六一居士自傳

居士集卷第四十四

居士集卷第四十五 集四十五

上書一首

通進司上書

十二月二十四日宣德郎守太子中允館閣校勘臣歐陽修謹昧死再拜上書于皇帝闕下臣伏見國家自元昊叛逆關西用兵以來爲國言事者衆矣臣初竊爲二策以料賊情然臣迂儒不識兵之大計始猶遲疑未敢自信今兵興既久賊形已露如臣素料頗不甚遠故竊自謂有可以助萬一而塵聽覽者謹條以聞惟陛下仁聖寬其狂妄之誅幸甚夫關西弛備而民不見兵者二三十年矣使賊萌亂之初藏形隱計卒然而來當是時吾之邊屯寡弱城堡未完民習久安而易驚將非素選而敗怯使其羊驅豕突可以奮然而深入然國威未挫民力未疲彼得城而居不能久守虜掠而去可邀擊其歸此下策也故賊知而不爲之戎狄侵邊自古爲患其攻城掠野敗則走而勝則來蓋其常事此中策也故賊兼而用之若夫假僭名號以威其衆先擊吾之易取者一二以悅其心然後訓養精銳爲長久之謀故其來也雖勝而不前不敗而自退所以誘吾兵而勞之也或擊吾東或擊吾西乍出乍入所以使吾兵分備多而不得減息也吾欲速攻賊方新銳坐而待戰彼則不來如此相持不三四歲吾兵已老民力已疲不幸又遇水旱之災調餉不勝而盜賊羣起彼方奮其全銳擊吾困弊可也使吾不堪其困忿而出攻決於一戰彼以逸而待吾勞亦可也幸吾苦兵計未知出遂求通聘以邀歲時之路度吾困急不得不從亦可也是吾力一困則賊謀無施而不可此兵法所謂不戰而疲人兵者上策也而賊今方用之今三十萬之兵食於西者二歲矣又有十四五萬之鄉兵不耕而自食其民自古未有四五十萬之兵連年仰食而國力不困者也臣聞元昊之爲賊威能畏其下恩能死其人自初僭叛屢書已上逾年而不一出則鋒不可當執劫

蕃官獲吾將帥多禮而不殺此其兇謀所蓄皆非倉卒者也奈何彼能以上策而疲吾吾不自知其已困彼爲久計以撓我我無長策而制之哉夫訓兵養士伺隙乘便用間出奇此將帥之職也所謂闔外之事而君不御者可也至於外料賊謀之心內察國家之勢知彼知此因謀制敵此朝廷之大計也所謂廟算而勝者也不可以不思今賊謀可知以久而疲我耳吾勢可察西人已困也誠能豐財積粟以紓西人而完國壯兵則賊謀沮而廟算得矣夫兵攻守而已然皆以財用爲強弱也守非財用而不久此不待言請試言攻昔秦席六世之彊資以事胡卒困天下而不得志漢因文景之富力三舉而纔得河南隋唐突厥吐蕃常與中國相勝敗擊而勝之有矣未有舉而滅者秦漢尤彊者其所攻今元昊之地是也况自劉平陷沒賊鋒熾銳未嘗挫衄攻守之計非臣所知天威所加雖終期於掃盡然臨邊之將尚未聞得賊釁隙挫其兇鋒是攻守皆未有休息之期而財用不爲長久之計臣未見其可也四五十萬之人坐而仰食然關西之地物不多加多關東所有莫能運致培克細碎既以無益而罷之矣至於鬻官入粟下無應者改法權貨而商旅不行是四五十萬之人惟取足於西人而已西人何爲而不困困而不起爲盜者須水旱爾外爲賊謀之所疲內遭水旱而多故天下之患可勝道哉夫關西之物不能加多則必通其漕運而致之漕運已通而關東之物不充則無得而西矣故臣以謂通漕運盡地利權商賈三術並施則財用足而西人紓國力完而兵可久以守以攻惟上所使夫小瑣目前之利既不爲長久之謀非旦夕而可効故爲長久而計者初若迂愚而可笑在必而行之則其利博矣故臣區區不敢避迂愚之責請上便宜三事惟陛下裁擇其一曰通漕運臣聞今爲西計者皆患漕運之不通臣以謂但未求之耳今京師在汴漕運不西而人之習見者遂以爲不能西不知秦漢隋唐其都在雍則天下之物皆可致之西也山川

地形非有變易於古其路皆在昔人可行今人胡一作何爲而不可漢初歲漕山東粟數十萬石是時運路未修其漕尚少其後武帝益修渭渠至漕百餘萬石隋文帝時沿水爲倉轉相運置而關東汾晉之粟皆至渭南運物最多其遺倉之迹往往皆在然皆尚有三門之險自唐裴耀卿又尋隋迹於三門東西置倉關山十八里爲陸運以避其險卒沂河而入渭當時歲運不減二三百萬石其後劉晏遵耀卿之路悉漕江淮之米以實關西後世言能經財利而善漕運者耀卿與晏爲首今江淮之米歲入于汴者六百萬石誠能分給關西得一二百萬石足矣今兵之食汴漕者出戍甚衆有司不惜百萬之粟分而及之其患者三門阻其中爾今宜浚治汴渠使歲運不阻然後按求耀卿之迹不憚十許里陸運之勞則河漕通而物可致且紓關西之困使古無法今有可爲尙當爲之况昔人行之而未遠今人行之而豈難哉耀卿與晏初理漕時其得尙少至其末年所入十倍是可持续之法明矣此水運之利也臣聞漢高祖之入秦不由東關而道南陽過鄴析而入武關曹操等起兵誅董卓亦欲自南陽道丹析而入長安是時張濟又自長安出武關奔南陽則自古用兵往來之徑也臣嘗至南陽問其遺老云自鄧西北至永興六七百里今小商賈往往行之初漢高入關其兵十萬夫能容十萬兵之路宜不甚狹而險也但自雒陽爲都行者皆趨東關其路久而遂廢今能按求而通之則武昌漢陽鄧復襄陽梁洋金商均房光化沿漢之地十一二州之物皆可漕而頓之南陽自南陽爲輕車人輦而遞之募置遞兵爲十五六鋪則十餘州之物日日入關而不絕沿漢之地山多美木近漢之民仰足而有餘以造舟車甚不難也前日陛下深恤有司之勤內賜禁錢數十萬以供西用而道路艱遠輦運逾年不能畢甚至於軍裝輸送多苦秋霖邊州已寒冬服尙滯於路其艱如此夫使州縣綱吏遠輸京師轉冒艱滯然後得西豈若較南陽之旁郡度其道

里入于武關與至京師遠近等者與其尤近者皆使直輪于關西京師之用有不足則以禁帑出賜有司者代而充用其迂曲簡直利害較然矣此陸運之利也其二曰盡地利臣聞昔之畫財利者易爲工今之言財利者難爲術昔者之民賦稅而已故其不足則鑄山煮海榷酒與茶征關市而算舟車尙有可爲之法以苟一時之用自漢魏迄今其法日增其取益細今取民之法盡矣昔者賦外之征以備有司之用今盡取民之法用於無事之時悉以冗費而糜之矣至卒然有事則無法可增然獨猶有可爲者民作而輸官者已勞而游手之人方逸地之產物者耕不得代而不墾之土尙多是民有遺力地有遺利此可爲也况歷視前世用兵者未嘗不先營田漢武帝時兵興用乏趙過爲畎田人犁之法以足用趙充國攻西羌議者爭欲出擊而充國深思全勝之策能忍而待其弊至遣詔罷兵而治屯田田於極邊以遊兵而防鈔寇則其理田不爲易也猶勉爲之後漢之時曹操屯兵許下疆敵四面以今視之疑其旦夕戰爭而不暇然用襄祗韓浩之計建置田官募民而田近許之地歲得穀百萬石其後郡國皆田積穀無數隋唐田制尤廣不可勝舉其勢艱而難田莫若充國迫急而不暇田莫如曹操然皆勉焉不以迂緩而不田者知地利之博而可以紓民勞也今天下之士不耕者多矣臣未能悉言謹舉其近者自京以西土之不闢者不知其數非土之瘠而棄也蓋人不勤農與夫役重而逃爾久廢之地其利數倍於營田今若督之使勤與免其役則願耕者衆矣臣聞鄉兵之不便於民議者方論之矣充兵之人遂棄農業託云教習聚而飲博取資一有於字其家不顧無有官吏不加禁父兄不敢詰家家自以爲患也河東河北關西之鄉兵此猶有用若京東西者平居不足以備盜而水旱適足以爲盜其尤可患者京西素貧之地非有山澤之饒民惟力農是仰而今二夫之家一人五夫之家三人爲游手凡十八九州以少言之尙可四五萬

人不耕而食是自相糜耗而重困也今誠能盡驅之使耕于棄地官貸其種歲田之入與中分之如民之法募吏之習田者爲田官優其課最而誘之則民願田者衆矣太宗皇帝時嘗貸陳蔡民錢使市牛而耕真宗皇帝時亦用取望之言買牛湖南而治屯田今湖南之牛歲買于北者皆出京西若官爲買之不難得一有又宜重爲法以困所謂私牛之客者使不容於民而樂爲官耕凡民之已有牛者使自耕則牛不足而官市者不多四十四字且鄉兵本農也籍而爲兵遂棄其業今幸其去農未久尙可復驅還之田畝使不得羣游而飲博以爲父兄之惠此民所願也一夫之力以逸而言任耕縵田一頃使四五萬人皆耕而久廢之田利又數倍則歲穀不可勝數矣京西之分北有大河南至漢而西接關若又通其水陸之運所在積穀惟陛下詔有司而移用之耳其三曰權商買臣聞秦廢王法啓兼并其上侵公利下刻細民爲國之患久矣自漢以來嘗欲爲法而抑奪之然不能也蓋爲國者興利日繁兼并者趨利日巧至其甚也商賈坐而權國利其故非他由興利廣也夫興利廣則上難專必與下而共之然後流通而不滯然爲今議者方欲奪商之利一歸於公上而專之故奪商之謀益深則爲國之利益損前日有司屢變其法法每一變則一歲之間所損數百萬議者不知利不可專欲專而反損但云變法之未當變而己其損愈多夫欲十分之利皆歸于公至其虧少十不得三不若與商共之常得其五也今爲國之利多者茶與鹽耳茶自變法已來商賈不復一歲之失數年莫補所在積朽棄而焚之前日議者屢言三說之法爲便有司既以詳之矣今誠能復之使商賈有利而通行則上下濟矣解池之鹽積若山阜今宜暫下其價誘羣商而散之先爲令曰三年將復舊價則貪利之商爭先而湊矣夫茶者生於山而無窮鹽者出於水而不竭賤而散之三年十未減其一二夫二物之所以貴者以能爲國資錢幣爾今不散而積之是

惜朽壤也夫何用哉夫大商之能蕃其貨者豈其鎔銖躬自鬻於市哉必有販夫小賈就而分之販夫小賈無利則不爲故大商不妬販夫之分其利者恃其貨博雖取利少貨行流速則積少而爲多也今爲大國者有無窮不竭之貨反妬大商之分其利寧使無用而積爲朽壤何哉故大商之善爲術者不惜其利而誘販夫大國之善爲術者不惜其利而誘大商此與商賈共利取少而致多之術也一有又今商賈之難以術制者以其積貨多而不急故也利厚則來利薄則止不可以說令召也故每有司變法下利既薄小商以無利而不能行則大商方幸小商之不行適得獨賣其貨尙安肯勉趨薄利而來哉故變法而刻利者適足使小商不來而爲大商買積貨也今必以術制商宜盡括其居積之物官爲賣而還之使其貨盡而後變法夫大商以利爲生一歲不營利則有惶惶之憂彼必不能守積錢而閉居得利雖薄猶將勉而來此變法制商之術也夫欲誘商而通貨莫若與之共利此術之上也欲制商使其不得不從則莫若痛裁之使無積貨此術之下也然此可制茶商耳若鹽者禁益密則言法愈多而刑繁凡二百三十八字若乃縣官自爲鬻市之事此大商之不爲臣謂行之難久者也誠能不較鎔銖而思遠大則積朽之物散而錢幣通可不勞而用足矣臣愚不足以知時事若夫堅守以扞賊利則出而擾之凡小便宜願且委之邊將至於積穀與錢通其漕運不二三歲而國力漸豐邊兵漸習賊銳漸挫而有隙可乘然後一舉而滅之此萬全之策也願陛下以其小者責將帥謀其大計而行之則天下幸甚臣修昧死再拜

居士集卷第四十五

居士集卷第四十六 集四十六

上書一首

準詔言事上一作上封事書

月日臣修謹昧死再拜上書于皇帝陛下臣近準詔書許臣上書一作許以封章言事臣學識愚淺一作昧不能廣引深遠以明治亂之原謹採當今急務條為三弊五事以應詔書所求伏惟陛下裁擇臣聞自古王者之治天下雖有憂勤之心而不知致治之要則心愈勞而事愈乖雖有納諫之明而無力行之果斷則言愈多而聽愈惑故為人君者以細務而責人專大事而獨斷此致治之要術一無此字也納一言而可用雖衆說一作議不得以沮一作沮之此力行之果斷也知此二者天下無難治矣一本治作致理伏見國家自大兵一動中外一作天下騷然陛下思社稷之安危念兵民之疲一作困弊四五年來聖心憂勞一作動可謂至矣然而兵日益老賊日益強併九州之力討一作平一西戎小者尚無一人敢前今又北戎大者違盟而動一作妄作其將何以禦之從來所患者夷狄今夷狄叛矣所惡者盜賊今盜賊起矣所憂者水旱今水旱作矣所賴一作仰者民力今民力困矣所須一作急者財用今財用乏矣陛下之心日憂於一日天下之勢歲危於一歲此臣所謂用心雖勞不知求致治之要者也近年朝廷開發一作難廣言路獻計之士不下數千然而事緒轉多枝梧不暇從前所採衆議紛紜至於臨事誰策可用此臣所謂聽言雖多不如力行之果斷者也伏思聖心所甚憂而當今所尚一作最闕者不過曰無兵也無將也無財用也無禦戎之策也無可任之臣也此五者陛下憂其未有而臣謂今皆有之然陛下未得而用者未思其術也國家創業之初四方割據中國地狹兵民不多然尚能南取荆楚收偽唐定閩嶺西平兩蜀東下并潞北窺幽燕當時所用兵財將吏其數幾何惟善用之故不覺其少何況一作豈如今日

承百年祖宗之業盡有天下之富強人衆物盛十倍國初故臣敢言有兵有將有財用有禦戎之策有可任一有用字之臣然陛下皆不得而用者其故何哉由朝廷有三大弊故也何謂三二一有大弊一曰不慎號令二曰不明賞罰三曰不責功實此三弊因循於上則萬事弛慢廢壞於下臣聞號令者天子之威也賞罰者天子之權也若號令一有煩而二字不信賞罰一有行而二字不當則天下不服故

又須責臣下以功實然後號令不虛出而賞罰不濫行是以慎號令明賞罰責功實此三者帝王之奇術也自古人君英雄如漢武帝聰明如唐太宗皆知用一作皆能知此三術而自執威權之柄故一有萬里以快其心欲求將則有衛霍之材以供其指使欲得賢士則有公孫董汲之徒以稱其意唐太宗好用兵則誅突厥服遼東威振夷狄以逞其志欲求將則有李靖李勣之徒一作傳入其駕馭欲得賢士則有房杜之徒一作輩在其左右此二帝者一有凡有所為後世莫及入字可謂所求無不得所欲皆如意無他術也惟能自執威權之柄耳伏惟陛下以聖明之姿超出一作越二帝又蓋有漢唐之天下然而欲禦邊則常患無兵欲破賊則常患無將欲贖軍則常患無財用欲威服四夷則常患無策欲任使賢材則常患無人是所求皆不得所欲皆不如意其故無他由不用威權之術也自古帝王或為強臣所制或為小人所惑則威權不得出於己今朝無強臣之患旁無小人偏任之溺一作又無小人獨任之惑內外臣庶尊陛下如天愛陛下如父傾耳延首願一有聽字陛下之所為然何所憚而不為乎一作何憚而久不為哉若一日赫然執一作奮威權以臨之則一作可使萬事皆辦何患五者之無奈何為三弊之因循一事之不集臣請言三弊夫言多變則一有俗字不信令頻改則一有下字難從一作入今出令之初不加詳審行之未久尋又更張以不信之言行

難從之令故每有處置之事州縣一作天下知朝廷未是一定之命
 則官吏或一作威相謂曰且未要一作可行不久必須更改或曰備
 禮行下略與應破指揮旦夕之間果然又變至於將一作官吏更易
 道路疲於送迎符一作文牒縱橫上下莫能遵守一作事中外臣庶
 一作官吏軍民或聞而歎息或聞而竊笑歎息者有憂天下之心竊
 笑者有輕朝廷之意號令如此欲威天下其可得乎此不慎號令之
 弊一有一字也用人之術不過賞罰一作古今用人之法不過賞罰
 而已用人一作人君然賞及無功則恩不足勸罰失有罪則威無所
 懼雖有人不可用矣一作也太祖時一作臣嘗聞太祖皇帝時王全
 斌破蜀而歸功不細矣犯法一貶十年不問是時方討江南故黜全
 斌與諸將立法一皆及江南已下乃復其官九字太祖神武英斷所
 以能平定天下者其賞罰之法一作分明皆如此也昨一作自關西
 用兵四五年矣一有賞罰之際是非莫分八字大將以無功罷者依
 舊居官軍中見無功者不妨得好官則諸將誰肯立功矣裨將畏懦
 逗留者皆當斬罪或暫貶而尋遷或不貶而依舊軍中見有罪者不
 誅則諸將誰肯用命矣所謂賞不足勸威一作罰無所懼賞罰如此
 而欲用人其可得乎此不明賞罰之弊一有二字也自兵動以來處
 置之事不少然多有名而無實臣請略言其一二則其他可知數年
 以來點兵不絕諸路之民半為兵矣其間老弱病患短小怯懦者不
 可勝數一有兵額空多所用者少八字是有點兵之虛名而無得兵
 之實數一作効也新集之兵所在教習追呼上下民不安居主教者
 非將領之材所教者無旗鼓之節一作法往來州縣愁一作怨嘆嗷
 嗷既多是老病小怯一作弱小懦之人又無訓齊精練之法一作術
 此有教兵之虛名而無訓兵之實藝一作効也諸路州軍分造器械
 一作諸州所造器械數不少矣工作之際已勞民力輦運般送又苦
 道塗一作路然而鐵刃不剛一作鋼筋膠不固長短大小多不中度

造作之所但務充數而速了不計所用之不堪經歷官司又無檢實
 此有器械之虛名而無器械之實用也以草草一作無實之法教老
 一作小怯之兵執鈍折不堪之器械百戰百敗理在不疑臨事而悟
 何可及乎故事無大小悉皆鹵莽則不責功實之弊一有三字也臣
 故曰三弊因循於上則萬事弛慢廢壞於下萬事不可盡言臣請一
 有首字言一有其字大者五事其一曰兵臣聞攻人以謀不以力用
 兵關智不關多前代用兵之人多者常敗少者常勝漢王尋等以百
 萬之兵遇光武九千人而敗是多者敗而少者勝也符堅以百萬之
 兵遇東晉二三萬人而敗是多者敗而少者勝也曹操以三十萬青
 州兵大敗於呂布退而歸許復以二萬人破袁紹十四五萬一作四
 十萬人是用兵多則敗少則勝之明驗也況於夷狄尤難以力爭只
 可以計取李靖破突厥於定襄只用三千人其後破頡利於陰山亦
 不過一萬一作萬人下有其化以三五千人或功塞外者不可悉數
 十六字蓋兵不在多能以計取一作能用計爾故善用兵者以少一
 有而字為多不善用者雖多而愈少也一無此字為今計者一作臣
 謂方今添兵則耗國減兵則破賊今沿邊之兵不下七八十萬可謂
 多矣然訓練不精又有老弱虛數則十人不當一人是七八十萬之
 兵不當七八十萬人之用加又一作之軍無統制分散支離分多為寡
 兵法所忌此所謂不善用兵者雖多而愈少故常戰而常敗也臣願
 陛下赫然奮威勸勵諸將精加訓練去其老弱七八十萬中可得一
 有四字五十萬數古人用兵以一當百今既未能得以一當十則
 五十萬精兵二字一作數可當五百萬兵之用此所謂善用兵者以
 少而為多古人所以少而常勝者以此也今不思實効但務添多耗
 國耗民積以年歲一作遷延日月賊雖不至天下已困矣此一事也
 其二曰將臣又聞古語曰將相無種故或出於奴僕或出於軍卒一
 作或出於士或出於卒或出於奴僕或出於盜賊惟能不次而用

之乃爲名將耳國家求將之意雖勞一作切選將之路太狹今詔近臣舉將而限以資品則英豪之士在下位者不可得矣試將材者限以弓馬一夫之勇則智略萬人之敵皆遺之矣山林奇傑之士召而至者以其貧賤而薄之不過與一主簿借職使其一作之快快而去則古之屠釣飯牛之傑皆激怒而失之矣至於無人可用則寧用龍鍾跛臂庸懦暗劣之徒皆一有委之要地四字授之兵柄天下三尺童子皆爲朝廷危之前日澶淵之卒幾爲國家生事此可見也議者不知取將之無術但云當今之無將臣願陛下革去舊弊奮然精求有賢豪之士不須限以下位有智略之人不必試以弓馬有山林之傑不可薄其貧賤惟陛下能以非常之禮待人人臣亦將以非常之効報國一作爲報又下有又何患於無將哉一句此二事也其三曰財用臣又聞善治病者必醫其受病之處善救弊者必尋一作塞其起弊之源今天下財用困乏其弊安在起於用兵一作兵興而費大故也漢武好窮兵用盡累世之財當時勒兵單于臺不過十八萬一作十萬人尙能困其一無其字國力况未若一無二字今日七八十萬連四五年而不罷一作解所以罄天地之所生竭萬民之膏血而用不足也今雖有智者物不能增而計無所出矣惟有減冗卒之虛費練精兵而速戰功成兵罷自然足矣今兵有可減之理一有而守無人敢當其事賊有速擊之便一有而守無將一作人敢奮其勇後時敗事徒耗國而耗民一有惟陛下以威權督責之乃有期耳二句此三事也其四曰禦戎之策臣又聞兵法曰上兵伐謀其次伐交北虜與朝廷通好僅四十年不敢妄動今一旦發其狂謀者其意何在蓋見中國頻爲元昊所敗故敢啓其貪心伺隙而動爾今若勸勵諸將選兵秣馬疾入西界但能痛敗其賊一陣則吾軍威大振而虜計沮矣此所謂上兵伐謀者也今謂一作論事者皆知北虜與西賊通謀欲併二國之力窺我河北陝西一有若使二虜並寇則難以力支

十一字今若能先擊敗其一國則虜勢減半不能獨舉此兵法所謂伐交者也元昊地狹賊兵不多向來攻我傳聞北虜常有助兵今若虜中自有點集之謀而元昊驟然被擊必求助於北虜北虜分兵助昊則可牽其南寇之力若不助昊則二國有隙自相疑貳此亦伐交之策也假令二國剋期分路來寇我能先期大舉則元昊倉皇自救不暇豈能與北虜相爲表裏是破其素定之約乖其剋日之期此兵法所謂親而離之者亦伐交之策也元昊叛逆以來幸而屢勝常有輕視諸將之心今又見朝廷北憂戎虜方經營於河朔必謂我師不能西出今乘其驕怠正是疾驅急擊之時此兵法所謂出其不意者此一無此字取勝之上策也前年西將有請出攻者當時賊氣力一無力字方威我兵未練朝廷尙許其出師况今元昊有可攻之勢此不可失之時彼方幸吾憂河北而不虞我能西征出其不意此可攻之勢也自四路分帥今已半年訓練恩信兵已可用故近日屢奏小捷是我師漸振賊氣漸斲此可攻之勢也苟失此時而使二虜先來則吾無策矣臣願陛下有一有不以臣言爲狂密十字詔執事之臣熟一作詔四路之帥協議而行之此四事也其五曰可任之臣臣又聞仲尼曰十室之邑必有忠信况今文武列職一作又武常選之官盈於朝廷偏於天下其間豈無材智之臣而陛下總治萬機之大既不敢盡識其人故不能躬自進賢而退不肖執政大臣動拘舊例又不敢進賢而退不肖審官吏部三班之職但掌文簿差除而已又不肖者所以賢愚混雜僥倖相容三載一遷更無旌別平居無事惟患太多而差遣一作餘不行一旦臨事要人常患乏人使用自古任官之法無如今日之繆也今議者或謂一有以字舉主轉官爲進賢犯罪黜責爲退不肖此不知其弊之深也大凡善惡之人各以類聚故守廉慎者各舉清幹之人一無上十字有賊汗者各舉貪濁之人

好徇私者各舉請一作奸財利者各舉諫求之人性庸暗者各舉不材之人一有守廉節者乃舉公幹之人十字朝廷不問是非但見舉主數足便與改官則清一作公幹者進矣貪濁者亦進矣請一作諫求者亦進矣不材者亦進矣混淆如此便可爲進賢之法乎方今黜責官吏豈有澄清糾舉之術哉惟犯贓之人因民論訴者乃能黜之耳夫能舞弄文法而求財賂者亦強黜之吏政事必由己出故雖誅刺豪民尙或不及貧弱至於不材之人不能主事衆胥羣吏共爲姦欺則民無貧富一受弊以此而言則贓吏與不材之人爲害等耳今贓吏因自敗者乃加黜責一不去其一至於不材之人上下共知而不問寬緩容姦其弊如此便可爲退不肖之法乎賢不肖旣無別則宜乎設官雖多而無人可用也臣願陛下明賞罰責功實則材一有不材二字皆列於陛下之前矣臣故曰五者皆有然陛下不得而用者爲有弊也三弊五事臣旣已詳言之矣惟陛下擇之天下之務不過此也方今天文變於上地理逆於下人心怨於內四夷攻於外事勢如此矣非是陛下遲疑寬緩之時惟願爲社稷生民留意一作惟陛下留計狂直甘俟誅夷臣修昧死再拜

居士集卷第四十六

居士集卷第四十七 集四十七

書八首

答陝西安撫使范龍圖辭命書

修頓首再拜啓急脚一作步至得七月十九日華州所發書伏審即日尊體動止萬福一有卑情不任欣慰之至八字戎狄侵邊自古常事邊吏無狀至煩大賢伏惟執事忠義之節信於天下天下之士得一識面者退誇於人以爲榮耀至於游談布衣之賤往往竊託門下之名矧今以大謀小以順取逆濟以明哲之才有必成功之勢則士之好功名者於此爲時孰不願出所長少助萬一得託附以成其名哉况聞狂虜猖獗屢有斥指之詞加之輕侮購募之辱至於執戮將吏殺害邊民凡此數事在於修輩尤爲憤恥每一思之中夜三起不幸修無所能徒以少喜文字過爲世俗見許此豈足以當大君子之舉哉若夫參決軍謀經畫財利料敵制勝在於幕府苟不乏人則軍書奏記一有之拙三字一末事耳有不待修而堪者矣由此始敢以親爲辭况今世人所謂四六者非修所好少爲進士時不免作之自及第遂棄不復作在西京佐三相幕府於職當作亦不爲作此師魯所見今廢已久懼無好辭以辱嘉命此一端也一本此下云某雖儒生不知兵事竊惟兵法有勇有怯必較彼我之利害事之如何要在成功不限遲速某近至京師屢於諸公間略聞緒言攻守之計此實當時之宜非深思遠見者孰能至此願不爲浮議所移伏見自至關西辟士甚衆古人所與成事者必有國士共之非惟在上者以知人爲難士雖貧賤以身許人固亦未易欲其盡死必深相知知之不盡士不爲用今奇怪豪備之士往往蒙見收擇顧用之如何爾一在此在明哲豈須臾言然尙一作但慮山林草莽有挺特知義慷慨自重之士未得出於天下也宜少一作亦宜思焉若修者恨無他才以當長者之用非敢効庸人苟且樂安佚也一本此下云伏蒙不書夏

公又以見舉某孤賤素未嘗登其門非執事過見褒稱何以至此規畏然某已以親老爲辭更無可往之理惟幸察一有焉字

答李詡第一書

修白人至辱書及性詮三篇曰以質其果是一有非乎夫自信篤者無所待於人有質於人者自疑者也今吾子自謂夫子與孟荀楊韓復生不能奪吾言其可謂自信不疑者矣而返以質於修使修有過於夫子者乃可爲一作與吾子辯况修未及孟荀楊韓之一二也修非知道者好學而未至者也世無師久矣尙賴朋友切磋之益苟不自滿而中止庶幾終身而有成固常樂與學者論議往來非敢以益於人蓋求益於人者也况如吾子之文章論議豈易得哉固樂爲一作與吾子辯也苟尙有所疑敢不盡其所學以告既吾子之自信如是雖夫子不能奪使修何所說焉人還索書未知所答慚惕慚惕修再拜

答李詡第二書

修白前辱示書及性詮三篇見吾子好學善辯而文能盡其意之詳今世之言性者多矣有所不及也故思與吾子卒其說修患世之學者多言性故常爲說曰夫性非學者之所急而聖人之所罕言也易六十四卦不言性其言者動靜得失吉凶之常理也春秋二百四十二年不言性其言者善惡是非之實錄也詩三百五篇不言性其言者政教興衰之美刺也書五十九篇不言性其言者堯舜二代之治亂也禮樂之書雖不完而雜出於諸儒之記然其大要治國修身之法也六經之所載皆人事之切於世者是以言之甚詳至於性也百不一二言之或因言而及焉非爲性而言也故雖言而不究子之所謂不言者非謂絕而無言蓋其言者鮮而又不主於性而言也論語所載七十二子之問於孔子者問孝問忠問仁義問禮樂問修身問爲政問朋友問鬼神者有矣未嘗有問性者孔子之告其弟子者凡

數千言其及於性者一言而已予故曰非學者之所急而聖人之罕言也書曰習與性成語曰性相近習相遠者戒人慎所習而言也中庸曰天命之謂性率性之謂道者明性無常必有以率之也樂記亦曰感物而動性之欲者明物之感人無不至也然終不言性果善果惡但戒人慎所習與所感而勤其所以率之者爾予故曰因言以及之而不究也修少好學知學之難凡所謂六經之所載七十二子之所問者學之終身有不能達者矣於其所達行之終身有不能至者矣以予之汲汲於此而不暇乎其他因以知七十二子亦以是汲汲而不暇也又以知聖人所以教人垂世亦皇皇而不暇也今之學者於古聖賢所皇皇汲汲者學之行之或未至其一二而好為性說以窮聖賢之所罕言而不究者執後儒之偏說事無用之空言一作又此子之所不暇也或有一作者問曰性果不足學乎予曰性者與身俱生而人之所皆有也為君子者修身治人而已性之善惡不必究也使性果善邪身不可以不修人不可以不治使性果惡邪身不可以不修人不可以不治不修其身雖君子而為小人書曰惟聖罔念作狂是也能修其身雖小人而為君子書曰惟狂克念作聖是也治道備人斯為善矣書曰黎民於變時雍是也治道失人斯為惡矣書曰殷頑民又曰舊染汙俗是也故為君子者以修身治人為急而不窮性以為言夫七十二子之不問六經之不主言或雖言而不究豈略之哉蓋有意也或又問曰然則三子言性過歟曰不過也其不同何也曰始異而終同也使孟子曰人性善矣遂怠而不教則是過也使荀子曰人性惡矣遂棄而不教則是過也使楊子曰人性混矣遂肆而不教則是過也然三子者或身奔走諸侯以行其道或者書累千萬言以告于後世未嘗不區區以仁義禮樂為急蓋其意以謂善者一日不教則失而入于惡惡者動而教之則可使至于善混者驅而率之則可使去惡而就善也其說與書之習與性成語之性近習

遠中庸之有以率之樂記之慎物所感皆合夫三子者推其言則殊察其用心則一故子以為推一無此字其言不過始異而終同也凡論三子者以子言而一之則饒饒者可以息矣予之所說如此吾子其擇焉

與荆南樂秀才

修頓首白秀才足下前者舟行往來屢辱見過又辱以所業一編先之啟事及門而贊田秀才西來辱書其後予家奴自府還縣比又辱書僕有罪之人人所共棄而足下見禮如此何以當之當之未暇答宜遂絕而再辱書再而未答宜絕而又辱之何其勤之甚也如修者天下窮賤之人爾安能使足下之切切如是邪蓋足下力學好問急於自為謀而然也然蒙索僕所為文字者此似有所過聽也僕少從進士舉於有司學為詩賦以備程試凡三舉而得第與士君子相識者多故往往能道僕名字而又以游從相愛之私或過稱其文字故使足下聞僕虛名而欲見其所為者由此也僕少孤貧食祿仕以養親不暇就師窮經以學聖人之遺業而涉獵書史姑隨世俗作所謂時文者皆穿蠹經傳移此儷彼以為浮薄惟恐不悅于時人非有卓然自立之言如古人者然有司過採屢以先多士及得第已來自以前所為不足以稱有司之舉而當長者之知始大改其為庶幾有立然言出而罪至學成而身辱為彼則獲譽為此則受禍此明効也夫時文雖曰浮巧然其為功亦不易也僕天姿不好而彊為之故比時人之為者尤不工然已足以取祿仕而竊名譽者順時故也先輩少年志感方欲取榮譽於世則莫若順時天聖中天子下詔書勅學者去浮華其後風俗大變今時之士大夫所為彬彬有兩漢之風矣先輩往學之非徒足以順時取譽而已如其至之是直齊肩於兩漢之士也若僕者其前所為既不足學其後所為慎不可學是以徘徊不敢留其所為者為此也在易之困曰有言不信謂夫人方困時其言

不爲人所信也今可謂困矣安足爲足下所取信哉辱書既多且切不敢不答幸察

答吳充秀才書

修頓首白先輩吳君足下前辱示書及文二篇發而讀之浩乎若干萬言之多及少定而視焉纔數百言爾非夫辭豐意雄需然有不可禦之勢何以至此然猶自患俚莫有開之使前者此好學之謙言也修材不足用於時仕不足榮於世其毀譽不足輕重氣力不足動人世之欲假譽以爲重借力而後進者奚取於修焉先輩學精文雄其施於時又非待修譽而爲重力而後進者也然而惠然見臨大字一作惠然而見及若有所責一作求得一無此字非急於謀道不擇其人而問焉者歟夫學者未始不爲道而至者鮮焉非道之於人遠也學者有所溺焉爾蓋文之爲言難工而可喜易悅而自足世之學者往往溺之一有工焉則曰吾學足矣甚者至棄百事不關于心曰吾文士也職於文而已此其所以至之鮮也昔孔子老而歸魯六經之作數年之頃爾然讀易者如無春秋讀書者如無詩一作讀春秋者如無詩書何其用功少而至此字一作自然於至也聖人之文雖不可及然大抵道勝者一有於字文不難而自至也故孟子皇皇不暇著書荀卿蓋亦晚而有作若子雲仲淹方勉焉以模三字一作強區區力作言語此一無此字有而宏博不及孟荀之雄者十字道未足而強一作勉言者也後之惑者徒見前世之文傳以爲學者文而已此句一作又溺其悅也故愈力一無此二字愈勤而愈不至此足下所謂終日不出於軒序一無此足下以下一句不能縱橫高下皆如意者道未一作不足也若道之充焉雖行乎天地一作下入于淵泉無不之也一有何患不至四字先輩一作足下之文浩乎需然可謂善矣而又志於爲道猶自以爲未廣若不止焉孟荀可至而不難也修學道而不至者然幸不甘於所悅而溺於所止因吾子之能不

自止又以勵修之少進焉幸甚幸甚修白

上杜中丞論舉官書

具官修謹齋沐拜書中丞執事修前伏見舉南京留守推官石介爲主簿近者聞介以上書論赦被罷而臺中因舉他代介者主簿於臺職最卑介一賤士也用不用當否未足害政然可惜者中丞之舉動也介爲人剛果有氣節力學喜辯是非真好義之士也始執事舉其材議者咸曰知人之明今聞其罷皆謂赦乃天子已行之令非疎賤當有說以此罪介曰當罷修獨以爲不然然不知介果指何事而言也傳者皆云介之所論謂朱梁劉漢不當求其後裔爾若止此一事則介不爲過也然又不知執事以介爲是爲非也若隨以爲非是大不可也且主簿於臺中非言事之官然大抵居臺中者必以正直謂正直剛明不畏避爲稱職今介足未履臺門之闕而已因言事見罷真可謂正直剛明不畏避矣度介之才不止爲主簿直可任御史也是執事有知人之明而介不負執事之知矣修嘗聞長老說趙中令相太祖皇帝也嘗爲某事擇官中令列二臣姓名以進太祖不肯用它日又問復以進又不用它日又問復以進太祖大怒裂其奏擲殿階一作陛下中令色不動插笏帶間徐拾碎紙袖歸中書它日又問則補綴之復以進太祖大悟終用二臣者彼之敢爾者蓋先審知其人之可用然後果而不可易也今執事之舉介也亦先審知其可舉邪是偶舉之也一作邪若知而舉則不可遽止若偶舉之猶宜一請介之所言辯其是非而後已若介雖忤上而言是也當助以辯若其言非也猶宜曰所舉者爲主簿爾非言事也待爲主簿不任職則可罷請一作請罷以此辭焉可也且中丞爲天子司直之臣上雖好之其人不可不省則當彈而去之上雖惡之其人賢則當舉而申之非謂隨時好惡而高下者也今備位之臣百十邪者正者其糾舉一信於臺臣而執事始舉介曰能朝廷信而將用之及以爲不能則亦曰不能是執

事自信猶不果若遂言它事何敢望天子之取信於執事哉故曰主簿雖卑介雖賤士其可惜者中丞之舉動也况今斥介而它舉必亦擇賢而舉也夫賢者固好辯若舉而入臺又有言則又斥而它舉乎如此則必得愚闇懦默者而後止也伏惟執事如欲舉愚者則豈敢復云若將舉賢也願無易介而它取也今世之官兼御史者例不與臺事故敢布狂言竊獻門下伏惟幸察焉

與曾鞏論氏族書

修一有拜字白一有曾君先輩足下六字貶所僻遠不與人通辱遣專人惠書甚勤豈勝媿也示及見託撰次碑文事務修於人事多故不近文字久矣大懼不能稱述世德之萬一以滿足下之意然近世士大夫於氏族一作族氏尤不明其遷徙世次多失其序至於始封得姓亦或不真如足下所示云曾元之曾孫樂為漢都鄉侯至四世孫據遭王莽亂始去都鄉而家豫章考於史記皆不合蓋曾元去漢近二百年自元至樂似非曾孫然亦當在漢初則據遭莽世失侯而徙蓋又二百年疑亦非四世以諸侯年表推之雖大功德之侯亦未有終前漢而國不絕者亦無自高祖之世至平帝時侯纔四傳者宣帝時分宗室趙頃王之子景封為都鄉侯則據之去國亦不在莽世而都鄉已先別封宗室矣又樂據姓名皆不見於年表蓋世次久遠而難詳如此若曾氏出於鄒者蓋其支庶自別有為曾氏者爾非鄒子之後皆姓曾也蓋今所謂鄒氏者是也楊允恭據國史所書嘗以西京作坊使為江浙發運制置茶鹽使乃至道之間耳今云洛苑使者雖且從所述皆宜更加考正山州無文字尋究一有不能周悉四字幸察

答宋咸書

修頓首白州人一作史至蒙惠書及補注周易甚善世無孔子久矣六經之旨失其傳其有不可得而正者自非孔子復出無以得其真

也儒者之於學博矣而又苦心勞神一作疲精於殘編朽簡之中以求一作考千歲失傳之繆茫乎前望已遠之聖人而不可見者乎後顧無窮之來者欲為未悟決難解之惑是真所謂勞而少功者哉然而一有六字經非一世之書也其傳之繆非一日之失也其所以刊正補緝亦非一人之能也使學者各極其所見而明者擇焉十取其一百取其十雖未能復六經於無失而卓如日月之明然聚衆人之善以補緝之庶幾不至於大繆可以俟聖人之復生也然則學者之於經一無三字其可已乎足下於經一本二字作之於學勤矣一有其於經至矣乎凡其所失無所不欲正之其刊正補緝者衆則其所得亦已多矣修學一作性不敏明而又無疆力以自濟恐終不能少出所見以補六經一作失傳之萬一得足下所為故尤區區而不能忘也屬奉使出疆一本二字作行有日忽忽不具一本具字作得盡所懷惟一有以時字自愛廬陵歐陽修再拜

居士集卷第四十七

居士集卷第四十八 集四十八

策問十二道

武成王廟問進士策二首

問學者言三統之義備矣然自孔子刪修六經與其弟子論辨堯舜
三代之際甚詳而於正朔獨無明文見於經者三正王者所以正一
統蓋大法也豈宜略而不言歟抑隱其義以寓見諸書歟或者經籍
散缺而失之歟自漢以來學者多增三統之說以附六經之文今所
見者特因漢儒之說爾當漢承秦焚書聖經未備而百家異說不合
于理者衆則其言果可信歟夫衆辭淆亂質諸聖今考於六經孔子
所筆何說可以驗其信然歟不然商周未嘗有改歟豈其不足爲法
聖人非之而不言歟請稽三王之舊典考六經之明文以祛厥疑敢
俟來對

問禮樂治民之具也王者之愛養斯民其於教導之方甚勤而備故
禮防民之欲也周樂成民之俗也厚苟不由焉則賞不足勸善刑不
足禁非而政不成大宋之興八十餘歲明天子仁聖思致民於太平
久矣而天下之廣元元之衆州縣之吏奉法守職不暇其他使愚民
目不識俎豆耳不聞弦歌民俗頑鄙刑獄不衰而吏無任責夫先王
之遺文具在凡歲時吉凶聚會考古禮樂可施民間者其別有幾順
民便事可行於今者有幾行之固有次第其所當先者又有幾禮樂
興而後臻於富庶歟將既富而後教之歟夫政緩而迂鮮近事實教
不以漸則或戾民欲其不迂而政易成有漸而民不戾者其術何云
儒者之於禮樂不徒誦其文必能通其用不獨學於古必可施於今
願悉陳之無讓

問進士策二首

問六經者先王之治具而後世之取法也書載上古春秋紀事詩以
微言感刺易道隱而深矣其切於世者禮與樂也自秦之焚書六經

盡矣至漢而出者皆其殘脫顛倒或傳之老師昏耄之說或取之家
墓屋壁之間是以學者不明異說紛起况乎周禮其出最後然其爲
書備矣其天地萬物之統制禮作樂建國居民養生事死禁非道善
所以爲治之法皆有條理三代之政美矣而周之治迹所以比二代
而尤詳見於後世者周禮著之故也然漢武以爲瀆亂不驗之書何
休亦云六國陰謀之說何也然今考之實有可疑者夫內設公卿大
夫士下至府史胥徒以相副貳分九服建五等差尊卑以相統理
此周禮之大略也而六官之屬略見於經者五萬餘人而里閭縣鄙
之長軍師卒伍之徒不與焉王畿千里之地爲田幾井容民幾家王
官王族之國邑幾數民之貢賦幾何而又容五萬人者於其間其人
耕而賦乎如其不耕而賦則何以給之夫爲治者故若是之煩乎此
其一可疑者也秦既誹古盡去古制自漢以後帝王稱號官府制度
皆襲秦故以至於今雖有因有革然大抵皆秦制也未嘗有意於周
禮者豈其體大而難行乎其果不可行乎夫立法垂制將以遺後也
使難行而萬世莫能行與不可行等爾然則反秦制之不若也脫有
行者亦莫能興或因以取亂王莽後周是也則其不可用決矣此又
可疑也然其祭祀衣服車旗似有可采者豈所謂郁郁之文乎三代
之治其要如何周禮之經其失安在宜於今者其理安從其悉陳無
隱

問古者爲治有繁簡其施於民也有淺深各適其宜而已三代之盛
時地方萬里而王所自治者千里而已其餘以建諸侯至於禮樂刑
政頒其大法而使守之則其大體蓋簡如此諸侯大小國蓋數千必
各立都邑建宗廟卿士大夫朝聘祭祀訓農練卒一作訓練武士居
民度土自一夫以上皆有法制則其於衆務何其繁也今自京師至
於海隅徼障一尉卒之職必命於朝政之大小皆自朝出州縣一作
郡之吏奉行而已是舉天下皆所自治其於大體則爲繁一有日勞

二字矣其州縣大小邑閭田井訓農練卒一夫以上略無制度其於衆務何其忽而簡也夫禮以治民而樂以和之德義仁恩長養涵澤此三代之所以深於民者也政以一一作均民刑以防之一作姦此其淺者爾一有蓋不可專用也六字今自宰相至于州縣一有之字一作至內外凡百有司莫不行文書治吏事其急在於督賦斂斷獄訟而已此特淺者爾禮樂仁義更不知所以爲而欲望民之被其教其可得乎一有况民之混混乎此專務其淺而忘其所以教民之深之弊也久矣二十五字夫治大以簡則力有餘治小以繁則事不遺制民以淺則防其僻漸民以深則化可成此三代之所以治也今一切悖古簡其當繁而繁其可簡一作大者煩而勢細者簡而務其淺而忽其深故爲國百年而仁政未成生民未厚者以此也然若欲使國體大小適繁簡之宜法政弛張盡淺深之術諸侯井田不可卒復施於今者何宜禮樂刑政一作仁義不可卒成用於今者何便悖古之失其原何自修復之方其術何始迹治亂通古今子大夫之職也其悉心以陳焉

問禮樂之書散亡而雜出於諸儒之說獨中庸出於子思子思聖人之後也其所傳宜得其真而其說有異一作異乎聖人者何也論語云吾十有五而志于學三十而立四十而不惑五十而知天命蓋孔子自年十五而學學十五年而後有立其道又須十年而一進孔子之聖必學而後至久而後成而中庸曰自誠明謂之性自明誠謂之教自誠明生而知之也自明誠學而知之也若孔子者可謂學而知之者孔子必須學則中庸所謂自誠而明不學而知之者誰可以當之歟堯用四凶其初非不思也蓋思之不能無失耳故曰惟帝其難之舜之於事必問於人而擇焉故曰舜好問禹之於事己所不決人入告必改故曰改過不悛孔子亦嘗有過故曰幸苟有過人必知之

而中庸曰誠者不勉而中不思而得夫堯之思慮常有失舜禹常待人之助湯與孔子常有過此五君子者皆上古聖人之明者其勉而思之猶有不及則中庸之所謂不勉而中不思而得者誰可以當之歟此五君子者不足當之則自有天地已來無其人矣豈所謂虛言高論而無益者歟夫孔子必學而後至堯之思慮或失舜禹必資於人湯孔不能無過此皆勉人力行不怠有益之言也若中庸之誠明不可及則怠人而中止無用之空言也故子疑其傳之謬也吾子以爲如何

南省試進士策問三首

問昔者禹治洪水奠山川而堯稱之曰萬世之功也蓋遭大水莫如堯致力以捍四字一作能捍大患莫如禹別四海九州山川地形盡水之性知其利害而治之有法莫一作未有如禹貢之爲書一作詳也故後世之言知水者必本於禹求所以治之之法與其跡者必於禹貢然則學者所宜盡心也國家天下廣矣其爲水害者特一河耳非有堯之大患也自橫壠商胡再決三十餘年天下無一人能與水利者豈有其人而弗求歟求而弗至歟抑不知水性而乖其導洩之方由禹貢之學久廢而然歟此當今之務學者之所留意也且堯之九州孰高孰下禹所治水孰後孰先考其治之之跡導其大水所從來而順其歸其小水則或附而行或止而有所畜然後百川皆得其宜夫致力於其大而小者從之此豈非其法歟然所導大水其名有幾夫欲治水而不知地形高下所治後先致力之多少及其名與數則何以知水之利害故願有所聞焉夫禹所以通治水之法如此者必又得其要願悉陳之無隱

問三王之治損益不同而制度文章惟周爲大備周禮之制設六官以治萬民而百事理夫公卿之任重矣若乃祭祀天地日月宗廟社稷四郊明堂之類天子大臣所躬親者一歲之間有幾又有巡狩朝

會師田射耕燕饗凡大事之舉一歲之間又有幾而爲其民者亦有
畋獵學校射鄉飲酒凡大聚聚字一作事期會一歲之間有幾又有
州黨族官歲時月朔春秋醴祭一作蜡祭詢事讀法一歲之間又有
幾其齋戒供給期召奔走廢日幾何由是而言疑其官不得安其府
民不得安其居亦何暇修政事治生業乎何其煩之若是也然說者
謂周用此以致太平豈朝廷禮樂文物萬民富庶第必如是之勤
且詳然後可以致之歟後世苟簡不能備舉故其未能及於三代之
盛歟然爲治者果若是之勞乎用之於今果安焉而不倦乎抑其設
施有法而第弗深考之歟諸君子爲言之

問六十四卦所謂易者聖人之書也今謂之繫辭昔謂之大傳者亦
皆曰聖人之作也其言曰兩儀生四象四象生八卦又曰河出圖聖
人則之又曰庖犧氏之王天下也仰觀于天俯察于地觀鳥獸之文
近取一有諸字下同身遠取物始作八卦又曰昔者聖人之作易也
幽贊於神明而生蓍參天兩地而倚數觀變於陰陽而立卦一書而
四說則八卦者果何從而有所若曰河圖之說信然乎則是天生神
馬負八卦出于水中乃天地自然之文爾何假庖犧始自作之也如
幽贊生蓍之說又似八卦直因蓍數而生爾至於兩儀四象相生而
成則又無待於三說而有卦也故一說苟勝則三說可以廢也然孰
從而爲是乎卜筮自堯舜二代以來用之蓋古聖人之法也不必窮
其始於古遠茫昧之前然繫辭聖人之作也必有深旨幸決其疑

問進士策四首

問孟子以謂井田不均則穀祿不平經界既正而分田制祿可坐而
定也故曰仁政必自經界始蓋三代井田之法也自周衰迄今田制
廢而不復者千有餘歲凡爲天下國家者其善治之迹雖不同而其
文章制度禮樂刑政未嘗不法三代而於井田之制獨廢而不取豈
其不可用乎豈憚其難而不爲乎然亦不害其爲治也仁政果始於

經界乎不可用與難爲者果萬世之通法乎王莽嘗依古制更名一
有民字田矣而天下之人愁苦怨叛卒共起而亡之莽之惡加于人
者雖非一而更田之制當時特爲不便也嗚呼孟子之所先者後
世皆不用而治用之而民特愁苦怨叛以爲不便則孟子謂之仁政
可乎記曰異世殊時不相沿襲書又曰事不師古匪說攸聞書傳之
言其戾如此而一作於孰從乎孟子世之所師也豈其泥於古而不
通於後世乎豈其所謂迂闊者乎不然將有說也自三代之後有天
下莫盛漢唐漢唐之治視三代何如其民田之制稅賦之一有法數
祿之四字差又何如其可施於今者又何如皆願聞其詳也

問子不語怪著之前說以其無益於事而有惑於人也然書載鳳凰
之來舜詩錄玄鳥之生商易稱河洛出圖書禮著龜龍游宮沼春秋
明是非而正王道六鵠鸚鵡於人事而何于二南本功德於后妃麟
豎騶虞豈婦人而來應昔孔子見作俑者歎其不仁以謂開端於用
殉也况六經萬世之法而容異說自啓其源自秦漢已來諸儒所述
荒唐怪誕無所不有推其所自抑有漸乎夫無焉而書之聖人不爲
也雖實有焉書之無益而有害不書可也然書之亦有意乎抑非聖
人之所書乎予皆不能論也惟博辯明識者詳之

問爲政者狗彘名乎襲迹乎三代之名正名也其迹治迹也所謂名者
萬世之法也迹者萬世之制也正名立制言順事成然後因名迹以
考實而其文章事物粲然無不備矣可謂盛哉董仲舒以謂三代質
文有改制之名而無變道之實者是也自秦肆其虐滅棄古典然後
三代之名與迹皆變易而喪其實豈所謂變其道者邪然自秦迄今
千有餘歲或治或亂其廢興長短之勢各由其人爲之而已其襲秦
之名不可改也三代之迹不可復也豈其理之自然歟豈三代之制
止於三代而不可施於後世歟王莽求其迹而復井田宇文求其名
而復六官二者固昏亂敗亡之國也然則孔子言爲政必也正名蓋

子言爲政必始經界豈虛言哉然自秦以來治世之主幾乎三代者唐太宗而已其名迹固未嘗復三代之一二而其治則幾乎三王豈所謂名迹者非此之謂歟豈遺名與迹而直考其實歟豈孔孟之所謂者有旨而學者弗深考之歟其酌古今之宜與其異同者以對問古之取士者上下交相待以成其美今之取士者上下交相害欲濟於事可乎古之士教養有素而進取有漸上之禮其下者厚故下之自守者重上非厚禮不能以得士士非自重不能以見禮於上故有國者設爵祿車服禮樂于朝以待其下爲士者修仁義忠信孝悌於家以待其上設于朝者知下之能副其待則愈厚居下者知上之不薄于己故愈重此豈不交相成其美歟後世之士則反是上之待其下也以謂于利而進爾雖有爵祿之設而日爲之防以革進之濫者下之視其上也以謂雖自重上孰我知不自進則不能以達由是上之待其下也益薄下之自守者益不重而輕鳴呼居上者欲得其人在下者欲行其道其可得邪原夫三代取士之制如何漢魏迄今其變制又如何宜歷道其詳也制失其本致其反古一有復自何時欲就今制稍復於古十二字當自何始今之士皆學古通經稍知自重矣而上之所以禮之者未加厚也噫由上之厚然後致下之自重歟必下之自重然後上禮之厚歟二者兩不爲之先其勢亦奚由而合也宜具陳其本末與其可施於今者以對

居士集卷第四十八

居士集卷第四十九 集四十九

祭文二十首

求雨祭一作五龍祈雨文

年月日乾德縣令歐陽修謹以清酌庶羞之奠祭于五龍之神曰百里之地一時而不雨則民被其災者數千家然則水旱一有之字重事也一無此字天之庇生斯民者豈欲輕爲之乎不幸而遭焉則歸其說於二者一曰吏之貪戾不能平民而使怨吁之氣于於陰陽之和而然也一曰凡山川能出雲爲雨者皆有神以主之以節豐凶而爲民之司命也故水旱之災不以責吏則以告神嗚呼民不幸而罹其災修一作吏與神又不幸而當其事者以吏食其祿而神享其祀也今歲旱矣令一作吏雖愚尙知恐懼而奔走神至靈也得不動於心乎尙饗

求雨祭漢景帝文

維年月日具官修告于漢孝景帝之神縣有州帖祈雨諸祠縣令至愚以謂雨澤頗時民不至於不足不敢以煩神之視聽癸丑出于近郊見民稼之苗者荒在草間問之曰待雨而后耘籽又行見老父曰此月無雨歲將不成然後乃知前所謂雨澤頗時者徒見於城郭之近而縣境數百里山陂田畝之間蓋未及也修以有罪爲令於此宜勤民事神以塞其責令既治民獄訟之不明又不求民之所急至去縣十餘里外凡民之事皆不能知頑然慢於事神此修爲罪又甚於所以來爲令之罪惟神爲漢明帝生能惠澤其民布義行剛威靈之名照臨後世而尤信於此土之人神其降休以答此土之民之信尙饗

祭桓侯文

謹以堯肩卮酒之奠告于桓侯張將軍之靈農之爲事亦勞矣盡筋力勤歲時數年之耕不遇一歲之稔稔則租賦科斂之不暇有餘而

食其得幾何不一作不幸則水旱相枕爲餓殍夫豐歲常少而凶歲常多今夏麥已登粟與稻之早者民皆食之矣秋又大熟則庶幾可以支一二歲之凶荒歲功將成曷忍敗之今晚田秋稼將實而少雨雨之降者頻在近郊山田僻遠欲雨一作高阜之方皆未及也惟神降休宜均其惠而終成歲功神生以忠勇事人威名震於荆楚沒食其土民之所宜告也尙饗

北嶽廟賽雨祭文

古者諸侯之國水旱豐凶山川所禱各卽其封祀薄秩卑止於一國而神所降休亦不過其國中豈如巨岳四方之鎮天下之雄天子命祀公王之崇而修之職既非一邦之守凡河北千里上給下足皆責于厥躬故修之禱非鎮一州而止自河以北冀厥惠之威蒙沉神之主又非河北而已利澤之廣宜及於無窮既獲賜矣而又敢躡幸神聽之惟聽尙饗

修城祈晴祭五龍文滕州

雨澤於物博哉其利及其過差患亦不細民勞於農將熟而敗吏動於職一作于城已成而圯一作壞龍於吏民何怒何戾山湫有祠樂可潛戲宜安爾居一作蕪靜以養智冬雪春雨其多已太浸潤收畜足支一歲旱則來告一作救否當且待一作有待

又祭城隍神文滕州

雨之害物多矣而一作惟城者神之所職不敢及他請言城役用民之力六萬九千工食民之米一千三百石衆力方作雨則止之城功既一作已成雨又壞之敢問雨者於神誰尸吏能知人一作成城不能知一作爲字雨惟神有靈可與雨一作以與語吏竭其力神祐以靈各供其一作厥職無媿斯民

祈晴祭城隍神文

昨者王倫爲盜攻劫城市州民被虐餘毒未瘳非待修言乃神所見

近蒙朝旨許理城隍所以戒往禦防未然惟神愛福此州必有陰助今與役有期而大雪不止沮民害事必有歸惟修不能事神治民當有明罰而城之成否自繫神民惟神之靈敢以誠告數日之內豁然陽開尚不失時在神而已尚饗

又祭漢高祖一作城隍廟文滁州

民常患不勤於農農勤矣而兩敗其稼吏常患不修其職職修矣而兩害其功吏與民一作民怠慢則懼神罰妨民沮吏豈又神聰今麥雖已失猶有望於穀城尚可補敢不勞厥躬谷難追於已往神幸惠於其終

祈雨祭漢高皇帝文滁州

維年月日具官歐陽修謹以清酌庶羞之奠致祭于漢高皇帝之靈一作神而言曰吏有常職來官于滁一作此者不三四歲而易也神食于此無窮已也神與吏於滁人孰親且久一有也字孰宜愛其一作滁人之深也滁人敢慢其吏而犯吏法者有矣未聞有敢慢神而犯威靈也其畏信動事於吏孰若畏信動事於神也吏於凡小事猶皆一無此字動有法令約束違則有罰孰若神之變化不測而能與民轉災為福也吏朝夕拜禱彌旬越月而無所感動神之招呼風雲開闔陰陽而役使鬼物頃刻之間一有爾孰難而孰易六字也今民田待雨急矣吏知人力不能為猶竭其力而不得已況神之易為也况滁人一作民畏信動事之久而親神宜愛之一作神宜愛之深也而又有可以轉災為福變化不測之能也吏誰敢與神較而一無此二十三字修輒一作敢以此為贖者蓋哀民之急辭也其政一作某政之不善而召災旱又以為贖神宜降殃於一作于修而賜民以兩使賞罰並行而兩得也民之幸也修之願一作幸也尚饗

漢高祖廟賽雨文

謹以清酌庶羞之奠致祭于漢高皇帝之神古之為政者率人甚勤

備災甚謹而自勉甚篤故勸農節用均豐補敗雖有水旱之歲而無飢殍之民一遇天災則厚自貶責務修人事之闕而復陰陽之和今乃不然當無事之時不能動民於農而亡備災之具一月不雨使民惶惶又不自責以修其闕而動輒于神賴神聰明知厥過之在吏闕斯民之可哀賜之豐年徧及遠邇神之太惠如何可報吏之大過如何可逃惟與民永承事神無敢懈尚饗

祈雨祭張龍公文潁州

維年月日具官修謹以清酌庶羞之奠致祭于張龍公之神曰刺史不能為政而使民失所其咎安歸而又頑傲愚冥無誠愨忠信之心可以動於物者是皆無以進說於神雖其有請宜不一作無聽也然而明天子閔閔憂勞於上而生民嗷嗷困苦于下公私並乏道路流亡於此之時以一日之兩救一方之旱用力至少其功至多此非人力之所能為而神之所甚易也苟以此說神其有不動於心者乎幸無以刺史不堪而止也刺史有職守不獲躬走祠下謹遣管界巡檢田甫布茲懇迫尚饗

祭薛尚書一作簡肅公

維年月日具官歐陽修謹以清酌庶羞之奠恭祭于故資政殿學士贈兵部尚書薛公之靈景祐之元公初解政雖告于家而疾未病若修之鄙敢辱公知公於此時欲以女歸公德方隆謂當再起齊大之婚敢辭以禮天不憖遺公薨忽然其後二一作三年卒追前言生死一作死生之間以成公志掛劍于墓古人之義公敏於材剛毅自勵不顧不隨以直而遂命也在天往則難期惟其行己敢言是一作自師有罪之身竄逐囚拘生不及門一不送車致誠薄奠因道終初尚饗

祭謝希深一作舍人文

維年月日具官修將以明日抵役于滑謹用清酌庶羞之奠致祭于

故副閣舍人謝公之靈嗚呼謝公一作公乎性明於誠履蹈其方其於死生固已自達而天下之士所以嘆息而不已者昔時之良況於吾徒師友之分情親義篤其何可忘景祐之初修志于峽而公在江東寓書真州哀其親老一作甚因而勉以自彊其後二年再遷漢土風波霧毒凡萬二千里而會公南陽初來謁公迎我而笑與我別久憐其貌若故而氣揚清風之館覽秀之涼坐竹林之修簾泛水芰之清香及告還一作歸邑得官靈昌走書來報喜詠于章罷縣無歸來客公邦徽言未幾遽問于牀不見五日而入哭其堂嗚呼謝公年不得中壽而位止于郎惟其歿也哭者爲之哀不識者爲之相弔或賻其家或力其喪嗟夫爲善之効得此而已庸何傷富貴偶也壽夭數也奚一作何較其少多而短長若公之有言著于文行著于事材著于用既久而愈彰此吾徒可以無大恨而君子謂公爲不亡滑人來迎修馬當北而不即去者以公而彷彿始修將行期公錢我今其去也來奠公觴茲言悲矣公其聞乎抑不聞也徒有淚而浪浪尙饗

祭薛質夫文大理寺丞薛宜濤

嗟吾質夫行豐而腴乃享其癯莖華雖敷不斂而枯善惡賢愚非有契符報或一差咎誰歸辜孔智通天曰命矣夫在聖猶疑況於吾徒嗟吾質夫毋不勝縷幕無孺孤奠觴爲訣已矣嗚呼尙饗

祭叔父文

維年月日具官姪修謹以清酌庶羞之奠致祭于十四叔都官之靈曰昔官夷陵有罪之罰今位於朝而參諫列榮辱雖異實皆羈縶使脩哭不及喪而葬不臨穴孩童孤艱哺養提挈昊天之報於義何闕惟其報者庶幾大節尙饗

祭尹子漸文太常博士知懷州尹源

年月日具官歐陽修謹遣人自鎮陽至懷州以清酌庶羞之奠致祭于亡友尹君子漸十一兄博士之靈嗚呼天於一作生萬物與吾人

孰愛憎而薄厚其生未始以一齊其死宜其有天壽苟百年者亦死則短長之何較惟善人之可喜謂宜在世而常存曰仁者壽兮是亦愛之者之說謂善必福兮得非以己而推天禍福吉凶一作壽夭至其難通雖聖人亦曰命而罕言兮豈其至此而辭窮壽夭置之吾不能問嗟乎子漸吾獨有恨我不見子於今幾時自子得懷始有見期子不能來我欲亟往子今安歸我往何一作誰訪昔我在朝諫官侍從職當薦賢知子不貢朋黨之誣苟避讒諷兩相知而以心謂尺書之不用遂聲音之永隔哭不聞而徒慟嗟此奠之一觴冀歡言之可共往莫及兮難追哀以辭而永送尙饗

祭尹師魯文

維年月日具官歐陽修謹以清酌庶羞之奠祭于亡友師魯十二兄之靈曰嗟乎師魯辯足以窮萬物而不能當一獄吏志可以狹四海而無所措其一身窮山之崖野水之濱猿獫之窟麋鹿之羣猶不容於其間兮遂即萬鬼而爲鄰嗟乎師魯世之惡子之多未必若愛子者之衆何其窮而至此兮得非命在乎天而不在乎人方其奔顛斥逐困厄艱屯舉世皆冤而語言未嘗以自及以窮至死而妻子不見其悲忻用捨進退屈伸一作出處語默夫何能然乃學之力至其握手爲訣隱几待終顏色不變笑言從容死生之間既已能通於性命憂患之至宜其不累於心胸自子云逝善人宜哀子能自達乎又何悲惟其師友之益平生之舊情之難忘言不可究嗟乎師魯自古有死皆歸無物惟聖與賢雖埋不沒尤於文章悼若星日子之所爲後世師法雖嗣子尙幼未足以付子而世人藏之庶可無於墜失子於衆人最愛予文寓辭千里循此一罇冀以慰子聞乎不聞尙饗

祭蘇子美文

維年月日具官歐陽修謹以清酌庶羞之奠致祭于亡友湖州長史蘇君子美之靈曰哀哀子美命止斯邪小人之幸君子之嗟子之心

胸蟠屈龍蛇風雲變化兩電交加忽然揮斧霹靂轟車人有遭之心
驚膽落震仆如麻須臾霽止而回一作四顧百里山川草木開發萌
芽子於文章雄豪放肆有如此者吁可怪邪嗟乎世人知此而已貪
悅其外不窺其內欲知子心窮達之際金石雖堅尚可破壞一作碎
子於窮達始終仁義惟人不知乃窮至此蘊而不見遂一作處以沒
地獨留文章照耀後世嗟世之愚掩抑毀傷譬如磨鑑不滅愈光一
世之短萬世之長其間得失不待較量哀哀子美來舉子觴尚饗

祭鄭宣徽文

謹以清酌庶羞之奠致祭于宣徽太尉鄭公之靈曰修曩在場屋公
爲先進既登館閣遂獲並遊平生笑言俯仰今昔至於勤勞中外啓
沃謀猷紀德揚功已著朝廷之論臨風隕涕但伸朋舊之私永訣之
情一觴而已尚饗

皇考焚黃祭文

男修謹以清酌庶羞之奠告于皇考郎中之靈脩不肖不能紹稟先
訓尚賴餘德遺休不隕其世得階仕進荷國寵靈欲報之恩不知其
所幸天子以孝治天下凡列位于朝者皆有追榮之典俾其知所以
有此爵祿者皆有自來而退得伸其私志故自上三見于郊一開明
堂以大享其所推恩自太子中允尚書工部兵部員外郎兵部郎中
告于第者四今謹以告惟是褒榮之意則具載于訓辭尚饗

居士集卷第四十九

居士集卷第五十 集五十

祭文十七首

祭程相公文

維至和三年歲次丙申月日具官歐陽修謹以清酌庶羞之奠致祭于故太師相國程公之靈嗚呼公於時人氣剛難合子實後進晚而相接一笑之樂淋漓酒卮十年再見公老子衰公遽如此子存幾時人生富貴朝露之光及其零落止一作益益悲傷惟可喜者令名不忘士窮閭巷念不逢時公位將相韜能不施公居廟堂有言諤諤白首于外愉愉其樂酒酣氣振猶見鋒鏑惜也雖老神清志完手書未復訃已在門昔者罇酒歌歡笑諠今而一觴涕淚霑落死生忽焉自古常然撫棺為訣夫復何言尙饗

祭資政范公文

月日廬陵歐陽修謹以清酌庶羞之奠致祭于故資政殿學士尙書戶部侍郎范文正公之靈曰嗚呼公乎學古居今持方入圓邱軻之艱其道則然公曰彼惡謂公好訐公曰彼善謂公樹朋公所勇爲謂公躁進公有退讓謂公近名讒人之言其何可聽先事而斥羣讒衆排有事而思雖仇謂材毀不吾傷譽不吾喜進退有儀一作度夷行險止嗚呼公乎舉世之善誰非公徒讒人豈多公志不舒善不勝惡豈其然乎成難毀易理又然歟嗚呼公乎欲壞其棟先摧榱椳傾巢破殼披折傍枝害一損百人誰不懼誰爲黨論是不仁哉嗚呼公乎易名謚行君子之榮生也何毀沒也何稱好死惡生殆非人情豈其生有所嫉而死無所爭自公云亡謗不待辨愈久愈明由今可見始屈終伸公其無恨寫懷平生寓此薄奠

祭杜祁公文

維嘉祐二年三月日具官歐陽修謹遣驅使官趙日宣以清酌庶羞之奠致祭于故太子太師贈司徒侍中杜公之靈曰士之進顯於榮

祿者莫不欲安享於豐腴公爲輔弼飲食起居如陋巷之士環堵之儒他人不堪公處愉愉士之退老而歸休者所以思自放於閑適公居于家心在于國思慮精深言辭感激或達旦不寐或憂形于色如在朝廷而有官責嗚呼進不知富貴之爲樂退不忘天下以爲心故行於己者老益篤而信於人者久愈深人之愛公寧有厭已壽胡不多八十而止自公之喪道路嗟咨況於愚鄙久辱公知繫官在朝心往神馳送不臨穴哭不望帷銜辭寫懷有涕漣而尙饗

祭吳尙書文

維嘉祐三年五月庚午朔具官歐陽修謹遣驅使官田安之至于西京以清酌庶羞之奠致祭于故留守資政左丞贈吏部尙書吳公之靈曰嗚呼公乎余將老也閱世久也見一作念時之事可喜者少而可悲者多也士多勤其身以干祿仕取名聲初若可愛慕者衆也既而得其所欲而怠與迫於利害而遷求全其節以保其終者十不一二也其人康強飲食平居笑言以相歡樂察其志意可謂偉然而或離或合不見幾時遂至於衰病與其俯仰旦暮之間忽焉以死者十常八九也嗚呼公乎所謂善人君子者其難得既如彼而易失又如此也故每失一人未嘗不咨嗟頌泣至於失聲而長號也一有惟字公材謀足以居大臣文學足以名後世宜在朝廷以講國論而久留于外宜享壽考以爲人望而遽云長逝一作往此播紳大夫所以聚弔于家而交朋故舊莫不走哭于位一作次豈惟老病之人獨易感而多涕也尙饗

祭梅聖俞文

維嘉祐五年歲次庚子七月丁亥朔九日乙未具官歐陽修謹率具官呂某劉某以清酌庶羞之奠致祭于亡友聖俞之靈而言曰昔始見子伊川之上余仕方初子年亦壯讀書飲酒握手相歡談辯鋒出賢豪滿前謂言仕宦所至皆然但當行樂何有憂患子去一作出河

南余貶山峽三十年間乖離會合晚被選擢濫官朝廷薦子學舍吟哦六經余才過分可愧非榮子雖窮厄日有聲名余獨而剛中遭多難氣血先耗髮鬢早變子心寬易在險如夷年實加我其顏不衰謂子仁人自宜多壽余嘗膏火煎熬豈久事今反此理固難知況於高貴又何必期念昔河南同時一輩零落之餘惟子子在子又去我余存無幾凡今之遊皆莫余先紀行琢辭子宜余責送終卹孤則有衆力惟聲與淚獨出余臆尙饗

曾祖曾祖母祖祖母焚黃祭文

維嘉祐七年歲次壬寅某月朔日曾孫具官修謹以清酌庶羞之奠及太子少保太保延安郡榮國太夫人之告四通告于曾祖太保曾祖母太夫人之靈曰修以不肖之質獲蒙祖考之餘休享有爵祿材薄任重繆膺獎擢踐更二府國有常典命及其先非惟優異丞弼之臣蓋所以彰積善垂慶其來有自而欲潛光闕德發耀有時俾爲臣子者退得伸孝於家而進以盡忠於國是謂一施而兩得此朝廷所以推仁廣恩而爲小子之幸也敢不夙夜祗畏竭其思慮勉其不逮俾有樹立冀不顛墜其家聲以對揚天子之寵靈以承賴祖考之遺德官有職任繫身于朝不得瞻望松楸親執邊豆謹遣兄之子廬陵縣尉嗣立以告祖祖母同詞

皇考太師祭文

嗣子具官修謹以清酌庶羞之奠及太常少卿給事中太子少師太師告身四通告于皇考太師之靈曰修獲罪于天幼懼孤苦蒙賴積德積善之慶不殞其躬得從士大夫之列天子哀其祿不獲養而寵及其親曰非以爲榮俾以伸汝志亦以示國家推仁廣惠不忘人之先也有慶賜之恩而又有官秩之寵粵元年季秋天子恭謝天地于大慶則有太常少卿之命四年孟冬拾享于廟則有給事中之贈五年冬十有一月修忝貳樞密則有少師之錫明年閏八月承乏東府

則有太師之告而修官職有守不得以時躬親即事留君之命于家不恭不勉力于其親不孝罪莫大焉是以涕泣憂懼不能自安謹遣兄之子廬陵縣尉嗣立以告尙饗

皇妣太夫人祭文

嗣子具官修謹以清酌庶羞之奠及平昌榮陽郡太君安定郡永國太夫人告身四通告于皇妣太夫人之靈曰修有不孝之罪不得躬親省視松楸者于茲十年無歲不請于朝而訖不獲報遂以貪冒榮祿留連歲時獨幸天子仁恩教人以孝俾得寵及其親故自嘉祐之元始今凡四被追封之告亦足以少慰爲鳥之心而備官東府任責至重不得退徇其私有司所下告第之制所以誕揚休命寵褒幽顯者不能躬自臨事則又以承負至慈罔極不報之恩不勝悲慕哀愴之情謹遣兄之子嗣立以告尙饗

祭宋侍中文

惟靈明誠敏識清方粹直由初考終不變一德忽然云亡天子之惻富於文章玉質天葩施之朝廟炳耀光華自茲而絕學者之嗟既文一作智且賢周達善問惟此不朽有司之信輻車其行禮備哀榮奠觴爲訣修等之誠尙饗

英宗皇帝靈駕發引祭文

維治平四年歲次丁未八月丁未朔八日甲寅具官臣歐陽修伏觀大行皇帝靈駕發引臣以官守有職不得攀號於道左謹擇順天門外恭陳薄奠瞻望靈輿臣修西望泣血頓首死罪言曰伏惟大行皇帝至仁至孝本堯舜之心克儉克寬躬禹湯之聖德澤被物威靈在天今者因山爲陵卜萬世而叶吉同軌畢至無一人之後期而臣受恩最深報國無狀不能秉髮持紼以供賤事而古人可慕有媿三良之殉身罔極銜哀但同百姓之喪考尙知豺獾之薦冀伸犬馬之誠臣無任號天摧絕哀慕感切之至臣修西望泣血頓首死罪謹言

祭石曼卿文祭一作甲

維治平四年七月日具官歐陽修謹遣尚書都省令史李敷至于太清以清酌庶羞之奠致祭于亡友曼卿之墓下而弔之以文曰嗚呼曼卿生而為英死而為靈其同乎萬物生死而復歸於無物者暫聚之形不與萬物俱盡而卓然其不朽者後世之名此自古聖賢莫不皆然而著在簡冊者昭如日星嗚呼曼卿吾不見子久矣猶能髣髴子之平生其軒昂磊落突兀崢嶸而埋藏於地下者一有吾字意其不化為朽壤而為金玉之精不然生長松之千尺產靈芝而一作之九莖奈何荒烟野蔓荆棘縱橫風淒露下走燐飛螢但見牧童樵叟歌吟而上下與夫驚禽駭獸悲鳴躑躅而啾嚶今固如此更千秋而萬歲兮安知其不穴藏狐貉與鼯鼯此自古聖賢亦皆然兮獨不見夫纍纍乎曠野與荒城嗚呼曼卿感衰之理吾固知其如此而感念疇昔悲涼悽愴不覺臨風而隕涕者有媿乎太上之忘情尚饗

祭胡太傅文

維治平四年歲次丁未十一月乙亥朔某日具官修謹以清酌庶羞之奠致祭于故太子太傅致仕胡公之靈自昔並遊儒館當世英豪譬如花卉先後零凋惟公松柏凜凜寒標他人磨礪爭出圭角公獨渾然不見其璞廊廟之器誰能測度晚登大用蔚有嘉言予文之鄙懼不能傳三十年間既親且舊哭不及喪行不送柩寫恨臨風有懷莫究尚饗

祭劉給事文

維熙寧元年歲次戊申四月壬寅朔十五日丙辰具官修謹遣通引官行首龐簡以清酌庶羞之奠致祭于亡友留臺給事原甫之靈曰嗚呼金百鍊以為鑑而萬物不能遁其形及為物蝕而蔽其光頑然無異乎瓦甃然而一遇良工之藥磨而瑩之則可以見肝膽而數毛髮蓋其可昏者光不可昏者性其或廢而或用由有幸與不幸若吾

原甫者敏學通於今古精識達于幽微乃百鍊之英而萬事之鑑也一為末疾昏之至使良醫不能措其術百藥無所施其功遂埋至寶銜恨無窮此所以士夫驚呼莫不為朝廷而痛惜至於不知命者皆有疑於造物之工况相知於道義而久接於游從念以身而莫贖徒有淚而沾胸尚饗

祭丁學士文

嗚呼元珍善惡之殊如火與水不能相容其勢然耳是故鄉人皆好孔子不然惡於不善然後為賢子之美才懿行純德誰稱諸朝當世有識子之憔悴遂以湮淪問孰惡子可知其人毀善之言譬若蠅矢點彼白玉濯之而已小人得志慳快一時要其得失後世方知受侮被謗無如仲尼巍然衮冕不祀桓魋孟軻之道愈久彌光名尊四子不數臧倉是以君子修身而俟擾擾姦愚經營一世迨榮華之銷歇嗟泯沒其誰記是皆生則狐鼠死為狗彘惟一賢之不幸歷千載而猶傷自古孰不有死至今獨弔乎沅湘彼靈均之事業初未見於南邦使不遭懼於放斥未必功顯而名彰然則彼讒人之致力乃借譽而揄揚嗚呼元珍道之通塞有命在天其如子何孔孟亦然何以慰子聊為此言寄哀一奠有涕漣漣尚饗

祭吳大資一作長文

維年月日具官修謹遣某人以清酌庶羞之奠致祭于資政侍郎吳公之靈曰惟公以孔孟之學晁董之文佐佑三朝始終一節顧惟庸繆敢企光塵而金門玉堂早接備遊之末紫樞黃閣晚陪國論之餘雖出處之略同在進退而則異余實衰病久思返於田疇一作盧公方感年宜復還於廊廟豈期白首來哭素帷飲釀百分尚想平生之意氣寫哀一奠不知涕淚之縱橫尚饗

祭蔡端明文

維年月日具官修謹遣三班奉職指使李敷以清酌庶羞之奠致祭

于故端明殿學士尚書吏部侍郎蔡公君謨之靈曰嗚呼感必有哀而生必有死物之常理也生爲可樂而死爲可哀人之常情也而有不幸於其間者宜其爲恨於無窮也自公之奮起徒步而名動京師遂登朝廷列侍從其年壯志銳而意氣橫出材宏業茂而譽望偉然方公之輝華顯赫之時而其親享壽考康寧之福夫得祿及親人以爲幸也而公以榮名顯仕爲之養綵衣而戲昔以爲孝也而公以金章紫綬悅其顏使天下爲子者莫不欲其親如公之親爲父母者莫不欲其子如公之爲子也其榮且樂可謂盛哉及其衰也母夫人喪猶在殯而公已臥病於苦塊之間而愛子長而賢者遽又卒於其前遂以奄然而瞑目一孤藐然以爲二喪之主嗚呼又何其不幸也此行路之人聞之皆爲之出涕況於親戚朋友乎況如修者與公之遊最久而相知之最深者乎夫世之舉遠以爲言者不過曰四海而閩負南海齊臨東海使修不得躬一觴之奠寫長慟之哀此其爲恨又可涯哉尙饗

青州求晴祭文

維年月日具官修謹以清酌之奠致告于東嶽天齊仁聖帝而言曰夫麥之爲物歷四時而後實凡所以生育長養成就之功可謂至矣以四時之功而成之以數日之雨而壞之此殆非天之意也非神之欲也農服耒耜有勞筋苦骨之勤而水旱之災螟蝗之孽豐歲常少而凶歲常多所得常不補其所失天之至仁憫斯民之若此也故於其間時賜一大豐之歲以償之夫豐歲可謂難得也既賜與之又遽奪之此非天之意也非神之欲也今在田者垂穗而蔽野在場者其積而如坻民傍徨而視之穗者不得施其手積者不得入于廩使皆化爲羽翼而飛揚之豈不可惜也哉此非天之意也非神之欲也惟神之惠假以十日之不雨以成天之大賜使收穫得以時而民足食公足用是則賴神之靈假之旬浹之頃而九州數千里之地公私皆

受其賜矣蓋所假者少而所利者多故敢以爲請尙饗

居士集卷第五十

樂府

擬玉臺體七首

欲眠

行人夜已斷明河南陌頭雙璫不擬解更欲要君留

攜手曲

落日隄上行獨歌攜手曲卻憶攜手人處處春華綠

雨中歸

朝看樓上雲日暮城南雨路遠香車遲迢迢向何所

別後

連環結連帶贈君情不忘暫別莫言易一夕九回腸

夜夜曲

浮雲吐明月流影玉璫陰千里雖共照安知夜夜心

落日窗中坐

朝聞驚禽去日暮見禽歸瑤琴坐不理含情復爲一作與誰

領邊繡

雙鴛刺繡領粲爛五文章暫近已復遠猶持歌扇障

古詩一

七交七首

河南府張推官

堯夫大雅哲稟德實溫粹霜筠秀含潤玉海湛無際平明坐大府官
事盈案几高談遣放紛外物不能累非惟席上珍乃是青雲器

尹書記

師魯天下才神鋒凜豪備逸驥臥秋櫪意在駿駭迅平居弄翰墨揮
洒不停晷談笑帝王略驅馳古今論良工正求玉片石胡爲韞

楊戶曹

子聰江山稟弱歲擅奇譽盱衡恣文辯落筆妙言語胡爲冉冉趨三
十滯公府美璞思善價浮雲有夷路大雅惡速成侯命宜希古

梅主簿

聖愈翹楚才乃是東南秀玉山高岑岑映我覺形陋離騷喻草香詩
人識爲獸城中爭擁鼻欲學不能就平日禮文賢寧久滯奔走

張判官

洛城車隆隆曉門爭道入連袂紛如帷文者豈無十壯矣張太素拂
羽擇其集遠慕鄴才子一笑懂相挹雖有軒與冕攀翔莫能及人將

孰君子盍視其遊軌

王秀才

幾道顏之徒沉深務單聖采藻薦良璧文潤相輝映入市羊駕車談
道犀爲柄時時一文出往往紙價感無爲戀邱樊遂滯蒲輪聘

自敘

余本漫浪者茲亦漫爲官胡然類鴟夷託載隨車轅時士不俛眉默
默誰與言賴有洛中俊日許相躋攀斂德醉醇耐襲馨佩春蘭平時

罷軍檄文酒聊相歡

答楊闢一作子靜喜一作祈雨長句

吾聞陰陽在天地升降上下無時窮環回不得不差失所以歲時無
常豐古之爲政知若此均節收斂勤人功三年必有一年食九歲一

作年常備二歲一作年凶縱令水旱或一作忽時遇以多補少能相
通今者吏愚不善政民亦游惰離於農軍國賦斂急星火兼并奉養

過王公終年之耕幸一熟聚而耗者多於蠶是以比歲屢一作黑登
稔然而民室常虛空遂令一時暫一作遭不雨輒以困急號天翁一

作公賴天閔民不責吏甘澤一作澍流布何其濃農當勉力吏當愧
敢不酌酒澆神龍

嵩山十二首

歐陽文忠公全集 卷五十一

一五二

公路澗

驅馬渡寒流斷澗橫荒徑危欲歇岸花落多依草擊汰翫游儻倒
影看飛鳥留連愛芳杜漸下西峯照

拜馬澗

昔聞王子晉把袂浮邱仙金鞍於此墮吹笙不復還玉蹄無迹久澗
草但荒烟

二室道

二室對岩竦羣峯聳嶒直雲隨高下起路轉參差碧春晚桂叢深日
下山烟白芝英已可茹悠然想泉石

自峻極中院步登太室中峯

擊馬青松陰躡屐蒼崖路驚鳥動林花空山答人語雲霞不可攬直
入冥冥霧

玉女窗

玉女不可邀蒼崖鬱岩直石乳滴空竇仰見沉寥碧徙倚難久留桂
樹含春色

玉女擣衣石

玉女擣仙衣夜下青松嶺山深風露寒月杵遙相應靈蹤杳可尋片
石秋光瑩

天門

石徑方盤紆雙峯忽中斷呀豁青冥間畜泄烟雲亂杉蘿試舉手自
可階天漢

天門泉舊號救命泉惡其名鄙因取美名書為續命泉大

書三字立于泉側

烟霞天門深靈泉吐巖側雲濕飄氣寒石老林腴碧長松暫休坐一
酌煩心滌

天池

高步登天池靈源湛然吐俯窺不可見淵默神龍護靜夜天一作松
籟寒宿客疑風雨

二醉石三醉石在八仙壇上南臨巨崖峯岫連連蒼烟白
雲鬱鬱在下物外之適相與配酌坐石飲醉似非人間因

索筆目梅聖俞書三醉字於石上而三人者又各題其姓
名而刻之

拂石登古壇曠懷聊共醉雲霞伴酣樂忽在千峯外坐久還自醒日
落松聲起

峻極寺

路入石門見蒼蒼深靄間雲生石砌潤木老天風寒客來依返照徒
倚聽山蟬

中峯

望望不可到行行何屈盤一逕林杪出千巖雲下看烟嵐半明滅落
照在峯端

初秋普明寺竹林小飲錢梅聖俞分韻得亭臯木葉下五首

臨水復飲石陶然同醉醒山霞坐未斂池月來亭亭
洛城風日美秋色滿蘅皋誰同茂林下掃葉酌松醪

野水竹間清秋山酒中綠送子此酣歌淮南應落木
勸客芙蓉盃欲舉芙蓉葉垂楊礙行舟演漾回輕櫂

山水日已佳登臨同上下衰蘭尚可採欲贈離居者
和謝學士泛伊川浩然無歸意因詠劉長卿佳句作欲留篇

之什

久不見南山依然已秋色悠哉川上行復激城中客木落山半空川
明潦尤積飛鳥鑑中看行雲舟中白夷猶白蘋裏笑傲清風側極浦

追所疑遠回峯高易夕觴詠共留連高懷追昔賢惟應謝公興不減
向臨川

戲書拜呈學士三丈

淵明本嗜酒一錢常不持人邀輒就飲酩酊歸來步三徑索
寞繞東籬詠句把黃菊望門逢白衣欣然復坐酌獨醉臥斜暉

和楊子聰答聖俞月夜見寄

秋露藹已繁迢迢星漢回皎潔庭際月流光依井苔有容愛涼景幽
軒爲君開所思不可極但慰清風來

謝人寄雙桂樹子

有客賞芳叢移根自幽谷爲懷山中趣愛此區下綠曉露秋暉浮清
陰藥蘭曲更待繁花白邀君弄芳馥

雨中獨酌二首

老大世情薄掩關外郊原英英少年子誰肯過我門宿雲屯朝陰暑
雨清北軒逍遙一罇酒此意誰與論酒味正薰烈吾心方浩然鳴禽
時一弄如與古人言

幽居草木深蒙籠蔽窗戶鳥語知天陰蛙鳴識天雨亦復命罇酒欣
茲卻煩暑人情貴自適獨樂非鐘鼓出門何所之閉門誰我顧

庭前兩好樹

庭前兩好樹日夕欣相對風霜歲苦晚枝葉常葱翠午眠背清陰露
坐蔭高蓋東城桃李月車馬傾闐闐而我不出門依然伴憔悴榮華
不隨時寂寞幸相慰君子固有常小人多變態

綠竹堂獨飲

夏簟解穉陰加繆臥齋公退無喧鬻清和况復值佳月翠樹好爲鳴
咬咬芳罇有酒美可酌胡爲欲飲先長謠人生暫別客秦楚尙欲泣
淚相攀邀况茲一訣乃永已獨使幽夢恨蓬蒿憶予驅馬別家去去
時柳陌東風高楚鄉留滯一千里歸來落盡李與桃殘花不共一日
看東風送哭聲嗷嗷洛池不見青春色白楊但有風蕭蕭姚黃魏紫
開次第不覺成恨俱零凋榴花最晚今又折紅綠點綴如裙腰年芳

轉新物轉好逝者日與生期遙予生本是少年氣瑳磨牙角爭雄豪

馬遷班固洎敢向下筆點竄皆嘲嘈客來共坐說今古紛紛落盡玉
塵毛彎弓或擬射石虎又欲醉斬荆江蛟自言剛氣貯心腹何爾柔

軟爲脂膏吾聞莊生善齊物平日吐論奇牙齧憂從中來不自遣強
叩瓦缶何譏譏伊人達者尙乃爾情之所鍾况吾曹愁填胸中若山

積雖欲強飲如沃焦乃判疑自古英壯氣不有此恨如何消又聞浮
屠說生死滅沒謂若夢幻泡前有萬古後萬世其中一世獨切憐安

得獨洒一榻淚欲助河水增滔滔古來此事無可奈不如飲此罇中
醪

暇日雨後綠竹堂獨居兼簡府中諸僚

新晴竹林茂日夕愛此君佳禽哢翠樹若與幽人親掃徑綠苔靜引
流清派分開軒軒見遠岫欹枕送歸雲桐槿漸秋意琴觴懷友文浩然
滄洲思日厭京洛塵車騎方開府梁王多上賓平時罷飛檄行樂喜
從軍騎省悼亡後漳濱多病身南窗若可傲方事陶潛中

江上彈琴

江水深無聲江雲夜不明抱琴舟上彈棲鳥林中驚遊魚爲跳躍山
風助清冷境寂聽愈真絃舒心已平用茲有道器寄此無景情經緯
文章合諧一作調和雌雄鳴颯颯風雨隆隆隱雷無射變凜冽
黃鍾催發生詠歌文王雅怨刺離騷經二典意澹薄三盤語丁寧琴
聲雖可狀琴意誰可聽

送白秀才西歸

白子來自西投我文與書升階揖讓席言氣温且舒萬轍走聲利獨
趨仁義塗仁義荒已久斤鋤費耕除吾常患力寡欣子好古徒終當
竭其力剗治爲通衢旌旄待天子安駕五輅車盡驅天子疑民垂白
歌其隅子其從我游有志知何如

鞏縣初見黃河

河決二門合四水徑流萬里東輸海蓬洛之山來而峙河來鬻山作沙觜山形迤邐若奔避河益凶怒而晉舟師弭楫不以帆頃刻奔過不及視舞波淵旋投沙渚聚沫倏忽為平地下窺莫測濁且深癡龍恠魚肆憑恃我生居南不識河但見禹貢書之記其言河狀鉅且猛驗河質書信皆是昔者帝堯與帝舜有子朱商不堪嗣皇天意欲開禹聖以水病堯民以潰堯愁下人瘦若腊衆臣薦鯨帝曰試試之九載功不殫遂殛羽山慚而斃禹羞父罪哀且勤天始以書畀於奴書曰五行水潤下禹得其術因而治鑿山疏流浚淤分璧枝派有三條理萬邦入貢九州宅生人始免生鱗尾功深德大夏以家施及三代蒙其利江海淮濟洎漢沔豈不浩渺汪而大收波卷怒畏威德萬古不敢肆凶厲惟茲濁流不可律歷自秦漢尤為害崩堅決壅勢益橫斜跳旁出惟其意制之以力不以德驅民就溺財隨斃蓋聞河源出崑崙其山上高大無際自高瀉下若激箭一直一曲一千里湍雄衝急乃迸溢其勢不得不然爾前歲河怒驚滑民浸激洋洋淫一作注不止滑人奔走若鋒駭河伯視之以為戲呀呀怒口缺若門日啖薪石萬萬計明堂天子聖且神悼河不仁嗟曰喟河伯素頑不可令至誠一感惶且畏引流辟易趨故道閉口不敢煩官吏邊塗率職直東下咫尺莫可離其次爾來歲星行一周民牛飽芻邦羨費滑人居河欽河流耕河之孺浸河潰嗟河改凶作民福嗚呼明堂聖天子

代書寄尹十一兄楊十六王三

並轡登北原分首昭陵道秋風吹行衣落日下霜草昔日魏鞏縣信馬行苦早行行過任村遂歷黃河隩登高望河流洶洶若怒鬪子生平居南但聞河浩渺停鞍暫遊目茫洋肆驚眺並河行數曲山坡亦繁縷費子與山口呀險乃天竈秤鈎真如鈎上下欲顛倒虎牢吏當關譏問名已告榮陽夜聞雨故人留我笑明朝已高塵轎車引旌纛傳云送主裏窳窳詰墳兆後乘皆輜輶輪轂相輝照辟易未及避廬

兒已呵噉午出鄭東門下馬僕射廟中牟去鄭遠記里十餘埃抵車日已暮僕馬困米粟漸罄闔門嘯若中天表趨門爭道入羈鞅不及棹浪壇遊九衢風埃嘆何浩京師天下聚奔走紛擾擾但聞街鼓喧忽忽夜復曉追懷洛中俊已動思歸操為別末期月音塵一何杳因書寫行役聊以為君導

別聖俞

車馬古城隅喧喧分曉色行人念歸塗居者徒慘惻薄宦共羈旅論交喜金石薦以羽酒懽懽知歲月適人事坐云變出處俄乖隔關山自茲始揮袂舉輕策歲暮寒雲多野曠陰風積征蹄踐嚴霜別酒臨長陌應念同時人獨為未歸客

送劉秀才歸河內

落日古京門車馬動行色河上多悲風山陽有歸客朽篋蠹蟲篆遺文暮鳥迹言子有司知豈顧時人識山陂歲始寒霰雪密已積還家寧久留方言事征軛

外集卷第一

外集卷第二 集五十二

古詩二

數詩

一室曾何埽居閑俗慮平二毛經節變青鑑不須驚二復磨圭戒深
防悔吝生四愁寧敢擬高詠且陶情五鼎期君祿無思死必烹六奇
還自秘海寓正休兵七日南山霧彪文幸有成八門當鼓翼凌厲指
霄程九德方居位皇猷日月明十朋如可問從此卜嘉亨

答錢寺丞憶伊川

之子問伊川伊川已春色綠芷雜芳浦青溪含白石山阿昔留賞展
齒無遺迹惟有崑桂花留芳待歸客

書懷感事寄梅聖俞

相別始一歲幽憂有百端乃知一世中少樂多悲患平聲每憶少年
日未知人事艱顛狂無所閔落魄去羈牽三月入洛陽春深花未殘
龍門翠鬱鬱伊水清潏潏逢君伊水畔一見已開顏不暇謁大尹相
攜步香山自茲愜所適便若投山猿幕府足文士相公方好賢希深
好風骨迥出風塵間師魯心磊落高談羲與軒子漸口若訥誦書坐
千言彥國善飲酒百盞顏未丹幾道事閑遠風流如謝安子聰作參
軍常跨破虎驕子野乃秃翁戲弄時脫冠次公才曠奇王霸馳筆端
聖俞善吟哦共嘲爲閩仙惟予號達老醉必如張顛洛陽古郡邑萬
戶美風烟荒涼見宮闕表裏壯河山相將日無事上馬若鴻翩出門
盡垂柳信步即名園嫩籜筠粉暗淥池萍錦翻殘花落酒面飛絮拂
歸鞍尋盡水與竹忽去嵩峯巔青蒼緣萬仞杳謁望三川花草窺瀾
竇崎嶇尋石泉君吟倚樹立我醉欹雲眠子聰疑日近謂若手可攀
共題三醉石留在八仙壇水雲心已倦歸坐正盃盤飛瓊始十八妖
妙猶雙環疑寒篁暖鳳觜銀甲調鴈絃自製白雲曲始送黃金船珠
簾捲明月夜氣如春烟燈花弄粉色酒紅生臉蓮東堂榴花好點綴

裙腰鮮插花雲髻上展簾綠陰前樂事不可極酣歌變爲歎平聲詔

書走東下丞相忽南遷送之伊水頭相顧淚潏潏臘月相公去君隨
赴春官送君白馬寺獨入東上門政府誰同在新年獨未還當時作
此語聞者已依然

雜言答聖俞見寄兼簡東京諸友

昔君居洛陽樂事無時有寶府富文章謝墅從親友豐年政頗簡命
駕時爲隅不問竹林主仍攜步兵酒芬芳一作菲弄嘉月翠綠相森
茂

聞梅二授德興戲書

君家小謝城爲客洛陽裏綠髮方少年青衫喜爲吏重湖亂山綠歸
夢寄千里洛浦見秋鴻江南老芳芷自言北地禽能感南人耳京國
本繁華馳逐多英軌爭歌白雪曲取酒西城市朝逢油壁車暮結青
驄尾歲月條可忘行樂方未已忽爾畏簡書翻然浩歸思江山故國
近風物饒陽美楚柚烟中黃吳萼波上紫還鄉問井邑上堂多慶喜
離別古所難更畏秋風起

戲贈

莫愁家住洛川傍十五纖腰聞四方堂上金罇邀上客門前白馬繫
垂楊春風滿城花滿樹落日花光爭粉光城頭行人莫駐馬一曲能
令君斷腸

寄左軍巡劉判官

遙聽洛城鍾獨渡伊川水綠樹鬱參差行人去無已因高望京邑驅
馬沿山趾落日亂峯多龍門何處是

罷官後初還襄城弊居述懷十韻回寄洛中舊寮

路盡見家山欣然望吾廬陋巷叩柴扉迎候遙驚呼兒童戲竹馬田
里邀籃輿春桑鬱已綠歲事催農夫朝日飛雉雉東臯新雨餘植杖
望遠林行歌登故墟夙志在一壑茲焉將荷鋤言謝洛社友因招洛

中愚馬卿已倦客嚴安猶獻書行矣方子役豈能遂歸歟

和聖俞聚蚊

頽陽照窮巷暑退涼風生夫子臥環堵振衣步前楹愁烟四鄰起鳥雀喧空庭餘景謁欲昏衆蚊復一作聚羣羣飛豈能數但厭聲營營抱琴不暇撫揮塵無由停散帙復歸臥詠言聊寫情覆載無巨細善惡皆生成朽木出衆蠹腐草爲飛螢書魚長陰溼醯醢田鬱蒸不蠱固多虱牛閑常聚蚩元氣或壹鬱播之爲孽腥卑臭乃其類清虛非所經華堂敞高棟綺疏仍藻扃金釘瑩椒壁玉壺含夜冰終朝事薰被豈敢近簷蠹富貴非苟得抱節居茅衡陰牆百蟲聚下偃衆穢盈何嘗曲肱樂但苦聚雷聲江南美山水水木正秋明自古佳麗國能助詩人情喧露不可久片席何時征

送劉學士知衡州

楊子懶屬書平居惟嗜酒一沐或彌旬解醒須五斗淡爾輕榮利何常問無有忍憶四一作回馬歸行爲一麾守湘耐自古醇醪水聞各久簿領但盈几聖經不離口湖田賦稻蟹民訟爭壟畝兀爾即沈冥安能知可否聊爲寄情樂豈與素懷偶藏器思適時投刃寧煩手行當考官績勿復困嬰岳

送張屯田歸洛歌

昔年洛浦見花落曾作悲歌歌落花愁來欲遣何可奈時向金河尋杜家杜家花雖非絕品猶可開顏爲之飲少年意氣易成懼醉不還家伴花寢一來京國兩傷春憔悴窮愁九陌塵紅房紫萼處處有騎馬欲尋無故人黃河三月入隋河河水多時悵望多爲憐此水來何處二字一作處遺中有伊流與洛波忽聞君至自西京洗眼相看眼暫明心裏面老畏人問驚我瘦骨清如冰今年七月妹喪夫稚兒孀女啼呱呱季秋九月子喪婦十月厭厭成病軀端居移病新城下日不出門無過者獨行時欲強高歌一曲未終雙涕洒可憐明月與春

風歲歲年年事不同暫別已嗟非舊態再來應是作衰翁感時惜別情無已無酒送君空有淚西歸必有問君人爲道別來今若此

述懷送張懋之

鬱鬱河堤綠樹平送君因得到東城落花已盡驚猶轉垂柳初長蟬欲鳴去年送客亦曾到正值楊花亂芳草人心不復故時歡景物自隨時節好感今懷昔復傷離一別相逢知幾時莫辭今日一罇酒明日思君難重持東吳山水天下秀羨君輕舟片帆逗江城月下夜聞歌淮浦山前朝放溜樂哉此行時未晚萬壑千巖不知遠可憐病客厭京塵寂寞淹留已再春扁舟待得東南下猶更河橋送幾人

送子野

四時慘舒不可調冬夏寒暑易鬱陶春陽著物大軟媚獨有秋節最勁豪金方堅剛屏炎疇兌氣高爽清風颺烟霞散破灑氣豁山河震發地脈搖天開寶鑑露寒月海拍積雪卷怒潮光輝通透奪星耀蟠潛驚奮鬪每蛟高樓精爽毛髮竦壯懷直恐衝斗杓欲飛輕衣上拂漢擬乘二氣戲鸞瀆念時文法密於織羈縻束縛不自聊豈無策議獻人主扼持舌在口已膠當秋且幸際軒豁誰能兒女聽塘蜩君方壯歲襟宇快名聲樂與家聲高輕舟從遊山川底詩酒合興皆翹翹堪嗟宋玉自悲攬可並張翰同逍遙功名富貴有時到忍把壯節良辰消

送劉十三南遊

泱泱汴河流檣聲過晚浦行客問吳山舟人多楚語春深紫蘭澤夏早黃梅雨時應賦登眺聊以忘羈旅

與李獻臣宋子京春集東園得節字

綠野秀可滄遊驂喜初結芸局苦寂寞禁署隔清切歡言得幽尋况此及嘉節鳥哢已關關泉流初泱泱紫萼繁若綴翠茗柔可擷屢期無後時芳物畏鶉鳩

晚泊岳陽

臥聞岳陽城裏鐘繫舟岳陽城下樹正見空江明月來雲水蒼茫失
江路夜深江月弄清輝水上人歌月下歸一闋聲長聽不盡輕舟短
楫去如飛

新開棊軒呈元珍表臣

竹樹日已滋軒窗漸幽與人閑與世遠為語知境靜春光諷欲布山
色寒尚映獨收萬慮心於此一枰競

代贈田文初

感君一顧重千金贈君白璧為妾心舟中繡被薰香夜春雪江頭二
尺深西陵長官頭已白憔悴窮愁一作顏媿相識手持玉罌唱陽春
江上梅花落如積津亭送別君未悲夢蘭酒解始相思須知巫峽聞
猿處不似荆江夜雪時

惠泉亭一本序云某啓伏觀知軍學士文丈新理惠泉謹為

拙詩十六句伏惟采覽

翠壁刻屨顏烟霞跬步間使君能愛客朝夕弄山泉春巖雨過春流
長置酒來聽山溜響鑑中樓閣俯清池雪裏峯巒開曉幌須知清興
無時已酒美賓嘉自相對席間誰伴謝公吟日暮多逢山簡醉淹留
桂樹幾經春野鳥巖花識使君使君今是鐘前客誰與山泉作主人
過張至秘校莊

田家何所樂簞笠日相親桑條起蠶事莒葉候耕辰望歲占風色寬

遙知政仁樵漁逐晚浦雞犬隔前村泉溜階間動山田樹杪分鳥聲
梅店雨野色柳橋春有客問行路呼童驚候門焚魚酌白醴但坐且
懽忻

行次葉縣

朝渡汝河流暮宿楚山曲城陰日下寒野氣春深綠征車倦長道故
國有喬木行行漸樂郊東風滿平陸

將至淮安馬上早行學謝靈運體六韻

晴霞煦東浦驚鳥動烟林曙河兼斗沒杳一作杳嶂陰雲深寒雞隔
樹起曲塢留風吟征夫倦行役秋興感登臨衡一作衡臯積涂一作
除迴江離香露沉行矣歲華晚歸歟勞歎音

自岐一作枝江山行至平陸驛五言二十四韻

岐江望平陸百里千餘嶺蕭條斷烟火莽蒼無人境峯巒互前後南
北失壬丙天秋雲愈高木落歲方冷水涉愁蟻射含沙也林行憂虎
猛萬仞懸巖崖一約履枯梗緣危類援揉陷淖若鼃龜腰輿懼傾撲
煩馬倦鞭警攀躋誠畏塗習俗羨蠻獠度隘足雖踈因高目還騁九
野畫荆衡羣山亂巫郢烟嵐互明滅點綴成一作若圖屏時時度深
谷往往得佳景翠樹鬱如蓋飛泉溜垂綆幽花亂黃紫荷榮弄光影
山鳥轉成歌寒蛩嗒如哽登臨雖云勞一作廣巨細得周省農裝趁
徒旅夕宿訪閭井村暗水茫茫雞鳴星耿耿登高近佳節歸思時引
領谿菊薦山罇田駕佑烹鼎家近夢先歸夜寒衾屢整崎嶇念行役
昔宿已為丞豈如江上舟棹歌方醅酌初泛舟荆江棋酒甚歡故有
此句

春日西湖寄謝法曹歌

西湖春色歸春水綠於染羣芳爛不收東風落如糝西湖者許昌勝
地也參軍春思亂如雲白髮題詩愁送春謝君有多情未老已白髮
野思到春如亂雲之句遙知湖上一罇酒能憶天涯萬里人萬里思
春尚有情忽逢春至客心驚雪消門外千山綠花發江邊二月晴少
年把酒逢春色今日逢春頭已白異鄉物態與人殊惟有東風舊相
識

答謝景山遺古瓦硯歌

火數四百炎靈銷誰其代者當塗高窮姦極酷不易取始知文景基
局牢坐揮長喙喙天下豪傑競起如蝟毛董呂權犯相繼死紹術權

備爭咆咻力彊者勝怯者敗豈較才德為功勞然猶到手不敢取而使螟蝗生蝮蝎子不當初不自恥敢謂舜禹傳之堯得之以此失亦此誰知三馬食一槽當其盛時爭意氣叱咤奮鬪生風颺于戈戰罷數功閱周蔑方召堯無辜英雄致酒奉高會巍然銅雀高岩岩圓歌宛轉激清徵妙舞左右回纖腰一朝西陵一作西朝或作兩朝看拱木寂寞總帳空蕭蕭當時淒涼已可嘆而况後世悲前朝高臺已傾漸平地此瓦一墜埋蓬蒿苔文半滅荒土蝕戰血曾經野火燒敗皮弊網各有用誰使鑄鐵成凸凹景山筆力若牛弩句道語老能揮毫嗟予奪得何所用簿領朱墨徒紛淆走官南北未嘗捨緹襲三四勤緘包有時屬思欲飛灑意緒軋軋難抽線舟行屢備一作被水神奪往往冥晦遭風濤質頑物久有精怪常恐變化成靈妖名都所至必傳玩愛之不換魯寶刀長歌送我怪且偉欲報慚愧無瓊瑤

古瓦硯

甄瓦賤微物得廁筆墨間於物用有宜不計醜與妍金非不為寶玉豈不為堅用之以發墨不及瓦礫頑乃知物雖一作微賤當用價難攀豈惟瓦礫爾用人從古難一作然

新營小齋鑿地爐輒成五言三十七韻

霜降百工休居者皆入室墻戶畏初寒開爐代温律規模不盈丈廣狹足容膝軒窗共幽窺竹栢助蒙密辛勤慚巧官窮賤守卑秩無術政奚為有年秋屢實文書少期會租訟省鞭挾地僻與世疎官閑得身佚荆蠻苦卑陋氣候常壹鬱天日每陰翳風颺多凜凜衰顏慘時晚病骨知寒疾蠻牀勸晨興籃輿朝出南山近樵採僮僕免呵叱禦歲畜蹲鴟饋客薦包橘霜薪吹晶熒石鼎沸啾啾披方養丹砂候節煎去聲秋尤西鄰有高士轆軻臥蓬蓽鶴髮善高談鉛背便平聲炙對披裘屢相就束縕亦時乞傳經伏生老愛酒楊雄吃農灰煖餘盃夜火爆山栗無言兩忘形相對或終日微生慕剛毅勁強去聲早

難屈自從世俗牽常恐天性失仰茲微官祿養此多病質省躬由一言無枉慕三黜因知吏隱樂漸使欲心窒面壁或僧禪倒冠聊酒逸螟蠹輕二豪一馬齊萬物啓期為樂二叔夜不堪七負薪幸有一作自謬舊學頗思述與亡聞今古一作古今圖籍羅甲乙魯冊謹會盟周公象凶吉詳或作鮮明左邱辯馳騁馬遷筆金石互鏗錡風雲生倏忽豁爾一開卷慨然時揜映浮沉恣其間適若遂聳聳一作聳吾居誰云陋所得乃非一五斗豈須慚優游歲將畢

外集卷第二

古詩二

南瘵

洪宋區夏廣恢張際四維狂孽久不聳民物含一作極春熙耆稚適
 所向游泳光華時遽然攝提歲南瘵掠邊睡予因叩村叟此事曷如
 斯初似却人問未語先涕垂收涕謝客問爲客陳始基撫水有上源
 水淺山峻巖生民三千室聚此天一涯復勇復輕脫性若鹿與麋男
 夫不耕鑿刀兵動相隨宜融兩境上殺人取其貲因斯久久來此寇
 易爲羈鼠竊及蟻聚近裏焉敢窺勢亦不久住官軍來即馳景德祥
 符後時移事亦移四輔哲且善天子仁又慈將軍稱招安兵非羽林
 兒龍江一牧拙邏騎材亦非威惠不兼深徒以官力欺智略仍復短
 從此難羈縻引兵卸甲嶺部陣自參差鋒鏑殊未接士卒心先離奔
 走六吏死初在懷遠軍卸甲嶺殺傷范補賓王崇班等六人落陣死
 明知國挫威自茲賊聲震直寇融州涪縣宇及民廬燬蕩無孑遺利
 鏃淬諸毒中膚無藥醫長刀斷人股橫屍滿通達婦人及孳產驅負
 足始歸堂堂過城戍何人敢正窺外計削秦疏一一聞宸闈赫爾天
 斯怒選將興王師精甲二萬餘猛毅如虎豹劍戟凜秋霜旌棨閃朝
 曦八營與七萃豈得多于茲外統三路進小敵胡能爲前驅已壓境
 後軍猶未知逶迤至蠻域但見空稻畦搜羅一月餘不戰帥自罷荷
 戈莫言苦負糧深可悲哀哉都督郵無辜遭屠糜昭州都曹皇甫僅
 三人部糧入洞盡蠻賊掩殺及善夫力千餘嗥咋計不出還出招安
 辭半降半來拒蠻意猶狐疑厚以繒錦贈徂心詐爲卑戎帳草草起
 賊戈躡背揮我聆老叟言不覺雙眉眉吮毫兼疊簡占作南瘵詩願
 值采詩官一敷于彤墀

寄聖俞

西陵山水天下佳我昔謫官君所嗟官閑憔悴一病叟縣古瀟灑如

山家雪消深林自斷一作斲筍人響空山隨摘茶有時攜酒探幽絕
 住住上下躬煙霞蒸綠縵軟可藉野卉青紅春自華風餘落葉飛
 面旋日暖山鳥鳴交加貪追時俗翫歲月不覺萬里留天涯今來寂
 寞西岡口秋盡不見東籬花市亭插旗鬪新酒十千得斗不可賒材
 非世用自當去一舸聲牙揮釣車君能先往勿自滯行矣春洲生荻
 芽

答梅聖俞寺丞見寄

憶昔識君初我少君方壯風期一相許意氣曾誰讓交游咸京洛鐘
 俎陪丞相驟驥日相追鸞鳳志高颺詞章盡崔蔡論議皆敵向文會
 忝子盟詩壇推子將談精鋒愈出飲劇歡無量賈勇爲無前餘光誰
 敢望茲年五六歲人事堪悽愴南北頓啜乖相離獨飄蕩失杯由畫
 足傷手因代匠移書雖激切拙語非欺誑安知乃心愚而使所言妄
 權豪不自避銜質誠爲當蒼皇得一邑奔走踰千嶂楚峽聽猿鳴荆
 江畏蛟浪蠻方異時俗景物殊氣象綠髮變風霜丹顏侵疾瘳常憂
 鵬鳥窺幸免江魚壑今茲荷寬宥遷徙來漢上惟悴戴冠驅馳嗟
 俗狀王事多倥偬學業差遺忘未能解綬去所戀寸祿養舉足畏逢
 仇低頭惟避謗忻聞故人近豈憚驅車訪一別各衰翁相見問無恙
 交情宛如舊歡意獨能強幸陪主人賢更值芳洲漲菱荷亂浮泛水
 竹涵虛曠清風滿談席明月臨歌舫已見洛陽人重開畫樓唱怡然
 壹鬱寫鬱爾累囚故自從還邑來會此驕陽亢神靈多請禱租訟煩
 答榜猶須新秋涼漢水臨一作瀉清漾野稼蕩浮雲晴山開疊障聊
 以助吟詠亦可資酣暢北轅如未駕辛子能來覓

酬聖俞朔風見寄

因君朔風句令我苦寒吟離別時未幾嶸嶸歲再陰驚颺擊曠野餘
 響入空林客路行役遠馬蹄冰雪深瞻言洛中舊期我高陽吟故館
 哭知己新年傷客心相逢豈能飲惟有涕沾襟

送琴僧知白

吾聞夷中琴已久常恐老死無其傳夷中未識不得見豈謂今逢知
白彈遺音髣髴尚可愛何況之子傳其全孤禽曉警秋野露空澗夜
落春崑泉二年遷謫寓三峽江流無底山侵天登臨探賞久不厭每
欲圖畫存於前豈知山高水深意久以寫此朱絲絃酒酣耳熱神氣
王聽之爲子心肅然嵩陽山高雪三尺有客擁鼻吟苦寒負琴北走
乞其贈持我此句爲之先

聽平戎操

西戎負固稽天誅勇夫戰死智士讓上人知白何爲者年少力壯逃
浮屠自言平戎有古操抱琴欲進爲我娛我材不足置廊廟力弱又
不堪戈爰遭時有事獨無用偷安飽食與汝俱爾知平戎競何事自
古無不由吾儒周宣六月伐檢枕漢武五道征匈奴方叔召虎乃真
將衛青去病誠區區建功立業當感日後世稱詠於詩書平生又欲
慕賈誼長纓直請繫單于當衝理檢四面啓有策不獻空踟躕慚君
爲我奏此曲聽之空使壯士吁推琴置一作耽酒恍若失誰謂子琴
能起予

書宜城修水渠記後奉呈朱寺丞

因民之利無難爲使民以說氏志疲樂哉朱君郵靈堤導鄢及蠻興
衆陂古渠廢久人莫知朱君三月而復之沃土如膏瘠土肥百里歲
歲無凶蓄一作災鄢蠻之水流不止襄人思君無時已

谷正至始得先所寄書及詩不勝喜慰因書數韻奉酬聖俞

寒日照深巷柴門朝尚閉有客自江來尺書千里至啓書復何云但
言南北異南方地常暖風物稱佳麗梅籬入新年蘭草動芳氣樂哉
登臨興豈厭江湖滯伊子方寂寞刻苦窮文字萬國會王州羣英馳
儔軌方朔常苦餓子雲非官意歲暮慘風塵官閑倦朝市出處一云
別所思寧可冀春江有歸鴈但使音書繼

答梅聖俞

寒日照窮巷荆扉晨未開驚聞遠方信有客渡江來開緘復何喜宛
若見瓊瑰一爾垂出處未嘗持酒盃官閑隱朝市歲暮慘風埃音書
日可待春鴈暖應回

病中聞梅二南歸

聞君解舟去秋水正泫泫野岸曠歸思都門辭世紛稍逐商帆伴初
隨征鴈羣山多淮甸出柳盡汴河分楚色蕪尚一作上綠江烟日半
一作畔曠客意浩已遠離懷寧復云宜城好風月歸信幾時聞

送蟾上人遊天台

昔年在伊洛林壑每相從對掃竹下榻坐思湖上峯自言伊洛波每
起滄洲憶今茲道行遊千里東南國都門汴河上柳色入青烟流水
向淮浦歸人隨越船東南遍林巒萬壑新流滿小桂綠應芳江春行
已晚藹藹赤城陰依依識古岑一去誰復見石橋雲霧深

送徐生秀州法曹

一笑暫相從結交方恨晚猶茲簿領困况爾東南遠落帆淮口暮採
石江洲暖黃鸝可寄書惟嗟雙翅短

讀山海經圖

夏鼎象九州山經有遺載空濛大荒中杳靄羣山會炎海積馱蒸陰
幽異明晦奔趨各異種倏忽俄萬態羣倫固殊羣至理寧一槩駭者
自云驚生乎孰知怪未能識造化但爾披圖繪不有萬物殊豈知方
輿大

依韻和聖俞見寄

與君結交深相濟同水火文章發春葩節行凜筠筍吾才已愧君子
齒又先我君惡予所非我許子云可厭趣共乖時畏塗難轉轍道肥
家所窮身老志彌果每嗟游從異有甚樊籠鑿天匠染青紅花腰呈
婁娜苟能杯酌同直待冠巾墮無欺校籬貧鹽米尙餘顆

晏太尉西園賀雪歌

陰陽乖錯亂五行窮冬山谷暖不冰一陽且出在地上地下誰發萬物萌太陰當用不用事蓋由姦將不斬虧國刑遂令邪風伺隙潛中瘟疫於疲氓神哉陛下至仁聖憂勤懇禱通精誠聖人與天同一體意未發口天已聽忽收寒威還水官正時肅物凜以清寒風得勢獵獵走瓦乾霰急落不停恍然天地半夜白羣雞失曉不及鳴清晨拜表東上閣鬱鬱瑞氣盈宮庭退朝騎馬下銀闕馬滑不慣行瑤瓊晚趨賓館賀太尉坐覺滿路流歡聲便開西園掃徑步正見玉樹花獨零小軒却坐對山石拂拂酒面紅烟生主人與國共休戚不惟喜悅將豐登須憐鐵甲冷徹骨四十餘萬屯邊兵

送吳照鄰還江南

霜前江水磨碧銅岸背菱葉翹青蟲吳郎鬢綠生幾縷不羞月上扶桑東羞見清波照人景去時黑髮吹春風五年歸來婦應喜從此不問西飛鴻

答朱采捕蝗詩

捕蝗之術世所非欲究此語興於誰或云豐凶歲有數天孽未可人力支或言蝗多不易捕驅民入野踐其畦因之姦吏恣貪擾戶到頭歛無一遺蝗災食苗民自苦吏虐民苗皆被之吾嗟此語祗知一不究其本論其皮驅雖不盡勝養患昔人固已決不疑秉蠹投火况舊法古之去惡猶如斯既多而捕賊未易其失安在常由遲誦誦最說子孫衆爲腹所孕多蛄蚘始生朝啟暮已頃化一爲百無根涯口含鋒刃疾風兩毒腸不滿疑常飢高原下濕不知數進退整若隨金擊嗟茲羽孽物共惡不知造化其誰尸大凡萬事悉如此禍當早絕防其微蠅頭出土不急捕羽翼已就功難施只驚羣飛自天下不究生子由山陂官書立法空太峻吏愚畏罰反自欺蓋藏十不敢申一上心雖惻何由知不如寬法擇良令告蝗不隱捕以時今苗因捕雖踐

死明歲猶免爲蚊蝻吾嘗捕蝗見其事較以利害曾深思官錢二十買一斗示一作亦以明信民爭馳斂微成衆在人力頃刻露積如京抵乃知孽蟲雖甚衆嫉惡苟銳無難爲住時姚崇用此議誠哉賢相得所宜因吟君贈廣其說爲我持之告採詩

答蘇子美離京見寄

衆奇子美貌堂堂千人英我獨疑其胸浩浩包滄溟滄溟產龍蜃百怪不可名是以子美辭吐出人輒驚其於詩最豪奔放何縱橫衆絃排律呂金石次第鳴間以險絕句非時震雷建兩耳不及掩百病爲之醒語言既可駭筆墨尤其精少雖嘗力學老乃若天成滯毫弄點畫信手不自停端莊雜醜怪羣星見攬槍爛然溢紙幅視久無定形使我終老學得一已足矜而君兼衆美磊落猶自輕高冠出人人上誰敢揖其膺羣臣列丹陛幾位缺公卿使之束帶立可以重朝廷况令參國議高論吐崢嶸惜哉三十五白髮今已生近者去江淮作詩寄離情口誦不及寫一日傳都城退之序百物其鳴由不平天方苦君心欲使發其聲嗟我非鸞鸞徒思和嚶嚶因風幸數寄警我聾與盲

立秋有感寄蘇子美

庭樹忽改色秋風動其枝物情未必爾我意先已悽雖恐芳節謝猶忻早涼歸起步雲月暗顧瞻星斗移四時有大信萬物誰與期故人在千里歲月令我悲所嗟事業晚豈惜顏色衰廟謀今謂何胡馬日以肥

喜雪示徐生

清穹一作空凜冬威早野渴天澤經旬三尺雪萬物變顏色愁雲噓不開慘慘連日夕寒風借天勢豪忽肆陵驟空枝凍鳥雀癡不避彈弋長河寂無聲厚地若龜坼陰階夜自照缺瓦晨復積貯潔瑩冰壺量深埋玉尺凝陰反翳剗陽九北初晝春回百草心氣動黃泉脉堅冰雖未破土潤已潛釋常聞老農語一臘見二白是爲豐年候占驗

勝策策天兵血西睡萬轍走供億嗟予媿疲俗奚術肥爾瘠惟幸歲之穰茲惠豈人力非徒給租調且可銷盜賊從今潔黼臚期共飽甦麥

賦竹上甘露

稍稍兩竹枝甘露葉間垂草木有靈液陰陽疑以時深山與窮谷往往嘗有之幸當君子軒得為衆人知物生隨所託晦顯各有宜聊以助歌詠兼堪飲童兒

和對雪憶梅花

昔官西凌江峽間野花紅紫多爛斑惟有寒梅舊所識異鄉每見心一作必依然為憐花自洛中看花上蜀鳥啼綿蠻當時作詩誰唱和粉藥自折清香繁今來把酒對殘雪却憶江上高樓山羣花四時媚者衆何獨此樹令人攀窮冬萬木立枯死玉艷獨發陵清寒鮮妍皎如鏡裏面綽約對若風中仙惜哉北地無此樹霰雪漫漫平沙川徐生隨我客此郡冰霜旅舍逢新年憶花對雪晨起坐清詩寶鐵裁琅玕長河風色暖將動即看綠柳含春烟寒齋寂寞何以慰卯盃且醉酣午眠

歸鴈亭

荒蹊臘雪春尚埋我初獨與徐生來城高樹古禽鳥野聲響格磔寒鴛鴦頽垣敗屋巍然在略可遠眺臨傾臺高株唯有柳數十夾路對立初誰栽漸誅榛莽辨草樹頗有桃李當墻隈欣然便擬趁時節斤鋤日夕勞耘培新年風色日漸好晴天仰見鴈已回枯根老脈凍不發遠之百匝空徘徊頑姿野態煩造化勾芒不肯先煦吹酒酣幾欲掬大鼓驚起龍蟄驅春雷偶然不到才數日顏色一變由誰催翠芽紅粒迸條出纖趺嫩萼如剪裁臥槎燒枿亦強發老朽不避衆艷怡焔然山杏開最早其餘紅白各自媒初開感發與零落皆有意思牽人懷衆芳勿使一時發當令一落續一開畢春應須酒萬斛與子共

醉三千盃

送韓子華

嗟我久不見韓子如讀古書思古人忽然相逢又數日笑語反不共一罇諫垣尸居職業廢朝事汲汲勞精神子華筆力天馬足驚駘千百誰可羣嗟予老鈍不自笑尚欲疾走追其塵子華有時高談駭我聽榮枯萬物移秋春所以不見令我思見之如飲玉醴醇叩門下馬忽來別高帆得風披飛雲離懷有酒不及寫別後慰我寓於文

送李太傅知冀州端懿

吾慕李漢超為將勇無儔養士三千人人百貌貅關南三十年天子不北憂吾愛李允則善規多計籌虜動靜寢食皎如在雙眸出入若變化談笑摧敵謀恩信浹南北聲名落燕幽二公材各異戰守兩堪尤天下不用兵爾來三十秋今其繼者誰守冀得李侯李侯年尚少文武學彬彪河朔一尺雪北風煖貂裘上馬擘一作臂長弓白羽飛金鏃臨行問我言我慚本儒軀漢超雖已久故來尚歌謳允則事最近猶能想風流將此聊為贈勉哉行無留

石篆詩并序

某啓近蒙朝恩守此州州之西南有瑯琊山唐李幼卿庶子泉者某在館閣時方國家詔天下求古碑石之文集于閣下因得見李陽冰篆庶子泉銘學篆者云陽冰之迹多矣無如此銘者常欲求其本而不得于今十年矣及此來已獲焉而銘石之側又陽冰別篆十餘字尤奇於銘文世罕傳焉山僧惠覺指以示予予徘徊其下久之不能去山之奇迹古今紀述詳矣而獨遺此字予甚惜之欲有所述而患文字之不稱思予嘗愛其文而不及者梅聖俞蘇子美也因爲詩一首并封題墨本以寄二君乞詩刻于石

寒嵩飛流一作洒落青苔旁斲石篆何奇哉其人已死骨已朽此字不滅留山隈山中老僧憂石泐印之以紙磨松煤欲令留傳在人世

持以贈客比瓊瑰我疑此字非筆畫又疑人力非能爲始從天地胚
渾判元氣結此高崔嵬當時野鳥踏山石萬古遺迹於蒼崖山祇不
欲人屢見每吐雲霧深藏埋羣仙飛空欲下讀常借海月清光來嗟
我豈能識字法見之但覺心眼開醉慳語鄙不足記封題遠寄蘇與
梅

題滁州醉翁亭

四十未爲老醉翁偶題篇醉中遺萬物豈復記吾年但愛亭下水來
從亂峯間聲如自空落瀉向雨簷前流入巖下溪幽泉助涓涓響不
亂人語其清非管絃豈不美絲竹絲竹不勝繁所以屢攜酒遠步就
潺湲野鳥窺我醉溪雲留我眠山花徒能笑不解與我言惟有巖風
來吹我還醒然

贈學者

人稟天地氣乃物中最靈性雖有五常不學無由明輪曲揉而就木
直在中繩堅今礪所利玉琢器乃成仁義不遠躬勤勤入至誠學既
積於心猶木之敷榮根本既堅好蓊鬱其幹莖爾曹宜勉勉無以吾
言輕

春寒効李長吉體

東風吹雲海天黑飢龍凍雲雨不滴噴雷隱隱愁烟白宿露無光瑤
草寂東皇染花滿春國天爲花迷借春色呼雲鏤日一作自恐紅鴛
幾日春陰養花魄悠悠遠絮繁空擲愁思一作絲織春挽不得高樓
去天無幾尺遠岫參差亂屏碧

幽谷一作豐樂亭晚飲

一徑入蒙密已聞流水聲行穿翠篠盡忽見青山橫山勢抱幽谷谷
泉含石泓旁生嘉樹林上有好鳥鳴鳥語谷中靜樹涼泉影清露蟬
已嘒嘒風留時冷渴心不待飲醉耳傾還醒嘉我二三友偶同邱
壑情環流席高蔭置酒當崢嶸是時新雨餘日落山更明山色已可

愛泉聲難久聽安得白玉琴寫以一作之朱絲繩

外集卷第三

外集卷第四 集五十四

古詩四

桐花

倚倚井上桐花葉何蕤蕤下墜百尺泉上聳陵雲材翠色洗朝露清
陰午當階幽蟬自嘒嘒鳴鳥何啾啾日出花照耀飛香動浮埃今朝
一雨過狼籍黏青苔斯桐乃誰樹意若銘吾齋常聞漢道隆上下相
和諧選吏擇孝廉視民嬰與孩政聲如九韶百物絕妖災優優賴川
守能致鳳凰來到此幾千載丹山自崔嵬聖君勤治理百郡列賢才
嗟爾不自勉鳳凰其來哉

思二亭送光祿謝寺丞歸滁陽

吾嘗一作常思醉翁醉翁名自我山林本我性章服偶包裹君恩未
知報進退奚為可自非因讒逐決去焉 一作詎能果前時永陽謫誰
與脫韁鑣山氣無四時幽花常婀娜石泉咽然鳴野豔笑而倖賓歡
正諠譁翁醉已岌岌我樂世所悲衆馳子坎軻惟茲三三子嗜好其
二字一作學甚同頗因歸謝巖石為我刻其左

吾嘗一作常思豐樂魂夢不在身二年永陽謫幽谷最來頻谷口兩
三家山泉為四鄰但聞山泉聲豈識山意春春至換羣物花開思故
人故人今何在憔悴賴之濱人去山自綠春歸花更新空令谷中叟
笑我種花勤

堂中畫像探題得杜子美

風雅久寂寞吾思見其人杜君詩之豪來者孰比倫生為一身窮死
也萬世珍言苟可垂後士無羞賤貧

和徐生假山

匠智無遺巧天形極幽探謂我愛山者為山列前簷賴垣不數尺萬
嶮由心潛或開如斷裂或吐似銜鐵或長隨靡迤或瘦露空故陰一
作險穴觀杳杳高屏立巉巖後出忽孤聳羣奔杳相參巒若氣融結

突如鬼鑄鑿昔歲貶荆楚扁舟極東南孤山馬當夾兩岸臨江潭常
恨江水惡輕風不留帆峯巒千萬狀可愛不可談但欲借粉繪圖之
掛紈嫌豈如几席間百態生濃纖暮雲點新翠孤烟起朝嵐况此窮
冬節陰飈積凝嚴巖巖幽齋喜深處遠目生遐瞻晝臥不移枕晨興自開
簾吾聞君子居出處無常占卷道或獨善施物仁貴兼於時苟無益
懷祿古所慙萬山幸不遠薇蕨豈不甘自可結幽侶披雲老溪巖胡
為不即往一室安且恬辱子贈可愧因詩以自讒

送楊員外

子昔走南宮江湖浩然涉今來厭塵土常懷把輕楫聞君東南行山
水恣登躡秋江湛已清樹色映丹葉羨君舟插擲去若魚鼓鬣君家
兄弟才門族當世甲行期薦賢書疾驛來上閣

讀梅氏詩有感示徐生

子美忽已死聖俞舍吾南嗟吾臂馳車而失左右驂勑敵嘗歷疊羸
兵當戒嚴凡人貴勉強惰逸易安恬吾既苦多病交朋復凋穢篇章
久不作意思如膠粘良田失時耕草莽廢鋤芟美井不日汲何由發
清甘偶開梅氏篇不覺日掛簷乃知文字樂愈久益無厭吾嘗一作
常哀世人聲利競爭貪哇咬聾兩耳死不享韶咸而幸知此樂又常
探討探今官得閑散舍此欲奚耽頑庸須警策賴子發其箝

和入三橋

笳鼓下層臺旌旗轉長嶼橋響鶯歸軒溪明望行炬北臨白雲澗南
望清風閣出樹見人行隔溪聞魚躍斷虹跨曲岸倒影涵清波為愛
斜陽好迴舟特特過

初夏劉氏竹林小飲

春榮忽已衰夏葉換初秀披荒得深蹊掃綠陰清晝萬竿交已聳千
畝蔚河富驚雷迸狂鞭霧揮舒文繡虛心高自擢勁節晚愈瘦雖慙
桃李妖豈愧松柏後川源湛新霽林麓洗昏翳綺綺色可餐滴滴翠

欲溜况茲夏首月景物得嘉候晚蝶舞新黃孤禽弄清味窺深入
蒙玩密愛林茂依依帶幽澗隱隱見孤岫林蔭縹緲眼野汲冷可漱
鳴琴瀉山風高賴發仙奏暑却自燭渴心閑疑愈疾杯盤雜芳園
籍羅左右怡然忘簪組釋若出羈廐矧予懷一邱未得解黃綬官事
偶多閑郊扉須屢叩新篁漸添林晚筍堪薦豆誰邀接離公有酒幸
相就

眼有黑花戲書自遣

洛陽三見牡丹月春醉往往眠人家揚州一遇芍藥時夜飲不覺生
朝霞天下名花惟有此罇前樂事更無加如今白首春風裏病眼何
須厭黑花

送朱生

萬物各有役無心獨浮雲遂令幽居客日與山雲親植桂比芳操佩
蘭思潔身何必濯於水本無纒上塵

雪時在頴州作玉月梨梅練絮白舞鶴鶴銀等事皆請勿用

新陽力微初破萼客陰用壯猶相薄朝寒稜稜風疑莫犯暮雪綉綉
止還作驅馳風雲初慘淡炫晃山川漸開廓光芒可愛初日照潤澤
終為和氣燥美人高堂晨起驚幽士虛牕靜聞落酒壚成徑集餅罌
獵騎尋蹤得狐貉龍蛇掃處斷復續虎團成呀且攫共食終歲飽
麩麥豈恤空林飢鳥雀沙墀朝賀迷象笏桑野行歌沒芒屨乃知一
雪萬人喜顧我不飲胡為樂坐看天地絕氛埃使我胸襟如洗淪脫
遺前言笑塵雜搜索萬象窺冥漠頴雖陋邦文士衆巨筆人人把矛
槩自非我為發其端凍口何由開一噉

雪晴

悠悠野水來灑灑西溪闊曉日披宿雲荒臺照殘雪風光變窮臘歲
律新陽月凍卉意初回綠醅浮可撥人閑樂朋友鳥啼知時節豈止
探芳菲耕桑行可閱

琴高魚

琴高一去不復見神仙雖有亦何為溪鱗佳味自可愛何必虛名務
好奇

竹間亭二首其一已見居士集

高亭照初日竹影涼蕭森新篁漸解擗翠色日已深雨多苔莓發青
幽徑無人尋靜趣久迺得暫來聊解襟清風颯然生鳴鳥送好音佳
時不易得濁酒聊自斟與盡即言返重來期抱琴

箕山

朝下黃蘆坂夕望箕山雲緬懷巢上客想彼崑中人弱歲慕高節壯
年嬰世紛激流羨潁水振衣嗟洛塵空祠亂鷺鳥山木含餘曠聊茲
謝芝桂歸月及新春

西園

落日叩溪門西溪復何所人侵樹裏耕花落田中雨平野見南山荒
臺起寒霧歌舞昔云誰今人但懷古

白兔

天冥冥雲濛濛白兔搗藥姮娥宮玉關金鑰夜不閉竄入滁山千萬
重滁泉清甘瀉大壑滁草軟翠搖輕風渴飲泉困棲草滁人遇之豐
山道網羅百計偶得之千里持為翰林寶翰林酬酢委金璧珠箔花
籠玉為食朝隨孔翠伴暮綴鸞皇翼主人邀客醉龍下京洛風埃不
露席羣詩名貌極豪縱爾兔有意果誰識天資潔白已為累物性拘
囚盡無益上林榮落幾時休回首峯巒斷消息

偶書

吾見陶靖節愛酒又愛閑二者人所欲不問愚與賢奈何古今人遂
此樂尤難飲酒或時有得閑何鮮焉浮屠老子流營營盈市塵二物
尚如此仕宦不待言官高貴愈重祿厚足憂患暫息不可得况欲閑
長年少壯務貪得銳意力爭前老來難勉強思此但長歎決計不宜

晚歸耕種尾田

日本刀歌

昆夷道遠不復通世傳切玉誰能窮寶刀近出日本國越買得之滄
海東魚皮裝貼香木鞘黃白閑雜鑰與銅真鑰似金真鑰似銀百金
傳入好事手佩服可以禳妖凶傳聞其國居大島土壤沃饒風俗好
其先徐福詐秦民採藥淹留仰董老百工五種與之居至今器玩皆
精巧前朝貢獻屢往來士人往往工詞藻徐福行時書未焚逸書百
篇今尚存令嚴不許傳中國舉世無人識古文先王大典藏夷猶蒼
波浩蕩無通津令人感激激流涕鏽澁短刀何足云

會峯亭

山勢百里見新亭壓其巔羣峯漸靡迤高下相綿聯下窺疑無地杳
藹但蒼烟是時新雨餘衆壑鳴春泉林籟靜更響山光晚逾鮮崑花
爲誰開春去夏猶妍野鳥窺我醉谿雲留我眠日暮山風來吹我還
醒然醉醒各任物雲鳥徒留連

晚步綠陰園遂登凝翠亭

餘春去已遠綠水涵新塘漸愛樹陰密初迎蕙風涼高亭可四望鏡
郭青山長野色晚更好風曛共微茫幽懷不可寫雅詠同誰觴明月
如慰我開軒送清光

聖俞惠宣州筆戲書

聖俞宣城人能使紫毫筆宣人諸葛高世業守不失緊心縛長毫三
副頗精密硬軟適人手百管不差一京師諸筆工牌榜自稱述纍纍
相國東比若衣縫蝨或柔多虛尖或硬不可屈但能裝管榻有表會
無實價高仍費錢用不過數日豈如宣城毫耐久仍可乞

贈潘景溫叟

秦盧不世出俗子相矜誇治疾不知一作東源橫死紛如麻番陽奇
男子衣冠本儒家學本得心訣照底窮根厓冷然鑿五藏曾靡毫釐

差公卿掃榻迎黃金載盈車語言無羽翰飛入萬齒牙相逢京洛下
使我驚且嗟七年慈母病庸工口啞啞恨不早見君以乞壺中砂通
宵耳高論飲恨知何涯瞥然別我去征途指烟霞孤雲不可留淚線
風中斜

學書二首

蘇子歸黃泉筆法遂中絕賴有蔡君謨名聲馳晚節醉翁不量力每
欲追其轍人生浪自苦以取兒女悅豈止學書然自悔從今決
學書不覺夜但怪西窗暗病目故已昏墨不分濃淡人生不自知勞
苦殊無憾所得乃虛名榮華俄頃暫豈止學書然作銘聊自鑿

奉使道中作三首

執手意遲遲出門還草草無嫌去時速但願歸時早北風吹雪犯征
裘夾路花開回馬頭若無二月還家樂爭奈千山遠客愁
爲客莫思家客行方遠道還家自有時空使朱顏老禁城春色暖融
怡花倚春風待客歸勸君還家須飲酒記取思歸未得時

奉使道中寄坦師

客夢方在家角聲已催曉忽忽行人起共怨角聲早馬蹄終日踐冰
霜未到思回空斷腸少貪夢裏還家樂早起前山一作山前路正長
道人少買海上遊海船破散身沉浮黃金滿篋人所寄吹簫偶得還
中州羸身歸金不受報祇取斗酒相獻酬歡娛慈母終一世脫妻妻
子藏巖幽蒼烟寥寥池水漫白玉藹菖吹高秋夜燃柏子煮山藥憶
此東望無時休塞垣春枯積雪溜沙礫威怒黃雲愁五更匹馬隨鴈
起想見鄭郭花今稠百年夸奪終一邱世上滿眼真悠悠寄聲萬里
心綢繆莫道異趣無相求

勉劉甲

有司精考覈中第爲公卿本基在積習優學登榮名吾子齒尚少加
勤無自輕努力圖樹立庶幾終有成

壽樓

碧瓦照日生青烟誰家高樓當道邊昨日丁丁斤且斲今朝朱欄橫
翠幕主人起樓何太高欲誇富力壓臺臺樓中女兒十五六紅膏畫
眉雙鬢綠日暮春風吹管弦過者仰首皆留連應笑樓前騎馬客腰
垂金章頭已白若貪名利損形骸爭若庸愚恣聲色朝見騎馬過暮
見騎馬歸經年無補朝廷事何用區區來往爲

試院聞奚琴作

奚琴本出奚人樂奚虜彈之雙淚落抱琴置酒試一彈曲罷依然不
能作黃河之水向東流鶯飛鴈下白雲秋岸上行人舟上客朝來暮
去無今昔哀絃一奏池上風忽聞如在河舟中絃聲千古聽不改可
憐纖手今何在誰知着意弄新音斷我罇前今日心當時應有會聞
者若使重聽須淚下

乞藥有感呈梅聖俞

宣州紫沙合圓若截郵筒偶得今十載走宦一作官南北東持之聖
俞家乞藥戒羸僮聖俞見之喜遽以手磨礬謂此吾家物問誰持贈
公因嗟與君交事事無不同憶昔初識面青衫游洛中高標不可揖
杳若雲間鴻不獨體輕健目明仍耳聰爾來三十年多難百憂攻君
晚得奇藥靈根斷離宮其狀若狗蹄其香比芎藭愛君方食貧面色
悅以豐不憚乞餘劑庶幾助衰癯平時一笑歡飲酒各爭雄向老百
病出區區論藥功衰感物常理循環勢無窮寄語少年兒慎勿笑兩
翁

擬刺豕行寄趙少師

刺刺復啄啄柴門驚鳥雀故人千里駕信士百金諾摺紳相趨動顏
色聞若歡呼共嗟愕顧我非惟慰寂寂於時自可警偷薄事國十年
憂患同酣歌幾日暫相從酒醒初不戒徒馭歸思瞥起如飛鴻車馬
闕然人已去荷鋤却向野田中

絕句臨堯作

冷雨漲焦陂人去陂寂寞惟有霜前花鮮鮮對高閣

聯句四首

冬夕小齋聯句寄梅聖俞陸經

寒牕明夜月一作夜月明散帙耿燈火破硯裂冰漸陸敗席薦霜
筍廢書浩長吟一作吟歎想子實勞我清篇追曹劉陸苦語侔鳥可耐飲每
頽山歐談笑工炙輶駕言當有期陸歲晚何未果幽夢亂如雲歐別
愁牢若鎖雪水漸漣漪陸春枝將婀娜客心莫遲留歐苑一作苑葩
卽紛墮何當迎笑前陸相逢朝飯顆歐

劍聯句范仲淹滕宗諒

聖人作神兵以定天下厄范蚩尤發靈機干將構雄績歐囊籥天地
開鑪治陰陽闢滕南帝輸火精西皇降金液歐炎炎岷岡焚洶洶洪
河聲范雷霆助意氣日月淪精魄滕神氣不在大錯落就三尺直淬
靈溪泉橫磨太行石歐雄雌威並立晝夜光相射范提攜風雲生指
顧烟霞寂滕堅剛正人心耿介志士跡歐初疑成夏鼎魑魅世所適
滕又若引吳刀犀象謂疑無隔范截波虬尾滑脫浪鯨牙直頑冰挂
陰霽皓月乘孤隙歐河角起善氣雲罅露秋碧曉鐔星斗爛夜匣飛
龍宅范舞酣霰雪回彈俊球琳擊鮮搖雪水光膩刮湘山色滕青蛟
渴雨瘦素虺蟠霜瘳歐清音鏘以鳴寒姿堅且澤范鬼類喪影響伎
黨摧肝腸歐一日會神武四海屠兇逆范周王奉天討商郊千里赤
歐楚子楊軍聲秦師萬首白祥輝冠吳楚殺氣橫燕易范與君斬鼉
足八極停震競歐與君荆鵬翼三辰增煥赫莫使化猿翁辱我爲幻
惑范莫使暴虎人屈我執仇敵滕算嚴侯冠冕左右舞干戚歐功成
不可留延平空霹靂

鶴聯句范仲淹滕宗諒

上霄降靈氣鍾此千年禽范幽閑靖節性孤高伯夷心歐頡頏紫霄

垠飄飄滄浪溟嶽岳湛有仙姿鈞韶無俗音范毛滋月華淡頂粹霞
光深歐目流泉客淚翅垂羽人襟騰騰漢雪千丈點溪霜半尋范織
喙礪青鐵修脰雕碧琳歐巖樓千溪樹澤飲卑朱泠騰鸞皇自瓊篴
燕雀徒商參范獨翅倕瓊枝羣舞傾瑤林歐病餘霞雲段夢回松吹
吟騰靜嫌鸚鵡言高笑鸞鴛淫范金清冷澄澈玉格寒蕭森歐潔白
不我恃腥羶非所任騰稻梁不得已歐鸞風胡爲侵范天池憶鵬遊雲
羅傷鳳沈騰風流超綺一作起續素雅淡絕規箴歐相親長道情偶
見銷煩襟范西漢惜馮唐華皓欲投簪歐南朝仰衛玠清風疑不禁
騰端如方直臣處羣良足欽范介如廉退士驚秋猶在陰范幾誦鷹
隼驚羈轄俄見臨歐還嗤鸞鸞食弋繳終就擒歐乘軒乃一芥空籠
仍萬金騰片雲伴遙影冥冥越烟岑范長廳送逸響亭亭一作
曲霜砧歐蓬瀛忽往來桑田成古今歐願下八佾庭鼓舞薰風琴騰
來鸞堂與趙叔平王禹玉王原叔韓子華聯句嘉祐三年見

華陽集續添

賢侯謝郡歸從游樂吾黨林泉富餘地下築疏陳莽是時春正中來
鸞音下上若賀大廈成喜留衆賓賞歐得各因談笑揮墨絮題榜所
夸賢豪感豈止池榭廣人心樂且閑鳥意頽而頽吟罇斂花軒醉枕
酣風幌歐輕雲薄藻棟初日麗珠網紅袂生暗香清絃泛餘響林深
隱飛蓋岸曲遲去槳波光欄檻明竹飛衣巾爽珪虛容涼機入影與
文漣蕩晨颺轉綠蕙夕雨滋膏壤嘉辰喜盃朋命駕期屢往觴詠陶
淑真世俗豈吾做珠得以爲勝游蕭然散煩想公子固好士世德復
可象今此大基構不圖專奉養美哉風流存來葉足師仰賢侯
謂鎮東軍節度觀察留後李端愿

外集卷第四

外集卷第五 集五十五

律詩一

漢宮

桂館神君去甘泉輦道平翠華飛蓋下豹尾屬車迎曉露寒浮掌光
風細轉旌廊回偏費步珮遠尚聞聲玉樹人間老珊瑚海底生金波
夜夜意偏照影娥清

送劉半千平陽簿假道歸故里

嶺梅歸驛路迢迢越鳥巢傾木半喬松徑就荒聊應召桂叢留隱定
相招家庭噪鶻爭諠樹夜帳驚猿自擁條何處秋風催客囊青絲恐
遂物華凋一作銷

樓頭

百尺樓頭萬疊山楚江南望隔晴烟雲藏白道天垂幕簾捲黃昏月
上弦桑落蒲城催熟酒柳衰章陌感凋年髮光如葆寧禁恨不待爲
郎已颯然

夕照

夕照留歌扇餘輝上桂叢霞光晴散錦雨氣晚成虹燕下隸池草烏
驚傍井桐無慘照湘水丹色映秋風

送張學士知郢州

漢郎清曉赤墀趨楚老西來望隼旗侍史護衣薰蕙草轆轤要劍從
驪駒陽春繞雪歌低扇油暮連雲水泛渠千里修門對溱浦好尋遺
玦弔三閭

曉詠

簾外星辰逐斗移紫河聲轉下雲西九雜鳥起城將曙百尺樓高月
易低露裏蘭苔惟有淚秋荒桃李不成蹊西堂吟思無人助草滿池
塘夢自迷

禁火

火禁開何晚春芳半已凋柳風兼絮墜榆雨帶錢飄淚蘭膏盡弦
衝桂魄消被蘭流水曲游襖一相招

送趙山人歸舊山

屈賈江山思不休霜飛翠葆忽驚秋吟拋楚畹蘭若老歸有淮山桂
樹留聒耳春池蛙兩部比封秋塢橘千頭嗔條怒頰真堪愧莫染衣
塵更遠遊

閑居卽事

巷有容車陋門無載酒過池喧蛙怒雨客去雀驚羅握臂如枝骨哀
絃繫一作擊飭歌無慘漳浦臥還似詠中阿

傷春

蕙蘭蹊徑失芳期風雨春深怯減衣卷箔高樓驚燕入揮絃遠日送
鴻歸蜂催釀蜜愁花盡絮撲暄條妬雪飛欲識傷春多少恨試量衣
帶忖要圍

公子

黃山開苑獵初回絳樹分行舞遞來下馬春場雞鬪距鳴絃初日雉
驚媒犀投博齒呼成白橋隔車音聽似雷不問春蠶眠未起更尋桑
陌到秦臺

夜意

蕙炷爐薰斷蘭膏燭艷煎夜風多起賴曉月漸虧弦鶻去星低漢烏
啼樹暝烟惟應牆外柳二起復三眠

寄張至秘校

關山一里一重愁念遠傷離兩未休南陌望窮雲似帳西樓吟斷月
如鉤柳綿飛後一作處春應滅蘭徑荒時客倦游擬寄東流問溝水
亦應溝水更東流

寄徐異秀才

瑤花飛雪蕩離愁鶻驚風下綠疇畦苑樹荒誰共客楚江楓老獨

悲秋千重錦浪翻如箭萬疊春山翠入樓章陌柳條今在否定臨溝
水拂東流

寄劉昉秀才

綠路繁回細入雲離懷南陌草初薰茂林修竹誰同禊明月春羅定
勒文燕憶銅鞮來不定鴻歸碣石信難分東風鸞友應相望懊惱孤
飛不及羣

送客回馬上作

南浦空波綠西陂夕照寒瑤華傷遠道芳草送歸鞍翠斂遙山疊氛
收古澤寬衰容畏秋色不及楚楓丹

西征道中送陳舅秀才北歸

某墅風流謝舅賢髮光如葆惜窮年人隨黃鶴飛千里酒滿樓烏送
一絃望驛早梅迎遠使拂鞍衰柳拗歸鞭越禽胡馬相逢地南北思
歸各黯然

送目

送目衡一作蕪臯望不休江蘋高下遍汀洲長堤柳曲妨回首小苑
花深礙倚樓楚徑蕙風消病渴洛城花雪蕩春愁流杯三日佳期過
擲度蘭波負勝遊

春晚

小閣回殘夢開簾轉曉暉露寒風不定花落為驚飛病渴偏思柘一
作蔗楚詞漢志作柘晉書杜詩作蔗朝寒怯減衣無錢將謝雪持底
送春歸

劉秀才宅對奕助

烏巷招邀謝墅中紫囊香珮更臨風塵驚野一作烽火遙知獵目送
雲羅但聽鷓鴣六着比犀鳴博勝百嬌柘矢捧壺空解衣對子歡何極
玉井移陰下翠桐

送李寔

幾幅歸帆不暫停吳天遙望斗牛橫香薰翠被乘青翰波暖屏風詠
紫莖江水自隨潮上下月輪閑與蚌虧盈河橋折柳傷離後更作南
雲萬里行

早夏鄭工部園池

夜雨殘芳盡朝暉宿霧收蘭香纔馥徑柳暗欲翻溝夏木繁堪結春
蹊一作畦翠已稱披襟楚風快伏檻更臨流

舟中寄劉昉秀才

東南天闊漾歸流西北雲高斷寸眸明月隨人來遠浦青山答鼓送
行舟歸心逐夢成魚鳥夜漢看星識斗牛釀一作釀酒開樽誰共醉
清江聊且玩游儻一作儻游

月夕

月氣初升海屏光半隱屏寒消覺春盡漏永送籌稀蘭燭風驚燼烟
簾霧濕衣清羸急寬帶頻減故時圍

奉送叔父都官知永州

虎頭盤綬貫垂紳青組名郎領郡頻畫鷁千艘隨下瀨聽雞五鼓送
行人楚波漾楫萍如日淮月開鈴蚌有津千里壺漿民詠溢檣烏旗
隼下汀蘋

柳

綠樹低昂不自持河橋風雨弄春絲殘黃淺約眉雙斂欲舞先誇手
小垂快馬折鞭催遠道落梅橫笛共餘悲長亭送客兼迎雨費盡春
條贈別離

舟中望京邑

東北歸川泱泱流汎煌青渚暫夷猶遙登瀛岸空回首不見長安但
舉頭揮手絃琴空墮睫開樽魯酒不忘憂青門柳色春應遍猶自留
連杜若洲

小圃

桂樹鶯鶯起蘭若翡翠翔風高絲引絮雨罷葉生光蝶粉花露紫蜂
茸露濕黃愁醒與消渴容易爲春傷

卽目

李徑陰森接翠幃押簾風日澹清秋晚烏藏柳棲殘照遠燕傷風失
故樓星漢經年雖可望雲波千疊不減愁平居草帶頻移孔誰問無
慘沈隱侯

南征道寄相送者

楚天風雪犯征裘誤拂京塵事遠遊謝野人歸應作詠灞陵岸遠尙
回頭雲含江樹看迷所目逐歸鴻送不休欲借高樓望西北亦應西
北有高樓

楚澤

宿莽湘纍怨幽蘭楚俗謠紫屏空自老翠被豈能招欲就蒼梧訴愁
迷澧浦遙哀猿羌晝晦悲鳩衆芳凋紅壁丹砂板瓊鉤翡翠翹如何
寥香杜一作杜若江上獨無慘

題金山寺

地接龍宮漲浪賒鷺峯岑絕倚雲斜崑披宿霧二竿日路引迷人四
照花海國盜牙爭起塔河童施鉢但驚沙春羅攀倚難成去山谷疎
鐘落暮霞

送寶秀才

晴原高下細如鱗樹轉城回路欲分望月西樓人共遠躍鞍南陌草
初薰短亭山翠偏多疊送目鷓鴣不及羣一驛賦成應援筆好憑飛
翼寄歸雲

旅思

調苦歌非樂岐多淚始零羞彈長鈇劍終戀五侯鯖陌草薰沙綠江
楓照岸青南陔動歸思蘭葉向春馨

仙意

孤桐百尺拂非煙鳳去鸞歸夜悄然滄海風高秋燕遠扶桑春老記
蠶眠槎流千里纔成曲桂魄經旬始下弦獨有金人寄遺恨曉盤雲
淚冷涓涓

聞朱祠部罷漳州歸闕

漢柱題名墨未乾南州坐布政條寬嶺雲路隔梅嶺驛使駟秋歸柳
拂鞍建禮侵晨趨冉冉明光賜對佩珊珊頽川此召行聞拜冠頰疑
塵俟一彈

勸征

沈約傷春思穉含倦久游帆歸黃鶴一作葦浦人滯白蘋洲乳燕差
池遠江禽格磔浮物華真可玩黑鬢恐逢秋

鄭駕部射圃

夢草西堂射圃蓮蘭若初日露華鮮暈含畫的弦關月牙筭行籌酒
滿船鑊管思催吟韻劇妓簾陰薄舞衣翩當筵獨愧探牛炙儉府芙
蓉客盡賢

甘露寺

雲樹千尋隔翠微給園金地敞仁祠講花飄雨諸天近春漏歇蓮白
日遲引鉢當空時取露殘灰經劫自成池危欄徙倚吟忘下九子鈴
寒塔影移

送友人南下

河橋別柳減春條隔浦翠音聽已遙十里蘼蕪誇敵酪滿池麩稻欲
鳴蜩東風楚岸神靈雨殘月吳波上下潮如弔湘纍攀香一作杜若
秋江斜日駐蘭橈

高樓

六曲雕欄百尺樓簾波不定瓦如流浮雲已映樓西北更向雲西待
月鈞

榴花

絮亂絲繁不自持蜂黃蝶紫燕差榴花最恨來時晚惆悵春期獨後期

宿雲夢館

北鴈來時歲欲昏私書歸夢香難分井桐葉落池荷盡一夜西牕雨不聞

鷓鴣一作鴛

花殘如霰落紛紛紫陌空遺翠幃塵鷓鴣杆綠催節物年華不信有傷春

簾

銀蒜鈎簾宛地垂桂叢烏起上朝暉枉將玳瑁雕爲押遮掩春堂礙燕歸

行雲

疊疊烟波隔夢思離愁幾日減腰圍行雲自亦傷無定莫就行雲託信歸

琵琶亭上作

九江烟水一登臨風月清含古恨深濕盡青衫司馬淚琵琶還似雍門琴

柳

兩闊堤長走畫轅絮兼梨雪墜春烟東風苑外千絲老猶伴吳蠶盡日眠

井桐

簷歌碧瓦拂傾梧玉井聲高轉轆轤腸斷西樓驚穩夢半留殘月照啼鳥

雪中寄友人

楚岸梅香半入衣凍雲銀鑠曉光飛遙應便面逢人處走馬章街失路歸

與謝三學士絳唱和八首

和國庠勸講之什

春盡沂風暖芹生泮水清雙旌榮照路博帶儼盈庭函丈師臨席鏘金壁有經諸生拜玉一作王褒欣識象邱形

和遊午橋莊

曉壇初畢祀禋蓋共尋幽鳥睇林中出泉聲冰下流攀條驚雪盡翻袂愛風柔好駐城南馬春一作秦桑徧陌頭

和龍門曉望

水霧濛濛曉望平悠然驅馬獨吟行煙嵐明滅川霞上凌亂空山百鳥驚

除夜偶成拜上學士三丈

萬瓦青烟夕靄生斗杓迎歲轉東城隋宮守夜沈香燎楚俗驅神爆竹聲玉樹羅階家宴感羽觴稱壽綵衣榮九門朝客思公甚向曉天風舞雪爰

陪飲上林院後亭見櫻桃花悉已披謝因成七言四韻

尋芳長恨見花遲豈意看花獨後期試藉落英聊共醉爲憐殘萼更攀枝清香肯以無人減幽艷惟應有蝶知開謝兩堪成悵望傷春不到柳絲時

昨日偶陪後騎同適近郊謹成七言四韻兼呈聖俞

堤柳纔黃已落梅尋芳弭蓋共徘徊桑城日暖蠶催浴麥壠風和雉應媒別浦人嬉遺翠羽弋林春廢鑠歌臺歸鞍暮逼宮街鼓府吏應驚便面回

和八月十五日齋宮對月

皓月三川靜晴氣萬里銷靈光望日滿寒色入波搖灑氣成山霧浮雲蔽壠苗廟荒陰燐出苑廢露螢飄齋館心方寂秋城夜已遙清談對元亮瓊彩映蕭蕭

送學士三王文一作送謝學士歸闕

供帳洛城邊三字一作拂雲煙征轅一作較去莫攀人醒風外酒馬
度雪中關故一作舊府誰同在新年獨未還遙應行路者偏識綵衣
班

已上八篇居十集上載後一篇其不同者五字題云送謝希深今
本皆作送王學士希深二訛爲王耳

外集卷第五

外集卷第六 集五十六

律詩一

雙桂樓

嘉樹叢生秀茲樓層漢傍飛甍臨萬井伏檻出垂楊卷暮晴雲度披襟夕賴涼山河瞻帝里風月坐胡林愛客東阿宴清歡北海觴淮南多雅詠歲晚翫幽芳

題張應之縣齋

小官歎簿領夫子臥高齋五斗未能去一邱真所懷綠苔一作薛長秋雨黃葉堆空堦縣古仍無柳池清尚有蛙琴觴開月幌窗戶對雲崖嵩少亦堪老行當與子一作子與偕

和梅聖俞杏花

誰道梅花早殘年豈是春何如艷風日獨自占芳辰

錢相中伏日池亭宴會分韻

罇俎逢佳節簪纓奉宴居林光拂衣冷雲影入池虛酒色風前綠蓮香水上疎飛談交玉塵聽曲躍文魚粉籜春苞解紅榴夏實初睢園多美物能賦謝相如

送辛判官

被薦方趨召還鄉仍綠衣看山向家近上路逐鴻飛結綬同為客登高獨送歸都門足行者莫訝柳條稀

叢翠亭

柳色滿重城岩岩出翠臺春雲依檻暖夕照落山明走馬章街曉鸛鳴洛浦晴清罇但留客梓鼓畫無驚

賀九龍廟祈雪有應

真宰調神化幽靈應不言朝雲九淵閣暮霰六花繁朔吹繁歸旆賓裾載後軒睢園有客賦郢曲幾人懸槐座方虛位鋒車佇改轅願移盈尺瑞為兩徧羣元

早春南征寄洛中諸友

楚色窮千里行人何苦賒芳林逢旅鴈候館噪山鷓春入河邊草花開水上樓東風一罇酒新歲獨思家

花山寒食

客路逢寒食花山不見花歸心隨北鴈先向洛陽家

寒食值雨

禁火仍風雨客心愁復悽陰雲花更重春日水平堤一作還西油壁逢南陌軟糲出綠蹊尋芳無厭遠自有錦障泥

寄謝晏尚書一絕

送盡殘春始到家主人愛客不須嗟紅泥煮酒嘗青杏猶向臨流藉落花

爛漫殘芳不可收歸來惆悵失春遊綠陰深處聞啼鳥猶得追閑果下驢

下驢

留守相公移鎮漢東

周郊徹楚坳舊相擁新旌路識青山在人今白首行相公舊有方城題句問農穿稻野候節見梅英腰組人稀識偏應邸吏驚

寄聖俞

平沙漫去聲飛雪行旅斷浮橋坐覺山波阻空嗟音信遙窮陰變寒律急節慘驚飄野霽雲猶積河長冰未銷山陽人半在洛社客無聊寄問陶彭澤籃輿誰見邀

柴舍人金覆閣

簷前洛陽道下聽走轅聲樹蔭春城綠山明雪野晴雲藏天外闕日落柳間營緩步應多樂壺歌詠太平

送王公榘判官

久客倦京國言歸歲已冬獨過伊水渡猶聽洛城鐘山色經寒綠雲陰入暮重臘梅孤館路疲馬有誰逢

伊川獨遊

綠樹遠伊川人行亂石間寒雲依晚日白鳥向青山路轉香林出僧
歸野渡閑巖阿誰可訪興盡復空還

遊彭城公白蓮莊

謝墅多幽賞華軒曾共尋人閑聊載酒臺迴獨披襟水落陂光淡城
當山氣陰惟餘桃李樹日覺翠蹊深

普明院避暑

選勝避炎鬱林泉清可佳拂琴驚水鳥代塵折山花就簡刻筠粉浮
甌烹露芽歸鞍微帶雨不惜角巾斜

送高君先輩還家

閑居寂寞面重城過我時欣倒屣迎入洛機雲推俊譽遊梁枚馬得
英聲風晴秀野春光變梅發家林鳥哢輕祗待登高成麗賦漢庭推

轂有公卿

憶龍門

楚客有歸心因聲道故岑依依動春色藹藹望香林山日巖邊下溪
雲水上霧遙知懷洛社應復動鄉吟

贈梅聖俞時聞敗舉

黃鶴刷金衣自言能遠飛擇侶異棲息終年修羽儀朝下玉池飲暮
宿霜桐枝徘徊且垂翼會有秋風時

郡人獻花

蝶遶蜂遊露滿盤芳條可惜折來殘我緣多病經春臥砌下花開不
暇看

龍門泛舟晚向香山

暫解塵中絃來尋物外遊寒蘭流水曲弄桂倚山幽波影巖前綠灘
聲石上流忘機下鷗鳥至樂翫游儂梵響雲間出殘陽樹杪收溪窮

興不盡繫榜且淹留

荷葉真梅二分題

採綴本芳陂移根向玉池晴香滋白露翠色弄清漪雨歇涼飄起烟
明夕照移如何江上思偏動越人悲

早赴府學釋奠

羽籥與東序春秋紀上丁行祠漢丞相學禮魯諸生俎豆兼三代罇
壘奠兩楹霧中槐市暗日出杏壇明昔齒公卿曾聞絃誦聲何須
向闕里首善本西京

和晏尚書夏日偶至郊亭

關關啼鳥樹交陰雨過西城野色侵避暑誰能陪劇飲清歌自可滌
煩襟稻花欲秀蟬初噤菱蔓初長水正深知有江湖杳然意扁舟應
許共追尋

和晏尚書自嘲

未歸歸即乘鴻鈞偷醉關亭醉幾春與物有情寧易得莫嗔花解久
留人

題薦嚴院

那堪多難百憂攻二十衰容一病翁却把西都看花眼斷腸來此哭
東風

寄題嵩巫亭

平地煙霄向此分繡楣丹檻照清芬一作汾風簾暮捲秋空碧剩見
西山數嶺雲

題淨慧大師禪齋景德寺普光院

巾屨諸方遍蕙苔一室前萎花吟次一作處落孤月定中圓齋鉢都
人施談機海外傳時應暮鐘響來度禁城烟

琵琶亭

樂天曾謫此江邊已嘆天涯涕泣然今日始知子罪大夷陵此去更
三千

初至虎牙灘見江山類龍門

曉鼓潭潭客夢驚虎牙灘上作船行山形酷似龍門秀江色不如伊
水清平日兩京人少壯今年二峽歲崢嶸臥聞乳石淙流響疑是香
林八節聲

題張損之學士蘭亭序

碣岸接芳蹊琴觴此自怡花林朝落砌山月夜臨池雨積蛙鳴亂春
歸鳥騁移惟應乘興客不待主人知

霽後看雪走筆呈元珍判官二首

江上寒山祇對門野一作山花巖草共嶙峋獨吟羣玉峯前景閑憶
紅蓮幕下人

嘉景無人把酒看一作尊縣樓終日獨凭欄山城歲暮驚時節已作
春風料峭寒

送致政朱郎中

平生不省問田園白首忘懷道更尊已上印書辭北闕稍留冠蓋餘
東門馮唐老有爲郎戀疏廣終無任子恩今日榮歸人所羨兩兒腰
綬擁高軒

留題安州朱氏草堂

俯檻臨流蕙徑深平泉花木繞陰森蛙鳴鼓吹春喧耳草暖池塘夢
費吟賭墅乞甥賓對奕驚鴻送目手揮琴嗟子遠捧從軍檄不得披
裘五月尋

題光化張氏園亭

君家花幾種來自洛之濱惟我曾遊洛看花若故人芳菲不改色開
落幾經春陶令來常醉山公到最頻曲池涵草樹啼鳥悅松筠相德
今方賴思歸未有因

和聖俞百花洲二首

野岸溪幾曲松一作沿蹊穿翠陰不知芳渚遠但愛綠荷深

荷深水風闊雨過清香發暮角起城頭歸櫓帶明月

魚

秋水澄清見髮毛錦鱗行處一作慢水紋搖岸邊人影驚還去時向
綠荷深處跳

月

天高月影浸長江江闊風微水面涼天水相連爲一色更無纖霧隔
清光

棖子

嘉樹團團俯可攀壓枝秋實漸爛斑朱欄碧瓦清霜曉粲粲繁星綠
葉間

初冬歸襄城弊居

日落原野晦天寒閭市閑牛羊遠陂去鳥雀空簷間憑高植藜杖曠
目瞻前山隴麥風際綠霜鴉村外還禾黍日已熟杯酒聊開顏酣歌
歲云暮寂寞向柴關

和晏尚書對雪招飲

瑤林瓊樹影交加誰伴山翁醉帽斜自把金船浮白蟻應須紅粉唱
梅花

滑州歸鴈亭

長河終歲足悲風亭古臺荒半倚空惟有鴈歸時最早柳含微綠杏
粘紅

送黃通之鄖鄉

君子貴從俗小官能養賢無慚折腰吏勉食落頭鮮均人相尚食腐
魚故俗傳爲落頭鮮困有亨之理窮當志益堅惟宜少近福親髮况
皤然

秋日與諸君馬頭山登高

晴原霜後若榴紅佳節登臨興未窮日泛花光搖露際酒浮山色入

樽中金壺恣灑毫端墨玉塵交揮席上風惟有淵明偏好飲盃與酪
酏一衰翁

送楊君歸漢上

我昔謫窮縣相逢清漢陰拂塵時解榻置酒屢橫琴介節温如玉嘉
辭擲若金趣當鄉士薦無滯計車音

後潭遊船見岸上看者有感河朔之俗不知嬉遊大名與真

定以三月十八日為行樂之日其俗頗盛

喧喧誰暇聽歌謳浪遠春潭逐綵舟爭得心如汝無事明年今日更
來遊

春日獨居

衆喧爭去逐春遊獨靜誰知味最優雨霽日長花爛漫春深睡美夢
飄浮常憂任重才難了偶得身閑樂暫偷因此益知為郡趣乞州仍
擬乞山州

得滕岳陽書大誇湖山之美郡署懷疑物甚野其意有戀著

之趣作詩一百四十言為寄且警激之

峭巖孤城倚平湖遠浪來萬尋迷島嶼百仞起樓臺太守凭軒處羣
賓奉笏陪清霜薦丹橘積雨過黃梅逸思歌湘曲遺文繼楚材魚貪
河岫樂雲忘帝鄉回遙信雙鴻下新緘尺素裁因聞誇野景一作境
自笑擁邊埃龍漢方多擊旋頭久示災旌旗時映日鼙鼓或驚雷有
志皆嘗膽何人可擊坏儒生半投筆牧豎亦輸財沮澤辭猶慢蒲萄
館未開支離莫攘臂天子正求才

幽谷種花洗山

洗出峯巒看臘雪栽成花木趁新年史君功行今將滿誰肯同來作

地仙

鷺鷥

激石灘聲如戰鼓翻天浪色似銀山灘鷺浪打風兼雨獨立亭亭意

愈閑

贈歌者

病客多年掩綠罇今宵為爾一顏醺可憐玉樹庭花後又向江都月
下聞

初春

新年變物華春意日堪嘉霽色初含柳餘寒尚勒花風絲飛蕩漾林
鳥睥交加獨有無惊者誰知老可嗟

送田處士

秦士多豪俠夫君久遁名青山對高臥白首喜論兵氣古時難合詩
精一作清格入評公車不久召歸袖夕風生

行次壽州寄內

紫金山下水長流書記當年此共遊今夜南風吹客夢夢清淮明月照
孤舟

答呂太博賞雙蓮

年來因病不飲酒老去無惊懶作詩我已負花常自愧君須屢醉及
芳時漢宮姊妹爭新龍湘浦皇英望所思天下從來無定色况將鉛
黛比天姿

酬孫延仲龍圖

洛社當年感莫加洛陽耆老至今誇梅聖俞張堯夫張子野延仲與
予皆在洛中死生零落餘無幾齒髮衰殘各可嗟北庫酒醪君舊物
延仲前守汝陰西湖烟水我如家已將二美交相勝仍在新篇麗彩
霞

常州張鄉養素堂

江左衣冠世有名幾人今復振家聲朝廷獨立清冰節閭里歸來白
首卿志在言談猶慷慨身閑耳目益聰明長松野水誰為伴願我堪
羞戀龍榮

西湖泛舟呈運使學士張揆

波光柳色碧深濛曲渚斜橋畫舸通更遠更佳唯恐盡漸深漸密似
無窮綺羅香裏留住佳客絃管聲來颺晚風半醉迴一作還舟迷向背
樓臺高下夕陽中

去思堂會飲得春字甲午四月潁州張唐公座上

世事紛然百態新西岡一醉十三春自慚白髮隨年少猶把金鐘勸
主人黃鳥亂飛深夏木紅榴初發豔清晨佳時易失開難得有酒重
來莫厭頻

太傅相公入陪大祀以疾不行聖恩優賢詔書俞允發於感

遇紀以嘉篇小子不揆輒亦課成拙惡詩一首

驛騎頻來急詔隨都人相與竊嗟咨自非峻節終無改安得清衷久
益思前席蓋將求讜議在庭非爲乏陪祠尊賢優老朝家美他日安
車召未遲

寄子春發運待制

廣陵花月嘗同醉唯苑風霜暫破顏但喜交情久彌重休嗟人事老
多艱壯心未忍悲華髮強飲猶能倒玉山留滯江一作五湖應不久
多爲春酒待君還

答許發運見寄詩云芍藥瓊花應有恨維揚新什獨無名

瓊花芍藥世無倫偶不題詩便怨人曾向無雙亭下醉自知不負廣
陵春

贈廬山僧居訥

方瞳如水衲披肩邂逅相逢爲洒然五百僧中得一士始知林下有
遺賢

過塞二首一首已見居士集

身驅漢馬踏胡霜每嘆勞生祗自傷氣候愈寒人愈北不如征鴈解
隨陽

晏元獻公挽辭三首

接物襟懷曠推賢品藻精謀猷存二府臺閣徧諸生帝念宮臣舊恩
隆衮服榮春風綠野迴千兩送銘旌

四鎮名藩忽十春歸來白首兩朝臣上心方喜親耆德物論猶期秉
國鈞退食圖書盈一室開罇談笑列嘉賓昔人風采今人少慟哭何
由贖以身

富貴優游五十年始終明哲保身全一時聞望朝廷重餘事文章海
外傳舊館池臺閑水石悲笳風日慘山川解官制服門生禮慙負君
恩隔九泉

酬滑州公儀龍圖見寄

畫舫齋前舊菊叢十年開落任秋風知君爲我留紅旆猶記載花白
髮翁

外集卷第六

外集卷第七 集五十七

律詩三

贈王介甫

翰林風月三千首吏部文章二百年老去自憐心尚在後來誰與子
爭先朱門歌舞爭新態綠綺塵埃試拂絃常恨聞名不相識相逢罇
酒盞留連

蘇才翁挽詩二首

握手接歡言相知二十年文章家世事名譽弟兄賢可惜英魂掩惟
餘醉墨傳秋風衰柳岸撫柩送歸船

雄心壯志兩崢嶸誰謂中年志不成零落篇章為世寶平生風義見
交情青松月下泉臺路白草原頭薤露聲自古英豪皆若此哭君徒
有淚沾纓

送石楊休還蜀

長愛謫仙誇蜀道送君西望重吟哦路高黃鶴飛不到花發杜鵑啼
更多清禁寒生鳳池水繡衣榮照錦江波昔年同舍青衿子夾道歡
迎鬢已皤

和景仁試明經大義多不通有感

庠序制猶闕鄉閭教不行古於經學政今也藝虛名來者益可鄙待
之因愈輕無徒誚其陋講勸在公卿

和公儀試進士終場有作

朝家意在取遺才樂育推仁亦至哉本欲勵賢敦古學可嗟趨利競
朋來昔人自重身難進薄俗多端路久開何異鱸爭尺水巨魚先
已化風雷

久在病告近方赴直偶成拙詩二首

經時移病久端居玉署新秋獨直廬夜靜樓臺落銀漢人閑鈴索少
文書江湖未去年華晚燈火微涼暑雨初敢向聖朝辭寵祿多慙禁

藥一作關養慵疎

清晨下直大明宮馳馬悠然宿露中金闕雲開滄海日天街雨後綠
槐風歲華忽忽雙流矢鬢髮蕭蕭一病翁名在玉堂歸未得西山畫
閣興何窮

送潤州通判屯田

船頭初轉兩旗開清曉津亭疊鼓催自古江山最佳處况君談笑有
餘才雲愁海闊鷺濤漲木落霜清畫角哀善政已成多雅思寄詩宜
逐驛筒來

和劉原甫平山堂見寄

督府繁華久已闌至今形勝可躋攀山橫天地蒼茫外花發池臺草
莽間萬井笙歌遺俗在一罇風月屬君閑遙知為我留真賞恨不相
隨暫解顏

送張吉老赴浙憲

吳越東南富百城路人應羨繡一作錦衣榮昔時結客曾遊處今見
焚香夾道迎治世用刑期止殺仁心聽獄務求生時豐訟息多餘暇
無惜新篇屢寄聲

春日詞五首

宮壇青陌賽牛回玉瑄一作管東風逗曉來不待鎖梅傳遠信剪刀
先放綵花開

試粉東臆待曉迴共尋春柳傍香臺不驚樹裏禽初變共喜釵頭燕
已來

紅霧初開上曉霞共驚風色變年華香車遙認春雷響庭雪先開玉
樹花

玉瑄吹灰夜色殘雞鳴紅日上仙盤初驚百舌綿蠻語已覺東風料
峭寒

待曉銅荷剪蠟燭繡簾春色犯寒來畫眉不待張京兆自有新粧試

落梅

走筆答原甫提刑學士慶曆五年詳見卷末

歲暮山城喜少留西亭尚欲挽行轡一罇莫惜臨歧別十載相逢各白頭

酬淨照大師說

佛說吾不學勞師忽款關吾方仁義急君且水雲閑意淡宜松鶴詩清叩珮環林泉苟有趣何必市塵閑

和劉原父從幸後苑觀稻呈講筵諸公

禁籞皇居接香畦檻鏤邊分渠自靈沼種稻滿瀆田六穀名居首三農政所先擢莖蒙德茂養實以時堅曉謁龍墀罷行瞻鳳蓋翻粹容知一作和喜色嘉瑞奏豐年衰病慙經學陪遊與俊賢安知帝力及但樂歲功全拜賜秋風裏分行黼座前自憐臺笠叟來綴侍臣篇

送薛水部通判并州

胸懷磊落逢知己氣略縱橫負壯心玉塵生風寶滿坐金鑪照甲士如林牛羊日暖山田美雨雪春寒土屋深自古幽并重豪俠祗應行樂費黃金

鶴

樊籠毛羽日低摧野水長松眼暫開萬里秋風天外意日斜閑啄岸邊苔

鴈

來時沙磧已冰霜飛過江南木葉黃水闊天低雲暗澹朔風吹起自成行

鷓

依倚秋風氣象豪似欺黃雀在蓬蒿不知羽翼青冥上麋鼠相隨勢亦高

原甫致齋集禧余亦攝事後廟謹呈拙句兼簡聖俞

受命分行攝上公紫微人在玉華宮樓臺碧瓦輝雲日蓮芝清香帶水風每接少年嗟老病尚能聯句惱詩翁凌一作曉晨已事追佳賞綠李甘瓜興未窮

同年秘書丞陳動之挽詞二首

場屋當年氣最雄交游樽酒弟兄同文章落筆傳都下議論生鋒服座中自古聖賢誰一作猶不死况君門戶有清風凋零三十年朋舊在者多為白髮翁

富貴聲名豈足論死生榮辱等埃塵青衫照日誇春榜白首餘年哭故人感德不忘存誌刻話言能記有朋親吳江草木春風動灑酒誰瞻壠樹新

奉和劉舍人初雪

夜雪填空曉更飄龍墀風冷珮聲高瓊花落處紫仙仗玉殿光中認赭袍下直笑談多樂事平時罇酒屬吾曹羨君年少才無敵顧我雖衰飲尚豪

暮春書事呈四舍人

樹陰初合苔生暈花藥新成蜜滿脾鸞燕各歸巢嘯子蛙魚共樂雨添池少年春物今如此老病衰翁了不知飽食杜門何所事日長偏與睡相宜

荷葉

池面風來波嫩嫩波間露下葉田田誰於水上張青蓋罩却紅粧唱採蓮

小池

深院無人鏤曲池莓苔繞岸兩生衣綠萍合處蜻蜓立紅蓼開時蝶飛

釣者

風牽釣線長竿短笠輕蓑細草間春雨濛濛看不見一作足水烟

埋却面前山

霜

一夜新霜著瓦輕
芭蕉心折敗荷傾
奈寒惟有東籬菊
金蕊繁開曉更清

牛

日出東籬黃雀驚
雪銷春動草芽生
土坡平慢陂田闊
橫載童兒帶犢行

送劉虛白二首

秘訣誰傳妙若神
能將題品徧朝紳
因言禍福兼忠孝
吾愛君平善誨人

我嗟羶鎖若牽拘
久羨南山去結廬
自顧豈勞君借譽
偶然章服裹猿狙

劉丞相挽詞二首

南國鄰鄉邑東都
並備遊賜袍聯唱
第命相見封侯念
昔趨黃閣相看笑
白頭感衰同俯仰
旌旆送山邱

連章相府辭榮寵
擁旆名都出鎮臨
年少已推能宰社
鄉人終不見揮金
長蛟息浪歸帆穩
喬木生烟蔽日深
昔家庭敦敦友愛
可憐松檟亦連陰

寄大名程資政琳

龍門長恨晚方登
便以忘年接後生
談劇每容陪玉塵
飲豪常憶困金觥
冰開御水春應綠
雲破淮天月自明
醉倒離筵聽別曲
醒來猶尙記餘聲

東齋對雪有懷

東齋坐客飲方豪
誰報風簾雪已飄
貪聽罇前歌裊裊
不聞牕外響蕭蕭
已憐殘臘催梅藥
更約新春探柳條
共憶瀛洲人獨立
神仙清景正寥寥

雪後玉堂夜直

雪壓宮牆鏤禁城
沉沉樓殿景尤清
玉堂影亂燈交晃
銀闕光寒夜自明
塵暗圖書愁獨直
人閑鈴索久無聲
鑿坡地峻誰能到
莫惜宮壺酒屢傾

官舍假日書懷奉呈子華內翰長文原甫景仁舍人聖俞博

士

鎖印春風雪入簾
天寒鳥雀聚空齋
青幡受歲兒童喜
白髮催人老病添
豔舞回腰飛玉盞
清吟擁鼻對冰蟾
相從一笑兩莫得
鐘領區區嘆米鹽

酬王君玉中秋席上待月值雨

池上雖然無皓魄
罇前殊未減清歡
綠醅自有寒中力
紅粉尤宜燭下看
羅綺塵隨歌扇動
管絃聲雜雨荷乾
客舟閑臥王夫子
詩陣教誰主將壇

中秋不見月問客

試問玉蟾寒皎皎
何如銀燭亂熒熒
不知桂魄今何在
應在吾家紫石屏

張仲通示墨竹詞以嘉一作佳篇豈勝欽玩聊以四韻仰酬

厚貺

數竿蒼翠寫生綃
寄我公齋伴寂寥
不待雪霜常一作長凜凜
雖無風雨自蕭蕭
嗟予心志俱憔悴
羨子文章騁一作足富饒
詞以嘉一作佳篇誠厚貺
遠慚爲報乏瓊瑤

奉寄襄陽張學士兄

東津滌水南山色
夢寐襄陽二十年
子昔遊漢上嘗愛其山川
迨今十六七年矣
願我百憂今白首
羨君千騎若登仙
花開漢女游堤上人看
仙翁擁道邊
况有玉鍾應不負
夜槽春酒響如泉

奉答聖俞宿直見寄之作

寒夜分曹直嚴城隔幾層子慚批鳳詔一作諾君歎守營燈病骨羸
漳浦官書蠹羽陵無嫌學舍冷文字比清冰

和原甫舍人閣下午寢歸有作

遙知好睡紫微郎枕簟清薰綠蕙芳五色詔成人不到萬年風動閣
生涼平時下直歸宜早陋巷相過意未忘楊子不煩多載酒主人猶
可具一作其黃梁

聞原甫久在病告有感

東城移疾久離居安得疑她意盡祛諸老何為譏賈誼君王猶未識
相如浮沉俗喜隨時態磊落材多與世疎誰謂文章金馬客轡同懽
悴楚二閭

試筆

試筆消長日就書遺百憂餘生得如此萬事復何求黃犬可為戒白
雲當自由無將一坏土欲塞九河流

齋宮感事寄原甫學士

曾向齋宮詠麥秋綠陰佳樹覆牆頭重來滿地新霜葉却憶初聞黃
栗留

戲答仲儀口號

弊居回看如蛙穴華宇來棲若鸞身寄宿人家敢望笙歌行樂事只
憂無米過來春今年遠近大水稼穡何望

觀龍圖閣二聖御書應制

層構嚴清禁披圖爛寶文虹蜺光照物龍鳳勢騰雲妙極功歸一真
隨體自分孝思遵寶訓聖業廣惟勳

題東閣後集一作題管邱集後

東閣三朝多大事管邱二載足三字一作兩郡半閑辭近詩留作歸
榮集何日歸田自集詩

日長偶書

日長漸覺逍遙樂何況終朝無事人安得遂為無事者人間萬慮不
關身

寄答王仲儀太尉素

豐樂山前一醉翁餘齡有幾百憂攻平生自恃一作是心無媿直道
誠知世不容換骨莫求丹九轉榮名豈在祿千鍾明年今日如尋我
頹水東西問老農

解官後答韓魏公見寄

報國勤勞已屢聞終身榮遇最無倫老為南畝一夫去猶是東宮二
品臣侍從籍通清切禁笑歌行作太平民欲知念舊君恩厚二者難
兼始兩人新制推恩致仕許依舊兼職自王仲儀始今某仍出特恩

余昔留守南都得與杜祁公唱和詩有答公見贈二十韻之
卒章云報國如乖願歸耕寧買田期無辱知己肯逐利名還

遠今二十有二年祁公捐館亦十有五年矣而余始蒙恩得
遂退休之請追懷平昔不勝感涕輒為短句真公祠堂

掩涕發陳編追思二十年門生今白首墓木已蒼烟報國如乖願歸
耕寧買田此言今始踐知不愧黃泉

答端明王尚書見寄兼簡景仁文裕二侍郎二首

日久都城車馬喧豈知風月屬三賢唱高誰敢投詩社行處人爭看
地仙酒面撥醅浮大白舞腰催拍趁繁絃與公等是休官者方把鋤
犂學事田

多病新還太守章歸來白首與何長琴書自是千金產日月閑銷百
刻香尚有俸錢沽美酒自栽花圃趁新陽醉翁生計今如此一笑何
時共一觴

寄題景純學士藏春塢新居

清才四紀擅時名晚卜邱林遂解纓欲借青春藏向此須知白首尚
多情水浮花出人間去山近雲從席上生漫一作謾說市朝堪大隱

仙家誰信在重城

會老堂

古來交道愧難終此會今時豈易逢出處三朝俱白首凋零萬木見
青松公能不遠來千里我病猶堪醜一鍾已勝山陰空興盡且留歸
駕爲從容

叔平少師去後會老堂獨坐偶成

積雨荒庭徧綠苔西堂瀟灑爲誰開愛酒少師花落去彈琴道士月
明來鷄啼日午衡門靜鶴唳風清畫夢回野老但欣南畝伴豈知一
作華高名籍在蓬萊

退居述懷寄北京韓侍中二首

悠悠身世比浮雲白首歸來賴水濱會看元臣調鼎鼎却尋田叟問
耕耘一生勤苦書千卷萬事銷磨酒百分放浪豈無方外士尚思親
友念雜羣

友念雜羣

青殿宮臣寵並叨不同憔悴返漁樵無窮興味閑中得強半光陰醉
裏銷靜愛竹時來野寺獨尋春偶過溪橋猶須五物稱居士不及顏
回飲一瓢

贈潘道士

門無車轍紫苔侵雞犬蕭條陋巷深寄語彈琴潘道士雨中尋得越
江吟

答樞密吳給事見寄

老得閑來興味長問將何事送餘光春寒擁被三竿日宴坐忘言一
炷香報國愧無功尺寸歸田仍值歲豐穰樞密任重才餘暇猶有新
篇寄草堂

答判班孫待制見寄

三朝羸寵幸逢辰晚節恩深許乞身無用物中仍老病太平時得作
閑人鳴琴酌酒留嘉客引水栽花過一春惟恨江淹才已盡難酬開

府甸清新

初夏西湖

積雨新晴漲碧溪偶尋行處獨依依綠陰黃鳥春歸後紅藕青苔人
跡稀萍匝汀洲魚自躍日長欄檻燕交飛林僧不用相迎送吾欲臺
頭坐釣磯

寄河陽王宣徽

誰謂蕭條賴水邊能令嘉客少留連肥魚美酒偏宜老明月清風不
用錢况值湖園方首夏正當櫻筍似三川自知不及南都會勉強猶
須詫短篇

寄韓子華并序

余與韓子華長文禹玉同直玉堂書約五十八歲致仕子華書於柱
上其後荐蒙恩寵世故多難歷任三朝備位二府已過限七年方能
乞身歸老俗諺云也賣弄得過裏

釣竿

人事從來無處定世塗多故踐言難誰如賴水閑居士十頃西湖一
釣竿

戲劉原甫見蔡條西清詩話已下續添

平生志業有誰先落筆文章海內傳昨日都城應紙貴開簾却扇見
新篇

仙家千載一何長

浮世空驚日月忙洞裏新花莫相笑劉郎今是老
劉郎

和子履遊泗上雍家園子履姓陳

長橋南走羣山間中有雍子之名園蒼雲蔽天竹色淨暖日撲地花
氣繁飛泉來從遠嶺背林下曲折寒波翻珍禽不可見毛羽數聲清
絕如哀彈我來據石弄琴瑟惟恐日暮登歸軒塵紛解刺耳目異祇
疑夢入神仙村知君襟尚我同好作詩閑放莫可攀高篇絕景兩不
及久之想像空冥煩

右雍家園詩吉綿閣本皆入公外集而王荆公四家詩選亦有之
今乃載蘇子美滄浪集後人安得不疑或謂公親作滄浪集序不
應誤雜己詩可以無疑姑附見於此按王荆公取公詩凡一百二
十五首內一百三首載居士集二十一首載外集又一篇卽此詩
其它或全改一聯或增減一聯甚者至增四聯或移兩聯之類已
注一作於逐篇豈當時傳本不同抑荆公自家潤色也

外集卷第七

古賦雜文五首附

紅鸚鵡賦并序

聖俞作紅鸚鵡賦以謂禽鳥之性宜適於山林今茲鸚鵡徒事言語文章以招累見囚禁中曾為鸞雞雜之不若也謝公學士復多鸚鵡之才故能去昆夷之賤有金闈玉堂之安飲泉啄實自足為樂作賦以反之夫適物理窮天真則聖俞之說勝負才賢一作賢才以取貴於世而能自將所適皆安不知籠檻之於山林則謝公之說勝某始得二賦讀之釋然知世之賢愚出處各有理也然猶疑夫鸞禽之腹一作賦中或有未盡者因拾二賦之餘棄也以代鸞畢其說

后皇之載兮殊方異類肖翹蠢息兮厥生成遂鎔挺賦予兮有物司之泊然後化兮默運其機陶形播氣兮小大取足紛不可狀兮千名萬族異物珍恠兮託產遐陬來海裔兮貴中州逸丹山於荒極越鳳皇之所宅稟南方之正氣孕赤精於火德蓋以氣而召類兮故感生而同域播為我形特殊其質不緣以文而丹其色物既賤多而貴少兮世亦安常而駭異豈負美以求兮適遭時之我貴客方黜我以文采弔我於籠樊謂夫飛鳴而飲啄不若雞鶩與烏鸞噫不知物有貴賤殊乎所得工一作天初造我甚難而畜千毛億羽曾無其一忽然成形可異而珍慧言美質俾貴於人籠軒寶翫翔集安馴彼衆禽之擾擾兮蓋迹殊而趣乖既心昏而質陋兮乃自穢而安卑樂以鍾鼓宜其眩悲蓋貴我之異稟何樂我於羣飛若夫生以才天養以性違客之所悼我亦悼之我視乎世猶有甚兮郊穢牢豕龜文象齒蚌蛤之胎犛牛之尾既殘厥形又奪其生是猶大為非以自營人又不然謂為最靈淳和質靜本湛而寧不守爾初自為巧智鑿竅泄和漓淳雜偽衣羔染夏強華其體鞭扑走趨自相械擊天不汝文而自文之天不汝勞而自勞之役聰與明反為物使用精既多速老招累侵

生豔性豈毛之罪又聞古初人禽雜處機萌乃心物則遁去探兮則網高兮則弋為之職誰而反予是責

述夢賦

夫君去我而何之乎時節逝兮如波昔共處兮堂上忽獨棄兮山阿嗚呼人羨久生生不可久死其奈何死不可復惟可以哭病子喉使不得哭兮况欲施乎其他憤既不得與擊而俱發兮獨飲恨而悲歌歌不成兮斷絕淚疾下兮滂沱行求兮不可過疑是遇字坐思兮不知處可見惟夢兮奈寐少而寤多或十寐而一見兮又若有而若無乍若去而若來忽若親而若疎杳兮倏兮猶勝於不見兮願此夢之須臾尺蠖憐子兮為之不動飛蠅閱子兮為之無聲冀駐君兮可久况子夢之先驚夢一斷兮魂立斷空堂耿耿兮華燈世之言曰死者斯也今之來兮是也非也又曰覺之所得者為實夢之所得者為想苟一慰乎予心又何一作可較乎真妄綠髮兮思君而白豐肌兮以君而瘠君之意兮不可忘何憔悴而云惜願日之疾兮願月之遲夜長於晝兮無有四時雖音容之遠矣於恍惚以求之

荷花賦

步蘭塘以清暑兮颯蘋風以中人擷杜若之春榮兮攀芙蓉於水濱嘉丹葩之耀質出淥水而含新蔭曲池之清泚漾波紋之齋淪披紅衣而耀彩寄清流以一作而託根挺無華之淺豔靡競麗乎先春抱生意以自得兮及薰時之嘉辰若夫夏一作下晚蘭衰夢池草密慘羣芳之已銷獨斯蓮之一作而適出可以嗅清香以析醒可以玩芳華而自逸况其晚浦煙霞水亭風日投文竿而餌垂萍莖而波溢蘇繁藕以全折杯卷荷而半側墜紫葩以飲煙釵紅芳而向夕可憐影兮相顧列金葩而返植清風遏以似起碧露合而乍失或兩兩以相扶漸亭亭而獨出發燕脂於此土生異香於西域匪江妃之小腰即廣陵之清一作青骨爾乃曲沼微陽橫塘細雨逐橋上之歸鞍笑

堤邊之游女墮虹梁而窺影倚風臺而欲舞覆翠被以薰香然犀燈而照浦雙心並根千株泣露湛月白而風清香池平而樹古送艇子於西州聞棹謳於北渚迎桃根而待檝逢宓妃而未渡迫而視之觀若星妃臨水而脈脈盈盈遠而望之杳如峽女行雲而朝朝暮暮其妖麗也其閑麗也香荃繞兮木蘭舟澹容與兮悵夷猶東西隨葉隱上下逐波浮已見雙魚能比目應笑鴛鴦會白頭昔聞妃子貴東鄰池上金花不染塵空留此日田田葉不見當時步步入

螟蠅賦并序

詩曰螟蠅有子螺贏負之言非其類也及楊子法言又稱焉嗟夫螟蠅一蟲爾非有心於孝義也能以非類繼之為子羽毛形性不相異也今夫為人父母生之養育劬勞非為異類也乃有不能繼其父之業者儒家之子卒為商世家之子卒為皂隸嗚呼所謂螟蠅之不若也作螟蠅賦詞曰

爰有桑蟲實曰螟蠅與夫螺贏異類殊形負以為子祝之以聲其子感之朝夕而成嗟夫人子父母所生父祝之言子莫之聽父傳之業子莫克承父沒母死身覆位傾嗚呼為人孰與蟲靈人不如蟲曷以人稱

辭

啄木辭

木皇司春兮物熙以春芽者斯勾兮甲者斯萌物賴皇兮榮以欣翳有蟲兮甚不仁穴皇木兮羣以聚穴不已兮又如咀皇木病兮毅將深皇心惻兮傷爾竭彼鷓鴣兮善啄吾利汝喙兮飢汝腹飛以鳴兮啄且食蟲不盡兮啄莫息山之麓兮水之濱皮堅節癭兮龍甲蛇鱗節流膏兮吻流血百不一兮徒飢渴蠹日滋兮鷲日苦京謁皇兮披雲路雲之深兮不可見記歸風兮仰訴古初之皇兮甚仁惠憐民愛物使兩遂穴民處兮鮮民食穴不棟梁兮鮮不薪米其求甚少兮給

之孔易野鬱鬱兮山蒼蒼土有毛髮兮山有衣裳金不韜治兮器不刃鉏木至老朽兮不見蓄殃聖萌機兮五財利贖有足兮生不匱蔽風避濕兮修容威廟祭室寢兮猶無異為帝何思之不熟兮忽生般而與倕丹雘之不已兮又以彫幾斜鉤曲闕兮華照欄梯高構峻兮目精眩地禿而赭兮山裸而寒材者傷死兮生者力殫一躬之庇兮一林夷族寓龍木馬兮重閣陰屋皇民暴嗇兮驅之以扑噫智巧兮誰為是既紛紛而不止工蠹則大兮蟲蠹則小捕小縱大兮將何謂皇惜木兮雖甚恩蟲利食兮啄徒動蠹未入口兮刃至其根與其啄蠹能盡死不如得啄匠手使不堪於斧斤

哭女師

暮入門兮迎我笑朝出門兮牽我衣戲我懷兮走而馳且覺夜兮不知四時忽然不見兮一日千思日難度兮何長夜不寐兮何遲暮入門兮何望朝出門兮何之恍惚在今杳難追髮兩毛兮秀雙眉不可見兮如酒醒睡覺追惟夢醉之時八年幾日兮百歲難期於汝有頃刻之愛兮使我有終身之悲

頌

會聖宮頌并序

西京留守推官將仕郎試祕書省校書郎臣歐陽修謹齋心滌慮頓首再拜言臣伏見國家采漢書原廟之制作宮于永安以備園寢欲以威陵邑之充奉昭祖宗之光靈以耀示于千萬世甚感德也修永惟古先王者將有受命之符必先興業造功以警動覺悟於元元然後有其位而繼體守文之君又從而顯明不大以纂修乎舊物故其兢兢勤勤不忘前人是以前深而葉茂德厚而流光子子孫孫承之無疆伏惟皇帝陛下以神聖至德傳有大器乾健而正離繼而明即位以來于茲十年勤邦儉家以修太平日朝東宮示天下孝親執遵豆三見於郊日星軌道光明清潤河不怒溢東南而流四夷承命歡

和以賓奔走萬里顧非有干戈告讓之命文移發召之期而犀珠象牙文馬數玉旅干闕庭納于廐府如司馬令無一後先至德之及格于天下極于地中浹於人而外冒於四表昆蟲有命之物無不仰戴神威聖功效見如此太祖創造基始克成厥家當天受命之功太宗征服綏來遂一海內睿武英文之業真宗禮樂文物以隆天聲升平告功之典陛下夙夜虔共嗣固鴻業纂服守成之勤基構累積顯昌昌益大而光稱于三后之意可謂至孝况春秋歲時以禘以禘則有廟祧之嚴配天昭孝以享以告則有郊廟明堂之位篆金刻石則有史氏之官歌功之詩一作歌詩之詠流于樂府象德之舞見乎羽毛惟是邦家之光祖宗之爲有以示民而垂無窮者固不宜著陛下承先烈昭孝思所以奉之以嚴罔不勤備聖人之德謂無以加而猶以爲未也乃復因陵園起宮室以望神游土木之功嚴而不華地爽而潔宇敞而邃神靈杳冥如來如宅合於禮經孝子警咳思親之義愚以謂宮且成非天子自臨享則不能以來三后之靈然郡國不見治道太僕不先整駕恬然未聞有司之詔豈難於動民而遲其咎疑耶特疑以龜筮所考須吉而後行耶不然何獨留意於屋牆構築而至於薦見孝享未之思耶况是宮之制夷山爲平外取客土鍛石伐木發兵胥靡調旁近郡如此數年而道路之民徒見輿爲之功恐愚無以識上意是宜不惜屬車之費無諱數日之勞沛然幸臨因展陵墓退而論民以孝思之誠遂見守土之臣采風俗以問高年亦堯舜之事也古者天子之出必有采詩之官而道路童兒之言皆得以聞臣是以不勝惓惓之心謹采西人望幸意作爲頌詩以獻闕下詞

曰

巍峨穹崇奠京之東有山而崧嶺淪道源匯流而淵有洛之川川靈山秀回環左右有高而阜其阜何名太祖太宗真宗之陵惟陵之制因山而起隱隱隆隆惟陵之氣常王而喜鬱鬱葱葱帝懷穹昊受命

我宋造初于屯帝念先烈用顧余家宣力以勤赫赫三后重基累構既豐而茂燕翼貽謀是惟永圖其傳在子曰祖曰宗有德有功子實嗣之克勤克紹以孝以報予敢不思惟此園陵先后之宅既宅且安后来游止弗宮弗室神何以驪迺相川原乃得善地地高惟邱迺以荆灼迺訊寶龜龜告曰猷帝命家臣而職我事而往惟寅一毫一絲給以縣官無取於民伐洛之薪陶洛之土瓦不病窳柯我之斧登我之山木好且堅家臣之來役夫萬名二年有成宮成翼翼在陵之側須后来格有門有宇有廊有廡有庭有序殿兮耽耽黼帷檐檐天威可瞻庭兮殖殖鉤盾虎戟容衛以飭太祖維祖太宗維弟真宗維子三聖疑疑有以正位于此而會聖今在天風馬雲車其來僂僂聖會于此靈威神馭其宮肅然聖既降矣其誰格之惟孝天子聖降當享其誰來薦亦孝天子孝既克祗而來胡遲其下臣修作頌風之

贊

有宋右諫議大夫贈開府儀同三司太師中書令兼尚書令魏國韓公國華真贊

氣剛而毅望之可畏色粹而仁近之可親有韞于中必見于外庶幾髣髴寫之圖繪惟其感德不可形容公德之豐後世之隆誰爲公子丞相衛公

章

州各急就章并序

敘曰古者史掌文書以識天地四方古今事物名言字訓而教學之法始於童子謂之小學君子重焉急就章者漢世有之其源蓋出於小學之流昔顏籀爲史游序之詳矣余爲學士兼職史官官不坐曹居多暇日每自娛於文字筆墨之間因戲集州各作急就章一篇以示兒女曹庶幾賢於博塞爾章曰

別州自禹郡於秦廢置經革難具陳皇家垂統天下定疆理萬方承

政令近征遠賁各有宜或異吏治或羈縻九域披圖指可知分音比
類慎訛疑文差字析極精微若夫錦居遐裔孤音無比隰集梓泗劍
陝涪幽駢聲相附可如類求則有變綏隨果賀播滑達越和河羅連
三前叶其四謂何乃有瓜沙嘉巴鳳隴雍宋欽峽合疊溜資思師化
雅華夏寶吉蔚悉永郢鼎賴不宜吃訥又如保邵道趙耀鄆信潤晉
慎凡五聲而一韻柳壽茂寶有湊憲克漢簡萬演海岱解蔡泰愛欽
潯金深郴黔蜀濮福睦復陸乃六律而同音七言惟一白澤號石益
德壁八音相望廣象相闐句絳獎黨宕句開萊台懷句階崖雷梅句
澧 莫利句濟薊費習句鄧鄧定孟句慶應靜勝句廉潭儋南句嵐
鹽甘崑句至於許汝發處句楚普潞敘古句魏惠桂貴句遂具端萬
會句言過乎九難宣於口於是有岳鄂毫薄洛句莫涿朔廓拓句眉
黎齊池斬句施伊西夷溪句濠曹饒昭韶句潮遼交洮牢句右皆十
叩通龍洪蓬蒙句豈同戎忠松龍句右上一連綿澶安延丹端句宣
檀離蘭潘田戀句湖蘇舒滁廬渝瀘句梧蒲徐廊扶儒禹句右皆十
四秦邠麟汾句均陳温春句筠辰文循句銀雲動岷句杭揚江黃句
常漳康襄句房坊商滄句詳昌壤長句右皆十六并青瀛澄成明句
衡彭英瓊邪洛句涇寧昇榮橫滕句汀興營平庭澄句右二十四聯
章斷句不能遽數真定河源以諱不舉若乃物有疑似同音異字則
有陵靈原袁府撫乾虔濱賓融容渭衛全泉繡秀易翼渠衢歸嬌龔
恭汴辨涼梁祁岐鄴單宿肅滋茲維維峯封暨豐沂宜及儀乃一號
而三之音或不同相近者亦借以足之劍環恩順鎮霸真雄又音文
之兩同至於太平鬱林萬安平琴武安洮陽新定建康二名雖美遠
小不彰若監若軍四十有六保定信安廣信安肅鎮戎保安岢嵐火
山順安寧化實控三邊其餘瑣瑣皆不足言其後因檢九域圖有高
富瀧當四州偶遺不錄以文句難移不復增入也

外集卷第九 集五十九

論時論三首附

本論本論三篇中下篇已載居十集第十七卷此乃公晚年

所刪上篇

天下之事有本末其爲治者有先後堯舜之書略矣後世之治天下未嘗不取法於三代者以其推本末而知所先後也三王之爲治也以理數均天下以爵地等邦國以井田域民以職事任官天下有定數邦國有定制民有定業官有定職使下之共上勤而不困上之治下簡而不勞財足於用而可以備天災也兵足以禦患而不至於爲患也凡此具矣然後飾禮樂興仁義以教道之是以其政易行其民易使風俗淳厚而王道成矣雖有荒子孱孫繼之猶七八百歲而後已夫三王之爲治豈有異於人哉財必取於民官必養於祿禁暴必以兵防民必以刑與後世之治者大抵同也然後世常多亂敗而三王獨能安全者何也三王善推本末知所先後而爲之有條理後之有天下者孰不欲安且治乎用心益勞而政益不就認認然常恐亂敗及之而輒以至焉者何也以其不推本末不知先後而於今之務衆矣所當先者五也其二者有司之所知其三者則未之思也足天下之用莫先乎財繫天下之安危莫先乎兵此有司之所知也然財豐矣取之無限而用之無度則下益屈而上益勞兵強矣而不知所以用之則兵驕而生禍所以節財用兵者莫先乎立制制已具備兵已可使財已足用所以共守之者莫先乎任人是故均財而節兵立法以制之任賢以守法尊名以厲賢此五者相爲用有天下者之常務當今之世所先而執事者之所忽也今四海之內非有亂也上之政令非有暴也天時水旱非有大故也君臣上下非不和也以是然至廣之天下無一間隙之端而南夷敢殺天子之命吏西夷敢有崛疆之王北夷敢有抗禮之帝者何也生齒之數日益衆土地之產日

益廣公家之用日益急四夷不服中國不尊天下不實者何也以五者之不備故也請試言其一二方今農之趣耕可謂勞矣工商取利乎山澤可謂勤矣上之征賦權易商利之臣可謂纖悉而無遺矣然一遇水旱如明道景祐之間則天下公私乏絕是無事之世民無一歲之備而國無數年之儲也以此知財之不足也古之善用兵者可使之赴水火今廂禁之軍有司不敢役必不得已而暫用之則謂之借債彼兵相謂曰官債我而官之文符亦曰債夫賞者所以酬勞也今以大禮之故不勞之賞三年而一徧所費八九百萬有司不敢緩月日之期兵之得賞不以無功知媿乃稱多量少比好嫌惡小不如意則羣聚而呼持挺欲擊天子之大吏無事之時其猶若此以此知兵驕也夫財用悉出而猶不足者以無定數也以疑兵之敢驕者以用之未得其術以此知制之不立也夫財匱兵驕法制未一而莫有奮然忘身許國者以此知不任人也不任人者非無人也彼或挾材蘊知特以時方惡人之好名各藏蓄收斂不敢奮露惟恐於名以犯時人所惡是以人人變賢爲愚愚者無所責賢者被譏疾遂使天下之事將弛廢而莫敢出力以爲之此不尙名之弊者天下之最大患也故曰五者之皆廢也前曰五代之亂可謂極矣五十三年之間易五姓十三君而亡國被弑者八長者不過十餘歲甚者三四歲而亡夫五代之主豈皆愚者邪其心豈樂禍亂而不欲爲久安之計乎顧其力有不能爲者時也當是時也東有汾晉西有岐蜀北有強胡南有江淮閩廣吳越荆潭天下分爲十三四面環之以至狹之中國又有叛將強臣割而據之其君天下者類皆爲國日淺威德未洽強君武主力而爲之僅以自守不幸孱子懦孫不過一再傳而復亂敗是以養兵如兒子之啖虎狼猶恐不爲用尙何敢制以殘弊之民人贍無費之征賦頭會箕斂猶恐不足尙何曰節財以富民天下之勢方若弊廬補其奧則隔壞整其楨則棟傾枝撐扶持苟存而已尙

何暇法象規圍矩方而爲制度乎是以兵無制用無節國家無法度一切苟且而已今宋之爲宋八十年矣外平僭亂無抗敵之國內削方鎮無強叛之臣天下爲一海內晏然爲國不爲不久天下不爲不廣也語曰長袖善舞多錢善買言有資者其爲易也方今承三聖之基業据萬乘之尊名以有四海一家之天下盡大禹貢賦之地莫不內輸惟上之所取不可謂乏財六尺之卒荷戈勝甲力穀五石之弩彎二石之弓者數百萬惟上制而令之不可謂乏兵中外之官居職者數千員官三班吏部常積者又數百三歲一詔布衣而應詔者萬餘人試禮部者七八千惟上之擇不可謂乏賢民不見兵革於幾四十年矣外振兵武攘夷狄內修法度興德化惟上之所爲不可謂無暇以天子之慈聖仁儉得一二明智之臣相與而謀之天下積聚可如文景之富制禮作樂可如成周之盛奮發威烈以耀名譽可如漢武帝唐太宗之顯赫論道德可與堯舜之治然而財不足用於上而下已弊兵不足威於外而敢驕於內制度不可爲萬世法而日益叢雜一切苟且不異五代之時此甚可嘆也是所謂居得致之位當可致之時又有能致之資然誰憚而久不爲乎

正統論七首此七論公後刪爲三篇已載居士集第十六卷今所載蓋初本也

原正統論

傳曰君子大居正又曰王者大一統正者所以正天下之不正也統者所以合天下之不一也由不正與不一然後正統之論作堯舜之相傳三代之相代或以至公或以大義皆得天下之正合天下於一是以君子不論也其帝王之理得而始終之分明故也及後世之亂僭僞興而盜竊作由是有居其正而不能合天下於一者周平王之有吳徐是也有合天下於一而不得居其正者前世謂秦爲閔是也由是正統之論興焉自漢而下至于西晉又推而下之爲宋齊梁陳

自唐而上至於後魏又推而上之則爲夷狄其帝王之理舛而始終之際不明由是學者疑焉而是非不公非其不公蓋其是非之難也自周之亡迄于顯德實千有一百一十三年之間或理或亂或取或傳或分或合其理不能一概是以論者於此而難也大抵其可疑之際有四其不同之說有三此論者之所病也何謂可疑之際周秦之際也漢魏之際也東晉後魏之際也朱梁後唐之際也秦魏得周而一天下其迹無異禹湯而論者黜之其可疑一也王莽得漢而天下一莽不自終其身而漢復興論者曰僞宜也魏得漢而天下三分論者曰正統其可疑二也以東晉承西晉則無終以周隋承元魏則無始其可疑三也梁之取唐無異魏晉而梁爲僞劉備漢之後裔以不能一天下而自別稱蜀不得正統可也後唐非李氏未嘗一天下而正統得之其可疑四也何謂不同之說三有味者之論有自私之論有因人之論正統之說肇於誰乎始於春秋之作也當東周之遷王室微弱吳徐並僭天下三王而天子號令不能加於諸侯其詩下同於列國天下之人莫知正統仲尼以爲周平雖始衰之王而正統在周也乃作春秋自平王以下常以推尊周室明正統之所在故書王以加正月而繩諸侯王人雖微必加於上諸侯雖大不與專封以天加王而別吳楚刺譏褒貶一以周法凡其用意無不在於尊周而後之學者不曉其旨遂曰黜周而王魯或曰起魯隱之不正或曰起讓國之賢君泥其說於私魯殊不知聖人之意在於尊周以周之正而統諸侯也至秦之帝既非至公大義因悖棄先王之道而自爲五勝之說漢興諸儒既不明春秋正統之旨又習秦世不經之說乃欲尊漢而黜秦無所據依遂爲三統五運之論詆秦爲閔而黜之夫漢所以有天下者以至公大義而起也而說者直曰以火德當天統而已甚者至引蚩龍之妖以爲左驗至於王莽魏晉直用五行相勝而已故曰昧者之論也自西晉之滅而南爲東晉宋齊梁陳北爲後魏後

周隋私東晉者曰隋得陳然後天下則推其統曰晉宋齊梁陳隋私後魏者曰統必有所授則正其統曰唐授之隋隋授之後周後周夷故曰自私之論也夫梁之取唐無異魏晉之取也魏晉得爲正則梁亦正矣而獨曰僞何哉以有後唐故也彼後唐者初與梁爲世仇及唐之滅欲借唐爲名託大義以窺天下則不得不指梁爲僞而爲唐討賊也而晉漢承之遂因而不改故曰因人之論也以不同之論於可疑之際是以是非相攻而罕得其當也易曰天下之動正夫一夫帝王之統不容有二而論者如此然摺紳先生未嘗有是正之者豈其興廢之際治亂之本難言歟自春秋之後述者多焉其通古今明統類者希矣司馬子長列序帝王而項羽亦爲本紀此豈可法邪文中子作元經欲斷南北之疑也絕宋於元徽五年進魏於大和元年是絕宋不得其終進魏不得其始夫以子長之博通王氏之好學而有不至之論是果難言歟若夫推天下之至公據天下之大義究其興廢迹其本末辨其可疑之際則不同之論息而正統明矣

明正統論

凡爲正統之論者皆欲相承而不絕至其斷而不接則猥以假人而續之是以其論曲而不通也夫居天下之正合天下於一斯正統矣堯舜三代秦漢晉唐天下雖不一而居得其正猶曰天下當正於吾而一斯謂之正統可矣東周亂五代始雖不得其正卒能合天下於一夫一天下而居其上則是天下之君矣斯謂之正統可矣如隋是也天下大亂其上無君僭竊並興正統無屬當是之時奮然而起並爭乎天下東晉後魏有功者強有德者王威一作盛澤皆被子生民號令皆加乎當世幸而以大并小以強兼弱遂合天下於一則大且強者謂之正統猶有說焉不幸而兩立不能相兼考其迹則皆正較其義則均焉則正統者將安與乎其或終始不得其正又不能合天

下於一則可謂之正統乎不可也然則有不幸而丁其時則正統有時而絕也夫所謂正統者萬世大公之器也有得之者有不得之者而論者欲其不絕而猥以假人故曰曲而不通也或曰可絕則王者之史何以繫其年乎曰欲其不絕而猥以假人者由史之過也夫居今而知古書今世以信乎後世者史也天下有統則爲有統書之天下無統則爲無統書之然後史可法也昔周厲王之亂天下無君周公邵公共行其政十四年而後宣王立是周之統嘗絕十四年而復續然爲周史者記周邵之年謂之共和而太史公亦列之於年表漢之中衰王莽篡位十有五年而敗是漢之統嘗絕十五年而復續然爲漢史者載其行事作王莽傳是則統之絕何害於記事乎正統萬世大公之器也史者一有司之職也以萬世大公之器假人而就一有司之記事或亦甚矣夫正與統之爲名甚尊而重也堯舜三代之得此名者或以至公或以大義而得之也自秦漢而下喪亂相尋其興廢之迹治亂之本或不由至公大義而起或由焉而功不克就是以正統屢絕而得之者少也正統之說曰堯舜夏商周秦漢魏晉而絕由此而後天下大亂自東晉太建之元年止陳正明之二年凡二百餘年其始也有力者並起而爭因時者苟偷而假冒奮攘敗亂不可勝紀其略可紀次者十六七家既而以大并小以強兼弱久而稍稍并合天下猶分爲四東晉宋齊梁陳又自分爲後梁而爲二後魏後周隋又自分爲東魏北齊而爲二是四者皆不得其統其後後周并北齊而授之隋隋始并後梁又并陳然後天下合爲一而復得其統故自隋開皇九年復正其統曰隋唐梁後唐晉漢周夫秦自漢而下皆以爲閔也今乃進而正之作秦論魏與吳蜀爲三國陳壽不以魏統二方而並爲三志今乃黜二國進魏而統之作魏論東晉後魏議者各以爲正也今皆黜之作東晉論後魏論朱梁四代之所黜也今進而正之作梁論此所謂辨其可疑之際則不同之論息而正統

明者也

秦論

謂秦為閭者誰乎是不原本末之論也此漢儒之私說也其說有三不過曰滅棄禮樂用法嚴苛與其興也不當五德之運而已五德之說非聖人之言曰昧者之論詳之矣其二者特始皇帝之事爾然未原秦之本末也昔者堯舜夏商周秦皆出於黃帝之苗裔其子孫相代而王堯傳於舜舜傳於禹禹之衰也湯代之王商之衰也周代之王周之衰也秦代之王其興也或以德或以功大抵皆乘其弊而代之初夏世衰而桀為昏暴湯救其亂而起稍治諸侯而誅之其書曰湯征自葛是也其後卒以放桀而滅夏及商世衰而紂為昏暴周之文武救其亂而起亦治諸侯而誅之其詩所謂崑崙共密是也其後卒攻紂而滅商推秦之興其德固有優劣而其迹豈有異乎秦之紀曰其先大業出於顓頊之苗裔至孫伯翳佐禹治水有功唐虞之間賜姓嬴氏及非子為周養馬有功秦仲始為命大夫而襄公與立平王遂受岐豐之賜當是之時周衰固已久矣亂始於穆王而繼以厲幽之禍平王東遷遂同列國而齊晉大侯魯衛同姓擅相攻伐共起而弱周非獨秦之暴也秦於是時既平犬夷因取周所賜岐豐之地而繆公以來始東侵晉地至于河盡滅諸戎拓國千里其後關東諸侯強僭者日益多周之國地日益蹙至無復天子之制特其號在爾秦昭襄五十二年周之君臣稽首自歸於秦至其後世遂滅諸侯而一一作有天下此本末之迹也其德雖不足而其功力尚不優於魏晉乎始秦之興務以力勝至於始皇遂悖棄先王之典禮又自推水德益任法而少恩其制度文為皆非古而自是此其所以見黜也夫始皇之不德不過如桀紂桀紂不能廢夏商之統則始皇未可廢秦也

魏論

新與魏皆取漢者新輒敗亡魏遂傳數世而為晉不幸東漢無賢子孫而魏為不討之讎今方黜新而進魏疑者以謂與魏而進惡此不可以不論也昔三代之興也皆以功德或積數世而後王其亡也衰亂之迹亦積數世而至於大壞不可復支然後有起而代之者其興也皆以至公大義為心然成湯尚有慚德伯夷叔齊至取食周粟而餓死况其後世乎自秦以來興者以力故直較其迹之逆順功之成敗而已彼漢之德自安和而始衰至桓靈而大壞其衰亂之迹積之數世無異三代之亡也故豪傑並起而爭而強者得之此直較其迹爾故魏之取漢無異漢之取秦而秦之取周也夫得正統者漢也得漢者魏也得魏者晉也晉嘗統天下矣推其本末而言之則魏進而正之不疑

東晉論

周遷而東天下遂不能一然仲尼作春秋區區於尊周而明正統之所在晉遷而東與周無異而今黜之何哉是有說焉較其德與迹而然爾周之始與其來也遠當其盛也瓜分一作規方天下為大小之國眾建諸侯以維王室定其名分使傳子孫而守之以為萬世之計及厲王之亂周室無君者十四年而天下諸侯不敢僥倖而窺周於此然後見周德之深而文武周公之作真聖人之業故雖天下無君而正統猶在不得而改况一有平字乎王之遷國地雖蹙然周德之在人者未厭而法制之臨人者未移乎王以子繼父自西而東不出王畿之內西周之地八百里東周六百里以井田之法計之通為千里之方則正統之在周也推其德與迹可以無疑夫晉之為晉與夫一一作乎周之為周也異矣其德法之維天下者非有萬世之計聖人之業也直以其受魏之禪而合天下於一推較其迹可以曰正而統爾自惠帝之亂晉政已亡愍懷之間晉如綫爾惟嗣君繼世推其迹曰正焉可也建興之亡晉於是而絕矣夫周之東也以周而東晉之

南也豈復以晉而南乎自愍帝死賊庭現邪起江表位非嗣君正非繼世徒以晉之臣子有不忘晉之心發於忠義而功不就可爲傷已若因而遂竊萬世大公之名其可得乎春秋之法君弑而賊不討則以爲無臣子也使晉之臣子遭乎聖人適當春秋之責况欲以失國共立之君干天下之統哉夫道德不足語矣直推其迹之如何爾若乃國已滅矣以宗室子自立於一方卒不能復天下於一則晉之琅邪與夫後漢之劉備五代漢之劉崇何異備與崇未嘗爲正統則東晉可知焉爾

後魏論

魏之興也自成帝毛至于聖武凡十二世而可紀於文字又十一世至于昭成而建國改元略具君臣之法幸遭衰亂之極得奮其力並爭乎中國又七世至于孝文而去夷即華易姓建都遂定天下之亂然後修禮樂與制度而文之考其漸積之基其道德雖不及於三代而其爲功何異王者之興今特以其不能并晉宋之一方以小不備而黜其大功不得承百王之統而不疑焉者質諸聖人而可也今爲魏說者不過曰功多而國強爾此聖人有所不與也何以知之以春秋而知也春秋之時齊桓晉文可謂有功矣吳楚之僭迭強於諸侯聖人於書齊晉實與而文不與之以爲功雖可褒而道不可以與也至書楚與吳或屢進之然不得過乎子爵則功與強聖人有所不取也或者以謂秦起夷狄以能滅周而一天下遂進之魏亦夷狄以不能滅晉宋而見黜是則因其成敗而毀譽之豈至公之篤論乎曰是不然也各於其黨而已周之興也與秦之興其說固已詳之矣當魏之興也劉淵以匈奴慕容以鮮卑苻生以氐成仲以羌赫連秀髮石勒季龍之徒皆四夷之雄其力不足者弱有餘者強其最強者苻堅之時自晉而外天下莫不爲秦休兵革興學校庶幾刑政之方不幸未幾而敗亂其後一作又強者曰魏自江而北天下皆爲魏矣幸而

傳數世而後亂以是而言魏者纔優於苻堅而已就使魏興世遠不可猶格之夷狄則不過爲東晉比也是皆有志乎天下而功不就者前所謂不幸兩立而不能相并者故皆不得而進之者不得已也

梁論

黜梁爲僞者其說有二一曰後唐之爲唐猶後漢之爲漢梁蓋新比也一曰梁雖改元即位而唐之正朔在李氏而不絕是梁於唐未能絕而李氏復興一曰因後唐而不改因後唐者是謂因人之論固已辨矣其二者宜有說也夫後唐之自爲唐也緣其賜姓而已唐之時賜姓李者多矣或同臣子之異心或懷四夷而縻之忠臣茂正思忠克用是也當唐之衰克用與梁並起而爭之梁以強而先得克用取爭之不勝難忍臣敵一作服之慚不得不借唐以自託也後之議者胡謂而從之哉其所以得爲正統者以其得梁而然也使梁且不滅同光之號不過於河南則其爲唐與昇瓌等耳夫正朔者何王者所以加天下而同之於一之號也昔周之東其政雖弱而周猶在也故仲尼以王加正而繩諸侯者幸周在也當唐之亡天祐虛名與唐俱絕尙安所寓於天下哉使幸而有忠唐之臣不忍弃乎况於唐亡中於事理或可善其誠心若李氏者果忠唐而不忍弃乎况於唐亡託虛名者不獨李氏也王建稱之於蜀楊行密稱之於吳李茂正亦稱之於岐大抵不爲梁屈者皆自託於虛名也初梁祖奪昭宗於岐遂劫而東改天復四年爲天祐而克用與王建怒曰唐爲朱氏奪矣天祐非唐號也遂不奉之但稱天復至八年自以爲非復稱天祐此尤可笑者安得曰正朔在李氏乎夫論者何爲疑者設也堯舜三代之終始較然著乎萬世而不疑固不待論而明也後世之有天下者帝王之理或舛而始終之際不明則不可以不疑故曰由不正與不一然後正統之論興者也其德不足以道矣推其迹而論之庶幾不爲無據云

正統辨上

正統曰統天下而得其正故繫正焉統而不得其正者猶弗統乎爾繼周而後帝王自高其功德自代統而得其正者難乎其入哉必不得已而加諸人漢唐之主乎曰甚哉吾子之說其隘也以漢唐之威烈猶曰不得已而加之焉爲魏晉之主則將奈何乎曰不然是烏得苟加諸人一簞食一瓢飲其義弗直而取諸人君子且從而惡之以天下之廣而被乎太公之實苟非其人則闕之可已必若曰應天而順人則繼周之後桀紂之惡常多而湯武之仁義未嘗等也若是其苟加諸人何哉予以謂正統之不在人率與言神聖者相類必待擇人而後加焉是仁王義主不足貴而姦雄篡弒之臣得以濟也

正統辨下

秦之裔罪暴於桀莽煬方於紂漢唐之主仗義而誅變以取天下其可謂之正統歟猶未離乎憾也德不及湯武秦之得天下也以力不以德秦之亡仁義驅其人民以爭敵其任賢得人孰若漢唐之始也晉之承魏也以篡繼篡隋亦若是而徒禪云爾晉隋盜也或者以爲正統茲非誤歟魏以吳存至于晉而吳始滅或者又以魏爲正統愈誤矣自後魏東晉至于周陳五代或以義或以不義皆不能并天下聖人不生而暴僞代興名與實自重久矣必待後世之明者斷焉斷而不以其勢捨漢唐我宋非正統也

時論

原弊

孟子曰養生送死王道之本管子曰倉庫實而知禮節故農者天下之本也而王政所由起也古之爲國者未嘗敢忽而今之爲吏者不然簿書聽斷而已矣聞有道農之事則相與笑之曰鄙夫知賦斂移一作財用之爲急不知務農爲先者是未原爲政之本末也知務農而不知節用以愛農是未盡務農之方也古之爲政者上下相移用

以濟下之用力者甚動上之用力者有節民無遺力國不過費上愛其下下給其上使不相困三代之法皆如此而最備於周周之法曰井牧其田十而一之一夫之力督之必盡其所任一日之用節之必量其所入一歲之耕供公與民食皆出其間而常有餘故三年而餘一年之備今乃不然耕者不復督其力用者不復計其出入一歲之耕供公僅足而民食不過數月甚者場功甫畢歛糠粃而食秕稗或採橡實畜菜根以延冬春夫糠覈橡實孟子所謂狗彘之食也而卒歲之民不免食之不幸一水旱則相枕爲餓殍此甚可歎也夫三代之爲國公卿士庶之祿廩兵甲車牛之材用山川宗廟鬼神之供給未嘗闕也是皆出於農而民之所耕不過今九州之地也歲之凶荒亦時時而有與今無以異今固盡有嚮時之地而制度無過於三代者昔者用常有餘而今常不足何也其爲術相反而然也昔者知務農又知節用今以不動之農贖無節之用故也非徒不勤農又爲衆弊以耗之非徒不量民力以爲節一作已又直不量夫力之所任也何謂衆弊有誘民之弊有兼并之弊有力役之弊請詳言之今坐華屋享美食而無事者曰浮圖之民仰衣食而養妻子者曰兵戎之民此在三代時南畝之民也今之議者以浮圖並周孔之事曰三教不可以去兵戎曰國備不可以去浮圖不可並周孔不言而易知請試言之國家自景德罷兵三十三歲矣兵嘗經用者老死今盡而後來者未嘗聞金鼓識戰陣也生於無事而飽於衣食也其勢不得不驕惰今衛兵入宿不自持被而使人持之禁兵給糧不自荷而雇人荷之其驕如此况肯冒辛苦以戰鬪乎前日西邊之吏如高化軍齊宗舉兩用兵而一有兩字輒敗此其効也夫就使兵耐辛苦而能鬪戰惟耗農民爲之可也奈何有爲兵之虛名而其實驕惰無用之人也古之凡民長大壯健者皆在南畝農隙則教之以戰今乃大異一遇凶歲則州郡吏以尺度量民之長大而試其壯健者招之去爲禁兵

其次不及尺度而稍怯弱者籍之以爲廂兵一作軍吏招人多有賞而民方窮時爭投之故一經凶荒則所留在南畝者惟老弱也而吏方曰不收爲兵則恐爲盜噫苟知一時之不爲盜而不知其終身驕惰而竊食也古之長大壯健者任耕而老弱者游惰今之長大壯健者游惰而老弱者留耕也何相反之甚邪然民盡力乎南畝者或不免乎狗彘之食而一去爲僧兵則終身安佚而享豐腴則南畝之民不得不日減也故曰有誘民之弊者謂此也其耗之一端也古者計口而受田家給而人足井田既壞而兼井乃興今大率一戶之田及百頃者養客數十家其間用主牛而出己力者用己牛而事主田以分利者不過十餘戶其餘皆出產租而僑居者曰浮客而有畝田夫此數十家者素非富而畜積之家也其春秋神社婚姻死葬之具又不幸遇凶荒與公家之事當其乏時嘗舉賣一作債於主人而後償一作賣之息不兩倍則三倍及其成也出種與稅而後分之償二倍之息盡其所得或不能足其場功朝畢而暮乏食則又舉之故冬春舉食則指麥於夏而償麥償盡矣一無四字夏秋則指禾於冬而償也似此數十家者常食三倍之物而一戶常盡取百頃之利也夫主百頃而出稅賦者一戶盡力而輸一戶者數十家也就使國家有寬征薄賦之恩是徒益一家之幸而數十家者困苦常自如一作乏也故曰有兼井之弊者謂此也此亦耗之一端也民有幸而不役於人能自田而自耕者下自二頃至一頃皆以等書於籍而公役之多者爲大役少者爲小役至不勝則賤賣其田或逃而去故曰有力役之弊者謂此也此亦耗之一端也夫此三弊是其大端又有奇袤之民去爲浮巧之工與夫兼井商賈之人爲僭侈之費又有貪吏之誅求賦斂之無名其弊不可以盡舉也既不勸之使勤又爲衆弊以耗之大抵天下中民之士一作事富且一作真貴者化竊糶爲精善是一人常食五人之食也爲兵者養父母妻子而一作爲計其饋運之

費是一兵常食五農之食也爲僧者養子弟而自豐食是一僧常食五農之食也貧民舉倍息而食者是一人常食二人三人之食也天下幾何其不之也何謂不量民力以爲節方今量國用而取之民未嘗量民力而制國用也古者家宰制國用量入以爲出一歲之物三分之一以給公上一以給民食一以備凶荒今不先制乎國用而一切臨民而取之故有支移之賦有和糴之粟有入中之粟有和買之絹有雜料之物茶鹽山澤之利有權有征制而不足則有司屢變其法以爭毫末之利用心益勞而益不足者何也制不先定而取之無量也何謂不量天力之所任此不知水旱之謂也夫陰陽在天地間騰降而相推不能無愆伏如人身之有血氣不能無疾病也故善醫者不能使人無疾病瘵之而已善爲政者不能使歲無凶荒備之而已堯湯大聖不能使無水旱而能備之者也古者豐年補救之術三年耕必留一年之蓄是凡三歲期一歲以必災也此古之善知天者也今有司之調度用一作歲足一歲而已是期天歲歲不水旱也故曰不量天力之所任是以前二三歲連遭旱蝗而公私乏食是期天之無水旱卒而遇之無備故也夫井田什一之法不可復用於今爲計者莫若就民而爲之制要在下者盡力而無耗弊上者量民而用有節則民與國庶幾乎俱富矣今士大夫方共修太平之基頗推務本以興農故輒原其弊而列之以俟與利除害者採於有司也

兵儲疑

惟王建官各司其局雖有細大俾專董其權責其成功斯古制也被堅執銳乃裨校之事若屯田積穀在委辦吏爾而漢末有田禾將軍屯田北邊魏興建典農中郎將唐建營田使副判官雖晉魏南北職未嘗闕國家弭獮戎之患包漢唐之境然而塞垣儲備罔遵古憲俾仰給他州饋餉一作餉此外固無築室反耕典農營田之利儻遇凶荒未免艱食雖有轉運未免營田何嘗建明利害稍致倉廩羨餘但

守空名會無實効當今之議要在乎河北河東陝西戍兵之地各時置營田使副判官仍在不兼職若遇水潦行流之處廣植秬稻雖荒隙原田亦當懇闢播以五穀今河北保塞河東并汾關中涇陽悉有水地基址惟有鄴中西門豹溉田之迹未見興起得非後人務於因循而無昔賢識邪不然何歷朝而下涇陂如是或曰亦嘗有人建議良以溉導之時瀕水之地恐害及民田由是而止斯乃腐儒之見爾非經遠之士也夫利害相隨古猶未免若利害相半憚於改作猶可苟利七害三當須擇地而行豈可以小害而妨大利哉夫如是鄴中溉田之法若行關疑畎水衝民田抵百戶妨闕而能溉灌千萬頃瘠土所收獲利益大豈止利七而害三亦嘗訪於彼州人士僉曰溉田之迹湮廢茲久土斷力田者不諳其事殊不知官中他日就功但於涇陽鄭白渠和雇水工及彼中負罪百姓悉可分配此地俾之開導民既見之必倣倣矣又豈成功之難然後特置營田使副判官專董其役西北二邊不問水陸並放此分職何假飛芻輓粟率鍾致石坐困民力以供軍實哉

塞垣

先王肇分九州制定五服必內諸侯而外夷狄姑務息民弗勤遠略其來也調戍兵以禦之其去也備戰具以守之修利隄防申嚴斥埃或來獻貢得以羈縻蓋聖人制禦戎之常道嚴尤所謂得其中策古今大槩在乎謹邊防守要害而已古之制塞垣也與今尤異漢唐之世東自遼海碣石榆關漁陽盧龍飛狐雁門雲中馬邑定襄西抵五原朔方諸郡每歲匈奴高秋膠折塞上草衰控弦南牧陵犯漢境於是守邊之臣防秋之士據險而出奇兵持重而待外寇近世晉高祖建義并門得戎王為援既已乃以幽薊山後諸郡為邪律之壽故今劃塞垣也自滄海乾寧雄霸順安廣信由中山拒并代自茲關東無復關險故契丹奄有幽陵遂絕古一作虎北之隘往來全師入寇徑

度常山陵獵全魏澶淵之役以至飲馬於河悉民不聊生矣非北一作索虜雄威如此失於險固然也今既無山阜設險所可恃者惟來峙壘道引河流固其復水為險濬之勢就其要害屯以銳兵茲亦護塞垣之一策也今廣信之西有鮑河中山之北有唐河盡可開決水勢修利陂塘或導自長河之下金山之北派于廣信安肅達于保塞或包舉蒲陰入于陽城然後積水瀾漫橫絕紫塞亦可謂險矣蒲陰陽城度其地勢今塞上之要衝先是胡馬將入寇于茲城駐牙帳數日伺漢兵之輕重或我師禦扞乃長驅南下我師既出即戎人為全師歸重之地此所謂藉城險而資寇兵非中國之利今若修復雉堞完聚兵穀與諸城柵刁斗相聞鮑唐二水交流其下虜騎縱至無復投足之地又焉有擾擾之患今之議者方南北修好恐邊庭生事然而戎狄之心桀驁難信貪我珍幣蓄養銳兵伺吾人之顛覆乘邊境之間隙出乎不意因肆猖獗茲乃不圖豫備疆場而偷取安逸第相付貽後世深患復如何哉

代會參答弟子書

參曰諸足下聞吾黨之士思夫子而莫得見也以有子之貌似夫子欲假設其位以夫子師之諸足下必其然乎否耶吾試為諸足下陳夫子之道以為斷諸足下知天之有四時乎春能生物而不能長也夏能長之而不能成也秋能有成而不能斂也斂之者其在冬矣自生民以來有大聖德居大聖位而作法以濟世者類不過八九三皇經始之五帝繼明之禹湯文武該洽之周公祖述之經始之者春也繼明之該洽之者夏也祖述之者秋也天恐斯文之中未有以折衷乃生吾夫子於衰亂之世前聖之所未立者俾夫子立之前聖之所未作者俾夫子作之上規聖明下救淪壞垂之百王而不變稽之千古而不疑雖百周公百堯舜復出於世亦無以過夫子也是夫子於列聖有成歲之功也是列聖不能斂而夫子斂之也吾以謂夫子之

道江漢以濯之秋陽以暴之皜皜乎不可尙已吾與諸足下奚所識知幸而生於時得以登其門望其堂而傳其道以光榮其身吾與諸足下猶衆無名之星也夫子猶日月之明也以無名之星代日月之明雖積累萬數吾未見其可况一焉而已乎諸足下奈何乃不察於是也天則有一冬而諸足下有二冬乎苟有子升夫子之席而吾與諸足下趨進於左右斂衣而立負牆而請當是時有子能勿愧乎吾有以知彼之必愧也吾儕有所問而不能答有所辨而不能斷譁然而往默然而來鏗然而叩寂然而應當是時有子能勿慚乎吾又知彼之必慚也昔者吾友子淵實有聖人之德不幸短命前夫子而死使子淵尙在而設之於夫子之席吾猶恐天下之不吾信也足下有子之道義孰與子淵德明而仁備孰與子淵夫子稱而嘆之孰與子淵羣弟子服其爲人孰與子淵達夫子之道而鄰夫子之性孰與子淵是數者皆無一可而獨以其容貌之似而欲升師之席竊師之位不亦難乎夫容貌之似者非獨有子也陽虎亦似矣如欲其大似則當以陽虎爲先奚先於有子哉諸足下果欲何耶復欲睹夫子之容乎復欲聞夫子之道乎如止欲睹夫子之容則圖之可也木之可也何必取弟子之似者以僭其稱而悖其位如必欲聞夫子之道不可以苟而已也且吾聞之師其道不必師其人師其人不必師其形如欲師其道則有夫子之六經在詩可以見夫子之心書可以知夫子之斷禮可以明夫子之法樂可以達夫子之德易可以察夫子之性春秋可以存夫子之志是之弗務而假設以爲尙此吾所以悼痛而不敢知也且昔夫子果何師哉師堯舜者也師文王者也師周公者也惟曰師其道而已未聞其假設而師之則似堯舜者似文王者似周公者終身而不得見矣苟不見其人則亦弗師其道乎夫麟之於獸也鳳之於鳥也出乎其類而處乎長者也不幸而麟以死鳳以亡則亦假設而爲之乎諸足下盍姑止不然吾恐萬世之後完口者

寡矣死而無知則已如其有知則子淵子路輩將瞑目流涕而有責於足下也諸足下其思之不宜參白

江鈿文海多以它人文爲公所作其章章者筠州學記曾鞏文也
綿本亦謀收察言論唐庚文也甚至元豐以後暨徽宗朝所下制詔亦有託公名者自當刪去惟京本英辭類彙似少僞妄而代曾參答弟子書不知何人之文與此卷兵儲塞垣兩論皆可疑削之恐無以解後來之感姑留而著其說

外集卷第九

經旨

石鵠論

夫據天道仍人事筆則筆而削則削此春秋之所作也援他說攻異端是所是而非所非此三傳之所殊也若乃上揆之天意下質諸人情推至隱以探萬事之元垂將來以立一王之法者莫近於春秋矣故杜預以謂經者不刊之書范甯亦云義以必當為理然至一經之指三傳殊說是彼非此學者疑焉魯傳之十六年隕石于宋五六鵠退飛過宋都左氏傳之曰石隕于宋星也六鵠退飛風也公羊又曰聞其礮然視之則石察之則五故先言石而後言五視之則鵠徐而視之則退飛故先言六而後言鵠穀梁之意又謂先後之數者聚散之辭也石鵠猶盡其辭而况於人乎左氏則辨其物公穀則鑿其意噫豈聖人之旨不一邪將後之學者偏見邪何紛紛而若是也且春秋載二百年之行事陰陽之所變見災異之所著闡究其所終各有條理且左氏以石為星者莊公七年星隕如雨若以所隕者是星則當星隕而為石何得不言星而直曰隕石乎夫大水大雪為異必書若以小風而鵠自退非由風之力也若大風而退之則眾鳥皆退豈獨退鵠乎成王之風有拔木之力亦未聞退飛鳥也若風能退鵠則是過成王之風矣而獨經不書曰大風退鵠乎以公羊之意謂數石視鵠而次其言且孔子生定哀之間去僖公五世矣當石隕鵠飛之際是宋人次於舊史則又非仲尼之善志也且仲尼隔數世修經又焉及親數石而視鵠乎穀梁以謂石後言五鵠先言六者石鵠微物聖人尚不差先後以謹記其數則於人之褒貶可知矣若乃西狩獲麟不書幾麟鵠來巢不書幾鵠鵠豈獨謹記於石鵠而忽於麟鵠乎如此則仲尼之志荒矣殊不知聖人紀災異著勸戒而已矣又何區區於謹數乎必曰謹物察數人皆能之非獨仲尼而後可也噫

三者之說一無是矣而周內史叔與又以謂陰陽之事非吉凶所生且天裂陽地動陰有陰陵陽則日蝕陽勝陰則歲旱陰陽之變出為災祥國之興亡由是而作既曰陰陽之事孰謂非吉凶所生哉其不亦又甚乎

辨左氏

左邱明作春秋外傳以記諸國之語其記柯陵之會曰單襄公見晉厲公視遠而步高且告魯成公以晉必有禍亂成公問之曰天道乎人事也單子曰吾非瞽史焉知天道吾見晉侯之容矣又曰觀其容知其心後卒如單子之言甚矣邱明之好奇而欲不信其書以傳後世也若單子之言然則夫單子者未得為篤論君子也幸其言與事會而已不然邱明從後書之就其言以合其事者乎何以論之觀其容雖聖人不能知人之心知其必禍福也夫禮之為物也聖人之所以飾人之情而閑其邪僻之具也其文為制度皆因民以為節而為之大防而已人目好五色為制文物采章以昭之耳樂和聲為制金石絲竹以道之體安尊嚴為制冕弁衣裳以服之又懼其佚而過制也因為之節其登車也有和鑾之節其行步也有佩玉之節其環拜也有鐘鼓之節其升降周旋莫不有節是故有其服必有其容故曰正其衣冠尊其瞻視儼然人望而畏之則外閑其邪而使非僻之心不入而已衣冠之不正瞻視之不尊升降周旋之不節不過不中禮而已天之禍福於人也豈由是哉人之心又能以是而知之乎夫喜怒哀樂之動乎中必見乎外推是而言猶近之單子則不然乃以絕義棄德因其視瞻行步以觀之又以謂不必天道止於是而禍福於是皆可以必此故所謂非篤論君子而其言幸與事會者也書曰象恭滔天又曰巧言令色孔壬夫容之與心其異如此故曰觀其容雖聖人不能知其心堯舜之無後顏回之短命雖聖人不可必夫君子之修身也內正其心外正其容而已若曰因容以知心遂又知其禍

敗則其可乎

三年無改問

或問傳曰二年無改於父之道可謂孝矣信乎曰是有孝子之志焉
蹈道則未也凡子之事其親莫不盡其心焉爾君子之心正則公
盡正心而事其親大舜之孝是也蓋嘗不告而娶矣豈曰不孝乎至
公之道也惟至公不敢私其所私私則不正以不正之心事其親者
孝乎非孝也故事親有三年無改者有終身而不可改者有不俟三
年而改者不敢私其所私也衰麻之服祭祀之禮哭泣之節哀思之
心所謂三年而無改也世其世奉其遺體守其宗廟遵其教詔雖終
身不可改也國家之利社稷之大計有不俟三年而改者矣禹承堯
舜之業啓嗣之無改焉可也武王繼文之業成王嗣之無改焉可也
使舜行警之不善禹行鯀之惡曰俟三年而後改可乎不可也凡爲
人子者幸而伯禹武王爲其父無改也雖過二年忍改之乎不幸而
警鯀爲其父者雖生焉猶將正之死可以遂而不改乎文王生而事
紂其死也武王不待畢喪而伐之敢曰不孝乎至公之道也魯隱讓
桓欲成父志身終以弑春秋譏之可曰孝乎私其私者也故曰凡子
之事其親者盡其心焉爾心貴正則不敢私其所私者大孝之道
也曰然則言者非乎曰夫子死門弟子記其言門弟子死而書寫出
乎人家之壁中者果盡夫子之言乎哉

易或問

或問曰王弼所用卦爻象其說善乎曰善矣而未盡也夫卦者時
也時有治亂卦有善惡然以象象而求卦義則雖惡卦聖人君子無
不可爲之時至其爻辭則艱厲悔吝凶咎雖善卦亦嘗不免是一卦
之體而異用也卦象辭常易而明爻辭嘗恆而隱是一卦之言而
異體也知此然後知易矣夫卦者時也爻者各居其一位者也聖人
君子道大而智周故時無不可爲凡卦及象象統言一卦之義爲中

人以上而設也爻之爲位有得失而居之者逆順六位君子小人之
雜居也君子之失位小人得位皆凶也居其位而順其理者吉逆
其理者亦凶也六爻所以言得失逆順而告人以吉凶也爻辭兼以
疑中人以下而設也是以論卦多言吉考爻多凶者由此也卦象象
辭大義也大義簡而要故其辭易而明爻辭占辭也占有剛柔進退
之理逆順失得吉凶之象而變動之不可常者也必究人物之狀以
爲言所以告人之詳也是故窮極萬物以取象至于臂腓鼠豕皆不
遺其及于性者窮物而取象者也其多隱者究物之深情也所以盡
萬物之理而爲之萬事之占也或曰易曰君子順天休命又曰自天
祐之吉無不利其繫辭曰天垂象見吉凶聖人象之易之爲說一本
於天乎其兼於人事乎曰止於人事而已矣天不與也在諸否泰然
則天地鬼神之理可以無乎曰有而不異也在諸謙知此然後知易
矣泰之象曰君子道長小人道消否之象曰小人道長君子道消夫
君子進小人不得不退小人進君子不得不退其勢然也君子感而
小人退天下治於泰矣小人感而君子衰天下亂於否矣否泰君子
小人進退之間爾天何與焉問者曰君子小人所以進退者其不本
於天乎曰不也上下交而其志同故君子進以道上下不交而其志
不通則小人進以巧此人事也天何與焉又曰泰之象不云乎天地
交而萬物通否之象不云乎天地不交而萬物不通乎曰所以云者
言天地也其曰上下之交不交者言人事也嗚呼聖人之於易也其
意深其言謹謙之象曰天道虧盈而益謙地道變盈而流謙鬼神害
盈而福謙人道惡盈而好謙聖人之於事知之爲知之不知爲不知
所以言出而萬世信也夫日中則昃之月缺則盈之天吾不知其心
吾見其虧盈於物者矣物之感者變而衰落之下者順而流行之地
吾不知其心吾見其變流於物者矣貪滿者多損謙卑者多福鬼神
吾不知其心吾見其禍福之被人者矣若人則可知其情者也故天

地鬼神不可知其心而見其迹之在物者則据其迹曰虧盈曰變流曰害福若人則可知者故直言其情曰好惡故曰其意深而言謹也然會而通之天地神人無以異也使其不與於人乎修吾人事而已使其有與於人乎與人之情無以異也亦修吾人事而已夫專人事則天地鬼神之道廢參焉則人事感使人事修則不廢天地鬼神之道者謙之象詳矣治亂在人而天不與者否泰之象詳矣推是而之焉易之道盡矣或問曰今之所謂擊辭者果非聖人之書乎曰是講師之傳謂之大傳其源蓋出於孔子而相傳於易師也其來也遠其傳也多其閒轉失而增加者不足怪也故有聖人之言焉有非聖人之言焉其曰易之興也其於中古乎作易者其有憂患乎其文王與紂之事歟殷之末世周之盛德歟若此者聖人之言也由之可以見易者也河出圖洛出書聖人幽贊神明而生蓍兩儀生四象若此者非聖人之言凡學之不通者惑此者也知此然後知易矣

詩解統序蜀中詩本義有此九篇他本無之故附於此

五經之書世人號爲難通者易與春秋夫豈然乎經皆聖人之言固無難易繫人之所得有深淺今考于詩其難亦不讓二經然世人反不難而易之用是通者亦罕使其存心一則人人皆明而經無不通矣大抵謂詩爲不足通者有二曰章句之書也曰淫繁之辭也曰猥細之記也若然孔子爲泛儒矣非唯今人易而不習之考于先儒亦無幾人是果不足通歟唐韓文公最爲知道之篤者然亦不過議其序之是否豈足明聖人本意乎易書禮樂春秋道所存也詩關此五者而明聖人之用焉習其道不知其用之與奪猶不辨其物之曲直而欲制其方圓是果於其成乎故二南牽於聖賢國風感於先後爾居變風之末惑者溺於私見而謂之兼上下二雅混於小大而不明三頌昧於商魯而無辨此一經大概之體皆所未正者先儒既無所取捨後人因不得其詳由是難易之說興焉毛鄭二學其說熾辭辯

固已廣博然不合于經者亦不爲少或失於疎略或失於謬妄蓋詩載關雎上兼商世下及武成平桓之間君臣得失風一作土俗善惡之事闊廣遠邈有不失者鮮矣是亦可疑也予欲志鄭學之妄益毛氏疎略而不至者合之於經故先明其統要十篇庶不爲之蕪泥云爾

二南爲正風解

天子諸侯當大治之世不得有風風之生天下無王矣故曰諸侯無正風然則周召可爲正乎曰可與不可非聖人不能斷其疑當文王與紂之時可疑也二南之詩正變之間可疑也可疑之際天下雖惡紂而主文王然文王不得全有天下爾亦曰服事於紂焉則二南之詩作於事紂之時號令征伐不止於受命之後爾豈所謂周室衰而關雎始作乎史氏之失也推而別之二十五篇之詩在商不得爲正在周不得爲變焉上無明天子號令由已出其可謂之正乎二南起王業文王正天下其可謂之變乎此不得不疑而輕其與奪也學詩者多推於周而不辨於商故正變不分焉以治亂本之二南之詩一有而字在商爲變而在周爲正乎或曰未論曰推治亂而述之當不誣矣

周召分聖賢解

聖人之治無異也一也統天下而言之有異焉者非聖人之治然矣由其民之所得有淺深焉文王之化出乎其心施乎其民豈異乎然孔子以周召爲別者蓋上下不得兼而民之所化有淺深爾文王之心則一也無異也而說者以爲由周召聖賢之異而分之何哉大抵周南之民得之者深故因周公之治而繫之豈謂周公能行聖人之化乎召南之民得之者淺故因召公之治而繫之豈謂召公能行聖人之化乎殆不然矣或曰不繫於雅頌何也曰謂其本諸侯之詩也又曰不統於變風何也曰謂其周迹之始也列於雅頌則終始之道

混矣雜於變風則文王之迹殆一作始矣雅頌焉不可混周迹之始其將略而不具乎聖人所以慮之也由是假周召而分焉非因周召聖賢之異而別其稱號爾蓋民之得者深故其心厚心之感者厚故其詩切感之薄者亦猶其深故其心淺心之淺者故其詩略是以有異焉非聖人私於天下而淺深厚薄殊矣二南之作當紂之中世而文王之初是文王受命之前也世人多謂受命之前則大妣不得有后妃之號天后妃之號非詩人之言先儒序之云爾考於其詩感於其序是以異同之論爭起而聖人之意不明矣

王國風解

六經之法所以法不法正不正由不法與不正然後聖人者出而六經之書作焉周之衰也始之以夷懿終之以平桓平桓而後不復支矣故書止文侯之命而不復錄春秋起周平之年而治其事詩自黍離之什而降於風絕於文侯之命謂教令不足行也起於周平之年謂正朔不足加也降於黍離之什謂雅頌不足興也教令不行天下無王矣正朔不加禮樂偏出矣雅頌不興王者之迹息矣詩書貶其失春秋憫其微無異焉爾然則詩處於衛後而不次於二南惡其近於正而不明也其體不加周姓而存王號嫌其混於諸侯而無王也近正則貶之不着矣無王則絕之太遽矣不著云者周召二南至正之詩也次於至正之詩是不得貶其微弱而無異二南之詩爾若然豈降之乎太遽云者春秋之法書王以加正月言王人雖微必算於上周室雖弱不絕其王苟絕而不與豈尊周乎故曰王號之存黜諸侯也次衛之下別正變也桓王而後雖欲其正風不可得也詩不降於厲幽之年亦猶春秋之作不在惠公之世爾春秋之作傷典語之絕也黍離之降憫雅頌之不復也幽平而後有如宣王者出則禮樂征伐不自一作在諸侯而雅頌未可知矣奈何推波助瀾縱風止燎乎

十五國次解

國風之號起周終商皆有所次聖人豈徒云哉而明詩者多泥於疏說而不通或者又以爲聖人之意不在於先後之次是皆不足爲訓法者大抵國風之次以兩而合之分其次以爲比則賢善者著而醜惡者明矣或曰何如其謂之比乎曰周召以淺深比也衛王以世爵比也鄭齊以族氏比也魏唐以土地比也陳秦以祖裔比也鄭曹以美惡比也商能終之以正故居末焉淺深云者周得之深故先於召世爵云者衛爲紂都而紂不能有之周幽東遷無異是也加衛於先明幽紂之惡同而不得近於正焉姓族云者周法尊其同姓而異姓者爲後鄭先於齊其理然也土地云者魏本舜地唐爲堯封以舜先堯明晉之亂非魏褊儉之等也祖裔云者陳不能興舜而襄公能大於秦子孫之功陳不如矣一有聖字穆姜卜而遇良之隨乃引文言之辭以爲卦說夫穆姜始筮時去孔子之生尙十四年爾是文言先於孔子而有乎不然左氏不爲誕妄也推此以迹其怪則季札觀樂之次明白可驗而不足爲疑矣夫黍離已下皆平王東遷桓王失信之詩是以列於國風言其不足正也借使周天子至甚無道則周之樂工敢以周王之詩降同諸侯乎是皆不近人情不可爲法者昔孔子大聖人其作春秋也既微其辭然猶不公傳於人第口受而已况一樂工而敢明白彰顯其君之惡哉此又可驗孔子分定爲信也本其事而推之以著其妄庶不爲無據云

定風雅頌解

詩之息久矣天子諸侯莫得而自正也古詩之作有天下焉有一國焉有神明焉觀天下而成者人不得而私也體一國而成者衆不得而違也會神明而成者物不得而欺也不私焉雅著矣不違焉風一矣不欺焉頌明矣然則風生於文王而雅頌雜於武王之間風之變自夷懿始雅之變自厲幽始霸者興變風息焉王道廢詩不作焉秦

漢而後何其滅然也王通謂諸侯不貢詩天子不採風樂官不達雅頌國史不明變非民之不作也詩出於民之情性情性其能無哉職詩者之罪也通之言其幾於聖人之心矣或問成王周公之際風有變乎曰爾是矣幸而成王悟也不然則變而不能復乎爾之去雅一息焉蓋周公之心也故能終之以正

魯頌解

或問諸侯無正風而魯有頌何也曰非頌也不得已而名之也四篇之體不免變風之例爾何頌乎頌惟一章而魯頌章句不等頌無頌字之號而今四篇皆有其序曰季孫行父請命于周而史克作之亦未離乎強也頌之本一人是之未可作焉訪於衆人衆人可之猶曰天下有非之者又訪於天下天下之人亦曰可然後作之無疑矣魯公之政國人猶未全其惠而春秋之貶尙不能逃未知其頌何從而興乎頌之美者不過文武文武之頌非當其存而作者也皆追述也魯公之德孰與文武而曰有頌乎先儒謂各生於不足宜矣然聖人所以列爲頌者其說有二貶魯之強一也勸諸侯之不及二也請於天子其非強乎特取於魯其非勸乎或曰何謂勸曰魯公之善不過復土字修宮室大牧養之法爾聖人猶不敢遺之使當時諸侯有過於魯公之善者聖人忍絕去而不存之乎故曰勸爾而鄭氏謂之備三頌何哉大抵不列於風而與其爲者所謂憫周之失貶魯之強是矣豈鄭氏之云乎

商頌解

古詩三百始終於周而仲尼兼以商頌豈多記而廣錄者哉聖人之意存一頌而有二益大商祖之德其益一也予紂之不憾其益二也明武王周公之心其益三也曷謂大商祖之德曰頌具矣曷謂予紂之不憾曰憫廢矣曷謂明武王周公之心曰存商矣按周本紀稱武王伐紂下車而封武庚於宋以爲商後及武庚叛周公又以微子繼

之是聖人之意雖惡紂之暴而不忘湯之德故始終不絕其爲後焉或曰商頌之存豈異是乎曰其然也而人莫之知矣三字一作知之非仲尼武王周公之心殆而成湯之德微毒紂之惡有不得其著矣向所謂存一頌而有二益焉者豈妄云哉

十月之交解

小雅無厲王之詩著其惡之甚也而鄭氏自十月之交已下分其篇以爲當刺厲王又妄指毛公爲詁訓時移其篇第因引前後之詩以爲據其說有三一曰節刺師尹不平此不當譏皇父擅恣予謂非大亂之世者必不容二人之專不然李斯趙高不同生於秦也其二曰正月惡褒姒滅周此不當疾豔妻之說出於鄭氏非史傳所聞况褒姒之惡天下萬世皆同疾而共醜者一篇譏之殆豈過哉其三曰幽王時司徒乃鄭桓公友此不當云番惟司徒謂史記所載鄭桓公在幽王八年方爲司徒爾豈止桓公哉是三說皆不合於經不可按法爲鄭氏者獨一作又不能自信而欲指他人之非斯亦惑矣今考兩無正已下三篇之詩又其亂說歸向皆無刺厲王之文不知鄭氏之說何從而爲據也孟子曰說詩者不以文害辭不以辭害意非如是其能通詩乎

外集卷第十

碑銘

衛尉卿祁公神道碑銘

惟太原祁氏其先出於黃帝之子二十五人一食於祁遂為氏太原
 晉公威於春秋之際祁氏亦威於晉其後世遠而衰子孫散亡一作
 亡散之他國有居誰者即為誰人後幾世生公諱某公由曾祖一有
 考字以來畜德蘊明世不大顯公生幾歲始有賢子革革咸平二年
 以鄉貢進士中一作及第始以祿榮其親後幾歲公卒卒之歲實景
 祐四年正月二十七日享年六十有一革既棄官服喪于家日月一
 字一作既訖如禮起復就仕任又某年始為尚書郎然後又以爵榮
 之一命贈大理評事累升衛尉卿夫人楚氏某人女其賢為公之配
 後公以卒天聖八年始以公夫人之喪合塋誰縣湯陰鄉將塋乃考
 其世德刻石藏墓中又圖刻於墓隧之外以暴露顯揚孝子之心也
 初公間居常命革曰祁氏世有仕族一作官各聲可稱聞者比比出
 於時自國家建隆以來天子每一作歲歲下書四方舉賢能之士以
 官之而四方之人摩肩爭出獨祁氏無一人之迹至誰刺史廷下稱
 應書者豈吾門遂廢乎抑大廢而後興也或後遂興與由汝也於是
 盡出其家之有益市羣書日釀酒為具以待四方之賓使與之遊每
 鄉里大儒先生講說授學校一作徒子即隨酒具以往勤勤盡其歡
 歲時未嘗懈怠不一有敢字顧資產之有無者惟奉其家祭祀及以
 禮士君子爾由是浸漸以成人及享子祿不數歲乃終人謂力勞而
 報約何也既而享名爵登九卿然後鄉里榮之夫享子養人之常歟
 而榮不朽顧天之報子孰云無厚薄哉惟公以純篤敦實履其身行
 其家以大其門教其子卒成其志志成矣而身歿身歿而名益榮矣
 今又得顯書其行揭之金石以彰為善之効而以其餘勸於後人得
 為賢也噫今有人一作人有負材與能昂立人上與時爭高下不肯

分寸屈其心而卒困厄顛踣快不得志欲一縣佐不可得以至窮
 且老歿無聞者幸而得志處富貴極崇高即死而身名俱滅子孫至
 為僕隸轉死溝壑者亦不可數用彼較此得失孰多乎豈負材與畜
 德所享固不同耶碑具使來乞辭辭具又為之詩以貽誰里之童子
 使歌之以永公之無窮也

衣車赫赫馳者誰生世不聞死莫知鄉居里門乃褐衣歿榮之存令
 名垂人有不信考斯碑鄉之有碑由于為後之父者宜所思

諫議大夫楊公墓誌銘

府君杭州錢塘人其譜曰漢太尉震之後世出弘農其後微遠不能
 譜錄府君之九代祖隱朝始復得次序曰隱朝生燕客燕客生堪而
 猶為弘農人堪生承休是謂皇高祖唐天祐元年為刑部員外郎副
 給事中鄭祁使吳越冊錢鏐為王楊行密亂江淮道阻不克歸遂留
 杭州始分弘農之籍籍錢塘初承休之行也聖其子嚴以俱嚴任吳
 越國位至丞相是謂皇曾祖生尚書職方員外郎諱郎是謂皇祖生
 贈禮部尚書諱蟻是謂皇考府君幼失其父有志節不羣諸兒母元
 夫人獨愛之夫人之喪尚書也內外之姻未嘗有見其笑者府君生
 十歲作雪賦一篇始為之笑及長尤好學日必誦書數萬言或晝夜
 不息臨食至失匕飭已而病其目元夫人奪藏其書府君盜之亡鄰
 家以讀大宋受命太宗皇帝即位之二年吳越忠懿王朝京師以其
 地納籍有司吳越國除隨其皇祖以族行寓宋州三舉進士端拱二
 年中乙科歷蔡州新昌縣令遷著作佐郎知德州為政有治迹詔書
 褒之咸平三年交趾獻馴犀府君以秘書丞監在京商稅院因奏犀
 賦真宗嘉之召試學士院遷太常博士賦一時文士爭相傳誦不及
 明年又上書自薦獻所為文二十餘萬言乃直集賢院知袁筠二州
 提點開封府界諸縣入為三司鹽鐵判官知越州提點淮南刑獄為
 宰相王文穆公不悅以事罷之卒坐考試國子監生貶監陳州榷酒

逾年得知常州復入三司判磨勘司丁元夫人憂服除判戶部勾院比自薦及是二十七年矣然少孤能自立力勤苦爲文章履其身以儉約不妄自爲進取其官業行己之方一皆自信於聖人之道不肯少顧時之人所爲而時之人亦以有德君子名之故其直集賢院者二十七年不遷官由太常博士纔至刑部郎中有出其後者往往至榮顯或有笑其違世自守以質朴諷使少改其爲者府君歎曰吾不學乎世學乎聖人由是以至此吾之所有不敢以薦於人而嘗自獻于天子矣今欲孰附以進邪其信道深篤不可屈曲如此天聖四年

以久次遷集賢修撰出知應天府同糾察在京刑獄轉兵部郎中六年年六十五老矣始召以知制誥府君與穎川陳從易皆以好古有文行知名然二人者皆久不用遂以老既而一日並用之是時學者稍相習務翰寫文章在位稍以爲患皆以謂天子用耆老將有意矣而又下詔書勅學者禁浮華使近古道然後以謂用二人皆無意矣而皆恨其晚也居二歲拜右諫議大夫集賢院學士出知亳州於州封號略縣男食邑二百戶明道二年四月十日以疾卒於州之正寢年六十有九其病將卒猶不廢學有文三十卷曰隱集又五卷曰西垣集嗚呼畜其學以老不克用獨見於文章然其文卒待一施於朝廷遂位榮顯既貴贈其皇考禮部尚書母太原郡太君其婦曰漳南縣君張氏後夫人南陽郡君亦張氏蔭其男長曰洎明州觀察支使次曰濬江陰軍司理參軍次曰泳漸沆瀾皆將作監主簿既終又蔭二孫某官其餘慶之及者二世則夫守道者未必果不遇也噫楊氏嘗以族顯於漢爲三公者四世漢之亂更魏涉晉戕賊一作斬於夷胡而漢之大人苗裔盡矣比數百歲下而及唐然楊氏之後獨在大和開成之間曰汝士者與虞卿魯士漢公又以名顯於唐居靖恭坊楊氏者大以其族著唐之亂極於懿僖昭三宗下更五姓天下瘼裂焚蕩剪雜而唐之各臣之後盡矣又幾百年至于今然楊氏

之後獨在及府君又大顯始震嘗有德於漢而死以無辜君子悼震曰不幸然孰知夫世不昌且久歟而府君又畜其德則孰知其後世又不然歟於其塋也是宜銘銘蓋所以使後世之有考也府君卒後若干年以景祐二年某月某日塋杭州某縣某鄉漳南縣君先府君二十六年以亡及是合塋自有誌府君初名侃後避真宗皇帝舊名改曰大雅字子正銘曰

楊氏之先自震有聞有感有衰世惟厥人由漢迄今更難冒亂歷時千年而世三顯府君之顯不彰于初其久不渝卒克以敷弘農之分遂播南土嗚呼德則承其先而塋也塋于一作於祖

尚書職方郎中分司南京歐陽公墓誌銘

公諱穎字孝叔咸平三年舉進士中第初任峽州軍事判官有能名卽州拜秘書省著作佐郎知建寧縣未半歲峽路轉運使薛顏巡部至萬州逐其守之不治者以謂繼不治非尤善治者不能因奏自建寧縣往代之以治聞由萬州相次九領州而治之一再至曰鄂州二辭不行初彭州以母夫人老不果行最後嘉州以老告不行實治七州州大者繁廣小者俗惡而姦皆世指爲難治者其尤甚曰歙州民習律令性喜訟家家自爲簿書凡聞人之陰私毫髮坐起語言日時皆記之有訟則取以證其視入狴牢就桎梏猶冠帶偃實恬如也盜有殺其民董氏於市三年捕不獲府君至則得之以抵法又富家有盜夜入啓其藏者有司百計捕之甚急且又大購之皆不獲有司苦之公曰勿捕與購獨召富家二子械付獄鞠之州之吏民皆曰是素良子也大恠之更疑互諫公堅不同鞠愈急二子服然吏民猶疑其不勝而自誣及取其所盜某物於某所皆是然後謹一作數曰公神明也其治尤難者若是其易可知也公剛果有氣外嚴內明不可犯以是施於政亦以是持其身初皇考侍郎爲許田令時丁晉公尙少客其縣皇考識之曰貴人也使與之遊待之極厚及公佐峽州晉公

薦之遂拜著作其後晉公居大位用事天下之士往往因而登榮顯而公屏不與之接故其仕也自著作佐郎秘書丞太常博士尚書屯田都官職方三員外郎郎中皆以歲月考課次第陞知萬峽鄂歙彭鄂閩饒嘉州皆所嘗得及晉公敗士多不免惟公不及明道二年以老乞分司有田荆南遂歸焉以景祐元年正月二十六日終于家年七十有三祖諱某贈某官疑皇妣李氏贈某縣君夫人曾氏某縣君先亡公平平生強力少疾病居家忽晨起作遺戒數紙以示其嗣子景昱曰吾將終矣後三日乃終而嗣子景昱能守其家如其戒歐氏出於禹禹之後有越王勾踐勾踐之後有無疆者爲楚威王所滅無疆之子皆受楚封之烏程歐陽亭者爲歐陽氏漢世有仕爲涿郡守者子孫遂北有居冀州之渤海有居青州之千乘而歐陽仕漢世爲博士所謂歐陽尚書者也渤海之歐陽有仕晉者曰建所謂渤海赫赫歐陽堅石者也建遇趙王倫之亂其兄子質南奔長沙自質十二世生詢詢生通仕於唐皆爲長沙之歐陽而猶以渤海爲封通又二世而生琮琮爲吉州刺史子孫家焉自琮八世生萬萬生和和生雅雅生高祖諱效高祖生曾祖諱託曾祖生皇祖武昌令諱柳皇祖生公之父贈戶部侍郎諱做皆家吉州又爲吉州之歐陽及公遂遷荆南且葬焉又爲荆南之歐陽嗚呼公於脩叔父也銘其叔父宜於其世尤詳銘曰

都官郎中王公墓誌銘

明道元年五月二十四日尚書都官郎中王公以疾終于許州私第明年十月其孤宗彭宗古奉公之喪及公之先君先夫人俱葬于許州長社縣白兔原公諱世昌字次仲少屬文學進士端拱元年登科第補鳳翔郿縣主簿再調開封士曹參軍知杭州鹽官縣又改蘇州

常熟縣轉運使張式以治狀奏充秀州判官遷著作佐郎知彭州九隴縣轉太常丞會鹽鐵上言建安茶稅不充請擇材臣幹其任公膺是選歲增四千萬三年歸朝優詔嘉獎擢知饒州連典蜀福二州歷太常博士屯田都官職方二員外郎權三司判官出知鄧州轉屯田郎中徙東川賜二品服移成州權莅西京留守司御史臺又知澤州轉都官郎中知絳州老疾上章得分司西京享年七十有八公生明察凡爲郡獄訟無細大皆呼前面質其罪有寃者立辨出之獄官俯伏受教僚佐充員而已故所至稱有治聲亦用此爲人所擠成州之遷是也好接士類不以年者自處候門者雖晚進皆與均禮論者多之初娶李氏再娶水邱氏封歸安縣君柔婉有婦道早亡生子三人長宗說終杭州臨安主簿次宗古前連州陽山今次宗彭前孟州汜水主簿女四人長適涇州支使宋齊古次早夭次適侍御史楊偕次適光祿寺丞呂昌齡臨安有子一人師温郊社齋郎陽山子師良師儉皆郊社齋郎二女俱幼銘曰

左班殿直胥君墓誌銘

八十其齡三品其服有子有孫以才以淑吁嗟令人兮嚮用茲福胥姓出晉大夫童世久徙遷失其譜君諱某字致堯有子曰沆能略言其世曰吾家爲燕人十二代祖儀爲唐御史中丞坐言武后事貶臨川後世因家焉胥氏義聞鄉閭門有旌表由吾先君而上祖諱某仕僞唐袁州宜春令父諱某當周世宗取淮南李氏日益衰亂因徙家合肥及吾先君始祿于朝然卒於不得志今其墓敢再拜以請子爲考次君之行曰君少力學爲文辭端拱咸平之間再舉進士嘗中選矣時天子諒闇不能廷試進士疑有司選太多削其奏籍之半乃罷去其冬契丹犯邊天子幸魏又將幸真定君以草澤應詔上書理檢言兵事且曰臣言有不可書者非人主不得聞天子召見爲屏左右聽其說覺然而悟將拜某官既出大臣詰其事不肯對大臣皆不

悅曰且可以職廢之以爲三班借職君辭不就天子還京師又固辭願從進士試禮部皆不許以監温州天富鹽監君歎曰吾親老敢擇祿邪凡世所謂材者惟施無不利乃可謂能吾將有爲也已乃受命凡治鹽三歲增其舊二百餘萬斛罷歸以能被薦未暇錄初契丹陷黎陽滑州守張秉請君將戍兵擊河凌以斷賊契丹去張公以君爲材留君護漁池迎陽二婦朱博代守滑乃曰河恐滑人者趨西婦爾請君兼護之君疏河爲別流以殺其勢明年河塞西婦去滑人無水恐歲省工材百餘萬秩滿有司上君鹽最護河之功遷奉職君意不滿辭不拜丁母夫人某氏憂終喪不許以監黃州商稅餘年課爲最召還在道用祀汾陰恩卒遷奉職監杭州排岸司浚浙江龍山二閘廢清河堰以通漕杭人至今便之爲端州兵馬監押就遷右班殿直給事中樂黃目舉君材任閤門祗候有司限例不行得温州兵馬監押期還遷職在温州聞黃目死前舉狀格不用君歎曰豈吾命邪今天子卽位遷左班殿直以疾求監壽州酒稅逾年請告就醫京師天聖元年十月某日卒于建平坊享年五十有九初娶宋氏生三男曰沆澄泳澄早卒二女長亦早卒次適某氏再娶沈氏後君卒初君之喪寓塋朝陽門外慶曆二年某日塋于某縣某鄉某原銘曰

內殿崇班薛君墓誌銘

公諱塾字宗道絳州正平人資政殿學士兵部尚書河東簡肅公之弟於惟簡肅爲時顯人天聖明道間實參大政以道德剛直外正於朝孝友敦睦內仁其家其爵命之榮上逮三世旁祿其族子官者三十人公於一作于太保諱景之廟爲曾孫太傅諱温瑜之廟爲孫太

師諱化光之廟爲第五子少以簡肅蔭補三班借職九遷內殿崇班享年六十五以終公爲人果毅質直喜以氣節自高少好學嘗爲文詞仕雖不章官能其職初監曲沃縣酒稅民素苦伐薪給官炊公始更用石炭民得不苦至今賴之又監龍門縣清澗木稅絳州鹽酒稅河中府浮橋凡所施設皆有法後人雖欲輒更莫能也蜀民易搖喜倡事以相驚諱遂緣爲亂公爲兵馬監押旁郡呼曰盜將大至公能以重鎮之州卒無事民恃以安歲滿州乞留不克知河池縣賦役刑罰示民以信使民知政而吏無所措其姦始建孔子廟春秋飭其牲器以與邑人行事民初識學校之禮當時名臣若今樞密副使杜公多薦其材以兄嫌避不升用奉使走馬承受滄州路公事數對便殿言利害皆可施行歷監通利軍陝蜀二州兵康定二年六月十五日壬辰以疾卒于蜀州之解其長子曰大理寺丞通判陵州仲儒扶其柩歸于絳州道出河池池之民泣遮于路曰此吾民之所思也公卒之六日夫人吳氏卒于代州其次子曰大理寺丞通判代州宗儒以其喪歸遂合塋于正平縣清源鄉周村原用慶曆元年十二月二十一日丙申之吉二子皆以材賢克承其家女一人適將作監主簿鄭宗賢銘曰

長安縣太君盧氏墓誌銘

薛絳大族興自簡肅簡肅之哲其剛烈烈公躬直清官以材稱惟賢是似不愧其兄薛有世次簡肅之碑公墓南原銘以識之

夫人盧氏其父諱之翰單父人好學通五行律曆善籌策中進士第至道中用兵河西以爲陝西轉運使屢爲太宗言靈武事不合意輒貶既而事驗思之輒復召用由是卒爲名臣官至太常少卿知廣州夫人歸楊公時年始十七公前夫人張氏生三男文友文舉文本皆尙幼夫人亦生三男一早卒次文敏文通四女長適大理寺丞王中孚次適崑山縣尉刁綬次將作監主簿朱銑次早卒楊公以文行者

各當時治身廉清好施宗族大中祥符四年以右諫議大夫薨廣州家無貲夫人居喪於淮上諸子怡怡知其母之慈撫其己不知家之有無也後二十有五年文友爲虞部員外郎知建昌軍文舉國子博士通判蔡州文本文通早卒文敏由大理寺丞應進士中第爲太子中允知蘇州常熟縣夫人在建昌感疾卒官舍享年五十七將卒戒其子曰吾幸見汝輩立而死吾無以教爲人能如汝父足矣遂歸壟壽州之西原祔舊塋禮也夫人初用公封范陽縣君後用其子封仁壽縣太君又進封長安縣太君及卒也張夫人二子居喪哀如所生嗚呼賢母也哉是宜銘粵景祐二年二月庚戌葬之銘曰
從者其姑祔者其夫安此室乎

外集卷第十一

外集卷第十二 集六十二

碑銘

漳一作事南縣君張氏墓誌銘

右諫議大夫集賢院學士楊公諱大雅之夫人曰漳南縣君張氏父諱保衡官至太僕寺丞其先荆門大族劉守光亂幽州曾祖敏徙其家濟南之歷城而益威夫人生二十有二歲歸楊氏十有五年生二男二女景德三年十月十四日終于袁州之解其子洵濬尚幼能記其母及長聞其家與其外內宗姻之稱夫人者曰夫人生于富族而柔明孝謹楊氏嘗世家公少孤貧始為開封縣尉夫人入其門若素小家子事其姑視日時早暮氣節之寒暑飲食起居之當進與否者不少懈如此十五年如始歸凡楊氏之內宗與其外姻賓客之至者如豐家退視其楮空如惟恐人之知也教其子不略弛其色有問之則曰慈或失之教不嚴不足以訓雖家人亦未嘗見其跋墜自開封及其為秘書丞而得封又見其夫為太常博士知袁州乃卒其後楊公登朝廷掌書命為諫議大夫居榮顯皆莫見也嗚呼可哀也已天聖某年楊公薨景祐二年某月日子洵舉而合葬之於其壙也洵為某官濬為某官女二人皆適人其幼早亡二女皆有子娶矣銘曰嗚呼一無二字生而淑淑也何思夫安於此其從斯

太子賓客分司西京謝公墓誌銘

惟景祐元年十月之晦太子賓客分司西京謝公薨明年三月嗣子絳自京師舉其柩南歸用八月某吉葬杭州富陽縣某鄉某原合以夫人晉陵郡君許氏而從王父戶部侍郎府君之墓次公世居富春生十一歲時已如成人嘗與客談論侍郎竊從聽之往往能奪其客議十四歲詣州學學左氏春秋略授其說即為諸生委曲講論如其師稍長居蘇州時天子平劉繼元露布至守臣嘗上賀命吳中文士作表章更數人皆不可意公私作於家客有持去者吳士見之大驚

遂有各於南方淳化三年以進士及第為梓州權鹽院判官會兩川

盜起攻劫州縣公乘賊未至盡伐近郊林木內城中且曰除賊隱蔽

以修閉守之具有餘可給薪蒸為久圍之備身與士卒守壘壁凡圍

百日不能破賊平知州事尚書左丞張雍轉運使馬襄狀言其能就

除觀察判官賜以器幣明年知益州華陽縣縣人苦兵劫皆逃失業

朝廷下令許民能倍租入官者皆得占其田既而良田盡為大豪所

奪而逃入歸者不復得公至則手判訟牒以謂恤亂撫人不宜利倍

租而使貧人失業盡奪之格其詔書不用由華陽召改著作佐郎通

判壽州筠州知興國軍三遷至太常博士真宗方考責能吏一日自

內出中外賢吏有治狀者二十四人付中書以名召公由興國召見

于長春殿賜緋魚袋即日試於學士院明日邊臣有急奏天子詔且

親征是時大賊王長壽又劫曹濮真宗面語宰相委公曹州遂改屯

田員外郎以往至則縛凶人趙諫趙諤斬於京師三字一作于市曹

人以寧自曹歸朝是歲火星見西南方占曰在蜀奉使巡檢益利兩

路蜀卒無事又議大鐵錢平其法至今行之使還舉州縣吏三十餘

人宰相疑其多公願署連坐以取信朝廷從之所舉後皆為能吏奉

使舉人連坐自公始既而為三司度支判官知秦州歙州再遷司封

員外郎坐三司舉吏奪官後為度支通判河南府侍中始平公自洛

來朝薦之召試授兵部員外郎直史館詔三司理欠憑由司出為兩

浙轉運使賜金紫遷禮部郎中判司農寺朝廷方議以知制誥將試

忽得疾踰旬不能興遂寢天禧五年以戶部郎中兼侍御史知雜事

同判吏部流內銓真宗葬永定陵詔山陵使道路所經拆民廬舍及

城門以過車輿象物公上言先帝封祀行幸儀物全感不聞所過壞

民居今少府治塗車明器侈大非禮且違遺詔務儉薄之意請裁損

之書委不聽以疾求去職遷吏部郎中直昭文館知越州還遷太常

少卿判太府寺登聞檢院復以疾求西京留司御史臺踰年就臺拜

秘書監遂求分司明道元年轉太子賓客公少以文行有名於時自言吾於一作在天下無一嫌怨待士君子必盡其心雖人出其下亦未嘗敢懈怠家居有法度撫養孤幼極恩愛常時温和謙厚真長者及在官臨事見義喜為過於勇夫故所至必有能稱不幸中廢以疾不得盡其所為及居西京不關人事惟理醫藥與方術士語終日不休歲時河南官屬詰問請見慘然肅潔有威儀不若老且病者享年七十有四以壽終嗚呼可謂君子者已公諱濤字濟之高祖希圖仕至衛州刺史會祖延徽處州麗水縣主簿祖懿文杭州鹽官令父崇禮秦寧軍節度掌書記以公贈戶部侍郎母崔氏博陵郡太君弟四人炎最有文行知名於時見國史子三人長曰絳次將作監主簿約次太廟齋郎綺亦有文皆早亡謝氏自會高不顯由公始昌其家而子絳又以文行繼之初公之葬其先君也為兵部員外郎今公之葬絳亦世其官度支判官河南府通判並踐世職判太府寺實父子相代書府之任昭文史館集賢院祕閣父子同時為之見于衣冠盛事錄謝氏其不衰又將大也歟銘曰

謝之遠世河南緱氏四代之祖因仕過江卒葬嘉興始留南方會祖在南佐麗水縣卒又葬焉世亦未顯祖令鹽官始葬富陽凡三徙遷遂家於一作于杭世久當隆其昌自公富陽之原三世有墓父大於祖子大於父後有賢嗣又有令孫公其安居有祀有承

檢校司農少卿致仕張公墓誌銘

君諱九思鄆州陽谷縣人張氏世以明經仕宦君少習春秋三傳太平興國五年以舉中高第凡仕若干年而致之又若干年而考終命初任雅州軍事推官轉大理評事光祿大理二寺丞太子中舍殿中丞國子博士尚書虞部比部駕部三員外郎中凡居官一十有二歷知黃蘄道三州既老又加檢校司農少卿於其家年八十有五其終也實天聖某年某月某日其葬也以明道二年某月某日其葬之地

汝州襄城縣某村某山之下父諱清累贈某官母崔氏追封某縣太君初娶朱氏某縣君生子龜正龜文龜文先亡女二人後娶王氏某縣君生子龜誠於其葬也龜正為鄆州支使知鄂州崇陽縣龜誠襄城縣尉君為人沉朴謹儉官能其職為政以慈仁厚下為先人有鬪訟常兩諭之初強不屈化必以禮義柔之卒相服從願改自疑為善故所至人愛思之其為黃州也飛蝗越州不下州人歌之以為異凡居官所得俸廉計身衣食足而已秩滿還家輒以所餘分親族噫其賢厚而敏亦經之効歟銘曰

張世鄆居舉明經朴儉勤孝家所承公壯而仕老康寧八十其壽位則卿始終以全為家學去鄆而汝從新塋後之世者考此銘

河南府司錄張君墓誌銘

山東道節度掌書記知伊陽縣事天水尹洙書

吾友張堯夫以今年七月癸酉葬其先君於北邙山既葬二十有九日壬寅晨起感疾復就寢弗寤若醉狀醫視其脈曰疾勢風甚感脈宜洪今細蹙殆不可為晝未盡數刻啓手足於官署翌日殮于正寢戊申葬先君墓次實明道二年八月也堯夫內淳固外曠簡不妄與人交初為河南府推官後為司錄子與之遊幾五年出處多共之其飭身臨事子嘗愧堯夫堯夫不予愧也嗚呼安能盡識吾友之善哉堯夫名汝士年二十七歷官至大理寺丞先君諱某終虞部員外郎母李氏隴西縣君娶崔氏生二男三女皆幼渤海歐陽修為之銘曰噫嘻哉上者蒼蒼也宜壽而夭宜福而禍有尸者邪其無也豐其躬者鮮其仁子之賢者當其位豈其不可兼邪斯可怪也其有莫施其為不伐充而不光遂以味滅後孰知也弔賓盈位哭皆有涕夫嗟於道婦咄於窻夫能使人之若此也噫嘻哉君子吾不得見而見善人善人今復不得而見也

先君墓表此乃瀧岡表初墓其後刪潤頗多題曰瀧岡阡表

修不幸生四歲而孤太夫人守節自誓居貧自力於衣食以長以教俾至十成人而嘗告之曰汝父為吏廉而好施以其俸祿事賓客常不使有餘曰無以是為我累故其亡也無一瓦之覆以庇其生然吾何恃而能自守以至是耶吾於汝父知其一二而已也此吾之所恃也吾之始歸也汝父免於母喪方踰年歲時祭祀則必泣涕曰祭而豐不如養之薄也閉居而御酒食感饌則又涕泣曰昔不足而今有餘其何及也吾始一二見之以為新免於喪而適然耳既而其後常然至於終身未嘗不然此吾知汝父之能養也汝父為吏嘗夜燭治官書屢廢而歎吾問之則曰此死獄也我求其生不得也吾曰生可求乎曰求其生而不得則死者與我皆無恨矧求而有得耶以其嘗有得知其不求而死者恨也夫嘗求其生猶失之死而况世常求其死也回顧乳者抱汝而立于旁指而歎曰歲行在戌我將死不及見兒之立也後當以我語告之其平居教他子弟亦皆用此語吾耳熟焉故能詳也其施於外事接於賓客或有矜飾吾不能知其居于家無所事而其為如此是其發於中者也其心誠厚於仁者也此吾之知汝父之得疑有後也汝其勉之夫士有用捨志之得施與否不在己而為仁與孝不取於人也修泣而誌之不敢忘先君少孤力學咸平三年進士及第為通州判官泗綿二州推官又為秦州判官正身懷道不及其施享年五十有九初贈太子中允今贈某官太夫人姓鄭氏世為江南名族太夫人恭儉仁愛而有禮初封縣太君累封樂安安康彭城二郡太君自其子少賤時治其家以儉約其後常不使過之曰吾兒多不合于世儉薄所以安患難也修初貶夷陵太夫人言笑自若曰汝家故貧賤也修察其志久而安故其後立于朝得不苟容于時蓋自先君之亡二十年修始得祿而養又二十有二年修為龍圖閣直學士尚書吏部郎中留守南京太夫人以疾卒于官舍

享年七十有二修竊自念為人子而不能識其父幸而得聞吾母之言其忍廢焉乃泣血而記之歐陽氏自為吉州廬陵人至于修十有五世矣沙溪吾世之家且墾也故又刻其所記者表於其阡以告其宗族及鄉之人曰

而耕而田歲取百千而耘而學久而不獲田何取之困倉峨峨學而取之簞芻盈家量功較收所得孰多先君之學獲不及時匪于其躬而利其後疾遲幾何善無不報先君之貽子修不肖矧有才于子何不有矧我歐陽世家惟舊自始氏封為程之亭在北有聞或冀或青中顯彌長或吉或衡勢大必分枝葉婆娑惟吉舊居子孫今多木久而林有喬其秀矧我歐陽扶疎並茂先君之德吾母知隆子修不肖以俟其宗以勉同鄉敢及他人

母鄭夫人石柳銘

維皇祐五年癸巳六月庚午匠作石柳舉七月己亥既成銘曰於乎有宋歐陽修母鄭夫人柳既密既堅惟億萬年其固其安

胥氏夫人墓誌銘公在慶制舉附葬之禮故命門人秉筆

廬陵歐陽先生語其學者徐無黨曰修年二十餘以其所為文見胥公于漢陽公一見而奇之曰子當有名于世因留置門下與之偕至京師為之稱譽於諸公之閒明年當天聖八年修以廣文館生舉中甲科又明年胥公遂妻以女公諱偃世為潭州人官至工部郎中翰林學士公以文章取高第以清節為時名臣為人沉厚周密其居家雖燕必嚴不少懈每端坐堂上四顧終日如無人雖其嬰兒女子無一敢妄舉足發聲其飲食衣服少長貴賤皆有常數胥氏女既賢又習安其所見故去其父母而歸其夫不知其家之貧去其姆傳而事其姑不知為婦之勞後二年三月胥氏女生子未逾月以疾卒享年十有七後五年其所生子亦卒後二十年從其姑葬于吉州吉水縣沙溪之山修既感胥公之知己又哀其妻之不幸短命顧二十年間

存亡憂患無不可悲者欲書其事以銘而哀不能文因命無黨序其
意又代爲哀辭一篇以弔胥氏因并刻而藏于墓當胥氏之卒也先
生時爲西京留守推官實明道二年也其哀辭曰

清冷兮將絕之語言猶可記髣髴兮平生之音容不可求謂不見爲
纔幾時兮忽二紀其行周豈無子兮久先于下上昔事姑兮今從于
此邱同時之人兮孰獨予留顧生餘幾兮一身而百憂惟其不忘兮
下志諸幽松風草露兮闕此千秋

楊氏夫人墓誌銘同前

廬陵歐陽先生之繼室曰楊氏者故右諫議大夫集賢院學士楊公
之女也楊氏遠有世德自漢至唐常出顯人故其繫譜所傳次序自
震至今不絕公諱大雅以文學篤行居清顯號爲古君子先生嘗謂
其學者焦千之曰楊公已歿脩始娶其女雖不及識公然嘗獲銘公
之德究見其終始其行于己立于朝廷發于文章者皆得考次及楊
氏之歸又得見公之退施于其家者皆可法也楊氏事其姑以孝而
勤友其夫以義而順接其內外宗族以禮而和其歸也修爲鎮南
軍掌書記館閣校勘家至貧見其夫讀書著文章則曰此吾先君之
所以樂而終身也見其夫食糲而衣弊則曰此吾先君雖顯而不過
是也閒因其夫之俸廩食其月而有餘則必市酒具肴果于堂上曰
吾姑老矣惟此不可不勉歸之十月以疾卒享年十有八實景祐二
年九月也後十有九年從其姑塋于吉州吉水縣沙溪之山乃命千
之序而銘其壙曰

其居忽兮而逝也遽其歿久矣一作今而悲如新一言以誌兮千萬
歲之存

記

河南府重修使院記

郡府統理民務調發賦稅稽功會事事無不舉代君理物政教繫之漢承秦餘精意牧民之官置部刺史以督察出御史以監掌之太守二千石莫不盡誠率下奉上李唐酌用舊典使天下以大權小故有州有府刺史專守理所大鎮觀察旁郡後增置胥吏史以總治諸州繩寬刺善理務詳焉府之有使院也厥惟尚矣皇朝政教清明制度適中雖鎮守自占總領委于均輸惟使幕置吏用而不革洛都天下之儀表提封萬井隸縣十九王事浩穰百倍他邑而典史之局甚陋不稱彭城相居守之明年若曰政教之廢與出于官吏之緩猛繫于是義不可忽始謀新之乃度地於府之西偏斥大其舊居列司存整按牒以圖經久之制夏某月工徒告成制作雖壯不踰矩官司雖冗執其方君子謂是舉也得為政之本焉為有端其本而未不正者哉宜乎書厥旨以示方來且誌歲月也

河南府重修淨垢院記

河南自古天子之都王公戚里富商大姓處其地喜於事佛者往往割脂田沐邑貨布之贏奉祠宇為莊嚴故淨圖氏之居與侯家主第之樓臺屋瓦高下相望於洛水之南北若苾基然及汴建廟社稱京師河南空而不都貴人大賈廢散淨圖之奉養亦衰歲壞月隳其居多不克完與夫遊臺釣池並為榛蕪者十有八九淨垢院在洛北廢最甚無刻識一作石不知誰氏之為獨勝其梁曰長興四年建丞相彭城錢公來鎮洛之明年禱雨九龍祠下過之歎其空闊且呼主藏者給緡錢二十萬洛陽知縣李宋卿幹而輯焉於是規其廣而小之即其舊而新之即舊焉所以速於集工損小焉所以易於完修一作守易壞補闕三十六間工既畢宋卿願刻於石以紀夫修舊起廢由

彭城公賜也且誌其復興之一無此字歲月云從事歐陽修遂為一無二字記

陳氏榮鄉亭記

什加漢某縣戶若干可征役者家若干任里胥給吏事又若干其豪又若干縣大以饒吏與民尤驚惡猾驕善貨法為蠹孽中州之人凡仕宦之蜀者皆遠客孤寓思歸以苟滿歲脫過失得去為幸居官既不久又不究知其俗常不暇判別已輒易去而縣之大吏皆宿老其事根堅穴深為其長者非甚明銳難卒攻破故一縣之政吏常把持而上下之然其特不喜秀才儒者以能接見官府知己短長以讒之為己病也每儒服持謁嚮縣門者吏輒坐兩下嘲咻踞罵辱之俛慙以去甚則陰用里人無賴苦之羅中以法期必破壞之而後已民既素饒樂鄉里不急祿仕又若吏之所為故未嘗有儒其業與服以游者甚好學者不過專一經工歌詩優游自養為鄉丈人而已比年蜀之士人以進士舉試有司者稍稍增多而什加獨絕少陳君什加之鄉丈人有賢子曰嚴夫嚴夫幼喜讀書為進士力學甚有志然亦未嘗敢儒其衣冠以謁縣門出入閭閻必鄉其服鄉人莫知其所為也已而州下天子詔書索鄉舉秀才嚴夫始改衣詣門應詔一作書吏方相驚然莫能為也既州試之送禮部將行陳君戒且約曰噫吾知惡進士之病己而不知可以為榮君行達得選於有司吾將有以旌志之使榮吾鄉以勸也於是呼工理材若將構築者明年嚴夫中丙科以歸陳君成是亭與鄉人宴其下縣之吏悔且歎曰陳氏有善子而吾鄉有才進士豈不榮邪嚴夫初為伊闕縣主簿時予為西京留守推官嘗語予如此欲予之志之也嚴夫為縣吏材而有內行不求聞知於上官而上官薦用下吏之能者歲無員數然卒亦不及噫嚴夫為鄉進士而鄉人始不知之卒能榮之為下吏有可進之勢而不肯一鬻所長以干其上其守道自修可知矣陳君有子如此亦賢丈

人也予既友巖夫恨不一登是亭往拜陳君之下且以識彼邦之長者也又嘉巖夫之果能榮是鄉也因以命名其亭且志之也某年月歐陽修記

明因大師塔記

明因大師道詮姓衛氏并州文水縣民家子生於太平興國辛巳之歲終於明道癸酉之正月壽五十有二年始為童子辭家人入洛陽妙覺禪院依真行大師惠璿學淨圖法咸平五年始去氏削髮入僧籍後二十四年賜紫衣遂主其衆又四年賜號明因兼領右街教門事凡為僧二十有一年卒之明年其徒以骨葬城南龍門山下始道詮未死時予過其廬問其年幾何曰五十有二矣問其何許人也曰本太原農家也因與語曰詩唐風言晉本唐之俗其民被堯之德化且詩多以儉刺然其勤生以儉蓄朴厚而純固最得古之遺風今能言其土風乎其民俗何若信若詩之所謂乎詩去今餘千歲矣猶若詩之時乎其亦隨世而遷變也曰樹麻而衣陶瓦而食築土而室甘辛苦薄滋味歲耕日積有餘則窖而藏之率千百年不輒發其動且儉誠有古之遺風至今而不變也又言為兒時聞長老語晉自春秋為盛國至唐基并以興世為北京及朱氏有中土後唐倚并為雄亦卒以王既而晉祖又以王漢又以王遭時之故相次出三天子劉崇父子又自為國故民熟兵鬪餽軍死戰勞苦幾百年不得息既而聖人出四方次第平一日兵臨城門係繼元以歸并民然後被政教棄兵專農休息勞苦為太平之幸人并平後二歲我始生幼又依浮圖生不見子戈長不執耒耜衣不麻食不瓦室不土力不穡而休乃并人之又幸者也今老矣且病即死無恨子愛其語朴而詳他日復過其廬莫見也訪之曰死矣為之惻然及其葬其徒有求予誌其始終者因并書其常語予者志歲月云爾

叢翠亭記

九州皆有名山以為鎮而洛陽天下中周營一作宮漢都自古常一作晉以王者制度臨四方宜其山川之勢雄深偉麗以壯萬邦之所瞻由都城而南以東山之近者關塞萬安轅轅縷氏以連嵩室一作少首尾盤屈踰百里從城中因高以望之衆山逶迤或見或否惟嵩最遠最一作而獨出其巔巖聳秀拔立諸峯上而不可掩蓋其名在祀典與四岳俱備天子巡狩望祭其秩甚尊則其高大殊傑當然城中可以望而見者若巡檢署之居洛北者為尤高巡檢使內殿崇班李君始入其署即相其西南隅而增築之治一作為亭於上儼其南北嚮以望焉見山之連者峯者岫者駱驛二字或從系聯巨卑相附高相摩亭然起崒然止來而向去而背傾崖怪擊若奔若躡若鬪若倚世所傳嵩陽三十六峯者皆可以坐而數之因取其蒼翠叢列之狀遂以叢翠名其亭亭成李君與賓客以酒食登而落之其古所謂居高明而遠眺望者歟既而欲紀其始造之歲月因求修辭而刻之云

非非堂記

權衡之平物動則輕重差其於靜也鎔銖不失水之鑿物動則不能有睹其於靜也毫髮可辨在乎人耳司聽目司視動則亂於聰明其於靜也聞見必審處身者不為外物眩晃而動則其心靜心靜則智識明是是非非無所施而不中夫是是近乎詔非非近乎訕不幸而過寧訕無詔是者君子之常是之何加一以觀之未若非非之為正也予居洛之明年既新廳事有文紀于壁末營其西偏作堂戶北嚮植叢竹闢戶於其南納日月之光設一几一榻架書數百卷朝夕居其中以其靜也閉目澄心覽今照古思慮無所不至焉故其堂以非非為名云

遊大寺院記

六月之庚金伏火見往往暑虹晝明驚雷破柱鬱雲蒸雨斜風酷熱

非有清勝不可以消煩炎故與諸君子有普明後園之遊春爭解繹夏潯漲渠引流穿林命席當水紅薇始開影照波上折花弄流銜鱗對弈非有清吟嘯歌不足以開懽情故與諸君子有避暑之詠太素最少飲詩獨先成坐者欣然繼之曰斜酒歡不能偏以詩寫獨留名於壁而去他日語且道之拂塵視壁某人題也同共索舊句揭之于版以致一時之勝而爲後會之尋云

李秀才東園亭記

修友李公佐有亭在其居之東園今年春以書抵洛命修志之李氏世家隨春秋時稱漢東大國魯桓之後楚始威隨近之常與爲鬪國相勝敗然怪其山川土地既無高深壯厚之勢封域之廣與鄭麥相介纔一二百里非有古疆諸侯制度而爲大國何也其春秋世未嘗通中國盟會朝聘僊二年方見於經以伐見書哀之元年始約列諸侯一會而罷其後乃希見僻居荆夷蓋於蒲騷鄭麥小國之間特大而已故於今雖名藩鎮而實下州山澤之產無美材土地之貢無上物朝廷達官大人自閩陝嶺微出而顯者往往皆是而隨近在天子千里內幾一一無此字百年間未出一士豈其瘠貧薄陋自古然也子少以江南就食居之能道其風土地既瘠枯民給一作急生不舒愉雖豐年大族厚聚之家未嘗有樹林地沼之樂以爲歲時休暇之嬉獨城南李氏爲著姓家多藏書訓子孫以學子爲童子與李氏諸兒戲其家見李氏方治東園往求美草一一手植周視封樹曰日去來園間甚勤李氏壽終公佐嗣家又構亭其間益修先人之所爲子亦壯不復至其家已而去客漢沔遊京師久而乃歸復行城南公佐引子登亭上周尋童子時所見則樹之槩者抱昔之抱者枿草之茁者叢葦之甲者今果矣問其遊兒則有子如予童子之歲矣相與逆數昔時則於今七閏矣然忽忽如前日事因歎嗟徘徊不能去噫予方仕宦奔走不知再至城南登此亭復幾閏幸而再至則東園之

物又幾變也計亭之梁木其蠹瓦甍其一有之溜石物其泐乎隨雖陋非子鄉然予之長也豈能忘情於隨哉公佐好學有行鄉里推之與子友蓋明道二年十月十二日也

樊侯廟災記

鄭之盜有入樊侯廟剽神象之腹者既而大風雨雹近鄭之田麥苗皆死人咸駭曰侯怒而爲之也余謂樊侯本以屠狗立軍功佐沛公至成皇帝位爲列侯邑食舞陽剖符傳封與漢長久禮所謂有功德於民則祀之者歟舞陽距鄭既不遠又漢楚常苦戰榮陽京索間亦侯平生提戈斬級所立功處故廟而食之宜矣方侯之參乘沛公事危鴻門振目一顧使羽失氣其勇力足有過人者故後世言雄武稱樊將軍宜其聰明正直有遺靈矣然當盜之俸刀腹中獨不能保其心腹腎腸哉而反貽怒於無罪之民以騁其忿雖何哉豈生能萬人敵而死不能庇一躬邪豈其靈不神於禦盜而反神於平民以駭其耳目邪風霆兩雹天之所以震耀威罰有司者而侯又得以濫用之邪蓋聞陰陽之氣怒則薄而爲風霆其不和之甚者凝結而爲雹方今歲且久旱伏陰不興壯陽剛燥疑有不和而凝結者豈其適會民之自災也邪不然則暗嗚叱吒使風馳霆擊則侯之威靈暴矣哉

東齋記

官署之東有閣以燕休或曰齋謂夫閑居平心以養思慮若於此而齋戒也故曰齋河南主簿張應之居縣署亦理一作治小齋河南雖赤縣然征賦之民一作名戶纔七八千田利之入率無一鍾之畝人稀土不膏腴則少爭訟幸而歲不大凶亦無通租凡主簿之所職者甚簡少故未嘗憂吏責而得優游以嬉應之又素病羸宜其有以閒居而平心者也應之雖病然力自爲學常曰我之疾氣留而不行血滯而流逆故其病咳血然每體之不康則或取六經百氏若一作與古人迷作之文章誦之愛其深博闕達雄一作奇富偉麗之說則必

茫乎以思暢乎以平釋然不知一作覺疾之在體因多取古書文字貯齋中少休則探以覽焉夫世之善醫者必多畜金石百草之物以毒其疾須其瞑眩而後瘳應之獨能安居是齋以養思慮又以聖人之道和平其心而忘厥疾真古之三字一作可謂樂善者歟傍有小池竹樹環之應之時時引客坐其間飲酒言笑終日一作終日言笑不倦而某嘗從應之於此因書於其壁三字一作于壁而記云

伐樹記

署之東園久弗不治修至始闢之糞瘠溉枯爲蔬圃十數畦又植花果桐竹凡百本春陽既淨萌者將動園之守啓曰園有樗焉其根壯而葉大根壯則梗地脈耗陽氣而新植者不得滋葉大則陰翳蒙礙而新植者不得暢以茂又其材拳曲臃腫疎輕而不堅不足養是宜伐因盡薪之明日圃之守又曰圃之南有杏焉凡其根庇之廣可六七尺其下之地最壤腴以杏故特不得蔬是亦宜薪修曰噫今杏方春且華將待其實若獨不能損數畦之廣爲杏地邪因勿伐既而悟且歎曰吁莊周之說曰樗櫟以不材終其天年桂漆以有用而見傷天今樗誠不材矣然一旦悉翦棄杏之體最堅密美澤可用反見存豈才不才各遭其時之可否邪他日客有過修者僕夫曳薪過堂下因持而語客以所疑客曰是何怪邪夫以無用處無用莊周之貴也以無用而賊有用爲能免哉彼杏之有華實也以有生之具而庇其根幸矣若桂漆之不能逃乎斤斧者蓋有利之者在死勢不得以生也與乎杏實異矣今樗之臃腫不材而以壯大害物其見伐誠宜爾與夫才者死不才者生之說又異矣凡物幸之與不幸視其處之而已客既去修然其言而記之

栽竹記

洛最多竹樊圃基錯包籜特筍之贏歲尙十數萬緡坐安候一作厚利寧肯爲涓川下然其治水庸任土物簡歷芟養率須謹嚴家必有

小齋閑館在虧蔽間賓欲賞輒腰輿以入不問辟疆恬無怪讓也以是名其俗爲好事壬申之秋人吏率持鎌斧亡公私誰何且戕且梓不竭不止守都出令有敢隱一毫爲私不與公上急病服王官爲慢齒王民爲悖如是累日地榛園禿下亡有畜色少見於顏間者由是知其民之急上噫古者伐山林納材董惟是地物之美必登王府以經于用不供謂之畔廢不特謂之暴殄今土宇廣斥賦入委疊上益篤儉非有廣居威園之侈縣官材用顧不衍溢朽蠹而一有非常斂取無藝意者營飾像廟過差乎書不云不作無益害有益又曰君子節用而愛人天子有司所當朝夕謀慮守官與道不可以忽也推類而廣之則竹事猶未

養魚記

折簷之前有隙地方四五丈直對非非堂修竹環繞蔭映未嘗植物因澇以爲池不方不圓任其地形不整不築全其自然縱鋪以濬之汲井以盈之湛乎汪洋晶乎清明微風而波無波而平若星若月精彩下入子偃息其上潛形於臺芒循漪沿岸渺然有江湖千里之想斯足以舒憂隘而娛窮獨也乃求漁者之罾市數十魚童子養之乎其中童子以爲斗斛之水不能廣其容蓋活其小者而棄其大者怪而問之且以是對嗟乎其童子無乃露昏而無識矣乎予觀巨魚枯涸在旁不得其所而羣小魚游戲乎淺狹之間有若自足焉感之而作養魚記

游儻亭記

禹之所治大水七岷山導江其一也江出荊州合沅湘合漢沔以輸之海其爲汪洋誕漫蛟龍水物之所憑風濤晦冥之變怪壯哉是爲四字一作是爲壯哉勇者之觀也吾兄晦叔爲人慷慨喜義勇而有志能讀前史識其盛衰之迹聽其言豁如也困於位卑無所用以老然其胸中亦已壯矣夫壯者之樂非登崇高之邱臨萬里之流不

足以爲適今吾兄家荊州臨大江捨汪洋誕漫壯哉勇者之所觀而方規地爲池方不數丈治亭其上反以爲樂何哉蓋其擊壺而歌解衣而飲陶乎不以汪洋爲大不以方丈爲局則其心豈不浩然哉夫視富貴而不動處卑困而浩然其心者一無此字真勇者也然則水波之漣漪游魚之上下其爲適也與夫莊周所謂專施游於濠梁之樂何以異烏用蛟魚變怪之爲壯哉故名其亭曰游儻亭景祐五年四月二日舟中記

浙川縣興化寺廊記

興化寺新修行廊四行摠六十四間匠者某人用工之力凡若干土木圻墁陶瓦鐵石之費匠工傭食之資凡若干營而主其事者僧延遇延遇自言餘杭人少棄父母稱出家子之鄆州拜浮圖人師其說年十九尙書祠部給牒稱僧遂行四方淳化三年止此寺得維摩院廢基築室自爲師教弟子以居居二十有三年授弟子惠聰而老焉又十八年七十有一矣乃斂其衣孟之具所一作之餘示惠聰而歎曰吾生乾德之癸亥明年而甲子一復而又將甲焉棄杭卽浙四十有三歲去墳墓不哭其郊聞吳歛不懷其土吾豈無鄉閭親戚之仁與愛而樂此土耶吾惟浮圖之說畏且信以忘其生不知大乎此也今老矣凡吾之有衣食之餘生無鄉閭宗族之調沒不待歲時蒸嘗之具盍就吾之素信者而用焉畢吾無恨也於是庀工度材營此廊廊成明道二年之某月也寺始建於隋仁壽四年號法相寺太平興國中改曰興化屋垣甚壯廣由仁壽至明道實四百四十有四年之間凡幾壞幾易未嘗有志刻雖其始造之因亦莫詳焉至延遇爲此役始求志之子因嘉延遇之能果其學也惠聰自少師之雖老益堅不壞又竭其所有期與俱就所信而盡焉夫世之學者知患不至不知患不能果此果於自信者也年月日記

湘潭縣修樂師院佛殿記

湘潭縣樂師院新修佛殿者縣民李遷之所爲也遷之買江湖歲一

買其入數千萬遷之謀曰夫民力役以生者也用力勞者其得厚用力媮者其得薄以其得之豐約必視其用力之多少而必當然後各食其力而無慙焉土非我匹若工農則吾等也夫琢磨一作磨琢煎鍊調筋柔革此工之盡力也斤斲鉏夷吠畝樹藝此農之盡力也然後所食皆不過其勞今我則不然徒幸物之廢興而上下其價權時輕重而操其奇贏游嬉以浮於江湖用力至逸以安而得則過之我有慙於彼焉凡誠我契而不我欺乎我斗斛權衡而不我踰出入關市而不我虞我何能焉是皆在上而爲政者以庇我也何以報焉聞浮屠之爲善其法曰有能捨己之有以崇飾尊嚴我則能陰相之凡有所欲皆如志乃曰盍用我之有所得於此施以報焉且爲善也於是得此寺廢殿而新之又如其法作釋迦佛十六羅漢塑像皆備凡用錢二十萬自景祐二年十二月癸酉訖三年二月甲寅以成其秋會子赴夷陵自真州假其舟行次潯陽見買一石壘而載于舟問其所欲用之因具言其所爲且曰欲歸而記其始造歲月也視其色若欲得子記而不敢言也因善其以買爲生而能知夫力少而得厚以爲幸又知在上者庇己而思有以報顧其所爲之心又趨爲善皆可喜也乃爲之作記問其寺始造之由及其歲月皆不能道也九月十六日記

堰虹隄記

有自岳陽至者以滕侯之書洞庭之圖來告曰願有所記子發書按圖自岳陽門西距金雞之右其外隱然隆高以長者曰堰虹隄問其作而名者曰吾滕侯之所爲也問其所以作之利害曰洞庭天下之至險而岳陽荆潭黔蜀四會之衝也昔舟之往來湖中者至無所寓則皆泊南津其有事于州者遠且勞而又常有風波之恐覆溺之虞今舟之至者皆泊隄下有事于州者近而且無患問其大小之制用

人之力曰長一千尺高三十尺厚加二尺而殺其上得厚三分之二用民力萬有五千五百工而不踰時以成問其始作之謀曰州以事上轉運使轉運使擇其吏之能者行視可否凡三反復而又上于朝廷決之三司然後曰可而皆不能易吾侯之議也曰此君子之作也可以書矣蓋慮於民也深則謀其始也精故能用少而爲功多夫以百步之隄禦天下至險不測之虞惠其民而及于荆潭黔蜀凡往來湖中無遠邇之人皆蒙其利焉且岳陽四會之衝舟之來而止者日凡有幾使隄土石幸久不朽則滕侯之惠利於人物可以數計哉夫事不患於不成而患於易壞蓋作者未始不欲其久存而繼者常至於殆廢自古賢智之士爲其民捍患興利其遺跡往往而在使其繼者皆如始作之心則民到于今受其賜天下豈有遺利乎此滕侯之所以慮而欲有紀於後也滕侯志大材高名聞當世方朝廷用兵急人之時常顯用之而功未及就退守一州無所用心略施其餘以利及物夫慮熟謀審力不勞而功倍作事可以爲後法一宜書不苟一時之譽思爲利於無窮而告來者不以廢二宜書岳之民人與湖中之往來者皆欲爲滕侯紀三宜書以三宜書不可以不書乃爲之書慶曆六年 月 日記

大明水記

世傳陸羽茶經其論水云山水上江水次井水下又云山水乳泉石池漫流者上瀑湧湍激勿食食久令人有頸疾江水取去人遠者井取汲多者其說止於此而未嘗品第天下之味也至張又新爲煎茶水記始云劉伯芻謂水之宜茶者有七等又載羽爲李秀卿論水次第有二十種今考二說與羽茶經皆不合謂山水上乳泉石池又上江水下而井水下伯芻以揚子江爲第一惠山石泉爲第二虎邱石井第三丹陽寺井第四揚州大明寺井第五而松江第六淮水第七與羽說皆相反秀卿所說二十水廬山康王谷水第一無錫惠山

石泉第二蕪州蘭谿石下水第三扇子峽蝦蟆口水第四虎邱寺井水第五廬山招賢寺下方橋潭水第六揚子江南零水第七洪州西山瀑布第八桐柏淮源第九廬山龍池山頂水第十丹陽寺井第十一揚州大明寺井第十二漢江中零水第十三玉虛洞香谿水第十四武關西水第十五松江第十六天台千丈瀑布水第十七郴州圓泉第十八嚴陵灘水第十九雪水第二十如蝦蟆口水西山瀑布天台千丈瀑布皆戒人勿食食之生疾其餘江水居山水上井水居江水上皆與羽經相反疑羽不當二說以自異使誠羽說何足信也得非又新妄附益之邪其述羽辨南零岸時疑怪誕甚妄也水味有美惡而已欲求天下之水一一而次第之者妄說也故其爲說前後不同如此然此井爲水之美者也羽之論水惡潭漫而喜泉源故井取汲者江雖長然衆水雜聚故次山水惟此說近物理云

孫氏碑陰記

皇祐二年夏元規以龍圖閣直學士尙書吏部郎中爲陝西都轉運使道出南京遇疾留河上予時往問之元規疾少間出其皇祖少師之銘而謂予曰此太子太傅杜公所書也吾家世德杜公之父榮公實銘之惟吾二家皆爲當世威族五代之亂播于吳越而不顯然其同祿仕通婚姻子孫之好至今而不絕也自吳越國除衣冠之族皆北子以不幸少孤既壯而從祿養其爲御史諫官以言事謫守處州始得過故鄉識其耆老而求杜氏之銘不可得也今十有五年而始獲于斯自榮公之銘孫氏三世百年至于小子幸成祖考忠義之訓今得進被榮顯于朝廷而列于侍從杜公以道德名望相明天子荷天之福眉壽于家惟吾二家之盛衰與時治亂而上下故屈于彼而伸于此其世德遺文由後有人克保不墜故晦於昔而顯於今將刻銘於碑表之墓隧以昭示來世子孫其以爲如何予曰嗚呼爲善之效無不報然其遲速不必問一作同也故不在身者則在其子孫或

晦於當時者必顯于後世其孫氏杜氏之謂乎刻之金石以遺家之子孫而勸天下之爲善者不亦宜哉

二琴記

吾家三琴其一傳爲張越琴其一傳爲樓則琴其一傳爲雷氏琴其製作皆精而有法然皆不知是否要在其聲如何不問其古今何人作也琴面皆有橫文如蛇腹世之識琴者以此爲古琴蓋其漆過百年始有斷文用以爲驗爾其一金暉其一石暉其一玉暉金暉者張越琴也石暉者樓則琴也玉暉者雷氏琴也金暉其聲暢而遠石暉其聲清實而緩玉暉其聲和而有餘今人有其一已足爲寶而余兼有之然惟石暉者老人之所宜也世人多用金玉琴暉此數物者夜置之燭下炫耀有光老人目昏視暉難準惟石無光置之燭下黑白分明故爲老者之所宜也余自少不喜鄭衛獨愛琴聲尤愛小流水曲平生患難南北奔馳琴曲率皆廢忘獨流水一曲夢寢不忘今老矣猶時時能作之其他不過數小調弄足以自娛琴曲不必多學要于自適琴亦不必多藏然業已有之亦不必以患多而棄也嘉祐七年上巳後一日以疾在告學書信筆作歐陽氏三琴記

吉州學記

慶曆三年天子開天章閣召政事之臣八人賜之坐問治天下其要有幾施於今者宜何先使書于紙以對八人者皆振恐失措俯伏頓首言此事大非愚臣所能及惟陛下幸詔臣等於是退而具述爲條列明年正月始詔州郡吏以賞罰勸農桑二月又詔天下皆立學惟三代仁政之本始於井田而成於學校記曰國有學遂有序黨有庠家有塾其極盛之時大備之制也凡學本於人性磨揉遷革使趨于善至於風俗成而頌聲興蓋其功法施之各有次第其教於人者勤而入於人者漸勤則不倦漸則遲久而深夫以不倦之意待遲久而成功者三王之用心也故其爲法必久而後至太平而爲國皆至六

七百年而未已此其効也三代學制甚詳而後世罕克以舉舉或不知而本末不備又欲於速不待其成而怠故學之道常廢而僅存惟天子明聖深原三代致治之本要在富而教之故先之農桑而繼以學校將以衣食飢寒之民而皆知孝慈禮讓是以詔書再下吏民感悅奔走執事者以後爲羞其年十月吉州之學成州即先夫子廟爲學舍於城西而未備今知州事殿中丞李侯寬之至也謀與州人遷而大之事方上請而詔下學遂以成李侯治吉敏而有方其作學也吉之士率其私錢一百五十萬以助用人之力積二萬一千工而人不以爲勞其良材堅甃之用凡二十二萬三千五百而人不以爲多學有堂寢齋講有藏書之閣有賓客之位有游息之亭嚴嚴翼翼壯偉閎耀而人不以爲侈既成而來學者常三百餘人予世家於吉濫官于朝廷進不能贊明天子之盛美退不能與諸生揖讓乎其中惟幸吉之學教者知學本於勤漸遲久而不倦以治毋廢慢天子之詔使予他日因得歸榮故鄉而謁於學門將見吉之士皆道德明秀可爲公卿過其市而買者不鬻其淫適其野而耕者不爭墮畝入其里閭而長幼相孝慈於其家行其道塗而少者扶羸老壯者代其負荷於路然後樂學之道成而得從鄉先生席于衆賓之後聽鄉樂之歌飲射壺之酒以詩頌天子太平之功而周覽學舍思詠李侯之遺愛不亦美哉故於其始成也刻辭于石以立諸其廡

外集卷第十三

序一

仁宗御集序英宗皇帝密旨代作

在昔君臣聖賢自相戒勅都俞吁咈於朝廷之上而天下治者二帝之言語也號令征伐丁寧約束而其辭彬彬篤厚純雅者二代之文章也堯舜夏商周之威邁乎遠出千載之上而昭然著見百世之下者以其書存焉此典謨訓誥之文所以為歷代之寶也惟我仁考神文聖武明孝皇帝之作二帝之言語而三代之文章也是宜刊之六經而不朽示之萬世而取法矧余小子獲承統業其所以繼大而顯揚之方思勉焉其敢失墜乃詔尚書刑部郎中知制誥邵必右諫議大夫天章閣待制呂公著悉發寶文之舊藏而類次之以為百卷而必公著勉朕以敘述之曰是不可闕也予惟聖考在位四十有二載承三聖之鴻業享百年之威隆而不敢暇逸慎重祭祀以事天而饗親齊莊潔精必以誠信故親郊而見上帝者九恭謝于天地大享于明堂者皆再耕于籍田裕于太廟者皆一而不為勞若夫游娛射獵前世賢王明主之所不能免者則皆非所欲歲時臨幸燕飮臣下必問祖宗之故常闕然非時不聞輿馬之音後苑歲春一賞亦故事也中廢者二十餘年而時改于近郊曲宴于便坐者廬纔一二而已故敘禮祀享升歌樂章藏于有司薦于郊廟者多矣而登臨游賞之適對鮮獻獲之樂前世之所誇者未始一及焉至於萬機之暇泊然凝神不見所好惟躬閱寶訓陳經邇英究鐘律之本元訓師兵之武略披圖以鑒古銘物以自戒其從事於清閑宴息之餘者不過此類嗚呼大禹之勤儉也夫惟一人勞於上則天下安其逸約于己則天下享其豐此禹之所以聖勤儉之功也惟我聖考之在御也澤被生民恩加夷狄寬刑罰息兵革容納諫諍信任賢材措民逸於治安躋俗豐於富庶使海內蒙德受賜涵濡鼓舞而不知所以然者由勤與

儉久而馴致之也是以功成業茂立廟建號為宋仁宗噫仁之為言堯舜之威德而甚美之稱也固已巍乎與天地而亡極矣永惟聖作刻之玉版藏之金匱以耀後嗣而垂無窮庶俾知我聖考仁宗之所以為仁者自勤儉始嗚呼亦惟予小子是訓

送方希則序

蒙莊以紳笏為柴柵班伯以名聲為韉鎖夫軒裳輝華人之所甚欲彼豈惡之邪蓋將有激云爾是以君子輕去就隨卷舒富貴不可誘故其氣浩然勇過乎賁育毀譽不以屑其量恬然不見於喜愠能及是者達人之節而大方之家乎希則茂才入官三舉進士不利命乎數奇時不見用而一作宜且夷然拂衣師心自往推否泰以消息輕寄物之去來淵乎其大雅之君子而幾類於昔賢者乎余自來上都寓謁舍化衣京塵穿履金門者再見春矣會天子方嚮儒學招徠俊良開賢科命卿舉而四方之傑齋貢函詣公車者千百千數余雖後進晚出而倚裳摩跌攘臂以遊其間交者固已多矣晚方得君傾蓋道塗一笑相樂形忘乎外心照乎內雖濂梁之遊不若是也未幾君召試中臺以枉於有司奪席見罷摺一作薦紳議者咸傷冤之君方澹乎冲襟竟於使人不能窺也後數日齋裝具舟泛然東下以余辱交者索言以為贈夫恢識字以見乎遠窮倚伏以至乎命此非可為淺見寡聞者道也希則達人爾可一言之昔公孫常退歸鄉人再推射策遂第一更生書數十上每聞報罷而終為漢名臣以希則之資材識業而沈冥鬱埋者豈非天將張之而固翕之邪不然何遭迴而若此也夫良工晚成者器之大後發先至者驥之良異日垂光虹蜺濯髮雲漢使諸儒後生企仰而不暇此固希則積養一作棄中所畜爾豈假子詳言之哉觴行酒半坐者皆欲去操觚率然辭不逮意同年景山欽之識之亦賦詩以為別則祖離道舊之情備之矣此不復云

送陳經秀才序

伊出陸渾略國南絕山而下東以會河山來水東西北直國門當雙闕隋煬帝初營宮洛陽登邙山南望曰此豈非龍門邪世因謂之龍門非禹貢所謂導河自積石而號龍門者也然山形中斷巖崖缺呀若斷若鑿當禹之治水九州披山斬木遍行天下凡水之破山而出之者皆禹鑿之豈必龍門然伊之流最清淺水濺濺鳴石間刺舟隨波可爲浮泛釣魴擲鰓可供膳羞山兩麓浸流中無巖嶄頽怪盤絕之險而可以登高顧望自長夏而往纔十八里可以朝遊而暮歸故人之遊此者欣然得山水之樂而未嘗有筋骸之勞雖數至不厭也然洛陽西都來此者多達官尊重不可輒輕出幸時一往則騶奴從騎吏屬遮道唱呵後先前僕旁扶登覽一作覽登未周意已怠矣故非有激流上下與魚鳥相傲然徙倚之適也然能得此者惟卑且閑者宜之修爲從事子聰參軍應之主縣簿秀才陳生旅遊皆卑且閑者因相與期於茲夜宿西峯步月松林間登山上方路窮而返明日上香山石樓聽八節灘晚泛舟傍山足夷猶而下賦詩飲酒暮已歸後二日陳生告予且西子方得生喜與之遊也又遽去因書其所以遊以贈其行

送楊子聰戶曹序

士之仕於州郡者必視其地大小高下之望以爲輕重河南大府也參軍雖卑以望而高下之固與他州郡異矣然地大望高居者皆將相名臣達官居又不久率一二歲而甚者半歲而易故河南吏民間坐而偶語道某相某將某官者常各斥而一二歲數之至於郎官御史方鎮牧守使人貴客由河南出者入不候於疆去不餞于郊途逢而不避市坐者不起豈素慢哉蓋其見之習也彼視公卿大臣要官其易如此矧所謂參軍者邪其不羣嘲而隨侮之幸也參軍每上府望門而趨吏摩以肩過不揖反就焉持刺執版求通姓名雖心負其

所有欲進自達不可得其勢鬱鬱卑且賤反甚於它州郡故爲之者未嘗樂也然其間能自以頭角頎然而出者鮮矣其才能之美非有異乎衆莫能也戶曹參軍楊子聰居府中常衣青衫騎破虎鞮出入府門下人固輩一作背視而概易之居一歲相國彭城公薦之集賢學士謝公又薦之士之有文而賢者盡交之其能出其頭角矣若去而之他州郡不特頎然而出矣遂特發將傑然以獨立也子聰南人樂其土風今秩滿調於吏部必吏於南也吾見南之州郡有傑然而獨出者必楊子聰也

送廖倚歸衡山序

元氣之融結爲山川山川之秀麗稱衡湘其蒸爲雲霓其生爲杞梓人居其間得之爲俊傑秀才生於衡山之陽而秀麗之精英者得之尤多故其文則雲霓其材則杞梓始以鄉進士舉於有司不中遂遊公卿間所至無不虛館設席爭以禮下之今永興太原公雅識沈正器君尤深初其鎮秦州也請君與俱行遂趨函關以覽秦都則西方士君子得以承望乎風采矣凡居秦幾歲而東將過京師以歸予嘗以上計吏客都中識君於交逵辱之以及益當君之西也獲錢於國門及夫斯來又相見於洛道語故舊數日乃行夫山川固能產異物而不能畜之者誠有利其用者爾今君之行也子疑夫不能久畜於衡山之阿也

送梅聖俞歸河陽序

至寶潛乎山川之幽而能先羣物以貴於世者負其有異而已故珠潛于泥玉潛于璞不與夫蚌蛤珉石混而棄者其先膺美澤之氣輝然特見于一作於外也土固有潛乎卑位而與夫庸庸之流俯仰上下然卒不混者其文章才美之光氣亦有輝然而特見者矣然求珠者必之乎海求玉者必之乎藍田求賢士者必之乎通邑大都據其會就其名而擇其精焉爾洛陽天子之西都距京師不數驛摺紳仕

宦雜然而處其亦珠玉之淵海歟子方據是而擇之獨得於梅君聖
愈其所謂輝然特見而精者邪聖愈志高而行潔氣秀而色和蘄然
獨出於衆人中初爲河南主簿以親嫌移佐河陽常喜與洛之士遊
故因吏事而至於此余嘗與之徜徉於嵩洛之下每得絕崖倒壑深
林古宇則必相與吟哦其間始而歡然以相得終則一作而暢然覺
乎薰蒸浸漬之爲益也故久而不厭既而以吏事訖言歸余且惜其
去又悲夫潛乎下邑混於庸庸然所謂能先羣物而貴於世者特其
異而已則光氣之輝然者豈能掩之哉

張應之字序

傳曰名以制義謂乎名之必可言也世之士君子名而無所言則
不能稱述一作著以見乎遠余友河南主簿張君名谷字仲容谷之
爲義達而不盈動而能應湛然而深有似乎賢人君子之德其所謂
名而可言者也然嘗竊謂仲容之字不足以表其所以名之之義大
凡物以至虛而爲用者有三其體殊焉有虛其形而能受者器之圓
方是也然受則有量故多盈溢敗覆之過有虛其中而能鳴乎外者
鐘鼓是也然鳴必假物故須篳篥考擊之設有虛其體而能應物者
空谷是也然應必有待故常自然以至靜接物而無窮土之以是爲
其名則君之道從可知也宜易其字曰應之蓋容以言其虛之狀不
若應以體乎容之德也君早以孝廉文藝考行於鄉里薦之於有司
而又試其用於春官者之選深中隱厚學優道充其有以應乎物矣
然今方爲小官主簿書其所應者近而小誠未能有以發乎其聲也
余知夫虛以待之則物之來者益廣響之應者益遠可涯也哉余與
君同以進士登于科又同爲吏于此羣居肩隨宴閑相語得以字而
相呼故於是不能讓而默也敢爲序以易之

尹源字子漸序

奉禮尹君之將西也稱古仁者送人之義責言於其交之所常厚者

其友人渤海歐陽修在錢中率然曰余無似雖不能竊仁者之號奈
嘗辱君之道義切劘爲最深是以一作既不能無言然君之文行余
既友慕欽揖之不暇顧豈有遺忽乏少之可以進於言邪因姑請更
君之字以塞其求云君之名源而字子淵夫源發於淵深且一作其
止也於詁訓既不類又無所表發其名之美甚非稱據禮家之說曰
三王之祭川也先河而後海或源也或委也蓋謂其源發而漸進於
廣大委其注積也楊子曰百川學海而至于海今君之學也皆古文
字聖賢之事業至其尤深而鉅者又爲止淵之譬邪然亦欲君之漸
進不已而至深遠博大之無際也請字之曰子漸古者男子之生舉
以禮而名之年既長見廟筮賓而加元服服加而後字示尊其名以
隆成人也夫君子所以自厚重其名一作所字如此之甚也誠以其
賢否醜美必常與各字相上下而始終鄰婁一小國君片善可稱春
秋褒之曰儀甫解者謂國不如名各不如字以爲極美之談是也子
漸行矣勉之

胡寅字序一作字說

寅之爲言恭且畏之辭虞書寅寅出曰寅錢納曰云者堯命其臣羲
和者修其官而史美之文又曰夙夜惟寅云者舜勅其臣伯夷之
辭也又曰同寅協恭和衷哉云者臯陶戒禹之言堯舜禹之事載
於書者爲萬世之法而其君臣之際相言語者如是是知恭恪畏慎
以思其事雖聖人猶然尉氏胡君名寅以問於余且將字之余以謂
名者古之人生而有別之稱爾若太甲盤庚仲壬者又一無此字直
識其次第而已至於一無此字左邱明者載魯大夫之語始謂命各
必有義而學者又以文王武王伯魚之類附其說者尤非也文王之
世爲商諸侯偶商不幸而紂爲淫虐然猶身一作生服事之豈其生
也已有滅商自大之心而名昌其子始生又期使殺君而發其功業
哉孔子之生子適有饋鯉者遂名之若史魚孔鮒又有饋者乎則是

真為識別之稱未嘗有義也然考古人之命字者則以若有義蓋將釋其名曰其字若此而已胡君曰我所以問其字者將知其實者何謂然因考于古取堯舜禹之書常所道告之而字曰子畏作字說

送陳子履赴絳州翼城序

子昔過鄭遇子履於管城其後二歲子履西自馮翊會子於洛陽而去又明年復來遂與一作領鄉進士自河南貢于京師又明年子方解官洛陽以來則子履中甲科為校書郎其冬得翼城於絳又明年春西拜其親於洛而後行自鄭之遇及茲行凡六歲而四見之焉其始也純然氣和而貌野再見之則道所學問出其文辭煒一作卓然有出於衆人矣又見之則挾其藝以較於羣士而以其能勝之今之行也又曰我將試其為政於絳而且力廣其學當盡落其華而成其實直取古人之所以尚以一無二字距今之為者其修己力行之道厚見而屢進進且一有又字不已而志又大焉孔子曰未見其止孟子曰孰能禦之者歟夫年少者心銳氣盛者好剛苟有志焉無不至也然君子之於臨政也欲果其行必審其思審而後果則不可易而無悔而學者亦在一明疑其所趨而後博其聞其致思必精其發辭必易待其足於中而後見於外子友河南富彥國常與子語於此今彥國在絳而子履往焉又從而辨之後之復見子履豈特若前之見者乎將有駭然者矣

送孫屯田序字英仲

良金美玉藏乎礦石而追師治工莫不孜孜攻且鍊焉吾賦有以利其用也況材臣賢士世不衆出而物官者得不貪以為利乎故今茲屯田孫公始以尚書郎來貳洛政未踰歲則復乘兩馬之傳東上將冠惠文以肅臺憲居不皇暖席行不及具駕蓋被知者之用且祗君命之速也御史本為秦官出入殿中督察監視事無大小皆得以法繩之至按章舉劾發姦治獄以清風軌則朝廷之得失御史繫焉然

過者為之至有伺求以為察剛許以為直驚愚激俗以速名譽至於紀綱大政則蔑乎無聞也故於是選必要以文儒沉正閱達大體然後審審王廷為天子司直之臣況乎白筆霜簡吾家舊物握蘭臥錦為世名郎緣飾以儒雅濟之以文敏余知夫振類綱舉舊典嗣先聲揚休聞在此行也而洛之士君子故相與翹足企聳東向而望俟聞凜然之餘風矣蓋各賦械僕以歌能官且賀舉者之得人也犯較長道揜祛為一作而別又為足効兒女之悲哉

張令注周易序

易之為書無所不備故為其說者亦無所不之蓋滯者執於象數以為用通者流於變化而無窮語精微者務極於幽深喜誇誕者不勝其廣大苟非其正則失而皆入於賊若其推天地之理以明人事之始終而不失其正則王氏超然遠出於前人惜乎不幸短命而不得卒其業也張子之學其勤至矣而其說亦詳焉其為自序尤所發明昔漢儒白首於一經雖孔子亦晚而學易今子年方壯所得已多而學且不止其有不至者乎廬陵歐陽修序

外集卷第十四

序一

刪正黃庭經序

無僂子者不知爲何人也無姓名無爵里世莫得而名之其自號爲無僂子者以警世人之學僂者也其爲言曰自古有道無僂而後世之人知有道而不得其道不知無僂而妄學一作求僂此我之所哀也道者自然之道也生而必死亦自然之理也以自然之道養自然之生不自戕賊天闕而盡其天年此自古聖智之所同也禹走天下乘四載治百川可謂勞其形矣而壽百年顏子蕭然臥於陋巷簞食瓢飲外不誘於物內不動於心可謂至樂矣而年不過三十斯二人者皆古之仁人也勞其形者長年安其樂者短命蓋命有一作之長短量之於天非人力之所能爲也惟不自戕賊而各盡其天年則二人之所同也此所謂以自然之道養自然之生後世貪生之徒爲養生之術者無所不至至茹草木服金石吸日月之精光又有以謂此外物不足恃而反求諸內者於是息慮絕欲鍊精氣動吐納專於內守以養其神其術雖本於養生及其至也尙或可以全形而却疾猶愈於肆欲稱情以害其生者是謂養內之術故上智任之自然其次養內以却疾最下妄意而貪生世傳黃庭經者魏晉間道士養生之書也其說專於養內多奇怪故其傳之久則易爲訛舛今家家異本莫可考正無僂子既甚好古家多集錄古書文字以爲翫好之娛有黃庭經石本者迺永和十三年晉人所書其文頗簡以較今世俗所傳者獨爲有理疑得其真於是喟然嘆曰吾欲曉世以無僂而止人之學者吾力顧未能也吾視世人執奇怪訛舛之書欲求生而反害其生者可不哀哉矧以我翫好之餘拯世人之謬惑何惜而不爲乃爲刪正諸家之異一以永和石本爲定其難曉之言略爲注解庶幾不爲訛謬之說惑世以害生是亦不爲無益若大雅君子則豈取於

此

送王聖紀赴扶風主簿序

前年五月大霖雨殺麥河溢東畿漫下田已而不雨至于一作於八月菽粟死高田三司有言前時溢博州民冒河爲言得免租者蓋萬計今歲秋當租懼民幸水旱因緣得妄免以虧兵食慎勅有司謹之朝廷因舉田令約東州縣吏無遠近皆望風惡民言水旱一以農田勑限甚者皆而絕之畿之民訴其縣不聽則訴於開封又不聽則相與聚立一作於宣德門外訴於宰相於是遣吏四出視諸縣視者還而或言災或言否然言否者十七八最後視者還言民實災而吏徒畏約束以苟自免爾天子聞之惻然盡蠲畿民之租余嘗竊歎曰民生幸而爲畿民有一作且緩急近而易知也雨降于天河溢于地與赤日之出是三者物之易見也前二三歲旱蝗相連朝廷歲歲隨其災之厚薄蠲其賦之多少至兵食不足則歲糴或入粟以爵而充之是在上者之愛人而仁人之心易惻也以易知之近言易見之事告易惻之仁然吏一壅之幾不得達况四海之大幾萬里而遠事之難知不若霖潦赤日之易見者何數使上有惻之之心不得達于下有思告之苦不得通於上者吏居其間而壅之爾可勝歎哉扶風爲縣限關之西距京師在千里外民之不幸而事有隱微者何限其能生死曲直之者令與主簿尉三人而民之志得不壅而聞于州不壅而聞于上縣不壅而民志通者令與主簿尉達之而已王君聖紀主簿於其縣聖紀好學有文佐是縣也始試其爲政焉故以夫素所歎者告之景祐三年二月二十四日廬陵歐陽修序

送太原秀才序

仲尼之徒子思倪記中庸事列于曲臺學欲服圓冠習矩步者皆造次必於中庸聞太原生得之矣生之履行無改是也月旅析木地居軫旆霜風動天萬竅號怒搖鞭長跋一作跋強飯自重時寶元二年

十月初七日乾德令尹歐陽修序

傳易圖序

孟子曰盡信書不如無書夫孟子好學者豈獨忽於書哉蓋其自傷不得親見聖人之作而傳者失其真莫可考正而云也然豈獨無書之如此余讀經解至其引易曰差若毫釐謬以千里之說又讀今周易有何謂子曰者至其繫辭則又曰聖人設卦繫辭焉欲考其真而莫可得然後知孟子之嘆蓋有激云爾說者言當秦焚書時易以下筮得獨不焚其後漢興他書雖出皆多殘缺而易經以故獨完然如經解所引考於今易亡之豈今易亦有亡者耶是亦不得為完書也昔孔子門人追記其言作論語書其首必以子曰者所以別夫子與弟子之言又其言非一事其事非一時文聯屬而言難次第故每更一事必以子曰以起之若文言者夫子自作不應自稱子曰又其作於一時文有次第何假子曰以發之乃知今周易所載非孔子文言之全篇也蓋漢之易師擇取其文以解卦體至其有所不取則文斷而不屬故以子曰起之也其先言何謂而後言子曰者乃講師自為答問之言爾取卦體以為答也亦如公羊穀梁傳春秋先言何曷而後道一作導其師之所傳以為傳也今上繫凡有子曰者亦皆講師之說也然則今易皆出乎講師臨時之說矣幸而講師所引者得載於篇不幸其不及引者其亡豈不多邪嗚呼歷弟子之相傳經講師之去取不徒存者不完而其偽謬之失其可究邪夫繫者有所繫之謂也故曰繫辭焉以斷其吉凶是故謂之交言其為辭各聯屬其一爻者也是則孔子專指爻辭為繫辭而今乃以孔子贊易之文為上下繫辭者何其謬也卦爻之辭或以為文王作或以為周公作孔子言聖人設卦繫辭焉是斥文王周公之作為繫辭不必復自各其所作又為繫辭也況其文乃概言易之大體雜論易之諸卦其辭非有所繫不得謂之繫辭也必然自漢諸儒已有此名不知從何而失之

也漢去周最近不應有失然漢之所為繫辭者得非不為今之繫辭乎易需之辭曰需于血出自穴艮之辭曰艮其限列其夤噬之辭曰見豕負塗載鬼一車是皆險怪奇絕非世常言無為有訓故一作詰考證而學者出其臆見隨事為解果得聖人之旨邪文言繫辭有可攷者其證如此而其非世常言無可攷者又可知矣今徒從夫臆出之說果可盡信之邪此孟子所嘆其不如亡者也易之傳注比他經為尤多然止於王弼其後雖有述者不必皆其授受但其傳之而已大抵易至漢分為三有田何之易焦贛之易費直之易田何之易傳自孔子有上下二篇又有彖象繫辭文言說卦等自為十篇而有章句凡學有章句者皆祖之田氏焦贛之易無所傳授自得乎一作之隱者之學專於陰陽占察之術凡學陰陽占察者皆祖之焦氏費直之易亦無所授又無章句惟以彖象文言等十篇解上下經凡以彖象文言等參入卦中者皆祖之費氏田焦之學廢於漢末費氏獨興遞傳至鄭康成而王弼所注或用康成之說比卦六四之類是弼即鄭本而為注今行世者惟有王弼易其源出於費氏也孔子之古經亡矣

月石硯屏歌序

張景山在號州時命治石橋小版一石中有月形石色紫而月白月中有樹森森然其文黑而枝葉老勁雖世之工畫者不能為蓋奇物也景山南謫留以遺予予念此石古所未有欲但書事則懼不為信因令善畫工來松一作摸寫以為圖予美見之當愛歎也其月滿西旁微有不滿處正如十三四時其樹橫生一枝外出皆其實如此不敢增損貴可信也

七賢畫序

某不幸少孤先人為綿州軍事推官時某始生四歲而先人捐館某為兒童時先妣嘗謂某曰吾歸汝家時極貧汝父為吏至廉又於

物無所嗜惟喜賓客不計其家有無以具酒食在綿州三年他人皆多買蜀物以歸汝父不營一物而俸祿待賓客亦無餘已罷官有絹一匹畫爲七賢圖六幅曰此七君子吾所愛也此外無蜀物後先人調泰州軍事判官卒于任比某十許一作餘歲時家益貧每歲時設席祭祀則張此圖于壁先妣必指某曰吾家故物也後三十餘年圖亦故闈某忝立朝懼其久而益朽損遂取七賢命工裝軸之更可傳百餘年以爲歐陽氏舊物且使子孫不忘先世之清風而示吾先君所好尚又以見吾母少寡而子幼能克成其家不失舊物蓋自先君有事後二十年某始及第今又二十三年矣事迹如此始爲作贊并序

龍茶錄後序

茶爲物之至精而小團又其精者錄敘所謂上品龍茶者是也蓋自君謨始造而歲貢焉一無此字仁宗尤所珍惜雖輔相之臣未嘗輒賜惟南郊大禮致齋之夕中書樞密院各四人共賜一餅宮人煎金爲龍鳳花草貼其上兩府八家分割以歸不敢碾試相一作但家藏以爲寶時有佳客出而傳翫爾至嘉祐七年親享明堂一有致字齋夕始人賜一餅余亦忝預至今藏之余自以諫官供奉仗內至登二府二十餘年纔一獲賜而丹成龍駕砥鼎莫及每一捧翫清血交零而已因君謨著錄輒附于後庶知小團自君謨始而可貴如此九字一作可貴而創自君謨也治平甲辰七月丁丑廬陵歐陽修書還公期書室

傳

桑懌傳

桑懌開封雍邱人其兄慥本舉進士有名懌亦舉進士再不中不去遊汝穎間得龍城廢田數頃退而力耕歲凶汝旁諸縣多盜懌白令願三字一作日願令爲耆長往來里中察姦民因召里中少年戒曰盜

不可爲也吾在此不汝容也少年皆諾里老父子死未斂盜夜脫其衣里老父怯無他子不敢告縣贏其屍不能壅懌聞而悲之然疑少年王生者夜入其家探其篋不使之知覺明日遇之問曰爾諾我不爲盜矣今又盜里父子屍者非爾邪少年色動即推仆地縛之詰共盜者王生指某少年懌呼壯丁守王生又自馳取少年者送縣皆伏法又嘗之郊城遇尉方出捕盜招懌飲酒遂與俱行至賊所藏尉怯陽爲不知以過懌曰賊在此何之乎下馬獨格殺數人因盡縛之又聞襄城有盜十許人獨提一劍以往殺數人縛其餘汝旁縣爲之無盜京西轉運使奏其事授郊城尉天聖中河南諸縣多盜轉運奏移澠池尉嶠古險地多涂山而青灰山尤阻險爲盜所恃惡盜王伯者藏此山時出爲近縣害當此時王伯各聞朝廷爲巡檢者皆授名以捕之既懌至巡檢者僞爲宣頭以示懌將謀招出之懌信之不疑其僞也因謀知伯所在挺身入賊中招之與伯同臥起十餘日信之乃出巡檢者反以兵邀於山口懌幾不自免懌曰巡檢授名懼無功爾即以伯與巡檢使自爲功不復自言巡檢倅獻京師朝廷知其實罪黜巡檢懌爲尉歲餘改授右班殿直永安縣巡檢明道景祐之交天下旱蝗盜賊稍稍起其間有惡賊二十三人不能捕樞密院以傳召懌至京授二十三人各使往捕懌謀曰盜畏吾名必已一作以潰潰則難得矣宜先示之以怯至則閉柵戒軍吏無一人得輒出居數日軍吏不知所爲數請出自效輒不許既而夜與數卒變爲盜服以出迹盜所嘗行處入民家民皆走獨有一媪留爲作飲食饋之如盜乃歸復閉柵三日又往則攜其具就媪媪而以其餘遺媪媪待以爲真盜矣乃稍就媪與語及羣盜輩媪曰彼聞桑懌來始畏之皆遁矣又聞懌閉營不出知其不足畏今皆還也某在某處某在某所矣懌盡鉤得之復三日又往厚遺之遂以實告曰我桑懌也煩媪爲察其實而慎勿泄後三日我復來矣後又三日往媪察其實審矣明日部分

軍士用甲若干人於某所取某盜卒若干人於某處取某盜其尤強者在某所則自馳馬以往士卒不及從惟四騎追之遂與賊遇手殺三人凡二十三人者一日皆獲二十八日復命京師樞密吏謂曰與我銀爲君致閣職懌曰用賂得官非我欲況貧無銀有固不可也吏怒匿其閤以免短使送三班三班用劍與兵馬監押未行會交趾撩叛殺海上巡檢昭化諸州皆警往者數輩不能定因命懌往盡手殺之還乃授閣門祗候懌曰是行也非獨吾功位有居吾上者吾乃其佐也今彼留而我還我賞厚而彼輕得不疑我蓋其功而自伐乎受之徒慚吾心將讓其賞歸己上者以奏臺示子子謂曰讓之必不聽徒以好名與詐取譏也懌歎曰亦思之然士顧其心何如爾當自信其心以行譏何累也若欲避名則善皆不可爲也已余慚其言卒讓之不聽懌雖舉進士而不甚知書然其所爲皆合道理多此類始居雍邱遭大水有粟二廩將以舟載之見民走避溺者遂棄其粟以舟載之見民荒歲聚其里人飼之粟盡乃止懌善劍及鐵簡力過數人而有謀略遇人常畏若不自足其爲人不甚長大亦自修爲威儀言語如不出其口卒然遇人不知其健且勇也廬陵歐陽修曰勇力人所有而能知其勇者少矣若懌可謂義勇之士其學問不深而能者蓋天性也余固喜傳人事尤愛司馬遷善傳而其所書皆偉烈奇節士喜讀之欲學其作而怪今人如遷所書者何少也乃疑遷特雄文善壯其說而古人未必然也及得桑懌事乃知古之人有然焉遷書不誣也知今人固有而不盡知也懌所爲壯矣而不知予文能如遷書使人讀而喜否姑次第之

書一

上范司諫書

月日具官謹齋沐拜書司諫學士執事前月中得進奏吏報云自陳州召至闕拜司諫即欲爲一書以賀多事忽一作卒卒未能也司諫七品官爾於執事得之不爲喜而獨區區欲一賀者誠以諫官者天下之得失一時之公議繫焉今世之官自九卿百執事外至一郡縣吏非無貴官大職可以行其道也然縣越其封郡逾其境雖賢守長不得行以其有守也吏部之官不得理兵部鴻臚之卿不得理光祿以其有司也若天下之失得生民之利害社稷之大計惟所見聞而不繫職司者獨宰相可行之諫官可言之爾故一有謂守士學古懷道者仕於時不得爲宰相必爲諫官諫官雖卑與宰相等天子曰不可宰相曰可天子曰然宰相曰不然坐乎廟堂之上與天子相可否者宰相也天子曰是諫官曰非天子曰必行諫官曰必不可行立殿陛之前與天子爭是非者諫官也宰相尊行其道諫官卑行其言言行道亦行也九卿百司郡縣之吏守一職者任一職之責宰相諫官繫天下之事亦任天下之責然宰相九卿而下失職者受責於有司諫官之失職也取譏於君子有司之法行乎一時君子之譏著之簡冊一作冊書而昭明垂之百世而不泯甚可懼也夫七品之官任天下之責懼百世之譏豈不重邪一作重非材且賢者不能爲也近執事始被召於陳州洛之士大夫相與語曰我識范君知其材也其來不爲御史必爲諫官及命下果然則又相與語曰我識范君知其賢也他日聞有立天子陛下直辭正色面爭庭論者非他人必范君也拜命以來翹首企足竚乎有聞而卒未也竊惑之豈洛之士大夫能料於前而不能料於後也將執事有待而爲也昔韓退之作爭臣論以譏陽城不能極諫卒以諫顯人皆謂城之不諫蓋有待而然退之

不識其意而妄譏修獨以謂不然當退之作論時城爲諫議大夫已五年後又二年始庭論陸贄及沮裴延齡作相欲裂其麻纒兩事爾當德宗時可謂多事矣授受失宜叛將強臣羅列天下又多猜忌進任小人於此之時豈無一事可言而須七年耶當時之事豈無急於沮延齡論陸贄兩事也謂宜朝拜官而夕奏疏也幸而城爲諫官七年適遇延齡陸贄事一諫而罷以塞其責向使止五年六年而遂遷司業是終無一言而去也何所取哉今之居官者率三歲而一遷或一二歲甚者半歲而遷也此又非更可以待乎七年也今天子躬親庶政化理清明雖爲無事然自千里詔執事而拜是官者豈不欲聞正議而樂讜言乎然今未聞有所言說使天下知朝廷有正士而彰吾君有納諫之明也夫布衣章帶之士窮居草茅坐誦書史常恨不見用及用也又曰彼非我職不敢言或曰我位猶卑不得言得言矣又曰我有待是終無一人言也可不惜哉伏惟執事思天子所以見用之意懼君子百世之譏一陳昌言以塞重望且解洛之士大夫之感則幸甚幸甚

與郭秀才書

僕昨以史事至漢東秀才見僕於叔父家以啓事二篇借門刺先進自賓階拜起旋辟甚有儀坐而語諾甚謹讀其辭温密華富甚可愛視秀才待僕之意甚勤而禮也古人之相見必有歡欣交接之誠而不能達乃取羔雁雉鷩之類致其意爲贊而先既致其意又取其無文則以虎豹之皮續畫之布以飾之然後意達情接客既贊而主人必禮以答之爲陳酒設幣篚壺矢燕樂之具將其意又爲賦詩以陳其情今秀才好學甚精博記書史務爲文辭不以羔禽皮布爲飾獨以言文其身而其贊既美其意既勤矣宜秀才責僕之答厚也僕既無主人之具以爲禮獨爲秀才賦詩女曰鷄鳴之卒章曰知子之來之雜佩以贈之取其知客之來豫儲珩璜瑇瑁之美以送客雖無此

物猶言之以致其意厚也僕誠無此物可謂空言之爾秀才年且少貌厚色揚志銳學敏因進其業修其辭暴練緝織之不已使其文采五色潤澤炳鬱若贊以見當世公卿大人非惟若僕空言以贈也必有分庭而禮加邊豆實幣篚延爲上賓者惟勉之不已

與張秀才第一書

修頓首致書秀才足下前日辱以詩賦雜文啓事爲贊披讀三四不能輒休足下家籍河中爲鄉進士精學勵行嘗已遷於里升於府而試於有司矣誠可謂彼邦之秀者歟然士之居也遊必有友學必有師其鄉必有先生長者府縣必有賢守長佐吏彼能爲足下稱才而述美者宜不少矣今乃越數百里犯風霜干一作好大國望官府下首於闕謁者以道一作通姓名趨走拜伏於人之階廡間何其勤勞乎豈由心負其所有而思以一發之邪將顧視其鄉之狹陋不足自廣而謂夫大國多賢士君子可以奮揚而光遠之邪則足下之來也其志豈近而求豈小邪得非磨光濯色計之熟卜之吉而後勇決以來邪今市之門旦而啓商者趨焉買者坐焉持寶而欲價者之焉賣金而求寶者亦之焉閒民無資攘臂以遊者亦之焉洛陽天下之大市也來而欲價者有矣坐而爲之輕重者有矣子居其間其官位學行無動人也是非可否不足取信也其亦無資而攘臂以遊者也今足下之來試其價既就於可以輕重者矣而反以及予夫以無資者當求價之責雖知貪於所得而不知有以爲價也故辱賜以來且歎且喜既不能塞所求以報厚意姑道此以爲謝

與張秀才第二書

修頓首白秀才足下前日去後復取前所貶古今雜文十數篇反復讀之若大節賦樂古太古曲一作典等篇言尤高而志極大尋足下之意豈非閑世病俗究古明道欲援今以復之古而翦剝齊整凡今之紛駁駁冗者歟然後益知足下之好學甚有志者也然而述三皇

太古之道捨近取遠務高言而鮮事實此少過也君子之於學也務爲道爲道必求知古知古明道而後履之以身施之於事而又見於文章而發之以信後世其道周公孔子孟軻之徒常履而行之者是也其文章則六經所載至今而取信者是也其道易知而可法其言易明而可行及誕者言之乃以混蒙虛無爲道洪荒廣略爲古其道難法其言難行孔子之言道曰道不遠人言中庸者曰率性之謂道又曰可離非道也春秋之爲書也以成隱讓而不正之傳者曰春秋信道不信邪謂隱未能蹈道齊侯遷衛書城楚邱與其仁不與其專封傳者曰仁不勝道凡此所謂道者乃聖人之道也此履之於身施之於事而可得者也豈如誕者之言者耶堯禹之書皆曰若稽古傳說曰事不師古匪說攸聞仲尼曰吾好古敏以求之者凡此所謂古者其事乃君臣上下禮樂刑法之事又豈如誕者之言者邪此君子之所學也夫所謂捨近而取遠云者孔子曰堯生周之世去堯舜遠孰與今去堯舜遠也孔子刪書斷自堯典而弗道其前其所謂學則曰祖述堯舜如孔子之聖且勤而弗道其前者豈不能邪蓋以其漸遠而難彰不可以信後世也今生於孔子之絕後而反欲求堯舜之王首仲尼之歎曰蕩蕩乎謂高深闕大而不可名也及夫二典述之炳然一作如使後世尊崇仰望不可及其嚴若天然則書之言豈不高邪然其事不過於親九族平百姓憂水患問臣下誰可任以女妻舜及祀山川見諸侯齊律度謹權衡一有斗斛節字使臣下誅放四罪而已孔子之後惟孟軻最知道然其言不過於教人樹桑麻畜雞豚以謂養生送死爲王道之本夫二典之文豈不爲文孟軻之言道豈不爲道而其事乃世人之甚易知而近者蓋切於事實而已今學者不探本之乃樂誕者之言思混沌於古初以無形爲至道者無有高下遠近使賢者能之愚者可勉而至無過不及而一本乎大中故

能亘萬世可行而不變也今以謂不足爲而務高遠之爲勝以廣誼者無用之說是非學者之所盡心也宜少下其高而近其遠以及乎中則庶乎至矣凡僕之所論者皆陳言淺語如足下之多聞博學不宜爲足下道之也然某之所以云者本一作平欲損足下高遠而俯就之則安一作又敢務爲奇言以自高邪幸足下少思焉

與石推官第一書

修頓首再拜白公操足下前歲於洛陽得在鄆州時所寄書卒然不能卽報遂以及今然其勤心未必若書之怠而獨不知公操察不察也修來京師已一歲也宋州臨汴水公操之譽日與南方之舟至京師修少與時人相接尤寡而譽者無日不聞若幸使盡識舟上人則公操之美可一作何勝道哉凡人之相親者居則握手共席道歡欣既別則問疾病起居以相爲憂者常人之情爾若聞如足下之譽者何必問其他乎聞之欣然亦不減握手之樂也夫不以相見爲歡樂不以疾病爲憂問是豈無情者乎得非相期者在於道爾其或有過而不至于道者乃可爲憂也近於京師頗得足下所爲文讀之甚善其好古閉世之意皆公操自得於古人不待修之贊也然有自許太高詆時太過其論若未深究其源一作原者此事有本末不可卒然一作平語須相見乃能盡然有一事今詳而說此計公操可朝聞而暮改者試與先陳之君貺家有足下手作書一通及有二像記石本始見之駭然不可識徐而視定辨其點畫乃可漸通吁何怪之甚也既而持以問人曰是不能乎書者邪曰非不能也書之法當爾邪曰非也古有之乎曰無今有之乎亦曰無也然則何謂而若是曰特欲與世異而已修聞君子之於學是而已不聞爲異也好學莫如揚雄亦曰如此然古之人或有稱獨行而高世者考其行亦不過乎君子但與世之庸人不合爾行非異世蓋人不及而反棄之舉世斥以爲異者歟及其過聖人猶欲就之於中庸况今書前不師乎古後不足

以爲來者法雖天下皆好之猶不可爲况天下皆非之乃獨爲之何也是果好異以取高歟然嚮謂公操能使人譽者豈其履中道秉常德而然歟抑亦昂然自異以驚世人而得之歟古之教童子者立必正聽不傾常視之毋誑勤謹乎其始惟恐其見異而惑也今足下端然居乎學舍以教人爲師而反率然以自異顧學者何所法哉不幸學者皆從而效之足下又果爲獨異乎今不急止則懼他日有責後生之好怪者推其事罪以奉歸此修所以爲憂而敢告也惟幸察之不宜同年弟歐陽某頓首

第二書

修頓首白公操足下前同年徐君行因得寓書論足下書之怪時僕有妹居襄城喪其夫匍匐將往視之故不能盡其所以云者而略陳焉足下雖不以僕爲作愚而絕之復之以書然果未能論僕之意非足下之不俞由僕聽之不審而論之之略之過也僕見足下書久矣不卽有云而今乃云者何邪始見之疑乎不能書又疑乎忽而不學夫書一藝爾人或不能與忽不學特不必論是以默默然及來京師見二像石本及聞說者云足下不欲同俗而力爲之如前所陳者是誠可諱矣然後一進其說及得足下書自謂不能與前所聞者異然後知所聽之不審也然足下於僕之言亦似未審者足下謂世之善書者能鍾王虞柳不過一藝己之所學乃堯舜周孔之道不必善書又云因僕之言欲勉學之者此皆非也夫所謂鍾王虞柳之書者非獨足下薄之僕固亦薄之矣世之有好學其書而悅之者與嗜飲茗閱畫圖無異但其性之一僻爾豈君子之所務乎然至於書則不可無法古之始有文字也務乎記事而因物取類爲其象故周禮六藝有六書之學其點畫曲直皆有其說楊子曰斷木爲棊梳革爲鞣亦皆有法焉而況書乎今雖隸字已變於古而變古爲隸者非聖人不足師法然其點畫曲直猶有準則如母母子子之相近易之則亂而

不可讀矣今足下以其直者爲斜以其方者爲圓而曰我第行堯舜周孔之道此甚不可也譬如設饌於案加帽於首正襟而坐然後食者此世人常爾若其納足於帽反衣而坐乎案上以飯實酒卮而食曰我行堯舜周孔之道者以此之於世可乎不可也則書雖未事而當從常法不可以爲怪亦猶是矣然足下了不省僕之意凡僕之所陳者非論書之善不但患乎近怪自異以惑後生也若果不能又何必學僕豈區區勸足下以學書者乎足下又云我實有獨異於世者以疾釋老斥文章之雕刻者此又大不可也夫釋老惑者之所爲雕刻文章薄者之所爲足下安知世無明誠質厚君子之不爲乎足下自以爲異是待天下無君子之與己同也仲尼曰後生可畏安知來者之不如今也是則仲尼一言不敢遺天下之後生足下一言待天下以無君子此故所謂大不可也夫士之不爲釋老與不雕刻文章者譬如爲吏而不受貨一作祿財蓋道當爾不足恃以爲賢也屬久苦小疾無意思不宜某頓首

答西京王相公書

月日某謹齋沐頓首復書于相公閣下所遣使二十一日至許州獲賜書一通伏讀周復且慚且悻修幸得備下吏承寵光日趨走于前竊慕古人堂下一言之獻思有所陳而恨愚無識不足自效徒抱區區之心者有日矣昨以初去府輒因奏記陳己疎淺一作賤得蒙大君子休德之幸以爲離去眷戀之辭既有次第臨治以來施政之善者顧寮吏宜有助而闇懦獨無能之過以爲謝因又妄思一言之獻以畢曩時區區之心以爲忠懇又輒贊德美願廣功業益休問以爲禱其誠雖勤其言狂惑猶即著龜之神而再三黷宜其拒以不應伏蒙相公不即棄絕猶辱以書條陳曉諭以爲寵答其爲賜也厚矣然伏讀求繹似有未察其誠者敢一終其說以逃責焉某聞古之爲政者必視年之豐凶年凶則節國用振民窮姦盜生爭訟多而其政繁

年豐民樂然後休息而簡安之以復其常此善爲政者之術而禮典之所載也凡某前所陳者亦不過如是而已其意謂夫乘凶年之後災沴消息風雨既時耕種既得常平之粟既出而民有食關西之運既重至而軍不乏不旱不蝗下民樂利天子不憂慮能如是然後務大體簡細事而已豈有直以鎮俗一作雅救民愁無爲置軍食之說邪伏惟詳而察之昔者孔子嘗爲委吏必曰稱其職而已蓋苟守其官不敢慢其事而思其他伏惟相公所賜之書有居官不出位之言有以見君子用心也然某之所陳非謂略一邦之小而不爲須四海之廣而後施以棄職而越思也蓋願乎進德廣業思以致君而及天下不以一邦而止既禱且勸之辭也噫士之至賤敢以言于其上者有三焉不量輕重之勢不度貴賤之位必爭以理而後止者此直士也蒙德思報不計善否務罄其誠而言者此知義之士也其言乖謬不合法理問不及而自僭者此狂士三字一作狂者也然直士之言雖逆意宜思而擇報德之言雖善原其心之所來宜容而納狂者之言既狂矣宜不足與之辨某士之賤者敢有干而云者於斯三者有其二焉伏惟相公擇之納之不足與之辨而絕之惟所賜焉

投時相書

某不佞疲軟不能強筋骨與工人田夫坐市區服吠畷爲力役之勞獨好取古書文字考尋前世以來聖賢君子之所爲與古之車旗服器名色等數以求國家之治賢愚之任至其炳然而精者時亦穿蠹盜取飾爲文辭以自欣喜然其爲道闊深肆大非愚且迂能所究及用功益精力益不足其勞反甚於市區吠畷而其所較之誠有不及焉豈勞力而役業者成功易勤心而爲道者至之難歟欲悔其所難而反就其易則復慙聖人爲山一簣止焉之言不敢叛棄故退失其小人之事進不及君子之文茫然其心罔識所嚮若棄車川游漫於中流不克攸濟回視陸者顧瞻惶惶然復思之人之有材能抱道

德懷智慮而可自肆於世者雖聖與賢未嘗不有不幸焉禹之偏枯
卻克之跛邱明之盲有不幸其身者矣抱關擊柝恓惶奔走孟子之
戰國楊雄之新室有不幸其時者矣少焉而材學焉而不回買誼之
毀仲舒之禁錮雖有其時有不幸其偶者矣今以六尺可用之軀生
太平有道之世無進身毀罪之懼是其身時偶三者皆幸於古人之
所有者獨不至焉豈天之所予不兩足歟亦勉之未臻歟伏惟明公
履道懷正以相天下上以承天子社稷之大計下以理公卿百職之
宜賢者任之以能不賢者任之以力由士大夫下至於工商賤技皆
適其分而收其長如修之愚既不足任之能亦不堪任以力徒以常
有志於學也今幸以文字試於有司因自顧其身時偶三者之幸也
不能默然以自羞謹以所業雜文五軸覽閣人以俟進退之命焉

外集卷第十六

書二

與范希文書

修頓首再拜知郡學士希文足下自去歲在洛陽聞以言事出陸州及來京師又知移常州尋復得蘇州遷延南方歲且終矣南方美江山水國富魚與稻世之仕宦者舉善地稱東南然竊惟希文登朝廷與國論每顧事是非不顧自身安危則雖有東南之樂豈能為有憂天下之心者樂哉若夫登高以望遠飲旨而食嘉所以宣輔神明亦君子起居寢食之宜也為別久矣所懷如何自古言事而得罪解當復用遠方久處省思慮節動作此非希文自重亦以為天下士君子重也謝希深學士丁家艱將謀南歸有少私事須託營辦因通區區之誠以問左右

代人上王樞密求先集序書

某月日具位某謹齋沐獻書樞密相公閣下某聞傳曰言之無文行而不遠君子之所學也言以載事而文以飾言事信言文乃能表見於後世詩書易春秋皆善載事而尤文者故其傳尤遠荀卿孟軻之徒亦善為言然其道有至有不至故其書或傳或不傳猶繫於時之好惡而興廢之其次楚有大夫者善文其謳歌以傳漢之盛時有賈誼董仲舒司馬相如楊雄能文其文辭以傳由此以來去聖益遠世益薄或衰下迄周隋其間亦時時有善文其言以傳者然皆紛雜滅裂不純信故百不傳一幸而一傳傳亦不顯不能若前數家之焯然暴見而大行也甚矣言之難行也事信矣須文文至矣又繫其所恃之大小以見其行遠不遠也書載堯舜詩載商周易載九聖春秋載文武之法荀孟二家載詩書易春秋者楚之辭載風雅漢之徒各載其時主一作王聲各文物之盛以為辭後之學者蕩然無所載則其言之不純信其傳之不久遠勢使然也至唐之興若太宗之政開元

之治憲宗之功其臣下又爭載之以文其詞或播樂歌或刻金石故其間鉅人碩德一作士闕言高輪流鑠前後者恃其所載之在文也故其言之所載者大且文則其傳也章言之所載者不文而又小則其傳也不章某不佞守先人之緒餘先人在太宗時以文辭為名進士以對策為賢良方正既而守道純正為賢待制逢時太平奮身揚名宜其言之所載文之所行大而可恃以傳也然未能甚行於世者豈其詞續不肖不能繼守而泯沒之抑有由也夫文之行雖繫其所載猶有待焉詩書易春秋待仲尼之刪正荀孟屈原無所待猶待其弟子而傳焉漢之徒亦得其史臣之書其始出也或待其時之有各者而後發其既歿也或待其後之紀次者而傳其為之紀次也非其門人故吏則其親戚朋友如夢得之序子厚李漢之序退之也伏惟閣下學老文鉅為時雄人出入三朝其能望光輝接步武者惟先君為舊則亦先君之所待也豈小子之敢有請焉謹以家集若干卷數寫獻門下惟哀其誠而幸賜之

代楊推官洎上呂相公求見書

某聞古者堯舜禹之為君也有皋夔益稷之徒者五字一作覆裂者之徒為其臣而湯之王也亦有仲虺伊尹者周之始興也有周公召公其復一作後興也有方叔邵虎申一作山甫之徒下而至漢其初也功臣尤多而稱善相者曰蕭曹其後曰丙魏唐之始則曰房杜既而曰姚宋者是皆能以功德佐其君而卓然特以名出眾而見於世者夫詩書之所美莫大乎堯舜二代其後世之盛者莫盛乎漢與唐而其興也必有賢哲之臣出其際而能使其君之功業名譽赫然光顯於萬世而不泯故每一讀其書考其事量其功而想乎其人已亡其事瓌傑奇怪若神人然非如今世之人可得而識也夫其人已亡其事已久去數千百歲之後徒得其書而一讀之猶灼然如在人耳目之際使人希慕稱述之不暇况得身出此序一作生於其時親見其所

爲而一識其人則雖奔走俯伏從妾國執鞭扑猶爲幸歟某嘗願於此而私自爲恨者有日矣國家之興一有也字七十有五年矣禮樂文章可謂太平而傑然稱王公大人於世者往往而出凡士之得身出於斯時者宜爲幸矣又何必忽近以慕遠違目而信耳且安知後之望今不若今之望昔者邪然其實有若不幸者某生也少賤而愚賤則不接乎朝廷之間愚故不能與於事則雖有王公大人者並出而欲一往識之乃無一事可因而進焉噫古之君子在上不幸而不得出其間今之君子在上幸而親見矣又以愚賤見隔而莫可望焉是真可閔歎也已然嘗獨念昔有聞於先君大夫者似有可以藉而爲說以干進於左右者試一陳之先君之生也好學勤力以孤直不自進於時其晚也始登朝廷享榮祿使終不困其志而少伸者蓋實出於大君子之門則相公一有闕下二字之於楊氏不爲無恩矣某不肖其一作莫能繼一作光大先君之世而又苟欲藉之以有緒於闈人誠宜獲罪於下執事者矣然而不詢於長者不謀於耆龜而決然用是以自進者蓋冀萬一得償其素所願焉雖及門而獲罪不猶愈於望古而自爲恨者邪言狂計愚伏惟聰明幸賜察焉

與黃校書論文章書

修頓首啓蒙問及邱舍人所示雜文十篇竊嘗覽之驚歎不已其毀譽等數短篇尤爲篤論然觀其用意在於策論此古人之所難工是以不能無小闕其救弊之說甚詳而革弊未之能至見其弊而識其所以革之者才識兼通然後其文博辯而深切中於時病而不爲空言蓋見其弊必見其所以弊之因若賈生論秦之失而推古養太子之禮此可謂知其本矣然近世應科目文辭求若此者蓋寡必欲其一作至於極致則宜少加意然後煥乎其不可禦矣文章繫乎治亂之說未易談况乎愚昧惡能當此愧畏愧畏修謹白

與高司諫書

修頓首再拜白司諫足下某年十七時家隨州見天聖二年進士及第榜始識足下姓名是時予年少未與人接又居遠方但聞今宋舍人兄弟與葉道卿鄭天休數人者以文學大有名號稱得人而足下廁其間獨無卓卓可道說者予固疑足下不知何如人也其後更十一年予再至京師足下已爲御史裏行然猶未暇一識足下之面但時時於予友尹師魯問足下之賢否而師魯說足下正直有學問君子人也予猶疑之夫正直者不可屈曲有學問者必能辨是非以不可屈之節有能辨是非之明又爲言事之官而俯仰默默無異衆人是果賢者耶此不得使予之不疑三字一作不疑之也自足下爲諫官來始得相識侃然正色論前世事歷歷可聽褒貶是非無一謬說噫持此辯以示人孰不愛之雖予亦疑足下真君子也是予自聞足下之名及相識凡十有四年而三疑之今者推其實迹而較之然後決知足下非君子也前日范希文貶官後與足下相見於安道家足下詆譎希文爲人子始聞之疑是戲言及見師魯亦說足下深非希文所爲然後其疑遂決希文平生剛正好學通古今其立朝有本末天下所共知今又以言事觸宰相得罪足下既不能爲辨其非辜又畏有識者之責已遂隨而詆之以爲當黜是可惜也夫人之性剛果懦軟粟之於天不可勉強雖聖人亦不以不能責人之必能今足下家有老母身惜官位懼飢寒而顧利祿一作祿利不敢一忤宰相以近刑禍此乃庸人之常情不過作一不才諫官爾雖朝廷君子亦將閱足下之不能而不責以必能也今乃不然反昂然自得了無愧畏便毀其賢以爲當黜庶乎飾己不言之過夫力所不敢爲乃愚者之不逮以智文其過此君子之賊也且希文果不賢邪自三四年來從大理寺丞至前行員外郎作待制日日備顧問今班行中無與比者是天子驟用不賢之人夫使天子待不賢以爲賢是聰明有所未盡足下身爲司諫乃耳目之官當其驟用時何不一爲天子辨其不賢

反默默一作然無一語待其自敗然後隨而非之若果賢邪則今日天子與宰相以忤意逐賢人足下不得不言是則足下以希文爲賢亦不免責以爲不賢亦不免責大抵罪在默默爾昔漢殺蕭望之與王章計其當時之議必不肯明言殺賢者也必以石顯王鳳爲忠臣望之與章爲不賢而被罪也今足下視石顯王鳳果忠邪望之與章果不賢邪當時亦有諫臣必不肯自言畏禍而不諫亦必曰當誅而不足諫也今足下視之果當誅邪是直可欺當時之人而不可欺後世也今足下又欲欺今人而不懼後世之不可欺邪況今之人未可欺也伏以今皇帝即位已來進用諫臣容納言論如曹修古劉越雖歿猶被褒稱今希文與孔道輔皆自諫諍擢用足下幸生此時遇納諫之聖主如此猶不敢一言何也前日又聞御史臺榜朝堂戒百官不得越職言事是可言者惟諫臣爾若足下又遂不言是天下無得言者也足下在其位而不言便當去之無妨他人之堪其任者也昨日安道貶官師魯待罪足下猶能以面目見士大夫出入朝中稱諫官是足下不復知人間有羞恥事爾所可惜者聖朝有事諫官不言而使他人言之書在史冊他日爲朝廷羞者足下也春秋之法責賢者備今某區區猶望足下之能一言者不忍便絕足下而不以賢者責也若猶以謂希文不賢而當逐則予今所言如此乃是朋邪之人爾願足下直攜此書于朝使正予罪而誅之使天下皆釋然知希文之當逐亦諫臣之一効也前日足下在安道家召予往論希文之事時坐有他客不能盡所懷故輒布區區伏惟幸察不宜修再拜

與尹師魯第一書

某頓首師魯十二兄書記前在京師相別時約使人如河上既受命便遣白頭奴出城而還言不見舟矣其夕及一作又得師魯手簡乃知留船以待惟不如約方悟此奴懶去而見給臨行臺吏催苛百端不比催師魯人長者有禮使人惶迫不知所爲是以又不留下書在

京師但深託君貺因書遺修意以西始謀陸赴夷陵以大暑又無馬乃作此行沿汴絕淮泛大江凡五千里用一百一十程纔至荆南在路無附書處不知君貺曾作書道修意否及來此問荆人云去郢止兩程方喜得作書以奉問又見家兄言有人見師魯過襄州計今在郢久矣師魯歡戚不問可知所渴欲問者別後安否及家人處之如何莫若相尤否六郎舊疾平否修行雖久然江湖皆昔所游往往有親舊留連又不遇惡風水老母用術者言果以此行爲幸又聞夷陵有米麪魚如京洛又有梨栗橘柚大筍茶餅皆可飲食益相喜賀昨日因參轉運作庭趨始覺身是縣令矣其餘皆如昔時師魯簡中言疑修有自疑之意者非他蓋懼責人太深以取直爾今而思之自決不復疑也然師魯又云聞於朋友此似未知修心當與高書時蓋已知其非君子發於極憤而切責之非以朋友待之也其所爲何足驚駭路中來頗有人以罪出不測見弔者此皆不知修心也師魯又云非忘親此又非也得罪雖死不爲忘親此事須相見可盡其說也五六十年來天生此輩沈默畏慎布在世間相師成風忽見吾輩作此事下至竈間一作門老婢亦相驚怪交口議之不知此事古人日日有也但問所言當否而已又有深相賞歎者此亦是不慣見事人也可嗟世人不見如往時事久矣往時砧斧鼎鑊皆足烹斬人之物然士有死不失義則趨而就之與几席枕藉之無異有義君子在傍見有就死知其當然亦不甚歎賞也史冊所以書之者蓋特欲警後世愚懦者使知事有當然而不得避爾非以爲奇事而詫人也幸今世用刑至仁慈無此物使有而一人就之不知作何等怪駭也然吾輩亦自當絕口不可及前事也居閑僻處日知進道而已此事不須言然師魯以修有自疑之言要知修處之如何故略道也安道與予在楚州談禍福事甚詳安道亦以爲然俟到夷陵寫去然後得知修所以處之之心也又常與安道言每見前世有名人當論事時感激不

避諫死真若知義者及到貶所則感感怨嗟有不堪之窮愁形於文字其心歡戚無異庸人雖韓文公不免此累用此戒安道慎勿作感感之文師魯察修此語則處之心又可知矣近世人因言事亦有所被貶者然或傲逸狂醉自言我爲大不爲小故師魯相別自言益慎職無飲酒此事修今亦遵此語咽喉自出京愈矣至今不曾飲酒到縣後勤官以懲洛中時懶慢矣夷陵有一路紙數日可至郢白頭奴足以往來秋寒矣千萬保重不宜修頓首

同前

某頓首自荊州得吾兄書後尋便西上十月二十六日到縣修茲新年已三月矣所幸者老幼無恙老母舊不飲酒到此來日能飲五七盃隨時甘脆足以盡歡修之舊疾漸以失去亦能飲酒矣不知師魯爲况如何到此便欲遣任進去又爲少事且遣伊入京師於今未回前者於朱駕部處見手書略知動靜夷陵雖小縣然諍訟甚多而田契不明僻遠之地縣吏朴鯁官書無簿籍吏曹不識文字凡百制度非如官府一一自新齊整無不躬親又朱公以故人日相勞慰時時頗有宴集加以乍到閨門內事亦須自營開正以來始以無事治舊史前歲所作十國志蓋是進本務要卷多今若便爲正史盡宜刪削存其大要至如細小之事雖有可紀非于大體自可存之小說不足以累正史數日檢舊本因盡刪去矣十亦去其三三四師魯所撰在京師時不曾細看路中昨來細讀乃大好師魯素以史筆自負果然河東一傳大妙修本所取法此傳爲此外亦有繁簡未中願師魯亦刪之則盡妙也正史更不分五史而通爲紀傳今欲將梁紀并漢周修且試撰次唐晉師魯爲之如前歲之議其他列傳約略且將逐代功臣隨紀各自撰傳待續次盡將五代列傳姓名寫出分而爲二分手作傳不知如此於師魯意如何吾等棄於時聊欲因此粗伸其心少希後世之名如修者幸與師魯相依若成此書亦是榮事今特告朱

公介馳此奉咨且希一報如可以便各下手只候任進歸便令齋國志草本去次春寒保重

同前慶曆五年春

某頓首啓兩路地壤相接幸時文字往還然關附狀蓋書生責以錢穀強其所不能自然公私不濟况其素懶於作書也然時聞師魯動止蘇子美事深欲論敘但避猶豫聞有極言乃知自信爲是甚善甚善子美雖未亟復其如排沮羣議爲益不少晉潞師魯少所樂遊其况如何春寒千萬保重

列傳人名便請師魯錄取一本分定寄來不必以人死年月斷於一代但著功一代多者隨代分之所貴作傳與紀相應千萬遞中却告一信要知尊意

同前慶曆四年

某頓首啓始聞師魯徙晉乃駭然本初與郭推官計師魯必離濱而受晉命道無所淹留徑之晉則謂於晉得相見既聞待闕至九月又計當入洛則謂於洛得相見又聞方留邠州有所陳來期未可知則謂遂不相見而東也及陝乃知直趨絳州修在絳阻兩數日苟更少留猶得道中相遇奈何前後相失如此尚欲留陝走人至解期一爲會而大暑懼煩往復亦須三四日又不欲久在陝使郡人有館待之勞顧此勢不得留慶晉不足屑屑於胸中但向聞師魯有失子之苦時方走河東東道遠多事不暇奉慰修嘗失一五歲小兒已七八年至今思之痛若初失時修素謂諸君自爲真情而善忍世事者尚如此况師魯素自謂有情而子長又賢哉語及此雖修忽自不堪又欲進何說以解師魯心邪自西事已來師魯之髮無黑者其不如意事多矣人生白首矣外物之能攻人者其類甚多安能尚甘於自苦邪得失不足計然雖歡戚勢既極亦當自有否泰惟不動心於憂喜非勇者莫能焉咫尺不相見又無以奉慰惟自寬自愛乃佳

同前慶曆五年夏

某頓首今春子漸兄云亡修在鎮陽半月後方知時又臥病草率走介託趙秉致奠云己之洛中矣苦事苦事修一春在外四月中還家則母病妻皆臥在牀又值沈四替去本司獨力出治公事入營醫藥纔得清卿來卽往德博視河功比還馬蹶傷足至今行履未得以故久不及拜書爲慰一寫朋友號呼之痛子漸平生所爲世謂吉人君子者然人生固不可以善惡較壽夭吾徒所爲天下之人嫉之者半故人相知不比他人易得失一人如他人之失百人也修往時意銳性本真率近年經人事多於世俗間漸似耐煩惟於故人書問尙有道慢之辭在因子漸亡追思數年不以一字往還遂至幽明永隔因此欲勉強於書尺益知交游之難得爲可惜也子漸爲人不待縷述修自知之然其所爲文章及在官有可記事相別多年不知子細蓋錄示一本修於子漸不可無文字墓誌或師魯自作則己若不自作則須修與君謨當作蓋他平生相知深者吾二人與季之才爾縱不作墓誌則行狀或他文字須作一篇也愁人愁人師魯知爲士廉所訟仇家報怨不意亦聽而行此更不須較曲直他不足道也夏君來日詢他潞州事得動靜甚詳差慰夏熱千萬保重

回丁判官書景祐三年

九月十四日宣德郎守峽州夷陵縣令歐陽修謹頓首復書于判官秘校足下修之得夷陵也天子以有罪而不忍卽誅與之一邑而告以訓曰往字吾民而無重前悔故其受命也始懼而後喜自謂曰幸而謂夷陵之不幸也夫有罪而猶得邑又撫安之曰無重前悔是以自幸也昔春秋時鄭詹自齊逃來傳者曰甚佞人來佞人來矣此不欲佞人入其邦而惡其來甚之一作之甚之辭也修之是行也以謂夷陵之官相與語於府吏相與語於家民相與語於道皆曰罪人來矣凡夷陵之人莫不惡之而不欲入其邦若魯國之惡鄭詹來者故

曰夷陵不幸也及舟次江陵之建寧縣人來自夷陵首蒙示書一通言文意勤不徒不惡之而又加以厚禮出其意料之外不勝甚喜而且有不遂之心焉夫人有厚己而自如者特其中有所以當之而不愧也如修之愚少無師傳而學出己見未一發其蘊忽發焉果輒得罪是其學不本實而其中空虛無有而然也今猶未獲一見君子而先辱以書待之厚意以空虛之質當甚厚之意竊懼既見而不若所待徒重媿爾且爲政者之懲有罪也若不鞭膚刑肉以痛切其身則必擇惡地而斥之使其奔走顛蹶窘苦左山右壑前虺虎而後蒺藜動不逢偶吉而輒奇凶其狀可爲閔笑所以深困辱之者欲其知自悔而改爲善也此亦爲政者之仁也故修得罪也與之一邑使載其老母寡妹浮五千五百之江湖冒大熱而履深險一有風波之危則叫號神明以乞須臾之命幸至其所則折身下首以事上官吏人連呼姓名喝出使拜起則趨而走設有大會則坐之壁下使與州校役人爲等伍得一食未徹俎而先走出上官遇之喜怒訶詰常斂手慄股以伺顏色冀一語之溫和不可得所以困辱之如此者亦欲其能自悔咎而改爲善也故修之來也惟困辱之是期今乃不然獨蒙加以厚禮而不以有罪困辱之使不窮厄而得其所爲以無重悔如前訓可謂幸矣然懼其頑心而不知自改也夫士窮莫不欲人之閱己然非有深仁厚義君子之閱矣疑則又懼且慙焉謹因弓手還敢布所懷不勝區區伏惟幸察

外集卷第十七

書二

與謝景山書

修頓首再拜景山十二兄法曹昨送馬人還得所示書并古瓦硯歌一軸近著詩文又三軸不勝欣喜景山留潯州縣行年四十獨能異其少時雋逸之氣就於法度根蒂一作抵前古作為文章一下其筆遂高於人乃知駟駿之馬奔星覆駕及節之鑾和以駕五輅而行於大道則非常馬之所及也古人久困不得其志則多躁憤狎狂失其常節接輿屈原之輩是也景山愈困愈刻意又能恬一作安然習於聖人之道賢於古人遠矣某常自負平生不妄許人之交而所交必得天下之賢才今景山若此於吾之交有光所以某益得自負也幸甚幸甚與君謨往還書不如此何以發明然何必懼人之多見也若欲銜長而恥短則是有爭心於其中有爭心則意不在於謀道也荀卿曰有爭氣者不可與辨此之謂也然君謨既規景山之短不當以示人彼以示人景山不當責之而欲自蔽也願試思之此縣常有人入京頻得書信往還今者茲人入京作書多未能子細夏熱千萬自愛

答李淑內翰書

修啓修違去門館今二年矣罪棄之迹不敢自齒於人是以雖有誠心饑渴之勤而奉記通問彌時曠闕惟恃憐憫寬而置之今月六日郵中蒙賜手書加以存恤憔悴之意感悅何勝幸甚幸甚問及五代紀傳修曩在京師不能自閑輒欲妄作幸因餘論發於教誘假以文字力欲獎成不幸中間自懼咎責爾來二年陸走三千里行萬里勤職補過營私養親偷其暇時不敢自廢收拾綴緝粗若有成然其銓次去取須有義例論議褒貶此豈易當故雖編摭甫就而首尾顛倒未有卷第當更資指授終而成之庶幾可就也最爾之質列一作限

於囚拘瞻望兩牆豈任私恨

答孫正之侔第一書

修白孫生足下丁元珍書至辱所示書及雜文二篇辭博義高而不違於道甚喜甚喜元珍言足下好古自守不妄接人雖居鄉閭罕識其面其特立如此而乃越千里以書見及若某者何以當之豈足下好忽近而慕遠邪得非以道見謀不為遠近親疎然者也僕愚學不足自立而氣力不足以動人而言不見信於世不知足下何為而見及今又豈足下所取信者丁元珍愛我而過譽邪學者不謀道久矣然道固不蕪廢而聖人之書如日月卓乎其可求苟不為刑禍祿利動其心者則勉之皆可至也惟足下力焉而不止則不必相見以目而後可知其心相語以言而後可盡其說也以所示文求足下之志苟不感而止則僕將見足下大發于文著于行而質于行事以要其成焉

答孫正之第二書

某再拜人至辱書甚勤前年丁元珍得所示書喜吾子之好學自立然未深相知及得今書乃知吾子用心如此僕與吾子生而未相識面徒以一言相往來而吾子遽有愛我之意欲戒其過使不陷於小人此非惟朋友之義乃一作而吾父兄訓我者不過如此也僕自知何足愛而吾子所愛者道也世之知道者少幸而有焉又自為過失以取累不得為完人此吾子之所悉也僕知道晚二十年一作以前尚好文華嗜酒歌呼知以為樂而不知其非也及後少識聖人之道而悔其往咎則已布出而不可追矣聖人曰勿謂小惡為無傷言之可慎也如此為僕計者已無奈何惟有力為善以自贖爾書曰改過不吝書不讎成湯之過而稱其能改則所以容後世之能自新者聖人尚爾則僕之改過而自贖其不晚也吾子以謂如此可乎尚為未可則願有可進可贖之說見教吾子待我者厚愛我者深惜乎未得

相見以規吾子之所未至者以報大惠蓋其他不足以爲報也值多事不子細

與王源叔問古碑字書

修頓首白源叔學士秋涼體候無恙修以罪廢不從先生長者之遊久矣今春蒙恩得徙茲邑然地僻而陋罕有學者幸而有之亦不足與講論或事有疑滯無所考正則思見君子北首瞻望而已縣有古碑一片一作研在近郊數大家之間圖經以爲儒瞿先生碑其文云先生諱壽字元考南陽隆人也大略述其有道不仕以教學爲業然不著其姓氏其題額乃云宮儒蒙一作玄儒蒙先生碑蒙字疑非翟字而莫有識者許慎說文亦不載外方無他書可考正其文辭簡質皆隸書書亦古樸隱隱猶可讀乃云熹平二年所立去今蓋八百五十六年矣漢之金石之文存於今者蓋寡惜其將遂磨滅而圖記所載訛謬若斯遂使漢道草莽之賢湮沒而不見源叔好古博學知名今世必識此字或能究見其人本末事迹悉以條示幸甚幸甚源叔居京師事多不當以此煩聽覽漸寒千萬保重不宣

與刁景純學士書

修頓首啓近自罷乾德遂居南陽始見謝舍人知文丈內翰凶訃聞問驚惶不能自已文丈位望並隆然平生亦嘗坎軻數年以來方履亨塗任要劇其去大用尺寸間爾豈富與貴不可力爲而天之賦予多少有限邪凡天之賦予人者又量何事而爲之節也前既不可詰但痛惜感悼而已某自束髮爲學初未有一人知者及首登門便被憐獎開端誘道勤勤不已至其粗若有成而後止雖其後遊於諸公而獲齒多士雖有知者皆莫之先也然亦自念不欲効世俗子一遭人之顧己不以至公相期反趨走門下脅肩詔笑甚者獻讒諛而備使令以卑昵自親名曰報德非惟自私重亦待所知以不厚是故懼此惟欲少勵名節庶不泯然無聞用以不負所知爾某之愚誠所守

如此然雖胥公亦未必諒某此心也自前歲得罪夷陵奔走萬里身日益窮迹日益疎不及再聞語言之音而遂爲幽明之隔嗟夫世俗之態既不欲爲愚誠所守又未克果惟有望謂長號臨柩一奠亦不及此之爲恨何可道也徒能惜不永年與未大用遂與道路之人同歎爾知歸壟廣陵遂謀京居議者多云不便而聞理命若斯必有以也若須春水下汴某歲盡春初當過京師尙可一拜見以盡區區身賤力微於此之時當有可致而無毫髮之助慚愧慚愧不宜某再拜

按內翰骨偃以寶元二年八月卒此書乃當時所作既與刁君不應稱又丈若與胥氏子又不應稱胥公當考

與陳員外書

陳君足下無恙近縣幹上府得書一角屬有少吏事不皇作報既而私有感者修本愚無似固不足以希執友之遊然而羣居平日幸得肩從齒序跪拜起居竊兄弟行寓書存勞謂宜有所款曲以親之意奈何一幅之紙前名後書且狀日牒如上公府退以尋度非謙即疏此乃世之浮道之交外陽相尊者之爲非宜足下之所以賜修也古之書具惟有鉛刀竹木而削札爲刺止於達名姓寓書於簡止於舒心意爲問好惟官府吏曹凡公之事上而下者則曰符曰檄問訊列對下而上者則曰狀位等相以往來曰移曰牒非公之事長吏或自以意曉其下以戒以飭者則曰教下吏以私自達於其屬長而有所候問請謝者則曰牒記書啓故非有狀牒之儀施於非公之事相參如今所行者其原蓋出唐世大臣或貴且尊或有權於時縉紳湊其門以傳響者謂舊禮不足爲重務稍增之然始於刺謁有參候起居因爲之狀及五代始復以候問請謝加狀牒之儀如公之事然止施於官之尊貴及吏之長者其僞繆所從來既遠世不根古以爲當然居今之世無不知此而莫以易者蓋常俗所爲積習以一作已牢

而不得以更之也然士或同師友締交游以道誼相期者尙有手書勤勤之意猶爲近古噫候問請謝非公之事有狀牒之儀以施于尊貴長吏猶曰非古之宜用况又用之於肩從齒序跪拜起居如兄弟者乎豈足下不以道義交游期我而惜手書之勤邪將待以牽俗積習者而姑用世禮以遇我之勤邪不然是爲浮道以陽相尊也是以不勝拳拳之心謹布左右屬以公檄赴滑臺行視驛傳迫於促裝楊秀才且一作且詰縣府中事可悉數

答祖擇之書

修啓秀才人至蒙示書一通并詩賦雜文兩策諭之曰一覽以爲如何某既陋不足以辱好學者之問又其少賤而長窮其素所爲未有足稱以取信於人亦嘗有人問者以不足問之愚而未嘗答人之問足下卒然及之是以愧懼不知所言雖然不遠數百里走使者以及門意厚禮勤何敢不報某聞古之學者必嚴其師師嚴然後道尊道尊然後篤篤敬然後能自守能自守然後果於用果於用然後不畧而不遷三代之衰學校廢至兩漢師道尙存故其學者各守其經以自用是以漢之政理文章與其當時之事後世莫及者其所從來深矣後世師法漸壞而今世無師則學者不尊嚴故自輕其道輕之則不能至不至則不能篤篤信不篤則不知所守守不固則有所畏而物可移是故學者惟俯仰徇時以希祿利爲急至於志本趨末流而不返夫以不信不固之心守不至之學雖欲果於自用莫知其所以用之之道又况有祿利之誘刑禍之懼以遷之哉此足下所謂志古知道之士世所鮮而未有合者由此也足下所爲文用意甚高卓然有不顧世俗之心直欲自到於古人今世之人用心如足下者有幾是則鄉曲之中能爲足下之師者謂誰交游之間能發足下之議論者謂誰學不師則守不一議論不博則無所發明而究其深足下之言高趣遠甚善然所守未一而議論未精此其病也竊惟足下之

交游能爲足下稱才譽美者不少今皆捨之遠而見及乃知足下是欲求其不至此古君子之用心也是以言之不敢隱夫世無師矣學者當師經師經必先求其意意得則心定心定則道純道純則充於中者實中充實則發爲文者輝光施於事者果毅二代兩漢之學不過此也足下患世未有合者而不棄其愚將某以爲合故敢道此未知足下之意合否

與田元均論財計書

修啓承有國計之命朝野忻然引首西望近審已至闕下道路勞止瘵味多休弊乏之餘諒煩精慮建利害更法制甚易若欲其必行而無沮改則實難裁冗長塞僥倖非難然欲其能久而無怨謗則不易爲大計既遲久而莫待收細碎又無益而徒勞凡相知爲元均慮者多如此說不審以爲如何但日冀公私蒙福爾春暄千萬爲國自厚一作重不宜修再拜

答徐無黨第一書

修白人還惠書及始隱書論等并前所記獲麟論文辭馳騁之際豈常人筆力可到於辨論經旨則不敢以爲是蓋吾子自信甚銳又嘗取信於某苟以爲然誰能奉奪凡今治經者莫不患聖人之意不明而爲諸儒以自出之說汨之也今於經外又自爲說則是患沙渾水而投土益之也不若沙土盡去則水清而明矣魯隱公南面治其國臣其吏民者十餘年死而入廟立謚稱公則當時魯人孰謂息姑不爲君也孔子修春秋凡與諸侯盟會行師命將一以公書之於其卒也書曰公薨則聖人何嘗異隱於他公也據經隱公立十一年而薨則左氏何從而知其攝公羊穀梁何從而見其有讓桓之迹吾子亦何從而云云也仲尼曰吾其爲東周乎與吾子起於平王之說何相反之甚邪故某常告學者慎於述作誠以是也秋初許相訪此不予細略開其端吾子必能自思而得之不宜某書白

答徐無黨第二書

修再拜白前夜自外歸燈下得吾子書言陳烈事亟讀之未暇求陳君之所爲尤愛吾子辭意甚質徑知吾子之有成不負其千里所以去父母而來之之意修亦粗塞責不愧于吾子之父母與親戚鄰里鄉黨之人甚善其善修今歲遠京師職在言責值天下多事常日夕汲汲爲明天子求人間利病無小大皆躬自訪問於人又夏大暑老母病故不得從今學者以遊得少如前歲之樂自入京來便聞陳君之名數以問於人多不識今得吾子所言如見其面矣幸母病今已愈望時過且謀共見陳君

與陳之方書

某白陳君足下某憂患早衰之人也廢學不講久矣而幸士子不見棄日有來吾門者至於粹然仁義之言譁然閎博之辯蔚然組麗之文閱於吾目多矣若吾子之文辯明而曲暢峻潔而舒遲變動往來有馳有止而皆中於節使人喜慕而不厭者誠難得也某固不能悉得天下之士然盡某所見如吾子之文豈一二而可數哉爲而不止行而必至畜厚而發益遠吾雖不能悉得天下之士然天下之士如吾子者可一二而數也某老矣心耗力憊有所不能徒喜後生之奮於斯也恨不得鳴躍於其間而從之姑奉此爲謝

外集卷第十八

外集卷第十九 集六十九

書四

答宋咸書至和二年

某啓去年冬承惠問時以奉使契丹不皇爲答茲者人至辱書且勝感愧某區區于此無補當時徒於京師大衆中汨汨人事奮學都廢耳不聞仁義之言久矣惟君子不以甘榮祿走聲利之徒見待時有所教幸甚幸甚天日之高以其下臨於人者不遠而自古至今積千萬人之智測驗之得其如此故時亦有差者由不得其真也聖人之言在人情不遠然自戰國及今述者多矣所以吾儕猶不能默者以前人未得其真也然亦當積千萬人之見庶幾得者多而近是此所以學者不可以止也足下以爲如何尙或不然當賜教向熱爲政外自重以副所懷不宜某再拜

與集賢杜相公慶曆四年秋

修皇恐頓首三兩日不審尊體動止何似某被催赴任不得躬造門下豈勝戀戀之誠保州叛卒必欲招之而外不退兵雖使忠臣孝子不免疑惑今又聞有築城之請雖知朝廷不以爲是而便宜之旨已下軍前萬一他事盡如築城之繆遂不請而便宜從事脫有敗誤則一方之事繫天下安危伏惟聰明何以裁處某才薄力劣不足以備急緩一作緩急之用若止於調發輸餉此俗吏之所能爲故自請願與田李共議兵事至今寢而不報內竊自度不報誠宜然朝廷既已力排言事者而託以用於外今反疑之而不任以事何以解言者之惑哉此某之不可論也秋暑尙繁伏惟爲國自重

答李大臨學士書

修再拜人至辱書甚慰永陽窮僻而多山林之景又嘗得賢士君子巨焉修在滁之二年得博士杜君與處甚樂每登臨覽泉石之際惟恐其去也其後徙官廣陵忽忽不逾歲而求一作來賴在賴逾年差

自適然滁之山林泉石與杜君共樂者未嘗輒一日忘于心也今足下在滁而事陳君與居足下知道之明者固能達于進退窮通之理能達於此而無累於心然後山林泉石可以樂必與賢者共然後登臨之際有以樂也足下所得與修之得者同而有小異者修不足以知道獨其遭世憂患多齒髮衰因得閑處而爲宜爾此爲與足下異也不知足下之樂惟恐其去能與修同否況足下學至文高宜有所施於當世不得若某之戀戀此其與某異也得陳君所寄二圖覽其景物之宛然復思二賢相與之樂恨不得追逐于其間因人還草率

答陳知明書

修再拜啓人至辱書有秦燕玉馬之說何其謙之甚邪某昨在廣陵一相見於衆人中未有相知之意及食將徹案方接足下以言而始知其非衆人也然尙不暇少留以盡修之所欲得者後常以爲恨也去年辱書于賴又客之來自滁者皆能道足下之事於是判然以爲士之相知或相望於千里或相追於異世知其道而已不必接其迹也則廣陵之不留無足以爲恨此前書所道勤備矣某於足下下必見其文章之自述然後以爲知也明矣蓋嘗辱示詩及書讀而愛之不已以謂閱博高深必有放縱奔馳而可喜者雖得之多宜不厭也因復輒有求於足下者譬之垂涎已啖一嚙之味而思快意於五鼎之間也何足怪哉幸足下無惜

與王深甫論世譜帖

修啓惠借顏氏譜得見一二大幸前世常多喪亂而士大夫之世譜未嘗絕也自五代迄今家家亡之由士不自重禮俗苟簡之使然雖使人人自求其家猶不可得况一人之力兼考於繆亂亡失之餘能如所示者非深甫之好學深思莫能也顏譜且留愚有未達須因見過得請集古錄未始委僮奴昨日大熱艱於檢尋今送不次修再拜

同前

修啓辱示承日莫體佳高陽說如此爲得之矣載初元年正月乃永昌年之十一月爾嘗與永昌同年天授庚寅載初己丑爾然自天授至長安四年甲辰凡十五年使自武德不除周年則乾元己亥乃一百四十二年除周年則大曆乙卯爲一百四十年乙卯大曆十年也哥舒晃事在八年又江西出兵不當越數千里出於明州此又可疑前日奉答一作啓後再將校勘却未敢書更俟面議也蓋江西出嶺路絕近次則出湖南已爲稍遠就令出明州非江西可節制也病一作疾嗽無悖姑此爲報修頓首

同前

修啓蒙疏示開益已多感服何已唐除周歲誠如所論兼密罷明州在建中二年則大曆八九年後做爲明守而密代之以年數推之與乾元之說不較可知但恐除周之前人未必如此難以臆斷爲定當兩載之使來者自擇也高陽門徒之說恐便是高陽人未知何如一作如何郭子儀家傳等先送碑當續馳修再拜 所推誠好然更深思唐人除周之說恐未必然也則天是天授中改周惟復是載初相較亦只一年爾

與王深甫論五代張憲帖

修啓辱教甚詳蒙益不淺所疑所論皆與修所考驗者同今既疑之則欲著一小論于傳後以哀其忠如此得否修之所書只是變賜死爲見殺於憲無所損益憲初節甚明但棄城而走不若守位而死已失此節則見殺與賜死同爾其心則可喜但舉措不中爾更爲不見張昭傳中所載或爲錄示尤幸目痛草草不次修再拜 莊宗月一日遇弒存霸在河中聞變走太原見殺而憲亦走忻州明宗初三日入洛十日監國二十日即位憲二十四日死初以此疑之又本傳言明宗郊天憲得昭雪則似非明宗殺之更爲思之如何

同前

修啓辱教益詳盡多荷多荷存霸奔太原人言其馬鞅斷疑其戰敗而來存霸乃以情告仍自髡衣僧衣見符彥超曰願爲山僧望公庇護彥超亦欲留之俟朝命爲軍衆所殺若此則憲似知莊宗已崩據張昭勸憲奉表則知新君立明矣但不知其走忻州何故也此意可喜而死不得其所爾食後見過更盡高議可乎修再拜

問王深甫五月一日會朝帖

修啓信宿爲况清佳前日貪奉笑言有一事數日欲咨問偶忘之唐時有五月一日會朝之禮略記其始本出於道家是日君臣集會其儀甚盛而其說不經不知起自何帝亦記得是開元已後方有略與批示其時爲幸修再拜 中間嘗罷後又復行復行恐是憲宗朝亦不記子細

與杜訢論祁公墓誌書

修啓專人至辱書伏承暑熱孝履支福深慰企想所要文字終不會得的實墜日以謂十日尙遠遂未曾銓次忽辱見索亦莫知葬期遠近爲一兒子患傷寒二次勞發已二字一作復一月在牀虛乏可憂日夕憂迫心緒紛亂不能清思於文辭縱使強爲之辭亦不工有玷清德如壑期逼乞且令韓舍人將行狀添改作誌文修雖遲緩當自作文一篇紀述平生知己先相公最深別無報答只有文字是本職固不辭雖足下不見命亦自當作然須慎重重要傳久遠不關速也苟粗能傳述於後亦不必行疑况治命不用邪若壑期未有日可待即尤好也然亦只月十日可了若以愚見誌文不若且用韓公行狀爲便緣修文字簡略止記大節期於久遠恐難滿孝子意但自報知己盡心於紀錄則可耳更乞裁擇范公家神刻爲其子擅自增損不免更作文字發明欲後世以家集爲信續得錄呈尹氏子卒請韓大尉別爲墓表以此見朋友門生故吏與孝子用心常異修豈負知己者范尹二家亦可爲鑿更思之然能有意於傳久則須紀大而略小此

可與通識之士語足下必深曉此但因壘期速恐倉卒不及遂及斯言也幸察京師區區中日爲病患憂煎不時遣人致問夏熱節哀自愛

同前

修啓秋涼不審孝履何似前於遞中辱書所示誌文今已撰了爲無得力人遂託李學士送達修愚鄙辱正獻公知遇不比他人公之知人推獎未有若修之勤者修遇知己未有若公知之深也其論報之分他事皆云非公所欲惟紀述感德可以盡門生故吏之分然以衰病文字不工不能次序萬分之一此尤爲愧恨也然所紀事皆錄實有稽據皆大節與人之所難者其他常人所能者在他人更無巨美不可不書於公爲可略者皆不暇書如作提刑斷獄之類然又不知尊意以爲何如苟見信甚幸或倖一真楷書而字畫不怪者書之亦所以傳世易曉之意也刻石了多乞數本爲人來求者多葬事知定十月不知何人簽蓋早了爲善昨禮院定諡曰正獻精白守節曰正正避御名音同所放也文賢有成曰獻義兼文節文正矣知己今不可得每臨公事但知感涕爾漸寒侍親千萬節哀自愛不宜修再拜

問劉原甫侍讀入閣儀帖

入閣之禮起自何年間是何殿開延英亦起何年五日起居遂廢正衙不坐起何年三者孤陋所不詳乞示其本末

修啓辱示甚煩尊用然得以開釋未悟其幸尤多感刻感刻問此一事本爲明宗置內殿起居又復入閣當時緣昭宗朝誤繆不合故事也朔望宣政一事尤失紫宸入閣本制也然不見初起年代今乃入閣却御前殿自此昭宗失之延英之對與入閣合儀亦自昭宗失之起居而廢正衙自明宗失之至今遂爾舍元大殿大朝會宣政常朝謂之正衙本爲玄宗朔望以陵寢屬食不復御正殿始於便殿召入宰臣已下此入閣之漸今云朔望御宣政殿大失之矣延英便殿亦

謂入閣乃五日一開與宰臣議事宣政立而奏事乾賜坐本場延英賜坐而論事蓋漸密而漸親也昭宗始一日中九度開延英入閣仍於一度開延英一日行之前殿入閣唐末即於朔望日前殿正觀殿行入閣自後唐至國朝並於文明殿行入閣皆非便殿或指朔望宣政爲入閣才誤說也修於史已不熟於制度又不熟乞爲參詳之

與蔡君謨求書集古錄序書

修啓竊一作曩在河朔不能自閑嘗集錄前世金石之遺文自三代以來古文奇字莫不皆有中間雖罪戾擯斥水陸奔走顛危困踣兼之人事吉凶憂患悲愁無聊倉卒未嘗一日忘也蓋自慶曆乙酉逮嘉祐壬寅十有八年而得千卷顧其勤至矣然亦可謂富哉竊復自念好嗜與俗異馳乃獨區區收拾世人之所棄者惟恐不及是又可笑也因輒自敘其事庶以見其志焉然顧其文鄙意陋不足以示人既則一作而自視前所集錄雖淨屠老子詭妄之說常見貶絕於吾儒者往往取之而不忍遽廢者何哉豈非特以其字畫之工邪然則字書之法雖爲學者之餘事亦有助於金石之傳也若浮屠老子之說當棄而獲存者乃直以字畫而傳是其幸而得所託爾豈特有助而已哉僕之文陋矣顧不能以自傳其或幸而得所託則未必不傳也由是言之爲僕不朽之託者在君謨一揮毫之頃爾竊惟君子樂善欲成人之美者或聞斯說謂宜有不能却也故輒持其說以進而不疑伏惟幸察

與樂秀才第一書景祐三年續添

某白秀才樂君足下昨者舟行往來皆辱見過又蒙以所業一冊先之啓事宛然如後進之見先達之儀某年始三十矣其不從鄉進士之後者於今纔七年而官僅得一縣令又爲有罪之人其德爵齒三者皆不足以稱足下之所得此其所以爲慚自冬涉春陰洩不止夷陵水土之氣比頗作疾又苦多事是以闕然聞古人之於學也講之

深而信之篤其充於中者足而後發乎外者大以光譬夫金玉之有英華非由磨飾染濯之所爲而由其質性堅實而光輝之發自然也易之大畜曰剛健篤實輝光日新謂夫畜於其內者實而後發爲光輝者日益新而不竭也故其文曰君子多識前言往行以畜其德此之謂也古人之學者非一家其爲道雖同言語文章未嘗相似孔子之繫易周公之作書奚斯之作頌其辭皆不同而各自以爲經子游子夏子張與顏回同一師其爲人皆不同各由其性而就於道耳今之學者或不然不務深講而篤信之徒巧其詞以爲華張其言以爲大夫強爲則用力艱用力艱則有限則易竭又其爲辭不規模於前人則必屈曲變態以隨時俗之所好鮮克自立此其充於中者不足而莫自知其所守也竊讀足下之所爲高健志甚壯而力有餘譬夫良駿之馬有其質矣使駕大輅而王良馭之節以和鑾而行大道不難也夫欲充其中由講之深至其深然後知自守能如是矣言出其口而皆文修見惡於時棄身此邑不敢自齒於人人所共棄而足下過禮之以賢明巧正見待雖不敢當是以盡所懷爲報以塞其慚某頓首

京本英辭類彙有答樂秀才二書首尾意頗相類其一居士集所無今錄如右其二雖載居士集而用字或不同併列于左見居士集四十七卷

策問

問進士策題五道

問古之人作詩亦因時之得失變其情於中而發之於詠歌而已一人之為詠歌歡樂悲瘁宜若所繫者未為重矣然子夏序詩以謂動天地感鬼神莫近於詩者詩之言果足以動天地感鬼神乎

問古之為聖人者莫如舜賢而與聖人近者莫如顏回仲尼稱虞舜不可及而顏氏其殆庶幾至其稱舜之所為則曰好問而好察邇言而已稱顏氏之好學則曰不遷怒不貳過而已然則如是者是為不可及與庶幾乎

問漢宣中興丙魏為相後之人言為相之賢者必稽焉宜其有與樹之業顯於世也及觀其紀傳亦無他功德相獨有明堂月令一章吉之事大概而已不識丙魏之所以得賢於後世者可得見乎

問子丑寅三代之正也孔子何獨行夏之時說者曰夏時質也忠實文三代之政也孔子何獨曰從周之文使夏之時為正則商周之時不正乎周之政尚文則夏商之政無文乎夫周以子則今之冬十一月乃春正也商以丑則今之冬十二月乃春正也夫以冬十一月十有二月頒春正於天下而教民之事無乃與天時相戾歟夫君臣之相和父子之相愛兄弟夫婦之相為悌順是文之本也仁以守之義以制之禮樂以和節之是文之成也使夏商而無文則夏商之世無君臣父子兄弟夫婦之制歟說者曰三代之正皆同也子丑寅出於後儒之妄也忠實文亦出於後儒之妄也使夫誠出於後儒之妄則孔子安有行時從文之說

問周天子之田方千里號稱萬乘萬乘之馬皆具又有十二閑之馬而六卿三百六十官必皆各有車馬車馬豈不多乎哉千里之地為田幾何其牧養之地又幾何而能容馬若是之多乎哉千里之地為

田幾何馬之法又如何今天下廣矣常患無馬豈古之善養馬而今不善乎宜有說以對也

證議

贈太尉夏守贊證議

議曰謹按證法世篤勤勞曰忠小心恭慎曰信今考公之行狀言其父以軍校歿戰陣遂獲賞延子以君命死道塗得證莊一作壯恪公自束髮已能孝謹遭遇先帝給事左右材敏自力愈久益勤至於典掌師旅宿衛玉宮出領節旄入登樞輔安享榮寵六十餘年方真宗時繼遷叛命用兵朔方契丹未和再駕河北多事之際其勤最著或奔走自效不暇過於私家親暱雖至未嘗敢請恩澤歷小大之職無纖毫之過先朝用此尤加獎擢昨者西師始出父子迭行北顧之憂選任居首迫於奄忽厥用未彰較其始終其迹可見所謂勤勞著於奕世恭慎見於小心考之不誣宜以節惠謹合二證證曰忠信謹謹議

齋文

順祖惠元睿明皇帝忌辰齋文

伏以積仁累德王業始於艱難追遠奉先孝治刑於遐邇式臨諱日祗率舊章順祖惠元睿明皇帝肇啓慶基克光先烈昭聖護而貽厥隆廟德而可觀今皇帝嗣繼大明克昌威業屬諱辰而增感因佛事以薦嚴順祖皇帝伏願如在之威百百年而可畏無疆之祚佑億世以垂休今皇帝伏願聖壽延鴻丕圖永固然後願鈞衡舊德宗室羣英下洎臣民咸均福祐

祭文

祭沙山太守祈晴文

修謹告祭于沙山太守之神修扶護母喪歸附先域大事有日陰雲屢興修不孝罪逆賴天地鬼神哀憐行四千里之江得無風波之恐今即事矣幸神寬之假三日之不雨則始終之賜報德何窮尚饗

祭五龍祈雨文一作祭五龍神

伏以去秋之潦豐不補凶飢民食糴麥爲命而天久不雨苗將稿焉
早非人力之能移徒知奔走雨者龍神之所作其忍不爲薄奠拙辭
致誠而已尙饗

祈晴文

吏之所以食民之賦而神之所以享民之祭祀者吏以刑政庇民而
神能以禍福加之也冤枉之無訴刑罰之不明此人力能爲而吏不
舉之其過宜在吏水旱而不時饑饉而疾疫此人力所不能及而皆
職神之由今自冬涉春雨雪不止居人無食市肆不開人皆食糴以
延旦夕之命至於無食有自殺者此縣吏不能治民以致神禍之過
此宜罰縣令之身使爲病恙災殃以塞其責不宜使數千戶人皆受
其災雨雪雖久及今而止民猶有望焉惟神閱之

祭東嶽文

某比者獲解郡章許還里閭方巾車而卽路屬暑雨之時行輒以愚
誠仰干大造蒙神之惠賜以不違吹清颯而散陰暴秋陽以涸轍遂
無道路之阻得返草茅之居荷德之深不知爲報一觴之潔謹用薦
衷尙饗

祭金城夫人文

修謹遺表第鄭興宗以清酌庶羞之奠致祭于金城夫人之靈修遭
懼酷罰方在哀疚護喪歸葬千里之外忽承凶訃情禮莫伸聊陳薄
奠致誠而已尙饗

祭王深甫文

嗟吾深甫孝悌行於鄉黨信義施於友朋貧與賤不爲之取富與貴
不爲之榮雖得於內者無待於外物而不可掩者蓋由其至誠故方
身窮於陋巷而名已重於朝廷若夫利害不動其心富貴不更其守
處於衆而不隨臨於得而不苟惟吾知子於初世徒信子於久念昔

居穎我壯而子方少年今我老矣來歸而送子于泉古人所居必有
是邦之友况如子者豈止一邦之賢舉觴永訣夫復何言

外集卷第二十

託生子三

鄂關

柳子入

俊生子一

翽生子一

葛

伸生子一

宏生子二

至

儀生子四

猛生子二

起

谷生子二

麗

寬生子四

熾

焯

燁

曉

藹

脩

宗道

宗顏

宗孟

凱

傲生子三

穎生子三

羽

景

暹

邦關

惟歐陽氏自得姓以來子孫衆多而譜隨親疎宜有詳略其上世遠而支分疎者事或具於史或各見其家譜今自吉州府君而下具列如左

如左

吉州府君諱琮葬袁州之萍鄉而子孫始家於吉州當唐之末黃巢

攻陷州縣府君率州人扞賊鄉里賴以保全至今人稱其德

安福府君諱萬事迹闕

處士諱雅字正言高年不仕德行稱於鄉里夫人龍氏

詔陽府君諱效字德用爲詔州詔陽主簿夫人周氏

處士諱託字達明隱德不仕鄉里稱之凡民有爭決之官府者後多

復訴訟有從處士平其曲直者遂不復爭夫人王氏

令公府君諱柳字可封仕南唐爲武昌令吉州軍事衝推官至檢校

右散騎常侍兼御史大夫性至孝兄弟相友愛有紫芝一莖兩葩生

於榴鄉人以爲孝德所感爲著賦頌享年九十有四蒸歐桂里橫溪

保之鸞湖夫人劉氏府君累贈金紫光祿大夫大師中書令夫人累

封楚國太夫人

屯田府君諱俊第三十六仕南唐爲洪州屯田院判官享年五十七

葬栗源夫人李氏

處士諱伸第三十七守道不仕享年七十有三葬潞陂夫人蕭氏

屯田府君諱儀第三十八字象之仕南唐舉進士及第官至屯田郎

中府君之登進士第也父母皆在鄉里榮之乃改廬慶之文霸鄉安德里爲儒林鄉歐桂里其所居履順坊爲具慶坊享年五十有五葬官山夫人王氏

處士諱傑第三十九守道不仕夫人王氏張氏

靜江府君諱信第四十仕南唐爲靜江軍團練使據宋史所撰安福

太君墓志列序入子官封云信爲靜江軍團練使兼兼兼秋南唐官品

疑與今異享年二十有五葬會家莊夫人郭氏

令公府君諱偃第四十一少以文學著稱南唐取從進士舉乃詣文

理院上書獻其所爲文十餘萬言召試爲南京街院判官享年三十

八葬吉水之回陂夫人李氏府君累贈金紫光祿大夫太師中書令

兼尙書令夫人累封吳國太夫人

處士諱佺第四十二晦迹不仕享年四十有七葬東田夫人陸氏

工部府君諱倣第四十三仕皇朝爲許田令葬奉新累贈工部侍郎

夫人李氏

處士諱翔事迹闕

處士諱宏事迹闕

處士諱猛葬馬家坑夫人鄭氏

水部府君諱谷爲筠州團練副使官至檢校水部員外郎葬傅家坑

夫人王氏

封州府君諱寬爲封州司理參軍葬早禾坑夫人邊氏

工部府君諱載字則之淳化二年進士及第歐陽氏自江南歸朝以

進士登科者自府君始爲人方重寡言真宗皇帝嘗自擇御史府君

以秘書丞拜監察御史後知泗州毀龜山佛寺誅妖僧數十人爲政

清廉簡靜所至官舍不窺園圃至果爛墮地家人無敢拾者官至尙

書工部郎中享年六十有八夫人金壇縣君米氏

處士諱素事迹闕

處士諱瑞事迹闕

崇公諱觀字仲賓事具瀧岡阡表享年五十有五葬吉水沙溪之瀧

岡累贈金紫光祿大夫太師中書令兼尙書令追封崇國公夫人彭

城郡大君鄭氏累封魏國太夫人享年七十有二附葬瀧岡

處士諱旦隱德不仕事母以孝爲鄉里所稱葬烏龜塘夫人彭氏

兵部府君諱暉字日華咸平三年進士及第官至都官員外郎歷知

桂陽監端黃永三州所至有能稱尤長於決疑獄所得俸祿分養孤

遺其兄之子脩少孤教之如己子享年七十有九葬安州應城之彭

樂村夫人福昌縣君范氏其後兄子脩者以參知政事遇今上登極

恩贈府君兵部員外郎

處士諱翦事迹闕

處士諱羽事迹闕

職方府君諱頴字孝叔咸平三年進士及第官至尙書職方郎中歷

知萬峽鄂欽彭岳闡鏡八州爲政務嚴明有威惠以本官分司享年

七十有二家于荆南遂葬焉夫人廣陵縣君曾氏

奉職府君諱頴爲三班奉職

殿直府君諱頴爲右班殿直

譜例曰姓氏之出其來也遠故其上世多亡不見譜圖之法斷自

可見之世卽爲高祖下至五世玄孫而別自爲世如此世久子孫

多則官爵功行載於譜者不勝其繁宜以遠近親疎爲別凡遠者

疎者略之近者親者詳之此人情之常也玄孫既別自爲世則各

詳其親各繫其所出是詳者不繁而略者不遺也凡諸房子孫各

紀其當紀者使譜牒互見親疎有倫宜視此例而審求之

外集卷第二十一

譜牡丹記附

硯譜

端石出端溪色理瑩潤本以子石爲上子石者在大小中生蓋精石也而流俗傳訛遂以紫石爲上又以貯水不耗爲佳有鸚鵡眼爲貴眼石病也然惟此巖石則有之端石非徒重於流俗官司歲以爲貢亦在他硯上然十無一二發墨者但充翫好而已歛石出於龍尾溪其石堅勁大抵多發墨故前世多用之以金星爲貴其石理微蠶以手摩之索索有鋒銳者尤佳余少時又得金坑礦石尤堅而發墨然世亦罕有端溪以北崑爲上龍尾以深溪爲上較其優劣龍尾遠出端溪上而端溪以後出見貴爾

絳州角石者其色如白牛角其文有花浪與牛角無異然頑滑不發墨世人但以研丹爾

歸州大沱石其色青黑斑斑其文理微蠶亦頗發墨歸峽人謂江水爲沱蓋江水中石也硯止用於川峽人世未嘗有余爲夷陵縣令時嘗得一枚聊記以廣聞爾

青州紫金石文理蠶亦不發墨惟京東人用之又有鐵硯製作頗精然患其不發墨往往函端石於其中人亦罕用惟研筒便於提攜官曹往往持之以自從爾

紅絲石硯者君謨贈余云此青州石也得之唐彥猷云須飲以水使足乃可用不然渴燥彥猷甚奇此硯以爲發墨不減端石君謨又言端石瑩潤惟有銛者尤發墨歛石多銛惟膩理者特佳蓋物之寄者必異其類也此言與余特異故并記之

青州濰州石末研皆瓦硯也其善發墨非石硯之比然稍蠶者損筆鋒石末本用濰水石前世已記之故唐人惟稱濰州今二州所作皆佳而青州尤擅名於世矣

相州古瓦賦佳然少真者蓋真瓦朽腐不可用世俗尙其名爾今人乃以澄泥如古瓦狀作瓦埋土中久而斷以爲硯然不必真古瓦自是凡瓦皆發墨優於石爾今見官府典吏以破盆甕片研墨作文書尤快也號州澄泥唐人品硯以爲第一而今人罕用矣文房四譜有造瓦硯法人罕知其妙嚮時有著作佐郎劉義叟者嘗如其法造之絕佳硯作未多士大夫家未甚有而義叟物故獨余嘗得其二一以贈劉原父一余置中書閣中尤以爲寶也今士大夫不學書故罕事筆硯硯之見於時者惟此爾

記

洛陽牡丹記

花品序第一

牡丹出丹州延州東出青州南亦出越州而出洛陽者今爲天下第一洛陽所謂丹州花延州紅青州紅者皆彼土之尤傑者然來洛陽纔得備衆花之一種列第不出三已下十字一作終列第三不能獨立與洛花敵而越之花以遠罕識不見齒然雖越人亦不敢自譽以與洛陽爭高下是洛陽者果天下之第一也洛陽亦有黃芍藥緋桃一有碧桃二字瑞蓮千葉李紅郁李之類皆不減它出者而洛陽人不甚惜謂之果子花曰某花某花至牡丹則不名直曰花其意謂天下真花獨牡丹其名之著不假曰牡丹而一有自字可知也其愛重之如此說者多言洛陽於一作居二河間一有最字古善地昔周公以尺寸考日出沒測知寒暑風雨乖與順於此此蓋天地之中草木之華得中氣之和者多故獨與它方異予甚以爲不然夫洛陽於周所有之土四方入貢道里一有遠近二字均乃九州之中在天地岷崑一作混淪旁薄之間未必中也又況天地之和氣宜遍被四方上下不宜限其中以自私夫中與和者有常之氣其推於物也亦宜爲有常之形物之常者不甚美亦不甚惡及元氣之病也美惡隔一作

隔并而不相和入故物有極美與一作有極惡者皆得於氣之偏也
花之鍾其美與夫瘳木擁腫之鍾其惡醜好雖異而得分氣之偏病
則均洛陽城園一作園數十里而諸縣之花莫及城中者出其境則
不可植焉豈又偏氣之美者獨聚此數十里之地乎此又天地之大
不可考也已凡物不常有而為害乎人者曰災不常有而徒可怪駭
不為害者曰妖語曰天反時為災地反物為妖此亦草木之妖而萬
物之一怪也然比夫瘳木擁腫者竊獨鍾其美而見幸於人焉余在
洛陽四見春天聖九年二月始至洛其至也晚見其晚者明年會與
友人梅聖俞游嵩山少室巖氏嶺石唐山紫雲洞既還不及見又明
年有悼亡之感不暇見又明年以留守推官歲滿解去只一作止見
其蚤者是未嘗見其極盛時然目之所矚已不勝其麗焉余居府中
時嘗謁錢思公於雙桂樓下見一小屏立坐後細書字滿其上思公
指之曰欲作花品此是牡丹名凡九十餘種余時不暇讀之然余所
經見而今人多稱者纔二十許種不知思公何從而得之多也計其
餘雖有名而不著未必得也故今所錄但取其特著者而次第之

姚黃

魏花

細葉壽安

輕紅亦曰青州紅

牛家黃

潛溪緋

左花

獻來紅

葉底紫

鶴領紅

添色紅

倒疊檀心

朱砂紅

九藥真珠

延州紅

多葉紫

龜葉壽安

丹州紅

蓮花萼

一百五

鹿胎花

甘草黃

一撒紅

玉板白

花釋名第二

牡丹之名或以氏或以州或以地或以色或旌其所異者而志之姚
黃牛黃左花魏花以姓著青州丹州延州紅以州著細葉龜葉壽安
潛溪緋以地著一撒紅鶴翎紅朱砂紅玉板白多葉紫甘草黃以色
著獻來紅添色紅九藥真珠鹿胎花倒疊檀心蓮花萼一百五葉底
紫皆志其異者姚黃者千葉黃花出於民姚氏家此花之出於今未
十年姚氏居白司馬坡其地屬河陽然花不傳河陽傳洛陽洛陽亦
不甚多一歲不過數朵牛黃亦千葉出於民牛氏家比姚黃差小真
宗祀汾陰還過洛陽留宴淑景亭牛氏獻此花名遂著甘草黃單葉
色如甘草洛人善別花見其樹知為某花云獨姚黃易識其葉嚼之
不腥魏家花者千葉肉紅花出於魏相仁溥家始樵者於壽安山中
見之斲以賣魏氏魏氏池館甚大傳者云此花初出時人有欲閱者
人稅十數錢乃得登舟渡池至花所魏氏日收十數緡其後破亡屬
其園今普明寺後林池乃其地寺僧耕之以植桑麥一作薑花傳民
家甚多人有數其葉者云至七百葉錢思公嘗曰人謂牡丹花王今
姚黃真可為王而魏花乃后也輕紅者單葉深紅花出青州亦曰青
州紅故張僕射齊賢有第西京賢相坊自青州以駝駝狀其種遂傳
洛中其色類腰帶輕故謂之輕紅獻來紅者大多葉淺紅花張僕射
罷相居洛陽人有獻此花者因曰獻來紅添色紅者多葉花始開而
白經日漸紅至其落乃類深紅此造化之尤巧者鶴翎紅者多葉花
其末白而一作其本肉紅如鴉鵲羽色細葉龜葉壽安者皆千葉肉
紅花出壽安縣錦屏山中細葉者尤佳倒疊檀心者多葉紅花凡花
近萼色深至其末漸淺此花自外深色近萼反淺白而深檀點其心
此尤可愛一撒紅者多葉淺紅花葉抄深紅一點如人以手指撒之
九藥真珠紅者千葉紅花葉上有一白點如珠而葉密盛其葉為九

風俗記第三

叢一百五者多葉白花落花以穀兩為開候而此花常至一百五日
 開最先丹州延州花皆千葉紅花不知其至洛之因蓮花尊者多葉
 紅花青趺三重如蓮花尊左花者千葉紫花一有出民左氏家字葉
 密而齊如截亦謂之平頭紫朱砂紅者多葉紅花不知其所出有民
 門氏子者善接花以為生買地於崇德寺前治花園有此花落陽豪
 家向未有改其名未甚著花葉甚鮮向日視之如猩血葉底紫者千
 葉紫花其色如墨亦謂之墨紫花在叢中旁必生一大枝引葉覆其
 上其開也比它花可延十日之久噫造物者亦惜之耶此花之出比
 它花最遠傳云唐末有中官為觀軍容使者花出其家亦謂之軍容
 紫歲久失其姓氏矣玉板白者單葉白花葉細長如拍板其色如玉
 而深檀心洛陽人家亦少有余嘗從思公至福嚴院見之問寺僧而
 得其名其後未嘗見也潛溪緋者千葉緋花出於潛溪寺寺在龍門
 山後本唐相李藩別墅今寺中已無此花而人家或有之本是紫花
 忽於叢中特出緋者不過一二朶明年移在他枝洛人謂之轉音紫
 枝花故其接頭尤難得鹿胎花者多葉紫花有白點如鹿胎之紋故
 蘇相禹珪宅今有之多葉紫不知其所出初姚黃未出時牛黃為第
 一牛黃未出時魏花為第一魏花未出時左花為第一左花之前唯
 有蘇家紅賀家紅林家紅之類皆單葉花當時為第一自多葉千葉
 花出後此花黜矣今人不復種也牡丹初不載文字唯以藥載本草
 然於花中不為高第大抵丹延已西及褒斜道中尤多與荆棘無異
 土人皆取以為薪自唐則天已後洛陽牡丹始盛然未聞有以各著
 者如沈宋元白之流皆善詠花草計有若今五年一作當時有一花
 之異者彼必形於篇詠一作什而寂無傳焉唯劉夢得有詠魚朝恩
 宅牡丹詩但云一叢千萬朵而已亦不云其美且異也謝靈運言永
 嘉竹間水際多牡丹今越花不及洛陽甚遠是落花自古未有若今
 之感也

洛陽之俗大抵好花春時城中無貴賤皆插花雖負擔者亦然花開
 時士庶競為遊遨往往於古寺廢宅有池臺處為市井張幄帶笙歌
 之聲相聞最感於月陂堤張家園棠棣坊長壽寺東街與郭令宅至
 花落乃罷洛陽至東京大驛舊不進花自今徐州李相迪為留守時
 始進御歲遣衙校一員乘驛馬一日一夕至京師所進不過姚黃魏
 花三數朵以葉葉實竹籠子藉覆之使馬上不動搖以蠟封花蒂乃
 數日不落大抵洛人家家有花而少大樹者蓋其不接則不佳春初
 時洛人於壽安山中斷小栽子賣城中謂之山篋子人家治地為畦
 墜種之至秋乃接接花工尤著者謂之門園子蓋本姓東門氏或是
 西門俗但云門園子亦由今俗呼皇甫氏多只云皇家也豪家無不
 邀之姚黃一接頭直錢五千秋時立契買之至春見花乃歸其直洛
 人甚惜此花不欲傳有權貴求其接頭者或以湯中蘸殺與之魏花
 初出時接頭亦直錢五千今尚直一千接時須用社後重陽前過此
 不堪矣花之木去地五七寸許截之乃接以泥封裹用軟土壅之以
 藉葉作庵子罩之不令見風日惟南向留一小戶以達氣至春乃去
 其覆此接花之法也用瓦亦可種花必擇善地盡去舊土以細土用
 白斂末一斤和之蓋牡丹根甜多引蟲食白斂能殺蟲此種花之法
 也澆花亦自有時或用日未出或日西時九月旬日一澆十月十一
 月二日二日一澆正月隔日一澆二月一日一澆此澆花之法也一
 本發數朶者擇其小者去之只留一二朶謂之打刺懼分其脈也花
 纒落便剪其枝勿令結子懼其易老也春初既去藉庵便以棘數枝
 置花叢上棘氣暖可以辟霜不損花芽他大樹亦然此養花之法也
 花開漸小於舊者蓋有蠹蟲損之必尋其穴以硫黃簪之其旁又有
 小穴如鍼孔乃蟲所藏處花工謂之氣窗以大鍼點硫黃末鍼之蟲
 乃死蟲死花復感此醫花之法也為賊魚骨以鍼花樹入其膚花輒

死此花之忌也

牡丹記跋尾

右蔡君謨之書八分散隸正楷行狎大小草衆體皆精其平生手書小簡殘篇斷彙時人得者甚多惟不肯與人書石而獨喜書余文也若陳文惠公神道碑銘薛將軍碣真州東園記杭州有美堂記相州畫錦堂記余家集古錄目序皆公之所書最後又書此記刻而自藏于其家方走人於毫以模本遺予使者未復於闕而凶訃已至于毫矣蓋其絕筆於斯文也於戲君謨之筆既不可復得而予亦老病不能文者久矣於是可不惜哉故書以傳兩家子孫

外集卷第二十二

雜題跋

書李翔集後

子爲西京留守推官得此書於魏君書五十篇子嘗讀韓文所作哀歐陽詹文云詹之事既有李翔作傳而此書亡之惜其遺闕者多矣

書梅聖俞彙後

凡樂達天地之和而與人之氣相接故其疾徐奮動可以感於心歡欣惻愴可以察於聲五聲單出於金石不能自和也而工者和之然抱其器知其聲節其廉肉而調其律呂如此者工之善也今指其器以問於工曰彼籥者簞者堵而編執而列者何也彼必曰鼗鼓鐘磬絲管干戚也又語其聲以問之曰彼清者濁者剛而奮柔而曼衍者在郊或在廟堂之下而羅者何也彼必曰八音五聲六代之曲上者歌而下者舞也其聲器各物皆可以數而對也然至乎動盪血脉流通精神使人可以喜可以悲或歌或泣不知手足鼓舞之所然問其何以感之者則雖有善工猶不知其所以然焉蓋不可得而言也樂之道深矣故工之善者必得于心應于手而不可述之言也聽之善亦必得於心而會以意不可得而言也堯舜之時樂得之以和人神舞百獸三代春秋之際師曩師曠州鳩之徒得之爲樂官理國家知興亡周衰官失樂器淪亡散之河海逾千百年未聞有得之者其天地人之和氣相接者既不得泄於金石疑其遂獨鍾於人故其人之得者雖不可和於樂尙能歌之爲詩古者登歌清廟太師掌之而諸侯之國亦各有詩以道其風土性情至於投壺饗射必使工歌以達其意而爲賓樂蓋詩者樂之苗裔與漢之蘇李魏之曹劉得其正始宋齊而下得其浮淫流佚唐之時子昂李杜沈宋王維之徒或得其淳古淡泊之聲或得其舒和高暢之節而孟郊賈島之徒又得其悲愁鬱埋之氣由是而下得者時有而不純焉今聖俞亦得之然

其體長于本人情狀風物英華雅正變態百出嗚呼其似春婁兮其似秋使人讀之可以喜可以悲陶暢酣適不知手足之將鼓舞也斯固得深者邪其感人之至所謂與樂同其苗裔者邪余嘗問詩於聖俞其聲律之高下文語之疵病可以指而告余也至其心之得者一作直不可以言而告也余亦將以心得意會而未能至之者也聖俞久在洛中其詩亦往往人皆有之今將告歸余因求其彙而寫之然夫前所謂心之所得者如伯牙鼓琴子期聽之不相語而意相知也余今得聖俞之彙猶伯牙之琴絃乎

讀李翔文

子始讀期復性書三篇曰此中庸之義疏爾智者誠一作讀其性當讀一作復中庸愚者雖讀此不曉也不作可焉又讀與韓侍郎薦賢書以謂期特窮時憤世無薦己者故丁寧如此始其得志亦未必然以韓爲秦漢間好俠一作事行義之一豪備亦善論一作論人者也最後讀幽懷賦然後置書而歎歎已復讀不自休恨期不生於今不得與之交又恨子不得生期時與翔上下其論也凡昔二字一作况迺期一時人有道而能文者莫若韓愈嘗有賦矣不過羨二鳥之光榮歎一飽之一作而無時爾此其二字一作推是心使光榮而飽則不復云矣若翔獨不然其賦曰衆器露而雜處兮咸歎老而嗟卑視予心之不然而慮行道之猶非又怪神堯以一旅取天下後世子孫不能以天下取河北以爲憂嗚呼使當時君子皆易其歎老嗟卑之心爲翔所憂之心則唐之天下豈有亂與亡哉然翔幸不生今時見今之事則其憂又甚矣奈何今之人不憂也余行天下見人多矣脫有一人能如一作如翔憂者又皆賤一作疏遠與翔無異其餘光榮而飽者一聞憂世之言不以爲狂人則以爲病癡子不怒則笑之矣嗚呼在位而不肯自憂又禁他人使皆不得憂可歎也夫景一作皇祐二年十月十七日歐陽修書

書春秋繁露後

漢書董仲舒傳載仲舒所著書百餘篇第云清明竹林玉杯繁露之書蓋略舉其篇名今其書纔四十篇又總名春秋繁露者失其真也予在館中校勘羣書見有八十餘篇然多錯亂重復又有民間應募獻書者獻三一作二十餘篇其間數篇在八十篇外乃知董生之書流散而不全矣方俟校勘而予得罪夷陵秀才田文初以此本示予不暇讀明年春得假之許州以舟下南郡獨臥閱此遂誌之董生儒者其論深極春秋之旨然惑於改正朔而云王者大一元者牽於其師之說不能高其論以明聖人之道惜哉惜哉景祐四年四月四日書

書韋應物西澗詩後

右唐韋應物滁州西澗詩今州城之西乃是豐山無所謂西澗者獨城之北有一澗水極淺遇夏潦漲溢但爲州人之患其水亦不勝舟又江湖不至此豈詩家務作佳句而實無此耶然當時偶不以圖經考正恐在州界中也聞左司郭員外新授滁陽欲以此事問之

論尹師魯墓誌

誌言天下之人識與不識皆知師魯文學議論材能則文學之長議論之高材能之美不言可知又恐大略故條析其事再述于後述其文則曰簡而有法此一句在孔子六經惟春秋可當之其他經非孔子自作文章故雖有法而不簡也修於師魯之文不薄矣而世之無識者不考文之輕重但責言之多少云師魯文章不合祗著一句道了既述其文則又述其學曰通知古今此語若必求其可當者惟孔孟也既述其學則又述其論議云是非非務盡其道理不苟止而妄隨亦非孟子不可當此語既述其論議則又述其材能備言師魯歷貶自兵興便在陝西尤深知西事未及施爲而元昊臣師魯得罪使天下之人盡知師魯材能此二者皆君子之極美然在師魯猶爲

末事其大節乃篤於仁義窮達禍福不媿古人其事不可偏舉故舉其要者一兩事以取信如上書論范公而自請同貶臨死而語不及私則平生忠義可知也其臨窮達禍福不媿古人又可知也既已具言其文其學其論議其材能其忠義遂又言其爲仇人挾情論告以貶死又言其死後妻子困窮之狀欲使後世知有如此人以此事廢死至於妻子如此困窮所以深痛死者而切責當世君子致斯人之及此也春秋之義痛之益至則其辭益深子般卒是也詩人之意責之愈切則其言愈緩君子偕老是也不必號天叫屈然後爲師魯稱冤一作怨也故於其銘又但云藏之深固之密石可朽銘不滅意謂舉世無可告語但深藏牢埋此銘使其不朽則後世必有知師魯者其語愈緩其意愈切詩人之義也而世之無識者乃云銘文不合不講德不辯師魯以非罪蓋爲前言其窮達禍福無媿古人則必不犯法况是仇人所告故不必區區曲辯也今止直言所坐自然知非罪矣添之無害故勉狗議者添之若作古文自師魯始則前有穆脩鄭條輩及有大宋先達甚多不敢斷自師魯始也偶儷之文苟合于理未必爲非故不是此而非彼也若謂近年古文自師魯始則范公祭文已言之矣可以互見不必重出也皇甫湜韓文公墓誌李翱行狀不必同亦互見之也誌云師魯喜論兵論兵儒者末事言喜無害喜非嬉戲之戲喜者好也君子固有所好矣孔子言回也好學豈是薄顏回乎後生小子未經師友苟恣所見豈足聽哉修見韓退之與孟郊聯句便似孟郊詩與樊宗師作誌便似樊文慕其如此故師魯之誌用意特深而語簡蓋爲師魯文簡而意深又思平生作文惟師魯一見展卷疾讀五行俱下便曉人深處因謂死者有知必受此文所以慰吾亡友爾豈恤小子輩哉

書冲厚居士墓銘後

東南固多學者而徐氏尤爲大族其子弟從子學者往往有聞于時

視其子弟則可知其父兄之賢也廬陵歐陽修書

讀裴叔傳

子嘗與尹師魯論自魏晉而下佐命功臣皆可貶絕以其貳心舊朝叶成大謀二字一作謀主雖曰忠於所事而非人臣之正也及讀裴叔傳迹其終始良有以哉始叔爲晉陽官監私以宮人饋高祖因見親暱可謂貳隋矣及太宗以博奔陷之遂開義師之謀卒成唐室武周爲寇請行自敗不卽就誅者非特佐命有功豈非曩時私狎之恩哉坐交沙門法雖免官見放復有所陳太宗數之曰計公勳庸不至於此數以武德時一作政之繆皆歸其人又聞妖言不自明乃欲殺人緘一作滅口遂被流放列其四罪貸不致理蓋由進身之私恩衰卽敗也韓彭之功猶終不保况寂也哉

書梅聖俞河豚魚詩後

子友梅聖俞於范饒州席上賦此河豚魚詩余每體中不康誦之數過輒佳亦屢書以示人爲奇贈翰林東閣書

書三絕句詩後

前一篇梅聖俞詠泥滑滑次一篇蘇子美詠黃鸝後一篇余詠畫眉鳥二人者之作也出於偶然初未始相知及其至也意輒一作趣同歸豈非其精神會通遂暗合耶自二子死余殆絕筆於斯矣翰林東閣書

跋晏元獻公書

右觀文殿大學士兵部尚書晏元獻公一帖公爲人真率其詞翰亦如其性是可佳也

跋李西臺書

嘉祐三年三月晦日和叔攜以過余因得覽之不能釋手嗟今之人清尙如西臺君者何少也遂書其後而還之廬陵歐陽修

同前

李公爲人端重清方爲當時所重不徒愛其筆蹟也嘉祐三年三月晦日修題

跋李翰林昌武書

昌武筆書道峻蓋欲自成一家宜其見稱於當時也修覽其書知此道七字一作風雅寂寞久矣嚮時蘇梅二子以天下兩窮人主張斯道一時士人一人作人士傾想其風采奔走不暇自其淪亡遂無復繼者豈孟子所謂折枝之易第不爲耶覽李翰林詩筆見故時朝廷儒學侍從之臣未嘗不以篇章翰墨爲樂也

記舊本韓文後

子少家漢東漢東僻陋無學者吾家又貧無藏書州南有大姓李氏者其子堯一作彥輔頗好學予爲兒童時多遊其家見有彛彛貯故書在壁間發而視之得唐昌黎先生文集六卷脫落顛倒無次序一作第因乞李氏以歸讀之見其言深厚而雄博然予猶少未能悉究其義徒見其浩然無涯若可愛是時天下學者楊劉之作號爲時文能者取科第擅名聲以誇榮當世未嘗有道韓文者予亦方舉進士以禮部詩賦爲事年十有七試于州爲有司所黜因取所藏韓氏之文復閱之則喟然一有而字嘆曰學者當至於是而止爾因怪時人之不道而顧己亦未暇學徒時時獨念于予心以謂方從進士干祿以養親苟得祿矣當盡力于斯文以償其素志後七年舉進士及第官于洛陽而尹師魯之徒皆在遂相與作爲古文因出所藏昌黎集而補綴之求人家所有舊本而校定之其後天下學者亦漸趨於古而韓文遂行于世至于今蓋三十餘年矣學者非韓不學也可謂盛矣嗚呼道固有行於遠而止於近有忽于往而貴于今者非惟世俗好惡之使然亦其理有當然者而孔孟惶惶於一時而師法於千萬世韓氏之文沒而不見者二百年而後大施於今此又非特好惡之所上下蓋其久而愈明不可磨滅雖蔽于暫而終耀于無窮者其道

一有皆字當然也予之始得於韓也當其沈沒棄廢之時予固知其不足以追時好而取勢利於是就而學之則予之所為者豈所以急名譽而干勢利之用哉亦志乎久而已矣故予之仕於進不為喜退不為懼者蓋其志先定而所學者宜然也集本出於蜀文字刻畫頗精於今世俗本而脫繆尤多凡三十年間聞人有善本者必求而改正之其最後卷秩不足今不復補者重增其故也予家藏書萬卷獨昌黎先生集為舊物也嗚呼韓氏之文之道萬世所共尊天下所共傳而有也予於此本特以其舊物而尤惜之

題薛公期畫

善言畫者多云鬼神易為工以謂畫以形似為難鬼神人不見也然至其陰威慘淡變化超騰而窮奇極怪使人見輒驚絕及徐而定視則千狀萬態筆簡而意足是不亦為難哉此畫雖傳自妙本然其筆力精勁亦自有嘉處嘉祐八年仲春旬休日竊覽而嘉之題還薛公期書室廬陵歐陽修題 一作俗言見畫鬼神者易為工以其人不常見也然而隱見出沒於無有之際千狀萬態筆簡而意足難矣及其變化飛騰窮奇極怪使人見輒驚絕豈不又難哉此畫雖所傳好本然其筆力精勁亦自有佳處廬陵歐陽修竊覽而嘉之遂題其後以還公期書室嘉祐八年仲春休日

跋杜祁公書

右杜祁公墨蹟公當景祐中為御史中丞時余以鎮南軍掌書記為館閣校勘始登公門遂見知契後十五年余以尚書禮部郎中龍圖閣直學士留守南都公已罷相致仕于家者數年矣余歲時率僚屬候問起居見公福壽康寧言笑不倦歲餘予遭內艱去居于穎服除來京師蒙恩召入翰林為學士與公書問往還無虛月又二歲公以疾薨于家子既泣而論次公之功德而銘之又集在南都時唱和詩為一卷以傳二家之子孫又發篋得公手書簡尺歌詩類為十卷而

藏之余與時寡合辱公之知久而愈篤宜於公有不能忘矧公筆法為世楷模人人皆寶而藏之然世人莫若余得之多也嘉祐八年六月晦日

跋永城縣學記

唐世執筆之士工書者十八九蓋自魏晉以來風流相承家傳少習故易為能也下逮懿僖昭哀衰亡一作世之亂宜不暇矣接乎五代四海分裂士大夫生長干戈於積屍白刃之間時時猶有以揮翰馳名於當世者豈又唐之餘習乎如王文乘之小篆李鄂郭忠恕之楷法楊凝式之行草至於羅紹威錢俶皆武夫驕將之子酣樂於狗馬聲色者其於字畫亦有以過人及宋一天下於今百年儒學稱盛矣唯以翰墨之妙中間寂寥者久之豈其忽而不為乎將俗尚苟簡廢而不振乎抑亦難能而罕至也蓋久而得三人焉嚮時蘇子美兄弟以行草稱自二子亡而君謨書特出於世君謨筆有師法真草惟意所為動造精絕世人多藏以為寶而予得之尤多若荔枝譜永城縣學記筆畫尤精而有法者故聊誌之俾世藏之知余所好而吾家之有此物也廬陵歐陽某書嘉祐八年歲在癸卯中元日

書荔枝譜後

善為物理之論者曰天地任物之自然物生有常理斯之謂至神圓方刻畫不以智造而力給然千狀萬態各極其巧以成其形可謂任之自然矣二十七字一作千態萬狀雖不以智造而功給一任之自然故能各極其妙而其一無此字醜好精麗壽夭多少皆有常分不有尸之孰為之限數由是言之又若有為之者一無此十字是皆不可詰於有無之間故謂之神也牡丹花之絕而無甘實荔枝果之絕而非名花昔樂天二字一作人有感於二物矣是孰尸其賦子邪然斯二者惟一無此字不兼萬一無此字物之美故各得一作得各極其精此於造化不可知而推之至理宜如此也余少遊洛陽花之

感處也因為牡丹作記君謨閩人也故能識荔枝而譜之因念昔人嘗有感於二物而吾二人者適各得其一之詳故聊書其所以然而以附君謨譜之末嘉祐八年七月十九日廬陵歐陽修題

跋學士院題名

余嚮在翰林七年嘗以謂宰輔有任責之憂神仙無爵祿之寵既都榮顯又享清閑而兼有人天之樂者惟學士也自頃以來叨被恩私俾參政論力疲矣而勤勞不得少息心衰矣而憂患浩乎無涯却思玉堂如在天上偶因發篋閑覽題名不覺慨然遂書於此嘉祐八年中秋日

熙寧四年正月二十九日載覽至却思玉堂如在天上之語因思余作內制集序亦為此語英宗皇帝嘗加稱賞為之泫然感涕不能止也六一居士書

跋茶錄

善為書者以真楷為難而真楷又以小字為難義獻以來遺迹見於今者多矣小楷維樂毅論一篇而已今世俗所傳出故高紳學士家最為真本而斷裂之餘僅存者百餘字爾此外吾家率更所書溫彥博墓銘亦為絕筆率更書世固不少而小字亦止此而已以此見前人於小楷難工而傳於世者少而難得也君謨小字新出而傳者二集古錄目序橫逸飄發而茶錄勁實端嚴為體雖殊而各極其妙蓋學之至者意之所到必造其精予非知書者以接君謨之論久故亦粗識其一二焉治平甲辰

古之善書者必先楷法漸而至於行草亦不離乎楷正張芝與旭變怪不常出乎筆墨蹊徑之外神逸有餘而與羲獻異矣襄近年粗知其意而力已不及為足道哉此蔡忠惠公公所題

跋觀文王尚書奉正書

右觀文學士尚書王公字伯中清德之老也余晚接公遊愛其為人

未幾公以病卒因錄其遺迹而藏之實思其人不獨玩其筆也天聖中公與謝絳希深黃鑑唐卿修國史余為進士初至京師因希深始識公而未接其遊後二十年余為翰林學士公以書殿兼職經筵始得竊從公後故得公手筆不多嗚呼天聖之間三人者皆一時之選今皆亡矣其遺迹尤可惜矧公素以書名當世也治平元年清明前一日書

跋學士院御詩

列聖御製刻石龜在玉堂北壁扁鏤甚嚴至和元年初蒙恩召為學士嘗因事獨對便殿先帝密諭將幸玉堂及欲如祖宗時夜召學士因問唐朝故事余奏曰唐世學士以獻替為職業至於進退大臣常參密議故當時號為內相又謂之天子私人其職在禁近故唐制學士不與外人交通比來選用非精致上恩禮亦薄漸見疎外無異百司若聖君有意崇獎則當漸修故事予遂退而建言不許私謁執政時人喧然共以為非蓋流俗習見近事不知學士為禁職舊制不通外人也貞宗時劉子儀當直既不為丁晉公草制明日晏元獻公入直劉見晏來遽趨一作移以出相遇不揖掩面而過蓋當時學士猶交直也近時當直者多不宿宿者暮入晨出玉堂終日闕然更人共守空院而已職曠事廢已久自朝廷近臣皆不知故事流俗不足怪也因覽刻石遂并記之于後治平元年清明日

院中名畫舊有董羽水僧巨然山在玉堂後壁其後又有燕肅山水今又有易元吉猿及狙皆在屏風其諸司官舍皆莫之有亦禁林之奇玩也余自出翰苑夢寐思之今中書樞密院惟內宴更衣則借學士院解歇每至徘徊畫下不忍去也

跋薛簡肅公奎書

右薛簡肅公詩并書其背乃天聖四年司農卿李湘門狀是歲丙寅至今丁未實四十二年矣偶得於家人篋中因標軸而藏之公之清

節直道余既銘之而有傳在國史此不復書治平四年閏月十八日

跋醉翁吟

余以至和二年奉使契丹明年改元嘉祐與聖俞作此詩後五年聖俞卒作詩殆今十有五年矣而聖俞之亡亦十年也閱其辭翰一爲泫然遂軸而藏之熙寧二年五月十三日

題青州山齋

吾常喜誦常建詩云竹逕通幽處禪房花木深欲効其語作一聯久不可得迺知造意者爲難工也晚來青州始得山齋宴息因謂不意平生想見而不能道以言者乃爲己有於是益欲希其髣髴竟爾莫獲一言夫前人爲開其端而物景又在其目然不得自稱其懷豈人才有限而不可彊將吾老矣文思之衰邪茲爲終身之恨爾熙寧庚戌仲夏月望日題

跋三絕帖

南唐澄心堂紙爲世所珍今人家不復有曼卿詩與筆稱雄於一時今亦未有繼者謂之三絕不爲過矣余家藏此蓋三十餘年熙寧壬子正月雨中記六一居士

外集卷第二十三

近體賦詩附

進擬御試應天以實不以文賦并引狀

臣伏觀今月十三日御試應天以實不以文賦題目初出中外羣臣皆歡然以謂至明至聖有小心翼異事天之意蓋自四年來天災頻見故陛下欲修應天以實之事時謂出題以詢多士而求其直言外議皆稱自來科場只是考試進士文辭但取空言無益時事亦一未有人君能上思天戒廣求規諫以為試題者此乃自有殿試以來數百年間最美之事獨見於陛下然臣竊慮遠方貢士乍對天威又迫三題不能盡其說以副陛下之意臣忝列書林粗知文字學淺文陋不自揆度謹擬御題撰成賦一首不敢廣列前事但直言當今要務皆陛下所欲聞者臣聞古者聖帝明主皆不免天降災異惟能修德修政則變災為福永享無窮之休臣不勝大願其賦一首謹隨狀上進

賦推誠應天豈尚文飾

天災之示人也若響應聲君心之奉天也惟德與誠固當務實以推本不假浮文而治情彼雖不言謫見以時而下告吾其修德禍患可銷於未萌臣聞天所助兮惟善則降祥德苟至兮雖妖而不勝皆由人事之告召然後天心之上應若國家有闕失之政則當頻見於衆災欲人主知戒懼之心所以保安於萬乘臣請述當今之所為引近事而為證至如陽能和陰則雨降若歲大旱則陽不和陰而可推去年大旱陰不侵陽則地頻動則陰干於陽而可知去年河東地頻動又如黑者陰之色晦者陰之時或暴風慘黑而大至白晝晦冥而四垂釐定元年二月黑風起白日晦日食正旦兩冰木枝今春二月如此之類皆陰之為蓋陰為小人與婦人又為大兵與蠻夷若四者之為患則羣陰之失宜故天象以此告吾君不謂不至陛下所

宜奉天戒不可不思是謂應以實者臣敢列而言之若夫慎擇左右而察小人則視聽之不惑肅清宮闈而滅冗刻則恭儉而成式况乎遠佞人者孔宣父之明訓放宮女者唐太宗之威德又若西師久不利宜究兵弊而改作叛羌久未服宜講廟謀之失得在陛下之至聖行此事而不忒庶天意之可回雖有災而自息方今民疲賦斂之苦又值飢荒之年貴財盡於私室苗稼盡於農田劫掠居人盜賊並起流離道路老幼相連陛下視民如子覆民如天在於仁聖非不矜憐故德音除刻削之令赦書行賑濟之權然而詔令雖嚴州縣之吏多慢人死相半朝廷之惠未宜夫天至高遠也惟可動以精誠民之休戚也皆繫君之好尚惟善政之能惠則休符之並現而况富有四海之大獨制萬民之上一言之出令誰敢不從百事責實兮自然無曠發號施令在聖意之必行變災為祥則太平之可望今漢史有五行之志尚書有洪範之文願詔侍臣之講說許陳古事於聽一作聽聞可以見自召妖災雖由於時政能招福應亦自於明君故禾偃於風表周王之覺悟雉鳴于鼎成商帝之功勳蓋恐懼修省者實也在乎不倦祈禳禱伏者文也皆不足云臣生逢納諫之聖明不問宣言之狂斐惟冀愚衷一作忠之可採苟避誅夷而則豈蓋賦者古人規諫之文臣故敢上干於旒屨

監試玉不琢不成器賦良玉非琢安得成器

至寶雖美因人乃彰欲成器而斯尚由載琢以為良瑕玷弗施始中含於溫潤切瑳有則取應用於圓方披大禮之遺言洞先儒之所錄以謂玉不因琢器莫得以自貴人不因學道無由而內勗故我誘之於人論之以玉內含其美雖粟質而可嘉外飾其形假載雕而後足然以寶有可尚世誠所希價連城而有待氣如虹而上揮禮神之用斯在磨玷之言則非稟爾天真包十德而成質制由工巧參六瑞以凝輝然則攻自它山列乎良璞雖曰寶也不能效於自用雖曰堅也

未有成於不琢美在中矣徒內抱於英華鬻而錯諸始外成於圭角豈不以玉者華於國而可重器者用於人而克安規矩殊形於圭璧短長具制於躬桓亦猶在鎔者金必資乎鍛礪之設從繩者木遂分乎曲直之端且夫人務其師玉責其德性雖本善不學則弗至於道質雖至美不琢則弗成其飾稽匪刻匪雕之說理實異斯嘉如切如磋之言義誠有得彼大圭責乎向質鳴珮取乎揚聲雖效珍而並用在記論以非精曷若彰教誨而有漸譬琢雕而可成是故西琥東圭捨規模而安創半璋全璧非制度以難明向若追琢不加刻畫非備雖縝密以含彩在文華而曷視故楊子以謂玉不雕則璠璵不作器

國學試人主之算如堂賦堂陞隆峻人主尊矣

位既異等君宜有常惟居尊而體國爰取論於如堂望而畏之使下民之咸仰高為貴者譬遠地以同彰稽往謀之遺文懿嘉言之洞啓謂立制於君上諭相承於堂陞蓋以貴賤殊品尊卑異禮下臨於物必也尊嚴而有儀上譬於堂所以崇高乎正體誠以赫赫化被巍巍道隆儼正守以居極統羣黎於宅中蓋取乎馭民之貴非資於構廈之功位正當陽若盛九筵之制民欣戴后如瞻七尺之崇然則堂非高則偃下而易陵君弗尊則保位而難慎卑高必貴乎不瀆上下於焉而克順邇臣內附類榱棟之相依一作高列辟下陳由陞廉而比峻豈不以富有函夏躬臨兆民示臣庶之弗越表等威之有倫將使制爾萬國宗子一人下絕僭王非歷階之可及世惟與子彰肯構以相因是知制衆室者莫先乎堂奄九有者必算其主蓋兼統於邦國匪專稱於棟宇化有於下奉穆穆以深居仰之彌高若耽耽之可親蓋由堂不可以卑而亂制君不可以驕而不尊喻穹隆於九仞用總制於羣元且異夫蓋之如天但迷居高之旨就之如日惟明照下之言大哉陞峻而堂高者勢之然臣貴而君尊者國之理伊制度之有別俾崇高而是視所以建公卿大夫而天子加焉其算也於斯見矣

詔重修太學詩

漢詔崇儒術虞庠講帝猷叢極新寶構萬杵逐歡謳照爛雲臺麗回環璧水流冠童儀威魯蒿柱德同周舞翟彌文郁橫經威禮修微生聽昕鼓願齒夏弦游

省試司空掌輿地圖賦平土之職圖掌輿地

率土雖廣披圖可明命乃司空之職掌夫輿地之名奉水土以勤修慎司無曠覽山川而盡載按謀惟精所以專一官而克謹辨九區而底平者也伊昔令王尊臨下土以謂綿宇非一不可以周覽衆職異守俾從於各主故我因地理二字一作輿地之察宜建冬官而法古將使如指諸掌括乎地以無遺皆聚此書著之圖而可觀險固咸在方隅異宜分形勝以昭若庶指陳而辨之度地居民既修官而有舊辨方正位俾披文而可知其或作屏建親命侯封國小大有民社之制遠邇異封圻之式非圖無以辨乎數非官無以奉其職主於空土既險阻之盡明別爾分疆誌廣輪而可識誠由據函夏之至要贊大君之永圖上以體國而經野下以建邦而設都參古號於周官各司其局辨羣方於禹跡無得而踰是何標區域以並分限華夷而靡爽域中所以張乎大天下無以逾其廣亦猶五土異物必辨於司徒之官九州有宜乃命乎職方之掌用能三壤咸則四民奠居窮人跡於遐域包坤載於方輿具異夫充國論兵但模方略之狀鄴侯創業惟收圖籍之餘彼夏貢紀乎州名漢史標乎地志雖前策之並載在設官而未備曷若我謹三公於漢儀專掌圖於輿地

翠旌詩

威禮郊儀肅純音帝樂清葳蕤飄翠羽赫奕展華旌鳳邱光覆鸞旗色共明續紛葩蓋輝映雜綵纓且異文竿飾非同翻舞各竹宮歌蕊祀雅曲播遺聲

殿試藏珠於淵賦君子非貴難得之物

稽治古之敦化仰聖人之作君務藏珠而弗寶俾在淵而可分效乎至珍雖希世而弗產棄於無用媿還浦以攸聞得外篇之寓言述臨民之致理將革紛華於煥俗復堯愚於赤子謂非欲以自化則爭心之不起蓋賤貨者爲貴德之義敦本者由抑末而始示不復用雖至寶而奚爲捨之則藏祕諸淵而有以誠由窒民情者在杜其漸防世欲者必藏其機使嗜欲不得以外誘則淳朴於焉而可歸將抵璧以同議諒彈雀而誠非照乘無庸盡遺碕岸之側連城奚取皆沉媚水之輝用能崇儉德以外昭復淳風而有謂民心朴以歸本物產全而靡費珍雖無脛俾臨淵而盡除事異暗投永沉川而不貴然而道既散則民薄風一澆而朴殘玩好既紛乎外役質素無由而內安故我斥乃珍奇之用絕乎侈靡之端將令物遂乎生老蚌蔑剖胎之患民知非尙驪龍無探領之難是則恢至治之風揚淳古之式不寶於遠則知用物之足不見其欲則無亂心之感上苟賤於所好下豈求於難得是雖寶也將去泰而去奢從而屏之使不知而不識彼捐金者由是類矣摘玉者可同言之諒率歸於至理實大化於無爲致爾漢臯之濱各全其本雖有淮蠙之產無得而窺自然道著不貪時無異物民用遵乎至儉地寶蕃而不屈所以虞舜垂衣亦由斯而弗拂

博愛無私詩

賞以春夏賦天子行賞欽順時令

賞出於國時行在天紀勳庸而有序順春夏以昭宣無忘爾勞法蠡生而布惠用嘉乃績因長養以旌賢原夫執政者君爲民之紀懼賞罰之一失則恩威之兩弛受焉不以其私賜之非爲其喜蓋夫欲固其國者必謹國之常能奉乎天者是謂天之子將出令以無僭必順時而后軌顯庸制爵爰占星鳥之中茂惠建官當俟薰風之始且夫春居東以首歲夏司南而執衡在氣爲燠於時主生東動也之以起南任也之以成我所以推本萬事之理欽象四時之行政刑由是以

有度寒暑於焉而不爭頒以土田順木行而養育昭其服物助火德之光明故曰天之大端在陰陽君之大柄在刑賞操其柄以歸己求其端而取象法大簇贊陽之月行慶有常體林鍾種物之時勸功無爽誠以賞當則民協澤流而德深但慮過時之失敢懷虛受之心故月令有布德之文前規具在景風爲賜爵之候往牒攸欽嗚呼王者畏天以臨民天道在人而可信事與時合則爲和而爲福時與事逆則有災而有謹在乎察動靜以爲本布仁恩而克慎亦由彌田主教非仲秋而不行議獄斷刑須大冬而乃順故能光昭國體欽奉邦彝用豈有於踰德舉無聞於振時且異夫賜以擊纓示假人而取諂贈其袞冕譏錫命以非宜大哉君之舉者必書上之出者爲令苟違時而不度懼招尤而失正故左氏載聲子之言以戒後王之立政

畏天者保其國賦祇畏天道能守其國

聖人以凝命恭默膺圖肅祇爰務畏天之義但彰保國之規惟帝難之翼翼固欽於乾道爲人上者兢兢慎守於邦基用能御寶位而惟永隆昌運以咸熙者也探齊王之式陳懿子與之所謂將設治民之術先本爲君之貴且曰天惟簡在誠由乎不敢荒寧國乃洽乎是宜乎克自抑畏惠此方國欽若昊天實克遵於慄慄示無爽於乾乾慮威宣咫尺之間所以嚴恭罔怠致疆啓幅員之內所以底定無愆蓋由仰高明以惟勤遂邦家而永保又新之戒斯在無逸之篇可考順帝之則始敷危懼之誠俾民不迷終得阜安之道豈不以天者本降鑒而是顯國者在緝綏而以興畏乎天表降鑒之甚邇保乎國示緝綏而可憑審雖休勿休之理遵日慎一日之稱是故懼無災以爲懷見楚莊之勿伐不敢康而在念識周成之有能夫如是則垂拱是圖持盈可久不遑啓居今以圓靈之是奉無敢暇豫今以中區而自守昭事而宜乎宗社咸寧之旨攸同欽承而惠彼民人設險之功何有不然又安得惟實謹爾匪懈昭其蓋足憚於覆燾必克固於蕃維周

詩垂降降之文亦足畏也淳雷著修省之說于時保之至哉闡釋聖猷鋪昭皇極眷懋悚以爲本在撫綏而作式有以見惟天爲大而君則之故定于萬國

斲雕爲樸賦除去文飾歸彼淳樸

德以儉而爲本器有文而可除爰斲載雕之飾將全至樸之餘篆刻未銷見背僞歸真之始鑲章咸滅知去華務實之初稽史牒之前聞述政風而遐舉懿淳儉之攸尙斥浮華而可沮謂乎防世僞者在塞其源全物性者必反其所素以爲貴將抱樸而是思煥乎有文俾運斤而悉去誠由淳自澆散器隨樸分聘匠巧而傷本掩天真而蔑聞故我反淳風而矯正杜未作之紛紜剖刻楛之形復采椽而不琢滅鑲篆之僞反木器於無文則知工巧盡捐浮淫是抑道尙取乎反本理何求於外飾圭磨嶽嶽歸璞玉以全真響去山雲表瓦罇而務德是則遵乎樸者將反始而臻極斲乎雕者惡亂真而飾非約澆風於一變矯治古以同歸確而錯諸盡滅彫蟲之巧質爲貴者寧歎朽木之譏用能杜文彩之煥然返淳和而遵彼雕雖著則尙可磨也樸其復則在其中矣棄末反本小巧之工盡捐革故取新見素之風可笑彼琢玉然後成器命工列乎彫人務以文而勝質徒散朴以遠淳曷若剗斲之功靡施大巧若拙刻鏤之華盡滅其德乃真懿之隆者非假飾以爲資儉之至者匪奇淫而是覺但期乎去泰去甚寧患乎匪雕匪斲有以知一變至道之風由是而復歸乎樸

祭先河而後海賦王者行祭先務其本

在祭者必有常典務本者貴乎不忘既先河而告備乃後海以爲常幣玉始陳恭視諸侯之瀆牲牢繼列方祠百谷之王探國典之舊文撫禮經之大旨以謂河導其派本一勺而始矣海納其會實百川之委也祀容肅設必先有事於靈長望秩並修然後功歸於善下誠以決九川而分導括衆流而混并一則窮本而有自一則兼容而積成

是用分禮章而異數昭祭典以推行命祀首陳始則出圖之所禱辭以設方祈紀地之各用能縹乃令儀昭夫重祭利萬物以斯善用五材而並濟無文既秩繁經瀆以領祠羣望繼行禱朝宗而用幣外則盡物中惟告虔既義取於源委乃禮分於後先一禱致誠必告榮光之渙大川並走嗣臨重潤之淵得非衆嶽肇乎一拳椎輪生乎五輅考厥初之攸在彰返始而爲務亦猶文王之祀雖貴不踰后稷之尊齊人之事將行敢越配林之故是知河必居首取發源而肇茲海不自大由積衆以成其導洪流而並注散靈潤以旁滋顧乃濫觴之因必有生也視爾委輸之廣然後從之昇哉祭尙潔誠禮惟思反將展報以爲義必討源而自遠故夫三王之祭川必務其本

大匠誨人以規矩賦良匠之誨人以規矩

工善其事器無不良用準繩而相誨由規矩以爲常度木隨形俾不欺於曲直運斤取法必先正於圓方載考前文爰稽哲匠伊作器以祖善必誨人而攸尙有模有範俾從教之克精中矩中規責任材而必當誠以人於道也非學而弗至匠之能也在器而攸施既諄諄而誨爾俾拳拳而服之默受以全曲則輪而直則軫動皆有法完爲鞠而斷爲基然則道不可以弗知人不可以無誨苟審材之義失則教人之理昧規矩有取爲圭爲璧以異宜制度可詢象地象天以是配匠之心也本乎大巧工之事也作于聖人因從繩而取論彰治材而有倫學在其中辨蓋與之異狀藝成而下明鑿柄之殊陳義不徒云道皆有以將博我而斯在寧小巧而專美殊玉工之作器惟求磨琢之精異扁人之斲輪但述苦甘之旨是知直在其中者謂之矩曲盡其妙者本乎規然工藝以斯下俾後來之可師道或相管引圓生方生而作諭言如未達譬周旋折旋而可知是何樸斲爲工剗斲斯主翫其役以雖未聽乃言而可取故孟子謂學者之誨人亦必由於規矩

魯乘周禮所以本賦魯公之後某本周禮見振奇集已下編
添

侯國修度時王著彝惟東魯之大本秉西周之舊儀曲阜襲封率奉
先規之威鎬京遺法限爲至治之基說者謂惟王建邦裂疆分土稟
正朔者歸於元后算制度者合於前古惟周之典世爲大則惟魯之
威法爲常矩及夫姬道衰逸邦侯侵侮雖周公之才之美不行於時
文王之德之純盡在於魯逮夫禮與時至教由治隆邇奉孺子位爲
上公千乘之國仰有遺法數世之後敢弃元功雖治邦治刑尙可宏
宣於祖業而教典教法猶能固本於民風大德純純兮世不敢忘至
文微微兮流而自遠守茂典之惟永遵飛燕休而可損一變于道聖
人之後所以昌百世可知先王之法以爲本且夫德固則邦化法行
則教流治而久於諸侯則莫若魯教而正於三代則莫如周在隱桓
之世力行純軌至定哀之後不棄芳猷蓋固藉以惟至以治人而可
求彼雖發嘆於詩人改王室而作離黍何俟興言於聲子見易象之
與春秋蓋夫與治同道罔不興安上治民莫如禮禮與邦化則莫窺
其枝葉法因時至則深蟠其根柢亦如齊有太公之遺制定作民彝
杞觀夏道之可知式成邦體嗚呼聖之所治人不可追移茂實以參
用著通規而有宜遂使化民之議有所經理之大者治國之君無亂
紀則而行之大哉周世所行魯邦慎守秉其法爲治之極則其文延
付而後故仲孫知魯而不可取者禮爲本焉致邦儀之含厚

秋籩詩見古省題詩

幽籩迎寒至商鷗應節流戎容修大綱殺氣順行秋多稼登方茂三
農隙始休斂歸軍實獻誓衆敵爲裘索享儀非蜡圍田禮異蒐國威
思遠播神武暢皇猷

外集卷第二十四

論

殿試儒者可與守成論關

三皇設言民不違論

論曰夫至治之極也塗耳目以愚民之讖暢希夷以合道之極化被而物不知功成而迹無朕古有臻於是者其大道之行乎聖人之興也捐仁義以為德之細放約束以取民之信德及而物自化言行而人必從古有感於此者其三皇之世歟故孔子有三皇設言而民不違之說敢試論之若乃暢上古之至道張億世之遠御結繩所以為信也而懼信之未孚我則有書契之易於是乎畫八卦以由數起茹毛所以養生也而憚生之未具我則有烹飪之利於是乎嘗百穀以粒蒸民網罟利人以為用使以畋而以漁牛馬異性而必馴使可乘而可服壯棟宇以易古者之居垂衣裳以興天下之治凡所以使民不倦者皆伏犧神農黃帝之為世然則治既行矣民既賴矣守之以至靜化之以無為上有淡泊清淨之風下無薄惡叛離之俗故言為教詔非誥誓而自聽言為號令不鞭朴而自隨且夫敵血以泚盟約要之於信者由不信而然也為刑以殘肌骨威之使從者由不從而設也不若御至質之民行大道之化悅不以愛故不待賞而勸畏不以威故不待罰而責政不罔民故不待約而信事不申令故不待誥而從一言以行萬民稟命賴其德者百年而利服其化者百年而移非三皇之德其孰能與於此乎噫商人作誓欲民之從也而人始疑周人會盟欲信之固也而諸侯叛由是而言則詛民於神明徂民於賞罰而違之者末世之為也服民以道德漸民以教化而人自從之者三皇之威也夫設言而不違者其在茲乎

賈誼不至公卿論

論曰漢興本恭儉革弊末移風俗之厚者以孝文為稱首議禮樂興

制度切當世之務者惟賈生為美談天子方忻然說之倚以為用而卒遭周勃東陽之毀以謂儒學之生紛亂諸事由是斥去竟以憂死班史贊之以誼天年早終雖不至公卿未為不遇予切感之嘗試論之曰孝文之興漢三世矣孤秦之弊未救諸呂之危繼作南北興兩軍之誅京師新喋血之變而文帝由代邸嗣漢位天下初定人心未集方且破觚斲雕衣絺履革務率敦朴推行恭儉故改作之議謙於未違制度之風闕然不講者二十餘年矣而誼因痛哭以憫世太息而著論况是時方隅未寧表裏未輯匈奴桀黠朝那上郡蕭然苦兵侯王僭擬淮南濟北繼以見戮誼指陳當世之宜規畫億載之策願試屬國以系單于之頸請分諸子以弱侯王之勢上徒善其言而不克用又若鑿秦俗之薄惡指漢風之奢侈嘆屋壁之被帝服憤優倡之為后飾請設庠序述宗周之長久深戒刑罰明孤秦之速亡譬人主之如堂所以優臣子之禮置天下於大器所以見安危之幾諸所以下者誼之所言略施行矣故天下以謂可任公卿而劉向亦稱遠過伊管然卒以不用者得非孝文之初立日淺而宿將老臣方握其事或艾旗斬級矢石之勇或鼓刀販繒賈豎之人朴而少文昧於大體相與非斥至于謫去則誼之不遇可勝歎哉且以誼之所陳孝文略施其術猶能比德於成康况用於朝廷之間坐於廊廟之上則舉大漢之風登三皇之首猶決壅禪墜耳奈何俯仰佐王之略遠致諸侯之間故誼過長沙作賦以弔汨羅而太史公傳於屈原之後明其若屈原之忠而遭棄逐也而班固不識文帝之遠賢痛賈生之不用但謂其天年早終且誼以失志憂傷而橫夭豈曰天年乎則固之善志速疑作殆與春秋褒貶萬一矣謹論

夫子罕言利命仁論

論曰昔明王不興而宗周衰斯文未喪而仲尼出修敗起廢而變于

道扶衰救弊而反於正至如探造化之本蹟幾深之慮以窮乎天下之至精立道德之防張禮樂之致以遠乎人情之大寶故易言天地之變吾得以辭而繫詩厚風化之本吾得以擇而刪禮樂備三代之英吾得以定而正春秋立一王之法吾得以約而修其為教也所以該明帝王之大猷推見天人之至隱道有機而不得秘神有密而不得藏曉乎人倫明乎耳目如此而詳備也然獨以利命仁而罕言其旨何哉請試言之夫利命仁之為道也淵深而難明廣博而難詳若乃誘生民以至教周萬物而不遺草木賁殖而無知所以遂其生踐險行息而不知所以達其樂物性莫不欲茂則薰之以太和人情莫不欲壽則濟之以不天滯者導之使達蒙者開之使明衣被羣生瞻足萬類此上之利下及於物聖人達之以和於義也則利之為道豈不大哉函五行之秀氣兼二儀之肖貌稟爾至命得之自天厥生而靜謂之性觸物而動感其欲派而為賢愚誘而為善惡賢愚所以異貴賤善惡所以定吉凶貧富窮達死生天壽賦分而有定循環而無端聖人達之內照乎神明小人逆之外滅於天理則命之為義豈不達哉又若兼百行以全美居五常而稱首愛人而及物力行而能近守而行之一日由乎復禮推而引之天下稱乎達道則仁之為理豈不感哉噫三者之說誠皆聖人之深達非難言之也易曰乾以美利利乎天下又曰利者義之和中庸曰天命之謂性又曰君子居易以俟命繫辭曰樂天知命故不憂禮記曰仁者天下之表又曰仁者右也道者左也酌是而論之則非不言也然罕言及者得非以利命仁之為道微而奧博而遠賢者誠而明之不假言之道也愚者鮮能及之雖言之弗可曉也故曰中人以上可以語上中人以下不可以語上又曰仁則吾不知者舉一可知也子貢以謂夫子之言性與天道不可得而聞者誠在是乎然則利命仁之罕言由此而見矣謹論

策

南省試策五道并問目

問管夷吾之書曰聖人之治天下也四民勿使雜處則其言嗜其事易士就閭燕工就官府商就市井農就田野羣萃而州處少而習焉其志安焉不見異物而遷焉且曰士農之子常為士農工商之子常為工商若乃士講學以居位農力穡以阜生安而不遷斯則嘉矣其或百工居肆萬商成淵奇技淫巧之蕩心鬻良難苦之牟利安於所習未足敦風見善而遷茲亦何害又如端木之貨殖膠鬲之魚鹽倪寬之帶經王猛之賣畚乘時萬變安可限其定居黃憲之牛醫胡廣之田畝桑羊之買豎叔敖之負薪肯構百端安可責其承世今茲貢士之制亦有異類之防雖條禁之久行諒甄明之不暇衆君子優於博古長於辨宜以為如何無惜辭費

對講天人之精稜貴艸茅之愚言古之求治者莫急於此與愚民之休利傳經術而條對士之射策者以盡其才自漢而遷於唐為盛然以公孫之對置第本下天子自擢於第一劉蕡之言指時甚直有司不敢以入第蓋言至切者顧後害論至甚者為難行故事欲迷者枉於有司而議不得申言欲顯者牽於文辭而談不得聘為弊之甚由古而然夫能革之誠在今日皇上垂衣御圖側席延士詔郡國以充賦命公卿而署奏而未學庸妄亦預試言開陳其端周爰而問上所以講求至治之本下所以展盡思慮之秋也策以謂古之四民罔敢雜處之義而今取士故有異類之防端木膠鬲倪寬王猛之徒謂不可限以定居黃憲胡廣桑羊叔敖之賢謂不可責其世職以古之鑒求今之宜此誠當世之所急也且夫至治之世四民異居士處閭燕談仁義禮樂於是乎與農服力穡限井田衣食於是乎足工述巧以備器用商達貨以遷有無少而習之各有常分故命射以觀其德命御以論其行如是則可以官賢材而不肖者有所勸不耕則祭無祿不蠶則衣無帛如是則可以禁游手而趨末者著於本器奇者殺以

杜工之僞關讎弗征以檢商之稽此聖王所以治天下之本明疑不得以異物遷也及周之晚漢繼而興救時之宜猶有可取士雖不選於里而有孝廉之舉農欲勸之使勤故有力田之秩有市籍則不得仕禁乘車以抑其豪行之當時猶爲進士升降及弊未適於權宜有入貲以爲郎有入粟而拜爵農商雜進黑白混然今國家監大清以爲治求王道之大端務思真賢以登庶位故於貢士之制亦有異類之防此誠法古爲政之要也然自井田一墮四民失業士不本鄉里舉不明真僞後世之取賢者宜條禁之故有行限年之制有復鄉舉之請有立秀才之科有立中正以品功伐之高下有從士斷以禁人士之流移科條益嚴變更非一賢否之辨未觀其真豈非制其末而失其要歟方今詔郡國歲貢謹士著以占數先鄉議而覈實然患條禁久行甄明不暇者誠由制之未得其術爾必若取人以才考行以實舉賢者上賞以旌功不肖者黜地以明罰自然無冒舉之過有得人之感又何患工商雜以並進士類混而無別乎彼作奇巧以蕩心雜良苦而射利謂其媮俗未足敷風在乎禁之以絕其僞而已若乃端木殖財膠鬲擅利倪寬爲御史而稱職王猛與諸葛而並功黃憲有三公之量胡廣明萬事之理蠶羊之心計叔敖之善相如此數賢者皆遭遇其時以立勳業故不限以定居責其世職烏得同條而語哉謹對

第二道

問古者糾邦禁以敘六典因天討而作五刑所以申嚴國章明慎時憲協大中之法助教化之治定三尺以著令明一成而不變又赦過宥罪議獄緩死法天地之茂育象雷雨之作解式顯好生之化茂宣去殺之仁且肆眚之恩尚廢而不用則時無滌穢之澤若數以爲利則人有委轡之歎折衷之理願聞嘉言

對夫民弊於末心作乎爭德不可以獨行也輔之者其刑法乎猛而

則殘虐以爲暴刑不可以獨任也濟之者其仁恩乎先王由是扶衰世以滅盜卽民心而有作謂天有震耀殺戮我則嚴之以威虐刑罰謂天有生殖長養我則申之以溫慈惠和大爲之防曲爲之制以商周之威德有九刑之典亦知獄與刑之不可去也如此然而議獄緩死義易之明文書災肆赦帝典之奧訓周官有三宥新國用輕典皆所以寬民之謂也故肆眚苟廢則時無滌穢之澤是傷乎無恩也數以爲利則人有委轡之歎是因而起弊也折衷之理何以辨之蓋周家之政至忠厚也須成康而刑乃錯漢世之德至寬仁也至文景而獄乃平夫所以致刑之錯獄之平其要非他在削苛刻之深文執議論之平讞無懼民之不遠無縱誅以快怒使愚民知所避姦吏無所弄則獄雖不赦刑將自平且投筆者不能救饑持轡者不能御騎又何必申小惠推私恩啓民心之姦弛古刑之典者哉故謂不赦者夏醫之針石赦者奔馬之委轡質斯言也不其然乎謹對

第三道

問天駟先牧列於祭經圍人圍師實有官局然則國馬之政其來尚矣皇朝累盛函夏大同華陽之歸偃息既久垌野之頌孳生益蕃而又河隴朔方歲行互市頗積縻於金帛亦罕辨於良駕誠由騎兵不可以闕供夷落仰資於善價擾爲經制者在有司議者或云承平日深冗費宜革思欲減邊關之條禁遂坻庶之賢選儻緩急於戎容可借資於民畜恭惟聖治務廣芻言靡倦極談以光俊域

對養馬有夏庠之制掌於周官春秋紀日中之候著於左傳遠郊任乎牧事祭祖標於月令作延廡禁原蠶著爲國經並載方策則國馬之政其可廢乎國家接千歲之大統承五代之末流畫牡荆以指麾包虎皮而載載聞一作聞有日矣而猶弗敢忘戰備於不虞內有七校禁衛之屯外有二邊防狄之戍而兵騎之衆畜牧且蕃資河朔以

仰足用金帛而交易爲日滋久其費日深然欲滅邊防之條禁遂氓
庶之實遷施之于今未見其得何則探寶貨以懷利者此夷落之民
所甚欲也商功利以惜費則主計之臣所徧明也若乃捐有餘之寶
獲爲兵之備以其所有易其所無斯誠利害可明而經久弗變之制
也非互市不能以足用歸氓庶則懼乎起姦顛蒙所見故在於此謹
對

第四道

問粵若姬氏肇自郤封佐堯而爲農師居豳成於王業綿綿之祚
本仁積功靡靡之原聿來胥宇逮文武之景化被岐鎬之故區繼
聖嗣興定命攸厚相茲河洛之宅求乎天地之中澗瀍之間風雨
所會在禮也載土圭之法於書也兆龜墨之祥遂觀獻卜之文顯
著徙都之事何乃邱明作傳康王有鄭宮之朝杜預垂言平王爲
東周之始豈先後之殊致將方策之失傳矧又奉春始謀極談秦
地之固孟堅能賦頗析西賓之問建邦之利析理奚長諒茲俊髦
精于經傳數言條對勿尙猥弁

對肇祖乎后稷以至乎赧王流德而深厚者莫大乎西周始封乎郤
士卒終於洛都因世而相宅者逮歷乎七百方策之所並載詩頌之
所歌舞可略而談也若乃武王在鎬繼文而有聲周公踐祚相成而
負辰即神臯以開壤據澗瀍之上游是爲洛都以徙周邑然而邱明
作傳康王有鄭宮之朝杜預垂言平王爲東周之始此策所以疑而
問者得非洛之初營周都既定但遷九鼎以居其中及周德之下衰
始平王之東徙迹先後之可見非方策之失傳也夫守金城之府據
繞囂之固扼關中之形勢者彊秦之興也此秦春以是建策而爲高
皇說也因土圭之影迹宗周之舊當天下而宅中者東漢之威也此
孟堅之所以因賦而陳光武之業也夫圯耿徒毫成湯非一邦而理
在岐居鎬姬氏不共邑而興世之威衰顧德薄厚而已又烏稱建邦

之利哉故東西二都皆兩漢由之而興廢也謹對

第五道

問聽德惟聰前王之至訓嘉言罔伏舉善之令猷國家守承平之
基御中區之廣地利無極齒籍益蕃各有爭心必虞彊詐之患或
非良吏慮與枉濫之尤故立肺石以達窮民設馭函以開言路而
又俾之轉對復彼制科思廣所聞遂延多士屬茲舉首將列仕塗
以何道致民之暴者與仁智者無訟以何術使吏之酷者存怒貪
者守廉試舉所長用觀精識

對帝堯之德非不聖也必乘九功而興虞舜之明非不智也必開四
聰之聽大禹之勤求賢士乃至乎王漢家之並建豪英以翼乎治誠
以一人之聖據羣元之尊王道之寢微寢昌生民之或仁或鄙理有
未燭思求其端是以垂精留神廣覽兼聽居以側遲賢之席行則馳
裹輪之車施及於方外而弗遺退託於不明而求輔其勤若此猶懼
乎弗及也故今國家所以覽照前古講求舊規下明詔以開不諱之
門設馭函以廣言者之路復轉對以採摛紳之議立制策以待備良
之言者意在茲乎猥惟禱昧之微舉皆管淺之說夫欲民之暴者與
仁智者無訟在乎庠序以明教化欲吏之酷者存怒貪者守廉在乎
嚴督責而明科條爲治之方不過乎是而已謹對

國學試策三道并問目

問詩刪風雅有一國四方之殊書載典謨實二帝三王之道君臣
之制有別小大之政不侔然而關雎王者之風反繫於周公之化
秦誓諸侯之事乃附於訓誥之餘究其閎綱必有微旨且巧言者
邱明爲取傳春秋蒙誣豔之譏惠人者子產用心作邱賦被蠶尾
之謗謂之誣豔非巧言乎目之蠶尾豈惠人也夫子又何謂之同
恥歎其遺愛者哉子大夫博識洽聞強學待問請談大義用釋深
疑

對舉賢而問炎漢之得人射策程材有唐之明詔晁錯明國家之大體仲舒究春秋之一元皆條對千篇章備天子之親覽劉蕡述兵農之大略徵之以才識而中科然品覈其言詞由有司而考第皇上思講勛華之闕道欲舉漢唐之茂規已詔公卿之流博選賢良之士而又申周官辨論之法以考於賢能較成均上游之徒並升於歲貢退媿拘儒亦當與問夫近世取士之弊策試爲先談無用之空文角不急之常論知井田之不能復妄設沿革之辭知權酷之不可除虛開利害之說或策之者鉤探微細殆皆游談而對之者軌轍曲辭僅能塞問業本末捨實得華若乃詩書之可疑聖賢之異行樂所以導和而率俗官所以共治而建中此皆聖師之所談明問之至要敢陳臆見用備詢求策曰詩刪風雅有一國四方之殊書載典謨是二帝三王之道關睢王者之風反繫於周公之化秦誓諸侯之事乃附於訓誥之餘考其本因可爲梗槩夫述四始之要明五際之變始之以風終之以頌以厚風俗以察盛衰此詩之所以作也而變風變雅有大義之殊焉關雎王化之基三百五篇推其首而周南之作一作化亦繫其列者蓋姬旦分陝而居天子與之共治故其政化之美得繫于王者之風也述百篇爲歷代之寶斷之自唐迄之以周以陳典謨以爲約束此書之所以設也作誥作誓皆三王之事焉成湯有罪己之言五十九篇載其義而秦侯之誓亦參其末者蓋穆公伐晉之辭夫子善之於改過故其誠令之說亦附訓誥之餘不然夫仲尼述堯舜刪詩書者爲不刊以示來葉豈容其失乎且巧言者邱明所恥惠人者子產用心著于前經此可明矣先儒稱仲尼立一王之法始修春秋而親授邱明使之作傳及范甯欲專穀梁一家故蒙以誣豔之譏前志稱子產猶衆人之母善其養民而臨治鄭國能行其惠及國人恕其邱賦之重斂故被以蠶尾之諺夫傳一經之義非曲而暢之蓋不能詳也救一時之弊蓋推一作推而行之非爲毒也學者偏見

妄云誣豔豈邱明之失歟國人無知謗以蠶尾非子產之過矣况以仲尼之聖作經親授豈有繆舉乎國僑既死國人皆罷不曰惠乎宜其同巧言之爲恥以遺愛而見稱也荒屨之說敢以此聞謹對

第二道

問樂由中出音以心生自金石畢陳咸韶間作莫不協和律呂感暢神靈雖嗜欲之變萬殊思慮之端百致敦和飾喜何莫由斯是以哀樂和睽則唯殺暉緩之音應其外禮信殊行則一作雖大雅小雅之歌異其宜鍾期改聽於流水伯喈回車於欲殺威憂未弭子夏不能成聲感慨形言孟嘗所以技泣斯則樂由志革音以情遷蓋心術定其慘舒鏗鏘發之影響是以亡陳遺曲唐人不以爲悲又皇劇談杜生於斯結舌謂致樂可以導志將此音不足移人先王立樂之方君子審音之言請論一作爲詳悉傾圻洽聞

對人肖天地之貌故有血氣仁智之靈生稟陰陽之和故形喜怒哀樂之變物所以感乎目情所以動乎心合之爲大中發之爲至和誘以非物則邪僻之將入感以非理則流蕩而忘歸蓋七情不能自節待樂而節之至性不能自和待樂而和之聖人由是照天命以窮根哀生民之多欲順導其性大爲之防爲播金石之音以暢其律爲制羽毛之采以飾其容發焉爲德華聽焉達天理此六樂之所以作三王之所由用人物以是感暢心術於焉慘舒也故樂記之文唯殺暉緩之音以隨哀樂而應乎外師乙之說以小雅大雅之異禮信而各安於宜夫葢聲正聲應感而至好禮好信由性則然此則禮信之常也若夫流水一奏而子期賞音殺聲外形則伯喈與歎子夏戚憂而不能成聲孟嘗聽曲而爲之墮睫亡陳之曲唐人不悲又皇劇談杜生靡對斯瑣瑣之濫音會非聖人之至樂語其悲適足以感匹夫之意謂其和而不能暢天下之樂且黃鍾六律之音尙賤於未節大武三王之事猶譏於未善况鼓琴之末技一國之遺音又爲足道哉必

欲明教之導志音之移人粗舉一端請陳其說夫順天地調陰陽感人以和適物之性則樂之導志將由是乎本治亂形衰樂歌政之本動民之心則音之移人其在茲矣帝堯之大章成湯之大濩乃是先王立樂之方延陵之聘魯夫子之聞韶則見君子審音之旨謹對

第三道

問建官惟百帝堯之闕規治事惟能武成之令典然則簡易之理斯得爵祿之馭有經自卜洛保圖述天定位別九服廣輪之數辨一圻國邑之宜乃六卿在郊五家爲比咸用蒙士尸於厥官教以和親禁其愛惡惟列爵之既衆豈取士之盡賢匪徒百里比肩尙艱於充選抑亦一命授職咸仰於代耕以夫至寡治衆之言清心省事之論會其歸趣不乃異乎是以秦漢已還抑而不舉得非折衷難用相治乎象魏舊章人倫彝訓遲聞清論用析深疑

對天生民而樹之牧執政以馭邦王建國以辨其方設官而分理列職乎庶位立民之大中以登至平皆由此道帝堯以魏魏之功臻乎靜治故建官惟百緝熙於大猷姬周以郁郁之風縟乎至化故治事惟能不揚於景鑠逮夫卜洛開基述天定位別九服而有等建六官而分職至于六卿在郊五家爲比並列官敎教於民人羸政并諸侯之疆冊古以自是其制不經播紳者罕道炎漢承孤秦之弊日給不暇相沿末流貴因循而不比崇廢民被乎無爲之化故官雖至簡亦可以治平姬周承二代之弊意在救時之失故官必衆建乃能爲共治此世之異時之然也雖曰六卿五家爲職甚細然由計以會要行之誅賞賢者尊之以勸善不賢者罰之以去惡則列職雖云至衆取人安不盡賢祿何由而濫尸官賊難於充選此宗周所以治安而長久後世所宜法則而未行也自秦歷漢積弊相沿權宜適時放去古法居位者莫分善惡之真考課者未見誅賞之當故列職彌衆治事益煩故政立而治不能進官衆而人不必賢夫清心省事之論所以

爲此弊而設非爲宗周而談也今欲捨姬周之往軌談秦漢之末規濁源清流未見其可夫惟簡易之深旨賢哲之異能求禮樂之深源述官師之大義此誠遠大之闕體非陋儒之能具也管窺之微既難於殫見藹藹之鄙聊備於周詢謹對

外集卷第二十五

易童子問卷第一 集七十大

童子問曰乾元亨利貞何謂也曰衆辭淆亂質諸聖者聖人之言也童子曰然則乾無四德而文官非聖人書乎曰是魯穆姜之言也在襄公之九年

童子問曰象曰天行健君子以自強不息何謂也曰其傳久矣而世無疑焉吾獨疑之也蓋聖人取象所以明卦也故曰天行健乾而嫌其執於象也則又以人事言之故曰君子以自強不息六十四卦皆然也易之闕文多矣

童子問曰乾曰用九坤曰用六何謂也曰釋所以不用七八也乾爻七九則變坤爻八六則變易用變以爲占故以各其爻也陽過乎亢則災數至九而必變故曰見羣龍無首吉物極則反數窮則變天道之常也故曰天德不可爲首也陰柔之動多入於邪聖人因其變以戒之故曰利永貞

童子問曰屯之象象與卦之義反何謂也曰吾不知也童子曰屯之卦辭曰勿用有攸往彖曰動乎險中大亨貞動而大亨其不往乎象曰君子以經綸不往而能經綸乎曰居屯之世者勿用有攸往衆人也治屯之時者動乎險而經綸之大人君子也故曰利建侯

童子問曰象曰山下出泉蒙君子以果行育德何謂也曰蒙者未知所適之時也處乎蒙者果於自信其行以育德而已蒙有時而發也患乎不果於自修以養其德而待也

童子問曰象曰雲上天需君子以飲食宴樂何謂也曰需須也事有期而時將至也雲已在天澤將施也君子之時將及矣少待之焉飲食以養其體宴安和樂以養其志有待之道也

童子問曰師貞丈人何謂也曰師正於丈人也其彖曰能以衆正可以王矣童子曰敢問可以王矣孰能當之曰湯武是已彼二王者以臣伐主其爲壽也甚矣然其以本於順民之欲而除其害猶壽藥眩

眩以去疾也故其彖又曰行險而順以此壽天下而民從之童子曰然則湯武之師正乎曰凡師必正於丈人者文王之志也以此壽天下而王者湯武也湯武以應天順人爲心故孟子曰有湯武之心則可也童子曰言無咎何謂也曰爲易之說者謂無咎者本有咎也又曰善補過也嗚呼舉師之成功莫大於王也然不免壽天下而僅得補過無咎以此見兵非聖王之所務而湯武不足貴也

童子問曰地上有水比先王以建萬國親諸侯何謂也曰王氏之傳曰萬國以比建諸侯以比親得之矣蓋王者之於天下不可以獨比也故建爲萬國君以諸侯使其民各比其君而萬國之君共比於王則視天下如身之使臂臂之使指矣

童子問曰同人之象曰唯君子爲能通天下之志象又曰君子以類族辨物何謂也曰通天下之志者同人也類族辨物者同物也夫同天下者不可以一概必使夫各得其同也人睽其類而同其欲則志通物安其族而同其生則各從其類故君子於人則通其志於物則類其族使各得其同也

童子問曰天道虧盈而益謙地道變盈而流謙鬼神害盈而福謙人道惡盈而好謙何謂也曰聖人急於人事者也天人之際罕言焉惟謙之象略具其說矣聖人知人而已天地鬼神不可知故推其迹人可知者故直言其情以人之情而推天地鬼神之迹無以異也然則修吾人事而已人事修則與天地鬼神合矣

童子問曰雷出地奮豫先王以作樂崇德殷薦之上帝以配祖考何謂也曰於此見聖人之心矣聖人憂以天下樂以天下其樂也薦之上帝祖考而已其身不與焉衆人之豫豫其身耳聖人以天下爲心者也是故以天下之憂爲己憂以天下之樂爲己樂

童子問曰觀之象曰先王以省方觀民設教何謂也曰聖人處乎人上而下觀於民各因其方順其俗而教之民知各安其生而不知聖

人所以順之者此所謂神道設教也童子曰順民先王之所難歟曰後王之不戾民者鮮矣

童子問曰剝不利有攸往彖曰順而止之觀象也君子尚消息盈虛天行也者何謂也曰剝陰剝陽也小人道長君子道消之時也故曰不利有攸往君子於此時而止與屯之勿往異矣屯之世衆人宜勿往而君子動以經綸之時也剝者君子正而不往之時也剝盡則復否極則泰消必有息盈必有虛天道也是以君子尚之故順其時而止亦有時而進也

童子問曰復其見天地之心乎者何謂也曰天地之心見乎動復也一陽初動於下矣天地所以生育萬物者本於此故曰天地之心也天地以生物爲心者也其彖曰剛反動而以順行是矣童子曰然則象曰先王以至日閉關商旅不行后不省方豈非靜乎曰至日者陰陽初復之際也其來甚微聖人安靜以順其微至其盛然後有所爲也不亦宜哉

童子問曰大過之卦辭曰利有攸往亨其象曰君子以獨立不懼遯世無悶者其往乎其遯乎曰易非一體之書而卦不爲一人設也太過者撓敗之世可以大有爲矣當物極則反易爲之力之時是以以往而必亨也然有不以爲利而不爲者矣故居是時也往者利而亨遯者獨立而無悶

童子問曰坎之卦曰習坎其彖曰習坎重險也者何謂也曰坎因重險之象以戒人之慎習也習高山者可以追猿狖習深淵者至能涸涿出沒以爲樂夫險可習則天下之事無不可爲也是以聖人於此戒人之習惡而不自知誘人於習善而不倦故其象曰君子以常德行習教事也

童子問曰咸取女吉何謂也曰咸感也其卦以剛下柔故其彖曰男下女是以取女吉也童子又曰然則男女同類歟曰男女媾而其志

通謂各睽其類也凡柔與柔爲類剛與剛爲類謂感必同類則以柔應柔以剛應剛可以爲咸乎故必二氣交感然後爲咸也夫物類同者自同也何所感哉惟異類而合然後見其感也鐵石無情之物也而以磁石引針則雖隔物而應彖曰觀其所感而萬物之情可見者謂此類也童子又曰然則聖人感人心而天下和平是果異類乎曰天下之廣蠻夷戎狄四海九州之類不勝其異也而能一以感之此王者所以爲大聖人所以爲能

童子問曰恆利有攸往終則有始何謂也曰恆之爲言久也所謂窮則變變則通通則久也久於其道者知變之謂也天地升降而不息故曰天地之道久而不已也日月往來與天偕行而不息故曰日月得天而能久照四時代謝循環而不息故曰四時變化而久成聖人者尚消息盈虛而知進退存亡者也故曰聖人久於其道而化成

童子問曰遯亨小利貞何謂也曰遯陰進而陽遯也遯者見之先也陰進至于否則不正利矣遯者陰浸而未感陽能先見而遯猶得小利其正焉

童子問曰明入地中明夷君子以蒞衆用晦而明何謂也曰日君象也而下入于地君道晦而天下暗矣大哉萬物各得其隨則君子嚮晦而入宴息天下暗而思明則君子出而臨衆商紂之晦周道之明也因其晦發其明故曰用晦而明童子曰然則聖人貴之乎曰不貴也聖人非武王而貴文王矣

童子問曰家人利女貞何謂也其不利君子之正乎曰是何言歟象不云乎女正位乎內男正位乎外也曰然則何爲獨言利女正曰家道主於內故女正乎內則一家正矣凡家人之禍未有不始於女子者也此所以戒也嗚呼事無不利於正未有不正而利者聖人於卦隨事以爲言故於坤則利牝馬之正於同人則利君子正於明夷則利艱正於家人則利女正

童子問曰睽之象與卦辭之義反何謂也曰吾不知也童子曰睽之卦曰小事吉象曰睽之時用大矣哉曰小事睽則吉大事睽則凶也凡睽於此者必有合於彼地睽其下而升天睽其上而降則上下交而爲泰是謂小睽而大合使天地睽而上下不交則否矣聖人因其小睽而通其大利故曰天地睽而其事同男女睽而其志通萬物睽而其事類其象又曰君子以同而異

易童子問卷第一

易童子問卷第二 集七十七

童子問曰履險蹈難謂之蹇解難濟險謂之解二卦之義相反而辭同皆曰利西南者何謂也曰聖人於二卦辭則同而義則異各於其象言之矣 蹇之象曰往得中也解之象曰往得衆也者是已西南坤也坤道主順凡居蹇難者以順而後免於患然順過乎柔則入於邪必順而不失其正故曰往得中也解難者必順人之所欲故曰往得衆也

童子問曰損損下益上益損上益下何謂也曰上君而下民也損民而益君損矣損君而益民益矣語曰百姓足君孰與不足此之謂也童子又曰損之象曰君子以懲忿窒慾益之象曰君子以見善則遷有過則改何謂也曰嗚呼君子者天下繫焉非一身之損益天下之利害也君子之自損忿慾爾自益者遷善而改過爾然而肆其忿慾者豈止一身之損哉天下有被其害矣遷善而改過者豈止一己之益哉天下有蒙其利者矣童子曰君子亦有過乎曰湯孔子聖人也皆有過矣君子與衆人同者不免乎有過也其異乎衆人者過而能改也湯孔子不免有過則易之所謂損益者豈止一身之損益哉

童子問曰夫不利即戎何謂也曰謂其已甚也去小人者不可盡蓋君子者養小人者也小人之道長斯害矣不可以不去也小人之道已衰君子之利及乎天下矣則必使小人受其賜而知君子之可尊也故不可使小人而害君子必以君子而養小人夫剛決柔之卦也五陽而一陰決之雖易而聖人不欲其盡決也故其象曰所向乃窮也小人感則決之衰則養之使知君子之爲利故其象曰君子以施祿及下小人已衰君子已感物極而必反不可以不懼故其象又曰居德則忌

童子問曰困亨貞大人吉無咎其象曰險以說困而不失其所亨何謂也曰困亨者困極而後亨物之常理也所謂易窮則變變則通也

困而不失其所亨者在困而亨也惟君子能之其曰險以說者處險而不懼也惟有守于其中則不懼于其外惟不懼則不失其所亨謂身雖困而志則亨也故曰其惟君子乎其象又曰君子以致命遂志者是也童子又曰敢問正大人吉無咎者古之人孰可以當之曰文王之姜里箕子之明夷

童子問曰革之象曰湯武革命順乎天而應乎人何謂也曰逆莫大乎以臣伐君若君不君則非君矣是以至仁而伐桀紂之惡天之所欲誅而人之所欲去湯武誅而去之故曰順乎天而應乎人也童子又曰然則正乎曰正者常道也堯舜禹禹傳子是已權者非常之時必有非常之變也湯武是已故其象曰革之時大矣哉云者見其難之也童子又曰湯武之事聖人貴之乎曰孔子區區思文王而不已其厚於此則薄於彼可知矣童子又曰順天應人豈非極稱之乎何謂薄曰聖人於革稱之者適當其事爾若乾坤者君臣之正道也於乾坤而稱湯武可乎聖人於坤以履霜爲戒以黃裳爲吉也童子問曰革去故而鼎取新何謂也曰非聖人之言也何足問革曰去故不待言而可知鼎曰取新易無其辭汝何從而得之夫以新易舊故謂之革若以商革夏以周革商故其象曰湯武革命者是也然則以新革故一事爾分於二卦者其誰乎童子又曰然則鼎之義何謂也曰聖人言之矣以木巽火亨飪也

童子問曰震之辭曰震驚百里不喪七鬯者何謂也曰震者雷也驚乎百里震之大者也處大震之時衆皆震驚而獨能不喪其守不喪其器者可以任大事矣故其象曰震驚百里驚遠而懼邇也不喪七鬯出可以守宗廟社稷爲祭主者謂可任以大事也童子曰郭公夏五聖人所以傳疑象之闕文奈何曰聖人疑則傳疑也若震之象其辭雖闕其義則在又何疑焉

童子問曰艮之象曰君子以思不出其位何謂也曰艮者君子止而

不爲之時也時不可爲矣則止而以待其可爲而爲者也故其彖曰時止則止時行則行於斯時也在其位者宜如何思不出其位而已然則位之所職不敢廢也詩云風雨如晦鷄鳴不已此之謂也

童子問曰歸妹征凶彖曰歸妹天地之大義人之終始也其卦辭凶而彖辭吉何謂也曰合二姓具六禮而歸得其正者此彖之所謂妹者也若婚不以禮而從人者卦所謂征凶者也童子曰敢問何以知之曰咸之辭曰取女吉其爲卦也艮下而兌上故其彖曰上柔而下剛男下女是以吉也漸之辭曰女歸吉其爲卦也艮下而巽上其上柔下剛以男下女皆與咸同故又曰女歸吉也歸妹之爲卦也不然兌下而震上其上剛下柔以女下男正與咸漸反故彼吉則此凶矣故其彖曰征凶位不當也者謂兌下震上也童子曰取必男下女乎曰夫婦所以正人倫禮義所以養廉取故取女之禮自納采至于親迎無非男下女而有漸也故漸之彖曰漸之進也女歸吉也者是已奈何歸妹以女下男而往其有不凶者乎

童子問曰兌之彖曰順乎天而應乎人何謂也曰兌說也說以先民民忘其勞說以犯難民忘其死說莫大於此矣而所以能使民忘勞與死者非順天應人則不可由是見小惠不足以說人而私愛不可以求說

童子問曰萃聚也其辭曰王假有廟渙散也其辭又曰王假有廟何謂也曰謂渙爲散者誰歟易無其辭也童子曰然則敢問渙之義曰吾其敢爲臆說乎渙之卦辭曰利涉大川其彖曰乘木有功也其象亦曰風行水上渙而人之語者冰釋汗浹皆曰渙然則渙者流行通達之謂也與夫乖離分散之義異矣嗚呼王者富有九州四海萬物之象莫大於萃可以有廟矣功德流行達于天下莫大於渙可以有廟矣

童子問曰節之辭曰苦節不可貞者自節過苦而不得其正歟物被

其節而不堪其苦歟曰君子之所以節於己者爲其愛於物也故其彖曰節以制度不傷財不害民者是也節者物之所利也何不堪之有乎夫所謂苦節者節而大過待於己不可久雖久而不可施於人故曰不可正也童子曰敢問其人曰異衆以取各貴難而自刻者皆苦節也其人則鮑焦於陵仲子之徒是矣二子皆苦者也

童子問曰小過之象曰君子以行過乎恭喪過乎哀用過乎險者何謂也曰是三者施於行己雖有過焉無害也若施於治人者必合乎大中不可以小過也蓋仁過乎愛惠之所生也刑過乎威亂之所起也推是可知之矣

童子問曰既濟之象曰君子思患而豫防之者何謂也曰人情處危則慮深居安則意怠而患常生於怠忽也是以君子既濟則思患而豫防之也

童子問曰火在水上未濟君子以慎辨物居方何謂也曰未濟之象火宜居下而反居上水宜居上而反居下二物各失其所居而不相濟也故君子慎辨其物宜而各置其物於所宜居之方以相爲用所以濟乎未濟也

易童子問卷第二

易童子問卷第三 集七十八

童子問曰繫辭非聖人之作乎曰何獨繫辭焉文言說卦而下皆非聖人之作而衆說淆亂亦非一人之言也昔之學易者雜取以資其講說而說非一家是以或同或異或是或非其擇而不精至使害經而惑世也然有附託聖經其傳已久莫得究其所從來而覈其真偽故雖有明智之士或貪其雜博之辯溺其富麗之辭或以爲辯疑是正君子所慎是以未始措意於其間若余者可謂不量力矣邈然遠出諸儒之後而學無師授之傳其勇於敢爲而決於不疑者以聖人之經尙在可以質也童子曰敢問其略曰乾之初九曰潛龍勿用聖人於其象曰陽在下也豈不曰其文已顯而其義已足乎而爲文言者又曰龍德而隱者也又曰陽在下也又曰陽氣潛藏又曰潛之爲言隱而未見繫辭曰乾以易知坤以簡能易則易知簡則易從易知則有親易從則有功有親則可久有功則可大可久則賢人之德可大則賢人之業其言天地之道乾坤之用聖人所以成其德業者可謂詳而備矣故曰易簡而天下之理得矣者是其義盡於此矣俄而又曰廣大配天地變通配四時陰陽之義配日月易簡之善配至德又曰夫乾確然示人易矣夫坤隤然示人簡矣又曰夫乾天下之至健也其德行常易以知險夫坤天下之至順也其德行常簡以知阻繫辭曰六爻之動三極之道也者謂六爻而兼三材之道也其言雖約其義無不包矣又曰易之爲書也廣大悉備有天道焉有人道焉有地道焉兼三材而兩之故六六者非他也三材之道也而說卦又曰立天之道曰陰與陽立地之道曰柔與剛立人之道曰仁與義兼三材而兩之故易六畫而成卦分陰分陽迭用柔剛故易六位而成章繫辭曰聖人設卦觀象繫辭焉而明吉凶又曰辨吉凶者存乎辭又曰聖人有以見天下之動而觀其會通以行其典禮繫辭焉以斷其吉凶是故謂之爻又曰易有四象所以示也繫辭焉所以告也定

之以吉凶所以斷也又曰設卦以盡情僞繫辭焉以盡其言其說雖多要其旨歸止於繫辭明吉凶爾可一言而足也凡此數說者其略也其餘辭雖小異而大旨則同者不可以勝舉也謂其說出於諸家而昔之人雜取以釋經故擇之不精則不足怪也謂其說出於一人則是繁衍叢勝之言也其遂以爲聖人之作則又大繆矣孔子之文章易春秋是已其言愈簡其義愈深吾不知聖人之作繁衍叢勝之如此也雖然辨其非聖之言而已其於易義尙未有害也而又有害經而惑世者矣文言曰元者善之長也亨者嘉之會也利者義之和也貞者事之幹也是謂乾之四德又曰乾元者始而亨者也利貞者性情也則又非四德矣謂此二說出於一人乎則殆非人情也繫辭曰河出圖洛出書聖人則之所謂圖者八卦之文也神馬負之自河而出以授於伏羲者也蓋八卦者非人之所爲是天之所降也又曰包羲氏之王天下也仰則觀象於天俯則觀法於地觀鳥獸之文與地之宜近取諸身遠取諸物於是始作八卦然則八卦者是人之所爲也河圖不與焉斯二說者已不能相容矣而說卦又曰昔者聖人之作易也幽贊於神明而生蓍參天兩地而倚數觀變於陰陽而立卦則卦又出於蓍矣八卦之說如是是果何從而出也謂此三說出於一人乎則殆非人情也人情常患自是其偏見而立言之士莫不自信其欲以垂乎後世惟恐異說之攻之也其肯自爲二二三之說以相抵牾而疑世使人不信其書乎故曰非人情也凡此五說者自相乖戾尙不可以爲一人之說其可以爲聖人之作乎童子曰於此五說亦有所取乎曰乾無四德而洛不出圖書吾昔已言之矣若元亨利貞則聖人於彖言之矣吾知自堯舜已來用卜筮爾而孔子不道其初也吾敢妄意之乎童子曰是五說皆無取矣然則繁衍叢勝之言與夫自相乖戾之說其書皆可廢乎曰不必廢也古之學經者皆有大傳今書禮之傳尙存此所謂繫辭者漢初謂之易大傳也至後

漢已爲繫辭矣語曰爲趙魏老則優不可以爲滕薛大夫也繫辭者謂之易大傳則優於書禮之傳遠矣謂之聖人之作則僞僞之書也蓋夫使學者知大傳爲諸儒之作而敢取其是而捨其非則三代之末去聖未遠老師名家之世學長者先生之餘論雜於其間者在焉未必無益於學也使以爲聖人之作不敢有所擇而盡信之則害經惑世者多矣此不可以不辨也吾豈好辨者哉董子曰敢問四德曰此魯穆姜之所道也初穆姜之筮也過良之隨而爲隨元亨利貞說也在襄公之九年後十有五年而孔子始生又數十年而始贊易然則四德非乾之德文言不爲孔子之言矣董子曰或謂左氏之傳春秋也竊取孔子文言以上附穆姜之說是左氏之過也然乎曰不然彼左氏者胡爲而傳春秋豈不欲其書之信於世也乃以孔子晚而所著之書爲孔子未生之前之說此雖甚愚者之不爲也蓋方左氏傳春秋時世猶未以文言爲孔子作也所以用之不疑然則謂文言爲孔子作者出於近世乎董子曰敢問八卦之說或謂伏羲已授河圖又俯仰於天地觀取於人物然後畫爲八卦爾二說雖異會其義則一也然乎曰不然此曲學之士牽合傳會以苟通其說而遂其一家之學爾其失由於妄以繫辭爲聖人之言而不敢非故不得不曲爲之說也河圖之出也八卦之文已具乎則伏羲授之而已復何所爲也八卦之文不具必須人力爲之則不足爲河圖也其曰觀天地觀鳥獸取於身取於物然後始作八卦蓋始作者前未有之言也考其文義其創意造始其勞如此而後八卦得以成文則所謂河圖者何與於其間哉若曰已授河圖又須有爲而立卦則觀於天地鳥獸取於人物者皆備言之矣而獨遺其本始所授於天者不曰取法於河圖此豈近於人情乎考今繫辭二說離絕各自爲言義不相通而曲學之士牽合以通其說而悞惑學者其爲患豈小哉古之言僞而辨順非而澤者殺無赦嗚呼爲斯說者王制之所宜誅也董子曰敢

問生著立卦之說或謂聖人已畫卦必用著以筮也然乎曰不然考其文義可知矣其曰昔者聖人之作易也者謂始作易時也又曰幽贊於神明而生著參天兩地而倚數觀變於陰陽而立卦發揮於剛柔而生爻者謂前此未有著聖人之將作易也感於神明而著爲之生聖人得之遂以倚數而立卦是言昔之作易立卦之始如此爾故漢儒謂伏羲畫八卦由數起者用此說也其後學者知幽贊生著之怪其義不安則曲爲之說曰用生著之意者將以救其失也又以卦由數起之義害於二說則謂已畫卦而用著以筮欲牽合二說而通之也然而考其文義豈然哉若曰已作卦而用著以筮則大衍之說是已大抵學易者莫不欲算其書故務爲奇說以神之至其自相乖戾則曲爲牽合而不能通也董子曰敢請益曰夫論未達者未能及於至理也必指事據迹以爲言余之所以知繫辭而下非聖人之作者以其言繁衍叢勝而乖戾也蓋略舉其易知者爾其餘不可以悉數也其曰原始反終故知死生之說又曰精氣爲物遊魂爲變是故知鬼神之情狀云者質於夫子平生之語可以知之矣其曰知者觀乎彖辭則思過半矣又曰八卦以象告爻象以情言云者以常人之情而推聖人可以知之矣其以乾坤之策三百有六十當期之日而不知七八九六之數同而乾坤無定策此雖筮人皆可以知之矣至於何謂子曰者講師之言也說卦雜卦者筮人之占書也此又不待辨而可以知者然猶皆迹也若夫語以聖人之中道而過推之天下之至理而不通則思之至者可以自得之董子曰既聞命矣敢不勉

易童子問卷第三

外制集卷第一 集七十九

制勅五十首

勸農勅

勅朕惟德之不明而至於用武久興師旅重困黎元有閔民愛物一
作農之心誰能副予意者有信賞必罰之令今將舉而行之朕言有
條其聽無忽夫農天下之本也凡為國者莫不務焉要在節其用則
易充勉其力使不匱今夫食者甚衆而輸者已殫勸之不勤而取之
仰足使民盡耕猶不給而半為游墮之手使歲常熟猶恐乏而多懼
水旱之凶調斂不得已也而吏之不仁一作期者緣以誅求賦役自
有法也而政之不明者重為煩費農者有幾害者若茲欲寬吾民何
可得也既富而教豈無術乎體予茲懷望爾良吏自今在官有能興
水利闢田荒一作荒田課農桑增戶口凡有利一有於字農而弗一
作不擾者有司具為一作其賞格當議旌酬其或陂池不修田野不
闢桑粟不植戶口流亡慢政墮官亦行降黜夫言而不信法弛於寬
朕久患之方思革弊爾毋猶習舊愆慢我新書此匪虛名必期責實
凡為條約告爾既明賞吾不欺罰爾無悔

頒貢舉條制勅

勅夫儒者通乎天地人之理而兼明古今治亂之原可謂博矣然學
者不得聘其說而有司務先聲病章句以牽拘之則吾豪雋奇偉之
士何以奮焉有純明朴茂之美而無數學養成之法其飭身勵節者
使與不肖之人雜而並進則夫懿德敏行之賢何以見焉此士人一
作取士之甚弊而學者自以為患議者屢以為言朕慎於改更比令
詳酌一作朕於更改之令比詳酌焉仍詔宰府加之參定皆以謂本
學校以教之然後可求其行實先策論則辨理者得盡其說簡程式
一作試則闕博者可見其材至於經術之家稍增新制兼行舊式以
勉中人其煩法細文一皆罷去明其賞罰俾各勸焉如此則待士之

意周取人之道廣夫過人以薄者不可責其厚今朕建學興善以尊
子大夫之行而更制革弊以盡學者之材予於教育之方勤亦至矣
有司其務嚴訓道精察舉以稱朕意學者其思進德修業而無失其
時凡所科條可一作以為承制一作式

皇叔荆王元儼可贈徐兗二州牧追封燕王加天策上將軍

制

勅朕負荷先業懼德不明實賴宗藩以屏王室今其亡也何痛如之
故皇叔荆南淮南節度大使守太師尚書令兼中書令行荊州揚州
牧荆王先皇帝之弟而朕之諸父於屬為尊荆淮之節於鎮為重太
師三公尚書中書令皆一品於官為崇於爵為貴而王皆享一作兼
之克有令德貴而能去其驕富而能守以約各重天下聞于四夷自
遵疾以來醫禱備至朕書臨省親為膏藥賜賚之物謙而不受詔言
猶在魏可想焉噫享年六十不謂不壽天之五福不曰不全而朕之
所以悼嘆之至深者上遵先帝友于之仁而下示朕孝思之至也故
詔有司擇位號之尤尊美者以追榮之而稱朕意焉夫名載冊書而
不朽澤流子孫而亡窮魂而有知膺我休命可特贈天策上將軍依
舊荆南淮南節度大使守太師尚書令兼中書令行荊州牧仍加克
州徐州牧追封燕王

堂後官李元方可大理寺丞制

勅李元方丞相府天下政本也吾任於相者既重則為之選吏也亦
艱賞勞勸能皆有優典以爾給事茲久其勤益著慎不漏泄謹無過
差用爾歲成俾丞卿寺勉圖後效無玷寵榮可

祠部員外郎直集賢院兩浙轉運按察使王琪可就轉刑部

員外郎制

勅具官王琪以儒學官于朝而嘗好言天下之利今二浙之廣生齒
衆而物產繁誠可以效汝之材幹予之盡今有司申考績之舊文乃

敘選之常法爾其能使吾民不勞而邦用給足去吏之貪愚者毋害于州縣舉士之材能者不遺其寒俊厥效苟著信賞豈稽往其勉哉以率爾職可

國子博士陳淑秘書丞薛仲簡尹源太子中舍李隨大理評事朱書昌磨勘改官制

勅國家考課之格敘進有常所以示為法之均平而防有司之輕重也及其弊也賢愚並進而功過不明屬者命考舊文稍更新制不專累日以為限間須善舉而後選夫選之艱則材者出賞之當則能者勸焉此予之意也今爾等雖以滿歲增秩而皆敘材可稱尙有爾知以應新法可

前光祿寺丞王簡言復舊官制

勅夫王者之有教所以開訓道之一無此字不純而愚民之陷焉者開其自新之路誘於改過之善而已然前世議者莫不以數赦為患得非人之無良以赦為幸者歟具官王簡言服于朝倫嚮以罪廢屢經肆眚宜與滌瑕夫過不可以貳赦不可以幸惟勉爾力以贖前羞可

登州黃縣尉五字一作主簿東方辛可密州司士參軍制

勅具官東方辛朕以信示天下而以祿報有功今爾辛緣死事而命于官然按察者紕失職而來有請按察吾所詔也不從則不自信念功吾所急也不報則無所勸焉是用易爾散秩優爾俸祿免爾吏責俾爾自安庶幾使吾信賞並行而不失可

華州鄭縣尉程炎可泗一作同州錄事參軍京兆府興平縣尉呂定可鳳翔府左司理參軍制

勅自兵興以來盜賊頗衆屢明信賞思以勸能具官程炎等各以敏材試于一尉今有司上爾所獲應于賞格聊茲甄錄以嘉勳勞夫量功而賞大小異宜勉爾自圖余無所愛可

大理評事張子庚可大理寺丞制

勅具官張子庚往臨邑政一作事近在王畿當夫賦役方繁而盜賊並起凡諸州縣之吏能不失職而免於咎者蓋亦鮮焉一作夫爾考績有司法當進秩能守厥職是亦可嘉遷爾卿丞勉終縣治可

舒州推官呂選可大理寺丞制

勅具官呂選國家設官之法由保薦而遷者必試之縣政非惟質舉者之信否亦以慎臨民之選焉以爾久服官勤今由材舉往服新命將觀汝能可

殿中丞郭及大理寺丞魯有立太常寺太祝張昭度等磨勘改官制

勅具官郭及等朕患考績之不明而使無聞者累久而幸遷有善者混淆而莫別故申新法不專以日月敘秩而間須保任之舉一作任保之限非以一有節字抑人之進而所以求能者焉汝等無謂今由積日而得次升尙勤後圖以俟知者可

東頭供奉官桑達可內殿崇班制先因過犯格磨勘一年今及四年除授

勅具官桑達國家命官之術必量功過之分計歲時之勤以為陞黜法在有司其平不欺其信不渝以爾嚮因事累格其會課今日月及矣考績者以時來上還汝所當得者示我不汝忘焉可

還州石昌鎮熟戶牛家族巡檢奴訛男萬訛可本族都軍主制

勅萬訛世捍邊陲繼生材武能以威信服其部人今爾父以疾而告休俾爾承家而濟美夫忠孝之節不徒守其先業而已亦以奮功名而圖富貴焉可

審官院令史馬登可遂州司戶參軍充職制

勅馬登百司丞史皆有入官之格不惟賞其勞所以勸能者而謹其

無過也惟勤與慎可不勉焉可

西京左藏庫使內侍省內侍押班任守信可遙郡刺史依舊

鄜延路駐泊兵馬鈐轄制

勅國家自靈夏不賓邊隅多警議者率以謂用兵之道任將宜惠恩信不久一作明則無以得士心一無此字山川不習則不可圖勝算頃一無二字自兵宿于野久而無功此始將帥數易之過也苟其能者無遽奪焉以具官任守信選以敏材臨于戎事肅軍捍寇宜力有聞遽以飛章自言滿歲顧久親於矢石豈不念於勤勞然而士卒之樂既汝安夷狄之情惟汝熟雖欲代汝實難其所宜旌以郡章仍臨舊部體茲委寄服我茂恩可

開封府兵曹參軍謝曄可大理寺丞制

勅具官謝曄府掾之制凡再歲而無過失者皆得例遷蓋以京師大衆之會獄訟尤多能無過焉是亦材也今考爾歲月法當進秩夫官能有守卑者尤難事之實繁勸則克一作惟勤則濟勉服明訓往膺寵章可

虞部員外郎盧士宏一作閩太常博士王揆祠部員外郎秘

閣校理張瓌丁憂服闋復舊官制

勅具官張瓌等夫孝子之於其親也無所不至焉生則養之以祿殯則榮之以名爾等自丁家艱克盡孝道天時屢變禮制以終勉思揚名無墜厥世可

比部員外郎趙宗古謝衍屯田員外郎李琪一作祺秘書丞

劉元瑜殿中丞馬仲磨勘改官制

勅具官謝衍等自兵興以來天下重困盜賊並起獄訟繁多爲州縣者不亦勞乎夫飢寒者未能衣食而調斂者未能盡除惟處之有方則民不甚弊賴夫勤敏乃克濟焉爾等咸以吏材寄予民政錄勞考課宜有茂恩可

前磁州錄事一作司理參軍杜鈇一作鈇可衛尉寺丞制

勅朕撫有萬國而官羣材不敢專用獨見之明而外詔庶寮各舉其善具官杜鈇舉者言爾材堪親民是用升汝司衛之丞而將用汝臨人於治詩云豈第君子民之父母蓋夫善爲政者能使其民愛之如此汝能以此親我民乎往膺進秩之榮無爲舉者之累可

前杭州司理參軍范褒可衛尉寺丞充堂後官制

勅朕觀兩漢名臣多或出於丞史小吏非夫丞史之能出名臣也乃知古雖吏屬亦必選用賢材焉一有况字今中書丞相之職比古公府曹掾之制吏員已爲簡闕欲任其事豈不擇人故詔銓衡俾其慎選具官范褒有司來上以爾爲一作有材進爾諸丞往率乃職古人可慕無自怠焉可

將作監主簿程中行制

勅程中行夫廉取道缺而貪冒成俗風化之薄久矣吾思有以勵焉故於致仕之制特示推恩之優厚廩給以家居官子孫而世及今爾父至服勞在官以老得謝宜茲懋賞以示寵榮汝尚勗哉無忘濟美可

祠部郎中沈周可開封府判官制

勅具官沈周夫刑獄以禁暴而託獄足以爲姦法令以止亂而舞法反以滋害平民者政而敗政者吏也知政之術繩吏爲先况乎京師號稱繁劇凡治繁者貴一作尚乎不勞苟知其方在得於要擿姦急吏此非要數以爾久列周行屢經任使通於政事俾佐浩穰告汝政弊之多端訓汝治煩之有術善思乃職無或廢官可

絳州防禦判官張銳衛州軍事推官汲熙載可大理寺丞制

勅具官張銳等以爾由學飭身試材于吏服勞既久薦者屢聞有邇臣之亟稱加所司之考實推恩進秩其慎若斯豈不勉哉無回汝守可

供備庫副使王道卿一作清臣可西京左藏庫副使制

朕觀春秋之際公侯卿大夫之譜至數十世而不絕不徒世其祿爾惟克勤者乃不隕焉近至于唐將相之後能以勳各自繼其家者亦衆秉筆者記之號稱衣冠盛事噫古之大族多良子孫而今獨鮮耶抑惟人之勉不勉爾惟汝大臣之子世爲名家豈不勵焉無俾自墜有司積日茲乃敘進不次之賞能者得之汝其勉哉無忽而怠可

前彰信軍節度判官褚式可太子中舍致仕制

勅具官褚式昨按察者言爾事一無此字有迹而爾方以老自一無此字請吾屈言者不究而進爾以秩全爾之歸吾之欲成人之美而不欲成人之惡如此汝其休矣知我之仁可

祠部員外郎崔燁男庶可試秘書省校書郎一作試監簿制

勅崔燁男庶古稱不學者之於事譬夫立而面牆與其敗政于官孰若勸教之明而養之有素也屬者故勅有司增定蔭補之格必由試藝乃得洩官夫不惟爲國造士是乃爲臣立家此予一作其詔也汝其勉之可

梓潼縣主簿宋文質可國子監丞致仕制

勅具官宋文質壯也服勞晚而登仕老能知止意亦可嘉吾有躋民仁壽之心爾其歸安田里之養可

駕部員外郎席夷甫可本官致仕制

勅具官席夷甫古者七十而得謝所以優其臣也不任以事而養之于家所以愛老也朕患廉恥之缺而尤嘉止足之人隆長老之恩而欲興孝弟之俗今爾之請朕所褒焉已詔有司錄爾之子克安眉壽往服龍章

南劍州司理參軍李孝友責授吉州參軍制

勅具官李孝友不孝之罪國有常刑民愚無知犯者猶鮮况爾被儒服者誦習六經而背本忘親悖理傷化雖屢經赦宥法欲貸汝而汝

之自視夫亦何顏宜屏遠方絕而不齒

江南 路提刑內殿承制柴貽慶可就轉禮賓副使制

勅具官柴貽慶傳曰夫刑者一成而不變又曰法者天下之至平庶獄之間其可不慎故於國制尤重邦刑擇彼監司必參文武所以藉其材敏而佐夫不逮者也惟爾克守其職能濟以勤有司質成法應敘進故增榮秩無替前勞可

右侍禁樂天錫可率府率致仕制

勅具官樂天錫服勞茲久因疾得衰雖未及於引年嘉自能於知止俾進春宮之率以爲歸老之榮可

大理寺丞袁穆許恢授殿中丞著作佐郎程適授秘書丞制

並磨勘改官

勅具官程適等國家治民之要其具素備惟奉法守職而免於有過者考其積日皆得敘遷苟有能稱豈無懋賞爾等寄子民政咸上歲成俛登于朝蓋用常典若夫異績在爾勉焉可

皇姪仲伉贈官制

勅具官仲伉朕上憑宗社之靈克荷先帝之業思治天下以孝而親九族以仁今宗正言爾信安郡王之長孫也不幸早世而追榮之典尙未有稱朕聞于聽一作聞于朕冀意甚悼焉可

秦州推官董彝可太子中舍致仕制

勅具官董彝朕嚮遣韓琦行視邊鄙所以宣上恩而下逮撫下情而上通也今琦言爾有勳未錄久疾自淹夫人之有勞吾豈不念事或一作有在遠患於不聞既披奏章宜示龍典可

劍州司理參軍董壽可大理寺丞制

勅具官董壽夫法者所以禁民爲非而使其遷善遠罪也然世之事於法者不患於不通而患於刻薄豈夫一無此字學者之弊歟今爾以學法入官而有能二字一作復被薦以一作施之臨事可不戒哉

往服明恩宜慎汝習可

兵部郎中皇甫必男備可將作監主簿制

勅具官皇甫必男備梓潼去京三千里外而東蜀一都會也吾難其選知必爲材而乃以家爲言請任其子得榮初仕仍便其私庶乎必無內顧之憂而得盡心於事則汝之幹蠱可不勉哉可

東頭供奉官閣門祗候知勝關寨李守信可就轉內殿崇班儀州寨主制

勅具官李守信西師之出累年而將帥之效未著凡爲吾扞城而乘障者不亦久一有於字勞乎迹其勤誠宜有陞進若夫異賞俟爾立功

和州防禦判官夏侯溥可太子中舍致仕制

勅具官夏侯溥古者王道之隆也使夫種樹畜養皆不失其時然後衣帛食肉而老者得以安之今夫致仕而歸者必增其榮秩而又廩給于其一無此字家者所以慮夫田野一作里之間養老之具未備而有以優其終身焉爾其往哉服我新命可

都官員外郎知成州王嘉聞轉職方員外郎殿中丞知普州葛昌一作商轉國子博士某官監洛州鹽酒稅李思恭轉駕部員外郎制並舊勅改官

勅具官王嘉聞等夫士之學古于祿而陳力涖官者孰不欲自爲材耶患乎勸之勵之四字一作勸賞砥礪無方而使賢能之不勉也一無此字此朕所以思革審官之法近增舉類之科爾等猶用舊文例當升秩其思率職無懈厥勤俟乎有聞以應新格可

東頭供奉官張德榮張行簡可率府率致仕制

勅具官張行簡等陳力有年服勞匪怠止足之戒乃能自知終始之恩亦以示勸衛率之長東宮要官享茲榮各可以休老可

虞部員外郎呂師簡可比部員外郎制爲冠軍

勅具官呂師簡國家嚮因募兵特立賞格俾勸勤者速於集事而議者皆患應募之卒雖多而難用豈夫訓練之未至將由簡閱之不精然而號令重于已行賞罰貴乎存信今有司按籍言爾當遷往服新恩其思實効可

悉利族軍主嗟移可都軍主制爲功效

勅嗟移夫賊壘未平王師在野當吾聞鼓擊思將帥之際是汝立功名取富貴之時而能率其部人力捍狂寇材武忠勇是皆可嘉爵秩階勳茲以爲寵猶有異賞爾其圖之可

東上閣門使普州刺史趙安期可右領軍衛大將軍致仕制

勅具官趙安期夫陳力就列不能者止而致仕之制非爲止者而設乃古所以禮其卿大夫之美名也而今又有增官秩頒廩給之數於爾之止一作爾之知止豈不爲優爾其歸哉可以榮矣可

供備庫副使沿邊巡檢都監王守一可就轉西京左藏庫副使制

勅具官王守一臨于軍政邈彼塞垣訓齊甲兵謹備寇盜爾其勤一作謹職吾不忘勞適因奏課之來宜舉陟明之典可

具州歷亭縣主簿周登可國子監丞致仕制

勅具官周登方剛而仕以疾思歸自陳不能可謂知止有官以爲汝寵有俸以終汝身體予深仁一作恩膺此嘉命可

進納長馬空名誥海詞

勅某人等國家以用師西鄙不欲加賦於人乃能出爾家貲佐吾邦用第其多少咸有一作可旌酬俾綴官聯以榮里閭可

潁州推官江楫可大理寺丞制

勅具官江楫朕思與多士共寧庶邦而賢豪材美之人或自沉於幽遠與夫懿節茂行之韞于中而未見於一作于事者吾皆不得而備觀焉故以舉類之科而爲官人之法今舉者言爾材行可稱命爾新

恩以期後効可

廣南西路轉運按察使金部員外郎周陵可司勳員外郎就
差充荆湖南路轉運按察使制

勅具官周陵朕顧荆楚之俗雜於諸蠻而嚮者州縣之間不能綏輯
與民生患曠日未平夫惟蠻貊一作夷雖不通於禮義而剽輕之性
惟信一作德可懷擴悍之心以威則服思擇能者僉曰汝材至於察
官吏之否臧乎賦輸一作稅而移用廣西之最朕已嘉焉今其諭我
至仁曉茲異一作暴俗並伸威信以靜一方仍遷郎署之榮以增使
車之重可

外制集卷第一

外制集卷第二 集八十

制五十首

內殿承制桑達可左監門衛將軍致仕制

勅具官桑達夫少也用其力老也優其秩在予推恩之意固亦仁矣於汝克終之善豈不美哉况爾方冀朝行又升環列歸安汝壽服此新命可

駕部員外郎致仕席夷甫男汝賢可將作監主簿制

勅具官席夷甫男汝賢夫力強一作壯而仕老至而一作則休還其官政于君傳其家事於一作于子士之美一作盡行不亦榮哉在爾承之宜勤以孝惟善事父乃能事君可

內殿崇班柴貽坦可內殿承制制

勅具官柴貽坦自列朝班克一作久勤官次用有司之常典因滿歲以一作之當遷往服新恩益思後一作克勤厥效可

福州寧德縣令孫知古可太子中舍致仕制

勅具官孫知古禮於老者尚不責其筋力而况泄官行法非強而敏者莫能焉士之老而還政者不惟示國之優恩一作禮亦自愛其身者得以遂其安一無此字養也矧加寵命豈不榮哉可

前太常寺奉禮郎司馬旦前將作監主簿司馬光前祕書省

校書郎黃元規丁憂服闋復舊官制

勅司馬旦等先王制禮之中不使賢者過而愚者不及故三年之喪謂之通制者人皆所共一作人皆可以行焉惟立身事君用顯親揚名之節則必賢者勉焉而可至二字一作不可不至此孝之大者也爾其思一作勉之可

比部員外郎知眉州馮平轉虞部員外郎太常博士知秀州

嘉興縣胡昉轉祕書承制並磨勘改官

勅具官馮平等朕頃因考績之文增以薦材之法夫累日月以敘進

則患賢愚之不分因舉類而觀能則慮奔趨而一作以求譽知人選士其難若此惟材茂而一無此字業廣既久而自彰者不亦優哉爾宜一作惟不懈其勤以求諸己可

東頭供奉官鍾懷德可內殿崇班制

勅具官鍾懷德臨于筭摧頗服勤勞因茲會課之來宜舉敘遷之例升之朝序勉荷寵章可

東頭供奉官夏惟慶可內殿崇班制

勅具官夏惟慶爵祿王者所以厲世磨鈍之具非徒為進者積日之資也一作惟字爾考績有司例當遷秩升于朝序可謂寵榮惟材與能在爾自力可

進納人空名誥海詞

勅某人等官者所以治人而非以假人之器也朕聞西人之勞而欲紓其乏有出其私以佐吾之用者是亦有益於吾民俾命于官所以示勸爾其往矣服我茂恩可

三班借職崔瑾可換縣尉制

勅具官崔瑾夫器人之材術者無施而一無此字不宜其次用其所長而各盡其善今爾厭夫武吏之不足為而思自擇以奮厥效從爾之請必有可觀可

太子中允通判秦州馮誥可太常丞制

勅具官馮誥西鄙用師久矣而未見成功然凡從事於兵間者微勞小善未嘗不錄而稍為久次已曰滯材夫材者必能集吾事實者所以圖厥功吾無愛焉以觀汝效可

文學李長卿可長史制

勅具官李長卿文學長史皆無職事而有秩俸吾設科一無此字以待天下之士而官其才者其不中於有司者猶祿其終身吾於養士之仁至矣汝其知之可

著作佐郎張去惑可秘書丞制

勅具官張去惑國家設官之法患乎巧僞干譽者之難止故考績之格三載而一例遷所以使沉實守正之人得以自進及其弊也庸人希累日之賞而賢者不能自別故又增舊法稍欲因舉類而求能者焉惟爾之材世所稱美夫累日而遷一作進非爾一有所字志干譽而進不可爲一有僞字惟思厥中務廣其業可

任若拙牛文犀等改官制

勅具官任若拙等朕閱夫士有少而執經老不及祿者其勤可嘉不可以棄故皆登一有官字于仕以榮厥躬歲月久焉又增以秩吾之不忘于爾也厚矣往其勉哉可

殿中丞通判延州高良夫可國子博士制

勅具官高良夫邊鄙之事不徒任金革而當矢石至於撫民人平政賦凡關決於兵一作其間者不亦勞乎惟爾之材久於其事今三載考績而例一有官字進秩乃爲常典况爾有勞宜推茂恩以旌能吏可

前司門員外郎樂許國殿中丞路綸李仲宣丁憂服闋復舊官制

勅樂許國等夫生事而死祭首麻哭泣之禮二十七月而後止孝子之服于其親也足矣奉其遺體立身揚名而施于有政孝子之忠於事君也吾欲觀爾之能焉勉膺新恩無怠其志可

內殿崇班劉顯可內殿承制制

勅具官劉顯以爾習知河事二十餘年既久而勤有勞可錄宜增榮秩以示褒嘉無易其官一作守俛終厥效可

澤州推官李泰可大理寺丞制

勅具官李泰誦習之學患乎專固少通而難施於事爾由學禮以登仕而涖官行法能使薦者稱之爲材是亦可嘉宜推寵命可

大理寺丞知鉅野縣孟皆可太子中舍制

勅具官孟皆夫執經之士不徒誦其文而必知其義一縣之政有土與民用爾所通之經求其治人之術苟有善聞一作譽豈無褒榮勉服新恩以率爾一作厥職可

陳曙李方改官制

勅具官陳曙等朕嚮以州縣之間備盜不謹而官吏畏怯擒捕失時雖實于刑以警不職而思得材武之士旌其功伐以廣勸一作勤能爾於茲時以捷來上霈然推賞朕所樂焉服我新恩益勤後效可

駙馬都尉柴宗慶可贈中書令制

勅具官柴宗慶夫爵祿王者所以賞功懋德之器古之聰明材智之士處乎崇高猶或顛覆爾以名臣之家爲國近戚惟富與貴享茲兼美乃能守而不一作弗失克保厥終一作終厥身蓋朕思廣孝愛之心務推仁恩之厚而致也夫生而寵之以位則歿也不可不榮其終在乎朕心既所嗟閱考之國典則有夔章寬而有知膺此休命可

前觀察支使試大理司直張德熙懷州防禦判官試大理司直倪俊並可檢校水部員外郎制

勅具官張德熙等士之在乎一作夫下位其有所稱道者吾無不二字一作乃擢其材而用之其積日累久而未聞於予者猶有兼試檢校階勳之次而敘升之所以念勞也况郊祀之禮慶賜所均宜有茂恩以彰寵典可

永興軍節度推官董士廉可著作佐郎制

勅具官董士廉一有朕觀二字自古奇偉之士因時立功而名在竹帛者率皆不以細文常行責其備蓋於其大者人二字一作以有所不能而能者焉惟爾少而好奇不狗小節喜從兵事思奮其材今積久錄一作累勞蓋從請者若夫異賞待爾有爲可

潭州錄事參軍楊令聞可太子中舍致仕制

勅具官楊令聞嚮因疾病自請退休少有間焉復思從政今其決矣可以止哉俾升朝序之榮以爲歸老之美可

權保安軍判官王溫恭可知延州延水縣制

勅具官王溫恭自西鄙用兵而智謀材敏一作勇之士奮然而爭出者非唯吾爵賞是利蓋士之負其能者亦欲因時而有立焉百里之縣有民與土課田而實軍備平政以懷邊一作疲人亦足有爲將觀汝效可

平陽郡王允升第二十二女趙氏可某縣主制

勅王者之以孝治天下也必先仁其九族然後刑于四海故具官允升女趙氏幼而淑美將及有行沐邑之封蓋稽舊典其勤女訓往宜汝一作爾家可

入內內侍省內東頭供奉官李允恭可內殿承制一作崇班

制

勅具官李允恭昨者亡命之卒攻劫京西而吏不能捕煩吾出兵爾一有能字稱我使令克奮厥效錄勞第賞宜有及一作且及身焉升

爾于朝往膺一作服龍命可

真州推官陳則可大理寺丞制
勅具官陳則朕撫有萬邦以官多士而材能廉善之迹苟有聞于予聽者必一無二字皆進而用之而申以二字一作與申賞罰之文懼乎言者之不信今爾之善屢有以聞勉爾之勤克廣其業無使言者于予之罰可

內殿崇班郝質可內殿承制制

勅具官郝質夫被甲馳馬出而與敵周旋于原野舉旗斬馘歸而與士卒數俘獲于軍中量功較計蒙褒被寵進而受賞于朝廷此將帥之事也一無此字豈不榮且樂一無二字哉戰之功有大小國之賞有重輕膺此茂恩更期後效可

龍衛指揮使邢贊拱聖指揮使胡元並可內殿承制制

勅具官邢贊等朕之勁兵銳將戍于邊者不可勝數惟爾能以武勇出乎其間方吾思得猛士之時吾之大臣以爾來上高爵厚祿爲爾等而設也往其勉矣吾將觀汝一作觀爾之能可

殿中丞崔愈一作崐可國子博士制

勅具官崔愈博士古經師之職也一無此字爾由明經登仕而居是官於爾之志豈不榮哉夫經者聖人之遺法也其臨民治政治身之道備矣雖未能施之於國子其一作幸率而行于厥躬可

錄事參軍張垂象登州文登縣令蓋一作孟巨源並可太子中舍致仕制

勅具官張垂象等致仕士之一一無二字克終之美節也故吏部之格吏賒無重輕一作輕重皆不得與乎一作焉斯命所以勸廉士而重乎歸老之榮也爾等爲吏二十餘年而能獲還政之名以歸宜推褒恩以寵田里可

右侍禁田延昭可右內率府率制

勅具官田延昭爾之子况乃吾侍從之臣一作官既不得去吾而從汝而念汝之老思得來歸朕亦嘉汝世陷虜中能識忠義自拔歸國致子顯榮宜有嘉一作加褒以旌美節服茲休命慰子孝心可

三司前行胡敏可許州長史制

勅胡敏陳力治事積有歲年自知不能以疾而止俾列州佐以榮厥終可

前將作監主簿張感丁憂服闋復舊官制

勅張感爾幼未任事而已命于官蓋承其祖父之遺業長而宜思有立以顯其親惟學可以成人爾其勉而無怠可

大理寺丞王諄轉左贊善大夫贊善大夫王若谷轉殿中丞著作佐郎李望周輔並轉祕書丞制並庶勸改官

勅具官王若谷等庶官之在位者吾不能徧察其常行而一有委之二字有司考第歲月以為進退之法惟治之有聲者五字一作治之有迹善而有聲也吾未嘗遺必有甄擢子聞無壅各勉所為可

前連水軍判官吳知幾可大理寺丞制

勅具官吳知幾士之飭躬勵行以勤厥官未有不知於人者知而薦之吾亦無所遺焉惟爾之能數有稱道有司較最於格當升勉膺新恩無廢其業可

供備庫副使郭承緒可西京左藏庫副使制

勅具官郭承緒夫善訓卒者少而愈精善用兵者寡可擊衆一障之守苟得其人推恩信以悅士心明教習以修武備扞城禦寇其任豈輕爾爾宜勞頗勳歲月令茲考績宜有一作被寵章爾其勉哉思奮厥效可

秦州觀察支使喬察可靜難軍節度推官知隴城縣制

勅具官喬察夫吏之不能稱一有其字職者或謂數易使之一作之使然今爾嘗佐於一作于州就臨屬縣其上下政令之便否士風民俗之所安皆所習知可以為治將觀汝績無替其勤可

吳守一改官制

勅具官吳守一夫文士之職有常守而循敘進之科至夫出類之材尚有不及之用况夫武吏有可以奮節立功之資而當茲用武之時其材易施其效易著歲月考課是為常格膺茲新命其往勉哉可

沂州沂水縣主簿韓道可大理評事制

勅具官韓道自京以東比苦多盜而臨沂卒一歲再變汝以主簿領尉職而能捕首惡上功第二凡真捕賊吏後時而無所獲與夫不獲而坐黜罰者豈不媿於汝哉夫事無不能惟不勉爾以褒以勸一作其勤宜有寵恩可

比部員外郎致仕張緯一作俸男允修可將作監主簿制

勅具官張緯男允修凡人之既老且病而見其子之得祿豈不榮哉爾宜一作其修身勵節入而思有以慰一作樂其親出而思有以報於國可

杜惟序可西上閣門使福州刺史知涇州一作四方館使涇

原鈐轄兼知涇州制

勅具官杜惟序西鄙用兵五六歲矣凡是中外文武之吏其材勇而可任者無不簡在於一無此字予心苟思得人則擇而用惟爾久習戎事勤於北邊素有能稱熟于朕聽涇原重地當賊之衝督視兵師兼撫其俗惟爾為可往其勉哉佩茲新恩以觀厥效可

左藏庫使涇原鈐轄王從政可西上閣門使益州鈐轄制

勅具官王從政西蜀之人性本輕悍易搖以事動輒驚搖而禦寇扞城兵任尤重夫馭兵之法威主於肅令一則威明恩惠乎私信著則恩浹使士卒和而武備謹則軍有善政民無姦心此惟材者能之而爾久習兵戎嘗委邊寄克堪一作膺茲任往服訓詞可

大理寺丞王陶轉殿中丞大理寺丞郭佑賢王正己並轉太

子中舍制並磨勘改官

勅具官王陶等州縣之政其文具矣吏之良者能舉一作學而行之足以為治故夫奉法守職積勞歲月而無過者皆有進秩之資所以褒勸一作勸而勉夫不及也今爾之課考於有司膺茲敘升慎守厥位可

試助教郭固可寧州軍事推官制

勅具官郭固自邊陲用兵而天下游談之士趨時蹈利者吾非不知其濫而未始怠焉者冀必有得於其間惟爾之能乃其素學夫學有實者詰之不窮而推之可用嘉汝施設精而有條慮變適宜將觀汝用可

東頭供奉官李禹言一作臣可內殿崇班制

勅具官李禹言惟爾陳力效職三十餘年而後登于朝序雖命官進秩厥有常法而爾之積勞至此不亦勤哉一作乎夫得之惟艱守之不可不慎往膺明訓服此寵章可

禮院副禮直官王永可益州司戶參軍充職制

勅王永太常所上禮皆祖宗之法朝廷之儀掌在有司爾所當習成書第賞及下不遺往膺新恩慎守而職可

太常寺太祝張觀一作觀可大理評事制

勅具官張觀有司上爾會課之書考其日時當得敘進夫有勞必錄其信不渝惟勤與能不可不勉可

故國子博士李克明可贈度支員外郎制

勅國家務以孝治爲人子者欲有所申於其父母則其爲請不一作豈可不從故具官某有子德隆克嗣其世効官陳力當得敘遷而思以其榮報於罔極合於經之以顯父母之義朕甚嘉之魂而有知膺此追命可

外制集卷第二

制五十首

左班殿直李德隆母王氏可追封永安縣君制

勅夫觀其子之孝可以知其父母之賢具官李德隆亡母永安縣君王氏生此孝子一作是生此子能守其家請以身官移於泉壤夫祿養於親有時而止榮名之及存不朽焉魂兮享之可以爲慰可

比部員外郎知綿州薛貽應轉駕部員外郎虞部員外郎知博州薛綸轉司門員外郎秘書丞知嘉州洪雅縣李述轉太常博士制並磨勘改官

勅具官薛貽應等吏之庸庸而無聞者吾所不取章章而特見者必擢一有而字用之若夫奉法循職守其官而無過者不亦吏之良哉念其勤勞豈可不錄二年考績敘進有常往服新恩無渝爾守可

司門員外郎李公謹秘書丞充集賢校理楊儀殿中丞段高磨勘改官制

勅具官李公謹等夫令在必信法在必行今審官考課增以舉類之科乃吾示信之令而新行之法也汝等敘進於此猶用常文其後當遷皆須應格勉勤其業以俟爾知可

范仲温可台州黃巖縣尉制

勅具官范仲温爾第仲淹參吾大政方欲輔朕平賞罰推至公以修紀綱而正庶位爾今所任有土與民惟過與功則有賞罰爾勤厥職可不戒哉可

東頭供奉官閣門祗候石宗尹可內殿崇班制

勅具官石宗尹陳力效官積有歲月會其課最來上有司按於舊文當得敘進升之朝刻可謂寵榮往服新章益勤後效可

著作佐郎盧革潘泳一作詠等磨勘改官制

勅具官盧革等州縣之職治有常法而遠方之俗風土異宜若夫上

克奉於教條下不違於民欲惟勤與敏乃克濟焉爾等服職有勞會課來上膺茲敘進無廢官箴可

史館書直官潘宗益可梓州司戶參軍制

勅具官潘宗益給事有年其勞可錄宜命以秩俾旌厥勤凡爲有司惟久則習尙安乃職以慎克終可

角廝波男合羅角可本族軍主制

勅合羅角生稟勁勇之姿而濟以忠果之性屢陳厥效咸可旌褒俾升官榮以勸諸部勉圖功業無自失時可

軍事推官龔待問可桂州觀察推官制

勅具官龔待問捕盜之格有功者賞而吏能應書者少非吾有所愛焉苟有其勞豈不甄錄今有司言爾於格當遷方茲多盜之時用勸不能之者一作更可

進士劉純可試將作監主簿制

勅劉純自兵興累年而功効未立然游談之士以兵爲說而得祿者多矣吾猶意乎厥路尙狹而未足以來特起之人故甄收未始少懈况爾屢經器使而言者謂材宜有推恩以勸來者可

秘書丞竇隨可本官致仕制

勅具官竇隨夫老而致其政於君者士之懿節也爾壯而登仕困於數奇今其老焉可以歸矣安而一作於眉壽膺此美名可

邢州觀察支使張德熙可著作佐郎制

勅具官張德熙士之在下位而能以聞于上者不有言者乎一失其言則有常罰焉知人而薦豈爲易哉今爾由舉者而被升擢尙勤其業無累爾知可

大理寺丞薛仲孺可太子右贊善大夫制

勅具官薛仲孺爾之伯父奎爲吾大臣參議國政剛直之節見於臨事歿而無嗣吾甚哀之爾幼以奉蔭而登仕籍今由累歲遂升于朝

惟爾伯父之行有司考法易一作謚以一德不懈執心決斷之名可謂美矣守爾家法克勤厥官可

殿中丞王正民大理寺丞朱景陽陳侁等磨勘改官制

勅具官王正民等審官之法三歲一遷惟無過焉乃得會課爾等服於官政以涖吾民奉法守職積勞歲月膺茲敘進此乃常科勉爾之為以期懋賞可

內殿崇班李允恭可內殿承制制

勅具官李允恭朕惠州縣之吏不職者不能禦姦禁暴而憫吾民罹於賊盜一作盜賊故於捕盜之吏推賞尤厚非以為私蓋有為也今爾之請一作謀自陳其勞方吾以賞行勸之時惟恐不及故加爾寵非徇爾私夫古有讓功不言之賢惟爾官慕可

節度推官張紳可大理寺丞制

勅具官張紳朕聞夫兵興而費廣不忍加斂於吾民凡能佐國足用者皆思懋賞以勸其勤今薦爾者皆曰爾材而吾近臣尤所取信故增汝秩不易厥官夫官惟業勤常患不久爾其自勉無替乃勞可

學士院孔目官遂州司戶參軍李懷德可特授 州陽信縣

尉充學士院錄事制

勅具官李懷德夫有司之事一作普惟久則習次遷之例顧一作惟汝宜升無忘克勤慢則有罰可

虞部員外郎李備太子中舍侯克明大理寺丞曹一作唐琰

等磨勘改官制

勅具官李備等國家外建庶位以官羣士而賞罰進退之法掌一作行於有司者所以待中材之無過者爾高能異效吾有不次之用焉爾等咸服于官久勤歲月以勞序進雖曰寵榮勉爾所為以期懋賞可

彰武軍節度推官李仲昌可大理寺丞簽署瀘州判官公事

制

勅具官李仲昌羣材之在下者思達其上難矣而在上者思得可用之材豈為易哉朕頃自擇能臣使舉其類而洙以爾充薦今琦又以為言琦洙皆能體吾勞於擇士之心者舉爾不應不慎濡然推寵吾所不疑爾尚勉哉以稱茲舉可

故尚父汾陽王郭子儀孫元亨可承興軍助教制

勅郭元亨繼絕世褒有功非惟推恩以及遠所以勸天下之為臣者焉况爾先王名載舊史勳德之厚宜其流澤於無窮而其後裔不可以廢往服新命以榮厥家可

奉禮郎李景圭可大理評事制

勅具官李景圭九州四海風俗不同而王者之化無不及吾於遠者尤加意焉夫吏非敏於其事則不能通俗習而順其宜政一失焉下則重困逸茲南海爾泣吾民今會課上聞增爾榮秩克勤厥職以副子懷可

故右驍衛大將軍致仕王元祐男知信可內殿崇班制

勅具官王知信爾父元祐陳力事子告老以休位終環尹歿而餘慶尚及爾身爾嗣厥家苟能有立則始終寵榮一作榮寵視汝父焉惟孝與忠勉思兩得可

前楚州團練判官丁宗臣可著作佐郎制

勅具官丁宗臣庶官之在位者衆矣吾思一善之取而無失則惟舉類之法所得尤一作宜多今薦者交章言爾可取爾其自勉以稱吾思善之心焉可

左侍禁李從式孫清並可太子左清道率府副率致仕制

勅具官孫清等壯而陳力老也告休古人所難有始有卒爾能至此可謂克終尚有推恩以嘉爾節歸安眉壽服此新榮可

權無為軍判官劉皆洪州錄事參軍張德元並可太子中舍

致仕制

勅具官劉皆等禮與法之為書其於老者皆有優焉今爾等學於禮法而能安其老思以歸休吾所嘉褒宜推寵命可

國子監直講青州千乘縣主簿孫復可大理評事制

勅具官孫復昔聖人之作春秋也患乎空文之不足為一作信故著之於行事以為萬世之法然學而執其經者豈可徒誦其言哉惟爾復行足以為人師學足以明人性不徒誦其說而必欲施於事吾將見吾國子蔚然而有成宜有嘉褒以為學者之寵可

太子中舍孫礪李國慶並可殿中丞制

勅具官孫礪等六經皆載治民之術而法者為吏一無此字之資也汝等學之用以從政經之道廣矣擇其宜於民者法之文密矣取其平而不害者足以涖爾官而成厥績焉膺茲敘遷勉用爾學可

秘書丞黃正殿中丞盧咸並可太常博士制

勅具官黃正等自兵興一作興兵以來調度日廣其能勤征權以佐經費而均漕運使不滯以通諸用者皆方今之急務其為勞力宜有勸焉因茲歲成寵爾榮秩可

原州彭陽縣令郝嗣宗可某州推官制

勅具官郝嗣宗二歲而一易其法久矣然議者莫不以屢易為患苟有能者吾豈奪焉爾一作汝於彭陽數有稱者就增其秩無易其居勉爾所為以俟成績可

供備庫副使張禮一可西京左藏庫副使制

勅具官張禮一考謀之法計過與功皆有常文得以敘進此所以待夫中材而勉其不及者也苟能有立吾必異之爾其往哉思所自效可

杜諮轉官制

勅具官杜諮吏部之格吏之升降遠爾勞逸之均皆有法焉不可以

亂今衍以爾為請一作今以爾為大臣所薦吾既重違大臣之言而顧有司之法苟不甚戾則吾豈不從無專爾私其率厥職可

柴宗慶第三女可封郡君制

勅某人相與將人臣之極也爾父常兼享其位而連戚里其於存歿宜有寵焉况其生也貴而歿也無嗣續之裔此吾尤所憫焉加一作爾爾郡封此非常典所以申吾不忘爾父之意可

洛苑使英州團練使內侍省內侍右班副都知藍元用可眉州防禦使罷副都知制

勅具官藍元用爾之事予陳力茲久既明而敏能濟以勤慎密一心不見過失屢更器任實東子懷屢披奏章陳疾自請願解要職以思便安惟爾之舊予所嘉惟爾有勞予所錄雖可爾請豈無加一作嘉褒服茲寵榮勉爾一作推後效可

西頭供奉官閣門祗候秦恩可內殿承制制

勅具官秦恩用兵久矣而將吏能以材武稱於軍中者豈不多哉苟有聞焉無不用也况如世衡吾所信者今其稱爾吾豈不然夫信以出令仁以撫人一作之勇以臨戰而嚴以一衆必皆出於智而後成功雖大將不過此也爾其勉之一作哉可

達州司戶參軍吳冲可奉寧軍節度推官制

勅具官吳冲嚮者盜起州縣久而未捕議者皆曰素備不謹賞罰不明所以盜滋而吏怠今考爾所獲嘉爾之能第賞推恩予無所愛一作愛矣凡謹備者爾則勉之當使怠吏由爾而勸可

內殿崇班程逸可左監門衛將軍致仕制

勅具官程逸將軍之職居則宿衛天子出則征伐四方此武人之重也今假爾茲寵以為歸老之榮者以爾服勞既久能克厥終而不忘爾勤之意也其往欽哉可

懷州防禦判官倪俊可著作佐郎制

勅具官杜諮吏部之格吏之升降遠爾勞逸之均皆有法焉不可以

勅具官倪俊凡官人之法莫不期於得材而或失之於有遺或失之於大濫故有司之守厥有常文苟能應書皆可選擇一作擇可使中材之並進不濫而無遺此吾所以慎於擇材之意也爾膺一作之茲舉其不勉哉可

大理寺丞宋緬孫周蘇逢等磨勘改官制

勅具官宋緬等庶官之守位者衆予欲一有其守百職並舉而人各趨之則於考功敘進之科厥有常法使夫自勉者無不得焉蓋所以示勸而及衆也今考爾歲績法當遷秩爾無以爲例得其體一作思予勸功進善之心以勉爾職其無懈可

盧守勤致仕制

勅具官盧守勤少也陳其力病而養其衰非惟安生樂壽人之所欲而朝廷待勞能之臣厚始終之意考之典禮亦有彝章爾之事子既勤且久今其病矣可以息焉尙有恩榮以爲爾寵夫勞無不報既享爵祿之豐身孰與親宜專輔養之理可

曹元賓轉官制

勅具官曹元賓夫用兵之法不可先言則爲將之材亦難先見國家用兵久矣求之行陣堪將者少夫士有素蘊之材未得達者比降明詔廣其詢求而方平等以汝爲言吾將觀汝之能試汝以事俾升朝序往自勉焉可

司理參軍杜彭壽可大理寺丞制

勅具官杜彭壽士有潔身以廉而服官以勤者長吏皆得薦論有司加之考閱用而進秩俾以臨民雖曰常科豈不慎選汝膺茲命其往勉哉可

戶曹參軍尹植可某官致仕制

勅具官尹植惟爾陳力二十餘年以老而歸朕豈不憫升之朝序榮以宮僚往其休哉安爾眉壽可

開封府開封縣主簿孫量可保大軍節度掌書記制

勅具官孫量用兵之法不欲久惟能使調敵發輸不勞而民有餘力則可以制敵二字一作久而有待於必勝西師之出久矣不惟將帥之選爲重其州縣臨民之吏能不乏民之力而佐吾之軍者亦難其人今爾既薦者皆曰材而臨涇乃爾自請往膺新命將試汝能可

內殿崇班韓守允可左監門衛將軍致仕制

勅具官韓守允自兵興于邊天下多事吏強有力者猶不能稱厥職而况於老者乎夫老者吾所優也豈宜強其力之所不逮往從爾請以安爾私尙有茂恩以爲爾寵可

泰州興化縣主簿朱思道可衛尉寺丞制

勅具官朱思道夫廉爲吏之一節也今保薦之法惟以受財爲同坐則待夫能吏豈盡其材爾其奮厥所長思有所立不獨守夫一節而已焉可

溪洞楊先贊可權知古城州制

勅楊先贊世號材勇雄于一州威能服其部人忠能奉其職貢宜加寵秩以紹厥家往服恩章一作榮無忘報效可

京西轉運按察使虞部員外郎杜杞可刑部員外郎直集賢院充廣西轉運使制

勅具官杜杞自一隅用兵而調發輸役之繁無遠不及况廣東西之路於東南尤爲遠者而吏多不良吾之疲民既有賦斂之勞而今又罹盜賊之患吾一慮及爲之惻然凡與吾憂國者豈遠暇於安居哉汝爲吾往其一作安可憚勞吾又嘉汝名臣之後好學博文一作聞尙有榮名以爲汝寵凡吾寄汝之事繁汝之材吾惟責成一作惟責厥成爾可自勉可

內殿承制孟均可千牛衛將軍制

勅具官孟均諸衛之置將軍唐之威時兵官之重者也衛兵之制廢

久矣其官雖存而世不知其重也自頃西北用師講求武事而議者多言唐之府兵可復朕方思之而爾能有請朕甚嘉焉爾其往哉吾將有用可

殿中丞史吉亨王珣瑜著作佐郎蘇黃中等磨勘改官制

勅具官史吉亨等夫官者所以盡人之材也至乎材之難得則姑以歲月常法積勞而敘遷誠亦莫有異材之善出於其間非止於此而已也爾等各膺例進宜自勉旃可

蘄州廣濟縣令充國子監直講邵必可大理寺丞制

勅具官邵必夫學所以爲治也而儒者以記誦爲專多或不通於世務但能傳古之說而不足施之於事使愚者益固一作昧而不明而材者聽之而怠一作殆以爲儒迂不足學故教人之法必該於古今以博其識而成其業焉惟汝之學能明當世之事而屢形議論朕甚嘉焉爾其守節礪行以率諸生而取古之有以宜于今者而養成之則功利廣矣可不勉哉可

外制拾遺

孫復可祕書省校書郎國子監直講制

朕勤治體喜賢俊嘗慮四方遺逸之善有不吾聞者間屬近列屢騰薦章以爾孫復深經術荏德行躬耕田畝以給歲時東州士人皆師尊一作隸之吾命汝校文於書省講藝於胄序不由鄉舉不俟科選汝姑直屏雜說純道粹經使搢紳子弟聞仁義忠孝之樂此吾所以待汝意往欽哉可

周陵荆湖轉運使制

勅具官周陵朕思欲寬民賦役而衣食給足天下之飢寒而惠州縣之吏不能稱職其老疾闇懦而縱其下與夫貪暴而自爲殘者皆所以蠹於物而重困吾民者也然按察之司視而不舉及一作乃務較鎔銖毫末之遺利而欲足用舒民豈不失其術而且勞者哉今荆湖

之南十一州一監三十有一縣吏員不爲不多矣爾其察其不良者而舉其賢者使州縣得良吏未有民富而用不足者廣西之最知汝爲材今其往哉無替朕命可

皇弟安靜軍節度使允迪可責授右監門衛大將軍制

勅皇弟具官允迪五刑之屬三千其罪莫大於不孝小民無知犯者猶鮮况爾燕恭肅王之子而朕之諸弟也宜率訓義以迪四方而乃忘直麻哭泣之哀爲酣飲沉酗之佚肆情鄙行害于而家達於朕聽嗟惋無已朕苟貸法何以處王公之上而教天下哉宜歸爵秩下領屯衛蓋寬於馭過而欲循省其非無蹈後悔也可

楊畋屯田員外郎直史館制

勅尙書省二十四司散郎皆當今要官况分直史館提太史筆蓋位之高者非材資甚美安可以兼此授以爾東染院使湖南鈐轄楊畋出自將家有文武器幹早由辭科歷任郡縣至提按之職嚮以羣蠻繹騷湖嶺未靖故特命以使各往專討輯速茲三歲澗洞帖然而勤勞積時重瘴生疾瀝懇來上願還朝行子既嘉爾作事不怠以集瘡于厥躬又重煩爾以軍旅之役宜改田曹之號且以表年爲業苟能有以益於國家則執干戈書簡牘其義一也可

司勳郎中張從革可衛尉少卿制

勅洛宅朕之西都而居之未皇暇也然有司百職莫不具焉其留務之多閑在憲司之尤簡最爲清峻可以優賢具官某久服官勞頗彰吏最老于郎署分領西臺用乎考績之文俾列命卿之貴任而至此是亦爲榮可

殿中丞府司錄李虞卿可國子博士制

勅具官某司錄爲府曹首民閭閻增減吏詞按曲直皆繫焉前涖此者或苛悍或懦軟率不免缺折之患惟爾慎不踰節廉不撓人吾用嘉之俾增秩于庠列爾其惟祗惟畏以茂對我朝家休命可

大名府推官徐洽可著作佐郎制

勅某朝廷置磨勘之法必以考限用人者使詳試吏能而後進也則仕者由銓調改京秩乃榮階之始固非輕授以爾進士登第歷佐大幕所知論薦是用進擢爾惟自勉以副恩命可

平陽縣尉林術可試秘校知永州祁陽縣事制

勅具官某南方之吏不能為吾以恩信撫茲谿蠻而使毒吾民於攻劫爾嘗被甲操矢而逐之則蠻之害民也深民之瘡痍者衆所宜自見焉今錄汝之勞命汝以縣勉勤其政以撫吾人可

大理寺丞彭通程濬可殿中丞某人可贊善制

勅具官某等仲尼有云言寡尤行寡悔祿在其中矣今有司大比羣吏之治不待悉最課而後遷也但不處于尤悔斯遷矣某等或贊治遠藩或長人大邑奉法循職克無累疵銓一作鉤考歲成用應陟典循省儲坊俾通朝守盍勸官業以對恩榮可

奏舉人杭州觀察推官呂邁可大理寺丞制

勅具官某夫士之處世如錐在囊中其鋒立見爾以選吏為藩府賓佐凡薦爾材者自戢等十有二人是必脫穎而出其輩者矣不然何言者之多也擢爾卿屬試爾治民無謂寵利之可圖因違道以干譽其思行義以自立務求己而為人服此訓辭則無疵吝可

軍事推官王野民可大理寺丞制

勅具官王野民自兵興用乏而能不取民以佐有司之急者利入之法尤多非勤且敏者則莫能焉不惟干賞者趨之蓋亦適時之用也爾職酒利厥課屢聞所宜褒陞以勸怠者可

錄事參軍張一作王師民可大理寺丞制

勅具官某方今官人之法由舉善而遷者必試之以臨民而觀其從政自兵興以來吾民可謂勞矣惟吏之良者能為吾休息之今爾被舉曰材亟遷其秩將觀汝政其不勉哉可

閩文寶供備副使監亳州茶鹽稅制

勅具官某國家因山澤之饒興筦榷之利以足邦用實須幹臣爾其絕侵牟謹出入使歲課增羨而績効著明敘進之榮茲乃常典疇勞之賞尚有優恩可

滕公輔衛州推官制

勅具官滕公輔堂洎昱之皆朕侍從之臣而外當寄任之重文章來上薦爾為材必有可觀以稱公舉宜從其請以察爾能往其勉哉無廢爾職可

藍田縣主簿權充府學教授 可華州蒲城主簿就差管

勾永興府學制

勅具官某古之敦學之法肄習以時而難易先後教之有方非久而安之則不能以成其業今學者言爾講說訓導可以為師吾欲觀汝之道至于有成放假爾大邑之佐使祿足以充然後安然克終其業可不勉哉可

外制集卷第三

內制集卷第一 集八十二

太祖皇帝忌辰道場齋文九月八日

維至和元年歲次甲午九月辛酉朔十九日己卯皇帝遺入內侍省內侍殿頭勾當太平興國寺開先殿劉立言請僧二十七人於太平興國寺開先殿開啓太祖皇帝忌辰道場一月日伏以受命開先肇基興運昭祖功而不顯懸寶祚於無疆用深追遠之誠式奉明齋之薦載嚴淨刹以集善因伏願覺力常資威靈如在延鴻宗祐集慶眇冲庶邦咸被於餘休品物共均於博施謹言

太祖皇帝忌辰道場功德疏右語九月八日

右伏以當天開運聿隆創始之功繼統承休方罄奉先之孝爰戒徹音之日用資作善之祥嚴法會於金園啓靈文於貝葉一作農伏願超登妙果高證真乘瞻不動以常存祐無疆而永固下均氓庶咸獲又寧

賜宰臣陳執中生日禮物口宣九月八日

有勅卿爲時柱石秉國鈞衡爰逢慶育之辰宜有便蕃之錫豈惟故事式示眷懷今差卿男將作監丞世儒賜卿生日禮物想宜知悉

班荆館賜契丹國信使副赴闕御筵口宣九月八日

卿等載持信節方止都圻特申式宴之儀以示勞勤之意用推寵數當體至懷

撫問梓州路臣寮口宣九月十七日

汝卿等並韞器能遠膺寄任式戒嚴秋之序載懷勤事之勞宜示撫存以彰眷厚

班荆館賜契丹國信使副却回御筵口宣九月十七日

卿等聘儀成禮歸馭戒塗念茲夙駕之勤宜有祖行之寵式陳行樂以示宴私

班荆館賜契丹國信使副却回酒果口宣同月日

卿等信節爰馳示隣歡之永固使軫云復申欽錢以爲榮宜有匪頒以彰眷遇

賜隴州團練使代州部署田辛等勅書九月十四日

勅田辛省所進奉謝恩賜公使月俸馬一疋專具悉邊防有嚴寄任尤重嘉汝材武董吾兵師軍聲俾壯於威容寵數宜優於慶賜遠陳貢謝益認傾輸尚體眷懷勿忘自効故茲示諭想宜知悉秋冷汝比好否遺書指不多及

二十日 雄州白溝驛賜契丹人使却回御筵兼傳宣撫問口宣九月

卿等言持信節式戒歸塗念茲衝涉之勤宜有撫存之意仍頒宴錢以示眷懷

賜翰林學士尙書工部郎中知制誥王洙獎諭詔九月十四日

勅王洙省監護使劉沆劄子奏繳連到少府監脩製法物所狀修製溫成皇后一行法物勘會例各鮮明及減省得物料功限甚多事少府領五署之衆工乃九卿之舊職卿以儒學參吾侍從兼洎其事能勤厥官俾夫功簡而速成物精而有法益彰材敏尤用敷嘉故茲獎諭想宜知悉

皇帝本命兗州會真宮等處開啓道場青詞九月二十日

維至和元年歲次甲午十月辛卯朔二十日庚戌嗣天子臣某謹遣某人開啓本命靈寶道場三晝夜罷散日設醮一座謹上啓大上開天執符御歷含真體道玉皇大帝寶祚無疆蒼穹垂祐吉旦式臨於元命醮科爰舉於舊章薦誠懇以惟精延聖真而並集仰希靈貺敷錫眇冲四時叶序於和平品彙均休於康泰無任懇禱之至謹詞

建隆觀開啓追薦溫成皇后道場青詞九月二十五日 伏以蒼圓隆鑒列象緯以昭垂燭潔備陳薦馨香而上達載嚴仙宇

恭按科儀眷內則之遺芳冀高真之冥祐仰祈陰貺永助靈遊

福康公主宅脩築地基祭告大歲已下祝文九月二十七日

維至和元年歲次甲午十月辛卯朔七日丁酉皇帝遣宮苑使榮州防禦使內侍省內侍右班副都知任守忠致祭於太歲土地諸神禮崇下嫁詩美宜家惟築館之有初方涓辰而叶吉冀百靈之來護期不日以斯成尙鑾

雄州白溝驛撫問契丹賀正人使兼賜御筵口宣九月二十

七日

卿等載馳一作持瑞節爰及疆亭顧惟夙駕之勤宜有示慈之宴用彰寵待當體眷懷

賜新除參知政事程戡讓恩命不允斷來章批答十月十二

日

省表具之朕有欲治之心而甚勞思底治之方而未獲夙夜於此惟賢是求卿出入宣勸材望兼著誠明發於事業識慮可以詢謀而召自外邦參於宰府朕志所定其何可移夫任之重者憂實深遇之隆者報亦厚讓而後受雖敦難進而可嘉知無不為其一乃心而圖効所讓宜不允仍斷來章

賜寧遠軍節度使張茂實進謝恩馬一無四字詔十月二十

日

勅茂實省所進奉謝恩賜公使并月俸及牌印到任馬共八疋事具悉卿出守蕃宣宜優祿給詔條方布受署有初印綬為榮古人所重載披貢謝深用難嘉故茲詔示想宜知悉

賜新授龍神衛四廂都指揮使英州團練使郝質勅書十月

二十日

勅郝質省所進奉謝恩授龍神衛四廂都指揮使英州團練使并賜公使月俸馬共二疋事具悉朕嘉汝有忠勇之材遂膺擢豐汝以

慶賜之厚實示眷懷貢奉所陳勤誠已著功名可勉後效其思故茲示諭想宜知悉

賜尚書工部侍郎余靖詔十月二十日

蠢爾蠻蜒驚於海隅卿起自家居首宣勳力至於大兵之後撫彼涸殘餘孽未平推吾恩信寄任實深於委遇寵章宜有於便蕃遽閱貢輸良增嘉歎

撫問江南東西路臣寮口宣十月二十三日

卿汝等並以材賢一作賢材出分寄任荐更歲月備著勞能宜示撫存以彰眷遇

撫問鄜延路臣寮口宣十月二十六日

卿汝等並膺東寄綽著才猷顧邊圉之肅然嘉王事之勤止屬茲寒沍宜示撫存

雄州撫問契丹賀正日兩蕃人使口宣十一月九日

卿等夙將瑞節方戒疆亭奉隣聘以申歡慶歲端之資始載惟跋履宜示撫存

景福殿庫開啓冬節道場齋文十一月十二日

伏以國財豐衍資民力以為先禁宇深嚴邇天居而甚遠式屆一陽之候俾脩衆善之因誦貝葉一作牒之遺文集金園之淨侶庶延梵福用副精衷

軍器庫開啓冬節道場齋文十一月十二日

伏以儲戎器以戒不虞敢忘武備肇新陽而集多福爰屆令辰俾法侶之精虔脩勝因之妙善仰瞻毫相載繹真文冀昭鑒之甫回契偃兵之咸際

舒州靈仙觀開啓三元節道場青詞十一月十五日

伏以萬物熙春肇新陽於首歲三元紀序標令節於真經爰即靈場俾遵科式薦雖陳於菲薄誠以達於精明伏願穹昊垂休紫青降鑒

邦家錫慶永叶於泰寧民物遂生並臻於和樂

恩州賜契丹皇太后賀正旦人使茶藥口宣同日

卿等載飭輶車方凝寒律乃顧道塗之役深嘉跋履之勞宜有頒宣式彰眷遇

恩州賜契丹皇帝賀正旦人使茶藥口宣同日

卿等繼脩邦好來及王春方凝凜之在辰念勤劬而將事聊頒飲劑式助宣調

皇帝本命兗州會真宮等處開啓道場青詞十一月二十一

日

伏以荷三靈之乃眷獲奉寶圖隆萬壽於無疆遐資道蔭爰薦精衷之禱及茲元命之辰伏願誠潔上通真靈甫鑒如松之茂永固於延長一物雖微並均於貺施

醴泉觀真君殿開啓年交道場青詞十一月二十四日

伏以元氣均調運三正而並用歲功肇序謹五始之惟初爰啟福庭一作廬恭陳淨醮伏冀精衷上達靈鑒甫回却疑陰伏沴之餘順和氣發生之造旁霑庶物並集多休豈惟眇冲膺此純嘏

添脩開先殿祭告土地祝文十一月二十七日

伏以神遊所格秘寢有嚴役事時興方勤於締葺后一作神祇安靜頗懼於震驚菲薦式陳明靈昭鑒

恩州賜契丹皇太后賀正旦大使茶藥詔十一月十五日

勅卿夙將信幣來慶王春載惟涉履之勤方示眷懷之意錫茲良物以輔至和今差入內侍省內侍殿頭張昭化往恩州賜卿茶藥具如別錄至可領也故茲詔示想宜知悉冬寒卿比平安好遣書指不多及

恩州賜契丹皇太后賀正旦副使茶藥詔十一月十五日

卿輶車載飭方講於隣歡歲序將回式凝於寒律載懷衝涉宜有頒

宣

恩州賜契丹皇帝賀正旦大使茶藥詔十一月十五日

卿脩南北之歡會期於首歲勤夙宵之役方及於半塗彌切眷懷宜加寵錫

恩州賜契丹皇帝賀正旦副使茶藥詔十一月十五日

卿使介選才以達欣歡之意道塗將命宜伸慰勞之恩式示頒宣俾茲調護

兗州會真宮等處開啓上元節青詞十二月十五日

伏以萬物資生肇新於陽月三元紀節式按於仙經爰款殊庭恭陳淨醮薦精誠而交感企真馭以來臨冀集靈休下均羣品

二十四日就驛賜契丹賀正旦人使銀鈔羅唾手盃孟子錦被褥口宣十二月十五日

卿等繼講降歡會期元日載嘉勤敏涉此疑嚴用示頒宣俾彰眷待

正月一日入賀畢就驛賜酒果口宣十二月二十五日

卿等方抵聘車即安賓館屬此春陽之煦宜多宴衍之歡寵錫有加眷懷增厚

今月三十日賜契丹賀正旦人使內中酒果口宣十二月二十五日

卿等式脩邦聘來會春朝方休道路之勤宜有宴私之惠聊頒甘實以侑清罇

正月三日就驛賜契丹賀正旦人使內中酒果口宣十二月二十五日

卿等聘儀交舉欣入見於彤墀邊品有加俾示慈於宴席用伸頒賚宜體便蕃

恩州賜契丹人使春幡春盤法酒口宣十二月二十五日

卿等並驅使傳來及王正初陽式應於新春令節俾修於故事宜加

頌養用示眷懷

內中福寧殿開啓三長月祝聖壽道場青詞

伏以真遊懸斂秘殿邃嚴惟首月之正時叶新陽而布慶俾陳法供仰薦明誠伏冀敷祐眇躬保千齡而永固躋民壽域均萬國以同休

萬壽觀齋殿內權奉安真宗皇帝御容祝文十二月二十五日

伏以齋室潔嚴辟容清穆涓叶吉具禮有儀冀真馭之安安符孝心之虔奉

東太一宮開啓祝聖壽年交金籙道場密詞十二月十日

伏以積陰窮候始變於二陽庶物更一作交新宜均於百福是陳法供載肅嚴祠延真馭以來臨冀明靈之洞鑒眇冲集佑期萬壽之無疆遐邇同休俾兆民之咸賴

班荆館賜契丹賀正旦人使到闕酒果口宣

卿等夙戒軺軒荐修信好顧凝嚴之在候宜宴錫以申恩頒以甘新

彰子眷遇

班荆館賜契丹賀正旦兩番人使到闕御筵口宣

卿等載馳隣聘來及歲元深惟道路之勤方戒郊圻之近特頒宴勞

以示眷懷

春帖子詞二十首十二月二十九日

皇帝閣六首

其一

萌牙資暖律養育本仁心顧彼蒼生意安知帝力深

其二

陽進升君子陰消退小人聖君南面治布政一作教法新春

其二

氣候三陽始勾萌萬物新雷聲初發號天下已知春

其四

玉瑤氣來灰已動東郊風至曉先迎乾坤有信如符契草木無知但發生

其五

朝雲靄靄弄春暉萬木欣欣暖尚微造化未嘗私一物各隨妍醜自芳菲

其六

熙熙人物樂春臺風送春從天上來玉輦經年不遊幸上林花好莫爭開

皇后閣五首

其一

御水冰銷綠宮梅雪壓香新年賀交一作康泰白日漸舒長

其二

藹藹珠簾日溶溶碧瓦煙漪漣采荇水和暖浴蠶天

其三

初欣綵勝迎春早已覺鷄人報漏遲風色結寒猶料峭天光煦物已融怡

其四

驚寒未報宮花發風暖還催臘雪銷欲識春來自何處先從天上斗回杓

其五

三辰明潤璇璣運四氣均調玉燭光共喜新年獻椒酒惟將萬壽祝君王

溫成皇后閣四首

其一

璪一作鑾窗珠戶暖生煙不覺新春換故年衆卉爭妍競時態却尋

遺跡獨依然

其二

寶奩香歇掩鉛華
舊閣春歸老監嗟
畫棟重來當日鷲
玉欄猶發去年花

其三

椒壁輕寒轉曉暉
珠簾不動暖風微
可憐春色來依舊
惟有餘香散不歸

其四

內助從來上所嘉
新春不忍見新花
君王念舊憐遺族
常使無權保厥家

夫人閣五首

其一

大史頒時令
農家候土牛
青林自花發
黃屋爲民憂

其二

元會千官集
新春萬物同
測圭知日永
占歲喜時豐

其三

黃金未變千絲柳
白日初遲百刻香
聖主本無聲色感
宮花不用妬新粧

其四

微風池沼輕漸漾
旭日樓臺瑞藹一
作鶯浮四海懽
懽聲歌帝澤萬家春色滿皇州

其五

玉殿籤聲玉漏催
綵花金勝巧先裁
宿雲容與朝暉麗
共喜春隨曙色來

萬壽觀告遷真宗皇帝御容祝文

伏以宗廟之禮是爲典彝
衣冠以遊實有故事
載嚴寶構以奉威靈

涓吉日以有初
庶真馭之斯格

萬壽觀造溫成皇后相儀祝文十一月二十九日

式營叢構俟靈遊顧落成之有初
惟茲日而斯吉冀茲住宅庶以卽安

皇帝回謝契丹皇帝書

九月日兄大宋皇帝致書於弟大契丹聰文聖武英略神功睿哲仁孝皇帝闕下使輶云止惠問見貽且承累歲而來荐有西師之舉討其不服初煩剪伐之謀全以舊恩終示含容之度慶武戈之遂息分軍獲以爲儀言諭斯勤欣銘併集方凝寒律冀保冲襟企詠之誠指陳奚既續遣使人咨謝次今忠正軍節度使檢校大尉同中書門下平章事蕭德等回專奉書陳謝不宣白

皇帝回謝契丹太后書

九月日姪大宋皇帝謹致書於嬪大契丹儀天體道至仁廣德慈順章聖皇太后闕下隣邦敦睦結信好以彌深使聘申歡承諭言而甚厚固壽齡之遐福欣帖泰之休期加侑幣以惟豐積感悰而增切秋商在候齋履惟和今忠正軍節度使檢校大尉同中書門下平章事蕭德等回專奉書陳謝不宣謹白

內制集卷第一

內制集卷第二 集八十三

景靈宮奉真殿看經堂開啓真宗皇帝忌辰黃錄道場青詞
正月十一日

伏以崇妙道於清虛實惟先志感時思於雨露式表孝心按金錄之
真科即琳宮之福地薦茲精潔庶以感通冀善應之無方期永資於
冲隆

景靈宮廣孝殿看經堂開啓章懿皇后忌辰黃錄道場青詞
正月十一日

伏以坤儀永闕昭厚德於無疆藥館載嚴奉真遊而如在式臨遠諱
用感孝思薦特品之維新啓齋場而增肅仰祈歆鑒永集祥祺

慈孝寺開啓真宗皇帝忌辰資薦道場齋文正月十一日

伏以仙馭乘雲式臨於遠日春陽滯露載感於孝思爰即梵居俾延
淨侶瞻玉臺之妙相啓貝葉之真文集此勝因仰資冥祐

集英殿開啓真宗皇帝忌辰道場齋文正月十一日

伏以神遊斯遠方仰於軒威諱日茲臨載深於舜慕虔依正覺俾集
善因敝禁殿以有嚴啓法筵而夙設仰祈冥助用慰孝思

內中福寧殿罷散二長月道場青詞正月十七日

伏以首春紀序標令月以惟時善氣宣和紛百祥而來集載嚴秘殿
恭按真科依妙道之冲虛薦清一作精衷之獨潔冀迎純祐均被羣
倫

撫問真定府定州等路臣寮口宣正月二十二日

卿汝等並輟時才出分邊寄屬新陽之戒候念宣力以惟勞特示撫
存體茲眷遇

撫問保州路臣寮口宣正月二十一日

卿汝等夙臨邊圉盡瘁公家當眷序之方和念朔陞之尚凜俾茲撫
慰式示眷懷

撫問北京并恩州臣寮口宣正月二十二日

卿汝等並膺東寄方布教條惟夙夜之宣勤在眷懷而彌切特加存
撫宜體優隆

雄州撫問契丹賀乾元節人使口宣二月二十三日

卿等並持使節叶講隣歡飭車馭以載勞及疆亭而茲喜一作始俾
伸撫慰式示眷懷

贈保順軍節度使張惟吉祭文堂祭二月二十六日

維至和二年歲次乙未三月己未朔皇帝遣入內侍省內西頭供
奉官勾當延福宮康爲政致祭於贈保順軍節度使張惟吉之靈惟
靈忠勤之節克保於有終存歿之恩備隆於異數仍加祖奠式表哀
榮尚享

贈保順軍節度使張惟吉祭文墳所二月二十六日

惟靈左右宣力始終不渝載嘉遺忠實用追惻奠爾臨墳魂其有知
賜契丹賀正日人使却回班荆館酒果口宣十二月二十九日

日

卿等並持信節繼講鄰歡既夙駕以言歸俾及郊而留錢宜伸寵錫
用示眷懷

賜鎮安軍節度使同中書門下平章事判陳州程琳進奉乾
元節詔三月十五日

誕祥著節延祝申誠願予同德之臣首列充庭之貢式彰勳蓋深用
歎嘉

賜外任臣寮進奉乾元節銀絹馬等詔勅書同 三月十五日

日

夏時正候誕節戒辰惟事君之盡忠因效貢而申祝嘉乃勤意勿忘
於懷

賜樞密使河陽三城節度使同中書門下平章事王德用生

日禮物口宣三月二十五日

卿勳閭名家樞機重任式因誕日用示優恩宜體眷懷膺茲蕃錫

廣聖宮開啓乾元節青詞三月二十五日

伏以月旅正陽當百嘉之茂威祥標誕節期萬壽之穹隆式案舊章
載嚴秘殿延紫霄之飛馭誦玉笈之靈篇伏冀誠懇上通聖真垂祐
錫之多福均動植之幽微永以無疆並乾坤而悠久

撫問河東路沿邊臣寮夏藥口宣三月二十五日

卿汝等並膺寄任深東器能顧隆暑之惟時念禦邊之宣力俾分珍
劑式示眷懷

撫問麟府路一無路字臣寮及并代州路臣寮口宣三月十

五日

卿汝等耐有時才並分邊寄顧蘊隆之在候嘉勤瘁以不忘式示撫
存體茲東注

撫問宣徽南院使彰信軍節度使判真定府李昭亮口宣四

月六日

卿宣勞邊鄙頗歷歲時因乃子之言行俾過家而賜問式彰寵眷以
耀私門

錫慶院賜宰臣已下罷乾元節道場酒果口宣

卿等任國鈞軸爲予股肱因誕節之屆辰嚴梵宮而申祝載嘉忠蓋

宜示寵頒

端午帖子詞二十首三月二十五日

皇后閣六首

其一

天清槐露挹歲熟麥風涼五日標嘉節千齡獻壽觴

其二

午位星杓正人間令節同四時和玉燭萬物被薰風

其三

舜舞來遐俗堯仁達九區五兵消以德何用赤靈符

其四

楚國因讒逐屈原終身無復入君門願因角黍詢遺俗可鑒前王惑
巧言

其五

嘉辰共喜汩蘭湯毒沴何須採艾禳但得臯夔調鼎鼎自然災稷變
休祥

其六

炎暉流爍蕙風薰草木蕃滋德澤均畜藥蠲痼雖故事使民無疾乃
深仁

皇后閣五首

其一

畫扇催迎暑靈符喜辟邪風光麗宮禁時節重仙家

其二

椒塗承茂渥嬪壺範柔儀更以親蠶繭紉爲續命絲

其三

覆檻午陰黃鳥轉烘簾曉日絳榴繁六宮綵縷爭新巧共續千齡奉
至尊

其四

紫闈浙浙光風轉綠葉陰陰禁苑涼天子萬機多暇日喜逢嘉節奉
瑤觴

其五

五色雙絲獻女功多因荆楚記遺風聖君照物同天鑒不用江心百
鍊銅

溫成皇后閣四首

其一

密葉花成子新巢鷺引雛君心多感舊誰獻辟兵符

其二

旭日映簾生流暉權艷明紅顏易零落何異此花榮

其三

綵縷誰云能續命玉奩空自鎖遺香白頭舊豎悲時節珠閣無人夏

日長

其四

依依節物舊年光人去花開益可傷聖主聰明無色惑不須西國返

魂香

夫人閣五首

其一

梅黃初過雨麥實已登秋避暑多佳賞皇歡奉一作奏豫遊

其二

鳴蜩驚早夏鬪草及良辰共薦萼華一作蒲酒君王壽萬春

其三

楚俗傳筒黍江人喜競船深宮亦行樂綵索續長年

其四

涼生玉宇來風細日永金徒報漏稀皎潔水壺清水殿二千爭捧楮

黃衣

其五

仙盤冷泛銀河露紈扇香搖綠蕙風禁掖自應無暑氣瑤臺金闕水

精宮

賜右屯衛大將軍叔詔擬論勅書四月十二日

勅叔詔省所進祝聖壽歌日月元樞論共二軸專具悉朕固嘉爾嚮學勵善蔚然而有文與夫習富貴之驕而樂狗馬之翫者異矣然夫

學者所以知君臣父子之禮出可以施於國入可以施於家汝其慎擇厥師講救其闕使言而無過以自遠於悔尤夫能異於衆人誠爲有立必至乎君子然後大成汝其勉之無或中止故茲獎諭想宜知悉

十二月

十九日契丹賀乾元節人使朝辭訖就驛賜酒果口宜四月

卿等夙持隣聘申慶誕辰嘉成禮之有儀在眷懷而增厚宜頒優賚

式示寵章

集禧觀迎祥池崇禧殿就上清宮功德前開啓保夏祝聖壽

金籙道場密詞五月十八日

伏以道本無爲功施萬物福惟善應信若四時當茂育之屆辰薦精

明而交感載嚴珍館恭按仙科伏願騰敷來臨清真垂祐保壽齡之

永錫均動植以咸休

賜判大名府賈昌朝判陳州程琳判成德軍李昭亮等進奉

上壽金酒器一副馬六疋詔五月二十二日

載誕及辰萬邦咸慶顧乃蕃宣之重實惟耆哲之明休有物容來陳

壽祝嘉乃誠意不忘於懷

兗州會真宮等處開啓皇帝本命道場青詞

伏以三辰昭運六甲馴行當薰風阜育之時屬正命本元之日謹遵

科式上薦誠明誦靈藥之真文延紫清之諸聖伏冀蒼靈降鑒福祚

駢臻蒙休匪止於躬博施咸均於庶品

除皇第九初特授依前檢校尚書右僕射充感德將軍度使

加食邑食實封餘如故制五月二十八日

門下爵賞當功則爲善之勸廣名器不假則至公之道存然而隆恩

睦親所以厚乎風俗建侯作屏所以扞乎一作捍我王家非予敢私

乃國舊典具官九初質性純茂稟乎天姿學問發明一作闡由於師

訓維我叔父時為賢王緬懷遺烈之存屬乃克家之善自被蕃宣之
寄久參朝請之聯宜從留務之繁進委臨戎之重節旄並建并賦兼
增僉謀克諧寵數惟渥於戲干戈衛社內有宣勤夙夜之臣甲冑在
躬外有奮力行伍之將爾其念宴安之懷毒知富貴之難居戒損於
滿而罔敢自驕勞身以謙而克保其位無忘勗勵往服恩榮可特授
依前檢校尚書右僕射使持節耀州諸軍事耀州刺史兼御史大夫
充感德軍節度使耀州管内觀察處置等使仍加食邑七百戶食實
封二百戶散官勳封如故主者施行

賜鎮海軍節度使檢校大尉同中書門下平章事判亳州陳
執中讓恩命第二表不允仍斷來章批答至和二年六月十

八日

卿自再司鈞軸未久歲時適者數上封章願還印綬朕惟委任之際
古今所難知之不盡如不知用之不終如不用所以悉格羣議獨斷
余衷非惟勉爾以胡恤人言亦庶幾乎任賢勿貳之意也而卿一無
卿字避讓之節再三益堅事有重違理當俯徇夫進退以禮豈惟優
大臣堂陛俱隆蓋以尊人主是用寵爾以節旄之寄兼之以槐鼎之
榮雖為新恩實爾舊物出入中外載嘉夙夜之勤待遇始終當盡君
臣之分無煩封執用體眷懷所讓宜不允仍斷來章

賜新除宰臣富弼赴闕茶藥口宣至和二年六月十八日

卿祗若新恩式趨近甸炎歊方辯衝冒良勤宜有頒宣用伸眷遇

賜新除宣徽北院使檢校大保判并州王拱辰讓恩命不允
仍斷來章批答至和二年六月十八日

省表具之宣導徽猷號為近職鎮撫方面實惟難才余思其人於爾
為得至於儒學雍容於顧問勤勞出入於劇繁考實望以執先在甄
陞而惟允辭讓之節誠雖可嘉詢謀既同命則無易所讓宜不允仍
斷來章

賜新除宣徽南院使檢校大保判延州吳育讓恩命不允仍
斷來章批答至和二年七月十七日

省表具之卿學足以治人知足以謀事夙有問望稱於搢紳惟時舊
人常歷二府一使二字一作宣徽之職夫復何讓若乃居則道古先
之訓講朕以大經出則重朝廷之威撫余之遠俗才無不可用之文
武而皆宜忠無不為任以內外而何異余考於衆僉惟汝諧所讓宜
不允仍斷來章

賜新除昭德軍節度使知鄆州龐籍赴闕生料口宣至和二
年七月二十一日

卿言乘觀圭甫臨畿甸屬此新商之序載嘉執轡之勤宜有頒宣以
彰寵待

賜新除昭德軍節度使知鄆州龐籍赴闕茶藥詔同日
勅龐籍擁節之蕃飭車來觀顧都圻之甫及嘉跋履之斯勞特頒欽
劑之良以示眷懷之厚

醴泉觀本觀三門上梁文至和二年七月二十一日

兒郎偉我國家膺三靈之眷命革五代之荒屯多壘削平包干戈而
偃武四夷面內解辯索以承風逮先聖之撫臨躋羣生於富壽乃欲
追羲軒以並軌款云亭而勒成容典交脩遂舉曠古難行之禮瑞應
來集有非人力可致之祥卿雲裔露之光紛綸而雜委朱草靈芝之
秀焜燿而叢生爰有神泉湧茲福地甘如飲醴美可獨病湛靈液以
淵澤敵琳宮而崛起歲時遊豫順民俗之樂康棟宇巽嚴表京師之
壯麗近以有司不謹飛焰延災皇上愛物推仁因民所利願遺基之
歸爾回聖慮以惻然爰飭良工載新有作損其土木之費所以寬民
適其奢儉之中俾之可久用涓吉日構此脩梁蓋効歡謳形於善祝
兒郎偉拋梁東危構岩嶠彩露中欲識聖君仁及物靈源一勺本無
窮

兒郎偉拋梁西金碧相輝俯仰迷萬瓦寒光浮瑞露層簷晚景掛晴
蜺

兒郎偉拋梁南善利深功一作功深不可談但喜斯民無疾癘誰知
靈液有餘甘

兒郎偉拋梁北觀者如雲來九陌四方萬國會京師有類衆星環斗
極

兒郎偉拋梁上棟宇規摹標大壯落成行即慶良辰望幸何時來綵
仗

野
兒郎偉拋梁下祈福爲民崇廣廈四時和氣致休祥萬國多歡洽朝
野

伏願上梁以後三辰順軌百穀豐登卉服雕題咸被垂衣之化行歌
戴白永爲擊壤之氓皇帝萬歲皇帝萬歲皇帝萬歲

賜新除宰臣文彥博讓恩命第二表不允仍斷來章批答至
和二年七月二十八日

省表具之朕躬儉約以先人而生民未足勤憂勞以勵政而百職多
墮豈布德之不明抑任人之弗至是以齋居正慮先志後占鑿屢易
以爲煩念難知之可慎永惟商周之所記至以夢卜而求賢孰若用
摺紳之公言從中外之人望卿以舊哲比嘗相余惟字量能寬以服
人惟純誠故久而益信勳德兼著可以重朝廷忠信不回可以臨大
事夫謀於其始而既審則果於必用而不疑汝其欽哉朕命無易所
讓宜不允仍斷來章

賜新除宰臣富弼讓恩命第二表不允仍斷來章批答至和
二年七月二十八日

省表具之卿有憂國愛君之心而忠以忘其己有經邦濟時之學而
用未究其能夫畜久而積厚則施之不窮慮深而計熟則謀無不獲
茲朕所以虛心仄席有望於卿也矧卿正直不回庸邪素忘小人所

異君子所同是以外十年而左右之譽不及履躬一德而摺紳之
望愈隆朕內決於心外詢於衆敢謂有得卿其可辭所讓宜不允仍
斷來章

南京鴻慶宮開啓皇帝本命道場青詞八月一日

伏以紫青垂祐資道妙之冲虛甲乙馴行會天辰於元本款別都之
福地舉淨醮之真科薦以潔精通乎粹響伏願衆靈昭鑒百福來臻
隆萬壽於無疆溥羣生而咸遂

撫問真定府高陽關河東等路臣寮口宣八月六日

卿汝等出分邊寄備罄材謀載嘉宣力之勞屬此爽秋之候宜加撫
慰俾示眷懷

撫問邠寧環慶涇原鎮戎軍德順軍路臣寮口宣八月八日

卿汝等各韞材猷並膺寄任屬商秋之在候念障圍之爲勞宜有恩
言用彰眷待

後苑華景亭開啓故秦晉國夫人林氏追薦道場齋文

伏以淑懿之賢已賈追榮之典陰幽之助仍資衆善之因爰即華林
載陳法供冀慈仁之廣被均勝利於無窮乘此妙緣超升福果

後苑華景亭開啓安土地道場齋文八月二十二日

伏以后皇安靜稟厚德以無疆靈既冥符惟至誠而有一作交感載
嚴淨侶夙按梵儀冀被滌於百邪俾委安於庶品

爲秦晉國永壽聖祐夫人林氏身亡於壽星觀倚設九幽道

場青詞

生而有盡是謂於物常道本無形實資於冥助虔依仙宇載肅淨場
追懿德之已遙冀明靈之垂祐薦茲勤潔庶達精誠一無此八字

故秦晉國夫人祭文路祭八月二十二日

惟靈蔚有令儀著於茂則顧追褒之寵數已極恩榮念永闕於佳城
載深惻怛列茲奠禮用慰營魂

故秦晉國夫人祭文夜排勅祭八月二十三日

惟靈懿德惟舊嘉問克彰奄然淪逝惻爾追感侑以禮奠庶乎來歆

荆南府紫府觀并潭州南嶽真君觀開啓皇帝本命道場青

詞八月二十六日

伏以道非常名無方而善應誠之所至有感而必通惟南服之奧區

敞清真之靖館因本元之吉日備科式之多儀延集衆靈仰祈沖鑿

冀咸臻於百福期永固於千齡

廣聖宮開啓祝聖壽道場青詞八月二十六日

伏以百工休力標禮典以順時衆善延祥紀道家之吉月恭陳秘館

式按常科瑤席瓊罇夙陳於芳潔芝華羽葆紛集於真靈伏願錫祉

眇躬隆壽齡於無極遂生庶品臻隱伏以咸均

論獎諭叔詔奏續添

臣伏準中書劄子下本院爲右屯衛大將軍叔詔進祝聖壽歌日月

玄樞論奉聖旨令學士院降勅書獎諭竊以叔詔宗室之子好學脩

辭誠可嘉獎然臣伏見玄字自來公私文字悉皆諱避其叔詔所進

日月玄樞論欲暫降付本院略更詳其文理庶於詔辭褒勸之間因

而得以訓勵今取進止 四月 日學士臣歐陽某劄子

貼黃

所有獎諭勅書未敢脩撰乞早降指揮

內批

其元樞論各以犯諱字因而諷諭使後來所撰益精其文字更不付

外只如此降詔施行

右至和二年四月奏審叔詔獎諭勅書奏劄後有內批三十四字

今真本尙存其勅書在內制第二卷而無此奏按蘇文忠內制集

如乞勿免文呂拜禮乞許安樞密辭轉官之類皆以元奏與詔書

並載故用此例附卷末

內制集卷第二

內制集卷第三 集八十四

河南府平陽洞河陽濟瀆北海水府投送龍簡青詞八月二十六日

伏以九區至廣萬物類居惟川嶽之宅靈繫真仙而總治載稽道祕實有舊章粲然玉簡之清文婉若金鱗之瑞質茲為鎮信輔以精誠伏冀冲鑒昭臨純祺錫羨保邦家之永固均動植以蒙休

雄州開啓北朝皇帝盡七道場齋文八月二十六日

伏為一作以北朝皇帝世結隣歡歲交聘問方睦敦隆之好遽聞訃告之音深極哀懷用伸資薦廣梵筵而斯啓陳法供以惟嚴冀仰助於仙遊庶永孚於冥祐

班荆館賜北朝告哀人使御筵口宣八月二十六日

卿載馳使介來計國哀當節物之凜秋嘉道塗之良苦宜頒燕犒以示眷勤

班荆館賜契丹告哀人使酒果口宣八月二十六日

卿載馳國計來及都城顧惟跋履之勞宜有頒宣之寵俾推珍錫式示眷懷

故秦晉國夫人林氏祭文堂祭八月二十六日

維靈歸全叶禮卜吉有期念將闕於幽局俾載陳於祖奠敢茲芳潔尙體追懷

故秦晉國夫人祭文墳祭八月二十六日

維靈壽考有終勞能可錄安茲宅兆備有物容載申奠訣之恩式盡追榮之美

內中福寧殿罷散三長月祝聖壽道場青詞八月三十日

伏以清霜肅候資萬物以將成嘉月齋心延百祥而並集有嚴秘殿來格衆靈冀真鑒之妙冲答精衷之獨潔保鴻圖而懸固均庶品以阜康

契丹告哀人使回至北京賜御筵口宣九月四日

御遠將國命來告訃音當使傳之言旋俾宴需之加錫用申眷勞式示寵恩

契丹告哀人使回至雄州賜御筵兼傳宣撫問口宣九月四日

御遠馳國訃旋飭使輶載嘉復令之勤爰錫示慈之宴式彰寵數宜體至懷

賜鎮海軍節度使檢校太尉同中書門下平章事判亳州陳執中生口口禮物口宣九月四日

卿榮擁節旄出臨蕃翰屬茲誕日宜有寵頒當體眷懷克膺茂數

太平興國寺開先殿開啓太祖皇帝忌辰道場齋文九月八日

伏以紹百王而開統昭著於祖功植衆善之妙因爰憑於覺力循有邦之舊典稽諱日以先期載肅齋場並延淨侶瞻玉毫之真相誦貝葉一作葉之靈文仰依慈慧之仁遐薦清真之馭庶資冥祐式廣孝思

太平興國寺開先殿開啓太祖皇帝忌辰道場功德疏右語

九月八日

伏以受命造邦耀無窮之不烈以時薦福資妙用於能仁爰及諱辰式遵彝憲即神居之寶殿延法侶於祇園仰冀覺慈廣敷勝利威靈如在冥助於真遊運祥克昌永隆於下世

賜西南蕃蠻人張漢頂等勅書九月十二日

勅張漢頂省所附進馬并硃砂等事具悉汝世安邊徼遠效款誠涉道里以其勤修貢輸而自達載嘉忠順宜有寵頒令回賜汝紅中錦旋欄一領八兩渾鍍銀腰帶一條衣着二十疋至可領也故茲示諭想宜知悉秋冷汝比好否遺書指不多及

歐陽文忠全集 卷八十四

四二二

增脩青帝朝日風師先蠶等壇祭告逐壇并當處土地祝文

九月十二日

壇遺之嚴神明所格以時修舊式叶彝儀涓此吉辰用伸昭告

皇帝回契丹皇帝告哀書

九月日伯大宋皇帝致書於姪大契丹皇帝闕下特枉使輶遽馳國
訃不意凶變文成皇帝上僊載念久敷世好方睦隣歡聞震驚撫
懷感惻姪皇帝始茲繼紹深極哀摧冀節至情以遵典禮已差人使
專持慰禮今右宣徽使忠順軍節度使左金吾衛上將軍耶律元亨
回奉書陳謝不宣白

皇帝回契丹皇太后告哀書

九月日姪大宋皇帝謹致書於孀大契丹仁慈聖善欽孝廣德安靜
正淳懿知寬厚崇覺儀天皇太后闕下不意凶變文成皇帝上僊方
敦睦睦遠及訃音載惟慈慕之懷必極哀傷之念冀從順變式副瞻
言已差人使專持慰禮今右宣徽使忠順軍節度使左金吾衛上將
軍耶律元亨回奉書陳謝不宣謹白

贈昭信軍節度使遂國公宗顏祭文堂祭九月十三日夜

維汝幼而敏明長克有立胡謂爲善而不永年奠瘞在茲營魂其慰

贈昭信軍節度使遂國公宗顏祭文堂所九月十三日

維汝稟質甚秀享齡不遐日月有期厝安惟吉陳茲奠酌實悼余懷

賜右領軍衛將軍克冲焚諭勅書九月十五日

朕覽先帝之餘文愴然增慕嘉汝志之專學期乃有成惟審制之坦
明合聖經之一作而雅奧傳寫之善茲謂藝能誦習不忘是爲寶訓
宜加褒曷以勉進修

吳王院上梁祭告土地祝文九月十五日

本支之威棟宇有嚴吉日既脩脩梁始構冀神之祐永壯厥居

南京鴻慶宮開啓皇帝本命道場青詞九月二十三日

伏以帝運開先建別都而雄壯神遊欽奉肅真館以邃嚴適臨元命
之辰恭按仙科之式薦茲嘉潔仰彼穹靈敢祈善應之祥永固無疆
之壽

賜鎮海軍節度使檢校大尉同中書門下平章事判亳州陳

執中詔十月二日

卿近辭宰柄出守蕃宣方受署以云初効右牽而來獻式彰誠蓋深
用敷嘉

賜知建昌軍張貴和勅書十月二日

敦本勸農惟汝之職因時任土脩貢有儀載省勤誠用增獎歎

啓聖禪院脩設故秦晉國肅恭賢正夫人林氏盡七大會齋

一中齋文十月二日

伏以覺慈廣被兼濟於含生冥福所資必憑於慧力惟懿柔之秉德
享壽考而有終隆睿眷以不忘集勝緣而增備願乘妙果一作道超
薦真乘

賜吏部尚書同中書門下平章事文彥博生日禮物口宣十

月二日

卿以名世之材當秉鈞之任乃顧具瞻之重適臨載誕之辰爰示頒
宜用彰眷遇

西太一宮開啓皇帝本命道場青詞至和三年正月十五日

伏以真遊所集靈宇載嚴奉臨元命之辰恭按仙科之式冀紫清之
垂鑒感蠲潔以潛通百福來臻克彰於善應萬齡增固永保於無疆

撫問麟府代州路臣寮口宣二月五日

卿汝等各蘊才猷出膺寄任綽著綏寧之績克彰勤蓋之勞宜示撫
存用推眷遇

皇帝回契丹皇太后回謝書

三月日姪大宋皇帝謹致書於孀大契丹仁慈聖善欽孝廣德安靜

正淳懿和寬厚崇覺儀天太皇太后闕下嚮以訃音來告方深感愴之懷贈禮是將用繼講修之好豈期懿念復在使軍且承春侯之和克固壽康之福其於感慰罔罄敷陳今順義軍節度使左監門衛上將軍蕭佶等回專奉書陳謝不宜謹白

皇帝回契丹皇帝回謝書

三月日伯大宋皇帝致書於姪大契丹皇帝闕下頃承哀訃嘗遣使輶惟久睦於仁隣俾往伸於禮極復蒙惠問仍示典儀方此春和克支福履其爲慰浣奚既各言今順義軍節度使左監門衛上將軍蕭佶等回專奉書陳謝不宜白

建隆觀翊教院開啓皇帝本命道場青詞閏二月四日

伏以道妙無方默運清真之氣日纏有次式臨元本之辰恭按仙儀俾陳淨醮伏願蒼靈昭鑒福報駢臻萬壽無疆永隆於鴻算羣生咸遂均被於餘休

賜侍衛親軍步軍副都指揮使涇州觀察使王凱赴闕茶藥口宣二十五日

卿遠戒戎車夙祗召節式及炎薰之候載惟道路之勤宜頒飲劑之良用示眷懷之厚

賜龍圖閣直學士給事中施昌言已下爲脩河了畢御筵口宣四月四日

卿等分庀工徒繕修隄捷遽茲訖事嘉乃有成宜推宴犒之恩用獎勞能之効

賜鎮東軍節度觀察留後知穎州李端愿赴闕茶藥詔八日卿出布詔條入祗召節屬此炎歊之候深惟道路之勤宜頒藥劑之良用示眷懷之厚

賜契丹賀乾元節國信使副生鐵口宣八日卿等式將聘幣來講隣歡載嘉道路之勤宜厚饋率之品往膺龍錫

用示眷懷

賜文武百官文彥博已下於大相國寺罷散乾元節道場香合口宣八日

卿等式因誕節祗率寮寮脩梵供以惟精罄臣誠而申祝載嘉忠愛宜示頒宣

賜文武百官文彥博已下於錫慶院罷散乾元節道場酒果兼教坊樂口宣八日

卿等叶德同寅愛君盡禮因誕彌之紀節申祝頌之常儀宜示宴私用彰優寵

大慶殿行恭謝之禮御札五月二日

勅內外文武百寮等執珪璧以事神嚴祖宗而配帝雖有國之常典亦因時而制宜朕承三聖之不基撫萬邦之有衆儉於己思天下之民豐勞於心致天下之民佚罔敢怠忽庶幾治一作治平而首春以來偶爽調適賴三靈敷祐百福來臻順以節宜獲茲康祐加以邊隅不聳風雨以時雖庶物之咸和顧眇躬之一作而增惕是用稽先朝之成憲詢故實於有司即廣殿之翼嚴擇靈辰之良吉式伸昭謝以格純休宜示先期俾茲誕告朕取今年九月內於大慶殿行恭謝之禮其今年冬至親祀南郊即宜權罷所有合行諸般恩賞並特就恭謝禮畢一依南郊例施行至日朕親御宣德門宣制仍令所司詳定儀注以聞務遵典禮勿俾煩勞咨爾多方咸體予意故茲札示想宜知悉

東太一宮開啓保夏祝聖壽金錄道場密詞四月二十七日伏以風薰紀候阜庶物以蕃滋道妙無言集百祥而善應即琳宮之福地考金錄之秘文薦此令芳通乎胙蟹冀延純錫保乃昌圖資壽考於無疆均蠶生而咸被

賜五臺山十寺僧正知令等勅書五月七日

汝等並懷出俗之心而有愛君之志因王正之肇序遵佛事以脩嚴期申祝延來効誠獻載嘉勸款宜有恩頒

賜天章閣待制知楊州許元詔五月七日

汝以材敏班余詔條眷乃淮海之濱產茲草木之美以時采掇來効貢輸嘉爾勤誠良深歎獎

天貺節謝內中露香表五月七日

伏以薰風應候滋阜於羣生嘉節紀時恭承於景既已嚴淨館虔奉祕祠仍假薰脩附通精意蒼靈昭鑒純祉來臻

撫問廣南西路臣寮口宣五月十七日

卿汝等並以幹能出分奇任顧此蘊隆之候載嘉宣布之勤宜示慰存用彰眷遇

除授陳執中行尙書左僕射充觀文殿大學士依舊判亳州

加食邑食實封餘如故仍放朝謝制六月十日

門下爵祿之寵所以優老而崇賢退讓之風所以勵俗而敦化眷我元輔殿於近邦屢辭將相之榮備述君臣之遇雖重違懇悃之請而豈無恩意之隆爰告外庭以旌嘉尙具官陳執中質性剛直姿識敏明出於名臣之家早有時材之用自更中外之任實勤夙夜之勞出撫師徒宣威種落之外入參機要竭忠帷幄之間至於兩踐台司首當國論杜門絕請善避權勢以遠嫌處事執心不為毀譽而更守顧方深於倚信乃祈解於鈞衡兼乘旄調鼎之榮資鎮俗偃蕃之重所以優逸者哲養頤精神而數形奏封每以疾告察其誠至良為惻然若夫中臺之崇端揆是為於師長祕殿之職詢訪實思於老成推此茂恩俾如汝志仍廣邑封之數即安屏翰之居於戲壹思慮以專心勤藥石以自輔人實求舊予惟不忘勉期壽康往服休命可特授行尙書左僕射充觀文殿大學士依舊判亳州加食邑七百戶食實封三百戶功臣散官勳封如故仍放朝謝王者施行

宣召曾公亮口宣六月六日

有勅卿自辭職禁林班條近輔休有政績播於民聲既深東於予衷俾召還其舊物矧汝材望著於搢紳豈惟潤色之文方俾論思之益

撫問河北路臣寮諸軍將校口宣七月二日

卿等任膺委寄職在綏寧當茲災沴之餘備著勞能之効俾伸撫慰宜體眷懷

撫問樞密直學士施昌言為患口宣七月十日

卿方委政條遽聞疾告致爽調和之理豈非夙夜之勞勉輔天真冀遵藥喜俾伸撫慰式示眷懷

撫問澶州滑州衛州通利軍梅摯等及存恤逐州軍為水災及防護堤岸口宣七月七日

卿汝等列蕃宣之重寄罹澍潦之時災顧乃兵民載深隱惻尙賴班條之善克伸捍患之勞往道予懷俾伸慰撫

萬壽觀延祥殿開啓中元節資薦真宗皇帝道場青詞七月七日

伏以道生萬物運元氣於無形節正三元紀清商之令序洪惟先聖邈矣真遊貽睿業以嗣承增孝思之時感式陳淨醮仰薦精衷伏願靈馭在天愈資於冥祐寶圖綿世永庇於羣生

內制集卷第二

內制集卷第四 集八十五

賜昭德軍節度使龐籍并武康軍節度使韓琦龍神衛四廂都指揮使英州團練使郝質各進奉端午馬詔勅七月七日卿外分寄任方切眷懷屬令節之紀時効駿足而來貢備彰勤蓋深所歎嘉

賜溪洞進奉乾元節并端午勅書

汝夙被朝恩克綏種落屬茲佳節來効貢儀省乃勤誠良深歎獎

賜外任臣寮進奉乾元節功德疏詔勅七月七日

卿汝夙韞材猷出分委寄屬茲誕節來効勤誠載詳善禱之言彌見愛君之義良深歎尚宜體眷懷

賜外任臣寮進奉助恭謝禮畢銀絹等詔勅七月二十五日

國有大事嚴祀以薦馨臣能盡忠因物而脩禮卿汝分職居外乃心於朝載陳來助之儀深歎勤誠之至

賜武康軍節度使韓琦到闕坐對口宣八月五日

卿德著耆明時膺材任祗趨召節方及國門宜示頒宣式彰眷遇

賜新授四方館使依舊英州刺史馬懷德進奉謝恩馬勅書

八月十日

汝近以疇勞擢陞要職乃求良駿來備貢輸深推報國之誠更俟奮身之効良深嘉獎當悉眷懷

賜知池州包拯進奉石菖蒲一銀合勅書八月十日

汝識遠言忠身外心內乃因時物來効貢儀深體誠勤益增歎尚

賜新授觀文殿大學士行尚書左僕射陳執中詔十月二十五日

卿出守蕃垣自陳疾恙祕殿之職接路之崇所以褒優輔臣增重朝體而乃發於誠慤來効貢輸載省恪一作忠勤但深嘉尚

賜新除資政殿大學士知青州孫沔告勅并對衣鞍轡馬口

宣八月十六日

卿蔚為名臣久撫方面俾加美職徙領要蕃仍推寵錫之優式示眷懷之厚

賜護國軍三軍將吏僧道百姓等為護國軍節度使樞密使

狄青罷政加平章事判陳州示諭勅書八月十六日

勅護國軍某人等朕以狄青夙兼忠勇之姿嘗著勤庸之効自參機務頗歷歲時載深乃眷之懷優以均勞之寵惟命崇於名器蓋體繫於朝廷是加鼎軸之司委以藩垣之任乃人臣之榮遇想輿論之僉諧

賜翰林學士尚書左司郎中知制誥權知審刑院曾公亮詔

八月十六日

國家政治之難惟刑是恤使民無犯嗟訓導之未純執法必平顧重輕而宜允卿以精識附一作傳之經術不特明而克審既能敏而加勤期於無刑子敢不勉靡有留事爾實為材副乃憂勞良深歎獎

賜尚書刑部員外郎兼侍御史知雜事權判大理寺郭申錫

等勅書八月十六日

獄重事也余所慎焉五刑之難請比之文毛舉四海之廣報決之書日繁汝以通敏之姿濟之夙夜之力厝刑不用余實慕於前猷俾獄無留汝則能於厥職副我欽恤良增嘉歎

除劉沆特授行工部尚書充觀文殿大學士知應天府加食

邑實封仍改賜功臣餘如故制嘉祐元年十一月五日

門下鑿一節以事君中外之任無間處大臣而有體進退之禮必優矧余輔弼之良方賴股肱之寄屢形懇避嘉敦慤之弗移宜峻寵章示眷懷之特異具官劉沆質性剛鯁姿材敏明早以藝文策俊科於異等遂迨髦彥騰夷路以飛華入必待於清閑出屢更於事任翼翼是則有聲京邑之雄巖巖具瞻遂參廊廟之用乃疇嘉績爰正台司

執毀譽不同之心篤於自信動夙夜匪懈之志久而益勞顧方厚於倚毗乃遽思於退讓宴見之際有言而必誠封章之來雖却而復至察其所守實亦重違惟茲秘殿之嚴眷乃留都之重既增美秩仍益真封寵我邇臣斯為異數雖如汝志尚東子衷於戲棄國之鈞居則坐而論道為時舊老往則殿於大邦是惟出處之榮勉服便蕃之命可特授行工部尚書充觀文殿大學士知應天府加食邑一千戶食實封四百戶仍改賜推誠保德崇仁忠亮功臣散官勳封如故主者施行替錢明遠

賜新除同中書門下平章事判大名府依前彰信軍節度使

李昭亮讓恩命不允詔十二月五日

卿勳閱之門世承舊德忠勤之節効著厥官惟別都管鑰之嚴兼方面鎮臨之重俾提相印增寵將旄嘉辭讓之有儀在眷懷而豈易爾無固執往服新恩

賜溪洞進奉助恭謝賀冬賀正水銀綿綉等勅書十二月五日

日

汝世膺朝寵能撫其人時効乃誠善脩其貢載惟忠恪深用歎嘉

東太一宮開啓年交祝聖壽金錄道場密詞十一月十日

伏以三陽肇序始變於凝陰萬壽無疆宜膺於茂祉俾延淨侶祗款嚴祠按金鏡之仙科格紫清之真馭冀迎福應永固不圖下逮庶邦咸均純錫

賜夏國主一有贈贈二字詔十二月二十五日

詔夏國主喪葬之儀孝子之大節贈贈之禮國家之至恩眷惟忠順之邦宜厚哀榮之恤緬思荼毒深用惻傷俾遣使車勉膺慰錫今差文思院使張惟志充弔慰使兼賜安葬故母物色具如別錄至可領也故茲詔示想宜知悉冬寒比平安好否書指不多及

正月六日朝辭訖就驛賜契丹賀正旦人使御筵口宣十二

月二十五日

卿等聘禮有成使輶云復嘉肅祗於將事宜宴飫以勞動式示眷懷勉膺寵錫

班荆館賜契丹賀正旦人使却回酒果口宣

卿等載馳瑞節來會王正嘉成禮以言旋念戒塗之伊始式推寵眷勉服恩頒

賜樞密副使程戡生日詔嘉祐二年三月四日

卿久罄謀猷叶宣機政眷惟誕日屬此令時宜推寵賚之優式示懷之厚

賜諸道州府軍監及四京恤刑詔勅

朕欲使民知禮義以遠罪而惠乎勸戒之未明蓋茲羣愚猶冒常憲顧此海暑閔然拘繫卿汝夙以敏材外分憂寄惟刑之恤當體於朕心舉政以時勉思於汝職務從欽慎庸副哀矜

契丹國信使副回入四月沿路賜夏藥扇子甘蔗等口宣三月十九日

日

卿等載驅使傳言復歸塗顧茲溽暑之辰宜有優恩之賚俾頒品劑當體眷懷

瀛州賜契丹國信使副却回御筵口宣三月

卿等將命達辭回轅屆道方涉川塗之邈宜伸宴犒之私式示優延體茲眷厚

北京賜契丹國信使副却回御筵口宣二月二十九日

卿等夙將信聘言復使輶方就館於別都宜示恩於錫宴式彰優渥當體眷懷

就驛賜契丹賀乾元節人使內中酒果口宣

卿等將乃聘儀及茲壽節宜示宴私之惠用彰眷寵之懷推以甘珍體余嘉錫

賜河北東西路邊臣夏藥及傳宣撫問口宣

卿汝等各以敏材任茲邊寄屬此炎歊之候深惟勤悴之勞俾頒藥劑之良式示眷懷之厚

東太一宮開啓保夏祝聖金籙道場密詞四月二十六日

伏以道妙無言惟一資生於萬物歲功有序以時均播於五行當火德之甚明順南訛而阜育式稽金簡祗即琳宮祈降集於上靈冀迎來於衆福伏願齊天永壽益保於鴻休觸類賦形皆均於純錫

賜昭德軍節度使檢校太傅知并州龐籍撫諭戒勅詔五月

二十三日

勅龐籍省所上表麟州申管勾麟府州軍馬司郭恩領兵過屈野河陷沒待罪事具悉卿以文武之才更將相之任入籌帷幄早資決勝之謀出撫邊隅方重臨戎之寄載惟同德可諒宣勤而裨校貪功會罔虞於蠶毒敗沒銜辱致輕損於國威嘉封奏之上陳能列言而引咎雖勇夫憤於輕敵彼實自貽而智者慮於未形宜無不備已失難追於既往後圖猶倚於老成勉思節制之方用副眷懷之厚故茲詔示想宜知悉夏熱卿比平安好遣書指不多及

大相國寺開啓爲民祈福道場齋文

伏以薰風協序阜百物以蕃昌慧福均慈蒙萬生而廣被顧惟編俗屬此煩蒸庶依妙覺之仁護此含靈之衆祓除時沴迎集天祺凡載坤輿共臻壽域

醴泉觀感通殿開啓爲民祈福道場青詞

伏以瑞泉涵液湛一勺之靈源琳館凝華嚴衆真之福地眷茲炎鬱閱彼蒸黔俾肅按於仙科冀導迎於善氣伏願紫清昭鑒靈獻來臨旁均海宇之遐下速翺蠕之細並蒙道蔭咸被時禧

賜宰臣富弼上第三表乞退不允斷來章批答

省表具之朕眷惟宰輔之司實繫一作繫朝廷之重職或非稱勢因

易搖比以連年厭於屢易或用人之不審致厥位之靡安故於圖任之初尤極精求之意而議者謂卿有天下之譽慶朕得非常之才豈惟斷不感於余心固已慰久鬱之人望則朕之用卿者至矣卿之自待者如何而方沃嘉猷遽形退讓駭無因而及此會莫論於乃賦豈廊廟之崇貴重者其憂難任而富貴之至位高則其慮易危耶朕嘗歷考往昔之人其於進退之際過計而圖全者未必無患忘身而殉國者固多令名惟汝之明必知所擇宜少安於職業用深體於倚毗所乞宜不允仍斷來章

賜克國公主陳讓恩命第三表不允斷來章手詔七月七日

省所三上表陳讓克國公主事具悉古者周姬下嫁車服不繫於其夫漢女有封湯沐並開於新邑所以重國家之體隆親愛之恩稽累聖之舊章皆按圖而啓國汝以天姿之甚淑習姆教而已閑方及有行乃遵先制俾褒賢懿用錫土田而乃志在撝謙願還渥澤固辭以禮既深體於懇誠承命必恭宜勉祗於寵數所讓宜不允仍斷來章付克國公主

賜賢妃苗氏陳讓恩命第三表不允斷來章批答

省所三上表陳讓賢妃事具悉妃嬪之制秩序著於王宮爵賞之行各數存乎國典舉必謀衆予其敢私眷柔閑淑慎之賢有輔佐憂勤之德更歲時而維舊列號位以既隆屬者因築館之將行示緣恩而推寵雖朕心之乃眷必廷諭之曰然而能恪一作封執謙沖深形懇避然而讓宜有節禮不越於再三命出惟行告已申於中外往祗休渥母或固辭所讓宜不允仍斷來章付賢妃苗氏

賜知乾寧軍高遵約獎諭勅書七月七日

勅高遵約省河北安撫提刑司奏勸會乾寧軍去歲值大雨河水泛漲衝破護城堤洩浸城壁其河岸大段墊壞軍城危急汝乘此水災徑赴本任交割勾當籌計度功料多方用心躬親部役脩築河堤及

護城堤至今年三月內了當其得堅固本軍久遠委不消遷廢伏乞
特加旌賞事嚮以暑雨失節湍湍迅流水防廢官衝溢爲患汝能奔
走就職勤勞匪躬民氓無墊溺之虞壁壘得繕完之固厥効明著攸
司以聞載寬憂顧之懷宜示褒嘉之意故茲獎諭想宜知悉秋熱汝
比好否遺書指不多及

福寧公主宅開啓道場青詞七月十五日

伏以妙道無形宅真靈於香默精衷有感延福應之純厖眷外館之
有嚴肅行車而伊始俾遵科式被以芬芳冀冥祐之敷垂集休寧而
永保

內中福寧殿開啓三長月祝聖壽道場青詞八月二十六日

伏以凜秋肅物嘉歲序之成功吉月延祥按仙科之舊式瞻彼清真
之馭敵茲禁密之廷薦以芬芳通於香默伏冀壽齡永固福應來臻
隆寶歷以遐昌均庶邦而康靖

玉津園開啓保祐聖躬爲民祈福道場青詞八月二十五日

伏以祗紹慶圖撫寧一作摩方夏仰荷百祥之時集思同庶品以均
休乃即清郊載嚴淨侶誦樂宮之真訓瞻璇極之高靈伏願聖壽無
疆永錫履鴻之祐物生咸遂並臻康泰之期

南京鴻慶宮開啓皇帝本命道場青詞九月十三日

伏以寶圖興運茲惟受命之邦琳館凝祥肅奉真遊之馭惟本元之
令日薦精潔之明誠按金籙之科儀瞻紫霄之杳默伏冀衆靈敷祐
百福來臻保遐筭於無疆均含生之賴德

賜樞密副使田況生日禮物詔九月十三日

卿夙韞才猷贊吾機務屬涼秋之肅物嘉誕日之屆一作戒期宜有
寵頒以彰恩眷

班荆館賜契丹國信使副到闕酒果口宣九月十三日

卿等祗命使輅脩歡隣聘式及都圻之近宜推宴勞之恩錫以甘芳

用彰眷遇

班荆館賜契丹國信使副到闕御筵口宣

卿等肅持聘問協講隣歡涉川陸之甚遐戒郊圻而茲始宜申宴犒
用示眷優

玉津園賜契丹國信使副弓箭御筵口宣

卿等荐脩聘好方憩輶軒肅射圃以有儀豐宴邊而加品膺茲寵錫
式體眷懷

雄州白溝驛賜北朝契丹賀正旦人使御筵兼傳宣撫問口
宣

卿等言飭使輅時脩聘好涉此沍寒之候載惟行李之勤宜示宴慈
用彰眷撫

內制集卷第四

內制集卷第五 集八十六

賜樞密使山南東道節度使同中書門下平章事賈昌朝生
日禮物口宜九月五日

御位峻樞庭望崇舊老屬誕期之斯及顧寵數以宜優體乃眷懷膺
茲蕃錫

皇帝賀契丹皇帝正日書

正月一日伯大宋皇帝致書于姪大契丹聖文神武睿孝皇帝闕下
玉曆正時布王春而茲始寶降敦契講信聘以交修方履新陽益綏
多福其於祝詠罔罄數言今差朝散大夫守太常少卿上騎都尉渤
海縣開國男食邑二百戶賜紫金魚袋吳中復供備庫使銀青光祿
大夫檢校太子賓客兼御史大夫騎都尉廣平縣開國男食邑二百
戶宋孟孫充正日國信使副有少禮物具諸別幅專奉書陳賀不宣
白

皇帝賀契丹太皇太后正日書

正月一日姪大宋皇帝謹致書于嬪大契丹仁慈聖善欽孝廣德安
靜正淳懿和寬厚崇覺儀大大皇太后闕下歲律更新春陽暉達因
履端之叶吉敦永好以申歡載惟慈懿之和方集壽康之祉更希善
攝用副遐悰今差朝散大夫守太常少卿直昭文館護軍廣陵縣開
國子食邑五百戶賜紫金魚袋呂景初洛苑使兼閤門通事舍人銀
青光祿大夫檢校太子賓客兼御史大夫騎都尉清河郡開國侯食
邑一千七百戶張利一充正日國信使副有少禮物具諸別幅專奉
書陳賀不宣謹白

賜知潁州徐宗况進奉賀充國公主出降銀絹馬等勅書

勅徐宗况省所進奉賀充國公主出降絹五百疋事具悉詩稱王姬
之下嫁國著嘉禮而有儀惟臣職之聿修備物容而敘慶誠勤所至
數尚良深故茲示諭想宜知悉冬寒汝比好否遣書指不多及

賜知建昌軍沈造勅書

勅沈造省所進奉銀珠稻米一十石計一百黃絹袋事具悉汝職守
軍符政兼民穡樂此有秋之實擇其嘉穀之英式陳常貢之儀彌體
恪官之意故茲示諭想宜知悉冬寒汝比好否遣書指不多及

集禧觀凝祥池崇禧殿開啓祝聖壽年交金錄道場密詞十
二月十日

伏以璇霄默運推四序以循行玉曆更新集萬靈而交會俾清琳宇
延格高真薦茲精一之誠祈乃純庖之祉冀絲福祚均及含生

班荆館賜契丹賀正日人使到闕酒果口宜十二月十日

卿等歲律更端降歡交聘載馳使傳方及國郊宜推寵錫之恩式示
眷懷之厚

瓊林苑開啓保祐聖躬祈福道場青詞十二月十二日

伏以四時成歲嘉庶彙之咸新百福自天荷衆真之冥貺使開靈囿
恭譁仙科恢寶祚之延長錫壽康之遐永是惟降鑒享乃克誠

瓊林苑開啓保祐聖躬祈福道場默表

伏以荷天地之鴻休席祖宗之不業載惟勵翼敢忘憂勤屬歲律之
更端冀時禧之茂集俾嚴禁禦祗率舊章庶通芬潔之誠仰格清真
之馭伏冀錫齡斯永降福孔多保邦祚於無窮均物生而咸被

啓聖院齋殿內權奉明德元德章穆皇后今告遷赴普安院

重徵隆福兩殿奉安祝文

嚮以雨水爲災殿塗增緝亦既新於叢構庶來復於真遊爰揆靈辰
冀茲安妥緬惟慈佑不鑿乃誠

皇帝親詣啓聖禪院告遷明德元德章穆皇后赴普安院奉

安祝文

嚮者因霖災之爲沴飭殿構以增新涓穀旦之惟良奉神遊而還止
載深感慕躬薦芬馨式慰孝思冀茲臨格

正月二日就驛賜契丹賀正旦人使內中酒果口宣

卿等奉將隣好來會歲元載推一作惟寵賚之私宜極珍豐之品俾
頌嘉味式侑宴歡

瓊林苑交年禱祭太歲諸神祝文

天行有度運二統以環周歲德所臨從百神而拱列載涓穀日薦此
令芳惟陰鑿之享誠委時祥而昭佑

班荆館賜契丹賀正旦人使到闕御筵口宣十二月十四日

卿等曆紀歲元聘交隣好載馳使傳方及國門宜頒宴犒一作推寵
錫之恩式示眷懷之厚

賜夏國主進奉賀正馬馳詔

詔夏國主省所差人進奉賀正馬馳共一百頭疋事具悉履端紀歲
萬邦咸稟於王正効貢以時奔世克修於藩職載閱充庭之實深惟
守土之勤遐體傾輸不忘歎獎今回賜銀絹茶等具如別錄至可領
也其差來人所賜物色亦具賜目故茲詔示想宜知悉春寒比平安
好否書指不多及

賜夏國主贖大藏經詔十二月 日

詔夏國主省所奏伏為新建精藍載請贖大藏經帙籤牌等其常例
馬七十疋充印造工直俟來年冬賀嘉祐四年正日使次附進至時
乞給賜藏經事具悉封奏聿來祕文為請惟覺雄之演說推善利於
無窮嘉乃純誠果於篤信所宜開允當體眷懷所載請贖大藏經帙
籤牌等已令印造候嘉祐四年正日進奉人到闕至時給付故茲詔
示想宜知悉春寒比平安好否書指不多及

賜新除觀文殿學士禮部侍郎孫沔詔嘉祐三年正月十七

日

勅孫沔省所上表伏蒙聖慈差使臣實到誥勅各一道授臣觀文殿
學士禮部侍郎并賜對衣金帶鞍轡馬錢五百貫文不敢恭受伏乞

特改差臣知一小郡或依例除一官致仕陳乞事具悉卿蔚有敏材
膺予簡任外分邊寄嘗著於恩威入贊國機早參於帷幄風猷甚美
寵遇既優適嘗擇帥之初方鑒用謀之失是惟慎舉實允僉諧豈宜
圖自便之私而罔體眷懷之意顧茲重地難久曠官往祗成命之行
當略好謙之節所讓宜不允依前降指揮疾速發赴本任故茲詔示
想宜知悉

集禧觀奉神殿開啓謝雪道場青詞

近以溫陽干時雨雪愆候載惟寡薄敢罄精神純明靈孔昭嘉應斯獲
兆豐年而有望消癘氣於未形惟物蒙休以時申報冀清真之來格
期福貺之永依

自京至雄州已來撫問契丹告哀人使口宣正月十九日

卿祗戒軫軒載馳隣計顧道塗之甚邈惟涉履之斯勤俾宣恩言式
慰良苦

賜契丹國告哀人使茶藥口宣正月十九日

卿式將隣聘來告國哀屬春候之尚寒顧驛塗之攸邈俾頒品劑用
示眷懷

沿路賜契丹國告哀人使赴闕茶藥口宣正月十九日

勅蕭福延卿夙駕使轡遽傳國卹屬餘寒之在候想馳驛之為勞俾
頒欽劑之良用示眷懷之厚

景靈宮雅飾元天大聖后聖容并侍從等開啓預告道場青

詞正月二十日

伏以珍宇邃嚴奉真靈而有素玉容清穆謹修祓以惟時爰按仙科
俾伸虔告載瞻道蔭宜鑒沖誠

皇帝回契丹皇帝告哀書

二月日伯大宋皇帝致書于姪大契丹聖文神武睿孝皇帝闕下承
遣使車特貽緘翰不意凶變太皇太后上僣載惟契好久睦仁鄰聞

此訃音但增感愴姪皇帝負荷至重追慕所深冀節哀情用遵禮制已差人使專持慰禮今林牙懷德軍節度使蕭福延回奉書陳謝不宣白

雄州撫問契丹賀乾元節人使口宣二月二十四日

卿等夙持信聘來講隣歡及疆候以惟初屬暄和之方感宜加撫慰式示眷懷

賜給事中參知政事會公亮生日詔二月二十五日

卿蔚有時望參于柄臣惟倚注之所深在眷顧之尤異屬茲誕日宜爾壽期膺此寵頒體予至意

賜翰林學士兼侍讀學士尚書戶部郎中知制誥知審刑院胡宿詔三月二日

勅胡宿省所奏據大理寺日奏司申二月二十一日已前下寺公案並已斷奏了畢無見在事具悉朕欲斯民足衣食知禮讓而竊攘爭鬪之獄猶滋欲吾吏慎刑罰盡情爲而傳予輕重之文不一卿以儒學之職總評識之繁克勤其官曾不留事實副予意惟時可嘉若乃使天下囹圄空虛而風流篤厚是亦論思獻納者之志其勉助我以共臻焉仍依奏宣付史館故茲獎諭想宜知悉

賜判大理寺陳太素并權少卿楊開及審刑院詳議官大理寺詳斷官等勅書三月三日

勅陳太素省知審刑院胡宿奏據大理寺日奏司申二月二十一日已前下寺公案並已斷奏了畢無見在事刑獄之重一成而不遷比類之微可疑者甚衆汝好學而敏蒞官以勤夫俾天下之無冤幾刑錯而不用此朕翼異希慕之所未及而爾孜孜厥職之所不忘者也故茲獎諭想宜知悉

恩州賜契丹遺留使副茶藥口宣三月二十八日

卿等夙馳使傳來達信函載惟涉履之勤當此暄和之候宜加頒賚

式示眷懷

瀛州賜契丹賀乾元節人使却回御筵口宣四月七日

卿等既成聘好方即歸塗再惟將命之勞宜有犒勤之錫俾伸宴飫用示眷私

班荆館賜契丹賀乾元節人使却回酒果口宣四月七日

卿等使軫復命郊館餞行惟茲良潔之英薦以甘馨之實用伸恩錫當體眷懷

十六日就驛賜契丹賀乾元節人使內中酒果口宣四月十

七日

卿等夙奉信函方休賓館惟此醇甘之品用推寵賚之恩聊侑宴歡以伸優遇

賜知舒州齊廓進新茶并知廣德軍浦延熙進先春茶勅書勅齊廓省所進奉新茶一銀合合重五十兩緋羅夾複全事具悉百物茂生取新爲貴羣方修職効貢以時汝守土有方事上惟恪閱茲來獻用體勤誠故茲示諭想宜知悉

賜外任臣寮進奉乾元節銀絹馬勅書

勅高易簡省所進奉乾元節絹五百疋事具悉汝夙以敏材膺于東寄及此奉觴之節載陳任土之儀能因物以達誠見事君之甚恪省閱于再歎嘉不忘故茲示諭想宜知悉

班荆館賜契丹告哀人使內中酒果口宣

卿夙將隣訃方屆國門載惟衝涉之勤宜有宴休之錫俾伸頒賚用示眷優一作懷

開寶寺福勝院開啓道場於乾元節日支散袈裟并設大會齋一中齋文

伏以正陽旅月方及於嘉時萬壽齊天式標於令節啓真乘之祕藏集淨侶於法筵仰惟慈妙之仁茂委純履之祉永隆不算均福羣倫

東太一宮開啓保夏祝聖壽金錄道場密詞四月二十四日
伏以寂然妙道推善應以無方瞻彼高靈薦精誠而必達屆此長贏
之候是惟茂育之時爰稽玉笈之真文載潔雲壇之淨醮冀敷昭鑒
來集純禧固壽曆之延昌渙蒼黔而均祐

賜彰信軍節度使檢校太保同中書門下平章事判大名府
李昭亮乞知西京不允詔

勅昭亮省所上表乞移判河南府事具悉朕惟魏洛之重皆為別都
將率所居難於履易卿以中外勤勞之績有撫綏扞禦之材自膺寄
任之雄方厚倚毗之意遠茲列奏嘉乃好謙宜體眷懷靖安爾位所
乞宜不允故茲詔示想宜知悉夏熱卿比平安好遣書指不多及

賜宣徽南院使准康軍節度使張堯佐乞知西京不允詔五
月二日

勅堯佐省所奏臣皇祐二年內授宣徽南院使判河陽軍州事未滿
任蒙詔赴闕供職至今六載自量尸素深不遑寧近知西京闕人未
有除授伏望特賜差委事具悉宜導徽猷任親而事簡居留京邑地
要而務繁惟予眷遇之臣方處清閑之職載披來牘深識乃誠雖奮
其聰明尚足以臨蒞而待我者艾宜有以優游實嘉盡瘁之心難徇
撝謙之意所乞宜不允故茲詔示想宜知悉

賜宰臣文彥博上第一表乞解重任不允批答五月十八日
省表具之夫知其人之為賢任則勿貳事其君而有道去不可輕此
古之臣主之明舉措必慎所以收功於一時而垂法於後世也卿夙
有時望為予柄臣自復秉於國鈞僅三周於歲序若乃進退賢否誅
賞罪功每於聽納之間敢忘虛己顧彼搢紳之論曾靡異辭方期有
成以副予意而乃過形謙損思避台衡豈寡德弗明於用才而不盡
將多言害正致厥位之難安苟異於斯夫何引讓矧卿忠信之節足
以叶予之一心材謀之優可以斷予之大事茲所東注寧煩諭言所

請宜不允

就驛賜契丹遺留使副銀鈔羅唾盂孟子錦被褥口宣五月
十八日

卿等馳輶來止將命有儀顧茲館憩之初宜具燕私之用俾伸優錫
式示眷懷

通商茶法詔嘉祐四年二月四日

勅古者山澤之利與民共之故民足於下而君裕於上國家無事刑
罰以清自唐末流始有茶禁上下規利垂二百年如聞比來為患益
甚民被誅求之困日惟咨嗟官受濫惡之入歲以陳積私藏盜販犯
者實一作是繁嚴刑重誅情所不忍使田閭不安其業商賈不通于
行嗚呼若茲是於江湖之間幅員數千里為陷穽以害吾民也朕心
惻然念此久矣間遣使者往就問之而皆歡然願弛權法歲入之課
以時上官一二近臣件析其狀朕嘉覽于再猶若憐然又於歲輸裁
減其數使得饒阜以相為生刻去禁條俾通商賈歷世之弊一旦以
除著為經常弗復更制損上益下以休吾民尚慮喜於立異之人緣
而為姦之黨妄陳奏議以惑官司必實明刑用戒狂謬布告遐邇體
朕意焉

內制集卷第五

內制集卷第六 集八十七

恩州賜契丹皇太后賀乾元節大使茶藥詔嘉祐四年二月二十四日

卿風將信聘方止中塗惟茲藥錄之良加之一作于茗品之美特伸頒一作恩齎式示眷懷

恩州賜契丹皇太后賀乾元節副使茶藥詔同日

卿肅將聘幣來及壽觴載嘉道路之勤宜有頒宣之寵仍伸撫勞當體眷優

恩州賜契丹皇帝賀乾元節大使茶藥詔同日

卿將命寶隣講歡壽節屬此暄之和候載惟涉履之勤宜頒品劑之良式示眷懷之意

恩州賜契丹皇帝賀乾元節副使茶藥詔同日

卿風副聘軺來陳壽祝願川塗之攸逸屬氣節之方和俾頒飲餌之精式助宣調之理

端午帖子

皇帝閣六首

其一

天容清永晝風色秀含薰五日逢佳節千齡奉聖君

其二

綵索盤中結楊梅粽裏紅宮闈九重樂風俗萬方同

其三

寶典標靈日明離正午方五行當火德萬壽續天長

其四

歲時令節多休宴風俗靈辰重被禳肅穆皇居百神衛滌邪寧待浴

蘭湯

其五

香菽黏米著佳名古俗相傳豈足矜天子明堂遵月令含桃初薦黍新登

其六

聖主憂勤致治平仁風息澤被羣生自然四海歸文德何用靈符號辟兵

皇后閣五首

其一

繭館覆柔桑新絲引更長初為五色纓續壽獻君王

其二

槐綠陰初合榴繁豔欲然翠筒傳角黍嘉節慶年年

其三

煙含玉樹風生細日永宮花漏出遲深殿未嘗知暑氣水精簾拂砌琉璃

其四

玉壺水彩瑩寒光避暑宸遊樂未央采艾不須禳毒沴塗椒自己馥清香

其五

蘭若擢秀迎風紫樞欒繁開照日紅嘉節相望傳有舊深宮行樂自無窮

温成閣四首

其一

香黍筒為稷靈苗艾作人芳音邈已遠節物自常新

其二

珠箔涼颺入金壺晝刻長鸞臺塵不動銷盡故時香

其三

聞說仙家事杳微世傳真偽豈能知遙思海上三山樂寧記人間五

日時

其四

雲散風流歲月遷君恩曾不減當年非因掩面留遺愛自爲難忘竊
窺賢

夫人閣五首

其一

冰壺疑皓彩水殿漾輕漣繡繭誇新巧繁絲喜續年

其二

黃金仙杏粉赤玉海榴房共鬪今朝勝盈襜百草香

其三

光風細細飄香轉綠葉陰陰覆檻涼雲物鮮明時節麗水精宮殿侍

君王

其四

蓬萊仙闕彩雲中端日一作午欣逢歲歲同皎潔霜紈空詠扇深沉

玉宇自生風

其五

古今風俗記佳辰樂事深宮日日新巧女金盤絲五色皇家玉曆壽

千春

皇帝回契丹皇帝賀乾元節書

四月日伯大宋皇帝致書于姪大契丹聖文武睿孝皇帝闕下乾
陽正月紀茲載誕之辰隣聘修歡祝以千齡之祝書言既緝禮幣兼
豐感著之私敷陳罔罄今彰聖軍節度使蕭供等同專奉書陳謝不
宣白

皇帝回契丹皇帝達皇太后賀乾元節書

四月日伯大宋皇帝致書於姪大契丹聖文武睿孝皇帝闕下壽
節屆期隣歡悖契仍導柔慈之旨過申延祝之言兼厚物容用增刻

著顯希待次達此悰誠今左監門衛上將軍耶律保等回專奉書陳
謝不宣白

恩州賜契丹皇太后賀乾元節人使茶藥口宣

卿等夙奉信函及茲誕節載勤馳傳方止中塗宜有寵頒用伸撫慰

恩州賜契丹皇帝賀乾元節人使茶藥口宣

卿等甫臨誕日來講隣歡載惟將命之嚴宜有勞勤之錫俾伸寵賚

式示眷嘉

天齊仁聖帝廟開啓祈祥迎福催生金籙道場密詞三月二

十日

伏以高穹降慶方垂佑於邦家彌月告期用薦誠於科籙冀衆真之

昭鑒臻百順以儲休

廣聖宮開啓催生道場默表三月二十日

伏以帶轡迎祥慶棣祠之叶應潔壇修薦致精懇以冥祈俾因麟瑞

以通誠仰冀靈真之報福

內中福寧殿開啓天祺節道場青詞三月二十日

伏以候臨初燠節紀嘉名肅嚴秘殿之居降集清真之馭薦之馨苾

報以善祥豈惟敷佑於眇躬兼冀均休於庶品

內中福寧殿罷散天祺節道場青詞同日

伏以薰風應候瑞節紀時按琳簡之真文嚴紫庭之邃宇衆靈來格

冥感交通嘉乃羣生蒙茲百福載傾虔意鑒此明誠

後苑親稼殿開建鎮星祈福道場青詞二月二十日

伏以祠棣叶應彌月告祥肅依科籙以薦誠仰冀照臨之降鑒錫之

祉福佑以休一作條寧惟集慶於邦家永延鴻於基緒

萬壽觀開啓求嗣保安道場青詞

伏以廟社降祥宮庭叶慶載涓吉日交薦明誠期仰格於清真俾敷
延於祉福永昌基祚遐企靈休

景靈宮天興殿開啓催生保慶道場青詞

伏以誕彌叶慶蠲潔修誠嚴修殿於靈宮誦真文於藥蘭通此蕊芬
一作芳之薦被其蓄害之虞仰冀昭回不符鑿祐

護國顯應公廟開啓保安催生道場青詞

伏以正陽旅月載育開祥式因靈宇之嚴交薦精衷之潔仰冀衆真
之貺敷昭百順之休永祚皇圖實希道隆

賜新除行刑部尙書依前觀文殿大學士知陳州劉沆讓息

命不允詔四月五日

卿嚮以宰弼之崇屢形懇避居留之任因用均勞而休風藹然嘉問
時至方深眷倚遠閱奏封願惟陪輔之邦俾遂便安之請增之美秩
優我舊臣豈祇循於故常蓋以示夫褒寵膺受之際遠巡以辭雖言
匪飾文見於能讓而令行已出難矣復還其體余懷往祇新命

雄州白溝驛賜契丹賀乾元節人使卻回御筵兼撫問口宣

四月十三日

卿等聘函時達使傳言旋冒茲炎燠之辰涉此川塗之逸宜申宴錫
式示眷懷

賜中書門下戒僭奢詔五月四日

敕中書門下朕纘承不基撫有方夏謂教之不可以家至而行之每
務於身先惟是儉勤敢志勉勵期與羣庶臻于富康而人殆久安驕
於佚欲物豐太感耗以浮虛苟奉養以自私志僭奢之爲戾士民交
黷貴賤靡分惟其疆力之能無復等威之制考於著令雖有舊章顧
在攸司鮮聞用法民遂安於常習弊罔革以滋深紀綱既紊於度程
風俗以至於流蕩俾朕有欲治之意不能副余之誠心而民多自陷
之愚未免煩余之訓導夫令信由於責始下化先於上行眷予一二
之臣其率庶工而警職俾爾多方之衆勿踰常憲一作法以干刑庶
漸革於侈風以共趨於治路凡居室之制器用之度冠服之章妾媵

之數其令中外臣庶遵守前後條詔如有違犯仰御史臺及開封府
糾察聞奏其諸路州軍即委轉運使提點刑獄臣寮及逐處長吏施
行布告中外咸使聞知故茲詔示想宜知悉

西太一宮續催生道場密詞四月二十六日

伏以吉月迎祥靈謀叶應爰即清真之宇虔脩科式之儀冀被滌於
害災俾敷昭於福應載昌儲慶永佑基圖

東太一宮開啓保夏祝聖壽金籙道場密詞四月二十六日

伏以珍館邃嚴格真靈而來宅明誠蠲潔薦馨茲以交修導迎百順
之祥及此長贏之序伏願保圖綿固壽曆延長永敷佑於邦家溥均
休於品庶

爲將來裕享禮畢奏謝內中福寧殿并景靈宮等處諸神表

六月二十五日

伏以清廟有嚴仲冬正序乃先時祭躬講禮文賴真靈之集休俾容
典之咸舉仰膺佳貺彌勵丹衷

爲將來裕享禮畢奏謝諸寺院表同日

伏以宗廟之嚴祭祀惟重矧茲合食之義尤爲盛禮之文乃顧眇躬
克成大饗實繫貺祐用薦菲誠

內中爲將來裕享禮畢奏謝露香表同日

伏以月正仲冬禮成大饗所以序昭穆之位格祖宗之靈荷清穹之
降休俾盛典之獲舉敢伸昭謝冀達精衷

爲將來裕享禮畢奏謝諸寺院神御表同日

伏以茲者祗率孝心躬修合祭潔精誠而是薦蒙顧享之來臨惟慈
聖之降休俾眇冲之成禮敢志勵翼永荷基圖

爲將來裕享禮畢奏謝永安陵等處表同日

伏以恭承先烈獲守慶基式因冬物之有成載肅廟容而合食上繫
不脫克展孝思是惟感慕之誠益勵祗寅之志

為將來裕享禮畢奏謝泰山廟等處表同日

伏以茲者因歲物之冬成講祭容而時舉豆籩有序禮樂交修顧惟
眇躬克遵盛典實賴明靈之佑敢忘報貺之誠

賜步軍副都指揮使涇州觀察使秦鳳路副都部署王凱赴
闕茶藥口宣六月二十五日

卿祗膺召節方屆都畿載惟道路之勤屬此炎薰之候宜頒良劑式
示眷懷

賜步軍副都指揮使涇州觀察使秦鳳路副都部署王凱赴
闕生料口宣同日

卿出膺邊寄入恪觀容顧就館以云初方奉圭而來見宜頒鎮勞式
示眷懷

除宋庠制加恩進封

門下盡其志以饗親因而餒惠爵于朝而示衆所以褒功考祭典而
可稽著國章而有舊矧乃樞機之任惟余鼎鼐之臣飭事齊莊宣力
左右方此慶行之始宜推寵數之隆推忠協謀同德佐理功臣樞密
使開府儀同三司檢校太尉行兵部尚書同中書門下平章事兼羣
牧制置使上柱國廣平郡開國公食邑七千八百戶食實封二千九
百戶宋庠履行清純器識深茂夙有佳譽蔚為各臣文足以為國華
學足以謀王體入則登于三事備聲謨猷出則殿于大邦藹存風績
自還機務頗歷歲時秉一德以協恭出處不更其守展四體而盡瘁
夙夜匪懈其勞屬盛禮之有成廣推恩而自近按夫輿地特啓於新
封加以寵名蓋遵於故事惟是便蕃之錫式伸眷倚之懷於戲君子
者邦之基大臣者民之表搢紳之望所屬老成德業之隆豈煩多訓
服我休命往惟欽哉可特授依前檢校太尉行兵部尚書同中書門
下平章事兼羣牧制置使充樞密使特封首國公仍賜推忠協謀同
德守正佐理功臣散官勳食實封如故主者施行

除李昭亮制加恩

門下朕卜吉孟冬躬薦清廟祖考來格貺以百福之多慶賜遂行均
于四海之廣惟予將相之任是謂股肱之良宜擇剛辰誕揚休命忠
果守正佐運翊戴功臣彰信軍節度曹州管內觀察處置等使開府
儀同三司檢校太保同中書門下平章事特節曹州諸軍事行曹州
刺史上柱國隴西郡開國公食邑一萬一千五百戶食實封三千四
百戶李昭亮志尚純慤資識敏明世蒙舊德之餘早遵重熙之盛備
千器使奮厥材猷好學詩書知將率之為體兼推威信撫士卒以克
和入則有宿衛之勤出則著扞城之效寄之方面屢守於要藩班乃
政條頗一作頻聞於佳譽乃眷別都之重實司留鑰之嚴擁節秉鈞
並享崇高之貴治戎撫俗兼資鎮靜之材茲惟圖任之艱方屬倚毗
之意是用因霽恩之浹洽推異數之便蕃廣乃疏封增其真戶仍囑
美績褒以嘉名於戲秉德不回所以見始終之操好謙自守乃能居
寵祿之榮汝其欽哉膺此優渥可特授依前檢校太保同中書門下
平章事使持節曹州諸軍事行曹州刺史充彰信軍節度曹州管內
觀察處置等使加食邑七百戶食實封四百戶仍賜推誠保德守正
佐運翊戴功臣散官勳封如故主者施行

除梁適制特授特進加恩

門下王者嚴其宗廟饗必及其時盡其誠心祭則受其福朕躬執圭
瓚率諸臣工因百物之成冬格列聖而合食嘉與有位之衆均茲錫
祉之繁矧惟槐鼎之舊臣實繫國家之大體宜優新命以告外庭推
誠保德忠亮翊戴功臣定國軍節度同州管內觀察處置等使光祿
大夫檢校太傅使持節同州諸軍事同州刺史兼御史大夫上柱國
安定郡開國公食邑四千七百戶食實封一千五百戶梁適世賈之
華早躋仕路藝文自奮繼踐辭科進階顯榮亟被獎擢優游侍從之
列嘗奉於清閒出入中外之勤實勞於夙夜既贊樞府遂登宰司啓

沃之謀話言猶在進退之際禮遇兼隆自歷藩垣頗更歲月近惟大
鹵實宿勁兵俾分節制之權以爲方面之重撫茲雅俗藉爾敏材屬
熙事之有成均慶恩而方洽是用敘陟崇階之貴兼增食戶之多推
茲寵章蓋率舊典於戲執忠信之一節所以事君守富貴而不驕乃
能終吉是惟素學寧假訓辭往服茂恩當體予意可特授特進依前
檢校太傅使持節同州諸軍事行同州刺史兼御史大夫充定國軍
節度同州管内觀察處置等使加食邑七百戶功臣勳封食實封如
故主者施行

除許懷德制加恩

門下賞以懋功俾有能之知勸祭之爲澤思在位以咸均嘉威禮之
斯成務推恩而惟廣矧乃耆明之哲是爲心膂之臣宜示優隆式揚
誕告衛聖忠果雄勇珣戴功臣殿前都指揮使保寧軍節度婺州管
內觀察處置等使特進檢校尚書左僕射使持節婺州諸軍事行婺
州刺史兼御史大夫上柱國潁川郡開國公食邑五千戶食實封一
千二百戶許懷德勁勇之質蓋稟天姿忠厚之良自爲國器少有四
方之志出逢千載之辰蘊其材謀能自奮勵訓我士卒號令之信甚
明爲予爪牙介冑之色難犯爰採軍中之譽俾分闡一作闡外之權
遂膺施節之榮專董貔貅之旅宿衛宮禁周旋歲時宣力甚勤有知
無不爲之節盡瘁後已加老而益壯之心誠未耗於精明豈但矜於
矍鑠屬受釐之均慶方浹予以蒙休載推圖舊之懷式敘疇勞之典
益其封食錄乃功庸於戲享爵祿之崇高荷寵靈之優渥挺金石不
渝之操茲惟事上之誠知富貴克守之難用保有終之吉勉矣來効
往其欽哉可特授依前檢校尚書左僕射使持節婺州諸軍事行婺
州刺史兼御史大夫充殿前都指揮使保寧軍節度婺州管内觀察
處置等使加食邑七百戶食實封三百戶仍賜衛聖忠果雄勇宣力
珣戴功臣散官勳封如故主者施行

翼祖皇帝冊文

維嘉祐四年歲次己亥十月壬戌朔十二日癸酉孝會孫嗣皇帝臣
某敢昭告于高祖翼祖簡恭睿德皇帝伏以皇天眷命興德造邦始
基之功實自積累獲嗣不烈敢忘翼勵孟冬吉月歲事既成合祭以
時舉茲禮典惟是備物將以誠愨之心神其歆之錫以多福謹以一
元大武柔毛剛鬣柔威齋合鄉其嘉蔬嘉薦醴齊嚴恭備物式薦虔
心高祖妣簡恭皇后劉氏配尚饗

真宗皇帝冊文

維嘉祐四年歲次己亥十月壬戌朔十二日癸酉孝子嗣皇帝臣某
敢昭告于皇考真宗膺符稽古成功讓德文明武定章聖元孝皇帝
伏以古之以孝而饗親者氣節既至感其思心祠禴嘗烝禮以時舉
然猶未厭其志也則又大合祖宗而享焉願惟小子克守成業治民
事神動有不訓是用躬執圭鬯薦其芬芳一作饋又作慨然如聞
來格來貺謹以一元大武柔毛剛鬣柔威齋合鄉其嘉蔬嘉薦醴齊
嚴恭備物式薦虔心皇妣章穆皇后郭氏皇妣章獻明肅皇后劉氏
皇妣章懿皇后李氏配尚饗

淑德皇后冊文

維嘉祐四年歲次己亥十月壬戌朔十二日癸酉孝孫嗣皇帝臣某
敢昭告于皇祖妣淑德皇后尹氏伏以彤管有煇內德茂焉清廟載
嚴合食爲重十月惟吉備物有容威靈來臨昭穆序配薦以誠潔神
其顧思謹以一元大武柔毛剛鬣柔威齋合鄉其嘉蔬嘉薦醴齊嚴
恭備物式薦虔心尚饗

賜樞密使宋庠讓恩命第一表不允批荅

省表具之朕以因時致享克展於孝思已祭受釐大均於慶澤乃眷
耆明之哲實子體貌之臣肅臨事之有容既交神而蒙貺宜推異數
以示眷懷雖嘉好謙曷止成命所讓宜不允

賜樞密使宋庠讓恩命第二表不允斷來章批答

省表具之卿蘊純和端慤之誠富敏贍通明之學惟時舊德實我柄臣當祀事之有成廣慶恩而方洽疇其封爵錫以號名茲為寵章蓋舉常典無煩避讓其往欽承所讓宜不允仍斷來章

賜樞密使宋庠讓恩命第一表批答口宣

熙事既成方大均於祭澤寵章所異宜首及於樞臣當即往膺勿煩沖讓

賜樞密使宋庠并河陽三城節度使判河南府文彥博加恩告敕口宣

朕以饗親致孝餒惠均恩宜有寵章以褒舊德往欽新命當體眷懷閣門賜華原郡王允良感德軍節度使允初告敕口宣

賜皇弟奉寧軍節度使華原郡王允良讓恩命第一表不允批答

朕合食祖考以昭孝推恩宗族以展親所以厚人倫明教愛卿以近屬肅然在庭能盡志以修容不違禮而終事方慶典之均洽宜寵章之所先好謙之懷雖可嘉尚已出之命其往欽承

賜皇弟奉寧軍節度使華原郡王允良讓恩命第二表不允斷來章批答

卿擢秀宗英作屏王室從我祠事罄其齊明因餒惠之均恩示推仁而睦族避讓之節固已識於沖懷敦諭既勤宜往祗於成命

賜皇弟感德軍節度使允初讓恩命第一表不允批答

朕因時孟冬薦鬯清廟蒙祖考之來貺均慶賜以推行乃眷宗藩宜優寵數蓋克遵於舊典何過自於撝謙其欽訓言往服休命

賜皇弟感德軍節度使允初讓恩命第二表不允斷來章批答

朕親款太宮致饗列聖蒙神貺其百福思慶及於多方乃眷宗藩宜優異數惟是便蕃之錫式推敦睦之仁嘉乃沖懷形于懇避禮有常節無為過恭命之已行難或中止

賜皇弟華原郡王允良感德軍節度使允初讓恩命第一表不允批答口宣

卿以宗藩之近參闕祀之嚴受疇乃勞優以異數宜思祗受勿復固辭

賜皇弟華原郡王允良感德軍節度使允初讓恩命第二表不允斷來章批答口宣

卿以宗支之賢陪廟祀之重均茲慶典遽述讓誠命出已行理難中止所宜祗受以副予懷

內制集卷第六

內制集卷第七 集八十八

賜河陽三城節度使同中書門下平章事判河南府文彥博
加恩告勅詔

朕因孟冬之吉辰饗太宮而合食膺受神貺推行慶恩眷惟同德之
臣方處居留之任宜優異數少示眷懷既敷告於外庭其往祗於休
命

內中福寧殿開啓禘享預告道場青詞十月十九日

伏以宗廟之嚴禘祭為重乃卜孟冬之吉躬修合食之儀仰企上靈
冥孚陰佑俾克成於威禮冀永錫於純禧式展孝思用膺神貺

在外五嶽四瀆四海并諸神廟等處謝禘享禮畢祝文十月
十九日

屬者卜吉孟冬致饗清廟聖靈來格福祉沓臻荷神貺之不違俾縟
儀之克舉敢忘神報達此明誠

泗州塔下并峨嵋山開啓謝禘享禮畢道場齋文

茲者冬物告成因饗親而達孝神釐來貺既均慶之以時惟感一作
成禮之弗違荷巨慈之旁祐即靈場而申報冀冥鑒之孔昭薦此誠
明期於福應

太平興國寺開先殿開啓孝明皇后忌辰道場齋文十一月
一日

伏以柔明之範瞻厚德而已遐感慕之思託洪慈而申薦載嚴寶殿
恭啓具函惟淨福之是資冀靈游之永祐

太平興國寺開先殿開啓孝明皇后忌辰道場功德疏右語
右伏以真覺之慈應物溥示於能仁孝思之感以時式臨於諱日俾
延淨侶交奏梵功冀承勝利之因永獲冥深之祐

賜西南蕃蠻人張光現等勅書十一月三日

汝世守邊疆遠輸忠順時修職貢附達款誠載嘉勤恪之心宜不褒

優之錫

賜宰臣富弼乞退不允批答

省表具之夫知人之明可謂難矣而任賢之術茲豈易哉若乃聽之
不聽信之不篤施設之方未盡弗極其材遲速之効有時莫能少待
則被其任者實亦艱歟卿以純一忠亮之誠蘊宏深遠大之業朕虛
己以聽推心仰成至於一二之臣是惟同德下逮衆多之論會靡間
然方將甄敘賢愚修明法度務究本根而更治不求歲月之近功期
於有成茲乃予意奈何中道而將止夫亦奚託以為辭矧上下既交
寧有不通之志而君臣相遇豈為易得之時當體余懷勉安厥位所
乞宜不允

賜外任臣寮進奉助禘享銀絹等勅書

朕卜吉孟冬合食清廟禮樂交舉臣工畢從嘉守土之修官咸以時
而來助各以其物粲然在庭載省勤誠良深歎尚

賜觀文殿學士禮部尚書王舉正乞致仕不允詔十一月十
四日

夫朝廷之廣大賢備之衆多必有瞻然耆壽之臣以當上所優禮之
異或事思所訪則有老成俾時之式瞻以為人望故禮雖七十猶有
不得謝者焉卿懿文高行有君子之風清節令問為當世所重閱書
祕殿日侍清閑進讀經筵坐論道德固非有官司之責筋力之勞宜
思少安副我眷待

鎮潼軍華陰縣雲臺觀修整真宗皇帝御容等殿今已了當
扶請御容入本殿奉安祝文十一月十四日

屹爾各山斯為福地翼然寶構式奉威靈繕完既新考卜惟吉鑿茲
懇至永以妥安

鎮潼軍華陰縣雲臺觀修整聖祖及真宗御容等殿今已了
當乞請御容入本殿奉安青詞十一月十四日

伏以靈峰甚峻仙宇載嚴爰考吉辰奉寧真聖式伸祗告昭鑒乃誠

賜相州觀察使劉從廣進奉乾元節馬詔

卿蔚有敏材膺子寄任遠瞻壽節効乃誠勤在庭之獻肅陳事上之忠可見省閱之際嘉歎不忘

賜觀文殿大學士尚書戶部侍郎知定州龐籍乞退不允詔

勅龐籍省所劄子奏以年齒衰殘自去年七月後累奉表及劄子輪漚懇誠尋蒙差知定州亦曾面告祗乞一年許賜請老歸第伏望早賜差人承替得遂前懇事具悉夫難進易退雖士節之甚美而尚賢優老亦朝家之所先故禮稱引年而有不得謝卿以備德為特舊臣東於予衷任以方面材猷甚壯視聽方彊矧夫邊候無虞民事尤簡固可以偃息藩屏養頤精神而遠慕昔賢願還官政雖止足之意誠可尚於高懷而眷遇之深難遽從於來請所乞宜不允故茲詔示想宜知悉冬寒卿比平安好遣書指不多及

賜河陽三城節度使同中書門下平章事判河南府文彥博

辭加恩不允詔十一月十七日

勅彥博省所上表陳讓裕享禮畢加恩事具悉朕屬者潔齋精誠薦見宗廟蒙神之既受福孔多推慶賜以大行均中外而咸及矧我同德乃時舊臣惟體貌之隆宜加於異數而褒優之意未稱於予衷嘉讓節之甚勤顧成命之難止所讓宜不允故茲詔示想宜知悉冬寒卿比平安好遣書指不多及

賜樞密使檢校太尉同中書門下平章事宋庠讓恩命第二

表不允斷來章批答口宣

御陪祀疇勞啓封加命再形懇讓深識冲懷顧定志之弗移宜承命而毋忽

西太一宮開啓祝聖壽年交金籙道場青詞十一月二十三

日

伏以萬物堅成樂歲功之斯就四時迭運荷乾施之無窮爰即靈場載啓科式薦以芬芳之潔通於香默之神伏願威靈昭臨福穰集固穹隆之壽曆延齡永之皇圖下逮羣生咸均餘祐

萬壽觀寧華殿開啓温成皇后忌辰道場青詞十一月二十九日

伏以妙道無方推乎善應清真昭格通以明誠追內則之有儀藹餘芳而未遠式臨諱日俾按醮科爰即琳宮肅延羽士冀資冥福永助仙游

閣門賜許懷德張茂實告敕口宣

卿素稱忠勇備著勞能俾更旄節之榮仍董貔貅之旅往膺寵命其體眷懷

賜觀文殿學士禮部尚書王舉正乞致仕不允詔十一月二十九日

卿精深之學足以待問清懿之望足以鎮浮嚮從守藩念遠賢之在外來侍經席冀開予於未聞惟道德之所資非耆舊而誰處雖引年之制禮固有常而愛老之心予寧敢怠所宜勉近醫藥輔安精神期臻壽康以副虛佇所乞宜不允

賜馬步軍副都指揮使張茂實赴闕生料口宣十二月六日

卿遠趨召節方屆都城惟茲鎮品之豐式舉彝章之舊往祗寵錫式體眷懷

班荆館賜契丹賀正旦人使到闕御筵口宣十二月九日

卿等歲元茲始隣好時修載馳使傳之勞方次都門之近宜伸頌錫式示眷懷

正月五日賜賀正旦人使內中酒果口宣

卿等夙將信聘來結隣歡方伸宴飲一作飲之豐式示眷懷之意芳醪嘉實宜厚寵頒

賜侍衛親軍馬軍副都指揮使張茂實讓恩命不允詔十二月十五日

卿尉有材武稱於周行早罄忠力膺予委任自分齊鉞屢易名邦俾更節制之權入總禁嚴之旅扞城宿衛皆汝職焉載閱來章雖嘉讓節趨祗成命宜體眷懷所讓宜不允

內中福寧殿開啓天慶節道場青詞

伏以新陽叶律肇正於歲端嘉節紀時蓋遵於國典載嚴祕殿遐企上真薦茲蠲潔之誠杳達清冥之應冀承靈貺永祐皇圖

內中福寧殿罷散天慶節道場青詞

伏以元符肇貺先聖是膺紀爲令節之名著乃仙科之式用嚴禁密恭薦茲芬冀真馭之昭臨貺嘉祥而茂集基圖永固動植均休

賜新除建雄軍節度使依舊殿前都指揮使許懷德讓恩命第二表不允斷來章批答十二月五日

省表具之卿拔從行伍之微董我師徒之衆嘉爾勞舊優之寵榮乃思功效之未彰能形避讓之冲懇已行之命其往欽承事上之忠無或怠忽所讓宜不允仍斷來章

內中御侍已下賀皇帝年節詞語

妾等言伏以堯官謹曆萬物惟新夏數得天四時以正恭惟尊號皇帝陛下睿明稟哲慈儉保邦正朔頒行極舟車之所至仁恩一作慈溥及順天地以發生妾等忝備掖庭獲瞻黼座順三微之首月祝萬壽於無疆

賜夏國主進奉賀正日馬馳詔

王正首歲玉曆頒春眷惟繼世之忠克効守藩之職勤修時貢來旅明庭言念傾輸良深歎獎

皇帝回契丹皇帝賀正日書

正月日伯大宋皇帝致書于姪大契丹聖文神武睿孝皇帝闕下歲

端更始順陽律以布和信聘時修講隣歡而增固閱書言之勤好如篋幣之腆豐感載所深述宣罔既今懷化軍節度使耶律淑等回專奉書陳謝不宣白

皇帝回契丹皇帝達皇太后賀正日書

正月日伯大宋皇帝致書于姪大契丹聖文神武睿孝皇帝闕下玉曆頒時寶隣交聘兼馳使册別枉信函載傳慈懿之言益固講修之好願希侍次達此悰誠今歸德軍節度使耶律思寧等同專奉書陳謝不宣白

賜起居舍人知制誥劉敞等獎諭詔十二月九日

勅劉敞省所進裕享詩事具悉裕大祭也禮久闕焉朕因時孟冬躬薦圭鬯永惟祖考之烈格于天地禮樂之盛昭乎一作于物容宜有儒學之臣形爲頌歎之美卿議論宏博辭章爛然敷訓告以代予言是惟其職發掄揚而稱上德聊見餘才省閱已還嘉尚良切故茲獎諭想宜知悉

賜刑部郎中充天章閣待制錢象先等獎諭詔十二月九日

勅象先省所進裕享詩事具悉裕大祭也禮久闕焉朕因時孟冬躬薦圭鬯永惟祖考之烈格于天地禮樂之盛昭乎一作于物容宜有儒學之臣形爲頌歎之美覽奏篇之來上慶熙事之有成文采可觀歎嘉于再故茲獎諭想宜知悉

賜屯田員外郎國子監直講梅堯臣獎諭勅書十二月九日

勅梅堯臣省所進裕享詩事具悉汝行懿而粹學優而純以詩自名爲衆所服况乃詠祖宗之功德述禮樂之聲容宜被朱絃以薦清廟載披來獻探用歎嘉故茲獎諭想宜知悉

賜西京作坊使知麟州王慶民獎諭勅書十二月十七日

勅王慶民省所奏準密院劄子節文以臣撰成麟府二州緝圖一面并序目二冊請闕上進事具悉古之用兵者必因地形制方略然後

可以策勝敗之算運奇正之謀爾以材武之資有明敏之識自膺東
寄出守邊封而能周知山川險易之形歷覽亭障屯防之要列爲凡
目察爾一作可條陳不惟指掌於披圖足以因時而制變遽茲來上
深體乃忠省閱以還數嘉曷已故茲發諭想宜知悉

集英殿告遷宣祖皇帝昭憲皇后御容赴奉先禪院慶基殿
奉安祝文

伏以祖烈昭宣威神緬邈顧祠庭之夙敵崇寶構以載新冀卽妥安
永伸一作申嚴奉

奉先禪院法堂上告遷宣祖皇帝昭憲皇后御容赴內中奉
安祝文

伏以早嚴寶殿以仲神游今奉威靈卽安清禁仰惟鑿格歆此精衷
景靈宮奉真殿開啓真宗皇帝忌辰道場看佛經都功德疏

語
伏以威神在天奉真遊而時格覺慈宣化敷慧福以無窮追諱日之
甫臨演秘言而申薦永繫仁佑式慰孝衷

景靈宮奉真殿真宗皇帝忌辰道場看道經都功德疏語
伏以琳宮嚴敞奉真馭以來臨寶笈飛華演靈篇而甚祕式屆遏音
之日載深濡露之懷遐薦福因永資道隆

景靈宮廣孝殿章懿皇后忌辰道場看佛經都功德疏語
伏以諱日斯臨孝心增感永慕至慈之德載瞻大覺之雄旣集善因
遐資福果

景靈宮廣孝殿章懿皇后忌辰道場看道經都功德疏語
伏以春露既濡孝思罔極卽仙庭之祕邃誦金簡之精微仰冀清真

永資遐福
賜新除建雄軍節度使殿前都指揮使許懷德讓恩命第一
表不允批答口宣

賜新除建雄軍節度使殿前都指揮使許懷德讓恩命第一
表不允批答口宣

賜新除建雄軍節度使殿前都指揮使許懷德讓恩命第一
表不允批答口宣

御以宿衛之勤勞能備著俾移使節式示眷懷宜體優恩勿持堅讓
賜新除建雄軍節度使殿前都指揮使許懷德讓恩命第二
表不允斷來章批答口宣

賜觀文殿學士尙書右丞田況乞致仕不允批答嘉祐五年
正月八日

省表具之卿德量足以容衆材識足以濟時蔚然君子之風綽有大
臣之體自嬰疾恙求解樞機朕心惻然深以爲惜乃惟書殿之清職
自非耆哲而弗居俾從優游以便頤養所期福善之理當蒙勿藥之
休還來輔予以盡賢業遽形引謝良異眷懷所乞宜不允

皇第九女封福安公主制正月二十四日

門下朕稽有國之彝章著皇女之稱謂取其主以同姓所以見王體
之尊必也錫之美名所以彰禮命之寵載涓吉日敷告在庭皇第九
女岐嶷之姿有生知之異稟柔順之質得天性之自然方嚴保傅之
規以養肅雍之德俾遵舊典褒以徽章嘉乃妙齡感哉儀服考僉言
而惟允非子意之敢私於戲隆仁恩以厚親茲惟教愛習圖史而循
法繫乃夙成祗若訓言往膺渙渥一作命可封福安公主仍令所司
擇日備禮冊命主者施行

皇第十女封慶壽公主制同日

門下詩紀王姬之威車服之制甚嚴漢優帝女之儀湯沐之封並列
蓋敦國體匪曰親私惟始被於寵章常推擇於嘉號載稽成憲誕告
外庭皇第十女寶婺分暉仙源襲慶天姿異稟溫而有儀姆教不煩
生而知善方居妙歲尉有令猷朕仰承燕翼之謀茲膺一作膺茲蕃
衍之祉俾新禮命式示褒榮於戲寵秩旣崇在乎有德名稱甚美享
乃多休祗服茂恩勿志明訓可封慶壽公主仍令所司擇日備禮冊
命主者施行

命主者施行

命主者施行

命主者施行

命主者施行

命主者施行

命主者施行

內中御侍已下賀皇帝乾元節詞語正月二十六日
妾等言正陽旅月式符誕聖之期令節稱觴共獻無疆之壽伏惟尊
號皇帝陛下法堯聰睿躬禹儉勤厚德浸於黎元至仁同於覆載舟
車所及聲教咸均罄茲率土之濱共効南山之祝妾等欣逢嘉會獲
侍嚴宸敢望清光恭陳善頌無任歌時樂聖歡呼激切之至

內制集卷第七

內制集卷第八 集八十九

乾元節謝內中露香表嘉祐五年正月二十六日

伏以清穹眷佑皇緒丕隆方陽月之正時屬誕辰而著節仰瞻霄極
薦此芬馨冀膺敷錫之祥永保延鴻之慶

乾元節謝內中真宗皇帝表同日

伏以佳名著節載誕紀辰永惟涼眇之躬獲荷顯休之業動遵聖訓
期保慶基怵惕之懷孝思罔極

乾元節謝內中章獻明肅皇太后章懿皇太后章惠皇太后

表同日

伏以天陽正候壽節紀時深惟載育之恩緬慕至慈之德敢忘翼勵
期保延鴻

賜樞密副使右諫議大夫張昇乞解罷第一表不允批荅正

月二十九日

省表具之朕惟一二左右之臣出納樞機之命必有同德為時老成
御質厚器闕材優識敏風力甚勁晚而不衰議論有稽言而必中朕
所體貌民之具瞻豈宜退猗謙沖自厭繁務盡瘁事國矧惟素懷推
心仰成當體予意所乞宜不允

除文彥博易鎮判大名府制二月十五日

門下朕惟將相之崇資是為文武之極選隆其名器所以重朝廷列
于蕃宣所以屏王室矧乃居留之任必屬老成之人爰擇剛辰敷告
有位具官文彥博器闕而厚識粹而明學得其方通古今而知要才
周於物適大小以惟宜自奮發於聲猷早更揚於中外居則參裨乎
國論出則宣暢乎皇威兩踐台司首當柄用賢愚式序舉百職以咸
修綱紀甚明贊萬機而至悉自一無此字懇避鈞衡之任出司管鑰
之嚴逮此逾時蔚然休問眷言邦哲實簡予衷是用更其擁節之榮
委以別京之重勁兵所宿實資總制之權雅俗惟淳兼賴撫綏之政

於戲與國同體是謂股肱之良惟民具瞻方隆師尹之望顧我舊德
豈煩訓辭往其欽哉祗服休命可特授依前檢校太師同中書門下
平章事懿國公行陝州大都督府長史充保平軍節度使判大名府
兼北京留守司事充大名府路安撫使加食邑七百戶食實封五百
戶功臣散官勳封如故仍放謝辭發赴本任主者施行

除李昭亮檢校太保判定州制二月十五日

門下嚴師律以宣威是為將率之事謀王體而坐論必屬廊廟之臣
惟二柄之是兼蓋一時之首選顧於寄任宜副倚毗爰告外庭式揚
休命具官李昭亮資質純厚器識通明世有勳庸蔚為舊德家傳韜
略濟以美材爰自壯齡早膺獎擢訓齊士伍號令信於恩威宿衛朝
廷勤勞著於夙夜屢被蕃宣之寄實資鎮撫之才惟留鑰之別都乃
旄之寵增其帝傳之崇於戲宣國威靈用綏寧於邊鄙求民疾苦以
班布於教條俾無北顧之憂惟我老成之倚往踐厥位時惟欽哉可
特授檢校太傅依前同中書門下平章事行兗州大都督府長史充
泰寧軍節度使充定州路都部署兼安撫使判定州加食邑七百戶
食實封三百戶功臣散官勳封如故仍放謝辭發赴本任主者施行

除李端懿寧遠軍節度使知澶州制同日

門下至治之時常不忘於武備用兵之要在先擇於將臣禮樂詩書
必資於學智信嚴勇又兼以仁是惟難才豈不慎選用諒一作擇剛
日敷告外庭具官李端懿器質宏深資識敏茂地聯近戚無富貴之
驕世濟美材躬儒素之行粵從壯歲綽有令名學問足以與謀忠信
可以事上而能克勵名節靡皇宴安每思報國以有為嘗請治民而
自効北州之政稱最東土之人甚思惟留務之是居願歷時而頗久
俾加褒進爰考僉同是用寵以節旄委之蕃翰於戲為政而先無擾
所以靖民除戎以戒不虞是宜有素繫乃通明之略副予東任之懷

往惟欽哉膺此休渥可特授依前檢校刑部尚書充寧遠軍節度使知澶州加食邑七百戶食實封二百戶散官勳封如故主者施行

賜禮部侍郎參知政事會公亮乞罷不允詔二月十八日

卿以敏識精學參贊萬務備德茂行表儀百僚而思慮之勞偶嬰疾恙藥石之効聞比康平嘉謀話言日以虛佇封章屢上引避甚堅豈未體於眷懷而每煩於開諭宜專輔養以副倚毗所乞宜不允

賜新除寧遠軍節度使李端懿讓恩命第一表不允斷來章

批答口宣同日

卿聯國懿戚惟時美材久居留使之權俾委將旄之任載嘉冲挹思避寵榮宜體眷懷無煩牢讓

閣門賜新除寧遠軍節度使知澶州李端懿告勅口宣同日

卿世胄聯華資材甚茂早膺器使頗著聲猷俾進總於中權式增榮於戚里所宜祗服以體眷懷

賜新除工部尚書知秦州張方平陳讓不允詔三月十六日

卿識茂器閎智優學博施於有用謂靡不宜乃眷西陲最為重地惟撫綏備禦之任必通明敏給之才予難其人於爾為得委遇之意則惟其勤避讓之誠夫何于再勉祗其往當體朕懷

賜樞密副使尚書禮部侍郎程戡乞退休第二表不允批答

三月十六日

省表具之朕惟朝廷之禮廣大材賢一作賢材之士衆多必有耆哲之臣以為時望之重卿早被獎擢藹然聲猷參聯鈞輔之崇協贊樞機之要履躬之懿久見於純誠事上之忠志期於盡瘁顧方深於毗賴而懇避於寵榮封章繼來敦諭亦至引年以禮雖嘉止足之賢優老虛懷未忘眷遇之意往安厥位宜體予衷所乞宜不允

大相國寺大殿上開啓為民祈福道場齋文五月三日

伏以南薰被物方茲長育之明西覺稱雄允賴慈仁之濟俾延淨侶

虔啓法筵冀迎百善之祥普洽萬生之衆

賜宰臣富弼第二表乞退不允批答五月十五日

省表具之卿事君一心憂國百慮簡拔寒俊而多得遺才慎重賞刑而惟恐過舉蔚然德業方厚倚毗而綱憲之司異同輿論或事非大體或言涉難明因其摭摭於至微益見始終之無過雖開廣言路務在兼容而進退大臣豈當緣此所宜篤卿自信之志成朕不感之明渙然無疑來復厥位所乞宜不允

賜宰臣富弼乞退第四表不允斷來章手詔

省四上表乞解機務事具悉朕力排讒構之言兼採搢紳之望委卿以重任待之以不疑惟致治之至難方同心而共濟勉以無怠庶幾有成而執法之臣以言為職議既不一理難必從遂其好勝之私因於積忿而發事緣藹昧語涉中傷遽罷憲司以釋羣惑雖朕之不明不敏既能為卿而辨之而卿亦何嫌何疑遂將去朕而不顧避辭已確敦諭亦勤其體予懷復安爾位使天下曉然知朕任賢而勿貳也所乞宜不允仍斷來章付富弼

賜樞密副使張昇生日詔一作口宣五月十九日

卿以業履之清優任樞機之密勿余所禮遇時之具瞻爰屆誕辰俾加慶賜

賜荆湖北路救濟飢民知州樊諭勅書五月二十七日

夫修人事所以禦天災安吾民豈不在良吏爾學優從政職任治人因凶歲之疫飢體詔書之隱惻既免懼於殍殮仍不天於札瘥再惟敏事之材深得卹荒之禮第課來上予心所嘉宜有褒章以旌善績

賜河陽三城節度使同中書門下平章事文彥博進奉謝詩

享加恩詔六月十七日

詩云君子邦之基記曰夫臣民之表予所寵異禮宜優隆乃因祭福之均恩首效駿良而來獻載惟誠恪深用歎嘉

賜定國軍節度使知并州梁適進奉謝恩馬詔六月十七日
大鹵之雄中權爲重時有舊老東于子吏寵之旄鉞之榮委以蕃宣
之寄效駿良而來獻將誠慤之甚勤省覽已還數嘉曷已

賜觀文殿大學士知定州龐籍進奉謝恩馬詔六月十七日
書殿之職號爲清優舊德之臣所宜寵異乃求駿足以副勤誠會非
貴物之心實體事君之節省閱于再歎獎不忘

賜虔州觀察使定州路副都部署劉渙進奉謝恩馬詔同日
國家慎選材武委之事權優其寵榮所以責効厚其頒予所以養廉
乃因物以達誠見事上之惟恪省閱于再歎嘉不忘

賜定國軍節度使梁適進奉謝恩馬詔
卿惟時舊德爲國將臣推恩典以旣優俾家庭之增寵乃輸良貢以
効誠勤省閱以還數嘉彌切

賜外任臣寮進奉賀裕享禮畢勅書六月十七日
朕以孟冬卜吉大祭仲庚惟熙事之旣成實庶邦之共慶載披來貢
深見輸忠省閱以還數嘉良切

賜翰林學士尙書兵部員外郎知制誥吳奎乞知青州不允
詔七月二十一日
卿強學博覽足以通古今嘉謀讜言足以承顧問朝夕獻納余有望
焉矧方委之劇煩嬰以事任懋乃賢業宜有施於朝廷奮乎壯猷豈
暇便於鄉里其安爾職深體眷懷

賜新除宣徽南院使檢校太保鄜延路馬步軍都部署經略
安撫使判延州程戡讓恩命第一表不允斷來章批答八月
八日

省表具之迺者卿數上封章懇辭樞要兼引年而爲請思還政以自
頤眷惟者舊之英誠久劇繁之任俾增書殿之職仍參講席之聯是
曰清優豈忘顧遇而進見之際聰明未衰迺遷使領之華任重邊陲

之寄子意所屬僉言允諧雖冲尚之可嘉惟成命之難止所讓宜不
允仍斷來章

賜知建昌軍楊儀進奉銀珠稻米勅書八月十六日
勸力農而務本惟汝之官登嘉穀以告豐乃時之瑞粲然良實來効
貢囊載惟修職之勤式緩憂民之意省閱于再歎尚不忘

賜右諫議大夫知梓州呂居簡進奉乾元節無量壽佛一幢
勅書同日
壽觴紀節罄率土以均歡妙像有儀獻無疆之善祝嘉乃愛君之意
見於事上之恭省閱以還數嘉良切

賜新除翰林學士依前禮部郎中知制誥權知開封府蔡襄
上表乞依舊知泉州不允詔八月十五日
卿學通古今足以備獻納政適寬猛足以臨劇煩而得材之難顧常
勞於選任矧居外茲久寧自逸於便安是宜勉旃來服新命綽有餘
力夫何微疾之辭居然寵名固爲榮養之樂其毋必讓當體至懷

賜屯田員外郎王公衮獎諭勅書
嚮者長人之官備盜不謹害我命吏驚茲遠民汝於斯時能奮厥効
督捕甚急饋餉有方致茲兇徒卒就擒戮第功來上覆實不虛載嘉
勤勞深用褒歎

東太一宮立冬祝文九月二十四日
四時適序萬物堅藏嘉歲事之有成繫神休之是賴承茲靈貺報以
吉獨惟冀享誠益數多祐

延福宮性智殿開啓皇后生辰道場齋文同日
伏以坤德流徽式臨於誕日貝文宣妙恭仰於巨慈載嚴秘邃之庭
駢集清修之侶冀資壽福時啓靈場伏願毫相分光法雲假蔭憑茲
勝利永保遐齡

延福宮性智殿開啓皇后生辰道場密詞九月二十六日

伏以寒律正時適臨於夏月會沙誕慶爰紀於嘉辰夙清秘殿之嚴並集祗園之侶冀因勝利延錫禧一作休祥永輔坤儀益隆壽祝

故贈濮王允讓十月九日拆攢祭文同日

日月惟吉山川既佳啓茲攢塗往卽襄事願歆薄奠宜體哀悼

故贈濮王允讓十月十八日起靈祭文同日

儀物既備川塗甚夷往卽佳城下茲吉日靈其顧享副此哀懷

故贈濮王允讓十月二十日下事祭文同日

惟靈稟德甚茂享年不遐余心所哀卹與斯備往卽安宅享茲克誠

撫問護壆使向傳式詔同日

壆之爲禮古所重焉方將事以在塗顧勞心於祗役眷賴之意不忘

于懷

撫問西京并汝州路附壆隨護宗懿已下勅書同日

日月惟吉川塗匪遐顧襄事之有期嘉送終之盡禮勞動備至眷矚

良深

撫問尙宮沈氏勅書同日

輻旌就道霜露戒時載惟將護之勞無怠祗勤之意

撫問西京并汝州路管勾修墳并沿路巡檢道路及管勾一行靈舉程頓排辦等朝臣使臣內臣等勅書

卜吉趨時送終備物顧風霜之方厲念事役之爲勞

賜宰臣富弼上第一表乞解罷機務不允批答

省表具之夫宰相之事非可以歲月考而一二數也其在朝廷選賢

任能而各得其職下俾民俗遷善遠罪而不知其然至於法度修紀

綱正然後相與慎守而安行之以臻于治此朕所以虛心一意日有

望於卿者也今事有緒而卿辭焉豈朕德之不明將顧時之不可中

道而止夫何謂哉傳子獲用材不盡之譏而卿涉苟安自便之計子

所不取卿其勉焉所乞宜不允

賜宰臣富弼上第三表乞解罷機務不允斷來章批答

省表具之卿博通古今之學深達治亂之原德業之隆名稱甚盛朕方虛己而任不愧知人之明而自秉鈞衡宣勞夙夜惟是小小之政損益施設惟卿之爲罰罪賞功進退能否惟卿之聽時有異論豈無多言一切屏之惟卿之信若乃恭己南面庶幾輔子享其成功登于至治亦惟卿之圖其三者人君之所難予罔敢忽其一者在卿之不止庶克有成而無名屢辭實所難論卿其體茲至意究乃素懷所乞宜不允仍斷來章

內制集卷第八

表奏書啓四六集卷第一 集九十

諫院謝賜章服表同王素 慶曆三年九月

臣某等今日準閣門告報奉聖旨來日改賜章服者臣等尋以列狀具言供職以來未有能効不敢即受乞賜停寢明日朝于垂拱退立廉下俟命不報方共彷徨未知進退而閣門吏已迫臣等入對及見于延和有司贊使俯伏受命臣等不勝惶恐趨出以辭伏蒙遣中使宣諭云出自宸衷並不因臣僚薦舉不得辭讓臣等知君命甚寵不可必讓因退而拜受俯伏之際竦動羣臣伏惟陛下聖德仁慈優容臣下凡有上殿者多因事陳述自乞章服故陛下不因臣等奏事之時特召賜見又宣明命告以出自宸衷蓋不欲使臣等雷同倣倖之流而爲外人譏議乃知陛下愛惜臣等至於如此臣等愛君憂國之勤自宜如何伏惟天地之恩無物可稱欲伸報謝惟有至誠今陛下以一章服賜臣等尚不欲令外人所非伏況陛下上承社稷之重下制元元休戚之命舉動得失所繫者大則臣等固當事無大小一規正致陛下纖過小失不見於外然後可以稱臣等報君之心如陛下所以愛惜臣等之意臣等無任

辭召試知制誥劄子慶曆三年十二月

臣今早準中書傳指揮令臣到聚廳處尋問得有聖旨令臣就試伏念臣自忝諫垣言事無狀日月未久恩渥已頻凡朝廷任用非人僥倖于進在於臣職皆所當言豈有自爲僥倖以言榮寵其召試指揮伏乞特賜追寢取進止

辭召試知制誥狀同前

臣今日準中書召臣聞有聖語令臣就試已會略具劄子辭免退而循省未止憂驚伏念臣本乏才能豈堪任用誤蒙聖獎擢在諫垣竊自思維無以論報但竭愚慮知無不爲凡姦邪在朝僥倖求進多以激訐沽名未察臣心紛然議謂臣亦自省忠國之節特惟陛下知之

而可畏之言何由悉辨但誓不敢干進庶幾久乃自明今若驟覓寵榮越次升用則是譏議者謂臣向之所爲果是沽激本非爲國而去惡但務傾人而進身不惟使今後朝廷擢用忠言之臣不以自明而取信兼恐小人見言者得進既速則各務奔趨一長其風遂成踰弊蓋上干於國體非止徇於臣私況臣供職未久言効無聞方今百度未修四夷多事言者正當以失職坐黜豈可以亡狀遽遷其召試之命必望特賜追寢緣臣早來爲中書催召倉卒之際論述未詳謹再具狀奏聞

辭直除知制誥狀同前

今月六日準中書召臣試尋會具劄子并奏狀辭免今日忽聞已有聖旨更不召試直除知制誥者伏以聖恩優異至寵至榮臣所以敢茲懇請者蓋以上繫朝廷任人之體非專臣子飾讓之私唯冀聖明察臣悃悃竊以朝廷進用臣下患忠邪不分欲辨忠邪須覈情僞今一言事之臣得速進則小人好進紛然爭以口舌爲事至其甚繁理難抑絕則後來有謙言之士必雷同以干進見疑使君子小人情僞何別故臣以謂任人之體惟言事者不可以速冒寵榮臣累得對便殿奏事之際常陳此說伏況臣供職已來日月未久幸值陛下切於求理優容直言然而夷狄未賓盜賊未息官吏未汰黎民未蘇以事考言其効安在而數月之內恩典頻仍當黜而升宜罰而賞繫於國體則如前所陳揣於臣私則自知若此且夫設官賦祿本以勸善擢臣一人好進者得以奔趨無勞者皆容忝冒所損已多伏望聖慈憫臣愚訥直降恩命特賜寢停

辭免第二狀同前

昨以準中書劄子爲臣累辭恩命奉聖旨不得辭讓者伏以臣之事君有誠無飾若理必當受則豈敢虛辭上煩聖聰自陷矯詐蓋臣所陳述者上繫朝廷事體非獨專徇臣私如臣之愚本以言事者速進

則僞言者誘以爭趨今若辭讓而不獲則僞讓者終於得進損之又損不如不辭臣猥以非材已在言責若陛下欲擢臣以責効則今所居之職自足展効但患無能若以寵典爲賞勞又無可賞伏況此來恩命特出聖心臣子至榮人所願得苟非深思熟慮理須避讓豈敢固自稽遲以干典憲伏望聖慈察臣至誠至懇所除誥勅早賜追還

舉呂溱自代狀同前

淮先降勅節文應兩省臺官尙書六品已上諸司四品已上授官訖具表讓一人自代於閣門投下方得入謝者

右臣伏見著作郎直集賢院知蘇州呂溱首登辭科素有文學不肯碌碌以希例進請補外郡躬勤政事今蘇州治狀爲兩浙第一臣嘗與溱同在館閣聞其論議服其度量材美甚衆非臣所如擢以代臣庶允公議謹具狀奏舉以聞

謝知制誥表同前

臣某言伏奉制命蒙恩特授臣右正言知制誥者伏以王者尊居萬民之上而誠意能與下通奄有四海之大而惠澤得以徧及者得非號令告詔發揮而已哉然其爲言也質而不文則不足以行遠而昭聖謨一作謀麗而不典則不足以示後而爲世法居是職者古難其人乃以愚臣而當此選臣某中謝伏惟尊號皇帝陛下茂仁聖之姿荷祖宗之業日慎一日曾未少懈而自羌夷負固邊鄙用師勤儉率先於聖躬焦勞常見於玉色雖有憂民之志而億姓未蘇雖有欲治之心而羣臣未副故每進一善則未嘗不欲勸天下之能每官一賢則未始不欲盡人材之用雖以爵祿而砥礪尙須訓誡之丁寧尤假能言以諭至意可稱是者不又一作大艱歟伏念臣雖以儒術進身本無辭藝可取徒值嚮者時文之弊偶能獨守好古之勤志欲去於雕華文反成於樸鄙本懼不適當世之用敢期自結聖主之知陛下獎之特深用之太過此臣所以懇讓三四至於辭窮而天意不回寵

命難止尙慮頑然之未諭更加使者以臨門恩出非常理難屢瀆及俯而受命伏讀訓辭則有必能復古之言然後益知所責之重夙夜惶惑未知所措伏况文字之職廁于侍從之班在於周行是爲超擢不徒揮翰以爲効自當死節以報恩惟所使之期於盡瘁

龍圖閣直學士河北都轉運使謝上表 慶曆四年八月

謝獎諭編次三朝故事表慶曆四年九月

臣修言今月二十八日進奏院遞到詔書一道以臣前奉詔編次三朝故事成上進訖特賜獎諭者聖后當天孝循先志嘉與左右奉爲大法成編上聞懼不稱旨蒙詔溫諭以榮以悖臣某中謝臣聞藝祖造邦翕受駿命文綏武服震響萬方十七年間大業以定神宗享御睿謀獨斷照茲以察用賢以誠政清法明夷夏安樂章聖紹衣上下錯國既安玉帛走於庭屣革糞於庫刑賞有典禮樂有經草木人靈鸞戀歡喜恭惟皇帝陛下以甚盛之德位久大之業日旰坐朝昧爽思道置器安處納民大中尙惟一祖二宗之遠讓有百世無疆之丕訓君臣所以固附天人所以調諧法令所以必行邦國所以從又天垂日皎布在方冊爰詔近侍採摭要實祕在大府用裨聖政蓋守成念夫至艱孝者先乎善繼睿心遠紹振古與偕臣親被上音適終論次慮失煩簡隕越待罪聖度兼貸錫以褒言誓捐微軀仰荷鴻覆瞻望宸展無任激切

謝賜慶曆五年曆日表

伏以聖人在上天地節陰陽和一日十二辰五星二十八舍皆安次而行四時八風六律二十四氣各應時而至臣愚幸同萬物俱被長育而得與草木自別使知寒暑之期臣某中謝伏惟尊號皇帝陛下聰明睿智天縱多能向因萬機之餘親考上元之曆以授百職以同萬方而臣官任轉輸兼司按察若乃加正朔於四海頒政教於明堂陛下摠其要而舉其大端至於經時節勸農桑候豐凶勸畜積順時

令察姦非則臣敢不守其職而行其小者庶無失業以答洪恩

滁州謝上表慶曆五年十月

臣某言臣伏蒙聖恩授臣依前右正言知制誥知滁州軍州事已於今月二十二日赴上訖者謗讒始作大喧羣口而可驚誣罔終明幸賴聖君之在上列職尚叨於清近爲邦仍竊於安閑祇荷恩榮惟知感涕臣某中謝伏念臣生而孤苦少則賤貧同母之親惟存一妹喪厥夫而無託携孤女以來歸張氏此時生纔七歲臣媿無著龜前知之識不能逆料其長大所爲在人情難棄於路隅緣臣妹遂養於私室方今公私嫁娶皆行姑舅婚姻况晟於臣宗已隔再從而張非己出因謂無嫌乃一作仍未及笄遽令出適然其既嫁五六年後相去數千里間不幸其人自爲醜穢臣之耳目不能接思慮不能知而言者及臣誠爲非意以至究窮於資產固已吹析於毫毛若以攻臣之人惡臣之甚苟罹纖過奚遑深文蓋荷聖明之主張得免羅織之冤枉然臣自蒙睿獎嘗列諫垣論議多及於實權指目不勝於怨怒若臣身不黜則攻者不休苟令讒巧之愈多是速傾危於不保必欲爲臣明辯莫若付於獄官必欲措臣少安莫若置之閑處使其脫風波而遠去避陷阱之危機雖臣善自爲謀所欲不過如此斯蓋尊號皇帝陛下推天地之賜廓日月之明知臣幸逢主聖而敢危言憫臣不顧身微而當衆怒始終愛惜委曲保全臣雖木石之心頑實知君父之恩厚敢不虔遵明訓上體寬仁永堅不轉之心更勵躬躬之節

賀章獻明肅章懿二皇后祔廟表慶曆五年十月

臣修言伏觀十月九日赦書章獻明肅皇后章懿皇后祔廟禮畢者大孝發於宸衷刑于四海休氣蒸平美澤賚及萬方華夏歡呼一人作神祇咸一作感悅臣某中賀恭惟尊號皇帝陛下自天生德繼聖垂衣率勤儉以在躬推仁恩而浹物動稽先訓謙弗自專奉二后之慈靈永懷罔極詢百執之公議所據有經然後肅清廟以載嚴由闕

宮而升祔上儀交舉大慶咸均孝思永奉於烝嘗懿範有光於典策臣守藩地近一作遠受國恩深欣感事之親逢與蒼生而共樂

賀祔廟禮畢進奉銀五百兩狀

右臣伏以廟容祔室一人式奉於孝思方物充庭萬國率從於奔走前件物堅剛挺質粹美稱珍勉修邦貢之儀用罄臣忠之節

謝賜慶曆六年曆日表

祇膺寵錫伏積榮榮臣某伏惟尊號皇帝陛下愛人育物精意奉天日用而百姓不知聖德與四時合序是以星辰順軌日月清明陰陽和風雨節恭己南面授人以時屬此歲端大頒玉曆臣職在守土愧無他能謹守詔條其敢失墜

謝賜慶曆七年曆日表

臣修言本州進奏院遞到詔書一道賜臣慶曆七年曆日一本者天序方周王正肇建凡爾守邦之吏皆蒙頒曆之恩匪以爲私蓋遵彝典臣某中謝伏惟尊號皇帝陛下乾坤覆載日月照臨不言而四時行有作而萬物覩而乃考覽氣象精窮天人著爲玉曆之文以叶明堂之政舟車所至正朔咸加雖被謫以窮居亦以時而受賜臣敢不虔遵聖訓順布民時上副欲治之心少逃曠官之責一作咎

慰申王薨表慶曆七年五月

臣某言臣得進奏院狀報五月二十三日以皇叔申王德文薨皇帝幸後苑舉哀挂服者伏以申王德文位崇王爵地重宗藩遽背明時奄然殂謝伏惟尊號皇帝陛下仁親九族孝治萬方成服發哀恩隆禮備臣忝居侍從遠守詔條不獲躬詣闕庭以伸奠慰臣無任哀感之至

賀鴻慶宮成奉安三聖御容表慶曆七年七月

臣修言伏觀南京鴻慶宮成奉安三聖御容者一人致孝式表於奉先二后在天並垂於鴻祐人靈交感華夏歡呼臣某中賀伏惟尊號

皇帝陛下以上聖之姿撫重熙之運親執玉幣禮天地之神祇時奉
絜嘗報祖宗之功德乃眷別京之重載崇原廟之儀衣冠出遊仰稽
於故事郡國嘗幸俾得以奉祠實隆廣孝之風以著不刊之典臣猥
叨辭職方守郡條瞻感禮以阻陪效歡聲而徒切

謝加上騎都尉進封開國伯加食邑三百戶表慶曆七年十

二月

訓辭深厚恩典優隆祇服以還戰兢無錯臣某中謝伏念臣材非世
用行與時違過蒙獎擢之私忝居侍從之列坐尸厚祿安處善邦當
見帝以親郊莫陪嚴祀洎受釐而均慶亦被寵光進爵賜勳即封加
戶併茲榮數及迺無功敢不退自省循益思砥礪上答乾坤之造更
堅犬馬之誠

賀平貝州表慶曆八年閏正月

伏聞閏月一日攻下貝州殺到妖賊王則者盜孽竊興人一作神祇
共忿果憑睿算悉殄兇徒臣某中賀伏惟尊號皇帝陛下推仁育物
浸澤在人常服一作克儉以躬行惟足兵而在念至於多捐金幣講
好戎夷務休戰爭蓋惜士卒德至深而莫報恩既厚則生驕敢肆妖
狂自干斧鉞驅脅一作脅士衆閉守城圍既違天而逆人宜不攻
而自破而況聖神運略將相協忠不遺一人咸即大戮悖慢者警而
肅恪一作恪肅昏愚者知有誅夷銷沮姦萌震揚威令臣幸忝郡寄
欣聞德音

揚州謝上表慶曆八年二月

臣修言準樞密院遞到誥勅一道伏蒙聖恩授臣起居舍人依前知
制誥知揚州軍州事已於今月二十二日赴任訖者貶所脫身遽叨
臨於督府歲成無狀仍敘進於官聯被遲以優撫心增懼臣某中謝
伏念臣材非適用行輒違時徒知好古之勤自勵匪躬之節誤蒙獎
拔驟玷寵榮小器易盈固已宜於顛覆盡言取禍仍多結於怨仇仰

特公朝臣雖自信在於物理豈有不危矧利口之中人譬含沙之射
影謂時之衆嫉者易爲力謂事之陰昧者易爲誣上一作幸擊天聽
之聰終辨獄辭之濫苟此寃之獲雪雖永棄以猶甘而況得善地以
長人享及親之厚祿坐安優逸未久歲時亟就易於方州仍陟遷於
秩序有以見聖君之意未嘗忘言事之臣孤拙獲全忠善者皆當感
勵竊讒不効傾邪者可使息心非惟愚臣獨以爲幸此蓋伏遇尊號
皇帝陛下乾坤覆載日月照臨察人常務於究情行賞必思於有勸
致茲恩典施及懦庸誓堅終始之心少答生成之造

頴州謝上表皇祐元年三月十二日

臣修言伏蒙聖恩就差臣知頴州軍州事臣已於三月十三日赴上
訖者規求安閑坐享榮祿雖大君之德曲示含容而爲臣之心豈自
違處臣某中謝伏念臣材能淺薄性識昏蒙偶自弱齡粗知學古謂
忠義可以事國名節可以榮身自蒙不次之恩亦冀非常之效然而
進未有纖毫之益己不容於怨仇退未知補報之方遽先罹於衰病
神與明而並耗風乘氣以交攻疇曠雖存白黑纒辨蓋積憂而自損
信處世之多危伏蒙尊號皇帝陛下造化陶鈞高明覆載閱其孤拙
未卽棄捐付以善邦俾從私便所冀療治有驗瞻視復完則及物之
仁荷更生之大賜使身不廢猶後效之可圖

謝轉禮部郎中表皇祐元年四月

臣某言蒙恩授臣禮部郎中知制誥依舊知頴州者恩出非常榮逾
始望人以臣爲寵臣以喜爲憂伏念臣自小有能惟知嗜學常慕古
人而篤行不思今世之難行而自遭遇聖明驟蒙獎拔急於報國遂
欲忘軀結怨仇者皆可畏之人所違忤者悉當權之士既將行己又
欲進身惟二者之難兼雖至愚而必達況臣粗知用捨頗識廉隅故
其自被讒誣迨於降黜當舉朝沸議未嘗以寸牘而自明及累歲謫
居不敢以半辭而自理其後再經寬赦移鎮要藩曾未逾年遽求小

郡蓋臣知難當之衆怒尙未甘心苟免之善謀惟宜退迹則臣於榮進豈敢僥求此蓋皇帝陛下日月照臨乾坤履載不忘舊物曲軫睿慈謂臣貶職之人悉皆牽復憫臣無名之罪久未雪除故推敘進之文特示甄收之意然臣近於去歲早已改官建此便蕃豈宜叨竊欲固讓則有嫌疑之避欲遽受則懷忝冒之慚進退之間凌兢失措惟當盡節上報深恩

謝復龍圖閣直學士表 皇祐元年八月

臣修言今月十八日樞密院遞到誥勅各一道伏蒙聖恩授臣依前禮部郎中充龍圖閣直學士仍舊知潁州者恩還舊職事雪前誣惑極心驚涕隨言出臣某中謝臣伏見前世材賢一作賢材之士身結主知勳德之臣功施王室然尙或一遭謗毀欲辨無由少忤要權其禍不測顧如臣者何足道哉臣材不迨於中人功無益於當世用之未見其効去之無足可思矧罔極之讒交與而並進易危之迹何恃而不顛而聖心不忘恩意特至辨罔欺於曖昧沮仇嫉於衆多雖暫居譴謫之中而屢被陞遷之渥今又特蒙甄錄牽復寵名以臣之愚豈比前人而獨異推其所幸蓋由聖主之親逢謂宜如何可以論報再念臣稟生孤拙本乏藝能徒因學古之勤粗識事君之節苟臨危效命尙當不顧以奮身況爲善無傷何憚竭忠而報國誓期盡瘁少答高明

南京謝上表 皇祐二年七月

臣某言伏蒙聖恩就差臣知應天府兼南京留守司事臣已於今月二十四日赴上訖者守宮鑰之謹嚴敢忘夙夜布政條之纖悉上副憂勤寄任非堪兢營並集臣某中謝伏念臣賦才庸薄稟數奇屯毀譽交興兩嘗過實寵榮踰分動輒招尤念報效之未伸敢不竭忠而盡瘁因風波之可畏則思遠去以深藏造此六年外更三守學偷安而杜口負素志以媿心朽質易衰已凋零於齒髮良時難得尙希慕

於功名豈謂皇慈未捐舊物擢從支郡委以各都惟此別京舊當孔道簿領少勤於職事厨傳取悅於路人苟循俗吏之所爲雖能免過非有古人之大節未足報君

謝明堂覃恩轉官加勳表 皇祐二年十月

臣某言今月十三日進奏院遞到誥勅各一道伏蒙聖恩授臣尙書吏部郎中加輕車都尉依前龍圖閣直學士仍舊知應天府兼南京留守司事及放朝謝者天地號令風雷鼓行一氣所均萬物咸被遂容僥倖亦與褒升臣某中謝伏念臣材不逮人識非慮遠徒有事君之節未知報國之方冒寵貪榮已踰其量見利臨得曾不知慚此者伏遇尊號皇帝陛下堯舜聰明禹湯勤儉修前王之曠典述先志以繼成昭致精禋躬臨路寢膺受上天之多福推與萬方而不私臣於此時限以官守講議制禮不預議即博士之流助祭陪祠不在諸侯方物之列既乏一言之獻又無執事之勞徒隨翟闈共享餘賜普天率土難異衆以獨辭躋厚踞高但撫躬而無措

表奏書啓四六集卷第一

表奏書啓四六集卷第二 集九十一

謝賜對衣狀至和元年六月

右臣伏以粹然玉色方覲於清光賁以章遽蒙於寵賜授受之際
兢懼交相伏念臣材靡及中器非周用遘光華之在日荷榮祿以逾
涯非惟罪謗之多懼實亦禍罰之並至苟存遺體僅續餘生敢謂伏
蒙尊號皇帝陛下覆燾之恩幽微必及召從廬次復以官聯當陛見
之云初陳笥衣而有煥飾躬增耀愈彰不稱之譏處物雖愚猶謝
生之所臣無任

辭翰林學士奏至和元年九月

臣今日準閣門告報蒙恩除臣翰林學士所降勅告臣未敢祗受竊
以內制之職選用非輕臣以庸虛繆塵侍從歲月雖久能効無聞居
外任不歷煩難在朝廷未有補益見居學士之職已甚厚顏豈敢更
希榮進况臣屯蹇之迹憂患所侵齒髮凋殘心志衰耗嚮侍老母久
纏疾恙尋丁憂制僅有餘生累歲以來學業荒廢詔詰之任尤非所
當欲望聖慈察臣衰拙所有恩命特賜寢停臣無任

謝宣召入翰林狀

使車入里君命在門閭甚驚傳豈識朝廷之故事措紳竦歎以爲儒
者之至榮在臣之愚何以堪此竊以文章一作詞之任自古非輕待
遇寵榮至有私人之目詢謀獻納因加內相之名恩既異於常倫人
愈難於稱職伏念臣器非宏遠識匪該明學不通古今之宜材不識
方圓之用久叨塵於侍從曾莫著於勞能而自出守外藩近遭家禍
苟存餘喘復齒周行風波流落者十年天日再瞻於雙闕進對之際
已蕭颯於霜毛慰勞有加賜憫憐於玉色形神若此志意可知身已
分於早衰心敢萌於希進加以羈危之迹仇嫉交攻進退動繫於羣
言論議多煩於睿聽雖覆載之造每賜保全而孤蹇偷安常思引去
敢謂伏蒙尊號皇帝陛下俯憐舊物曲軫宸慈因內署之闕員俾備

官而承乏臣敢不勉尋舊學益勵前修感遺簪未棄之仁竭駑馬已
疲之力庶伸薄効少答鴻恩

謝對衣金帶鞍轡馬狀同前

右臣伏蒙聖慈以臣入院特賜衣一對金帶一條金鍍銀鞍轡馬一
疋者禁林促召彌峻於近班慈澤逾涯復叨於蕃錫退循昧陋曷稱
暉榮伏念臣素乏藝文久塵清近神都繁浩常懼於曠官內署凝嚴
遽叨於廁職便蕃曲被兢慄方深豈謂載厚宸慈式垂寵賚兼金錫
帶榮踰廓落之名在笥頌衣媿甚曳婁之刺輟以內閑之駿飾精寶
校之光俯耀微軀仰慚殊渥庸何購補但誓糜捐臣無任

乞洪州劄子嘉祐二年

臣去冬曾有奏陳乞差知洪州一次尋以差入貢院無由再述懇私
伏念臣本以庸愚叨塵恩寵一入禁署迨今三年進無補於朝廷退
自迫於衰病眼目昏暗腳膝行步頗艱右臂疼痛舉動費力雖翰苑
事無繁劇聖恩曲賜優容然非養病尸居之地兼臣鄉里在吉州昨
於丁憂持服時歸葬亡母荒迷之中庶事未備本期服闋還朝上告
聖慈乞一近鄉州郡貴得俸祿因便營緝而自叨禁職荏苒歲時貪
寵忘親此又人子之責也所以夙夜彷徨不能自止欲望聖慈憫臣
衰朽察臣懇迫特許差知洪州一次取進止

辭侍讀學士劄子嘉祐三年二月

臣準閣門告報伏蒙聖恩授臣兼侍讀學士臣伏見侍讀之職最爲
清近自祖宗以來尤所慎選居其職者常不過一兩人今經筵之臣
一十四人而侍讀十人可謂多矣臣以愚繆忝廁翰林又充史職太
常禮儀秘閣秘書省尚書禮部刊修唐書然則在臣不謂無兼職而
經筵又不闕人忽沐聖慈特此除授蓋以近年學士相承多兼此職
朝廷以爲成例不惜推恩比來外人議者皆云講筵侍從人多無坐
處矣每見有除此職者則云學士俸薄朝廷與添請俸官以人輕一

至於此欲乞罷臣此命不使聖朝慎選之清職遂同例授之冗員况臣材識淺薄自少以來粗習辭章過蒙進擢俾塵禁署中年衰病常憂廢職至於講說經義博聞強記矧復非臣所長今者舊之臣經術之士並侍講讀者足以備顧問承清光欲望聖慈矜臣不材自知俾免冒榮之誥所有告勅不敢祇受取進止

再辭侍讀學士狀嘉祐三年三月

右臣準中書劄子以臣辭免侍讀學士恩命奉聖旨不許辭讓者伏念臣猥以庸虛過蒙獎擢禁署為一時清選既已忝竊經筵况近例多兼何必辭讓蓋以臣身見兼入職侍讀已有十人為朝廷惜清職遂為冗員况講席不添人未至闕事所以敢陳警說乞免冒榮臣伏見國家近年以來恩濫官冗議者但知冗官之弊不思致弊之因蓋由凡所推恩便為成例在上者稍欲裁減則恐人心之不足在下者既皆習慣因謂所得為當然積少成多有加無損遂至不勝其弊莫知所以裁之中外之臣無有賢愚共知患此而臣為陛下學士職號論思豈有目覩時弊心知可患無所獻納而又自身蹈之今既已陳述若又不自踐言則貪榮冒寵不止尋常之責而虛辭飾讓又為矯偽之人此臣所以恐迫惶惑不自知止也伏望聖慈矜臣至懇察臣狂言許寢新恩俾安常分謹具狀奏聞伏候勅旨

辭開封府劄子嘉祐三年六月

臣伏聞內出誥勅各一道付閣門除臣兼龍圖閣學士權知開封府臣以庸拙久塵侍從初無勞效以伸補報日夕循省常愧心顏今者曲蒙聖慈候加選用豈可苟避繁劇輒希辭免蓋臣有不得已者須至縷陳臣自前歲已來累有奏列一作狀乞一外任差遣蓋以臣久患目疾年齒漸衰昏暗愈甚又自今年春末忽得風眩昨於韓絳入學士院勅設日衆坐之中遽然昏踏自後往往發動緣臣所修唐書已見次第所以盤桓欲俟書成便乞補外豈期聖造委以治煩臣素

以文辭專學治民臨政既非所長加以早衰多病精力不彊竊慮隳官敗事上誤聖知兼所修唐書不過三五月可以畢手置局多年官吏拘留糜耗供給今已垂成若別差人轉成稽滯只委臣了畢則恐無暇及之欲望聖慈矜臣衰病才非所長欲乞別選材能許臣且仍舊職候唐書成日乞一外任差遣以養衰殘今取進止

乞洪州第二劄子嘉祐四年正月

臣輒有愚懇上干聖聰出於至誠不敢緣飾臣本以愚懦別無材能過蒙恩私列在侍從初無補報之效每以尸素為慚昨者忽被選差俾權京尹臣雖知材力淺薄衰病侵陵當此浩穰實難辦濟直以忝廁翰苑迄今數年所職清閑過享優逸一旦遽蒙煩使不可再辭亦欲勉強年歲之間少陳筋力之效苟無曠敗乞一外州不意眼目舊疾遽然發動蓋自供職以來且巨常於燈燭下看讀文字及簽書發遣自早至夜率以為常全藉眼力而臣舊患已及十年兩目眊然中外具見近一兩月來暗昏疼痛屢在假告不無廢事人雖未責臣豈自安臣自前累會陳乞江西差遣一任欲乞檢會臣前後陳乞依蔡襄例除臣洪州一次俾解繁劇以養衰殘伏望聖慈特賜矜允今取進止

乞洪州第三狀

右臣近罄懇私自陳衰病願罷權尹乞一外州伏蒙聖恩降詔不允臣以庸縻過叨獎擢不能陳力輒欲辭勞當被刑誅敢期詔諭理宜祇惕明訓勉勵疲驚而敢再干天聰固自愚執者蓋臣有不得已也臣舊患兩目於今十年近日以來發作一作動尤甚眊淚浸澁睛瞳耗昏視物稍多其痛如割欲頻請假告則浩穰之地豈自違安欲竭力枝梧則疾患內攻有難勉彊夙夜憂畏不知所為欲望聖慈憫臣衰殘察臣愚拙許解繁劇假一遠外之州俾之待罪臣無任瞻天祈恩激切之至謹具狀陳乞伏候勅旨

乞洪州第四劄子

臣近兩會陳乞差知洪州一任未蒙恩許蓋以臣衰病不支難當任使素心所切苟欲便私非敢自圖外州以就優逸臣年雖五十三歲鬢鬢皓然兩目昏暗自丁憂服闋便患腳膝近又風氣攻注左臂疼痛舉動艱難一身四肢不病者有幾以此貪冒榮祿兼處劇繁實知難濟矧自權行府事以來三致臺諫上言兩煩朝廷起獄其他碌碌常事亦無分寸可稱蓋其資材本自庸虛加以精神日漸耗竭處之清職則論議謀猷無一可取擢以煩使又心力疲憊自訴不能上賴聖慈憐憫雖未欲遽棄於外而臣自處實所難安伏見侍從之班交相出入昨呂濬劉敞並請補外不三數歲今悉召歸况如臣者留之無所補去之無所惜者哉欲望聖慈矜臣此志乞一外任差遣得以養理衰殘誓於餘年少圖報效今取進止

辭轉給事中劄子嘉祐四年二月

臣近會陳乞外任差遣伏蒙聖慈許臣解罷府事兼授臣給事中臣本以庸虛誤蒙獎任不能陳力况未及暮遠以衰病自求罷去理當黜責以勵不才豈宜非時濫被恩賞况臣權府之初已蒙加以兼職到今才及半年有餘不因朝廷別有差使只是自以疾病求罷豈可又轉一官雖聖恩優厚過寵衰殘而臣自揣量無容濫受所有恩命乞賜停癢只許令臣歸院供職所貴少安疲病今取進止

再辭轉給事中劄子同前

臣近準閣門告報蒙恩授臣給事中臣尋會瀝懇乞賜癢停今準中書劄子奉聖旨不許辭讓便令授告勅者臣本庸材蒙陛下擢在翰苑言語侍從既無所納以伸報效任以煩使又自陳疲病訴以不能然則如臣久冒寵榮果堪何用上賴聖君優容未加黜責豈可授命之日已蒙加職不久罷去又復轉官此臣所以慙懼徊徨不敢即授也臣竊見前知府呂公弼差知益州授樞密直學士及公弼辭免不

行徙領郡牧遂却只依舊充龍圖閣直學士王素蔡襄並因方面之寄乃遷職是則罷府供職京師者不當別有遷轉此近例也臣非敢飾僞上煩聖聰直以恩寵頻併理當辭避欲望聖慈察臣無所堪用矜臣能自揣量俾獲新恩免貽羣議今取進止

舉呂公著自代狀同前

臣伏見司封員外郎崇文院檢討呂公著出自相門躬履儒行學贍文富器深識遠而靜默寡欲有古君子之風用之朝廷可抑浮俗置在左右必為各臣非惟臣所不如實當今難得之士臣今舉以自代

進新修唐書表嘉祐五年七月戊戌為提舉編修會公亮作

臣公亮言竊惟唐有天下幾三百年其君臣行事之始終所以治亂興衰之迹與其典章制度之英宜其粲然著在簡冊而紀次無法詳略失中文采不明事實零落蓋百有五十年然後得以發揮幽昧補緝闕亡黜正偽謬克備一家之史以為萬代之傳成之至難理若有待臣某中謝伏惟尊號皇帝陛下有虞舜之智而好問躬大禹之聖而克勤天下平和民物安樂而猶垂心積精以求治要日與鴻生舊學講論六經考覽前古以謂商周以來為國長久惟漢與唐不幸接乎五代衰世之士氣力卑弱言淺意陋不足以起其文而使明君賢臣傳功偉烈與夫昏虐賊亂禍根罪首皆不足暴其善惡以動人耳目誠不可以垂勸戒示久遠甚可歎也乃因邇臣之有言適契上心之所閱於是刊脩官翰林學士臣歐陽修端明殿學士臣宋祁與編脩官知制誥臣范鎮臣王疇集賢校理臣宋敏求秘書丞臣呂夏卿著作佐郎臣劉義叟等並膺儒學之選悉發祕府之藏俾之討論共加刪定凡十有七年成二百二十五卷其事則增於前其文則省於舊至於各篇著目有革有因立傳紀實或增或損義類凡例皆有據依纖悉綱條具載別錄臣公亮典司事領徒費日月誠不足以成大典稱明詔無任慙懼戰汗屏營之至

辭轉禮部侍郎劄子嘉祐五年七月庚子

臣準閣門告報蒙恩除臣禮部侍郎令臣授告勅者臣伏思聖恩所及必以臣近進唐書了畢凡與修書官並均審澤竊緣臣與他脩書官不同檢會宋祁范鎮到局各及一十七年王疇一十五年宋敏求呂夏卿劉義叟並各十年已上內列傳一百五十卷並是宋祁一面刊脩一部書中三分居二范鎮王疇呂夏卿劉義叟並從初置局便編纂故事分成卷草用功最多如臣者蓋自置局已十年後書欲有成始差入局接續殘零刊撰紀志六十卷是臣到局月日不多用功最少今來一例受賞臣實愧心兼臣自嘉祐二年蒙恩轉諫議大夫三年蒙恩加龍圖閣學士四年蒙恩轉給事中到今方及一年豈可又一作加以無功濫賞臣不敢虛飾辭讓煩贖朝廷理有不安實難自默欲望聖慈特寢新命今取進止

再辭轉禮部侍郎狀

右臣今月二十二日奉被詔書一道以臣乞寢新除禮部侍郎恩命不允事伏念臣出自孤寒累蒙獎擢職忝學士官至給事中前後所授恩命不少豈敢頓於此際過飾偽辭取好讓之虛名為有識之所誦實以臣撫心內愧不敢自欺蓋以唐書置局已十餘年纂錄垂就臣最後至接續分撰卷數不多用功最少不敢與從初置局及在局年深用功勤勞人一例受賞所陳情實皆有據依不敢過言冀為可信敢謂特煩詔諭前例所無上體聖恩便合祗受而臣迫於懇悃實所難安夙夜徊徨莫知所措若以臣雖無功效不欲獨遺欲望聖慈稍加裁損或於階勳食邑一有所霑俾臣得不過分足以為榮臣若自欺不言則冒寵雖多為愧愈甚臣不勝激切戰懼屏營之至謹具狀陳乞以聞伏候勅旨

賀壽星表至和三年二月誤離在此

臣某等言天雖不言事以象見保祐聖德其祉無疆臣某等中賀伏

惟尊號皇帝陛下以憂勞動儉之志躬自發憤而以仁慈寬厚之惠愛養元元下洎萬邦小大諸物咸欲各正性命而畢安其生上天降監宜有以報庚寅之夕星見南方占考天文福在人主惟天去人不遠如此災祥在德可不戒哉臣等忝備詞臣無所裨補惟願清心屏欲以隆南山之固而享一有夫字無疆之休

乞洪州第五劄子嘉祐五年七月

臣猥以庸虛過蒙獎擢久列侍從訖無補報年齒老大疾病侵陵聽重目昏聰明並耗髮白手顛精力俱衰兼以父母墳塋遠在江外未有得力子弟照管誠心迫切臣自三四年來累曾陳乞一外任差遣中間緣奉勅刊修唐書未見次第所以盤桓歲月不敢再三堅請今來唐書已得了當欲望聖慈差臣知洪州一次所冀退養衰一作疎拙兼便私塋取進止

乞洪州第六狀嘉祐五年 月

右臣近歷懇私上干睿聽以臣年衰多病父母墳墓在遠無人照管乞一次江西差遣至今未蒙恩旨臣以病攻於外一作內事迫於中一作外既不自安實難緘默將期得請不避煩言重念臣不幸少孤先父遠葬鄉里在吉州之吉水昨臣丁母憂日又扶護歸葬然臣方在憂禍故事力有所不周臣但仰天長號撫心自誓祗期服闋便乞一江西差遣庶幾近便營緝至於種植松柏置田招客蓋造屋宇刻立碑碣之類事難倉卒冀於一二年間勉力可就當是時鄉人父老親族故舊環列墓次並聞臣言自臣除服還朝皆引領望臣歸踐前約而臣遷延在再一住七年是臣欺罔幽明貪戀一作其榮祿食言不信罪莫大焉兼臣稟賦奇薄衰羸多病兩目昏暗已踰十年近又兩耳重聽如物閉塞前患左臂疼痛舉動無力今年以來又患右手指節拘攣至於鬚鬢蕭颯一作條久已皤然臣自視形容如此不惟不宜濫廁賢材英備之士出入朝廷以取笑於搢紳之列實慮早衰

易殞恐遂不得一償素志以爲終身之恨臣自數年以來雖累會陳乞而懇誠不至天聽未回亦嚮欲伺候唐書了畢今者幸已成書上奏其餘所領並是尋常職務別無朝廷差委勾當未了事件臣是敢罄述愚衷備盡微瑣伏念臣本乏材能初無階援特蒙睿獎拔自常流置在侍從始今十有七年矣訖無補報孤負恩榮伏望聖慈察臣心志凋零形骸朽悴閔臣昔當少壯銳意立朝今而衰退一至於此哀臣情實迫切乞賜檢會數年以來前後陳乞特許與除知洪州一次臣雖疲憊猶能遵奉詔條修舉常職誓殫犬馬之力上酬天地之仁臣無任徬徨激切謹具狀奏聞伏候勅旨

乞洪州第七狀同前

右臣奉被今月二十一日詔書一道以臣陳乞江西差遣宜不允者伏念臣早以孤賤誤玷恩榮而生粟拙艱動罹謗咎往自河北斥守滁陽在外十年遂至白首頃除慶制還奉內朝幸蒙聖恩收以桑榆置之翰苑凡今仕宦光寵孰不樂在朝廷職任清優顧亦無出禁近臣豈不思嚮之流落引領欲一作願還而乃却蹈風波自投遠外此之愚計豈近人情蓋以臣事迫心危有不得已凡諸懇悃嘗具剖陳不敢煩言况已罄盡再念臣遭遇明聖過被恩私犬馬無知猶能報效而臣性既疎簡識非明敏少以專學而自愚不能趨世以濟務效當求實而安事虛名才貴適時而一無可用至於上所詢訪時有論議亦碌碌隨衆人未嘗有所建言縱令有之亦不足采惟有用文字綴爲流俗過稱而自供職禁庭殆今七載屬中外無事文書甚簡不過月赴四五直飽食甘寢止撰青詞齋文一兩通只此爲臣所能是臣事業去之亦何闕於事存之又奚補於時將何以上煩睿慈曲示恩意特頒詔諭前例所無捧讀驚慚繼以感涕臣亦竊聞近日兩制臣寮多求外任彼皆材業有素年齒方彊又無事於外方可以且留供職惟臣材無可用年又漸衰外有私營冀償夙素欲望聖慈畀之一

郡使其志畢願從若天幸餘齡未填溝壑則遺簪舊物尙或冀於見收而疲馬君軒豈不知於有戀臣無任祈恩激切之至謹具狀陳乞以聞伏候勅旨

辭侍讀學士狀嘉祐五年九月

右臣準閣門告報蒙恩除臣兼侍讀學士者竊以學士不宜兼侍讀臣於前歲已具陳論當時蒙恩遂許辭免在於今日豈宜復授得非以方今經筵闕人而臣在學士中適當次補聖恩優異不忍獨遺臣以衰殘久塵禁署已兼龍圖閣學士而在院學士多未有兼職况臣前已有言理宜自踐欲乞許臣只兼舊職其經筵閣侍讀別賜除人所有誥勅臣不敢祇受今取進止

辭樞密副使表嘉祐五年十一月

臣某言伏奉制命蒙恩特授臣依前禮部侍郎充樞密副使仍加食邑實封散官勳賜如故者成命始行驟驚於衆聽撫心增懼會莫以自容臣某中謝竊以樞要之司朝廷慎選出納惟允實贊於萬機禮遇均隆號稱於二府顧任人之得失常繫國一作體之重輕苟非其材所損不一伏念臣器能甚薄風力不強少喜文辭殆浮華而少實晚勤古學終迂闊以自愚而自遭逢威明擢在侍從間嘗論天下之事言出而衆怨已歸思欲報人主之知智短而萬分無補徒厝危躬於禍谷每煩聖造之保全既不適於時宜惟可置之閑處故自叨還禁署逮此七年屢乞方州幾于十請慝愚誠而懇至被明詔之丁寧雖大度并包猥荷優容之賜而羣賢在列敢懷希進之心豈謂伏遇尊號皇帝陛下急於求人思以濟治因柄臣之並選憐舊物以不遺然而致遠之難力不勝者必速其覆量材不可能自知者猶得爲明敢冀睿慈察其迫切俾回渙渥更選備良如此則器不假人各適賢愚之分物皆知報何勝犬馬之心

謝樞密副使表

臣某言伏奉制命蒙恩特授臣依前官充樞密副使尋具表陳免蒙降批答不允斷來章者右樞虛府充位宜求於備賢多士盈庭誤選乃先於庸妄既牢辭之靡獲徒冒寵而為憂臣某中謝伏念臣少本賤愚初無志慮為小人之事力不勝於負薪程有司之文學止期於干祿過被仁恩之樂育早從英俊之並遊遂叨侍從之流久玷論思之地方時求治殆無補於毫分一作分毫顧質早衰况漸凋於齒髮但思藏縮敢望甄陞矧惟贊萬事之機必也極一時之選豈容濫得猥以備員當命令之始行方惶惑以自失而睿恩至渥召旨甚嚴莫諧懇避之誠徒負貪榮之媿此蓋伏遇尊號皇帝陛下廓天地之量垂日月之光憐樸直之無他謂疲鴛之可勉俾承闕乏以効拙勤臣敢不奮勵無能之姿感激難逢之會職思其位庶免於曠官謀不以身少期於報國

辭參知政事表嘉祐六年八月

職參論道宜極選於一時授匪其人實駭聞於衆聽恩榮所被踟躕難安臣某中謝伏念臣本乏材能徒緣幸會列于侍從白首無聞置在樞機素餐已甚雖聖主之恩天地曲示含容而朝廷之事毫釐動關利害豈止曠官之誚每懷誤國之憂矧惟政事之臣實代天工之任俾之贊貳宜擇材賢伏望尊號皇帝陛下收誤獎之恩廣僉諧之訪憫疲鴛之已試備見無庸求俊又於在廷擢之不次俾獲安於舊職冀免速於罪辜報効之誠殞糜後已

謝參知政事表

贊貳國鈞參聞廟論謂宜不次而選冀得非常之材迺以敘遷俾之承乏誤恩過被訴讓靡從臣某中謝伏念臣少迫賤貧偶勤學問儒者博而寡要况匪多聞文章世之空言豈能適用徒以早遭亨嘉之會驟蒙疑拔一作擢之私叨言語侍從之流速令踰紀玷出納樞機之任初乏可稱幸先彈理之未加每欲逡巡而引去敢期睿眷俾與

政機優以寵章進其爵秩望非意及榮與憂并此蓋伏遇尊號皇帝陛下堯德聰明禹躬勤儉博求俊乂以濟治康謂臣既朴且愚必能循於忠謹雖愚而懦尚可策其疲鴛猥以備員遂茲冒寵臣敢不益堅素守自勉不強惟殫犬馬之勞上答乾坤之造

辭明堂加恩表嘉祐七年九月

祭之為惠雖澤費乎均而賞不因功則士無以勸既難安於兢愧敢自避於顯煩臣某中謝伏念臣性本顛愚學無師法才不適當世之用識不通治古之原誤蒙聖知擢自平進俾參國論幸有蘊而得施坐耗歲時訖無稱而取諂方懼素餐之責敢懷濫得之心屬宗祀之有嚴奉精禋之致孝陪一二大臣之後既竊窺於威儀獻千萬歲壽之觴獲共慶於成禮然而賜之昨餞蒙福已多加以寵榮在臣豈稱伏望尊號皇帝陛下回高明之聽察懇至之誠推一人有慶之恩賜先於幽遠憫小器易盈之量俾免於覆顛特收渙汗之行仰冀曲全之造

謝賜飛白并賜宴詩狀嘉祐八年正月

右臣去月二十七日伏蒙聖慈召赴天章閣觀太宗真宗御集次赴寶文閣觀御飛白書賜以金花牋字遂賜宴於羣玉殿臣本出寒儒遭逢盛旦誤被獎擢參贊鈞衡陛下憂勤萬機德被四海邊鄙不聳年穀順成民物熙閑聖心怡豫臣於此際既得以尸素偷安而又獲親侍清光便蕃恩錫一時之感事千載之難遇臣不勝至榮至幸謹課成召赴天章閣寶文閣觀祖宗御集賜飛白羣玉殿賜宴五言八韻詩一首隨狀上進于瀆宸嚴無任惶恐戰汗屏營之至

謝羣恩轉戶部侍郎表嘉祐八年英宗登極四月上

皇明繼照如日之昇睿澤霽流溥天咸被時惟朽懦亦玷光華臣某中謝伏念臣本以庸虛僅知學問識不周於往行一作時用材莫逮於中人方其壯年喜論時事各聲濫得招謗咎以偕來榮寵踰涯蹈

憂危而亦至晚被先朝之誤疑俾陪二府之後塵居無補於休明方
自期於引避遽號弓而結恨雖殞體以何追伏遇皇帝陛下奮發乾
剛嗣承天統當茂業繼文之始乃歡謳歸啓之初宗社獲安人神洽
一作合慶矧惟新之號令方無間於幽遐顧於茲時其敢獨異俯從
祗受但益凌兢敢不勉勵衰殘感遇今昔更竭疲篤之效庶伸塵露
之微

謝皇太后表

嗣聖當天法重離而正位鴻恩浹物均萬國以同休遂容尸素之臣
猥被優隆之渥臣某中謝伏念臣名雖學古性實迂儒徒誦習於典
墳靡該通於今古爰從束髮遭會明時蒙先帝之誤知與羣英而並
進紫樞黃閣叨陪論道之司白首丹心徒有報君之志屬綴衣之揚
命奉主鬯以承祧方推慶賜之行遽荷便蕃之寵伏遇皇太后殿下
坤元厚載母道居尊惟茲聽覽之初務滯汪洋之澤臣敢不勉脩職
業上副憂勤送往事居忘身盡節庶展涓埃之效少酬覆燾之私

表奏書啓四六集卷第二

辭轉吏部侍郎表治平元年閏五月

受寵若驚况被非常之命事君無隱取傾至懇之誠仰竊高明惟知
踴躍臣某中謝伏念臣性姿庸近識局昏冥學古自愚非有適時之
用論材甚薄豈堪任重之難徒以荷先帝之誤知自孤生而拔擢犬
馬未報但虞填壑之有時弓劍忽遺遽歎攀髯之莫及而屬皇明繼
照聖治惟新送往事居雖策疲驚而自勵進思退補未知罪戾之所
逃至於貪踰分之寵榮冀無功之爵賞非惟愚慮所不敢及顧有公
議其將謂何而甫茲彌年再以增秩方命書之始下駭羣聽以生疑
此臣所以剖瀝肺肝不能自止彷徨夙夜莫獲偷安伏望皇帝陛下
回日月之餘光廓乾坤之大度察其悃悞一作迫假以矜寬雖成命
已行國體當嚴於出令而從人之欲天高幸或於聽卑特收渙汗之
恩以息諠譁之論庶安常業誓畢愚衷

再辭轉官第一劄子

臣此者伏蒙聖恩特除臣吏部侍郎依舊居職臣早來獲對天顏雖
略具陳述退而循省未盡懇誠伏念臣本以常材誤蒙任使問其所
職則皆朝廷之大事較其成效則無尺寸之可稱外惟碌碌以隨人
內則區區而自守當陛下聖政惟新之始勵精求治之時雖天度包
容未加斥罷而臣心自揣常負驚憂豈謂宜黜而升當責而賞非惟
臣自知不可顧於物論其謂如何况自去年陛下即位之初均慶之
典臣已首叨遷秩今來恩命實出非常在臣之愚難以自處欲望聖
慈矜察特賜寢停今取進止

第二劄子

臣今日伏蒙聖慈差中使傳宣令於後殿告謝臣與趙槩等遂詣垂
拱殿門請對欲再具敷陳續奉聖旨須管便受告勅臣以聖駕已起
君命甚嚴惶惑之間不知所措雖已受告勅尋於延和殿得對已會

灑懇備述聖恩非次義實難安蓋以無功受賞者衆以為非若竊事
為功則罪又大矣伏以陛下承先帝已定之命入繼大統此天人之
意也而即位之始偶因過哀致違和裕既而勿藥有喜聖躬清寧蓋
由宗社神靈顯此異事欲彰皇天眷祐陛下使不由人力而致康復
而臣今乃貪以為功坐獲厚賞此臣所謂於義難安者也至於陛下
未親庶政之間中外幸得無事此有宋百年四聖相繼威德在人顧
臣等輩有何施設過蒙睿獎以此疇勞况臣猥以庸材參聞國政上
所賞罰臣職奉行若羣臣之間有功狀不明迹涉僥倖尚當裁抑以
絕濫恩而臣乃自貪寵榮以速議論此臣所以區區不能自己也故
聖恩雖極優異而臣不免厚瀆天聽一作懇伏乞早回聖斷追寢成
命俾臣獲安常分以息羣言今取進止

第三劄子

臣今日伏蒙聖慈差入內高品陳日新至中書傳宣令臣繫新除官
臣尋與曾公亮等具劄子奏乞候來日覆奏伏緣此來恩命出於非
常臣與韓琦等進退惶懼夙夜思維雖君恩至優違則有咎然事體
所繫義有難安所恃者睿聖聰明必察臣等懇誠之至聖心寬恕不
以臣等屢瀆為煩欲望天慈省閱臣等前後所陳事理曲加裁擇特
賜寢停於此四方旱災百姓嗷嗷之際是臣等合被責之時免濫受
非次之賞則臣不勝幸甚臣誠迫意切言不成文干冒冤疏伏俟誅
戮今取進止

謝轉吏部侍郎表

驟膺渙渥備瀝愚誠雖至辭窮罔避煩言之為贖重乎令出莫回成
命於已行祇受以還驚一作兢惶失節臣某中謝伏念臣學不通於
元本材不足以經綸但知守拙以為忠每務師心而自信徒以遭逢
先帝拔自衆人久參侍從之聯遂玷機衡之貳而屬大橫啓兆嗣統
膺期方初政之清明思百度之修理內量譴薄實憂以聖而責愚矧

迫衰殘方念乞身而告病不謂皇慈曲被寵數屢加當單大慶之初已無功而冒賞會未踰年之久復進秩以叨榮此蓋伏遇皇帝陛下聖政惟新用人務廣謂才難於求備思悅使以忘勞憫其勤劬錫以優洽雖榮踰於望表亦寵與其憂并誓殫犬馬之微少答乾坤之造

乞外任第一表治平二年正月二十三日二十二日二十五日批答

不允

臣某言臣聞事君以忠本期盡瘁不能者止亦貴自知敢傾悃悞之誠仰讀高明之聽臣某中謝伏念臣本由寒素偶踐科場祇希干祿以養親敢冀逢時而見用蓋以腐儒章句之學豈堪王佐之材童子雕篆之文固異賢人之事而誤蒙睿獎俾貳宰司訖無豪髮之可稱常懼滿盈之必覆加以年齡迫於衰晚氣血損於憂傷惟兩目之舊昏自去秋而漸劇精明晡謁瞻視茫茫冬春以來職業多廢當聖君求治之始是羣臣宣力之時自嗟犬馬之微生遽先疲乏惟恃乾坤之大度曲賜含容雖未責於曠官亦難安於尸祿與其坐待於彈劾豈如自乞於哀憐伏望推天地之恩回日月之照察其愚直不敢矯誣許辭政事之名假以州符之寄則臣不止偷安而養拙亦將自療以求痊向冀昏瞳之復明會圖後効而論報

第一劄子

臣所有誠懇昨日獲對便坐已具數述蓋臣自去年八月喪一女子凡庶常情不免悲苦因此發動十年來久患眼疾又爲老年全服涼藥不得自深冬已來氣暈昏澁視物艱難接此春早陽氣上攻遂至大段妨事然臣愚心祇欲俟壽聖節隨班上壽一展臣子之誠以爲榮幸然後懇求罷去所以勉強遷延至今緣此是臣私故瑣屑雖臣子之於君父理當無隱然難委曲盡載表章所以先具奏陳冀蒙省察臣以非才過蒙任用使其聰明彊健猶懼不能稱職况此衰病何以堪處昨日雖面奉聖旨令且未要入文字蓋臣迫於情懇退不自

安今已具表陳乞伏望聖慈哀許今取進止

第二表正月二十六日上二十九日批答不允

臣某言臣近貢封章乞解政事伏奉批答不允者天甚仁而溥愛人有欲而必從苟睿聽之未回由懇誠之不至敢干斧鉞再瀝肺肝臣某中謝伏念臣學不通經材非適用徒以遭逢亨會進冒寵榮一玷機衡五遷歲律伏遇皇帝陛下握圖撫運嗣統當天覽決萬事則堯舜之聰明愛養羣生則禹湯之勤儉賢材並進聖治惟新臣於此時得與大政何倚何飾而可以稱職旅進旅退而莫知所爲已慚廊廟之許謨既無遠略惟有簿書之瑣屑尚可宣勞而苦此雙瞳莫能久視耗然終日兀爾尸居上無以副人主之憂勤下無以伸臣子之報效久而不去罪則奚逃此臣所以夙夕彷徨難安自默者也伏望皇帝陛下曲回天聽少軫皇慈念臣日侍冕旒察臣心非木石祿位者人情之所顧惜孰肯妄辭筋骸者物理之有感衰不能無乏哀其可憫寬以不誅俾諧得請之恩當識謝生之所

第二劄子

臣受國厚恩叨與機政材識庸下不能有所補報上賴聖君含垢未即斥去而又不思勉彊竭力以脩職業輒以衰疾自陳欲圖安便重煩聖念特降中使傳宣賜以訓誨丁寧切至而又頑然未即聽從在臣之罪可誅者非一臣以方具表陳乞理當闔門俟命不得進見闕庭面陳悃悞臣聞自古君臣去就之際與今不同蓋昔之公卿解職便歸田里其朝居君側暮已絕於朝廷所以臣重去其君君亦難其臣之去然猶去者相繼今則不然凡辭職任者皆不去祿任或優游侍從之班或出守藩要之地豈爲避寵辭榮乃是免勞就逸實人臣之僥倖也况如臣者尸祿終日無勞可均實以兩目俱昏是十年舊疾自去秋發動日益昏澀看讀文字艱難憂慮職事曠廢有誤國家所以敢布懇誠乞憐君父冀一閑僻處將養三二年或目復清明却

乞一邊遠繁難處展効乃是臣自爲僇倖之計與辭榮避寵者不同
欲望聖慈不以爲難早賜恩許今取進止

第三表正月二十九日上二月二日批答不允

臣某言近上表章乞解政事伏蒙聖慈再降批答不允者臣聞事君
以忠信爲本立朝以進退爲難惟不自疑乃能取信於上苟無大過
庶幾善退其身昔之爲臣全此者少今臣遇聰明之聖主固不自疑
苟好庇之寬仁幸無大過是以敢因疾病直露情誠而封章屢陳愈
旨未賜臣竊謂日月之明無不照豈不諒臣之乃心得非天地之恩
有所憐未忍許臣之遽去在臣自揣何以克堪豈合更此多言上煩
宸聽所難遂默蓋切懇私臣某中謝伏念臣以中下之才被非常之
任日諧進見則蒙眷待之優隆退接同寮則絕纖毫之間隙自可安
然樂職亦復何所憂危况千載一遇者感時之難逢高秩厚祿者常
情之貪得苟非迫於衰病豈敢固自欺誣伏望皇帝陛下曲軫睿慈
俯哀愚款念其蒲柳質易朽而先衰譬若馬牛力已疲而則止賜其
如請恕以苟安則臣刮膜祛昏尙冀清明之來復捐軀殞命終圖報
效於餘生

爲雨水爲災待罪乞避位第一表治平二年八月

臣某言臣聞任非其人則官必曠職時多闕政則天爲降災惟謹咎
之有歸難僥倖於獨免臣某中謝伏念臣本以庸妄遭逢盛明擢貳
宰司與聞國論不能叶宣上德輔導至和頻年已來害氣交作春饑
已甚鐘疫相望秋潦暴興覆溺無數下致生民之愁苦上貽聖主之
焦勞臣獨何心安於厥位舉朝廷之典法便合黜幽賴覆幬之寬仁
尙容自劾伏望皇帝陛下特回天造俯察愚忠俾解政機推行憲罰
以塞上穹之降責以警庶位之脩官然後別選備賢俾居參輔益圖
更化之術上副求治之心自然人神以和災異咸弭不惟臣適其分
亦俛國無屈刑

第二表

臣某言近以雨水之變上表待罪蒙降批答不允者上天告戒比屋
罹災虔思消異之方願避進賢之路特迂聖訓未諒愚誠退自省循
豈違安處臣某中謝伏以天人之相去不遠見於事者若響之應聲
賞罰之至要易知舉其大則以一而警百是以政有得而有失則災
祥以類而來官若成而若虧則黜陟以時而舉伏念臣猥由愚陋進
冒寵榮一貳政機五更歲律相府之事無不摠既皆得以與聞斯人
之居不聊生欲於何而歸咎辜朝廷之委任貽君父之憂勞此而不
誅何以勵衆伏望皇帝陛下奮然睿斷赫以皇明理其曠敗之愆正
厥經常之法置之散地全以寬恩誓堅犬馬之心終效涓埃之報

第三表

臣某言近以雨水之災再上表待罪蒙降批答不允仍斷來章者陰
沴千時聖心軫慮明詔一下羣臣震惶况居任責之司敢爲幸免之
計臣某中謝伏惟皇帝陛下自膺眷命光紹丕圖振撥萬機之繁講
求三代之治旰不遑食勵文王之小心行之以勤躬躬禹之盛德固
已生民受賜品彙蒙休宜召至和以來嘉應而善氣未效時災殄臻
惟天聰明異不虛出示人警戒咎必有歸所以三事之臣連章瀝懇
况臣最爲濫竊尤玷寵榮方平日以尸居不知引分及敗官而宜罰
其敢逃刑伏惟皇帝陛下俯抑至慈深思大譴退其不肖以爲脩政
之先不以空文庶得應天之實

再乞外任第一表治平三年三月二十四日上二十七日批

答不允

臣聞忠以事上雖見義而必爲力有不能則知難而當止是惟臣子
進退之分實繫國家利害之機則其居也敢懷竊位之安其去也豈
止全身之計輒揮拙訥上瀆高明臣某中謝伏念臣本以庸妄出於
孤平一作單學不通方識非慮遠徒以遭逢先帝誤被聖知擢自諸

生俾參大政伏遇皇帝陛下膺期出震繼統當天方聖政之惟新思羣材而並濟臣以衰遲之朽質久當機要以妨賢有守經泥古之愚無應變適時之用考於外論早合黜幽伏蒙皇帝陛下廓大度以兼容謂衆惡者一作之必察特加庇覆俾獲保全固當勉勵疲爲誓圖報效而臣量盈器極福過災生兩目昏昏積年舊苦中消渴涸新歲所加精液銷澌志與神而並耗革膚削氣將力以俱殫臣若猶彊殘骸竊貪厚祿坐取敗官之責上累知人之明苟以此致與於人言則乃是可畏之公議異夫誣謗難復主張此臣所以深自揣思取陳悃迫一作幅伏望皇帝陛下曲回睿眷俯察愚忠念其獲親日月之光頗歷歲時之久居常碌碌曾莫異於片言一有紛紛遂獨當於衆怒尙乏周身之智豈堪爲國之謀因其自訴於病衰幸俾獲逃於罪戾退之散地得盡餘齡則臣永荷天地之恩敢忘犬馬之報

乞出第一劄子

臣昨日獲對便坐輒述懇私乞解政事之任緣臣疾患累日氣血虛乏頭目昏眩不能久立不得久待天顏悉陳悃悃伏自僕園之議既興言事之臣荒唐不學妄執違經非禮無稽之說耻於不用不勝其忿遂厚誣朝廷借以一作臣爲各因乃一作以肆言訕上指臣爲姦邪首議之人陛下至聖至明洞見中書與兩制所議本末察臣無罪曲賜保全而呂誨等附下罔上語言悻慢無復君臣之禮以至斥黜母后非毀詔書等事陛下皆屈意含容不加顯戮止於退罷而已及詔定濮王典禮不如誨等所誣既又詔勝朝堂諭以本末由是中外釋然凡素爲誨等誣誑銜感之人皆識朝廷本意但恨曠論之晚今則是非已正曲直已分臣所被誣亦已獲雪然則更何所辨豈合有言而臣義有不得已者蓋以執政之臣天下之所瞻望朝廷以爲重輕若其名譽烜赫非止一人之榮乃是朝廷之光也其或身名毀辱非止一人之辱乃是朝廷之辱也昔唐文宗甘露事後小人用事宰

相李石爲其所惡乃遣盜殺之不中而斷石馬尾石遂求罷文宗雖知石賢相可惜亦不得已而罷石爲荆南節度使蓋顧國體當爾也今臣固無李石可惜之賢而其所被毀辱者何止斷馬尾而已呂誨等連章累疏惡言醜詆陛下爲臣愛惜留中而不出誨等自寫章疏宣布中外今閭巷之人皆能傳誦雖誨等急於賣直取各肆其誣罔不暇惜國體而自爲傳播如臣者豈合彊顏忍恥猶安厥位使天下何所瞻望凡臣所貪以爲榮者乃朝廷之辱也由是言之臣豈得已哉使臣無疾病猶當懇自一作自引去况臣不幸適值自春來瘡渴不止昨日面奉德音陛下悉已知臣所苦聖恩憫恤爲之惻然伏望陛下特賜除臣近京一郡俾養衰殘則臣未死之間誓當別圖報効今取進止

第二表 三月二十八日 上四月三日批答不允

臣近貢封章願還政事伏蒙聖慈特降批答不允者臣聞愚誠雖微而苟至可以動天大仁博愛而無私未嘗違物取理懇悃再冒誅夷臣某中謝伏念臣智識非精器能甚淺稟生奇薄自少嘗履於艱虞雖處困窮所守粗知於名節而自早蒙擢用思奮猷爲不善自謀遂致怨仇之積罔知避禍屢觸陷罪之機先皇帝深察孤忠悉排羣議甄收獎進終始保全以至晚年致之二府念初無於報効徒久玷於恩榮逮逢神聖之嗣興願已歲時之三易問其職業會無補於毫分聽於諛譁則不勝於詆辱猶彊延殘之質坐懷寵祿之貪昔一作古云高位之疾顛何况千人之所指繼以恙疴之苦蕭然氣血之衰藥石之功既難求於速効機政之地豈宜久於曠官伏望皇帝陛下曲軫睿慈俯哀危懇謂獻納舒護之任已無益於明時而沮傷憔悴之餘寔難安於久處許其引避寬以優容備後來因此以得賢則臣去猶爲於有補苟未填於溝壑誓終竭於涓埃

第二劄子

臣近再述懇誠上干天聽乞解重任伏蒙聖慈特降批答丁寧訓誨未賜允俞臣本庸材不堪大用遭逢聖主誤被疑知陛下急於求治取信輔弼言無不從臣於此時不謂不得君不謂不得位而智識驚下初無補報既不能建明大義鎮遏羣言又不能和會衆心叶于一德遂致浮詞異論中外誼譁惟務含胡無一言以辨正但欲因循苟於無事以此養成羣小誣謗聖朝上則煩黷睿聰下則自取身辱雖陛下閱臣拙直衆怒獨當察臣暗愚不識陷穽然臣拙於謀身不堪任用已驗如此可黜不疑陛下聖度寬仁曲加庇庇以爲響履舊物不忍一旦棄捐然臣夙夜彷徨不能安於自處者蓋以朝廷輕重繫在大臣若大臣望重則朝廷尊大臣望輕則朝廷不重大臣望輕猶爲不可何況惡言醜詆毀辱百端今豺狼當路姦邪在朝之語下傳閭巷外播四夷以是而言何止望輕而已陛下有臣如此豈不爲朝廷之辱哉雖陛下至聖至明察臣無過臣能自信無愧於心而中外之人不可家至而戶曉百辟之瞻望衆人之譏誚臣亦何顏以處之與其負慚俛首以見搢紳執若乞身遠去少避指目是則聖恩許臣解罷俾臣稍獲便安乃是臣居位也以榮爲辱其去也以黜爲升惟望天慈曲從人欲今臣已上第二表伏望聖慈曲從人欲除臣蔡亳一州差遣

第二表四月初四日上初七日批答不允斷來章

臣近以疾患自陳乞解重任伏蒙聖慈再降批答不允者坐貪國寵既以難安仰叫帝闈期於必達臣某中謝伏念臣早緣幸會親遵休辰以一經之腐儒參萬機之密論違時背俗謗詬尤雖無獨立弗懼之明粗懷可殺不辱之節所以彊顏忍恥不知軒冕之榮加之多病久衰難勝筋力之任近從去歲益以中乾渴如饑鼠之飲河喘若吳牛之見月多言外噪衆疾內攻心已自危豈足當於謀慮力難欲彊幾或一作不至於踣顛方奮銳於壯時猶無可道迨摧傷於晚節

亦復何堪雖幸聖君容覆之恩豈道神理滿盈之罰苟不知退其將殞生伏望皇帝陛下推天地之私回日月之照察臣粗識廉恥閱臣遽此衰疲丐以一州俾從素志如此則力排羣議已荷於保全遂養殘生更繫於亭育雖同草木之賤尙識造化之仁

第三劄子

臣近以疾病乞解重任除一蔡亳州差遣已三上表及兩具劄子陳述伏蒙聖慈累降批答不允斷來章者臣竊伏思惟臣之披瀝肝血祈天請命之懇其說甚詳而其誠至矣陛下每降答諭丁寧獎勗所以過期優待臣之恩禮亦已至矣而臣不能仰遵聖訓力疾就職而猶更哀鳴上煩天聽者蓋臣義不獲已與近日韓琦曾公亮胡宿等從容於進退者事體不同也臣以非才被任違時忤衆自招謗怒不容其身今上自朝廷下至閭閻巷陌遠洎四海外及夷狄皆能傳呂誨等章疏矣其罔誣醜詆之語莫不能道之矣而臣以顧惜國體既不當更與誨等辨正便合引避去位而以是非曲直付之公議乃爲合理昔漢世大臣有被誣以罪者例不對理陳寃蓋其人或遂廢黜或被刑誅所以更不自辨可矣未有論議喧沸不自辨明而頑然自安其位者也今朝廷處臣者何位任臣者何事所繫事體者如何而誨等詆臣者何語臣其可安處此位者乎昨濮園之議自手詔告示中外後凡中書論議本末邪正及誨等加誣詆訕等事皆已幸蒙辨正矣惟臣所被邪謀首議姦諛徽寵之惡名既不能自辨若又不識廉恥頑如木石遂安其位陛下謂有臣如此其可當國家之大任乎此臣所以夙夜思維誨等詆臣者諛佞希榮寵耳故惟有懇辭重任遠避寵榮乃可以塞小人之口然則陛下聖恩一許臣罷去是爲臣辨誣謗全名節其賜臣者多矣厚於賜以高秩重祿萬萬也臣幸蒙陛下知樊久矣臣之心迹聖鑒昭然洞見表裏此臣不當復言臣所謂辨誣謗全名節者爲中外之人不可家至戶曉者爾蓋非早自引

去無以塞誣謗臣者之口也夫爵祿朝廷所以寵臣下也使身心安泰名譽光顯者居之則不勝其榮也若毀辱媿恥憤悶憂鬱者居之適足爲苦耳伏望聖慈察臣哀切懇迫之誠不以臣比從容於進退者特許臣解罷政事除臣一外任差遣則臣雖死之日猶生之年今取進止

第四劄子

臣近以疾病乞解重任已具劄子罄述懇私更不敢重疊敘陳上煩天聽臣以非才誤膺獎任存之既無所惜去之何足可思然而不早罷去此乃陛下至仁至慈憐臣衰殘不忍遽一作差便棄捐務欲退人以禮今臣表章劄子各已三上伏蒙三降批荅丁寧訓誨未即允俞中外之人皆知陛下曲意留連恩禮已足伏乞出自宸斷早賜恩許除臣一外任差遣

第五劄子

臣昨日獲對威顏備陳懇迫而言意拙訥不能感動愚誠雖切天聽未回夙夜省循莫遑安處臣本庸材不足比數然而職所任者國政身所繫者國體而遭罹誣枉毀辱百端既不自辨明便當引去加以年齒凋耗疾病侵凌豈可勉彊衰殘不知廉恥此臣所以披肝瀝血干冒誅夷不能自止者也再念臣材識驚下過蒙陛下獎用固當奮發事業粗立功名上報君恩次雪身辱然臣出入二府已七八年迄無一言建明一事可採以前日之碌碌如此可知後日之無所爲也若終於尸祿偷安苟貪榮寵不惟上辜委遇實亦自負初心蓋材力短長固有不能勉彊若進退名節尚可自擇前世人主之待其臣也事非一端或高其行義不奪其志或許其閑退俾自安全不必悉以高秩厚祿但曲從所欲便是君恩伏望聖慈察臣悃悃特許臣所乞則臣未盡之年尙知論報今取進止

辭單恩轉左丞表治平四年正月神宗登極二月上

臣某言伏奉制命蒙恩特授臣行尙書左丞依前參知政事加階食邑食實封及賜功臣者澤施無外雖務極於汪洋寵至若驚寶難安於啓處敢傾拙訥上顯高明臣某中謝伏念臣本以妄庸早由平進一經之學乃自守之迂儒十駕其驚終不堪於遠用徒以日暮千載遭逢兩朝擢貳鈞衡坐淹歲月國恩未報但虞墳壑以遺差金鼎已成豈謂攀胡之莫及幸遇皇帝陛下重離繼照正統當大萬物覩而咸忻大號渙其均慶致茲屏朽亦玷光華然夫位高而疾顛者是亦其勢然器滿而必覆者蓋由於量過敢忘戒懼誠迫懇私伏望皇帝陛下特軫睿慈俯矜愚守當萬機之新政收厚賞於無功則臣雖蒲柳之易一作已衰尙冀涓埃於後效

謝單恩轉左丞表

臣某言云云大慶均行騰流而甚渥鴻恩曲被俯僂以無容臣某中謝伏念臣性質迂愚器能淺陋言不足以備典謨之與學不足以通治亂之原徒以早荷兩朝之誤知拔自孤生而獎用疲篤雖一作難勉訖無補於毫分歲月屢遷猶坐食於寵祿方懼黜幽之典敢希冒進之榮此蓋伏遇皇帝陛下光紹寶圖惟新聖政繼離明而大照推乾施以無偏致此妄庸首霑渙汗臣敢不退思警懼益勵衰疲感風雲際會之難依日月光華之末少圖後効冀盡夙心

表奏書啓四六集卷第三

表奏書啓四六集卷第四 集九十三

乞根究蔣之奇彈疏劄子治平四年二月

臣近因誤於布衣下服紫襖爲御史所彈臣即時於私第待罪蒙聖恩差中使傳宣召入中書供職今竊聞蔣之奇再有文字誣臣以家私事臣忝荷國恩備員政府橫被汗辱情實難堪雖聖明洞照察臣非辜而中外傳聞不可家至而戶曉欲望聖慈解臣重任以之奇所奏出付外庭公行推究以辨虛實願示多方取進止

再乞根究蔣之奇彈疏劄子

臣昨日曾有奏陳爲臺官蔣之奇誣奏臣以家私事乞以之奇所奏出付外庭公行推究以辨虛實未蒙降出施行臣夙夕思維之奇誣罔臣者乃是禽獸不爲之醜行天地不容之大惡臣若有之萬死不足以塞責臣若無之豈得含胡隱忍不乞一作真辨明伏况陛下聖政惟新萬方幽遠咸仰朝廷至公不疑爲辨曲直而臣身爲近臣忝列政府今之奇所誣臣之事苟有之是犯天下之大惡無之是負天下之至冤犯大惡而不誅負至冤而不雪則上累聖政其體不細由是言之則朝廷亦不可含胡不爲臣辨明也大抵小人欲中傷人者必以曖昧之事貴於難明易爲誣汙然而欲以無根之謗絕無形迹便可加人則人誰不可誣人人誰能自保欲望聖慈特選公正之臣爲臣辨理先賜詰問之奇所言是臣聞門內事之奇所得必有從來因何彰敗必有蹤跡據其所指便可推尋盡理根窮必見虛實若實則臣甘從斧鉞若虛則朝廷典法必有所歸如九臣所請乞以臣劄子并蔣之奇所奏降出施行

乞罷政事第一表

臣某言臣聞事君之節雖盡瘁以爲期量力而行有不能而則止敢讀蓋高之聽濼陳至悃之誠臣某中謝伏念臣本出羈單粗知業履逢右文崇學之代竊並羣英之遊當好問納諫之朝獲從諸老之後

遂蒙費用叨貳機衡幸四海之無虞得容口素荷三聖之殊遇特察孤忠坐貪寵祿之榮不覺歲時之久而餘齡擗晚百疾交侵四體羸甚已衰之蒲柳雙瞳晬昏幾不辨於羈馱頃自去秋累陳愚款先皇帝惻然垂憫慰以恩言許至新年俾解重任萬乘之仙遊忽遠孤臣之素願莫從方今聖統嗣興皇明繼照人神胥悅中外晏安願無避事之嫌敢遂乞身之請伏望皇帝陛下特回睿眷俯察懦衷念孤根之易危哀小器之難用置之閑處賜以保全如此則天地之仁曲從於物性犬馬之報尙識於主恩

又乞罷任根究蔣之奇言事劄子

臣爲臺官蔣之奇誣奏陰私事已具劄子乞差官根究明辨虛實伏緣臣見任政府在於事體理合避嫌欲望聖慈先罷臣參知政事除一外任差遣臣既解去事權庶使所差之官無所畏避得以盡公根究臣竊慮朝廷未明虛實不欲直以此事罷臣職任臣已別具表章伏乞早賜施行

神宗御札治平四年二月二十四日差中使朱可道賜

春寒安否前事朕已累次親批出詰問因依從來要卿知 付歐陽

脩

謝賜手詔劄子

臣伏蒙聖慈差內臣朱可道傳宣撫問仍賜臣手詔委曲慰安臣孤危之迹橫爲言事者誣以莫大之罪自非遭遇聖明特爲窮究則當爲冤死之鬼然事出曖昧上煩天造累行詰問必見蹤由臣仰恃聖君在上內省於心必冀終獲辨雪臣無任捧詔涕泗感天荷聖激切屏營之至謹奏

乞詰問蔣之奇言事劄子

臣近爲蔣之奇誣奏臣以陰私事前日再具劄子乞詰問之奇自何所得因何蹤跡彰敗乞差官據其所指推究虛實伏緣之奇所誣臣

者乃是非人所爲之大惡人神共怒必殺無赦之罪傳聞中外駭聽四方四方之人以謂朝廷執政之臣犯十惡死罪乃曠世所無之事皆延首傾耳聽朝廷如何處置惟至公以服天下之心若實有之則必明著事迹暴揚其惡顯戮都市以快天下之怒若其虛妄使的然明白亦必明著其事彰示四方以釋天下之疑至如臣者若實有之則當萬死若實無之合窮究本末辨理明白亦不容苟生若托以曖昧出於風聞臣雖前有鼎鑊後有鈇鉞必不能中止也以此言之繫天下之瞻望繫朝廷之得失繫臣命之生死其可忽乎其得已乎伏乞以臣所奏詰問蔣之奇得於何人其人所說有何事更不得徒說虛辭直具所說人姓名及所聞事狀據實聞奏臣所瀝血懇必望朝廷理辨虛實乞不留中

再乞詰問蔣之奇言事劄子

臣近累陳血懇煩瀆天聽爲彭思永蔣之奇誣奏臣陰私事乞辨明虛實伏蒙聖恩累賜詰問至今未聞有所指陳竊以臺憲之司雖許風聞言事然所謂風聞者謂事不親見而有聞於他人耳然其說必有其人其人必有姓名若所聞小事則有不足論若所聞大事繫人命之生死則必須審問所說之人事狀虛實然後可以上言况之奇明列章疏伏地頓首堅請必行若不明見事狀審知虛實豈敢果決如此及朝廷窮究又却不指定所聞之人姓名亦不明言有何事迹但飾游辭無所的確蓋之奇初以大惡誣臣期朝廷更不推究便有行遣及累加詰問遂至辭窮也不然思永之奇懼見指說出所說人姓名後朝廷推鞠必見其虛妄所以諱而不言也臣忝列政府動繫國體不幸枉遭誣陷惟賴朝廷至公推究別證虛實使罪有所歸則臣雖死之日猶生之年也臣竊慮朝廷須所說人姓名思永之奇無所指說必以朝廷拒諫爲言此乃辭窮理屈而妄說也臣謂若朝廷聞言事不行則是拒絕言者今以所言事體不可直行須當根究虛

實乃是用臺官之言即須行遣爾豈足爲拒諫也

封進批出蔣之奇文字劄子

臣以拙直受恩兩朝惟以至公之心爲報國之効凡於親舊不敢有纖介阿私是致怨怒臣深者造爲飛語誣臣以家私陰事是人倫之大惡所以語駭人聽易於傳布竊以言事之臣謂之天子耳目之官本期裨益聰明若聞外有怨家仇人造作飛語中傷執政之臣正當奮然嫉惡爲臣根窮起謗之人辨別虛實明其誣罔使後凶人不敢陷害良善以彰朝廷之明此乃言事之職今思永心知事無實狀而不能爲臣辨明反碌碌隨衆騰口搖舌蔣之奇專用怨仇人飛語便以虛爲實上惑聖聰及至朝廷再三詰問須要事實則各不能明指一人之言明陳一事之據思永既云無實狀則知虛妄可知之奇則飾游辭謂風聞於衆且臺官雖許風聞而朝廷行事豈可不辨虛實大凡可駭之語易於傳布假如怨仇之人有誣大臣以叛逆不道者飛語一出則必騰口相傳豈可便以傳聞之衆致大臣族誅如此則爲大臣者終日恐懼彌縫不暇何敢盡公行事以身當怨而一夫之怒飛語騰出可以搖動朝廷則正人端士不立足矣以此言之則思永之奇專用風聞惑亂聖聰爲耳目之官罔上欺君其害豈細今閭巷小民有罪猶須證驗分明案節圓備方可行刑之奇言臣死罪未明虛實豈可含糊伏乞朝廷以至公之明必爲分別令事理窮盡止於兩端不過虛與實而已實則臣當死虛則之奇安得無罪使事實而臣不死不足以顯之奇之言使事虛不罪之奇不足以雪臣之冤枉臣非敢固惜各位不自引去但以冤若不得雪則身是罪人朝廷自當行法豈容臣自引退若虛則幸望朝廷辨別分明使中外之人知臣無罪然後可以容臣自陳引去臣初乞朝廷差官根究虛實故當乞解權任以避嫌今既蒙朝廷直行詰問故臣合杜門俟命乞不留中降出施行

乞辨明蔣之奇言事劄子

臣先於慶曆中擢任諫官臣感激仁宗恩遇不敢顧身力排姦邪不避仇怨舉朝之人側目切齒惡臣如讎適會臣有一妹夫張龜正前妻女嫁臣一疎族同居姪處於守官處一作所與人犯姦是時錢明逸為諫官遂言臣侵欺本人財物與之有私既蒙朝廷置獄窮勸並無實狀事得辨明而當時執政之臣惡臣者衆其陰私事雖已辨明猶用財物不明降臣知滁州今惟趙槩知此事甚詳若非仁宗至聖至明察臣無辜為臣窮究則臣豈復更有今日仁宗豈有用臣至此今臺官方舉前事彈錢明逸陷害良善不意蔣之奇自又效尤欲望朝廷特加裁察若以蔣之奇所對語無事實知其虛妄乞早賜明告中外以辨臣冤若猶疑於虛實之間則乞更加盡理推窮辨正

再乞辨明蔣之奇言事劄子

臣近以蔣之奇誣奏臣家私事乞賜辨正杜門俟命今已多日雖蒙朝廷累賜詰問之奇則但云得自彭思永而思永又云事無實狀是暖一作舊昧之言若此便欲加臣十惡大罪雖州郡小民犯罪官司斷獄必未敢便斷其死臣孤拙無黨特被兩朝眷遇忝列政府橫被小人誣以禽獸不為之惡本因臣以至公報國以身當怨不徇親黨阿私至多積仇怨造作飛語中傷而以忠取禍之奇乃以虛為實欺天罔上及至朝廷詰問則辭窮理屈並無實狀指陳至於彭思永亦自言暖一作舊昧無實各自乞罷去若臣果有實狀何故惜而不言何故自言無實狀而自乞罷去以此見思永之奇專欲以暖一作舊昧之事惑亂聖聰使臣不能自辨冀望朝廷更不辨明便以風聞行法况聖君在上公道方行臣必不能枉受大惡之名當舉族碎首叫天號冤仰訴于闕庭必不能含胡而自止當陛下聖政惟新之日使執政之臣守闕號冤固知非朝廷美事然臣以惡名不可虛受將不得已而為之期於以事必辨而後止臣無任懇血哀號激切之至取

進止

神宗御札三月四日差中使朱可道賜

春暖久不相見安否數日來以言者汚卿以大惡朕曉夕在懷未嘗舒釋故累次批出再三詰問其從來事狀訖無以報前日見卿文字力要辨明遂自引過今日已令降黜仍出勝朝堂使中外知其虛妄事理既明人疑亦釋卿宜起視事如初無恤前言賜歐陽修

謝賜手詔劄子同日

臣今日伏蒙聖慈差中使朱可道傳宣撫問賜臣手詔為言者汚臣以大惡已令降黜仍出勝朝堂令中外知其虛妄勅臣宜起視事如初無恤前言者臣捧讀感咽不知涕泗之橫流竊伏自念天地父母能生臣身不能免臣於憂患陛下神聖聰明無幽不燭察臣孤危辨臣冤枉使臣不陷大惡得為完人至德大恩過於天地父母萬倍則臣餘生之命是陛下所延之命今日之身是陛下再造之身雖盡此命捐此身亦不能上報至德大恩之萬一而臣又有大罪者蒙國寵榮忝居重位處危機之地而自任拙直不防禍患怨仇所積謗怒交與當陛下即位之初外有機政之繁內有孝思感慕之戚於此之時致言事者以陰私之惡醜穢之言上黷聖聽煩陛下曉夕在懷為臣親加詰問特賜辨明臣之此罪何以自贖捫心自省何以自安臣無任感天荷聖歎懼涕泗激切屏營之至臣已依詔旨來日詣闕門祗候入見冀面天顏別陳血懇次

乞罷政事第二表

臣某言臣近貢封章乞解職任伏奉批答未賜允俞者臣聞高而必危蓋處易傾之勢滿則招損實存至戒之言敢再瀝於懇私輒自干於斧鉞臣某中謝伏念臣本以庸妄出於遭逢誤被國恩俾參政論材非適用而當重任之難智不周身而履危機之地既不能於阿徇故多積於怨仇謗怒之興紛紜靡一所持者聖君在上公道方行雖

構造中傷人言可畏而聰明聽察天鑒孔昭既悉辨於罔誣遂判分於枉直俾臣不陷大惡得爲完人今亂國之讒已蒙於遠屏立朝之士皆保於自安則臣仰銜再造之鴻慈正合捐軀而自效然念臣病羸之質年迫已衰寵祿之盈理難久處頃事先帝之日屢貢乞骸之言間奉德音亦蒙恩許一麾之請素志甚勤伏望皇帝陛下推天地之仁回日月之照閱其孤拙曲賜矜從予之一州俾自退處亦有民社可宣教條苟知盡瘁之方未失事君之節

第三表

臣某言臣近再上表乞解政事除一外郡差遣奉今月八日批答所乞宜不允者臣聞士之行己所慎者始終之不渝臣之事君所難者進退而合理苟無大過善退其身昔之爲臣全此者少臣頃侍先帝屢陳斯言今之懇誠蓋迫於此臣某中謝伏念臣識不足以通今古材不足以語經綸幸逢盛際之休明早自諸生而拔擢方其與儒學文章之選居言語侍從之流每蒙過獎於羣公常愧虛名之浮實暨晚叨於重任益可謂於得時何嘗敢傷一士之賢豈不樂得天下之譽而動皆臣忌毀必臣歸人之愛憎不應遽異臣之本末亦豈頓殊蓋以處非所宜用過其量惟是要權之地不勝指目之多周防所以履危而簡疎自任委曲所以從衆而拙直難移宜其舉足則蹈禍之機以身爲斂怨之府復盤桓而不去遂謗議以交與讒說震驚輿情共憤皇明洞照聖斷不疑孤臣獲雪於至寬四海共忻於新政至於賴天地保全之力脫風波險陷之危使臣散髮林丘幅巾衡巷以此沒地猶爲幸民况乎擁蓋垂檐其榮可喜撫民求瘼所寄非輕苟可效於勤勞亦寧分於內外伏望皇帝陛下曲回天造俯察愚衷許解劇繁處之閑僻物還其分庶獲遂於安全心匪無知豈敢忘於報效

又乞外郡第一劄子

臣前日獲對便坐已具血懇披陳爲臺官一作臣東誣臣以陰醜之

事臣聞詩曰中冓之言不可道也所可道也言之醜也蓋陰醜之事君子之所深惡猶不可自道於口而况上達君父之聽汚黷朝廷驚駭中外事雖起於誣罔然本臣而發此臣所以夙夜慙懼而無地自容也伏况當陛下即政之初日有軍國萬機之繁乃以人口不道之事上煩聖慮蒙陛下曉夕在懷親批詰問再三窮究得其虛妄之狀特賜行遣曉告中外使臣大寃獲雪人疑盡釋夫辨枉直雪幽冤以釋天下之疑以快輿情之憤此固陛下神聖聰明自是新政之一事然亦因臣致勞聖慮此亦臣所以夙夜慙懼而無地自容也祗此二事臣自修省已不能安然而上賴陛下至寬至仁必以此事是臣寮中傷臣非臣自作以紊煩朝廷以此必賜矜恕然臣有不得已而不能處者蓋臣所以致此大謗者本出怨仇之口由臣拙直多忤於物而在位已久積怨已多若使臣頓然變節勉學牢籠小人以弭怨謗非惟臣所不能亦非陛下所以任臣之意若使臣復居於位祗如前日所爲則臣恐怨家仇人以臣不去必須更爲朝廷生事臣亦終不能安况臣一二年來累爲言者攻擊心志摧沮加以衰病所侵兩目昏暗四支骨立願身已如此而人情又如此亦復何心貪冒榮寵伏望聖慈憫臣之志誠可哀矣察臣之迹實難安矣特許臣解罷除一外郡則天地保全之恩何以論報臣今已上第三表伏乞早賜降出施行

第二劄子

臣近者度屢懇誠乞解政事已三上表殆今累日夙夕俟命踟躕靡遑臣竊伏自思理宜罷退者其事非一臣聞所謂大臣者必能宣布上德叶和中外使人心悅豫朝政肅清此乃輔弼之任也臣性既簡拙恥爲阿徇又復愚暗不識禍機多積怨仇動遭指目謗怒毀辱不可勝言一二年來屢爲言事者攻擊以臣一人無日不煩君父不惟朝廷未嘗少靜而臣亦未嘗少安則臣之小一作不材不堪大用從

可知矣臣又思朝廷每用柄臣必取人望者以其爲衆人所服故使處衆人之上也今如臣者舉必爲衆人所怒動必爲衆人所怨讒謗忌嫉叢集於一身以此而居要任者八年矣其未陷於禍咎者臣竊自怪以爲晚也所賴者聖君在上朝廷至公察臣孤危辨正誣罔使臣不懼枉橫得爲完人臣於此時不自引去是不知進退矣臣竊見前世元勳舊德社稷之臣一有間隙尙或懼於禍咎而臣能薄材劣竊位已久語其勤則勞一作功效未著於毫髮詢於衆則怨毀已積於丘山所謂衆怒難犯孤根易危豈敢與人自結仇敵昨緣思永等誣臣以大惡之名於義不可虛受若不辨於今時則無以自明於後世故臣屢乞辨理者蓋事不獲已而爲之非敢與言事者爭勝負也而自思永等得罪以來言事者固已取於不勝若臣復處事權遷延不去彼必自疑而不安是臣下有衆人之怨嫉旁爲言事者切齒他人視之猶爲臣寒心顧臣何以自處伏望聖慈哀臣言之至懇察臣勢已難安予之一州俾自藏縮如此則臣大寬已雪既彰新政之清明孤迹獲安又荷聖恩之優假言事者但得臣去亦稍釋其忿必無疑而安處別不爲朝廷生事則臣之一去所利甚多惟乞出自一作必睿斷早賜允俞

第二劄子

臣今月二十日伏蒙聖恩以臣所上第三表乞解政事特降批答不允仍斷來章者聞命以還憂惶殞越懇誠所迫欲止不能臣以非才誤膺委用歲月已久不知引避而寵祿盈滿福過災生仇怨既多謗讒一作讒謗大作衆情不與孤迹已危陛下既已深察一有臣守而哀憐之矣臣之憂危迫切披肝瀝血之誠亦已屢瀆於天聰而陛下固已諒臣至誠至懇察臣事勢當去而無疑矣然而聖恩未忍遽許臣解罷者必以不欲令臣因言者而罷爾蓋自思永等遠竄勝朝堂告示以來中外皆知臣事已辨雪陛下至聖至明言事者不能動搖

朝廷矣今臣自以懇請與言事者不復相關若賜允俞是陛下出臣於萬死之中保全其終始而使之善退也如此則臣之大寬已蒙辨雪危迹又保安全陛下天地父母之恩自非殞骨糜軀何以論報臣自上三表後已兩具劄子披陳必已蒙省覽臣之血誠竭於是矣今更不敢煩言上顯睿聽惟乞聖慈哀憫早賜施行

謝傳宣撫問劄子治平四年三月壬申

臣今日伏蒙聖慈差中使傳宣撫問以臣累表乞解政事之職已除觀文殿學士刑部尚書知亳州仍問臣幾日朝參者臣近以迫切之誠累形章表上煩天聽合被罪誅乃蒙睿恩曲賜矜許既特加美職又超轉官資仍假善邦俾從私便臣孤危之迹已荷保全衰晚之年猶貪榮寵但以未受新命無由入謝又蒙聖造曲賜記錄丁寧慰諭趣其入見恩數優異舉族歡呼伏緣自二十六日後前後殿不坐臣欲乞候御殿日參假冀面天顏別披血懇次

辭刑部尚書劄子治平四年三月二十六日

臣今月二十六日伏蒙聖恩賜臣告勅各一道授臣刑部尚書充觀文殿學士知亳州臣猥以庸材久竊重任雖策勵奮奮訖無補報而在再歲月漸迫衰殘所以屢陳危懇之誠上干宸造者正以願避寵榮冀全衰朽而天私曲被恩命過優既加以美職又超轉官資臣竊尋前例參貳之職出處非一而推恩之數罕有若臣之優者况臣近遇單慶已叨遷秩未逾兩月恩典頻仍無功之賞度越常格非惟臣自循省莫知所措而名器所假人言謂何欲望聖慈憫臣孤拙察臣畏避寵榮之懇特許臣只以本官兼職或止轉一官庶俾少安常分臣誓竭晚節上報鴻恩今取進止

謝觀文殿學士刑部尚書表

職清書殿實爲儒者之榮望峻天臺仍忝刑官之重內循謹薄仰玷光華臣某中謝伏念臣稟質迂愚粗知業履因時幸會遂竊寵靈無

拾遺補闕之勤常陪法從非大冊高文之手久廁翰林晚綴宰寮俾聞國論荷三朝之眷遇每察懦衷幸四海之清平得容尸祿居滿盈而不戒積災釁以自貽屬聖統之嗣興赫皇明而繼照詎言詰服已大釋於羣疑危跡保全俾不虧於素守犬馬合思於報效桑榆奈迫於衰遲屢貢懇私上干聰睿遂蒙開允俾解繁機然而晚節餘生本期避寵清資顯秩益更貪榮被優渥之非常但凌兢而失措此蓋伏遇皇帝陛下聖神御極專育推仁閔孤拙之勢危無容自立謂疲駑之力竭難責遠圖曲軫至慈俯從誠請仍憐舊物特示殊恩顧非木石之頑宜識乾坤之造颯然素領雖難強於筋骸較若丹心猶自期於塵露

進承厚陵挽歌辭三首引狀治平四年閏二月

右臣伏蒙聖恩差臣知亳州軍州事見發赴本任次伏見大行皇帝將來八月遷坐于承厚陵中外羣臣咸進挽歌辭臣以非才久竊重任遭遇先帝蒙被聖知恩極昊天未知論報痛深喪考徒切攀號臣今謹撰成大行皇帝靈駕發引日挽歌辭三首謹隨狀上進伏候勅旨

亳州謝上表治平四年六月

臣某言伏蒙聖恩授臣觀文殿學士刑部尚書知亳州軍州事已於今月二日赴上訖者貳政非才雖獲奉身而退分符善地猶懷竊祿之慙祇荷寵靈惟知戰懼臣某中謝伏念臣章句腐儒之學也豈足經邦斗筭小器之量也寧堪大用而叨塵二府首尾八年荷三朝之誤知罄一心而盡瘁若乃樞機宜慎而見事輒言陷罪當前而橫身不避竊尋前載未有能全一昨怨出仇家構為死禍造謗於下者初若含沙之射影但期陰以中人宣言於廷者遂肆鳴梟之惡音孰不聞而掩耳賴聖神之在上廓日月之至明悉究調誣遂投讒賊再念臣性實甚愚而疎於接物事多輕信者蓋以至誠如彼匪人失於泛

變平居握手惟期道義之交延譽當朝常巧齒牙之論而未乾薦福之墨已變射羿之弓知士其難世必以臣為戒常情共惡人將不食其餘而臣與遊既昧於擇賢在滿不思於將覆自貽禍釁幾至顛隳上煩睿聖之保全得完名節於終始洎懇辭於重任尤深惻於皇慈雖避寵隆僅能去位而清資顯秩愈更叨榮莫逃僥倖之譏實負心顏之視斯蓋伏遇皇帝陛下乾坤大度堯舜至仁察臣自取於怨仇本由孤直憫臣力難於勉強蓋迫衰殘既獲免於非辜仍曲從於私欲遂同萬物俾無失所之嗟未盡餘生敢忘必報之效

謝賜仁宗御集表治平四年 月

臣某言伏準御藥院告報伏蒙聖慈賜臣仁宗御集一部一百卷者俾彼雲章方聯於寶軸刻之玉版忽被於恩頒臣某中謝恭惟仁宗皇帝睿哲聰明寬仁恭儉每虛心而訪道務嚮學以崇儒天縱生知臻作者之謂聖功高德威由煥乎其有文伏惟皇帝陛下纂紹不圖善繼先志惟仁祖發揮於衆製乃英考序述而成編昭如三光並照萬物法彼後世同符六經方副本之頒行非近輔而莫獲敢期睿眷尚及愚臣寵異羣邦光生節室載念臣出身寒苦自少遭逢晚蒙獎任之殊嘗與展歌之後捐軀論報餘生已負於素心拜賜為榮撫事但零於清血

亳州乞致仕第一表熙寧元年春

臣某言臣聞難進易退者禮經之格言知足不辱者道家之明戒苟貪榮而不止宜招損以自貽况災疾之所纏顧筋力之難強輒披悞悞自冒誅夷臣某中謝伏念臣生也多屯少雖有志而識不明於大體用不適於當時徒以荷三朝之誤知屬四方之無事遂容章句之學竊與機政之司遠更二府之繁蓋亦八年之久既不能遇事發憤慨然有所建明又不能與世浮沉默爾以為阿狗每多言而取怨積衆怒以難當繼逢時事之方艱思欲乞身而未獲不虞暗禍陷臣於

風波必死之淵上賴至仁脫臣於絞縛垂涎之口以至平生所守之名節晚暮未盡之年齡豈臣能於自全皆陛下之所賜既懇辭於重任仍假守於善邦固已坦無危疑幸此優逸而風霜所迫鬢髮凋殘憂患已多精神耗盡加之肺肝渴涸眼目耗昏去秋以來所苦增劇兩脛惟骨拜履俱艱雙瞳雖存黑白纒辨顧形骸之若此尸寵祿以何安伏望皇帝陛下特軫睿慈俯從人欲許還官政俾返田廬白首明時幸遭垂衣之治酣歌聖化願追擊壤之民雖居吠畝之間永荷乾坤之造

第一劄子

臣輒歷一作有血懇上干宸慈臣本以庸虛誤蒙獎擢一作擢用濫塵二府獲事二朝無德一作一事可稱無言一作一言可採既不能報國又不善謀身怨嫉謗讒喧騰衆口風波陷穽一作權併僅脫餘生憂患既多形神俱瘁齒髮凋落疾病侵陵故自數年以來竊有退休之志而臣猥以非才久叨重任值國家多事所以未敢遽言頃自去春伏蒙陛下矜憫孤危保全晚節許解政事得從外補臣於此時遂乞守毫一作乞守毫社蓋以去類最近便於私營及入辭之日亦具奏陳乞枉道至穎脩葺故居幸蒙聖恩皆賜允許臣自到毫以來始將暮歲一作歲暮舊苦瘠渴蓋已三年腰脚細瘦惟存皮骨行步拜起乘騎鞍馬俱覺艱難而眼目昏花氣暈侵蝕視一成兩僅分黑白職事至簡猶多妨廢坐口厚祿益所難安然臣嚮者不敢啓言而今乃輒茲有請者蓋以方今朝廷無事中外晏然臣亦幸無任責之重其進退之際既無所嫌避又不繫重輕故敢直以臣子之私誠自乞君父之憐憫臣以守官在外不得親伏旒宸之前縷陳悃悞臣今已具表章欲乞一致任名目就近於穎州居止以養殘年伏望聖慈特賜開許臣無任祈天俟命

第二表

臣某言臣近貢封章乞還官政伏奉詔答未賜允俞退自省循奚勝殞越臣聞神功不幸而萬物得以曲成者惟各從其欲天鑿孔昭而一言可以感動者在能致其誠敢傾虔至之心再瀆高明之聽臣某中謝伏念臣本以一介之賤叨塵二府之聯知直道以事君每師心而自信然而既多捐軀之效又無先覺之明用之已過其分而曾不自量毀者不堪其辱而莫知引去幸賴乾坤之再造得逃陷穽之危機仍許避於要權俾退安於晚節今乃苦於衰病莫自支持顧難冒於寵榮始欲收於骸骨敢期聖念過軫天慈謂雖迫於桑榆未忍弃於草莽竊以古今之制公襲不同蓋由兩漢而來雖處三公之貴每上還於印綬多自駕於車轅朝去朝廷暮歸田里一辭高爵遂列編民豈如至治之朝深篤愛賢之意每示隆恩之典以勸知止之人故雖有還政之名而仍享終身之祿固已不類昔時之士無殊居位之榮然則在臣素心雖切退休之志迹臣所乞尙虞僥倖之譏伏望皇帝陛下惻以深仁矜其至懇俾解方州之任遂歸環堵之居固將優游垂盡之年涵泳太平之樂惟辛勤白首迄無一善之稱孤負明時莫報三朝之德此爲慚恨何可勝陳

第二劄子

臣近以疾病衰遲再上表一作封章懇陳血懇乞一致任名目以養殘年聖恩憐憫不忍遽棄特降詔諭未賜允俞承命之際惟知感泣臣竊以七十之制雖著禮經而歷代以來人臣進退多不拘此有年已過而不得去者有年未及而可以去者蓋以人有賢愚理難一概一作致其或上智高才元勳舊德用捨去就繫朝廷得失輕重者故雖年已過之理不得去而人皆不以爲非也若中常之人碌碌備位存之既無所益去之亦無可思其用捨不爲得失去就不繫輕重其人苟能量分知止奉身而退朝廷則必嘉其趣尙而成就其志故雖年未及而特許其去而人亦不以爲非也彼中常之人者居常則無

足可稱及能識分自量不待年及而知止則尚有一節可取故人君推樂賢養士之心務欲變成其名節所以不待年及而亦一作方許其去也如臣愚陋不敢過自陳其不肖輒竊自比於中常之人所謂碌碌備位存之無所益去之無可思而用捨去就不繫朝廷得失輕重者臣某是也然臣比於中常之人猶有不及者貪冒榮寵過其涯分荷三朝之恩德而無所報効被小人之摧辱而不能遠去固非有識分知止之明而直以疾病侵陵心神昏耗力不能勉然後不得已而自陳耳此臣自媿於心者也雖然臣以犬馬之賤蒙陛下天地養育之恩始終保全以至今日惟晚暮一節尚賴君父之仁獎成其志臣今已具第二表陳乞伏望聖慈特賜開許一作九今取進止

第三表

臣某言臣近者再貢封章乞從致仕伏奉詔書宜不允者竊稽典禮退止一辭上黷睿慈臣今三請雖未忍弄捐之意曲煩再論以丁寧而不勝迫切之誠尚冀終蒙於開可臣某中謝伏念臣稟生至陋力學不強徒以略誦仁義之言粗知廉恥之節早緣一藝擢自諸生智非先見之明材無適用之敏但知報國不敢謀身性枉尋直尺之不為故圓鑿方柄而難合以至被侵凌於羣小遭詆毀之百端而臣忍辱強顏踰時歷歲蓋思責任之方重顧於去就而難輕今者幸蒙寬恩獲保孤拙脫於死地優以便藩既無效於勤勞徒坐尸於寵祿加以艱危備歷憂患已多老將疾以偕來形與神而俱瘁昔而少健駘驢之伎已殫今也病衰駑馬之疲難強始露肺肝之懇乞收骸骨而歸迹臣前後之心可見遲徊之久不敢為於妄舉蓋幸冀於必從伏望皇帝陛下推天地之仁垂日月之照察臣既非狷憤以肆一朝之忿又非矯激而希高世之名本由多難之餘誠以不能而止矜其朽德賜以哀憐許上印章退居田里使病瘳癘盡爾天年斥鷃逍遙遂其物性幸克成於素志惟仰賴於鴻私

第三劄子

臣輒有血懇上干天慈意迫言煩合從誅戮臣近以衰年疾病三上表章乞一致仕名目伏蒙聖恩一作慈恩降詔諭未賜允俞祗服訓辭惟知感涕臣聞陳力就列不能者止此臣子之常分也臣以庸謬遭遇三朝誤被獎擢叨塵二府論其報効初無取一作補於毫分積為怨仇則不勝於詆訾雖忠邪善惡上則難逃聖鑒之明毀譽是非下則一付至公之論可以撫心省己自信不疑其如蹇拙孤危亦已甚矣而猶貪冒榮寵不知進退以至橫遭詆陷幾至顛擠上賴陛下推天地父母之恩以保全之察其誠心許解重任假以善地從其私便偷安苟祿優幸已多而臣量盈器極福過災生衰疾所嬰積年滋甚中虛渴酒若注漏卮腰脚伶俜僅存皮骨舊患兩目氣暈侵蝕日加昏暗簽書文字轉覺艱難一郡之間事多曠廢是敢直露肺肝願還印綬而皇慈垂惻未忍遽弃三賜詔諭慰以恩言中外之人皆知聖君恩禮之數過厚於臣者至矣而臣之懇悃迫切不能自止之誠亦已至矣伏望聖慈憫臣衰殘哀臣懇迫特賜允臣累表所乞俾以本官致仕一作政歸老田間一作置則臣雖死之年猶生之日今取進止

第四表

臣某言臣累貢封章乞從致政伏奉詔書所乞宜不允者未忍遽捐幸曲憐於舊物尚茲再黷蓋中迫於危誠進冒誅夷俯深殞越臣某中謝伏念臣以一介無能之賤荷三朝特達之知仁宗擢自諸生俾參二府先帝力排羣議深察孤忠暨逢神聖之纂臨竊幸風雲之感會至於辨正誣枉保全始終雖天地之施無私恩非責報而犬馬之微自效力不逮心繼之衰疾之纏綿加以年齡之晚暮寵榮既過小器盈而必顛筋力已疲飛鳥倦而思止輒露乞身之請願諧解組之歸而皇慈惻然明詔屢下示廓含容之大度慰安憔悴之餘生祗服

訓辭惟知感涕然而忠信所以事上理無弗踐之空言進退各有其宜力或不能而當止雖禮著引年之制必待及時而身有負薪之憂亦容辭仕是敢再殫悃悃仰冀哀矜伏望皇帝陛下軫堯舜之深仁推乾坤之曲造憫其確至賜以允俞俾還穎尾之居遂養漳濱之病再念臣早從壯歲粗學文辭久冒榮階常豐祿賜尚能遇樵夫而談道宣上德以諭愚民與故老而揮金均君恩而榮里巷此聯一作談王道揮賜金似衍二字以終晚節永荷鴻私

第四劄子

臣近者累具章表劄子披述懇誠上干宸造乞一致仕名目歸老田廬伏蒙五降詔書未賜俞允訓諭丁寧恩意深至捧讀之際惟知感泣而臣情迫於中不能自止者蓋以疾病侵攻心志衰盡欲於未填溝壑之間自爲苟且朝暮之計是敢更瀝肝膈一作膺冀蒙哀憐臣自治平二年已來遽得瘡渴四肢瘦削脚膝尤甚行步拜起乘騎鞍馬近益艱難而兩目昏暗多年舊疾氣暈侵蝕積日轉深視瞻恍惚一作恍恍數步之外不辨人物至於公家文字看讀簽書動成妨廢臣本庸常之人非有深識遠慮每見比來臣僚多因疾病致仕其人既遂閑退往往稍復康安一作寧臣伏自念無才無能叨竊榮寵滿盈之罰福過災生亦欲量分知止辭去官祿庶於晚暮之年少免災疾之苦又臣所患眼目一作疾自今年春夏以來日更增加其勢未止惟恐年歲之間遂成廢疾若幸於未廢之前獲遂退休之請與其病廢尚竊美名臣之愚慮所希實止於此臣遭遇明聖過蒙知獎其孤危蹇拙之迹荷保全終始之恩可謂至矣而未知報効遽迫病衰天心仁憫必垂矜惻臣不敢避煩言屢贖之罪今已再具表陳乞伏望聖慈特賜開許今取進止

第五表

臣某言臣近者累具陳乞願還官政伏蒙聖慈五降詔書未賜俞允

上恩曲諭已至矣而丁寧下愚弗移但頑然而迷執論罪合當於誅戮原情尚冀於矜從臣某中謝伏念臣以空言少實之文守泥古不通之學遭逢亨會玷竊寵榮祿利已豐乃辭臣力息私未報輒欲便身推是以言固難逃責若乃艱危險阻僅存將盡之餘齡沮辱摧傷無復平生之壯氣加以形骸衰頹疾病侵凌顧難戀於軒裳遂退甘於畎畝語其此志又若可哀自伸五請之勤已涉三時之頃天慈憫隱聖度優容謂駕馬雖疲念服轅之已久而著轡至賤閱舊物而不志固當上體至仁勉安厥位而夏秋交際痾疹日增弱體零丁惟存骨立昏矇耗督常若冥行既未知痊損之期終當廢去而苟遂退休之懇尚竊美名是敢更殫悃悃之私冀動高明之聽伏望皇帝陛下推乾坤亨育之施回日月照臨之光少寬屢贖之刑俯徇至誠之請庶使戒滿盈而知止免災疾以全生老安治世之和永荷終身之賜

第五乞守舊任劄子熙寧元年 月

臣今月六日進樞密院遞到詔書一道以臣上第五表乞致仕伏蒙聖恩未賜俞允者伏念臣以庸虛淺末之學遭遇三朝荷非常不次之恩寵未知報効之方而遽迫衰病自懼盈滿思慕古人知止之節願於聖世獲遂退休陛下仁聖寬慈俯哀誠悃既恕其屢贖之罪未加誅戮而又推天地父母之恩不忍遽令退去六降詔書丁寧訓諭感極惟泣不知所容再念臣昨蒙恩許守此便郡以養衰殘今到任已及一年蓋爲脚膝乘騎鞍馬艱難憂慮非特別有移替欲望聖慈許臣且更於此將理一二年間若稍獲安痊則不敢上煩聖聽臣以孤危蹇難之迹荷陛下始終保全之恩以至今日猶以衰殘疾病之懇煩君父含容養育之私臣無任

表奏書啓四大集卷第四

表奏書啓四六集卷第五 集九十四

辭免青州第一劄子熙寧元年八月九日

臣今月八日準樞密院遞到誥勅各一道蒙恩授臣兵部尚書依前觀文殿學士知青州者伏念臣近以疾病衰殘累上表章陳乞致仕天慈憫惻六降詔書未賜俞允臣以訓諭丁寧不敢更煩睿聽然臣久患脚膝乘騎鞍馬艱難又到任已踰一年深慮非特別有移替已具劄子奏陳乞且於亳州將理一二年間若稍獲痊安冀可陳力敢謂聖恩優異命出非常超轉官資移委大郡再念臣累年瘠渴衆所具知肌體瘦削精神昏耗本以衰羸懼難勉勵遂乞休致今青州所管一路寄任至重實藉幹才以臣居之必至曠敗兼臣所患脚膝道路乘騎鞍馬艱難欲望聖慈特賜矜察許臣且守舊任冀得將理衰殘所有誥勅臣未敢祇受已送軍資庫寄納今取進止

第二劄子熙寧元年八月二十八日

臣今月二十七日準樞密院遞到詔書一道以臣辭免青州恩命所乞宜不允者臣竊惟表海名邦青爲重地聖恩優借以寵衰殘豈合固辭上煩宸聽伏念臣情有迫切不能自己者蓋臣近以疾病侵陵心志昏耗方瀝血懇乞從退休陛下曲賜矜憐不忍廢棄丁寧訓諭未賜俞允今則忽被新恩有此遷擢乃是臣乞退休而得進秩方稱疾而領要任則臣嚮所陳請矯激欺詐以要恩寵之罪何以自逃雖天度寬仁未以此責臣而臣之心願何以自處使臣筋力可以勉強猶當陳述義理必冀獲辭以免清議之責况臣衰病羸悴實如累表所陳陛下推天地父母之恩未忍廢退且令苟祿養疾於便郡臣已不勝僥倖之慙豈敢更望遷進况亳州於近邦之中尤爲善地前後曾任兩府臣寮如陳執中宋庠皆得養疾於此者甚多伏望聖慈憫臣衰病哀臣誠惓惓俾臣且守舊任更將理一二年間苟其筋力稍完則臣盡瘁薄効豈無犬馬識恩知報之心所有降到詔勅臣不敢祇

受見在本州軍資庫寄納伏乞早賜許臣繳納臣無任

第二劄子熙寧元年九月

臣今月十四日準樞密院遞到詔書一道以臣辭免青州恩命所辭宜不允及準中書劄子奉聖旨令臣便受勅告疾速發赴青州本任者伏念臣自去春蒙恩許解重任俾守便郡以養衰殘方及一年忽被恩渥超轉官資移委藩鎮聖恩眷異便當祇受豈合固辭上煩睿聽臣罪當萬死然念臣義迫情切不能自止者緣臣久患眼目脚膝心志昏耗自懼盈滿乞從退休六蒙詔諭丁寧深至臣上體聖眷殊常未敢固辭再讀方且乞更將理一二年冀少痊安庶可勉彊而不圖遽被遷擢之命臣竊思聖恩本以憫臣憔悴加以寵榮以慰臣之衰暮而臣衰薄羸危不能上副恩眷今進退皆觸於罪戾蓋臣若進而祇受則有連章累懇矯激欺詐以邀恩寵之罪而其罪大若退而懇辭則有稽違君命煩言屢黷之罪然比於矯詐邀恩則其罪似輕在臣愚計自擇則固當逃大罪而就輕罪臣又竊惟陛下所以保全愛惜臣者至深至厚矣亦必不使臣至於大罪也故臣披瀝肝血不敢避煩言屢黷之誅臣所患眼目脚前奏已具陳述不敢虛矯欲望聖慈於未許臣休致間且令臣守舊任便於將理所有勅告見寄納本州軍資庫稽留君命多日臣曉夕憂惶如履冰炭伏乞早賜許臣繳納臣無任

辭轉兵部尚書劄子熙寧元年九月

臣近蒙恩除臣兵部尚書移知青州臣已三具劄子辭免伏奉今月二十五日詔書所辭宜不允者聖恩優異訓諭丁寧便當祇命而行豈合上煩睿聽罪宜誅戮無以自逃然臣懇血之誠猶有不能自己者伏念臣本以衰羸疾病方乞退休遽茲遷擢義迫難安所以懇祈辭免至於恩典超優遷轉頻數使臣不因疾病乞退亦合懇辭蓋臣近自去春由尚書吏部侍郎轉左丞未逾兩月又超轉三資除刑部

尚書今纔逾歲又超轉兩資尚書六曹一歲之間超轉其五無功之賞公議豈容此臣所以不避煩言屢瀆之罪而上干宸造也然臣已三被詔書慰諭深切進退惶惑不知所措敢不力勉衰殘上副恩眷臣今更不敢辭免青州差遣若得祇守舊官而往庶幾可免矯激邀求之責伏望聖慈察臣悃悞一作迫特許免臣轉官恩命繳納近降諸勅所有青州差勅臣見別候指揮今取進止

青州謝上表熙寧元年十月

臣某言伏蒙聖慈特授臣兵部尚書依前觀文殿學士知青州軍州事充京東東路安撫使臣已於今月二十七日赴上訖掌國五兵叨進中臺之秩宣風一面俾綏東土之人祇荷寵靈徒知殞越臣某中謝伏念臣學非通敏材實空疎幸逢千載之休明誤被三朝之獎擢久陪法從嘗與政機國恩未報而身已先衰世塗可畏而命亦多蹇頃緣災疾遂決退休敢期上惻於皇慈未忍遽捐於舊物而復過推優渥以慰羸殘惟孤拙之無堪蹈艱危一作虞而已甚世之所榮者臣之所懼人以爲寵者臣以爲憂是敢輒陳悃悞之誠累曠高明之聽迫於危慮罔避煩辭而聖度并容寬其罪戾恩言屢降譬以丁寧而擊井耕田各安其業詔條寬大而奉法守職足以脩官內省庸虛奚勝忝幸此蓋伏遇皇帝陛下日新求治天覆推仁謂響履雖爲於賤微尚堪收錄而犬馬苟豐於養猶可使令臣敢不策勵疲羸勤思夙夜庶期盡瘁少答鴻私

謝南郊加食邑五百戶表熙寧元年十一月

紫壇高峙式薦於精禋皇澤滂流推行於大慶庶膺寵數伏切兢營臣某中謝伏惟皇帝陛下出震膺期繼文與治百度講明於新政羣生涵泳於至和乃考舊章聿思報本謂三歲一郊之禮必舉以時俾四海九州之人並受其福遂因景至躬款陽丘萬國充庭其誰敢後

六卿聯事各以其官而臣職忝頒條位拘守土執豆蓬而祇役罔獲施勞速輝翟之餒餘遽蒙均惠無功受賞莫違俯僮之辭盡瘁事君惟蕃糜捐之効

謝傳宣撫問賜香藥銀合表熙寧二年三月

臣某言今月二十五日伏蒙聖慈差入內侍省西頭供奉官王延慶傳宣撫問仍賜臣香藥一銀合者祇命有嚴瞻天威而不遠撫躬增惕拜君賜以爲榮臣某中謝伏念臣本以妄庸幸緣遭際進陪國論莫贊萬機之微出布政條未聞五月之報屬北州之災鐘隣東土之封疆皇帝陛下子育黔黎仁深覆載閉扶攜而轉徙軫宵旰之焦勞而臣職在撫綏任叨寄委曲煩訓諭備極丁寧仍因使傳之馳特示恩頒之寵臣敢不恪官自警祇事以時惟善是從勉企前人之迹俾民受賜上寬明主之憂

謝賜漢書表熙寧二年三月

臣某言臣伏蒙聖恩賜臣新校定前漢書一部已於今日據進奏院遞到臣已祇受訖者俯躬承命拭目生輝臣某中謝竊以右文興化乃致治之所先著錄藏書須太平而大備惟漢室上繼三代之統而班史自成一家之書文或舛訛蓋共傳之已久詔加刊定俾後學之無疑一新方冊之文增煥祕書之府而奏篇之始方經衡石之程賜本之榮惟及鈞福之近敢期孤外特與恩頒此蓋伏遇皇帝陛下曲軫睿慈俯矜舊物謂其嘗與臣隣之列不忍遽遺憐其自喜文字之間俾之娛老然臣兩目昏耗雖嗟執卷之已艱十襲珍藏但誓傳家而永寶

乞壽州第一劄子熙寧二年冬

臣輒瀝誠懇上干天聰一作聽臣本以妄庸逢時竊祿寵榮踰分報効無聞頃在亳州嘗以疾病乞從休退聖恩憐憫未忍遽捐累降詔諭丁寧備至適會東秦關守誤被選差超轉兩官委以一路臣亦屢

陳朽憊既不獲辭便當策勵疴疲上副憂寄而臣迫以年齒晚暮近日以來心力俱耗事多健一作廢忘腰脚舊苦拜起艱難兩目氣暈尤更昏然僅分黑白雖勉力支持日虞曠敗兼臣到任已及一年有餘欲乞就移准頽間一差遣以便私計伏望聖慈特賜憐憫許差臣知壽州一次冀一作庶就閑僻苟養衰殘今取進止

第二劄子

臣近以疾病乞就移知壽州一次伏奉今月九日詔書宜不允者聖恩優假訓諭丁寧迫以危誠不能自默再煩睿聽罪合誅夷伏念臣舊患眼目已十餘年又苦渴淋亦五六歲年日加老病日加深暗瞳氣暈侵蝕幾盡脚膝瘦細行步艱難自入今歲以來心神又更昏耗事多健忘動輒差失九州一路寄任匪輕勉彊疴殘日虞曠敗况臣貪冒榮寵過分已多年齒衰遲又復如此理宜量力知止早自退休蓋臣昨在亳州累陳此懇伏蒙陛下至仁至慈憐憫舊物不忍遽棄屢頒恩詔委曲慰安欲令且更勉勵故臣今者未敢別有陳請祇欲求准頽之間一便郡苟竊俸祿以盡餘生庶幾上副聖君天地父母含容養育之恩伏望睿慈特賜矜許今取進止

謝擅止散青苗錢放罪表熙寧二年夏

臣某言今月二十九日準中書劄子以臣奏乞不俟秋料青苗錢事奉聖旨不合不聽候朝廷指揮擅行止散之罪特與放免者有罪必誅是爲彝典原情以恕特出深仁聞命驚慚省躬涕泗臣某誠惶誠恐伏念臣以一介之微賤荷三聖之疑知寵祿既豐初無報効筋骸已憊尚此遲徊曲蒙大度之并容誤委一方之寄任職當撫俗責在分憂方茲旰昃之勞心豈敢因循而避事昨遇國家新建官司而主計大商財利以均通分命出使之車交馳於郡縣悉發舊藏之鏹取息於民氓而臣方久苦於昏衰初莫詳其利害既已大諳於物議始知不便於人情亦嘗略陳衆弊之三冀補萬分之一屬再當於班給

顧已逼於會期雖具奏陳乃先擅止據茲專輒合被譴呵豈謂伏蒙皇帝陛下深軫睿慈俯矜朴拙免從吏議特貸刑章夫何草木之微曲被乾坤之施臣敢不益思祇畏更勵操脩戒小人之飾一作遂非希君子之改過冀圖薄效少答鴻私

辭宣徽使判太原府劄子熙寧三年四月

臣準今月二十九日入內東頭供奉官馮宗道到州傳宣撫問賜臣告勅各一道伏蒙聖慈除臣宣徽南院使判太原府事伏念臣久苦老疾自今春眼目疼痛及渴淋舊疾作脚膝細瘦行步艱難自二月已來交割却本州公事見今在假將理所有今來恩命優異寄任非輕以臣非才固不敢當兼以久嬰疾病未得痊安見別具奏章陳乞一小郡差遣次所有賜到勅告臣未敢祇受已於青州軍資庫寄納別聽指揮次今取進止

同前

臣前月二十九日伏蒙聖恩差中使賈賜臣告勅除臣宣徽南院使判太原府事臣尋已具奏陳未敢祇受今輒再瀝危懇上干天聰意迫言煩敢避誅戮伏念臣自至青州忽已踰歲適值年時豐稔盜訟稀少足以偷安竊祿而臣自以年齒日加衰殘日甚心識昏耗難於勉彊以謂一路九州不可常幸於無事每憂緩急有誤寄委所以去冬累陳衰病乞移一准頽間小郡未賜允俞之間遂接春陽戒候爲風氣上攻眼目驟加昏痛因此服藥過度發動渴淋舊患甚於初得疾時腰脚枯瘦行履艱難自三月後來不免兩次交割却本州公事在假將理百方治療終未痊損敢期於疾一作病告中忽被睿恩有此差遣一作選不惟寵命優異非臣敢當兼以久病淹延筋力難彊欲望聖慈曲賜哀憫特許檢會臣前所陳乞於准頽間移一小郡俾養殘年所有大原重任必難久闕人伏乞別選用人上副憂寄今取進止

同前五月一日

臣近蒙聖恩除臣宣徽南院使判太原府事續准中書劄子奉聖旨令臣依前降指揮疾速起發仍赴闕朝見訖發赴本任者伏念臣以老疾經春方在病假中忽被此恩命自揣才力難當寄任不敢祗受尋已具辭免仍乞一准願聞小郡見別聽候朝旨次今取進止

同前附馬供奉入奏

臣此者伏蒙聖旨除臣宣徽南院使判太原府事特差入內供奉官馮宗道賜臣告勅各一道兼傳宣撫問續准中書劄子奉聖旨令臣疾速起發仍赴闕朝見訖赴任者伏緣臣以非才久病心力衰耗難當擢任之寵兼自春以來疾病久在假告已於四月二十九日五月一日兩具劄子奏聞辭免恩命至今一無至今二字祗候提點刑獄席汝言到任交割公事別聽朝旨次欲望聖慈矜察早賜允俞今取聖旨

同前

臣今月二十二日一作二十日準進奏院遞到詔書一道伏蒙聖慈以臣辭免恩命未賜允俞者訓諭丁寧理宜祗受懇誠迫切尚敢煩言伏念臣本以妄庸誤叨器使寵榮踰分福過災生五七年來纏綿疾病嚮蒙聖念許解政機仍與近藩俾從優便臣以高秩一作舊厚祿非為養病之資竊位素餐難又偷安以處所以決謀休致累上封章陛下尚以一作念眷履之微曲憐舊物不忍遽棄屢賜安存既又徙一作賜以東州兼委兵民之任然而雖各一路不係邊防所管九州苦無軍馬加以歲時稍稔盜訟頗稀臣得以偶免曠愆蓋出天幸而臣常竊自念年齒日以嚮暮筋力知不復完與其臨事而后辭不若量分而先止故於一作自去冬再遷懇私乞一小郡冀就一作稍遷於淮賴得漸近於田廬敢期病告之中忽被優殊之命超轉一作遷時貴職付以極邊使臣未至一作遇衰殘尚非所受而况實難勉

彊敢不必辭再念臣自在亳州累乞致仕殆今三歲矣而口誦退休之言身貪榮進之寵既自違於言行豈不愧於心顏雖聖度之兼容必公議之難遏伏望睿慈曲加憫察特賜追還新命許換近賴一州則天地父母之恩敢忘犬馬之報今取進止

同前

臣今月十五日準樞密院遞到詔書一道伏蒙聖恩以臣辭免宣徽南院使判太原府事充河東四路經略安撫使恩命乞差知蔡州一次所乞宜不允者聖訓丁寧已煩再論臣誠迫切難避嚴誅臣竊以朝廷之用人臣子之事上蓋常察其進退不違於理則可以知其大節之所守而予之爵祿將以為寵則必使不犯清議之所非授受之間可謂兩難矣故高秩厚祿人臣所願必也處之無媿然後得以為榮或其義有不安所以容其自免今陛下寵臣者至矣任臣者優矣而臣不幸心懷自媿義有難安敢更竭此一作敢不更竭懇誠必期哀許伏念臣妄以迂儒遭逢三聖寵踰其分器小易盈爰自中年早苦多病臣因竊思前世為人臣者不待伏於床第然後稱疾不必廢其支體然後辭官但其一作以心志已衰筋力難彊則義當知止不可貪榮爾此臣所以不待年及累乞退休而蒙聖慈仁不忍遽棄六賜詔諭備極恩憐而臣上體聖眷之優殊不敢自決而引去然止當矜伏閑處偷安竊祿譬諸已乏之馬牛俾盡餘生於芻豢而已此乃粗為合理其如事則不然蓋臣前歲以老告便超兵部尚書今春以疾辭又轉宣徽南一無南字院使辭淮南一州則領潞青九州免京東一路則總并代四路是每求退則得進每辭少則獲多使其一出偶然人情猶或少恕若其每舉必爾則公議豈復可容雖幸人之未言顧臣何以自處此臣一無此字所謂心懷自媿義有難安者也使臣筋力猶彊尚合懇辭恩寵况臣疾病積有歲年已具奏陳累一作屢于聽覽臣亦竊聞議者以臣脚膝一作腰脚未至着床枕一作第

眼目猶可分人物便謂尚堪驅策致此誤蒙選任殊不知臣心志已衰精神並耗雖未伏枕實一行尸再念臣本出書生老於文字賦才非敏以學自愚故歷官以來多觸罪辜屢懼憂患蓋以不通時務不習人情加以晚年繼之衰疾識慮昏昧一作耗舉事乖違大抵時多喜於新奇則獨思守拙衆方興於功利則苟欲循常至於軍旅之間機宜之務則又非其所學素不經心蓋以病悴已衰之軀持昏昧乖違之見任素非所學之事一有敗闕雖戮臣身不足以塞責而誤國之計如後患何使臣粗有愛君憂國之心豈敢不思及此而貪榮苟得臣一作蓋已所宜必辭者三義所難安一也精力已衰二也用非所學三也然於三者之中其二尤急若其義所難安者幸蒙聖恩獲免俾臣不取非於清議而無愧於晚節則陛下之賜臣者榮於高秩厚祿之賜遠矣至於用非所學致誤國家之計貽朝廷之憂則當君父旰食憂勞求治之時聖慮所宜留意也伏望聖慈哀臣誠至之言察非矯僞之飾特賜允臣屢請追還新命一作更換一小州則臣雖死之日猶生之年今取進止

蔡州謝上表熙寧三年

臣某言臣伏奉勅命就差知蔡州軍州事已於九月二十七日赴上訖者負薪嬰疾獲辭四貴之遷剖竹分符尙忝一塵之守荷寬恩之優假撫朽質以兢慚臣某中謝伏念臣本出孤平一作貧粗親文藝遭逢亭會叨寵寵榮方犬馬之壯時早無施於尺寸况桑榆之晚景嗟已迫於衰遲一昨誤被選掄擢升要近付以一方之民政委之四路之兵機惟寄任之匪輕揣庸虛而內懼輒陳懇悃屢蹟高明敢冀天慈不違人欲還其舊職易以近藩惟古豫之名邦控長淮之右壤土風深厚物產豐饒雖宣化班條慚無異術而守官循法足以偷安此蓋伏遇皇帝陛下惻以至仁包之大度既不責其避事又曲從其便私哀爾厄殘容其僥倖仰被乾坤之造顧非木石之頑臣敢不勉

自勵其筋骸更殫盡瘁之節苟未填於溝壑尙知圖報之方

蔡州再乞致仕第一表熙寧四年四月

臣某言臣聞士之致政而傳家雖著禮經之常制昔有乞骸而稱疾不待年及者固多况臣久苦於病衰早歲已陳於悃悞敢茲再願仰冀哀憐臣某中謝伏念臣以一介之妾庸荷三朝之眷獎因時竊位嘗俾贊於萬機積日累年訖無稱於一善徒緣朴懇動觸機危每煩君父之保全不殞終身一作始終之名節嚮由災疾願謝軒裳披瀝肺肝累奏封而五上留連寵祿復歲序之三遷間被誤恩驟加擢任顧已難於策勵遂復力於懇辭上賴慈仁曲加憫惻既不責其避事又曲從其便私得善地之寬閑俾殘軀之養息而臣年日加老病益交攻新春以來舊苦增劇中瘠渴涸注若漏卮弱脛零丁兀如槁木加以晴瞳氣暈幾廢視瞻心識昏耗動多健忘雖聖君之念舊廓大度以兼容而曠職曠官實爲可畏貪榮竊食難久自安伏望皇帝陛下日月照臨乾坤亭育察其情實賜以矜從許解郡章歸榮里閑俾其酣詠樂時之感化優游爲世之幸民以畢餘生永依鴻造

又劄子

臣輒瀝懇私上千宸造愚誠所迫罪戾難逃臣自頃蒙恩許解政事即曾乞一近潁州差遣庶得漸謀歸者上荷至仁憫臣衰病尤其所乞差知亳州到任之明年遂乞致仕聖念惻然憐其舊物不忍廢置凡五上表章四具奏劄皆蒙詔答未賜允愈臣以不敢更爲煩瀆遂且中止尋又蒙恩超轉臣兵部尙書安撫淄青一路既不獲懇辭遂勉力就任而臣迫以昏衰事多曠廢甫及一年則又陳乞壽州亦以近潁冀便於歸老未得請間尋又蒙恩除臣宣徽使移守并門付以河東一路官益榮任益重而臣身益老病益加不勝憂懼之情所以累瀝血懇上煩天聽伏蒙睿慈察其誠實養疾便私悉如其請臣自到今任忽已半年幸值歲物豐成民一作盜訟稀少坐戶厚祿足以

偷安臣上戴陛下天地父母之恩未知論報之所而身與願違蓋自冬春以來舊苦愈增上榻下淋晝夜不止脚膝細瘦僅存皮骨行履跪拜艱難加以眼目昏暗視物睛痛有妨簽書看讀公家文字載念臣昏衰疾病既已累年量分知止亦非一日寵祿之榮無容久竊臣今輒具表章再伸舊請乞一致仕名目欲望聖慈特賜開許今取進止

第二表熙寧四年五月

臣某言臣近上表章乞從致仕伏奉詔書所乞宜不允者審訓丁寧曲加慰諭愚衷懇迫尚敢黷煩將再干於冕旒宜先伏於砧鎖臣某中謝伏念臣世惟寒陋少苦奇屯識不達於古今學僅知於章句各浮於實用之始見於無能器小易盈過則不勝於幾履徒以早違千齡之亨會誤蒙三聖之獎知寵榮既溢其涯憂患亦隨而至稟生素弱顧身未老而先衰大道甚夷嗟力不前而難強每念恩私之莫報兼之疾病以交攻爰於守毫之初遂決竄漳之計逮此三遷於歲律又更兩易於州符而大馬已疲理無復壯田廬甚邇今也其時是敢更殫螻蟻之誠仰冀乾坤之造况今時不乏士物咸遂生鳧鴈去來固不爲於多少爲魚上下皆自適於飛潛苟遂乞於殘骸庶少償其夙志伏望皇帝陛下哀憐舊物隱惻至仁察其有素非僞之誠成其識分知止之節曲從其欲賜報曰俞俾其解組官庭還車故里披裘散髮逍遙垂盡之年鑿井耕田歌詠太平之樂其爲榮幸曷可勝陳

又劄子

臣此者伏奉詔書以臣再乞致仕未賜允俞恩旨稠重伏讀感涕臣自熙寧元年初有陳乞迄今四年之間凡八上表章五具劄子其懇悃迫切言意重復干冒大慈煩黷聖聽固已可厭而可責矣而蒙陛下未加誅譴曲爲優容八被詔音一作答丁寧慰譬此天地父母之仁可謂至矣然臣猶有不得已者臣前嘗奏述古之爲臣不必伏於

床枕然後稱疾不待廢其支體然後辭官但其心力已衰不能勉強則自宜知止而不可貪榮此臣前次陳乞之時所志止於如此爾蓋自守毫迄今又已四年身比前日如老則氣血比前日益衰而疾病比前日益不支持但未伏床枕廢支體爾此臣不能自己者也臣竊伏思聖君久已察臣區區而未允其請者必以臣歷事三朝最爲舊物聖恩眷眷未忍廢棄而年又未及去之大早耳然臣前又嘗奏述今之致仕與古之人不同恩禮優幸不爲廢棄至於年未及而早去亦今昔人臣常事臣竊見實錄所載太宗時有大常少卿孔承恭者年纔六十一便乞致仕太宗皇帝欣然許之仍特降詔書褒獎以敦勸人倫蓋當時議者不以朝廷許承恭早去爲非而但稱承恭之善又以有臣如此可以勸勵風俗自爲朝廷美事也欲望聖慈少紆聽覽果若致仕優幸不爲廢棄雖年未及又議者不以爲非而反爲朝廷美事則理無可疑而臣若蒙哀憐得遂其請則上不損朝廷之體下不失優幸之恩而又竊知止之名爲一時之佳事則臣之受賜者多矣臣不勝意迫言煩惶懼激切俯伏待罪之至今取進止

第二表同前

臣某言今月二十一日準樞密院遞到詔書一道伏蒙聖慈以臣再乞致仕未賜允俞者恩深煦嫗感極涕洟雖情有迫於危心不知自止而辭已窮於累牘幾至無言惟以至誠期於必達自乞憐於君父不復訊於蒼龜臣某中謝伏念臣家世單平性姿中下少從官學本免饑寒不自意於遭逢遂進階於華顯然而羣材方茂蒲柳未秋而早衰衆駭並馳驚駘中道而先乏而沉荷難勝之任用竊逾分之寵榮風波憂畏而慮已深疾病侵凌而老亦至故自辭於機政卽願謝於軒裳蒙上聖之至仁念三朝之舊物每曲煩於訓諭久未忍於棄捐竊惟臣之事君必本忠信言不顧行是爲罔欺而臣口日誦於田間身坐貪於祿利可畏至公之議何施有覲之顏每自省循莫違啓

處是敢罔避再三之煩黷猶希萬一之矜從伏望皇帝陛下特軫天
慈俯回睿聽察前言之可復蓋屢請者有年哀下愚之不移俾卒成
於素志徇其所欲乞以殘骸臣若得上還印綬於有司自駕柴車而
卽路晚節知無於大過沒身永荷於鴻私

謝致仕表熙寧四年六月

臣某言今月十七日進奏院遞到勅告伏蒙聖恩除臣太子少師依
前觀文殿學士致仕者愚誠懇至曲軫於皇慈寵命優殊特加於常
品本期得謝更此叨榮臣某中謝伏念臣猥以庸近之材早違休明
之運不通之學既泥古以難施無用之文復虛言而少實是以三朝
被遇四紀服勞蒙德重於丘山論報亡於毫髮而年齡晚暮疾病疴
殘輒希知止於前人不待及期而後請自陳悃悃屢至瀆煩既久歷
於歲時始由蒙於開可仍超加於異數非止賜於殘骸道愧師儒乃
忝春宮之峻秩身居吠畝而兼書殿之清名至於頭垂兩鬢之霜毛
腰束九環之金帶雖異負薪之里一作重何殊衣錦之歸使閭巷咨
嗟共識聖君之念舊摺紳感悅皆希後福之有終豈惟愚臣獨受大
賜此蓋伏遇皇帝陛下無私覆物博愛推仁以其夙幸遭逢密契風
雲之感會曾經服御不忘簪履之賤微致此便蕃萃于衰朽雖伏櫪
之馬悲鳴難戀於君軒而曳尾之龜涵養未離於靈沼餘生易畢鴻
造難酬

乞免明堂陪位劄子熙寧四年八月

臣伏準今月二日詔書以明堂大禮特令臣赴闕陪位者臣竊惟大
饗之禮國家盛典千官分職以奉事萬國駿奔而在庭方以老病衰
殘退伏閭里尚蒙天慈曲加記錄特賜詔召俾與待祠之列此臣子
之至榮至幸豈臣克堪而臣不幸早嬰災疾纏綿累年近蒙聖恩許
以歸老而自春涉秋舊苦增劇脚膝細瘦行履拜跪艱難伏况祠事
恭虔出於彊力而臣迫此疾苦不獲祇赴召命無以上副君父記錄

愛憐之恩臣不勝惶恐

謝免明堂陪位表

合宮大啓爰講於上儀明詔忽頒俾祇於嚴召被恩言之優渥撫病
質以兢營臣某中謝伏惟皇帝陛下仁聖聰明憂勤慈儉遂羣生而
涵育臻至治於和平乃因萬物之成秋爰卽九筵而展禮陟降薦獻
百官以職而各供膺受福釐一人有慶而咸賴而臣近辭印紱方伏
田廬當與庶民並蒙餘澤取期養耆尚錄孤孱俾陪在外之臣來預
侍祠之列載念臣自緣災疾幸獲退休殆未踰時尙舊苦雖朝廷
禮樂之盛得與者爲榮而犬馬筋力之衰告疲而已久既不能於策
勵姑自信於奇屯太史滯於周南惟知歎命子牟瞻於魏闕但極馳
心

謝明堂禮畢宣賜表熙寧四年九月

臣某言臣今月十七日伏蒙聖恩特差右班殿直王昌賜臣衣一襲
金腰帶一條銀器一百五十兩絹一百五十疋米麵羊酒等者太室
精裡方集神明之貺華門增耀亦霑慶賜之優祇受以還兢營失措
臣某中謝伏惟皇帝陛下垂衣致治盡志奉先率循三歲之舊章時
舉季秋之大饗四方萬國執玉帛以盈庭羣卿百司潔豆遷而恭事
而臣以衰殘之病質荷寬假之深仁方居吠畝以偷安莫覩朝廷之
威禮靈書賜召不違祇命而趨使指就臨特被匪頒之寵此蓋伏遇
皇帝陛下容之大度推以至慈念簪履之雖微猶爲於舊物閱桑榆
之向暮俾慰其餘生惟嗟犬馬之已疲莫報乾坤之大施

代作三首續添

代進奉承天節絹狀

右臣伏以重熙纂歷載誕啓辰正守陳儀允昭於嘉會庶邦脩貢咸
効於駿奔前件絹三壞所宜九賦攸出備諸宰旅實織篋以非工竊
比野人得美芹而是獻虔誠斯至欣頌咸同

代進奉土貢狀

右臣伏以百嘉咸茂允賴聖功九貢所儀備存方志前件物出於爾
稅戴厥仙經疏密有程甘馨可采以時述職庶六尚之攸資向日傾
誠保億齡而是祝于浼宸造臣無任

代薛孺乞御篆神道碑狀

右臣輒瀝哀懇上干睿聽人子之志蓋急於顯親天心至仁仰冀於
從欲伏念臣先臣奎早以孤直遭逢威明自結主知參預國政謙言
忠節著在朝廷遺德餘芳宜刻金石伏見兩府舊臣之家所立神道
碑多蒙聖恩賜以御書名額臣今欲於先臣墓隧刻立碑名欲望聖
慈特賜御篆神道碑額所冀神翰之光照臨幽壤不獨榮其後嗣實
以勸於事君謹具狀陳乞以聞

表奏書啓四六集卷第五

表奏書啓四六集卷第六 集九十五

上胥學士僊啓天聖六年

某聞在昔築黃金之館首北路以爭趨附青雲之名使西山而起價
賦以求千里之迹者先其市骨得一字之寵者榮於袞章而况天下
之風采聳聞口吻之雌黃並出以未塗之俗擬說定鑒於妍媸目論
所加能令重於九鼎鼈端或倚可使逸於太霄是宜輝重躅宿春之
勞懷漫刺署里之字鋪論有素題品攸歸伏惟某官稟粹天英抽華
道秘虹蜺遠映拂霄堦而垂光輔徽攝文絢雲河而發藻遊士鄉而
著品入聖域以踐優爽爽之聲軼前良而通美瓊環其璞瑞昭世以
稱珍爰自覽輝下翔階木特起倚袂於羣英之轂頰弁乎千齡之辰
列坐棘以聯曹署法庭而奏讞若若懷綬宛轉於一綸翹翹聘車雍
容於半刺陳仲舉以題輿而擅美何恭祖以纒幘而馳稱垂腰佩刀
見賞三公之器追鋒給傳終膺雙武之皮第連最以推高賁初儀而
上獲公車以兩令而持牘縈几以十篇而奏文禪衣曲裾暮召大臺
之對尚方給札霈灑鴻都之毫雖西岷者冊書之藏是開乎仙室而
東壁者文章之府載郁於時風居爲顯化之階式是育材之地爰膺
麗正之選首被集仙之名白蟬芸簡以生香茲焉辟惡紫袷荷囊而
備問最近清光固已丹轂解朝天祿草經而擬聖金刀博學太一乘
藜而下觀頊緣泛駕之求亟發違行之訟取從吏對出檢猾商謂軒
冕之儻來視同於寄物履名教之中樂坦照乎清襟旋關掌於郡條
久從容於別乘一麾出守固雅尚之所存千里佩青乃上心之攸注
距棧江之清郡標軍壁之上游大鷲之警無譁賈室之繁甚富足以
坐棠聽訟閉閣凝神秀野頌春過衢畢而倦目清言捉麈臨雅俗以
鎮浮然而未央居半夜而生思安石以蒼生而待一作特起望之補
史意雅在於本朝主父出遊帝已嗟於見晚行奉一封之傳入墮二
節之趨見堂堂之委送之迄目對顛顛之表威不違顏登涉乎赤墀

之塗進重於高門之地卓然遠韻度越諸公露芳潤者漱其清芬仰
龍光者思其一作於未照英風有煥物議攸歸矧此妄庸蓋希品目
伏念某社稷樞機膏肓鈍昏抱器質以何堪賦天機而甚淺晞髮華
日徒跂於清流措足英躋終慚於遠到自遭家之不造早遂一作逢
生於百憂姑歎之音悲存乎手澤動明之韻遠失於先時西華以孤
露而見哀庚信以流離而多感矧復齊氣多緩穉筋其驚乏朽木之
先容無一錢而爲地旁魄而論都邑則被僉父之詞頑鈍以取世資
但聽蹶輪之曉終非令器第困窮塗一昨竊萬家之應書隨重車而
上計方策條對廬至狼狽拜雅儀失於盤辟甘觸聞而引去但歛
墨以蒙羞臥漳濱而養痾鼠身茲久弔湘纍而感賦夢語迷招當樹
之於無何宜匠者之不顧而或竊先生之餘論企諸公之未暉聞伯
夷之名增其懦氣伏海濱之下久以望風是敢強飾固陋之容庶伸
伏拜之謁綴窮愁之汗簡奏蕪累之庸音竊覬崇閣將塵隱几登太
山者小天下在培塿以宜衛奏咸池而張洞庭非蛙咬一作蛙蚊之
可度然一作伏遇某官量陂無際宇陰甚機一作濃推轂成猷噓枯
振德襄陽秋於皮裏不言備乎四時吞雲夢於胸中兼容盡於一介
幸望許承音旨少貶光塵曲垂褒采之私俾獲題評之目如是則六
轡在手驥足何滯於蟻封五色成文樂節或資於牛鐸荷恩有素累
牘奚陳

胥學士答啓

伏蒙春私以感製文筆二編先之長踐爲贊者恭以某人象與異稟
龍輔至珍奉奕世之貽謀克隆堂室傾羣言之妙旨深達淵源伏一
作服膺聖域以惟勤策足俊躋而迥異敏學該乎變貫英識極於覃
研秉節高奇發清吟於梁甫締交名勝綴雅聚於蘭臺飄飄之逸思
無窮籍籍之芳塵自遠偶叨一飛之翼行躋多士之魁何誤采於虛
聲辱遠垂於厚顧方披晬表遽捧雄篇爲恣探賞以忘勞信窺測而靡

暇幽意絢於道德高義薄於雲天飛染道麗以盈箱彫續紛華而滿
眼賞孫詩之零兩何止一章贊沈賦之確星豈惟數句固將備西岷
之玉府奚獨易東堂之桂枝尤矣難能誠哉可畏雖享衛自至靡資
左右之先容而名路共成敢惜齒牙之餘論

謝胥學士啓

近贊蕪音仰塵絀几載形答復深極褒稱弊帚無庸愧藏家而自享
重言外獎干尺牘以必珍始繩弱而匣開爛然在目旋骨驚而心折
至矣聞音退揆頑疎陰加震疊竊以昔者魯衮垂乎一字龍極於華
章汝月更乎坐評自成於往法得河南之口占多藏去以爲榮獲江
左之筆蹤則神明之來復至有不喜人事常堆案而弗謝靡答私書
或矜才而格物未若翠綉鳴玉之彥蘭臺金馬之英品風流坐正物
之源交士林忘公侯之貴俯存寒素之目毋密譽咳之音鬼墨流英
洒鴻都百金之筆犀談對客發荊州一日之函有煥私藏因爲殊遇
某控蒙惟舊操檢弗支乏沃若之軒髦有尾兮之長醜顧右臂而爲
彈早歎蕭疲雖左附之生楊徒能彈化爰以自重髮之交剪浴聖日
之光華勉紹箕裘懼墮門素冠乎枝木莫踐化人之場鈍若神槌爰
對囊錐之願一昨與偕外計續食縣官之郵召詰中臺果玷浮華之
目州間貶於素論篋衍棄於祭芻委末路而弗振與清塗而自隔然
或鼓舞至化呻吟變儒效騷人之鬱伊暮漳濱之模楷品之上下會
弗齒於鍾評擲中官商宜遠慚於孫賦奚辨麗而可紀徒執轂以興
譏何弗避於詆訶輒外彰於嗤鄙踉蹌短韻迨無取於繫轡盧胡見
貽乃自珍於乾璞所期用覆甌甌譬十年之練都投置皮箱資一笑
於相樂伏蒙某官憫菑愚之無似加品目之惟優醜以愛忘音緣賞
奏許上修名之謁獲伸拜德之恭後堂執經餼陪一肉之賜西齋坐
宴密親三雅之歡執如意以指譚務車轂而推引噴咳珠玉大小以
之成珍指顧飛沈眴於焉起色出乎望表溢乃情涯而復俛十倍

而增榮示一嘆而爲美當黯闇之多暇枉虞筆以摛文緝旨星稠駢
牋雲落布帛之言甚暖暴以秋陽齒牙之論所加重於大呂譬以明
月闇投於人不意此音猥來入耳謹當納藏行楮歸耀當閱襲以十
緝爲天下之至寶脫復一讀解體中之不安貴洛紙而爭傳與吳刀
而共布隱恩所及頂踵奚勝

謝國學解元啓天聖七年

右修啓伏覩解文濫膺名薦肄三合雅方列於甑筵旅百在庭遽陪
於方貢惟遯東之彌衆叨首舉以爲榮飾讓無從循涯有盜竊以姬
庭講治務多士之思皇漢席遲一作優賢以得人而爲威然皆謹能
書而上獻始揚進造之名隨計吏而與偕乃署秀廉之等一適謂之
有德九變選乎知言所以樂育羣材並贊郁乎之化潤色鴻業協暢
炳然之風用登至平皆由此道而況成均講藝昭五帝之遺文辟靡
環流聳三宮而對峙自京師而首善俾天下之向風卓爾不彝垂之
來葉皇上握褒文而統理坐法宮以垂精並舉豐規不揚先烈恢迓
衡之至治攬入毅之羣雄躬孝武招徠之勤紹承嘉敦樸之舉取之
數路並用文武以兼通託之百朋思講天人之相與並申辨論之法
持爲孝秀之門責士著以占名謹一作詳鄉評之清議一郡國之衆
咸一作或使得以應書百孝廉之羣皆勸令其趨駕固以厚一馬乘
軺之聘光東帛賁園之招張羅挂雲盡取於逸翮傾峴取琰無復於
遺珍超振古以無前契千齡而猶是而復詔大胥之掌版登遊倅於
上座謹從事以新書先考言而明試才可嘉於辨麗擇之妍詞言析
理以精詳求於闕論當此三道使無諱以著千篇對有百人盡揮毫
欲善其事自非行能高妙業履優殊關覽乎九家之流舍激乎六藝
之潤諱乎高誼而已久識必研幾施之當世而可行言皆詰理則何
以當重圍之樹棘並列於各聞佩後席之容刀得趨於臺試如脩者
天機甚淺俗韻素冥響未徹於一臯器不賈於當世瓊尾成乎長醜

寒素本乎後門撫頑鈍以無庸常拙艱而茹歎首戴瘡而服業早失
先疇書剖楹而發函僅存手澤毀瓦居慚於志或作求食不龜安可
以得封勉爲佔畢以呻吟動取戲儒之詬病晞髮光華之且徒慶於
逢辰策足英雄之躡奚能於遠到嘗因續食於縣次獲陪待詔於公
車對策無爲終以空言而罷雅拜非禮幾坐舉者之人辱皮相以堪
羞耗心氣而都盡諱窮極於反袂鍛羽嗟其觸隅學揣摩而不成反
嗤於丘嫂旁離騷而發詠幾吊於湘纍志銷落以堙沈迹零丁而孤
苦頃自脫身僑籍著錄師費學狗曲以見譏肆鱣堂而卒業入梁茲
久敢期英俊之並遊論都未成殆以僉荒而見隔對合鰭而記食驪
訛履以倦遊會深詔之急賢俾命鄉而論士靡慚街鬻之技上充跣
施之求輒以復來勉茲再鼓當翰場之斯闢接雋軌以並馳禿千兔
之毫筆不停而爭綴舉連帷之袂袍何白以大紛曾是齷生最當前
列躑躅燥吻舌不下以喬然彫琢曼詞思彌枯而兀若率有枚生之
累句僅同雕苑一作苑之後成日侍報聞陰圖引去夫何濫吹之曲
誤中程文之規用冠譽髦越陞上級屏間誤墨本無望於成蠅蠶下
焦桐豈有思於爲器玷茲褒實駭羣倫顧揚批以增差在冠蓋而
曷稱再循竊據實用覲顏此蓋伏遇某官表燭羣倫丹青上化雌黃
在口捉麈尾而不休翦拂長鳴託旌一作旌端而可逝因與民於三
物務推轂於諸生致此妄庸及於甄采敢不仰銜提獎益勵進修磨
鉢鈍以爲銛策蹇步而瞻驥跡兮箕舌已簸糠而在前沛乎鴻毛使
培風而直上用於知己答乃初心過此以還未知所措

謝進士及第啓天聖八年

楓宸蠖濩方贊趨而在庭雲幄觀深遽臚傳而唱第竊顧無庸一作
用之品仍躋異等之科祗服龍靈實增震悸竊以思皇之詠多士雅
頌播於姬庭間出之有異人文章炳乎漢德選知言於九變東都下
深詔之辭開孝秀之一門唐家有得賢之盛皆所以招徠時彥樂育

人材講求精稔之原潤色帝王一作皇之美卓爲往範垂照來今丕
哉文物之華屬我神靈之運國家右賢興治若古敷猷休聲塞乎淵
泉至德溥於烽火彌文上化疏壁水以環流儲精太寧坐蒿萊而講
道爛乎舜日之晏晏煥乎堯章之巍巍而且優游巖廊夢想豪俊下
賢書而旁午論上意之丁寧復詔策於廉科謹鄉能於歲舉馳封一
馬使者在道而相望翹首羣英天下嚮風而咸靡逮計車之偕上首
方貢以前陳委密侍之鉅賢先春闈而覆較擅筆署乎重棘奏可而
後行錦几坐乎中楹親臨而明試森陳奏牘速兩令之不勝精閱書
衡幾百斤而未止自匪該明治具佩服儒規行實譎乎微猷識字包
乎賢業浸明寢昌之畢講學際乎天人之交至纖至悉而不遺言達
於國家之體則何以上當乙覽榮中甲科聯俊又以服官陪英雄而
入轂如某者風猷靡立操植素淪樹樗甚乎液楠膏肓嗟乎昏鈍戴
枝冠而竦詣切愧命儒問天一作尺咫以不知終然懵學加以素鍾
舛運生邁百懼自翦髮以交垂已不髦而茹歎逐耕夫而衣襪早去
先疇署生版以占各轉隨僑籍流離末路台擬後塵借譽羣公之遊
本無題目接足諸生之後多見排根嗟感際之親逢忍窮途而自竄
陪貢廉於百羣每與計偕飲試墨之一升嘗從罷去退慚蹀躞數此
雙奇撫骨嗟乎淪鋪卷迹甘於藏密然而良裘學冶惜先芬而懼隳
母髮垂星感親聞之思養未及衰於駒齒勉自奮於驚筋乘下澤以
去鄉棄裂繻而爲警車騎之甚都之雅風塵有化俗之勞上國連衡
仰攀於俊軌橋門倚一作倚袂獲規於邦光會泛駕之求才輒應書
而充賦以孝廉而射策本無百六之能自銜鬻之上書蓋逾千數之
衆逮漢庭之籍奏咸以各聞同矚圍之去賓僅有存者顧一作故惟
庸安首玷甄陞獲召於公車之庭給試乎上方之札致狂言之誤擇
叨署第以開榮若若飛華交垂宛轉之綬諄諄其誨載聆郁穆之言
浸雲澤以芬流沐天光之下燭竊漸鉢鈍嘗廁翰場屢以下中之才

嘗乎第一之選宜不失於舊物期仰答於知人然其戰屢勝而後驕
 鼓至三而乃竭綆短楮小嗟遠用以奚勝弓撥矢錯前功之皆廢
 誠以九閩坐狄百戟森庭就列瞻天駭威臨於咫尺爭觀落筆紛立
 若於堵墻怙訝鈞庭之夢遊驟覺幹魂之驚去僅成牽課靡中科程
 瀆審覽之至精宜報聞於獨罷尙賴難施之過聽兼求箕斗之虛名
 謂簸揚之在前常先於羣彥以薦藉之良厚重違於大臣擬自下流
 參聯上列省逢辰之至幸實叨恩之有因此蓋某官闡譯帝猷雍容
 朝首粉澤光華之治表燭薦修之倫膺上心之東求主斯文之盟會
 言皆有味務推轂以彌勤先爲之容俾朽株之見用致茲辱瑣及此
 抽揚敢不慎服官箴遵修士則鞭後策足更希遠致之塗鎔金鈞泥
 尙依陶者之力誓殫用拙之効少酬再造之恩過此以還未知所措

代王狀元拱辰謝及第啓天聖八年

右某啓云云坐狄啓扉並集千人之俊賜袍在筇驟紆一采之綸矧
 惟最爾之軀仍玷褻然之首仰膺渥渙伏積震惶竊以周陳三物以
 賓賢必慎乎命鄉之選漢開敷路而求士乃感乎得人之稱用能暢
 郁乎之文一變而至道飾炳然之化三代以同風闡是齊明之猷允
 屬神靈之曰國家景炎興運赤伏膺圖敷四葉以重光式九圍而用
 又銷鋒偃革外憺乎靈威卷領垂衣坐朝乎夷憬上方穆然無事監
 于太清崇庠序以興文飾弓旌而招俊萃歌式宴咸預於計偕滄棘
 樹圍載嚴於籍奏敵中楹而親試署異等以精求所宜得命世之偉
 才爲一時之清選夫何么一作側陋前玷寵光如某者業履空疎才
 猷散戾門緒本乎寒素人品幾乎下中竊逢待旦之盛期浸被右文
 之上化激昂稚節策發蒙襟澆雜白以樹碑偶能於童戲炙簡青而
 嗜學常訪於師嚴徒有志於雕蟲僅不成於刻鵠陸機閱史尙靡識
 於攢翠枚臯屬文徒率成於軌轍早緣妄動竊企英游貢版齋行常
 從於未薦佩刀脫去尋觸於報聞何天幸之聿臻遵賢書之薦降濫

乎事舉猥以名聞洪惟聖治之光華蔚有俊才而選集並進乎千篇
 之牘精覽於百斤之衡會是孤生絕企殊級豈期庸腐偶中科程採
 乎一日之長冠乃諸生之列既行能之無取如世胃以非高蹠踣後
 塵迹靡參於俊軌雖黃餘論各不齒於人評驟從底下之才擢居第
 一之選顧揜裳之在列誠揚批以貽譏明命已行固無容於反汗多
 言可畏諒彌甚於鑠金豈非思致異才掛怒蛙而茲始將招駭足假
 死骨以爲先則何以靡遺讓薄之姿偶首清明之舉再省循而是懼
 實獎擢一作拔之有因斯蓋伏遇某官黼黻斯文丹青至化嘉猷屢
 進務推轂以爲先賢路一開使騰夷而有始敢不仰銜恩遇進勵操
 脩循士則以爲勤佩官箴而有守在鈞以播旣由陶者之爲摩頂無
 忘誓答知人之賜過此以往未知所圖

代謝唐簽判俞啓天聖八年第一甲

伏自某人飛策上第就辟初筵千里奮乎鴻軒方訝雀知之晚一木
 爲乎大廈豈無燕賀之私屬被責於吏訶方罷歸於士伍翟公之門
 有大署意欲謝交嵇康之性不便書箋而成懶屏居田里遂隔音徽
 豈謂某官俯示存臨過敦禮意迺金迺玉堅乎久而不渝如璧如珪
 問以音而厚賜服勞謙而自牧若飲醇而醉人恭佩恩勤敢亡寢寐
 伏况以英英之善譽丁晏晏之休辰德行中乎妙科諮謀參乎大府
 運籌帷幄豈足盡於上才垂光虹蜺固莫量於逸致內惟衰退但積
 欣愉

答李秀才啓

脩再拜天錫友兄足下此月八日叔父自貴郡回轅首得所賜書教
 一筒開闔數四歡喜無量逃虛既久驟聞足音以寔然迷魂若招頓
 歸常幹而來此惜乎一失交臂之舊一作藥再見回星之周薰歇燼
 銷壤斷土絕昔人以三月不見尙或嗟於生鄙羣居久離則弗能於
 無過况孤曠之有素邈師友以斯疏妍皮裹骨而益癡獨學面牆而

奚擲薰濡弗及寡一作孤陋已增豈意此音猥來入耳美乎此四字

一作人且羨美溢雲紙以摛思揆春華而發藻厚乎養鳥誤奏咸池

之和豁若觀天驟發駢難之覆茲焉匠一作五者之規矩誓訂璋璣

之模楷承平居之無俚方枕塊以罹憂不見齒而三年合乎禮制加

於人之一等時以孝聞願思肯構之不忘無使過哀而至毀而况天

錫標一作振絕俗之雋軌包大賢之茂器學兼九變辨雕一作智刻

萬物竊伏一鄉之評宜首幽人之聘而屈試方策見枉有司薦紳寃

嗟道路譁樂且夫好惡之異古今所均仲尼至賢乃取侮於盜跖帝

莖大樂猶見非於墨子撫絃在乎流水難矣賞音珍髡鬻於九戎誰

其識寶使懷道而委芥動直士之盱衡然而泰先否而後傾禍爲福

之所伏驚爲將擊先卑而飛流川久壅其決孰禦一作必在願養高

而全道密中藏而埃時掩乎十切以韜光去則萬里而不息良工晚

成者器必大寧以朴而示人逐水一作策又作末先至者驥之能豈

與驚而爭路斯皆雅量之素蘊誠非兩好之溢言某之妄庸本無似

肖誤蒙甄擢遂見收齒衆珉入寶至璞使之見遺我輩登科前賢所

以媿讓循涯已盜覩目無容江關復重音問睽阻時既昏而將暮人

在陰而鮮歡邀懷英俊之並遊恨無羽翮而飛肉冀綬吉履之福以

迎來譽之光紙盡筆窮辭不逮意

與西京留府交代推官仲簡啓天聖九年三月

某啓此者竊吹一作玷下科濫巾一作升大府懷檄之嘉一作喜容

外見迫感於遠親負薪之足力不彊靡遑於媿讓在業官之資始懼

傷錦以貽譏况上邦英俊之躔大相煒煌之座幕中諸彦泛蓮池

之賓門下並遊一作蘭臺之衆一作聚勳策驚筋之緩仰陪席聘之

琬問祈招而不知因慚諮訪奉南陽之坐嘯曷有籌謀賴乎天幸之

來續於賢者之躅晚伐柯而取則獲企前規告舊政以乞靈得師餘

獲已積想風之慕彌增竊抃之懷俟燹墨以戒辰卽齋行而首路傾

依一作系之至談悉非終

謝人投贊啓

伏蒙某人寵貽妙製兼任長牋欽玩懿辭慢銘丹臆恭以某人機神

遠茂識理淹和徽名籍布於士鄉粹表挺生於王國言章絢美審大

藝之英蕤一作精奇思緒蘊華激五河之芳潤揆茲逸軌冠乃蒸髦

今國家崇東駿珍寤求孝秀下細文於方國騰實帛於丘園而某人

夙蘊瑰材衷膺溫詔占磐鴻而啓絲侯萃鹿以送賓顧以其體質頑

疏聲猷險薄誤中程文之選猥參顛俊之求承版謁以見臨袖瑤華

而伸貺仰衡清眷荷褒袞以奚勝載扶蒙襟念英瓊而曷報欽降至

極敷染奚周所示威編輒敢留借

謝石秀才啓

某啓累日前伏承惠然見過仍以嘉什一筒寵示者繼纓拜賜刮目

披文紙弊墨渝不能捨手伏以某人英躋逸軌天驥上才好學屢空

浸潤淵源之奧知言九變窺見天人之交久已擅一鄉之評早亦應

萬家之令然而奏琴俚耳難矣賞音抱石荆山終爲至寶而自慕幅

巾於衡巷乘下澤於鄉閭晦丘園之養高輕鷹纏而堅臥冥飛已遠

笑弋者之何求齷齪坐談嗟律魁之獨棄而以錦帶居士白蓮社人

効菩薩之坐家去塵自遠掃維摩之一室敢入者稀是宜逸爲方外

之遊隔乃一作此俗中之軌而乃過存庸妄曲借獎題因隱几之閑

居抽吮毫之餘思灑乃藻麗用飾愚矇爲鸚鵡而扶機僅成輕發養

鷄鶻而奏曲徒使眩悲矧夫峭格峻高春華披美暢來雲依月之句

擅落花映草之評內惟賁鈍之姿奚稱袞袞之寵去天尺五已服於

清標和者數人蔑聞一作階於絕調未違廣報徒用覲獻

上隨州錢相公惟演啓明道二年初惟演以使相判河南府

後落平章事以崇信軍節度使歸本鎮

此者及期被代投版言歸宿官早愧於迷方書課塵能於自脫徒以

無庸之迹曾希一盼之榮當懷檄以云初屬擁旄之方始相公坐於雅俗鎮以無為民豐四輔之年市息三九之盜行郊憩樹絕無兩造之辭託乘載賓惟奉百金之宴而况西河幕府最感於文章南國蘭臺莫非平英俊豈伊未迹首玷初筵至於憐穠懶之無能容爾狂而不辱告休漳浦許淹臥以彌旬偶造習家或忘歸而終日但覺從軍之樂豈知為吏之勞苾德已深遊藩未幾既而持山國之瑞節改戎乘而啓行荊州遽失於所依周南遂留於滯迹稍以引去無復並遊之人歸然自存時有思歸之嘆每臨風而結想徒零涕以懷恩相公以彝鼎之勳極公臺之重獨立不倚羣言互興中山之篋雖盈南海之車終辯繫辭有云崇高莫大乎富貴古人歎曰富貴必履於危機伏惟推盈虛消長之言究動靜吉凶之理秉珪璋之德何卸瑕疵挺松筠之心不變霜雪雖流路之謗未免三年以居東而在廷之臣豈無一言之悟主俟聞來復以慶終亨願無以理而自明當要既久而復見區區之志實在於斯徒有戀軒之心未知報恩之所

謝校勘啓景祐元年用王文康公薦入館

仰服恩榮實增震懼竊以校讎之職是一作辨正為難委方冊於程文折羣疑於獨見一作斷脫絢組之三寸簡編多前後之乖并盤庚之一篇文章有合離之異以仲尼之博學猶存郭公以示疑非元凱之勤經孰知明王一作五而為閨况乃西崑冊府備帝者之來臨蓬萊道山非人間之所見自匪識窮元本學漸淵源究百世之放紛掇羣言而博達則何以效官天祿對青藜而屬書抱簡羽陵拂白蟬而辨蠹如倚者器惟庸妄族本羈單雖出逢千載之期而生有百懼之苦入橋門而著錄最後諸生聞月旦之坐評敢希一目徒以浸潤聲明之代優柔教育之仁過時之年已捍堅而難入少作可悔終雕刻以無功早盪吹以決科旋釋巾而補吏逮親而得斗祿雖慰於子心斂版以揖上官遂成於俗狀學久矣而將落思元然而欲枯進無取

當塗之賁退已失故時之步歲月其忽徒有志於分陰英俊並遊方問途而孤進內顧拙艱之若此敢懷榮遇以為心豈期天幸之來特被柄臣之薦敢辱知人之美蓋因連茹而陞蒙曲造之并容俾考言而善擇顧蕪庸之末學已屢試於有司鼯鼠之有五能盡於是矣鉞刀之堪一割其可再乎固無可喜之文過辱太優之等俾從賓席入預書林一進階而可榮何勝於睿渥三下拜而聞命深服於訓辭天闕乍趨迷目晴而眩轉芸臺深敏近星象以昭回恣窺金匱之書坐費太官之膳內循忝據有溢情涯此蓋伏遇昭文相公焚物均私樂材推美圓方有範大陶冶以挺鎔高下不欺正權衡而輕重閱此庸懦曲以甄收誓堅頂踵之誠永荷丘山之賜

謝襄州燕龍圖肅惠詩啓景祐二年秋時公自館閣謁告視

妹家

昨日伏蒙知府龍圖即席寵示五言詩一章者脩聞古者賓主之間獻酬已接將見其志必有賦詩託於咏嘆之音以通歡欣之意然而工一作正歌三夏使者再辭及於皇華然後拜貺是則施於貴賤各有所當脩賤士也何足當之伏惟某官以侍從之臣當藩屏之任德爵之重與齒俱尊學通天人識洞今古綽有餘裕多為長言談笑樽俎之間舒卷風雲之際成於俄頃蓋其咳唾之餘得而祕藏已如金玉之寶豈伊辱陋敢辱褒稱形於短篇以為大賜伏讀三四且喜且慚譬夫四面之宮鏗鏘之奏愚者驟聽駭然震蕩及夫心平悸定然後知於至和在於頑蒙獲此開警然貺之厚者不敢報之以薄禮所尊者不敢敵之以平願惟愚庸豈得屢繼但佩黃金之賜無忘長者之言

夷陵上運使啓景祐二年

脩近以狂言當蒙大譴荷乾坤之厚施全螻蟻之微生得一邑以庇身使之思過竊三鍾而就養猶足為榮獲在公床是為天幸伏以運

使郎中懿猷經遠茂業康時當一面之利權竦百城之威譽凡居屬部皆仰餘輝顧此孤生最爲沉迹時蒙眇眇曲賜拊存安其惶懼之心慰乃危疑之慮敢不銘之肌骨佩恩紀以無忘策其筋骸盡疲驚而爲報將謀就道即遂公趨瞻企門闕忻愉罔既

謝朱推官啓

某啓伏念某出自寒鄉本非茂器東髮州里絕無一日之評影纒王畿竊階羣俊之後加以識非遠到才不及中惟至治之方隆願上官之並恪竊繫之不失職咸盡其能庖祝之各有司悉共爾位豈伊下列遂敢奸官因忿躁之使然奮狂愚而不顧惡許爲直仲尼之所深讖盡言招人武子之猶不免在於庸妄宜抵譴訶尙賴至仁特加寬議投之遐僻使自省思猶寸祿以事親守一同而庇邑有民與社足爲政以効勤退食自公敢忘心於補過是惟天幸徒自覲顏伏遇某官式佐郡符屈臨賓席烜赫天下方想於風猷從容幕中暫爲於府望是惟孱昧得庇光華然而從事有便宜之權縣吏本徒勞之迹負弩而隨伍伯當備前驅折腰以揖上官敢差斂板况茲異懦素本孤危犯忌於時竄身無所棄芻道上過者踐之搖尾穿中人誰憐爾豈謂某官哀其懇朴賜以存憐削去常儀自敦高議猥因介使先辱長絀過形溢美之辭曲盡至勤之意片言之辱榮於儀父之褒一顧所臨增其大呂之律徒益撝謙之威美豈宜鄙陋之取當歲律已殘寒威方肅更祈珍攝以副傾依

回王舍人亮臣啓景祐四年

伏審某官光膺寵擢入掌命書竊以三代之興兩漢之治蔚聲名之爲威何前後之相望蓋以高文大冊之所傳遺風餘烈之盡在是以代言之任難乎命世之才至於雷動風行金相玉振至意難論必盡於丁寧威德有容兼資於粉澤適當休運允屬鉅賢伏惟某官識際天人學通今古而自親膺聖擇第中甲科聞乎風采而天下悚一作

聳然論之人物而時無先者若乃從容禁署潤色皇猷使德澤之流下淪於民髓文章之威交映於國華遂階榮塗以致公輔斯皆雅度之素蘊考於羣議而猶稽豈惟愚矇私獨稱贊某跡居遠邑名在罪人忽以踰時未能補過省孤危之已甚惟藏縮以爲宜豈望龍光之末輝希咳唾之餘潤匪期齒論猶錄疎頑先以珍函越於常禮遺簪已棄尚以舊物而見憐窮谷久寒忽如溫律之來煦幽憂併釋榮感兼深瞻望兩闕無任飛越

謝李秀才贊見啓寶元二年在乾德日

某啓自某獲罪於時竄身南楚楚之爲邑既陋且窮詩稱荆蠻以比戎狄羈遊宦學之不至風俗言語之不通頑然囚拘誰與爲偶孤陋之誚古人所憂今者上蒙寬仁徙之善地始得與士君子揖讓進退周旋方將沐而薰之自與人齒秀才首迂玉趾贊以長牋升自賓階肅有儀矩開函啓紙粲然詞章蓋夫逃於虛空聞足音而尙喜友於賢者况邦土之所推願斥簿領沈迷之勞以從間燕仁義之樂區區之意豈足足彈

回穀城狄令啓

某啓此者縣徒云至書牘見貽載道鄙文曲加榮獎伏以某官以文飾吏學古任官講事勸功脩舊起廢示之典一作曲禮固已警於愚民刻以銘文又將貽於來者足見仁人之意非惟最之優顧爾訥辭矧非善敘已然之諾將止以奚能既出之言雖追而莫及豈敢逃於衆誥但慮玷於清猷慙愧之誠數陳罔罄

上執政謝館職啓康定二年十二月因崇文總目成書自館

閣校勘遷集賢校理

脩啓今日蒙恩以本官充前件職者受命之始榮懼交并伏以國家悉聚天下之書上自文籍之初六經傳記百家之說翰林子墨之文章下至醫卜一作卜醫禁呪神仙黃老浮圖異域之言靡所不有

號為書林又擇聰明俊乂之臣以遊其間因其校讎得以考閱使知天地事物古今治亂九州四海幽荒隱微之說無所不通名曰學士一日天子闕左右之人思宏一作閔博之彥出贊明命入承顧問遂登宰輔以釐百工一有取焉多從此出所以平居優游崇獎一作素服其業館以禁畧食於太官詩菁莪之育人材易鼎鼐之養賢者凡在茲選得非茂歟然而廩重職閑則未免尸祿官無吏責則可容幸人若倚者以塞陋之資被文藝之舉自初警職已與書筵於時上有鴻儒侍從之才下多羣賢論撰之衆而修方被罪譴竄之荆蠻流離五年赦宥三徙山川跋履風波霧毒凡萬四千里而後至於京師其奔走之役憂思之勞形意俱衰豈暇舊學比其來復舊已垂成遂因衆功豈有微效奏御之日鳧膺而前例蒙褒嘉正以職秩雖因時而幸會實有覲於面顏此蓋伏遇某官柱石之功佐佑明主鈞衡之任進退百官方疇衆勞不忍獨棄遂令忝冒出自生成在於顯愚何以論報雖未能著見德業以稱君子教育之仁猶可以作為歌詩稱頌聖朝功化之美過此以往未知所裁

同滑州知郡啓慶曆三年三月自滑州召知諫院四月各此

啓

伏審某官顯膺美詔移領陪藩凋弊之民方仰思於惠煦撫綏之術况舊著於政謠猥以下僚獲陳大府近膺朝命俾擢諫垣實自揣於非才豈敢同於飾讓日祈聰睿哀此孤蒙庶所請之曲從即依仁而有幸凡云瞻企但切忻愉初暑方隆就塗甚邁伏惟上為邦國倍保興居

同賀環慶帥天章滕待制宗諱謝龜紫啓慶曆三年

伏以龜紫之重唐制所難武元衡牛僧孺為宰相裴度為中丞李宗閔為學士方有是賜聖朝推恩庶位半乎朱藍然被之則負器藝兼名實者惟一人所貴恭惟知府待制歷諫局以蹇正聞領麾守以惠

養及臨邊鎮靜訓士精研歲功遽成時議頗鬱果獲三品之麗特煥五府之光其在欣慰增倍衆多展慶未皇塵毫為贈載仰明庭之命如瞻君子之容

謝知制誥啓慶曆三年十二月

此者蒙恩授前件官并職者祗荷寵靈不任戰懼伏念某學非遠古材匪適時勵孤進以立朝偶四方之多事雖聖聰廣納獲盡狂夫之言而闡慮空勞未聞愚者之得方虞官謗敢冀主知擢自周行塵于華選代言禁掖已愧才難兼職諫垣猶當貴重補報不可以淺則憂愧不得不深此蓋某官過採庸虛書形獎飾致茲忝冒驟此寵榮敢不勉拙以勤誓身許國上酬天造次答已知懇悃之誠敷宣曷罄

上提刑司封啓慶曆五年冬此後皆滁州作

伏念自臨貶所屢辱誨音霜雪方嚴見不彫之雅操蕙蘭其意佩可服之清芬慰此孤危奚勝感佩某人學通治亂識達古今奮經遠之才護慰甚高之議論六條頒政早欽善最之奇列郡按刑行迓陟明之典隆冬式序保履惟和瞻企禱祈交于誠素

同校理邵學士必啓慶曆五年冬

伏審召試榮庭升華儒館方思馳賀遂辱飛騰伏惟某人性稟生知材惟秀出學通今古究明人事之始終辭富典謨煥發文章之雅頌一作爾雅蔚然茂器藹著休聲惟上相之知人務薦賢而報國况此圖書之府素為俊彥之遊峻乃清資豈止文翰之樂茲焉養士以取公輔之材豪英既登朝野共慶願茲淪謫敢謂記存已懷欣抃之誠又積感銘之懇患於遊訥匪可殫陳

同河北安撫王驥驥啓

右脩啓此者伏承顯奉朝恩峻遷使職寵光甚渥輿論僉和卓然高世之才久蘊經時之略山川指畫千里如在於目前惟幄坐籌百勝無窮於術內是宜聽之前膝副乃沃心遂寬北顧之憂行正中權之

任敢期着與尚顧衰殘辱誨問以彌勤積感銘之徒切傾瞻企詠兼集
集
驚
靈

回賀狀元壽啓慶曆六年

伏以狀元廷評行久著於鄉書聲素馳於文園果先羣彥榮中甲科英雄入於較中衆稱妙選風采傾一作駭乎天下爭仰餘光蓋以擢才之難近世爲重趨好尚而成俗則文章坐變其風繫利害於斯民則公輔常由此出一賢既進拔萃皆可以彙征一士以一作已旌勸善不勞於家至得人之要其利若斯曷惟治朝臻此盛事方深羈絆遽辱惠首顧惟棄置之餘宜此退藏之密久稽裁敘但切一作舊懷惶

回賀楊翰林察啓同前

伏審某人榮奉宸恩入陞禁署伏惟慶慰恭以某人聲猷峻立德宇宏深學洞淵源煥發六經之蘊文含純粹邈追三代之風雍容待從之華東注顛昂之眷亟由星掖入踐鑾坡天邑之雄雖暫煩於尹正國鈞之重行即俟於曠庸事業炳於丹青勳德光於鼎彝實繫縉紳之望非惟禱頌之私某幸守陋邦遙聞美拜迹宜藏密非敢忘於致誠恩厚記存特辱垂於榮問忻愉感愧交集難陳

上都運待制啓慶曆六年夏

昨者解官河外竄迹淮壖顧乃孤危便於藏縮雖瞻依之甚久在訊候以闕倚某人天稟中和材惟周洽凜然風操早肅於朝倫蔚若謀猷寶禱於聖治自輟從於侍從暫臨總於劇繁足食彊兵雖並資於經畫先機別事誠有繫於安危況成績之已彰什褒功之不次時炎燠若天宇泰然更冀珍調以符傾禱

回賀李待制東之啓慶曆七年九月

伏審肅奉寵靈峻升侍從得賢之慶固宜發於歡愉待罪之人方自思於藏密遂稽馳賀敢謂不遺先辱榮函可勝愧色伏惟某官懿文

經國敏識造微學探姪孔之淵源世濟辜襲之德業立朝正色凜風憲以載嚴造膝沃心賴仁言之甚博遂膺簡注升著清華上寬乃顧之憂聊假有餘之力作時霖雨當均及於疲民秉國大鈞實久顯於羣望涼秋之謝嚴律將疑冀爲邦朝善綏福履

賀文參政彥博啓慶曆七年九月

伏以光膺制命參秉國鈞爰擇令辰已諧禮上伏惟慶慰恭以某人學通繁表識照幾先懿文爲大國之光華偉望乃一時之柱石上心所東適符寶弼之祥輿頌載喧久渴爲霖之望果膺龍數式副具瞻進退羣材運誠衡之輕重調和元氣登至治於升平然後正台衮以代天工列功勳而銘廟器符爲元志一作德以重熙朝某幸在陶鑄惟知慶抃商秋式序歲物方成伏請上爲邦家精調寢膳

回賀集賢韓學士絳啓慶曆七年十月

伏承被召試文升華儒館伏惟歡慶伏以某人天麟異稟廟理至珍學通今古之淵源言合質文之體要英躋高步羣俊筆一作載以望風雄較龍材妙選稱爲得士果膺帝東入耀書林給札揮毫筆如墻而駭目奏篇稱善喧黃紙以傳都惟祕府之育賢乃熙朝之威美優游歲課豈鉛槧之是專選取國材實棟梁之此出蔚然茂業奚測遠塗方懷抃躍之私遽辱置郵之問仰御隆眷徒切愧誠冬序云初天和善保傾瞻感頌交集悚靈

上致政王太保啓

某啓昨者太保還政王朝榮歸故里暫留齋舫云止陋邦竊省孤危方嬰罪隨一作謹逃虛易喜蓋人迹之罕逢道舊爲歡矧平生之有素特荷眷私之厚不爲位貌之嚴金玉之堅弗渝於彌久松筠之操獨見於天寒感慰所一作攸深幽憂如釋捨舟趨陸去險騰夷懷組鄉閭雖暫伸於夙尚追鋒疾置將入副於精求惟期善衛襟靈以迎休寵

回泗州通判勾龍都官書

右修啓此者特蒙惠顧遠辱詩言副以雄編俾之試目通判都官識窮淵韞學探本原一作元講於仁義之餘深得風騷之旨雜然衆體各極其精時無鍾期誰識高山之意人非季札豈知治世之音矧惟朽拙之無堪方幸退藏而自屏敢期時彥不我鄙遺諭之累幅之勤貺以百篇之富四面之宮並奏驟聽於鏗鏘三歎之音有餘豈窮於杳默但駭夜光之投闇徒令海鳥之驚魂媿乏重言以起連城之價用爲永好惟期十襲之藏感幸之誠敷陳罔既

回和州通判啓

日睽風表曠有歲時邈絕奉於聲塵蓋率奔於事役幸茲鄰羣首辱誨言締縛旨之勤隆若清徽之晤挹政修關決難久滯於材猷臺彥飛英卽入承於光寵更希珍攝以副禱祈

謝黃巖李主簿啓

伏念爲邦誠樂懷舊則勞風月佳時久辜燕集文酒勝處動渴清狂亦惟愛忘未棄疎外猥蒙流問但喜拜嘉某官力學多文射策得雋枳棘甚賤非翔鳳之所棲杞梓惟材宜大廈之可用窮冬不雪多濕少寒勾稽之餘畜神爲最益期勤懋庸迓升揚

回陳殿丞啓

伏念睽闊英猷賢遷時簫竄身窮僻方便於自藏惠問周隆遽承於曲顧欽雅材之高妙播華譽以芬揚貳政藩宣諒難於滯俊飛綏臺閣行被於寵遷歲律斯回陽和將布善綏嘉履以副願言

賀文相公拜相啓慶曆八年正月

伏審就降命書入持宰柄伏惟慶慰恭以某官際天蘊識名世標才以文章甲賢科以忠義挺臣節華要之選期翔速周素蘊內充所臨必最化行右蜀政貳中樞屬邊寇之肆狂仗使威而殄滅暫形籌略已取蕩平還居廟堂副聖主仰成之意坐調鼎彝洽羣生成遂之和

凡被陶鎔皆知抃頌矧居庶列實倍常情

表奏書啓四六集卷第六

表奏書啓四大集卷第七 集九十六

與晏相公殊書皇祐元年知穎州日

春暄伏惟相公閣下動止萬福脩伏念曩者相公始掌貢舉脩以進士而被選掄及當鈞衡又以諫官而蒙獎擢出門館不爲不舊受恩知不謂不深然而足迹不及於賓階書問不通於執事豈非飄流之質愈遠而彌疎孤拙之心易危而多畏動常得咎舉輒累人故於退藏非止自便今者偶因天幸得請郡符問遺老之所思流風未遠瞻大邦之爲殿接壤相交因得自伸懇悃之誠庶幾少贖曠怠之責伏惟相公朝廷元老學者宗師尙屈蕃宣行膺圖任伏惟上爲邦國倍保寢與企望旌麾無任激切

答胡秀才啓當是從官在朝時

脩啓竊以考行選賢故人皆修德而自厚論才較藝則下或銜己而忘廉誠誘養之道殊致進趨之勢異浸久之俗益薄惡而可嗟習見爲常遂安恬而不恠伏以秀才學優墳史詞富文章能力行以自強方韞藏而待價豈期誤舉遂爾遺材惟賢食之不家顧良時之難得譬夫餓者雖取嗟來因而無言亦將不及既一慙之莫忍遂兩訟以交輿遠乎究窮果自明白矧朝廷之選士惟寒俊之是先雖爾初屯理將後得必也治官學古爲政臨民當獄訟而平心視斯爲戒利公家而忘己効此必爭苟終身之不回雖一作維一費之何患如此則圭璧之玷猶或可磨日月之更其將皆仰至於較定能否明辨是非形長者豈度之私貌妍者非鑒之惠但慚淺識惟竭至公漁者讓泉思古人而莫見私門受謝亦鄙志之不爲

辭副樞密與兩府書嘉祐五年十一月

右脩啓伏奉制命特授依前官充樞密副使者聞命若驚撫躬無措伏念脩稟生孤苦賦性拙疎才不足以適時少本無於遠志早迫速親之祿學爲應用之文而自叨塵侍從之聯荏苒歲月之積初無實

効少補明時中被謗譏固多憂而速老素非強力加困病以成衰白首禁林厚顏時彥方欲自請江湖之上漸謀田畝之歸屢懼危誠未蒙恩許敢希聖選登貳樞庭夙夕內循俯仰惟懼已形懇奏期必獲停伏望昭文相公借以閱憐察其悃迫幸因對見特爲開陳俾遂牢辭庶安常分謹奉狀披聞

又謝兩府書同前

此者叨膺聖選俾貳樞庭渙命已行循涯匪稱伏念脩學非臻與才不逮中仰屬昌期猥塵靡任抱孤忠而自許顧獨立之易危竊比古人每常嗟其異懦有志當世徒自愧於衰遲雖策厲之愈勤信技能之奚取久尸厚祿進無補於高明屢乞方州冀漸謀於退縮政期謀寵繆及匪才此蓋伏遇昭文相公叶贊大猷翊宣元化爲特柱石持物權衡急於甄才過及庸品第堅一節力勉不能上酬聰睿之知次答陶鎔之賜

謝參政與兩府書嘉祐六年閏八月

寵兼憂而並至恩與責以俱深叩讓靡從撫循無措伏念脩稟生孤懦賦識迂愚力微非致遠之才學陋無適時之用徒緣士類早借稱揚幸會聖時過加獎擢既叨塵於侍從遂竊與於謀謨待罪樞庭顧無分一作功而可錄備員政府用累日以敘升豈惟致寇之虞奚道曠官之誚此蓋某官心存體國道廣濟時謂庶政之交脩必羣材之博取誤加品目俾玷光靈雖冥拙之無知豈忘感勵苟疲驚之可策尙冀涓塵鄙訥之誠數陳罔罄

回池州呂侍讀濬謝到任書嘉祐八年春

伏承祇奉明恩已臨善治雖未充於士望聊有漸於復亨深慮危心君子固嘗多難處窮與否昔賢因以知人矧遠器之莫量佇華塗之歸踐過承謙挹曲損論言感愧之誠數言罔既春和在候福履增休英宗覃恩轉官回前兩府賀書嘉祐八年四月

叨膺渙渥敘進官聯祗荷恩榮豈任戰懼伏念某識非周物學不逮人蒙先帝之誤知自諸生而獎擢久塵侍從薦著聲猷不圖衰病之齡進備政機之貳幸久安於無事容充位以素餐未知報國之方遽結遺弓之恨屬皇明之繼照均慶萬邦發大號以惟新推恩一切致茲濫及莫獲懇辭內省庸虛實虞顛覆此蓋某官為時元老協德一心言成華袞之文志樂菁莪之育素加品目遂至叨踰方懷感勵之私遽辱誨存之枉佩銘悚愧交集襟靈

回文相公辭起復使相判河南書嘉祐八年四月

伏承光奉制書起從哀次未皇馳賀特辱貽函伏惟留守太師相公望重縉紳道高巖廟出處之際繫中外之重輕弛張有宜兼將相之文武蔚為元老東在先朝雖孝性之隆專守經而執禮而權時之制或以義而斷恩副聖君及席之思見忠臣許國之急諒難遵於固避幸勉屈於至情脩方與蒼生同茲引領遠煩誨諭但極感悚

回富相公辭樞密使書嘉祐八年五月

此者伏審光膺制命登贊國機渙號始行羣情胥悅伏惟樞密相公摺紳舊德社稷元勳維石巖然朝廷以為輕重長城隱若中外繫其安危嚮由執禮以居憂重於至性之難奪聖君及席而勞想樞庭虛位以待賢自聞召節之來歸故雖行路而相屬矧惟庸昧早辱知憐幸陪副貳之聯得企光塵之末賴庇冀逃於罪戾望賜有過於蒼黔敢謂謙撝例貽誨翰罔知承命但極感悚

又回富相公謝書同前

伏承顯奉制書茂膺寵數伏惟歡慶伏惟樞密太師相公學優孔孟道協臯夔屏于萬邦申伯之兼文武秉乎一德仲山之不剛柔嘉謀早著於先朝時望久隆於巖石屬嗣聖繼明之始乃宵衣講治之初首速元臣來還宰席三接之際羣心以安出納樞機雖為於要任調和鼎彝當正於鴻鈞始塞輿談實非私論敢期謙眷曲示誨函既深

忭躍之誠復積悚銘之抱

回鄭樞密公輔二舍人謝新除書嘉祐八年八月

伏承顯奉制恩陞華禁掖允膺聖選式協輿談朝廷之體尊嚴王者之居淵默德澤宣布必使入人心之深號令發揮而能鼓天下之動惟是代言之任實資博古之英伏惟某官履行敦方材猷敏茂謁一鄉之佳譽掩衆俊以各科通達古今固已優游於儒學出入侍從是宜顧問於清間果被僉僉並司典訓竦萬方之視聽追三代之文章遂陞榮塗益奮賢業共慶得人之感方深竊忖之私遽辱謙撝特貽誨翰感銘之素敷敘奚殫

回皇子神宗辭使相封淮陽郡王書嘉祐八年九月

伏承光奉制書峻膺寵數伏惟驩慶藉以命官有秩正上下之等威制禮緣情以親疎而隆殺惟是國家之舊典蓋推天下之至公郡王相公識稟誠明學窮原本篤於樂善因天性之自然舉必有儀秉君子之常德地崇家嗣望著宗英兼陞將相之榮顯被山川之錫有光典冊九叶朝僉豈謂仁私曲貽誨翰感銘之素敷述奚殫

與安撫密學啓

伏自安撫密學顯奉寵靈出分寄任邊陲被德爵與襦袴之謠宸眷倚材隱若金湯之固實藉威名之重即疇勳績之華入踐廊廟之崇以副摺紳之望祁寒在候福履凝休瞻頌傾度罔殫庸鄙

賀延州程太尉兼加節度使再任啓治平元年

伏審賜節中宸建侯鉅屏伏惟慶慰恭惟太尉閣下剛明稟哲純一端誠嘉猷夙著於本朝偉望尤先於舊德久鬱巖廊之用屢淹藩翰之居惟關陝之一方苦干戈而累一作屢歲用兵之後疲傷尤急於撫綏難信之盟醜黠宜先於經制是膺帝眷實實大纛高牙雖暫煩於節度鴻鈞元鼎行即俟於登庸乃公議之久然匪私情之獨禱春陽式序幕府肇開伏惟上為邦家精調寢膳

轉吏部侍郎回謝親王書治平元年五月

祇膺渙渥交積兢慚伏念某學問不強顯蒙自守流離當世而寡合幸會先朝之誤知拔自衆人俾參國論而屬承祧嗣慶布治惟新以聖主而責愚臣方懷惕懼假小人而乘大器豈不墮顛故當成命之初行屢竭愚誠而必請而君恩至篤天聽莫回此蓋某官借以餘光致茲冒寵仍貽誨諭曲賜褒揚感佩之私數陳罔既

回穎王書治平元年六月

右脩啓伏承顯膺帝制榮啓國封伏惟歡慶某官宇量闊深機神敏悟玉質非由於追琢天姿自發於純明德威地尊乃王家之屏衛色溫言厲爲宗籍之表儀顧惟爵秩之崇實繫朝廷之體真王錫號蓋遵有國之彝章寵命始行方愜至公之興議豈期謙挹曲示誨函感戰之私欣瞻併集

賀穎王書同前

右某啓伏承顯膺帝制榮啓國封伏惟歡慶某官純茂凝姿溫仁秉哲濟之學問而以廣其業履夫崇高而能守以謙蔚然德譽之隆式是宗藩之列遂膺典冊進位真王胙之土以建邦實資親屏爵于朝而示衆蓋匪私恩方寵命之初行聽僉言而惟允莫違伸慶徒積忻瞻

回宋相公庠謝除司空致仕書治平元年十二月

右脩啓伏承顯奉制書入膺召節一作節召遂諧歸政之請兼陞論道之崇伏惟慶慰司空公道覺天民學臻聖域兩朝碩望文武兼資四海具瞻搢紳取法雖欲優游於進退實繫輕重於朝廷矧初政之日新方任人而圖舊所以奏封累上眷遇彌隆終於雅志之重違難徇輿情之所惜聳高風以勵輪俗介眉壽而膺百祥若賢若愚以榮以祝况惟庸懦早荷知憐方深欣頌之私遽辱誨存之厚感銘之至數敘奚周

回文相公謝服闋入覲書治平二年 月

右某啓伏承榮奉制恩顯膺寵典伏惟慶慰恭惟相公道兼文武功著鼎彝言行搢紳之表儀出入朝廷之輕重自執至情而不奪勉從制禮之難逾爰被徽章遂趨召節介主來覲方優體貌之隆前席嘉謀卽正弼諧之任實繫士夫之素論豈惟朽拙之焉依敢謂謙摛特貽誨諭感銘之至忻抃交深

又回文相公服除遷侍中移判永興書治平二年四月

右脩啓竊承顯奉制恩眷膺寵拜伏惟歡慶恭惟太師侍中器深宏達業茂經綸弛張文武之才出入將相之任而日者來覲冕旒之遽喜聞履鳥之聲從容話言固多仁者之利體貌者皆是惟先帝之臣宜加異數之優以爲一面之重雖方勞於憂顧藉有素之威名然而患輕四支不足爬搔於蟻虱坐制萬里理當根本於朝廷卽期廊廟之來歸始慰士夫之素望過蒙謙挹曲示誨言趨賓廂以無由積感悼而徒切

又回文相公辭避樞密使啓同前

右脩啓此者伏承顯膺制命首贊樞庭伏惟某官業茂兩朝望崇百辟嚮自入親法座欣體貌於元勳出撫西師藉威名於擴俗然而籌謀當出於帷幄根本固在於朝廷果茲煖席之未違已被追鋒之迅召揚庭誼告方喜動於朝紳及席來儀固渴聞於嘉話竊承謙摛尙欲逡巡敢謂不遺亦貽善誨卽期前賀但切感銘

回杭州蔡端明讓謝到任書治平二年十月

右脩啓伏承出領要藩已諧禮上伏惟歡慶某官剛毅體仁粹明迪哲直道信於中外高風凜乎搢紳頃煩持橐之清資蓋賴富氏之餘術經綸之業蓄素蘊以未施偃息于藩邈沖懷而自遠雖重違於誠請實深鬱於輿情諒煖席之未違卽追鋒而迅召遂登大用顧匪私言寒律向嚴神襟善燭瞻凝感著交集悚靈

回吳侍郎奎辭副樞書治平二年二月

右脩伏承顯奉制恩寵陸樞近伏惟某官材兼文武業茂臯夔左右帷幄之謀謀出入朝廷之輕重自丁至戚暫解繁機執喪禮以過哀雖君命而難奪祥琴甫御召節甚嚴尙少鬱於登庸姑復還於舊物光輔一人之新政式副四海之具瞻敢謂謙撝由貽誨翰方屬臥漳之告莫伸賀慶之誠感抃之私敷陳罔既

回諫院傅龍圖下攀違書治平四年二月

脩猥以非才久竊重任報効初無於毫髮怨仇已積於丘山近蒙睿恩曲徇誠請與之近郡俾養衰年荷聖主之保全賴公朝之議論俾獲奉身而退方懷去德之思諫院龍圖舍人深閔孤危特迂誨翰意愛勤甚有踰平時風義凜然可激薄俗仰止門仞莫違敘違銘之肌膚永以佩賜瞻依之懇敷道奚周

亳州到任謝兩府書治平四年

脩此者祇荷朝恩出分郡寄退循忝冒徒積兢慚伏念脩學知行已而智不周身才匪適時而任參大政用過其量危而必顛乃物理之宜然偶天幸而獲免昨以怨仇並作讒謗交興蓋逢堯舜之聰明方與夔龍而左右講新至治銷伏狂邪而市虎之言雖驚於衆聽投豺之惡遽屏於遠方得逃九死於非辜實荷更生之大賜今者特蒙睿眷深察孤忠樂土近藩已由從於私欲清資願秩仍過竊於寵靈捨衰疲勉強之勞就空曠逍遙之適然而坐思補報歎心存而願違却視風波猶寢驚而夢噩顧獲全身而至此豈非宰物之深功仰佩恩私但銘肌骨載念脩以至愚之朴陋蹈可畏之危機徇物從時既昧自容之計拂衣遠去又無先見之明惟貪得於暮年致以身而取辱而識雖不早悔尙可追至於緝風雨之敝廬治松菊之三逕少假歲年之頃卽爲田畝之人固將追野老而行歌永陶聖化恃仁人之在上必保餘生尙有斯誠猶煩再造炎歎方感機務至繫上爲廟朝精

調寢膳瞻依之懇敷述奚周

回穎州通判楊虞部書

脩啓茲者赴郡假塗久留賓次過承眷與日接宴言遽此睽違實增感戀但以柅車之始視職方初雖云陋邦粗有人事加以大暑遂成病軀旦夕之間方思布款急遽之至先以惠音且承別來福履清勝脩以衰朽得此退藏如夙昔之所聞皆少過於其實惟寂寞之爲樂須漸久而益佳餘非悉談更冀多愛

回西京留守韓侍郎贊書治平四年六月

右脩啓此者祇荷朝恩出分郡寄顧惟庸妄早乏聲猷才非經濟之謀位玷光華之寵進陪國論無補於休明動觸禍機可喻於朴糲賴聖神之燭理獲終始以保全許解要權俾逃重責仍分善地以養衰齡留守龍圖侍郎清德鎮浮純誠接物由敦故舊不我鄙遺遠形誨獎之言以慰孤危之迹嗟時久薄孰爲金石之交因歲大寒方見松筠之色凜然高誼可激踰風永佩恩私但銘肌骨晤言未遂溽暑方隆更冀珍調以符瞻詠

回寶文呂內翰濬書治平四年九月

右脩啓茲者伏承寶文內翰被召禁林升華內閣仰惟道德名望之老久淹言語侍從之流以望之之忠誠兼孔光之慎密豈止典謨潤色朝廷遂變於斯文固已朝夕論思天下獲受其陰賜雖未正秉鈞之任而姑副尺席之求凡在搢紳皆同抃慶况於庸鄙最荷知憐而多病早衰乞骸而已久因閑成懶顧與世而益疎豈無嚮慕之私殊闕寢興之問敢期惠眷先辱誨言世路多虞方歎風波之惡歲寒已甚始知松栢之心感慰之深敷陳奚既清霜戒候內直方嚴惟冀珍調以符瞻詠

賀樞密使呂太傅公弼書治平四年

右脩啓伏承顯膺寵典登進樞庭成命始行輿言僉允伏惟某官存

誠直諫蹈道中和學臻三代之英世濟八人之美論思獻納已多補益之勤護明弼諧久韞經綸之業三朝眷遇一德老成尚虛黃閣之居姑正紫樞之位坐籌帷幄方資制勝之謀正席鈞台始慰具瞻之望願惟衰朽早辱知憐惟與蒼黔同深慶抃

冬

賀韓相公琦罷相轉司徒兩鎮節度使判相州書治平四年

右脩啓伏審榮被恩俞勉從懇請極便蕃之寵命均休逸於名邦伏惟司徒侍中誠明發揮德業久大三朝顧遇百辟表儀挺金石之純誠當國家之大事上所取信有疑決於元龜民之具瞻爲望重於九鼎屬聖神之嗣統方毗倚於老成而功高不居志確難奪爰併推於異數用顯答於元勳孰不秉旄詎有兼持於雙節昔嘗衣錦今而威服於九章極古今儒者之至榮保進退君子之全德顧惟庸懦久辱知憐聆誕告之頒行極私誠之竊抃隆寒戒候大旆啓行伏惟上爲廟朝精調寢膳一作痛傾依瞻頌筆舌奚殫

回青州吳資政奎書治平四年

右脩啓伏承光被制恩出臨藩服斯民之幸將蒙豈第之仁有識所嗟共惜忠賢之去伏惟資政侍郎智周物表性自誠明學窮仁義之本原識達古今之治亂匪躬之操出入三朝秉心不回進退一德方聖神之嗣統賴耆哲以倚衡送往事居其勤亦至沃心造膝爲益已多毅然君子之剛卓爾大臣之節信於中外明若丹青雖就逸均勞暫侍殿邦之重而用人圖舊諒難煖席之安願惟衰退之蹤終託光輝之末隆寒戒候大旆啓行上爲廟朝精調寢膳

回陳州王密學陶賀冬書治平四年

右脩啓天心來復七日之亨有初陽氣潛萌萬物之生以此茲謂履長之慶宜膺多福之祥伏惟某官性稟純誠識窮至韞講明道德是惟舊學之臣啓沃謀猷蔚有嘉言之話暫遂偃藩之便已勞側席之

思卽膺圖任之求庸慰具瞻之望願慙衰朽方卜退藏自期田畝一作里之獲安惟幸仁人之在上傾依祝詠交集悚懼

回諫院吳舍人充書照寧元年二月

右脩啓伏承光奉制恩入司書命得人爲一作之威輿頌同欣伏惟某官器稟純明道探淵蘊清名峻望獨映於一時碩學高文素推於羣彥果被上心之東進膺龍命之華紅藥翻階直禁垣之清切紫荷持臺陪法從以雍容文章追三代之風號令警四方之聽允歸鴻筆增重本朝顧惟衰朽之退藏方與摺紳而竊抃豈期謙眷特枉誨函感服之私數言罔既

與開封知府呂內翰公著書照寧元年四月

伏自某官輟從邇列暫領陪藩竊顧愚矇獲茲庇賴載惟孤拙每荷優容積於佩德之誠無異遺民之愛恭惟入趨宸展榮署天畿仰匪日以政成卽疇賢而柄用始茲歆溥宜乃高明伏惟上爲邦家精調寢膳

回王先輩安國謝賜及第書照寧元年

某啓伏審先輩顯承嚴召明試雄文立若堵牆駭筆端之灑落程之衡石留帝覽以稱嗟遂膺賜第之榮式副求賢之意講明仁義之奧久以充中發揮德業之光實從茲始凡居交舊孰不欣愉雅眷不忘惠音斯及其爲銘佩難罄敷宣

謝判大名府韓侍中惠書啓照寧二年夏

右脩啓伏念東秦僻處在海一涯全魏相望邇風千里特枉惠音之間實惟眷與之私兼承鎮撫之餘克集休祥之祐伏惟某官道優文武業茂舉慶爲百辟之表儀首三朝之勳德從容進退雖不有於成功出入勤勞實未忘於憂國頃遂便藩之請豈遑煖席之安屬北州大震之災加仍歲浹饑之後流亡殍踣民未復於故居招輯綏來上方倚於元老豈不少煩於思慮夫何暇顧於衰殘乃知才大經綸固

多餘裕契敦道義屢出常情尋知己之既深輒忘言於敘感統臨寄重炎燠時繁更祈上為邦家精調寢鍊即還大用均福羣黎最爾孤生但同輿頌

回宮教丘寺丞書熙寧三年六月

右脩啓不聆嘉話忽已再暮晚節無堪久思歸於南畝上恩未忍猶復委於東州但謀屏迹以深藏敢冀時髦之枉顧遠貽誨問寔慰病衰示之進退之方勵以始終之節愛人不苟知君子之用心服義甚高俾懦夫之有立仰銜眷與徒極佩銘載嗟疾恙之攻兼以年齡之迫雖請纓自効豈不竊慕於功名而伏懼已疲第恐難勝於鞭策未期披款徒以傾馳暑伏方炎襟靈善嗇區區之懇數布奚禪

回李舍人壽朋書熙寧三年冬

右脩啓此者伏承顯膺寵命入直禁垣臺閣登賢措紳共慶舍人器涵闊遠德蘊純深講仁義之淵源極天人之精稜備言語侍從之列承清問顧問之榮時望蔚然輿談久屬果被上心之東進司書命之嚴惟帝制之坦明必訓辭之深厚金相玉振煥三代之文章雷動風行警四方之耳目遂歸鴻筆增重本朝顧惟衰病之餘敢辱眷勤之貺遽先惠問益認撫感服欣愉數陳罔既

賀王相公安石拜相啓熙寧四年春

伏審榮膺帝制顯正台司伏惟慶慰伏以史館相公誠明稟粹精稜窮微高步儒林著三朝甚重之望晚登文陛當萬乘非常之知論道黃扉沃心黼屨果被往諧之命遂膺爰立之求左右謀謨方切倚衡之任措紳中外益崇巖石之瞻竊顧病衰恪居官守莫陪班謁徒用馳誠春序布和政機惟密伏惟上為邦國精調寢興欣抃之誠敘陳罔既

致仕謝兩府書熙寧四年六月

某啓此者獲解郡章許歸田畝荷聖君之念舊越常典以推恩內自

省循惟知感涕伏念某猥以一介之賤幸會千齡之期學業素荒早接俊游之末謀謨無取晚陪國論之餘訖於報効之慶聞徒蹈危機之可畏而年齡遲暮疾病侵攻乃以難強之筋骸坐尸踰分之榮祿自陳懇悃頗歷歲時猶蒙上之哀憐久乃賜其開可奉身而去悵負國之已多受寵至優但捫心而自愧此蓋伏遇某官權衡萬物佐佑三朝思輔治於和平務敦行於仁厚不遺故舊期俗革於燴風過借寵光俾民知於愛老致茲渙渥渥併及衰殘已自屏於明時惟永藏於大賜

代辭胥學士啓已下續添

某聞驚蹇之材雖謝終戀於故軒頡頏之羽方歸尚懷於廣廈何則物由時制質以願遺瞻後來以不遑豈卑飛而自適矧在最靈之品優叨再造之仁拘文憲以難踰捨藩牆而輕去翻如秋蒂臨一水以將歸鸞若晨霞與孤舟而遂往恩渥山積感緒絲茅竊念某材實懦庸識惟駢淺謬偷生於人壤獲違幸於王塗弓冶傳家未粗遵業嘗畏圈牢之誚樂聞詩禮之言逮過弱齡粗堅苦節且親闈就養官路隨方西走巴寶南浮江澨登稽山而訪古學謝前良歷劍阪以刊銘文慙往哲何嘗不歧清徹於朝闈詠鴻藻於聖門丈席是依寸晷惟競僅借童刻之技終無老成之風性既愚而不移齒及壯而自惕幸邁當陽求士上哲持衡勉趨翰墨之場濫齒孝廉之舉袍紛紛而若雷志凜凜以懷霜鑿本無私敢逃於蚩鄙科非有備遽荷於甄收玷妙簡以惟精撫微生而何幸洎春闈之較藝叨雲陛以策名山木呈材自選掄而為器冶金効用荷鎔造以成功進匪時來幸由恩假自此從風官牒授任選臺俾外掌於司刑尋參榮於軍幕幸洎熙熙之壤姑隨冉冉之趨若乃民命所矜在一成而致慎憲條具設知五聽之惟難允非幹明曷副欽恤而某身專吏局世匪法家象斗之制斯嚴肇聞甲令磔鼠之能素寡舉乏片言矧乎人有刻木之嫌口擅鑠

金之利或行如黠虜或巧過騰猿居多納履之防願奉酌泉之戒事
機匪一識局難周惟曠弛之是憂在憲章而可懼弱羽未沈於泥滓
福星聚列於珠躔幸遇某官京輔移轅軍牙蒞政金龜虛署久稽上
笏之榮銀兔分符寔重專車之任撫治綱之大振使訟牒以寢銷茂
草鞠屏甘棠蔽坐不謂斗筭之役載依旌榮之門榮立府庭恪奉條
之大體示含垢之深仁賜以雍容優其顏色嘗與言於塵柄許獻技
於鈴齋曲矜蹇蹇之軀過損循循之誘重念某襟靈不爽道藝非優
自竊吹於秀科頗空食於官舍嘗欲温故於案几之暇勵力於歲月
之餘冀少益於顛愚庶上裨於亨遇而寡聞自任枉格奚勝學圃遂
荒整一經而不治文緒難繹懼彌日而無成露狂狷以居多默聰明
而爲甚斷無他技動乏所長徒祗事於塵尾固無施於塵露豈謂伏
蒙某官恢山藪之量納菲葑之言回掩疵瑕荐加題品褒采一介靡
遺五管之微甄拔下流有過衆人之遇舉空疎之器爰定品於優長
飾闇弱之姿將類能於開敏矜其拙効嘉乃妄庸上辱哲明曲形表
薦且俾預官聯於轂下參器使於民間苟檢操之有渝引簡書而共
守所念名編桂籍已塵玷於大猷迹廁金臺復叨居於始賞恩踰素
望理邁常均永懷肉骨之私寧止捐軀之報方幸輝光未運使節少
留願旅翩之有依適諧樓集何飛蓬之易轉遽至飄離俄及戌期倏
辭藩岳結課蕙闈於最賦省躬幸免於常刑初履有光優慈是賴而
自解曹符而退處終歲律以寓居荷眷待以特殊沐霑濡之至澤越
後筵之禮分接右席之賓儀置酒梁園幾逢於美景觀容相圍屢奉
於清歡給舳舻以備行假輿臺而補乏士林增耀民巷改觀今則已
揆良辰將還舊華建樂郊而去德戀大幕以銷魂行當聞優詔於塗
中候歸艗於日下瀛洲秘局式瞻侍從之班温樹近司承託陶鎔之
造願趨槐府獲效蓬心攬涕敘誠隕首誓報卑情無任

代人辭官狀

温辭甫及渥命駢臻竊用退思匪遑祇受伏念某本以孤宦託於威
時專室之性甚愚外廷之游粗足寅緣聖獎寵濫朝榮屬潛邸之署
官首膺表擢陪學費之講道無所發明旋預政機益承恩紀欽績圖
而布慶亞司會以名官隘薄奚勝深懼覆於公錄毫分未報自愧食
於土毛而乃曲被宸慈驟隆禮秩既褒異於邦爵復登貳於天官震
悸來并覲墨無措已陳車府之奏冀息鄉校之譏方聽俞音尚希舊
貫伏望某官軫念庸識鑒諒危衷享其所宜勿使其進冒誠有所訴
特示於保全獲追寢於恩章實有依於德隆

上李學士啓二首

某猥策草茅之愚近膺寒素之日沿官牒而便道許以過家入里門
而下趨遂茲稅鞅想孤生之弱植早自困於無津竊希上國之並游
偶以諸生而著錄久彈鐔於外舍託推轂於各卿然而泰機後門最
嗟於晚出蘭臺雅聚本格於清流某官躡履起迎一顧增價借以左
右之譽視如子姓之親辱謝公之齒牙憐其未立經平子之題目時
不敢更一作不敢更非遂憑外獎之華獲致榮階之漸仰銜殊遇陰
誓銘藏至於當便坐而執經對諸公而隸筆聞塵尾之餘論入於耳
而不忘得師門之一言書諸紳而故在越流離於下國悵洵遠於崇
闕在陰鮮歡歲崢嶸而修盡一作忽逃虛既久音聲咳而不聞遜仰
墮鱣之庭豈勝疲馬之戀

同前

某啓伏自學士被渥帝宸躋榮史局嘗貢躍蟲之懇諒塵隱几之觀
然而偃宣父之風草帶一作帶何勝於餘煖望長安之日葵心愈屬
於愛輝計六氣之順調降百祥而穰簡恭以學士星奎裏粹玉鎮凝
華敏學兼該復一變而歸乎道美文鼓動導元氣而洩其和自丁千
載以親逢出協五靈而瑞聖當天下之第一履大名而久居爰屬國

家威紀無疆之休慎求良史之實仰惟俊望允彼僉諧入聚石渠之書坐擅鴻都之筆畢聖人之能事曲暢大猷約春秋而謹元修明舊法乙其處者三月上覽以忘疲勒成書於一家官藏而永秘益注帝心之東行聞柄用之求推相如之文章坐朝而當大冊取公孫之儒雅作相以繩羣臣豈伊紬繹之勤可滯久賢之業竊揆妄庸之質永懷棲庇之心緹律已窮凝寒方凜冀保和倪之妙益迎福履之綏遊歧門牆卑情不任

右四六四篇散在諸本之中胥學士啓專敘獄官非公甚明今加以代字辭官啓初似爲晏元獻作徐考官職則又不然或是他人之文李學士二篇據蔡康祖跋云王銍性之搜求文忠公遺文已多某復於家藏李邕鄆錄遺中得此啓狀按公天聖八年登科淑已爲史館檢討尋遷直集賢院於公爲先進逮景祐二年公貶夷陵淑在翰林以書附遞問五代史公異辭答之則初第或曾投啓但公後來奏疏極口詆淑今第一啓乃有沿牒過家并子姓師門等語與公出處交際殊不相應吉綿本既已收入姑存之

回穎州呂侍讀遠迎狀熙寧三年

右某啓某此者誤恩擢任嗟瘵病之不堪危懇力辭蒙睿慈之垂憫許從易地俾養衰齡方趨便道之行適遂過家之樂敢期雅眷遠辱惠音雖瞻款之尚遙若話言之已接傾馳之素欣感交深謹奉狀謝

與穎州呂侍讀賀冬狀同前

右某啓伏以七日告期候天陽之來復百祥佑德宜君子之承休知府侍讀侍郎經濟嘉謨論思碩望宣風撫俗一方式藉於鎮臨獻可告猷三接侍升於近密屬迎長之屆日當受社於無疆頌詠傾動敷宣罔既謹奉狀賀伏惟照察謹狀

右公熙寧二年改知蔡州與呂正獻公二狀今載呂公五州錄公嘗典數郡凡應用之文如頒曆恤刑賀正賀冬歲歲皆當上表而

集中纔見一二至於監司隣郡往復書啓亦僅有之按蘇丞相跋公帖在書簡第二卷謂南京幕府二年府事外章奏書疏悉以見託然則公委人代作者固多此二狀未知出公手與否姑存之

謝張先輩啓明道前吉綿本及文海皆有之

早者公步至伏蒙以七言雅什一篇爲贈者承命之辱拜賜甚嘉亟淪心而玩辭殆驚魂之去體伏以秀才即先輩象與稟異廟理凝姿服懿行以彌中騰藉華而冒遠遊聖門而入其闔洞際天人之交塞藝圃而激其芳獵取菁英之妙自叨一日之雅已服百人之豪方育賢而在阿久俟時而踴足第一鄉之品推月旦之美評游諸公之門有名卿之躡履而乃過存庸妄之品借借交游之光采箕斗之虛名靡責其實謂糠粃之無用偶置于前特遺蔓草之餘妍摛寫陽春之雅曲如華裘之一字寵示榮褒鸞珍髡於九戎委之非所矧復警辭森駭峭格鋒生挫萬物以揮毫入無間而抽秘蕩蕩默默而滿坑滿谷雅韻迭揚郁郁紛紛而非霧非煙文華炳發屬苦中於清聖方臥歎於酸瘠條駭無因而至前不醉爲之而彊起病醒都釋颯若清風之襲人絀繹並輝永訂至珍之藏衍顧迫持於歸鞅慚弗獲於披風恭佩之私談非終悉

回發運主客啓見文海及仕塗必用

伏審顯膺寵命榮總使權伏惟慶慰恭以某官才猷經世問望光朝資敏議以通微竭精誠而濟務自居漕職克邁官能九年之一作厚儲已豐於茂最三載考績遽被於陟明重膺東注之求奚測亨騰之勢幸依使部致辱誨函銘佩欣祈併交悰悃

與辛郎中啓慶曆二年冬倅滑州見絳啓新範

右某此者得請便親署官近郡始臨舊府逸想清風依聽訟之甘棠餘音疑可愛步飛觴之月樹遺址尚存其如邊鄙多虞公私並乏簿書期會常苦紛紜鐫俎笑談豈如疇昔方茲感誠疑愧遽辱誨存顧

冬律之嚴疑喜天和之保奮佇膺茂渥以副企禱

與呂轉運啓見臧啓新範

伏審顯奉宸恩入趨天闕方欣庇賴遽失於焉依仍流播謙特貽於嘉問某人珪玉茂德棟幹上材藹清望於朝端東乃心於帝眷列城按俗誼美政於民謠會課及期走旌賢之召節鬱去思而雖甚諒峻陟以非遙冬序方凝神襟善齋傾祈禱戀交集感悚

答運使啓見臧啓新範

伏審榮膺帝渥出領漕權方懷竊抃之誠遽辱誨存之惠某人廟理重器國棟上材茂績藹於朝端嘉猷均於宸東果被僉諧之命實資富庶之謨攬譽有初已風行於列郡追鋒訊疑召即柄用於本朝矧託公庥但深久禱

賀新發運啓見臧啓新範

伏審榮抱使權已諧禮上猥居屬郡竊庇公庥方深欣幸之私遽辱誨存之厚伏惟某人才優學古業茂經時久妙東於上心屢委分於劇任果疇懿績亟被陟明投刃皆虛豈足煩於餘地暮年入報行別訝於寵靈屬此春和冀綏福履欣依禱頌倍萬常情

與李吉州寬啓慶曆五年冬初到滁州見臧啓新範

伏念待罪山城絕迹人事敢期音誨屢以顧存欽羨風義以其高若話言之方晤坐塵千里矧茂最之已深入覲四門佇寵光之休被冬凝在候福履惟寧瞻詠感銘倍爲誠素

別紙附

人至辱書爲誨承臨郡之暇體况甚休鄉郡多幸得賢侯爲立學舍蒙索鄙文竊喜載名廡下遂不敢辭筆語麤惡幸望與伯鎮學士評改而刻石也冬冷千萬加愛

與許發運啓慶曆六年滁州見臧啓新範

伏念僻守郡封殆不通於輟迹邈詹風采缺馳問於與居恭惟按省

之餘克保粹和之妙洽朝急土方渴佇於宏材漕最淹賢况已升於美績卽期迅用以奮遠圖企頌之私縷言非罄

又慶曆六年春滁州見臧啓新範

伏念睽異風微屢更年律河壩阻邈常辱郵音准郡僻荒亦蒙誨問荷顧存之至厚慰艱拙以茲多此者伏審某人榮被恩俞近移使節望行舟而非遠伸良觀以未涯惟賢業之素彰藹勳勤而夙著佇從公議別帶龍光豈此漕輸可淹傑俊春陽方感福履惟休感詠詹依交集誠悃

上李端明狀見臧啓新範

伏審遠驅旌旆已及郊圻和氣所充與民謳而先涑餘塵可望欣馬首之獲詹卽遂攀迎交深祝詠某不任激切依歸之至

回知郡賀冬狀見臧啓新範

天序欲周物生伊始惟君子福綏之吉順陽和來復之時卽訝寵光以符善禧敢祈隆顧先辱惠音荷慰誨之尤多積感銘而但切

與楊太傅狀見臧啓新範

右某伏念畫圻雖邇遵德未由幸時接於誨音良若披於徽采夫何定瑣辱此記憐春序已暄神襟善齋佇膺茂渥以副傾祈

答李寺丞狀見臧啓新範

早欽秀望忽枉榮緘以州部之相望加門闌之最舊過形來問但切中藏

答王供奉狀見臧啓新範

乍聞清徽兩蒙芳訊審總車之伊始欣妙畫以惟和卽奉渥恩以待瞻禱

與鄰郡官狀見臧啓新範

伏念封圻甚密官守有常雖傾企德之勤尙阻披風之便承屢形於謙顧常曲示於誨言冬序方凝陽和將動伏惟爲國自重以副瞻祈

答賀赴闕狀見緘啓新範

近蒙朝旨召赴闕庭方瀝懇以致辭敢辱書而爲賀仰承詔疑眷但切悚惶

謝真州知郡見緘啓新範

伏念幸守陋邦獲鄰善壤側聽下車之始已喧載路之聲方渴仰於風徽遽先貽於誨問某人材雄通敏器蘊宏深撫俗班條綽聞於餘裕陟明陞最行被於殊恩方此春陽冀綏福履禱祈感詠言述非周

謝劉真州見緘啓新範

幸鄰善壤日執政聲雖談笑之靡親辱誨言之屢及少浣詹翹之懇奚勝感愧之私行因盜路之謠入被中臺之召清和始屆寢寐增休縷縷之誠一一奚旣

右張先輩啓公所作無疑四六集偶失編入餘得之仕塗必用緘啓新範者皆京師舊本也或出公手或人代作其說與蘇丞相跋語同

表奏書啓四六集卷第七

奏議卷第一 集九十七

諫院

論按察官吏劄子慶曆二年

臣伏見天下官吏員數極多朝廷無由徧知其賢愚善惡審官三班吏一作二部等處又只主一作具差除月日人之能否都不可知諸路轉運使等除有臧吏自敗者臨時舉行外亦別無按察官吏之術致使年老病惠者或懦弱不材者或貪殘害物者此等之人布在州縣並無黜陟因循積弊一作官濫者多使天下州縣不治者十有八九今兵戎未息賦役方煩百姓嗷嗷瘡痍未復拯其疾苦擇吏爲先臣今欲乞特立按察之法於內外朝官中自三丞以上至郎官中選強幹廉明者爲諸路按察使自來雖差安撫使緣管他事不專按察今請令進奏院各錄一州官吏姓名爲空行簿以授之使至州縣遍見官吏其公廉才幹顯著實狀及老病不材顯有不治之迹者皆以朱書於姓名之下其中材之人別無奇効亦不致曠敗者則以墨書之又有雖是常材能專長于一事亦以朱書別之使還具奏則朝廷可以坐見天下官吏賢愚善惡不遺一人然後別議黜陟之法如此足以澄清天下年歲之間可望至治只勞朝廷精選二十許人充使別無難行之事取進止

論乞詔諭陝西將官一作臣劄子同前

臣風聞吳賊今其人來辭意極不遜順所請之事必難盡從事既不成則元昊必須作過朝廷須合先爲禦備竊慮沿邊將帥見西人入朝惟一作準望通好便生懈怠萬一西賊驟出忿兵擊吾弛惰則立見敗事乞速詔邊臣密諭與西賊辭未遜順必不通和之意各使先知絕其願望早爲準備庶不敗事仍慮邊將謂一作料朝廷此時議雖未合若後次更來必須和好因此便無討賊之志仍乞便因詔諭示以激厲之言云朝廷以吳賊罪大意在討除今不許其和好者蓋

以外有爾輩在邊必望破賊成功之意使其不生退心臣見唐武宗英武之主所任宰相李德裕最號有材當時用兵征伐指揮將帥處置事宜動以詔書約束勸厲故終成功業國家用兵以來未聞以賞罰號令激動人心使其竭力者此最宜留意取進止

論元昊來人請不賜御筵劄子同前

臣竊知吳賊所遣來人將欲到闕風聞管勾使臣須索排備一作比次第甚廣及聞纔至欲賜御筵管領臣知吳賊此來意極不遜臣料朝廷必欲要其臣服方許通和若欲如此則便須有以挫之方能抑其驕慢庶可商量今若便於禮數之間過加優厚則彼必以一作謂我爲怯知我可欺議論之間何由屈折若果能得其臣順一作能得其心則待議定之後稍加禮數一作待亦未爲遲仍須杜漸防微常爲挫抑之計豈可一事未成先虧國體其元昊一行來人伏乞凡事減勒無令曲加優厚若因此得其抑挫而臣服則吾計無失如其必不臣服則免至虛虧事分取進止

論楊察請終喪制乞不奪情劄子慶曆二年

臣近見丁憂人茹孝標居父之喪來入京臣奔走權貴營求起復已爲御史所彈又聞新及第進士南宮觀聞母之喪匿不行服得官娶婦然後徐歸見在法寺議罪孝標官爲大常博士觀在場屋粗有名稱此二人猶如此則愚俗無知違禮犯義者何可勝數矣蓋由朝廷素不以名教獎勵天下而禮法一隳風俗大壞竊以風化之本由上而下伏見起復龍圖閣待制楊察累有章奏乞終母喪而朝旨未允夫臣子之行惟孝與忠察以文中高科官列近侍而能率勵頽俗以身爲先陛下宜曲賜褒嘉遂成其志使遷善化俗自察而始豈可不通人情膠執舊弊推祿利之小惠廢人臣之大節臣謂近侍奪情本非一作以軍國之急不過循舊例示推恩而已今察以節行自高志在忠孝知貪冒祿利爲可恥若朝廷抑奪其情使其於身不得成美

行而于母有罔極之恨豈足謂之推恩乎方今愚俗無知違犯禮義至使繁獄訟嚴刑罰而不能禁止脫有一人欲守名教而全忠孝以勵天下者又爲朝廷不許則風俗之弊其咎安在伏乞早降恩旨許其終喪不獨成察之志亦以爲朝廷之美取進止

論韓琦范仲淹乞賜召對事劄子同前

臣伏見自西鄙用兵以來陛下聖心憂念每有臣寮言及西事必皆傾心聽納今韓琦范仲淹久在陝西備諳邊事是朝廷親信委任之人况二臣才識不類常人其所見所言之事不同常式言事者陛下最宜加意訪問自一人到闕以來只是逐日與兩府隨例上殿呈奏尋常公事外有機宜大處置事並未聞有所建明陛下亦未曾特賜召對從容訪問况今西事未和邊陲必有警急兼風聞北虜見在涼旬與大臣議事外邊人心憂恐伏望陛下于無事之時出御便殿特召琦等從容訪問使其盡陳西邊事宜合如何處置今琦等數年在外一日歸朝必有所陳但陛下未賜召問此二人亦不敢自請獨見至如兩府大臣每有邊防急事或令非時召見聚議或各令互述所見或只召一兩人對見商量此乃帝王常事祖宗之朝並亦如此不必拘守常例也取進止

論罷鄭戡四路都部署劄子同前

臣伏覩勅除鄭戡知永興軍仍兼陝西都部署自聞此命外人議論皆以爲非在臣思之實亦未便竊以兵之勝負全由處置如何臣見用兵以來累次更改或四路都部署或分而各領一方乍合乍離各有利害惟夏竦往年所任鄭戡今日之權失策最多請試條列臣聞古之善用將者先問能將幾何今而不復問能將幾何直以關中數十州之廣蕃漢十萬之兵沿邊二三千之事盡以委之此其失者一也或曰戡雖名都部署而諸路自各有將又其大事不令專制而必稟朝廷假如邊將有大事先稟於戡又稟於朝廷朝廷議定

下戡戡始下於沿邊只此一端自可敗事其失二也今大事戡既不專若小事又不由戡則都部署一職止是虛名若小事一問戡則四路去永興皆數百里其寨柵遠者千餘里使戡一一處分合宜尙有遲緩之失萬一耳目不及處置失宜則爲害不細其失三也若大小事都不由戡而使帶其權豈有數十州之廣數十萬之兵二三千里之邊事作一虛名使爲無權之大將若知戡可用則推心用之若知不可用則善罷之豈可盡關中之大設爲虛名而以不誠待人其失四也今都部署名統四路而諸將事無大小不稟可行則四路偏裨各見其將不由都帥則上下相効皆欲自專其失五也今都部署是大將反不得節制四路而逐路是都帥部將却得專制一方則委任之意大小乖殊軍法難行名體不順其失六也若知戡果不可大用但不敢直罷其職則是大臣顧人情避己怨如此作事何以弭息人言其失七也料朝廷忽有此命必因韓琦等近自西來有此擊畫琦等身在邊陲會爲將帥豈可如此失計臣今欲乞令兩府之臣明議四路不當置都部署利害其鄭戡既不可內居永興而遙制四路則乞落其虛名只令坐鎮長安撫民臨政以爲關中之重其任所繫亦大而使四路各責其將則事一作名體皆順處置合宜今取進止

論凌景陽二人不宜與館職奏狀慶曆五年

右臣今日竊聞凌景陽召試館職外議皆以爲非臣聞聖主之以風化勵天下不能家至戶到但進一善人則天下勸退一不肖則天下懼用功至簡其益極多苟賞罰之過差繫朝廷之得失伏况自國家祖宗以來崇建館閣本以優待賢材至於侍從之臣宰輔之器皆從此出其選非輕如凌景陽者粗親文學本實凡庸近又聞與在京酒店戶孫氏結婚推此一節其他可知物論喧然共以爲醜此豈足以當國家優待賢材之選又聞夏有章魏廷堅等亦皆得旨將試館職此二人者皆有贓污著在刑書此尤不可玷辱朝化其凌景陽今已

就試乞不與館職有章廷堅乞更不召試竊以累年以來風教廢壞士無廉恥之節官多冒濫之稱當其積習因循則不以爲怪如欲澄清治化則宜革此風臣謂黜此三人則天下士人當修名節臣職在諫諍忝司耳目採是非之公論合具密陳見選任之非人皆當論列謹具狀奏聞伏候勅旨景陽轉一官知和州有章廷堅罷試景陽集賢晏公舉有章故相陳公章廷堅兩制運狀舉

論按察官吏第二狀同前

右臣近曾上言爲天下官吏冗濫者多乞遣使分行按察昨日竊觀降勅下諸路轉運使司令兼按察使竊以轉運使自合察舉本部官吏今若特置使名更加約束則於常行之制頗爲得宜必欲救弊於時則未盡善且臣初乞差按察使者蓋欲朝廷精選強明之士竊聞朝議一作廷以所選非人故不遣使今所委轉運使豈盡得人乎其間昏老病患有之懦弱不材者有之貪贓失職者有之此等之人自當被劾豈可更令按察其間縱有材能之吏又以幹運財賦有米鹽之繁供給軍需有星火之急既不暇遍走州縣專心察視則稽遲鹵莽不得無之故臣謂轉運使兼按察使不材者既不能舉職材者又不暇盡心徒見空文恐無實効在於事體不若專遣使人伏自兵興累年天下困弊飢荒疲瘵既無力以賑救調斂科率又無由而減省徒有愛民之意絕無施惠之方若能逐去冗官不令貪暴選用良吏各使撫綏惟此一事及民最切苟可爲人之利何憚選使之勞况自近年累遣安撫豈於今日頓以爲難今必恐三丞至郎中內難得其人卽乞且依前後安撫於侍從臣寮及臺官館職中選差十數人小處路分兼察兩路其侍從臣寮仍各令自辟判官分行採訪用臣前來起請事件施行其轉運兼按察使若能精選其人亦乞著令爲今後常行之制臣伏思從來臣寮非不言事朝廷非不施行患在但著空文不責實効故改更雖數號令雖煩上下因循了無所益今

必欲日新求治革弊救時則須在力行方能濟務臣所言者生民之急一有務乎也天下之利也不徒略行一二分以塞言責而已伏望留意詳擇謹具狀奏聞伏候勅旨

再論按察官吏狀同前

右臣自初忝諫官於第一次上殿日首曾建言方今天下凋殘公私困急全由官吏冗濫者多乞朝廷選差按察使糾舉年老病患贓污不材四色之人以行澄汰仍具陳按察之法條目甚詳如臣之議蓋欲使使者四出而天下悚然知朝廷有賞善罰惡之意然後按文責實甚惡者黜有善者升中材之人盡使警勵凡臣所言者乃所以救民急病革數一作四十年蠹弊之事若非遭逢聖主銳意求治之時上下力行之不可也奈何議者憚於作事惟樂因循抵命諸路轉運使就兼其職命出之日外論皆謂諸路之中貪贓如魏兼老病如陳杲穢惡如錢延年庸常礙礙如袁抗張可久之輩盡爲轉運使皆自是可黜之人必不能舉職臣亦再具論奏其議格而不行按察空名今遂寢廢生民蠹病日益可哀伏見陛下聖德日新憂心庶政近發手詔督勵宰輔然天下之事積弊已多如治亂絲未知頭緒欲事事更改則力未能周而煩擾難行欲漸漸整頓則困弊已極而未見速効臣謂如欲用功少爲利博及民速於事切則莫若精選明幹朝臣十許人分行天下盡籍官吏能否而升黜之如臣前所陳者而後可臣聞治天下者如農夫之治田不可一槩也蒿萊蕪穢久荒之地必先力加墾闢芟除待其成田然後以時耘耨冗濫之官蕪穢天下久矣必先力行澄汰待其百職粗治然後精選有司常令糾舉今特遣之使如久荒而芟闢也轉運兼按察乃以時之耘耨者耳寬猛疾徐各有所宜也漢時刺舉唐世黜陟使考課使之類歲歲遣出祖宗朝亦有考課院蓋按察升黜古今常法非是難行之異事也方今言事者多以高論見棄或以有害難行如臣所言只是選十餘人明幹朝

臣察視官吏善惡灼然有迹易見者著之簿籍朝廷詳之黜其甚者耳臣自謂于論不為甚高為甚高二字一作迂行之有利無害然尚慮議者未以為然謹條陳冗官利害六事以明利博効速而可行不疑伏望聖慈特賜裁擇如有可採乞早施行

一曰去冗官則民之科率十分減九

臣伏見兵興以來公私困弊者不惟賦斂繁重全由官吏為姦每或科率一物則貪殘之吏先於百姓而刻剝老繆之吏恣其羣下之誅求朝廷得其一分姦吏取其十倍民之重困其害在斯今若去此四色冗官代以循良之吏事隨便宜絕去搔擾使民專供朝廷實數科率免却州縣分外誅求故臣謂於民力十分減九也比於別圖減省細碎無益者其利博矣

二曰不材之人為害深於賊吏

國家之法除賊吏因民告發者乃行之其他不材之人大者壞州小者壞縣皆明知而不問臣謂凡賊吏多是強黠之人所取在於豪富或不及貧弱不材之人不能馭下雖其一身不能乞取而恣其羣下下字一作不逞共行誅剝更無貧富皆被其殃為害至深縱而不問故臣尤欲盡取老病繆懦者與賊吏一例黜之

三曰內外一體若外官不澄則朝廷無由致治

今朝廷雖有號令之善者降出外方若落四色冗官之手則或施設乖方不如朝廷本意反為民害或稽滯廢失全不施行而又無糾舉棄一作多作空文若外邊去却冗官盡得良吏則朝廷所下之令雖有乖錯彼亦自能回改或執奏更易終不至為大害是民之得失不獨上賴朝廷全繫官吏善惡以此而言冗官豈可不去

四曰去冗官則吏員清簡差遣流通

今天下官有定員而入仕之人無定數既不黜陟冒濫者多差遣不行賢愚同滯每有一闕眾人爭之一作競爭爭得者無廉恥之風不得者騰怨嗟之口濫官之弊近古無之今若擇四色冗官去之則待闕之人可無怨滯

五曰去冗官則中材之人可使勤懼

今天下官吏豈必盡是不材蓋為朝廷本無黜陟善惡不分今若見國家責實求治逐一求治逐一四字一作是求人精別則中材之人皆自勉強不敢因循雖有貪殘亦須斂手

六曰去冗官則不過暮月民受其賜

方今朝廷雖有愛一作憂念疲民之意然上下困乏必未有餘力廣惠及民若但去冗官則民受速賜蓋臣常見外處州縣每一繆官替去一能者代之不過數日民已歌謠今若盡去冗濫之吏而以能吏代之不過暮月民即一作必受賜此臣所謂及民速於事切者也

論禁止無名子傷毀近臣狀同前

右臣竊見前年宋庠等出外之時京師先有無名子詩一首傳於中外尋而庠罷政事近又風聞外有小人欲中傷三司使王堯臣者復作無名子詩一篇略聞其一兩句臣自聞此詩日夕疑駭深思事理不可不言伏以陛下視聽聰明外邊事無大小無不知者竊恐此詩流傳漸廣須達聖聰臣忝為陛下耳目之官不欲小人浮謗之言上惑天聽合先論列以杜姦讒况自兵興累年繼以災旱民財困竭國帑空虛天下安危繫於財用虛實三司之職其任非輕近自姚仲孫罷去之後朝廷以積年蠹弊貧虛窘乏之三司付與堯臣仰其辦事乃是陛下委信責成之日堯臣多方展効之時臣備見從前任人率多顧惜祿位寧可敗事於國不肯當怨於身如堯臣者領職以來未及一月自副使以下不才者悉請換易足見其不避嫌怨不徇人情

竭力救時以身當事今若下容讒間上不主張則不惟才智之臣無由展効亦恐忠義之士自茲解體臣思作詩者字亦作之人雖不知其姓名竊慮在朝之臣有各位與堯臣相類者嫉其任用故欲中傷只知爭進於一時不思沮國之大計伏自陛下罷去呂夷簡夏竦之後進用韓琦范仲淹以來天下欣然皆賀聖德君子既蒙進用小入自恐道消故共一作只喧然務騰讒口欲惑君聽欲沮好人不早絕之恐終敗事況今三司蠹弊已深四方匱乏已極堯臣必須大有更張方能集事未容展効已被謗言臣近日已聞浮議紛紛云堯臣更易官吏專權侵政今又造此詩語搖惑羣情若不止之則今後陛下無以使人忠臣無由事主讒言罔極自古所患若一起其漸則扇惑羣小動搖大臣貽患朝廷何所不至伏望特降詔書戒勵臣下敢有造作言語誣搆陰私者一切禁之及有轉相傳誦則必推究其所來重行朝典所貴禁止讒巧保全善人謹具狀奏聞伏候勅旨勅出賞錢官爵購捉是時上欲更改朝政小人不便造作言語動搖及勅榜出自此遂絕

奏議卷第一

奏議卷第二 集九十八

諫院

論沂州軍賊王倫事宜劄子慶曆三年

臣近聞沂州軍賊王倫等殺却忠佐朱進打劫沂密海楊泗楚等州邀呼官吏公取器甲橫行淮海如履無人比至高郵軍已及二三百人皆面刺天降聖捷指揮字號其王倫仍衣黃衫據其所為豈是常賊驟聞可駭深思可憂臣竊見自古國家禍亂皆因兵革先興而盜賊繼起遂至橫流後漢隋唐之事可以為鑒國家自初兵興必知須有盜賊便合先事為備而謀國之臣昧於先見致近年盜賊縱橫不能撲滅未形之事雖或有所不及已兆之患豈可因循不為臣遍思天下州軍無一處有備假令王倫等周遊江海之上驅集罪人徒衆漸多兩越閩廣而斷大嶺西走巴峽以窺兩蜀所在空然誰能禦之一作劍製若不多為方略竊恐未可剪除而朝廷之臣尚若常事不過差一兩人使臣領兵捕捉此外更無處置竊以去患宜速防禍在微伏望陛下深懼禍端督責宰輔早為擊晝速務剪除臣亦有短見數事謹具條列以裨萬一

一乞訪尋被殺朱進或有兒男便與一官令其捕賊以復父讎仍許令乘驛隨逐一作處指射兵士隨行

一竊知王倫在沂密間只有四五十人及至高郵已二三百人皆是平民被其驅脅欲乞除軍賊不赦外特赦驅脅之人先與安慰其家各令家人以書招諭有能殺軍賊脫身自歸者等第重與酬賞可使自相疑貳壞散兇徒

一竊慮江淮諸處先有盜賊漸與王倫合勢則兇徒轉熾卒難剪滅欲乞指揮募諸處未獲盜賊有能謀殺軍賊者亦等第重行酬獎可使賊心自疑徒黨難集

一乞出榜招募諸處下第舉人及山林隱士負犯流落之人有能

以身入賊筭殺首領及設計謀賊陷於可敗之地者重與酬獎所貴兇黨懷疑不肯招延無賴之人以為謀主

一竊見朝廷雖差使臣領兵追捕而兇賊已遍劫江淮深慮趕趁一作追趕不及徒黨漸多欲乞特差中使馳騎先計會沿江淮諸路州軍會合巡檢縣尉預先等截續發禁兵隨後追逐所貴不致走透

右臣所陳五事伏乞詳擇施行外有先被王倫脅從人等首身者百餘人其中有當與酬賞及合行分配者乞早賜施行用安反側謹具狀奏聞

論王舉正范仲淹等劄子慶曆三年

臣伏見朝廷擢用韓琦范仲淹為樞密副使萬口懽呼皆謂陛下得人矣然韓琦稟性忠鯁遇事不避若在樞府必能舉職不須更藉仲淹如仲淹者素有大材天下之人皆許其有宰輔之業外議皆謂在朝之臣忌仲淹材名者甚衆陛下既能不感衆說出於獨斷而用之是深知其可用矣可惜不令一有居宇大用蓋樞府只掌兵戎中書乃是天下根本萬事無不總治伏望陛下且令韓琦佐樞府移仲淹於中書使得參預大政况今參知政事王舉正最號不才久居柄用柔懦不能曉事緘默無所建明且可罷之以避賢路或未欲罷亦可且令與仲淹對換當今四方多事二虜交侵正是急於用人之際凡不堪大用者去之乃叶天下公論不必待其作過亦不須俟其自退也况若令與仲淹對換則於舉正不離兩府全無所損伏望陛下思國家安危大計不必顧惜不材之人使妨占賢路如允臣所請即乞留中特出聖斷指揮或尚未欲施行即乞降付中書令舉正自量材業優劣何如仲淹若實不如即須自求引避以副中外公議取進止

論趙振不可將兵劄子同前

議和之際尙有朝廷未許事節深慮狂賊因忿出兵卽三路邊防皆合設備伏見河東都部署明鎬雖是材臣未諳戰陣副部署趙振人品庸劣全不知兵只是好交結沽買聲譽所以不因功業擢至將帥前在延州遂至敗誤雖行責降不及期年却授兵權全無報効其人少壯尙不堪用今又年老病患全然不堪戰鬪一旦臨事必悞國家臣聞將者國之司令陛下安危之機繫於將帥而河東一路無一戰將只有趙振老病一人而已細思此事大可寒心苟有誤事憂在朝廷其趙振伏乞速下本路體量如或實老病不任卽乞罷歸散秩別委將臣竊以河東一路兵馬極多豈是蓄養病將之處西北二虜爲患如此亦非趙振可當若使臨事敗誤悔恐不及伏望聖慈深思大計無惜一老病敗事之人取進止

再論王倫事宜劄子同前

臣竊見近日四方盜賊漸多兇鋒漸熾撲滅漸難皆由國家素無禦備官吏不畏賞罰臣謂夷狄者皮膚之患尙可治盜賊者腹心之疾深可憂而朝廷弛緩終未留意每遇有一火賊則臨事警駭倉皇旋發兵馬終不思經久禦賊之計只如王倫者今若幸而剪撲則其殺害人民爲患已廣如更未能剪撲使其據城邑則患禍不細矣臣數日前已有奏論只是條列招捉王倫一火事宜至如池州解州南京鄧州諸處強賊甚多今後亦須禁絕其端不可更令頻有臣欲乞陛下特勅兩府大臣議定經制臣亦有短見數事備列如後

一臣竊見一作如王倫所過楚秦等州知縣尉巡檢等並不關敵却赴王倫茶酒致被奪却衣甲蓋由法令不峻無所畏稟官吏見一作知朝廷寬仁必不深罪而賊黨兇虐時下可懼寧是畏賊不畏朝法臣今欲乞凡王倫所過州縣奪却衣甲處官吏並與追官勒停其巡檢仍先除名令白身從軍自効俟賊破日却議敘用仍今後用此爲例

一外處知州本號郡將都監監押只管在城巡檢若賊入城不能擒捕則設之何用臣欲乞應有不能禦備致賊人入城打劫不尋時鬪敵致全火走透者知州亦特勒停都監監押除名白身從軍自効能獲賊則議敘用

一臣見諸處有賊多是自京師別差使臣兵馬捉殺則本地分元置都監巡檢縣尉等設之何用每有些小盜賊不獲又無深責稍似強賊則別差人捉殺如此可以推避因循臣欲乞若朝廷別差人捉獲則本地分巡檢縣尉仍坐全不獲賊之罪及從初不切收補致走透他處及潰散後別地分巡檢縣尉捉獲者元出賊處官吏不得與破全火批書

一竊見諸處縣尉多是新及第少年儒生怯懦往往不能捉賊虛令陷罪臣今欲乞下銓司詳議選擇縣尉之格以武勇人材堪充者充仍重定賞罰之法其一作若見今有新及第少年怯懦者委諸路按察使先次舉奏替換

一臣竊見自來所差巡檢兵士多不能捕賊反與州縣爲患臣今欲乞自朝廷選募使臣令使臣自選募兵卒不拘廂禁軍令所在州軍指名抽射仍重立賞罰之法

論蘇紳姦邪不宜侍從劄子同前

臣昨日竊聞勅除太常博士馬端爲監察御史中外聞之莫不驚駭端爲性險巧本非正人往年常發其母陰事母坐杖脊端爲人子不能以禮法防其家陷其母於過惡又不能容隱使母被刑理合蒙羞負恨終身不齒官聯豈可更爲天子法官臣不知朝廷何故如此用人縱使天下全無好人亦當虛此一位不可使端居之況剛明方正之士不少臣求其故蓋是從初不合令蘇紳舉人紳之姦邪天下共惡視正人端士一作端人正士如仇讎惟與小人氣類相合宜其所舉如此也端之醜惡人誰不知而紳一作輒敢欺罔朝廷者獨謂陞

下不知耳此一事尚敢欺罔一作惑人主其餘毀忠良以是爲非之說其可信乎其馬端伏乞追寢成命蘇紳受詔舉此醜惡之人罔上欺下亦乞坐此黜外任不可更令爲人主侍從取進止

論乞令百官議事劄子同前

臣伏見祖宗時猶有漢唐之法凡有軍國大事及大一作不決刑獄皆集百官參議蓋聖人慎於臨事不敢專任獨見欲採天下公論擇其所長以助不逮之意也方今朝廷議事之體與祖宗之意相背每有大事秘不使人知之惟小事可以自決者却送兩制定議兩制知非急務故忽略拖延動經年歲其中時有一兩事體大者亦與小事一例忽之至於大事秘而不宣此尤不便當處事之始雖待從之列一作例皆不與聞已行之後事須彰布縱有乖誤却欲論列則追之不及况外廷百官疎遠者雖欲有言陛下豈得而用哉所以兵興數年西北二方累有事宜處置多繆者皆由大臣自無謀慮而杜塞衆見也臣今欲乞凡有軍國大事度外廷須知而不可秘密者如北虜去年有請合從與不合從西戎今歲求和當許與不當許凡如此事之類皆下百官廷議隨其所見同異各令署狀而陛下擇其長者而行之不惟慎重大事廣採衆見兼又於庶官寒賤疎遠人中時因議論可見其高材敏識者國家得以用之若百官都無所長則自用廟堂之議至於小事並乞只令兩府自定其錢穀合要見本末則召三司官吏至兩府討尋供析而使大臣自擇至於禮法亦可召禮官法官詢問如此則事之大小各得其體如允臣所請且乞將西戎請和一事先集百官廷議取進止

論諫院宜知外事劄子同前

臣竊聞近日爲軍賊王倫事江淮州軍頗有奏報朝廷不欲人知召進奏官等於樞密院責狀不令漏泄指揮甚嚴不知此事出於聖旨或只是兩府大臣意欲如此以臣料之爲近日言賊事者多朝廷欲

人不知以塞言路耳臣謂方今多事之際雖有獨見之明尚須博採善謀以求衆助豈可壅蔽羣聽杜塞人口况朝廷處事未必盡能合宜臣下獻忠未必全無可採至如王倫驅殺士民攻劫州縣江淮之上千里驚搔事已若斯何由掩蓋當今列辟之士極有憂國之人欲爲人主獻言常患聞事不的况臺諫之官尤一作元是本職凡有論列貴在事初善則開端惡則杜漸言於未發庶易回改今事無大小常患後時或號令已行或事迹已布縱欲論救多不能及若更秘密不使聞知則言事之臣何由獻說臣今欲乞指揮進奏院凡有事非實封者不須秘密臣因此更有起請事件畫一如後

一竊見御史臺見有進奏官逐日專供報狀欲乞依御史臺例選差進奏官一人凡有外方奏事及朝廷詔令除改並限當日內報諫院

一竊見唐制諫臣爲供奉之官常在天子仗內朝廷密議皆得聞之今雖未曾恢復舊制欲乞凡遇朝廷有大處置四方奏報事非常程及諫官風聞事未得實者並許詣兩府請問庶知審實得以論列

右件二事如允臣所請乞降指揮施行取進止

論河北守備事宜劄子同前

臣伏見朝廷方遣使與西賊議通和之約近日竊聞邊臣頗得北界文字來問西夏約和了與未了苟實如此事深可憂臣以謂天下之患不在西戎而在北虜縱使無此文字終須貽患朝廷契丹通好僅四十年無有纖介之隙而輒萌姦計妄有請求竊以戎狄貪吝性同犬彘遇強則服見弱便欺見我無謀動皆屈就謂我爲弱知我可一作易欺故添以金繒未滿其志更邀各分抑使必從無事而來尚猶如此若更因西事攬以爲功別有過求將何塞請此天下之人無愚與智共爲朝廷寒心者也今若果有文字來督通和之事則臣謂醜

虜狂計其迹已萌不和則詰我違言既和則論功責報不出年歲恐須動作苟難曲就必至交兵至於選將練師既難卒辦禦戎制勝當在機先一有然字臣竊怪在朝之臣尙偷安靜自河以北絕無處置因循弛慢誰復挂心豈可待虜使在廷寇兵壓境然後計無所出空務張皇而已哉今國家必謂兩意雖乖尙牽盟誓邊防處置未敢張皇以臣思之莫若精選材臣付與邊郡使其各圖禦備密務脩完此最爲得也况今邊防處置百事乖方惟有擇人最爲首務今北邊要害州軍不過十有餘處於文武臣寮中選擇十餘人不爲難得各以一州付之使其各得便宜如理家事完城壘訓兵戎習山川蓄糧食凡百自辦不煩朝廷經度以茲預備尙可枝梧至如鎮定一路最爲要害張存昔在延州以不了事罷去今乃委以鎮府王克基凡庸輕巧非將臣之材而任定州其餘州郡多匪其人臣欲乞陛下特詔兩府大臣取見在邊郡守臣可以禦敵捍城訓兵待戰者留之其餘中常之材不堪邊任者悉行換易若一有使字秋風漸勁虜虜一作陳有端陛下試思邊鄙之臣誰堪力戰朝廷之將誰可出師當臣初授諫職之時見朝廷進退大臣陛下銳意求治必謂羣臣自此震懾百事自此脩舉西北二事最爲大者自當處置不待人言及就職以來已數十日而政令之出漸循舊弊惟言事之臣拾遺補闕者勉強施行其一二至如講大利害正大紀綱外制四夷內紓百姓凡廟堂帷幄之謀未有一事施行於外者臣忝司諫諍豈敢不言伏望陛下不忘社稷之深恥無使夷狄之交侵駁發天威督勵臣下仍一作伏乞詢問兩府大臣西鄙和與不和能保契丹別無辭說否苟有所說能以廟謀奇筭沮止之否苟無謀以止之則練兵選將備待寇賊至而後圖能不敗事否臣願陛下勿謂去歲六符之來可以賄解今而有請則事難從矣勿謂累年西賊爲患習以爲常若此事一動則天下搖矣臣所言者社稷之大計也願陛下留意而行之取進止

論軍中選將劄子同前

臣伏見國家自西鄙用兵累經敗失京師勁卒多在征行禁衛諸軍全然寡少又無將帥以備爪牙方今爲國計者但務外憂夷狄專意邊陲殊不知根本內虛朝廷勢弱萬一有事一作事有萬一無以枝梧今軍帥暗懦非其人禁兵驕惰不可用此朝廷自以爲患不待臣言而可知也臣亦歷考前世有國之君多於無事之際恃安忘危備患不謹使禍起倉卒而致敗亡者有矣然未有於用兵之時而反忘武備如今日者兵法曰將者民之司命國家安危之主也今外以李昭亮王克基輩當契丹內以曹琮李用和等衛天子如當今之事勢而以民之司命國之安危繫此數人安得不取笑四夷遭其輕侮臣謂去歲北虜忽興狂悖今年元昊妄有請求若使朝廷有一二人中材之將叩頭効死奮身請戰誓雪君恥少增國威則戎狄未敢侵陵朝廷未至屈辱奈何自中及外都無一人既無可恃以力爭遂至甘心於自弱夫天下至廣遂無一人者非真無人也但求之不勤不至耳臣伏思自用兵以來朝廷求將之法不過命近臣舉朝士換武官及選試班行方略等人而已近臣所舉不過俗吏材幹之士班行所選乃是弓馬一夫之勇至於方略之人尤爲乖濫試中者僅堪借職縣尉參軍齎挽而已於此求將而欲捍當今之患此所以困天下而敗於一作取侮夷狄者也臣不知朝廷以此數事爲求將之術果是乎果非乎以爲是則所得何人知其非則盡思改革又不知朝廷以將爲易得乎爲難得乎爲易得則數歲未見一人知其難得則當多方用意早思求擇俟其臨患何可得乎伏望陛下特詔兩府大臣別議求將之法盡去循常之格以求非常之人苟非不次以用人難弭當今之大患臣亦常有愚見久欲條陳若必講求庶可參用臣伏見唐及五代至平國朝征伐四方立功行陣其間名將多出軍卒只如西鄙用兵以來武將稍可稱者往往出於軍中臣故謂只於軍中自

可求將試略言求將之法謹條如左

凡求將之法先取近下禁軍至廂軍中年少有力者不拘等級

一作伏因其伎同者每百人團爲一隊而教之較其伎精而最

勇者百人之中必有一人矣得之以爲隊將此一人伎勇實能

服其百人矣以爲百人之將可也合十隊將而又教之較其伎

精而最勇者十人之中必有一人矣得之以爲裨將此一人之

伎勇實能服其千人矣以爲千人之將可也合十裨將而又教

之夫伎勇出千人之上而難爲勝矣則當擇一作較其有識見

知變通者十人之中必有一人矣得之以爲大將此一人之伎

勇乃萬人之選而又粗知變通因擇智謀之佐以輔之以爲萬

人之將可也幸而有伎勇不足而材識出乎萬人之外者此不

世之奇將非常格之所求也臣所謂只於軍中自可求將者此

也誠能如此得五七萬兵隨而又得萬人之將五七人下至千

人百人之將皆自足然後別立軍名而爲階級之制每萬人爲

一軍以備宿衛有事則行師出征無事則坐威天下比夫以豐

衣厚祿養驕惰無用之卒而遞遷次補至於校帥皆是凡愚暗

懦之人得失相萬矣若臣之說果可施行俟成一軍則代舊禁

兵萬人散出之使就食於外新置之兵便制其始稍增舊給不

一作勿使大優常役其力不令驕惰比及新兵成立舊兵出盡

則京師減冗費得精兵此之爲利又遠矣

右臣所陳只是選勇將訓衛兵之一法耳如捍邊破賊奇才異略之

人不可謂無伏乞早賜留意精求謹具奏聞伏候勅旨

奏議卷第二

奏議卷第三 集九十九

諫院

論郭承祐不可將兵狀慶曆三年

右臣伏聞朝旨用郭承祐為鎮定部署臣自聞此除改夙夜思維一
作竊見朝廷以郭承祐為鎮定州總管事關利害臣職當言國家用
 兵已五六年未有纖毫所得控蓋朝廷威勢困却天下生靈細一
 深思厥由其失安在患在朝廷拘守常例不肯越次擇材心知小一
 作非人付以重一作要任後雖敗事亦終不悔今每有除擬一作差
 不當人或問於大臣則曰雖知非材捨此別無人一有矣字甚者欲
 塞人言則必曰爾試別思更有誰可用乎一作者臣亦常聞此言每
 退而歎息夫所謂別無人者豈是天下真無人乎蓋不力一作肯求
 之耳今不肯勞心一無二字選一作揀擇越一作不次而用一有而
 字但守常循例輕用小入寧誤大計一誤不一作一悔後又復然至
 如葛懷敏頃在西邊天下皆知其不可當時議者但曰捨懷敏一有
 則字別未有人難為換易一無此四字及其戰敗身亡橫屍原野懷
 敏既不復生亦須別求一作別須有人用臣謂二字一作且今日任
 一作用承祐亦猶當時用懷敏也況如一無如字承祐者凡庸一無
 二字奴隸之才不及懷敏遠甚頃在澶州只令一有營字築一有州
 字城幾至生變豈可當此一路一作道臣謂朝廷一作天下非不知
 承祐非材議者不過曰例當敘進別更無人此乃因循之說耳方今
 點一作醜虜狂謀禍端已兆中外之士一無二字見國家輕忽戎患
 弛武北方人皆獻言願早為備忽見如此除改誰不驚憂前者劉六
 符之一作暫來一有便使二字朝廷忍取就議蓋謂河朔無可自一
 作素無可恃難與速一作力爭須知屈意苟和少寬禍患今幸得此
 自紓之計所宜多方汲汲一無二字精意一作選將臣先為禦一作
 預備猶恐不及豈是因循守例輕任一作用小人之日也一無也字

其郭承祐欲乞早移與一不用兵處知州或召還別與一閑慢職秩
 若欲錄其勤一作勳舊優其戚里之恩閑官厚祿足可養之不必須
 令居此要任伏願陛下深思大計不憚改為則天下幸甚取進止

論元昊來人不可令朝臣管伴劄子同前

臣風一作竊聞朝旨一作廷欲以殿中丞任顓管領元昊遣來一行
 人等一本此十字只作管伴西人臣竊知元昊此來全無好意一無
 此四字不一作未肯稱臣一有又字索物大多其志不小一作少乃
 是欲以強相迫脅爾一無此九字朝廷既一作必不能從則待其來
 人凡事不可過分至於禮數厚薄賜與多少雖云小事不足較量然
 於事體之間所擊者大凡兵交之使來入一無入字大國必須窺伺
 將相勇怯規察國家強弱若一作如見朝廷威怒未息一作回事勢
 一作意未則則必內憂斬戮次恐拘留一本此十二字只作莫測必
 有斬使出兵之懼拘囚在館之憂使其偶得生歸自為大幸則我弱
 形未露壯論可持今若便損國威過加厚禮先為自弱長彼驕心使
 其知我可欺則議論愈一作論事悉益難合矣必若成就其事尤須
 鎮重為先況其議必不成可惜空損事體前次元昊來人至少朝廷
 只差一作以一班行一有人字待之今來漸多遂差朝士若其後次
 一無文字來者漸一作更感則必須差近侍矣是彼一本彼字作今
 賊轉自強我轉自弱一有矣字況聞邵良佐昨來往彼僅免屈辱而
 還則彼雖戎一作夷狄不謂無謀今其來人必須極驕強辭以圖相
 勝若能一無能字先薄其禮以折之亦挫賊一作廟謀之一端也其
 元昊來人欲乞更不差官管領送置驛中不須急問一本其字下廿
 一字止作宜罷館待而比於前次更可減損至於監視饋餉一作館
 待傳道語言一了一作幹事班行足一作可矣臣料今國家若不能
 曲從其意即一本無此十字雖尊寵一無寵字來人厚加禮遇一本
 人字下四字作而不從其請則元昊不免出兵一無此二字攻寇一

有邊鄙字逞一作肆彼忿心等是不和何必自虧事一作國體不若
急備一作速嚴邊備以圖勝算一作廟勝取進止三字一作惟陛下
留意

論元昊不可稱吾祖劄子同前

臣伏見如定等來西賊欲稱吾祖嚮聞朝議已不許之今日風聞議
却未定不知虛的深切驚憂且吾祖兩字是何等語便當拒絕理在
不疑安有未定之說哉夫吾者我也祖者俗所謂翁也今匹夫臣庶
尙不肯妄呼人為父若欲許其稱此號則今後詔書須呼吾祖是欲
使朝廷呼蕃賊為我翁矣不知何人敢開此口且蕃賊撰此名號之
時故欲侮翫中國而已今若得其稱臣則此二字尤須論辨今自元
昊以下名稱官號皆用夷狄若蕃語元卒華言吾祖則今賊中每事
自用夷禮安得惟於此號獨用華言而不稱元卒且彼於我稱臣而
使我呼為祖於禮非便故當以此折之可也朝廷自有西事以來處
置乖方取笑於人者多矣未有如此一事最可笑也竊慮小人妄有
議論伏乞拒而不聽取進止

論乞廷議元昊通和事狀同前

右臣近有奏論今後軍國大事不須秘密請集百官廷議近聞以上
一作伏見元昊再遣使人將至闕下一無下字和之與否決在此行
竊計廟謀合思成筭臣謂此最大事也天下安危繫之今公卿士大
夫愛君憂國者人人各為陛下深思極一作遠慮惟恐廟堂之失策
遂落夷狄之姦謀衆口云云一作紛紛各有論議一曰天下困矣不
和則力不能支少屈就之可以紓患一曰羌夷險詐雖和而不敢罷
兵則與不和無異是空包一作抱屈就之羞全無紓患之實一曰自
屈志一無此三字講和之後一有不遵欲字退而休息練兵訓卒一
作訓兵選將以為後圖然此亦必不能者只以河朔一有將字之事
可知蓋慮纒和之後便忘發憤因循弛廢一作廢弛為患轉深一曰

縱使元昊復一作稱臣一有而字西邊滅費不弛武備不忘後圖然
猶有大可憂者北戎將一作必攬通和之事以為己功過有邀求遂
與兵甲是暫息小患於關西復生大患於河北臣忝為耳目之官見
國有大事旁採外一作衆論所聞如此異同然大抵皆謂就和則難
不和則易不和則害少和則害多然臣又不知朝廷之意其議云何
臣見漢唐故事一有祖宗舊制大事必須廷一作集議蓋以朝廷示
廣大不欲自狹謀臣思公共不敢自強故舉事多臧衆心皆服伏思
國家自與兵以來常祕大事初欲隱藏護惜不使人知其處置乖
違豈能掩蔽臣謂莫若採大公之議收衆善之謀待其都無所長四
字一作所言無可採自用廟謀一有固亦未晚其元昊請和一事伏
乞二字一作請於使人未至之前一有先字集百官廷議臣只自朝
夕以來諸處詢訪已聞衆說如此若使並集於廷各陳所見必有長
策以裨萬一一有惟陛下裁幸無下九字謹具狀奏聞伏候勅旨

論西賊議和利害狀同前

右臣伏自一作見如定等到京以來竊聞朝議不許賊稱吾祖必欲
令其稱臣然後許和此乃國家大計廟堂得策蓋由陛下至聖至明
不苟目前之事能慮嚮去之憂斷自宸衷決定大議然數日來風聞
頗有無識之人妄陳愚見不思遠慮欲急就和臣雖知必不能上惑
聖聰然亦慮萬一少生疑沮則必壞已成之計臣職在言責理合辨
明伏自西賊請和以來衆議頗有異同多謂朝廷若許賊不稱臣則
慮北戎別索中國各分此誠大患然臣猶謂縱使賊肯稱臣則北戎
尙有邀功責報之患是臣與不臣皆有後害如不得已則臣而通好
猶勝不臣然於後患不免也此有識之士憂國之人所以不願急和
者也今若不許通和不過懼賊來寇耳且數年西兵遭賊而敗非是
賊能善戰蓋由我自繆謀今如遣范仲淹盧置邊防稍不失所一有
則字賊之勝負尙未可知以彼驕兵當吾整旅使我因而獲勝則善

不可加但得兩不相傷亦已一作是挫賊銳氣縱仲淹不幸小敗亦所失不至如前後之繆謀一作戰是比於通和之後別有大患則所損猶少此善筭之士見遠之人所以知不和害小而不懼未和也臣謂方今不羞屈志急欲就和者其人有五一曰不忠於陛下者欲急和二曰無識之人欲急和三曰姦邪之人欲急和四曰疲兵懦將欲急和五曰陝西之民欲急和自用兵以來居廟堂者勞於幹運在邊鄙者勞於戎事若有避此勤勞苟欲陛下屈節就和而自偷目下安逸他時後患任陛下獨當此臣所謂不忠之臣欲急和者也而而偷安利在目下和後大患伏而未發此臣所謂無識之人欲急和者也自兵興以來陛下憂勤庶政今小人但欲苟和之後寬陛下以太平無事而望聖心怠於庶政一作事因欲進其邪佞惑亂聰明大抵古今人主憂勤小人所不願也此臣所謂姦邪之人欲急和也屢敗之軍不知得人則勝但謂賊來常敗此臣所謂懦將疲兵欲急和也此四者皆不足聽也惟西民困乏意必望和請因宣撫使告以朝廷非不欲和而賊未遜順之意然後深戒有司寬其力役可也其餘一切小人無識之論伏望聖慈絕而不聽使大議不沮而善筭有成則社稷之福也謹具狀奏聞伏候勅旨

論乞不遣張子奭使元昊劄子同前

臣竊聞吳賊來人議論數日全無遜順之意朝廷又欲遣張子奭復往賊中仍聞且只一有令字在延州伺候賊意待其來迎方敢前進不知果有如此議否若實有之大為不便臣謂方今兩議未決正是各爭名分之時尤不可自虧事體元昊既見朝廷議論不合必料邊防須為準備其偽以好辭來迎子奭使我望和而少弛然後不意以出一作出小意以攻子奭或被拘留或遭虐害以為中國萬世之辱則悔何及焉雖不如此使子奭端坐延州不來省問欲歸則又慮來迎久待則寂然無報進退不得何取如之蓋元昊已與中國二次商

量必知難合子奭之往又別無議論未盡之事彼一有必字不急求相見則於臣二說慮有一焉臣不知朝廷以吳賊為可臣乎不可乎若有可臣則自當以重兵壓境仍選忠厚知謀之士直入賊中說令臣服如其不可則何必遣人或但欲遷延歲月不拒絕之則只當因如定之回賜以甘言許其厚賂論以若能遜順則使通意邊臣俟得其實然後定議乃是未絕其來之意也不可令天子使臣待賊命而進退萬一遭其拒絕或被拘執則於事無益空損國威為今計者不若速遣范仲淹嚴備邊境徐放如定等還當自為謀以求勝筭取進止

論乞不受呂紹寧所進羨餘錢劄子同前

臣風聞轉運使呂紹寧纔至淮南便進見錢十萬貫不知是一作果否臣見兵興以來天下困弊者非獨備邊之費半由官吏壞之今三司自為闕錢累於東南剗刷及以穀帛回易則南方庫藏豈有剩錢閩里編民必無藏鏹故淮南旬近歲號為錢荒不知紹寧纔至淮南用何術於何處得此錢以進若將官庫錢上進則逐州合使錢處甚多必致闕乏若於民間科率則人力豈任且十萬緡錢國家得之所益至微外處取之為害不細往年李定王逵一作蓬輩皆刻剝疲民進奉至今南方嗟怨况今年江淮王倫大三字一作諸路自警劫後繼以蝗旱為孽民間困窘尤要撫存而紹寧欺罔朝廷妄有進獻伏乞特降指揮下別路選差一精強官將淮南一路見管錢帛磨勘大數取見紹寧所進何處得來苟涉欺妄乞賜重行朝典其所進錢伏乞聖慈拒而不受以彰朝廷均卹外方防禦姦吏刻剝之意取進止

論孫抃不可使契丹劄子慶曆三年

臣伏見差孫抃等充契丹人使臣謂朝廷新遣契丹侮慢陵辱之後必能發憤每事挂心凡在機宜合慎措置及見抃等被選乃知忘忽慮患依舊因循今西賊議和事連北虜中間屢牒邊郡來問西事了

與未了今專使到彼必先問及應對之際動關利害一言苟失爲患非輕豈可四人之中令抃先往抃本蜀人語音訛謬又其爲性靜默自安軍國之謀未常與議凡關機事多不諳詳臣聞古者遣使最號難才不受以辭許其專對蓋取其臨事而敏應卒一作變無窮今抃旣不可預告以言則將何以應卒苟一疎脫取笑四夷其孫抃欲乞不令出使或恐中書不能逆抃人情尙執一作守前議卽乞別令人言語分明稍知朝廷事者先往貴不誤事且醜虜君臣頗爲強黠中國常落其計不可不知今欲雪前恥雖知未能其如後患豈可不慮伏望聖慈早令兩府別議取進止

論范仲淹宣慰陝西劄子同前

臣風聞如定等不久放還竊緣此來議論必未諧和須慮驕賊猖狂忿兵攻寇凡關邊備正要枝梧伏覩朝旨已差范仲淹田況等爲宣撫使今日風聞韓琦以仲淹已作參政欲自請行不知是否以臣愚見不若且遣仲淹速去琦與仲淹皆是國家委任之臣材識俱堪信用然仲淹於陝西軍民恩信尤爲衆所推服今若仲淹外捍寇兵而琦居中應副必能共濟大事庶免後艱若陛下以新用仲淹責其展効則且令了此一事俟邊防稍定不兩三月自可還朝旣先弭於外虞可漸修於闕政今邊事是目下之急不可遲緩以失事機伏望斷自宸衷輟仲淹速去以備不虞取進止

奏議卷第四 集一百

諫院

論京西賊事劄子慶曆二年

臣竊聞近日張海郭貌山與范二等賊勢相合轉更猖狂諸處奏報日夕不絕伏惟聖慮必極憂勞不聞廟謀有何處置臣竊見朝廷作事常有後時之失又無慮遠之謀患到目前方始倉忙而失措事纔過後已却弛慢而因循昨王倫暴起京東轉攻淮甸橫行千里旁若無人既於外處無兵須自京師發卒孫惟忠等未離都下而王倫已至和州矣賴其天幸偶自敗亡然而驅殺軍民焚燒城市瘡痍塗炭毒遍生靈此州郡素無守備而旋發追兵誤事後時之字一作皆有明驗臣謂朝廷因此必悔前非須有改更以防後患而自王倫敗後居兩府者了無擘畫有上言者又不施行上下拖延日過一日遂至張海郭貌山等又起京西攻劫州縣橫行肆毒更甚王倫依前外處無兵又自京師發卒臣聞張海是李宗火內惡賊郭貌山在商山已及十年其驍勇兇姦不比王倫偶起之賊縱使官兵追及亦其勝負未知天下之憂恐自此始臣亦知近日臣寮上言賊事者甚衆竊慮兩府進呈文字之時必須奏言已差使臣選兵追捕將此拙計便爲廟謀上寬聖懷苟自塞責張海等二百餘人盡有甲馬日行一二百里馬力困乏則弃別奪民間生馬乘騎竊料官兵必難追逐縱使追兵能及生靈已受其殃此度賊雖能平後患豈可不慮以今四方盜起所在各要隄防則臣前所言禦賊四事之中州縣置兵最爲急務伏望陛下憫此生民見受屠戮之苦不聽迂儒遲緩誤事之言其州縣置兵事件富弼已有起請伏乞決於宸意速與施行取進止

再論置兵禦賊劄子同前

臣近爲張海等賊勢猖狂會上言禦賊四事內一件州縣置兵爲備風聞朝議已依富弼起請施行其餘三事一乞選擇盜官一乞定賞

罰新法三乞按察老病貪賊之官此三事至今未聞擬議臣伏見去年朝廷於諸道州府招宣毅兵士及添置鄉兵弓手當時搔擾次第不小本要爲州縣禦賊之備及一旦王倫張海等相繼而起京東淮南江南陝西京西五六路二三十州軍數千里內殺人放火肆意橫行入州入縣如入無人之境則去年所置宣毅兵鄉兵弓手等盡皆何在無一處州縣得力者蓋由官吏不得其人賞罰無法而所置宣毅鄉兵弓手皆不一作無堪使用一作者所以張皇搔擾空有爲備之名而無爲備之用今朝廷雖依富弼起請令州郡置兵若不先擇官吏嚴立法令則依前置得不堪使用之兵空有其名終不濟事故臣謂必欲州郡置得精兵則須採臣所陳三事一一施行方可集事其州縣官吏誤事臣請試言京西一兩處則其他可知鄂州知州王昌運老病腰腳行動不得每日令二人扶出坐衙三年之內州政大壞臨替得一比部員外郎劉依交代其劉依亦是七十餘歲昏昧不堪昨在滑州寄居臣爲通判三四度來看臣每度問臣云中書有一個王參政名甚如此不知人事陛下試思如此等人能爲國家置兵禦賊乎今汝州知州鮑亞之是三司以不才東退者鄧州知州朱文郁是轉運使中不材選退者二人老懦不才如此等人能爲國家置兵禦賊乎陛下欲知全盛之世盜賊便敢如此者蓋爲處處官吏非人故臣前後累言乞按察冗濫之官者蓋爲恐有此事也兩府之議不肯於無事之時先爲禦備直待打破一州方議換知州打破一縣方議換縣令其餘未經打破州縣一任老病貪繆之官壞之臣謂是大臣不肯以身當怨之過也今天下生民獲安樂則皆須上感陛下聖德若其父子殺戮難散不安則亦必歸怨陛下今大臣不肯澄汰蓋避百十人官吏怨其身寧使百萬蒼生塗炭而怨國家今盜賊一年多如一年一火強如一火天下禍患豈可不憂伏望聖明一作慈特出睿斷如必行州郡置兵之法則先須慎擇官吏免致虛爲搔擾

反更害民臣前後三次乞按官吏况國家自來每有災傷路分累會遣使安撫豈於今日視民如此塗炭頓以遣使爲難願陛下力主而行之則天下幸甚取進止

論盜賊事宜劄子同前

臣近因軍賊王倫等事累有論奏爲見天下空虛全無武備指陳後漢隋唐亡國之鑒皆因兵革先興而盜賊繼起不能撲滅遂至橫流又見國家綱紀隳頽法一作政令寬弛賞罰不立善惡不分體弱勢危可憂可懼欲乞朝廷講求禦盜之術峻行責下之法兼聞搢紳之內憂國者多有封章皆論賊事臣但謂朝廷見已形之患聞衆多之言必動於心略知恐懼及聞樞密院戒勵進奏官不使外人知事方認兩府厭苦獻言之人又見自和州奏破王倫之後更不講求禦賊之策又認上下已有偷安之意殊不知前賊雖滅後賊更多今建昌軍一火四百人桂陽監一火七十人草賊一火百人其餘池州解州鄧州南京等處各有強賊不少皆建旗鳴鼓白日入城官吏逢迎飲食宴樂其敢如此者蓋爲朝廷無賞罰都不足畏盜賊有生殺時下須從臣恐上下因循日過一日國家政令轉弱盜賊威勢轉強使畏賊者多向國者少天下之勢從茲去矣臣竊聞京西提點刑獄張師錫爲部內使臣與賊同坐喫酒及巡檢縣尉不肯用心曾有論奏其言甚切臣舊識師錫其人恬靜長者遲緩優柔不肯生事今尙有此奏則臣謂天下無賢愚皆爲國家憂之獨不憂者朝廷爾嗟夫古之智士能慮未形之機今之謀臣不識已形之禍以患爲樂以危爲安見盜賊雖多而時有敗者遂生翫寇之意見言事者衆而聽之已熟遂有忽人之心臣近曾求對便殿伏蒙陛下語及賊事憂形於色及退見宰輔間暇從容天下之事深可憂矣今建昌桂陽一有軍守賊數不少想其爲害尤甚王倫在於遠處更合留意今自京發兵則道遠不及外處就撥則處處無兵欲乞嚴勅大臣鑒此已成難救之

患速講定禦盜之法頒行天下使四方漸爲備禦及一作仍早壁畫剪撲諸處見在賊數自有賊以來羣臣上言者皆爲自來寬法致得不肯用心捉賊皆乞峻行法令近見池州官吏各只罰銅五斤乃知言者皆不蒙聽納臣謂大臣爲國計者寧厭忠言之多不厭盜賊之多乃如此行事爾臣前後上言賊事文字不少仍乞類聚擇其長者講定法制陛下欲知大臣不肯峻國法以繩官吏蓋由陛下不以威刑責大臣此乃社稷安危所繫陛下之事也伏望留意而行之取進止

論學士不可令中書差除劄子慶曆三年

臣近見翰林學士蘇紳葉清臣等相繼解職風聞侍從之臣內有姦儉小人頗急經營爭先進用至有喧忿之語傳聞中外者既虧廉讓之風又損朝廷之體臣伏思翰林之職重於唐世乃是天子親信朝夕謀一作謀夕議內助之臣當時號爲內相故其進用尤極精選只用一作取材識不限資品往往自州縣官一有擢字而拜者國朝近歲於此一職頗非其人既見其材識愚下不足以備訪問一本有之事二字人主因之薄一本作薄之其待遇漸疎外同於冗官遂容小人得以濫進臣思其弊蓋由不合令中書依資差除且學士之職本要內助天子講論外朝闕失今若却令中書除人致於內一作置之內制則是恩出中書之人雖在天子左右與無無字一作外官同也伏乞自今後翰林學士不必足員用人不限資品但擇有材望正人堪充者出自上意一作聖明擢用以杜小人爭進之端而天子左右更無姦邪之人庶清侍臣之列取進止

論呂夷簡劄子同前

臣昨日伏覩外廷宣制呂夷簡守大尉致仕以夷簡爲陛下宰相而致四夷外侵百姓內困賢愚失序一作倒置綱紀大隳二十四年一作十四年間壞了天下人臣大富貴夷簡享之而去天下大憂患留

與陛下當之夷簡罪惡滿盈事跡彰著然而偶不敗亡者蓋其在位之日專奪國權脅制中外人皆畏之莫一作不敢指一作發擄及其疾病天下共喜姦邪難去之人且得已爲天廢又見陛下自夷簡去後進用賢才憂勤庶政聖明之德日新一作日又新故識者皆謂但得大姦已廢不害陛下聖政則更不復言所以使夷簡平生罪惡偶不發揚上一作正賴陛下始終保全未污斧鑕是陛下不負夷簡夷簡上負朝廷今雖陛下推廣仁恩厚其禮數然臣料夷簡必不敢當理須陳讓臣乞因其來讓便與寢罷別檢自來宰相致仕祖宗舊例與一合受官名然臣猶恐夷簡不識廉恥便一作更受國家過分之恩仍慮更乞子弟恩澤緣夷簡子弟因父僥倖恩典已極今邊鄙多事外面臣寮辛苦者未常非次轉官豈可使姦邪巨蠹之家貪賦懸駸子弟不住加恩竊恐朝廷貽濫賞之譏未弭物論其子弟伏乞更不議恩典取進止

論呂夷簡僕人受官劄子同前

臣伏見國家每出詔令常患官吏不能遵行不知患在朝廷自先壞法朝廷不能自信則誰肯信而行之然多因小人僥倖而不加抑絕所與之恩雖少所損之體則多臣聞去年十月中曾有臣寮上言乞今後大臣廡僕不得奏薦班行勅旨頒下纔三四月已却用呂夷簡僕人袁宗等二人爲奉職夷簡身爲大臣壞亂陛下朝政多矣苟有利於其私雖敗天下事尚無所顧况肯爲陛下惜法但朝廷自宜如何今一法纔出而爲大臣先壞之則其次臣寮僕人豈可不與不與則是行法有二與之則近降勅旨今後又廢有司爲陛下守法者不思國體但徇人情或云二僕得旨與官在降勅前奈何授官在降勅後凡出命令本爲釐革前弊法家以後勅衝前勅今袁宗等雖曾得旨而未受命之間已該新制自合釐革夷簡不能止絕而恣其倖求朝廷又不舉行近勅而自隳典法今後詔令何以遵行其袁宗等伏

乞特追奉職之命別與一軍將之類閑慢各目足示優恩不可爲無功之臣私寵僕奴而亂國法取進止

論止絕呂夷簡暗入文字劄子同前

臣風聞呂夷簡近日頗有密奏仍聞自乞於御藥院暗入文字不知實有此事否但外人相傳上下疑懼臣謂夷簡身爲大臣久在相位尚不能爲陛下外平四夷內安百姓致一作使得二虜交構中國憂危兵民疲勞上下困乏賢愚失序賞罰不中凡百綱紀幾至大壞筋力康健之日尚且如此乖繆况已罷政府久病家居筋力已衰神識昏耗豈能更與國家圖事據夷簡當此病廢卽合杜門自守不交人事縱有未忘報國之意凡事卽合公言令外廷見當國政之臣共議一作擬可否豈可暗入文書眩惑天聽况夷簡患攤風手足不能舉動凡有奏聞一作疏必難自寫其子弟輩又不少一作首須防作僞或恐漏泄於體尤爲不便雖陛下至聖至明於夷簡姦謀邪說必不聽納但外人見夷簡密入文書恐非公論若誤國計爲患不輕夷簡所入文字伏乞明賜止絕臣聞任賢勿貳去邪勿疑見今中外羣臣各有職事苟有闕失自可任責不可更令無功已退之臣轉相惑亂取進止

薦姚光弼狀同前

右臣等伏觀慶曆元年南郊赦書節文委史院檢閱國朝將帥有威名勳業者尋訪子孫錄用風聞史院已具檢勘姓名聞奏至今未見施行伏以赦令之文國家大信度必難行之事則不當輕言若已布告天下則不可失信况此一節自是當今合行之事必慮將家子孫例多不肖則宜於尋訪之時便責州郡察其行止無大過惡者乃得以聞今舊將名在史官能應赦書所求者有幾若更去一作擇其不肖者不用則推恩所及不過一二十人耳不至濫行恩賞所可惜者因此一二十人而失國家大信臣等伏見故慶州刺史姚內斌有孫

光弼好學有行止能記前世兵法及史籍所載名將用兵取勝之術比於累年所試方略濫進之人不可同類若蒙擢用必有所爲伏乞舉行赦書特賜召試仍下所居州縣隣里考其行實參驗而行其餘將家亦乞通行一作加尋訪臣等職在諫諍當補闕遺見國家赦令已行而自失大信及士有豪俊沉棄而未用者皆當論列臣等又觀赦書節文云本房子孫與班行安排如實有膽勇謀略者仍與邊上任使詳此雖無材藝者亦預推恩也今光弼據其學識况有可採臣等所陳只乞比近年方略之人特與一試上以全國家大信下可收遺逸之人伏望聖慈特賜施行取進止

論李淑姦邪劄子同前

臣昨日因奏事於延和殿已曾面論李淑嚮在開封府猶爲疎外今拜學士是禁中親近之職竊緣此人不宜在侍從之列其姦邪陰險之迹陛下素已知之今外邊臣寮骨肉同坐者不敢道李淑姓名蓋其穢惡醜不可當據外人如此惡之豈合却在人主左右淑自來朋附夷簡在三口五鬼之數蓋夷簡要爲肘腋所以援引至此不知今日朝廷如此清明更要此人何用若欲藉其詞業則臣謂才行者人臣之本文章者乃其外飾耳況今文章之士爲學士者得一兩人足矣假如全無文士朝廷詔勅之詞直書王言以示天下尤足以敦復古朴之美不必雕刻之華自古有文無行之人多爲明主所棄只如徐鉉胡旦皆是先朝以文章著名於天下二人皆以過惡廢棄終身不齒當時朝廷亦不至乏人淑居開封過失極多然止是一府之害今在朝廷若有所爲少肆其志則害及忠良沮壞政治是爲天下之害故臣不可不言今雖陛下主張正人不信讒巧然淑之爲惡出於天性恐不能悔改竊慮依舊譖毀好人伏望聖慈一切不納早與一外任差遣使正人端士安心作事無譏毀之避取進止

再論李淑劄子同前

臣近日竊聞李淑已有聖旨令與壽州却知中書不肯便行須得淑自上章求一作乞出方敢差除臣謂李淑姦邪之迹陛下既已盡知若得斷自宸衷則使天下之人皆知陛下聰明神聖辨別忠邪黜去小人自出聖斷如此則今後姦邪險惡之人可使知懼而不敢爲害今若如中書之意須待其自求退則是賞罰之柄不由明主自行去住之謀一任臣下取便如此則今後小人皆知雖爲姦邪險惡天子欲力去而中書必未一作未必肯行若不自退則一作別無人敢差臣恐自此小人轉爲得計不肯懷心進賢退不肖者宰相之職也今大臣既自避怨不肯爲陛下除去姦邪賴陛下聖明洞分邪正又不能使依聖旨直與差除更須曲收人情優假羣小三四日來外邊聞陛下欲除李淑壽州人人鼓舞皆賀聖德蓋淑二三十年出入朝廷姦險傾邪害人不少一旦見人主斥去左右莫不欣抃却聞中書如此迂迴自相顧避可惜聖明之斷不盡施行臣欲望更不須候其請郡因兩府奏事之時特出聖旨處分直除一外郡使天下皆知此姦邪穢惡之人是人主力自除去以彰聖明之德取進止

論慎出詔令劄子同前

臣伏以朝廷每出詔令必須合於物議下悅民情真宗皇帝初置諫官詔書內條列六事首言詔令不便者許諫官論列蓋朝廷慎於出令之意也近見詔書褒美陝西轉運使卞咸風聞咸在陝西爲買百姓青苗及轉般大麥此兩事大與西人爲一作大爲西人患逃移却人戶一無此三字極多至今西人怨謗不已賴吳遵路減得轉般一事人獲稍寧今所降詔書兩人一時一作例褒美善惡不分無所激勸使陝西人見者必謂朝廷咫尺絕不卹念西人不知西事誤下詔書美此與民爲害之人必轉生怨謗臣竊料朝廷必因邊臣奏舉咸等能積糧儲故賜一作此獎諭蓋失於採訪不知咸處置乖方之事致西民流移怨謗之因欲乞今後戒此失誤慎出詔令及戒勵羣臣

今後薦舉人不得妄有稱美其已出之詔既不可追臣又恐朝廷因此遂待下咸爲材一作能吏別有任用却致敗事臣職在諫諍不可不言

奏議卷第四

諫院

論李昭亮不可將兵劄子慶曆三年

臣伏見朝廷近自河東移李昭亮為鎮定高陽三路都部署竊以北戎險詐必與國家為患北面之事常須有備此一事陛下聖心久自憂之執政大臣非不知而憂之天下之人共為朝廷憂之李昭亮不才不堪為將帥不可委兵柄此一人陛下聖心久自知之執政大臣非不知之天下之人亦共知之不審因何遽有此命大凡朝廷行事不當者或為小事而忽略容有不知致誤施行而至乖錯者有矣未有以天下大可憂患而上下共知之事公然乖繆任以非人如此者臣料兩府之議必因施昌言等近奏三路關都部署而目下無人以昭亮塞請而欲徐別選擇不過如此而已然臣竊見朝廷作事常患因循應急則草草且行纔過便不復留意只如今秋用郭承祐於鎮定尋以非才罷之當時應急且以常一作康德興為鈐轄闕却部署一職本待徐擇其人臣初喜朝廷必能自此精於選任經今數月何曾用意求人一旦昌言奏來又遣昭亮且去今平時無事之際尚如此不能選人任用若一旦倉皇事動更於何處求人故臣謂朝議欲徐擇人而代昭亮者乃虛語爾方今天下至廣不可謂之無人但朝廷無術以得之耳寧用不材以敗事不肯勞心而擇材事至憂危可為慟哭臣思朝廷所以乏人任用之弊蓋為依常守例須用依資歷級之人不肯非次拔擢所以無人可用古人謂勞於擇賢而逸於任使今人既難得求之又不勤待其自來何復可得臣累會上言練兵選將之法未賜施行又曾言乞於沿邊十數州且選州將亦不蒙聽納寧可公選不材之人委以大兵之柄一旦誤事悔何及之伏望聖慈出於睿斷其李昭亮早令兩府擇人替換仍早講求選將之法若大將能卒然而得即乞於沿邊州軍選擇州將近下資淺人中庶乎

易得昨北使姓名稍遲數日中外之士已共憂疑幸其未動之間宜作先時之備兵法曰無恃其不來恃吾有以待之惟陛下為社稷之計深思而行之則天下幸甚取進止

論禦賊四事劄子同前

臣昨自軍賊王倫敗後尋會極言論列恐相次盜賊漸多乞朝廷早為禦備凡為國家憂盜賊者非獨臣一人前後獻言者甚眾皆為大臣忽棄都不施行而為大臣者又無筆畫果致近日諸處盜賊縱橫自淮海已南新遣王倫之後今自京以西州縣又遭張海郭貌山等劫掠焚燬桂陽監昨奏蠻賊數百人夔峽荆湖各奏蠻賊皆數百人解州又奏見有未獲賊十餘火滑州又聞強賊三十餘人燒却一作劫沙彌鎮許州又聞有賊三四十人劫却榷澗鎮此臣所聞目下盜起之處如此縱橫也此外京東今歲自秋不雨至今麥種未得江淮倫賊之後繼以飢蝗陝西災旱道路流亡日夜不絕似此等處將來盜賊必起是見在者未滅續來者愈一作更多而乾象變差謹告不一於古占法多云天下大兵盡起今兵端已動於下天象又告於上而朝廷安恬舒緩無異常時此臣前狀所謂古之智者能慮未形之機今之謀臣不識已形之禍者也臣聞兩漢之法凡盜賊並起人民流亡天文災異如此等事皆責三公或被誅戮或行黜放今幸陛下仁聖寬慈大臣偶免重責而尤忘忽禍患偷習因循此臣所謂大臣不肯峻國法以繩官吏蓋由陛下不以威刑責大臣者也今見在賊已如此後來賊必更多若不早圖恐難後悔臣計方今禦盜者不過四事一曰州郡置兵為備二曰選捕盜之官三曰明賞罰之法四曰去冗官用良吏以撫疲民使不起為盜此四者大臣所忽以為常談者也然臣視今朝廷於此四者未有一事合宜伏望聖慈嚴勅兩府大臣問其捨此四事別有何術可為苟無他術則此四事宜早施行臣竊聞州郡置兵富弼已有條奏其餘三事前後言事者議論甚多

伏乞合聚羣議擇其善者而行其禦盜四事方今措置乖失極多容臣續具一二一作一條奏取進止

論乞主張范仲淹富弼等行事劄子同前

臣伏聞范仲淹富弼等自被手詔之後已有條陳事件必須裁擇施行臣聞自古帝王致治須待同心叶力之人二字一作者而君臣相得五字一作相與維持謂之千載一遇之難今仲淹等遇陛下聖明可謂難逢之會陛下有仲淹等亦可謂難得之臣陛下既已傾心待之仲淹等亦又各盡心思報上下如此臣謂事無不濟但願行之如何伏況仲淹弼是陛下特出聖意自選之人初用之時天下已皆相賀然猶竊謂陛下既能選之未知用之如何耳及見近日特開天章從容訪問親寫手詔督責丁寧然後中外喧然既驚且喜此二盛事固已一作以朝報京師暮傳四海皆謂自來未曾如此責任大臣天下之人延首拭目以看陛下欲作何事一作用此二人果有何能此二人所報陛下果有何能一作欲作何事是陛下得失在此一舉生民休戚繫此一時以此而言則仲淹等不可不盡心展効陛下不宜不力主而行使上不玷知人之明下不失四海之望臣非不知陛下專心銳志必不自怠而中外大臣且憂國同心必不相忌而沮難然臣所慮者仲淹等所言必須先絕僥倖因循姑息之事方能救數一作今世之積弊如此等事皆外招小人之怨怒不免浮議之紛紜而姦邪未去之人亦須時有讒沮若稍聽之則事不成矣臣謂當此事初尤須上下叶力凡人怨怒仲淹等自以身當浮議姦讒陛下亦須力拒待其久而漸定自可日見成功伏望聖慈留意始終成之則社稷之福天下之幸也取進止

論臺官不當限資考劄子同前

臣伏見御史臺闕官近制令兩制并中丞輪次舉人遂致所舉多非其才罕能稱職如昨來蘇紳舉馬端却煩朝廷別有行遣臣謂今兩

制之中姦邪者未能盡去若不更近制則輪次所及須令舉人近聞梁適舉王礪燕度充臺官其人以適在姦邪之目各懷愧醜懼其汚染風聞皆欲不就以此言之舉官當先擇舉主臣欲乞今後只令中丞舉人或特選舉主仍見官一作朝班中雖有好人多以資考未及遂至所舉非人者皆爲且就資例可入仍乞不限資考惟擇才堪者爲之況臺中自有裏行之職以待資淺之人仍乞重定舉官之法有不稱職一有者字連坐舉主重爲約束以防僞濫庶幾稱職可振綱紀取進止

再論臺官不可限資考劄子同前

臣近會上言爲臺官闕人乞不依資限選舉仍乞添置裏行所貴得材可以稱職竊聞近詔宋祁舉人依前只用資一作舊例又未見議復裏行臣竊嘆方今一有大臣二字事無大小皆知其弊不肯更改凡臺官舉人須得三丞已上成資通判此例起自近年然近年臺官無一人可稱者近日臺官至有彈教坊倭一作弟子鄭州來者朝中傳以爲笑其臺憲非才近歲尤其是此例不可用明矣然而寧用不材以曠職不肯變例以求人今限以資例則取人之路狹不限資例則取人之路廣廣之一作廣其路猶恐無人何況專守其狹若使資例及者入三院未及者爲裏行又於差除都不妨礙況今四方多事之際揚威出使正要得人臣今欲乞特降指揮令舉官自京官以上不問差遣次第惟材是舉使資淺者爲裏行資深者入三院臣見前後舉臺官者多徇親戚一作舊舉既非材人或問之則曰朝廷用資限致別無人可舉今若革此繆例責其惟才是舉則不敢不舉好人所冀漸振臺綱免取非笑取進止

論京西官吏非人乞黜按察使陳洎等劄子同前

臣竊見去年五月詔勅節文諸路轉運並兼按察使或貪殘老昧委是不治者逐處具狀聞奏若因循不切按察致官吏貪殘刑獄枉濫

民庶無告朝廷察訪得知並當勸罪重一作嚴行黜降竊見近日賊人張海等入金州劫却軍資甲仗庫蓋爲知州王茂先年老昏昧所以放賊入城及張海等到鄧州順陽縣令李正己用鼓樂迎賊入縣飲宴留賊宿於縣廳一作靡恣其劫掠其李正己亦是年老昏昧之人京西按察使陳洎張昇自五月受却朝廷詔書後半年內並不按察一人如王茂先李正己並顯然容庇不早移換致使一旦賊至不能捍禦及光化軍韓綱在任殘酷致兵士作亂亦不能早行覺察其陳洎等故違詔書致興盜賊並合依元降詔勅重行黜降中書又不舉行使國家號令棄作空文天下禍亂貽憂君父蓋由上下互相蒙庇之罪也其陳洎張昇伏乞依詔勅施行重與黜降若明降詔勅顯有違者並不舉行則今後朝廷號令徒煩虛出伏望出於聖斷以警後來取進止

再論陳洎等劄子同前

臣近曾上言爲京西轉運使陳洎張昇違廢詔書並不按察部下官吏致使盜賊縱橫貽憂君父其陳洎等合坐此罪名重行黜降此事非是臣自生狂見敢有妄言乃是朝廷元降詔書內指揮自合行遣今諸路轉運使不按察官吏者甚衆然別不至大段生事及部內官吏不甚昏老者亦可以示優容如陳洎等部內顯然官吏昏老貪殘並不舉劾致得盜賊並起事勢可憂此若不行則國家詔勅乃是空文今後號令有誰肯聽臣伏見近日頓易諸路轉運方思改作欲除舊弊朝廷此後政令須要必行今若自廢詔書示人無信則新轉運見朝廷先自弛廢言不足聽一作信則更無凜畏必効因循虛煩更張必不濟事古人於作事之初尙或借人行法況洎等首自違犯理合舉行宜於革弊之初先行勸衆之事或謂洎等於少人之際且要任使即乞各與降官依舊差遣以責後効徐議復資亦使過之術也尙慮議者謂淮南王倫賊後不會行遣轉運蓋淮南新授詔書未及

按察而賊已卒至又部內官吏如晁仲約等非昏老不比京西慢賊經年不能剪滅直至養成兇勢又其一作洎等部內官吏顯是昏老誤事之人授詔半年故違不舉較其事體與淮南不同今若以淮南不會行遣便捨洎等不問則今後犯者又指洎等以爲例是則朝廷命令永廢不行伏惟陛下聰明睿斷惟是則從尙恐大臣務收私恩不顧國體若能不惜暫降洎等一兩資一作員官存取朝廷綱紀以勵中外則庶幾國威復振患難可平取進止

論舉館閣之職劄子慶曆三年

臣伏見國家近降詔書條制館閣職事有以見陛下慎於各器漸振紀綱然而積弊之源其來已久僥倖之路非止一端今於澄革之初尙有未盡其甚者臣竊見近年外任發運轉運使大藩知州等多以館職授之不擇人材不由文學但依例以爲恩典朝廷本意以其當要劇之任欲假此清職以爲重然而授者既多不免冒濫本欲取重人反輕之加又比來館閣之中大半膏粱之子材臣幹吏差與比肩亦有得之以爲恥者假之既不足爲重得者又不足爲榮授受之間徒成兩失臣欲乞今後任發運轉運知州等更不依例帖職若其果有材能必欲重其職任則當升拜美官優其秩祿況設官之法本貴量材隨其器能自可升擢豈必盡由儒館方以爲榮

一臣竊見近年風俗澆一作輪薄士子奔競者多至有偷竊他人文字干謁權貴以求薦舉如丘良孫者又有廣費資財多寫文冊所業又非絕出而惟務干求勢門日夜奔馳無一處不到如林概者此二人並是兩制臣寮奏乞召試內丘良孫近雖押出而林概已有召一作得試指揮舊來本無兩省以上舉館職明文尙猶如此奔競今若明許薦人則今後薦者無數矣臣欲於近降詔書內兩省舉館職一節添入遇館閣闕人即朝廷先擇舉主方得薦人仍乞別定館閣合存員數以革冗濫

一臣竊見近降詔書不許權貴奏廕子弟入館閣此蓋朝廷爲見近年貴家子弟濫在館閣者多如呂公綽錢延年之類尤爲荒濫所以立此新規革其甚弊臣謂今後膏粱子弟既不濫居清職則前已在館閣者雖未能沙汰尙須裁損欲乞應貴家子弟入館閣見在人中若無行業文詞爲衆所知則不得以年深遷補龍圖昭文館并待制脩撰之類所貴侍從清班不至冗濫

奏議卷第五

諫院

論乞令宣撫使韓琦等經略陝西劄子慶曆三年

臣竊聞已降中書劄子抽回韓琦田況等歸闕昨來琦等奉命巡邊本爲西賊議和未決防其攻寇要爲禦備今西人再來方有邀請在於事體必難便從邊上機宜正須處置仍聞韓琦田況各有奏狀言邊防有備請朝廷不須怯畏每事由從竊以勝敗之間安危所繫料琦等如此奏來則邊事可知自有枝梧不致敗誤臣謂且令琦等在彼撫遏則朝廷與賊商議自可以持重不須屈就今議方未決中道召還則是使賊知朝廷意在必和自先弛備況事無急切何必召歸其召韓琦劄子伏乞速賜指揮抽回且令琦等在彼經略以俟西賊和議如何取進止

論西賊議和請以五問詰大臣狀同前

右臣伏見張子奭奉使賊中近已一作以到關風聞賊意雖肯稱臣一有受冊字而尙有數事邀求未審朝廷如何處置臣聞善料敵者必揣其情僞之實能知彼者乃可制勝負之謀今賊非難料難知但患爲國一有誤字計者昧於遠見落彼姦謀苟一時之暫安召無涯之後患自爲削弱助賊姦謀此左傳所謂疾首痛心賈誼所以大息慟哭者也今議賊肯和之意不過兩端而已欺罔天下者必曰賊困窘而求和稍能曉事者皆知賊權詐而可懼若賊實困窘則正宜持重以裁之若知其詐謀則豈可厚以金繪助成姦計昨如定等回但聞許與之數不過十萬今子奭所許乃二十萬仍聞賊意未已更有過求先朝與契丹通和只用二十萬一旦劉六符輩來又添二十萬今吳賊一口一有已字許二十萬到一作則他日更來又須一二十萬使四夷窺見中國廟謀勝一作神筆惟以金帛告人則遼川首領豈不動心一旦興兵又須三二十萬生民膏血有盡四夷禽獸無厭

引之轉衆何有限極今已許之失既不可追分外過求尙可抑絕見今北虜往來尙在沿邊市易豈可西蕃絕遠須要直至京師只用一作以此詞自可拒止至如青鹽弛禁尤不可從於我雖所損非多在賊則爲利甚博況鹽者民間急用既開其禁則公私往來姦細不分若使賊捐一作損百萬之鹽以啗邊民則數年之後皆爲盜用矣凡此三事皆難允許今若只爲目下苟安之計則何必愛惜盡可由從若爲社稷久遠之謀則不止目前須思後患臣願陛下試發五問詢於議事之臣一問西賊不因敗歟忽肯通和之意或用計困之使就和乎或其與北虜連謀而僞和乎二問既和之後邊備果可徹而寬國用乎三問北使一來與二十萬西人一去又二十萬從今更索又更與之凡廟謀爲國計者止有此策而已乎四問既和之後能使北虜不邀功責報乎虜或一動能使天下無事乎五問元昊一議許二十萬他日保不更有邀求乎他日有求能不更添乎陛下赫然以此五事問之萬一能有說焉非臣所及若其無說則天下之憂從此始矣方今急和謬議既不可追許物已多必不能減然臣竊料元昊不出三五年必須更別猖獗以邀增添而將相大臣只如一有中國二字今日之謀定須更與添物若今日一頓盡與則他時何以添之故臣願惜今日所求其如西賊雖和所利極鮮若和而復動五字一作北戎若動其患無涯此臣前後非不切言今無及矣伏望陛下留意而思之且可不與彼若實欲就和雖不許此亦可若實無和意與之適有後虞謹具狀奏聞伏候勅旨

論葛宗古等不當減法劄子同前

臣伏見近日賊吏葛宗古王克庸滕宗諒等相繼贓污事發內葛宗古情理尤惡臣伏觀去年朝廷命賈昌朝等減省天下冗費上自陛下供御之物至於皇后宮嬪飲食已來盡皆減節蓋謂調度至多公私已乏故陛下以身先天下自行減刻一作省要供軍費凡爲邊將

者所得一錢一帛宜思此物自生民困苦之中取其膏血陛下憂勞之際減自聖躬如此得之宜作如何使用今乃盜朝廷賞勞蕃夷之物贍養求食婦人全家骨肉及供自己家口并營造工作私家冗用之類量其如此用心豈是愛君愛國忘身破賊之人何足愛惜若律文已重即乞盡行更不減法若舊法尙輕仍望特加重斷其滕宗諒王克庸若事狀分明亦望早賜勘鞫正行國典竊慮議者爲宗古等方任邊陲宜從寬貸臣非不知駕馭英雄難拘常法如太祖委用李漢超等蓋漢超能捍寇戎不爲邊患功大過小理可優容諸將守邊未有尺寸之功而先已踰違不一無論不二字法外特敵在而欲望朝廷屈法姑息今朝廷未曾行寬假之惠一作惠而此三人不法一作已各如此若更寬之則今後邊臣不復可以法制矣臣思邊上公使必欲使將臣不拘常法者若用之陰養壯士招延布衣利啗敵人賞勞將校如此之數皆不必問其出入可恣所爲或其性本關略偶不點檢誤用於私家原其本情亦可輕恕若宗古等故意偷減刻寔犒蕃夷軍士之物入己者有何可恕之理特減從輕有何可贖之功得以屈法若此三人不行重斷則邊臣知元昊常在則一無則字可以常爲不法臣恐詭寇弄兵事無了日今取進止

論燕度勘滕宗諒事張皇大過劄子同前

臣昨日風聞張子奭未有歸期消息賊吳又別遣人來必恐子奭被賊拘留西人之來其意未測邊鄙之事不可不憂正是要藉將帥効力之際旦夕來三字一作近者傳聞燕度勘鞫滕宗諒事枝蔓勾追直得使盡邠州諸縣枷杻所行拷掠皆是無罪之人囚繫滿獄邊上軍民將吏見其如此張皇人人嗟怨自狄青种世衡等並皆解體不肯用心朝廷本爲臺官上言滕宗諒支用錢多未明虛實遂差燕度勘鞫不期如此作事搖動人心若不早止絕則恐元昊因此邊上動搖將臣憂懼解體之際突出兵馬誰肯爲朝廷用死命向前臣忝爲

陛下耳目之官外事常合採訪三五日來都下喧傳邊將不安之事亦聞田況在慶州日見滕宗諒別無大段罪過并燕度生事張皇累具奏狀並不蒙朝廷報答況又遍作書告在朝大臣意欲傳達於聖聽大臣各避嫌疑必不敢進呈況書臣伏慮陛下但知宗諒用錢之過不知邊將憂嗟搖動之事只如臣初聞滕宗諒事發之時獨有論奏乞早勘鞫行遣臣若堅執前奏一向遂非則惟願勘得宗諒罪深方表臣前來所言者是然臣終不敢如此用心寧可因前來不合妄言得罪於身不可今日遂非致誤事於國臣竊思朝廷於宗諒必無愛憎但聞其有罪則不可不問若果無大過則必不須要求瑕疵只恐勘官希望朝廷意旨過當張皇搖動邊鄙其滕宗諒伏望速令結絕仍乞特降詔旨告諭邊臣以不枝蔓勾追之意兼令今後用錢但不入已外任從便宜不須畏避庶使安心放意用命立功其田況累次一作度奏狀并與大臣等書伏望聖慈盡取詳覽田況是陛下侍從之臣素非姦佞其言可信又其身在邊上事皆目見必不虛言今取進止

再論燕度勘鞫枝蔓劄子同前

臣昨日風聞燕度勘鞫滕宗諒事枝蔓張皇邊陲搖動會有論奏乞降詔旨安諭邊臣今日又聞度輒行文牒劾問樞密副使韓琦議邊事因依不知燕度實敢如此否若實有之深可驚駭竊以韓琦是陛下有一有左右二字大臣繫國家事體輕重今燕度敢茲無故意外侵陵乃是輕慢朝廷舞文弄法一作舞弄文法臣每見前後險薄小人多爲此態得一刑獄勘鞫踴躍以爲奇貨務爲深刻之事以邀強幹之名自謂陷人若多則進身必速所以虛張聲勢肆意羅織今燕度本令只勘滕宗諒使過公用錢因何劾問大臣議邊事顯是節外生事正違推勘勅條况樞密使是輔弼之任宜撫使將君命而行本藉重臣特行鎮撫今若無故遣一獄吏侵欺而陛下不與主張則今後奉

君命而出使者皆爲邊鄙所輕爲大臣而作事者反畏小人所制故燕度論於國體便合坐以深刑責其俗吏亦自違於條制罪須行遣情不可容今樞密副使尙被侵陵則以下將帥無辜遣其枝蔓者不少據其如此作事此獄必無平允其滕宗諒一宗刑獄狀一作伏乞別選差官取勘結絕其燕度亦乞別付所司勘罪行遣取進止

論乞不勘狄青侵公用錢劄子同前

臣風聞邊臣張亢近爲使過公用錢見在陝西置院根勘其勘官所取干連人甚衆亦聞狄青曾隨張亢入界見已勾追照對臣伏見國家兵興以來五六年所得邊將惟狄青種世衡二人而已其忠勇材武不可與張亢滕宗諒一例待之臣料青本武人不知法律縱有使過公用錢必不似葛宗古故意偷謾不過失於檢點致誤使而已方今議和之使正在賊中苟一言不合則忿兵爲患必至侵邊謹備過防正藉勇將況如青者無三兩人一作三兩人而已可惜因豎小公用錢於此要人之際自將青等爲賊拘囚使賊聞之以爲得計伏望特降指揮元勘官只將張亢一宗事節依公根勘不得枝蔓勾追其狄青縱有干連仍乞特與免勘臣於邊臣本無干涉豈有愛憎但慮勘官只希朝廷意旨不顧邊上事機將國家難得之人與常人一例推鞠一旦乏人誤事則悔不可追伏乞朝廷特賜寬貸邊臣知無功之將犯法必誅一作行要藉之人以能贖過則人人自勵將見成功取進止

論體量官吏酷虐劄子同前

臣等風聞朝廷近降指揮與諸路轉運使令體量州縣官吏酷虐軍民者臣料朝旨如此必是因韓綱酷虐近致光化兵士亂作一作作亂故有此指揮竊以昨來光化兵變雖因韓綱自致其如兵亦素驕處置之間須合中道韓綱自當行法驕兵亦合討除此兩行方始得體今若明行號令徧約官吏則驕兵增氣轉更生心長吏畏避無

由行事其所降與轉運司文字竊慮朝夕之間傳播中外扇動羣小引惹事端然已失之令既不可追伏乞速降指揮與諸路轉運使令密切稟行不得漏泄所貴別不生事取進止

論募人入賊以壞其黨劄子同前

臣竊聞京西賊盜日近轉多在處縱橫不知火數所患者素無禦備不易枝梧然獨幸賊雖猖狂未有謀畫若使其得一曉事之人教以計策不掠婦女不殺人民開官庫之物以賑貧窮招愁怨之人而爲黨與況今大臣不肯行國法州縣不復畏朝廷官吏尙皆公然迎奉疲民易悅豈有不從若兇徒漸多而不暴虐則難以常賊待之可爲國家憂矣以此思之賊衆雖多尙可力破使有一人謀主卒未可圖臣前因王倫賊時曾有起請十餘事內一件乞出榜招募諸處下第舉人及山林隱士負犯流落之人有能以身入賊斡殺首領及設計誤賊陷於可敗之地者優一作重與酬獎所貴兇黨懷疑不納無賴之人以爲謀主當時議者頗以爲然伏乞採臣此意速降指揮與杜杞令所在張榜使賊聞知所貴投賊之人懷疑不納但無謀主尙可剪除取進止

論宜專責杜杞捕賊劄子同前

臣伏見昨張海等賊勢初盛之時一有言字京西未有得力官吏遂自朝廷差臺官蔡稟催督一作監催捉殺後來已別選杜杞充京西轉運使委以一路之事兼近日差出兵馬甚多分爲頭項不少部分一作內進退須要統一指蹤一作縱號令不可二三竊慮杜杞蔡稟不相叶同各出異見凡指揮諸事使諸將難從一失事機反成敗誤自兵士差出今已多時然未聞奏報與賊鬪敵及殺獲次第竊慮官兵互相迴避空作往來或恐進退之間號令不一致茲逗遛未見成功今雖賊奏稍稀然亦未見殺獲之數困獸猶鬪不可不虞寇死命窮一作寇賊死命恐未易敵合早除剪仍一作切須一作須由督責

況蔡稟是應急差出杜杞乃選材用之責任之間宜專在杞兼聞蔡稟自到京西處置多未合宜近聞欲枷一巡檢致使兵士喧譟幾至生變苟或如此張皇竊恐別致生事其蔡稟伏乞早賜指揮抽回只委杜杞一面催捉庶得一作使專一早能一作得了當取進止

論江淮官吏劄子同前

臣聞江淮官吏等各爲王倫事奏案已得多時而尙未聞斷遣仍聞議者猶欲一作爲寬貸臣聞昨來江淮官吏或斂物獻送或望賊奔迎或獻兵甲或同飲宴臣謂倫一叛卒偶肆猖狂而官吏敢如此者蓋知賊可畏而朝廷不足畏一有故字也今若更行寬貸則紀綱隳壞盜賊縱橫天下大亂從此始矣何以知之昨王倫事起江淮官吏未行遣之間京西官吏又已棄城而走望賊而迎若江淮官吏不重行遣則京西官吏亦須輕怨京西官吏見江淮官吏已如此則天下諸路亦指此兩路爲法在處官吏皆迎賊棄城獻兵納物矣則天下何由不大亂也臣伏思祖宗艱難創造基圖陛下憂勤嗣守先業而一旦四夷外叛盜賊內攻其壞之者誰哉皆由前後迂繆之臣因循寬弛使朝威不振綱紀遂隳今已壞之至此而猶不革前非以寬濟寬何以救弊如晁仲約等情法至重俱合深行議者無由曲解或聞以謂自是朝廷素不爲備不可全罪外官假如有殺父與兄者豈可只言自是朝廷素無教化而不罪殺親之人又如有人掠奪生人男女金帛不可只言自是朝廷素無禮讓而不罪劫人之賊迂儒不可用可笑如此李熙古豈獨是朝廷素有備之州傅永吉豈獨是朝廷素練之兵蓋用命則破賊矣今朝廷素無禦備爲大臣者又不責之守州縣者合有罪又寬之天下之事何人任責竊緣韓綱是大臣之家父子兄弟並一作盡在朝廷權要之臣皆是相識多方營救故先於江淮官吏寬之只要韓綱行遣不重今大臣不思國體但樹私恩惟陛下以天下安危爲計出於聖斷以勵羣下則庶幾國威粗振

賞罰有倫其晁仲約等乞重行朝典乞不寬恕取進止

奏議卷第六

諫院

論捕賊賞罰劄子慶曆二年

臣伏見方今天下盜賊縱橫王倫張海等所過州縣縣尉巡檢有迎賊飲宴者有獻其器甲者有畏懦走避者有被其驅役者朝廷於此憂賊之時正患乏人之際或於巡檢縣尉之內得一捕賊可使之人則必須特示旌酬以行激勵苟或未能者猶須懸賞以待之何況有而失賞伏見吏部選人區法自出身以來兩任縣尉初任臨江軍新淦縣三年之內大小賊盜獲四十餘火內雖小盜數多其如強劫羣賊亦不為少據欲賞格合改京官而有司守纖細之文執尋常之例謂其所獲雖為全火而不同時因不與理為勞績臣料一作謂天下州縣盜賊之多無如新淦天下縣尉能捉賊之多亦無如區法又聞法次任吉水縣尉使其縣民結為伍保至今吉水一縣全無盜賊民甚便之法為縣尉官至卑賤所至之處皆有可稱臣思朝廷非不欲賞善罰惡以行勸戒而患於有司法弊拘守常文致抑才能失於旌賞其區法偶與臣相識因得知之然人所不知抑而不申者何可勝數竊以盜賊是方今急患縣尉是方今切要之人皆朝廷常合留意之事臣輒有起請事件具畫一如後

一選人區法捕賊之効甚多但為有司拘守細碎之文不理勞績其人已升得職官伏乞追取本人歷子別加考驗如實有勞能即乞不拘常格特與酬獎以勸後來

一臣謂天下羣盜縱橫皆由小盜合聚今但患其大而不防其微故必欲止盜先從其小能絕小盜者巡檢縣尉也然而賞罰之法其弊極多只如捕盜去惡但惡淨盡豈必須是一日之內同時捕獲假如有全火強盜縣尉巡檢以死命鬪敵若於兩日內捉盡已不理為勞績其守文之弊如此極多欲乞下銓司重定

捕賊賞格施一作頒行

一臣伏見自天下有盜賊以來議者多陳禦盜之策皆欲使民結為伍保則姦惡不容今區法於吉水縣立伍保之法三年之內劫賊不敢入其縣界臣欲乞特降指揮下江南西路體量吉水縣自區法創立伍保之法以來如實全無劫賊又一作及民間以為便利即乞須行伍保之法於天下

右謹具如前取進止

論光化軍叛兵家口不可赦劄子同前

臣竊見近日盜賊縱橫張海等二三百人未能敗滅光化軍宣毅又二三百人作亂臣謂朝廷致得盜賊如是者不惟中外無備蓋由威令不行昨王倫賊殺主將自置官稱着黃衣改年號事狀如此乃是反賊使其不敗為患如何既敗之後不誅家族況小人作事亦須先計成敗今使其事成則獲大利不成則無大禍有利無害誰不欲反只如淮南一帶官吏與王倫飲宴率民金帛獻送開門納賊道左參迎苟有國法豈敢如此而往來取勘一作會已及半年未能斷遣古者稱罰不踰時所以威激士衆今遲緩如此誰有懼心遂至張海等官吏依前迎奉順陽縣令李正己延賊飲宴宿於縣廳恣其劫掠鼓樂送出城外其人敢如此者蓋為不奉賊則死不奉朝廷則不死所以畏賊過如畏國法臣恐朝廷威令從此遂弱盜賊兇勢從此轉強臣聞刑期無刑殺以止殺寬猛相濟用各有時伏望陛下勿採迂儒所說婦人女子之仁尚行小惠以誤大事其宣毅兵士必有家族伏乞盡戮於光化市中使遠近聞之悚畏以止續起之賊其李正己仍聞已有臺憲上言亦乞斬於鄧州使京西一路官吏聞之畏恐知國法尚存不敢奉賊從來只被迂儒之人因循不斷誤陛下事壞得天下事勢已如此不可更循舊弊有失威斷惟陛下力行之取進止

薦李允知光化軍劄子同前

臣近爲光化軍遭韓綱酷虐致得兵士作亂會薦國子博士李允前知光化軍日軍民愛畏乞却令依舊知軍不蒙朝廷施行近聞光化軍兵民官吏列狀奏乞李允知軍正與臣等所言符合臣等職在諫諍事無大小只要上益朝廷下叶物議今來所薦李允臣皆不識其面但採訪得此人實有吏才在光化日甚有惠政當此軍城一作賊燒劫之後此人必可撫綏今朝廷只見臣等薦論未賜深信既是本軍陳乞可以不疑朝廷前來失選良吏致因韓綱屠虐軍城今又不能別選良吏撫綏殘破致使軍民自乞一舊知軍若又不與則臣恐軍民怨怒變亂復生其李允伏乞依光化軍民所請却令知軍取進止

論韓綱棄城乞依法劄子同前

臣伏見前知光化軍韓綱近爲酷虐兵士致兵士等作亂攻劫州縣驚動朝廷上貽君父之憂下致生民之患而又不畏法棄城遁走其罪狀顯著便合誅夷朝廷慎於用刑尙令勘鞠至今多日未見施行竊以斷獄之議不過兩端而已有正法則依法無正法則原情今韓綱所犯法有明文情無可恕謹按律文主將守城爲賊所攻不固守而棄者斬此韓綱於法當斬有明文也綱不能撫綏士卒致其叛亂但其棄城而走情最難容當初亂兵未有器械韓綱手下自有六十餘人不亂兵士又有官庫器甲既不能盡力禦捍又不能閉城堅守公然將手下兵士津送全船上船便棄牌印城池而去致兵之亂起自綱身臨難逃身而不死國方今盜賊可憂之際若使天下州縣皆効韓綱見賊便走則在處城池皆爲賊有陛下州縣誰肯守之此韓綱之情又無可恕也綱之一死理在不疑一有然字外人但見拖延多日未行斷決皆謂朝廷好行姑息漸有息貸之意又緣綱是大臣家子作如此大過生如此大患犯如此大刑名若曲法不行卽不知一作今後孤寡有罪者何以行法其韓綱伏望聖慈出於審斷早賜

依法施行取進止

論乞賑救饑民劄子慶曆三年

臣伏見近降大雪雖是將來豐熟之兆然卽日一作自陝西飢民流亡者衆同華河中尤甚往往道路遺棄小兒不少只聞朝旨令那移近邊兵馬及於有官米處出糶此外未聞別行賑救此急在旦夕不可遲回其遺棄小兒亦乞早降指揮令長吏收卹仍聞京西東大雪不止毀折桑柘不少竊慮向去綠蠶稅賦無所出致貧民起爲盜賊亦乞特降指揮體量臣竊見國史書祖宗朝每奏一兩州軍小有災傷亦隨多少賑卹或蠲免稅租蓋以所放者少不損國用又察民疾苦微細不遺所以國恩流布民不怨嗟不必須待災傷廣闊方行賑救也方今人貧下怨之際不厭頻推恩惠伏望聖慈特賜矜憫取進止

論救賑雪後飢民劄子同前

臣風聞京城大雪之後民間飢寒之人甚多至有子母數口一時凍死者雖豪貴之家往往亦無薪炭則貧弱之民可知矣蓋京師小民例無蓄積只是朝夕旋營口食一日不營求則頓至乏絕今大雪已及十日使市井之民十日不營求雖中人亦乏絕矣况小民哉雪於農民雖爲利澤然農畝之利遠及春夏細民所苦急在目前日夕以來民之凍死者漸多未聞官司有所賑救欲乞特降聖旨下開封府或分遣使臣遍錄民間貧凍不能自存者量散口食并各於有官場柴炭草處就近支散救其將死之命至於諸營出軍家口亦宜量加存卹以示聖恩所散不多所利者衆仍令兩府條件應有軍士在外辛苦及民人支移稅賦殘零輸送艱辛等處並與擘畫早加存卹若使戍兵愁苦道路怨嗟飢凍之尸列於京邑則大雪之澤其利未見而數事之失所損已多伏望聖慈特賜留意取進止

論澧州瑞木乞不宣示外廷劄子同前

臣近聞澧州進柿木成文有太平之道四字其知州馮載本是武人不識事體便爲祥瑞以媚朝廷臣謂前世號稱太平者須是四海晏然萬物得所方今西羌叛逆未平之患在前北虜驕悍藏伏之禍在後一患未滅一患已萌加以西則虜戎南則湖嶺凡與四夷連接無一處無事而又內則百姓困弊盜賊縱橫昨京西陝西出兵八九千人捕數百之盜不能一時剪滅只是僅能遺散然却於別處結集今張海雖死而達州軍賊已却百人又殺使臣其勢不小興州又奏八九十人州縣皇皇何以存濟以臣視之乃是四海騷然萬物失所實未見大平之象臣聞天道貴信示人不欺臣不敢遠引他事只以今年內事驗之昨夏秋之間太白經天累月不滅金木相掩近在端門考於星占皆是天下大兵將起之象豈有纔出大兵之象又出大平之道一無道字字一歲之內前後頓殊豈非星象麗天異不虛出凡一作宜於戒懼常合脩省而草木萬類變化無常不可信憑便生懈怠臣又思若使木文不僞實是天生則亦有深意蓋其文止曰太平之道者其意可推也夫自古帝王致太平皆自有道得其道則太平失其道則危亂臣視方今但見其失未見其得也願陛下憂勤萬務舉賢納善常如近日不生逸豫則二三歲間漸期修理若以前賊張海等稍衰便謂後賊不足憂以近京得雪便謂天下大豐熟見北虜未來便謂必無事見西賊通使便謂可罷兵指望太平漸生安逸則此瑞木乃誤事之妖木耳臣見今年一作頃見太平州曾進芝草者今又進瑞木竊慮四方相効爭造妖妄其所進瑞木伏乞更不宣示臣寮仍乞速詔天下州軍告以興兵累年四海困弊方當責己憂勞之際凡有奇禽異獸草木之類並不得進獻所以彰示聖一作明德感勵臣民取進止

論美人張氏恩寵宜加裁損劄子同前

臣近風聞禁中因皇女降生於左藏庫取綾羅八千疋染院工匠當

此大雪苦寒之際敲冰取水染練供應頗甚艱辛臣伏思陛下恭儉勤勞愛民憂國以此勞人枉費之事必不肯爲然外議相傳皆云見今染練未絕臣又見近日內降美人張氏親戚恩澤大頻臣忝爲諫官每聞小有虧損聖德之事須合力言難避天譴臣竊見自古帝王所寵嬪御若能謙儉柔善不求恩澤則可長保君恩或恣意驕奢多求恩澤則皆速致禍敗臣不敢遠引古事只以今宮禁近事言之陛下近年所寵尚氏楊氏余氏苗氏之類當其被寵之時驕奢自恣不早裁損及至滿盈今皆何在况聞張氏本良家子昨自修媛退爲美人中外皆聞以謂與楊尚等不同故能保寵最久今一旦宮中取索頗多恩澤日廣漸爲奢侈之事以招外人之言臣不知陛下欲愛惜保全張氏或欲縱恣而敗之若欲保全則須常令謙儉不至驕盈臣料八千疋綾羅豈是一作必非張氏一人獨用不過支散與衆人而已乃是枉費財物盡爲衆人至於中外譏議則陛下自受以此而言廣散何益昨正月一日曹氏封縣君至初五日又封郡君四五日間兩度封拜又聞別有內降應是疎遠親戚盡求恩澤父母因子而貴可矣然名分亦不可太過其他疎遠皆可減罷臣謂張氏未入宮之前疎遠親戚各皆何在今日富貴何必廣爲閑人自招謗議以累聖德若陛下只爲張氏計亦宜如此况此事不獨爲張氏大凡後宮恩澤大多宮中用度奢侈皆是虧損聖德之事繫於國體臣合力言伏望聖慈防微杜漸早爲裁損取進止

論乞止絕河北伐民桑柘劄子同前

臣風聞河北京東諸州軍見修防城器具民間配率甚多澶州濮州地少林木卽今澶州之民爲無木植送納盡伐桑柘納官臣謂農桑是生民衣食之源相調繫國家用度之急不惟絕其根本使民無以爲生至於供出賦租將來何以取足臣伏思兵興以來天下公私匱乏者殆非夷狄爲患全由官吏壞之其誅剝疲民爲國歛怨蓋由郡

縣之吏不得其人故臣前後累乞澄汰天下官吏者蓋備見其弊如此也今澶州之民驟罹此苦豈非長吏非才處事乖繆所致兼聞澶州民桑已伐及三四十萬株竊慮他郡盡皆效此伏乞早賜指揮禁絕其合用材木仍乞下轉運司令相度漸次那容準備其澶州人戶經伐桑者乞差官檢覆量多少與權免將來絲綿細絹之稅竊以軍國所須出自民力必欲外禦契丹之患常須優養河朔之民若使道路怨嗟人心離叛則內外之患何以枝梧伏望聖慈特賜留意取進止

論方田均稅劄子同前

臣竊見近有臣寮上言均天下賦稅已送三司商量施行臣嘗聞自前諸處亦會有均稅者多是不知均定一作稅之術或嚴行刑法或引惹詞訟或姦民欺隱或官吏誅求稅未及均民已大擾臣前任通判滑州日有秘書丞孫琳與臣同官其人言先差往洛州肥鄉縣與郭咨均稅初立千步方田法括定民田並無欺隱亦不行刑罰民又絕無詞訟其時均定稅後逃戶歸業者五百餘家復得稅數不少公私皆利簡當易行其千步均田法自有制度二十餘條臣在滑州時因聞此事遂略行體問隣近州軍大率稅賦失陷一半方欲陳述乞行琳等均田之法今來已有臣寮上言均稅事竊慮未得千步方田簡當之法其孫琳見任滑州職官郭咨爲崇儀副使在外欲乞召此二人送三司令一處商量一有取進止字

奏議卷第七

奏議卷第八 集一百四

諫院

論張子奭恩賞太頻劄子慶曆四年

臣風聞知汝州范祥為相度陝西青白鹽勅差張子奭權知汝州子奭自選人二年內遷至員外郎朝廷之意雖曰賞勞而天下物議皆云僥倖蓋以子奭宣勞絕少止兩次而遷官恩賜已數重自古賞功不過一次一作賞賞之不已故難弭人言初自選人改京官曰賞勞未及二歲改秘書丞又曰賞勞賜以章服又曰賞勞秘書丞不久又轉官又曰賞勞合得大常博士超遷員外郎又曰賞勞後行祠部為名曹又曰賞勞作京官合作知縣而作簽判又曰賞勞一任未滿合更有一任知縣又超通判差遣又曰賞勞此所以外人之議不允也況范祥暫出勾當只合交割以次官員或轉運司自差人權今朝廷差人已是失體又於子奭為此僥倖今朝廷待闕在京者甚眾豈無一人堪權知州者朝廷每用一人必當使天下人服今每一差遣則物議沸騰累日不息昔五代桑維翰為晉相一夕除節度使十五人為將而人皆服其精今中書差一權知州而不能免人譏議者蓋事無大小當與不當而已其張子奭伏乞追寢權差之命仍乞今後外處差出知州只委本路轉運使差官權權至於賞罰之柄貴在至公今莫大之罪不過一刑而止豈有勞者終身行賞而不已亦乞今後有勞効之人量其大小一賞而止若其別著能効則拔擢自可不次人亦自然無言伏以朝廷用人惟患守例而不能不次選任但不涉於僥倖實有材藝之人誰敢有言子奭作使西鄙不謂無勞但恩典已優於賞已足可惜令天下指為僥倖之人而掩其前効况又上虧朝政不可不思取進止

論救賑江淮飢民劄子同前

臣伏見近出內庫金帛賜陝西以救飢民風聞江淮以南今春大旱

至有并泉枯竭牛畜瘴死鷄犬不存之處九一作春農失業民庶嗷嗷然未聞朝廷有所存卹陛下至仁至聖憂民愛物之心無所不至但患遠方疾苦未達天聰苟有所聞必須留意下民疾苦臣職當言昨江淮之間去年王倫蹂踐之後人戶不安生業倫賊纔滅瘡痍未復而繼以飛蝗自秋至春三時亢旱今東作已動而雨澤未霑此月不雨則終年無望加又近年已來省司屢於南方斂率錢貨而轉運使等多方刻剝以貢羨餘江淮之民上被天災下苦賊盜內應省司之重斂外遭運使之誅求比於他方被苦尤甚今若不加存卹將來繼以凶荒則飢民之與疲怨者相呼而起其患一有善字不比王倫等偶然狂叛之賊也臣以為一作謂民怨已久民疲可哀因其甚困一作困時宜速賜一作施惠不惟消弭盜賊之患兼可以悅其疲怨之心伏望聖慈特遣一二使臣分詣江淮各山祈禱雨澤仍下轉運并州縣各令具逐處亢旱次第奏聞及一面多方蠶書賑濟窮民無至失時以生後患取進止

論內出手詔六條劄子同前

臣伏聞近出手詔條大事以賜兩府大臣有以見陛下憂勤責任之意然而天下紀綱壞壞皆由上下因循一旦陛下奮然雖有責成之心而大臣尚習因循之弊不能力行改作以副聖懷自去年范仲淹韓琦等特被選擢陛下尋開天章閣召見而大臣遞互相推並不建明一事以救天下之弊洎至內出手詔范仲淹富弼等方始各條數事至今半年有餘或寢而不行或行而不盡或雖行而未有明効今陛下又以大事責之臣恐兩府大臣依前無以上副憂勤之意下救當今之急臣願陛下不因常例奏事之時特御便殿召兩府大臣賜坐先戒以不得推避緘默後以當今大務問之須令有所陳述所問之急不過三四大事而已二虜交侵一也三路禦備之術何者可以易行而速効二也百姓困匱國用不足何以使公私俱濟三也若兩

府大臣於此三事能其一者便委其專管示以責成可也若其不然臣恐手詔屢出聖意雖勞而大臣相推終未濟事陛下必欲速救時弊非專任而切責之不可也取進止

論葬荆王劄子同前

臣伏觀朝旨雖差宋祁監護故荆王葬事然未見陛下葬日及一行事件或聞以歲月不利未可葬或聞有司以財用不足乞且未葬夫陰陽拘忌之說陛下聰明睿聖必不信此巫卜之言而違禮典但慮議者堅執方今財用不足不可辦葬陛下聞有勞民枉費之說則不得不慮因以遲疑臣謂前後勅葬大臣浮費枉用之物至多豈是朝廷本意皆爲主司措置之失致人因緣以爲姦爾今若盡節一作減仍有其字浮費及絕其侵蠹而使用物不廣一作多則將復以何辭而云不葬臣不知所一作有司會將一行用度計定大數否內若干是浮費若干是實用若實用之物數猶至多而力不可辦則緩之可也若實用之物少只是舊例費浮多則可削去浮費而已今都不一作未計度而但云無物可葬則不可也未見實用之數多少不量力能及否而曰必須遵禮而曰必須葬亦未可也如臣愚見酌此兩端葬則爲便然須先乞令王堯臣宋祁等將一行合用之物列其各件內浮費不急者一一減去之若只留實用之物數必不多假如稍多更加節減雖至儉薄理亦無害如此則葬得及時物亦不費夫儉葬古人之美節侈葬古人之惡名今避儉葬不肯節費留喪而待有物之年以就侈葬則非臣所知也若曰儉葬亦未能辦則乃過言之甚也然外之輿議爲國家論事體者皆云葬則爲便今朝廷議者分而爲二顧物力者則不顧典禮國體論典禮國體者則不思財用辦否各執偏見議久不決以感陛下之聰明今便葬之害一不葬之害五便葬之害不過費物然力有可爲不葬之害所失則大不肯薄葬而以待侈葬成王之惡名一也信巫卜之說而違典禮二也且下

減節力所易爲他時豐足理或難待使皇叔之極五七年間不得安宅而神靈無歸二也使四夷聞天子皇叔薨而無錢出葬遂輕中國而動心四也今天下物力雖乏然凡百用度不能節費處多獨於皇叔之身有所裁損傷陛下孝治之美五也此臣所謂葬則爲便者也荆王於國屬最尊各名位最重伏乞早令定議無使後時取進止

論葬荆王後贈燕王一行事劄子同前

臣風聞已有聖旨荆王葬事令三司與大常禮院及監葬官等同議減節浮費此足見陛下厚於皇叔之恩念民惜費之意一舉而兩得也然臣每見朝廷作事欲愛民節用而常枉費勞人蓋爲議事之初不得其要或失於不精審者有四民間不科配一也州縣供應物有定數二也送葬之人在路禁其呼索三也州縣官吏不得過外供須以邀名譽四也苟絕此四者則無大患矣昨京西一路遭張海驚劫之後不可更有誅求臣今欲乞指揮三司應是合要之物並須官給不得民間科買仍乞先將一行儀仗人馬并送葬人等一人以上先定人數然後劄與京西令依數供頓則可無廣費自荆王以下諸喪非至親者不必令其盡往仍乞限定人數及每人將帶隨行人數亦乞限定凡皇親及一行官吏除宿頓合供飲食外不得數外呼索州縣官吏亦不得於官供飲食外別以諸物獻送權要其受獻送并呼索並以入己贓論仍乞一有選字御史裏行一人隨行糾察其數外帶人及州縣隨順呼索獻送物等官吏物出於己亦從違制若託以供應爲名於民間賤買及率掠者皆以枉法贓論如此防禦方可杜絕浮費以稱陛下厚親節用之心

論燕王子允良乞未加恩劄子同前

臣伏見昨燕王初薨其子允良於苦塊中便答書題仍不稱孤子不落官銜今聞巷民家猶能檢按書儀粗知喪禮而允良爲國宗屬全然不曉人事京師士流間傳說爲笑有玷聖朝又聞燕王諸子皆失

教訓自其父病多不躬侍湯藥纔至父死便乞家財管勾居喪之禮亦無哀戚臣伏見近降詔勅約束補蔭子弟須是一作令習一無習字試經業蓋謂訓誘臣寮子弟欲爲臣下立家至於宗室之親號爲藩屏全不訓誨使其不知禮義不及民間之子而不孝之聲流聞中外其尤甚等過失伏慮陛下仁慈以睦宗族未欲別行責罰只乞不緣燕王薨謝別加恩典且與裁抑令其知過俟其向後改悔遷善方與加恩仍乞明以此意戒諭近一作所貴其餘宗室聞之各思嚮善不使外人非笑玷辱皇風取進止

論乞與元昊約不攻峭廝囉劄子同前

臣風聞魚周詢余靖孫抃等奉使北虜皆有事宜爲一無爲字北虜中詰問元昊通和之意將來必須因此別與朝廷生患又聞虜人已欲議移界至漸示相侵禍亂之萌其端可見臣自去年春始蒙聖恩擢在諫列便值朝廷與西賊初議和好臣當時首建不可通和之議前後具奏狀劄子十餘次論列皆言不和則害少和則害多利害甚詳懇切亦至然天下之士無一人助臣言朝廷之臣無一人採臣說今和議垂就禍胎已一作以成而韓琦自西來方言和有不便之狀余靖自北至始知虜利急和之謀見事何遲雖悔無及當臣建議之際衆人方欲急和以臣一人誠難力奪衆議今韓琦余靖親見二虜事宜中外之人亦漸知通和爲患臣之前說稍似可採但願大臣不執前議早肯回心則於後悔之中尚有可爲之理昨來許賊之物數一作誠已太多然尚有禁青鹽還侵地等事非賊所利幸其因此自絕不遣人來朝廷深戒前非慎自持重因而罷議不落賊計則轉禍爲福後策可爲若賊志愈驕貪心未滿復遣一作馳人使更有須求則假此爲名亦可拒絕今通和之事爲中國之患大爲二虜之利深萬一西賊貪深利而不惜侵地更無他求急來就和則此時取舍便繫安危陛下宜詔執一作報議之臣定果決之計認賊肯和之意知

我害彼利之謀尤須多方以事拒絕臣計西賊無故而請和者不止與北虜通謀共困中國兼欲詐謀款我併力以吞峭廝囉摩旃瞎旃之類諸族地大力威然後東向以攻中國耳今若未有他計拒其來和則當賜以詔書言峭廝囉等皆受朝廷官爵父子爲國蕃臣今若講和則不得攻此數族且攻此數族是賊本心所貪聞我此言必難聽約用此爲說亦可解和臣所以區區惟願未和者蓋臣愚慮知不和患輕易爲處置和後患大不可枝梧臣前後奏章論列已備此乃天下安危大計聖心日夜所憂臣爲言事之官見利害甚明若不極言罪當誅戮伏望聖慈特賜省覽取進止

論更改貢舉事件劄子

臣竊聞近有臣寮上言請改更貢舉進士所試詩賦策論先後事已下兩制詳議伏以貢舉之法用之已久則弊一有理字當變更然臣謂必先知致弊之因方可言變法之利今貢舉之失者患在有司取人先詩賦而後策論使學者不根經術不本道理但能誦詩賦節抄六帖初學記之類者便可剽盜偶儷以應試格而童年新學全不曉事之人往往幸而中選此舉子之弊也今爲考官者非不欲精較能否務得賢材而常恨不能如意大半容於繆濫者患在詩賦策論通同雜考人數既衆而文卷又多使考者心識勞而愈昏是非紛而益惑故於取捨往往失之者此有司之弊也故臣謂先宜知此二弊之源方可言變法之利今之可變者知先詩賦爲舉子之弊則當重策論知通考紛多爲有司之弊則當隨場去留而後可使學者不能濫選一作進考者不至疲勞一作濫選今若不改通考之法而但更其試日之先後則於革弊未盡其方凡臣所請者若漫然泛言之恐不能盡其利害請借二千人爲率以明變法之便謹條如左

凡貢舉舊法若二千人就試常額不過選五百人每年到省就試及取人之數大約不過此是於詩賦策論六千卷中每一人

三卷選五百人而日限又迫使考試之官殆廢寢食疲心竭慮因勞致昏故雖有公心而所選多濫此舊法之弊也今臣所請者寬其日限而先試以策而考之擇其文辭鄙惡者文意顛倒重雜者不識題者不知故實略而不對所問者限以事件若干

以上誤引事跡者亦限件數雖能成文而理識乖誕者雜犯舊革不考式者凡此七等之人先去之計於二千人可去五六百以其留者次試以論又如前法而考之又可去其二三百其留而試詩賦者不過千人矣於千人而選五百則少而易考不至勞昏考而精當則盡善矣縱使考之不精亦選者不至大濫蓋其節抄剽盜之人皆以先經論策去之矣策論逐場旋考則卷子不多考官不致勞昏去留必不誤比及詩賦皆是已經策論粗有學問理識不致乖誕之人縱使詩賦不工亦足以中選矣如此可使童年新學全不曉事之人無由而進此臣所謂變法必須隨場去留然後能革舊弊者也其外州解送到且當博採

詳定大率當以策論爲先
右臣所陳伏乞特加詳覽苟有可採即乞降付有司與前所上言參同詳議著於今式謹具狀奏聞

論臣寮不和劄子同前

臣伏觀方今夷狄外疆公私內困盜賊並起蝗旱相仍陛下軫念生民深思禍患憂勤之意夙夜焦勞而中外臣寮未能爲國家慮遠謀建長策少濟世事以寬聖懷近日以來風俗尤薄搢紳之列不務和同或徇私意以相傾或因小事而肆忿紛然毀譽傳布道塗飾己短以遂非各期必勝進偏辭而互說上惑聖聰當陛下思念遠圖之時致陛下日厭紛紜之議至於朝廷得失邦國安危熟視恬然各思緘

默陛下仁慈審聖務存大體未欲明行責罰以戒澆浮伏望聖慈特降詔書戒勵中外革茲時弊各使同心憂國捨小謀大然後陛下不爲小事紛紜煩於聽覽則可以坐運宸筭以康時難取進止

論三司判官擇人之利劄子慶曆四年

臣伏見近差薛紳爲轉運使紳是三司判官資例合作轉運使然外人議論未允者若以一作似昔日差人更有不如紳者亦不足怪蓋見朝廷近更新制不次用人凡舊轉運使稍不材者悉令換易忽見却用薛紳所以人言未允昨來京東用沈邈替却一無却字晁宗簡今用薛紳又更不及宗簡此臣之所未喻也平時無事公私上下從容吏無大小奉法守常而已所以擬一作罷齷廉謹不爲大過雖庸暗繆懦者皆可苟祿偷安而朝廷可以不擇賢愚一例差撥官雖漸濫猶未敗誤今天下事勢豈比嚮時盜賊縱橫而州郡無備公私困乏而用度轉多賦役繁興而人戶凋耗雖有出人之才尚恐不能了事豈可尚循舊例依次用人一作撥入然臣竊思方今中外差除未肯脫去舊例如紳之輩謂其已作省判須且依例除轉運以此思之若省判須令一作合作轉運則弊在差省判之時不早慎擇也夫前已濫者不能驟去後來者又不擇之永無澄清之時矣臣今欲乞詳定差省判之法每遇闕人或令本省使副自舉或朝廷先擇舉主令舉主擇人但重其保任同罪之法而不必限其資序如此則省判得人省判得人則將來有好轉運使有好轉運使則逐路澄清民紓用足以此而言擇得一省判爲數十州民之福其利甚大夫人爲利甚大則失人爲害亦大矣伏望聖慈留意裁擇取進止

詳定貢舉條狀一作議科場奏狀慶曆四年

初范仲淹等欲復古勸學詔近臣議於是翰林學士宋祁御史中丞王琪辰知制誥張方平歐陽脩殿中侍御史梅摯天章閣待講曾公亮王洙右正言孫甫監察御史劉湜

九人同上此委其文則出公手元在外制集今移入此卷
臣等準勅差詳定貢舉條制者伏以取士之方必求一作貢其實用
人之術當盡其材今教不本於學校士不察於鄉里則不能覈名實
有司束一作求以聲病學者專於記誦則不足盡人材此獻議者所
共以爲言也臣等參考衆說擇其便於今者莫若使士一作人皆士
著而教之於學校然後州縣察其履行則學者脩飭矣故爲學制一
作立學合保薦送之法夫上之所好一作設法下之所趨也今先一
有舉字策論則文辭者留心於治亂矣簡其一無此字程式一作試
則閎博者得以馳騁矣問以大義則執經者不專於記誦矣一本其
詩賦之未能自肆者至此所謂盡人之材者也在此下故爲先策論
過落簡詩賦考式問諸科大義之法此數者一有皆字其大要也其
詩賦之未能自肆一作新者雜用今體經術之未能亟通者尚依舊
科則中常之人皆可勉及矣此所謂一作爲盡人之材者一無此字
也其一有它字通禮一有司之所習及一無此九字州郡封彌謄錄
進士諸科帖經一作填帖之類皆細碎而無益者一切罷之凡其所
爲二字一作爲法者皆申之以賞罰而勸焉如此則養士有素一作
業取材不遺一有爲治之本也五字苟可施行望賜裁擇

奏議卷第八

諫院

論討蠻賊任人不一劄子慶曆四年

臣嘗患朝廷慮事不早及其臨事草草便行應急倉皇常多失誤昨湖南蠻賊初起一作動自昇州差劉沆知潭州授龍圖閣學士令專了蠻事沆未到湖南又差楊敞作提刑又令專了蠻事敞未到續後又差周陵爲轉運使令專了蠻事周陵差勅未到又自朝廷遣王綵安撫令專了蠻事王綵方在路又自淮南遣徐的往彼令專了蠻事不惟任人不一難責成功兼此數人一時到彼不相統制凡於事體見各不同使彼一方從誰則可若所遣皆是才者則用才不在一作必人多若遣不才雖多適足爲害此臣所謂臨事倉皇應急草草之失也今劉沆自守方面不可動楊敞周陵自是本路不可動徐的於數人中最才又是朝廷最後差去可以專委責成其間惟有王綵一人在彼無用可先抽回近聞一作觀綵有奏請欲盡驅荆南土丁往彼捉殺臣曾謫官荆楚備知土丁子細若果如此則必與國家生患朝廷已不從之然絲處事可見矣若絲到彼默然端坐並無所爲一任徐的等擘畫則絲在彼何用自可召還若以其身是臺官出粟朝命取以不才默坐於中強有施爲竊慮的等不能制絲又州縣長絲是朝廷差去從其所見謀事必多一有臣字尙恐大臣有主張絲者遂非偏執曲庇於絲不欲中道召回彰已知人之失護其不才之取未肯抽回即乞諭徐的專了賊事只令絲至一路州軍遍行安慰訖即速還庶不敗事取進止

論湖南蠻賊可招不可殺劄子同前

臣風聞楊敞近與蠻賊鬪敵殺得七八十人首級仍聞入彼巢穴奪其糧儲挫賊之鋒增我士氣敞之勇略固亦可嘉然朝廷謀慮事機宜思久遠竊恐上下之心急於平賊聞此小捷便形虛喜不能鎮靜

外示輕脫其間二事尤合深思一日不待成功便行厚賞二日謂其可殺更不肯招苟或如此則計之大失而事之深害也今湖南捕賊者殺一人頭賞錢十千官軍利賞見平人盡殺平人驚懼盡起爲盜除鄧和尚李花脚等數十一作大頭項外其餘隨大小成火者不可勝數今敞所擊只一洞所聚已二千餘人於二千人中殺七八十人是二十分之一其餘時暫鳥散必須復集臣見自古蠻蠻爲害者不聞盡殺須是招降昨緣卻歸等失信於黃捉鬼遂恐更難招誘今若因敞小勝示以恩威正是天與招服之一有時字機不可失也若令敞自作意度招取大頭項者因此小勝傳布捷聲其餘諸處結集者分行招誘藉此聲勢必可盡降旬日之間湖南定矣若失此時漸向夏熱以我所病一作病暑之兵當彼慣習水土之賊小有敗衄則彼勢復堅不惟爲害湖南必慮自此貽朝廷憂患今於未了之間便行厚賞則諸處巡檢捕賊官等見敞獲賞爭殺平人而敞等自恃因戰得功堅執不招之議朝廷亦恃敞小勝更無招輯之心上下失謀必成大患其楊敞等伏乞且降勅書獎諭授與事宜俟彼招安便行厚賞今湖南賊數雖多然首惡與本賊絕少其餘盡是枉遭殺戮竭脅爲盜之徒在於人情豈忍盡殺惟能全活人命多者則其功更大仍乞明說此意諭與楊敞其賞典乞少遲留庶合事體取進止

再論湖南蠻賊宜早招降劄子同前

臣風聞湖南蠻賊近日漸熾殺戮官吏鋒不可當新差楊敞銳於討擊與郭輔之異議不肯招降又王綵去時朝廷亦別無慮分慮絲到彼與敞同謀蓋蠻賊止可招攜卒難剪撲而敞等急於展効恐失事機今深入而攻則山林險惡巢穴深遠議者皆知其不可若以兵外守待其出而擊之則又未見其利也蓋以蠻所依山在衡州永州道州桂陽監之間四面皆可出寇若官兵守於東則彼出於西官兵守於南則彼出於北四面盡守則用兵大多分兵而邀之則兵寡易敗

此進退未有可擊之便也今盤氏正蠻已爲鄧和尚黃捉鬼兄弟所誘其餘山民莫徭之類亦皆自起而爲盜竊聞常寧一縣殆無平民大小之盜二三百火推其致此之因云莫徭之俗衣服言語一類正蠻黃鄧初起之時捕盜官吏急於討擊逢蠻便殺屢殺平人遂致莫徭驚惶至此而言則本無爲盜之心固有可招之理然欲諸盜肯降必須先得黃鄧昨邵飾等初招黃捉鬼之時失於恩信致彼驚逃尋捕獲之斷其脚筋因而致死今鄧和尚等若指前事爲戒計其必未輕降如云且招終恐難得必須示以可信之事推以感動之恩若得黃鄧先降其餘指麾可定今深入而攻既不可待其出而擊之又不可且殺且招又不可以臣思之莫若罷兵曲赦示信推恩庶幾招之可使聽命臣亦廣詢南方來者云我若推信彼不難招鄧和尚等大則希一班行其次不過殿侍足矣正蠻叛者得一團主之名亦足矣莫徭之類使安耕織而歲輸皮粟得爲平民乃彼大幸不徒足志而已今若擊之不已則其爲害愈深况漸夏暑南方燠濕士卒不習水土須慮死傷仍恐迫之大急則潭柳全邵諸寨向化之蠻皆誘脅而起則湖南一路可爲國家之憂臣欲乞速令兩府大臣深究招殺之利害共思長策決定廟謀若遷延後時致彼猖熾不幸官吏頻遭殺害則朝廷之體難爲屈法而招彼以其罪既多必恐不能自信則兵久不解害未有涯伏望聖明斷之在早取進止

論水洛城事宜乞保全劉滬等劄子慶曆四年

臣近風聞狄青與劉滬爭水洛城事枷禁滬等奏來竊以邊將不和用兵大患况狄青劉滬皆是可惜之人事體須要兩全利害最難處置臣聞水洛城自曹瑋以來心知其利患於難得未暇經營今滬能得之則於滬之功不小於秦州之利極多昨韓琦等自西來聞有論奏非以水洛爲不便但慮難得而難成今滬能得之又有成之志正宜專委此事責其必成而狄青所見不同遂成釁隙其間利害臣

請詳言國家近年邊兵屢敗常患大將無權今若更沮狄青釋放劉滬則不惟於狄青之意不足兼沿邊諸將皆挫其威此其不便一也臣聞劉滬經營水洛城之初奮身展効不少先以力戰取勝然後誘而服從乃是黨留諸族畏滬之威信今忽見滬先得罪帶枷入獄則新降生戶豈不驚疑若使飜然復叛則今後邊臣以威信招誘諸族誰肯聽從不惟一作特水洛城更無可成之期兼沿邊生戶永無可招之理此其不便二也自用兵以來諸將爲國立事者少此水洛城不惟自曹瑋以來未能得之亦聞韓琦近在秦州嘗欲經營而未暇今滬奮然力取其功垂就而中道獲罪遂無所成則今後邊將誰肯爲國立事此其不便三也臣又聞水洛之戍雖能救援秦州而須藉渭州應副今劉滬既與狄青異議縱使水洛築就他時萬一緩急狄青怒滬異己又欲遂其偏見稍不應副則水洛必須復失其不便四也緣此之故遂移青於別路則是因一小將移一部署此其不便五也此臣所謂利害甚多最難處置者也臣謂今宜遣一中使處分魚周詢等速令和解務要兩全必先密諭狄青曰滬城水洛本有所稟非是擅爲役衆築城不比行師之際滬見利堅執意在成功不可以違節制加罪滬宜釋放朝廷不欲直放恐挫卿之威卿自釋之使感卿惠若他時出師臨陣有違進退之命者任卿自行軍法然後密諭滬曰汝違大將指揮自合有罪朝廷以汝於水洛展効望汝成功故諭青使赦汝責汝卒一作辦事以自贖俟水洛功就則又戒青不可因前曾異議堅執不脩惟幸失之遂己偏見今後水洛緩急尤須極力應副萬一小有疎失則是汝挾情故陷之必有重責如此則水洛之利可成蕃戶之恩信不失邊將立事者不懈大將之威不挫苟不如此未見其可蓋罪滬既不可罷水洛城又不可沮狄青又不可事關利害伏望聖慮深思取進止

再論水洛城事宜乞保全劉滬劄子同前

臣伏見朝廷近爲倚水洛城事雖已差魚周詢等就彼相度風聞周詢近有奏來爲水洛蕃族見狄青柳取劉滬等因致驚擾周詢却乞將帶滬等往彼以此足驗劉滬能以恩信服彼一方朝廷必知水洛爲利而不欲廢之非滬守之不可然滬與狄青尹洙已立同異難使共了此事臣謂必不得已寧移尹洙不可移滬尙慮議者必謂不可因小將而動大將今若但移洙而不動狄青卽不是特移大將矣若却移路分更升差遣或召拜他官苟不類前後因事移替之人卽不是因滬被移矣如此則於洙無損於滬獲全其功於邊防利便二者皆獲其利若洙狄青却將立功將校輕沮則其害有二大凡文武官常以類分武官常疑朝廷偏厚文臣假有二人相爭實是武人理曲然武人亦不肯服但謂執政盡是文臣遞相黨護輕沮武士況今滬與洙爭而滬實有功效其理不曲若洙罪劉滬則沿邊武臣盡鼓怨怒其害一也自有西事以來朝廷擢用邊將極多能立功効者絕少惟范仲淹築大順城种世衡築青澗城滬築水洛耳臣亦聞三者惟滬尤爲艱辛是功不在二人之下今若曲加輕沮則今後武臣不肯爲朝廷作事其害二也滬若不在水洛則蕃族一作部恐他人不能綏撫一有蕃部二字別致生事則今後邊防不能招輯蕃部一無此二字其害三也今三利三害其理甚明但得大臣公心不於尹洙曲有黨庇則不與邊防生患此繫國家利害甚大伏望聖意斷而行之取進止

論陳留橋事乞黜御史王礪劄子同前

臣伏觀朝廷近爲王堯臣吳育等爭陳留橋事互說是非陛下欲盡至公特差臺官定奪而王礪小人不能上副聖意挾公徇私一作內挾私徇妄將小事張皇稱王堯臣與豪民有情弊誣奏慎鉞令兇吏潛行殺害及妄稱真宗皇帝朝移橋不便致民切齒等事及勦出事狀王堯臣元不曾受豪民請囑慎鉞亦不曾令小吏潛行殺害及據

先朝日曆內真宗皇帝親諭王旦爲陳留橋損害舟船特令倚換證驗得王礪所言悉是虛妄上感聖聽賴陛下聖明慎於聽斷不便輕信其言別令呂覺根勘今既勦出事狀方明王礪不公伏以臺憲之職本要糾正紀綱而礪但務挾私欺罔天聽合行黜責其罪有四一曰謗黷先朝聖政謹按日曆書真宗皇帝親諭王旦移橋一事乃是先帝知民間利病移得此橋爲便故史官書之以彰聖政爲後世法今王礪却稱是真宗朝權臣受豪民獻賂移得此橋不便民間至今切齒若如王礪所說卽是真宗誤信權臣移橋致民怨怒乃是當時闕政今國史書橋便利彰先帝一作朝聖政王礪言移橋不便是先朝闕政臣不知國朝舊史可信爲復王礪之言可憑其虛妄謗黷之罪可誅一也二曰中傷平人使今後勞臣不勸臣見向前三司使不能擘畫錢穀至有強借豪民錢二十萬貫買天下官私物貨至稅果菜之類碎細刻剝自堯臣在三司不聞過外誅求而卽今財用不至大闕亦聞南郊漸近諸事亦稍有備當此窘迫多用一作人之時而能使民不加賦而國用粗足亦可謂勞能之臣方當責其辦事今因移一橋小事而王礪誤其與豪民有情致興大獄及至勦出並無情弊是王礪不卹朝廷事體當此多用一作人之際將能幹事之臣因小事妄加傷害其罪二也三曰誣奏平人爲殺人賊凡臺官言事許風聞者謂耳目不及之事卽許風聞今王礪目見慎鉞所遣小吏別無武勇又無器械而稱其有殺害之心及至勦出並無迹狀其罪三也四曰挾私希旨初朝廷本爲省府互爭別選不干礙官定奪王礪既吳育是舉主卽合自陳乞別差官豈可謗黷先朝希合舉主且礪言慎鉞是堯臣所舉感惠必深今礪是吳育舉豈不懷感且吳育與王堯臣本無怨恨各爲論列本司公事所見異同乃是常事但王礪小人妄思迎合張皇欺誑其罪四也且王礪謗黷先朝聖政之罪若不重責則無以彰陛下孝治之明中傷堯臣若不重責則使勞能之

臣不能安心展効其誣奏慎賊遣吏殺害及挾私迎合舉主之罪若不重責則今後小人一作臣恣情妄作獄訟必多事係朝廷之體臣忝諫諍不可不言其王礪伏乞重行貶黜取進止

論王礪中傷善人乞行黜責劄子同前

臣近有劄子并會面奏爲臺官王礪特被差委輒敢徇私妄言王堯臣因移橋別有情弊等事欺誑朝廷上賴陛下聖明再令推究勘得堯臣並無私曲已蒙聖恩釋放自王礪妄形彈奏羅織無事之人欲借國威以報私忿立朝之列人各自危及聞堯臣不陷枉刑更蒙陛下恩釋中外之士稍復安心然小人在朝非國之利如礪善惡未辨尙可含容今既試之以事見其傾險之迹則豈可更令濫處臺憲中傷善人伏望聖慈早行黜責以戒在位傾邪之輩一作者兼亦使今後選用之人不敢尙辜委任別造過愆若礪不黜竊慮今後被差委者動皆作過則陛下無由使人此事所繫不細取進止四月庚戌王礪罷御史授大常博士通判鄧州

論任人之體不可疑劄子同前

臣近見淮南按察使邵錡奏爲體量知潤州席平爲政不治及不教閱兵士等朝廷以錡爲未足信又下提刑司再行體量臣竊以轉運提刑俱領按察然朝廷委任重者爲轉運其次乃提刑爾今委任重者言事反不信又質於其次者而決疑臣不知邵錡果是才與不才可信與不可信二字一作否如不才不可信則一路數十州事豈宜委之若果才而可信又何疑焉又不知爲提刑者其才與錡優劣如何若才過於錡尙可取信萬一不才於錡見事相背却言席平爲才邵錡合有罔上之罪矣若反以罪錡臣料朝廷必不肯行若捨錡與席平俱不問則善惡不辨是非不分况席平會作臺官立朝無狀只令制勘亦不能了尋爲御史中丞以不才奏罷朝廷兩府而下誰不識平其才與不才人人盡知何必更令二作待提刑體量然後爲定

今外議皆言執政大臣託以審慎爲各其實不肯主事而當怨須待言事者再三陳述使被黜者知大臣迫於言者不得已而行只圖怨不歸已苟誠如此豈有念民疾苦澄清官吏之意哉若無此意一有只字是好疑不決則尤其是朝廷任人之失自去年以爲轉運使不察官吏特出詔書加以使各責其按察今按察使依累詔書舉其本職又却疑而不聽今後朝廷命令誰肯信之凡任人之道要在不疑寧可艱於擇人不可輕任而不信若無賢不肖一例疑之則人各心闌誰肯辦事今邵錡言一不才顯者所貴朝廷肯行然後部下振竦官吏畏服今反爲朝廷不信却委別人則錡之使威誰肯信服錡亦懣見其下今後見事不若不爲不獨邵錡一人臣竊聞諸處多有按察官吏皆爲朝廷不行人各嗟歎以謂任以事權反加沮感朝廷之意不可諭也伏望聖慈特勅其三字一作取邵錡所奏特與施行又令今後按察使奏人如不才老病灼然不疑者不必更委別官示以不信所貴不失任人之道而令臣下盡心取進止

論與西賊大斤茶劄子同前

臣伏覩昨者西賊來議通和朝廷許物數目不少內茶一色元計五萬斤緣中國茶法大斤小斤不同當初擬議之時朝廷謀慮不審不曾明有指定斤數竊慮西賊通和之後須要大斤若五萬斤大斤是三十萬小斤之數如此則金帛二十萬茶三十萬乃是五十萬物真宗時契丹大舉至澶州只用三十萬物三十年後乘國家用兵之際兩國交爭方添及五十萬今元昊一隅之敵一口便與五十萬物臣請略言爲國家大患一兩事不知爲國計者何以處之三十萬斤之茶自南方水陸二三千方至西界當今民力困乏陛下不恥屈志就和本爲休民息力若歲般輦不絕只此一物可使中國公私俱困此大患一也計元昊境土人民歲得三十萬茶其用已足然則兩權場捨茶之外須至別將好物博易賊中無用之物其大患二也契丹

常與中國爲敵國指元昊爲小邦若見元昊得物之數與彼同則須更更爭添何以應副不過云茶不比銀絹本是羸物則彼必須亦要十數萬大斤中國大貨利止於茶鹽而已今西賊一歲三十萬斤北虜更一作又要二三十萬中國豈得不因此其大患三也昨與西賊議和之初大臣急欲事就不顧國家利害惟恐許物不多及和議將成契丹語洩兩府方有悔和之色然許物已多不可追改今天幸有此一事尚可罷和臣乞陛下特召兩府大臣共議保得久遠供給四夷中國不困則雖大斤不惜若其爲患如臣所說不至妄言即乞早議定計取進止

論西賊占延州侵地劄子慶曆四年

臣竊聞元昊近於延州界上脩築城壘強占侵地欲先得地然後議和故楊守素未來而占地之謀先發又聞邊將不肯力爭此事所繫利害甚大料賊意見朝廷累年用兵有敗無勝一旦計無所出厚以金帛買和知我將相無人便欲輕視中國一面邀求賂遺一面侵占邊疆不惟驕賊之心難從實亦爲國之害不細今若縱賊於侵地立起堡寨則延州四面更無捍蔽便爲孤壘其一作而賊盡據要害之地他時有事延州不可保守若失延州則關中遂爲賊有以此而言則所侵之地不可不爭伏况西賊議和事連北虜今人無愚智皆知和爲不便但患國家許物已多難爲中悔若得別因他事猶可絕和何况此侵地是中國合爭之事豈可不爭臣謂今欲急和而不顧利害者不過邊臣外憚於禦賊而內欲邀議和之功以希進用耳故不肯擊逐羌人力爭侵地蓋小人無識只苟目前榮進之利不思國家久遠之害是國家屈就通和只與邊臣爲一時進身之利而使社稷受無涯之患陛下爲社稷計豈不深思大臣爲社稷謀豈不極慮伏望聖慈遣一使往延州令龐籍力爭取昊賊先侵之地不令築城堡寨若緣此一事得絕和議則社稷之福也臣仍慮西賊來人尙有

青鹽之說此事人人皆知不可許亦慮小人無識急於就和者尙陳鹽利以惑聖聰伏望聖慈不納浮議取進止

奏議卷第九

奏議卷第十 集一百六

諫院

論大臣不可親小事劄子慶曆二年

臣伏見兵興累年天下多故樞密之職事任非輕雖典兵戎體均一作同宰輔至於大小機務其繁文倍於中書所以國家舊制都副承旨皆用士人位比屬僚事參謀議祖宗之制一作世尤慎擇材或取其歷職詳練者以為副使自承平以來綱紀隳廢惟用人吏備員而已當四方無事之時兩府檢例行事上下戶曠恬然不怪自兵戎既動中外事繁猶務因循致多敗誤今承旨不親職事惟署文書凡百行遣皆委諸房小吏使副大臣不免親臨細事既不得精心思慮專意廟謀至於碎務繁多又不能躬自檢察遂使邊防急奏多苦滯留軍國密謀動成漏洩凡關事體不便處多皆由樞臣難自躬親而承旨不能舉職也臣今欲乞依祖宗舊制承旨特用士人如武臣中難得其人即請於文官中精選材能換與合入官資責其舉職仍令樞密使副條列常行事目有可以分職責成者悉以委之使大臣專意廟謀屬吏分行職事時參國論一作論議庶有裨補一作助既復朝廷之舊制又於事體而合宜伏望聖慈特賜裁擇取進止

論中書增官屬主文書劄子同前

臣伏見近來朝廷號令煩數更改又頻降出四方多不遵稟而朝廷之臣無專主者亦不勾校稽違考責實効以不銳之意行不信之言宜乎空文雖多而下不畏聽今百職廢壞弊實由斯臣竊見漢丞相官屬甚多欲乞精選材臣采漢各號增置兩府官屬官一二員使專掌政令之出者置簿拘管俟天下施行報應校其稽違舉行朝典即不得以承受回申便為報應須是施行實迹具以條聞旋行勾銷以見能否臣謂苟設此官則天下知朝廷有責實之意今後可使令出必行官無曠職如允臣所請一作奏乞下兩府重議施行取進止

論班行未有舉薦之法劄子同前

臣伏見朝廷選任百官文武參用文官在選者各以舉主遷京朝官其間雖容時有濫冒然孤寒有才行之人亦往往獲進惟有武官中近下班行並無賢愚分別一例以年歲遞遷自借職得至供奉官須是三十餘年使賢愚同滯而國家緩急要人使用無由知其能否或要人使則臨時只看脚色點差多是不副所選臣謂班行入仕之人雖多端然其中亦極有才能可任用者但國家舉選之法全未精博臣欲乞將近下班行比類選人別立舉官之法凡無人舉者官有所止更不例遷有舉主者一作舉主足者方與遷轉或且令無舉主者依舊年限遷轉將有舉主者別作任使仍乞嚴為約束重其連坐之法使舉者不容冒濫則才與不才漸可分別而用人不濫况今四方多事天下都監巡檢監當之類盡要得人方能一作可集事不必邊任并閣職方用舉薦其他要切使喚處多如允臣所請乞付樞密院商量立定法制頒行取進止

論乞放還蕃官胡繼諤劄子同前

臣竊見朝廷前歲以延州蕃官胡繼諤因為邊臣所疑移入內地見任亳州都監以子守清悉領父之諸部風聞近為不服一作安亳州水土死一無死字亡却家族身又疾病會有奏陳乞移一京西地涼之處臣謂方今西鄙用兵之際朝廷宜廣推恩信撫御蕃夷既欲守清盡死於邊疆當厚遇繼諤保全其家族豈有既任其子又疑其父繼諤求一作來遷內地其實異鄉雖曰居官乃是因繫致其失所身病家亡况彼初心又無顯過在繼諤之身已有幽囚冤枉之嘆於守清之分又失駕馭豪傑之方萬一繼諤疾病死而不歸守清父子之心豈得無恨反視中國乃為世讎必與邊陲別生患害其餘部族亦必離心國家自用兵以來凡有計謀未聞勝算尤於招撫蕃夷之術常失恩威致使離叛者多皆願附賊在於繼諤處置特乖臣欲乞因

其有請召至京師與雪前疑厚加禮遇放還本族示以推誠守清得父子復完必思盡節繼謬感國家之遇必有所施若朝廷猶以爲疑即乞先以此意詔聞守清計其必無弄父之理若彼自不欲其歸則他日可無後患取進止

繳進王伯起上書狀同前

右臣今月二十五日出外至夜歸家有相州進士王伯起看臣不見後留下長書一封中言爲檢匣抑塞言事者責臣不能規諫人主開益聰明及自言有策可以弱北虜使十年不爲害又言有上皇帝書爲有司所抑不得上達仍於長書後卷却奏狀一封意欲令臣繳奏臣竊詳王伯起所與臣書詞理極有可採但未知奏狀內所言何事緣臣本不識其人又無處尋訪只據所與臣書內言有策可使北虜十年不爲害此一事是朝廷當今急務其奏狀臣不敢滯留謹并元與臣書繳連上進伏望聖慈特賜省覽或有可採乞下開封府尋訪本人更加詢問謹具狀奏聞

論大理寺斷冤獄不當劄子同前

臣風聞大理寺近奏斷德州公案一道爲一班行王守度謀殺妻事止斷杖六十私罪其守度所犯情理極惡本因踰濫欲誘一求食婦人爲妻自持刃杖恐逼正妻阿馬令其誣以姦事髡截頭髮又自以一作將繩索付與阿馬守度持刀在旁逼令自縊其命垂盡只爲未有棺器却且解下其後又與繩索令自縊阿馬偶得生逃臣略聞此大概其他守度兇惡之狀備於案牘人不忍聞阿馬幽苦冤枉一作之冤如此而法吏止斷誣姦降以杖罪竊以刑在禁惡法本原情今阿馬之冤於情可憫守度所犯其惡難容若以法家斷罪舉重而論則守度誣姦不實之罪輕迫人以死之情重原其用意合從謀殺凡謀殺之罪其類甚多或有兩相爭恨理直之人因發忿心殺害理曲之人者死與未死須被謀殺之刑豈比守度曲在自身阿馬本無所

爭備極陵辱迫以自裁一作處虐害之情深於謀殺遠矣臣嘗伏讀真宗皇帝賜諫臣之詔曰冤枉未申賞刑踰度者皆許論列今之冤婦臣職當言者也豈有聖主在上國法方行而令強暴之男而敢逼人以死臣恐守度不誅則自今強者陵弱疎者害親國法遂隳人倫敗矣其王守度一宗公案伏望聖慈特令中書細詳情理果如臣之所聞即乞行刑法以止姦凶取進止

論內臣馮承用與外任事劄子同前

臣伏見內官馮承用近因過失爲臣寮論奏一作奏劾陛下親發睿斷不私小人聽納羣言逐去左右中外之士莫不相慶然初聞朝議將與外任至今多日未見指揮近日外面虛傳云却得教坊勾當留本因有過超轉官資只與外任尙爲優幸若更遲留不遣則使今後伏事陛下左右者恣爲過惡無以戒勸承用從來過犯甚衆人皆畏懼不敢明言自其罷却入內已來舊跡漸一作甚多彰露內廷之事臣不細知外邊作過頗有實狀今若未行遠黜則言事臣寮不免再有論奏勾連獄訟生事轉多其馮承用伏乞早與一外任閑慢差遣便令出京可以戒勸後人外再物論取進止

奏議卷第十

河北轉運

論臺官上言按察使狀慶曆四年八月新除河北轉運按察

使未行

右臣伏觀近降朝旨約束諸路按察使備載臺官所上之言意謂按察使等所奏之人多不實或因迎送文移之間有所闕失挾其私怒枉奏平人朝廷都不深思輕信其說臣自聞降此約束日夕憂嗟竊思國家方此多事難了之時正是責人展効之際獎之猶恐不竭力疑之誰肯盡其心昨大選諸路按察之際兩府聚廳數日盡破常例不次用人中外翕然皆謂一時之極選凡一有彼字被選之者皆亦各負才業久無人知常患無所施為一旦忽蒙擢用各思宣力爭奮所長不惟欲報朝廷豈一不更希進用豈可頓為欺罔便徇私情料其心必未至此苟或如臺官所說則是兩府聚廳數日選得不公之人其或不至如斯何必更加約束竊以任人之術自古所難常能力主張猶或有沮者何况更一作過生疑異使其各自心闌如此用人安能集事况按察之任人所難能或大臣薦引之人或權勢僥倖之子彼按察使者下當怒怒上忤權勢而不敢避者只賴朝廷主張而已今按察者所奏則未能施一作與行沮毀者一言則便加輕信皆由朝廷未知官吏為州縣大患而按察可以利民委任之意不堅故毀謗之言易入也所可惜者自差諸路按察今雖未有大有效而老病昏昧之人望風知懼近日致仕者漸一作甚多州縣方欲澄清而朝廷自沮其事臣欲乞聖慈令兩府召臺官上言者至中書問其何路按察之一作何人因挾私怒苟有迹狀乞下所司辨明若實無人乃是妄說其近降劄子乞賜抽還不使四方見朝廷自沮按察之權而為貪贓老繆之吏所快謹具狀奏聞伏候勅旨

論兩制以上罷舉轉運使副省府推判官等狀慶曆五年歲

實于此

右臣近準御史臺牒為臣寮上言待制以上舉省府推判官轉運使副等事奉聖旨去年勅命更不行用令臣知委者臣竊詳臣寮上言悉涉虛妄蓋因近日陛下進退大臣改更庶事小人希合欺罔天聰臣試請辨之據上言者云若令兩制以上保舉則下長奔競之路方今上自朝廷下至州縣保舉之法多矣只如臺官亦是兩制以上舉以至大理詳斷審刑詳議刑部詳覆等官三路知州知縣通判選人改京官學官入國學班行遷閣職武臣充將領選人入縣令下至天下茶鹽場務榷場及課利多處酒務凡要切差遣無大小盡用保舉之法皆不聞以奔競而廢之豈可獨於省府等官獨一作偏長奔競而可廢此其欺妄可知也上言者又云遂令端士並起馳騫且馳騫盡係一作自是小人豈名端士至如自來舉官之法多矣豈能盡絕小人干求况自領新勅以來何人舊是端士頓然改節馳騫於何門而得舉乞賜推究姓名若果無之則見其欺妄可知也上言者又云不因請託人莫肯言此又厚誣之甚也今內外臣寮無大小曾受人舉者十八九豈可盡因請託而得自兩府大臣而下至外處通判以上人人各會舉官豈可盡因請託而舉若云其它舉官不請託只此勅舉官須請託即非臣所知也今兩制之中好人不少繁難一作重要害之地皆已委信任用二字一作而任之豈可不如外郡通判等不堪委任舉官况兩制之臣除此勅外亦更別許舉官豈可舉他官則盡公惟此勅則頓一作使徇私請此其欺妄可知也又云每歲舉一百五十人致人多而爭差遣臣竊一人有三人舉主方敢望差遣一百五十人須一歲內有四百五十員兩制為舉主今兩制不及五十人使人人歲舉三人即纔各是一人舉主豈敢便爭差遣况有不曾舉人者或舉不及三人者乞賜檢會去年終兩制以上舉到人數便可知其恣情欺妄也近日改更政令甚多惟此一事尤易辨明故

臣不避煩言而辨者伏冀陛下因此深悟小人希合而欺妄也緣自去年陛下用范仲淹富弼在兩府值累年盜賊頻起天下官吏多不得力因此屢建舉官之議然亦不是自出意見皆先檢祖宗故事請陛下擇而行之所以元降勅文首引國書爲言是也當時臣寮並不論議近因仲淹等出外與朝廷經畫邊事讒嫉之人幸其不在左右百端攻擊只此事朝廷不暇審察便與施行臣昨見富弼自至河北緣山傍海經畫勤勞河北人皆云自來未有大臣如此其經畫所得事亦不少歸至國門臨入而黜使河北官吏軍民見其盡忠而不知其罪狀小人貪務希合又不爲朝廷惜事體凡事攻擊至今未已况朝廷用人屢有進退豈有一人纔出便不問是非盡改所行之事若大臣一度進退政令一度改更如此紛紛豈有定制伏望陛下重一作審察愛憎之私辨其虛實之說凡於政令更慎改張臣檢詳元降舉官勅意亦一作本是於國書檢用祖宗所行之法今上言者却云因諫官論列致差遣不定而有更張事涉臣身不敢自辨然臣在諫署日言事無狀致今來臣寮指以爲辭豈可尙冒寵榮不能自勅請從黜罰以免人言臣伏見陛下聖德仁慈保全忠正之士進退之際各有恩意此所以能使忠臣義士忘身報國至死而已也其今後臣寮希附上言攻擊前兩府所行之事乞賜辨明擇其實有不便者方與改更庶全大體則天下幸甚也臣伏觀去年八月二日元降勅命節文云比於國書擇一作據諸治要見其官人之際尤慎外臺之選又云然其進任必屬近臣又命告示賞罰之命皆三朝之攸行此是元議舉官因依乞賜詳酌臣無任激切祈天待罪之至

論劉三殿事狀慶曆四年

臣伏見契丹宣徽使劉三殿挈其愛妾兒女等七口向化南歸見在廣信軍聽候朝旨竊慮朝廷只依常式投來人等依例約回不納國家大患無如契丹自四五十年來智士謀臣晝思夜算未能爲朝廷

出一奇策坐而制之今天與吾時使其上下乖離而親貴臣忽來歸我此乃陛下威德所加祖宗社稷之福竊慮憂國之臣過有思慮以謂納之別恐引惹臣請略陳納之却之一端利害伏望聖慈擇其可往年山遇捨元昊而歸朝邊臣爲國家存信拒而遣之元昊甘心山遇盡誅其族由是河西之人皆怒朝廷不納而痛山遇以忠而赤族吾既自絕西人歸化之路堅其事賊之心然本欲存信以懷元昊而終至叛逆幾困天下是拒而不納未足存信而反與賊堅人心此已驗之効也其後朝廷悟其失計歸罪郭勸悔已難追矣此事不遠可爲鑿戒伏望陛下思之此不可拒而可納一也三殿是契丹貴臣秉節鉞兼宣徽可謂至親且貴矣一旦君臣離心走而歸我是彼國中大醜之事必須掩諱不欲人聞必不敢明言求之於我此其可納二也况彼來投又無追者相繼既絕蹤跡別無明驗雖欲索之於我難以爲辭此其可納三也三殿既彼之貴臣彼國之事無不與知今既南來則彼之動靜虛實我盡知之可使契丹日夕懼我攻取之不暇安敢求索於我自起兵端若使契丹疑三殿果在中國則三十四年之間卒無南向之患此又納之大利其可納四也彼既窮來歸我若拒而遣之使其受山遇之禍則幽燕之間四五十年來心欲南向之人盡絕其歸路而堅其事狄之心思爲三殿報仇於中國又終不能固契丹之信此爲誤計其失尤多且三殿在中國則契丹必盡疑幽燕之人是其半國離心常恐向背凡契丹南寇常藉幽燕使其盡疑幽燕之人則可無南寇之患此又可納大利五也古語曰天與不取反受其咎此不可失之幾也其劉三殿伏望速降密旨與富弼令就近安存津遣赴闕惟乞決於睿斷不惑羣言取進止

論杜衍范仲淹等罷政事狀 一作上皇帝辨杜韓范富書慶

曆五年

臣聞士不志身不爲忠言不逆耳不爲諫故臣不避羣邪切齒之禍

敢干一作冒一人難犯之類惟賴聖明一作慈幸加省察臣伏見杜
衍韓琦范仲淹富弼等皆是陛下素所委任之臣一旦相繼罷黜一
作而罷天下之士皆素知其可用之賢而不聞其可罷之罪臣雖供
職一作臣職雖在外事不盡一作審知然臣竊見自古小人讒害忠
賢其說一作讒不遠欲廣陷善則不過指爲朋黨欲動搖大臣則
必須誣以專權其故何也夫去一善人而衆善人尙在則未爲小人
之利欲盡去之則善人少過難爲一二求瑕惟有指以爲朋一作惟
指以爲朋黨則可一時盡逐至如大臣已被知遇而蒙信任一有者
字則難難字一作不可以他事動搖惟有專權是上一作人主之所
惡故須此說方可傾之臣料衍等四人各無大過而一時盡逐弼與
仲淹委任尤深而忽遭離間必有以朋黨專權之說上惑聖聰一有
者字臣請試辨辨字一作詳言之昔年仲淹初以忠言讜論聞於中
外天下賢士爭相稱慕當時姦臣誣作朋黨猶難辨明自近日陛下
擢此數人並在兩府察其臨事可以辨也蓋衍爲人清慎而謹
守規矩仲淹則恢廓自信而不疑琦則純正而質直弼則明敏而果
銳四人爲性既各不同雖皆歸於盡忠而其所見各異故於議事多
不相從至如杜衍欲深罪滕宗諒仲淹則力爭而寬之仲淹謂契丹
必攻河東請急修邊備富弼料以九事力言契丹必不來至如尹洙
亦號仲淹之黨及爭水洛城事韓琦則是尹洙而非劉滬仲淹則是
劉滬而非尹洙此數事尤彰著陛下素已知者此四人者可謂天下
至公四字一作公正之賢也平日閑居則相稱笑之不暇爲國議事
則公言廷諍而不作無私以此而言臣見衍等真得漢史所謂忠
臣有不和之節而小人讒爲朋黨可謂誣矣臣聞有國之權誠非臣
下之得專也然一無此字臣竊思仲淹等自入兩府已一作以來不
見其專權之迹而但見其善避權也權者二字一作夫權得各位則
可行故好一作行權之臣必貪一有名字位自陛下召琦與仲淹於

陝西琦等議至五六陛下亦五六召之一有至如二字富弼三命學
士兩命樞密副使每一命皆再三懇讓者愈切陛下用之愈堅皆
再至愈堅十五字一作夫嘗不懇讓懇讓之者愈切而陛下用之愈
堅此天下之人所共知臣一有但字見其避讓大繁不見其好一作
專權貪位也及陛下堅不許辭方敢受命然猶未敢別有所爲陛下
見其皆未作一作行事六字一作欲其作事乃特一無此字開天章
召而賜坐受一作授以紙筆使其條事一作列然衆人避讓不敢下
筆弼等亦不敢獨有所述因此又煩聖慈特出手詔指定姓名專責
弼等一字一作其條列大事而施行二字一作行之弼等遲回又近
二字一作近及一月方敢略條數事然一無此字仲淹深一作老練
世事必知凡百難猛一作凡事難遽更張故其所陳志在遠大而多
若迂緩但欲漸而行之以久冀皆有効弼性雖銳然亦一無此字不
敢自出意見但多一無此字舉祖宗故事請陛下擇而行之自古君
臣相得一言道合遇事便行臣方怪弼等蒙陛下如此堅意委任遇
事至委任十八字一作遇事而近更無推避弼等蒙陛下堅意委任
督責丁寧而猶遲緩自遇作事不果然小人巧譖已一作而曰專權
者豈不誣哉至如兩路宣撫聖一作國朝常一作累遣大臣况自中
國之威近年不振故元昊叛逆一方而勞困及於天下北虜乘釁違
盟而動其書辭侮慢至有貴國二字一作責祖宗之言陛下憤恥雖
深但以邊防無備未可與爭屈志一作意買和莫大之辱弼等見中
國累年侵凌之患感陛下不次進用之恩故各自請行力思雪國家
之前恥八字一作力思雪恥沿一作緣山傍海不憚勤勞欲使武備
再修國威復振臣見弼等用心本欲尊陛下威權以禦四夷未見其
侵權而作過也伏惟陛下睿哲聰明有知人之聖臣下能否洞見不
遺故於千官百辟之中特一作竊選得此數人驟加擢用夫正士在
朝羣邪所忌謀臣不用敵國之福也今此數人一旦罷去而使羣邪

相賀於一作于內四夷相賀於一作于外此臣所一有以字爲陛下
惜之一無此字也伏惟陛下聖德仁慈保全忠善退去之際恩禮各
優今仲淹四路之任亦不輕矣惟一無此字願陛下拒絕羣謗委任
一作信不疑使盡其所爲猶有裨補方今西北二虜交爭未已正是
天與陛下經營之時如弼與琦豈可置之閑處伏望陛下下一無此二
字早辨讒巧特加圖任則不勝幸甚臣自前歲召入諫院十月之內
七受聖恩而致身兩制方一作常思君一作榮寵至深未知報効之
所今羣邪爭進讒巧一有而字正士繼去朝廷乃臣忘身報國之秋
一作時豈可緘言而避罪敢竭愚瞽惟陛下擇之臣無任祈天待罪
懇激屏營之至臣修昧死再拜

右正文乃今盱台守施宿所藏當時真本也一作疑是後來公所
改定如以水落爲洛之類及其餘文意皆不若一作爲長至如貴
國二字注一作貴蓋用綿本及李燾長編今真蹟元用貴國按慶
曆二年契丹求關南書云貴國 祖先肇創基業尋與敵境繼爲
善鄰暨乎

太宗紹登寶位於有征之地才定并汾以無名之師直抵燕薊

仁宗命王拱辰草答書云

太宗皇帝親駕并郊匪圖燕壤當時貴國亟發援兵既交石嶺之
鋒遂舉薊門之役則是貴國二字彼此用之公此奏後改爲貴耳

銓部

論權貴子弟衝移選人劄子至和元年六月判流內銓

臣勘會銓司近年選人倍多員闕常少待闕者多是孤寒貧乏之人得替住京動經年歲遇有合入闕次多被權貴之家將子弟親戚陳乞便行衝改或已注授者且一無者字且字一作卻令待闕或纔到任者即被對移只就權貴勾當家私不問孤寒便與不便兼臣所見臣寮陳乞多非急切事故或云近便鄉里或云看覩墳塋僥倖希求妄託名目孤寒阻滯徒益怨嗟臣欲乞今後臣寮須有急切事故如委任邊寄不許般家及致仕分司丁憂病患之類方許陳乞子弟差遣其一有餘字雖無事故自將恩澤陳乞者許銓司勘會如已注人者更不改注已到任者更不衝移並令別具陳乞仍不許連併陳乞兩任如允臣所請乞下銓司遵守施行今取進止依奏并下三班審官並依此

翰苑

論臣寮奏帶指使差遣劄子至和元年九月兼三班院

臣等勘會本班見管使臣至八千餘員其入仕之源既已冗濫及差遣之際又多有因緣附權貴者僥倖多門致孤寒者怨嗟不已伏見近年文武臣寮出外任者多帶指使隨行不久便奏乞監押巡檢差遣仍多指定去處陳乞亦有元只是諸司職掌人奏帶隨行後來改轉班行並不會歷短使監當差遣便入監押巡檢親民亦無合入遠近路分取便指射有職田處朝廷以重違臣寮奏請更不勘會差遣資序路分遠近合與不合入得便行差除相繼成例近日漸多合行釐革臣今欲乞今後臣寮奏帶隨行指使之入及三年已上並只與理為一任候歸班依例差遣外更不得陳乞差遣所貴止絕僥倖今取進止

論史館日曆狀嘉祐四年誤纂于此

右臣伏以史者國家之典法也自君臣善惡功過與其百事之廢置可以垂勸戒示後世者皆得直書而不隱故自前世有國者莫不以史職為重伏見國朝之史以宰相監修學士修撰又以兩府之臣撰時政記選三館之士當升擢者乃命修起居注如此不為不重矣然近年以來員具而職廢其所撰述簡略遺漏百不存一至於事關大體者皆沒而不書此實史官之罪而臣之責也然其弊在於修撰之官惟據諸司供報而不敢書所見聞故也今時政記雖是兩府臣寮修纂然聖君言動有所宜論臣下奏議事關得失者皆不紀一作記錄惟書除日辭見之類至於起居注亦然與諸司供報公文一作文字無異修撰官只據此銓次繫一作排以月日一作日月謂之日曆而已是以朝廷之事史官雖欲書而不得書也自古人君皆不自閱史今撰述既成必錄本進呈則事有諱避史官雖欲書而不可得一作取書也加以日曆時政記起居注例皆承前積滯相因故纂錄者常務追修累年前事而歲月既遠遺失莫存至於事在目今可以詳於見聞者又以追修積滯不暇及之若不草其弊則前後相因史官永無舉職之時使聖朝典法遂成一有於字廢墜矣一無此字臣竊聞一作見趙元昊自初僭叛至復稱臣始終一宗事節皆不會書亦聞修撰官甚欲紀述以修纂後時追求莫得故也其於他事又可知焉臣今欲乞特詔修時政記起居注之臣並以德音宣諭臣下奏對之語書之其修撰官不得依前只據諸司供報編次除目辭見並須考驗事實其餘某官者以某功如狄青等破僞智高文彥博等破王則之類其貶某職者坐某罪如昨來麟州守將及并州龐籍緣白草平事近日孫沔所坐之類事有文據及迹狀明白一作分明者皆備書之所以使聖朝賞罰之典可以勸善懲惡昭示後世若大臣用情朝廷賞罰不當者亦得以書為警戒此國家置史之本意也至於

其他大事並許史院據所聞見書之如聞見未詳者直牒諸處會問及臣寮公議異同朝廷裁置處分並書之已上事節並令修撰官逐時旋據所得錄爲草卷標題月分於史院躬親入櫃封鎖候諸司供報齊足修爲日曆仍乞每至歲終命監修宰相親至史院點檢修撰官紀一作記錄事迹內有不勤其事蹟一作惰官失職者奉行責罰其時政記起居注日曆等除今日以前積滯者不住追修外截自今後並令次月供報如稍遲滯許修撰官自至中書樞密院催請其諸司供報拖延及史院有所會問諸處不盡時報應致妨修纂者其當行手分並許史院牒開封府勾追嚴斷其日曆時政記起居注並乞更不進本所貴少修史職上存聖朝典法此乃臣之職事不敢不言謹具狀奏聞伏候勅旨

請駕不幸温成廟劄子至和二年

臣伏見今月八日聖旨疎決禁囚特行減降及軍士各有特支陛下聖慈本以興國寺奉安真宗皇帝御容有此恩旨而中外之議紛然不一皆云正月八日是温成皇后周年故有此特支疎決又見聖駕朝謁萬壽宮又云温成畫像在彼所以聖駕親臨蓋爲自去年追冊温成皇后之後朝廷每於典禮過及優崇遂致議者動皆疑惑今又聞來日聖駕幸奉先寺酌獻宜祖皇帝外議喧然又云温成皇后祠廟在彼伏以陛下聖德仁孝本爲祖宗神御以時酌獻不可使中外議者言陛下意在追念後宮寵愛託名以謁祖宗虧損聖德其事不細臣欲乞明日幸奉先寺酌獻畢更不臨幸温成祠廟以解中外之疑以止議者之說臣職忝侍從無所裨補聞外人議論不敢不言不惟臣有愛君之心合具陳述陛下舉動爲萬世法亦不可不慎取進止

論臺諫官言事未蒙聽允書至和二年

月日具官臣歐陽某謹昧死再拜上書於體天道欽文聰武聖神

孝德皇帝闕下臣聞自古有天下者莫不欲爲治君而常至於亂莫不欲爲明主而常至於昏者其故何哉患於好疑而自用也夫疑心動於中則視聽惑於外視聽惑則忠邪不分而是非錯亂是非錯亂則舉國之臣皆可疑盡疑其臣則必自用其所見夫以疑惑錯亂之意而自用則多失一有多字失則其國之忠臣必以理而爭之爭之不切則人主之意難回爭之切則激其君之怒心而堅其自用之意然後君臣爭勝於是邪佞之臣得以因隙而入希旨順意以是爲非以非爲是惟人主之所欲者從而助之夫爲人主者方與其臣爭勝而得順意之人樂其助己而忘其邪佞也乃與之并力以拒忠臣夫爲人主者拒忠臣而信邪佞天下無不亂人主無不昏也自古人主之用心非惡忠臣而喜邪佞也非惡治而好亂也非惡明而欲昏也以其好疑自用而與下爭勝也使爲人主者豁然去其疑心而回其自用之意則邪佞遠而忠言入忠言入則聰明不惑而萬事得其宜使天下尊爲明主萬世仰爲治君豈不臣主俱榮而樂哉與其區區自執而與臣下爭勝用心益勞而事益惑者相去遠矣臣聞書載仲虺稱湯之德曰改過不悛又戒湯曰自用則小成湯古之聖人也不能無過而能改過此其所以爲聖也以湯之聰明其所爲不至於繆戾矣然仲虺猶戒其自用則自古人主惟能改過而不敢自用然後得爲治君明主也臣伏見宰臣陳執中自執政以來不叶人望累有過惡招致人言而執中遷延尙玷宰府陛下憂勤恭儉仁愛寬慈堯舜之用心也推陛下之用心天下宜至於治者久矣而綱紀日壞政令日乖國日益貧民日益困流民滿野濫官滿朝其亦何爲而致此一作皆由陛下用相不得其人也近年宰相多以過失因言者罷去陛下不悟宰相非其人反疑言事者好逐宰相疑心一生視聽既惑遂成自用之意以謂宰相當由人主自去不可因言者而罷之故宰相雖有大惡顯過而屈意以容之彼雖惶恐自欲求去而屈意以留

之雖天災水旱饑民流離死亡道路皆不暇顧而屈意以用之其故非他直欲沮言事者爾言事者何負於陛下哉使陛下上不顧天災下不恤人言以天下之事委一不學無識詔邪很愎之執中而甘心焉言事者本欲益於陛下而反損聖德者多矣然而言事者之用心本不圖至於此也由陛下好疑自用而自損也今陛下用執中之意益堅言事者攻之愈切陛下方思有以取勝於言事者而邪佞之臣得以因隙而入必有希合陛下之意者將曰執中宰相不可以小事逐不可使小臣動搖甚者則誣言事者欲逐執中而引用他人陛下方患言事者上忤聖聰樂聞斯言之順意不復察其邪佞而信之所以拒言事者益峻用執中益堅夫以萬乘之尊與二三數言事小臣角必勝之力萬一聖意必不可回則言事者亦當知難而止矣然天下之人與後世之議者謂陛下拒忠言庇愚相以陛下爲何如主也前日御史論梁適罪惡陛下赫怒空臺而逐之而今日御史又復敢論宰相不避雷霆之威不畏權臣之禍此乃至忠之臣也能忘其身而愛陛下者也陛下嫉之惡之拒之絕之執中爲相使天下水旱流亡公私困竭而又不學無識憎愛挾情除改差繆取笑中外家私穢惡流聞道路阿意順旨專事逢君此乃詔上傲下懷戾之臣也陛下愛之重之不忍去之陛下睿智聰明羣臣善惡無不照見不應倒置如此直由言事者大切而激成陛下之疑惑爾執中不知廉恥復出視事此不足論陛下豈忍因執中上累聖德而使忠臣直士卷舌於明時也臣願陛下廓然回心釋去疑慮察言事者之忠知執中之過惡悟用人之非法成湯改過之聖遵仲虺自用之戒盡以御史前後章疏出付外廷議正執中之過惡罷其政事別用賢材以康時務以拯斯民以全聖德則天下幸甚臣以身叨恩遇職在論思意切言狂罪當萬死臣昧死再拜

論修河第一狀同前

右臣竊見朝廷近因臣寮建議欲塞商胡開橫壠回大河於故道已下三司候今秋興役見令京東計度物料次臣伏以國家興大役動大衆必先順天時量人力謀於其始而審然後必行計其所利者多乃能無悔伏見比年以來興役動一作動衆勞民費財不精謀慮於厥初輕信利害之偏說舉事之始一作初既已倉惶羣議一搖尋復悔罷臣不敢遠引他事上煩聖聰只如往年河決商胡是時執政之臣不慎計慮遽謀修塞科配一千八百萬梢芟播動大路一百有餘州一有軍字官吏催驅急若星火民庶愁苦盈於道塗或物已輸官或人方在路未及興役遽已罷修虛費民財爲國斂怨舉事輕脫爲害若斯雖既往之失難追而可鑒之蹤未遠今者又聞復有修河之役聚三十萬人之衆開一千餘里之長河計其所用物力數倍往年當此天災歲旱之時民困國貧之際不量人力不順天時臣知其有大不可者五蓋自去秋以及今春半天下苦旱而京東尤甚河北次之國家常務安靜振卸之猶恐饑民起而爲盜何況於此兩路聚大衆興大役此其必不可者一也河北自恩州用兵之後繼以凶年人戶流亡十失八九數年以來人稍一作稍稍歸復然死亡之餘所存無一作者幾瘡痍未斂物力未完一作充今又遭此旱歲京東自去冬無雨雪麥不生苗已及莫春粟未布種不惟目下乏食兼亦向去無望而欲於此兩路興三十萬人之役若別路差夫則遠處難爲赴役就河便近則此兩路力所不任此其必不可者二也臣伏見往年河決滑州會議修塞當時公私事力未如今日貧虛然猶收聚物料誘率民財數年之間方能興役況今國用方乏民力方疲且合商胡塞大決之洪流此自是一大役也鑿橫壠開久廢之故道此又一大役也自橫壠至海一千餘里埽岸久已廢壞頓須修繕此又一大役也往年公私有力之時興一大役尚須數年今併三大役倉卒興爲一無爲字於災旱一作於旱歲貧虛之際此其必不可者三也就令

商胡可塞故道可回猶宜重一作審察天時人力之難為何況商胡未必可塞故道未必可回者哉臣聞繇障一作湮洪水九年無功禹得洪範五行之書知水趨一作潛下之性乃因水之流疏決就下而水患乃息然則以大禹之神功不能障塞其流但能因而疏決爾今欲逆水之性障而塞之奪洪河之正流幹以人力而回注此大禹之所不能此其必不可者四也橫壠湮塞已二十年商胡決流一作流決又亦數歲故道已塞一作平而難整安流已久而難回昨聞朝廷會遣故樞密直學士張奎計度功料極大近者再行檢計減得功料全少功料少則所開淺狹淺狹則水勢難回此其必不可者五也臣伏見國家累歲災譴甚多其於京東變異尤大地貴安靜動而有聲巨嶠山摧海水搖蕩如此不止僅乎十年天地警戒必不虛發臣謂變異所起之方尤宜加意防懼今乃欲於凶旱之年聚三十萬之大衆於變異最大之方臣恐地動山搖災禍自此而始一作自茲而發也方今京東赤地千里饑饉之民正苦天災又聞河役將動往往伐桑拆一作毀屋無復生計流亡盜賊之患不可不虞欲望聖慈特降德音速罷其事當此凶一作荒歲務安人心徐詔有司審詳利害縱令河道可復乞候一作俟豐年餘力漸次興為臣實庸愚本無遠見得於外論不敢不言謹具狀奏聞

論雕印文字劄子至和二年

臣伏見朝廷累有指揮禁止雕印文字非不嚴切而近日雕板尤多蓋為不曾條約書鋪販賣之人臣竊見京城近有雕印文集二十卷名為宋文者多是當今論議時政之言其首篇是富弼往年讓官表其間陳北虜事宜甚多詳其語言不可流布而雕印之人不知事體竊恐流布漸廣傳入虜中大於朝廷不便及更有其餘文字非後學所須或不足為人師法者並在編集有誤學徒臣今欲乞明降指揮下開封府訪求板本焚毀及止絕書鋪今後如有不經官司詳定妄

行雕印文集並不得貨賣許書鋪及諸色人陳告支與賞錢貳佰貫文以犯事人家財充其雕板及貨賣之人並行嚴斷所貴可以止絕者今取進止

奏議卷第十二

翰苑

論使臣差遣劄子至和二年兼判三班院

臣勘會本班見管使臣八千一百一十二員自古濫官未有如此之多也臣遂將簿籍根磨增添數目只自皇祐二年終至今實四年半之內自借職以上增添二千八十五員於中近日增添併多只自皇祐五年終至今年六月一年半之內增四百九員殿侍猶不在數蓋由曲恩濫賞臨時無節以日計月所積遂多率計一歲常增四百五十員若不塞其濫源則更三五年後不勝其弊矣於今裁損已為大晚若更增添則四海之廣不能容濫官天下物力不能給俸祿矣臣今略舉入仕僥倖者二事乞先賜指揮釐革其餘見在者既不可減損惟其入仕之源欲乞令當政大臣早賜擘畫所貴不為將來之患所有臣擘畫二事今具畫一如後

一自來諸皇親宅前勾當人除郡王宮殿侍年深有例送三班院差使外其餘宮院殿侍及客司書表宅案等別無恩例只自慶曆八年初立年限上自郡王下至觀察使以下應緣皇親宅前殿侍客司書表宅案等並只勾當五年便送三班差使等第年限轉充借奉職此入士之源最為僥倖者臣今欲乞應郡王已下宅前殿侍客司書表宅案勾當及五年者更不送三班只令在宅依舊勾當所有合轉殿侍至借職年限並依慶曆八年密院劄子指揮如此則皇親勾當人不妨恩澤只是免得諸宮院送納三班後續補人數兼諸宮院若得依舊勾當並是諳熟委使之入又三班減得人數甚為利便
一百司人吏舊來出職皆有職名年限近年多候轉及職名及年限未滿多乞情願就近下恩澤或僥求因人奏帶及抽差勾當敘勞酬獎及合作選人者情願就班行之類臣今乞一切止絕

右臣所起請只是因述濫官略陳此二事如九臣所請乞下三班院與勾當臣寮同共鋪陳條貫立定新制奏乞朝廷降下施行取進止

論罷修奉先寺等狀至和二年

右臣近會言為京師土木興作處多乞行減罷尋準勅差臣與二司同共相度減定續具奏聞次今又聞聖旨下三司重修慶基殿及奉先寺屋宇臣伏見近年政令乖錯紀綱隳頽上下因循未能整緝惟務崇修祠廟廣興土木百役俱作無一日暫停方今民力困貧國用窘急小人不識大計不思愛君但欲廣耗國財務為己利恣侵欺於官物圖酬獎之功勞託名祖宗張大事體况諸處神御殿當蓋造之初務極崇奉棟宇堅壯莫不精嚴雖數百年未必損動近年以來不住修換昨開先殿只因兩柱損遂換一十三柱前後差官檢計朝廷並不取信只憑最後之言遂至廣張物一作功料蓋緣廣張得物料即多圖酬獎恩澤一作廣得功料大即圖酬獎恩澤多竊以崇奉祖宗禮貴清淨今乃頗有遷徙輕瀆威靈要其所歸止為小人圖利臣見自古人君好興土木者自春秋史記歷代以來並皆書為過失以示萬世今小人圖一旦之利黷祖宗之威靈置一作致人主於有過之地誰忍為之臣實痛惜臣因準勅減定於三司略見大槩開先殿初因兩條柱損今所用材植物料共一萬七千五百有零睦親宅神御殿所用物料又八十四萬七千又有醴泉福勝等處物料不可悉數此外軍營庫務合行修造者又有百餘處使厚地不生他物惟產木材亦不能供此廣費自古王者尊祖事神各有典禮不必廣興土木然後為能臣竊見累年天災自玉清昭應洞真上清鴻慶壽寧祥源會靈七宮開寶興國兩寺塔殿並皆焚燒蕩盡是以見天意厭土木之華侈為陛下惜國力民財謹戒丁寧前後非一陛下與其廣興土木以事神不若畏懼天戒而修省其已興作者既不可及及字一作止其未修者宜速寢停况睦親神御殿於禮不宜作其事甚

明別無禮典講求乞更不下太常便行寢罷其慶基殿如的有損漏只令三司差官整補不得理爲勞績其奉先寺乞勒寺家自修今垂拱殿是陛下當坐之處近聞爲無一作未有梁木且止未修諸皇親自火燒居宅後至今寄寓他所陛下尊爲天子無梁木修一殿富有四海而皇族無屋可居蓋爲將良材美木俯徇小人並於不急處枉費遂致合行修造處却至乏材伏願陛下進思累次大火常發於土木最威處凡國家極力興修者火必盡焚一作必盡焚除且天厭土木而焚之又欲興崇土木以奉之此所以福應未臻而災譴屢降也伏乞上思天戒下察人言雖狂而實忠天戒甚明而不遠伏惟陛下聖德恭儉不樂遊畋凡所興修皆非嗜好但以難違小人一時之請自取青史萬世之譏實爲陛下惜之伏望聖慈一作聖廣賜裁擇謹具狀奏聞伏候勅旨

論修河第一狀至和二年

臣伏見學士院集兩省臺諫官議修河事未有一定之論蓋由賈昌朝欲復故道李仲昌請開六塔互執一說莫知孰是以臣愚見皆謂不然言故道者未詳利害之原一作源述六塔者近乎欺罔之繆何以言之今謂故道可復者但見河北水患而欲還之京東然不思天禧以來河水屢決之因所以未知故道有不可復之勢此臣故謂未詳利害之原也若言六塔之利者則不攻而自破矣且開六塔既云減得大河水勢然今恩冀之患何緣尙告危急此則減水之利虛妄可知開六塔者又云可以全同大河使復橫壠故道見今六塔只是分減之水下流無歸已爲濱棣德博之患若全同大河以入六塔則其害如何此臣故謂近乎欺罔之繆也臣聞河本一作之泥沙無不淤之理淤澱之勢常先下流下流淤高水行不快乃自上流低下處決此其常勢也然避高就下水之本性故河流已棄之道自是難復臣不敢遠引書史廣述河源只以今所欲復之故道言天禧以來屢

決之因初天禧中河出京東水行於今所謂故道者水既一作流乎淤澱乃於滑州天臺埽決尋而修塞水復故道未幾又於滑州南鐵狗廟決今所謂龍門埽者也其後數年又議修塞水令復故道已而又於王楚埽決所決差小與故道分流然而故道之水終以壅淤故又於橫壠大決是則決河非不能力塞故道非不能力復不久終必決於上流者由故道淤高水不能行故也及橫壠既決水流就下所以十餘年間河未爲患至慶曆三四年橫壠之水又自下流先淤是時臣爲河北轉運使海口已淤一百四十餘里其後遊金赤三河相次又淤下流既梗乃又於上流商胡口一作復決然則京東橫壠兩河故道一無二字皆是下流淤塞河水已棄之高地京東故道屢復屢決理不可復其驗甚明則六塔所開故道之不可復不待言而易知臣聞議者計度京東故道功料止云銅城已上地高不知大抵東去皆高而銅城已上乃特高耳其東比銅城已上則似低比商胡已上則實高也若云銅城已東地勢斗下則當日水流一作決宜決銅城已上何緣而頓淤橫壠之口亦何緣而大決也然則兩河故道既皆不可爲則河北水患何爲而可去臣聞智者之於事有一有所字不能必則一作則必較其利害之輕重擇其害少者而爲之猶勝害多而利少何况有害而無利此三者可較而擇也臣見往年商胡初決之時議欲修塞計用一千八百萬稍安料配六路一百有餘州軍今欲塞者乃往年之商胡必須用往年之物數至於開鑿故道張奎元計功料極大後來李參等減得全少猶用三十萬人然一有而字欲以五十步之狹容大河之水此可笑也又欲增一夫所開三赤之方倍爲六尺且闊厚三尺而長六尺已是一倍之功在於人力已爲勞苦若云六尺之方以開方法算之乃八倍之功此豈人力之所勝是則前功浩大而難興後功雖小而不實大抵塞商胡開故道凡二大役皆困國而勞人所舉如此而欲開難復屢決已驗之故道使其

虛費而商胡不可塞故道不可復此所謂有害而無利者也就使幸而暫塞暫復以紓目前之患而終於上流必決如龍門橫壩之比重以困國勞人此所謂利少而害多一有者字也若六塔者於大河有減水之名而無減水之實今下流所散爲患已多若全同大河以注之則濱棣德博河北所仰之州不勝其患而又故道淤澁上流必有他決之虞此直有害而無利耳是一有則字智者之不爲也今若因水所在一作注增治堤防疏其下流浚以入海則可無決溢散漫之虞今河所一作北歷數州之地誠爲患矣堤防歲用之夫誠爲勞矣與其虛費天下之財虛舉大衆之役而不能成功終不免爲數州之患勞歲用之夫則此所謂害少者乃智者之所擇也大抵今河之勢負三決之虞復故道上流必決開六塔上流亦決今河下流若不浚使入海則上流亦決臣請選知水利之臣就其下流求其入海之路而浚之不然下流梗澁則終虞上決爲患無涯臣非知水者但以今事目可驗者而較之耳言狂計愚不足以備聖君博訪之求此大事也伏乞下臣之議廣謀於衆而裁擇之謹具狀奏聞伏候勅旨

論修河第三狀一作論大塔河至和三年

右臣伏見朝廷定議開修六塔河口回水入橫壩故道此大事也中外之臣皆知不便而未有肯爲國家極言其利害者何哉蓋其說有三一曰畏大臣二曰畏小人三曰無奇策今執政之臣用心於河事亦勞矣初欲試十萬人之役以開故道既又捨故道而修六塔未及興役遽又罷之已而終爲言利者所勝今又復修然則其勢難於復止也夫以執政大臣銳意主其事而又有不可復止之勢固非一人口舌可回此所以雖知不便而罕肯言也李仲昌小人利口僞言衆所共惡今執政之臣既用其議必主其人且自古未有無患之河今河漫恩冀目下之患雖小然其患已形回入六塔將來之害必一作雖大而其害未至一作止夫以利口小人爲大臣所主欲與之爭未

形之害勢必難奪就使能奪其議則言者猶須獨任怨冀爲患之責使仲昌得以爲辭大臣得以歸罪此所以雖知不便而罕敢言也今執政之臣用心太過不思自古無不一作無患之河直欲使河不爲患若得河不爲患雖竭人力猶當爲之况聞仲昌利口詭辨謂費物少而用功不多不得信爲奇策於是決意用之今言者謂故道既不可復六塔又不可修詰其如何則又無奇策以取勝此所以雖知不便而罕肯言也衆人所不敢言而臣今獨敢言者臣謂大臣非有私仲昌之心也直欲與利除害爾若果知其爲患一作害愈大則豈有不同者哉至於顧小人之後患則非臣之所慮也且事欲一作貴知利害權重輕有不得已則擇其害少而患輕者爲之此非明智之士不能也况治水本無奇策相地勢謹隄防順水性之所趨爾雖大禹不過此也夫所謂奇策者不利則大害若循常之計雖無大利亦不至大害此明智之士善擇利者之所爲也今言修六塔者奇策也然終不可成而爲害愈大言順水治堤者常談也然無大利亦無大害不知爲國計者欲何所擇哉若謂利害不可必但聚大衆興大役勞民困國以試奇策而僥倖於有成者臣謂雖執政之臣亦未必肯爲也臣前已具言河利害甚詳而未蒙採聽今復略陳其大要惟陛下詔計議之臣擇之臣謂河水未始不爲患今順已決之流治堤防於恩冀者其患一而遲塞商胡復故道者其患二而速開六塔以回今河者其患三而爲害無涯自河決橫壩以來大名金堤埽歲歲增治及商胡再決而金堤益大加功獨恩冀之間自商胡決後議者貪建塞河之策未嘗留意於堤防是以今河水勢一無勢字浸溢今若專意併力於恩冀之間謹治隄防則河患可禦不至於一作爲大害所謂其患一者十數年間今河下流淤塞則上流必有決處此一患而遲者也今欲塞商胡口使水歸故道治堤修埽功料浩大勞人費物困弊公私此一患也幸而商胡可塞故道復歸高淤難行不過

一二年間上流必決此二患而速者也今六塔河口雖云已有上下約然全塞大河正流爲功不小又開六塔河道治二千餘里堤防移一縣兩鎮計其功費又大於塞商胡數倍其爲困弊公私不可勝計此一患也幸而可塞水入六塔而東橫流散溢濱棣博與齊州之界咸被其害此五州者素號富饒河北一路財用所仰今引水注之不惟五州之民破壞田產河北一路坐見貧虛此二患也三五年間五州凋弊河流注溢久又淤高流行梗一作艱難則上流必決此三患也所謂爲害而無涯者也今爲國謀計者本欲除一患而反就三患此臣所不論也至如六塔不能容大河橫壟故道本以高淤難行而商胡決今復驅而注之必橫流而散溢自瀘至海二千餘里堤埽不可卒修修之雖成又一作必不能捍水如此等事甚多士無愚智皆所共知不待臣言而後悉也臣前未奉使契丹時已嘗具言故道六塔皆不可爲惟治堤順水爲得計及奉使往來河北詢於知水者其說皆然雖恩冀之人今被水患者亦知六塔不便皆願且治恩冀隄防爲是下情如此誰爲上通臣既知其詳豈敢自默伏乞聖慈特諭宰臣使更審利害速罷六塔之役差替李仲昌等不用選一二精幹之臣與河北轉運使副及恩冀州官吏相度隄防併力修治則今河之水必不至爲大患且河水天災非人力可回惟當順導防捍之而已不必求奇策立難必之功以爲小人僥冀恩賞之資也况功必不成後悔無及者乎臣言狂計愚惟陛下裁擇

論狄青劄子至和三年

臣聞人臣之能盡忠者不敢避難言之事人主之善馭下者常欲聞難言之言然後下無隱情上無一作不墜聽姦宄不作禍亂不生自古固有伏藏之禍未發之機天下之人皆未知而有一人能獨一作獨能言之人主又能聽而用之則銷患於未萌轉禍而爲福者有矣若夫天下之人共知而獨一作獨其人主之不知者此莫大之患也

今臣之所言者乃天下之人皆知而惟陛下未知也今士大夫無貴賤相與語於親戚朋友下至庶民無愚智相與語於閭巷道路而獨不以告陛下也其故何哉蓋其事伏而未發言者難於指陳也臣竊一作伏見樞密使狄青出自行伍號爲武勇自用兵陝右已著名聲及捕賊廣西又薄立勞效自其初掌機密進列大臣當時言事者已爲不便今三四年間雖未見其顯過然而不幸有得軍情之名推其所因蓋由軍士本是小人面有黥文樂其同類見其進用自言我輩之內出得此人既以爲榮遂相悅慕加之青之事藝實過於人比其輩流又粗有見識是以軍士心共服其材能國家從前難得將帥經略招討常用文臣或不知軍情或不閑訓練自青爲將領既能自以勇力服人又知訓練之方頗以恩信撫士以臣愚見如青所爲尙未得古之名將一二但今之士卒不慣見如此等事便謂須是我同類中人乃能知我軍情而以恩信撫我青之恩信亦豈能徧及於人但小人易爲扇誘所謂一犬吠形百犬吠聲遂皆翕然喜共稱說且武臣掌機密而得軍情不唯於國家不便亦於其身未必不爲害然則青之流言軍士所喜亦其不得已而勢使之然也臣謂青不得已而爲人所喜亦將不得已而爲人所禍者矣爲青計者宜自一作自宜退避事權以止浮議而青本武人不知進退近日以來訛言益甚或言其身應圖讖或言其宅有火光道路傳說以爲常談矣而惟陛下猶未聞也且唐之朱泚本非反者倉卒之際爲軍士所迫爾大抵小人不能成事而能爲患者多矣此雖自取族滅然爲德宗之患亦豈小哉夫小人陷於大惡未必皆其本心所爲直由漸積以至蹉跌而時君不能制患於未萌爾故臣敢昧死而言人之所難言者惟願陛下早聞而省察之耳如臣愚見則青一常才未有顯過但爲浮議所喧勢不能容爾若如外人衆論則謂青之用心有不可知者此臣之所不能決也但武臣掌機密而爲軍士所喜自於事體不便不計青

之用心如何也伏望聖慈深思遠慮戒前世一作後禍亂之迹制於未萌密訪大臣早決宸斷罷青機務與一外藩以此觀青去就之際心迹如何徐察流言可以臨事制變且二府均勞逸而出入亦是常事若青之忠孝出處如一事權既去流議漸消一作息則其誠節可明可以永保終始夫言未萌之患者常難於必信若仁患之已萌則又言無及矣臣官爲學士職號論思聞外議喧沸而事繫安危臣言狂計愚不敢自默取進止月餘青罷樞密知陳州

奏議卷第十三

奏議卷第十四 集一百十

翰苑

論水災疏至和二年

七月六日翰林學士朝散大夫尚書吏部郎中知制誥充史館修撰判太常寺兼禮儀事輕車都尉賜紫金魚袋臣歐陽某謹昧死再拜上疏于體天道欽文聰武聖神孝德皇帝陛下臣伏覩近降詔書以雨水為災許中外臣寮上封言事有以見陛下畏天愛人恐懼修省之意也竊以雨水為患自古有之然未有水入國門大臣奔走滄浸社稷破壞都城者此蓋天地之變也至於王城京邑浩如波湖衝溺奔逃號呼晝夜人畜死者不知其數其幸而免者屋宇摧塌無以容身縛棧露居上雨下水壘疊老幼狼籍于天街之中又聞城外墳冢亦被浸注棺槨浮出骸骨漂流此皆聞之可憫見之可憫生者既不安其室死者又不得其藏此亦近世水災未有若斯之甚者此外四方奏報無日不來或云閉塞城門或云衝破市邑或云河口决千百步闊或云水頭高三四丈餘道路隔絕田苗蕩盡是則大川小水皆出為災遠方近畿無不被害此陛下所以警一作驚懼莫大之變隱惻至仁之心廣為諮詢冀以消復竊以天人之際影響不差未有不召而自至之災亦未有已出而無應之變其變既大則其憂亦深臣愚謂非小小有為可以塞此大異也必當思宗廟社稷之重察安危禍福之機追已往之闕失防未萌之患害如此等事不過一二而已自古人君必有儲副一作嗣下同所以承宗社之重而不可闕者也陛下臨御三十餘年而儲嗣未立此久闕之典也近聞臣寮多以此事為言大臣亦嘗進議陛下聖意久而未決而庸臣愚士知小忠而不知大體者因以為異事遂生嫌疑之論此不思之甚也且自古帝王有子至三二十人者甚多材高年長羅列於朝者亦衆然為其君父者莫不皆享無窮之安豈有所嫌而斥其子耶若陛下鄂王豫

王皆在至今則儲官之建久矣世之庸人偶見陛下久無皇子忽聞此議遂以云云爾且禮曰一人元良萬國以正蓋謂定天下之根本上承祖宗之重亦所以絕臣下之邪謀自古儲嗣所以安人主也若果如庸人嫌疑之論則是常無儲嗣則人主安有儲嗣則人主危此臣所謂不思之甚也臣又見自古帝王建立儲嗣既以承宗廟之重又以為國家美慶之事故每立太子則不敢專享其美必大赦天下凡為人父後者皆被恩澤所以與天下同其慶喜然則非惡事也漢文帝初即位之明年羣臣再三請立太子文帝再三謙讓而後從之當時羣臣不自疑而敢請漢文帝亦不疑其臣有二心者臣主之情通故也五代之主或出武人或出夷狄如後唐明宗尤惡人言太子事羣臣莫敢正言有何澤者嘗上書乞立太子明宗大怒謂其子從榮曰羣臣欲以汝為太子我將歸老於河東由是臣下更不敢言然而一有漢字文帝立太子之後享國長久為漢太宗是則何害其為明主也後唐明宗儲嗣不早定而秦王從榮後以舉兵窺朝陷于大禍後唐遂亂此前世之事也況聞臣寮所請但欲擇宗室為皇子爾未即以為儲貳也伏惟陛下仁聖聰明洞鑒今古必謂此事國家大計當重慎而不可輕發所以遲之耳非惡人言而不欲為也然朝廷大議中外已聞不宜久而不決昨自春首以來陛下服藥於內一無二字大臣早夜不敢歸家飲食醫藥一無十字侍於左右如人子之侍父自古君臣未有若此之親者也下至羣臣士庶婦女嬰孩晝夜禱祈填咽道路發於至誠不可禁止以此見臣民盡忠蒙陛下之德厚愛陛下之意深故為陛下之慮遠也今之所請天下臣民所以為愛君計也陛下何疑而不從乎中外之臣既喜陛下聖躬康復又欲見皇子出入宮中朝夕問安侍膳於左右然後文武羣臣奉表章為陛下賀辭人墨客稱述本支之盛為陛下歌之頌之豈不美哉伏願一作望陛下出於聖斷擇宗室之賢者依古禮文且以為子未用立

爲儲副也既可以徐察其賢否亦可以俟皇子之生臣又見樞密使狄青出自行伍遂掌樞密始初議者已爲不可今三四年間外雖未見過失而不幸有得軍情之名且武臣掌國機密而得軍情豈是國家之利臣前有封奏其說甚詳具述青未是奇材但於今世將率中稍可稱耳雖其心不爲惡不幸爲軍士所喜深恐因此陷青以禍而爲國家生事欲乞且罷青樞密任以一州旣以保全青亦爲國家消未萌之患蓋緣軍中士卒及閭巷人民以至士大夫間未有不以此事爲言者惟陛下未知之爾臣之前奏乞留中而出自聖斷若陛下猶以臣言爲疑乞出臣前奏使執政大臣公議此二者當今之急務也凡所謂五行災異之學臣雖不深知然其大意可推而見也五行傳曰簡宗廟則水爲災陛下嚴奉祭祀可謂至矣惟未立儲貳易曰主器莫若長子殆此之警戒乎至於水者陰也兵亦陰也武臣亦陰也此推類而易見者天之謹告苟不虛發惟陛下深思而早決庶幾可以消弭災患而轉爲福應也臣伏觀一作讀詔書曰悉心以陳無有所諱故臣敢及之若其他時政之失必有羣臣應詔爲陛下言者臣言狂計愚惟陛下裁擇臣昧死再拜

再論水災狀同前

右臣伏觀近降手詔以水災爲變上軫聖憂旣一人形罪己之言宜百辟無違安之意而應詔言事者猶少亦未聞有所施行豈言者不足採歟將遂無人言也豈有言不能用歟然則上有詔而下不言下有言而上不用皆空言也臣聞語曰應天以實不以文動民以行不以言臣近有實封應詔竊謂水入國門大臣奔走滄溟社稷破壞都城此天地之大變也恐非小有所爲可以消弭因爲陛下陳一二大計而言狂計愚不足以感動聽覽臣日夜思維方今之弊紀綱之壞非一日政事之失非一端水災至大天譴至深亦非一事之所致災謹如此而禍患所應於後者又非一言而可測是則已往而當救之

弊甚衆將來而可憂之患無涯亦非獨責二三大臣所能取濟况自古天下之治必與衆賢共之也詩曰濟濟多士文王以寧書載堯舜之朝一時同列者夔龍稷契之徒二十餘人此特其大者爾其百工在位莫不皆賢也今欲救大弊弭大患如臣前所陳一二大計旣未果爲而又不思衆賢以濟庶務則天變何以塞人事何以修故臣復敢進用賢之說也臣材識愚暗不能知人然衆人所知者臣亦知之伏見龍圖閣直學士知池州包拯清節美行著自貧賤謙言正論聞於朝廷自列侍從良多補益方今天災人事非賢罔乂之時拯以小故棄之遐遠此議者之所惜也祠部員外郎直史館知襄州張瓌靜默端直外柔內剛學問通達似不能言者至其見義必爲可謂仁者之勇此朝廷之臣非州郡之才也祠部員外郎崇文院檢討呂公著故相夷簡之子清靜寡欲生長富貴而淡於榮利識慮深遠文學優長皆可過人而喜自晦默此左右顧問之臣也太常博士羣牧判官王安石學問文章知名當世守道不苟自重其身論議通明兼有時才之用所謂無施不可者凡此四臣者難得之士也拯以小過棄之其三人者進退與衆人無異此皆爲世所知者猶如此臣故知天下之廣賢材淪沒於無聞者不少也此四臣者名迹已著伏乞更廣詢採亟加進擢置之左右必有裨補凡臣所言者乃願陛下聽其言用其才以濟時艱爾非爲其人私計也若量器恩澤稍陞差遣之類適足以爲其人累耳亦非臣薦賢報國之本心也臣伏見近年變異非止水災謹告丁寧無所不有董仲舒曰國家將有失道之敗而天乃先出災害以謹告之不知自省又出怪異以警懼之尙不知變而傷敗乃至斯言極矣伏惟陛下切詔大臣深圖治亂廣引賢俊與共謀議未有衆賢並進而天下不治者此亦救災弭患一端之大者臣又竊見京東京西皆有大水並當存卹而獨河北遣使安撫兩路遂不差人或云就委轉運使此則但虛爲行遣爾兩路運司只見河北遣

使便認朝廷之意有所重輕以謂不遣使路分非朝廷憂恤之急者兼又放稅賑救皆耗運司錢一作用物於彼不便兼又運使未必皆得人其才未必能救災卹患又其一司自有常行職事亦豈能專意撫綏故臣以爲虛作行遣爾伏乞各差一使於此兩路安撫雖未能大段有物賑濟至於興利除害臨時措置更易官吏詢求疾苦事既專一必有所得與就委運司其利百倍也又聞兩浙大旱赤地千里國家運米仰在東南今年災傷若不賑濟則來年不惟民饑國家之物亦自闕供此不可不留心也竊聞三司今歲京師糧米已有二年備準外猶有三百五十萬餘未漕之物今年東南既早則來年少納上供此未漕之米誠不可不惜然少輟以濟急時亦未有所闕欲下三司勘會若實如臣所聞則乞量輟五七十萬石物與兩浙一路令及時賑救一十三州只作借貸他時米熟不妨還官然所利甚博也此非弭災之術亦救災之一端也臣愚狂妄伏望聖慈特賜裁擇謹具狀奏聞伏候勅旨

論水入太社劄子同前

臣所領太常寺累得郊社勾當人狀申爲雨水滄浸太社太稷壇四面及屋宇牆壁摧塌乞行修整尋一無尋字會具狀申奏及累牒三司至今未見有人興功整頓但聞行路之人咨嗟傳說言國家社稷之壇損壞如此臣遂躬親往詣太社及齋宮裏外觀當見二壇浸在水中四神門及闕庭齋宮屋宇並各倒側摧圯并自來所植樹木亦有僵仆與瓦石土木縱橫狼籍於水中四面並無遮映使巷陌人馬往來皆見竊以宗廟社稷禮貴尊嚴今四面並無遮映使巷陌人馬往來褻瀆如此而又積水圍浸瓦木土石狼籍其中臣初到彼旁側居民見臣來觀當亦有對臣咨嗟者又見有數人兵士在彼辱水問得只有二十三人仍是今日纔方差到既無家事辱水又無官員監督社稷之重豈宜如此竊以水入社稷谷罰豈輕陛下仁聖寬慈未有

過失天之謹告必有所因伏乞特諭執政之臣退省己失之事各思警懼速務修完仍較量事體輕重後先以社稷爲國家大事不與軍營倉卒一例行遣乞專差大臣一員充修太社太稷使并差幹事諸司使及使臣一兩員監役及差兵匠併力先且決洩辱出積水築起四面垣牆不使路人車馬往來褻瀆然後整頓諸屋舍等以稱陛下尊嚴社稷上畏天戒之意臣以職事不敢不言取進止差知禮院王起三司判官王輝監修提舉

乞添上殿班劄子嘉祐元年十月

臣伏見陛下自今春服藥已來羣臣無得進見今聖體康裕日御前後殿視朝決事中外臣庶無不感悅然侍從臺諫省府臣寮皆未曾一作能得上殿奏事今雖邊鄙寧靜時歲豐稔民無疾癘盜賊不作天下庶務粗循常規皆不足上煩聖慮陛下可以游心清閑頤養聖體然侍從臺諫省府臣寮皆是陛下朝夕左右論思獻納委任之臣豈可擴隔時月不得進見於前不惟亦有天下大務理當論述者至於臣子之於君父動經年一作半歲不得進對豈能自安一有臣字今欲望聖慈每遇前後殿坐日中書樞密院退後如審官三班銓司不引人則許臣寮一班上殿假以頃刻進瞻天威不勝臣子區區之願也如允臣所請乞下閣門施行仍約束上殿臣寮不得將干求恩澤訴理功過及細碎閑慢等事上煩聖聰或乞約定上殿時刻所貴不煩久坐伏候勅旨其後上殿添一班

論賈昌朝除樞密使劄子一作論某人交結宦官狀嘉祐元年十一月

臣伏見一作親近降制書除賈昌朝爲樞密使旬日以來中外人情莫不疑懼縉紳公議一作論漸以沸騰蓋緣一作由昌朝稟性回邪執心傾險頗知經術能文一作緣飾姦言好一作善爲陰謀以陷害良士小人朋附者衆皆樂爲其用前在相位一作政事累害善人所

以聞其再來望風恐畏一作畏恐陛下聰明仁聖勤儉憂勞每於用人尤所審慎然而自古毀譽之言未嘗不並進於前而聽察一作納之際人主之所難也臣以謂能知聽察之要則不失之矣何謂其要在先察毀譽之人一作臣若所譽者君子所毀者小人則不害其進用矣若君子非之小人譽之則可知其人不可用矣一作小人譽之君子非之則其人可知其不可用矣今有毅然立於朝危言讜一作正論不阿人主不附權臣其直節忠誠為中外素所稱信者君子也如此等人一無四字皆以昌朝為非矣宦官宮女左右使令之人往往小人也如此等人一無四字皆以昌朝為是矣陛下察此則昌朝為人可知矣今陛下之用昌朝與執政大臣謀而用之乎與立朝忠正之士一作臣謀而用之乎與左右近習之臣一作真宦官左右之人謀而用之乎或不謀於臣下斷自聖心而用之乎昨聞昌朝陰結宦豎構造事端謀動大臣以圖進用若陛下與執政大臣謀之則大臣勢一作自處嫌疑必難啓口若立朝忠正之士則無不以為非矣其稱譽昌朝一作其所稱信以為可用者不過宦官左右之人爾陛下用昌朝為天下而用之乎為左右之人而用之乎臣伏思一作陛下必不為左右之人而用之也然左右之人謂之近習朝夕出入進見無時其所讒諛能使人主不覺其漸昌朝善結宦官人人喜為稱譽朝一人進一言暮一人進一說無不稱昌朝之善者一有使字陛下視聽漸熟遂簡在于聖心及將用之時則不必與謀一有識字也蓋稱薦有漸久已熟于聖聰三字一作於聽矣是則陛下雖斷自聖心不謀臣下一作於人而用之亦左右之人積漸稱譽之力也陛下常患近歲以來一無二字大臣體輕連為言事者彈擊蓋由用非其人不叶物議而然也今昌朝身為大臣見事不能公論乃結交中貴因內降以起獄一有訟字以此規圖進用竊一作今聞臺諫方欲論列其過惡而忽有此命命字一作差除是以中外疑懼物論喧

一作沸騰也今昌朝未來議論一作外議已如此則使其在位一作若使居其位必不免言事者上煩聖聽若不爾則昌朝得遂一作遂得其志傾害善人壞亂朝政一作事體必為國家生事臣愚欲望聖慈一作臣願聖聽抑左右陰薦之言採縉紳公正一作議之論一作說早一作速罷昌朝還其舊鎮一作任則天下幸甚臣官為學士職號論思見聖心求治甚勞而一日用人偶失而外廷物議如此既有見聞合思裨補取進止

舉留胡瑗管勾太學狀同前

右臣伏見新除國子監直講胡瑗充天章閣侍講有以見聖恩獎崇儒學褒勸經術之臣也然臣等竊見國家自置太學十數年間生徒日盛常至三四百人自瑗管勾太學以來諸生徒服其德行遵守規矩一作內二百餘人是瑗一作皆是胡瑗所教然則學業有成非止生徒之幸庠序之盛亦自一無自字是朝廷一有之字美事今瑗既升講筵遂去太學竊恐生徒無依漸以分散竊以學校之制自昔難興惟唐太宗時生員最多史冊書之以為盛美其後庠序廢壞至於今日始復興起若一旦分散誠為可惜也一作誠可惜矣臣等欲望聖慈特令胡瑗同勾當國子監或專一作兼管勾太學所貴生徒不至分散伏候勅旨

薦布衣蘇洵狀嘉祐五年

右臣猥以庸虛叨塵侍從無所裨補常愧心顏竊慕古人薦賢推善之意以謂為時得士亦報國之一端往時自國家下詔書戒時文風勵學者以近古蓋自天聖迄今二十餘年通經學古履忠守道之士所得不可勝數而四海之廣不能無山巖草野之遺其自重者既伏而不出故朝廷亦莫得而聞此乃如臣等輩所宜求而上達也伏見眉州布衣蘇洵履行淳一作純固性識明達亦嘗一舉有司不中遂

退而力學其論議精於物理而善識變權文章不爲空言而期於有用其所撰權書衡論機策二十篇辭辨閑偉博於古而宜於今實有用之言非特能文之士也其人文行久爲鄉閭所稱而守道安貧不營仕進苟無薦引則遂棄於聖時其所撰書二十篇臣謹隨狀上進伏望聖慈下兩制看詳如有可採乞賜甄錄謹具狀奏聞伏候勅旨

舉梅堯臣充直講狀嘉祐元年

右臣等忝列通班無裨聖治知士不薦咎在蔽賢伏見太常博士梅堯臣性純一作淳行方樂道守節辭學優贍經術通明長於歌詩得風雅之正雖知名當時而不能自達竊見國學直講見闕二員堯臣年資皆應選格欲望依孫復例以補直講之員必能論述經言教導學者使與國子諸生歌詠聖化千庠序以副朝廷育材之美如後不如舉狀臣等並甘同罪

舉布衣陳烈充學官劄子嘉祐元年

臣伏見國家崇建學校近年以來太學生徒常至三四百人此朝廷感美之事數百年來未嘗有也然而教導之方必慎其選其進德修業必有篤行君子可以不言而化者使居其間以爲學者師法庶幾內修其實不止聚徒之多爲虛名之美也伏見福州處士陳烈清節茂行著自少時晚而益勤久而愈信非惟一方學者之所師蓋天下之士皆推算其道德謂宜以禮致之朝廷必有裨補近聞命以官秩使教學於鄉里其禮甚薄未足以稱勵賢旌德之舉臣今乞以博士之職召致太學雖未能盡其材亦足以副天下學者之所欲而成一作爲朝廷崇賢勸學之實取進止

再乞召陳烈劄子嘉祐二年

臣嘗奏舉福州處士陳烈有道德可爲博士處之太學竊聞朝廷命以官秩俾之講說而烈辭讓不起臣亦嘗知烈之爲人其學行高古然非矯激之士一有也字其所蘊蓄亦欲有所施爲况聖恩優異褒

實所及足以勸天下之爲善者在烈不宜辭避然其進退之際亦有所難蓋朝廷前命以本州教授彼方辭讓而遽有國學之召義不得不辭然自古國家樂賢好士未始不如此在下者逡巡而避讓在上者勤勤而不已以勵難進之節而天下靡然識上有好賢不倦之心上下相成以勸風俗臣謂朝廷宜再加優命致烈必來則於其一作其於進退之際已足以勉勵踴躍臣今欲乞未命以官但且召至京師彼必無名辭避俟其既至徐可推恩況今胡瑗疾病方乞致仕學校之職不可闕人能繼瑗者非烈不可欲乞早賜指揮取進止

薦王安石呂公著劄子至和中

臣伏見陛下仁聖聰明優容諍諫雖有狂直之士犯顏色而觸忌諱者未嘗不終始保全往往亟加擢用此自古明君賢主一作聖王之所難也然而用言既難獻言者亦不爲易論小事者既可鄙而不足爲陳大計者又似迂而無速效欲微諷則未能感動將直陳則先忤貴權而旁有羣言奪於衆力所陳多未施設其人遽已改遷致陛下有聽言之勤而未見用言之效頗疑言事之職但爲速進之階蓋緣臺諫之官資望已峻少加進擢便履清華而臣下有厭人言者因此亦得進說直云此輩務要官職所以多言使後來者其言益輕而人主無由取信嘉陛下納諫之意違陛下賞諫之心臣以謂欲救其失惟宜擇沉默端正守節難進之臣置之諫署則既無干進之疑庶或其言可信伏見殿中丞王安石德行文學爲衆所推守道安貧剛而不屈司封員外郎呂公著是夷簡之子器識深遠沉靜寡言富貴不染其心利害不移其守王安石久更吏事兼有時才會試館職固辭不就公著性樂閑退淡於世事然所謂夫人不言言必有中者也往年陛下上遵先帝之制增置臺諫官四員已而中廢復止兩員今諫官尙有虛位伏乞用此兩人補足四員之數必能規正朝廷之得失裨益陛下之聰明臣叨被恩榮未知報效苟有所見不敢不言取進

止乞留中遂不出

薦張立之狀

臣伏見朝廷之議常患方今士人名節不立民俗禮義不修所以取士多濫而浮僞難明愚民無知而冒犯者衆蓋由設教不篤而獎善無方也伏見徐州進士同三禮出身見守選人張立之能事父母有至孝之行著聞鄉里本州百姓僧道列狀稱薦前後長吏累次保明安撫臣寮亦曾論奏至今未蒙朝廷甄擢其人母年八十無祿以養銓司近制於選人祇許入邊遠官立之家居則患祿不逮親欲就遠官則難於扶持有至孝之行而進退失所有累薦之美而褒勸不及於立之養親之志所希至少於朝廷獎善之道所施至多伏望聖慈特下銓司採閱本人行止及前後論薦迹狀與一本州合入官所貴旌一士之行勸一鄉之人伏以古今致理先於孝子勸賞最勤今孝悌之科久廢不舉旌表之禮久闕不行欲乞今後應有孝行著聞累被薦舉者與一本州官令自化其鄉里仍乞著爲永式其張立之如臣所奏乞送銓司施行

奏議卷第十四

翰苑

條約舉人懷挾文字劄子嘉祐二年四月知貢舉

臣伏見國家自興建學校以來天下學者日盛務通經術多作古文其辭藝可稱履行修飭者不可勝數然累次科場人數倍多於往歲事既大感弊亦隨生竊聞近年舉人公然懷挾文字皆是小紙細書抄節甚備每寫一本筆工獲錢三二十千亦有十數人共斂錢一一作三二百千雇倩一人虛作舉人名目依例下家狀入科場只令懷挾文字入至試院其程試則他人代作事不敗則賴其懷挾共一作互相傳授事敗則不過扶出一人既本非應舉之人雖敗別無刑責而坐獲厚利竊以國家取士務得實材今若浮偽之人容其濫進則使負辛勤蘊實學者無以自別且自來科場務存事體所以優加禮遇用待賢能今浮薄之徒不知朝廷崇獎之意自為姦偽以至於此甚可歎也一作惟宜峻立科條明加約束使浮薄姦偽之徒不容於其間則實有學行之人得被選進然後士子無濫舉朝廷得實才臣今欲乞增定貢院新制寬監門之責重巡捕之賞蓋以入門之時一一搜檢則慮成擁滯故臣乞自舉人入院後嚴加巡察多差內臣及清幹京朝官巡捕每獲懷挾者許與理為勞績或免遠官或指射差遣其監門官與免透漏之責若搜檢覺察得人數多者令知舉官聞奏取旨重加酬獎其巡捕官除只得巡察懷挾及傳授文義外不得非理侮慢舉人庶存事體且朝廷待士甚厚而小人自為浮薄不可不行禁止以革弊端一作厚弊如允臣所奏乞立定巡捕官賞格及懷挾人責罰刑各添入貢院新定條制仍榜南省門及下進奏院頒告天下所貴先明條約然後必行取進止

論保明一無明字舉人行實一作止劄子同前

臣伏覩近降勅命更定科場條制內一節令本縣令佐知州通判保

明舉人行實委無玷缺若因事彰露只罪令佐知州通判所斷刑名並用舊制雖去官經恩不得原減者伏緣舊制刑名甚重今來去官經恩不得原減則官吏所責不輕而玷缺之累中人所不能免小過微累皆為玷缺難以必用深刑責官吏保其所不能盡知者若謂止坐大事則又無明文竊慮後有犯者難用必行之法臣今欲乞指定舉人玷缺事狀如事親不孝行止踰濫冒哀匿服會犯刑責及雖有蔭贖而情理重者以上事節苟犯其一並不得收試如違必一作並用舊制刑名所貴事簡而易遵法嚴而必用如允臣所請乞下禮部貢院施行今取進止

論契丹求御容劄子嘉祐二年

臣伏見契丹所遣汎使專為御容而來中外之議皆謂前歲既已許之於理不可中止失於不早踐言至彼非時遣使及朝夕以來傳聞頗異或云大臣共議欲遂拒而不與若然則臣恐釁隙之端自此而始禍患之起未易遽言大凡為國謀事者必先明信義重曲直酌人情量事勢四者皆得然後可以不疑苟一有未然尚恐敗事况四者俱失豈可不思契丹與中國通盟久矣而嚮來宗真特於信好自表懇勸別有家書繼以畫像聖朝納其來意許以報之而乃遷延至今遂欲食言而中輟是則彼以推誠結我我以不待之失信傷義甚非中國待夷狄之術而又其曲在我使彼易以為辭自南北通和以來信問往復之際每於報答常從優厚假借既久其心已驕况此畫像之來特表懇勸之意是則於平常之禮厚報以驕之懇勸之來則不報以沮一作阻下同之沮之彼必怒不報彼必取懷取蓄怒何所不為此人之常情也許其父不許其子厚薄之際此亦人情之難處也臣竊見契丹來書初無寒温候問之言直以踐言孤約為說其意在於必得若此時被沮勢必更來事既再三豈能堅執若待其失於遜順已成釁隙然後與之則重為中國之辱又使夷狄謂中國難以

恩意交惟可以勢力脅因之引惹別有他求則為後患何可涯哉今虜主雖弱而中國邊備未完廟謀未勝未可生事而欲執我曲彼直之議以起戎而結禍夫察彼事勢必不能中止量我事勢又未能必沮之臣故曰四者俱失也臣又聞虜使入境之日地震星殞變異非常先事深防猶恐不及失計招禍豈可自為巨願聖慈出於獨斷勿沮其善意無失我信言臣今欲乞回諭虜中告以如約直候今冬因遣常使時與之則於事體稍便伏乞速下兩府商議上繫國家利害臣不敢不言今取進止

論選皇子疏一作書 嘉祐二年

八月日翰林學士朝散大夫右諫議大夫知制誥充史館修撰刊修唐書判太常寺兼禮儀事上輕車都尉賜紫金魚袋臣歐陽某謹昧死再拜上書于體天道欽文聰武聖神孝德皇帝陛下臣聞言天下之難言者不敢冀必然之聽知未必聽而不可不言者所以盡為忠之心况臣遭遇聖明容納諫諍言之未必不聽其可默而不言臣伏見自去歲以來羣臣多言皇嗣之事臣亦嘗因災異竊有奏陳雖聖度包容不加誅戮而愚誠懇至天聽未回臣實不勝愛君之心日夜區區未嘗忘此思欲再陳狂瞽而未知所以為言今者伏見克國公主近已出降臣因竊思人之常道莫親於父子之親人之常情亦莫樂於父子之樂雖在聖哲異於凡倫其為天性於理則一陛下嚮雖未有皇嗣而尚有公主之愛上慰聖顏今既出降漸疎左右則陛下萬機之暇處深宮之中誰可與語言誰可承顏色臣愚以謂宜因此時出自聖意於宗室之中選材賢可喜者錄以為皇子使其出入左右問安侍膳亦足以慰悅聖情臣考於書史竊見自古帝王雖曰至尊未嘗獨處也其出而居外也不止百司公見奏事而已必有儒臣學士講論於閑宴又有左右侍從顧問語言其入而居內也不止宦官宮妾在於左右而已其平居燕寢也則有太子問安侍膳於朝

夕其優游宴樂也多與宗室子弟懽然相接如家人計其一日之中未嘗一時獨處也今陛下日御前後殿百司奏事者往往仰瞻天顏而退其甚幸者得承一二言之德音君臣之情不通上下之意不接其餘在廷之臣儒學侍從之列未聞一人從容親近於左右入而居內則至於問安侍膳亦闕於朝夕是則陛下富有四海之廣躬享萬乘之尊居外則無一人可親居內則無一人得親此臣所以區區而欲言也伏况陛下荷祖宗之業承宗廟社稷之重皇子未降儲位久虛羣臣屢言大議未決臣前所奏陳以謂未必立為儲貳而且養為子既可以徐察其賢否亦可以待皇子之降生於今為之亦其時也臣言狂計愚伏俟斧鉞臣昧死再拜

乞寫祕閣書令館職校讎劄子嘉祐二年九月兼判祕閣

書省

臣近準勅兼判祕閣檢會先準皇祐元年七月十一日中書劄子節文奉聖旨祕閣有闕者書各件用崇文總目逐旋補寫依例酬校了以黃絹裝褫正副本收附準備御覽內中取索一作借本閣尋具畫一合行事件聞奏蒙依所奏施行當時雖有此行遣尋值抄寫觀文殿書權住至今伏見館閣校讎之官員數甚多除係省府南曹外其餘主判閑局及別無主判者並各無書校對既無職事因此多不入館伏以館閣國家優養賢材之地自祖宗以來號為清職今館宇闕然塵埃滿席有同廢局甚可嘆嗟臣今欲乞檢會先準皇祐元年七月十一日所降指揮及一宗行遣次第許從本閣選請在院館職官員先將祕閣書目與崇文總目點對內有見闕書籍即於三館取索先校定然後抄寫成書仍差初校覆校官刊正裝褫其合行事件已有畫一起請依奏指揮亦乞檢會施行惟元乞公用錢乞更不支破其抄寫楷書候見得闕書數目將見在楷書人數酌量多少如一作照闕人即別具擘畫聞奏今取進止

乞定兩制員數劄子嘉祐三年

臣竊以學士待制號爲侍從之臣所以承宴閒備顧問以論思獻納爲職自祖宗以來尤精其擇一作尤所精擇苟非清德笑行藹然衆譽高文博學獨出一時則不得與其選是以選用至艱員數至少官以難得爲貴人以得職爲榮摯紳之望既隆則朝廷之體增重其後用人頗易員數漸多往時學士待制至六七十員近年以來稍慎除拜即今猶及四十餘員臣以謂愛惜名器不輕授人朝廷既已知之矣而爲國家一無夫而家三字計者宜於此時一作亦宜及今創立經制今惟翰林學士中書舍人知制誥各有定員其餘學士待制未有定一作員數臣今欲乞檢詳前史及國朝故事自觀文殿大學士至待制並各立定員數遇有員闕則精擇賢材以充其選苟無其人尙可虛位以待如允臣所請乞賜詳議施行取進止

論編學士院制劄子嘉祐三年

臣伏見國家承五代之餘建萬世之業誅滅僭亂懷來四夷封祀天地制作禮樂至於大臣進退政令改更學士所作文書皆繫朝廷大事示於後世則爲王者之訓護藏之有司乃是本朝之故實自明道以前文書草葉尙有編錄景祐以後漸成散失臣曾試令類聚收拾補綴十已失其五六使聖宋之威文章詔令廢失湮淪緩急事有質疑有司無所檢證蓋由從前雖有編錄亦無類例卷第只是本院書吏私自抄寫所以易爲廢失臣今欲乞將國朝以來學士所撰文書各以門類依其年次編成卷帙號爲學士院草錄有不足者更加求訪補足之仍乞差本院學士從下兩員專切管勾自今已後接續編聯如本行人吏不盡時編錄致有漏落許令本院舉察理爲過犯此臣本院常事也所以上煩聖聽者蓋以近歲以來百司綱紀相承廢壞事有曾經奏聞及有聖旨指揮者僅能遵守若只是本司臨時處置其主判之官纔罷去則其事尋亦廢停所以臣欲乞朝廷特降指

擇所貴久遠遵行不敢廢失今取進止

請今後乞內降人加本罪二等劄子嘉祐三年

臣伏見諫官陳旭起請僥求內降之人委二府劾奏于請者之罪蒙朝廷依奏施行尋聞李璋因內降責罰自後罕聞敢求內降以希恩賞者以此見至公之朝必信之法可以令行而禁止也然旭所請只爲恩賞之一端而小人僥求無所不至臣自權知開封府未及兩月之間十次承準內降或爲府司後行或爲宮院嬖嬖或爲內官及干擊人吏等本府每具執奏至於再三而干求者一無二字內降不已至於婢妾賤人犯姦濫等事亦敢上煩聖聽以求私庇官豎小臣自圖免過反彰聖君曲法之私雖有司執奏終許公行然小人干求未有約束止絕臣今一無此字欲乞今後應有因事敢干求內降者依舊許本府執奏外更乞根究因緣干求之人奉攝下府勸勸重行責罰如本人自行干請者亦乞一就勸鞠加元犯本罪二等斷遣其情理稍深及干求不已者亦許本府一面牒報御史臺彈糾勸勸施行所貴止絕小人干亂公朝敗紊綱紀今取進止

論梁舉直事封回內降劄子嘉祐二年

臣勤會本府見勸內臣梁舉直公事兩曾執奏三準內降特與放罪臣伏見近年權倖之臣多是公然作過不畏憲法特干求內降紊亂紀綱所以前後臣寮累具論述陛下特降明詔許承受官司執奏不得施行布告天下善爲信令今梁舉直累煩審聽干求不已本府遵依前後詔勸再具執奏未許公行伏以曲庇小臣撓屈國法自前世帝王苟有如此等事史冊書之以著人君之過失今梁舉直不欲受過於其身寧彰陛下之過於中外舉直此罪重於元犯之罪今縱未能法外重行以戒小人干求內降者其元犯本罪豈可曲恕舉直苟爲愛身之計不思愛君之心乃是小人全無知識爾如臣忝被恩寵列於侍御職在獻納合思裨補豈可阿意順旨爲陛下曲法庇縱小

臣以彰聖君之失其內降臣更不敢下司謹具狀繳連進納今取進止

論郭皇后影殿劄子嘉祐二年

臣所領太常禮院得御藥院公文稱奉聖旨送畫到景靈宮廣孝殿後修蓋郭皇后影殿圖子一本赴太常禮院詳定者其圖子已別具狀繳奏訖臣伏見近年京師土木之功糜耗國用其弊特深原其本因只為差內臣監修利於偷竊官物及訖功之後僥求恩賞以故多起事端務廣興作其甚則託以祖宗神御張皇事勢近年以來如此興造略無虛歲伏以景靈宮建自先朝以尊奉聖祖陛下又建真宗皇帝章懿太后神御殿於其間天下之人皆知陛下奉先廣孝之意然則此宮乃陛下奉天奉親之所今乃欲以後宮已廢未一作遺復之後建殿與先帝太后並列瀆神違禮莫此之甚臣竊謂此事必不出於聖意皆小人私於興作有所僥求爾蓋自前世帝王於宗廟之外別為廟享以追奉祖宗者則有之未聞有自追奉其妃后者也蓋小人不識事體但苟一時之利不思虧損聖德伏乞特賜寢罷以全典禮今取進止

論孟陽河開掘墳墓劄子嘉祐四年春

臣勤會府界開掘孟陽新河相次據祥符縣人戶經府披訴稱被入夫開掘墳墓斫伐桑棗拆拽舍屋等事尋差兵曹參軍張稚圭往彼檢視得已開河道六里有餘計三料開掘却村民墳墓八十二所大墓園三所草瓦屋七十七間其未開三料猶有墳墓二十五所舍屋四十七間桑五百餘株田土八十段臣因體問得村民所掘墳墓屍首骨殖布在新河兩岸子孫骨月環坐守之仰天號慟屍骨暴露並無所歸其甚貧一作貧甚者用火燒焚向空撒棄其庄宅屋宇累世安居且夕毀拆全家露坐冤痛之聲聞於遠近方此春月朝廷務行仁政之時橫屍暴骨殃及幽明可為憫傷可為驚駭兼體問得所開

新河有害無利其萬勝斗門及陽武橋斗門兩處減水盡入白溝河所以年年決溢今又開新河亦入白溝是則三道減水盡聚一河將來決溢可知兼今所開新河深六尺至七尺白溝河只深四尺至五尺下源高仰水勢難行臣今欲乞權住夫役三兩日差朝臣一員計會都水監開封府各差官一員同行相度苟如臣所說不虛未開三料乞更不開掘却移夫役修整舊河其元獻利見開河之人本為自圖功賞及從初檢計壕寨官吏蒙昧朝廷不言有墳墓宅舍桑棗在所開地內情理難恕欲乞下開封府取勘一作會其獻利之人與壕寨等並行決配官員悉與停廢所貴少謝枯骨兼慰生人今取進止

乞罷上元放燈劄子嘉祐四年

臣伏以上元放燈不出典禮蓋因前世習俗所傳陛下二字一作普以俯狗衆心欲同民樂勉出臨幸非為嬉游若乃時歲豐和一作時豐歲和人物康富以為樂事亦是人情今自立春以來陰寒雨雪小民失業坊市寂寥寒凍之人死損不少薪炭食物其價增倍民憂凍餓何暇遨遊臣本府日閱公事內有投井投河不死之人皆稱因為貧寒自求死所今日有一婦人凍死其夫尋亦自縊竊惟里巷之中失所之人何可勝數昨日聖恩差官俵錢正為如此目下陰雪未解假使便得晴明坊市不免泥淖聖駕所歷衝冒風寒况方以日蝕之災一無二字避殿減膳聖心憂畏中外所知欲乞特罷放燈所有常年酌獻之禮若至日未得晴明一作和亦乞差大臣攝事所是見今供擬遊幸及修道路寒凍兵士並乞放罷庶幾上副陛下畏天憂民之心今取進止

論包拯除三司使上書嘉祐四年二月

臣聞治天下者在知用人之一作在用人知先後而已用人之法各有所宜軍旅之士先材能朝廷之士先名節軍旅主成功惟恐其不

趨賞而爭利其先材能而後名節者亦勢使之然也朝廷主教化風俗之薄厚治道之汗隆在乎用人而教化之於下也不能家至而諄諄諭之故常務尊名節之士以風動天下而聳勵其媮薄夫所謂名節之士者知廉恥修禮讓不利於苟得不牽於苟隨而惟義之所處白刃之威有所不避折枝之易有所不爲而惟義之所守其立於朝廷進退舉止皆可以爲天下法也其人至難得也至可重也故其一無二字爲士者常一作當下同貴名節以自一無此字重其身而君人者亦常全名節以養成善士伏見陛下近除前御史中丞包拯爲三司使命下之日中外一作外議喧然以謂朝廷貪拯之材而不爲拯惜名節然猶冀拯能執節守義堅讓以避嫌疑而爲朝廷惜事體數日之間遽聞拯已受命是可惜也亦可嗟也拯性好剛天姿峭直然素少學問朝廷事體或有不思至如逐其人而代其位雖初無是心然見得不能思義此皆不足怪若乃嫌疑之迹常人皆知可避而拯豈獨不思哉昨聞拯在臺日常自至中書詬責宰相指陳前三司使張方平過失怒宰相不早罷之既而臺中寮屬相繼論列方平由此罷去而以宋祁代之又聞拯亦曾彈奏宋祁過失自其命出臺中寮屬又交章力言而祁亦因此而罷而拯遂代其任此所謂蹊田奪牛豈得無過而整冠納履當避可疑者也如拯材能資望雖別如進用人豈爲嫌一作聞言其不可爲者惟三司使爾非惟自涉嫌疑其於朝廷所損不細臣請原其本末而言之國家自數十年來士君子務以恭謹靜慎爲賢及其弊也循默苟且類一作始惰寬弛習成風俗不以爲非至於百職不修紀綱廢壞時方無事固未覺其害也一旦黠虜犯邊兵出無功而財用空虛公私困弊盜賊並起天下騷然陛下奮然四字一作天子感悟思革其弊進用二數大臣銳意於更張矣於此之時始增置諫官之員以寵用言事之臣俾之舉職由是修紀綱而繩廢壞遂欲分別賢不肖進退材不材而久弊之俗驟見

而駭因共指言事者而非之或以謂好訐陰私或以爲公相傾陷或謂沽激名譽或謂自圖進取羣言百端幾惑上聽上賴陛下至聖一無二字至明察見諸臣本以一無此字忘身殉國非爲己利纔間不入遂荷保全而中外之人久而亦漸爲信自是以來二十年間臺諫之選屢得謙言之士中間斥去姦邪屏絕權倖拾遺救失不可勝數是則納諫之善一作臣從古所難自陛下臨御以來實爲盛德於朝廷補助之效不爲無功今中外習安上下已信纖邪之人凡所舉動每畏言事之臣時政無巨細亦惟言事官是聽原其自始開發言路至於今日之成效豈易致哉可不惜哉夫言人之過似於一無此字下同激訐逐人之位似於傾陷而言事之臣得以自明者惟無所利於其間爾而天下之人所以爲信者亦以其無所利焉今拯併逐二臣自居其位使將來姦佞者一作之人得以爲說而惑亂主聽今後言事者不爲人信而無以自明是則聖明一作朝用諫之功一旦由拯而壞夫有所不取之謂廉有所不爲之謂恥近臣舉動人所儀法使拯於此時有所不取而不爲可以風天下以廉恥之節而拯取其所不宜取爲其所不宜爲豈惟自薄其身亦所以開誘他時言事之臣傾人以覲得相習而成風此之爲患豈謂小哉然拯所持者惟以本無一作無本心耳夫心者藏於中而人所不見迹者示於外而天下所瞻今拯欲自信其不見之心而外掩天下之迹是猶手探其物口云不欲雖欲自信人誰信之此臣所謂嫌疑之不可不避也况如拯者少有孝行聞於鄉里晚有直節著在朝廷但其學問不深思慮不熟而處之乖當其人亦可惜也伏望陛下別選材臣爲三司使而處拯他職置之京師使拯得避嫌疑之迹以解天下之惑而全拯之名節不勝幸甚臣叨塵侍從職號論思昔嘗親見朝廷致諫之初甚難今又復見陛下用諫之效已著實不欲因拯而壞之者爲朝廷惜也臣言狂計愚伏俟誅戮

翰苑

乞與尹構一官狀嘉祐四年

右臣等伏見故起居舍人直龍圖閣尹洙文學議論為當世所稱忠義剛正有古人之節初蒙朝廷擢在館閣而能不畏權臣力排衆黨以論范仲淹事遂坐貶黜其後元昊僭叛用兵一方當國家有西顧之憂思得材謀之臣以濟多事而洙自初出師至於元昊納款始終常在兵間比一時之人最為宣力而羣邪醜正誣構百端卒陷罪辜流竄以死嚮蒙陛下仁聖恩憐哀其冤枉特賜清雪俾復官資足以感動羣心勸勵忠義今洙孤幼並在西京家道屢空衣食不給洙止一男構年方十餘歲惘然無依實可嗟惻伏見將來裕享大禮在近羣臣皆得奏蔭子孫伏望聖慈錄洙遺忠憫洙不幸特賜其子一官庶幾寸祿以免饑寒則天地之仁幽顯蒙德臣等忝列侍從愧無獻納苟有所見不敢不言謹具狀奏聞伏候勅旨

舉丁寶臣狀同前

右臣竊見太常丞湖州監酒務一作稅丁寶臣前任知端州日因遭儂智高事停官敘理監當方智高攻劫嶺南州縣例以素無備禦官吏各至奔逃如一作兼聞當時獨寶臣曾捉得智高探事人便行斬決及會鬪敵朝廷以其如此故他人皆奪兩官獨寶臣只奪一官以此見其比衆人情理之輕臣伏見寶臣履行清純頗有官業惟海賊遽至力屈致敗出於不幸今者伏遇裕享恩赦欲望聖慈特與不候監當滿任牽復官資就移一親民差遣如後犯入己贓臣甘當同罪謹具奏聞伏候勅旨

乞免舉臺官劄子嘉祐四年

臣近準勅為見闕臺官下學士院令臣與孫抃等同共保舉兩人聞奏者伏以學士之職置自有唐初以文辭供奉人主其後漸見親信

至於朝廷機密及大除拜每被詢訪皆與參決當時居是職者選擇既精信任亦重下至五代莫不皆然國朝遵用唐制尤重其任自比年以來選用之際時容繆濫職以人廢官以人輕任時臺官闕人只命學士一員獨舉今乃令三人共舉若以為俱可信則一員足以公舉若以為俱不可信則雖衆舉亦豈為得人若以為有可信有不可信者則自宜捨不可信者專委可信者其不可信者既不稱職罷黜之可也以臣思之朝廷所以遽改舊制而學士不足取信皆由非其人如臣是也今在院學士三員孫抃胡宿各會獨舉臺官朝廷嘗所取信惟臣未曾舉人伏念臣材識庸暗不能知人使臣隨衆署名則臣實為恥欲三人所見皆一則理必不能欲望聖慈免臣共舉却依舊制只命學士一員專舉况孫抃胡宿嘗會舉官可以不疑如以臣為不可獨任乞候將來續有臺官員闕更不差臣專舉非敢避事直以任非其才不足取信致煩朝廷改更舊制以此不敢不言今取進止

論許懷德狀嘉祐五年

右臣今月初四日當直準內降許懷德讓恩命表一道撰批答臣勸會昨來許懷德裕享加恩自合兩表陳讓只曾投進一表批答後更不會進第二表稽停至今四十餘日制書留在閣門既不受命又不陳讓直至今來移鎮方於讓表內因帶引敘前來裕享加恩乞併獲二命蓋懷德以裕享例加恩命為輕所以更無表讓却於今來表內因帶敘陳其前來恩制久已稽留不讓不受顯是輕侮朝廷違慢君命閣門無所申舉臺司風憲亦無彈糾况懷德身是將臣職典禁衛敢此違廢國家典制罪大不恭其批答臣未敢撰辭乞下所司勸劾懷德正以典刑庶肅朝綱以戒不恪謹具狀奏聞伏候勅旨

再論許懷德狀同前

再論許懷德狀同前

臣竊以謂治天下在明號令正朝廷在修紀綱號令所行紀綱所振

由人主有賞罰之柄也若號令出而不從紀綱弛而不整又不以賞罰臨之而欲正朝廷治天下臣不知其可也今者陛下親祀宗廟不敢獨受其福推恩羣臣徧及中外此聖德之至深厚也而臣下輒敢有所輕重以謂例恩泛及視以爲輕而慢之原其情理其可恕乎方裕享始畢恩典推行命出之日宰相押班百官在列宣揚制誥布告天下而將臣偃蹇不肯受命稽俸制書四十餘日有司無所申舉恬然不以爲怪是陛下號令不能行於朝廷而紀綱弛壞於武士凡士之知治體者皆爲陛下惜也臣謂方今國家全盛天下無虞非有強臣悍將難制之患而握兵之帥輒敢如此不畏朝廷者蓋由從前不惜事體因循寬弛有以馴致也今若不正其罪罰而公爲縱弛則恐朝廷失刑自此而始武臣驕慢亦自此而始號令不行於下紀綱遂壞於上亦自此而始夫古人所謂見於未萌者智之明也若事有萌而能杜其漸者又其次也若見其漸而興之浸成後患者深可戒也臣前日爲許懷德事曾有奏論略陳大概蓋以方今賞罰之行只據簿書法令以從事而罕思治體况如懷德在法非輕於事體又重故臣復罄愚警伏乞聖慈裁擇而行之

論茶法奏狀嘉祐五年

右臣伏見朝廷近改茶法本欲救其弊失而爲國誤計者不能深思遠慮究其本末惟知圖利而不圖其害方一二大臣銳於改作之時樂其合意倉卒輕信遂決而行之令下之日猶恐天下有以爲非者遂直詆好言之士指爲立異之人峻設刑名禁其論議事既施行而人知其不便者十蓋八九然君子知時方厭言而意殆一無二字不肯言小人畏法懼罪而不敢言今行之踰年公私不便爲害既多而一二大臣以前者行之大果令之大峻勢既難回不能遽改而士大夫能知其事者但騰口於道路而未敢顯言於朝廷幽遠之民日被其患者徒怨嗟於閭里而無由得聞于天聽陛下聰明仁聖開廣言

路從前容納補益尤多今一旦下令改事先爲峻法禁絕人言中外聞之莫不嗟駭語曰防民之口甚於防川川壅而潰傷人必多今壅民之口已踰年矣民之被害一作患者亦已衆矣古不虛語於今見焉臣亦聞方一作初改法之時商議已定猶選差官數人分出諸路訪求利害然則一二一作二三大臣不惟初無害民之意實亦未有自信之心但所遣一作使之人既一無此字見朝廷必欲更改不敢沮議又志在希合以求功賞傳聞所至州縣不容一作用吏民有所陳述直云朝廷意在必行但來一無此字要一審狀爾果如所傳則誤事者在此數人而已一無二字蓋初以輕信於人施行大果今若明見其害救失何遲患莫大於遂非過莫深乎不改臣於茶法本不詳知但外論既喧聞聽漸熟古之爲國者庶人得謗於道商旅得議於市而士得傳言於朝正爲此也臣竊聞議者謂茶之新法既行而民無私販之罪歲省刑人甚多此一利也然而爲害者五焉江南荆湖兩浙數路之民舊納茶稅今變租錢使民破產亡家怨嗟愁苦不堪忍或舉族而逃或自經而死此其爲害一也自新法既用小商所販至少大商絕不通行前世爲法以抑豪商不使過侵國利與爲僭侈而已至於通流貨財雖三代至治猶分四民以相利養今乃斷絕商旅此其爲害二也自新法之行稅茶路分猶有舊茶之稅而新茶之稅絕少年歲之間舊茶稅盡新稅不登則頓虧國用此其爲害三也往時官茶容民入雜故茶多而賤徧行天下今民自買賣須要真茶真茶不多其價遂貴小商不能多販又不暇遠行故近茶之處頓食貴茶遠茶之方向去更無茶食此其爲害四也近年河北軍糧用見錢之法民入米於州縣以鈔筭茶於京師三司爲於諸場務中擇近上場分特留八處專應副河北入米之人輸鈔筭請今場務盡廢然猶有舊茶可筭所以河北和糴實要見錢不惟客旅得錢變轉不動茶當盡無可筭請則河北和糴實要見錢不惟客旅得錢變轉不動

兼亦自京師歲歲罄錢於河北和糴理必不能此其爲害五也一利
不足以補五害今雖欲減放租錢以救其弊此得寬民之一端爾然
未盡公私之利害也伏望聖慈特詔主議之臣不護前失深思今害
黜其遂非之心無襲弭謗之迹除去前令許人獻說亟加詳定精求
其當庶幾不失祖宗之舊制臣冒禁有言伏待罪責謹具狀奏聞伏
候勅旨李憲長編說五害處止是節文仍改變轉不動一句爲艱於
移用

論監牧劄子嘉祐五年

臣所領羣牧司近準宣差吳中復王安石王陶等同共相度監牧利
害事竊以國馬之制置自祖宗歲月既深官司失守積習成弊匪止
一時前後因循重於改作今者幸蒙朝廷因言事之官有所陳述選
差臣寮相度更改臣以謂監牧之設法制具存條目既繁弊病亦衆
若祇坐案文籍就加增損恐不足以深革弊端如欲大爲更張初立
制度則凡於利害難以遠度必須目見心曉熟於其事然後可以審
詳裁制果決不疑蓋謀於始也不精則行於後也難久况此是臣本
職豈敢辭勞欲乞權暫差臣仍於吳中復等三人內更差一人與臣
同詣左右廂監牧地頭躬親按視至於土地廣狹水草善惡歲時孳
牧吏卒勤惰以至牝牡種類各隨所宜棚井溫涼亦有便否嚮何以
致馬之耗減今何以得馬之蕃滋既詳究其根源兼旁采於衆議如
此不三數月間可以周遍然後更將前後臣寮起請與衆官參詳審
處與其坐而遙度倉卒改更其爲得失不可同日而論也臣又竊思
今之馬政一有着字皆因唐制而今馬多少與唐不同者其利病甚
多不可悉一作概舉至於唐世牧地皆與馬性相宜西起隴右金城
平涼天水外暨河曲之野內則岐幽涇寧東接銀夏又東至於樓煩
皆一作此唐養馬之地也以今考之或陷沒夷狄或已爲民田皆不
可復得惟聞今一作惟今之河東一有路字嵐石之間山荒甚多及

汾河之側草地亦廣其間草軟水甘最宜牧養往時河東軍馬常在
此處牧放今馬數全少閑地極多此乃唐樓煩監地也可以興置一
監臣以謂推迹而求之則天池元池三監之地尙冀可得又臣往年
因奉使河東嘗行威勝以東及遼州平定軍見其不耕之地甚多而
河東一路山川深峻水草甚佳其地高寒必宜馬性及京西唐汝之
間久荒之地其數甚廣欲乞更下河東京西轉運司差官就近於轄
下訪求草地有可以興置監牧處如稍見次第即乞朝廷差官與羣
牧司官員同共往彼踏行壁畫若可以興置新監則河北諸監內有
地不宜馬處却可議行廢罷惟估馬一司利害最爲易見若國家廣
捐金帛則券馬利厚來者必多於其多中時得好馬若有司惜費則
蕃部利薄馬來漸少兼亦好馬不來然而招誘之方事非一體亦須
知其委曲欲乞特差羣牧司或禮賓院官一員直至秦州以來體問
蕃部券馬利害凡此三者雖暫差官比及吳中復等檢閱本司文字
講求商議未就之間已各來復可以參酌相度庶不倉卒輕爲改更
如允臣所請乞賜施行今取進止一作國馬之制置自祖宗歲月既
深官失其守積習成弊匪止一時伏觀詔書命奎等商度利害將有
更革臣以謂監牧之設法制具存條目既繁其弊亦衆若止坐案文
籍就加增損恐不足以深革弊端如欲大爲更張初立制度則凡於
利害難以遠度蓋謀於始也不精則行於後也難久請認相度官一
人同臣躬按左右廂監牧凡土地廣狹水草善惡歲時孳牧吏卒勤
惰以至牝牡種類各隨所宜棚井溫涼亦有便否嚮何以致馬之耗
減今何以得馬之蕃滋詳究根源旁采衆議然後以此日臣寮奏請
參詳審處與其坐而遙度倉卒改更其爲得失不可同日而論也臣
又竊思今之馬政皆因唐制而今馬多少與唐不同者其利病甚多
不可概舉至於唐世牧地皆與馬性相宜西起隴右金城平涼天水
外暨河曲之野內則岐幽涇寧東接銀夏又東至於樓煩此唐養馬

之地也以今考之或陷沒夷狄或已為民田皆不可復得惟聞今河東路嵐石之間山荒甚多及汾河之側草地亦廣其間草軟水甘最宜養牧此乃唐樓煩監地也可以與置一監臣以謂推迹而求之則樓煩元池天地三監之地尚冀可得又臣往年奉使河東嘗行威勝以東及遼州平定軍見其不耕之地甚多而河東一路山川深峻水草甚佳其地高寒必宜馬性及京西路唐故之間久荒之地其數甚廣請下河東京西轉運司遣官訪草地有可以與置監牧則河北諸監有地不宜馬可行廢罷至於佐馬一司利害易見若國家廣捐金帛則券馬利厚來者必多有可惜費則蕃部利薄馬來復少然而招誘之方事非一體請遣羣牧司或禮賓院官一人至邊訪蕃部券馬利害以此三者參酌商議庶不倉卒輕為改更以上乃通鑑長編所載與集本頗異

舉章望之會鞏王回等充館職狀同前

右臣猥以庸虛過蒙獎任竊惟古人報國之效無先薦賢雖知人之難愧於不廣而高材實行亦莫多得苟有所見其敢默然臣竊見祕書省校書郎章望之學問通博文辭敏麗不急仕進行義自修東南士子以為師範太平州司法參軍會鞏自為進士已有時名其所為文章流布遠邇志節高爽自守不回前亳州衛真縣主簿王回學行純固論議精明尤通史傳姓氏之書可備顧問此三人者皆一時之秀宜被朝廷樂育之仁而或廢處江湖或沉淪州縣不獲聞達議者惜之其章望之會鞏王回臣今保舉堪充館閣職任欲望聖慈特賜甄擢如後不如舉狀臣甘當同罪謹具狀奏聞伏候勅旨

舉蘇軾應制科狀嘉祐五年

右臣伏以國家開設科目以待備賢又詔兩省之臣舉其所知各以聞達所以廣得人之路副及席之求臣雖庸暗其敢不勉臣伏見新授河南府福昌縣主簿蘇軾學問通博資識明敏一作多識敏明文

采爛然論議盡出其行業修飭名聲甚遠臣今保舉堪應材識兼茂明於體用科欲望聖慈召付有司試其所對如有繆舉臣甘伏朝典謹具狀奏聞伏候勅旨

免進五代史狀同前

右臣準中書劄子為知制誥范鎮等奏乞取臣五代史草付唐書局繕寫上進事伏念臣本以孤拙初無他能少急養親遂學干祿勉作舉業以應所司自忝竊於科名不忍忘其素習時有妄作皆應用文字至於筆削舊史褒貶前世著為成法臣豈敢當任者曾任夷陵縣令及知滁州以負罪謫官閑僻無事因將五代史試加補緝而外方難得文字檢閱所以銓次未成昨自還朝便蒙差在唐書局因之無暇更及私書是致全然未成次第欲候得外任差遣庶因公事之暇漸次整緝成書仍復精加考定方敢投進冀於文治之朝不為多士所誚謹具狀奏聞伏候勅旨

論刪去九經正義中識緯劄子

臣伏見國家近年以來更定貢舉之科以為取士之法建立學校而勤養士之方然士子文章未純節行未篤不稱朝廷勵賢興善之意所以化民成俗之風臣愚以謂士之所本在乎六經而自暴秦焚書聖道中絕漢興收拾亡逸所存無幾或殘編斷簡出於屋壁而餘齡昏耗得其口傳去聖既遠莫可考證偏學異說因自名家然而授受相傳尚有師法暨晉宋而下師道漸亡章句之篇家藏私畜其後各為箋傳附著經文其說存亡以時好惡學者茫昧莫知所歸至唐太宗時始詔名儒撰定九經之疏號為正義凡數百篇自爾以來著為定論凡不本正義者謂之異端則學者之宗師百世之取信也然其所載既博所擇不精多引識緯之書以相雜亂怪奇詭僻所謂非聖之書異乎正義之名也臣欲乞特詔名儒學官悉取九經之疏刪去識緯之文使學者不為怪異之言惑亂然後經義純一無所駁雜其

用功至少其爲益則多臣愚以謂欲使士子學古勵行而不本六經欲學六經而不去其詭異駁雜欲望功化之成不可得也伏望聖慈下臣之言付外詳議今取進止

議一有新字學狀嘉祐元年

右臣等伏見近日言事之臣爲陛下言建學取士之法者衆矣或欲立三舍以養生徒或欲復五經而置博士或欲但舉舊制而修廢墜或欲特創新學而立科條其言雖殊其意則一陛下慎重其事下其議於羣臣而議者遂欲創新學立三舍因以辨士之能否而命之以官其始也則教以經藝文辭其終也則取以材識德行聽其言則甚備考於事則難行夫建學校以養賢論材德而取士此皆有國之本務而帝王之極致也而臣等謂之難行者何哉蓋以古今之體不同而施設之方皆異也古之建學取士之制非如今之法也蓋古之所謂爲政與設教者遲速異宜也夫立時日以趨事考其功過而督以賞罰者爲政之法也故政可速成若夫設教則以勸善興化尙賢勵俗爲事其被於人者漸則入於人也深收其效者遲則推其功也遠故常緩而不迫古者家有塾黨有序國有學自天子諸侯之子下至國之俊選莫不入學自成童而學至年四十而仕其習乎禮樂之容講乎仁義之訓敦乎孝悌之行以養父兄事長上信朋友而臨財廉處衆讓其修於身行於家達於隣里聞於鄉黨然後詢於衆庶又定於長老之可信者而薦之始謂之秀士久之又取其甚秀者爲選士久之又取其甚秀者爲俊士久之又取其甚秀者爲進士然後辨其論隨其材而官之夫生七八十歲而死者人之常壽也古乃以四十而仕蓋用其半生爲學考行又廣察以隣里鄉黨而後其人可知然則積德累善如此動而久求賢審官如此慎而有次第然後矯僞干利之士不容於其間而風俗不陷於媮薄也古之建學取士其施設之方如此也方今之制以貢舉取人往者四歲一詔貢舉而

議者患於太遲更趣之爲間歲而應舉之士來學於京師者類皆去其鄉里遠其父母妻子而爲旦暮干祿之計非如古人自成童至於四十就學於其庠序而隣里鄉黨得以衆察徐考其行實也蓋古之養士本於舒遲而今之取人患於急迫此施設不同之大概也臣請詳言方今之弊既以文學取士又欲以德行官人且速取之歟則真僞之情未辨是朝廷本欲以學勸人脩德行一有而字反以利誘人爲矯僞此其不可一也若遲取之歟待其衆察徐考而漸進則文辭之士先已中於甲科而德行之人尙未登於丙舍此其不可二也且今入學之人皆四方之遊士齋其一身而來爲合羣處非如古人在家在學自少至長親戚朋友隣里鄉黨衆察徐考其行實也不過取於同舍一時之毀譽而決於學官數人之品藻爾然則同學之人蹈利爭進愛憎之論必分朋黨昔東漢之俗尙名節而黨人之禍及天下其始起於處士之橫議而相訾也此其不可三也夫人之材行若不因臨事而見則守常循理無異衆人苟欲異衆則必爲迂僻奇怪以取德行之名而高談虛論以求材識之譽前日慶曆之學其弊是也此其不可四也今若外方專以文學貢士而京師獨以德行取人則實行素履著於鄉曲而守道丘園之士皆反見遺此其不可五也近者朝廷患四方之士寓一有藉字京師者多而不知其士行遂嚴其法使各歸於鄉里今又反使來聚於京師云欲考其德行若不用四方之士一作人止取京師之士則又示人以不廣此其不可六也夫儒者所謂能通古今者在知其意達其理而酌時之宜爾大抵古者教學之意緩而不迫所以勸善興化養賢勵俗在於遲久而不求近效急功也臣謂宜於今而可行者立爲三舍可也復五經博士可也特創新學雖不若即舊而脩廢然未有甚害創之亦可也教學之意在乎敦本一作在於敦本教學之意而修其實事給以糗糧多陳經籍選士之良者以通經有道之士爲之師而舉一作謹察其有過

無行者黜去之則在學之人皆善士也然後取以貢舉之法待其居官爲吏已接於人事可以考其賢善優劣而時取其尤出類者旌異之則士知修身力行一作士修其行非爲一時之利而可伸於終身則矯僞之行不作而輪薄之風歸厚矣此所謂實事之可行於今者也臣等伏見論學者四人其說各異而朝廷又下臣等俾之詳定是欲盡衆人之見而採其長者爾故臣等敢陳其所有以助衆議之一非敢好爲異論也伏望聖慈特賜裁擇

奏議卷第十六

樞府

論均稅劄子嘉祐五年

臣爲諫官時嘗首言均稅事乞差郭諮孫琳蒙朝廷依臣所言起自蔡州一縣以方田法均稅事方施行而議者多言不便尋卽罷之近者伏見朝廷特置均稅一司差官分往河北陝西均稅始聞河北傳言人戶虛驚斫伐桑棗尙不爲信次見陝西州郡有上言歲儉民饑乞罷均稅者稍已疑此一事果爲難行而朝廷之意決在必行言者遂不能入近者又見河北人戶凡千百人聚訴於三司然則道路傳言與州郡上言雖爲不足信其如聚集千人於京師此事不可掩蔽則民情可知矣蓋均稅非以規利而本以便民如此民果便乎竊知朝廷本只一作則以見在稅數量輕重均之初不令其別生額外之數也近聞衛州通利軍括出民冒佃田土不於見在管催數內均減重者攤與冒佃戶却別一無此字生立稅數配之此非朝廷本一作之意而民所以喧訴也又聞澶州諸縣一有是字見今實額管催數外將帳頭自來椿坐有各無納及一有夫字開閣將行一無二字兩項遠年稅數並係祥符景德已前以至五代長興年椿管虛數並攤與見今人戶又聞以地肥瘠定爲四等其下等田有白棘帶鹹地并鹹鹵沙薄可殖地死沙不可一無此字殖地並一例均攤與稅數謂此雖不可耕種尙可煎鹽且河北之民自祖宗以來蒙賜恩卹放行鹽不一無此字禁只令據鹽斤兩納稅今煎鹽者已納鹽稅又令更納田稅豈祖宗所以惠河北之民意又聞河南不殖之地係禁鹽地分者亦均攤與稅又不知使一無此字民何以納也澶衛去京師近偶可聞知者如此其餘遠方一作地謂所均稅悉便於民其可得乎以此見朝廷行事至難小人希意承旨者言利而不言害俗吏貪功希賞見小利忘大害爲國斂怨於民朝廷不知則已苟已知之其可

不爲救其失哉欲望聖慈特賜指揮令均稅所只如朝廷本議將實催見在稅數量輕重均之其餘生立稅數及遠年虛數卽與放免及未均地分並且罷均且均稅一事本是臣先建言聞今事有不便臣固不敢緘默今取進止

乞差檢討官校國史劄子嘉祐六年

臣前爲學士日兼充史館脩撰竊見本院國史自進本入內後官守空司因具奏陳乞降付院收藏以備檢討尋準朝旨於龍圖閣寫本關送本院令修撰官躬親對讀修改其國史尋已寫了竊緣本院元有修撰官三員後來孫抃及臣相次別蒙差任今止有胡宿一員其未經對讀一有國史二字卷數尙多竊慮寫下多日闕官校對久不了當漸至因循欲乞添差檢討官三兩員同共對讀早令了當况檢討官檢閱本朝故事亦是本職仍乞不令漏泄今取進止

論牧馬草地劄子嘉祐六年

臣爲學士日兼充羣牧使朝廷以馬政久弊差吳中復等與臣共議利害欲有改一有更字爲未見得牧地善惡多少難爲廢置欲乞差官先且打量牧馬草地次臣遽蒙恩擢在樞府所有牧馬利害商量未了事件臣有愚見方欲條陳今聞諸監所差官各將前去竊緣監牧帳舊管一作管舊地甚多自來界至不明官私作弊積久爲民間侵占耕種年歲已深昨已會差高訪等根括打量人戶多稱父祖世業失却契書無憑照驗但追呼搔擾而已今若更行根究必亦難明徒爲追擾未見其利民先被害臣今欲乞令差去官只據見在草地逐段先打量的實頃畝明立封標界至因便相度其地肥瘠宜與不宜牧馬其廢置改更候逐官回日令相度牧馬所據利害擘畫申奏其已爲民間侵耕地土更不根究蓋以本議欲以見在牧地給與民耕豈可却根究已耕之地重爲搔擾至於民間養馬等事利害甚多臣當續具奏聞其不根究侵耕地土一事伏乞先賜指揮今取進止

論臺諫官唐介等宜早牽復劄子嘉祐六年

臣材識庸暗碌碌於衆人中蒙陛下不次拔擢置在樞府其於報效自宜如何而自居職以來已逾半歲凡事關大體必須衆議之協同其餘日逐進呈皆是有司之常務至於謀猷啓沃蔑爾無聞上辜聖恩下愧清議人雖未責臣豈一作豈敢自安所以夙夜思維願竭愚慮苟有可採冀裨萬一臣近見諫官唐介臺官范師道等因言陳旭事得罪或與小郡或竄遠方陛下自臨御已來擢用諍臣開廣言路雖言者時有中否而聖慈每賜優容一旦臺諫聯翩被逐四出命下之日中外驚疑臣雖不知臺諫所言是非但見唐介范師道皆久在言職其人立朝各有本末前後一有言事二字補益甚多豈於此時頓然改節故爲欺罔上昧聖聰在於人情不宜有此臣竊以謂自古人臣之進諫於其君者有難有易各因其時而已若剛暴猜忌之君不欲自聞其過而樂聞臣下之過人主好察多疑於上大臣側足畏罪於下於此之時諫人主者難而言大臣者易若寬仁恭儉之主動遵禮法自聞其失則從諫如流聞臣下之過則務爲優容以保全之而爲大臣者外秉國權內有左右之助言事者未及見聽而怨仇已結於其身故於此一有之字時諫人主者易言大臣者難此不可不察也自古人主之聽言也亦有難有易在知其術而已夫忠邪並進於前而公論與私言交入於耳此所以聽之難也若知其人忠邪辨其言之公私則聽之易也凡言拙而直逆耳違意初聞若可惡者此忠臣之言也言婉而順希旨合意初聞若可喜者邪臣之言也至於言事之官各舉其職或當朝正色顯言於廷或連章列署共論其事言一出則萬口爭傳衆目共視雖欲爲私其勢不可故凡明言於外不畏人知者皆公言也若非其言職又不敢顯言或密奏乞留中或面言乞出自聖斷不欲人知言有主名者蓋其言涉傾邪懼遭彈劾故凡陰有奏一有陳字而畏人知者皆挾私之說也自古人主能

以此術知臣下之情則聽言易也伏惟陛下仁聖寬慈躬履勤儉樂聞諫諍容納直言其於大臣尤所優禮常欲保全終始思與臣下愛惜各節尤慎重於進退故臣謂方今言事者親切人主則易欲言大臣則難臣自立朝耳目所記景祐中范仲淹言宰相呂夷簡貶知饒州皇祐中唐介言宰相文彥博貶春州別駕至和初吳中復呂景初馬遵言宰相梁適並罷職出外其後趙抃范師道言宰相劉沆亦罷職出外前年韓絳言富弼貶知蔡州今又唐介等五人言陳旭得罪自范仲淹貶饒州後至今凡二十年間居臺諫者多矣未聞有規諫人主而得罪者臣故謂方今諫人主則易言大臣則難陛下若推此以察介等所言則可知其用心矣昨所罷黜臺諫五人惟是從二字一作呂誨一有新進二字入臺未久其他四人出處本末迹狀甚明可以歷數也唐介前因言文彥博遠竄廣西煙瘴之地賴陛下仁恕哀憐移置湖南得存性命范師道趙抃並因言忤劉沆罷臺職守外郡連延數年然後一有來字復今二人者又以言樞臣罷黜然則介不以前蹈必死之地爲懼師道與抃不以中滯進用數年爲戒遇事必言得罪不悔蓋所謂進退一節終始不變之士也至如王陶者本出孤寒只因韓絳薦舉始得臺官及絳爲中丞陶不敢內顧私恩與之爭議絳終得罪夫牽顧私恩人之常情爾斷恩以義非知義之士不能也以此言之陶可謂徇公滅私之臣矣此四人者出處本末之迹如此可以知其爲人也就使言雖不中亦其情必無他議者或謂言事之臣好相朋黨動搖大臣以作威勢臣竊以謂不然至於去歲一無十一字韓絳言富弼之時介與師道不與絳爲黨乃與諸臺諫共論絳爲非然則非相朋黨非欲動搖大臣可明矣臣固謂未可以此疑言事之臣也况介等此者雖爲諫官幸蒙陛下寬恩各得爲郡未至失所其可惜者斥逐諫臣非朝廷美事阻塞言路不爲國家之利而介等盡忠守節未蒙憐察也欲望聖慈特賜召還介等置之朝

廷以勸守節敢言之士則天下幸甚今取進止

政府進

舉劉效呂惠卿充館職劉子嘉祐六年

臣伏見前廣州觀察推官劉效辭學優贍履行修一作肅謹記問該博可以備朝廷詢訪前真州軍事推官呂惠卿材識明敏文藝優通好古飭躬可謂端雅之士並宜置之館閣以副聖朝養育賢材之選臣以庸繆參聞政論無能報國敢舉所知其劉效呂惠卿欲望聖慈俾充館閣之職如後不如舉狀臣甘同罪取進止

論祠祭行事劉子嘉祐八年

臣近準勅差祭神州地祇於比郊竊見有司行事不合典禮據開寶通禮當先引行事官於東遺門外道南北向立次引入橫門就壇東南位西向行事蓋即事有漸自外而入於禮爲宜今却先引行事官於壇下阼階之側北向立次引東行向外就行事位由內而外乖背禮文臣遂於本院檢詳蓋是往年撰祀儀之時誤此一節今據祀儀四時及三一作土王五帝上辛祈穀春分祀九宮朝日高禘孟夏雩秋分夕月仲秋祀九宮貴神季秋大享明堂冬至祀昊天臘蜡夏至祀皇地祇及孟冬祭神州地祇凡一十七祭並係大祀一例錯誤並合改正依開寶通禮兼禮生贊唱生疎多不依禮文臣伏見朝廷近年新製祭祀器服修飭壇壝務極精嚴而有司失傳行事之際於禮繆誤伏乞下禮院詳定依開寶通禮改正祀儀及教習禮生使依典禮以上副聖朝精嚴祀事之意今取進止

論逐路取人劉子治平元年

臣伏見近有臣寮上言乞將南省考試舉人各以路分糊名於逐路每十人解一人等事雖已奉聖旨送兩制詳定臣亦有愚見合具敷陳竊以國家取士之制比於前世最號至公蓋累聖留心講求曲盡以謂王者無外天下一家故不問東西南北之人盡聚諸路貢士混

合爲一而惟材是擇又糊名騰錄而考之使主司莫知爲何方之人誰氏之子不得有所憎愛薄厚於其間故議者謂國家科場之制雖未復古法而便於今世其無情如造化至公如權衡祖宗以來不可易之制也傳曰無作聰明亂舊章又曰利不百者不變法今言事之臣偶見一端卽議更改此臣所區區欲爲陛下守祖宗之法也臣所謂偶見一端者蓋言事之人但見每次科場東南進士得多而西北進士得少故欲改法使多取西北進士爾殊不知天下至廣四方風俗異宜而人性各有利鈍東南之俗好文故進士多而經學少西北之人尚質故進士少而經學多所以科場取士東南多取進士西北多取經學者各因其材性一無此字所長而各隨其多少取之今以進士經學合而較之則其數均若必論進士則多少不等此臣所謂偏見之一端其不可者一也國家方以官濫爲患取士數必難增若欲多取西北之人則却須多減東南之數今東南州軍進士取解者二三千人處只解二三十人是百人取一人蓋已痛裁抑之矣西北州軍取解至多處不過百人而所解至十餘人是十人取一人比之東南十倍假借之矣若至南省又減東南而增西北則一無此字是已裁抑者又裁抑之已假借者又假借之此其不可者二也東南之士於千人中解十人其初選已精矣故至南省所試合格者多西北之士學業不及東南當發解時又十倍優假之蓋其初選已濫矣故至南省所試不合格者多今若一例以十人取一人則東南之人合格而落者多矣西北之人不合格而得者多矣至於他路理不可齊偶有一路合格人多亦限以十一落之偶有一路合格人少亦須充足十一之數使合格者得合得者落取捨顛倒能否混淆其不可者三也且朝廷專以較藝取人而使有藝者屈落無藝者濫得不問濫濫只要諸路數停此其不可者四也且言事者本欲多取諸路士著之人若此法一行則寄應者爭趨而往今開封府寄應之弊可驗矣

此所謂法出而姦生其不可者五也今廣南東西路進士例各絕無舉業諸州但據數解發其人亦自知無藝只來一就省試而歸冀作攝官爾朝廷以嶺外煙瘴北人不便須藉攝官亦許其如此今若一例與諸路一無二字十人取一人此為縲濫又非西北之比此其不可者六也凡此六者乃大槩爾若舊法一壞新議必行則弊濫隨生何可勝數故臣以謂且遵舊制但務擇人推朝廷至公待四方如一惟能是選人自無言此乃當今可行之法爾若謂士習浮華當先考行就如新議亦須只考程試安能必取行實之人議者又謂西北近虜土要牢籠此甚不然之論也使不逞之人不能為患則已苟可為患則何方無之前世賊亂之臣起於東南者甚眾其大者如項羽蕭銑之徒是已至如黃巢王仙芝之輩又皆起亂中州者爾不逞之人豈專西北矧貢舉所設本待材賢一作能牢籠不逞當別有術不在科場也惟事久不能無弊有當留意者然不須更改法制止在振舉綱條爾近年以來舉人盛行懷挾排門大謀免寇突入虧損士風傷敗善類此由舉人既多而君子小人雜聚所司力不能制雖朝廷素有禁約條制甚嚴而上下因循不復申舉惟此一事為科場大患而言事者獨不及之願下有司議革其弊此當今科場之患也臣忝貳宰司預聞國論苟不能為陛下守祖宗之法而言又不足取信於人主則厚顏尸祿豈敢偷安而久處乎故猶此彊言乞賜裁擇

乞發用孫沔劄子治平二年

臣伏見諒祚猖狂漸違誓約僭叛之迹彰露已多年歲之間必為邊患國家禦備之計先在擇人而自慶曆罷兵以來至今二十餘年當時經用舊人零落無幾惟尚書戶部侍郎孫沔尚在西事時沔守環慶一路其人磊落有智勇但以未嘗出兵又不遇敵故未有臨陣破賊之功然其養練士卒招撫蕃夷恩信著於一方至今邊人思之雖世不乏材朝廷方務推擇若求曾經西事可用之人則臣謂無如沔

者沔今年雖七十聞其心力不衰飛鷹走馬尚如平日况所用者取其智謀藉其威信前世老將疆起成功者多沔雖中間曾以罪廢棄瑕使過正是用人之術臣今欲乞朝廷更加察訪如沔實未衰羸伏望聖慈特賜獎用庶於擇一作人材難得之時可備一方之寄取進止

英宗實錄所載乃節文但於孫沔姓名之上添致仕二字又國家禦備作朝廷禦備

奏議卷第十七

政府

言西邊事宜第一狀治平二年

右臣伏見諒祚狂僭釁隙已多不越歲年一無此字必爲邊患臣本庸暗不達時機輒以外料敵情內量事勢鑒往年已驗之失思今日可用之謀雖兵不先言俟見形而應變然坐而制勝亦大計之可圖謹具條陳庶裨萬一臣所謂外料敵情者諒祚世有夏州自彝興克敵以前止於一鎮五州而已太宗皇帝時繼捧繼遷始爲邊患其後遂陷靈鹽盡有朔方之地蓋自淳化咸平用兵十五餘年既不能剪滅遂務招懷適會繼遷爲潘羅支所殺其子德明乃議歸款而我惟以恩信復其王封歲時俸賜極於優厚德明既無南顧之憂而其子元昊亦壯遂併力西攻回紇拓地千餘里德明既死地大兵彊元昊遂復背叛國家自寶元慶曆以後一方用兵天下騷動國虛民弊如此數年元昊知我有厭兵之患遂復議和而國家待之恩禮又異於前矣號爲國主僅得其稱臣歲予之物百倍德明之時半於契丹之數今者諒祚雖曰狂童然而習見其家世所爲蓋繼遷之叛而復王封元昊再叛而爲國主今若又叛其志可知是其欲自比契丹抗衡中國以爲鼎峙之勢爾此臣竊料敵情在於如一無此字此也夫所謂內量事勢者蓋以慶曆用兵之時視方今禦邊之備較彼我之虛實彊弱以見勝敗之形也自真宗皇帝一無二字景德二年盟北虜於澶淵明年始納西夏之款遂務休兵至寶元初元昊復叛蓋三十餘年矣天下安於無事武備廢而不修廟堂無謀臣邊鄙無勇將將愚不識干戈兵驕不識一作如戰陣器械朽腐城郭隳頽而元昊勇鷙桀黠之虜也其包畜毒謀欲窺中國者累年矣而我方恬然不以爲慮待其謀成兵具一旦一作日反書來上然後茫然不知所措中外震駭舉動倉惶所以用兵之初有敗而無勝也既而朝廷用韓琦

范仲淹等付以西事極力經營而勇夫銳將亦因戰陣稍稍而出數年之間人謀漸得武備漸修似可枝梧矣然而天下已困也一無此字所以屈意忍恥復與之和此慶曆之事爾今則不然方今甲兵雖未精利不若往年之腐朽也城壘粗嘗完緝不若往年之隳頽也土兵蕃落增添訓練不若往年寡弱之驕軍也大小將校曾經戰陣者往往尙在不若往年魏昭炳夏隨之徒綺紈子弟也一二執政之臣皆當時宣力者其留心西事熟矣不若往時大臣茫然不知所措者也蓋往年以不知邊事之謀臣馭不識干戈之將用驕兵執朽器以當桀黠新興之虜此所以敗也方今謀臣武將城壁器械不類往年而諒祚狂童不及元昊遠甚往年忽而不思今又已先覺可以早爲之備苟其不叛則已若其果叛未必不爲中國利也臣謂可以因此時雪前恥收後功但願人謀如何爾若上憑陛下神威睿筭係繫諒祚君臣獻於廟社此其上也其次逐狂虜於黃河之北以復朔方故地最下盡取山界奪其險而我守之以永絕邊患此臣竊一作內量事勢謂或如此臣所謂鑒往年已驗之失者其小失非一不可悉數臣請言其大者夫夷狄變詐兵交陣合彼佯敗以爲誘我貪利而追之或不虞橫出而爲其所邀或進陷死地而困於束手此前日屢敗之戒今明習兵戰者亦能知之此雖小事也亦不可忽所謂大計之繆者攻守之策皆失爾臣視慶曆禦邊之備東起麟府西盡秦隴地長一千餘里分爲路者五而路分爲州軍者又二十有四而州軍分爲寨爲堡爲城者又幾二百皆須列兵而守之故吾兵雖衆不得不分所分既多不得不寡而賊之出也常窺其國衆合聚爲一而來是吾兵雖多分而爲寡彼衆雖寡聚之爲多以彼之多擊吾之寡不得不敗也此城寨之法既不足自守矣而五路大將所謂戰一作此守兵者分在二十四州軍欲合而出則懼後空而無備欲各留守備而合其餘則數少不足以出攻此當時所以用兵累年終不能一出者以

此也夫進不能出攻退不足一作能自守是謂攻守皆無策者往年已驗之失也臣所謂今日可用之謀者在定出攻之計爾必用先起制人之術乃可以取勝也蓋列兵分地而守敵得時出而撓於其間使我處處爲備常如敵至師老糧匱我勞彼逸昔周世宗以此策困

李景於淮南昨元昊亦用此策以困我之西鄙夫兵分備寡兵家之大害也其害常在我以逸待勞兵家之大利也其利常在彼所以往

年賊常得志也今誠能反其事而移我所害者予敵奪敵所利者在

我則我當先爲出攻之計使彼疲於守禦則我亦得志矣一無此字

凡出攻之兵勿爲大舉我每一出彼必呼集而來拒彼集於東則別

出其西我歸彼散則我復出而彼又集我以五路之兵番休出入使

其一國之衆聚散奔走無時暫停則無不困之虜矣此臣所謂方今

可用之謀也蓋往年之失在守方今之利在攻昔至道中亦嘗五路

出攻矣當時將相爲謀不重一作密蓋欲攻結虜方彊之國不先以

謀困之而直爲一戰必取之計大舉深入所以不能成功也夫用兵

至難事也故謀既審矣則其發也必果故能動而有成功也若其山

川之險易道里之迂直蕃漢兵馬之彊弱騎軍步兵長兵短兵之所

利與夫左右前後一出一入開闔變化有正有奇一無四十八字凡

用兵之形勢有可先知者有不可先言者臣願陛下遣一重臣出而

巡撫遍見諸將與熟圖之以先一無此字定大計凡山川道里蕃漢

步騎出入之一無此字所宜可先知者悉圖上方略其餘不可先言

付之將率使其見形應變因敵制勝至於諒祚之所爲宜少屈意含

容而曲就之既以驕其心亦少緩其事以待吾之爲備而且嚴戒五

路訓兵選將利器甲蓄資糧常具軍行之計待其反書朝奏則王師

暮出以駭其心而奪其氣使其枝梧不暇則勝勢在我矣往年議者

亦欲招輯橫山蕃部謀取山界之地然臣謂必欲招之亦須先藉勝

捷之威使一有其字知中國之疆則方肯來附也由是言之亦以出

攻爲利矣凡臣之所言者大略如此爾一無此字然臣足未嘗踐邊陲目未嘗識戰陣以一儒生偏見之言誠知未可以直以方當陛下勞心西事廣詢衆議之時思竭愚慮備芻蕘之一說爾

言西邊事宜第二劄子同前

臣近曾上言諒祚爲邊患朝廷宜早圖禦備及乞遣一重臣親與邊

將議定攻守大計等事至今多日未蒙降出施行臣竊見慶曆中元

昊作過時朝廷輕敵詭寇無素定之謀每遇邊奏急來則上下惶恐

倉卒指揮既多不中事機所以落賊姦便敗軍殺將可爲痛心今者

諒祚以萬騎寇秦渭兩路焚燒數百里間掃蕩俱盡而兩路將帥不

敢出一人一騎則國威固已挫矣諒祚負恩背德如此陛下未能發

兵誅討但遣使者齎詔書賜之又拒而不納使者羞媿俛首懷詔而

回則大國不勝其辱矣當陛下臨御之初遭此狂童威沮國辱此臣

等之罪也臣謂陛下宜赫然發憤以邊事切責大臣至於山川形勢

有利有不利士卒勇怯孰可用孰不可用何處宜攻何處宜守何兵

宜屯某地何將可付某兵如此等事甚多皆陛下聖慮所宜及者臣

謂陛下宜因閑時御便殿召當職之臣使按圖指畫各陳所見陛下

可以不下席而盡在目前然後制以神機睿略責將相以成功而陛

下以萬機之繁既未及此兩府之臣如臣一無二字等日所進呈又

皆常程公事亦未嘗聚首合謀講定大計外則四路邊臣自賊馬過

後亦不聞別有擘畫臣恐上下因循又如慶曆之初矣近者韓琦曾

將慶曆中議山界文字進呈此邊事百端中一端爾蓋琦亦患事未

講求假此文字爲題目以牽合衆人之論爾自進呈後尋送密院至

今多日亦未曾擬議臣以非才陛下任之政府便是國之謀臣若其

謀慮淺近所言狂妄自可黜去不疑臣亦昨因目疾懇求解職曲蒙

聖恩未許其去既使在其位又棄其言而不問使臣尸祿厚顏何以

自處所有臣前來所上奏狀欲望聖慈一無二字降付中書密院與

韓琦山界文字一處商量若其言果不足取棄之未晚今取進止

乞補館職劄子治平三年

臣竊以治天下者用人非止一端故取士不以一路若夫知錢穀曉刑獄熟民事精吏幹勤勞夙夜以辦集爲功者謂之材能之士明於仁義禮樂通於古今治亂其文章論議與之謀慮天下之事可以決疑定策論道經邦者謂之儒學之臣善用人者必使有材者竭其力有識者竭其謀故以材能之士布列中外分治百職使各辦其事以儒學之臣置之左右與之日夕謀議講求其要而行之而又於儒學之中擇其尤者置之廊廟而付以大政使總治羣材衆職進退而賞罰之此用人之大略也由是言之儒學之士可謂貴矣豈在材臣之後也是以前世英主明君未有不以崇儒嚮學爲先而各臣賢輔出於儒學者十常八九也臣竊見方今取士之失患在先材能而後儒學貴吏事而賤文章自近年以來朝廷患百職不修務一作而獎材臣故錢穀刑獄之吏稍有寸長片善爲人所稱者皆已擢用之矣夫材能之士固當擢用然專以材能爲急而遂忽儒學爲不足用使下有遺賢之嗟上有乏材之患此甚不可也臣謂方今材能之士不患有遺固不足上煩聖慮惟儒學之臣難進而多棄滯此不可不思也臣以庸繆過蒙任使俾陪幸輔之後然平日論議不能無異同雖曰奉天威又不得從容曲盡拙訥今臣有館閣取士愚見具陳一作列如別奏一作劄欲望聖慈因宴間之餘一賜審覽或有可采乞常賜留一有聖字意今取進止

又論館閣取士劄子同前

臣竊以館閣之職號爲育材之地今兩府闕人則必取於兩制翰林學士謂之內制中書舍人知制誥謂之外制今并雜學士待制通謂之兩制兩制闕人則必取於館閣然則館閣輔相養材之地也材既難得而又難知故當博採廣求而多畜之時冀一得於其間則傑然

而出爲各臣矣其餘中人以上優游養育以獎成之亦不失爲佳士也自祖宗以來所用兩府大臣多矣其間各臣賢相出於館閣者十常八九也祖宗用人初若不精然所采既廣故所得亦多也是以有文章有學問有材有行或精於一藝或長於一事者莫不畜之館閣而獎養之其傑然而出者皆爲賢輔相矣其餘不至輔相而爲一時之名臣者亦不可勝數也先朝循用祖宗舊制收拾養育得人尤多自陛下卽位以來所用兩府之臣一十三人而八人出於館閣此其驗也只自近年議者患館職之濫遂行釐革而改更之初矯失大過立法既峻取人遂艱使下多遺賢之嗟國有乏材之患今先朝收拾養育之人或已被遷擢或老病死亡見在館者無幾而新法艱阻近年全無選進臣今略具館閣取人舊制并新格則可見取人之法如何所得之人多少也

一舊制館閣取人以三路進士高科一路也大臣薦舉一路也歲月曠勞一路也進士第二人及以上及第者并制科及第者不問等第並只一任替回便試館職進士第四第五人經兩任亦得試此一路也兩府臣寮初拜命各舉三兩人卽時召試此一路也其餘歷任繁難久次或寄任重處者特令帶職此一路也今三路塞其二矣自科場改爲間歲後第一人及第者須兩任回方得試自第二人至第五人更永不試制科入第三者亦須兩任回方得試凡五七次科場未有一人中第三等者其餘等第並永不試則進士高科一路已塞矣兩府大臣所薦之人並只上簿候館職有闕則於簿內點名召試其如館閣本無員數無有闕時故自置簿來至今九年不曾點試一人則大臣薦舉一路又塞矣惟有曠勞帶職一路尙在爾

一新制館閣共置編校八員本爲館中書籍久不齊整而館職多別有差遣不能專一校正乃別置此八員故選新進資淺人令

久任而專一校讀所以先令作編校二年然後升爲校勘未是
正館職爲校勘四年後升爲校理始是正館職爲校理又一年
方罷編校別任差遣然自置編校後適值館閣取人之路漸廢
今議者遂只以編校爲取士新格往時直館直院直閣校理皆
無定員惟材是用不限人數今編校限以八員爲定以此待天
下之多士宜其遺材於下矣八員之內仍每七年方遇一員一
有之字闕而補一人以此知天下滯材者衆矣

右以臣愚見編校八員自可仍舊每有員闕令中書擇人進擬陛下
必欲牢籠天下英俊之士則宜脫去常格而獎拔之今負文學懷器
識磊落奇偉之士知名於世而未爲時用者不少惟陛下博訪審察
悉召而且置之館職養育二數年間徐察其實擇其尤者而擢用之
知人自古聖王所難然不以其難而遂廢但拔十而得一二亦不爲
無益矣况中人上下養育變成之不止十得一二也

薦司馬光劄子治平四年

臣伏見龍圖閣直學士司馬光德性淳正學術通明自列侍從久司
諫諍謹言嘉話著在兩朝自仁宗至和服藥之後羣臣便以皇嗣爲
言五六年間言者雖多而未定議最後光以諫官極論其事數陳
激切感動主聽仁宗豁然開悟遂決不疑由是先帝選自宗藩入爲
皇子會未踰年仁宗奄棄萬國先帝入承大統蓋以人心先定故得
天下帖然今以聖繼聖遂傳陛下由是言之光於國有功爲不淺矣
可謂社稷之臣也而其識慮深遠性尤慎密光既不自言故人亦無
知者臣以忝在政府因得備聞其事臣而不言是謂蔽賢掩善詩云
無言不酬無德不報光今雖在侍從日承眷待而其忠國大節隱而
未彰臣既詳知不敢不奏

青州進

言青苗錢第一劄子熙寧三年

臣伏見朝廷新制俵散青苗錢以來中外之議皆稱不便多乞罷罷
至今未蒙省察臣以老病昏忘雖不能究述利害苟有所見其敢不
言臣今有起請事件謹具畫一如後

一臣竊見議者言青苗錢取利於民爲非而朝廷深惡其說至煩
聖慈一作聽命有司具述本末委曲申論中外以朝廷本爲惠
民之意然告諭之後搢紳之士論議益多至於田野之民蠢然
固不知周官泉府爲何物但見官中放債每錢一百文要二十
文利爾是以申告雖煩而莫能諭也臣亦以謂等是取利不許
取三分而許取二分此孟子所謂以五十步笑百步者以臣愚
見必欲使天下曉然知取利非朝廷本意則乞除去二分之息
但令只納元數本錢如此始是不取利矣蓋二分之息以爲所
得多耶固不可多取於民所得不多耶則小利又何足顧何必
以此上累聖政

臣檢詳元降指揮如災傷及五分已上則夏料青苗錢令於秋
料送納秋料於次年夏料送納臣竊謂年歲豐凶固不可定其
間豐年常少而凶歲常多今所降指揮蓋只言偶然一料災傷
爾若連遇二兩料水旱則青苗錢積壓拖欠數多若纔遇豐熟
却須一併催納則農民永無豐歲矣至於於中小熟之年不該得
災傷分數合於本料送納者或人戶無力或頑猾拖延本料尙
未送納了當若令又請次料合使錢一作散數則積壓一作欠
轉多必難催索臣今欲乞人戶遇災傷本料未曾送納者及人
戶無力或頑猾拖延不納者並更不支使與次料錢如此則人
戶免積壓拖欠州縣免鞭朴催驅官錢免積久一作欠失陷
臣竊聞議者多以抑配人戶爲患所以朝廷屢降指揮丁寧約
束州縣官吏不得抑配百姓然諸路各有提舉管勾等官往來
催促必須盡錢俵散而後止由是言之朝廷雖指揮州縣不得

抑逼百姓請錢而提舉等官又却催促盡數散俵故提舉等官以不能催促盡數散俵爲失職州縣之吏亦以俵錢不盡爲弛慢不才上下不得不遞相督責者勢使之然各不獲已也由是言之理難獨責州縣抑配矣以臣愚見欲乞先罷提舉管勾等官不令催督然後可以責州縣不得抑配其所俵錢取民情願專委州縣隨多少散之不得一作必須要盡數亦不必須要闡縣之民戶戶盡請如此則自然無抑配之患矣

右謹具如前臣以衰年昏病不能深識遠慮所見目前止於如此然而青苗之議久已喧然中外羣臣乞行廢罷者不可勝數其所陳久遠利害必已詳盡而無遺矣一日陛下赫然開悟悉採羣議追還新制一切罷之以便公私天下之幸也若中外所言雖多猶未能感動天聽則見行不便法中有此三事尤繫目下利害如臣畫一所陳伏望聖慈特賜裁擇今取進止

言青苗第二劄子同前

臣近會奏爲起請俵散青苗錢不便事數內一件乞遇災傷夏料未納及不係災傷人戶頑猾拖欠者並更不俵散秋料錢數至今未奉指揮臣勘會今年二麥纔方成熟尙未收割已係五月又合俵散秋料錢數竊緣夏料已散錢尙未有一戶送納若又俵散秋料錢竊慮積壓拖欠枉有失陷官錢臣已指揮本路諸州軍並令未得俵散秋料錢別候朝廷指揮去後一作訖臣伏思除臣近所起請災傷未納及人戶拖欠不納者乞且不俵次料一事外臣今更有愚見不敢緘默臣竊見自俵青苗錢已來議者皆以取利爲非朝廷深惡其說遂命所司條陳申諭其言雖煩而終不免於取利然猶有一說者意在惠民也以臣愚見若夏料錢於春中俵散猶是青黃不相接之時雖不戶戶闕乏然其間容有不濟者以爲惠政一作濟尙有說焉一作可說若秋料錢於五月俵散正是蠶麥成熟人戶不之乏之時何名濟

願直是放債取利爾若二麥不熟則夏料尙欠豈宜更俵秋料錢使人戶積壓拖欠以此而言秋料錢可以罷而不散欲望聖慈特賜詳擇伏乞一無八字早降指揮今取進止

舉宋敏求同知太常禮院劄子嘉祐二年

臣等勘會同知太常禮院張師中近被朝命差充兩浙提點刑獄伏見太常丞集賢校理宋敏求文學該贍多識故事藏古今書史禮樂制度記傳尤多禮官博士每有所疑多就之質證其人見是知州差遣資望不淺臣等今保舉欲乞就差充同知太常禮院一次如後不如舉狀臣等甘當朝典今取進止六月日
右公在翰苑時薦宋敏求奏劄得之汪遠既云臣等則非獨薦或公自草或止預各不可知也

奏議卷第十八

畫一起請劄子

臣準勅差往河東壁畫糧草合有起請事件今具畫一如後

一臣伏詳勅旨本為河東民力困乏差臣壁畫利害竊慮州縣未體朝廷之意因而播擾臣今欲乞特降聖旨指揮下河東路候

臣到彼不得令官吏及諸色人出城迎送及不得作樂筵席

一臣準勅計置壁畫河東一路經久利害竊緣河東地分闊遠山川險絕竊慮僻遠之處不能徧至又緣本路文武官吏不少內

有久諳彼處民情事體者或在不當驛路守官致臣無由見得

臣今欲乞許臣採問官吏就近召與相見所貴詢訪兵民利病仍慮有合行事件亦乞於本路選擇幹事官員暫差勾當

一臣所授勅只是與轉運司計置壁畫邊上糧草竊緣一路州縣賦租戶口兵馬錢帛及公私財用利害要見本末文字竊慮所不在不畫時應副仍乞指揮一路州軍凡有取索文字並令畫時應副

一臣伏見國家自兵興以來言事之人多陳利害竊慮有前後上文字人內有陳河東一路事宜所言大體利害詳明朝廷未暇施行者乞於中書樞密院檢尋所上文字付臣看詳到彼參驗利害可否同日聞奏

一臣準勅除壁畫糧草外竊慮更有可以因便勾當事件伏乞令中書樞密院畫一條目付臣施行取進止

辟郭固隨行劄子

臣準勅差往河東路計置經久利害伏見新授寧州軍事推官郭固熟知邊兵民利害會隨韓琦奉使陝西近差充涇原路參謀見未赴任臣今欲乞暫將帶本人隨行候臣回日令一面發赴本任如允臣所請乞降朝旨指揮取進止

免晉絳等州人戶遠請蠶鹽牒

當所訪聞晉絳慈隰四州百姓每年所請蠶鹽並於解池請領近聞省司指揮支移往三門鹽倉請領道路遙遠竊知百姓多不願往彼般請須議專行公文者右具如前今欲牒州候牒到日請不移時疾速詳前項事理如委實省司有此指揮及百姓情願依舊送納鹽錢不請三門官鹽仰立便差人前路曉示百姓各令逐便不得勒抑監催須令前去免使麥蠶農忙之際虛勞百姓遠路艱辛兼當所已具一面施行奏聞仍請具已施行公文疾速入馬遞回報當所不管遲延住滯者

同前

當所訪聞晉絳慈隰四州百姓每年所請蠶鹽並於解池請領近聞省司指揮支移往三門鹽倉請領道路遙遠竊知百姓多不願往彼般請須議專行公文者右具如前當所雖已牒晉絳慈隰等四州請詳前項事理如委實省司有此指揮及百姓情願依舊送納鹽錢不請三門官鹽仰立便差人前路曉示百姓各令逐便不得勒抑監催須令前去竊慮百姓已到解池及前去未遠今欲牒解州安邑知縣請詳前項事理如是請鹽百姓見在彼處請就近告示逐人如依舊送納鹽錢情願不往三門請鹽者各令歸本縣仍希已施行公文回報當所者

相度併縣牒

當所體量得潞州八縣內屯留黎城壺關三縣地居僻遠戶口凋零全少詞訟盜賊逐縣虛占令佐及諸色公人色役今欲壁畫將三縣併省分割入隣近縣分可以寬減民役兼省吏員須議差官相度利害者右具如前今欲牒上黨縣鄭主簿請詳上項事理躬親遍往屯留等縣相度地里遠近接連疆畔就近可以分割併省利害務令人戶穩便仍具可以分併地里畫成紙圖及取索逐縣見在戶口賦稅

見役諸色公人數目畫一開坐連申無致鹵莽者

同前奏狀

右臣近自威勝軍至遼州體量得遼州州界東西二百五十里南北一百五十九里所管戶口主客二千七百餘戶地里人戶不及一中下小縣而分建一州四縣內榆社縣主客一千七十二戶其餘遼山縣主客五百六十九戶平城縣主客六百一十八戶和順縣主客四百五十九戶各不及一鎮人煙及潞州管內八縣亦有似此地里絕近人戶全少處虛立縣名枉占官吏每縣曹司弓手手力解子之類各近伯人外別有供應本州廳子客司承符散從及本村里正戶長者長壯丁色役人戶凋零差役繁重以臣相度可以將帶就近分割併省庶使減省官吏寬紓民役緣臣時暫經過竊慮不盡民間利害已密牒知遼州國子博士蓋平上黨縣主簿節唐等審細相度可與不可分併利害臣今前去所過州縣除邊防要切縣分外其餘地里迫窄人戶凋零絕然小縣有可以分割併省者並欲隨近遷差幹敏之官密切先行相度可與不可分割利害候臣奉使回日別具條陳數奏次

倚閣忻代州和糴米奏狀

右臣準中書劄子節文臣寮上言勸會忻代二州裏外分配博糴斛斗共致萬餘碩即今催納方及二分今來已是五月粒食踴貴之際民間斛斗甚是難得欲乞朝廷特賜恩許將已支絹帛及大鐵錢合納米粟特與倚閣候將來秋成一併送納奉聖旨令臣與河東轉運司同共相度施行者臣尋至忻代二州取索逐州元分配錢絹次第及見納見欠白米一宗文字看詳元是富弼起請為去年河東秋大熟乞朝廷較那錢銀絹廣謀糧草三司遂支雜州絹二十萬疋與河東內代州分配到五萬疋並是在京及并晉等州比及旋旋般來往復拖延直至冬末春初方行俵散至今年五月分配纔畢已是麥熟

義勇指揮使代貧民差役奏狀

右臣準中書批送下二狀河東都轉運司準康定元年九月十四日勅節文河東路強壯應見充正副指揮使內雖係第一至第三等戶者州縣更不得輪次別差色役竊緣義勇指揮使各是鄉村第一第二等力及有家活產業人戶今來一年之內只是一季上番多在本家管勾農業兼當司體量得正副指揮使等俱是上等入戶揀充最屬僥倖其餘等第人戶丁數稍多亦是一般點充義勇祗應仍更不免州縣差役所有軍員已是優便仍更依條免放州縣色役頗見影庇却鄉縣重難差役却差下等義勇人戶充州縣重難里正或衙前

夏稅起納民間豈復更有白米輸官其絹五萬疋并本州舊有絹三千餘疋共博糴白米九萬五千二百餘碩州縣從春至夏枷棒催驅只納到四萬餘碩見欠五萬四千餘石本州為催納不前遂申轉運司乞令將隔年陳米減價折納雖有此聲畫亦並無人送納蓋為過時無可收糴其忻州差配名目尤多去年一年內除稅賦和糴沿途送納外配銀送納見錢收買肉羊羊皮數目不少又有酒務十五年積壓損爛酒糟白酵分配人戶令納清醋價錢又有轉運司先配絹三千疋博糴諸色斛米除此多般科配已催納了足外方到一項大鐵錢絹博糴白米是今來臣寮起請乞行倚閣者其鐵錢絹元拋配博糴白米肆萬餘石因轉運司自見人民不易先減一半外尚有二萬八千四百餘碩後為送納不前運司又已與倚閣一半候秋熟併納外有一萬餘碩係見行催納臣遂取索本倉受納日曆點檢逐日全無人戶送納亦為過時無可收糴兼兩州百姓累經臣陳狀臣上稟朝旨親見民間疾苦又緣轉運使二人並在潞州相去絕遠不及計會商量兼勸會二州人糧見在忻州約支二年有餘代州亦約支一年半不至闕備又前去秋熟日月不遠臣已一面出榜及牒本州令倚閣候至秋熟一併送納施行訖謹具狀奏聞

等差役計其勞逸深爲不便欲乞朝廷早賜特降指揮下諸處義勇正副指揮使乞依其餘義勇體例各依等第戶例輪次差定州縣色役庶得均濟臣勘會河東一路鄉兵除係籍強壯不勾追教閱外所有刺手背義勇見管七萬二千八百七十二人每年秋冬上番教閱州縣因而諸雜役使常於秋冬邊地支移稅賦和糴遠納之時復有上番之役凡一家二兩丁者一人上州教閱一人供送一人或在州縣執役或遠地輸納稅租所存但有衰老或有全無倚托者廢業忘家不勝其苦其間惟有正副指揮使並是州縣中最有物力上等人戶却獨得免差役是下等人戶常有勞役最豪富者獨得寬優兼自兵事已來州縣差役頻併素來力及之戶累世勤儉積畜只於三五年重疊差役例各減耗貧虛逃亡破敗而州郡事多差役難減往往將第三第四等人差充第一等色役亦有主戶小處差稍有家活客戶充役勾當如此上下窘乏之際惟義勇正副指揮使豈容獨免兼自差管轄義勇以來已避免却數年色役當衆人苦於勞耗之際獨獲寬優之幸已多兼臣累過州軍體問得逐處義勇指揮使等家業例皆物力不減人丁又多若令一例差役可以貧富均濟稍寬已困之民其都轉運司起請伏乞朝廷特賜允許施行今具狀奏聞伏候勅旨

舉米光濬狀

右臣伏自準勅計置河東沁邊糧草所過州軍遍見文武官吏不少其間臨民治軍可稱邊任者絕難得人伏見西頭供奉官閣門祗候尙嵐軍使米光濬年四十餘世家代州熟知本路邊事出於將種練習兵機兼有膽勇會弓馬自到尙嵐二年處置皆合事宜昨代州寧化各爲守將非才引惹北人爭侵疆界惟尙嵐草城川正當北界要害之地去年北人來侵疆界光濬應機拒守故獨尙嵐得不侵却地土亦不張皇臣自過本軍體問軍民備得其實伏覩近降宣命指揮

差李偉替令赴闕切以邊鄙常患難材苟得其人豈宜屢易兼自有移替宣命軍民並各衆狀舉留其米光濬臣今同罪保舉再任尙嵐如再任後犯入己贓及邊防軍政但有一事敗悞並甘連坐今欲具狀奏聞伏候勅旨

米光濬斬決逃軍乞免勸狀

右臣訪聞尙嵐軍昨於四月中捉獲逃走萬勝長行張貴虎翼張貴李德等三人並係禁兵本軍勸正法司檢用編勸禁軍料錄滿五百文逃走捕捉獲者處斬訖奏其張貴等並依法處斬訖本路轉運司檢會先降令勸春夏不行斬刑合決重杖處死糾駁本軍不合斬斷見差嵐州團練判官劉述取勘尙嵐軍使米光濬等竊緣尙嵐軍地接西北二虜正是秋冬大屯軍馬之處若管軍將率斬一逃軍却遭勘罰則無由統衆漸啓兵驕况重杖與處斬俱是死刑無所失入運司守令勸糾按雖執常科兵官以軍令斬人亦是常事況米光濬等勘成公案亦不過得違制失入刑各論情定罪所犯至輕沮將率以長兵驕其損不細伏乞朝廷只作訪聞此事特降聖旨與免勸所貴邊將率知朝廷委遇之恩盡心効用兵戎畏肅不致驕恣生事謹具狀奏

乞減配賣銀五萬兩狀

右臣伏見河東路轉運司近準三司從京支撥得銀十萬兩於本路州軍配賣見錢臣體問得此銀本非運司因闕乏陳乞忽自省司特支行支撥蓋是朝廷優恤三路軍須不足特此輟賜助濟用度以舒疲民又慮朝廷訪聞今年河東二麥大熟欲使將此銀十萬兩乘時收糴軍儲有以見聖心憂念邊防寬卹民力臣昨因至寧化軍有百姓衆狀經臣馬前陳訴爲配銀數多臣遂取索本軍人戶物力次第及前後配數數目看詳本軍人戶全少城郭主客十等共三十四戶內五等已上只十五戶其餘六等已下貧弱之家共有一十九戶去年

共配銀三百兩數月枷棒催驅方能了納今年所配一千兩比常年三倍是致百姓送納不前衆狀詞訴又緣寧化軍屯兵不多本軍自有納便鹽錢及諸雜課利見錢不致闕用本軍地寒民不種麥又無夏糴倉當其軍用未闕民間難得錢時可惜慮困民力臣已牒本軍且令配賣五百兩其餘別候朝旨尙慮河東一路州軍極有見今未至闕錢及地高不種二麥無可收糴去處不宜一例急斂橫困疲民臣今欲乞聖慈特下本路轉運司令將已分銀十萬兩除見今闕錢州軍及二麥大熟合行收糴處依數配賣其餘見不闕錢及不糴夏麥處且只配一半候闕錢不得已卽漸漸分配所費少舒民力上副陛下憂民念邊之意謹具狀奏聞伏候勅旨

相度銅利牒

當所據澤州進士閻玠司法參軍萬頤等狀並爲河東鼓鑄鐵錢盜鑄者不少竊見絳州稷山垣曲縣二處皆有銅鑛欲乞遍往有銅鑛處密切詢訪採取烹煉鼓鑄錢幣者當所檢尋古跡翼城縣有唐錢坊一在縣東十五里翔皋山下又有唐王城冶在縣北平城三十六里又有曹公冶在縣東南七十五里又有廢銅窟在縣西三十里稷山縣甘祚鄉有銅冶村絳縣有唐古銅冶在縣南五十里舍山谷內垣曲縣有錢坊在縣西北九十二里程子村銅源監內自唐以來絳州舊曾鼓鑄銅錢鑪冶古跡見在其廢已久山澤銅鑛產育必多兼訪知絳州人戶多私採鑄貨賣銅器近年錢幣闕乏以來亦曾有人獻言乞尋銅鑛烹鑄前後差官尋訪多是不曉事體張皇驚擾私鑄之家避犯禁之罪不肯指引採取又鑛銅側近民居懼見官中與置爐冶各相蔽固並稱無銅所差官員又不盡心多方求訪遂使銅寶不能興發須議專委通幹之官密切求訪者右具如前欲牒絳州管界巡檢孫借職仰細詳前項事理只作界內巡警各目遍至四縣多設方略先且誘賺得民間私賣銅器一兩件然後詢求出鑛之家及

細問烹煉之法須使姦民不能隱蔽或須要私鑄之人指引烹煉卽設權宜許其免罪或別加酬獎務要求出銅寶不爲民間蔽閉候見次第密具公文回申無至張皇悞事者

再乞減配銀狀

右臣近爲三司拋降銀一十萬兩與河東諸州軍配賣臣尋體量得河東諸州軍錢糧各有準備見今不至闕乏民間卽日難得見錢遂曾具狀論奏且欲配賣一半乞朝廷特降指揮與都轉運司後來聞有朝旨只與減得些小價錢其諸州軍百姓累經臣告訴並稱銀價雖然不高各爲見錢難以變轉伏緣河東州軍昨來只是澤潞兩州二麥大熟晉絳并分石隰等處係種麥地分並只熟及三五分其秋稼尋遭夏旱垂欲焦死近方得雨只可救得四五分見今物價甚高民間窘急無異凶歲況配賣銀絹乃是緩急不得已之事今諸州軍幸各錢糧不闕不必非時抑配重擾人民只可留之以備緩急若已知縣官實爲闕乏則勵力供納自不怨嗟以理論之其銀盡可罷配又緣都轉運司已使與州軍故臣且乞只配一半日近臣不住見百姓以配銀爲苦已牒諸州軍且令先配一半其餘聽候朝旨比欲候臣到闕更自論請竊慮臣離河東後轉運司依舊催促盡令使配伏望聖慈特賜矜恤仍乞檢會臣前後奏狀早降朝旨

再舉米光濬狀

右臣近會同罪妻舉西頭供奉官閤門祗候米光濬再任岢嵐軍使竊知朝廷爲光濬病患會加體量臣昨往岢嵐親見光濬絕無病狀體問得去年偶因飲酒暫曾不安竊緣本人有心力會弓馬諳熟邊事善撫軍民況岢嵐當草城川一路地形平坦與北虜止隔界壕不比代州尚有險固捍禦控扼尤藉得人臣嘗見朝廷選擇邊將比及於武臣中求得一人常患難得而任使俟其知次第亦須年歲之間其米光濬於武臣之中不易多得在岢嵐既久又已知次第其人既

不病患又無過犯料其替去別得差遣必與今任輕重一般與其移易往來不若責之久任況知光濬亦累會乞替臣今所舉非徇光濬之私蓋爲邊防之計其米光濬伏望聖慈特加獎擢與優轉一官且令再任以防緩急可以使喚如朝廷遷官及再任後犯入己贓及邊事有所敗悞臣並甘同罪

論礬務利害狀

臣昨準三司牒繳連錄到晉州博賣生熟礬始末一宗事理及備錄中書批狀牒臣候到河東與施昌言等同共相度經久利害聞奏臣未到河東間施昌言等已一面先具相度申奏訖尋又準中書劄子送下施昌言等奏狀付臣奉聖旨更切相度具經久利害聞奏者臣看詳都轉運司狀內元牒晉州通判殿中丞榮謹相度事節似有未便遂牒并州通判秘書丞張日用就晉州計會榮謹取索一宗文字子細議定經久利害尋據張日用狀果與榮謹始初相度利害不同今具畫一如後

一晉州折博務元定年額錢一十六萬餘貫自來許客人入中紬絹絲綿見錢茶貨算請生礬上京重別煎煉後取便賣與通商路分客人後至景祐四年三司爲客旅並不入銀絹見錢只將茶貨入納遂額定令客人每年於晉州折博務入納茶一十萬斤在京權貨務入納見錢五萬貫文自此杜昇李慶等六戶管認上件年額錢茶等請生礬於京師重煎貨賣

一慶曆元年河東都轉運司始於晉州官置鍋鑊自煎熟礬一面勒杜昇等六戶依舊管認年額錢茶博算生礬一面將新煎熟礬別招客旅出賣是致杜昇等六戶稱積壓礬貨出賣不行累年拖欠課利有煩官司催督及引惹六戶詞訟不絕

一據榮謹元狀內聲說晉州起立煉礬重煎作明白熟礬貨賣慶曆元年入到絲綿見錢五萬七千八百餘貫并收在京入納見

錢及晉州入到茶錢一十一萬六千八百餘貫都收一十七萬四千六百餘貫慶曆二年收絲綿綿錢四萬二千餘貫并錢茶都收一十九萬五百餘貫慶曆三年收絲綿錢四萬七千餘貫并錢茶都收二十萬五千餘貫自晉州置煉礬務後來比祖額各有增剩況自六家撲斷後來景祐四年只賣過生礬五十五萬七千餘斤寶元元年賣過生礬七十二萬二千餘斤寶元二年賣過生礬三十五萬一千餘斤康定元年賣過生礬三十六萬五千餘斤自慶曆元年起置煉礬務重煎後來當年支賣生熟礬八十四萬九千餘斤慶曆二年支賣生熟礬八十五萬五千餘斤慶曆三年支賣生熟礬一百四萬六千餘斤比附未煎已前逐年大有增剩今相度欲乞依已前體例指揮在京權貨務及本州折博務出榜告示招召諸色客旅投狀在京入納見錢及取便於晉潞等州入納茶貨金銀錢帛絲布斛斗更不限定人數姓名斤兩多少取便依則例入折博算請晉州重煉熟礬兼問得晉慈州生礬染蠶色亦可以生使並許依則例算射與販更不拘定杜昇等六戶認納年額錢茶仍乞指揮逐戶將煎礬鍋鑊家事納官今後更不衷私重煎只令晉州煉礬務一面重煎收辦課利

一據張日用狀與晉州通判榮殿丞將慶曆元年置煎礬務後收到課利比對本州煎礬務止賣到折撲見錢五萬七千八百一十三貫八百三十三文在京六戶納折到錢一十一萬六千八百三十八貫八百五十五文慶曆二年本務止賣到四萬二千一百八貫一百一十文在京六戶收到一十四萬八千四百八十六貫五十五文慶曆三年本務收到四萬七千二百三十三貫七百五十五文在京六戶收到一十五萬八千三百四十五貫三百五十五文是煉礬務出賣得錢常少六戶入納數目常多遂將三

年置到煎鑿務通比皆不過五萬貫及四萬貫今年自正月一日至六月終收到入絲課利錢一千九百五十九貫有零課利不敷惟是六戶逐年納數常多若遂放令六戶逐便必致大段虧少課利況今用兵之際若行寬法客人有利必歲額遂增今將三年止於五萬數目遂便止令官實必恐大虧年計今乞廢罷晉州煉鑿務一就令在京六戶管認年額錢茶所貴經久通行逐年入得茶貨充備河東路并汾等十餘州軍支折和糴有備不致誤闕

右謹具如前臣今將二司錄到一宗始末文字子細看詳蓋由河東都轉運司改法官自煉鑿出賣見一時之小利致經久之難行從初本為課額不敷遂定為錢茶十五萬數許六戶管認即不當更自官賣與其爭利若云官賣有利則六戶便合除免年額臣今看詳榮謹張日用等二人狀內開說自官置煉鑿務後來逐年所賣生熟鑿折撲到見錢數目蓋是榮謹從初將生熟兩色鑿博賣到錢數姦合比算便謂自起立煉鑿務後來年額課利增盈遂欲罷六戶算請生鑿舊額及榮謹再與張日用等子細將生熟兩色鑿課利遞年比類其熟鑿自慶曆元年只賣及五萬二年二年已及四萬貫有零今年自正月一日至六月終半年只賣及一千貫若將生鑿貫利與熟鑿姦合算數則似有增盈若各別比較則熟鑿賣錢全少又一年虧於一年今若依榮謹罷賣生熟鑿即據近年課利虧減次第必慮向去無客算請虧陷官中年額錢茶臣今相度欲乞官罷自煎熟鑿出賣只令杜昇等大戶依舊管認年額入納錢茶十五萬數將見今晉州已煎下熟鑿并生鑿相兼其六戶本為官實熟鑿侵爭其利致其積壓貨賣不行今若官罷自賣則六戶更難詞說如此則官中雖歲失三五萬貫自賣之利而於錢茶十五萬舊額卻有準的不至虧陷必若不欲抑勒六戶認額即乞未立定年額但選差清強官吏初新一

面博賣熟鑿候三二年取一年為定額蓋緣熟鑿見已課利大虧若自新官實必不能敷及遞年與生鑿俱賣時常額免使監臨官吏枉遭決罰年計用度虛為指準於此二說伏乞朝廷裁擇施行

論西北事宜劄子

臣昨在河東聞北虜事宜說者多端而少實其役兵動衆修城掘壕凡所興為則有蹤跡昨三月四月之間於北界地各大柳谷銀盆口與蕃族相殺契丹累敗折却主將數人見今抄點中軍秋冬必大交戰此亦說者多同而不虛惟云夾山部落叛歸元昊契丹與西賊相攻又云西賊見在河灣會劄寨兵馬尤多或云二虜詐謀欲合而攻我此一事則說者雖多而以人情料之皆不可信自西賊叛我以來更事契丹甚謹蓋已與中國交爭則屈己事隣乃其常理二虜自來未聞釁隙而忽納夾山小族反與契丹立為大敵但恐元昊黠羌不為此事以此言之不可信也契丹若寇邊鄙當先自河北不應便出河東若云出吾不意則兵釁未成必未突然入吾險地是北虜必不攻河東矣西賊二年之間累次遣人通好國家過當許物已多今盟約垂成而忽借契丹數百里之路崎嶇勞師入吾險固以此而言是西賊必不攻河東此其不可信者也然北戎抄點人馬聲張已久今漸向秋必已聚集邊臣但見虜兵聚在界上不得不至驚疑惟在朝廷料敵制謀養威持重不為輕發使虜不可窺則得計矣其密為禦備次第臣今具管見畫一如後

一據今事宜不問北虜攻夾城與元昊但不過夷狄自相攻耳然虜兵在我境上不可不為支準惟當持重以待未宜便若寇至而大集窮邊虛成自擾但訓兵練卒於并忻嵐憲屯結以俟大原去忻州一日半可至忻州去代州一日半可至嵐州去岢嵐一日中可至憲州亦然今以兵屯忻并而應援代州屯嵐憲而應援岢嵐賊至則使代州岢嵐堅壁清野待其師老徐以忻嵐

等兵擊之此用兵之法也如此則虜來不失應敵不來不至虛驚其代州岢嵐但用去年防秋兵數可矣惟治器械擇將帥此非倉卒可辦宜急爲之具

一河東沁邊州軍器械全然不堪臣昨到彼見逐處弓弩無十數枝可施用者問其何故云爲省司惜筋膠支請不得縱支得卽角短筋碎不堪使用久無物料修治是致廢壞臣亦知京中筋膠角絕少然若遍支與諸州軍卽恐不及欲乞且只支與沁邊州軍仍乞選差幹事官逐州自遣一員上京支請便令自監修補其諸州木羽箭臣曾逐色用草人被甲去三十步以硬弩射之或箭幹飛掉不至或箭頭卷折不入甲此乃臨陣候事之物十無一二堪者惟舊竹箭雖翎損鏃生秀然射之亦能入甲又數目不多亦乞委官揀點脩換

一代州知州康德興老懦不濟事臣方欲到京奏乞替却近知已差張元然德興却充并代鈴轄只此職亦非德興所堪乞與一近裏小處知州鈴轄別選差人

一代州諸寨主監押三十餘員內無三四人能幹而曉事者伏乞早行替換仍乞於近日臣寮準密院劄子舉到堪充將領人內差充寨主監押

一岢嵐軍地接草城川口無險可恃而城小壕淺須合增城浚壕乞降指揮下河東那打白草廂軍及本軍係役兵士早併力脩葺臣曾兩狀奏乞米光濬且令知軍蓋光濬已知彼中次第當事宜之際若李緯乍到恐處事未盡合宜又緯必非岢嵐久住之人其米光濬伏乞檢會臣前奏施行取進止

論宣毅萬勝等兵劄子

臣昨準勅差往河東續准樞密院劄子奉聖旨所到州軍體量諸軍指揮自來習學武藝并教閱戰陣次第精與未精緩急堪與不堪陣

敵使喚者臣尋至諸州軍令主兵官吏依常式教閱觀其精粗所用陣法除四官陣舊法外亦有自爲新陣者大抵只是齊得進退不亂行伍而已諸處所較不多其陣法則皆未可用惟有踏硬射親最爲實藝見今經略司分差主將諸州巡教以三等弓弩拍試漸次亦當精熟然而主將不一器械不精此二事須更別爲制置其諸軍禁兵共九萬五千餘人內駐泊兵三萬餘人惟萬勝最多最不精本路就糧禁兵六萬餘人惟宣毅最多最不精臣今欲乞定主將精器械此二事條目甚多容臣續具畫一其宣毅萬勝等兵臣今先具起請如後

一臣勘會河東駐泊禁兵六十八指揮共三萬二千餘人內萬勝二十指揮一萬一千一百餘人當初招募倉卒不能精擇此中外共知自到河東已及三年其射親踏硬弩比初到則漸慣熟但其人大小強怯不等又不耐辛苦其事藝勉力不及河東最下清邊而料錢請受與最上神衛等見今多差在河外五寨緣請受既大於他軍則重難倫次須至差撥其使喚乃不及下軍緩急常憂敗候臣今欲乞於河東見在廂軍三萬人數內揀少壯有勇力者增置清邊及於京師差撥三百料錢禁軍充足一萬人數抵替萬勝抽回兼其人到河東已二年餘人各有辛苦思歸之意

一臣勘會河東本路就糧禁兵共一百四十九指揮六萬二千七百餘人內宣毅四十四指揮二萬二百餘人宣毅招揀不精無異萬勝惟河東稍勝諸路蓋土人天性勁勇耐辛苦然終是不及自投軍者其農夫生梗難以教訓至今全未堪使喚臣到澤州有一指揮只揀出九十餘人呈教尙亦生疎威勝軍兩指揮內一指揮絕然不成次第問之云差出近方歸本營蓋河東多將宣毅差在巡檢下及諸處便不教閱臣今欲乞將見在宣毅

委河東都轉運使親至諸州將短小怯弱者先揀退充廂軍其餘堪教者不得差往巡檢下及防河寨柵不教閱處專令逐州軍教一二年必漸可用

論麟州事宜劄子

臣昨奉聖旨至河東與明鑄商量麟州事緣臣未到間鑄已一面與施昌言等先有奏議尋再準樞密院劄子備錄鑄等所奏令臣更切同共從長相度臣遂親至河外相度利害與明鑄等再行商議乞那減兵馬人數可以粗減兵費已具連署奏聞此外臣別有短見合盡條陳其利害措置之說列爲四議一曰辨衆說二曰較存廢三曰減寨卒四曰委土豪如此則經久之謀庶近禦邊之策謹具畫一如後一曰辨衆說者臣竊詳前後臣寮起請其說有四或欲廢爲寨名或欲移近河次或欲抽兵馬以減省饋運或欲添城堡以招輯蕃漢然廢爲寨而不能減兵則不若不廢苟能減兵而省費則何害爲州其城壁堅完地形高峻乃是天設之險可守而不可攻其至黃河與府州各纔百餘里若徙之河次不過移得五七十里之近而棄易守難攻之天險以此而言移廢二說未見其可至如抽減兵馬誠是邊議之一端然兵冗不獨麟州大弊乃在五寨若只減麟州而不減五寨與不減同凡招輯蕃漢之民最爲實邊之本然非朝廷一力可自爲必須委付邊臣許其久任漸推恩信不限歲年使得失不繫於朝廷之急而營緝如其家事之專方可收其遠効非二年一替之吏所能爲也臣謂減兵添堡之說近之而未得其要

二曰較存廢者今河外之兵除分休外尙及二萬大抵盡河東二十州軍以贍二州五寨爲河外數百邊戶而竭數百萬民財賊雖不來吾已自困使賊得不戰疲人之策而我有殘民斂怨之勞以此而思則似可廢然未知可存之利今二州五寨雖云空

守無人之境然賊亦未敢據吾地是尙能斥賊於二三百里外若麟州一議移廢則五寨勢亦難存兀爾府州便爲孤壘而自守不暇是賊可以入據我城堡耕牧我土田夾河對岸爲其巢穴今賊在數百里外沿河尙費於防秋若使夾岸相望則泛舟踐冰終歲常憂寇至沿河內郡盡爲邊戍以此而慮則不可不存然須得存之術

三曰減寨卒者臣勘會慶曆三年一年用度麟州用糧十萬餘石草二十一萬餘束五寨用糧一十四萬餘石草四十萬餘束其費倍於麟州於一百二十五里之地列此五寨除分兵歇泊外尙有七千五百人別用二千五百人負糧又有并忻等十州軍百姓輸納外及商旅入中往來其冗長勞費不可勝言逐寨不過三五十騎巡綽伏路其餘坐無所爲蓋初建五寨之時本不如此寨兵各有定數建寧置一千五百人其餘四寨各止三百至五百今之冗數並是後來增添臣謂今事宜稍緩不比建寧之初然且約舊數尙不至冗費臣請只於建寧留一千人置一都巡檢其鎮川中墩百勝三寨各留五百其餘寨兵所減者屯於清寨堡以一都巡檢領之緣此堡最在近東隔河便是保德軍屯兵可以就保德軍請糧則不煩輸運過河供饋若平日路人宿食諸寨五百之卒巡綽有餘或些小賊馬則建寧之兵可以禦捍若賊數稍多則清寨之兵不失應援蓋都不去百里之內非是減兵但那移就食而已如此則河外省費民力可舒

四曰委土豪者今議麟州者存之則困河東棄之則失河外若欲兩全而不失莫若擇一土豪委之自守麟州堅險與兵二千其守足矣况所謂土豪者乃其材勇獨出一方威名既著敵所畏服又能諳敵情僞凡於戰守不至乖謀若委以一州則其當自視州如家豈已休戚其戰自勇其守自堅又其既是土人與其

風俗情接人賴其勇亦喜附之則蕃漢之民可使漸自招集是外能捍賊而戰守內可輯民以實邊省費減兵無所不便比於命吏而往凡事仰給於朝廷利害百倍也必用土豪非王吉不可吉見在建寧塞蕃漢依吉而耕於塞側者已三百家其材勇則素已知名况其官守自可知州一二年間視其後効苟能善守則可世任之使長為捍邊之守

右臣所陳乃是大計伏望聖慈特賜裁擇若可以施行則紆民減費之事容臣續具條列取進止

乞罷鐵錢劄子

臣準中書劄子備錄臣寮四狀並為上言河東大小鐵錢事奉聖旨相度利害聞奏者臣尋至河東取索晉澤二州鑄錢監及諸州軍見使鐵錢數又將都轉運司供到慶曆二年一年都收支錢數約度用度多少及探問軍民用鐵錢便與不便今具利害畫一如後

一見在大小鐵錢數大鐵錢自起鑄至目下共鑄到四萬四千八百餘貫小鐵錢自起鑄至目下共鑄到一十一萬七千七百餘貫是大小鐵錢未及六十萬貫銅錢數見在官私行用

一大小鐵錢官本及淨利數目晉州大錢計用一萬七千八百餘貫省陌銅錢官本鑄成大錢二萬八千八百餘貫當二十八萬八千餘貫銅錢凡用一萬七千餘貫本得二十七萬餘貫利其利約一十五倍有餘晉州小錢計用四萬六千貫足陌銅錢官本鑄成一十一萬四千五百餘貫凡用四萬六千貫本得六萬八千餘貫淨利其利一倍有餘澤州大錢計用六千四百餘貫省陌銅錢官本鑄成大錢一萬六千餘貫省當一十六萬餘貫銅錢凡用六千四百餘貫本得一十五萬三千八百餘貫利其利二十三倍有餘澤州小錢計用九百八十貫省陌銅錢官本鑄成四千餘貫凡用九百餘貫本得三千餘貫利其利兩倍

一都轉運司一年收支錢數實收諸雜課利客便賣鹽糞斗秤夏秋稅出糶斛斗賣疋帛絲綿銀進納雜收等錢二百一十七萬二千二百三十貫實支係隨衣添支特支料錢句設公使國忌獄空際神地理脚錢買羊馬糧草客便招軍人戶和糶糶本雜支等錢一百九十九萬八千四百一十四貫

右謹具如前臣今相度大小鐵錢其可廢者有五據都轉運司慶曆三年一年收支實數比算實收二百一十七萬二千餘貫實支一百九十九萬八千餘貫是每歲只將河東一路實收錢支遣自足外尚有一十七萬四千餘貫剩數其大小鐵錢可以罷鑄一也小鐵錢將本利計算其利甚薄不過一倍略將鑄造工課約算兩監逐日共鑄不過四百貫文一歲不過鑄得十六萬貫內除約六萬貫為官本外只獲淨利十萬貫若罷大錢而只用小錢是一歲為十萬貫錢而壞銅錢舊法陷民刑戮者不絕其大錢利既博至二十餘倍議者皆謂其利厚於黃白術雖有死刑不能禁止臣昨在河東於提刑司取索得犯私錢人數已五火自臣出界後又續供到新捉獲二火是小錢利薄不足鑄大錢犯法者日漸多皆可以罷鑄二也今開厚利之門而致人死法則誘愚民以趨死若貸其死則犯者愈多急於捕察則良民一例搔擾縱而緩禁則民不勝姦是深法不可緩法又不可捕察又不可縱之又不可以此而言其可罷三也用之既久幣輕物貴惟姦民盜鑄者獲利而良民與官中常以高價市貴物是官私久遠害深其可罷四也臣勘會河東十九州軍凡四十九處新開沽酒務據轉運司供到每月約收二萬貫有餘計一歲合得二十四五萬貫又麟州元許入中七萬石斛昨來為入中數多無處收貯見移於府州入中日近明鑄又減放馬軍歸京是利入之數漸多物之兵日減此其可罷五也今見在官私鐵錢共不過六十萬數既未多罷之甚易况河東一路二十二州軍贍廂禁兵共十二三萬略計所

闕不多不比陝西事體其大小鐵錢伏乞特罷鑄造行用取進止

麟州五寨兵糧地里

河外糧倉共二百一十九萬三千七百石束
 振三千四萬二千三百石
 單八十五萬三千四百石
 已上六月中旬見在馬料不在數

麟州 四千六十
 臣今欲乞
 留二千石

麟州 一人
 臣今欲乞
 留二千石

麟州 一千二百人
 臣今欲乞留五百人

麟州 二千七百八十八人
 臣今欲乞留一千人置寨
 固巡檢員額之

河外馬步禁軍二萬八千三百一十二人

馬軍二千三百三十六人

馬一千四百五十三疋

步軍二萬六千一百七十五人

根一萬九千四百石

支本堡一年

支本堡二年

支本堡三年

支本堡四年

支本堡五年

支本堡六年

支本堡七年

支本堡八年

支本堡九年

支本堡十年

南

根一萬三千八百石

支本堡一年

支本堡二年

支本堡三年

支本堡四年

支本堡五年

支本堡六年

乞免諸州一年支移劄子

中

七百二十七人
臣今欲乞留五百人

百勝寨

一千二十七人
臣今欲乞留五百人

清寨堡

一千七百七十七人
臣今欲乞將麟州并四寨所減三千三百人於此寨及保德軍駐劄
緩急應調四寨及麟州其兵并清寨本兵共七千人仍乞置五寨
都同巡檢員額之

府州

六千七百三十二人
臣已與明鑑等共奏乞減千人過河屯營保軍
本州在清寨界過河於保德軍界此糧草不會支動

臣昨至河東體訪一路百姓貧弊勞擾本為河外麟府二州闕少軍糧遂於近裏二十州軍遞相支配今來麟州見在兵馬糧可支三年

府州見有一十三萬石不支糧米諸寨各有糧不少兼臣將慶曆三年轉運司拋配秋稅支移數目勘算得今年博羅斛斗可以減放和

糴可以不支過河如此則少紓民困大息怨嗟其科配減放次第今具畫一如後

一河外麟州見有三年糧府州兵士見於河南保德軍請給府州

見有不支糧一十三萬石

一去年并忻嵐憲石州岢嵐火山靈化保德等軍凡九處和糴斛

斗共十四萬二千餘石支往河外麟府二州送納今來河外糧

斛已多上件九州軍和糴只乞於保德軍送納

一去年并忻汾遼潞晉絳澤石隰慈等州威勝平定軍凡十三處

博羅斛斗共一十七萬六千餘石往保德軍送納今來河外既

不支移那得并忻等九州軍和糴十四萬石於保德軍納則此

十三處博羅可以減放

乞不配賣醋糴與人戶劄子

臣昨至忻州見百姓人戶經臣出頭怨嗟告訴為轉運司將十五年

積壓損爛酒糟俵配與人戶要清醋價錢緣已配納了當臣方欲奏

乞今後不得抑配續據石州狀申本務見管醋糟六千餘石本州見

取索在州及諸縣坊郭鄉村酒戶第等及州縣色役公人姓名欲行

俵配次其糟每斛價錢二十五文足陌緣臣已離河東只曾行移文

字且令未得俵配別候指揮臣欲乞特降朝旨下轉運司今後醋糟

只許官務造醋沽買及令百姓取便買醋醞醋不得抑配人戶其糟

所得之利不多但虛為搔擾以斂怨嗟伏望聖慈特賜矜免其石州

醋糟尚慮本州已行俵配即乞特與減落一半價錢令漸次送納

河東奉使公草卷上

河東奉使奏章卷下 集一百十六

乞減放逃戶和糴劄子

臣伏見河東百姓科配最重者額定和糴糧草五百萬石往時所糴之物官支價直不虧百姓盡得茶絲見錢自兵興數年糧草之價數倍踴貴而官支價直十分無二三百姓每於邊上納米二斗用錢叁伯文而官支價錢三十內二十折得朽惡下色茶草價大約類此遂致百姓貧困逃移而州縣例不申舉其本戶二稅和糴不與開閣稅則戶長陪納和糴則村戶均攤已逃者既破其家而未逃者科配日重臣至代州崞縣累據百姓陳狀其一村有逃及一半人戶者尙納全村和糴舊額均配與見在人臣兼會差大理寺丞史譚檢得嵐州平夷一縣已逃未檢人戶共四十一戶諸州似此者甚衆臣今欲乞下轉運司差清幹官二兩人於并代等十五州軍係有和糴處檢括已逃人戶其逐戶下二稅和糴額定數目並與倚閣候招輯得人戶歸業各令依舊均配仍許諸縣人戶見均攤着和糴及戶長陪納逃稅者列狀自陳所貴重困之民免此重疊科配

請耕禁地劄子

臣昨奉使河東相度沿邊經久利害臣竊見河東之患患在盡禁沿邊之地不許人耕而私糴北界斛斗以爲邊儲其大害有四以臣相度今若募人耕植禁地則去四大害而有四大利河東地形山險輦運不通邊地既禁則沿邊乏食每歲仰河東一路稅賦和糴入中和博斛斛支往沿邊人戶既阻險遠不能輦運遂資金銀絹銅錢等物就沿邊貴價私糴北界斛斗北界禁民以粟馬南入我境其法至死今邊民冒禁私相交易時引爭鬪輒相斫射萬一興訟遂構事端其引惹之患一也今吾有地不自耕植而偷糴隣界之物以仰給若敵常歲豐及緩法不察而米過吾界則尙有可望萬一虜歲不豐或其與我有隙頓嚴邊界禁約而閉糴不通則我軍遂至乏食是我師飢

飽繫在敵人其患二也代州崞嵐寧化火山四州軍沿邊地既不耕荒無定主虜人得以侵占往時代州陽武寨爲蘇直等爭界訟久不決卒侵却二三十里見今寧化軍天池之側杜思榮等又來爭侵經年未決崞嵐軍爭掘界壕賴米光濬多方力拒而定是自空其地引惹北人歲歲爭界其害三也禁膏腴之地不耕而困民之力以遠輸其害四也臣謂禁地若耕則一二歲間北界斛斗可以不糴則邊民無爭糴引惹之害我軍無飢飽在敵之害沿邊地有定主無爭界之害邊州自有粟則內地之民無遠輸之害是謂去四大害而有四大利今四州軍地可二三萬頃若盡耕之則其利歲可得二五百萬石伏望聖慈特下兩府商議如可施行則召募耕種稅入之法各有事目容臣續具條陳取進止

乞減樂平縣課額劄子

臣昨至河東據平定軍知樂平縣孫直方狀爲本縣酒稅課利錢舊額四千一百餘貫本縣不當驛路舊有兵士四指揮軍營在縣自慶曆三年三月內移起軍營往并州在縣只有居民百餘戶人煙既少客旅不來酒稅課利無由趁辦本軍亦會申奏乞行減額省司下轉運司保明尋蒙轉運司令將起移軍營後一年比較重立租額只及二千八百餘貫亦會差遼州知州孟濟定奪及轉運司保明申省省司指揮勸本縣收趁課利不得減額臣勘會平定軍樂平縣最處孤僻若無軍營人戶絕少實難趁辦課利見今專副等逐月逐季逐年各有比較決責未嘗虛日及虛令監官殿降考第臣今欲乞特降勅旨下轉運司令自起却樂平縣軍營後來一年內所收課利立爲租額與免舊額虛數所貴專副不至重疊被刑監官虛負殿罰取進止

乞放麟州百姓沽酒劄子

臣伏見麟州元是百姓沽酒自經事宜後來轉運司壁畫官自開沽臣昨令本州勘會一年自去年十二月開沽至今年六月用米麴本

錢二千五百貫所收淨利只及一千八百貫然官私勞費不少自并
嵐等州造麴千里般運又配百姓造酒黃米遠行輸納麟州自經賊
馬後來人戶纔有二百家又權其沽酒之利市肆頓無營運居者
各欲逃移今來麟州既不移廢則凡事却須葺理其沽酒之利官中
所得不多而勞費甚大今欲乞令百姓依舊開沽所貴存養一州
人戶漸成生業今取進止

舉孫直方奏狀

右臣伏見平定軍知樂平縣事著作佐郎孫直方進士及第為性明
敏有吏材臣昨至河東備見直方治縣事善狀臣今保舉堪充大藩
通判兼臣勘會代州通判李舜元到任已及二年三箇月有餘見今
北面事宜代州最為要地尤藉得人伏乞就差孫直方充代州通判
如後犯正入己贓及職事敗闕並甘同罪謹具狀奏聞

條列文武官材能劄子

臣昨奉勅差往河東體量得一路官吏才能善惡其間文武官共二
十五人各有所長堪備任使今具姓名條列如後

一戰將八人緩急可以使喚

如京使孟元知兵書疎財善撫士然未經戰陣

內殿承制郝質沉厚有勇善用兵累經戰陣

北作坊使田肅有勇累戰有功

崇儀副使王吉臣已有論薦

禮賓副使張岳河西人有武勇智謀善戰

百勝寨主折繼長有勇好戰曾立功

權鎮川堡陳懷順府州人有勇好戰

麟州兵馬都監田曠有勇好戰

一武臣中材幹者四人

岢嵐軍使米光濬已曾薦舉

知保德軍劉承嗣

建寧寨主陳昭兼有勇好戰未曾行陣

岢嵐軍五谷巡檢夏侯合

一通判中五人可以升陟差使

并州通判秘書丞張日用通曉民事

嵐州通判殿中丞董沔清潔勤於吏事

寧化軍通判大理寺丞武陶勤幹

屯田員外郎麟州通判孫預清勤

保德軍通判贊善大夫吳中廉幹

一知縣令州縣職官中材幹可用者十人

著作佐郎知平定軍樂平縣事孫直方

代州崞縣令王旭

府州簽署判官公事史譚

絳州稷山縣令劉處中

潞州屯田縣令張曜縣尉王荀龍

大理寺丞知并州陽曲縣事張景儉

知并州大谷縣張伯玉

大理寺丞知榆次縣吳天常

岢嵐軍嵐谷縣尉安吉

右謹具如前伏乞聖旨送中書樞密院紀錄姓名差使今取進止

舉劉義叟劄子

臣昨奉勅差往河東伏見澤州進士劉義叟有純樸之行為鄉里所
稱博涉經史明於治亂其學通天人禍福之際可與漢之歆向張衡
即顛之徒為比致之朝廷可備顧問伏乞特賜召試或不如所舉臣
甘當朝典今取進止

繳進劉義叟春秋災異奏狀

右臣近曾薦舉澤州進士劉義叟學通天福福之際如漢欽向張衡郎顛之比乞賜召試升之朝廷可備顧問臣今有收得劉義叟所撰春秋災異集一冊其辭章精博學識該明論議有出於古人文字可行於當世然止是義叟所學之一端其學業通博詰之不可窮屈其文字一冊臣今謹具進呈伏望聖慈下兩制看詳如有可採乞早賜召試謹具狀奏聞

論代州開壕事宜劄子

臣昨到代州見其城壁甚堅壕雖三重而地高無水惟一面有城中棄水停聚其壕不足恃以爲固然尙爲三重高下相連猶可以隔奔突近年有臣寮擘畫欲掘出重岸通爲一壕以臣相度若壕無水而通爲一則坦爲平地不異無壕又工料極大去年大役鄉兵所開未及三二分又治險爲平非自固之計兼工大猝難了當虛勞人力欲乞特賜止絕取進止

舉張旨代王凱劄子

臣昨至河東伏見西京作坊使王凱見在麟府路勾當軍馬司公事此一職乃是河外將領其任非輕凱雖將家委性柔謹雖聞前後累經戰鬪而詢訪彼中衆議皆云得功非實冒賞最多見今勾當軍馬一司雖無大過而軍民將校不得其情衆口紛然莫能服衆臣亦累詢其蘊畜絕無所長緩急邊防事宜必不能指揮諸將奮勇立功况其在彼將及二年伏見河東提點刑獄職方員外郎張旨爲人有心力膽勇材幹可稱先在府州經第一次圍閉倉卒之際應變有謀至今府人思之不已兼諳知邊事曉達軍情臣今保舉堪充邊將任使欲乞特出聖恩與超換一近上使名令代王凱庶幾緩急可捍邊防如蒙朝廷擢用後犯正入己贓及邊事敗誤臣並甘同罪今取進止

論不才官吏狀

臣昨往河東一路所見官吏內有全然不任其職須至替移者今具

姓名如後

一知澤州度支郎中直史館鮑亞之年老昏昧視聽不明行步艱澁本州職事全然不治昨轉運使劉京至澤州決遣公人手分六十餘人兼信縱手分拆諸縣村學要蓋州學及斂掠人戶錢一千餘貫充蓋造州學使用等事件甚多其人西京廣有家活而昏病之年貪祿不止伏乞轉與一致仕官

一知汾州虞部郎中范尹年老昏昧不能檢束子弟在州販賣播擾人民伏乞特與一致仕官

一憲州通判國子博士劉與年及七十行步艱難精神昏昧雖已得替伏乞特與一致仕官

一平定軍樂平縣監酒借職石貴本是軍中出職因捉賊不獲降充監當其人不識字又是獨員如允臣所奏乞下樞密院三班著爲定令

右謹具如前今取進止

乞罷刈白草劄子

臣昨至河東問得去年轉運司擘畫於諸州軍差兵士收刈白草數目雖多然其害不淺臣所過州軍皆稱白草爲患蓋河東山嶮地土平闊處少高山峻坂並爲人戶耕種惟荒閑草地去人絕遠兼又多兵士收刈般擔地里闊遠工課不辦其兵士往往逃亡州縣遂差鄉兵及村民配數般擔百姓避見遠般辛苦裹費又多遂只將稈草送納非次更成一種科配其納下真白草者支與軍人餵馬不及稈草又皆不樂及草場中不耐停留專副有損爛陪填之患兼虛占却雜役兵士諸處脩補城壁諸般工役處處闕人不便事多臣今略舉數事如後

一據遼州狀分析勘會在州及外縣寨專副楊最等下山白草共肆萬柒仟伍伯陸拾肆束內在州每月約支叁伯壹拾叁束及

外縣寨每月約支壹伯肆拾餘束約得向去捌年零柒箇月支遺其上件山白草自去年八月已後至年終本州及外縣鎮差兵士并散從官步奏官承符手力諸色公人等入山收刈到逐旋般運赴場送納積疊收管其上件山白草若經今夏雨水必是大段損爛不堪經久存留委是諸賢

一臣昨六月中旬內至保德軍聞得本處白草差百姓公人般擔至今尚未了疑其白草是去年秋間刈下積露田野必須損爛因探問得村外白草已並無其差配着擔草人戶却於請白草兵士處旋買納官每一馱子二百文省

一據苛嵐軍狀自八月二日起首至十月三日住止元差兵士一千二十八人至放散日逃亡一百三十六人只有九百餘人入役收刈到草玖萬二千九百餘束將軍人請受諸般錢物計七千三百七十二貫文若比算買草價錢每束及七十九文省

一平定軍元差宣毅兵士刈草本軍為兵士辛苦逃亡及自縊者一月中四五十人遂放散兵士差兩縣村民往往只將稗草送納折州亦為刈下無人般擔配與百姓人戶亦多將稗草送納右具如前其諸州軍各稱白草不便不能一一條列伏乞特降朝旨速令止絕緣臣昨七月初離汾州見轉運司已抽會絳兵士稱於淤邊刈草竊恐即今已下手收刈乞早降指揮放散况勘會本路一年

秋稅和糴等草共五百餘萬東慶曆二年一年只支四百餘萬今年馬軍抽減歸京後馬數少於去年其稗草等數必不至闕少今取進止

乞免浮客及下等人戶差科劄子

臣昨見河東人民疲弊道路怨嗟蓋自兵革一興調餉繁重今兵未能減用未能節但當卹其貧困稍得均平則民力粗寬怨嗟可息往時因為臣寮起請將天下州縣城郭人戶分為十等差科當定戶之

時繫其官吏能否有只將堪任差配人戶定為十等者有將城邑之民不問貧窮孤老盡充十等者有只將主戶為十等者有并客戶亦定十等者州縣大小貧富既各不同而等第差科之間又由官吏臨時均配就中僻小州縣官吏多非其人是小處貧民常苦重斂河東諸州并州最大遼州最小并州客戶不入等第遼州盡入等第臣昨至遼州人戶累有詞狀遂牒本州據州狀稱檢估得第七等一戶高榮家業共直十四貫文省其人賣松明為活第五等一戶韓嗣家業二十七貫文第八等一戶韓祕家業九貫文第四等一戶開餅店為活日掠房錢六文其餘嵐憲等州苛嵐寧化等軍並係僻小凋殘之處其十等人戶內有賣水賣柴及孤老婦人不能自存者並一例科配臣勘會慶曆二年一年諸州軍科配惟并遼州火山軍二處第九第十兩等人戶免得配率若并州免得則他處豈可不免蓋由官吏臨時均配是致不均臣今欲乞特降朝旨下河東路一概將貧民下戶減放差配今具畫一如後

一并州最大在城浮客不入等第遼州最小縣郭浮客盡充等第臣今欲乞將遼州客戶比類并州特與放免等第其苛嵐保德軍嵐忻等州亦有浮客充等第者緣彼處浮客當屯兵之地經營物力過於主戶尚堪差配遼州荒僻與近邊州郡不同乞特與放免

一臣體問得河北陝西二路州縣科配止於第六第七等今河東除并遼火山三處外並差配下及十等臣今欲相度并晉絳潞汾澤等六州在河東物力比他州富實其第九第十兩等人戶乞與免差配其餘州軍第八第九第十等入戶並乞特與放免差配取進止

乞免膏頭酒戶課利劄子

臣竊見河東買撲酒戶自兵興數年不計遠近並將月納課利支往

邊上折納米粟近又轉運司擘畫將課利稍多者四十九處並已官自開沽其餘衙前百姓買撲者皆是利薄之處其衙前公人差遣重難百倍往日而酬獎場務有利處官已奪之其見今利薄場務又更有邊遠折納陪填之費兌欠課額破家業被鞭撲不堪其苦其百姓買撲者自兵興以來苦於支移輸納並無人肯承替有開沽五七年十年已上者家業已破酒務不開而空納課利民間謂之蒿頭供輸臣昨至忻州據百姓陳明狀稱元有蓋順天禧四年買撲酒務至乾興元年身死家破什保人陳明等蒿頭代納至今二十五年臣遂差導縣令王旭於忻代二州一點檢酒戶見今開沽及即日正各身死人戶蒿頭代納者尋據王旭狀列一十八戶係正各身死什保人開沽送納十二戶係並無開沽只是什保及干繫公人里正等陪納及什保人家破後來承買什保人產業戶下蒿頭代納臣略行勘會二州已有三十戶則諸州其數極多臣今欲乞下轉運司差官遍詣諸州點檢應有蒿頭供納者並與開閣放免係代保人開沽并正各買撲見開沽人並乞特與權免支移邊上三二年所貴利薄酒戶稍獲寬舒況今沿邊糧儲不至闕少

舉陸詢武劄子

臣昨奉使河東得西頭供奉官并代州駐泊都監米光濬西京作坊使并代州鈐轄王凱四方館使并代州鈐轄張亢內殿承制并代州都監郝質供備庫使并代州都監田朮崇儀副使麟府路都監王吉等六狀各爲進士陸詢武有材勇久在邊上累會隨諸將戰鬪乞朝廷錄用臣亦曾召詢武詢問其人曾應進士舉熟知邊事通習兵書善弓馬有膽勇伏乞朝廷特賜收錄與一借奉職或縣尉各目安排令於邊防或內地多賊縣分展効如後本人犯入己贓及不如舉狀臣並甘同罪今取進止

論舉官未行劄子

臣近曾有劄子奏舉河東路提點刑獄張旨乞超換一近上使額替王凱勾當麟府路軍馬公事兼奏舉平定軍知樂平縣孫直方堪充代州通判替李舜元各未蒙朝廷擢用臣伏見近日保州兵士作過與國家生一大患只爲知州通判非人不能早察軍情制於未亂朝廷以此可爲鑑戒王凱在河外不得軍民之情及李舜元不曉邊郡事體臣所舉張旨孫直方並無僥倖但以臣忝在兩制奉朝命巡行邊郡所見官吏能否合有陳列兼臣並是同罪保舉伏望朝廷特加信納其張旨孫直方早與升擢移換

論永寧軍捉獲作過兵士劄子

臣近據永寧軍捉獲作過兵士已會具結集作過因依聞奏訖蓋以河北屯聚兵馬雖多自來未有威名將帥鎮撫而卒士驕狠相習爲常昨自保州變亂之後安肅軍衛州通利軍等處相繼結集不已只如今來趙牧等本亦別無酷虐情狀只是偶然稟試不當況自有部署轉運提點刑獄司等處自可依公論訴豈得小不如意便謀結集以此見雖是官吏乖方亦由驕兵好亂臣伏見有唐驕兵逐帥之禍起自河北始務姑息養成大患況今河北爲國家重地事之利害所繫不輕尤宜遠慮周思防微杜漸今官吏敗事偶寬責罰未至失刑若驕兵過示姑息一啓其端則他時有不可制之患昨保州之事知州通判並遭殺害其餘官吏各重行責降至今保兵自爲得志動皆引以爲言而即日統兵之官亦自始以爲戒軍威日削士氣益驕今永寧之事亦因茲而馴致也其趙牧等雖爲可罪若便重行黜責則河北驕兵結集竊恐自此漸多開啓其端養成後患以此而言趙牧等可罪之人誠不足惜所可惜者朝廷事體也其趙牧等欲乞候斷訖作過兵士且與移之河北隣近依舊資序差遣不使驕兵得志而後患轉滋必欲更行移降事疑朝廷旨定逾時亦未爲晚

河東奉使奏草卷下

乞許同商量保州事劄子

臣準勅差充河北轉運按察使伏見河北驕兵作過見據保州招之未肯開門擊之未能速破諸將集於城下而進退攻取未有定計臣今偶被發擢俾當繁使至於應副糧草軍需之類皆有司之常事臣雖竭力供職未足以稱陛下用臣之意臣今欲乞每遇軍馬攻討招撫應于保州事宜許臣與田況李昭亮等同共商量施行庶幾慮慮有裨萬一如允臣所奏乞特降聖旨劄子付臣及乞劄與田況等今取進旨

舉官劄子

臣近蒙聖恩擢備任使臣勘會本路州縣至多甲馬甚眾比於三路最號繁難况今兵據保州河決德博虜人對境未測事宜當此之時以臣非才驟當重責苟一敗職所繫非輕須藉眾庶能可共濟臣今有奏舉下項官吏五人伏乞朝廷特賜勘會本路州縣關員及有成資滿任闕處各與差除以備緩急勾當庶幾職務辦集不至敗慢今具姓名畫一如後

一前知長垣縣著作佐郎黃贊臣前任滑州通判日與贊縣境相隣熟聞其政治之迹本人近準勅移知大寧監竊知長垣縣係祇應北朝人使有例免得遠官臣今欲乞下審官院及開封府會問保明本官實會祇應人使及合免遠官體例特除一河北路通判差遣

一權充州掌書記龔鼎臣有詞學明於吏術歷官六考有舉主磨勘循資今又成一考見有舉主臣今欲乞檢會本人考第舉主特改轉一京官除注河北路簽判知縣差遣

一新授舒州團練判官徐玉為性明敏有吏幹曉民政其人新授官未赴任臣今欲乞特除一河北職官或知縣差遣

一大廟齋即姜潛有文行通曉民間利病熟知河北事宜臣今欲乞特除一河北路縣令或主簿差遣

一試國子四門助教李邊有膽勇材或本因白身効用捉賊得功臣今欲乞特除一河北縣尉差遣

右謹具如前臣所奏舉黃贊等五人如蒙朝廷擢用後犯正入己贓及不如舉狀臣並甘同罪謹具狀奏聞伏候勅旨

乞不親教閱劄子

臣近準中書劄子節文河北宜選轉運使二員密授經略之任使其熟圖利害陰為預備仰不住遍行巡歷所到據城壁并烽火臺防城動使家事衣甲器械一一覷步仍躬親於教閱處試驗兵士鞍馬次第者臣偶以不才被此責任若乃詢究軍民之利害相度山川之險要幹運芻粟建易城寨以至按察將吏廉其否臧營辦工材督治器甲如此等事乃是朝廷密授臣經略之職敢不盡心至如躬親教閱此則主兵之官日行常事兼臣本司自有職事凡於軍政既不精專而又所至州軍一歲不過一兩次暫時按視難盡精詳縱欲處置改更未必皆當况主兵之權貴於統一侵官失職於理非便臣今欲乞除點檢城壁器甲並依中書劄子內聖旨指揮外所有轉運使提點刑獄司等躬親教閱一事乞更不施行如允臣所奏乞明降朝旨

乞許轉運司差兵士捉賊

當司準樞密院劄子節文奉聖旨令真定府路定州路高陽關部署司各行移文字與合行本路管轄軍馬州軍今後每遇勾抽係路分管轄軍馬候見本屬部署司文字即得起發并劄付河北都轉運司亦仰依此指揮

右謹具如前當司近因巡歷至邢州據趙州寧晉縣鄉兵部頭管用德狀及口稱緝得昨來北京走却壯城兵士強賊一十一人見在趙州贊皇縣窩藏乞差使臣兵士指引前去掩捕臣尋為本州及側近

地方巡檢縣尉並在磁洛州會合見捉打劫武安縣賊人次側近應
急別無巡檢使臣可差又緣近準上件樞密院劄子轉運司差撥兵
士不得偶值宣撫使富弼到邢州遂具狀乞就差使臣兵士已差殿
直高惟正帶兵甲前去掩捕次臣看詳近降樞密院劄子蓋為大段
起發兵臣須候部署司勾抽不欲令他司侵主兵之權事要統一敢
不遵行臣欲乞今後遇有強惡賊人之處巡檢縣尉地分遙遠未能
救應中間許令轉運司於就近州軍勾撥兵士一二百人以來應急
掩捕所貴不致透漏強惡賊人其餘大段起移兵馬即依近降樞密
院劄子指揮如九臣所奏乞降付本司及部署司施行

奏洛州盜賊事

今月十日準樞密院劄子邢州駐泊都監胡承澤奏近準樞密院劄
子監逐大名府磁相邢洛州巡檢等捉殺賊盜者今有賊人徒伴殺
併到軍賊頭劉貴首級并前後捉殺獲共七人外只有三兩人見已
殺併散相度更不消臣監逐收捉欲乞却歸邢州管勾本職公事候
旨奉聖旨令河北都轉運司相度指揮訖奏

右臣昨自到任累據北京邢洛磁等州節次申報軍賊或十人十五
人至二十人在西路數州之內驚劫人戶掠奪遞馬并鄉村生馬騎
乘倏忽往來不辨頭首姓名及每火人數尋根問得元有殺巡檢縣
尉軍賊劉貴一火及近日大名府走却壯城兵士九人共兩火略知
姓名雖曾捉殺得數人然其餘黨昌熾愈甚或旋合火伴或脅逐村
人到處一二十人動成羣隊臣今月九日巡歷到洛州南準本州巡
檢走報稱有軍賊十四人打奪臨洛界馬遞鋪同時又據磁州申武
安縣軍賊二十人入縣衝鬪敵傷着兵士及燒却草市當日又據權
巡檢殿直高惟正申邢州沙河縣九月一日有賊一火打劫村民史
秀至十一日臣離洛州至故城馬鋪又聞前面馬鋪有賊四人白日
騎馬帶甲羣行過往向東雞澤縣賊勢如此交橫其巡檢縣尉等並

各未見向前捉捕臣雖已一面催促巡檢縣尉等及牒逐處併力掩
捕及體量巡檢縣尉內有畏懦不能捉賊者續乞替換行遣次不委
胡承澤妄有申奏只有三兩人未獲意欲速罷捉賊差使兼臣曾召
承澤問當口稱奉宣監捉本不令躬親捉殺兼宣撫使富弼已權差
供奉官武承平內殿承制魏辛等充邢洛五州軍捉賊方今盜賊勢
雖未衰其胡承澤臣已牒令却歸本任去訖

乞一面罷差兵士拽磨

右臣準中書劄子訪聞昨來石待舉擊畫酒務內令兵士拽磨所貴
省得草料轉運司尋依此遍下諸州軍施行訖今仰立便指揮只依
舊用驢子拽磨仍具因依聞奏臣今檢取到元初一宗行遣公案勘
會得慶曆二年十一月九日轉運使張沔因巡歷到保州本州通判
石待舉擊畫申請乞更不差磨憊驢子只以廂軍兵士推磨所有轉
運使張沔尋依所申行下今來朝廷指揮仰疾速止絕本司相度即
日已是秋深磨憊踏麴罷多日兼又保塞亂兵纒息若非時急行出
上件指揮深慮扇惑小人別致引惹欲乞直候來年將及踏麴之時
只作本司一面行遣依舊却差驢子所貴不至張皇引惹謹具狀奏
聞

奏李昭亮私取叛兵子女

右臣近巡歷至保州訪聞得部署李昭亮昨因保州開門後入城將
雲翼第九兵士妻女分配與諸州軍軍員等本為是作亂兵士妻女
配與軍營要行戒勸却於其中揀選軍人女子先自將入昭亮本家
及手下兵士使臣通判官等遞相做倣亦各私取歸家軍民傳聞道
路喧沸其李昭亮等知臣覺察舉行遂却轉遞出外即日未知去處
尋據定州通判馮博文狀陳首稱收得長行許秀女一人臣等勾到
許秀女子小姐及元傳送兵士楊遂王在共三人已牒送真定府通
判王鵬於本府置院推勘去訖謹具狀奏聞

乞不詰問劉渙斬人

臣近知吉州刺史劉渙新到保州因點檢軍資庫有虞侯張吉無禮及擅開金銀籠子不伏知州指揮已行處斬訖竊聞前轉運使張沔曾具奏聞深意朝廷別致疑感况保州新經兵亂河北士卒素驕處置權宜難依常法伏乞朝廷更不詰問所費不致引惹今取進旨

訪問逐州利害牒

當司勘會轄下州軍縣鎮地里闊遠戶口財賦兵甲甚多逐處官吏所見公私利病竊慮當司巡歷未到之間無由一一詢訪須議專行公文者牒具如前事須牒某州候到仰遍牒在州及外縣鎮官員內有見得本路及本職務不便事件及民間弊病可以興利除害者並密具文字子細條列直赴當司投下以憑看詳可否

乞不令提刑司點檢賞給

臣近準樞密院劄子節文河北諸州軍將來所支廂禁軍賞給折支奉聖旨劄與轉運提點刑獄司疾速分頭遍行點檢續準宣頭節文今下河北轉運使副提點刑獄朝臣使臣候到逐處將賞給物色若是估價尚高便重行估計其劄子宣頭並不得下司者臣伏詳朝旨本為賞給之物不可虧損軍人又緣士卒素驕亦須鎮靜故每于賞給文字多令不得下司者蓋慮張皇却生引惹今若只令轉運司點檢即可以因巡歷各目每到州軍自合點檢倉庫因便於軍資庫內點檢如此方可不至張皇其提刑司自來不管錢穀忽至州軍却入軍資庫點檢即兵士皆知朝廷畏懼軍人特令點檢如此却成引惹又慮諸州軍見自來提刑不管錢穀忽要入軍資庫不肯應副則須明言有朝旨點檢賞物又全違不下司之意有此事體不便伏乞朝廷專責轉運使一面點檢準備况臣累準朝旨指揮丁寧嚴切已各行下諸州軍及見巡歷因便點檢亦恐州軍數多南郊漸近逼到不得即乞密委本州通判等就點檢所費不至張皇如九臣所奏乞

明降聖旨指揮更不令提刑司點檢所費別不張皇引惹取進止

保舉王果

右臣等伏見前知定州皇城使王果移知密州或聞朝議罪果昨攻保州之日傷中兵士數多及縱兵掠奪南關人戶財物所以降移差遣臣等體量得昨來保州兵士作亂之初便欲自南門突出賴果領兵力拒守得南關賊既不能奔突遂閉城門兼初閉門之時尚可斬關而入為諸將心不齊一致果不能獨進其兵士傷中人多蓋是果能得士死力奮勇爭先雖有中傷尋各完復其後累降招勝賊衆搽城投降亦因外兵攻圍示以必取賊知窮蹙方肯聽命果之力戰不為無助其南關人戶財物乃是招收兩指揮初作亂之時先自南關劫掠然後入城果到南關只令兵士於招收叛卒營內就其糧水兵士或得些小物色多是叛卒遺棄之物然東關人戶亦不免劫掠昨來保州城開之後兩關人戶皆有狀稱劫掠財物不少足明因亂被劫不獨南關蓋緣王果為性剛勇奮不顧身但務盡忠不恤毀譽若朝廷當用兵伐叛之初罪先登効命之將使冒矢石中傷者被責而被賊不戰偶無傷中者得遷竊賞罰失中無以勸戒兼臣昨因巡歷至沿邊州軍訪聞軍民嗟憤皆以果當被賞而不意被責累經本司及宣撫司陳訴舉留伏望朝廷審察愛憎之言保全忠勇之士其王果伏乞特與清雪復一河北沿邊重地差遣所費下叶軍民之議激勸將吏之心謹具狀奏聞

保明張景伯

準宣頭節文磁州奏據武安知縣張景伯申今月六日有軍賊約二十餘人入縣圍却縣城有守把兵士三十餘人於縣門樓上相射賊人中箭後便懷出往城西草市打劫劉簡家財物乞指揮收捉去訖奏聞事宜令河北都轉運司疾速體量詰實如是上件賊人曾打劫縣城裏面人戶財物所有本縣官員仰依近降指揮取勘施行并下

提刑司火急指揮應干繫地分都同巡檢使臣及捕盜官等仰立便部領兵甲弓手等會合捉殺須管敗獲所乞權差兵士百十人防護縣城即仰轉運司疾速相度差撥訖奏聞者

右謹具如前當司勘會先據磁州狀申今月六日有軍賊二十餘人入武安縣內打劫被知縣張景伯部領守把兵士於縣門樓上相射賊人中箭出往城西草市內打劫劉簡家財物粘逐前去值夜捉賊不獲乞差巡檢縣尉會合捉殺及乞於諸縣添差守把兵士及權差義勇防托當司尋遍牒都大捉賊徐夔及地分巡檢縣尉等分頭捉殺及牒磁州差兵士義勇量支器甲防守縣城相次據徐夔及沙河縣令甲斫到賊頭一箇及胡承澤申永年縣百姓殺頭二箇又據磁州申活捉到軍賊張最一人斫到徐木大趙二頭二箇其餘並是元被賊人驅虜去遞鋪兵士及百姓等並各詣逐處首身訖外即目磁洛之間別無賊盜當司體量得上件賊人元初於武安縣打劫被知縣張景伯與兵士三十餘人用命射中賊人致其潰散因此徐夔等接勢收捉斫殺方得盡靜其武安縣吏難議更行取勘謹具狀奏聞

乞罷郭承祐知邢州

臣近日伏覩差郭承祐知邢州臣自蒙朝廷差充轉運按察使已來前後稟準密降不下司宣頭劄子令常用心體量轄下官吏臣細詳朝旨本爲河北於天下諸路最爲用武之地曩因北虜通和之後弛備多年一旦恐有事宜百事驟廢朝廷悔鑑前弊故先慎擇官吏務欲脩整類綱昨準宣頭節文一十九州軍擇人久任外其餘州軍長吏令中書門下樞密院選差并下轉運司體量大小文武官不堪其任者不得容庇不才因循不切糾舉却致臨事闕誤朝廷留意河北丁寧切至如此加以近自保州兵亂之後至今民尙虛驚軍情未帖相次順安軍瀛州安肅軍衛州通利軍等諸處不住驕兵扇搖結構當此之際臣實不意選差郭承祐爲河北長吏承祐頃知澶州引惹

修城兵士幾至作鬧去年差來河北將兵臣在諫院會極論列尋罷知相州貪穢之狀狼籍多端又爲按察使張昱之奏論罷爲北京部署今者移陝西遷延不去又以邢臺委之當河朔多事朝廷丁寧留意之時承祐累任不離河北不審其人果以何能當此慎選承祐庸劣貪穢奴斯之材若以會効僕使之勞不忍廢棄豈無閑處可畜養之况邢州北連鎮定控扼西山軍馬所屯人民繁富禦戎鎮俗尤須擇吏萬一乏人選差止得中常之材尙勝承祐伏望朝廷顧惜河朔名藩重地不使庸劣小人壞之其郭承祐伏乞特賜指揮罷去邢州別選差人取進止

再奏郭承祐

臣昨覩朝廷差郭承祐知邢州已曾具劄子奏論乞別選差人至今未奉朝旨臣昨因準中書劄子權知成德自邢州經過見其城壁嚴整居人繁富不惟爲朝廷惜此各藩重地兼痛惜一城軍民將懼其毒仍採問得邢州之民自聞朝廷差下郭承祐其上等人戶各訴免行戶及欲逃移他郡緣承祐久在河北其賊穢之狀人盡知之竊恐朝廷未知民情不悅如此謹再具奏聞取進止

五保牒

當司檢會轄下諸州軍近年不住申報盜賊羣火極多蓋緣盜賊必先須鄉村各有宿食窩藏之處及所得贓物常有轉賣寄附之家然後方能作賊所以自來每有羣盜驚劫及至官司捕捉又却分散不見蹤跡卒難尋覓蓋爲鄉村不相覺察致得姦盜之人到處便可容隱兼檢會準戶令諸戶皆以隣聚相保以相檢察勿造非違如有遠客來過止宿及保內之人有所行詰並語同保知雖然有此令文州縣多不舉行昨因巡歷到通利軍問得舊來常有盜賊逃軍爲患近歲黎陽衛縣各將鄉村之人五家結爲一保自結保後來絕無逃軍賊盜公私簡靜其利甚博須議專有施行

右具如前當司相度隣聚相保之法是國家見行勅令於公私甚利然今既舉行若縣令非才不能制馭公人胥吏則勾追搔擾未見其利先爲民害以此當司未欲一舉遍行指揮今且於轄下諸縣東選知縣縣令公明材幹可以差委者先次施行數內某官見知某縣事須實封專牒某官候到請詳前項事理施行當司所錄去合保次第只是大綱若更有合從彼處民便別加增損事件亦請一面增損施行仍請先具如何施行次第公文供報無至張皇鹵莽者

乞推究李昭亮

準中書劄子節文奉聖旨馮博文爲陳首特放更不置院推勘如更有官員使臣等將帶却保州作過兵士人口往本家者並許陳首亦與放罪仰本處依前來體例配與軍員收養者

右謹具如前當司昨爲真定府定州等路部署李昭亮身爲大將不能統轄致得保州兵士作亂及朝廷累降勅榜屈法招誘叛卒方肯歸降既城開之後其李昭亮轉帖號令諸軍不得私取人口并財物却先將叛卒女口私入本家當司爲見李昭亮忝爲大將不恤國家憂患幸此亂兵利其妻女當司職在按察理合舉行遂當面詢問李昭亮其人妄稱不會收得及通判馮博文處亦有一人知臣覺察遂急送保州陳首當司爲要見得李昭亮處私取叛兵士女口歸着遂勾追馮博文處許秀女一人及轉送兵士等於真定府差官置院根勘本爲要李昭亮私取手下叛兵妻女歸着今準中書劄子內上項聖旨指揮欲乞除馮博文特放更不推勘及其餘官員使臣等未發覺者並許陳首外其李昭亮身爲大將不憂國家幸此亂兵私取妻女其情理不輕况已發覺無容自首伏乞許臣根勘見歸着奏取勅裁兼本司已牒推勘院令疎放馮博文處許小姐及催促根究李昭亮私取人等早行結絕未得斷遣繳送當司以憑看詳聞奏去訖伏緣當司職在按察今來若舉察轄下官吏未容根究便行疎放即按

察之司是爲虛設今後官吏作過者無由糾舉伏乞朝廷特賜詳察謹具狀奏聞

乞將諫降配廂軍依舊升爲禁軍

當司近牒真定府定州等路部署司取索昨來保州分配作過兵士人數尋準部署司公文分拆到一宗分配兵士人數內二千一百六十五人配諸州軍禁軍一百九十八人配諸州軍廂軍臣昨因巡歷到通利軍勘會本軍分配係保州分配來兵士共九十九人內八十八人配禁軍武衛指揮十人配廂軍威邊保節指揮尋體問所配禁軍兵士八十人並是城中作過殺戮吏民劫奪財物污辱良善靡所不爲其人等並各配禁軍指揮仍升得軍分其十人配廂軍者元在保州城外巡警聞城中兵亂遂投定州別不會作過當分配之時却責以擅離地分降配諸處充廂軍仍體問其人等爲見城中作過兵士却升得軍分亦累曾經知軍出頭有狀聲冤稱無過降作廂軍本軍不敢接狀然亦以其人等怨忿不敢差使功役只與閑慢處窳坐羈縻當司看詳部署司分配保州兵士之時升降之間顯是倒置今來通利軍威邊等兵士被作過之人升得軍分事相形比不得無言今若先其無事之時便與措置尙全大體若萬一漸形怨忿別起事端至時難爲鎮靜不免改更則轉更引惹驕兵生事者

右具如前當司雖子細體問得上件降充威邊保節等廂軍事節蓋慮引惹又不敢親喚本人取問分配因依今錄白部署司元牒分拆到廂軍人數頭連在前欲乞特降指揮下真定府定州等路部署司分拆元降配諸處兵士尤係是何指揮及坐何等過犯降配若會問得與當司體問得事理不別即乞將降配廂軍人數只作因南郊該恩赦却與升爲禁軍所貴於事稍允伏乞早降指揮

乞一面除放欠負

臣竊見自來每遇南郊赦勅除放天下欠負朝廷雖示恩卹而有司

未嘗奉行是致天下常有積年欠負累經赦宥除放不得使破敗逃亡之人傳子至孫攤在親戚干繫人等追擾陪填不勝其苦臣究其弊蓋為先降天聖編勅內欠負官物該恩除放者須得諸州軍及轉運司節次保明申奏送三司并理欠司定奪經歷官司既多則往復問難拖延日月故每一次赦恩除放則未能了當者蓋由關防太密經歷處多使赦宥之恩擁隔不能及下而官司胥吏反為播擾之資臣伏觀今年赦書節文內所該欠負官物特與除放者若干項內若干項並特與除放內一項即令本屬及轉運司保明聞奏切緣雖申奏下三司理欠司即不免往復問難拖延日月使除放赦恩不時及下臣今欲乞除赦文內一項元指定令保明申奏者依赦施行外若干項係赦恩特與除放者並許轉運司子細勘會先行除放訖一面申三司及理欠司乞行點檢如敢夾帶不合除放之人誤行除放者其轉運司官吏並料違制之罪况三司轉運司俱是掌錢穀之司其轉運司尤以聚斂為功只患刻剝太過雖不經三司覆驗必不敢濫行除放如九臣所請乞特降指揮下諸路申明赦文內令保明者並須申奏其餘特與除放者許轉運司除放訖申三司今具畫一如後

一應乾興年已前諸州軍帳內有椿管諸色欠負年深及累經界分登帶不見年代各件見無家業抵當及正身亡沒配流不在攤在妻男及干繫人處理索自來催納不行者不以有無侵欺盜用並特與除放此一項臣今欲乞先行除放訖申三司

一今日已前諸色欠負官物并於干繫十保人處攤理元不顯侵欺盜用者或雖是侵欺盜用本家并干繫十保人內有委實見無抵當者並仰本屬及轉運司保明聞奏當議特與除放此一項臣今欲乞依赦文保明申奏

一應陝西河東諸般綱運般送衣甲器械等緣路死損却官驢騾并磨擦損折潰污及去失疋帛係剝納虧官錢元不是侵欺盜

用者並與除放此一項臣今欲乞先行除放訖申三司

一應天下州府軍監縣等應干繫節級手分自來有失行遣催納官物并誤行支遣委不是啓倖侵欺見行攤納者並與除放此一項臣今欲乞先行除放訖申三司

一應慶曆三年終已前諸道州府軍監人戶先因災傷支借過貸糧草斛斛除納外見在欠數目並特與除放此一項臣今欲乞先行除放訖申三司

一應慶曆三年已前諸處夏秋因災傷倚關稅數並特與除放此一項臣今欲乞先行除放訖申三司

一應今日已前幕職州縣官在任及未到任亡沒者如會借過月俸並特與除放此一項臣今欲乞先行除放訖申三司

一應諸般啓倖隱陷稅租今日已前已根磨出累年積欠數目見行理納者並特與除放此一項臣今欲乞先行除放訖申三司

一應羊綱死損虧折斤兩別無欺弊者並特與除放此一項臣今欲乞先行除放訖申三司

一應江淮兩浙荆湖福建川峽等州軍監并黃河在京肆排岸稍工兵士牽駕綱船般運物色內有少欠元無欺弊見對折請受者並特與除放此一項臣今欲乞先行除放訖申三司

一應諸處有水火損敗官物及綱船遭風水拋失不虛及賊偷盜勘會分明別無欺弊者並特與除放此一項臣今欲乞先行除放訖申三司

乞真定府分驍武兵士別作指揮

臣勘會昨準河北宣撫使司指揮真定府驍武雲翼共五指揮各以五百人為一指揮外共營併出九百三十七人別為兩指揮本司已依近降樞密院劄子未敢分擘先具分擘團併人數聞奏聽候朝廷指揮去訖臣檢會昨準宣撫司劄子下河北諸路分併指揮兼令轉

運司應副木植人工修蓋營房其諸處各爲少闕材木未曾修蓋營房仍未及分併指揮之間已准樞密院劄子令奏候朝旨以此諸州兵士指揮各未曾分營營房亦未敢修蓋惟有真定府一處爲有見在木植甚多於未降到劄子已前尋便依准宣撫司指揮踏逐到營房地支撥一色新好材木修蓋到營一座卽令將欲了手元指定作驍武兵士各爲住營內人多屋少多是兩三家共住一間經夏暑雨存住不得爲見官中修營分營指揮人各忻然遂其私便各自用功修蓋全不曾催督只及月餘已相次了手竊慮朝廷元降劄子指揮內有七百人已上處方許分營今來鑄武三指揮各只是六百四五十人已上以此不令分營又慮朝廷不見得本府鑄武兵士已共力興工蓋成好屋今若却不令分營卽恐兵士已指望上件營房屋住頓然失望於軍情不便伏乞朝廷特賜詳察其諸州軍卽須候奏得朝旨分定指揮方得興蓋營房其真定府一處已蓋了營屋者伏乞早降指揮許令將驍武兵士分營爲一指揮於新蓋成營內居住所貴下順軍情別不生事仍乞檢會部署司前奏人數早賜施行取進止

乞放行牛皮膠膠

臣累據轄下州軍狀申爲勑造添修兵器乞牛皮筋角膠膠物勘會本路見在常是全然闕絕民間雖有禁法合逐旋納官及點檢帳曆亦全無人戶納到數目亦曾聞奏及申三司乞自京師支撥又爲京師諸庫各稱亦是數少或累申奏不曾支得縱或支下亦數目不多應副使用不足其諸州軍又爲上下催促造作甚嚴每於難得之中或時支得些小不暇東擇好弱兼更使用不足須至減料那融只且備數修勑僅能成器全不堪用今河北一路兵器萬數雖然不少而精好堪用之器十無一二臣竊其弊蓋爲皮筋膠膠難得之故臣因勘會自來國家明有禁法民間筋角須盡納官河南膠膠又不許過

河北既有此禁便合民間更無兵器今河北見管義勇十七萬有餘人人自有私弓弩此是官司明知其數者更有不係義勇之家例有弓弩不少其筋角膠膠從何而得能致弓弩如此之多以此見國家禁法未便只是禁得官中絕無民間不能禁止臣今有起請營畫事件伏乞朝廷特賜詳度如允臣所請乞賜施行庶得今後更不專仰朝廷輟那支撥而物料漸有兵器可精今具畫一如後

一未兵興以前舊制民間自死牛皮筋角並中賣入官量爲三等支價錢其不及等者退還百姓及許客旅販賣官中置場收買當時公私却不關少自兵興後來改法甚嚴人戶自死牛馬皮筋角限半月赴官送納許人陳告隱藏者支賞自有此指揮後來人戶絕更不會經官送納亦無人告者隱藏者豈可二年之內舉河北牛馬全然不倒死以此足見改法之弊蓋其拋死牛馬已是下民之苦更不支得價錢令人戶自納及更令陪錢於官司使用了納又令盡底納官絕却民間使用以此民不爲便緣此等物各是民間要用之物陳告又支賞錢不多所以各相蔽蓋無由發露今年雖亦許破官錢收買緣已有上項盡底納官之條民若不納官而中賣卽是違禁之物以此收買不得臣今欲乞却依天聖編勑及前後舊條許人戶自死牛馬皮筋角中賣入官分爲三等支錢不及等者退還本主及置場收買客旅輿販者如有及等皮筋角不中官賣卽許人陳告如此所賣却似舊日公私各獲濟用

一臣體量得河北私置弓弩並無河南過者膠膠只是河北自有蓋滄州大海出魚不異南方及塘泊之中魚亦不少河北人民並能煎膠出處只百十文一斤自來民間公行官司只是黃河不放過南膠外本土膠膠州縣無人點檢禁絕民間取足使用但官中自禁耳臣今欲乞滄州及瀛保等州相度置場收買必

然大段易得竊慮議者猶恐官既收買則民間公行因此北界為不便況今官雖不買民間亦不會禁北人從來不藉南界販縹豈聞無弓使用以此言之不足疑也

右謹具如前所有牛皮筋角等臣只見得本路利害仍乞更下諸路轉運司相度利害取進止

乞展便糴斛限

當司近準三司牒為便糴斛仰依編勅至三月終住便更不展限者當司勘會沿邊軍儲事大累年斛斗入便不敷慶曆元年只便到八十五萬二年只便到四十五萬三年只便到一百四萬今年方遇豐熟正是好行入便之時價例比去年大段低減兼每年客人雖有斛斗不肯便行入中須待體探年歲豐儉及伺候官中價例高低常至三四月間方始猛來入中今若只於三月盡頓然中止即邊儲大段闕候況元拋四百餘萬斛斗即今全未糴得莫州元拋二十萬方糴便到一萬二千有餘信安三十萬方便到四千有餘霸州一十九萬方便到三千有餘其餘大約似此全未及數只指望四五月間趁逐入便若便及省司元拋數目只及四百萬石不得一年約支之數若頓然住却必見大段誤事者

右謹具如前伏乞朝廷特賜詳酌體認河北軍馬糧儲事大兼累年便糴不前趁此年豐價賤之時且乞依常年便糴至五六月已來只便及省司元拋數目即止兼自有便糴已來年年展限客人以習慣其事皆廣為計置直候依常年四五月方來入中今若只於三月止住即不惟全無入中致闕乏悞事兼恐賺悞客人向後無由入中伏乞特下三司許令且依當年體例候糴及元數別聽朝旨仍乞速降指揮

乞置御河催綱

臣伏見沿邊鎮定等十六州軍每年入中斛斗並支在京一色見錢

自來不止全仰沿邊入中亦於近裏州軍計置斛斗從御河漕運輸邊所以軍儲不闕近年廢却御河運船不曾般運只藉沿邊入中加又京師近歲難得見錢客旅交鈔無價雖於沿邊多添價例終亦入中不前近裏州軍却合相兼計置然須先修運路俟漕運路既行方敢近裏儲積今有壁畫事件一乞復置御河催綱二員一乞將見行三說新法地分與沿邊見錢糴州軍分為兩番更互入中所貴漕運通流邊儲易備在京亦省費見錢之半今具利害畫一如後

一點檢本司帳曆係管御河堪好糧船一千八百隻見在只有二百餘隻內一千五百隻不知所在自來不會點檢見差官二員根磨尋覓至今未見歸着其見在三百餘隻每年亦全不曾般運斛斗只是雜般虛名占使蓋由御河催綱廢罷後來綱運無人提轄致得綱梢偷減拌和濕爛損惡却饋邊之粟因此轉運司漸廢漕運之利殊不思若只仰沿邊入中則在京廣費見錢在京錢少則沿邊亦難入中兼昨本司近據廣信軍通判蔣賁擘畫求得江南配來船匠打造鑠枹船比舊船減省得物料人工又可以封鑠不令偷拌已打成一隻甚見利便見今廣謀打造次臣今欲乞朝廷却復催綱二員一員依舊於大名府一員於乾寧軍漸用新船興行漕運之利

一勘會沿邊十六州軍元係見錢便糴外近裏大名府等七州軍近年已許客人三說入中然二法不可並行若兩處鈔價苦相爭即客人只就近裏入中蓋沿邊全少土居斛斗皆藉近裏客人販去中官若沿邊價高有利即近裏少人肯入以此二法並行未便臣今欲乞將見錢三說二法分為兩番一年於沿邊見錢入中則近裏權住三說次年於近裏行三說即沿邊權住見錢若近裏入中而權住沿邊斛斗無所住官中便糴必多若沿邊隔年一入則京師減費見錢之半不至滯却客鈔則沿邊入

中亦必多矣若明立二法分番示信於客人則久遠不勞朝廷
改法自可省得見錢邊備亦易計置然近裏沿御河州軍用三
說本要輸邊則須先修運路故先乞復催綱二員也

右謹具如前臣所乞復置催綱及糴便利害伏乞朝廷特賜裁度如
允臣所請即更有約束條件候朝旨別具奏聞

乞催納放外稅物

臣等近親赦書節文應今年係災傷處已經體量見欠稅物未得催
理奏取指揮當司勘會本路一十二州軍各係水災人戶已委官體
量到合放稅數具帳申奏其放外稅物並是見在苗畝上合納稅數
若更行減放則姦倖之人枉有拖陷省稅及元計度軍儲失備已具
狀奏聞乞將第四等已下人戶依赦取奏朝旨外第三等已上人戶
放外合納稅物乞許依例催納至今未蒙指揮當司今再將合納合
放稅數勘會合放稅數已及七十四萬餘石東賈外合納尚有四十
餘萬若更行減放即恐無名虛放數多軍儲大段失備況今年河北
大豐熟三二十年未有如此豐歲其係災傷地分已盡數檢放外合
納稅數若於豐歲更行除放即恐軍儲失備將來歲不常豐或小遇
不熟及緩急關乏不免却煩科斂臣等今欲乞朝廷檢會本司前奏
特降指揮其第三等已上人戶除已放外合納稅數乞依例催納外
第四等已下人戶放外合納稅數仍乞與免支移折變只令納本色
或見錢則優倖已多所貴赦恩下及貧民上戶不至僥倖兼即今輸
納是時如允臣所請乞速降指揮今取進止

乞置弓弩都作院

當司勘會近會壁畫乞於磁相州置都作院打造兵器已蒙朝廷依
奏及差到監官等見催促磁相州蓋造營房作院及抽束工匠打造
一色精好器械次切緣磁相二州只是鐵作院所有弓弩元未曾別
有壁畫當司今相度得西山一帶所產弓弩良材甚多自來係相州

盤陽務採斫應副諸處使用今欲乞就近於邢州置都作院一所專
打造一色好弓弩久遠甚爲利便蓋緣弓弩二物於兵器之中最難
打造尤要精專至於煎膠披筋各有法度燥濕寒暑有日時製造遲
速之間若一事不精遂不堪用兼亦不久易損壞見今諸州軍弓弩
造作之時既皆草草造成不久尋復損壞又須從頭修換一番修換
未了一番已却損壞即目諸州並不暇打造新弓弩只是終年修換
舊者積壓無由了絕有打造成後不會經使已修三二次者修換既
頻轉不堪用虛費人功物料久遠誤事不細其弊如此蓋由散在諸
州打造工匠及監官皆不齊一本司亦難爲點檢故也若蒙朝廷許
置都作院即選得專一監官東擇精好工匠製定二料法式明立賞
罰可以責成兼亦易爲點檢者

右謹具如前所有磁相州鐵作院并今來起請弓弩都作院擬置事
初合立規法欲候朝旨許置弓弩作院擬置事一就條列續奏乞賜
指揮遵守施行次伏乞早降指揮謹具狀奏聞

乞再定奪減放應役人數

臣勘會轄下州軍使州院節級前後行并通引官客司書表司等並
各於元定勅額人數外有影占上等人戶前轉運使張昱之等遂令
諸州軍據元額合留人數外剩占之人並減放歸農雖減得人數不
少其如當時逐州行遣不一或不問戶等高下從下名減放者或有
於下名之中東上等人戶影占之人減放者或有不問節級前後行
只東上等人戶減放者遂致減放之後不絕詞訟近累據減放公人
等過狀却乞收敘又緣諸州減放事體不一若盡據減放之人却行
收敘則顯違先降勅條額定之數若全不收敘則又有前行節級繫
各多年者難盡不收亦有州軍經減放往往輒已行收敘者臣等兼
檢會日近雖有條實前行不免里正然額外人多終是不便若額外
手分無賄賂乞覓之倖則不可使其更當兩役若有賄賂乞覓之倖

則不當額外剩置人數以此而言只合依勅額爲當竊以事既千衆必欲州縣久遠遵行則須乞自朝廷明降指揮庶爲定令臣等今欲乞特降朝旨申明元定人數許本司遍取轄下州軍見管人數及已減放之人委同依入事年月上各下次排連從上據勅額元定人數存留外截下額外之人不問戶第高下一時減放如此則年深上各却得收斂額外盡減又不違勅條內有州軍元定人數全少後來戶口增盈及公事委實繁多之處乞許本司差官定奪量與添人員數聞奏立定爲額庶絕詞訟兼可永久遵行取進止

乞不免兩地供輸人役

近又準中書劄子節文知保州劉渙奏欲乞朝廷相度沿邊州軍應係兩地供輸人戶比附一州軍內人戶量與減免州縣色役奉聖旨宣令轉運司勘會聞奏本司方行勘會相度次續再準三司牒伏乞朝廷指揮內有界河北兩地供輸衙前兩地人戶全放歸農只令輸納稅賦奉聖旨依所奏施行臣勘會沿邊界河以北百姓雖有兩地供輸虛名其稅賦已經太宗皇帝朝全放即今只於北界納稅唯有差役則兩地共之今若全放界河北人戶差役即是稅賦差徭全不屬中國所管既不能賦役其民即久遠其地亦非中國之有此事所繫利害不輕又緣放免界河以北人戶歸農指揮元不會降下本司相度只是朝廷下三司直降下沿邊施行已行之事雖失難追然昨來所放只是衙前客司第一等人戶差役所有以次戶第等諸般差遣竊慮人戶援例別有詞說及邊臣更有奏請乞不與施行其劉渙起請亦乞更不施行取進止

再乞不放兩地供輸人色役

臣勘會本司近準三司牒爲臣寮起請沿邊乞減放兩地供輸衙前及係自京支下官物並令三司差軍大將管押前去及係外州軍支撥者即令支下州軍差衙前人管押赴逐處奉聖旨依奏施行臣看

詳臣寮所起請上項三節事理內減放兩地供輸衙前及般運官物令支下州軍差衙前管押此二事甚爲不便其兩地供輸人減役一節本司累會具不便利害奏聞近因程琳有奏已蒙朝廷行下却且依舊差役外有般運官物令支下州軍差衙前管押此一事蓋是元起請臣寮不見得本司逐時支移官物次第所以不詳利害切緣河北一路沿邊州軍每年所用絲綿綉絹見錢等數目不少並只出在瀛滄德博四州每遇邊上州軍少關即本司於此四州支撥無有虛月若一一並令此四州衙前盡應副沿邊諸州軍即衙前人數有限官物般運長無虛月其四州本處亦各自有重難差遣要人差使若如此施行不待久遠只年歲間立見四州衙前破蕩盡及逃亡避役有悞緩急沿邊關絕要用之物般運不前况自去年河水決溢德博二州人戶災傷貧困及係災傷地分破敗場務甚多正是衙前人等困乏不易之時尤宜存恤臣今相度若令沿邊州軍各自般運則每年轉數不多若一切令此四州應副沿邊州軍則大爲繁併臣今欲除自京支與沿邊綱運不多乞令自京差軍人將外所有本路支般官物並令沿邊且依久來體例般運所貴各得均濟今取進止

乞重定進納常平倉恩澤

臣等勘會本司近爲諸州軍有人戶進納常平倉斛斗檢會到元降勅命內定到等第恩澤太優比省倉進納軍儲數目全然數少竊以募民入粟嚮以官爵蓋是國家權宜不得已之事苟遇軍須闕乏不欲科率人民權許兼并之家進納誘以官爵蓋備一時緩急之用其常平倉乃餘力惠民之所及豈容兼并之家緣此僥倖恩澤兼慮豪民見常平倉納物不多見得恩澤一向只就常平倉進納更無進納軍儲之人失權官嚮爵之本意本司爲見有此不便會具狀申奏乞增應常平倉進納物數與省倉進納一般所貴杜絕僥倖兼不妨招誘進納軍儲具狀申奏多日至今未蒙降下指揮後來累準提刑司

牒諸處漸有人戶進納常平斛斗蓋爲恩澤僥倖所以人戶各來進納本司爲已有申奏起請乞增數目見轉候朝旨已各牒逐處且令未得受納伺候朝廷降下指揮今再具畫一常平倉并省倉進納軍儲數目酬獎次第伏乞朝廷比類裁酌體認本司見止住人戶進納伺候勅旨次乞早降勅命指揮

乞條制催綱司

當司近遵朝旨已差太子中舍賈熊充潮御河等催綱伏緣御河運路不修催綱職事久廢是致催綱兵梢因緣作過偷減官物遲滯行程所過州軍任意截撥舟船所經地分隨處拆拽釘板因此於一千八百隻綱船內失却一千五百隻至今根究不見蹤由蓋因自來全關關防不嚴條制而致茲積弊也今已蒙朝廷却置催綱所有合行起請事件今具畫一如後伏乞朝廷特賜裁酌降下本司及提轄催綱司等處遵守施行所貴革絕自來綱運積弊

一自來綱船利於雜般多將未及年限糧船故意損壞及虛有申報退作雜般船既充雜船之後多是妄稱不堪行運便行毀拆或於沿河孤迥村落地分故意損壞靠關便於本處拆拽推搡在破兵梢看守有至三四年者兵梢恣於村坊作過及偷賣釘板提轄催綱司元無拘轄無由點檢欲乞起今年已後打造到二百料糧船每二十隻爲一綱同用一字爲號并造年月刻於船梁額上用官火印記訖給與綱官梢工主管團成一綱後不得輒更分破所貴見得年限遠近不敢故意損壞及妄行毀拆一糧船每隻以二百料爲率逐船所用釘板小大名件既已一般欲乞令催綱司將二百料船所用釘板各件一一開坐雕爲印板每差梢工給帖之時頭連一本旋鑿釘板大小數目給與令據數交割主掌如遇損壞合行拆拽即却據元數釘板各件送納或有少數並勒梢工陪填如遇行運之次損壞不堪即仰申

報本地分官司檢覆亦據元數拆收立報催綱司指揮因便舟船附帶令元主掌梢工於造船場依數交納出給收附仍令造船場納訖據數關報催綱司照會施行所有合退作雜般船者亦須依刻記造成年月先後資次撥充雜般不得隔壽將新好船據退仍每綱據少數却以新船撥填足數

一自來提轄司支撥綱船般載官物至逐處下卸了其空船便被沿路州軍取意截撥諸般不急使用因此積弊散失數多不能拘轄點檢今欲乞指揮沿河諸州軍不得專擅截撥遇有合般載官物並申提轄催綱官梢工候見提轄催綱等司文字支撥方得裝載行運如違各乞重行勘罪官員奏罰

一御河等水並無風波走射險阻其地里行程可以制定自來上下水空重船亦有程限但無關防點檢之法今欲乞委轉運司將通利軍下至潮河西盡順安軍地理遠近所至沿河州軍立爲程限牒與提轄催綱司每遇轉運司有合般運斛拋撥下數目裝發糧船即令提轄司具裝發去處至下卸州軍除裝卸各給十日候外沿路地里指定行程帖與綱官梢工等及一面牒催綱司依程催促仍令提轄司預先將簿照會行程約度合到卸地頭月日續便支撥或令回載官物或令轉載向下行運亦便牒與催綱司依程催促如是下卸後並無官物般載即仰乾寧大名兩處就近赴催綱司岸下繫泊祗候差撥所貴綱運無由散失住滯作弊

一所有帳籍文簿今欲乞令提轄催轄等司各置簿二道一置綱船都曆一道抄上都大舟船數目逐綱依字號隻數造成年月主提梢工姓名開坐如有退撥充雜般及損壞拆拽及新收充填數目亦一一開坐轉計每半年一度造帳供申轉運司一置裝發勾朱簿一扇具逐綱隻數綱官姓名裝卸官物數目月日

依程限抄上催促候下卸了勾鑿了畢逐一關報照會一置修折簿一扇每遇合修舟船卽上簿拘管取索造船務修補日限上簿催促候修了勾鑿如合毀拆變轉卽先具合拆數目上簿候折了赴造船場納畢取到收附於催綱司呈驗開落勾銷仍於都曆上照會開落每遇轉運使巡歷並須子細點檢

右謹具如前當司起請催綱司條件只是規矩大綱更有合何事件乞令催綱司續次申舉其催促行程點檢官物拘轄新舊舟船及拆修除破等事並委催綱司專切管勾所有支撥舟船應副般運卽申擬轄司總領仍令本路轉運司逐時點檢如有違慢並乞嚴行斷決其情理重者仍乞奏取勅裁所貴上下遵行久遠漕運通流不至悞事

河北奉使奏草卷上

河北奉使奏草卷下 集一百十八

乞免差人往崑嵐軍築城

臣近準朝旨於河北差兵士二千人往崑嵐軍修城本司尋會奏乞於閑慢路分抽差今奉樞密院劄子奉聖旨如委實人數不足即仰抽差一千人者雖蒙朝廷許減一千人伏緣本路除祁瀛定雄霸等州見闕修城兵士外近又節次據滄博州狀申為河水汎漲向着緊急乞差人夫兵士應副功役本司為轄下例各闕人已牒滄州如河水大段汎漲令應急量差人夫功役博州即見於諸州軍剗刷例各無可抽差方欲奏聞乞朝廷於降路抽差應副次今準朝旨令依前降指揮於近便州軍應急抽那臣非不知河東河北俱係邊防路分若本路實有兵數不少臣亦豈敢自私自一路妄有占留只緣本路實為闕人處多今若朝廷須令差撥即將轄下見役處罷役那往崑嵐縱河北事有闕候緣臣已有奏請朝廷必未深罪其如於事有闕在臣之職不敢不言况今年黃河水勢不類常年即今五月已汎漲如此將來夏末秋初必大段漲溢本司方別具奏乞於京東西路差人兼兼本路役兵多惟河上及修城西山採木等處各有人數河上既不可抽那若抽河北修城兵士與河東修城又兩地事體不異而西山採木蓋為即今諸處分擘七百已上人禁軍別立指揮各要營房及敵棚樓子防城器用並是緊切不可闕用之物若不於逐處功役內抽人即轄下例各別無閑占之人可差伏乞朝廷更賜體卹且乞令河東路一面應副崑嵐功役謹具再奏聞

再奏

臣近準朝旨令本路差兵士一千人往崑嵐軍修城臣已再具劄子奏乞占留其本路黃河及修城採木緊切功役浩大及闕人次第已具前奏劄子臣伏詳朝廷指揮令於近便州軍應剗刷勘會本路與河東近便惟有成德軍最近其路出土門經天威軍平定軍至并

州又出天門關經惠州飛鷲軍入洪谷方至崑嵐約一千五百餘里據明鑄元奏稱向去二十二箇月方了今縱河北差一千人往彼遠涉一千五百里山險到彼卒未了嘗將來冬月崑嵐苦寒役兵各須歸營歇泊令一千人往來三千里苦寒山路必致大段逃亡作賊况北虜縱有事宜必先河北河北重地莫如定州今定州所修城池將元計工料及見役人數亦須五六年方了今若更抽減人往河東即河北完緝禦備全然弛廢况除定州外瀛雄祈霸等州修城處亦須向秋兼用強壯一二年內期可了當本司非不能張皇事體煩贖朝廷乞人蓋以北虜即今別無事宜一二年間幸可漸次了當今崑嵐修城功限比定州全小路分事宜緊慢又與河北不同亦未銷得遠涉三千里於緊切處抽人所有德博黃河今年水勢甚大於去年今春朝廷差到河上兵士全少如去歲若旦夕逐州更有申報須至煩朝廷乞人外所有諸處修城功役雖見闕人本司亦當斟酌事體緊慢只於本路漸次修葺惟乞朝廷體卹更不抽撥往別路庶免本路闕慢其抽差一千人劄子臣亦未敢施行取進止

乞選差文臣知定州

臣等伏見知定州李昭亮已抽赴闕見闕知州定州控扼西山險要於河北三路最為重地軍民政事邊鄙機宜須藉通才方能辦集况即今北界見於界首興建寨柵及於銀坊口侵占疆封處置之間或須應變鎮撫之術尤要得人况河北比於陝西四路事體甚重今秦渭延慶並用文臣伏乞朝廷特於文臣兩制已上選差一員知定州或便兼部署或別差武臣充部署所貴委任得人邊事有備取進止

乞預聞邊事

臣昨蒙朝廷選擇差充河北都轉運使之日授到付身不下司劄子云河北宜選有文武才識轉運使二員密授經略之任使其熟圖利害陰為預備以臣非才誠不當文武才識之目其如朝廷責任之意

然而必欲密爲經略熟圖利害則須外詳邊鄙之事內不爲朝廷所疑竭慮盡心猶恐不副委寄檢會去年定州軍城寨爲北虜於石白子口侵入內界卓立鋪屋本寨爲地分不屬沿邊安撫司遂依例申報轉運司無何安撫司並不勘會不係地分便發怒妄奏軍城官吏不合申轉運司乞行取勘又蒙朝廷更不照會便下轉運司詰問軍城官吏賴本寨引執元降勅條分明臣與本寨主等偶免罪譴其不屬安撫地分合申轉運司者尙如此其他沿邊係安撫司地分固不得與聞矣昨來北虜於安肅軍北欲移界標南侵邊臣既承例不以事報轉運司臣心不能安因以手書問知軍侍其濬濬亦不敢答又昨臣寮有起請復支保州沿邊巡檢兵士口食者是臣本路本司職事竊聞本爲小人上言不識事體乞不下轉運司朝廷因此只下程琳一面相度臣竟不得與聞臣既親蒙密授經略之任使其圖利害爲預備而外則邊防之事了不聞知內則不足爲朝廷取信而本司職事亦不得與議平日無事之時尸祿而居尙當憂愧况聞近日邊鄙頗有事端飛狐界上興立城柵漸貯甲兵又於銀坊冶谷以來壘石爲城包侵南界大役人夫卓立堡寨竊慮嚮去沿邊別有事宜臣既授上件劄子內委任之意凡事不可不知兼臣體問得舊日邊上州軍事宜並申轉運司只自通和後漸廢臣今欲乞應係沿邊事宜自來申報安撫部署司者亦乞令逐州軍申報轉運司所貴稍得與聞邊事至於儲蓄糧草修城池器械亦量酌事體緊慢不至乖方其間愚慮或有所長更冀裨助萬一而少副委任之意如允臣所請乞明降指揮取進止

再奏

臣近曾奏爲先授朝廷密旨令熟圖河北利害陰爲預備然邊防事意元不與聞乞今後沿邊事宜並令申報轉運司至今未奉朝旨者臣伏以轉運使雖合專掌錢穀不與兵戎然河北事體不同他路故

授之密旨常使經營况今沿邊知州武臣不過諸司使副已下其通判卽是常參初入京朝官等臣被朝廷責任比沿邊知州通判故不爲輕下至機宜司手分亦是轉運司所差並得盡聞機宜事臣之本司獨不得與且臣愚慮非欲侵邊臣之權攬事多管以招罪累蓋臣所職糧草錢帛蓄積之備其賦斂緩急須量邊事緊慢以至按察沿邊將吏能否亦要知其處事如何伏望朝廷細詳元降不下司劄子內事意及比類沿邊通判初入京朝官等許本司今後與聞邊事所有沿邊申到事宜卽不得直便行遣文字苟有所見須令密具奏陳不得下司漏洩如此則本司得知邊事緩急凡於計置準備不至緊慢乖方而又愚見苟有所思亦得少裨萬一取進止

乞令邊臣辨明地界

臣伏見近日北虜於四望口起立寨柵及於銀坊冶谷已來侵過南界壘石爲城寨等事竊以北虜初立寨柵已違誓書然猶在彼界內可以佯爲不知不須緊問兼萬一中國却合有興修去處可以引彼爲詞以塞問難雖然如此亦當早爲預備便合於界首分明界防彼亦必更南侵事既造形理須杜漸其如朝廷選任非人從來以定州一路付與李昭亮其人昏懦而不曉事機雖有勾當事人並不能先謂探得起寨事端及已立了寨柵又不能預防侵界之患直至囚捉了巡邊指揮使湯則侵了銀坊以南邊地大與人夫壘立城寨至今終亦不能辨理疆界拒絕侵凌竊以北虜號爲犬戎自古畏強欺弱今若便示以怯不爭於初則必更引其貪心別有侵擾養成事體漸大而不與之爭則爲患不細爭之則必起事端惟在卽今速爲處置據今事體不煩朝廷只委邊臣自可了當然湯則被囚之後亦不聞別有壁畫至今侵界立寨等事但聞婉順止約彼既不聽亦別無謀臣近體問得往年雄州西北亦曾爲北戎侵界立數處鋪屋當時邊臣葛懷敏力以公牒往來爭辨拆卸鋪屋北人竟不敢爭况今來所

侵南界百姓見耕種田中地界分明易爲理會今來已蒙朝廷差王德基知定州其人久在雄州頗諳邊事伏乞早降朝旨下邊臣速令止絕辦理地界早見分明兼軍城西北山路險絕銀坊等口皆可出兵我於此口扼其險要是中國必爭之地彼於今日侵得此一二十里則險固在彼而他日行兵是彼可以來我不可往之勢以此言之尤不比河東陽武天池等處侵地便因循不爭伏乞朝廷早賜指揮王德基如婉順止約不得即須力與論辨仍乞令檢會雄州安撫司等處往年會拆卸鋪屋行遺令依此相度施行所貴邊防不生他患取進止

乞差武衛人員

臣昨權成德軍日爲屯駐淄州武衛第六十六指揮兵士高林等乞替會有劄子奏聞尋蒙朝旨以京東一路所管武衛不少例各差在別路屯駐奉聖旨劄與臣詳此照會者臣尋作本府行遺備錄聖旨告示本營知委訖臣今勘會上件武衛兵士共六百三十一人並無正轄官員只有權管副都頭四人並是往年曾在信安軍作過之人及本營雖有正軍頭十將等八人亦並是曾在信安軍作過之人部轄此六百人思歸之卒久遠深不爲便伏乞朝廷檢會早賜自京選差有心力能部轄正副指揮使及逐都正都頭所貴可以部轄久遠別不生事臣亦密體問得權管人員姓名因依今具如後

一人軍頭劉緒

三人右十將孫榮田榮蔡斌已上四人元係

本州武衛第九指揮內軍頭及右十將昨於慶曆三年十一月內準州帖準步軍司牒權充第六十六指揮副都頭勾當並未會正授查其人等各係曾在信安軍作過之人

一人軍頭韓筠

十人左右十將四人左徐吉賀進谷與段千

三人右王清丁用楚興

已上八人亦元係本州武衛第九指揮將虞候承局昨於慶曆三

年正月內授州帖差到於慶曆四年四月授步軍司帖正充六十六指揮勾當亦係曾在信安軍作過人數

右具如前所有上件武衛兵士高林等當京東武衛刺面排定軍分之時獨此一指揮累次糾合陳詞今來準密院劄子告示後雖不敢別有詞說然此一軍兵士已是累日扇搖人數既多又無正管人員只令會作過人權管深爲不便伏乞朝廷特賜允臣所奏早與差補有心力正副指揮使及軍頭等部轄

乞住買羊

勘會河北自前不會配買羊畜自西事已來分配於河北收買竊見京師羊畜有備準三司指揮截住權場上供羊綱於西路州軍牧放一萬六千餘口至冬深死却五千餘口所有今年人戶配買羊已上京送納訖却饋下權場羊綱在邢洛等州牧養竊慮冬深枉有死損臣等相度剩數羊綱見在河北州軍牧養只以盡數上京自可供用得足乞今後河北特住配買羊數委得公私俱利仍乞今後京師羊少却於陝西依舊配買取進止

乞條制都作院

當司檢會近蒙朝廷依奏差到磁相二州都鐵作院監當使臣二員各已赴任訖所有作院工匠營房蓋造亦已了畢當司見揀選轄下州軍內打造得兵器精好處取樣及於本路軍器庫內揀選往時經使舊兵器內試驗精利者取爲樣及申三司於南北作坊檢會工課料例及於轄下抽揀工匠令都作院依樣打造伏緣本路鐵炭出自磁相二州自來諸州軍不以遠近並於磁相檢請生鐵差占衙前枉費脚乘般於不出炭州軍廣破官錢買炭變煉及散在逐州軍打造監官多不得人加又當司巡歷地分闊遠每年內不過各到得一次往往有不及到處難爲點檢不惟虛破人工物料不少兼更造成不精器械久遠有悞使用今來已蒙朝旨許置都作院若制置得久

遠不廢本路兵器必皆精好其利甚博伏緣初置事初合有諸般規式今具畫一如後伏乞朝廷特賜勅命指揮所貴久遠官吏遵守施行

一都作院所造兵器其閑雜不急各件欲乞並不得打造只令打造一色切要使用之物箭頭甲葉槍劍手刀等候打造成於本州軍內送納仍令別作一項封樁專準備緩急支與合要州軍除許轉運司支撥本州不得專擅使用所有其餘閑雜之物及修補舊器械並令諸州軍量留工匠自造

一本路轉運提刑共四員欲乞每次季輪一員專至都作院點檢將前季工課文字磨算造到兵器候見數即依數點檢試驗內手刀及劍每一百口內抽揀三二十口用甲葉或墮錢斫試鋼刀箭頭亦於每一百箇內揀三二十箇安入箭輪用鐵甲硬弓弩試射槍亦試驗鋼刀如是槍刀劍刀軟卷缺及箭頭尖卷鏢折甲葉長闊厚薄不依斤重者並勒專工匠等陪填打造及等第區分

一都作院逐作工課欲乞依本州作院起置工課文曆監官與本州知州通判都監依例簽押及旬呈如是一任內造到兵器經轉運提刑點檢並無揀退各得精好即乞據造成萬數批上曆子理爲勞績內本監官將見監一任理合入差遣得替優與先次點差如任內更有知州提刑轉運三人保舉即乞與轉官酬獎如逐季點檢揀退三分已上並畫時取勘奏乞重行朝典如知州通判都監候一年終如揀退三分已上亦乞等第責罰如揀退二分本監官乞許本司量罪勘罰如揀退不及分數即工匠千繫人等許點檢官員酌量勘斷

一河北一路諸州軍作院欲乞且令依舊內合行造作及合減罷者乞許當司相度施行候年歲間都作院打造兵器各及萬數

可以應副諸處使用即將諸州軍作院工作及舊有監官處漸次減省

右謹具如前所有上件畫一事理更乞朝廷特賜詳酌如得允當乞降勅命指揮下本司及磁相州都作院及提點刑獄司等處遵守施行

再乞放行皮角

臣近爲兵興以來改法禁絕民間牛皮筋角等令人戶盡底直納入官因此却致官中闕絕使用後來雖亦許破官錢收買緣已有上項盡底納官禁法若不納入官却於官場中賣即是違禁之物致人戶不敢赴場中賣乞却依天聖編勅及前後舊條許人戶自死牛馬皮筋角中賣入官分爲三等支錢其不及等者退還本主及置場收買客旅輿販者所貴却似舊日公私各獲濟用會具利害劄子奏聞至今未奉朝旨臣近體問得河東路亦爲禁止牛皮筋角已來闕絕使用近已却依舊放行即今河東大段有牛皮筋角等使用甚爲利便勘會本路合修兵器萬數不少自來累據諸州乞支物料本司只是牒逐處拘攔使用及申奏乞自京支撥檢會只自今年正月後諸州所少牛皮筋角等七萬一千餘事件累次申省乞支撥及令逐處拘攔自死者使用據諸州軍所申即云無可拘攔乞支撥及申奏乞支撥即準省牒又却令逐處拘攔空煩行遣文字繁多積壓下未修軍器萬數終是無由了當况今見行之法其弊易見禁民令盡納則絕無納者置場收買則民礙法不敢中賣兼河東近已放行甚見其利欲乞朝廷檢會臣前奏劄子特賜詳酌明降指揮許依舊法令人戶將三等牛皮筋角入官中賣支與價錢及許收買客旅輿販者其不中等者退還本主所貴公私各獲濟用不至時紊煩朝省乞行支撥及不空費文移令逐處拘攔虛積壓下未修軍器久遠深爲不便今取進止

奏北界爭地界

準密院劄子節文北界於銀坊城創修寨壘侵占南界奉聖旨令程
林河北都轉運司提點刑獄司壁畫如何理占拆去者

右謹具如前當司勘會昨據定州軍城寨申銀坊城南冶谷口有北
界兵馬創起寨子當司尋具聞奏乞下沿邊安撫司施行自後雖知
安撫司會與北界公文往來至今未曾拆去寨子又緣自來安撫司
邊機文字不曾關報當司不見得安撫司逐度說何事意如何占理
及不知北界却以何詞爲答今來已立寨子貯畜器甲及防戍之人
不少事勢已成竊恐難爲追理蓋是邊臣從初失於違慢當其建寨
未成之時不早爭占及建寨雖成未貯甲兵之際又不能拆去今已
縱成其計却欲理會必須費力兼當司全不知北界與沿邊往復意
度見行體問候見次第或有管見別具奏聞次謹具狀奏

論契丹侵地界狀

右臣伏見北虜近於界首添建城寨及拘囚定州巡兵湯則侵過銀
坊冶谷地界等事竊聞朝廷至今未有分明嚴切指揮令邊臣以理
爭辨竊料朝廷之意必謂爭之恐有引惹之虞此乃慮之過而計之
失也夫虜性貪狠號爲犬戎欺弱畏疆難示以怯今杜之於早而力
爲拒絕猶恐不能若縱之不爭而誘其來侵乃是引惹况西山道路
有二千餘處皆可行兵其險要所扼在於軍城銀坊等路爲彼奪據
而不爭則北寨王柳等口漸更來侵豈能爭矣是則西山險要盡爲
彼奪一日使虜以大兵渡易水由威虜之西平陸而來以奇兵自飛
狐出西山諸口而下則我腹背受敵之患不知何以禦之此蓋兵法
必爭之地也且與人爲隣敵而自棄險要任彼奪據而不爭雖使我
弱彼疆尙須勉強何況勢鈞力敵又違誓約而彼曲我直乎臣謂朝
廷所以然者蓋由未察虜中強弱之形而不得其情僞之實也臣又
見朝廷常有懼虜之色而無愛虜之心夫愛之與懼各近而意殊愛

者深思極慮而不敢暫忘懼者臨事惶惑而莫知所措今邊防之事
措置多失其機者懼虜之意過深也若能察其強弱之形得其情僞
之實則今日之事誠不足懼而將來之患深而有可憂奈何不憂其深
可憂而反懼其不足懼且戎虜雖以戰射爲國而耶律氏自幼承其
父祖與中國通和之後未嘗躬戰陣遭勅敵謀臣舊將又皆老死今
其臣下如貫寧者無三兩人寧才不及中人已是彼之傑者所以君
臣計事動多不臧當初對梁適遣使河西使與中國通好及議和垂
就不能小忍以邀中國厚利乃與元昊爭夾山小族遂至交兵而累
戰累敗亡人失馬國內瘡痍誅斂山前漢人怨怒往時虜殺漢人者
罰漢人殺虜者死近聞反此二法欲悅漢人漢人未能收其心而虜
人亦已怒矣又聞今春女貞渤海之類所以離叛攻劫近纔稍定方
且招輯敗亡修完器甲內恐國中之復叛外有西夏之爲虞心自懷
疑憂我乘虛而北襲故於界上勉彊虛張因我巡兵侵我地界蓋其
實弱而示彊者用兵之詭計故臣謂苟能察其疆弱知其情僞則無
不爭之理何必懼其不足懼哉自國家困於西鄙用兵常慮北戎合
謀乘隙而動及見二虜相失而交攻議者皆云中國之福夫幸其相
攻爲我之福則不幸使其解仇而復合豈不爲我禍乎臣謂北虜昨
所以敗於元昊者亦其久不用兵驟戰而逢勅敵耳聞其自敗輒以
來君臣恐懼日夜謀議通招丁口東募甲兵處處開教閱之場家家
括糧馬之數以其天姿驍勁之俗加以日夜訓練之勤則其疆難敵
矣今虜國雖未有人然大抵爲國者久無事則人難見因用兵則將
自出使其交戰既頻而謀臣猛將爭能並出則是夾山一敗警其四
十年因循之弊變驕心而爲憤志化墮卒而爲勁兵因屢戰而得驍
將此乃北虜之福非中國之福也此臣所謂將來之患者也然二虜
勢非久相攻者也一二年間不能相并則必復合使北虜驅新勵之
疆兵無西人之後害而南向以窺河北則又將來之患大者也臣雖

不知朝廷顧河北爲如何但於本路之事以今年較去年則亦可見去年以前河北官吏無大小皆得舉材而擇能急於用人如不及者惟恐一事之失計故也自今春已來差除漸循舊弊凡幹敏之吏熟於北方事者舉留奏乞百不一從不惟使材臣能吏不勸而殆亦足見朝廷不憂河北之事辦否也至如廢緣邊久任之制而徒劉貽孫以王世文當冀州李中吉當廣信王中庸當保州劉忠順當邢州如此數人於閑慢州軍尙憂敗政况於邊要之任乎臣愚以朝廷不以北事爲憂則又怯懼如此既曰懼矣則於用人之際又若忽而不憂此臣之所未論也臣聞虜人侵我治谷雖立寨屋三十餘間然尙遲延未敢便貯兵甲更伺我意緊慢若不及早毀拆而少緩縱之使其以兵守之則尤難爭矣此旦夕之間不可失也至於湯則亦聞囚而未敢殺此亦不可不爭臣願陛下但以將來之患爲憂不忘此事用人之際革去舊例而惟材是擇勿聽小人之繆謀勿於忠良而疑貳使得上下畢力庶幾漸成禦備至於目今小事未銷過自怯懼夫事之利害激切而言則議者以爲太過言不激切則聽者或未動心此自古以爲難也况未形之事雖曰必然而敢冀盡信乎伏望陛下留意聽納不以人廢言則庶竭愚警少裨萬一謹具狀奏聞謹奏

論河北財產上時相書

某頓首啓仲春漸暄伏惟相公尊體動止萬福某不佞少以文章言語自任而頃備諫諍之臣得與朝廷論議當中外多事天子急於聽納之時不以爲愚而屢加獎擢及得寵太過受恩太深則自視區區素所任者不足以報一作奮萬一故方欲勉彊不能以圖自三字一作以俾報效而蒙相公不以爲不才而擇天下諸路中最重之地以授之而責其所爲一作報效當此之時自宜如何可以塞責及臨職以來迨一作近將半歲齷齪自守未知所措一作爲非敢怠也誠有說也一作焉至於山川險易城寨屯防邊陲守備等事是皆河朔之

大者朝廷已委樞密當公經畫之矣而本司之事自不爲少凡自河以北州軍縣寨一作州府軍縣一百八十有七城主客之民七十萬五千有七百戶官吏在職者一千二百餘員廂禁軍馬義勇民兵四十七萬七千人騎歲支糧草錢帛二千四百四十五萬而非常之用不與焉其間事目之節利害之源非詳求而審察之不能得其要前張昞之等急於舉職公家之利知無不爲其興利除害便於事者極多而時有失於不審更改過繁而涉一作失於苛碎者故自繼職以來遵其所長戒其所短凡事關利害者慎之重之未敢輕議今半歲矣官吏之能否公私之弊病粗已得其十七八而又取一作先求其事涉苛碎紛繁而下切患之有司自可改復不煩朝廷處分者先以次第行之乃暇及於其它然其事繫利害有司不敢自決必當一作而必上聞者其類甚多而久之一作初則未敢干一作以煩朝聽者不惟自疑於不審誠慮朝廷鑒昞之等前失不能盡信其說而必一無必字從之今慎之久矣得之詳矣苟有所請實有望於見信而從之也凡河北大事富公經營之外其要不過五六其一作凡不可爲者一其可爲者四五耳雖皆有司之事然朝廷主張之則能行不主張之則亦不能爲也自古邦國財產之利必出山澤故傳曰山海天地之藏也自兩漢以來摘山煮海之利必歸公上而今天下諸路山澤悉已權之無遺利矣獨河北一方兵民所聚最爲重地而東負大海西有高山此財利之產天地之藏而主計之吏皆不得取焉祖宗時哀閔河北之民歲爲夷狄所困盡以海鹽之利乞與疲民此國家恩德在人已深而不可奪者也西山之長數百里其產金銀銅鐵丹砂之類無所不有至寶久伏於下而光氣苗礦往往溢發而出地官禁之不許取故捨此惟有平地耳河北之地四方不及千里而緣邊廣信安肅順安雄霸之間盡爲塘水民不得耕者十八九澶衛德博濱滄通利大名之界東與南歲歲河災民不得耕者十五六今年大

豐秋稅尙放一百萬石滄瀛深冀邢洛大名之界西與北鹹鹵大小鹽池民不得耕者十二四又有泊淀不毛監馬棚牧與夫貧乏之逃而荒棄者不可勝數大山大海之利既不可取而平地堪出財賦者又有限而不取一作人不多其取者不過酒稅之入耳其入有數而用度無常也故雖研桑之心計捨山澤與平地不能爲之此所謂不可爲者一也一本無此九字及其用有不足不過上干朝廷乞銀絹而配一作下殃疲民號爲變轉爾此近年之弊也此六字一作所謂不可爲者二也然若能擇官吏以辦職事裁僥倖以減浮費謹良材精器械以助武備因貴賤通漕運而移有無如此之類苟能爲之尙可使邊防相足而京師省費用此冀此三字一作尙足以裨萬一而皆有弊病理須更改事目委曲非書可殫敢具其大綱列於別紙伏望特加省覽察其利害或其所說不至大乖戾望少信而從之俾畢其所爲若夫盡其所爲而卒無成焉則不待朝廷之責而自當劾去若其有以裨萬一則何幸如之伏惟聰明少賜裁擇不宜某頓首再拜

自劾乞罷轉運使

右臣檢會轉運司近爲相度順安軍塘泊水口予與楊懷敏等所奏頗有異同議方未決近準樞密院劄子節文臣寮奏乞今後近塘泊州軍人戶地內蘆葦等並不得採取及自順安軍以西漸近西山水難滯聚今卽不往開治及乞今後標占却人戶田土卽將官地給還人戶或估計價錢給付等第奉聖旨依奏仍令本路提刑田京專切管勾者臣伏見國朝之制河北轉運使皆領都大制置屯田使之名兼臣赴職之初被朝旨密授經略之任以此見朝廷差選之際其任非輕於臣職分之間所責尤重至於塘泊邊防利害之事皆其職也職隲其守谷將安歸豈有親蒙密授經略之旨身領都大制置之名而煩朝廷別委他官專切管勾則臣之不才不能任事不待彈劾可

以自知况臣將及暮年絕無績効考其常課已合黜幽又以不才失其本職且都大制置豈是假人之虛名苟非其人自當易去豈可容不才之人戶位移本職於他司使臣偷安實難自處伏望聖慈據臣不才失職之狀降授一小郡差遣庶以警勸在位之人臣無任祈天望聖激切屏營之至謹具狀自劾奏聞伏候勅旨

河北奉使奏草卷下

奏事錄

集一百十九

自治平一年六月十一日已後其日進書者乃已前事忘其月日矣

論孫長卿為臺諫所劾事

孫侍郎長卿罷環慶路總管拜集賢院學士為河東都轉運使臺諫交章論列長卿守邊無狀宜加降黜中書以長卿無敗事昨因朝廷起孫汚於致仕欲委以西事而長卿以歲滿得代無過可黜而臺諫論奏不已最後賈中丞二章六月十一日進呈上厲聲曰已行之事何可改易臣脩奏曰臣等不為已行難改若朝廷果是除授不當能用臺諫之言改正足以彰陛下從諫之聖至於臣等能不遂非而服義改過不悛聖賢所難亦是臣等好事但以長卿除授不為過當若曲從臺官之言使彼銜冤受黜於理豈安改難行也韓公曰自陛下親政已來臺諫所言施行者少外人之議謂致人主有拒諫之名者是臣等之過若其言有可行者臣等豈敢不行直以長卿無過難徇言者濫行黜罰耳上皆然之上又曰人言臺諫奪權臣脩奏曰此則為陛下言者過也朝廷置臺諫官專為言事若使默然却是失職苟以言事為奪權則臺諫無職可供矣

辨蔡襄異議

蔡侍郎襄自給事中三司使除禮部侍郎端明殿學士知杭州初上入為皇子中外相慶知大計已定矣既而稍稍傳云有異議者指蔡公為一人及上即位始親政每語及三司事便有忿然不樂之色蔡公終以此疑懼請出既有除命韓會二公因為上言蔡襄事出於流言難以必信前世人主以疑似之嫌害及忠良者可以為鑒也臣脩亦啓曰或聞蔡襄文字尚在禁中陛下曾親見之乎上曰文字即不曾見無則不可知其必無臣脩奏曰若無文字則事未可知就使陛下曾見文字猶須更辨真偽往時夏竦欲陷富弼乃先令婢子學石

介書字歲餘學成乃偽作介與弼書謀廢立事書未及上為言者廉知而發之賴仁宗聖明弼得免禍至如臣自丁母憂服闋初還朝時有嫉臣者乃偽撰臣一劄子言乞沙汰內官欲以激怒羣闈是時家家有本中外謔傳亦賴仁宗保全得至今日由是而言陛下曾見文字猶須更辨真偽何況止是傳聞疑似之言何可為信上曰官家若信傳聞蔡襄豈有此命

獨對語八月十四日

是日昭文與西廳趙侍郎皆在告集賢私忌臣脩獨對崇政殿進呈文字學敏劄將退上有所問所問不緣臣脩因奏曰近聞臺諫累有文字彈奏臣不合專主讓王之議上荷陛下保全知此讓非臣所得獨主臺諫文字既悉留中言者於是稍息上曰參政性直不避衆怨每見奏事時或與二相公有所異同便相折難其語更無回避亦聞臺諫論事往往面折其短若似奏事時語可知人皆不喜也今後宜少戒此臣脩對曰臣以愚拙敢不如聖訓上曰水災以來是月三日言事者多云不進賢臣脩曰近年以來進賢之路太狹此誠當今之患臣每與韓琦等論議未合上曰何謂進賢路狹中書常所進擬者其人皆如何臣脩對曰自富弼韓琦當國以來十數年間外自提刑轉運內則省府之類選擇其精時亦得人比於往年絕不同也然皆錢穀刑名強幹之吏此所謂用材也如臣所言進賢之路謂館職也上曰如何臣脩曰朝廷用人之法自兩制遷居兩府今學士舍人待制通謂之兩制自三館遷居兩制是則三館者輔相養材之地也往時入三館有三路今塞其二矣此臣所謂太狹也上曰何謂三路臣脩曰進士高科一路也大臣薦舉一路也因差遺例除一路也往時進士五人已上及第者皆入館職第一人及第者十年而至輔相者今第一人及第者兩任近十年方得試館職而第二人已下無復得試是高科一路塞矣往時大臣薦舉隨即召試今但令上簿候館

閣闕人與試而館閣人無員數無有闕時則上簿者永無試期是薦舉一路又塞矣唯有因差遣例除者半是年勞老病之人也此臣所謂進賢之路太狹也後數日上因中書奏事遂處分令擇人試館職

御藥陳承禮監造衮冕事八月

先是三司奏造作諸物舊屬少府監文思院後苑作紫雲樓下近年多別置局以內臣監作各爭占工匠乞一切依舊歸于有司遂依奏既而少府監中造衮冕內批令御藥院陳承禮監造中書覆奏上以南郊日近須內臣庶可辦集韓曾二公奏以衝改近降指揮不若令承禮就少府監作上意未決臣脩奏曰此是陛下新降指揮從來所患朝令夕改今若依前用承禮監作只是移御藥院置局就少府監中耳如此何害集事上遂曰可

內降補僧官九月十九日

先朝僧官有闕多因權要請謁內降補人當時諫官御史累有論列元帝深悟其事因著令僧職有闕命兩街各選一人較藝而補至是鑿義有闕中書已下兩街選一人未上而內臣陳承禮以寶相院僧慶輔爲請內降令與鑿義中書執奏以爲不可韓曾二公極陳其事臣脩亦奏曰補一僧官當與不當至爲小事何繫利害但中書事已施行而用內降衝改先朝著令則是內臣干撓朝政此事何可啓其漸又奏曰宦女近習自前世常患難於防制今小事若蒙聽許後有大事陛下必以害政不從是初欲姑息而返成怨望不若絕之於漸此一小事陛下不以爲意而從之彼必自張於外以謂爲上親信朝政可迴在陛下目前似一閑事外邊威勢不小矣上遽可中書所奏令只依條例選試臣脩又奏一有日字事既不行彼必有言萬事只由中書官家豈得自由行一事陛下試思從私請與從公議孰爲得失而韓曾二公亦所陳甚多上皆嘉納也

歐陽文忠公在政府時手錄奏對語此前一無前字五事得之

林子中家文忠手錄皆密語筆札精楷蓋欲傳示後今而子職不謹身沒未幾已流落於他人家其曰追書者皆不見又未知其在耶後三事亦子中錄以相示云得之於史院曾布子宜

題

又三事

三司使給事中蔡襄除端明殿學士尚書禮部侍郎知杭州初上自濮邸立爲皇子中外欣然無間言既卽位以服藥故慈壽垂簾聽政嘗爲中書言仁宗既立皇子因追思鄂王等悲傷涕泣宦官宮妾爭相熒惑而近臣亦有異議者可怪者一二知名人也因言執政數人不顧家族以定社稷之計而小人幾壞大事又云近臣文字只在先帝臥床頭近日已於燒錢爐內焚之矣然莫知爲誰也中書不敢問其姓名但唯唯而退已而外人亦稍稍言蔡襄嘗有論議尙莫知虛實既而上疾愈親政數問襄如何人一日因其請朝假上變色謂中書曰三司掌天下錢穀事務繁多而襄十日之中在假者四五何不別用人韓公已下共奏曰三司事無闕失罷之無名今更求一人材識名望過襄者亦未有脩奏曰襄母年八十餘多病况其只是請朝假不趁起居耳日高後便却入省亦不廢事然每奏事語及三司未嘗不變色襄亦自云每見上必厲色詰責其職事其後諒祚攻劫涇原西邊日有事宜上遂督中書以邊事將與軍須未備三司當早選人韓公等初尙揮解上意不回因奏待其陳乞可以除移初傳者多端或云上在慶寧已聞蔡異議或云上入宮後親見奏牘尙在至是因蔡乞罷劄子韓公遂質於上上曰內中不見文字然在慶寧卽已聞之韓公曰事出曖昧若虛實未明乞更審察苟令襄以飛語獲罪則今後小人可以搆害一作留字善人人難立矣曾公曰京師從來善造謗議一人造虛而衆人傳之便以爲實前世以疑似之言陷害忠良者非惟臣下被禍兼與國家爲患脩曰陛下以爲此事果有果

無上曰雖不見其文字亦不能保其必無僞曰疑似之謗不唯無迹可尋就令迹狀分明猶須更辨真僞只如先朝夏竦欲害富弼令其婢子學石介字體久之學成乃僞作介爲弼撰廢立詔草賴仁宗聖明弼得保全又如臣至和末丁母憂服闋初至闕下小人中有嫉忌臣者僞撰臣乞沙汰內官奏藁傳布中外家家有之內臣無不切齒只判銓得六日爲內臣楊永德以差船事罷知同州亦賴仁宗保全未久知其無罪遂却留住至今以此而言就令有文字猶須更辨真僞况此無迹狀陛下幸不致疑韓曾又各進說上曰數家各有骨肉意謂異議若行則執政被覆又曰造謗者因甚不及他人據此似聖意未解也

仁宗既連失喪豫鄂三王遂更無皇子自至和三年正月得疾踰時不能御殿中外憂恐既而康復自是言者常以根本爲急交章論述每輒留中故樞密副使包拯今翰林學士范景仁所言尤激切其餘不爲外人所知者不可勝數今樞密富相與昭文韓相亦屢進說雖余亦嘗因大水言之然初無采納之意如此五六年言者亦已稍怠嘉祐六年秋余自樞密過東府忽見內降一封乃諫官司馬光言立皇子事既而知江州呂誨亦有疏論述昭文與集賢會公及余晚議來曰當將上相顧以爲如何韓公曰若上稍有微意即當力贊成之曾公與余偕曰此吾儕素所願也既而明日奏事垂拱殿二章讀畢未及有所啓仁宗遽曰朕有意多時矣但未得其人余自爲校勘及在諫垣忝兩制迨此二十年每進對常極從容至此始聞仁宗自稱朕既而又左右顧曰宗室中孰爲可韓公惶恐對曰不惟宗室不接外人臣等不知此事豈臣下敢議當出自聖擇仁宗曰宮中嘗養二子小者甚純然近不惠大者可也遂啓曰其名謂何仁宗即道今上舊名曰名某今三十歲矣余等遂力贊之議乃定余等將下殿又奏曰此事至大臣等未敢施行請陛下今夕更思之臣等來日取旨明

日奏事崇政殿因又啓之仁宗曰決無疑也余等遂奏言事當有漸容臣等商量所除官來日再奏既退遂議且判宗正時今上猶在濮王喪乃議起復自大將軍遙郡團練使除泰州防禦使來日將上仁宗大喜曰如此甚好二公與余又奏曰此事若行不可中止乞陛下斷在不疑仍乞內中批出臣等奉行仁宗曰此事豈可使婦人知只中書行可也余等喜躍稱賀時六年十月也命既出今上再三辭避有旨候服除取旨至七年二月一日服除今上堅臥稱疾前後十餘讓至七月韓公議曰宗正之命始出則外人皆知必爲皇子也不若遂正其名使其知愈讓而愈進示朝廷有不可回之意庶幾肯受曾公與余皆以爲然及將上今上累讓表仁宗問如何韓公未對余即前奏曰宗室自來不領職事今外人忽見不久擢此子又判宗正則天下皆知陛下將立爲皇太子也今不若遂正其名命立爲皇子緣防禦使判宗正降誥勅御名得以堅臥不受若立爲皇子只煩陛下命學士作一詔書告報天下事即定矣不由御名受不受也仁宗沈思久之顧韓公曰如此莫亦好否韓公力贊之仁宗曰如此則須於明堂前速了當遂降詔書立爲皇子仍更今名自議皇子事凡所奏請皆余與西廳趙侍郎自書其改名劄子余所書也初擇日旁十字請仁宗點之其最下一字乃今名也是仁宗親點今封在中書今上自在濮邸即有賢名及遷入內良賤不及三十口行李蕭然無異寒士有書數廚而已中外聞者相賀

嘉祐八年上元京師張燈如常歲歲常以十四日上晨出遊幸諸宮寺賜從臣飲酒留連至暮而歸遂御宣德門與從臣看燈酒五行而罷是歲自正初上覺體中不佳十四日遂不晨出至晚略幸慈孝相國兩寺御端門賜從臣酒三行止自是之後雖日視朝前後殿而寢若不佳既而韓蟲兒事稍稍傳於外云去歲臘月上閑居見一宮婢汲井有小龍纏其汲綆而出以問左右皆云不見上獨見之以爲異

遂召宮婢視之乃宮正柳瑤真之私身韓蟲兒也其後柳夫人宿直閣中明日下直遣蟲兒取夜直坐整上獨處閣中召而幸之遂有娠蟲兒自云上已幸我取我臂上金錠子一隻云爾當爲我生子以此爲驗外人所傳如此而蟲兒於宮中亦自道云上幸我有娠又言金錠子上與黎伯使藏之矣黎伯者上所愛扶持內臣黎永德也是月二十七八間春寒微雨上不御崇政殿祇坐延和見羣臣奏事而殿中熾爐火云聖體畏風寒蓋自上臨御四十年盛暑未嘗揮扇極寒未嘗御火至是始見御前設爐火也自是之後上益不豫至于大漸今上卽位於柩前中外帖然無一言之異唯韓蟲兒事籍籍不已云大行嘗有遺腹子誕彌當在八九月也九月十七日余以服藥請一日假家居晚傳內出宮女三人送內侍省勘并召醫官產科十餘人坐婆三人入矣十九日入對內東門小殿簾前奏事將退太后呼黃門索韓蟲兒案示中書余等於簾前讀之見蟲兒具招盧僞事甚詳云自正月至今月水行未嘗止今方行也醫官坐婆軍令狀皆云去歲臘月黎永德奉使成都未還不在閣中而錠子埋在柳夫人佛堂前闕下太后使人監蟲兒至埋所自掘之深尺餘得金錠子一隻折爲三段矣合之以比臂上者同秤之各重一兩半兩錠重輕又同信爲是矣因以金錠俾余等傳看之太后言問蟲兒何爲作此僞事云以免養孃管捶庶日得好食耳蓋自蟲兒言有娠太后遣宮人善護之日給緡錢二千以市可食物如此至其月滿無娠始加窮詰耳余等遂前奏曰蟲兒事外已暴聞今其僞迹盡露可以釋中外之疑然蟲兒當勿留庶外人必信也太后曰固當如是旣而樞密院奏事簾前示之如前明日福寧上太行證冊罷見入內都知任守忠於廷中云蟲兒決臂杖二十送承天寺充長髮

濮議卷第一 集一百二十

英宗皇帝初即位既單大慶於天下羣臣並進爵秩恩澤遍及存亡而宗室故諸王亦已加封贈惟濮安懿王上所生父也中書以為不可與諸王一例乃奏請下有司議合行典禮奏狀具別卷有旨宜俟服除其議遂格音閣治平二年四月上既釋服乃下其奏兩制雜學士待制禮官詳議翰林學士王珪等議濮安懿王高官大國極其尊榮而已其議狀具別卷中書以為贈官及改封大國當降制行冊命而制冊有式制則當曰某親具官某可贈某官追封某國王其冊則當曰皇帝若曰咨爾某親某官某今冊命爾為某官某王而濮王於上父子也未審制冊稱為何親及各與不各乃再下其議而珪等請稱皇伯而不各其議狀具別卷中書據儀禮喪服記云為人後者為其父母報又據開元開寶禮皆云為人後者為其所生父齊衰不杖期為所後父斬衰三年是所生所後皆稱父母而古今典禮皆無改稱皇伯之文又歷檢前世以藩侯入繼大統之君不幸多當衰亂之世不可以為法唯漢宣帝及光武威德之君也皆稱其父為皇考而皇伯之稱既非典禮出於無稽故未敢施行乃略具古今典禮及漢孝宣光武故事并錄皇伯之議別下三省集官與臺官共加詳議未及集議而皇太后以手書責中書不當一有議字稱皇考中書具對所以然其對劄子具別卷而上見皇太后手書駭駭遽降手詔罷議而追崇之禮亦廢後數日禮官范鎮等堅請必行皇伯之議其奏留中已而臺官亦各有論列上既以皇太后之故決意罷議故凡一有有字言者一切留中上聖性聰睿英果燭理至明待遇臣下禮極謙恭然而不為姑息臺官所論濮園事既悉已留中其言他事不可從者又多寢而不行臺官由此積忿出怨言并怒中書不為施行中書亦嘗奏云近日臺官忿朝廷不用其言謂臣等塞塞言路致陛下為拒諫之主乞略與施行一二事上曰朝廷當以至公待天下若臺官

所言可行當即盡理施行何止略行一二若所言難行豈當副人情以不可行之事勉強行之豈不害事耶中書以上語切中事理不敢更有所請一作言上仍問曰所言莫有可行而未行者否韓琦已下相顧曰實無之因一有奏字曰如此則未有是時雜端御史數人皆新被擢用銳於進取務求速譽見事輒言不復更思職分故事多乖繆不可施行是時京師大雨水官私屋宇倒塌無數而軍營尤甚上以軍士暴露聖心焦勞而兩府之臣相與憂畏夙夜勞心竭慮部分處置各有條目矣是時范純仁新除御史初上殿中外竦聽所言何事而第一劄子催修營房責中書何不速了因請每一營差監官一員中書勘會在京倒塌軍營五百二十坐如純仁所請當差監官五百二十員每員當直兵士四人是於國家倉卒多事闕人之際虛破役兵二千人當直五百員監官而未有瓦木箬箔一併興修未得其任率疎繆如此故於中書聚議時臣脩不覺笑之而臺中亦自覺其非後數日呂大防再言乞兩營共差一官其所言煩碎不識事體不可施行多類此而臺官不自知其言不可施一無施字行但怨朝廷沮而不行故呂大防又言今後臺官言事不行者乞令中書具因何不行報臺其忿戾如此而怨怒之言一作語漸傳於士大夫間臺官親舊有戲而激一作誤之一有者字曰近日臺官言事書盡批進呈訖外人謂御史臺為進呈院矣此語甚著朝士相傳以為戲笑而臺官益快怏慚憤遂為決去就之計以謂因言得罪猶足取笑各是時人主聖德恭儉舉動無差失兩府大臣亦各無大過未有事可決去就者惟濮議未定乃曰此好題目所謂奇貨不可失也於是相與力言然是時手詔既已罷議皇伯皇考之說俱未有適從其他追崇禮數又未嘗議及朝廷於濮議未有過失故言事者但乞早行皇伯之議而已中書以謂前世禮連年不決者甚多此事體大况人主謙抑已罷不議有何過舉可以論列於是置而不問臺官羣至中

書揚言曰相公宜早了此事無使一作與他人作奇貨上亦已決意罷議故言者雖多一切不聽由是臺官愈益愧恥既勢不能止又其本欲以言得罪而買名故其言惟務激怒朝廷無所忌憚而肆爲誣罔多引董宏朱博等事借指臣某爲首議之人恣其醜詆初兩制以朝廷不用其議意已有不平一有者字及臺憲有言遂翕然相與爲表裏而庸俗中下之人不識禮義者不知聖人重絕人嗣凡無子者明許立後是大公之道但習見閭閻俚俗養過房子及異姓乞養義男之類畏人知者皆諱其所生父母以爲當然遂以皇伯之議爲是臺官既挾兩制之助而外論又如此因以言惑衆云朝廷背棄仁宗恩德崇獎濮王而庸俗俚巷之人至相語云待將濮王入太廟換了仁宗木主中外涵涵莫可曉諭而有識之士知皇伯之議爲非者微有一言佑朝廷便指爲姦邪太常博士孫固嘗有議請稱親議未及上而臺官交章彈之由是有識之士皆鉗口畏禍矣久之中書商量欲共定一酌中禮數行之以息羣論乃略草一事目進呈乞依此降詔云濮安懿王是朕本生親也羣臣咸請封崇而子無爵父之義宜令中書門下以瑩爲園即園立廟令王子孫歲時奉祠其禮止於如此而已乃是歲九月也忘其日矣上覽之略無難色曰只如此極好然須白過太后乃可行且少待之是時漸近南郊朝廷事多臺議亦稍中息上又未暇白太后中書亦更不議及郊禮既罷明年正月臺議復作中書再將前所草事目進呈乞降詔上曰待三兩日間白過太后便可施行矣不期是夕忽遣高居簡就會公亮宅降出皇太后手書云濮王許皇帝稱親又云濮王宜稱皇二夫人宜稱后與中書所進詔草中事絕異而稱皇稱后二事上亦不會先有宣諭從初中書進呈詔草時但乞上直降詔施行初無一語及慈壽宮而上但云欲白過太后然後施行亦不云請太后降手書此數事皆非上本意亦非中書本意一作議是日韓琦以祠祭致齋惟會公亮趙槩與臣

倚在垂拱殿門閣子內相顧愕然以事出不意莫知所爲因請就致齋處召韓琦同取旨少頃琦至不及交言遂同上殿琦前奏曰臣有一愚見未知可否上曰如何琦曰今太后手書三事其稱親一事可以奉行而稱皇稱后乞陛下辭免別降手詔止稱親而却以臣等前日進呈詔草以瑩爲園因園立廟令王子孫奉祠等事便載於手詔施行上欣然曰甚好遂依此降手詔施行手詔具別卷初中外之人爲臺官眩惑云朝廷尊崇濮王欲奪仁宗正統故人情涵涵及見手詔所行禮數止於如此皆以爲朝廷處置合宜遂更無異論惟建一作是皇伯之議者猶一作稍以稱親爲不然而呂誨等已納告勅杜門不出其勢亦難中止遂專指稱親爲非益肆其誣罔言韓琦交結中官蘇利涉高居簡惑亂皇太后致降手書又專指臣僣爲首議之人乞行誅戮以謝祖宗其奏章正本進入副本便與進奏官令傳布誨等既欲得罪以去故每對見所言悻悻惟恐上不怒也上亦數諭中書云誨等遇人主無復君臣之禮然上聖性仁厚不欲因濮王事逐言事官故屈意含容久之至此知其必不可留猶數遣中使還其告勅就家宣召既決不出遂各止以本官除外任蓋濮園之議自中書始初建一作啓請以至稱親立廟上未嘗有一言欲如何追崇但虛懷恭己一付大臣與有司而惟典禮是從爾其不稱皇伯欲稱皇考自是中書執議上亦無所偏執及誨等累論久而不決者蓋以上性嚴重不可輕回謂已降手詔罷議故稱伯稱考一切置而不議爾非意有所偏執也上嘗諭韓琦等云昔漢宣帝即位八年始議追尊皇考昨中書所議何太速也以此見上意慎重不敢輕議耳豈欲過當追崇也至於中書惟稱號不敢用皇伯無稽之說欲一遵典故耳其他追崇禮數皆未嘗議及者蓋皇伯皇考稱呼猶未決而遽罷議故未暇及追崇之禮也其後所議止於即園立廟而已如誨等廣引哀桓之事爲厚誣者皆未嘗議及也初誨等既決必去之意上屈意

留之不可得趙瞻者在數人中尤爲庸下殊不識事體遂揚言於人云昨來宮家但不曾下拜留我耳以此自誇有德色而呂誨亦謂人曰嚮若朝廷於臺官所言事十行得三四使我輩遮羞亦不至決去由是言之朝廷於濮議豈有過舉逐臺官豈是上本意而誨等決去豈專爲濮議耶士大夫但見誨等所誣之言而不知濮事本末不究誨等用心者但謂以言被黜便是忠臣而爭爲之譽果如誨等所料誨等既果以此得虛名而薦誨等者又欲因以取名夫揚君之惡而彰己善猶不可况誣君以惡而買一作賣虛名哉嗚呼使誨等心迹不露而誣罔不明先帝之志不論於後世臣等之罪也故直書其實以備史官之采

濮議卷第一

或問罷議之詔有權罷之文議者謂權罷者有待之言也蓋朝廷迫於皇太后不得已而罷故云權罷者欲俟皇太后千秋萬歲後復議追崇耳朝廷之意果如是乎答曰此厚誣之一事也使朝廷果有此意手詔雖無權字他日別議追崇何施不可何必先露此意示人是時臺諫方吹毛求疵以指爲朝廷過失若君臣果有此意亦當深謀密計豈肯明著詔令以資言者之口問者曰然則何故云權罷答曰事體自當如此爾追崇以彰聖君之孝而示天下也本無中罷之理今不得已而罷當爲逸邇之辭故云權罷集議更令禮官徐求典禮者乃體當如此一有耳字此事人所易知而呂誨等欲恐迫人主故厚誣以有待之說也先帝每語及此事則不勝其憤仰天而歎曰天鑒在上豈有此心或問皇太后既已責中書不當議稱皇考而手書復有稱皇稱后等事議者謂韓琦交結高居簡惑亂皇太后請降手書其稱親稱皇稱后皆非皇太后本意果若是乎答曰手書非皇太后本意事出禁中非外人所得知也若云因韓琦使高居簡請降手書則又厚誣也何以明之若手書是韓琦所請既降出便合奉行豈敢却有阻難又請上別降手詔也以此而言但見韓琦沮止手書稱皇稱后二事不見琦請降手書也一作詔問者又曰然則出於上意乎答曰亦非也若出於上意亦一作則當先論中書商議安得絕無一言及之又若上意果有所主而中書雖欲不奉行猶須再三論列方可回聖意豈有韓琦一言上即從之略無難色以此知上意不主也問者又曰然則稱皇稱后是哀桓之事中書以爲非而不奉行者也而呂誨表乃一作又云致主之謀不取哀桓之亂制者何謂也答曰此所以爲厚誣也且稱親置園寢及稱皇考皆是漢宣光武事呂誨等指以爲哀桓之亂制乃是指鹿爲馬爾以此見其誣罔何所不至也據漢書師丹上疏云定陶恭皇證號既已前定義不可復改據

此則恭王稱皇乃師丹許以爲是者故云不可復改爾昨國家於漢王固自不議稱皇就使稱皇亦是師丹所許者也問者曰若此則師丹當時與漢爭論何事答曰董宏欲去定陶國號而止稱恭皇及欲立廟京師爾此二事是師丹所爭也蓋恭皇之號常繫於定陶則自是於諸侯國稱皇爾與漢不相干也若止稱恭皇而不繫以國則有進干漢統之漸又立廟京師則亂漢宗廟此師丹不得不爭也昨漢王既不稱皇而立廟止在濮園事無差僭而呂誨等動以師丹自比不知朝廷有何過舉誨等果爭論何事也問者曰誨等所論者稱親也稱親果是乎答曰稱親是矣此乃漢宣故事也謹按宣帝之父曰史皇孫初丞相蔡義議稱親證曰悼裁置奉邑而已其後魏相始改親稱皇考而立廟京師至哀帝時議毀漢廟不合禮經者於是毀悼皇考廟在京師者是時丞相平晏等百餘人議曰親證曰悼裁置奉邑皆應經義由是言之立廟京師則當毀稱親置奉邑則自合經義也所謂應經義者即儀禮云爲人後者爲其父母報是也親者父母之稱也問者曰京師廟既毀而又毀奉明園者何也答曰漢制宗室諸侯王皆有園悼皇考自合置園初名奉明園置奉邑三百家可矣其後增爲一千六百家而改奉明園爲縣則僭天子之制矣故議毀之也今國家追崇漢王其禮數三而已稱親一也置園二也立廟三也稱親則漢儒所謂應經義者也置園則漢宗室諸侯王之制也立廟則一品家廟之制也如漢諸王廟當在本國今濮園一有爲字虛名無立廟處故即園而立廟爾其依經合義可以爲萬世法也問者曰漢儒既以稱親爲應經義又以兩統貳父爲非一有禮字者何謂也豈其議自相矛盾乎答曰兩議皆是不相矛盾也其初稱親而置邑也止在下國與漢朝不相干故不違經義也及其後立廟於京師與漢祖宗並立至元帝時議毀親盡之廟時昭帝既以親未盡不毀悼皇考亦以親未盡不毀是則悼皇考與漢祖宗並爲世數此爲一

作謂字兩統貳父也元帝既上承昭宣而又承悼皇考爲世所謂違離祖統者其議皆是也使悼皇考廟在奉明園而不與漢朝宗廟相干豈有兩統貳父之說乎問者曰父有貳乎答曰何止貳也父之別有五母之別有八皆見於經與禮而父之別曰父也所生父也所後父也同居繼父也同居繼父也同居繼父者父死而母再適人子從而暫寓其家後去而異居矣猶以暫寓其家之恩終身謂其人爲父而所生父者天性之親也反不得謂之父是可謂不知輕重者也問者曰父母之名果不可改乎對曰能深嫉爲後者尊其父母莫如魏明帝也明帝之詔曰有謂考爲皇稱妣爲后者大臣共誅之然則稱皇與后是其所禁而考妣之名雖明帝不能易也明帝之不能易是不可改也問者曰所生所後父之名徒見於禮文而今世未嘗用也今公卿士大夫至于庶人之家養子爲後者皆以一有其字所生父爲伯叔久矣一旦欲用古禮而違世異俗其能使衆論不誼乎答曰禮之廢失久矣始於閭閻鄙俚之人不知義禮者壞之而士族之家因相習見遂以成風然國家之典禮則具存也今士大夫峨冠束帶立於朝廷號爲儒學之臣爲天子議禮乃欲不遵祖宗之典禮謂開寶通禮五服年月等書而徇閭閻鄙俚之弊事此非臣某之所敢知也使臣以此得罪臣固無慚而不悔也况所謂以養子所生爲伯叔父者今但行於私家爾有司之議禮議律則未嘗不遵典禮也方禮官議以濮王爲皇伯也是時王子融卒初故相王曾之無子也以其兄子融之子繹爲後及子融之死也禮官議繹服所生父齊衰期而心喪三年夫以子融爲所生父是典禮也以濮王爲伯是閭閻之所稱也兩議並發於一時而爲臣下議則用典禮爲天子議則用閭閻其任情顛倒有如此而人莫與之辨也問者曰或謂所生父之名出於喪服記止可爲議服而言其他不可稱也果若是乎答曰律言所養父殺其所生父聽其子告者又豈因議服而言乎問者曰禮

有明文一作禮存父名而世不用者何也答曰聖人以立後爲公不畧人知故不諱不諱則其子必有所生父母也小人不知義禮以養子爲私畏人知之故諱其自有父母欲一心以爲我生之子故唯恐諱之不密也嘗試論之曰一本無此五字古之不幸無子而以其同宗之子爲後者聖人許之著之禮經而不諱也而後世閭閻鄙俚之人則諱之諱之則不勝其欺與僞也故其苟偷竊取嬰孩襁褓之子諱其父母而自欺以爲我生之子曰不如此則不得其一志盡愛於我而其心必二也而爲其子者亦自諱其所生而絕其天性之親反視以爲叔伯父以此欺其九族而亂其人鬼親疎之序凡物生而有知未有不愛其父母者使是子也能忍一有而字真絕其天性數會禽獸之不若也使其不忍而外陽絕之是大僞也夫閭閻鄙俚之人之一作其慮於事者亦已深矣然而苟竊欺僞不可以爲法者小人之事也惟聖人則不然以爲人道莫大於繼絕此萬世之通制而天下之至公也何必諱哉所謂子者未有不由父母而生者也故爲人後者必有所生之父此理之自然也其簡易明白不苟不竊不欺不僞可以爲通制而公行者聖人之法也又以謂爲人後者所承重故加其服以斬而所生之親恩有屈於義故降其服以期服可降父母之名不可諱故著於經曰爲人後者爲其父母報自三代以來有天下國家者莫不用之問者曰以濮王稱親則於仁宗之意如何答曰大哉仁宗皇帝之至聖至明也知立後爲公不畧人知而不諱也故明詔天下曰是濮安懿王之子也然則濮安懿王者爲所生父可知矣此仁宗先告于天下矣所謂簡易明白不苟不竊不欺不僞者聖人之法也問者曰議者以謂恭愛之心分施於彼則不得專一於此也此兩制議稱皇伯議狀之文也如是則恭愛可專施於一而不分施於二也使上之待濮王也既不施恭又不施愛是以行路之人待其所生也不亦過乎答曰行路之人遇其鄉閭之長者與有德者則

必疎然有肅恭之容遇其交遊故舊久不相見者則必忻然有離愛之語今遇其所生而既不施恭又不施愛是不如行路之人也忍爲斯言者誰乎君子之爲言也度可行於已然後可責於人今斯人也偶不爲人後耳使其自度爲人後而能以不恭不愛待其父母則能忍而爲此言也問者曰爲人後而不絕其所生之恩者施於臣民可矣施於國家而有宗廟社稷之重則將干乎正統柰何答曰濮園之稱親立廟今二歲矣而與宗廟朝廷了不相關也其於正統有何所干乎於此足以見言者之誣罔也復何疑乎

濮議卷第二

中書請議漢王典禮奏狀

韓琦等狀奏伏以出於天性之謂親緣於人情之謂禮雖以義制事因時適宜而親必主於恩禮不忘其本此古今不易之常道也伏惟皇帝陛下奮乾之健乘離之明擁天地神靈之休荷宗廟社稷之重即位以來仁施澤浹九族既睦萬國交歡而漢安懿王德威位隆宜有尊禮陛下受命先帝躬承聖統顧以大義後其私恩慎之重之事不輕發臣等忝備宰弼實聞國論謂當考古酌禮因宜稱情使有以隆恩而廣愛庶幾上以彰孝治下以厚民風臣等伏請一本臣等四字却作願字下有司議漢安懿王及譙國太夫人王氏襄國太夫人韓氏仙遊縣君任氏合行典禮詳處其當以時施行

兩制禮官議狀

臣等謹按儀禮喪服為人後者傳曰何以三年也受重者必以尊服服之爲所後者之祖父母妻妻之父母昆弟昆弟之子若子若子者言皆如親子也又爲人後者爲其父母報傳曰何以期也不貳斬也何以不貳斬也持重於大宗者降其小宗也又爲人後者爲其昆弟傳曰何以大功也爲人後者降其昆弟也以此觀之爲人後者爲之子不敢復顧私親聖人制禮尊無二上若恭愛之心分施於彼則不得專一於此故也是以秦漢以來帝王有自旁支入承大統者或推尊父母以爲帝后皆見非當時取譏後世臣等不敢引以爲聖朝法况前代入繼者多宮車晏駕之後援立之策或出母后或出臣下非如仁宗皇帝年齡未衰深惟宗廟之重祗承天地之意於宗室衆多之中簡拔聖明授以大業陛下親爲先帝之子然後繼體承祧光有天下漢安懿王雖於陛下有天性之親顧復之恩然陛下所以負展端冕富有四海子子孫孫萬世相承者皆先帝之德也臣等愚淺不達古今竊以爲今日所以崇奉漢安懿王典禮宜一準先朝封贈期

親尊屬故事高官大國極其尊榮譙國太夫人襄國太夫人仙遊縣君亦改封大國太夫人考之古今實爲宜稱

中書進呈劄子

準內降翰林學士王珪等奏崇奉漢安懿王典禮宜一準先朝封贈期親尊屬故事高官大國極其尊榮譙國太夫人襄國太夫人仙遊縣君亦改封大國太夫人考之古今實爲宜稱者伏詳王珪等所奏未見詳定漢安懿王嘗稱何親名與不名欲乞再下王珪等詳定聞奏

兩制禮官再議稱皇伯狀

臣等參詳真宗大中祥符八年楚王元佐以皇兄詔書不名仁宗即位涇王元儼以皇叔贊拜不名天聖五年加詔書不名此國朝崇奉尊屬故事今漢安懿王於仁宗皇帝其屬爲兄於皇帝合稱皇伯而不名謹具狀聞奏伏候勅旨

中書請集官再議進呈劄子

準內降翰林學士王珪等狀稱臣等參詳真宗大中祥符八年楚王元佐以皇兄詔書不名仁宗即位涇王元儼以皇叔贊拜不名天聖五年加詔書不名此國朝崇奉尊屬故事今漢安懿王於仁宗皇帝其屬爲兄於皇帝合稱皇伯而不名者臣等謹按儀禮爲人後者爲其父母報及按今文與五服年月勅並云爲人後者爲其所後父斬衰三年爲人後者爲其父母齊衰期卽出繼之子於所繼所生皆稱父母又漢宣帝光武皆稱其父爲皇考今來王珪等議稱皇伯於典禮未見明有引據伏讀下尙書省集三省御史臺官定議聞奏

奏慈壽宮劄子

二十三日使韓和齎到皇太后實封劄子一封付中書爲尙書省集議漢王典禮事中書檢勘自皇帝登極後應皇親尊屬並各追封加贈惟有漢王并夫人爲是皇帝本生父母合下有司檢尋典禮并

前代故事遂具奏請尋奉聖旨候過諒闇別取旨近自皇帝釋服從吉遂再奏乞下兩制以上及太常禮院詳定尋據王珪等奏稱崇奉濮安懿王典禮宜一準先朝封贈期親尊屬故事高官大國極其尊榮中書爲未見議定合稱何親再下詳議續據王珪等議稱皇伯中書檢詳儀禮爲人後者爲其父母報及今文與五服年月勅並云爲人後者爲所後父斬衰三年係義服爲人後者爲其父母齊衰期係正服卽出繼之子於所繼所生皆稱父母是古今禮律明文其王珪等議稱皇伯卽前代並無典故須今奏乞下尙書省集官再議只是令議合稱呼何親所有合行尊崇典禮未曾議及今來忽蒙皇太后降出指揮臣等竊恐是間諜之人故要銜惑聖聽離間兩宮將前代已行典禮隱而不言但進呈一作呈字皇伯無稽之說欲撓公議臣等各是先朝舊臣若於仁宗承繼大統有礙事體豈敢妄爲自取衆人之罪况今來已奉皇帝手詔令權罷集議臣等若不具述前後理道慮皇太后不知始末兼外廷凡百公一作博議若皇太后却欲親見兩府并百官理會竊恐有虧聖德兼臣等限以朝廷規制亦必不敢對見謹具奏聞謹奏

稱親手詔

朕面奉皇太后慈旨爲議濮安懿王典禮久未施行已降手書付中書濮安懿王謙國太夫人王氏襄國太夫人韓氏仙遊縣君任氏令朕稱親仍尊濮安懿王爲濮安懿皇王氏韓氏任氏並稱后朕以方承大統懼德不勝稱親之禮謹遵慈訓追崇之典豈易克當且欲以榮爲園增置吏卒守衛卽園立廟俾王子孫主奉祠事皇太后諒茲誠懇卽賜允從宜令中書門下依此施行

榜朝堂手詔

朕近奉皇太后慈旨濮安懿王令朕稱親仍有追崇之命朕惟漢一有史字宣帝本生父稱曰親又諡曰悼裁置奉邑皆應經義既有典

故遂遵慈訓而不敢當追崇之典朕又以上承仁考宗廟社稷之重義不得兼奉其私親故卽園立廟俾王子孫世襲漢國自主祭祀遠嫌有別蓋欲爲萬世法豈皆權宜之舉哉而臺官呂誨等始者專執合稱皇伯進一作追封大國之議朕以本生之親改稱皇伯歷考前世並無典故進一作追封大國則又禮無加爵之道向自罷議之後誨等奏促不已忿其未行乃引漢哀帝去恭皇帝陶之號立廟京師于亂正統之事皆朝廷未嘗議及者歷加誣詆自比師丹意欲搖動人情銜惑衆聽以至封還告勅擅不赴臺明繳留中之奏於中書錄傳訛上之文於都下暨手詔之出誨等則以稱親立廟皆爲不當朕覽誨等前疏亦云生育之恩禮宜追厚俟祥禫既畢然後講求典禮褒崇本親今反以稱親爲非前後之言自相牴牾繼以堯俞等不顧義理更相唱和旣撓權而恃衆復歸過以取名朕姑務含容屈於明憲止命各以本官補外尙慮搢紳之間士民之衆不詳本末但感傳聞欲釋羣疑理宜申諭宜令中書門下俾御史臺出榜朝堂及進奏院遍牒告示庶知朕意

濮議卷第三

濮議卷第四 集一百二十三

劄子一首是歲十月撰不曾進呈

臣伏見朝廷議濮安懿王典禮兩制禮官請稱皇伯中書之議以謂事體至大理宜慎重必合典故方可施行而皇伯之稱考於經史皆無所據方欲下三省百官博訪羣議以求其當陛下屈意手詔中罷而衆論紛然至今不已臣以謂衆論雖多其說不過有二其一曰宜稱皇伯者是無稽之臆說也其二曰簡宗廟致水災者是厚誣天人之言也其三曰不當用漢宣哀爲法以干亂統紀者是不廣本末之論也臣請爲陛下條列而辨之謹按儀禮喪服記曰爲人後者爲其父母報報者齊衰期也謂之降服以明服可降父母之名不可改也又按開元開寶禮國朝五服年月喪服令皆云爲人後者爲其所生父齊衰不杖期蓋以恩莫重於所生故父母之名不可改義莫重於所繼故寧抑而降其服此聖人所制之禮著之六經以爲萬世法者是中書之議所據依也若所謂稱皇伯者考於大經無之方今國朝見行典禮及律令皆無之自三代之後秦漢以來諸帝由藩邸入繼大統者亦皆無之可謂無稽之臆說矣夫儀禮者聖人六經之文開元禮者有唐二百年所用之禮開寶通禮者聖宋百年所用之禮五服年月及喪服令亦皆祖宗累朝所定方今天下共行之制今議者皆棄而不用直欲自用無稽之臆說此所以不可施行也其二曰簡宗廟致水災者臣伏以上天降災皆主人事故自古聖王逢災恐懼多求闕政而修之或自知過失而改悔之庶幾以塞天譴然皆須人事已著於下則天譴爲形於上今者濮王之議本因兩制禮官違經棄禮用其無稽之臆說欲定皇伯之稱中書疑其未可施行乃考古今典禮雖有明據亦未敢自信而自專方更求下外廷博議而陛下遽詔中罷欲使有司徐求典禮是則臣下慎重如此人君謙畏如此君臣不敢輕議妄舉而天遽譴怒殺人害物此臣所謂厚誣天也議

猶未決仍罷不議而便謂兩統二父以致天災者厚誣人也其三引漢宣哀之事者臣謹按漢書宣帝父曰悼皇考初稱親諡曰悼置奉邑寢園而已其後改親稱皇考而立廟京師皇考者親之異名爾皆子稱其父之名也漢儒初不以爲非也自元帝以後貢禹韋玄成等始建毀廟之議數十年間毀立不一至哀帝時大司徒平晏等百四十七人奏議云親諡曰悼裁置奉邑皆應經義是不非宣帝稱史皇孫爲親也所謂應經義者卽儀禮云爲人後者爲其父母報是也惟其立廟京師亂漢祖宗昭穆故晏等以謂兩統二父非禮宜毀也定陶恭王初但號共皇立廟本國師丹亦無所議至其後立廟京師欲去定陶不繫以國有進干漢統之漸丹遂大非之故丹議云定陶恭皇諡號已前定議不得復改而但論立廟京師爲不可爾然則稱親置園皆漢儒所許以爲應經義者惟去其國號立廟京師則不可爾今言事者不究朝廷本議何事不尋漢臣所非者何事此臣故謂不原本末也中書之議本謂稱皇伯無稽而禮經有不改父名之義方議名號猶未定故尊崇之禮皆未及議而言事者便引漢去定陶國號立廟京師之事厚誣朝廷以爲干亂大統何其過論也夫去國號而立廟京師以亂祖宗昭穆此誠可非之事若果爲此議宜乎指臣等爲姦邪之臣而人主有過舉之失矣其如陛下之意未嘗及此而中書亦初無此議而言事者不原本末過引漢世可非之事以爲說而外庭之臣又不審知朝廷本議如何但見言事者云云遂以爲欲加非禮干亂統紀信爲然矣是以衆口一辭紛紛不止而言事者欲必遂其皇伯無稽之說牽引天災恐迫人主而中書守經執禮之議及指以爲姦邪之言朝廷以言事之臣禮當優容不欲與之爭辨而外庭羣論又不可家至而戶曉是非之禮不辨上下之情不通此所以啾啾而不止也夫爲人後者既以所後爲父矣而聖人又存其所生父名者非曲爲之意也蓋自有天地以來未有無父而生之子也

既有父而生則不可諱其所生矣夫無子者得以宗子爲後是禮之所許也然安得無父而生之子以爲後乎此聖人所以不諱無子者立人之子以爲後亦不諱爲人後者有父而生蓋不欺天不誣人也故爲人後者承其宗之重任其子之事而不得復歸於本宗其所生父母亦不得往與其事至於喪服降而抑之一切可以義斷惟其父母之名不易者理不可易也易之則欺天而誣人矣子爲父母服謂之正服出爲人後者爲本生父母齊衰期謂之降服又爲所後父斬衰三年謂之義服今若以本生父爲皇伯則漢安懿王爲從祖父反爲小功而濮王夫人是本生嫡母也及爲義服自宗懿已下本生兄弟於禮雖降猶爲大功是禮之齊衰期今反爲小功禮之正服今反爲義服上於濮王父也反服小功於宗懿等兄弟也反服大功此自古所以不稱所生父爲伯父叔父者稱之則禮制乖違人倫錯亂如此也伏惟陛下聰明睿聖理無不燭今衆人之議如彼中書之議如此必將從衆乎則衆議不見其可欲違衆乎則自古爲國未有違衆而能舉事者願陛下霽然下詔明告中外以皇伯無稽決不可稱而今所欲定者正名號爾至於立廟京師干亂統紀之事皆非朝廷本議庶幾羣疑可釋若知如此而猶以謂必稱皇伯則雖孔孟復生不能復爲之辨矣

爲後或問上

或問爲人後者不絕其所生之親可乎曰可矣古之人不絕也而降之何以知之曰於經見之何謂降而不絕曰降者所以不絕也若絕則不待降也所謂降而不絕者禮爲人後者降其所生父母三年之服以爲期而不改其父母之名者是也問者曰今之議者以謂爲人後者必使視其所生若未嘗生己者一以所後父爲尊卑疎戚若於所後父爲兄則以爲伯父爲弟則以爲叔父如此則如之何余曰吾不知其何所稽也苟如其說沒其父母之名而一以所後父爲尊卑

疎戚則宗從世數各隨其遠近輕重自有服矣聖人何必特爲制一有爲子降服乎此余所謂若絕則不待降者也稽之聖人則不然昔者聖人之制禮也爲人後者於其父母不以所後之父尊卑疎戚爲別也直自於其父子之間爲降殺爾親不可降降者降其外物爾喪服是也其必降者示有所屈也以其承大宗之重尊祖而爲之屈爾屈於此以伸於彼也生莫重於父母而爲之屈者以見承大宗者亦重也所以勉爲人後者知所承之重以專任人之事也此以義制者也父子之道天性也臨之以大義有可以降其外物而本之於至仁則不可絕其天性絕人道而滅天理此不仁者之不爲也故聖人之於制服也爲降三年以爲期而不沒其父母之名以善於六經曰爲人後者爲其父母報以見服可降而父母之名不可沒也此所謂降而不絕者以仁存也夫事有不能兩得勢有不能兩遂爲子於此則不得爲子於彼矣此俚巷之人一作人之所共知也故其言曰爲人後者爲之子此一切之論非聖人之言也是漢儒之說也及一作乃衆人之所能道也質諸禮則不然方子夏之傳喪服也苟如衆人一切之論則不待多言也直爲一言曰爲人後者爲之子則自然視其父母絕若未嘗生己者矣自然一以所後父爲尊卑疎戚矣奈何彼子夏者獨不然也其於傳經也委曲而詳言之曰視所後之某親某親則若子若子者若所後父之真子以自處而視其族親一以所後父爲尊卑疎戚也故曰爲所後者之祖父母妻妻之父母昆弟昆弟之子若子猶嫌其未備也又曰爲所後者之兄弟之子若子其言詳矣獨於其所生父母不然而別自爲服曰爲其父母報蓋於其所生父母不使若爲所後者之真子者以謂遂若所後者之真子以自處則視其所生如未嘗生己者矣其絕之不已甚乎此人情之所不忍者聖人亦所不爲也今議者以其所生於所後爲兄者遂以爲伯父則是若所後者之真子以自處矣爲伯父則自有服不得爲齊衰

期矣亦不得云爲其父母報矣凡見於經而子夏之所區區分別者皆不取而又忍爲人情之所不忍者吾不知其何所稽也此大義也不用禮經而用無稽之說可乎不可也問者曰古之人皆不絕其所生而今人何以不然曰是何言歟今之人亦皆然也而又有加於古焉今開寶禮及五服圖乃國家之典禮也皆曰爲人後者爲其所生父母齊衰期服雖降矣必爲正服者示父母之道在也爲所後父斬衰三年服雖重矣必爲義服者示以義制也而律令之文亦同五服者皆不改其父母之名質於禮經皆合無少異而五服之圖又加以心喪三年以謂三年者父母之喪也雖以爲人後之故降其服於身猶使行其父母之喪於其心示於所生之恩不得絕於心也則今人之爲禮比於古人又有加焉何謂今人之不然也

爲後或問下

問者曰子不能絕其所生見於通禮見於五服之圖見於律見於令其文則明矣其所以不絕之意如之何曰聖人以人情而制禮者也問者曰事有不能兩得勢有不能兩遂爲子於此則不得爲子於彼此豈非人情乎曰是衆人之論也是不知仁義者也聖人之於人情也一本於仁義故能兩得而兩遂此所以異乎衆人而爲聖人也所以貴乎聖人而爲衆人法也父子之道正也所謂天性之至者仁之道也爲人後者權也權而適宜者義之制也恩莫重於所生義莫重於所後仁與義二者常相爲用而未嘗相害也故人情莫厚於其親抑而降其外物者迫於大義也降而不絕於其心者存乎至仁也抑而降則仁不害乎義降而不絕則義不害乎仁此聖人能以仁義而相爲用也彼衆人者不然也其爲言曰不兩得者是仁則不義義則不仁矣夫所謂仁義者果若是乎故曰不知仁義者衆人也嗚呼聖人之以人情而制禮也順適其性而爲之節文爾有所強焉不爲也有所拂焉不爲也况欲反而易之其可得乎今謂爲人後者

必絕其所生之愛豈止強其所難而拂其欲也是直欲反其天性而易之曰爾所厚者爲我絕之易爾之厚於彼者一以厚於此是其可以強乎夫父母猶天地其大恩至愛無以加者以其生我也今苟以爲人後之故一旦反視若未嘗生我者其絕之固已甚矣使其真絕之歟是非人情也迫於義而一有僞字絕之歟則是仁義者教人爲僞也是故聖人知其無一可也以謂進承人之重而不害於仁退得伸其恩而不害於義又全其天性而使不陷於僞惟降而不絕則無一不可矣可謂曲盡矣夫惟仁義能曲盡人情而善養人之天性以濟於人事無所不可也故知義可以爲人後而不知仁不絕其親者衆人之偏見也知仁義相爲用以曲盡人情而善養人之天性使不入於僞惟達於禮者可以得聖人之深意也問者曰爲人後而有天下者不絕其所生則將于乎大統奈何曰降則不能干矣自漢以來爲人後而有天下者算其所生多矣何嘗干於大統使漢宣哀不立廟一有於字京師以亂昭穆則其於大統亦何所干乎

漢魏五君篇

治平二年秋八月京師大雨水壞官私廬舍而民被壓溺者千餘人或謂是時方議漢王典禮議者以謂天災之應信乎曰議猶未決而天已降災殺人害物此厚誣天人之言也余已論之詳矣問者曰前世已驗之事如之何曰自漢以來由諸侯入繼大統之君多矣不可遍舉今略舉入繼大統之君追尊所生父母者二人不追尊父母者三人而試推以禍福之驗可以知之矣其追尊所生者二人曰漢宣帝也光武也宣帝初稱其父曰親置園邑而奉之漢儒以爲應經義者也光武稱其父爲皇考立廟南陽而祭之後世無非者是皆進不干大統退不絕本親最爲得禮而宣帝爲前漢中興之主光武爲後漢世祖其德業隆感天下富安享國長久此二人者追尊所生者也天不降以禍而降之以福生爲明帝歿享榮名爲萬世所尊者也其

不追崇所生者三人曰魏廢帝也高貴鄉公也常道鄉公也魏自明帝無子養齊王芳以爲子乃下詔後世有入繼之主敢追尊父母者大臣共誅之故終魏之世謹遵其約然自明帝下詔後連三世皆以宗子入繼皆不敢追尊其父母其一曰齊王芳立十六年而被廢謂之廢帝其次曰高貴鄉公立七年爲司馬文王所弑其次曰常道鄉公立七年爲晉所篡魏遂以滅亡此三人者能不追尊其所生者也天不降以福而降之以禍一被廢一被弑一被篡喪身亡國爲萬世所悲者也彼漢魏五君者其享國威衰長短雖自有歷數繫於天命不繫於一作其追尊所生與不追尊也然就以禍福推之追尊者未必不享福不追尊者未必不得禍也

晉問

或謂爲人後者改其所生父母之名考於六經與古今典禮固無之矣而前世有天下之君多矣果無之乎曰有而不足法也蓋自漢以來由藩侯入繼大統其爲人後合禮而得正之君皆無之也惟五代晉出帝嘗以其所生父爲皇伯矣此何足道也彼出帝者立不以正非爲後繼統之君也蓋其不當立而立必絕其所生則得立不絕則不得立故不得已而絕之也出帝父曰敬儒高祖之兄也敬儒早卒高祖憐出帝孤而養以爲己子而高祖自有子五人高祖疾病以其子重睿託於大臣及高祖崩晉大臣背約欲得長君故捨重睿而立出帝其義不當立惟欺天下以爲高祖真子故得立則其勢豈敢復顧其所生父也哉其以爲皇伯者不得已也蓋立不以正之君又不得已而至此其可爲後世法哉嗚呼五代之際禮樂崩壞三綱五常之道絕先王之制度文章於是掃地矣蓋篡逆賊亂之始一作世也而晉氏尤甚自高祖與契丹爲父子出帝以耶律德光則爲祖以其所生父則臣而名之是其可以人理責乎是其可以爲世法乎出帝既立不旋踵而契丹滅晉遷其族于北荒幽之黃龍府舉族餓死承

爲夷狄之鬼其滅亡禍敗自古未有若斯之酷也議者謂漢哀桓亂世不足爲法可矣若晉出帝者果可爲法乎

濮議卷第四

易類

前史謂秦焚三代之書易以下筮而得不焚及漢募羣書類多散逸而易以故最完及學者傳之遂分爲三一曰田何之易始自子夏傳之孔子卦象爻象與文言說卦等離爲十一篇而說者自爲章句易之本經也二曰焦贛之易無所師授自言得之隱者第述陰陽災異之言不類聖人之經三曰費直之易亦無師授專以象爻文言等參解卦一作易文凡以象象文言雜入卦中者自費氏始田何之學施孟梁丘之徒最盛費氏初微止傳民間至後漢時陳元鄭衆康成之徒皆學費氏費氏興而田學遂息古十二篇之易遂亡其本及王弼爲注亦用卦一作象象相雜之經自晉已後弼學獨行遂傳至今然易比五經其來最遠自伏羲畫卦下更三代別爲二易其變卦五十有六命名皆一作其殊至於七八九六筮占之法亦異周之末世夏商之易已亡漢初雖有歸藏已非古經今書二篇莫可究矣獨有周易時更三聖世歷三古雖說者各自名家而聖人法天地之緼則具存焉

書類

書原於號令而本之史官孔子刪爲百篇斷堯訖一作迄秦序其作意遭秦之故孔子末孫惠與濟南伏勝各藏其本于家楚漢之際勝失其所藏但口以傳授勝既老昏乃繆合二十四篇爲二十九歐陽夏侯之徒皆學之寫以漢世文字號今文尙書至武帝時孔惠之書始出屋壁百篇皆在而半已磨滅又皆科斗文字惠孫安國以隸古定之得五十八篇爲之作傳號古文尙書至陳隋之間伏生之學廢絕而孔傳獨行先是一作時孔傳亡其舜典東晉梅賾一作贖乃以王肅所注伏生舜典足其篇至唐孝明不喜隸古始更以今文行于一作於世

詩類

昔孔子刪古詩三千餘篇取其三百一十一篇著于經秦楚之際亡其六漢興詩分爲四一曰魯人申公作訓詁號魯詩二曰齊人轅固生作傳號齊詩三曰燕人韓嬰作內外傳號韓詩四曰河間人毛公作故一作詁訓傳號毛詩三家並立學官而毛以後出至平一作章帝時始列于學其後馬融賈逵鄭衆康成之徒皆發明毛氏其學遂盛魏晉之間齊魯之詩廢絕韓詩雖在而益微故毛氏獨行遂傳至今韓嬰之書至唐猶在今其存者十篇而已漢志嬰書五十篇今但存其外傳非嬰傳詩之詳者而其遺說時見於他書與毛之義絕異而人亦不信去聖既遠誦習各殊至於考風雅之變正以知王政之興衰其善惡美刺不可不察焉

禮類

禮樂之制盛于三代而大備於周三代之興皆數百年而周最久始武王周公修太平之業畫天下以爲九服上自天子至于一作於庶人皆有法度方其郊祀天地開明堂以會諸侯其車旗服器文章爛然何其盛哉一作也及幽厲之亂周室衰微其後諸侯漸大然齊桓賜胙而拜晉文不敢必請隧以禮維持又二百餘年禮之功亦大矣下更戰國禮樂殆絕漢興禮出淹中后戴諸儒共爲補綴得百餘篇三鄭王肅之徒皆精其學而說或不同夫禮極天地朝廷宗廟凡人之大倫可謂廣矣雖二一作百家殊說豈不博哉自漢以來沿革之制有司之傳著于書者可以覽焉

樂類

三代禮樂自周之末其失一作亡已多又經秦世滅學之暴然書及論語孝經得藏孔氏一作子之家易以下筮不禁而詩本諷誦不專在於竹帛人得口以傳之故獨禮之於六經其亡最甚而樂又有聲器尤易爲壞失及漢興考求典籍而樂最缺一作闕絕學者不能自

立遂并其說於禮家書為五經流別為六藝夫樂所以達天地之和而飭化萬物要之感格人神象見功德記曰五帝殊時不相沿樂所以王者有因時制作之感何必區區求古遺缺一作闕至於律呂鍾石聖人之法雖更萬世可以考也自漢以來樂之沿革惟見史官之志其書不備隋唐所錄今著其存者云

春秋類

昔周法壞而諸侯亂平王以後不復雅而下同列國吳楚徐夷並僭稱王天下之人不稟周命久矣孔子生其一作於末世欲推明王道以扶一作拔周乃聘諸侯極陳君臣之理一作禮諸侯無能用者退而歸魯即其舊史考諸行事加以王法正其是非凡其所書一用周禮為春秋十二篇以示後世後世學者傳習既久其說遂殊公羊高穀梁赤左丘明鄒氏夾氏分為五家鄒夾最微自漢世已廢而三家盛行當漢之時易與論語分為二詩分為四禮分為二及學者散亡僅存其一而餘家皆廢獨春秋三傳並行至今初孔子大修六經之文獨於春秋欲以禮法繩諸侯故其辭尤謹約而義微隱學者不能極其說故三家之傳於聖人之旨各有得焉太史公曰為人君者不可不知春秋豈非王者之法具在乎

論語類

論語者蓋孔子相與弟子時人講問應答之言也孔子卒羣弟子論次其言而撰之漢興傳者三家魯人傳之謂之魯論齊人傳之謂之齊論而齊論增問王知道二篇今文無之出於孔子壁中者則曰古論有兩子張是三家者篇第先後皆所不同考今之次即所謂魯論者也

小學類

古者教學之法八歲而入小學以習六甲四方書數之藝至於成童而後授經儒者究極天地人神事物之理無所不通故其學有次第

而後大成焉爾雅出於漢世正名物講說者資之於是有訓詁之學文字之興隨世轉易務趨便省久後乃或亡其本七字一作者或去其本二三蒼之說始志字法而許慎作說文於是音韻之學五聲異律清濁相生而孫炎始作字音於是音韻之學篆隸古文為體各異秦漢以來學者務極其能於是字書之學先儒之立學其初為法未始不詳而明而後世猶或訛失二字一作失之故雖小學不可闕焉

正史類

昔孔子刪書上斷堯典下訖秦誓著為百篇觀其堯舜之際君臣相與吁俞和諧於朝而天下治三代已下約束實罰而民莫敢違考其典誥誓命之文純深簡質丁寧委曲為體不同周衰史廢春秋所書尤謹密矣非惟史有詳略抑由時君功德薄厚異世而殊文哉自司馬氏上採黃帝迄于漢武始成史記之一家由漢以來千有餘歲其君臣善惡之迹史氏詳焉雖其文質不同要其治亂興廢之本可以考焉

編年類

昔春秋之後繼以戰國諸侯交一作皆亂而史氏廢失策書所載紀次不完司馬遷始為紀傳表志之體網羅千載馳騁其文其後史官悉用其法春秋之義書元最謹一時無事猶空書其首月以謂四時不具則不足成年所以上尊天紀二字一作時紀下正人事自晉荀悅為漢紀始復編年之體學徒稱之後世作者皆與正史並行云

實錄類

實錄起於唐世自高祖至于一作於武宗其後兵盜相交史不暇錄而實錄始作補錄十或得其二三五代之際尤多故矣天下乖隔號令並出傳記之士一作事訛謬尤多幸而中國之君實錄粗備其感衰善惡之迹較然而著者不可泯矣

雜史類

周禮天子諸侯皆有史官晉之乘楚之檮杌考其紀事為法不同至于周衰七國交侵各尊其主是非多異尋亦磨一作靡滅其存無幾若乃史官失職畏怯回隱則游談處士亦必各記其說以伸所懷然自司馬遷之多聞當其作史記必上採帝繫世本旁及戰國荀卿所錄以成其書則諸家之說可不備存乎

偽史類

周室之季吳楚可謂彊矣而仲尼脩春秋書荆以狄之雖其屢進不過子爵所以抑黜僭亂而使後世知懼三代之弊也亂極于七雄並主漢之弊也亂極于三國魏晉之弊也亂極于永嘉以來隋唐之弊也亂極于五代一又有五代字之際天下分為十三四而私竊名號者七國及大宋受命王師四征其係孽負質請死不暇九服遂歸于有德歷考前世僭竊之邦雖一有甚字因時苟偷自彊一方然卒歸于二字一作於禍敗故錄于一作於篇以為賊亂之戒云

職官類

堯舜二代建官名數不同而周之六官備矣然漢唐之興皆因秦隋官號而損益之足以致治興化由此而言在一作存乎舉職勤一無此字事代公治物一字作工一而已至於車服印綬爵秩俸廩因時為制著于有司一有焉字書曰無曠庶官又曰允釐百工夫百官象物奉職恭位此虞舜一有之字所以端拱無為而成天下可不重哉

儀注類

昔漢諸儒得古禮十七篇以為儀禮而大射之篇獨曰儀蓋射主於容升降揖讓不可以失記曰禮之末節有司掌之凡為天下國家者莫不講乎三代之制其采章文物邦國之典存乎禮官秦漢以來世有損益至於一作于車旗服器有司所記遺文故事凡可錄者皆附

子一作於史官云

刑法類

刑者聖人所以愛民之具也其禁暴止殺之意必本乎至仁然而執挺刃刑人而不疑者審得其當也故法家之說務原人情極其真偽必使有司不得銖寸輕重出入則其為書不得不備歷世之治因時制法緣民之情損益不常故凡法令之要皆著于篇

地理類

昔禹去水害定民居而別九州之名記之禹貢及周之興畫為九畿而宅其中內建五等之封外撫四荒之表職方之述備矣及其衰也諸侯並爭二字一作兼并并一作爭吞削奪秦漢以來郡國州縣一作邦國郡縣廢與治亂割裂分屬更易不常至於日月所照要荒附叛山川風俗五方不同行師用兵順民施政考於圖謀可以覽焉

氏族類

昔黃帝之子二十五人得姓命氏由其德之薄厚自堯舜夏商周之先皆同出於黃帝而姓氏不同其後世封為諸侯者或以國為姓至於一作于公子公孫官邑證族遂因而命氏其源流次序帝繫世本言之甚詳秦漢以來官邑證族不自別而為姓又無賜族之禮至于近世遷徙不常則其得姓之因與夫祖宗曲次人倫之記尤不可以不考焉

歲時類

傳曰民生在勤勤則不匱故堯舜南面而治考星之中以授人時秋成春作教民無失周禮六官亦因天地四時分其典職然則天時者聖人之所重也自夏有小正周公始作時訓日星氣節七十二候凡國家之政生民之業皆取則焉孔子曰吾不如老圃至於山翁野夫耕桑樹藝四時之說其可遺哉

傳記類

古者史官其書有法大事書之策小事載之簡牘至於風俗之舊者老所傳遺言逸行一作述史不及書則傳記之說或有取焉然自六經之文諸家異學說或不同况乎幽人處士聞見各異或詳一時之所得或發史官之所諱參求考質可以備多聞焉

儒家類

仲尼之業垂之六經其道闡博君人治物百王之用微是無以為法故自孟軻楊雄荀况一作卿之徒又駕其說扶而大一作本之歷世諸子轉相祖述自各一家異端其言或破碎於大道然計其作者之意要之孔氏不有殊焉

道家類

道家者流本清虛去健羨泊然自守故曰我無為而民自化我好靜而民自正雖聖人南面之術一作治不可易也至或不究其本棄去仁義而歸之自然以因循為用則儒者病之一有云字

法家類

法家者流以法繩天下使一本於其術商君申韓之徒乃推而大之挾其說以干世主收取功名至其尊君抑臣辨職分輔禮制於王治不為無益然或狃細苛持刻深一作深刻不可不察者也

名家類

名家者流所以辨嚴名實流別一作源流等威使上下之分不相踰也仲尼有云必也正名乎言為政之大本不可不正者也

墨家類

墨家者流其言貴儉兼愛尊賢右鬼非命上一作尚同此墨家之所行也孟子之時墨與楊其道塞路軻以墨子之術儉而難遵兼愛而不知親疏故辭而闕之然其疆本畜用之說有足取焉

縱橫家類

春秋之際王政不明而諸侯交亂談說之士出於其間各挾其術以

干時君其因時適一作遷變當權事而制宜有足取焉

雜家類

雜家者流取儒墨各法合而兼之其言貫穿衆說無所不通然亦有補於治理一作道不可廢焉一作也

農家類

農家者流衣食之本一作大原也四民之業其次曰農稷播百穀勸勞天下功炳後世著見書史孟子聘列國陳王道未始不究一作論耕桑之勤漢興劬農勉人為之著令今集其樹藝之說庶取法焉

小說類

書曰狂夫之言聖人擇焉又曰詢于芻蕘是小說之不可廢也古者懼下情之壅於上聞故每歲孟春以木鐸徇于路採其風謠而觀之至於俚言巷語亦足取也今特列而存之

兵家類

周禮夏官司馬掌軍戎以九伐之法正邦國書之洪範八曰師易之繫辭取諸睽此兵之所由始也湯武之時勝以仁義春秋戰國出奇徃變其術無窮自田齊始著司馬之法漢興張韓之徒序次其書武帝之世楊僕又摺撫之謂之紀奏孝成命任宏乃以權謀形勢陰陽技巧析為四種繇是兵家之文既修列矣然而司馬之法本之禮讓後世莫行焉惟孫武之書法術大詳考今之列非特四種又雜以下筮刑政之說存諸篇云

崇文總目敘釋一卷

于役志

集一百二十五

景祐三年丙子歲五月九日丙戌希文出知饒州

戊子送希文飲于祥源之東園

壬辰安道貶筠州

甲午師魯貶鄆州

乙未安道東行不及送余與君貶追之不克還過君謨家遂召移之

公期道滋景純夜飲

丁酉與損之送師魯于固子橋西與教寺余留宿明日道卿損之公

期君貶君謨武平源叔仲輝皆來會飲晚乃歸余貶夷陵

己亥夜過遠卿家話別遠卿病也

庚子夜飲君貶家會者公期君謨武平秀才范鎮道滋飲婦家不來

辛丑舟次宋門夜至公期家飲會者君謨君貶景純穆之道滋飲婦

家不來

壬寅出東水門泊舟不得岸水激舟橫于河幾敗家人驚走登岸而

避遂泊亭子下損之來奕棋飲酒暮乃歸

癸卯君貶公期道滋先來登祥源東園之亭公期烹茶道滋鼓琴余

與君貶奕已而君謨來景純穆之武平源叔仲輝損之壽昌天休

道卿皆來會飲君謨景純穆之壽昌遂留宿明日子野始來君貶

公期道滋復來子野還家餘皆留宿君謨作詩道滋擊方響穆之

彈琴秀才韓傑居河上亦來會宿

乙巳晨興與宿者別舟既行武平來追及至下鑠見之少頃乃去午

次陳留登康廟

丙午在陳留

丁未次南京明日留守推官石介應天推官謝郭右軍巡判官趙衮

曹州觀察推官蔣安石來小飲于河亭余疾不飲客皆醉以歸

六月己酉次柳子

庚戌過宿州與張參約泊靈壁鎮遊損之園會余有客住宿州參先

發棧靈壁待余不至乃行晚次靈壁獨遊損之園舟失水道敗掩

辛亥次青陽

壬子至于泗州晚與國器小飲州廡中

癸丑始見春卿

甲寅乙卯丙辰獨在泗州始食淮魚

丁巳次洪澤與劉春卿同年黃孝恭相遇始識大理寺丞李惇裕洪

澤巡檢顏懷玉者錢思公在洛時故吏遂與四人者夜飲五鼓罷

明日食畢解舟與飲者別春卿復相送以前晚入沙河乘月夜行

嚮小陽與春卿聯句二鼓宿闌下黎明元均來遂至楚州泊舟西

倉始見安道于舟中安道會飲于倉亭始食瓜出倉北門看雨與

安道奕

庚申小飲舟中會者元均春卿安道余始飲酒移舟機城西門閉

泛月以歸

辛酉安道解舟不果別與春卿奕于倉亭晚別春卿

壬戌與元均小飲倉北門舟中夜宿倉亭

癸亥夕與元均坐水次納涼已而大風雨震電暴至

乙丑與隱甫及高繼隆焦宗慶小飲水陸院東亭看雨始見荷花

丙寅與元均隱甫飲于西倉

丁卯隱甫來會登倉北偃上亭納涼遲客至遂及元均小飲舟中已

而大風震電遂宿舟中

戊辰余生日具酒為壽于舟中

己巳與元均泛舟北辰會隱甫小飲宿倉亭

庚午同年朱公綽來自京師

辛未子聰來自壽州夜飲倉亭留宿

壬申泛舟飲于北辰

癸酉隱甫來飲別夜與元均小飲宿倉亭

甲戌知州陳亞小飲魏公亭看荷花與者隱甫朱公緯晚移舟楚望亭陳從益來自京師見余於舟中始聞君謨動靜秀才陳策來自京師夜見余於楚望亭作常州書自泊西倉至于楚望凡十有七日

乙亥次寶應

丙子至于高郵

七月丁丑復見子聰會飲弭節亭

戊寅遂與子聰同舟以前次邵伯

己卯至于揚州遇秀才廖倚夜與倚及子聰飲觀風亭明日子聰之

潤州廖倚之楚州伯起來宿觀風亭

辛巳與伯起飲邈渚亭會者集賢校理王君玉大理寺丞許元太常

寺太祝唐詔祠部員外郎蘇儀甫

壬午儀甫來小飲觀風亭會者許元唐詔君玉伯起先歸

癸未與許元小飲邈渚亭會者如壬午伯起不來

甲申與君玉飲壽寧寺寺本徐知誥故第李氏建國以為孝先寺太

平興國改今名寺甚宏壯畫壁尤妙問老僧云周世宗入揚州時

以為行宮盡朽壞之惟經藏院畫玄奘取經一壁獨在尤為絕筆

嘆息久之

乙酉小飲秀才呂有家會者如壬午伯起不來余遂留宿

丙戌至于真州大熱無水

辛卯飲僧于資福寺移舟溶溶亭處士謝去華授琴待涼以入客舟

戊戌入客舟泊涵虛亭

庚子次江口

辛丑次長蘆

壬寅夜乘風次清涼寺

癸卯晨至江寧府

八月丙午猶在江寧

丁未小飲君續家

己酉小飲于水閣

庚戌次采石

辛亥阻風與侍禁陳宗顏飲

壬子過太平州夜乘風宿帶星口

癸丑過蕪湖繁昌宿慈母磯

甲寅乘風晝夜行

丙辰禱小姑山神至江州

丁巳在江州約陳侍禁遊廬山余病呼醫者不果往遂行次郭家洲

己未阻風郭家洲與澧陽縣令趙師道飲村市就村人市羊供膳不

得余疾謀還江州召廬山僧以醫不果

庚申次盤唐港

辛酉至于蕪陽

壬戌小飲翟珣家會丹稜知縣著作佐郎范佑斬春主簿郭公美

癸亥次新治禱江神得大魚

甲子至于磁湖

乙丑猶在磁湖自丁巳余體不佳至是小間

丙寅至于黃州

丁卯與知州夏屯田飲于竹樓興國寺火約余明日為社飲不果夜

登江瀨次漆磁

戊辰次雙柳夾

己巳次白楊夾

庚午至于鄂州始與令狐修己相識

辛未遣人之黃陂召家兄大風雨不克渡江而還

壬申小欽修己家遂留宿明日家兄來見余於修己家始中酒睡兄家

甲戌欽于兄家

乙亥欽令狐家夜過兄家會宿

九月丙子次沌口

丁丑次昭化港夜大風舟不得泊禱江神

戊寅次穿石磯夜大風擊舟不得寢

己卯至岳州夷陵縣吏來接泊城外

庚辰假舟于邵暖

辛巳壬午入官舟

癸未入荆江次李家洲

甲申次烏沙

乙酉次魯汛

丙戌次塔子口觀魚望五鵝塵角望夫諸山

丁亥次石首夜大風

戊子阻風

壬辰次公安渡

于役志一卷

太祖皇帝初幸相國寺至佛像前燒香問當拜與不拜僧錄贊寧奏曰不拜問其何故對曰見在佛不拜過去佛贊寧者頗知書有口辯其語雖類俳儷然適會上意故微笑而頷之遂以為定制至今行幸焚香皆不拜也議者以為得禮

開寶寺塔在京師諸塔中最高而制度其精都料匠預浩所造也塔初成望之不正而勢傾西北人怪而問之浩曰京師地平無山而多西北風吹之百年當正也其用心之精蓋如此國朝以來木工一人而已至今木工皆以預都料為法有木經三卷行於世世傳浩惟一女年十餘歲每臥則交手於賀為結構狀如此踰年撲成木經三卷今行於世者是也

國朝之制知制誥必先試而後命有國以來百年不試而命者纔二人陳堯佐楊億及脩忝與其一爾

仁宗在東宮魯肅簡公宗道為論德其居在宋門外俗謂之浴室巷有酒肆在其側號仁和酒有名於京師公往往易服一作衣微行飲于其中一日真宗急召公將有所問使者及門而公不在移時乃自

仁和肆中飲歸中使遽先入白乃與公約曰上若怪公來遲當託何事以對幸先見教冀不異同公曰但以實告中使曰然則當得罪公曰飲酒人之常情欺君臣子之大罪也一作罪大中使嗟歎而去真

宗果問使者具如公對真宗問曰一作公何故私入酒家公謝曰臣家貧無器皿酒肆百物具一作俱備賓至如歸適有鄉里親客自遠來遂與之飲然臣既易服市人亦無識臣者真宗笑曰卿為宮臣恐

為御史所彈然自此奇公以為忠實可大用晚年每為章獻明肅太后言羣臣可大用者數人公其一也其後章獻皆用之

太宗時親試進士每以先進卷子者賜第一人及第孫何與李庶幾同在科場皆有時名庶幾文思敏速何尤苦思遲會言事者上言舉

子輕薄為文不求義理惟以敏速相誇因言庶幾與舉子於餅肆中作賦以一餅熟成一韻者為勝太宗聞之大怒是歲殿試庶幾最先進卷子遽叱出之由是何為第一

故參知政事丁公度晁公宗憲住時同在館中喜相諧謔晁因遷職以啓謝丁時丁方為羣牧判官乃戲晁曰啓事更不奉答當以糞壑一車為報晁答曰得壑勝於得啓聞者以為善對

石資政中立好諧謔士大夫能道其語者甚多嘗因入朝遇荆王迎授東華門不得入遂自左掖門入有一朝士好事語言問石云何為自左去聲掖門入石方趁班且走且答曰祇為大音拖王迎授聞者無不大笑

楊大年方與客棋石自外至坐於一隅大年因誦賈誼鶴賦以戲之云止於坐隅貌甚閑暇石遽答曰口不能言請對以臆

故老能言五代時事者云馮相道和相疑同在中書一日和問馮曰公靴新買其直幾何馮舉左足示和曰九百和性褻急遽回顧小吏云吾靴何得用一千八百因詬責久之馮徐舉其右足曰此亦九百

於是烘堂大笑時謂宰相如此何以鎮服百僚

錢副樞若水嘗遇異人傳相法其事甚怪錢公後傳楊大年故世稱此二人有知人之鑿仲簡楊州人也少習明經以貧傭書大年門下

大年一見奇之曰子當進士及第官至清顯乃教以詩賦簡天禧中舉進士第一甲及第官至正郎天章閣待制以卒謝希深為奉禮郎

大元尤喜其文每見則欣然延接既去則歎息不已鄭天休在公門下見其如此怪而問之大年曰此子官亦清要但年不及中壽爾希深官至兵部員外郎知制誥卒年四十六皆如其言希深初以奉禮郎鎖廳應進士舉以啓事謁見大元有云曳鈴其上念無君子者解組不顧公其如蒼生何大年自書此四句于扇曰此文中虎也由是知名

太祖時郭進爲西山巡檢有告其陰通河東劉繼元將有異志者太祖大怒以其誣害忠臣命縛其人子進使自處置進得而不殺謂曰爾能爲我取繼元一城一寨不止贖爾死當請賞爾一官歲餘其人誘其一城來降進具其事送之于朝請賞以官太祖曰爾誣害我忠良此纔可贖死爾賞不可得也命以其人還進進復請曰使臣失信則不能用人矣太祖於是賞以一官君臣之間蓋如此

魯肅簡公立朝剛正嫉惡少容小人惡之私目爲魚頭當章獻垂簾時屢有補益謙言正論士大夫多能道之公既卒太常諡曰剛簡議者不知爲美諡以爲因諛譏之竟改曰肅簡公與張文節公知自當垂簾之際同在中書二公皆以清節直道爲一時名臣而魯尤簡易若曰剛簡尤得其實也

宋尚書祁爲布衣時未爲人知孫宣公爽一見奇之遂爲知己後宋舉進士驟有時名故世稱宣公知人公嘗語其一無此字門下客曰近世諛用兩字而文臣必諛爲文皆非古也吾死得諡曰宣若戴足矣及公之卒宋方爲禮官遂諡曰宣成其志也

嘉祐二年樞密使田公兪罷爲尚書右丞觀文殿學士兼翰林侍讀學士罷樞密使當降麻而止以制除蓋往時高若訥罷樞密使所除官職正與田公同亦不降麻遂以爲故事真宗時丁晉公謂自平江軍節度使除兵部尚書參知政事節度使當降麻而朝議惜之遂止以制除近者陳相執中罷使相除僕射乃降麻龐籍罷節度使除觀文殿大學士又不降麻蓋無定制也

寶元康定之間余自貶所還過京師見王君貺初作舍人自契丹使歸余時在坐見都知押班殿前馬步軍聯騎立門外呈榜子稱不敢求見舍人遣人謝之而去至一無此字慶曆三年余作舍人此禮已廢然二衙管軍臣僚於道路相逢望見舍人呵引者即斂馬駐立前呵者傳聲太尉立馬急遣人謝之比舍人馬過然後敢行後子官于

外十年而還遂入翰林爲學士見三衙呵引甚雄不復如當時與學士相逢分道而過更無敘避之禮蓋兩制漸輕而三衙漸重舊制侍衛親軍與殿前分爲兩司自侍衛司不置馬步軍都指揮使止置馬軍指揮使步軍指揮使一止作馬步軍指揮使以來侍衛一司自分爲二故與殿前司列爲三衙也五代軍制已無典法而今又非其舊制者多矣

國家開寶中所鑄錢文曰宋通元寶至寶元中則曰皇宋通寶近世錢文皆著年號惟此二錢不然者以年號有寶字文不可重故也太祖建隆六年將議改元語宰相勿用前世舊號於是改元乾德其後因於禁中見內人鏡皆有乾德之號以問學士寶儀儀曰此僞蜀時年號也因問內人乃是故蜀王時人太祖由是益重儒士而歎宰相須用讀書人

仁宗即位改元天聖時章獻明肅太后臨朝稱制議者謂撰號者取天字於文爲二人以爲二人聖者悅太后爾至九年改元明道又以爲明字於文日月並也與二人旨同無何以犯契丹諱明年遽一作遂改曰景祐是時連歲天下大旱改元詔意冀以迎和氣也五年因郊又改元曰寶元自景祐初羣臣幕唐玄宗以開元加算號遂請加景祐於算號之上至寶元亦是歲趙元昊以河西叛改姓元氏朝廷惡之遽改元曰康定而不復加於算號而好事者又曰康定乃諡爾明年又改曰慶曆至九年大旱河北尤甚民死者十八九於是又改元曰皇祐猶景祐也六年日蝕四月朔以謂正陽之月自古所忌又改元曰至和三年仁宗不豫久之康復又改元曰嘉祐自天聖至此凡年號九皆有謂也

寇忠愍公準之貶也初以列卿知安州既而又貶衡州副使又貶道州別駕遂貶雷州司戶時丁晉公與馮相拯在中書丁嘗秉筆初欲貶崖州而丁忽自疑語馮曰崖州再涉鯨波如何馮唯唯而已丁乃

徐擬雷州及丁之貶也馮遂擬崖州當時好事者相語曰若見雷州寇司戶人生何處不相逢比丁之南也寇復移道州寇聞丁當來遣人以蒸羊逆於一作迎于境上而收其僮僕杜門不放出聞者多以一作公爲得體

楊文公億以文章擅天下然性特剛勁寡合有惡之者以事譖之在大年學士院忽夜召見於一小閣深在禁中既見賜茶從容顧問久之出文彙數篋以示大年云卿識朕書蹟乎皆朕自起草未嘗命臣下代作也大年惶恐不知所對頓首再拜而出乃知必爲人所譖矣由是佯狂奔于陽翟真宗好文初待大年眷顧無比晚年恩禮漸衰亦由此也

王文正公會爲人方正持重在中書最爲賢相嘗謂大臣執政不當收恩避怨公嘗語尹師魯曰恩欲歸己怨使誰當聞者歎服以爲名言

李文靖公沆爲相沈正厚重有大臣體嘗曰吾爲相無他能唯不改朝廷法制用此以報國士大夫初聞此言以謂不切於事及其後當國者或不思事體或收恩取譽屢更祖宗舊制遂至官兵冗濫不可勝紀而用度無節財用一作力匱乏公私困弊推迹其事皆因執政不能遵守舊規妄有更改一作改更所致至此始知公言簡而得其要由是服其識慮之精

陶尚書穀爲學士嘗晚召對太祖御便殿陶至望見上將前而復却者數四左右催宜甚急穀終彷徨不進太祖笑曰此措大索事分顧左右取袍帶來上已束帶穀遽趨入

薛簡肅公知開封府時明參政編爲府曹官簡肅待之甚厚直以公輔期之其後公守秦益常辟以自隨優禮特異有問於公何以知其必貴者公曰其爲人端肅其言簡而理盡凡人簡重則尊嚴此貴臣相也其後果至參知政事以卒時皆服公知人

臘茶出一作盛於劍建草茶盛於兩浙兩浙之品曰注爲第一自景祐已後洪州雙井白芽漸盛近歲製作尤精囊以紅紗不過一二兩以常茶十數斤養之用辟暑濕之氣其品遠出日注上遂爲草茶第一

仁宗退朝常命侍臣講讀於邇英閣買侍中昌朝時爲侍講講春秋左氏傳每至諸侯淫亂事則略而不說上問其故買以實對上曰六經載此所以爲後王鑒一作豈戒何必諱

丁晉公自保信軍節度使知江寧府召爲參知政事書以丁節度使召學士草麻時威文肅爲學士以爲參知政事合用舍人草制遂以制除丁甚恨之

寇忠愍之貶所素厚者九二字一作之人自威文肅已下皆坐斥逐而楊大年與寇公尤善丁晉公憐其才曲保全之議者謂丁所貶朝士甚多獨於大年能全之大臣愛才一節可稱也

太祖時以李漢超爲關南巡檢使捍北虜與兵二千而已然其齊州賦稅最多乃以爲齊州防禦使悉與一州之賦俾之養士而漢超武人所爲多不法久之關南百姓詣闕訟漢超貸民錢不還及掠其女以爲妾太祖召百姓入見便殿賜以酒食慰勞之徐問曰自漢超在關南契丹入寇者幾百姓二字一作對曰無也太祖曰往時契丹入

寇邊將不能禦河北之民歲遭劫虜汝於此時能保全其貲財婦女乎今漢超所取孰與契丹之多又問訟女者曰汝家幾女所嫁何人百姓具以對太祖曰然則所嫁皆村夫也若漢超者吾之貴臣也以愛汝女則取之得之必不使失所與其嫁村夫孰若處漢超家富貴

於是百姓皆感悅而去太祖使人語漢超曰汝須錢何不告我而取於民乎乃賜以銀數百兩曰汝自還之使其感汝也漢超感泣誓以死報

仁宗萬機之暇無所翫好惟親翰墨而飛白尤爲神妙凡飛白以點

畫象物形而點最難工至和中有書待詔李唐卿撲飛自三百點以進自謂窮盡物象上亦頗佳之乃特為清淨二字以賜之其六點尤為奇絕又出二百點外

仁宗聖性恭儉至和二年春不豫兩府大臣日至寢閣問聖體見上器服簡質用素漆唾壺孟孟素盞盡進藥御榻上衾褥皆黃純色已故暗宮人遽取新衾覆其上亦黃純也然外人無知者惟兩府侍疾因一作因侍疾見之耳

陳康肅公堯咨善射嘗世無雙公亦以此自矜嘗射於家圃有賣油翁釋擔而立睨之久而不去見其發矢十中八九但微頷之康肅問曰汝亦知射乎吾射不亦精乎翁曰無他但手熟爾康肅忿然曰爾安敢輕吾射翁曰以我酌油知之乃取一葫蘆置於地以錢覆其口徐以杓酌油瀝之自錢孔入而一作而入錢不濕因曰我亦無他惟手熟爾康肅笑而遣之此與莊生所謂解牛斲輪者何異

至和初陳恭公罷相而並用文富二公彥博正衙宣麻之際上遣小黃門一有二輩二字密於百官班中聽其論議而二公久有人望一旦復用朝士往往相賀黃門具奏上大悅余時為學士後數日奏事垂拱殿上問新除彥博等外議如何余以朝士相賀為對上曰自古二字一作古者人君用人或以夢卜苟不知人當從人望夢卜豈足憑耶故余作文公批答云永惟商周之所記至以夢卜而求賢孰若用搢紳之公言從中外之人望者具述上語也

王元之任翰林嘗草夏州李繼遷制繼遷送潤筆物數倍於常然用啓頭書送一作送拒而不納蓋惜事體也近時舍人院草制有送潤筆物稍後時者必遺院子詰問催索而當送者往往不送相承既久今索者送者皆恬然不以為怪也

內中舊有玉石三清真像初在真遊殿既而大內火遂遷於玉清昭應宮已而玉清又大火又遷於洞真洞真又火又遷於上清上清又

火皆焚蕩無孑遺遂一有又字遷於景靈而官司道官相與惶恐上言真像所至輒火景靈必不免願遷二字一作乞移他所遂遷於集禧宮迎祥池水心殿而都人謂之行火真君也

丁文簡公度罷參知政事為紫宸殿學士即文明殿學士也文明本有大學士為宰相兼職又有學士為諸學士之首後以文明者真宗諡號也遂更曰紫宸近世學士皆以殿名為官稱如端明資政是也

丁既受命遂稱曰丁紫宸議者又謂紫宸之號非人臣之所宜稱據更曰觀文觀文是隋煬帝殿名理宜避之蓋當時不知然則朝廷之事一作士不可以不學也

王冀公欽若罷參知政事而真宗眷遇之意未衰特置資政殿學士以寵之時寇萊公在中書定其班位依雜學士在翰林學士下冀公因訴于上曰臣自學士拜參知政事今無罪而罷班反在下是貶也真宗為特加一作置大學士班在翰林學士上其寵遇如此

景祐中有郎官皮仲容者偶出街衢為一輕薄子所戲遽前賀云聞君有臺憲之命仲容立馬媿謝久之徐問其何以知之對曰今新制臺官必用稀姓者故以君姓知之爾蓋是時三院御史乃仲簡論程掌禹錫也聞者傳以為笑

太宗時宋白買黃中李至呂蒙正蘇易簡五人同時拜翰林學士承旨屢蒙贈之以詩云五鳳齊飛入翰林其後呂蒙正為一作至宰相買黃中李至蘇易簡皆至參知政事宋白官至尚書老於承旨皆為名臣

御史臺故事三院御史言事必先白中丞自一有中山二字劉子儀為中丞始勝臺中今後御史有所言不須先白中丞雜端至今如此

丁晉公之南遷也行過潭州自作齋僧疏一有文字云補仲山之袞雖曲盡於巧心和傳說之藁實難調於眾口其少以文稱晚年詩筆尤精在海南篇詠尤多如草解忘憂憂底事花名含笑笑何人一有

之句二字尤爲人所傳誦

張僕射齊賢體質豐大飲食過人尤嗜肥豬肉每食數斤天壽院風藥黑神丸常人所服不過一彈丸公常以五七兩爲一大劑夾以胡餅而頓食之淳化中罷相知安州安陸山郡未嘗識達官見公飲陷不類常人舉郡驚駭嘗與賓客會食廚吏置一金漆大桶於廳側窺一作羈視公所食如其物投桶中至暮酒漿浸漬漲溢滿桶郡人嗟愕以謂享富貴者必有異於人也然而晏元獻公清瘦如削其飲食甚微每析半餅以飭卷之抽去其飭內捻頭一莖而食一有之字此亦異於常一無此字人也

宋宣獻公綬夏英公東同試童行誦經有一行者誦法華經不過問其習業幾年矣曰十年也二公笑且閉之因各取法華經一部誦之宋公十一作五曰夏公七日不復遺一字人性之相遠一有也字如此

樞密曹侍中利用澶淵之役以殿直使於契丹議定盟好由是進用嘗莊獻明肅太后時以勳舊自處權傾中外雖太后亦嚴憚之但呼侍中而不名凡內降恩澤皆執不行然以其所執既多故有三執而又降出者一無此字則不得已而行之久之爲小人一有之字所測凡有求而三降不行者必又請之太后曰侍中已不行矣請者徐啓曰臣已告得侍中宅嬾婆或其親信爲言之許矣於是又降出曹莫知其然也但以三執不能已僂俛行之於是太后大怒自此切齒遂及曹芮之禍乃知大臣功高而權威禍患之來非智慮所能防也曹侍中在樞府務革僥幸而中官尤被裁抑羅崇勳時爲供奉官監後苑作歲滿敘勞過求恩賞內中唐突不已莊獻太后怒之簾前諭曹使召而戒勵曹歸院坐廳事召崇勳立庭中去其中帶因辱久之乃取狀以聞崇勳不勝其恥其後曹芮事作鎮州急奏言芮反狀仁宗太后大驚崇勳適在側因自請行既受命喜見顏色晝夜疾馳鍊

成其獄芮既被誅曹初貶隨州再貶房州行至襄陽渡北津監送內臣楊懷敏指江水謂曹曰侍中好一江水蓋欲其自投也再三言之曹不諭至襄陽驛遂逼其自縊

宋鄭公庠初名郊字伯庠與其弟祁自布衣時名動天下號爲二宋其爲知制誥仁宗驟加獎眷便欲大用有忌其先進者譖之謂其姓符國號名應郊天又曰郊音交也交者替代之名也宋交其言不祥仁宗遽命改之公快快不獲已乃改爲庠字公庠公後更踐二府二十餘年以司空致仕兼享福壽而一作以終而譖者竟不見用以卒可以爲小人之戒也

曹武惠王彬國朝名將勳業之盛無與爲比嘗曰自吾爲將殺人多矣然未嘗以私喜怒輒戮一人其所居堂室擊壞子弟請加脩葺公曰時方大冬牆壁瓦石之間百蟲所蟄不可傷其生其仁心愛物蓋如此既平江南回詣閣門入見勝子稱奉勅江南勾當公事回其謙恭不伐又如此

真宗好文雖以文辭取士然必視其器識每御崇政賜進士及第必召其高第三四人並列於庭更察其形神磊落者始賜第一人及第或取其所試文辭有理趣者徐夬鑄鼎象物賦云足惟下正詎聞公鍊之歛傾鉉乃上居實取王臣之威重遂以爲第一蔡齊置器賦云安天下於覆盂其功可大遂以爲第一人

錢思公生長富貴而性儉約閨門用度爲法甚謹子弟輩非時不能輒取一錢公有一珊瑚筆格平生尤所珍惜常置之几案子弟有欲錢者輒竊而藏之公卽悵然自失乃勝于家庭以錢十千贖一作購之居一二日子弟佯爲求得以獻公欣然以十千賜之他日有欲錢者又竊去一歲中率五七如此公終不悟也余官西都在公幕親見之每與同僚歎公之純德也

國朝雅樂卽用王朴所製周樂太祖時和峴以爲聲高遂下其一律

然至今言樂者猶以為高云今黃鐘乃古夾鐘也景祐中李照作新
二字一作所作樂又下其聲太常歌工以其一作為太濁歌不成聲
當鑄鐘時乃私賂鑄匠使減其銅齊而聲稍清歌乃吐而成聲而照
竟不知以此知審音作樂之難也照每謂人曰聲高則急促下則舒
緩吾樂之作久而可使人之感之皆舒和而人物之生亦當豐大王
侍讀殊身尤短小常戲之曰君樂之成能使我長一有大字乎聞者
以為笑而樂成竟不用

鄧州花蠟燭名著天下雖京師不能造相傳云一作亦是寇萊公燭
法公嘗知鄧州而自少年富貴不點油燈尤好夜宴劇飲雖寢室亦
燃燭達旦每罷官去後人至官舍見廁溷間燭淚在地往往成堆杜
祁公為人清儉在官未嘗燃官燭油燈一炷熒然欲滅與客相對清
談而已二公皆為名臣而奢儉不同如此然祁公壽考終吉萊公晚
有南遷之禍遂歿不返雖其不幸亦可以為戒也

故事學士在內中院吏朱衣雙引太祖朝李昉為學士太宗在南衙
朱衣一人前引而已昉一有因字亦去其一人至今如此
住時學士入劄子不著姓但云學士臣某先朝感度丁度並為學士
遂著姓以別之其後遂皆著姓

晏元獻公以文章名譽少年居富貴性豪俊所至延賓客一時名士
多出其門罷樞密副使為南京留守時年三十八幕下王琪張亢最
為上客亢體肥大琪目為牛琪瘦骨立亢目為猴二人以此自相譏
諑琪嘗嘲亢曰張亢觸牆成八字亢應聲曰王琪望月叫三聲一坐
為之大笑

楊文公常戒其門人為文宜避俗語既而公因作表云伏惟陛下德
邁九皇門人鄭戩遽請於公曰未審何時得賣生菜於是公為之大
笑而易之

夏英公疎父官於河北景德中契丹犯河北遂歿于陣後公為舍人

丁母憂起復奉使契丹公辭不行其表云父歿王事身丁母憂義不
戴天難下穹廬之拜禮當枕塊忍聞夷樂之聲當時以為一作謂四
六偶對最為精絕

孫何孫僅俱以能文馳名一時僅為陝西轉運使作驪山詩二篇其
後篇有云秦帝墓成陳勝起明皇宮就祿山來時方建玉清昭應宮
有惡僮者欲中傷之因錄其詩以進真宗讀前篇云朱衣吏引上驪
山遽曰僅小器也此何足誇遂棄不讀而陳勝祿山之語卒得不一
作不得聞人以為幸也

楊大年每欲一作選作文則與門人賓客飲博投壺奕碁二字一作
乃至語啖諳諱而不妨構思以小方紙細書揮翰如飛文不加點每
盈一幅則命門人傳錄門人疲於應命頃刻之際成數千言真一代
之文豪也

楊大年為學士時草答契丹書云隣壤交歡進草既入真宗自注其
側云朽壤鼠壤糞壤大年遽改為隣境明日引唐故事學士作文書
有所改為不稱職當罷因亟求解職真宗語宰相曰楊億不通商量
真有氣性一作性氣

太常所用王朴樂編鐘皆不圓而側垂自李照胡瑗之徒皆以為非
及照作新樂將鑄編鐘給銅一有於字鑄瀉務得古編鐘一枚工人
不敢銷毀遂藏於太常鐘不知何代所作其銘曰一作云粵朕皇祖
寶斂鐘粵斯萬年子子孫孫永寶用叩其聲與王朴夷則清聲合而
其形不圓一有而字側垂正與朴鐘同然後知朴博古好學不為無

據也其後胡瑗改鑄編鐘遂圓其形而下垂叩之揜鬱而不揚其鐘
鐘又長而震掉其聲不和著作佐郎劉義叟竊謂人曰此與周景
王無射鐘無異必有眩惑之疾未幾仁宗得疾人以義叟之言驗矣
其樂亦尋廢一有不用

自太宗崇獎儒學驟擢高科至輔弼者多矣蓋一作自太平興國二

年至天聖八年二十三榜由呂文穆公蒙正而下大用二十七一作
五人而三人並登兩府惟天聖五年一榜而已是歲王文安公堯臣
第一今昭文相公韓僕射琦西廳參政趙侍郎槩第二第三人也予
忝與二公同府每見語此以爲科場盛事自景祐元年已後至今治
平三年三十餘年十二榜五人已上未有一人登兩府者亦可怪也

歸田錄卷第一

真宗朝歲歲賞花釣魚羣臣應制嘗一歲臨池久之而御釣不食時
丁晉公謂應制詩云鶯鶯鳳葢穿花去魚畏龍顏上釣遲真宗稱賞
羣臣皆自以為不及也

趙元昊二子長曰佖令受次曰諒祚諒祚之母尼也有色而寵佖令
受母子怨望而諒祚母之兄曰沒藏訛喚者亦黠虜也因教佖令受
以弑逆之謀元昊已見殺訛喚遂以弑逆之罪誅佖令受子母而諒
祚乃得立而年甚幼訛喚遂專夏國之政其後諒祚稍長卒殺訛喚
滅其族元昊為西鄙患者十餘年國家困天下之力有事於一方而
敗軍殺將不可勝數然未嘗少挫其鋒及其困於女色禍生父子之
間以亡其身此自古賢智之君或不能免况夷狄乎訛喚教人之子
殺其父以為己利而卒亦滅族皆理之然也

晏元獻公喜評詩嘗曰老覺腰金重慵便枕玉涼未是富貴語不如
笙歌歸院落燈火下樓臺此善言富貴者也人皆以為知言

契丹阿保機當唐末五代時最威開平中屢遣使聘梁梁亦遣人報
聘今世傳一有學士二字李琪金明集有賜契丹詔乃為阿保機當
時書詔不應有誤而自五代以來見於他書者皆為阿保機雖今契
丹之人自謂之阿保機亦不應有失又有趙志忠者本華人也自幼
陷虜為人明敏在虜中舉進士至顯官既而脫身歸國能述虜中君
臣世次山川風物甚詳又云阿保機虜人實謂之阿保謹未一作莫
知孰是一有也字此聖人所以慎於傳疑也

真宗尤重儒學今科場條制皆當時所定至今每親試進士已放及
第自十人已上御試卷子並錄本於真宗影殿前焚燒制舉登科者
亦然

近時名畫李成巨然山水包鼎虎趙昌花果成官至尚書郎其山水
寒林往往人家有之巨然之筆惟學士院玉堂北壁獨存人間不復

見也包氏宣州人世以畫虎名家而鼎最為妙今子孫猶以畫虎為
業而曾不得其髣髴也昌花寫生逼真而筆法輕俗一作劣殊無古
人格致然時亦未有其比一作未有過此者

寇萊公在中書與同列戲云水底日為天上日未有對而會揚大年
適來白事因請其對大年應聲曰眼中人是面前人一坐稱為的對
朝廷之制有因偶出一時而遂為故事者契丹人使見辭賜宴雜學
士員雖多皆赴坐惟翰林學士祗召當直一員一人餘皆不赴諸
王宮教授入謝祖宗時偶因便殿不御袍帶見之至今教授入謝必
俟上入內解袍帶復出見之有司皆以為定制也

處士林逋居於杭州西湖之孤山逋工筆畫善為詩如草泥行郭索
雲木叫鉤輒頗為士大夫所稱又梅花詩云疎影橫斜水清淺暗香
浮動月黃昏評一作能詩者謂前世詠梅者多矣未有此句也又其
臨終為句云茂陵他日求遺棄猶喜曾無封禪書尤為人稱一作傳
誦自逋之卒湖山寂寥一作莫未有繼者

俚諺云趙老送燈臺一去更不來不知是何等語雖士大夫一作君
子亦往往道之天聖中有尚書郎趙世長者常以滑稽自負其老也
求為西京留臺御史有輕薄子送以詩云此回真是送燈臺世長深
惡之亦以不能酬酢為恨其後竟卒於留臺也

官制一作稱廢久矣今其名稱訛謬者多雖士大夫皆從俗不以為
怪皇女為公主其夫必拜駙馬都尉故謂之駙馬宗室女封郡主者
謂其夫為郡馬縣主者為縣馬不知何義也

唐制三衛官有司階司戈執干執戟謂之四色官今三衛廢無官屬
惟金吾有一人每日於正衙放朝喝不坐直謂之四色官尤可笑也
京師諸司庫務皆由三司舉官監當而權貴之家子弟親戚因緣請
託不可勝數為三司使者常以為患田元均為人寬厚長者其在三
司深厭干請者雖不能從然不欲峻拒之每溫顏強笑以遣之嘗謂

人曰作三司使數年強笑多矣直笑得面似靴皮士大夫聞者傳以爲笑然皆服其德量也

茶之品莫貴於龍鳳謂之團茶凡八餅重一斤慶曆中蔡君謨爲福建路轉運使始造小片龍茶以進其品絕精一作精絕謂之小團凡二十餅重一斤其價直金二兩然金可有而茶不可得每因南郊致齋中書樞密院各賜一餅四人分之宮人往往縷一作覆金花於其上蓋其貴重如此

太宗時有待詔買玄以棋供奉號爲國手邇來數十年未有繼者近時有李憇子者頗爲人所稱云舉世無敵手然其人狀貌昏濁垢穢不可近蓋里巷庸人也不足置之罇俎聞故胡旦嘗語人曰以碁爲易解則如旦聰明尙或不能以爲難解則愚下小人往往造於精絕信如其言也

王副樞嚙之夫人梅鼎臣之女也景彝初除樞密副使梅夫人入謝慈壽宮太后問夫人誰家子對曰梅鼎臣女也太后笑曰是梅聖俞家乎由是始知聖俞名聞於宮禁也聖俞在時家甚貧余或至其家飲酒甚醇非常人家所有問其所得云皇親有好學者宛轉致之余又聞皇親有以錢數千購梅詩一篇者其名重於時如此

錢思公雖生長富貴而少所嗜好在西洛時嘗語寮屬言平生惟好讀書坐則讀經史臥則讀小說上廁則閱小辭蓋未嘗頃刻釋卷也謝希深亦言宋公垂同在史院每走廁必挾書以往誦誦之聲琅然聞於遠近其篤學如此余因謂希深曰余平生所作文章多在二三上乃馬上枕上廁上也蓋惟此尤可以屬思爾

國朝宰相最少年者惟王溥罷相時父母皆在人以爲榮今富丞相蜀入中書時年五十二太夫人在堂康強後三年太夫人薨有司議贈卹之典云無見任宰相丁憂例是歲三月十七日春宴百司已具前一夕有旨富某母喪在殯特罷宴此事亦前世未有

皇祐二年嘉祐七年季秋大享皆以大慶殿爲明堂蓋明堂者路寢也方於萬祭園丘斯爲近禮明堂額御篆以金填字門牌亦御飛白皆皇祐中所書神翰雄偉勢若飛動余詩云寶墨飛雲動金文耀日晶者謂二牌也

錢思公官兼將相階勳品皆第一自云平生不足者不得於黃紙書名每以爲恨也

三班院所領使臣八千餘人治事于外其罷而在院者常數百人每歲乾元節釀錢飯僧進香合以祝聖壽謂之香錢判院官常利其餘以爲餐錢羣牧司領內外坊監使副判官比佻司俸入最優又歲收糞糞錢頗多以充公用故京師爲之語曰三班喫香羣牧喫糞也咸平五年南省試進士有教無類賦王沂公爲第一賦盛行於世其警句有云神龍異粟猶嗜欲之可求纖草何尙薰蕕而相假時有輕薄子擬作四句云相國寺前熊翻筋斗望春門外驢舞柘枝議者以謂言雖鄙俚亦著題也

國朝之制自學士已上賜金帶者例不佩魚若奉使契丹及館伴北使則佩事已復去之惟兩府之臣則賜佩謂之重金初太宗嘗曰玉不離石犀不離角可貴者惟金也乃創爲金鈔之制以賜羣臣方圍毬路以賜兩府御仙花以賜學士以上今俗謂毬路爲芡頭御仙花爲荔枝皆失其本號也

宋丞相庠早以文行負重名於時晚年尤精字學嘗手校郭忠恕佩觿三篇寶翫之其中書堂吏書牒尾以俗體書宋爲宋公見之不肯下筆責堂吏曰吾雖不才尙能見姓書名此不是我姓堂吏惶懼改之乃肯書名

京師食店賣酸饅者皆大出一作書牌勝於通衢而俚俗昧於字法轉酸從食饅從啗有滑稽子謂人曰彼家所賣饅餡音俊切不知爲何物也飲食四方異宜而各號亦隨時俗言語不同至或傳者轉失

其本湯餅唐人謂之不托今俗謂之餽餽矣晉束皙餅賦有饅頭薄持起溲牢九之號惟饅頭至今各存而起溲牢九皆莫曉爲何物薄持荀氏又謂之薄夜亦莫知何物也

嘉祐八年上元夜賜中書樞密院御筵于相國寺羅漢院國朝之制歲時賜宴多矣自兩制已上皆與惟上元一夕祇賜中書樞密院雖前兩府見任使相皆不得與也是歲昭文韓相一作公集賢曾公樞密張太尉皆在假不赴惟余與西廳趙侍郎蔡副樞胡諫議宿吳諫議奎四人在席酒半相顧四人者皆同時翰林學士相繼登二府前此未有也因相與道玉堂舊事爲笑樂遂皆引滿劇飲亦一時之盛事也

國朝之制大宴樞密使副不坐侍立殿上既而退就御廚賜食與閣門引進四方館使列坐廡下親王一人伴食每春秋賜衣門謝則與內諸司使副班于垂拱殿外廷中而中書則別班謝于門上故朝中爲之語曰廚中賜食階下謝衣蓋樞密使唐制以內臣爲之故常與內諸司使副爲伍自後唐莊宗用郭崇韜與宰相分秉朝政文事出中書武事出樞密自此之後其權漸盛至今一作本朝遂號爲兩府事權進用祿賜禮遇與宰相均惟日趨內朝待宴賜衣等事尚循唐舊其任降輔弼之崇而雜用內諸司故事使朝廷制度輕重失序蓋沿革異時因循不能釐正也

蔡君謨既爲余書集古錄目序刻石其字尤精勁爲世所珍余以鼠鬚栗尾筆銅線筆格大小龍茶惠山泉等物爲潤筆君謨大笑以爲太清而不俗後月餘有人遺余以清泉香餅一篋者君謨聞之歎曰香餅來遲使我潤筆獨一作猶無此一種佳一無此字物茲又可笑也清泉地名香餅石炭也用以焚香一餅之火可終日不滅

梅聖俞以詩知名三十年終不得一館職晚年與修唐書書成未奏而卒士大夫莫不歎惜其初受勅修唐書語其妻刁氏曰吾之修書

可謂糊塗入布袋矣刁氏對曰君於任宦亦何異鮎魚上竹竿耶聞者皆以爲善對一作昔梅聖俞以詩名當世然終不得一館職晚年

在唐書局充脩書官尚冀書成曠勞得一貼職以償素願書垂就而卒時人莫不歎其奇薄其初脩唐書也嘗竊嘆曰吾今可謂糊塗入布袋

仁宗初立今上爲皇子令中書召學士草詔學士王珪當直召至中書諭之王曰此大事也必須面奉聖旨於是求對明日面稟得旨乃草詔羣一作詰公皆以王爲真得學士體也

威文肅公豐肌一作肥大腹而眉目清秀丁晉公疎瘦如削二公皆兩浙人也並以文辭知名於時梅學士詢在真宗時已爲名臣至慶曆中爲翰林侍讀以卒性喜焚香其在官所每晨起將視事必焚香兩鑪以公服單之撮其袖以出坐定撒開兩袖郁然滿室濃香有寶元寶者五代漢宰相正固之孫也以各家子有文行爲館職而不喜脩飾經時未嘗沐浴故時人爲之語曰威肥丁瘦梅香寶臭也

寶元中趙元昊叛命朝廷命將討伐以鄜延環慶涇原秦鳳四路各置經略安撫招討使余以爲一作謂四路皆內地也當如故事置靈夏四面行營招討使今自於境內何所招討余因竊料王師必不能出境其後用兵五六年劉平任福葛懷敏三大將皆自戰其地而大敗由是至於罷兵竟不能出師

呂文穆公蒙正以寬厚爲宰相太宗尤所眷遇有一朝士家藏古鑑自言能照二百里欲因公弟獻以求知其弟伺間從容言之公笑曰吾面不過碟一作鏡子大安用照二百里其弟遂不復敢言聞者歎服以謂賢於李衛公遠矣蓋寡好而不爲物累者昔賢之所難也

國朝百有餘年年號無過九年者開寶九年改爲太平興國太平興國九年改爲雍熙大中祥符九年改爲天禧慶曆九年改爲皇祐嘉祐九年改爲治平惟天聖盡九年而十年改爲明道

唐人奏事非表非狀者謂之榜子亦謂之錄子今謂之劄子凡羣臣百司上殿奏事兩制以上非時有所奏陳皆用劄子中書樞密院事有不降宣勅者亦用劄子與兩府自相往來亦然若百司申中書皆用狀惟學士院用咨報其實如劄子亦不書一作出名但當直學士一人押字而已謂之咨報今俗謂草書名為押字也此唐學士舊規也唐世學士院故事近時隳廢殆盡惟此一事在爾

燕王元儼太宗幼子也太宗子八人真宗朝六人一無此字已亡歿至仁宗即位獨燕王在以皇叔之親特見尊禮契丹亦畏其名其疾亟時仁宗幸其宮親為調藥平生未嘗語朝政遺言一二事皆切於理余時知制誥所作贈官制所載皆其實事也

華元郡王允良燕王子也性好晝睡每自日酣寢至暮始與盥一作頰濯櫛漱衣冠而出燃燈燭治家事飲食宴樂達旦而罷則復寢以終日無日不如此由是一宮之人皆晝睡夕興允良不甚喜聲色亦不為佻驕恣惟以夜為晝亦其性之異前世所未有也故觀察使劉從廣燕王壻也嘗語余燕王好坐木馬子坐則不下或饑則便就其上飲食往往乘輿奏樂於前酣飲終日亦其性之異也

皇子穎封東陽郡王除婺州節度使檢校太傅翰林學士上言太傅天子師臣也子為父師於體不順中書檢勘自唐以來親王無兼師傅官者蓋自國朝命官祗以差遣為職事自三師三公以降皆是虛名故失於因循爾議者皆以買言為當也

端明殿學士五代後唐時置國朝尤以為貴多以翰林學士兼之其不以翰苑兼職及換職者百年間纔兩人特拜程巖王素是也

慶曆八年正月十八日夜崇政殿宿衛士作亂於殿前殺傷四人取進備救火梯登屋入禁中逢一宮人問寢閣在何處宮人不對殺之既而宿直都知聞變領宿衛士入搜索已復逃竄後三日於內城西北角樓中獲一人殺之時內臣楊懷敏受旨獲賊勿殺而倉卒殺

之由是竟莫究其事

葉子格者自唐中世以後有之說者云因人有姓葉號葉子青一作清或作晉者撰此格因以為名此說非也唐人藏書皆作卷軸其後有葉子其制似今策子凡文字有備檢用者卷軸難數卷舒故以葉子寫之如吳彩鸞唐韻李郃彩選之類是也散子格本備檢用故亦以葉子寫之因為名爾唐世士人宴聚盛行葉子格五代國初猶然後漸廢不傳今其格世或有之而人無知者惟昔楊大年好之仲待制簡大年門下客也故亦能之大年又取葉子彩一作歌名紅鶴卑鶴者別演為鶴格鄭宣徽章郇公得象皆大年門下客也故皆能之余少時亦有此二格後失其本今絕無知者

國朝自下湖南始置諸州通判既非副貳又非屬官故常與知州爭權每云我是監郡朝廷使我監汝舉動為其所制太祖聞而患之下詔書戒勵使與長吏協和二字一作同押凡文書非與長吏同簽書者所在不得承受施行自此遂稍稍戢然至今州郡往往與通判不和往時有錢昆少卿者家世餘杭人也杭人嗜蟹昆嘗求補外郡人問其所欲何州昆曰但得有螃蟹無通判處則可矣至今士人以為口實

嘉祐二年余與端明韓子華翰長王禹玉侍讀范景仁龍圖梅公儀同知禮部貢舉辟梅聖俞為小試官凡鎖院一有經字五十日六人者相與唱和為古律歌詩一百七十餘篇集為三卷禹玉余為校理時武成王廟所解進士也至此新入翰林與余同院又同知貢舉故禹玉贈余云十五年前出門下最榮今日預東堂余答云昔時叨入武成宮曾看揮毫氣吐虹夢寐閑思十年事笑談今此一作日一罇同喜君新賜黃金帶顧我宜為白髮翁也天聖中余舉進士國學南省皆忝第一人薦名其後景仁相繼亦然故景仁贈余云澹墨題名第一人孤生何幸繼前塵也聖俞自天聖中與余為詩友余嘗贈以

蟠桃詩有韓孟之戲故至此梅贈余云猶喜共量天下士亦勝東野亦勝韓而子華筆力豪贍公儀文思溫雅而敏捷皆勦敵也前此爲南省試官者多窘束條制不少放懷余六人者懽然相得羣居終日長篇險韻衆製交作筆吏疲於寫錄僮史一作隸奔走往來間以滑稽嘲諷形一作加於風刺更相酬酢往往烘堂絕倒自謂一時盛事前此未之有也

往時學士循唐故事見宰相不具靴笏繫鞋坐玉堂上遣院吏計會堂頭直省官學士將至宰相出迎近時學士始具靴笏至中書與常參官雜坐於客位有移時不得見者學士日益自卑丞相禮亦漸薄蓋一作並習見已久恬然不復爲怪也

張堯封者南京進士也累舉不第家甚貧有善相者謂曰視子之相不過一幕職然君骨貴必享王封人初莫曉其旨其後堯封舉進士及第終於幕職堯封温成皇后父也后既貴堯封累贈太師中書令兼尚書令封清河郡王由是始悟相者之言

治平二年八月三日大雨一夕都城水深數尺上降詔責躬求直言學士草詔有大臣惕思天變之語上夜批出云淫雨爲災專戒不德遽令除去大臣思變之言上之恭己畏天自勵如此

章郇公得象與石資政中立素相友善而石喜談一作談諧嘗戲章云昔時名畫有戴松牛韓幹馬而今有章得象也世言閩人多短小而長大者必爲貴人郇公身既長大而語聲如鐘豈出其類者是爲異人乎其爲相務以厚重鎮止浮競時人稱其德量

金橘產於江西以遠難致都人初不識明道景祐初一作中始與竹子俱至京師竹子味酸人不甚喜後遂不至而金橘香清味美置之罇俎間光彩灼爍一作的爍如金彈丸誠珍果也都人初亦不甚貴其後因温成皇后尤好食之由是價重京師余世家江西見吉州人甚惜此果其欲久留者則於菘豆中藏之可經時不變云橘性熱而

豆性涼故能久也

凡物有相感者出於自然非人智慮所及皆因其舊俗而習知之今唐鄧間多大柿其初生澀堅實如石凡百十柿以一椀櫛置其中搗棹亦可則紅熟爛如泥而可食土人謂之烘柿者非用火乃用此爾淮南人藏鹽酒蟹凡一器數十蟹以阜策半挺置其中則可藏經歲不沙一作損至於薄荷醉貓死貓引竹之類皆世俗常知而翡翠屑金人氣粉犀此二物則世人未知者余家有一玉璽形製甚古而精巧始得之梅聖俞以爲碧玉在潁州時嘗以示僚屬坐有兵馬鈐轄鄧保吉者真宗朝老內臣也識之曰此寶器也謂之翡翠云禁中寶物皆藏宜聖庫庫中有翡翠盞一隻所以識也其後予偶以金環於嬰腹信手磨之金屑紛紛而落如硯中磨墨始知翡翠之能屑金也諸藥中犀最難搗必先鏽屑乃入衆藥中搗之衆藥篩羅已盡而犀屑獨存四字一作犀獨在余偶見一醫僧元達者解犀爲小塊子方一寸半許四字一作半寸許以極薄紙裹置於一無此字懷中一有使守近肉以人氣蒸之候氣薰蒸浹洽乘熱投臼中急搗應手如粉因知人氣之能粉犀也然今醫工皆莫有知者

石曼卿磊落奇才知名當世氣貌雄偉飲酒過人有劉潛者亦志義之士也常與曼卿爲酒敵聞京師沙行王氏新開酒樓遂往造焉對飲終日不交一言王氏怪其所飲過多非常人之量以爲異人稍獻肴果益取好酒奉之甚謹二人飲啗自若傲然不顧至夕殊無酒色相揖而去明日都下喧傳王氏酒樓有二酒仙來飲久之乃知劉石也

燕龍圖肅有巧思初爲承興推官知府寇萊公好舞柘枝有一鼓甚惜之其鑲忽脫公悵然以問諸匠皆莫知所爲燕請以鑲脚爲鑲簧內之則不脫矣萊公大喜燕爲人寬厚長者博學多聞其漏刻法最精今州郡往往有之

劉岳書儀婚禮有女坐婿之馬鞍父母為之合髻之禮不知用何經義據岳自敘云以時之所尚者益之則是當時流俗之所為爾岳當五代干戈之際禮樂廢壞之時不暇講求三王之制度苟取一時世俗所用吉凶儀式略整齊之固不足為後世法矣然而後世猶不能行之今岳書儀十已廢其七八其一二僅行於世者一作悉皆苟簡粗略不如本書就中轉失乖繆可為大笑者坐鞍一事爾今之士族當婚之夕以兩倚相背置一馬鞍反令婿坐其上飲以三爵女家遣人三請而後下乃成婚禮謂之上高坐凡婚家舉族內外姻親與其男女賓客堂上堂下竦立而視者惟婿上高坐為威禮爾或有偶不及設者則相與悵然咨嗟以為闕禮其轉失乖繆至於如此今雖名儒巨公衣冠舊族莫不皆然嗚呼士大夫不知禮義而與閭閻鄙俚同其習一作所見而不知為非者多矣前日濮園皇伯之議是已豈止坐鞍之繆哉

世俗傳訛惟祠廟之名為甚今都城西崇化坊顯聖寺者本名蒲池寺周氏顯德中增廣之更名顯聖而俚俗多道其舊名今轉為菩提寺矣江南有大小孤山在江水中巖然獨立而世一作俚俗轉孤為姑江側有一石磯謂之澎浪磯遂轉為彭即磯云彭即者小姑壻也余嘗過小孤山廟像乃一婦人而勦額為聖母廟豈止俚俗之繆哉西京龍門山夾伊水上自端門望之如雙闕故謂之闕塞而山口有廟曰闕口廟余嘗見其廟像甚勇手持一屠刀尖銳按膝而坐問之云此乃豁口大王也此尤可笑者爾

今世俗言語之訛而舉世君子小人皆同其繆者惟打字爾打字雅反其義本謂者擊故人相毆以物相擊皆謂之打而工造金銀器亦謂之打可矣蓋有槌槌作擊之義也至於造舟車者曰打船打車網魚曰打魚汲水曰打水役夫餉飯曰打飯兵士給衣糧曰打衣糧從者執傘曰打傘以糊黏紙曰打黏以丈尺量地曰打量舉手試眼之

昏明曰打試至於名儒碩學語皆如此觸事皆謂之打而徧檢字書了無此字丁雅反者其義主考擊之打自音謫疑當作滴耿以字學言之打字從手從丁丁又擊物之聲故音謫耿為是不知因何轉為丁雅也

用錢之法自五代以來以七十七為百謂之省陌今市井交易又剋其五謂之依除咸平五年陳恕知貢舉選士最精所解七十二人王沂公會為第一御試又落其半而及第者三十八人沂公又為第一故京師為語曰南省解一百依除殿前放五十省陌也是歲取人雖少得士最多宰相三人乃沂公與王公隨章公得象參知政事一人韓公億侍讀學士一人李仲容御史中丞一人王臻知制誥一人陳知微而汪白青陽楷二人雖不達而皆以文學知名當世

唐李肇國史補序云言報應敘鬼神迷夢卜近帷箔悉去之紀事實探物理辨疑惑示勸戒採風俗助談笑則書之余之所錄大抵以筆為法大字一作亦然而小異於筆者不書人之過惡以謂職非史官而掩惡揚善者君子之志也覽者詳之

歸田錄卷第二

居士退居汝陰而集以資閑談一作話也

李文正公進永昌陵挽歌辭云奠玉五回朝上帝御樓二度納降王
當時羣臣皆進而公詩最為首出所謂三降王者廣南劉鋹西蜀孟
昶及江南李後主是也若五朝上帝則誤矣太祖建隆盡四年明年
初郊改元乾德至六年再郊改元開寶開寶五年又郊而不改元九
年已平江南四月大雪告謝於西京蓋執玉祀天者實四也李公嘗
時人必不繆乃傳者誤云五二字一作之耳

仁宗朝有數達官以詩知名常慕白樂天體故其語多得於容易嘗
有一聯云有祿肥妻子無恩及吏民有戲之者云昨日通衢遇一輜
駟車載極重而羸牛甚苦豈非足下肥妻子乎聞者傳以為笑

京師輦轂之下風物繁富而士大夫牽於事役良辰美景罕或一作
獲宴遊之樂其詩至有賣花擔上看桃李拍酒樓頭一作前聽管絃
之句西京應天禪院有祖宗神御殿蓋一作寺在水北去河南府十
餘里歲時朝拜官吏常苦晨興而留守達官賈貫每朝罷公酒三行
不交一言而退故其詩曰正夢寐中行十里不言語處喫一作飲三

杯其語雖淺近皆兩京之實事也
梅聖俞嘗於范希文席上賦河豚魚詩云春洲生荻芽春岸飛楊花
河豚當是二字一作於此時實不數魚蝦一有其狀已可怪其毒亦
莫加於腹若封豕怒目猶吳蛙庖前苟失所入喉為錢鄒若此喪軀

體何須資齒牙持問南方人黨護復於誇皆言美無度誰謂死如麻
我語不能屈自思空嗚嗟退之來潮陽始憚餐龍蛇子厚居柳州而
甘食蝦蟇一物雖可憎性命無外差斯一作滋味曾不比中藏禍無

涯甚美惡亦爾此言誠可嘉河豚常出於春暮羣遊水上食絮而肥
南人多與荻芽一作笋為羹云最美故知詩者謂抵破題兩句已道
盡河豚好處聖俞平生苦於吟詠以閑遠古淡為意故其構思極艱

此詩作於罇俎之間筆力雄贍頃刻而成遂為絕唱

蘇子瞻學士蜀人也嘗於清井監得西南夷人所賣蠻布弓衣其文

織成梅聖俞春雪詩一有朔風三日暗吹沙蛟龍卷足噴成花花飛
萬里春曉月白石爛堆愁女嫗大眼廣庭踏朝賀雉尾不掃粘官靴
宮中才人承聖額捧觴稱壽呼南山三公免責百姓喜斗酒十千誰

復怪此詩在聖俞集中未為絕唱蓋其名重天下一篇一詠傳落夷
狄而異域之人貴重之如此耳子瞻以余尤知聖俞者得之因以見
遺余家舊蓄琴一張乃寶曆三年雷會所劉距今二百五十年矣其
聲清越如擊金石遂以此布更為琴囊二物真余家之寶玩也

吳僧贊寧國初為僧錄頗讀儒書博覽強記亦自能撰述而辭辨縱
橫人莫能屈時有安鴻漸者文詞備敏尤好嘲詠嘗街行遇贊寧與
數僧相隨鴻漸指而嘲曰鄭都官不愛之徒時時作隊贊寧應聲答
曰秦始皇未坑之輩往往成羣時皆善其捷對鴻漸所道乃鄭谷詩
云愛僧不愛紫衣僧也

鄭谷詩名感於唐末號雲臺編而世俗但稱其官為鄭都官詩其詩
極有意思亦多佳句但其格不甚高以其易曉人家多以教小兒余
為兒時猶誦之今其集不行於世矣梅聖俞晚年宦亦至都官一日
會飲余家劉原父戲之曰聖俞官必止於此坐客皆驚原父曰昔有

鄭都官今有梅都官也聖俞頗不樂未幾聖俞病卒余為序其詩為
宛陵集而今人但謂之梅都官詩一言之謔後遂果然斯可歎也
陳舍人從易當時文方盛之際獨以醇儒古學見稱其詩多類白樂

天蓋自楊劉唱和西崑集行後進學者爭效之風雅一一作之變謂
之崑體繇是唐賢集詩集幾廢而不行陳公時偶得杜集舊本文多
脫誤至送蔡都尉詩云身輕一鳥其下脫一字陳公因與數客各用
一字補之或云疾或云落或云起或云下莫能定其後得一善本乃

是身輕一鳥過陳公嘆服以為雖一字諸君亦不能到也

歐陽文忠全集 卷一百二十八 六十五

國朝浮圖以詩名于世者九人故時有集號九僧詩今不復傳矣余少時聞人多稱其一曰惠崇餘八人者忘其名字也余亦略記其詩有云馬放降來地鵬盤戰後雲又云春生桂嶺外人在海門西其佳句多類此其集已一作既亡今人多不知有所謂九僧者矣是可嘆也當時有進士許洞者善為辭章俊逸之士也因會一作命諸詩僧分題出一紙約曰不得犯此一字其字乃山水風雲竹石花草雪霜風月一作日禽鳥之類於是諸僧皆閉筆洞咸平三年進士及第時無名子嘲曰張康渾裹馬許洞開裝妻者是也

孟郊賈島皆以詩窮至死而平生尤自喜為窮苦之句一作辭孟有移居詩云借車載家具具少於車乃是都無一物耳又謝人惠炭云暖得曲身成直身人謂非其身備嘗之不能道此句也賈云鬢邊雖有絲不堪織寒衣就令織得二字一作堪織能一作所得幾何又其朝飢詩云坐聞西林琴凍折兩三絃人謂其不止忍飢而已其寒亦何可忍也

唐之晚年詩人無復李杜豪放之格然亦務以精意相高如周朴者構思尤艱每有所得必極其雕琢故時人稱朴詩月鍛季煉未及成篇已播人口其名重當時如此而今不復傳矣余少時猶見其集其句有云風暖鳥聲碎日高花影重又云曉一作晚來山鳥鬧雨過杏花稀誠佳句也

聖俞常語予曰詩家雖率一作主意而造語亦難若意新語工得前人所未道者斯為善也必能狀難寫之景如在目前含不盡之意見於言外然後為至矣賈島云竹籠拾山果瓦餅擔石泉姚合云馬隨山鹿放雞逐野禽棲等是山岳荒僻官況蕭條不如縣古槐根出官清馬骨高為工也余曰語之工者固如是狀難寫之景含不盡之意何詩為然聖俞曰作者得於心覽者會以意殆難指陳以言也雖然亦可略道其髣髴若嚴維柳塘春水慢花塢夕陽遲則天容時一作

物態融和駘蕩豈不如在目前乎又若温庭筠雜聲茅店月人迹板橋霜賈島怪禽啼曠野落日恐行人則道路新苦羈愁旅思豈不見於言外乎

聖俞子美齊名於一時而二家詩體特異子美筆力豪備以超邁橫絕為奇聖俞思精微以深遠閑淡為意各極其長雖善論者不能優劣也余嘗於水谷夜行詩略道其一云子美氣尤雄萬竅號一噫有時肆顛狂醉墨灑滂霈譬如千里馬已發不可殺盈前盡珠璣一一難揀汰梅翁事清切一作句石齒漱寒澗作詩三十年視我猶後輩文辭念精一作清新心意雖老大有如妖韶女老自有餘態近詩尤古一作苦硬咀嚙苦一作且難嚼又如食橄欖真味久愈在蘇豪以氣轡舉世徒驚駭梅窮獨我知古貨今難賣語雖非工謂粗得其髣髴然不能優劣之也

呂文穆公未第時薄或作嘗遊一縣忘其縣名胡大監日方隨其父宰是邑遇呂甚薄客有譽呂二字一作喻胡曰呂君工於詩宜少加禮胡問詩之警句客舉一篇其卒章云挑盡寒燈夢不成胡笑曰乃是一渴俗語轉亦虛睡漢爾呂聞之甚恨而去明年首中甲科使人寄聲語胡曰渴睡漢狀元及第矣胡答曰待我明年第二人及第輸君一籌既而次榜亦中首選

聖俞嘗云詩句義理雖通語涉淺俗而可笑者亦其病也如有贈漁父一聯云眼前不見市朝事耳畔惟聞風水聲說者云患肝腎風四字一作此漁父肝熱而腎虛也又有詠詩者云一無此六字盡日覓不得有時還自來本謂詩之好句難得爾而說者云此是人家失却猶兒詩人皆以為笑也

王建宮詞一百首多言唐宮禁中事皆史傳小說所不載者往往見於其詩如內一作兩中數日無呼喚傳得滕王蛟蝶圖滕王元嬰高祖子新舊唐書皆不著其所能惟名畫錄略言其善畫亦不云其工

蛺蝶也及畫斷云工於蛺蝶及見於建詩爾或聞今人家亦有得其圖者唐世一藝之善如公孫大娘舞劍器曹剛彈琵琶米嘉榮歌皆見於唐賢詩句遂知名於後世當時山林田畝潛德隱行君子不聞於世者多矣而賤工末藝得所附託乃垂於不朽蓋其各有幸不幸也

李白戲杜甫云借問別來太瘦生總爲從前一作來作詩苦太瘦生唐人語也至今猶以生爲語助如作麼生何似生之類是也陶尚書襲嘗曰尖簷帽子卑凡廝短鞦靴兒末厥兵未厥亦當時語余天聖景祐間已聞此句時去陶公尙未遠人皆莫曉其義王原叔博學多聞見稱於世最爲多識前言者亦云不知爲何說也第記之必有知者耳

詩人貪求好句而理有不通亦語病也如袖中諫草朝天去頭上宮花侍燕歸誠爲佳句矣但進諫必以章疏無直用囊草之理唐人有云姑蘇臺下寒山寺半夜鐘聲到客船說者亦云句則佳矣其如三更不是打一作撞鐘時如賈島哭僧云寫留行道影焚却坐禪身時謂燒殺活和尙此尤可笑也若步隨青山影坐學白塔骨又獨行潭底影數息樹邊身皆鳥詩何精麗頓一無此字異也

松江新作長橋制度宏麗前世所未有蘇子美新橋對月詩所謂雲頭灑灑開金餅水面沈沈臥臥彩一作錄虹者是也時謂此橋非此句雄偉不能稱也子美兄舜元字才翁詩亦道勁多佳句而世獨罕傳其與子美紫閣寺聯句無媿韓孟也恨不得盡見之耳

晏元獻公文章擅天下尤善一作善爲詩而多稱引後進一時名士往往出其門聖俞平生所作詩多矣然公獨愛其兩聯云寒魚猶著底白鷺已飛前又絮暖鰲魚繁秋添蓴菜一作線紫余嘗於聖俞家見公自書手簡再三稱賞此二一作兩聯余疑而問之聖俞曰此非我之極致豈公偶自得意於其間乎乃知自古文士不獨知己難得

而知人亦難也

楊大年與錢劉數公唱和自西崑集出時人爭效之詩體一變而先生老一作老先生輩患其多用故事至於語僻難曉殊不知自是學者之弊如子儀一作大年新蟬云風來玉宇烏先轉一作覺露下金莖鶴未知雖用故事何害爲佳句也又如一有大年二字峭帆橫渡官橋柳疊鼓驚飛海岸鷗其不用故事又豈不佳乎蓋其雄文博學筆力有餘故無施而不可非如前世號詩人者區區於風雲一作雲草木之類爲許洞所困者也

西洛故都荒臺廢沼遺迹依然見於詩者多矣惟錢文僖公一聯最爲警絕云日上故陵煙漠漠春歸空苑水潏潏裴晉公綠野堂在午橋南往時嘗屬張僕射齊賢家僕射罷相歸洛一作故日與賓客吟宴於其間惟鄭工部文寶一聯最爲警絕云水暖鶯驚行哺子溪深桃李臥開花人謂不減王維杜甫也錄詩好句尤多而鄭句不惟當時人莫及雖其集中自及此者亦少

閩人有謝伯初者字景山當天聖景祐之間以詩知名余謫夷陵時景山方爲許州法曹以長韻見寄頗多佳句有云長官衫色江波綠學士文華蜀錦張余答云參軍春思亂如雲白髮題詩愁送春蓋景山詩有多情未老已一作光白髮三字一作頭先白野思到春如亂雲之句故余以此戲之也景山詩頗多如自種黃花添野景旋移高竹聽秋聲園林換葉梅初熟池館無人燕學飛之類皆無媿於唐賢而仕宦不偶終以一作於困窮而卒其詩今已不見於世其家亦流落不知所在其寄余詩殆今三十五年矣余猶能誦之蓋其人不辛既可哀其詩淪棄亦可惜因錄於此詩曰江流無險似瞿唐滿峽猿聲斷旅一作盡腸萬里可堪人謫宦經年應合鬢成霜長官衫色江波綠學士文華蜀錦張異域化爲儒雅俗遠民爭識校讎郎才如夢得多爲累情似安仁久悼亡下國難留金馬客新詩傳與竹枝娘典

辭懸待修青史諫草當來集皂囊莫為明時暫遷謫便將纓足濯滄浪

石曼卿自少以詩酒豪放自得其氣貌偉然詩格奇峭又工於書筆

畫道勁體兼顏柳為世所珍一作好余家嘗得南唐後主澄心堂紙

曼卿為余以此紙書其筆筆釋詩詩曼卿平生所自愛者至今藏之

號為三絕真余家寶也曼卿卒後其故人有見之者云恍惚如夢中

言我今為鬼仙也所主芙蓉城欲呼故人往遊不得忿然騎一素一

作青驪去如飛其後又云降於亳州一舉子家又呼一有其字舉子

去不得因留詩一篇與之余亦略記其一聯云鶯聲不逐春光老花

影長隨日脚流神一作鬼仙事怪不可知其詩頗類曼卿平生語舉

子不能道也王建霓裳詞云弟子部一作歌中留一色聽風聽水作

霓裳霓裳一有羽衣二字曲今教坊尚能作其聲其舞則廢而不傳

矣人間又有望瀛府獻仙音二曲云此其遺聲也霓裳曲前世傳記

論說頗詳不知聽風聽水為何事也白樂天有霓裳歌甚詳亦無風

水之說第記之或有遺亡四字一作必有知者爾

龍圖趙學士師民以醇儒碩學各重當時為人沈厚端默羣居終日

似不能言而於文章之外詩思尤精如麥天辰氣潤槐夏午陰清前

世名流皆所未到也又如曉鶯林外千聲轉芳草堦前一尺長殆不

類其為人矣

退之筆力無施不可而嘗以詩為文章末事故其詩曰多情懷酒伴

餘事作詩人也然其資一作發談笑助諧謔敘人情狀物態一寓於

詩而由盡其妙此在雄文大手固不足論而子獨愛其工於用韻也

蓋其得韻寬則波瀾橫溢泛入傍韻乍還乍離一作乍去乍還出入

回合殆不可拘以常格如此日足可惜之類是也得韻窄則不復傍

出而因難見巧愈險愈奇如病中贈張十八之類是也余嘗與聖俞

論此以謂譬如一作夫善馭良馬者通衢廣陌縱橫馳逐惟意所之

至於水曲蟻封疾徐一有懼字中節而不少蹉跌乃天下之至工也

聖俞戲曰前史言退之為人木強若寬韻可自足而輒傍出窄韻難

獨用而反不出豈非其拘強而然歟坐客皆為之笑也

自科場用賦取人進士不復留意於詩故絕無可稱者惟天聖二年

省試采侯詩宋尚書祁最擅場其句有色映棚雲爛聲迎羽月遲一

作見尤為京師傳誦當時舉子目公為宋采侯

詩話一卷

老氏說

前後之相隨長短之相形推而廣之萬物之理皆然也不必更言其餘然老子爲書比其餘諸子已爲簡要也其於覈見人情尤爲精爾非莊周慎到之倫可擬其言雖若虛無而於治人之術至矣

富貴貧賤說

貧賤常思富貴富貴必履危機此古人之所嘆也惟不思而得既得而不患失之者其庶幾乎富貴易安而患於難守貧賤難處而患於易奪居富貴而能守者周公也在貧賤而能久者顏回也然爲顏回者易爲周公者難也君子小人之用心常異趣於此見之小人莫不欲富貴而不知所以守是趣禍罪而惟恐不及也君子莫不安於貧賤爲一無此字小人者不閱則笑是閱笑人之不捨其所樂而趨於禍罪也其爲大趣相反如此四字一作如此之反則其所爲不得不事事異也故與小人共事者難於和同凡事不和同則不濟古之君子有用權以合正者爲至難也若其一作有事君之忠主於誠信有欲濟其事顧不害其正亦有用權之助者此可以理得難以言傳孔子所以置而不論也推誠以接物有害其身者仁人不悔也所謂殺身以成仁然其所濟者遠矣非常情之可企至也

鐘莛說

甲問於乙曰鑄銅爲鐘削木爲莛以莛叩鐘則鏗然而鳴然則聲在木乎在銅乎乙曰以莛叩垣牆則不鳴叩鐘則鳴是聲在銅甲曰以莛叩錢積則不鳴聲果在銅乎乙曰錢積實鐘一有則字虛中是聲在虛器之中甲曰以木若泥爲鐘則無聲聲果在虛器之中乎

駟不及舌說

俗云一言出口駟馬難追論語所謂駟不及舌也若較其理卽俗諺爲是然則泥古之士學者患之也

學書靜中至樂說

有暇卽學書非以求藝之精直勝勞心於他事爾以此知不寓心於物者真所謂至人也寓於有益者君子也寓於伐性泊情而爲害者愚惑之人也學書不能不勞獨不害情性耳要得靜中之樂者惟此耳

夏日學書說

夏日之長飽食難過不自知愧但思所以寓心而銷暑者惟據按作字殊不爲勞當其揮翰若飛手不能止雖驚雷疾霆兩雹交下有不暇顧也古人流愛信有之矣字未至於工尙已如此使其樂之不厭未有不至於工者使其遂至於工可以樂而不厭不必取悅當時之人垂名於後世要於自適而已嘉祐七年正月九日補空

學書自成家說

學書當自成一家之體六字一作自家成一體其模倣他人謂之奴書安昌侯張禹曰書必博見然後識其真爲余實見書之未博者廬陵歐陽修嘉祐二年十一月冬至日

李白杜甫詩優劣說

落日欲沒峴山西倒着接離花下迷襄陽小兒齊拍手攔街爭唱白銅鞮此常言也至於清風明月不用一錢買玉山自倒非人推然後見其橫放其所以警動千古者固不在此也杜甫於白得其一節而精強過之至於天才自放非甫可到也

薛道衡王維詩說

空梁落鷺泥未爲絕警而楊廣不與薛道衡解仇於泉下豈荒煬所趣止於此耶大風飛雲信是英雄之語也若漠漠水田飛白鷺陰陰夏木嘯黃鸝終非己有又何必區區於竊攘哉

峽州詩說

春風疑不到天涯二月山城未見花若無下句則上句何堪既見下

句則上句頗工文意難評蓋如此也

辨甘菊說

本草所載菊花者世所謂甘菊俗又謂之家菊其苗澤美味甘香可食今市人所賣菊苗其味苦烈迺是野菊其實蒿艾之類強名爲菊爾家菊性涼野菊性熱食者宜辨之余近來求得家菊植於西齋之前遂作詩云明年食菊知誰在自向欄邊種數叢余有思去之心久矣不覺發於斯

博物說

螻蛄是何棄物草木蟲魚詩家自爲一學博物尤難然非學者本務以其多不專意所通者少苟有一焉遂以名世當漢晉武帝有東方朔張華皆博物

道無常名說

道無常名所以算於萬物君有常道所以算於四海然則無常以應物爲功有常以執道爲本達有無之至理適用捨之深機詰之難以言窮推之不以迹見

物有常理者

凡物有常理而推之不可知者聖人之所不言也磁石引針蠅蛆甘帶松化虎魄

世人作肥字說

世之人有喜作肥字者正如厚皮饅頭食之未必不佳而視其爲狀已可知其俗物字法中絕將五十年近日稍稍知以字書爲貴而追迹前賢未有二數人古之人皆能書獨其人之賢者傳遠然後世不推此但務於書不知前日工書隨與紙墨泯棄者不可勝數也使顏公書雖不佳後世見者必寶也楊疑式以直言諫其父其節見於艱危李建中清慎溫雅愛其書者兼取其爲人也豈有其實然後存之久耶非自古賢哲必能書也惟賢者能存爾其餘泯泯不復見爾

轉筆在執說

昨日王靖言轉筆誠是難事其如疑對以熟豈不爲各理之言哉往時陳堯咨以射藝自高嘗射於家圃有一賣油里翁釋擔而看射多中陳問爾知射乎吾射精乎翁對曰無他能但手熟耳陳忿然曰汝何敢輕吾射翁曰不然以吾酌油可知也乃取一葫蘆設於地上置一錢以杓酌油歷錢眼中入葫蘆錢不濕曰此無他亦熟耳陳笑而釋之

李昉筆說

余書惟用李昉筆雖諸葛高許頌皆不如意最非金石安知其不先朝露以填溝壑然則遂當絕筆此理之不然也夫人性易習當使無所偏係乃爲通理適得聖俞所和試筆詩尤爲精當余嘗爲原甫說聖俞壓韻不似和詩原甫大以爲知言然此無它惟熟而已蔡君謨性喜書多學是以難精古人各自爲書用法同而爲字異然後能名於後世若夫求悅俗以取媚茲豈復有天真耶唐所謂歐虞褚陸疑至於顏柳皆自名家蓋各因其性則爲之亦不爲難矣嘉祐四年夏納涼於庭中學書盈紙以付發

峽州河中紙說

夷陵紙不其精然最季久余爲縣令時有孫文德者本三司人吏也嘗勸余多藏峽紙云其在省中見天下帳籍惟峽州不朽損信爲然也今河中府紙惟供公家及館閣寫官書爾

誨學說

玉不琢不成器人不學不知道然玉之爲物有不變之常德雖不琢以爲器而猶不害爲玉也人之性因物則遷不學則捨君子而爲小人可不念哉付奕

筆說一卷

南唐硯

某此一硯用之二十年矣當南唐有國時於歙州置硯務選工之善者命以九品之服月有俸廩之給號硯務官歲為官造硯有數其硯四方而平淺者南唐官硯也其石尤精製作亦不類今工之侈竄此硯得自今王舍人原叔原叔家不識為佳硯也兒子輩棄置之予始得之亦不知為南唐物也有江南人年老者見之懷一作慶然曰此故國之物也因具道其所以然遂始寶惜之其貶夷陵也折其一角

宣筆

宣筆初不可用往時聖俞屢以為惠尋復為人乞去今得此甚可用遂深藏之

琴枕說

介甫嘗言夏月晝睡方枕為佳問其何理云睡久氣蒸枕熱則轉一方冷處然則真知睡者耶余謂夜彈琴唯石暉為佳蓋金蚌瑟瑟之類皆有光色燈燭照之則炫耀非老翁夜視所宜白石照之無光唯目昏者為便介甫知睡真賴者余知琴暉直以老而目暗耳是皆可矣余家石暉琴得之二十年昨因患兩手中指拘攣醫者言唯數運動以導其氣之滯者謂唯彈琴為可亦尋理得十餘年已忘諸曲物理損益相因固不能窮至於如此老莊之徒多寓物以盡人情信有以也哉

鑒畫

蕭條淡泊此難畫之意畫者得之覽者未必識也故飛走遲速意淺之物易見而閑和嚴靜趣遠之心難形若乃高下嚮背遠近重複此畫工之藝爾非精鑒者之事也不知此論為是否余非知畫者強為之說但恐未必然也然世謂好畫者亦未必能知此也此字不乃傷俗耶一十字一作然自謂好畫者未必能知此也

學書為樂

蘇子美嘗言明憲淨几筆硯紙墨皆極精良亦自是人生一樂事能得此樂者甚稀其不為外物移其好者又特稀也余晚知此趣恨字體不工不能到古人佳處若以為樂則自足有餘

學書消日

自少所喜事多矣中年以來漸以廢去或厭而不為或好之未厭力有不能而止者其愈久益深而尤不厭者書也至於學字為於不倦時往往可以消日乃知昔賢留意於此不為無意也

學書作故事

學書勿浪書事有可記者它時便為故事

學真草書

自此已後雙日學草書雙日學真書真書兼行草書兼楷十年不勸當得書名然虛名已得而真氣耗矣萬事一作物莫不皆然有以寓其意不知身之為勞也有以樂其心不知物之為累也然則自古無不累心之物而有為物所樂之心

學書費紙

學書費紙猶勝飲酒費錢曩時嘗見王文康公戒其子弟云吾生平不以全幅紙作封皮文康太原人世以晉人喜齋資談笑信有是哉吾年向老亦不欲多耗用物誠未足以有益於人然衰年志思不壯於事少能快然亦其理耳

學書工拙

每書字嘗自嫌其不佳而見者或稱其可取嘗有初不自喜隔數日視之頗若稍可愛者然此初欲寓其心以銷日何用較其工拙而區區於此遂成一役之勞豈非人心蔽於好勝耶

作字要熟

作字要熟熟則神氣完實而有餘於靜坐中自是一樂事然慮少暇

豈其於樂處常不足耶

用筆之法

蘇子美嘗言用筆之法此乃柳公權之法也亦嘗較之斜正之間便分工拙能知此及虛腕則義獻之書可以意得也因知萬事皆有法楊子云斷木為棋剗革為鞠亦皆有法豈正得此也

蘇子美論書

蘇子美喜論用筆而書字不迨其所論豈其力不副其心邪然萬事以心為本未有心至而力不能者余獨以為不然此所謂非知之難而行之難者也古之人不虛勞其心力故其學精而無不至蓋方其幼也未有為時專其力於學書及其漸長則其所一無此字學漸近於用今人不然多學書於晚年所以與古不同也

秋霖不止文書頗稀叢竹蕭蕭似聽愁滴顧見案上故紙數幅信筆學書樞密院東廳

蘇子美蔡君謨書

自蘇子美死後遂覺筆法中絕近年君謨獨步當世然謙讓不肯主盟往年子嘗戲謂君謨學書如沂急流用盡氣力不離故處君謨頗笑以為能取譬今思此語已一一無此字十餘年竟如何哉

李邕書

余始得李邕書不甚好之然疑邕以書自名必有深趣及看之久遂謂他書少及者得之最晚好之尤篤譬猶結交其始也難則其合也必久余雖因邕書得筆法然為字絕不相類豈得其意而忘其形者邪因見邕書追求鍾王以來字法皆可以通然邕書未必獨然凡學書者得其一可以通其餘余偶從邕書而得之耳嘉祐五年春分日雪中西憲一作蕭信筆

風法華

住時有風法華者偶然至人家見筆便書初無倫理久而禍福或應

豈非好怪之士為之遷就其事耶余每見筆輒書故江鄰幾比余為風法華

九僧詩

近世一作時有九僧詩極有好句然今人家多不傳如馬放降來地鵬盤戰後雲春生桂嶺外人在海門西今之文士未能有此句也詳載詩話

弔僧詩

謝希深嘗誦哭僧詩云燒痕詩一作碑入集海角寺留真謂此人作詩不求好句只求好意余以謂意好句亦好矣買島有哭僧詩云寫留行道影焚却坐禪身唐人謂燒却活和尚此句之大病也與詩話所載略同

郊島詩窮

唐之詩人類多窮士孟郊買島之徒尤能刻篆一作琢窮苦之言以自喜或問二子其窮孰甚曰閩仙甚也何以知之曰以其詩見之郊曰種稻耕白水負薪斫青山島市中樵山我舍朝無煙并底有甘泉釜中乃空然蓋孟氏薪米自足而島家柴水俱無此誠可嘆一作笑然二子名稱高於當世其餘林翁處士用意精到者往往有之若鷄聲茅店月人迹板橋霜則羈孤行旅流離辛苦之態見於數字之中至於野塘春水慢花塢夕陽遲則春物融怡人情和暢又有言不能盡之意茲亦精意刻琢之所得者耶

謝希深論詩

住在洛時嘗見謝希深誦一有日字或作云縣古槐根出官清馬骨高又見晏丞相常愛笙歌歸院落燈火下樓臺希深曰清苦之意在言外而見於言中晏公曰世傳寇萊公詩云老覺腰金重慵便枕玉涼以為富貴此特窮相者爾能道富貴之盛則莫如前言亦與希深所評者類爾二公皆有情味而善一作善為篇詠者其論如此歸田

錄亦及此

温庭筠嚴維詩

余嘗愛唐人詩云鷄聲茅店月人迹板橋霜則天寒歲暮風淒木落
羈旅之愁如身履之至其曰野塘春水慢花塢夕陽遲則風酣日煦
萬物怡一作伏蕩天人之意相與融怡讀之便覺欣然感發謂此四
句可以坐變寒暑詩之爲巧猶畫工小筆爾以此知文章與造化爭
巧可也詳載詩話

作詩須多誦古今詩

作詩須多誦古今詩不獨詩爾其他一作餘文字皆一作盡然

漢人善以文言道時事

漢之文士善以文言道時事質而不俚茲所以爲難

蘇氏四六

往時作四六者多用古人語及廣引故事以銜二字一作自以爲博
學而不思述事不暢近時文章變體如蘇氏父子以四六述敘委曲
精盡不減古人一作又自學者變格爲文迫一作追今二十年始得
斯人不惟遲久而後獲實恐此後未有能繼者爾自古異人間出前
後參差不相待余老矣乃及見之豈不爲幸哉

王濟譏張齊賢

張齊賢形體魁肥飲食兼數人然其爲相嘗有邊功國朝宰相惟宋
琪與齊賢知邊事然其常與王濟不相能濟剛峭之士也其後齊賢
罷相歸洛陽買得午橋裴晉公綠野堂營爲別墅一日濟自洛至京
師公卿間有問及齊賢午橋別墅者濟忿然曰昔爲綠野堂今作屠
兒墓園矣聞者皆笑

晦明說

藏精於晦則明養神以一作於靜則安晦所以畜用靜所以應動善
畜者不竭善應者無窮此君子修身治人之術然性近者得之易也

付業

廉恥說

廉恥士君子之大節罕能自守者利欲勝一作華之耳物有爲其所
勝雖善守者或牽而去故孟子謂勇過賁育者誠一作信有旨哉君
子之道闇然而日彰而今人求速譽遂得速毀以自損者理之當然
一有也字

繫辭說

書不盡言言不盡意然自古聖賢之意萬古得以推而求之者豈非
言之傳歟聖人之意所以存者得非書乎然則一無此字書不盡言
之煩而盡其要言不盡意之委曲而盡其理謂書不盡言言不盡意
者非深明之論也子謂繫辭非聖人之作初若可駭余爲此論迨今
二十五年矣稍稍以余言爲然也六經之傳天地之久其爲二十五
年者將無窮而不可以數計也子之言久當見信於人矣何必汲汲
較是非於一世哉

論樂說

清濁二聲一作音爲樂之本而今自以爲知樂者猶未能達此安得
言其細微之旨

六經簡要說

妙論精言不以多爲貴而人非聰明不能達其義余嘗聽人讀佛書
其數十萬言謂可數談一作言而盡而溺其說者以謂欲曉愚下人
故如此爾然則六經簡要愚下一有人字獨不得曉耶

余家多文忠公書然比其沒余於篋中得十數帖耳今劉君乃
能致此非篤好之不能也元豐二年正月初吉蘇轍子由題

此數十紙皆文忠公衝口而得信手而成初不加意者也其文
采字畫皆有自然絕人之姿信天下之奇蹟也元祐四年九月

十九日蘇軾書

試筆一卷

樂語 長短句

聖節五方老人祝壽文

東方老人

但其太山老叟東海真仙一有一字溜穿石而會究初終一有五字
松避雨而備知歲月羲氏定三百六日嘗守寅寅之官吏吾紀七十
二君盡觀登封之事遇安期而遺囊笑方朔之偷桃風入律而來自
巖前斗指春而光臨洞口昔漢武帝嘗懷三島之勝遊有羨門生欲
謁巨公於昭代今則紫庭降聖華渚開祥遠離朝日之方來展望雲
之懸千八百國咸歸至治之風億萬斯年共禱無疆之壽遙望天庭
敢進祝聖之頌

東海蓬萊第一仙遙瞻西北祝堯天願皇長似東君壽與物為春億
萬年

西方老人

但其秦川故老華岳幽人詢仙掌之遺蹤咸知始末戀蓮峯之絕頂
不記歲時激流玉乳之泉枕石雲陽之洞逍遙物外笑傲林間奉王
母之蟠桃嘗延漢帝指老聃之仙李永佑唐基掌中五色之丸世上
千年之壽欣逢聖代來至塵寰當洪河澄九曲之時是甲觀誕一人
之日祥麟遊於秦時天馬來於大宛景星見而朱草生瑞露降而赤
鳥集既遇無爲之化宜歌有道之君是以駕青牛而度函關指丹鳳
而趨魏闕唯願慶源流遠齊河海以無窮壽筭絲長等乾坤而不老
遙望天庭敢進祝聖之頌

華岳峯頭萬葉蓮開花今古世相傳願皇長似蓮峯久結實盤根不
記年

中央老人

但其棲心嵩極振迹伊川年高而可等松椿氣粹而嘗發芝朮洞裏

之煙霞不老壺中之日月偏長當聖主之盛時居天心之奧壤但見
璿璣運而寒暑正土圭測而陰陽和冠帶被於百蠻玉帛來於萬國
龍在沼而麟在藪河出圖而洛出書民躋壽域之中俗樂春臺之上
今則堯眉誕秀舜目開祥遠離王屋之間來入帝畿之內仰瞻天表
莫非嶽降之神上祝皇圖豈止山呼之歲遙望天庭敢進祝聖之頌
嵩高維嶽鎮中天王氣盤基降壽仙惟願吾皇等嵩嶽三靈齊祝一
作壽萬斯年

南方老人

但其託迹炎洲游神衡嶽非海濱之野叟迺星極之老人當火德爲
治之朝是離明繼照之日里社鳴而聖人出泰階正而王道平百蠻
向風重譯來貢屢觀豐年之上瑞故知百姓之懽心鼓腹而歌治世
之音安以樂曲肱而枕化國之日舒以長斯可謂唐虞之民又豈止
成康之俗今則流虹誕聖遶電開祥來趨北闕之前上祝南山之永
雲翔霧集既羅仙籍之班地久天長以禱皇家之祚遙望天庭敢進
祝聖之頌

南極星中一老人南山爲壽祝吾君願君永奏南薰曲當使淳音萬
國聞

北方老人

但其脩真北嶽常傾葵藿之心混俗幽都不避草茅之迹潛神自得
味道爲娛易水歌風會識荆軻於往歲燕山勒石親逢寶曆於當年
仙家之景物常春人世之光陰易老華表之鶴未久還來蓮葉之龜
於時屢見但處積陰之境每輪就日之誠望千呂之青雲慶流虹於
華渚當萬域來王之際是千齡誕聖之初是以歷沙漠而朝宗叩天
闕而祝頌惟願慶基不朽永齊金石之堅寶祚無疆更等山河之固
遙望天庭敢進祝聖之頌

北嶽神仙九轉丹特來北闕獻君前願將北極齊君壽萬國陶陶共

戴天

會老堂致語熙寧壬子趙康靖公自南京訪公於穎時呂正獻公爲守

某聞安車以適四方禮典雖存於往制命駕而之千里交情罕見於今人伏惟致政少師一德元臣三朝宿望挺立始終之節從容進退之宜謂青衫早並於俊遊白首各諧於歸老已釋軒裳之累却尋鷄黍之期遠無憚於川塗信不渝於風雨幸會北堂之學士方爲東道之主人遂令穎水之濱復見德星之聚里閭拭目覺陋巷以生光風義聳聞爲一時之盛事敢陳口號上贊清歡

欲知咸集繼荀陳請看當筵主與賓金馬玉堂三學士清風明月兩閑人紅芳已盡鶯猶轉青杏初嘗酒正醇美景難并良會少乘歡舉白莫辭頻

西湖念語

昔者王子猷之愛竹造門不問於主人陶淵明之臥輿遇酒便留於道士况西湖之勝槩擅東穎之佳名雖美景良辰固多於高會而清風明月幸屬於閑人並遊或結於良朋乘興有時而獨往鳴蛙暫聽安問屬官而屬私曲水臨流自可一觴而一詠至歡然而會意亦傍若於無人乃知偶來常勝於特來前言可信所有雖非子己有其得已多因讎舊閱之辭寫以新聲之調敢陳薄伎聊佐清歡

採桑子

輕舟短棹西湖好綠水逶迤芳草長堤隱隱笙歌處處隨 無風水面琉璃滑不覺船移微動漣漪驚起沙禽掠岸飛

二

春深雨過西湖好百卉爭妍蝶亂蜂喧晴日催花暖欲然 蘭橈畫舸悠悠去疑是神仙返照波間水闊風高颺管絃

三

畫船載酒西湖好急管繁絃玉盞催傳穩泛平波任醉眠 行雲却在行舟下空水澄鮮俯仰留連疑是湖中別有天

四

羣芳過後西湖好狼籍殘紅飛絮濛濛垂柳欄干盡日風 笙歌散盡遊人去始覺春空垂下簾櫳雙燕歸來細雨中

五

何人解賞西湖好佳景無時飛蓋相追貪向花間醉玉卮 誰知閑凭欄干處芳草斜暉水遠煙微一點滄洲白鷺飛

六

清明上巳西湖好滿目繁華爭道誰家綠柳朱輪走鈿車 遊人日暮相將去醒醉諠譁路轉堤斜直到城頭總是花

七

荷花开後西湖好載酒來時不用旌旗前後紅幢綠蓋隨 畫船撐入花深處香泛金卮煙雨微微一片笙歌醉裏歸

八

天容水色西湖好雲物俱鮮鷗鷺閑眠應慣尋常聽管絃 風清月白偏宜夜一片瓊田誰羨驂鸞人在舟中便是仙

九

殘霞夕照西湖好花塢蘋汀十頃波平野岸無人舟自橫 西南月上浮雲散軒檻涼生蓮芰香清水面風來酒面醒

十

平生爲愛西湖好來擁朱輪富貴浮雲俯仰流年二十春 歸來恰似遼東鶴城郭人民觸目皆新誰識當年舊主人

十一

畫樓鐘動君休唱往事無蹤聚散忽忽今日歡娛幾客同 去年綠

鬢今年白不覺衰容明月清風把酒何人憶謝公

十二

十年一別流光速白首相逢莫話衰翁但鬪樽前語笑同 勸君滿酌君須醉盡日從容畫鷁牽風即去朝天沃舜聰

十三

十年前是樽前客月白風清憂思凋零老去光陰速可驚 鬢華雖改心無改試把金觥舊曲重聽猶似當年醉裏聲

朝中措

平山欄檻倚晴空山色有無中手種堂前垂柳別來幾度春風 文章太守揮毫萬字一飲千鍾行樂直須年少樽前看取衰翁

歸自謔

何處笛深夜夢回情脈脈竹風簷雨寒牕隔 離人幾歲無消息今頭白不眠特地重相憶

二

春艷艷江上晚山三四點柳絲如剪花如染 香閨寂寂門半掩愁眉斂汨珠滴破胭脂臉

三

寒水碧水上何人吹玉笛扁舟遠送瀟湘客 蘆花千里霜月白傷行色來朝便是關山隔

長相思

蘋滿溪柳遠堤相送行人溪水西回時隴月低 煙霏霏風淒淒重倚朱門聽馬嘶寒鷗相對飛

二

深畫眉淺畫眉蟬鬢鬢雲滿衣陽臺行雨回 巫山高巫山低暮

兩蕭蕭郎不歸空房獨守時

三

花似伊柳似伊花柳青春人別離低頭雙淚垂 長江東長江西兩岸鶯鶯兩處飛相逢知幾時

四

深花枝淺花枝深淺花枝相並時花枝難似伊 玉如肌柳如眉愛著鶉黃金縷衣啼粧更爲誰

訴衷情眉意

清晨簾幕卷輕霜呵手試梅粧都緣自有離恨故畫作遠山長 思往事惜流芳易成傷擬歌先斂欲笑還顰最斷人腸

踏莎行

候館梅殘溪橋柳細草薰一作芳風暖搖征轡離愁漸遠漸無窮迢迢不斷如春水 一寸柔腸盈盈粉泪樓高莫近危欄倚平蕪盡處是春山行人更在春山外

二

雨霽風光春分天氣千花百卉爭明媚畫梁新燕一雙雙玉籠鸚鵡愁孤睡 薜荔依牆莓苔滿地青樓幾處歌聲麗暮然舊事上心來無言斂皺眉山翠

望江南

江南蝶斜日一雙雙身似何郎全傳粉心如韓壽愛偷香天賦與輕狂 微雨後薄趨趨颯煙光纔伴遊蜂來小院又隨飛絮過東牆長是爲花忙

減字木蘭花

留春不住燕老鶯慵無覓處說似殘春一老應無却少人 風和月

好辦得黃金須買笑愛惜芳時莫待無花空折枝

二

傷懷難抱天若有情天亦老此意如何細似輕絲渺似波 扁舟岸側楓葉荻花秋索索細想前歡須著人間比夢間

三

樓臺向曉淡月低雲天氣好翠幕風微宛轉梁州入破時 香生舞袂楚女腰肢天與細汗粉重勻酒後輕寒不著人

四

畫堂雅宴一抹朱絃初入遍慢撚輕籠玉指纖纖嫩刺葱 撥頭慳利怨月愁花無限意紅粉輕盈倚暖香檀曲未成

五

歌檀斂袂繚繞雕梁塵暗起柔潤清圓百琲明珠一綫穿 櫻唇玉齒天上仙音心下事留住行雲滿坐迷魂酒半醺

生查子

一

去年元夜時花市燈如晝月到柳梢頭人約黃昏後 今年元夜時月與燈依舊不見去年人泪滿春衫袖

二

含羞整翠鬢得意頻相顧鴈柱十三絃一一春鶯語 嬌雲容易飛夢斷知何處深院鎖黃昏陣陣芭蕉雨

瑞鷓鴣

楚王臺上一神仙眼色相看意已傳見了又休還似夢坐來雖近遠 如天 隴禽有恨猶能說江月無情也解圓更被春風送惆悵落花

飛絮兩翩翩

清商怨

關河愁思望處滿漸素秋向晚鴈過南雲行人回淚眼 雙鸞衾裯

悔展夜又承枕孤人遠夢未成歸梅花聞塞管

阮郎歸

一

東風臨水日銜山春來長是閑落花狼籍酒闌珊笙歌醉夢間 春睡覺晚粧殘無人整翠鬢留連花景惜朱顏黃昏獨倚欄

二

南園春早踏青時風和聞馬嘶青梅如豆柳如眉日長蝴蝶飛 花露重草煙低人家簾幕垂鞦韆慵困解羅衣畫梁雙燕棲

三

角聲吹斷隴梅枝孤窻月影低塞鴻無限欲驚飛城烏休夜啼 尋斷夢掩深閨行人去路迷門前楊柳綠陰齊何時聞馬嘶

四

劉郎何日是來時無心雲勝伊行雲猶解傍山屏郎行去不歸 強勻畫又芳菲春深輕薄衣桃花無語伴相思陰陰月上時

五

落花浮水樹臨池年前心眼期見來無事去還思而今花又飛 淺螺黛淡麝脂閑粧取次宜隔簾風雨閉門時此情風月知

近體樂府卷第一

近體樂府卷第二 集一百三十二

長短句

蝶戀花 一名鳳樓梧又名鶻踏枝

一
簾幕東風寒料峭雪裏香梅先報春來早紅蠟枝頭雙燕小金刀剪
綵呈纖巧 旋暖金爐薰蕙藻酒入橫波困不禁煩惱繡被五更春
睡好羅幃不覺紗窗曉

二

南鴈依稀回側陣雪霽牆陰迹覺蘭芽嫩中夜夢餘消酒困鐘香卷
穗燈生暈 急景流年都一瞬往事前懽未免繁方寸臘後花期知
漸近東風已作寒梅信

三

臘雪初銷梅蕊綻梅雪相和喜鵲穿花轉睡起夕陽迷醉眼新愁長
向東風亂 瘦覺玉肌羅帶緩紅杏梢頭二月春猶淺望極不來芳
信斷音書縱有爭如見

四

海棠雙來歸畫棟簾影無風花影頻移動半醉騰騰春睡重綠糝堆
枕香雲擁 翠被雙盤金縷鳳憶得前春有箇人人共花裏黃鸝時
一啣日斜驚起相思夢

五

面旋落花風蕩漾柳重煙深雪絮飛來往雨後輕寒猶未放春愁酒
病成惆悵 枕畔屏山圍碧浪翠被華燈夜夜空相向寂寞起來素
繡幌月明正在梨花上

六

六曲欄干侵碧樹楊柳風輕展盡黃金縷誰抱鈿箏移玉柱穿窳海
燕雙飛去 滿眼遊絲兼落絮紅杏開時一處清明雨濃睡覺來鶯

亂語驚殘好夢無尋處

七

遙夜亭皋閑信步乍過清明漸覺傷春暮數點雨聲風約住朦朧淡
月雲來去 桃杏一作李依倚香暗度誰上一作在鞦韆笑裏輕輕
語一寸相思千萬緒人間沒箇安排處

八

簾幕風輕雙語鸞午後醒來柳絮飛撩亂心事一春猶未見紅英落
盡青苔院 百尺朱樓閑倚遍薄雨濃雲抵死遮人面羌管不須吹
別怨無腸更爲新聲斷

九

庭院深深深幾許楊柳堆煙簾幕無重數玉勒雕鞍遊冶處樓高不
見章臺路 兩橫風狂三月暮門掩黃昏無計留春住泪眼問花花
不語亂紅飛過鞦韆去

十

永日環隄乘綵舫煙草蕭疎恰似晴江上水浸碧天風皺浪菱花荷
葉隨雙槳 紅粉佳人翻麗唱驚起鴛鴦兩兩飛相向且把金樽傾
美釀休思往事成惆悵

十一

越女採蓮秋水畔窄袖輕羅暗露雙金釧照影摘花花似面芳心只
共絲爭亂 瀾鵲灘頭風浪晚霧重煙輕不見來時伴隱隱歌聲歸
棹遠離愁引着江南岸

十二

水浸秋天風皺浪縹緲仙舟只似秋天上和露採蓮愁一餉看花卻
是啼粧樣 折得蓮莖絲未放蓮斷絲牽特地成惆悵歸棹莫隨花
蕩漾江頭有箇人相望

十三

梨葉初紅蟬韻歇銀漢風高玉管聲淒切枕乍涼涼銅漏徹誰教社
燕輕離別 草際蟲吟秋露結宿酒醒來不記歸時節多少衷腸猶
未說珠簾昨夜朦朧月

十四

獨倚危樓風細細望極離愁黯黯生天際草色山光殘照裏無人會
得凭欄意 也擬疎狂圖一醉對酒當歌強飲還無味衣帶漸寬都
不悔況伊銷得人憔悴

十五

簾下清歌簾外宴雖愛新聲不見如花面牙板數敲珠一串梁塵暗
落琉璃盞 桐樹花深孤鳳怨漸邊遙天不放行雲散坐上少年聽
未慣玉山將倒腸先斷

十六

誰道閑情拋棄久每到春來惆悵還依舊日日花前常病酒不辭鏡
裏朱顏瘦 河畔青蕪堤上柳爲問新愁何事年年有獨立小橋風
滿袖平林新月人歸後

十七

翠苑紅芳晴滿目綺席流鶯上下長相逐紫陌閑隨金轡驄馬蹄踏
遍春郊綠 一覺年華春夢促往事悠悠百種尋思足煙雨滿樓山
斷續人閑倚遍欄干曲

十八

小院深深門掩亞寂寞珠簾書閣重重下欲近禁煙微雨罷綠楊深
處軟鞭掛 傅粉狂遊猶未捨不念芳時眉黛無人畫薄倖未歸春
去也杏花零落香紅謝

十九

幾日行雲何處去忘了歸來不道春將暮百草千花寒食路香車繫
在誰家樹 淚眼倚樓頻獨語雙燕來時陌上相逢否撥亂春愁如

柳絮依依夢裏無尋處

二十

欲過清明煙雨細小檻臨窗點點殘花墜梁燕語多驚曉睡銀屏一
半堆香被 新歲風光如舊歲所恨征輪漸漸程迢遞縱有遠情難
寫寄何妨解有相思泪

二十一

畫閣歸來春又晚燕子雙飛柳軟桃花淺細雨滿木風滿院愁眉斂
盡無人見 獨倚欄干心緒亂芳草芊綿尙憶江南岸風月無情人
暗換舊遊如夢空腸斷

二十二

嘗愛西湖春色早臘雪方銷已見桃開小頃刻光陰都過了如今綠
暗紅英少 且趁餘花謀一笑況有笙歌豔態相縈繞老去風情應
不到憑君剩把芳樽倒

漁家傲

一派潏潏流碧漲新亭四面山相向翠竹嶺頭明月上迷俯仰月輪
正在泉中漾 更待高秋天氣爽菊花香裏開新釀酒美賓嘉真勝
賞紅粉唱山深分外歌聲響

二

十月小春梅藥綻紅爐畫閣新裝遍錦帳美人貪睡暖羞起晚玉壺
一夜冰漸滿 樓上四垂簾不卷天寒山色偏宜遠風急鷹行吹字
斷紅日短江天雪意雲撩亂

三與趙康靖公

四紀才名天下重三朝構廈爲梁棟定冊功成身退勇辭榮寵歸來
白首笙歌擁 顧我薄才無可用君恩近許歸田壠今日一觴難得
共聊對捧官奴爲我高歌送

四

暖日遲遲花裏人將紅粉爭花好花不能言惟解笑金壺倒花開
未老人年少 車馬九門來擾擾行人莫羨長安道丹禁漏聲衝鼓
報催昏曉長安城裏人先老

五

紅粉墻頭花幾樹落花片片和鶯絮墻外有樓花有主尋花去隔墻
遙見鞦韆侶 綠索紅旗雙綵柱行人只得偷回顧腸斷樓南金鎖
戶天欲暮流鶯飛到鞦韆處

六

妾本錢塘蘇小妹芙蓉花共門相對昨日爲逢青傘蓋慵不採今朝
陡覺凋零 愁倚畫樓無計奈亂紅飄過秋塘外料得明年秋色
在香可愛其如鏡裏花顏改

七

花底忽聞敲雨聲逡巡女伴來尋 一作相訪酒盞旋將荷葉當蓮舟
蕩時時盡裏生紅浪 花氣酒香清漸釀花腮酒面紅相向醉倚綠
陰眠一响驚起望船頭閣在沙灘上

八

葉有清風花有露葉籠花罩鴛鴦侶白錦頂絲紅錦羽蓮女妬鴛飛
不許長相聚 日脚沉紅天色暮青涼傘上微微雨早是水寒無宿
處須回步枉教雨裏分飛去

九

荷葉田田青照水孤舟挽在花陰底昨夜蕭蕭疎雨墜愁不寐朝來
又覺西風起 雨擺風搖金藥碎合歡枝上香房翠蓮子與人長廝
類無好意年年苦在中心裏

十

葉重如將青玉亞花輕疑是紅綃掛顏色清新香脫洒堪長價牡丹

怎得稱王者 兩筆露殘勻彩畫日爐風炭薰蘭麝天與多情絲一
把誰廝惹千條萬縷繫心下

十一

粉藥丹青描不得金針綫功難敵誰傍暗香輕採摘風淅淅船頭
觸散雙鸚鵡 夜雨染成天水碧朝陽借出胭脂色欲落又開人共
惜秋氣逼盤中已見新荷的

十二

幽鶯謾來窺品格雙魚豈解傳消息綠柄嫩香頻採摘心似織條條
不斷誰牽役 珠泪暗和清露滴羅衣染盡秋江色對面不言情脈
脈煙水隔無人說似長相憶

十三

楚國細腰元自瘦文君風臉誰描就日夜鼓聲催箭漏昏復晝紅顏
豈得長如舊 醉折嫩房紅藥嗅天絲不斷清香透卻傍小欄凝望
久風滿袖西池月上人歸後

十四

喜鶻填河仙浪淺雲軒早在星橋畔街鼓黃昏霞尾暗炎光斂金鈎
側倒天西面 一別經年今始見新歡往恨知何限天上佳期貪眷
戀良宵短人間不合催銀箭

十五

乞巧樓頭雲幔卷浮花催洗嚴粧面花上蛛絲尋得遍顰笑淺雙眸
望月牽紅綫 奕奕天河光不斷有人正在長生殿暗付金釵清夜
半千秋願年年此會長相見

十六

別恨長長歡計短疎鐘促漏真堪怨此會此情都未半星初轉鸞琴
鳳樂忽忽卷 河鼓無言西北盼香蛾有恨東南遠脈脈橫波珠泪
滿歸心亂離腸便逐星橋斷

十七

九日歡遊何處好黃花萬蕊雕欄遠通體清香無俗調天氣好煙滋
露結功多少 日脚清寒高下照寶釘密綴圓斜小落葉西園風嬾
嬾催秋老叢邊莫厭金樽倒

十八

青女霜前催得綻金鈿亂散枝頭偏落帽臺高開雅宴芳樽滿按花
吹在流霞面 桃李三春雖可羨鶯來蝶去芳心亂爭似仙潭秋水
岸香不斷年年自作茱萸伴

十九

露裏嬌黃風擺翠人間晚秀非無意仙格淡粧天與麗誰可比女真
裝束真相似 筵上佳人牽翠袂纖纖玉手按新藥美酒一杯花影
膩邀客醉紅瓊共作熏熏媚

二十

對酒當歌勞客勸惜花只惜年華晚寒豔冷香秋不管情春春凭欄
盡日愁無限 思抱芳期隨塞鴈悔無深意傳雙燕悵望一枝難寄
遠人不見樓頭望斷相思眼

玉樓春題上林後亭名木蘭花令

一

風遲日媚煙光好綠樹依依芳意早年華容易即凋零春色只宜長
恨少 池塘隱隱驚雷曉柳眼未開梅萼小樽前貪愛物華新不道
物新人漸老

二

西亭飲散清歌闋花外遲遲宮漏發塗金燭引紫駟嘶柳曲西頭歸
路別 佳期只恐幽期闊密贈殷勤衣上結翠屏魂夢莫相尋禁斷
六街清夜月

三

春山斂黛低歌扇暫解吳鉤登祖宴畫樓鐘動已魂銷何況馬嘶芳
草岸 青門柳色隨人遠望欲斷時腸已斷洛城春色待君來莫到
落花飛似霰

四

樽前擬把歸期說未語春容先慘咽人生自是有情癡此恨不關風
與月 離歌且莫翻新闋一曲能教腸寸結直須看盡洛城花始共
春風容易別

五

洛陽正值芳菲節穠豔清香相間發游絲有意苦相縈垂柳無端爭
贈別 杏花紅處青山缺山畔行人山下歇今宵誰肯遠相隨惟有
寂寥孤館月

六

殘春一夜狂風雨斷送紅飛花落樹人心花意待留春春色無情容
易去 高樓把酒愁獨語借問春歸何處所暮雲空闊不知音惟有
綠楊芳草路

七

常憶洛陽風景媚煙暖風和添酒味鶯啼宴席似留人花出牆頭如
有意 別來已隔千山翠望斷危樓斜日墜關心只爲牡丹紅一片
春愁來夢裏

八

池塘水綠春微暖記得玉真初見面從頭歌韻響錚鏦入破舞腰紅
亂旋 玉鈎簾下垂香臂醉後不知紅日晚當時共我賞花人點檢
如今無一半

九

兩翁相遇逢佳節正值柳綿飛似雪便須豪飲敵青春莫對新花羞
白髮 人生聚散如弦管老去風情尤惜別大家金盞倒垂蓮一任

西樓低曉月

十

西湖南北煙波闊風裏絲簧聲韻咽舞餘裙帶綠雙垂酒入香腮紅
一抹杯深不覺瑤璃滑貪看六么花十八明朝車馬各西東惆悵
畫橋風與月

十一

燕鴻過後春歸去細算浮生千萬緒來如春夢幾多時去似朝雲無
覓處聞琴解佩神仙侶挽斷羅衣留不住勸君莫作獨醒人爛醉
花間應有數

十二

蝶飛芳草花飛路把酒已嗟春色暮當時枝上落殘花今日水流何
處去樓前獨遠鳴蟬樹憶把芳條吹暖絮紅蓮綠艾亦芳菲不奈
金風兼玉露

十三

別後不知君遠近觸目淒涼多少悶漸行漸遠漸無書水關魚沉何
處問夜深風竹敲秋韻萬葉千聲皆是恨故敲單枕夢中尋夢又
不成燈又燼

十四

紅條約束瓊肌穩拍碎香檀催急袞隴頭嗚咽水聲繁葉下間關鶯
語近美人才子傳芳信明月清風傷別恨未知何處有知音常爲
此情留此恨

十五

檀槽碎響金絲撥露濕潯陽江上月不知商婦爲誰愁一曲行人留
夜發畫堂花月新聲別紅藥調長彈未徹暗將深意祝膠絃唯願
絃絃無斷絕

十六

春葱指甲輕擺撚五彩垂條雙袖卷雪香濃透紫槽胡語急隨紅
玉腕當頭一曲情何限入破鐙鏦金鳳戰百分芳酒祝長春再拜
斂容擡粉面

十七

金花盞面紅煙透舞急香茵隨步皺青春才子有新詞紅粉佳人重
勸酒也知自爲傷春瘦歸騎休教銀燭候擬將沉醉爲清歡無奈
醒來還感舊

十八

雪雲乍變春雲簇漸覺年華堪送目北枝梅蕊犯寒開南浦波紋如
酒綠芳菲次第還相續不奈情多無處足樽前百計得春歸莫爲
傷春歌黛蹙

十九柳

黃金弄色輕於粉濯濯春條如水嫩爲緣力薄未禁風不奈多嬌長
似困腰柔乍怯人相近眉小未知春有恨勸君着意惜芳菲莫待
行人攀折盡

二十

珠簾半下香銷印二月東風催柳信琵琶傍畔且尋思鸚鵡前頭休
借問鶯鴻過後生離恨紅日長時添酒困未知心在阿誰邊滿眼
泪珠言不盡

二十一

沉沉庭院鶯吟弄日暖煙和春氣重綠楊嬌眼爲誰回芳草深心空
自動倚欄無語傷離鳳一片風情無處用尋思還有舊家心蝴蝶
時時來役夢

二十二

去時梅萼初凝粉不覺小桃風力損梨花最晚又凋零何事歸期無
定準欄干倚遍重來凭淚粉偷將紅袖印蜘蛛喜鵲誤人多似此

無憑安足信

二十三

酒美春濃花世界得意人人千萬態莫教辜負豔陽天過了堆金何處買 已去少年無計奈且願芳心長恁在閑愁一點上心來筭得東風吹不解

二十四

湖邊柳外樓高處望斷雲山多少路欄干倚遍使人愁又是天涯初日暮 輕無管繫狂無數水畔花飛風裏絮算伊渾似薄情郎去便不來來便去

二十五

南園粉蝶能無數度翠穿紅來復去倡條冶葉恣留連飄蕩輕於花上絮 朱欄夜夜風兼露宿粉棲香無定所多情翻卻似無情贏得百花無限妬

二十六

江南三月春光老月落禽啼天未曉露和啼血染花紅恨過千家煙樹杪 雲垂玉枕屏山小夢欲成時驚覺了人心應不似伊心若解思歸歸合早

二十七

東風本是開花信及至花時風更緊吹開吹謝苦忽忽春意到頭無處問 把酒臨風千萬恨欲掃殘紅猶未忍夜來風雨轉離披滿眼淒涼愁不盡

二十八

陰陰樹色籠晴晝清淡園林春過後杏腮輕粉日催紅池面綠羅風卷皺 佳人向晚新粧就圓風歌喉珠欲溜當筵莫放酒杯遲樂事良辰難入手

二十九

芙蓉鬪暈燕支淺留着晚花開小宴畫船紅日晚風清柳色溪光晴照暖 美人爭勸梨花盞舞困玉腰裙縷慢莫交銀燭促歸期已祝斜陽休更晚

漁家傲

正月斗杓初轉勢金刀剪綵功夫異稱慶高堂歡幼稚看柳意偏從東面春風至 十四新蟾圓尚未樓前乍看紅燈試冰散綠池泉細細魚欲戲園林已是花天氣

同前

二月春耕昌杏密百花次第爭先出惟有海棠梨第一深淺拂天生紅粉真無匹 晝棟歸來巢未失雙雙款語伶仃飛乙留客醉花迎曉日金盞溢卻憂風雨飄零疾

同前

三月清明天婉婉晴川被禊歸來晚况是踏青來處遠猶不倦鞦韆別閉深庭院 更值牡丹開欲遍醉醺壓架清香散 誰解勸增眷戀東風回晚無情絆

同前

四月園林春去後深深密幄陰初茂折得花枝猶在手香滿袖葉間梅子青如豆 風雨時時添氣候成行新筍霜筠厚題就送春詩幾首聊對酒櫻桃色照銀盤溜

同前

五月榴花妖豔烘綠楊帶雨垂重五色新絲纏角粽金盤生綃畫扇盤雙鳳 正是浴蘭時節動菖蒲酒美清尊共葉裏黃鸝時一啣猶響髮等閑驚破紗窗夢

同前

六月炎天時雲雨行雲涌出奇峯露沼上嫩蓮腰束素風兼露梁王宮闕無煩暑 畏日亭亭殘照性傍簾乳燕雙飛去碧知敲冰傾玉

處朝與莫故人風快涼輕度

同前

七月新秋風露早渚蓮尚折庭梧老是處瓜華時節好金樽倒人間
綵縷爭祈巧萬葉敲聲涼乍到百蟲啼晚煙如掃箭漏初長天杳
杳人語悄那堪夜雨催清曉

同前

八月秋高風歷亂衰蘭敗芷紅蓮岸皓月十分光正滿清光畔年年
常願瓊筵看社近愁看歸去燕江天空闊雲容漫宋玉當時情不
淺成幽怨鄉關千里危腸斷

同前

九月霜秋秋已盡烘林敗葉紅相映惟有東籬黃菊感遺金粉人家
簾幕重陽近曉日陰陰晴未定授衣時節輕寒嫩新鴈一聲風又
勁雲欲凝鴈來應有吾鄉信

同前此篇已載本卷但數字不同

十月小春梅蕊綻紅爐晝閣新裝遍驚帳美人貪睡暖梳洗嬾玉壺
一夜輕淅滿樓上四垂簾不卷天寒山色偏宜遠風急鴈行吹字
斷紅日晚江天雪意雲撩亂

同前

十一月新陽排壽宴黃鐘應管添宮綫獵獵寒威雲不卷風頭轉時
看雪霰吹人面南至迎長知漏箭書雲紀候冰生研臘近探春春
尚遠閑庭院梅花落盡千千片

同前

十二月嚴凝天地閉莫嫌臺榭無花卉惟有酒能欺雪意增豪氣直
教耳熱笙歌沸隴上雕鞍惟疑數騎獵圍半合新霜裏霜重鼓聲
寒不起千人指馬前一鴈寒空墜

荆公嘗對客誦永叔小閣云五綵新絲纏角粽金盤送生綃畫扇

盤雙鳳曰三十年前見其全篇今才記三句乃永叔在李大尉端

愿席上所作十二月鼓子詞數問人求之不可得嗚呼荆公之沒

二紀余自永平幕召還過武陵始得於州將李君誼追恨荆公之

不獲見也誼太尉猶子也

年中秋日金陵

關其名

政和丙申冬余還自京師過歙州太守濠梁許君頌之席上見許

君舉荆公所記三句且云此詞才情有餘它人不能道也後十二

年建炎戊申偶得此本於長樂同官方君後四年辛亥紹興二月

朔自尤溪避盜宿龍爬以待二弟適無事謾錄於此吏部員外郎

朱松喬年

近體樂府卷第二

長短句

南歌子

鳳髻金泥帶龍紋玉掌梳走來窗下笑相扶愛道畫眉深淺入時無
弄筆俚人久描花試手初等閑妨了繡功夫笑問雙鴛鴦字怎生
書

御街行

天非華艷輕非霧來夜半天明去來如春夢不多時去似朝雲何處
乳鷄酒燕落星沉月就枕城頭鼓 參差漸辨西池樹朱閣斜欹戶
綠苔深徑少人行苔上屐痕無數遺香餘粉剩金閑枕天把多情賦
桃源憶故人一名虞美人影

一

梅梢弄粉香猶嫩欲寄江南春一作芳信別後寸腸繁 一作愁損說
與伊爭穩 小爐獨守寒灰燼忍泪低頭二字一作無言畫盡眉上
萬重新恨竟日無人問

二

鶯愁燕苦春歸去寂寂花飄紅雨碧草綠楊岐路況是長亭暮 少
年行客情難訴泣對東風無語日斷兩三煙樹翠隔江淹浦

臨江仙

一

柳外輕雷池上雨雨聲滴碎荷聲小樓西角斷虹明欄干倚處待得
月華生 燕子飛來窺畫棟玉鈎垂下簾旌涼波不動簾紋平水精
雙枕傍有墮釵橫

二

記得金鑾同唱第春風上國繁華如今薄宦老天涯十年岐路空負
曲江花 聞說閩山通閩苑樓高不見君家孤城寒日等閑斜離愁

難盡紅樹遠連霞

聖無憂

世路風波險十年一別須臾人生聚散長如此相見且懽娛 好酒
能消光景春風不染鬢鬢爲公一醉花前倒紅袖莫來扶

浪淘沙

把酒祝東風且共從容垂楊紫陌洛城東總是當時攜手處遊遍芳
叢 聚散苦匆匆忽此恨無窮今年花勝去年紅可惜明年花更好知
與誰同

二

花外倒金瓶飲散無慆柔桑蔽日柳迷條此地年時曾一醉還是春
朝 今日舉輕橈帆影飄飄長亭回首短亭遙過盡長亭人更遠特
地魂銷

三

五嶺麥秋殘荔子初丹絳紗囊裏水晶丸可惜天教生處遠不近長
安 往事憶開元妃子偏冷一從魂散馬嵬關只有紅塵無驛使滿
眼驪山

四

萬恨苦綿綿舊約前懽桃花溪畔柳陰間幾度日高春睡重繡戶深
關 樓外夕陽閑獨自憑欄一重水隔一重山水關山高人不見有
淚無言

五

今日北池遊漾漾輕舟波光嫩鸕柳條柔如此春來春又去白了人
頭 好妓好歌喉不醉難休勸君滿滿酌金甌縱使花時常病酒也
是風流

定風波

歐陽文忠全集 卷一百三十三

六九七

一
把酒花前欲問他對花何怪一作惜醉顏醺春到幾人能爛賞何況
無情風雨等閑多 艷樹香叢都幾許朝暮惜紅愁粉奈情何好是
金船浮玉浪相向十分深送一聲歌

二
把酒花前欲問伊忍嫌金盞負春時紅艷不能旬日看宜算須知開
謝只相隨 蝶去蝶來猶解戀難見回頭還是度年期莫候飲蘭花
已盡方信無人堪與補殘枝

三
把酒花前欲問公對花何事訴金鍾為問去年春甚處虛度鶯聲擦
亂一場空 今歲春來須愛惜難得須知花面不長紅待得酒醒君
不見千片不隨流水即隨風

四
把酒花前欲問君世間何計可留春縱使青春留得住虛語無情花
對有情人 任是好花須落去自古紅顏能得幾時新暗想浮生何
事好唯有清歌一曲倒金樽

五
過盡韶華一作光不可添小樓紅日下層簷春睡覺來情緒惡寂寞
楊花綠亂拂珠簾 早是閑愁依舊在無奈那堪更被宿醒兼把酒
送春惆悵甚長恁年年三月病厭厭

六
對酒追歡莫負青春光歸去可饒人昨日紅芳今綠樹已暮殘花飛
絮兩紛紛 粉面麗姝歌窈窕清妙樽前信任醉醺醺不是狂心貪
燕樂自覺年來白髮滿頭新

暮山溪
新正初破三五銀蟾滿纖手染香羅剪紅蓮滿城開遍樓臺上下歌

管咽春風駕香輪停寶馬只待金烏晚 帝城今夜羅綺誰為伴應
卜紫姑神問歸期相思望斷天涯情緒對酒且開顏春宵短春寒淺
莫待金杯暖

浣溪沙

一
雲曳香綿彩柱高絳旗風颭出花梢一梭紅帶往來拋 東素美人
差不打却嫌裙慢褪纖腰日斜深院影空搖

二
堤上遊人逐畫船拍堤春水四垂天綠楊樓外出鞦韆 白髮戴花
君莫笑六么催拍盞頻傳人生何處似樽前

三
湖上朱橋響畫輪溶溶春水浸春雲碧瑤璃滑淨無塵 當路遊絲
繁醉客隔花啼鳥喚行人日斜歸去奈何春

四
葉底青青杏子垂枝頭薄薄柳綿飛日高深院晚鶯啼 堪恨風流
成薄倖斷無消息道歸期托腮無語翠眉低

五
青杏園林煮酒香佳人初着薄羅裳柳絲搖曳燕飛忙 乍雨乍晴
花自落閑愁閑悶畫偏長為誰消瘦損容光

六
紅粉佳人白玉杯木蘭船穩棹歌催綠荷風裏笑聲來 細雨輕煙
籠草樹斜橋曲水遠樓臺夕陽高處畫屏開

七
翠袖嬌鬟舞石州兩行紅粉一時差新聲難逐管絃愁 白髮主人
年未老清時賢相望偏優一樽風月為公留

八

燈燼垂花月似霜薄簾映月兩交光酒釀紅粉自生香 雙手舞餘
拖翠袖一聲歌已酬金觴休回嬌眼斷人腸

九

十載相逢酒一卮故人纔見便開眉老來遊舊更同誰 浮世歌歡
真易失宦途離合信難期樽前莫惜醉如泥

御帶花

青春何處風光好帝里偏愛元夕萬里繒絲構一屏峯嶺半空金碧
寶藥銀缸耀絳幕龍虎騰擲沙堤遠雕輪繡轡爭走五王宅 雍容
熙熙作畫會樂府神姬海洞仙客拽香搖翠稱執手行歌錦街天陌
月淡寒輕漸向曉漏聲寂寂當年少狂心未已不醉怎歸得

虞美人

爐香晝永龍煙白風動金鸞額畫屏寒掩小山川睡容初起枕痕圓
墜花鈿 樓高不及煙霄半望盡相思眼艷陽剛愛恁愁人故生芳
草碧連雲怨王孫

鶴沖天

梅謝粉柳拖金香滿舊園林養花天氣半晴陰花好却愁深 花無
數愁無數花好却愁春去戴花持酒祝東風千萬莫匆匆

夜行船

憶昔西都懽縱自別後有誰能共伊川山水洛川花細尋思舊遊如
夢 今日相逢情愈重愁聞唱畫樓鐘動白髮天涯逢此景倒金樽
殢誰相送

二

滿眼東風飛絮催行色短亭春暮落花流水草連雲看看是斷腸南
浦 檀板未終人去去扁舟在綠楊深處手把金樽難爲別更那聽
亂鶯疎雨

洛陽春

紅紗未曉黃鸝語蕙爐銷蘭炷錦屏羅幕護春寒昨夜三更雨 繡
簾閉倚吹輕絮斂眉山無緒看花拭泪向歸鴻問來處逢郎否

一叢花此篇世傳張先子野詞

傷春懷遠幾時窮無物似情濃離愁正恁牽絲亂更南陌飛絮濛濛
歸騎漸遙征塵不斷何處認郎蹤 雙鴛池碧水溶溶南北小橋通
梯橫畫閣黃昏後又還是新月簾櫳沉恨細思不如桃李還解嫁春
風

雨中花

千古都門行路能使離歌聲苦送盡行人花殘春晚又到君東去
醉藉落花吹暖絮多少曲堤芳樹且攜手留連良辰美景留作相思
處

千秋歲

數聲鶉鴉又報芳菲歇惜春更把殘紅折雨輕風色暴梅子青時節
永豐柳無人盡日花飛雪 莫把絲絃撥怨極絃能說天不老情難
絕心似雙絲網終有千千結夜過也東窗未白殘燈滅

越溪春

三月十三寒食日春色遍天涯越溪園苑繁華地傍禁垣珠翠煙霞
紅粉牆頭軟艸影裏臨水人家 歸來晚駐香車銀箭透窗紗有時
三點兩點雨聲朱門柳細風斜沉麝不燒金鴨冷籠月照梨花

賀聖朝影

白雪梨花紅粉桃露華高垂楊慢舞綠絲條草如袍 風過小池輕
浪起似江皋千金莫惜買香醪且陶陶

洞天春

鶯啼綠樹聲早檻外殘紅未掃露點真珠遍芳草正簾幃清曉 鞦
韆宅院悄悄又是清明過了燕蝶輕狂柳絲撩亂春心多少

憶漢月

紅艷幾枝輕裊新被東風開了倚煙啼露爲誰嬌故惹蝶伶蜂惱
多情遊賞處留戀向綠叢千繞酒闌歡罷不成歸腸斷月斜春老

清平樂

一
雨晴煙晚綠水新池滿雙燕飛來垂柳院小閣書簾高捲 黃昏獨
倚朱欄西南初月眉彎砌下落花風起羅衣特地春寒

二

小庭春老碧砌紅萱草長憶小欄閑共攬攜手綠叢含笑 別來音
信全乖舊期前事堪猜門掩日斜人靜落花愁點青苔

應天長

一
一彎初月臨鸞鏡雲鬢鳳釵慵不整珠簾淨重樓迥惆悵落月風不
定 綠煙低柳徑何處轆轤金井昨夜更闌酒醒春愁勝却病

二

石城山下桃花綻宿雨初晴雲未散南去棹北飛鴈水闊山遙腸欲
斷 倚樓情緒懶惆悵春心無限燕度兼葭風晚欲歸愁滿面

三

綠槐陰裏黃鸝語深院無人日正午繡簾垂金鳳舞寂寞小屏香一
炷 碧雲凝合處空役夢魂來去昨夜綠窗風雨問君知也否

涼州令東堂石榴

翠樹芳條颯的的裙腰初染佳人攜手弄芳菲綠陰紅影共展雙紋
簾插花照影窺鸞鑑只恐芳容減不堪零落春晚青苔雨後深紅點
一去門閑掩重來却尋朱檻離離秋實弄輕霜嬌紅脈脈似見臙

脂臉人非事住眉空斂誰把佳期賺芳心只願長依舊春風更放明
年豔

南鄉子

一
翠密紅繁水國涼生未是寒雨打荷花珠不定輕翻冷潑鴛鴦錦翅
斑 盡日凭欄弄藥拈花子細看偷得夢蹄新鑄樣無端藏在紅房
艷粉間

二

雨後斜陽細細風來細細香風定波平花映水休藏照出輕盈半面
粧 路隔秋江蓮子深深隱翠房意在蓮心無問處難忘泪裏紅腮
不記行

鵲橋仙

月波清露煙容明淡靈漢舊期還至鵲迎橋路接天津映夾岸星榆
點綴 雲屏未卷仙鷄催曉腸斷去年情味多應天意不教長恁恐
把歡娛容易

芳草渡

梧桐落蓼花秋煙初冷兩纒收蕭條風物正堪愁人去後多少恨在
心頭 燕鴻遠羌笛悠悠渺渺澄波一片山如黛月如鉤笙歌散夢魂
斷倚高樓

珠簾捲暮雲愁垂楊暗鎖青樓煙雨濛濛如畫輕風吹旋收 香斷
錦屏新別人閑玉簾初秋多少舊懽新恨書杳杳夢悠悠

更漏子

風帶寒枝正好蘭蕙無端先老情悄悄夢依依離人殊未歸 寒羅
幕凭朱閣不獨堪悲搖落月東出鴈南飛誰家夜搗衣

摸魚兒

卷繡簾梧桐秋院落一雲雨添新綠對小池閑立殘粧淺向晚水紋
如縠凝遠目恨人去寂寂鳳枕孤難宿倚欄不足看燕拂風驚鶯蝶翻

露草兩兩長相逐 雙眉促可惜年華婉婉西風初弄庭菊況伊家
年少多情未已難拘束那堪更趁涼景追尋甚處垂楊曲佳期過盡
但不說歸來多應忘了雲屏去時祝

少年遊

一
去年秋晚此園中攜手翫芳叢拈花嗅藥惱煙擦霧拚醉倚西風
今年重對芳叢處追往事又成空敲遍欄干向人無語惆悵滿枝紅

二

肉紅圓樣淺心黃枝上巧如裝雨輕煙重無慘天氣啼破曉來粧
寒輕貼體風頭冷忍拋棄向秋光不會深心爲誰惆悵回面恨斜陽

三

玉壺冰瑩獸爐灰人起繡簾開春叢一夜六花開盡不待剪刀催
洛陽城闕中天起高下遍樓臺絮亂風輕拂鞍澹袖歸路似章街

行香子

舞雪歌雲閑淡粧勻藍溪水染輕裙酒香醺臉粉色生春更雅談話
好情性美精神 空江不斷凌波何處向越橋邊青柳朱門斷鐘殘
角又送黃昏奈眼中淚心中事意中人

鷓鴣天

學畫宮眉細細長芙蓉出水鬪新粧只知一笑能傾國不信相看有
斷腸

雙黃鸝兩鴛鴦迢迢雲水恨難忘早知今日長相憶不及從初莫作
雙

近體樂府卷第三

集古錄跋尾卷第一 集一百三十四

古敦銘毛伯敦 龔伯彝 伯庶父敦

右毛伯古敦銘嘉祐中原父以翰林侍讀學士出爲永興軍路安撫使其治在長安原父博學好古多藏古奇器物能讀古文一作之銘識考知其事蹟而長安秦漢故都時時發掘所得原父悉購而藏之以予方集錄古文故每有所得必模其銘文以見遺此敦原父得其蓋於扶風而有此銘原父爲子考按其事云史記武王克商尙父牽牲毛叔鄭奉明水則此銘謂鄭者毛叔鄭也銘稱伯者爵也史稱叔者字也敦乃武王時器也蓋余集錄最後得此銘當作錄目序時但有伯固銘吉日癸巳字最遠故言自周穆王以來敘已刻石始得斯一作此銘乃武王時器也其後二銘一得蓋屋曰龔伯尊彝其一亦得扶風曰伯庶父作舟姜尊敦皆不知爲何人也三器銘文皆完可識具列如左右真蹟

毛伯敦銘

惟二年正月初吉王在周昭宮丁亥王格于宣射毛伯入門位中庭右祝鄭王呼內史冊命鄭王曰鄭昔先王既命女作邑一字未詳五邑祝今余佳亂商乃命錫女赤芾同冕齊黃麻旂用事鄭拜稽首敢對揚天子休命鄭用作朕皇考龔伯尊敦鄭其壽萬年

釋文

惟二年正月初吉王在周昭宮丁亥王格于宣射毛伯入門位中庭右祝鄭王呼內史冊命鄭王曰鄭昔先王既命女作邑一字未詳五邑祝今余佳亂商乃命錫女赤芾同冕齊黃麻旂用事鄭拜稽首敢對揚天子休命鄭用作朕皇考龔伯尊敦鄭其壽萬年

無疆子子孫孫永寶用享薛尚功釋云惟二年正月初吉王在周邵宮丁亥王格于宣射毛伯內門立中廷佑祝鄭王呼內史冊命鄭王曰鄭昔先王既命汝作邑繼五邑祝今余惟禮京乃命錫汝赤芾彤冕齊黃麻旂用事鄭拜稽首敢對揚天子休命鄭用作朕皇考龔伯尊敦鄭其眉壽萬年無疆子子孫孫永寶用享

龔伯彝銘

龔伯彝銘
惟二月戊寅伯庶父作王姑舟姜尊敦其永寶用薛尚功釋舟爲周餘同上

釋文

屢作皇祖懿公文公武伯皇考龔伯尊彝屢其熙萬年無疆壽終壽始其子子孫孫永寶用享于宗室薛尚功釋云屢作皇祖益公文公武伯皇考龔伯尊彝屢其熙萬年無疆令終令其子子孫孫永寶用享于宗室

伯庶父敦銘

惟二月戊寅伯庶父作王姑舟姜尊敦其永寶用薛尚功釋舟爲周餘同上

釋文

惟二月戊寅伯庶父作王姑舟姜尊敦其永寶用薛尚功釋舟爲周餘同上

韓城鼎銘

惟二年正月初吉王在周昭宮丁亥王格于宣射毛伯入門位中庭右祝鄭王呼內史冊命鄭王曰鄭昔先王既命女作邑一字未詳五邑祝今余佳亂商乃命錫女赤芾同冕齊黃麻旂用事鄭拜稽首敢對揚天子休命鄭用作朕皇考龔伯尊敦鄭其壽萬年

雙阜園遊坊君子晉美申勸解昭贊畫山徑
突亟其老喪得申官用德吟吟與孫子三歲

皇粉

右原甫既得鼎韓城遺余以其銘而太常博士楊南仲能讀古文篆
籀爲余以今文寫之而闕其疑者原甫在長安所得古奇器物數十
種亦自爲先秦古器記原甫博學無所不通爲余釋其銘以今文而
與南仲時有不同故并著二家所解以俟博識君子具之如左右真
蹟

惟王九月乙亥晉姜曰余惟司朕先姑君晉邦余不○安寧巫離
明德宣○我猷用○所辭辟○○○剿虔不○○○巨龍我
萬民嘉遺我錫鹵賚千兩參儻文侯○○○○○征綏○○○堅
久吉金用作寶尊鼎用康履安懷遠邦君子晉姜用斬○○○慶壽
作惠○亟萬年無疆用德暖保其孫子三壽是利

右原父所寫如此

佳惟王九月乙亥晉姜曰余佳惟惟同司嗣朕先姑君晉邦余不不
敬今作省敬安寧巫經離離明德宣邢耶作帥我耐用雷房辟姬
疑即疑文光剝度不余疑遠字謔諸豐草享自帥賢我萬民乳
遣我涉疑易函或胃費千兩多儻文侯頤令畢疑畢讀爲貴
循通房征絲疑疑疑湯驪叔受久吉金用亡作寶傳傳鼎用康履疑
夏及爲疑裏越切君子晉姜用櫛讀爲祈綽縮寶讀爲眉畫當畫
象爲亟極萬季無疆疆用享享用德暖保其孫子三壽是利

料

右嘉祐己亥歲馮掖有得鼎韓城者摹其款識于石樂安公以南
仲職典書學命釋其字謹按其銘蓋多古文奇字古文自漢世知
者已稀字之傳者賈逵許慎輩多無其說蓋古之事物有不與後
世同者故不能盡通其作字之本意也其不傳者今或得於古器

無所依據難以臆斷大抵古字多省偏旁而趣簡易故佳司巫自
亼等字皆假借也鄭司農說周禮云古者書儀但爲義又云古者
立位同字古文春秋經公即位爲公即立者是也 取者進取也
从受故夏疑爲取食毋从女而象乳子形故姪疑爲母而難讀爲
餘 離用豈聲豈从尪古文作豈今此豈从水从呂故疑爲離
魯字古作表即旅字古文旅作𠂔而𠂔者字用𠂔爲聲蓋古文魯
旅者二字通用故譚疑爲諸 易者篆文象蜥易形故尹疑爲易
而讀爲錫爲賜皆以聲假借也函从函古西字中象鹽形買胃上
象胃中穀形故函胃二字 卑者从十在甲下十今但用左古者
尚右故十在甲下爲卑 故星疑爲卑亦恐借爲卑讀母音冠象穿
寶貨形貫字从之聿或即母字今毛詩有串夷字俗用爲串穿之
串而說文不載豈非聿字之省也故疑聿讀爲貫 通从之凡从
之千之字多通用故循疑爲通 古語二字相屬者多爲一字書
之若秦鍾銘有季小子秀四方之字是也函古西字故屢疑爲西
夏字秦鍾銘亦有此字 委字說文無之蓋古綏字省系余其後
相承讀如嬌故屢疑讀爲綏 於音偃石鼓文皆作爲古之旌旂
悉載於車故疑鞞即旂字而从車借讀爲祈近嘗有得敦藍田者
二銘皆有用鞞萬壽之文故知然也 釁今幡爲許刀而釁古之
釁音門用之爲聲詩鳧鷖 在釁又省爲釁易繫辭釁又讀如尾
釁門尾眉聲相近又古者字音多與今異徐鉉所謂如自亦音香
釁亦音門乃亦音仍它皆做此是也豈釁眉古亦同音歟秦鍾銘
亦有釁壽字故釁疑爲眉 爲者毋猴也从爪而象其形故衆爲
爲說呪字字書所無而於文執字爲允蓋用𠂔省聲也宅字不可
識者猶十一二與其偏旁之異者若𠂔𠂔𠂔之類皆今所不
傳以小篆參求之不能彷彿以今揆之其間或當時書者鑄器者
不必無謬誤矣姑盡淺學以塞公命云尔

嘉祐壬寅冬十月大常博士知國子監書學豫章楊南仲識

嘗觀石鼓文愛其古質物象形執有遺思焉及得原甫鼎器銘又知古之篆字或多或少或省或移之左右上下惟其意之所欲然亦有工拙秦漢以來裁歸一體故古文所見者止此惜哉治平甲辰正月蒲陽蔡襄

商雒鼎銘真蹟

右商雒鼎銘者原甫在長安時得之上雒其銘云惟十有四月既死霸王在下都離公誠作障鼎用追享于皇且考用氣慶壽萬年無疆子子孫孫永寶用離公不知為何人原甫謂古丁寧通用蓋古字簡略以意求之則得爾而蔡君謨謂十有四月者何原甫亦不能言也治平元年中伏日書

古器銘鐘銘二 缶器銘一 字疑非缶 甗銘二 寶敦

銘一

右古器銘六余嘗見其二曰甗也寶蘇鍾也大宗皇帝時長安民有耕地得此甗初無識者其狀下爲鼎三足上爲方甗中設銅筆可以開闔製作其精有銘在其側學士句中正工於篆籀能識其文曰甗也遂藏于秘閣余爲校勘時常閱于秘閣下景祐中脩大樂冶工給銅更鑄編鐘得古鐘有銘于腹因存而不毀即寶蘇鍾也余知大常禮院時嘗於太常寺按樂命工叩之與王朴夷則清聲合初王朴作編鐘皆不圓至李照等奉詔脩樂皆以朴鐘爲非及得寶蘇其狀正與朴鐘同乃知朴爲有法也嘉祐八年六月十八日書右真蹟

同前綴和鍾 寶盃 寶敦

右古器銘四尙書屯田員外郎楊南仲爲余讀之其一曰綏和林鐘其文磨滅不完而字有南仲不能識者其二曰寶盃其文完可讀曰伯玉般子作寶盃其萬斯年子子孫孫其永寶用其三其四皆曰寶敦其銘文亦同曰惟王四年八月丁亥散季肇作朕王母第姜寶敦

散季其萬年子子孫孫永寶蓋一敦而二銘余家集錄所藏古器銘多如此也治平元年七月十三日以服藥假家居書右真蹟

自余集錄古文所得三代器銘必問於楊南仲章友直暨集錄成書而南仲友直相繼以死古文奇字世罕識者而二代器銘亦不復得矣治平三年七月二十一有八年日一有以字孟饗攝事太廟齋宮書右真蹟

終南古敦銘

右終南古敦銘大理評事蘇軾爲鳳翔府判官得古器於終南山下其形制與今二禮圖所畫及人家所藏古敦皆不同初莫知爲敦也蓋其銘有寶簋敦之文遂以爲敦爾右集本

叔高父賁簋銘

叔高父賁簋銘

此蓋銘

此腹銘

右賁簋銘曰叔高父作賁簋其萬年子子孫孫永寶用原父在長安得此簋於扶風原甫曰簋容四升其形外方內圓而小壻之似龜有首有尾有足有甲有腹今禮家作簋亦外方內圓而其形如桶但於其蓋刻爲龜形一有爾字與原甫所得真古簋不同一有也字君謨以謂禮家傳其說不見其形制故名存實亡原甫所見可以正其繆也故并錄之以見君子之於學貴乎多見而博聞也治平元年六月二十日書右真蹟

周穆王刻石

右周穆王刻石曰吉日癸巳在今贊皇壇山上壇山在縣南十三里穆天子傳云穆天子登贊皇一有山字以望臨城置壇此山遂以爲名癸巳誌其日也圖經所載如此而又別有四望山者云是穆王所

爾嘉祐中原父在長安獲二古器於藍田形制皆同有蓋而上下有銘甚矣古人之爲慮遠也知夫物必有弊而百世之後埋沒零落幸其一在尙冀或傳爾不然何丁寧重複一作復若此之煩也詩六月之卒章曰侯誰在矣張仲孝友蓋周寧王時人也距今實千九百餘年而二器始復出原甫藏其器予錄其文蓋仲與吾二人者相期於二千年之間可謂遠矣方仲之作斯器也豈必期吾二人者哉蓋久而必有相得者物之常理爾是以君子之於道不汲汲而志常在於遠大也原甫在長安得古器數十作先秦古器記而張仲之器其銘文五十有一其可識者四十一具之如左其餘以俟博學君子

石鼓文

右石鼓文岐陽石鼓初不見稱於前世至唐人始感稱之而韋應物以爲周文王之鼓一有至字宣王刻詩一有爾字韓退之直以爲宣王之鼓在今鳳翔孔子廟中鼓有十先時散棄于野鄭餘慶置于廟而亡其一皇祐四年向傳師求於民間得之一有十鼓二字迺足其文可見者四百六十五一有磨滅二字不可識者過半余所集錄文之古者莫先於此然其可疑者三四今世所有漢桓靈時碑往往尙在其距今未及千歲大書深刻而磨滅者十猶八九此鼓按太史公年表自宣王共和元年至今嘉祐八年實千有九百一十四年鼓文細而刻淺理豈得存此其可疑者一也其字古而有法其言與雅頌同文而詩書所傳之外三代文章真蹟在者惟此而已然自漢已來博古好奇之士皆略而不道此其可疑者二也隋氏藏書最多其志所錄秦始皇刻石婆羅門外國書皆有而獨無石鼓遺近錄遠不宜如此此其可疑者三也前世傳記所載古遠奇怪之事類多虛誕而難信况傳記不載不知韋韓二君何據而知爲文宣之鼓也隋唐古今書籍粗備豈當時猶有所見而今不見之耶然退之好古不妄者余姑取以爲信爾至於字畫亦非史籀不能作也廬陵歐陽某記嘉

祐八年六月十日書右真蹟

秦度量銘

右秦度量銘二按顏氏家訓隋開皇二年之推與李德林見長安官庫中所藏秦鐵稱權傍有鑄銘二其文正與此二銘同之推因言司馬遷秦始皇帝本紀書丞相隗林當依此銘作隗狀遂錄二銘載之家訓余之得此二銘也迺在秘閣校理文同家同蜀人自言嘗遊長安買得一有此字二物其上刻二銘出以示余其一乃銅鑲不知爲何器其上有銘循環刻之乃前一銘也其一乃銅方版可三四寸許所刻乃後一銘也考其文與家訓所載正同然之推所見是鐵稱權而同所得乃二銅器余意秦時茲二銘刻於器物者非一也及後又於集賢校理陸經家得一銅版所刻與前一銘亦同益知其然也故並錄之云嘉祐八年七月十日書右真蹟

秦昭和鐘銘

右秦昭和鐘銘曰秦公曰不顯朕皇祖受天命奄有下國十有二公按史記秦本紀自非子邑秦而秦仲始爲大夫卒莊公立卒襄公文公寧公出公武公德公宣公成公穆公康公公桓公景公相次立太史公於本紀云襄公始列爲諸侯於諸侯年表則以秦仲爲始今據年表始秦仲則至康公爲十二公此鐘爲共公時作也據本紀自襄公始則至桓公爲十二公而銘鐘者當爲景公也故並列之以俟博識君子治平元年二月社前一日書右真蹟

秦祀巫咸神文一作秦誓文

右秦祀巫咸神文今流俗謂之詛楚文其言首述秦穆公與楚成王事遂及楚王熊相之罪按司馬遷史記世家自成王以後王各有熊夏夫熊適熊槐熊元而無熊相據文言穆公與成王盟好而後云倍十八世之詛盟今以世家考之自成王十八世爲頃襄王而頃襄王各橫不名熊相又以秦本紀與世家參較自楚平王娶婦於秦昭王

時吳伐楚而秦救之其後歷楚惠簡聲悼肅五王皆寂不與秦相接而宣王熊良夫時秦始侵楚至懷王熊槐頃襄王熊橫當秦惠文王及昭襄王時秦楚屢相攻伐則此文所載非懷王則頃襄王也而各皆不同又以十八世數之則當是頃襄然則相之名理不宜繆但史記或失之爾疑相傳寫為橫也右集本

之翠山秦篆遺文集本

右秦篆遺文纔二十一字曰於久遠也如後嗣焉成功威德臣去疾御史大夫臣德其文與嶧山碑泰山刻石二世詔語同而字畫皆異惟泰山為真李斯篆爾此遺者或云麻温故學士於登州海上得片木有此文豈杜甫所謂棗木傳刻肥失真者邪

秦泰山刻石一作書李斯篆後集本

右秦二世詔李斯篆天下之事固有出於不幸者矣苟有可以用於世者不必皆賢聖之作也蚩尤作五兵紂作漆器不以二人之惡而廢萬世之利也篆字二字一作小篆之法出於秦李斯斯之相秦焚棄典籍遂欲滅先王之法而獨以己之所作刻石而示萬世何哉十四字一作至己之所作則為萬世不可朽之計何其愚哉按史記秦始皇帝行幸天下凡六刻石及二世立又刻詔書于一作於其旁今皆亡矣獨泰山頂上二世一有此字詔僅在所一無二字存數十字爾今俗傳嶧山碑者史記不載又其字體差大六字一作其字特大不類泰山存者其本出於徐鉉一無此六字又有別本云一無此字出於夏竦家者以今市人所鬻校之無異一無此十一字自唐封演已言嶧山碑非真而杜甫直謂棗木傳刻爾皆不足貴也一無此五字余友江鄰幾一作休復謫官於秦待嘗自至泰山頂上視秦所刻石處云石頑不可鐫鑿不知當時何以刻也然而二字一作其四面皆一有石字無草木而野火不及故能若此之久一有也字然風雨所剝其存者纔此數十字一無此三字而已本鄰幾遺余也此今俗

傳嶧山碑本特為真者爾一無此十九字只作體復字鄰幾

秦嶧山刻石

右秦嶧山碑者始皇帝東巡羣臣頌德之辭至二世時丞相李斯始以刻石今嶧山實無此碑而人家多有傳者各有所自來昔徐鉉在江南以小篆馳名鄭文寶其門人也嘗受學於鉉亦見稱於一時此本文寶云是鉉所摸文寶又言嘗親至嶧山訪秦碑莫獲遂以鉉所摸刻石於長安世多傳之余家集錄別藏泰山李斯所書數十字尚存以較摸本則見真偽之相遠也治平元年六月立秋日右真蹟

同前一作秦二世詔

右鄰嶧山秦二世刻石以泰山所刻較之字之存者頗多而磨滅尤甚其趙嬰楊樛姓名以史記考之乃微可辨其文曰大夫趙嬰五大夫楊樛皇帝曰金石刻盡始皇帝所為也今襲號而金石刻凡二十九字多於泰山存者而泰山之石又滅威德二字其餘則同而嶧山字差小又不類泰山存者刻畫完好而附錄于一作於此者古物難得兼資博覽爾蓋集錄成書後八年得此于一作於青州而附之熙寧元年秋九月六日書右真蹟

前漢二器銘林華宮行鎰一蓮勺宮博山爐 歲月見本文

劉原父帖

近又獲一銅器刻其側云林華觀行鎰重一斤十四兩五鳳二年造第一今附墨本上呈

右林華宮行鎰銘一蓮勺宮銅博山爐下槃銘一皆漢五鳳中造林華宮漢書不載宣帝本紀云困於蓮勺鹵中注云縣也亦不云有宮蓋秦漢離宮別館不可勝數非因事見之則史家不能備載也余所集錄古文自周穆王以來莫不有之而獨無前漢時字求之久而不獲每以為恨嘉祐中友人劉原甫出為永興守長安秦漢故都多古物奇器埋沒於荒基敗冢往往為耕夫牧豎得之遂復傳於人間而

原甫又雅喜藏古器由此所獲頗多而以余方集古文故每以其銘刻爲遺既獲此二銘其後又得谷口銅甬銘乃甘露中造由是始有前漢時字以足余之所闕而大償其素願焉余所集錄既博而爲日滋久求之亦勞得於人者頗多而最後成余志者原甫也故特誌之嘉祐八年歲在癸卯七月二十日書石真蹟

前漢谷口銅甬銘歲月見本文

右漢谷口銅甬原父在長安時得之其前銘云谷口銅甬容十其下減兩字始元四年左馮翊造其後銘云谷口銅甬容十斗重四十斤甘露元年十月計掾章平左馮翊府下減一字原父以今權量校之容三斗重十五斤始元甘露皆宣帝年號一有也字余所集錄千卷前漢時文字惟此與林華行鎗蓮勺博山鑪盤銘爾治平元年六月九日書石真蹟

前漢屬足鎗銘此賦本與漢二器銘銅甬銘共爲一卷

裴如晦帖

煜頃嘗謂周秦東漢往往有銘傳於世間獨西漢無有王原叔言華州片瓦有元光字急使人購得之乃好事者所爲非漢字也待坐語及公亦謂家集所闕西漢字耳煜守丹陽日蘇氏者出古物有銅屬足鎗制作精巧因辨其刻則黃龍元年所造其言榮宮二史間未始概見遂摹之欲寄左右以爲集古錄之一事會悲苦不果昨偶開篋見之謹以上獻亦聞原甫於秦中得西漢數器不知文字與此類不煜再拜治平元年十二月十四日

後三年余出守亳社而裴如晦以疾卒于京師明年原甫卒于南都

二人皆年壯氣盛相次以歿而余獨歸然而存也熙寧壬子四月右真蹟

後漢西嶽華山廟碑歲月見本文

右漢西嶽華山廟碑文字尙完可讀其述自漢以來云高祖初興改

秦淫祀太宗承循各詔有司其山川在諸侯者以時祠之孝武皇帝脩封禪之禮巡省五嶽立宮其下宮曰集靈宮殿曰存僊殿門曰望僊門中宗之世使者持節歲一禱而三祠後不承前至於亡新濔用丘虛建武之元事舉其中禮從其省但使二千石歲時往祠自是以來百有餘年所立碑石文字磨滅延熹四年弘農太守袁逢脩廢起頓易碑飾闕會遷京兆尹孫府君到欽若嘉業遵而成之孫府君諱璆其大略如此所謂集靈宮者他書皆不見惟見此碑一有爾字則余之集錄不爲無益矣一無此十字治平元年閏五月十六日書右真蹟

後漢樊毅華嶽碑歲月見本文

右漢樊毅華嶽碑云泰華之山削成四方其高五千仞廣十里周禮職方氏華謂之西嶽祭視三公者以能興雲雨產萬物通精氣有益於人則祀之故帝舜受堯親自巡省暨夏殷周未之有改秦違其典璧遺鄗池二世以亡漢祖應運禮遵陶唐祭則獲福亦世克昌亡新滔逆鬼神不享建武之初慧掃頑凶光和二年有漢元舅五侯之胃謝陽之孫曰樊府君諱毅字仲德命守斯邦孟冬十月齋祠西嶽以傳窄狹不足處尊卑廟舍舊久墻屋傾亞特部行事荀班縣令先謙以漸補治此其事也又云功曹郭敏等遂刊玄石銘勒端勳其字畫頗完其文彬彬可喜惟以周禮職方氏爲識方氏其字畫分明非訛缺疑當時周禮之學自如此蓋識誌其義皆通也治平元年五月十日書石真蹟

同前

右漢樊毅脩華嶽廟碑云惟光和元年歲在戊午名曰咸池季冬己巳弘農太守河南樊君諱毅字仲德下車之初恭肅神祀西嶽至尊詔書奉祠躬親自往齋室逼窄法齋無所於是與令巴郡胸忍先謙圖議繕故二年正月己卯興就刻茲碑號更卒挾路據此碑乃即時

所立而太守生稱諱者何哉治平元年末伏日書右真蹟

後漢脩西嶽廟復民賦碑歲月見本文

右漢脩西嶽廟復民賦碑云光和二年十二月庚午朔十三日壬午弘農太守臣毅頓首死罪上尚書臣毅頓首頓首死罪死罪謹按文書臣以去年十一月到官其十二月奉祠西嶽華山省視廟舍及齋衣祭器率皆久遠有垢臣以神嶽至尊宜加恭肅輒遣行事荀班與華陰令先謙以漸繕治成就之又曰謙言縣當孔道加奉尊嶽一歲四祠養牲百日用穀糞三千餘斛或有請兩齋禱役費兼倍小民不堪有饑寒之窘違宗神之敬乞差諸賦復華下十里以內民租田口臣輒聽盡力奉宜詔書思惟惠利增異復上臣毅誠惶誠恐頓首頓首死罪死罪上尚書漢家制度今不復見惟余家集錄漢碑頗多故於磨滅之餘時見一二而此碑粗完故錄其首尾以傳臣毅者樊毅也右集本

後漢北嶽碑歲月見本文 集本

右漢北嶽碑文字殘滅尤甚莫詳其所載何事第其隱隱可見者曰光和四年以此知為漢碑爾其文斷續不可次序蓋多言珪幣牲酒黍稷豐穰等事似是禱賽之文其後有一人姓名偶可見云南陽冠軍馮巡字季祖甘陵夏方字伯陽其餘則莫可考矣

後漢無極山神廟碑歲月見本文

右漢無極山神廟碑文字磨滅斷續然尋繹次序其可見者尚可成文云太常臣耽承敏頓首上尚書謹按文書男子常山蓋高上黨范遷為元氏二公神山去年五月常山相巡詣山請兩山神即使高傳言白國縣即與封龍靈山無極山共與雲雨常山相巡元氏令王珣各以一白羊賽復使高與遷俱詣太常為無極山神索法食臣疑高遷言不實輒移本國今常山相巡書言郡督郵言無極山體可三里所立石為體長二丈五尺所山周匝二十餘里其二公封龍靈山皆

得法食乞令無極山比三山祠牲出王家以珪璧為信愚臣如巡言請少府給珪璧故事須報臣耽愚頓頓首頓首上尚書制曰可尚書令忠奏雒陽宮太常承書從事光和四年八月十七日丁酉尚書令忠下太常耽承敏下常山相其奏章如此其後遂言造廟事而有銘其文多不載按漢奏章首尾皆言臣某頓首頓首死罪死罪上尚書而此碑所載大常一有奏字章首尾不稱死罪而承敏又不稱臣莫曉其制碑後又刻常山官屬云常山相南陽馮巡字季祖元氏令王翊字元輔云治平元年四月二日書右真蹟

後漢桐柏廟碑歲月見本文

右漢桐柏廟碑磨滅雖不甚而文字斷續粗可考次蓋南陽太守脩廟碑也其辭云延熹六年正月乙酉南陽太守中山盧奴君奴下正闕一字當是其姓又云尊神敬祀立廟桐柏春秋崇祭災異告變水旱請求位比諸侯聖漢所尊一作宗太守奉祀二十餘年不復身至遣丞行事簡略不敬明神弗歆災害以生五嶽四瀆與天合德仲尼慎祭常若神在君準則大聖親之桐柏來見廟祠崎嶇逼狹開拓神門立闕四望增廣壇場又云執玉以沉為民祈福靈祇報祐天地清和其大意止於如此其後有頌亦可讀第不見太守姓名爾然不著他事惟修廟祀神爾桐柏淮瀆廟也治平元年六月十二日書右真蹟

後漢殺阬君神祠碑光和四年

右漢殺阬君神祠碑在鄭縣慶曆中樞密直學士施君為陝西都轉運使為余模此本云碑文已磨滅初不可辨以麩填其刻稍尋其點畫命工鑄治之乃可讀漢碑今在者類多磨滅不完故斯碑歷歷可見也惟裴肆姓各為鄉人鑿去矣殺阬所以畜洩水患據碑文云自亡新以來廢之則前漢時已有之矣光和中嘩為鄭縣令始修復之事見水經及華州圖經殺阬君祠今謂之五部神廟其像有石隄西

成樹谷五樓先生東臺御史王翦將軍皆莫曉其義施君名昌言今
爲涇原路安撫使右集本

集古錄跋尾卷第一

Blank space for the main text of the volume, consisting of multiple vertical columns.

後漢堯母碑歲月見本文

右漢堯母碑漢建寧五年造其文略曰堯母慶都感赤龍而生堯遂以侯伯快踐帝下有闕慶都僂沒蓋葬于茲欲人莫知名曰靈臺上立黃屋堯所奉祠三代改易荒廢不脩漢受濡期興滅繼絕如堯為之遂遭亡新禮祠絕矣故廷尉姓名磨滅不可讀矣深惟大漢堯之苗曹當脩堯祠追遠復舊前後奏上帝納其謀歲以春秋奉大牢祠時濟陰太守魏郡審晃成陽令博陵管遵各遣大掾輔助闕一字若經之營之不日成之此其大概也按皇覽云堯家在濟陰城陽呂氏春秋云堯葬穀林皇甫謐云穀林即城陽然自史記地志及水經諸書無堯母葬處惟見於此碑蓋亦葬城陽也而諸書俗本多為城陽獨此碑為成陽當以碑為正碑後列當時人名氏又云審晃字元讓管遵字君臺又云漢受濡期莫曉其義也右集本

後漢堯祠碑歲月見本文

右漢堯祠碑在濟陰碑云帝堯者蓋昔世之聖王也又曰聖漢龍興纂堯之緒祠以上犧至于王莽絕漢之業而壇場夷替屏懾真蹟一作攝無位大抵文字磨滅字雖可見而不復成文其後有云李樹連理生於堯祠太守河南張龍到官始初出錢二千敬致禮祠其餘不能一作可讀也碑後有年月蓋熹平四年建也治平元年五月晦日書右真蹟

後漢堯祠祈雨碑歲月見本文

右漢堯祠祈雨碑首尾殘滅其儘可識者有云股肱賢良廣祈多福虔虔夙夜又云常以甲子曰詔太常陳上古之禮舞先王之樂又云延熹十年仲春二月陽氣侵陰又云享祀羣神仰瞻雲漢又曰嘉樹優霑利茂萬物又云孟府君知堯精靈與神通神脩治大殿以此知為祈雨於堯祠也堯祠在漢濟陰郡孟府君者當是濟陰郡太守也

其餘隸字完者頗多亦往往成句但斷續不可次序爾右集本

後漢老子銘歲月見本文

右漢老子銘按桓帝本紀云延熹八年正月遣中常侍左官之苦縣祠老子至十一月又遣中常侍管霸祠之而此碑云八月夢見老子而祠之世言碑銘蔡邕作今檢邕集無此文皆不可知也右真蹟

後漢魯相置孔子廟卒史碑歲月見本文

右漢魯相置孔子廟卒史碑云司徒臣雄司空臣戒稽首言魯前相瑛書言詔書崇聖道孔子作春秋制孝經演易繫辭經緯天地故特立廟褒成侯四時來祠事已即去廟有禮器無常人掌領請置百石卒史一人典主守廟謹問太常祠曹掾馮牟卒史郭玄辭對故事辟雍祠先聖太宰太祝各一人備爵太常丞監祠河南尹給牛羊豕大司農給米臣愚以為如瑛言可許臣雄臣戒愚誠惶誠恐頓首頓首死罪死罪臣稽首以聞制曰可按漢書元嘉元年吳雄為司徒二年趙戒為司空即此云臣雄臣戒是也魯相瑛者據碑言姓乙字仲卿漢碑在者多磨滅此幸完可讀錄之以見漢制三公奏事如此與羣臣上尚書者小異也又見漢祠孔子其禮如此治平元年六月二十日書右真蹟

後漢脩孔子廟器碑一作表 歲月見本文

右漢一有朝字韓明府脩孔子廟器碑云永壽二年青龍二字一作歲在涪灘霜月之靈皇極之日永壽桓帝年號也按爾雅云歲在申曰涪灘桓帝永興三年正月戊申大赦改元永壽明年一有歲次二字丙申曰歲在涪灘是矣云霜月之靈皇極之日莫曉其義疑是九月五日而漢文章之威庶幾三代之純深自建武以後頓爾衰薄崔蔡之徒擅名當世然其筆力辭氣非出自自然與夫楊馬之言醇醜異味矣及其末也不勝其繁霜月皇極是何等語韓明府者各勅字叔節前世見於史傳未有各勅者豈自余學之不博乎春秋左氏傳載

古人命名之說不以爲名者頗多故以勅爲名者少也治平元年二月晦日書右真蹟

後漢魯相長孔子廟碑歲月見本文

漢魯相上尚書其略云建寧二年三月癸卯朔七日己酉魯相臣農長史臣謙頓首死罪上尚書臣農頓首頓首死罪死罪臣以元年到官行秋饗飲酒泮宮復禮孔子宅而無公出酒脯之祠臣輒依社稷出王家設春秋禮建寧靈帝年號也於此見漢制天子之尊其辭稱頓首而不敢斥至尊因尚書以致達而已余集錄漢碑頗多亦有章惠其磨滅獨斯碑首尾完備可見當時之制也又云孔子乾坤所挺西狩獲麟爲漢制作故孝經援神契曰玄丘制命帝卯行又尚書考靈耀曰丘生倉際觸期稽度爲赤制讖緯不經不待論而可知甚矣漢儒之狡陋也孔子作春秋豈區區爲漢而已哉治平元年三月廿五日書右真蹟

後漢碑陰題名歲月未詳

右漢碑陰題名不知爲何人碑余家集錄古文既多或失其所得之自然漢碑存於今者惟華嶽與孔子廟最多其陰往往列脩廟人姓名并記其所出錢數不過三百至五百今斯碑所題文字缺滅而中間有錢各五百四字則似是脩廟人所記其人可見者有濟陰定陶蔡顛子咸山陽金鄉張諺季德河南宛陵趙堂世萇南陽南鄉鄧升升遠濟陰成武周鳳季節而其餘人姓名邑里多不完又時時有故吏字不知爲何人祠廟第以漢隸難得錄之爾治平元年閏五月八日書右真蹟

同前

右漢碑陰題名不知爲何碑之陰蓋余家集錄既多而或失其所得之處又其文字磨滅莫可考究惟有錢各五百四字似是漢時脩廟人爾漢碑今在者惟華嶽與孔子廟中最多其碑陰題名者往往各

書所出錢數不過三百五百也而此碑所列邑里姓名字完可見者尚十餘人然皆是濟陰山陽彭城汝南陳留人則疑爲脩孔子廟人也今列于後覽者可以察焉濟陰定陶蔡顛子咸濟陰張翔季審陳留酸棗季真顯節山陽金鄉張諺季德河南宛陵趙堂世萇南陽南鄉鄧升升遠濟陰成武周鳳季節山陽昌邑田胤元算濟陰成武史楞世明彭城朱翔元舉右真蹟

同前

右漢碑陰題名二皆不知爲何碑陰其人各記所出錢數似是漢脩廟人題名余家集錄華嶽與孔子廟碑多如此亦疑是二廟中碑前碑殘滅尤甚第時有門生濟南東郡等字而姓名無復完者後碑則有議曹功曹騎吏有蓮勺左鄉有秩池陽左鄉有秩池陽集丞有秩皆不知是何名號又有關一字陽侯長役祠侯長則是縣吏之名其隸字不甚精又無事實可考姑錄其名號以俟知者爾右集本

後漢張公廟碑歲月見本文 真蹟

右漢張公廟碑在黎陽而碑無題首又其文字殘滅不可考究莫知爲何碑第時時得其字之可識而僅成文者曰惟和平元年正月丙寅和平桓帝年號以此知爲漢碑也又曰豐碑廟堂之前又曰於穆張公則又知爲張公廟碑矣又云國無災侵屢獲豐年作歌九章頌公德芳其辭有云公與守相駕蜚魚往來倏忽遠熹煥祐此兆民寧厥居其餘字畫尙完者甚多但不成文爾治平元年閏五月九日書是日奏事垂拱退召赴延和閣謝契丹禮物遂歸休

後漢公昉碑一作仙人唐君碑 歲月未詳

右漢公昉碑者乃漢中太守南陽郭芝爲公昉脩廟記也漢碑今在者類多磨滅而此記文字僅存可讀所謂公昉者初不載其姓名但云君字公昉爾又云耆老相傳以爲王莽居攝二年君爲郡吏啖瓜旁有真人一有居字左右莫察君獨進美瓜又從而敬禮之真人者

遂與期谷口山上乃與君神藥曰服藥以後當移意萬里知鳥獸言語是時府君去家七百餘里休謁往來轉景卽至闔郡驚焉白之府君徙爲御史一作吏鼠醫被具君乃畫地爲獄召鼠誅之視其腹中果有被具府君欲從學道頃無所進府君怒勅尉部吏收公昉妻子公昉呼其師告以厄其師以藥飲公昉妻子曰可去矣妻子戀家不忍去於是乃以藥塗屋柱飲牛馬六畜須臾有大風雲來迎公昉妻子屋宅六畜儻然與之俱去其說如此可以爲怪妄矣嗚呼自聖人沒而異端起戰國秦漢以來一作之際奇辭怪說紛然爭出不可勝數久而佛之徒來自西夷老之徒起於中國而二患交攻爲吾儒者往往牽而從之其卓然不惑者僅能自守而已欲排其說而黜之常患乎力不足也如公昉之事以語愚人豎子皆知其妄矣不待有力而後能破其惑也然彼漢人乃刻之金石以傳後世其意惟恐後世之不信然後世之人未必不從而惑也治平元年四月二十三日以早開宮寺祈雨五日中一日休務假書右真蹟

後漢析里橋郿閣頌歲月見本文

右漢析里橋郿閣頌建寧五年立云惟斯析里處漢之右溪源漂疾橫注于道涉秋霖澆稽滯商旅休謁往還常失日晷行理咨嗟郡縣所苦斯溪旣然郿閣尤甚臨深長淵二百餘丈接木相連號爲萬柱遭遇隕納人物俱隋一作隳沈沒洪淵烈爲禍於是太守阿陽李君諱會字伯都以建寧二年二月辛巳到官思惟惠利有以綏濟聞此爲難其日久矣乃俾府掾仇審改解危殆卽便求隱析里大橋於爾乃造又驛散關之嚙潔徙朝陽之平慘滅西高閣就安寧之石道禹導江河以靖四海經紀厥續艾康萬里乃作頌曰頌後又有詩皆磨滅不完其云遭遇隕納又云驛散關之嚙潔徙朝陽之平慘刻畫適完非其訛繆而莫詳其義疑當時人語與今異又疑漢人用字簡略假借不同爾故錄之以俟博識君子治平元年六月十日書右真蹟

蹟

後漢人關銘歲月未詳 真蹟

右漢人關銘二其一曰永樂少府賈君關其一曰雒陽令王君關二者皆不知爲何人按漢書桓帝母孝崇皇后居永樂宮和平元年詔置太僕少府如長樂故事又按顏師古注地理志曰魚豢真蹟誤作券云漢火行忌水故去洛水加佳師古謂光武以後始改爲雒然則二人者皆後漢時人也又按漢官儀長樂少府以宦者爲之則賈君者蓋亦宦者也治平元年九月十五日書

後漢文翁石柱記歲月見本文

右漢文翁石柱記云漢初平五年倉龍甲戌旻天季月脩舊築周公禮殿始自文翁開建洋宮據顏有意益州學館廟堂記云按一無此字華陽國志文翁爲蜀郡守造講堂作一無此字石室一名玉堂安帝永初間烈火爲災堂及寺舍並皆焚燎惟石室獨存至獻帝興平元年太守高朕於玉堂東復造一石室爲周公禮殿有意又謂獻帝無初平五年當是興平四字一作當如華陽志爲興平元年蓋時天下喪亂西蜀僻遠年號不通故仍稱舊號也今檢范曄漢書本紀初平五年正月改爲興平顏說是也治平元年六月十三日書右真蹟

後漢文翁學生題名

右漢文翁學生題名凡一百有八人文學祭酒典學從事各一人司儀主事各二人左生七十三人右生三十人文翁在蜀教學之盛爲漢稱首其弟子著籍者何止於此蓋其磨滅之餘所存者此爾治平元年六月二十日書右真蹟

後漢泰山都尉孔君碑歲月見本文

右漢泰山都尉孔君碑云君諱宙字季將二字一作季特孔子十九世之孫也年六十一延熹四年正月乙未以疾卒一有于家二字其序官闕甚簡又或殘滅不完但見其舉孝廉爲郎遷元城令遂爲泰

山都尉爾其辭有云躬忠恕以及人兼禹湯之罪己由人臣而引湯以爲比在今人於文爲不類蓋漢世近古簡質猶如此也治平元年閏五月二十一日書右真蹟

後漢孔宙碑陰題名

右漢孔宙碑陰題名漢世公卿多自教授聚徒常數百人其親授業者爲弟子轉相傳授者爲門生今宙碑殘缺其姓名邑里僅可見者纔六十二人其稱弟子者十人門生者四十二人故吏者八人故民者一人宙孔子十九世孫爲泰山都尉自有錄治平元年閏五月二十一日書右真蹟

後漢孔君碑歲月見本文 真蹟

右漢孔君碑其名字磨滅不可見而世次官闕粗可考云孔子十九代孫頴川君之元子也舉孝廉除郎中博昌長遭太守君憂服竟拜尚書侍郎治書御史博陵太守遷下邳相河東太守建寧四年十月卒其餘文字歷歷可讀以其斷絕處多文理難續故不復盡錄然其終始略可見矣惟其名字皆亡爲可惜也治平元年五月十日書

後漢孔德讓碑一作碣 歲月見本文

右漢孔德讓碑蓋其名已磨滅但云字德讓者宣尼公二十世孫都尉君之子也仕歷郡諸曹史年二十永興二年七月遭疾不祿碑在今兗州孔子墓林中永興孝桓帝年號也一有都尉者宙也五字其人二字一作德讓早卒無事蹟可考余集錄所藏一有獨關二字孔林中漢一無此字碑最後得此遂無遺者蓋以其文字簡少無事實故世人遺而不取獨余家有之也治平元年閏正月二十日書右真蹟

後漢劉寬碑中平二年

右漢大尉車騎將軍特進遂鄉二字一作封昭烈侯劉公碑公諱寬有兩碑皆在洛陽余家集錄皆得之其一故吏李謙所一作等立而

此碑門生殷包等所一無此字立其所書與李謙等一作碑所載不異惟漢隸難得當錄二字一作故錄之漢公卿一有卒字故吏門生各自立碑以伸感慕惟見於此今人家碑碣非其子孫則他人不爲立也治平元年六月十四日書右真蹟

後漢太尉劉寬碑同前

右漢大尉劉寬碑漢書有傳其官闕始卒與碑多同而傳載遷官次序頗略蓋史之所記善惡大事官次雖小略不足爲失惟其繆誤與闕其大節不可不正碑云大將軍以禮脅命拜侍御史遷梁令三府並用博士徵皆不就司隸校尉舉其有道公車徵拜議郎司徒長史而傳但云大將軍辟五遷司徒長史今據碑止四遷爾博士未嘗拜也碑於長史下遂云入登侍中延熹八年地震有詔詢異而拜尚書遷南陽太守拜太中大夫復拜侍中屯騎尉宗正光祿勳遂授大尉傳至太中大夫始云遷侍中其前自長史入登侍中史闕書也碑又云固疾遜位拜光祿大夫遷衛尉復作大尉而傳云以日食免拜衛尉以日食免當從傳爲正而不書光祿大夫史闕也其餘皆同故不復錄右集本

後漢大尉劉寬碑陰題名歲月見本文

右漢大尉劉寬碑陰題名寬碑有二其故吏門生各立其一也此題名在故吏所立之碑陰其別列於後者在寬子松之碑陰也寬以漢中平二年卒至唐咸亨元年其裔孫湖一作胡城公爽以碑歲久皆仆于野爲再立之并記其世序嗚呼前世士大夫世家著之譜牒故自中平至咸亨四百餘年而爽能知其世次如此之詳也蓋自黃帝以來子孫分國受姓歷堯舜三代數千歲間詩書所記皆一有各字有次序豈非譜繫源流傳之百世而一無此字不絕數此古人所以爲重也不然則士生於世皆莫自知其所出而昧其世德遠近其所以異於禽獸者僅能識其父祖爾其可忽哉唐世譜牒尤備士大夫

務以世家相高至其弊也或陷輕薄婚姻附託邀求貨賂君子患之然而士子脩飭喜自樹立競競惟恐墜其世業亦以有譜牒而能知其世也今之譜學亡矣雖名臣巨族未嘗有家譜者然而俗習苟簡廢失者非一豈止家譜而已哉嘉祐八年七月二十九日書右真蹟

後漢楊震碑歲月未詳

右漢楊震碑首題云漢故太尉楊公神道碑銘文字殘缺首尾不完其可見而僅成文者云聖漢龍興神祇降祉乃生於公又云窮神知變與聖同符鴻漸衡一作于門羣英雲集又云貽我三魚以章懿德又云大將軍辟舉茂材除襄城令遷荊州刺史東萊涿郡太守又云司徒太尉立朝正色恪勤竭忠其餘字存者多而不復成文矣治平元年六月十日書右真蹟

後漢楊震碑陰題名真蹟

右漢楊震碑陰題名者一百九十人其餘磨滅不完者又十餘人余家所錄漢碑陰題名頗多或稱故吏門生弟子或稱從事曹掾之類其人皆著州縣邑里名字甚詳獨此碑所書簡略直云河間賈伯錡博陵劉顯祖之類凡百九十人者皆然疑其所書皆是字爾蓋後漢時人見於史傳者未嘗有名兩字者也漢隸世所難得幸而在者多殘滅不完獨此碑刻畫完具而隸法尤精妙甚可喜也治平元年中伏日書

後漢沛相楊君碑歲月見本文 真蹟

右漢沛相楊君碑在閿鄉楊震墓側碑首尾不完失其名字按後漢書震及中子秉秉子賜賜子彪皆有傳又云震長子牧富波相牧孫奇侍中奇子亮陽成亭侯又云少子奉季子敷敷子衆務亭侯又有彪彪子脩楊氏子孫載于史傳者止此爾不知沛相爲何人也碑云孝順皇帝西巡以掾史召見拜郎中遷常山長史換犍爲府丞宰司累辟應于司徒州察茂才遷綱陽侯相後拜議郎五官中郎將沛相

年五十六建寧元年六月癸丑遵疾而卒其終始尙可見而惜其名字亡矣治平元年六月十日書

後漢繁陽令楊君碑熹平中

右漢繁陽令楊君碑首尾不完文字磨滅可識者四百三十字不可識者六十一字碑云君遭叔父大尉薨委榮輕舉吏民攀轅守闕上書運穀萬斛助官賑貧以乞君還又云一作君富波君之子按漢書楊震子牧爲富波相君迺牧子也叔父太尉者秉也出米乞令前史所無惜其名字磨滅不可見矣嘉祐八年十月廿三日書右真蹟

後漢高陽令楊君碑歲月未詳

右漢高陽令楊君碑首尾不完而文字尙可識云司隸從事定賴侯相最後爲善侯相善上一字磨滅不可見蓋其中間嘗爲高陽令而碑首不書最後官者不詳其義也按楊震碑高陽令著震孫也今碑在震墓側一有也字 真蹟

後漢楊君碑陰題名真蹟

右漢楊君碑陰題名首尾不完今可見者四十餘人楊震子孫葬閿鄉者數世碑多殘缺此不知爲何人碑陰其後有云右後公門生又云右沛二字集本作後史君門生沛君疑是沛相者自有碑而亡其名字矣後公亦不知爲何人也治平元年六月十日書

同前真蹟

右漢楊君碑陰題名凡一百三十一人有稱故吏者故民者處士者故功曹史者故門下佐者類例不一似當時人各隨意書之而文字磨滅僅可讀其姓名皆俱完可識者八十三人其餘或在或亡蓋後漢楊震墓域中碑也楊氏墓在閿鄉有碑數片皆漢世所立余家集錄得其四震及沛相繁陽高陽令碑并得碑陰題名然一有帶字得時參錯不知爲何碑之陰也其各氏可見者當時皆無所稱述顧其人亦不足究考第以漢隸真蹟金石所傳者至今類多磨滅可惜故

錄之爾治平元年三月晦日書

後漢碑陰題名

右漢碑陰題名在闕鄉楊震墓側文字磨滅不復可考其僅可見者曰侯長汾陰趙遺子宣侯上滅一字又曰故督郵曹史縣功曹鄉部吏柏昱等人名鄉上又滅一字又曰西鄉亭長柏昱子政又曰鄉亭長翟國相如鄉上又滅一字又曰麟都亭長陰定安定谷口亭長方丈雅方上又滅一字東門亭長梁忠子孝四望亭長吳鴻子名麟武亭長常壽君宜其餘缺裂不完蓋楊氏子孫當時皆闕鄉碑碣往往磨滅此不知為誰碑也治平五年五月廿日謝雨致齋于太社書右真蹟

後漢楊公碑陰題名真蹟

右漢楊公碑陰題名楊氏世葬闕鄉墓側皆有碑今其存者四余家集錄皆得之乃太尉沛相高陽繁陽令也此碑陰者不知為何人碑文字殘缺其僅存者十五人又滅其一其在者十四人曰懷陵圍令相蔣禧字武仲宜祿長蕭劉瑞字仲祐孝廉杆秋劉旭字子明太官日丞謙曹臻字建國辭曹史鄆公孫銀字山根門下書佐史韓純字子敬豐畢珮字廣世鄆孟縱字河維決曹書佐鄆公孫暘字元暘皆稱故吏又有故吏一無二字贊陳俊字仲顯斬夏陽字儀公斬兒銀字伯玉杆秋劉順字子選沛周儀字帛民凡五人皆不著職一有但稱故吏四字而孟縱字河維周儀字帛民文字皆完非訛謬而莫曉其義也治平元年六月十四日書

後漢殘碑陰歲月未詳

右漢殘碑陰前後二字一作亦磨滅不知為何人碑其知為漢碑者蓋其隸字非漢人莫能為也其字僅可見者尙數十而姓名完者九人曰王伯鄉趙仲方賈元周王景陽賈元輔宗石處王仲宣馬安國王通國皆無官號邑里莫知為何人惟漢隸在者少為難得故錄之

治平元年五月十八日書右真蹟

後漢朔方太守碑陰歲月見本文

右漢朔方太守碑陰題名一無此字云永壽二年朔方太守上郡仇君察察下滅一字除郎中大曲長大下又滅一字延熹四年九月乙酉詔書遷衙令五年正月到官奉見明府見下又滅一字立祠刊石表章大聖之遺靈永示來世之未一作未未下又滅一字謹出錢千下又滅兩字者下行因紀姓名一無七字據此乃當時脩廟出錢人爾今其姓名往往可見云衙鄉三老時勤伯秋上官鳳季方錄事史楊禹孟布衙主記掾楊綬子長門下功曹裴篤伯安倉曹掾任就子優又有集曹掾軍一作召假司馬之類名字多不完其所出錢不過三百至五百蓋漢世物輕幣重今華嶽孔子廟碑陰所列亦皆如此其所立祠蓋不知為何廟也治平元年夏至日書右真蹟

後漢劉曜碑一有並陰二字 歲月未詳 真蹟

右漢劉曜碑在今鄆州界中文字磨滅僅有存者云諱曜字季尼年七十二其餘爵里官閥卒葬歲月皆不可見字為漢隸亦不甚工惟其銘云天臨大漢錫以明哲碑首題云漢故光祿勳東平無鹽劉府君之碑以此知為漢碑也治平元年四月一日書

後漢北海相景君銘歲月見本文

右漢北海相景君銘其碑首題云漢故益州太守北海相景君銘其餘文字雖往往可讀而漫滅多不成文故君之名氏邑里官閥皆不可考一作見其可見者云惟漢安二年北海相任城府君卒城下一字不可識當為景也漢功臣景丹封櫟陽侯傳子尚尚傳子苞苞傳子臨以無嗣絕安帝永初中鄧太后詔封苞弟據為監亭侯以續丹後自是而後史不復書而他景氏亦無顯者漢安順帝年號也君卒于順帝時蓋與據同時人也碑銘有云不永慶壽余家集錄三代古器銘有云眉壽者皆為慶蓋古字簡少通用至漢猶然也治平元年

四月二十九日書右真蹟

後漢謁者景君碑

右漢景君碑尤磨滅惟謁者任城景君數字尙完其餘班班可見者皆不能成文故其年世壽考功行卒薨莫可考也蓋漢隸今尤難得其磨滅之餘可惜爾右集本

後漢景君石郭銘

右景君石郭銘者余既得前景君碑又得此銘皆在任城不知一景君乎將任城景氏之族多耶文字磨滅不可考故附于此熙寧三年正月朔旦山齋記右真蹟

後漢袁良碑歲月見本文

右漢袁良碑云君諱良字卿卿上一字磨滅陳國扶樂人也厥先舜苗世爲封君周興虞闕父自此而滅又云滿爲陳侯至玄孫濩塗以字立姓曰袁自此又滅又云當秦之亂隱居河洛高祖破項實從其冊天下既定還宅扶樂蓋不知爲何人也又云孝武征和三年曾孫斬賊先勇拜黃門郎曾孫滅其名賊下亦一作又滅一字又曰封關內侯食遺鄉六百戶薨子經嗣經薨子山嗣傳國二世至王莽而絕君卽山之曾孫也舉孝廉郎中謁者將作大匠丞相令廣陵太守討江賊張路等威震徐方謝病歸家孝順初初下數字滅一作滅數字又云府舉君拜議郎符節令其後又云永建六年二月卒其碑首題云漢故國二老袁君碑而碑文有使者持節安車又有几杖之尊祖割之養君實饗之之語以此知良嘗爲二老矣其餘磨滅雖時時可讀而不能次第也又云帝御九龍殿引對飲宴九龍殿名惟見於此治平元年五月二十九日夏至假書右真蹟

後漢張平子墓銘永和四年

右漢張平子墓銘世傳崔子玉撰并書按范曄漢書張衡傳贊云崔子玉謂衡數術窮天地制作侔造化此銘有之四字一作今銘有此

語則真子玉作也其刻石爲二本一在南陽一在向城天聖中有右

班殿直趙球者知南陽縣事因治縣署毀馬臺得一石有文驗之迺斯銘也遂龜于聽事之壁其文至凡百君子而止其後一有半字亡矣其在向城者今尙書屯田員外郎謝景初得其半於向城之野自凡百君子已上則亡矣三字一作其前半亡矣今以二本相補續其文遂復完而闕其最後四字然則昔人爲二本者不爲無意矣據徐方回所記二十一字迺趙球所得南陽石之亡者二十一字一作唐寶應中有徐方回者別得二十一字云是銘最後文疑求所得南陽石之半亡者爾今不復見則又亡矣惜哉嘉祐八年歲在癸卯十月十八日書右真蹟

集古錄跋尾卷第二

集古錄跋尾卷第三 集一百二十六

後漢費鳳碑歲月見本文

右漢費鳳碑云集本有君諱鳳三字字伯蕭梁相之元子也集本無也字漢安二年舉孝廉拜郎中除陳國新平長又云試守故障長其文班班可見而卒年壽皆不載其後悉為五言韻語其略曰不悟集本作語奄忽終藏形而匿景集本作影耕夫釋耒耜桑女投鉤宮道阻而且長起坐淚如雨其文既非工故不悉錄入字集本作文字工拙古今皆然惟漢隸難得故錄爾熙寧二年十一月十六日山齋書右真蹟略曰一作云

後漢武班碑歲月見本文

右漢班碑者蓋其字畫殘滅不復成文其氏族州里官闕卒葬皆不可見其僅見者曰君諱班爾其首書云建元年太歲在丁亥而建下一字不可識以漢書考之後漢自光武至獻帝以建各元者七謂建武建初建光建康建和建寧建安也以歷推之歲在丁亥乃章帝章和元年後六十一年桓帝即位之明年改本初二年為建和元年又歲在丁亥則此碑所缺一字當為和字真蹟無此大字迺建和元年也碑文缺滅者十八九惟亡者多而存者少尤為可惜也故錄之治平元年四月二十日書右集本

後得別本模榻粗明始辨其一二云武君諱班乃易去前本熙寧二年九月朔日記

後漢中常侍費亭侯曹騰碑歲月見本文 真蹟

右漢中常侍費亭侯曹騰碑文字磨滅其粗可見者云維建和元年七月二十二日己巳皇帝若曰其遺費亭侯之國其餘不可識也建和桓帝即位之元年也後二十七年獻帝中平元年騰養子操始為騎都尉集本有領兵二字擊黃巾矣治平元年六月十日書

後漢司隸楊君碑歲月見本文

歐陽文忠全集 卷一百二十六

右漢司隸校尉楊厥碑云惟以靈定位川澤攸同澤有所注川有所通余谷之川其澤南隆八方所達益城為充高祖受命興於漢中道由子午出散入秦建定帝位以漢詆焉後以子午塗路澀難更隨園谷復通堂光凡此四道塹高尤艱至於永平其有四年詔書開余鑿通石門中遭元二西夷處殘橋梁斷絕子谷復循於是故司隸校尉健為武陽楊厥字孟文深執忠伉數上奏請廢子由斯得其度經至建和二年漢中太守王升字稚紀嘉君明知美其仁賢勸石頌德以明厥勳其辭大略如此其刻畫尚完可讀大抵述厥脩復斜谷路爾但其用字簡省復多舛繆惟以公為坤以余為斜漢人皆爾獨詆字未詳永平明帝建和桓帝年號也右集本

後漢樊常侍碑歲月見本文

右漢樊常侍碑云君諱安字子佑南陽湖陽人也君幼學治韓詩論語孝經歷中黃門拜小黃門小黃門右史遷藏府令中常侍年五十六有六承壽四年四月甲辰卒其先為中黃門後為小黃門又為小黃門右史蓋漢官之制今不詳其次序也余少家漢東天聖四年舉進士赴尚書禮部道出湖陽一本作周見此碑立道左下馬讀之徘徊碑下者久之後三十年始得而入集錄蓋初不見錄於出自子集錄古文時人稍稍知為可貴自此古碑漸見收采也右集本

後漢郎中鄭固碑固一本作宜 歲月見本文 集本

右漢郎中鄭固碑文字磨滅其官闕卒葬年月皆莫可考其僅可見者云君諱固字伯堅孝友著于閭閻至行立乎鄉黨初授業於歐陽住郡諸曹掾史主簿督郵五官掾功曹又曰忠以衛上清以自脩其餘殘缺不復成文又云延熹元年二月詔拜而不見其官惟其碑首題云漢故郎中鄭君之碑以此知其官至郎中爾漢隸刻石存於今者少惟余以集錄之勤所得為獨多然類多殘缺一作滅不完蓋其難得而可喜者其零落之餘尤為可惜也延熹元年二月之下一本

云詔拜郎中非其好也以疾錮辭年四十二遭命殞身而中間又有
遺遺遺讓之語適嘗作循錮嘗作固疑漢人用字多假借又疑以疾
錮辭謂疾已堅固若云以疾篤辭覽者詳之

後漢田君碑歲月見本文 真蹟

右漢田君碑今在沂州其名字皆已磨滅惟云其先出自帝舜之苗
裔自完適齊因為氏乃知為姓田爾又云周秦之際家於東平陽
君總角倚韓詩京氏易真蹟作易京氏究洞神變窮奧極微為五官
掾功曹州從事辟太尉延熹二年辛亥詔書泰山瑯琊盜賊未息州
郡吏有仁惠公清撥煩整化者試守滿歲為真州言各時牧劉君知
君宿操表上試守費自此以後殘缺不可次第而隱隱可見蓋無年
壽卒堊月日而有故吏薛咸等立石勒銘之語乃費縣令長德政去
思碑爾治平元年六月二十九日書

後漢孫叔敖碑延熹二年

右漢孫叔敖碑云名鏡字叔敖而史記不著其名而見於他書者亦
皆曰叔敖 而已微斯碑後世遂不復知其名鏡也此集本無此
字碑世亦集本作所罕傳余以集錄二十年間求之博且勤乃得之
然則世之未見此碑者猶不知為名鏡也謂余集古為無益可乎集
本無此九字 右真蹟

後漢王元賞碑歲月見本文

右漢王元賞碑云君諱某字元賞御史君之孫茂才君之子也歷秦
及漢有國有家宰相牧守踵武相襲又曰遭父喪以孝立稱土堦環
堵兼業並受門徒兩集感於洙泗又云郡察孝廉郎中謁者宛陵丞
封丘令母憂去官服祥辟司空府延熹四年五月辛酉遭命而終其
文字磨滅隱隱可見者如此其名既亡又不序其姓惟其銘云於惟
王君以此知其姓王爾 右集本

後漢祝睦碑歲月見本文 真蹟

右漢祝睦碑云君諱睦字元其下遂缺滅不能成文惟其官壽年月
可見云賓于王庭除北海長史潁川郎令辟司空府北軍中候拜大
尚書尚書僕射遷常山相山陽太守年六十有八延熹七年八月丁
巳卒睦有二碑皆在今南京虞城縣此碑不見世次而隱隱有云其
先高辛爾其後碑則頗完故錄於次也治平元年六月立秋日書

後漢祝睦後碑延熹七年

右漢祝睦後碑其前碑不知所立人名氏兩碑所載官閤壽考年月
悉同而此碑有立碑人名氏及睦世次云故吏王堂等竊聞下有述
上之功臣有敘君之德又曰君兆自黎辛祝融苗曹鄭有祝輔君其
胤也其餘文字亦完可讀二銘皆以三言為文而後銘尤完云穆我
君邦之陽資五就闡道綱綱下滅一字表微準樞衡稽列宿覽四方
德合乾道應皇領二郡曜重光化流洽蠲爾昌性天約元用長頌聲
作謠令香功烈著遺椒芳存觀榮倫弗忘其後二句磨滅難詳故錄
其成文以見其雅質亦可佳也治平元年六月立秋日書 右真蹟

後漢衡方碑歲月見本文

右漢衡方碑云府君諱方字興祖其先伊尹在殷號稱阿衡因而氏
焉又曰州舉孝廉除郎中郎丘侯相膠東令州舉尤異遷會稽東部
都尉又拜議郎北平太守遷潁川太守又曰拜步兵校尉年六十有
三建寧元年二月五日癸丑卒於是海內門生故吏采嘉石樹靈碑
鏤茂伐祕將來此其始終之大略其餘歷歷可見而時亦磨滅以其
文多不備錄也治平元年六月三日書

後漢冀州從事張表碑歲月見本文 真蹟

右漢冀州從事張表碑云君諱表字元異其碑首題云漢故冀州從
事張君碑而文為韻語敘其官閤不甚詳但云春秋六十四以建寧
元年三月癸巳薨疾而終其辭有云仕郡為郵都鷹擻盧擊是以狗
喻人集本有也字又有畔桓利正之語蓋漢人猶質不嫌取類於鷹

犬畔桓疑是盤桓集本有漢時二字文字簡少假借爾治平元年六月廿九日書

後漢竹邑侯相張壽碑歲月見本文

右漢竹邑侯相張壽碑云君諱壽字仲吾其先晉大夫張老威德之裔孝友恭懿明允篤信博物多識獵一作略涉傳記臨疑獨照確然不撓有孔甫之風舉孝廉除郎中給事謁者遷竹邑侯相年八十建寧元年五月辛酉卒其大略可見者如此其餘殘缺或在或亡亦班班可讀爾右集本

後漢金鄉守長侯君碑歲月見本文 真蹟

右漢金鄉守長侯君碑云君諱成字伯威山陽防東人也其先出自幽岐周文之後封于鄭鄭共仲賜氏曰侯厥胤宜多以功佐國漢之興也侯公納策濟太上皇於鴻溝之厄謚曰安國君曾孫醜封明統侯光武中與玄孫霸為臨淮太守轉拜執法右刺姦五威司命大司徒公封於陵侯枝葉繁茂或家河清或邑山濟君即上黨太守之第郡請署主簿督郵五官掾功曹守金鄉長建寧二年四月癸酉卒年八十一碑文首尾皆完故得詳其世次其上黨太守不見其名按漢書執法左右刺姦五威司命皆王莽官名侯霸列傳云霸莽時為隨令遷執法刺姦而未嘗為五威司命後事光武代伏湛為大司徒封關內侯既薨光武下詔追封則鄉侯而此碑言封於陵侯未知孰是據碑言刺姦司命為光武時官蓋碑文之繆矣治平元年四月二十九日書

後漢慎令劉君墓碑建寧四年

右漢慎令劉君墓碑在今南京下邑其名已磨滅其字伯麟少罹艱苦身服田畝舉孝廉除郎中辟從事司徒掾遷慎令卒年六十有二其銘曰於惟君德忠孝正直至行通洞高明柔克鬼神福謙受茲介福知命不延引輿旋歸忽然輕舉志激拔葵人皆有亡貴終譽兮歿

而不朽垂名著今余家漢碑常思其銘多缺滅而斯銘獨完故錄之右真蹟

後漢北軍中侯郭君碑歲月見本文

右漢北軍中侯郭君碑其名字磨滅云元城君第四子也其先蓋周之胄緒枝葉雲布列於州郡自東郡衛國家於河內汲兄竹邑侯相次尚書侍郎次濟北相順弟臨沂長次徐州刺史次中山相次雒陽令君為五官掾功曹司隸中都官從事三辟將軍府舉廉比陽長復辟司徒拜北軍中侯年六十有六建寧四年九月丙子卒其於兄竹邑侯相上一字缺滅不完疑是惠字其下又云順弟莫曉其義豈漢人謂兄弟為此語邪故闕其疑以候知者治平元年六月廿九日書右真蹟

後漢司隸從事郭君碑歲月見本文

右漢司隸從事郭君碑云君諱究汲人也元城君之孫雒陽令之適歷主簿督郵五官掾功曹守令長辟司隸從事部郡都官春秋二十八而卒中平元年歲在甲子三月而葬據北軍中侯碑為元城君子而弟為雒陽令考其世次皆同前世碑碣但書子孫而不及兄弟惟郭氏碑載其兄弟甚詳蓋古人譜牒既完而於碑碣又詳如此可見其以世家為重不若今人之苟簡也治平元年六月廿九日書右真蹟

後漢魯峻碑歲月見本文 集本

右漢魯峻碑云君諱峻字仲嚴山陽昌邑人監營謁者之孫脩武令之子治魯詩顏氏春秋舉孝廉除郎中謁者河內太守丞辟司徒司空府舉高第御史東郡頓丘令遷九江太守拜議郎太尉長史御史中丞司隸校尉遭母憂自乞拜議郎服竟還拜屯騎校尉以病遜位熹平元年卒門生子商等二百三十人謚曰忠惠父其餘文字亦粗完故得遷拜次序頗詳以見漢官之制如此惟云遭母憂自乞拜議

即又其最後為屯騎校尉而碑首題云漢故司隸校尉忠惠父魯君碑二者莫曉其義治平元年四月二十二日

後漢玄儒婁先生碑歲月見本文

右漢玄儒婁先生碑云先生諱壽字九考南陽隆人也祖太常博士父安貧守賤不可營集本作榮以祿先生童孩多奇岐嶷有志好學不默不飭小行善與人交久而能敬榮沮溺之偶耕甘山林之香藹又曰有朋自遠冤紳莘莘講習不倦年七十有八熹平三年二月甲子不祿今光化軍乾德縣圖經載此碑景祐中余自夷陵貶所再遷乾德令按圖求碑而壽有墓在穀城界中余率縣學生親拜其墓見此碑在墓側遂據圖經遷碑還縣立於勅書樓下至今在焉治平元年六月十二日書右真蹟

後漢郭先生碑真蹟 歲月未詳

右漢郭先生碑云諱輔字輔成其先出於王季之中子為文王卿士食業於號後世謂之郭歷戰國秦漢子孫流分來居荆土先生其少也孝友而悅學其長也寬舒如好施是以宗親歸懷鄉鄰高尙年五十有二遇疾而終其以而為如及用鄉鄰字與婁壽碑同蓋漢人如此爾治平元年六月二十日書

又集本

右不見書撰人名氏碑在襄州穀城縣界中其辭云先生諱輔字輔成其先出自有周王季之中子為文王卿士食業於號至於武王錫而封之後世謂之郭春秋之時為晉所并歷戰國秦漢子孫流分來居荆土氏國立姓焉傳云聖賢之後必有達者先生應焉孝友而說學其長也寬舒如好施是以宗親歸懷鄉鄰高尙年五十有二遇疾而終其文字古質蓋漢之碑也其用鄉鄰字與漢婁壽碑同其曰寬舒如好施蓋以如字為而也春秋書屋隕如兩釋者曰如而也然施於文章以如為而始見於此也

後漢桂陽太守周府君紀功銘熹平中

此君檢漢書無之今碑石缺不見其名惜乎遂不見於世也南人紀其所脩瀧水即韓文公所謂昌樂瀧者是也至今以為利祠宇甚嚴云右集本

後漢桂陽周府君碑熹平中

右漢桂陽周府君碑按韶州圖經云後漢桂陽太守周府君碑按廟在樂昌縣西一百一十八里武溪上武溪驚湍激石流數百里昔馬援南征其門人轅寄生善吹笛援為作歌和之名曰武溪深其辭曰滔滔武溪一何深鳥飛不渡獸不能臨嗟哉武溪何毒淫周使君開此溪下合真水桂陽人便之為立廟刻石又云碑在廟中郭蒼文今碑文磨滅云府君字君光而名已訛缺不可辨圖經但云周使君亦不著其名後漢書又無傳遂不知為何人也按武水流出郴州臨武縣鷓鴣石南流三百里入桂陽面桂陽真水一有梨溪二字盧溪曹溪諸水皆與武水合流其俗謂水湍峻為瀧韓退之詩云南下昌樂瀧即此水也碑首題云神漢者如唐人云聖唐爾蓋當時已為此語而史傳他書無之獨見於此碑也右集本

後漢桂陽周府君碑後本熹平中

右漢桂陽周府君碑余初得前本恨其名遂磨滅後有國子監直講劉仲章者因出其碑而為余言前為樂昌令因道府君事云名悞問其何以見之云碑刻雖闕尚可識也乃以此碑并陰遺余蓋前本特模者不工爾又余初以韓集云昌樂瀧疑其誤乃改從樂昌仲章曰不然縣名樂昌而瀧名昌樂其舊俗所傳如是韓集不誤也乃知古人傳疑而慎於更改者以此右集本

後漢費府君碑歲月未詳 集本

右漢梁相費府君碑其名字若云諱況字仲慮而況疑為汎慮疑為寬其官闕可見者為蕭令九年沛有蝗獨不入其界國以狀聞朝廷

嘉諸拜梁相春秋八十卒其銘頗簡而文字粗完云縣縣顯祖厥德懿樂播助於前不碩基業遺愛於民福流於後昨自此磨滅不可識者八字其卒章云功烈休矣來昆戮力而穆字爲縣古文多然

後漢郎中王君碑光和元年

右漢郎中王君碑文字磨滅不復成文而僅有存者其名字官闕卒葬年月皆莫可考惟其碑首題云漢故郎中王君之銘知君爲漢人姓王氏而官爲郎中爾蓋夫有形之物必有時而弊是以君子之道無弊而其垂世者與天地而無窮顏回高臥於陋巷而名與舜禹同榮是豈有託於物而後傳邪豈有爲於事而後著邪故曰久而無弊者道隱而終顯者誠此君子之所貴也若漢王君者託有形之物欲垂無窮之名及其弊也金石何異乎瓦礫治平元年四月晦日書右真蹟

後漢太尉陳球碑歲月見本文

右漢太尉陳球碑云君諱球字伯真廣漢太守之元子也又云除郎中尚書符節郎慎陵園令換中東城門候遷繫陽令拜侍御史其後又云拜將作大匠其餘磨滅僅存按後漢書球傳云父甕廣漢太守陽嘉中球舉孝廉稍遷繫陽令太尉楊秉表球零陵太守後累拜司空光和元年遷太尉坐日食免復拜光祿大夫與司徒劉郃等謀誅宦官曹節等不果下獄死球在零陵破賊胡蘭朱蓋有功威著南邦今碑破蘭蓋事班班可讀與傳皆合惟不著誅宦官事至其卒時文字磨滅不可識惟云六十有二亦與傳合予所集錄古文與史傳多異惟此碑所載與列傳同也治平元年四月晦日書右真蹟

後漢敬仲碑歲月見本文

右漢敬仲碑者其姓名字皆不可見惟其初有敬仲二字尙可識故以寓其名爾蓋疑其人姓田氏也大抵文字磨滅比其他漢碑尤甚字可識者頗多第不成文爾惟云州郡課最臨登大郡又云居喪致

哀又云司隸從事治書侍御史又云光和四年閏月庚申此數句粗可讀爾其餘字畫廬完者以漢隸今爲難得錄之爾治平元年閏五月廿九日書右真蹟

後漢無名碑此與前跋大槩同

右漢無名碑文字磨滅其姓氏名字皆不可見其僅可見者云州郡課最臨登大郡又云居喪致哀曾參閔損又曰辟司隸從事拜治書侍御史又曰奮乾剛之嚴威揚哮虎之武節又曰年六十三光和四年閏月庚申遭疾而卒其餘字畫尙完者多但不能成文爾夫好古之士所藏之物未必皆一作能適世之用惟其埋沒零落之餘尤以爲可惜此好古之癖也治平元年六月五日書右真蹟

後漢長蔡君頌碑光和四年 真蹟

右漢長蔡君頌碑在鎮府故天章閣待制楊旼嘗爲余言漢時隸書在者此爲最佳旼自言平生惟學此字余不甚識隸書因旼言遠遣人之常山求得之遂入於錄

後漢唐君碑歲月見本文

右漢唐君碑其名已磨滅其字正南云集本作云字正南潁川鄆人也其先出自慶都感赤龍生堯王有天下苗胄枝分相土視居因氏唐焉君父孝廉郎中早卒君繼厥緒就道好古敦書味詩守舞陽丞潁陽令察能治劇遷豫章其後遂復磨滅雖文字班班可見而不能得其次序其後又云換君昌陽令吏民慕戀牽君車輪不得行君臣流涕道路環玕是故從事郡掾刊石樹頌歌君之美據此蓋縣令去思碑爾其後又云光和六年二月壬午朔二十五日丙午則知唐君爲後漢時人矣治平元年閏五月二十八日右真蹟

後漢朱龜碑歲月見本文

右漢朱龜碑云字伯靈察孝廉除郎中尚書侍郎以將事去官于時幽州州下滅一字夷侵寇以君爲御史中丞討伐其後磨滅又云鮮

卑侵犯障塞復舉君拜幽州刺史年六十四光和六年卒龜之事跡不見史傳其僅見於此碑者如此碑在今亳州界中云將軍去官莫曉其語治平元年六月十四日書右真蹟

後余守亳州徙碑置州學中

後漢小黃門謙君碑歲月見本文

右漢小黃門謙君碑云君諱敏字漢達年五十七中平二年卒其文不甚磨滅而官闕無所稱述惟云肅將王命守靜輅光以遠悔咎而已後漢宦者用事靈帝時尤威敏卒之歲張讓等十二人封侯於斯之時能守靜遠悔是亦可佳然敏以一小小黃門而立碑稱頌於此可見宦官之威也治平元年四月二日書右真蹟

後漢熊君碑歲月見本文

右漢熊君碑云君諱喬字舉舉上滅一字其官闕不可詳考其僅可知者劉表時為綏民校尉後遷騎都尉建安二十一年卒享年七十有一其云治歐羊尚書其字非訛闕而以陽為羊蓋古文字少故須假借至漢字已備而猶假用何哉後云大歲在甲申上滅一字以曆推之當是丙申又云碑師春陵福造福上滅一字當是其姓其書顯字皆為顯按許慎說文顯從曷聲而轉為累其失遠矣莫曉其義也右集本

後漢兪鄉侯季子碑歲月未詳

右漢兪鄉侯季子碑云君諱熊字孟下闕一字廣陵海西人也厥祖天皇大帝垂精接感篤生聖明子孫享之分源而流枝葉扶疎出王別胤受爵列土封侯載德君光武皇帝之玄廣陵王之孫兪鄉侯之季子也由是而後文字缺滅其稍稍可讀者時得其一二云六籍五典如源如泉既練州郡卷舒委隨化流南城政猶北辰三祀有成來臻我邦仁恩如冬日威猛烈夏日史民愛若慈父畏如神明其後又云採撫謠言作詩三章據碑文無卒葬年月而其辭若此似是德政

碑按後漢書光武皇帝子曰廣陵思王荆荆子元壽等四人皆封鄉侯史略而不載其名兪鄉侯者不知為誰也思王荆之第幾子也天皇大帝之語自漢以來有矣右集本

後漢武榮碑歲月未詳

右漢武榮碑云君諱榮字舍集本作舍和治魯詩經章君章句孝經論語漢書史記左氏國語為州書佐郡曹史集本作文學主簿督郵五官掾功曹年三十六南蔡府君察舉孝廉執金吾丞孝桓大憂屯守玄武關加遇害氣遭疾殞靈其餘文字殘缺不見其卒葬年月又不著氏族所出惟其碑首題云漢故執金吾丞武君之碑云治平元年五月六日書右真蹟

後漢蔡君碑首歲月見本文

漢碑今存者少此篆亦與今文小異勢力勁健可愛蔡君謨題右漢熹平中碑在南陽界中字已磨或作磨非滅不可識獨其碑首字大僅存其筆畫頗奇偉蔡君謨甚愛之此君謨過南都所題乃皇祐三年也今一紀矣嘉祐八年九月十七日書右真蹟

又此集本與真蹟頗不同故兩存之

右漢蔡君碑首題云漢故南陽太守蔡君之碑蔡君不知為何人碑在南陽界中字已磨滅不可識獨其碑首字大僅存其筆畫頗奇偉蔡君謨甚愛之

後漢元節碑歲月未詳

右漢元節碑文字磨滅不見其氏族其可見者纔數十字爾云君集本無此字諱立字元節其先出自伊尹其餘不復成文其銘云於穆從事疑其姓伊而為從事也碑無年月而知為漢人者以其隸體與他漢碑同爾治平元年五月三日書右真蹟

後漢殘碑歲月未詳 真蹟

右漢殘碑不知為何人所存者纔三十二字不復成文惟云高字幼

知其名高又云漢一有中字興復知爲後漢時人而隸字在者甚完
體質淳勁非漢人莫能爲也故錄之

後漢天祿辟邪字歲月未詳

右漢天祿辟邪四字在宗資墓前石獸膊上按後漢書宗資南陽安
衆人也今墓在鄧州南陽界中墓前有二石獸刻其膊上一曰天祿
一曰辟邪余自天聖中舉進士往來穰集本作襄鄧間見之道側迨
今三十餘年矣其後集錄古文思得此字屢求於人不能致尙書職
方員外郎謝景初家於鄧爲余模得之然字畫集本作或訛缺不若
余見時完也按黨錮傳云資祖均有傳今後漢書有宋均傳云南
陽安衆人而無宗均傳疑黨錮傳轉集本無此字寫宋爲宗爾蜀志
有宗預南陽安衆人豈安衆當漢時有宗宋二族而字與音皆相近
遂至訛謬邪史之失傳如此者多矣嘉祐八年臘日書

集古錄跋尾卷第三

集古錄跋尾卷第四 集一百三十七

魏受禪碑歲月見本文

右魏受禪碑世傳為梁鵠書而顏真卿又以為鍾繇書莫知孰是按漢獻帝紀延康元年十月乙卯皇帝遜位魏王稱天子又集本無此字按魏志是歲十一月葬土卒死亡者猶稱集本有正字令是月丙午集本作寅漢帝使張悌奉璽綬庚午王升壇受禪又是月癸酉奉漢帝為山陽公而此碑云十月辛未受禪於漢三家之說皆不同今據裴松之注魏志備列漢魏禪代詔冊書令羣臣奏議甚詳蓋漢實以十月乙卯策詔魏王使張悌奉璽綬而魏王辭讓往返三四而後受也又據侍中劉廙奏問大史令許芝今月十七日己未可治壇場又據尚書令桓階等奏云輒下太史令擇元辰今月二十九日可登壇受命蓋自十七日己未至二十九日正得辛未以此推之漢魏二紀皆繆而獨此碑為是也漢紀乙卯遜位者書其初命而略其辭讓往返遂失其實爾魏志十一月癸卯猶稱令者當是十月衍一字爾丙午張悌奉璽綬者辭讓往反容集本作殆有之也惟庚午升壇最為繆爾癸卯去癸酉三十一日不得同為十一月此尤繆也禪代大事也而二紀所書如此則吏官之失以惑後世者可勝道哉嘉祐八年九月十七日書右真蹟

魏公卿上尊號表黃初元年

右魏公卿上尊號表唐賢多傳為梁鵠書今人或謂非鵠也乃鍾繇書爾未知孰是也嗚呼漢魏之事讀其書者可為之流涕也其鉅碑偉字其意惟恐傳之不遠也豈以後世為可欺欺不然不知取者無所不為乎右真蹟

魏鍾繇表歲月見本文

右鍾繇法帖一字集本作表者曹公破關羽賀捷表也其後書云建安二十四年閏月九日南蕃東武亭侯鍾繇上集賢校理孫思恭精

歐陽文忠全集 卷一百三十七

於曆學余問孫君建安二十四年閏在何月思恭為余以漢家所用四分乾象曆推之是歲己亥二曆皆閏十月而陳壽三國志所書時月雖為簡略然以思恭言考之則合按魏志是歲冬十月軍還洛陽其下遂書孫權請討關羽自効於吳志則書閏月權討羽以魏吳二志參較是閏十月矣吳志又書十二月權獲羽及其子平魏志明年正月乃書權傳羽首至洛陽蓋二志相符乃權以閏十月方征羽至十二月獲之明年正月始傳首至洛理可不疑然則鍾繇安得於閏十月先賀捷也由是此表可疑為非真而今世盛行復有兩本字大小不同小字差類繇書然不知其果是否姑並存之以俟識者治平元年七月廿六日書右真蹟

又集本

右魏鍾繇書其辭云戎路兼行履險冒寒因述曹仁徐晃破關羽事其後題云建安二十四年閏月九日南蕃東武亭侯臣繇上按建安二十四年冬曹公軍于摩陂而仁等破羽後未嘗出征履險冒寒之役又古人牋啓不書年此二事可疑又云羽已被手刃據三國志羽圍曹仁於樊為仁所敗而走後為孫權兵斬於沮與此帖不同

魏劉熹學生冢碑歲月未詳

右魏劉熹學生冢碑在襄州穀城縣界中余為乾德令時嘗以公事過穀城見數荒冢在草間傍有古碑傾側半埋土中問其村人為何人家皆不能道而碑文磨滅不暇讀而去後數年在河北始集錄古文思嚮所見穀城碑疑為漢碑求之又數年乃獲按襄州圖經云學生冢在縣東北水經注云魏濟南劉熹字德怡博學好古立碑載生徒百餘人其不終業而卒者葬于集本作於此號學生冢今碑雖殘缺而熹與生徒名字往往尚可見蓋余昔所見乃學生冢而碑魏時碑也熹穀城令也治平元年正月十日書右真蹟

魏賈逵碑歲月未詳

右魏賈逵碑魏志逵傳云逵為絳邑長為賊郭援所攻絳人與援約不害逵乃降而援欲以逵為將怒逵不肯叩頭欲殺之絳人乘城呼

曰負集本作若要殺我賢君寧俱死援義之遂不殺又按裴松之注

引魏略云援捕得逵怒不肯拜促斬之諸將覆護囚於壺關土窖中

守者祝公道釋其械而逸之集本有已守與魏志不同而此碑但云

為援所執臨以白刃不屈而已不載絳人約援事如傳所載不獨逵

有德於絳人而絳人臨危能與逵生死亦可謂賢矣自古碑碣稱述

功德常患過實如逵與絳人德義集本有俱隸字碑不應略而不著

頗疑陳壽作傳集本無此二字好奇而所得非實也松之又注魏書

逵年五十五而碑云五十有四亦當以碑為正嘉祐八年十一月十

四日書右真蹟

魏鄧艾碑歲月未詳

右鄧艾碑考其事蹟終始即魏集本無此字鄧艾碑也艾嘗為兗州

刺史據碑云晉初嘗發兗州兵討叛羌艾降巫者傳言授以用兵之

法因以破羌充人神之遂為艾立廟建碑紀其事艾於三國時為名

將嘗有大功其姓名聞於世甚顯史與充人皆不應誤而艾又二名

不同如此此君子所以慎於傳疑也余謂古人艾又常通用漢書曰

黎民艾安與懲艾創艾注皆讀為艾豈非鄧侯名艾音又而書碑者

從之歟後人讀史無音注乃且以為蒿艾之艾而流俗轉失久而訛

繆遂不復正此理或然覽者詳之熙寧壬子正月晦日六一堂書右

真蹟

吳九真太守谷府君碑鳳皇九年四月

右谷朗者事吳為九真公守碑無書撰人名氏其序云府君諱朗字

義先桂陽耒陽人豫章府君之曾孫公府君之孫郎中君之子也其

先出自顓頊益為舜虞賜姓贏氏至於屏子封於秦谷因而氏焉谷

氏在吳不顯史傳無所見所謂豫章府君而下三世皆莫知其名字

按秦本紀非子昆於秦而此與朗子永寧侯相碑皆為屏子莫詳其

義也治平元年四月廿六日書右真蹟

吳國山碑歲月見本文

右吳國山碑者孫皓天冊元年禪于國山改元天璽因紀其所獲瑞

物刊石于山陰是歲晉咸寧元年後五年晉遂滅吳以皓昏虐其國

將亡而衆瑞並出不可勝數後世之言祥瑞者可以鑒矣熙寧元年

中元後一日書右真蹟

晉南鄉太守頌泰始中

右南鄉太守司馬整集本作者南鄉太守頌南鄉太守者司馬整也

按晉書宣帝弟曰安平獻王季季次子曰義陽成王望望第三子曰

隨穆王整整先望卒後武帝分義陽之隨縣封整為王諡曰穆穆以

魏咸熙二年為南鄉太守是歲晉武受禪改元泰始泰始三年徙整

南陽而南鄉人為整建此碑晉書地理志當魏末荆州分屬三國而

南鄉南陽皆屬魏後晉武改南鄉為順陽此碑今在光化軍軍即襄

州穀城縣之陰城鎮陰城當魏晉時為南鄉屬縣也余貶乾德縣令

時得此碑今二紀矣嘉祐八年九月二十六日書右真蹟

晉南鄉太守碑泰始四年

右南鄉太守碑不著書撰人名氏題曰宣威將軍南鄉太守司馬府

君紀德頌碑云君諱整字孔修太宰安平王之孫太尉義陽王之子

按晉書宣帝弟曰安平獻王季季次子曰義陽成王望望第三子隨

穆王整整先望卒後武帝分義陽之隨縣封整為王諡曰穆穆以泰

始三年自南鄉太守徙南陽而南鄉人共立此碑今在光化軍軍即

襄州穀城縣之陰城鎮按晉志不列南鄉郡據此碑所載縣令各氏

有武陵樂陽丹水陰城順陽析六縣此蓋南鄉郡所治也晉志但云

南鄉魏時屬荆州武帝平吳改為順陽郡而不著順陽治所與廢屬

贈冠軍將軍亦不言其爲宣威將軍南鄉南陽二郡守皆其所漏略也右集本

南鄉太守碑陰集本

右南鄉太守將吏三百五十人分爲二卷其磨滅者猶有二十餘人
人皆有邑姓名字而無次序其名號有令有長有南閣祭酒門下督
主簿部督郵監汀督郵部勸農五官掾文學掾營軍掾軍謀掾府門
亭長主記史待事掾待事史部曲將部曲督又有賊曹功曹議曹戶
曹金曹水曹科曹倉曹鎧曹左右兵曹曹皆有掾又有祭酒有史有
書佐有脩行有徙掾位有從史位有史有小史等魏晉之際太守官
屬之制蓋如此他書或時見一二不能如此之備也

晉陸嗜碑歲月見本文

右晉陸嗜碑嗜爲宣威內史建武元年卒碑以咸和七年立而碑後
題云咸和七年歲在庚辰咸和成帝年號也成帝以泰寧二年八月
即位是歲乙酉明年改元咸和據曆七年當爲壬辰而此爲集本作
云庚辰者繆也陸氏有二碑余家集錄皆有之據陸禕碑後題云泰
寧三年歲在乙酉與今曆合則當時曆官不應至咸和而頓爾差失
然則庚辰時書碑者誤爾治平元年六月二十九日書右真蹟

晉蘭亭脩禊序永和九年 集本

右蘭亭脩禊序世所傳本尤多而皆不同蓋唐數家所臨也其轉相
傳模失真彌遠然時時猶有可喜處豈其筆法或得其一二邪想其
真蹟宜如何也哉世言真本葬在昭陵唐末之亂昭陵爲温韜所發
其所藏書畫皆別取其裝軸金玉而棄之於是魏晉以來諸賢墨蹟
遂復流落於人間太宗皇帝時購募所得集以爲十卷俾模傳之數
以分賜近臣今公卿家所有法帖是也然獨蘭亭真本亡矣故不得
列於法帖以傳今予所得皆人家舊所藏者雖筆畫不同聊並列之
以見其各有所得至於真僞優劣覽者當自擇焉其前本流俗所傳

不記其所得其二得於殿中丞王廣淵其三得於故相王沂公家又
有別本在定州民家二家各自有石較其本纖毫不異故不復錄其
四得於三司蔡給事君謨世所傳本不出乎此其或尙有所未傳更
俟博采

范文度模本蘭亭序附

余嘗集錄前世遺文數千篇因得悉覽諸賢筆蹟比不識書遂稍通
其學然則人之於學其可不勉哉今老矣目昏手顫雖不能揮翰而
開卷臨几便別精麤若范君所書在余集錄實爲難得也竊幸覽之
一作焉爲之忘倦嘉祐七年夏五月二十八日廬陵歐陽脩書右真
蹟

書雖列於六藝非如百工之藝也蔡君謨以書名當世其稱范君者
如此不爲誤矣滁山醉翁題右真蹟

又

自唐末干戈之亂儒學文章掃地而盡宋興百年之間雄文碩儒比
肩而出獨字學久而不振未能比蹤唐之一無此字人余每以爲恨
今乃獲見范君筆法信乎時不乏人而患知之不博不然有於中必
形於外若范君者筆迹不傳於世而獨傳其家蓋其潛光晦德非止
其書闕不傳也右真蹟

又與前跋相類疑是彙本今兩存之

自唐末兵戈之亂儒學文章掃地而盡聖宋興百餘年間雄文碩學
之士相繼不絕文章之盛遂追三代之隆獨字書之法寂寞不振未
能比蹤唐室余每以爲恨今迺獲見范君之書信乎時不乏人而患
聞見之不博也然范君之筆法宜傳於世久闕於家蓋其潛光晦德
非獨其書之闕也右集本

晉樂毅論永和四年

右晉樂毅論石在故高紳學士家紳死家人初不知惜好事者往往

就閱或模傳其本其家遂秘藏之漸為難得後其子弟以其石質錢於富人而富人家失火遂焚其石今無復有本矣益為可惜也後有集本有此二字甚妙二字吾亡友聖俞書也論與文選所載時時不同考其文理此本為是惜其不完也右真蹟

晉王獻之法帖歲月未詳 真蹟

右王獻之法帖予嘗喜覽魏晉以來筆墨遺蹟而想前人之高致也所謂法帖者其事率皆弔哀候病敘睽離通問施於家人朋友之間不過數行而已蓋其初非用意而逸筆餘興淋漓揮灑或妍或醜百態橫生披卷發函爛然在目使人驟見驚絕徐而視之其意態集本無此三字愈無窮盡故使後世得之以為奇詭而想見其人也至於高文大冊何嘗用此而今人不然至或棄百事弊精疲力以學書為事業用此終老而窮年者是真可咲也治平甲辰秋社日書

又

獻之帖蓋唐人所臨其筆法類顏魯公更俟識者辨之右真蹟

晉賢法帖真蹟

右晉賢法帖太宗皇帝萬機之餘留精翰墨嘗詔天下購募鍾王真蹟集為法帖十卷模刻以賜羣臣往時故相劉公沆在長沙以官法帖鑱版遂布於人間後有尙書郎潘師旦者又擇其尤妙者別為卷第與劉氏本並行至余集錄古文不敢輒以官本參入私集遂於師旦所傳又取其尤者散入錄中俾夫啓帙披卷者時一得之把翫欣然所以忘勸也治平元年五月十日書

晉七賢帖

右晉七賢帖得之李不緒少卿真蹟無此二字家不緒多藏古書然不知此為真否七子書蹟世罕傳故錄之右集本

宋文帝神道碑歲月未詳

右宋文帝神道碑云太祖文皇帝之神道凡八大字而別無文辭惟

以此為表識爾古人刻碑一作碑刻正當如此而後世鐫刻功德爵里世繫惟恐不詳然自後漢以來門生故吏多相與立碑頌德矣余家集古所錄三代以來鍾鼎彝盤銘刻備有至後漢以後始有碑文欲求前漢時碑碣卒不可得是則冢墓碑自後漢以來始有也此碑無文疑非宋世立蓋自漢以來碑文務載世德宋氏子孫未必能超然獨見復古簡質又南朝士人氣尚卑弱字書工者率以纖勁清媚為佳未有偉然巨筆如此者益疑後世所書按宋書文帝為元兇邵所弑初諡曰景廟號中宗孝武立改諡曰文號太祖其墓曰長寧陵也右真蹟

宋宗愨母夫人墓誌歲月見本文

右宗愨母夫人墓誌不著書撰人名氏有誌無銘其後云謹牒子孫男女次第各位婚嫁如左蓋一時之制也按愨本傳與此誌歷官終始不同本傳云宋孝武即位以愨為左衛將軍累遷豫州刺史監五州諸軍使討竟陵王誕入為左衛將軍廢帝即位為寧蠻校尉雍州刺史卒此誌乃大明六年作誌云為右衛將軍監交廣二州湘州之始興冠軍將軍平越中郎將廣州刺史始遷豫州監五州軍事又為散騎常侍左衛將軍領太子中庶子荊州大中正而傳皆略之也愨南陽涅陽人而此誌云涅陽縣都鄉安衆里人又云寧於秣陵縣都鄉石泉里都鄉之制前史不載右集本

齊鎮國大銘像碑天統三年 集本

右齊鎮國大銘像碑銘像文辭固無足取所以錄之者欲知愚民當夷狄亂華之際事佛尤篤爾其字畫頗異雖為訛謬亦其傳習時有與今不同者其錄之亦以此也

南齊海陵王墓銘歲月未詳

右南齊海陵王墓銘長兼中書侍郎謝朓撰海陵王昭文者文惠太子次子也初明帝鸞既廢鬱林王昭業而立昭文又廢為海陵王而

殺之遂自立按謝朓傳朓嘗海陵王時爲驃騎諮議領記室又掌中書卽後遷尙書吏部卽此誌題云長兼中書侍郎而據傳朓未嘗爲中書侍郎史之闕也按南齊書劉俊爲長兼侍中後魏臨淮王彧爲長兼御史中尉南北史多有此名蓋集本有長兼者三字當時兼官之稱如唐檢校官之類也嘉祐八年九月十七日書右真蹟

梁智藏法師碑普通三年 真蹟

右梁智藏法師碑梁湘東王蕭繹撰銘新安太守蕭幾作敘尙書殿中郎蕭挹書世號二蕭碑法師者姓顧氏幾挹皆稱弟子衰世之弊遂至於斯余於集古錄而不忍遽棄者以其字畫集本作書粗可佳捨其所短取其所長斯可矣嘉祐八年五月晦日書

陳張慧湛墓誌銘貞觀二十三年

右陳張慧湛墓誌銘不著書撰人名氏陳隋之間字書之法極於精妙而文章頽壞至於鄙俚豈其時俗繁薄士遺其本而逐其末乎予家集錄所見頗多自開皇仁壽而後至唐高宗已前碑碣所刻往往不減歐虞而多不著名氏如鉗耳君清德頌或有名而其人顯如丁道護之類不可勝數也慧湛陳人至唐太宗時始改葬爾其銘刻字畫遒勁有法翫之忘勸惜乎不知爲何人書也治平元年四月晦日書右真蹟

陳浮屠智永書千字文歲月未詳

右千字文今流俗多傳此本爲浮屠智永書考其字畫時時有筆法不類者雜於其間疑其石有亡缺後人妄補足之雖識者覽之可以自擇然終汨其真遂去其二百六十五字其文既無所取而世復多有所佳者字爾故輒去其僞者不以文不足爲嫌也蔡君謨今世知書者猶云未能盡去也嘉祐八年十月十八日書右真蹟

又

梁書言武帝得王羲之所書千字文命周興嗣以韻次之今官集本作

觀法帖有漢章帝所書百餘字其言有海鹹河淡之類蓋前世學書者多爲此語不獨始於羲之也右真蹟

大代脩華嶽廟碑歲月見本文

右大代脩華嶽廟碑按魏書文成帝興光二年三月己亥改元爲太安故魏書興光無二年而此碑云集本有興光二字二年二月甲午立者蓋立碑後六日始改元也其曰闡皇風於五葉者自道武明元太武至於文成纔四世爾太武之弑南安王余立不踰年亦被弑不得成君集本無此十九字而景穆太子文成父也追尊爲帝立廟稱宗故以爲世也魏自道武天興元年議定國號羣臣欲稱代而道武不許乃仍稱魏自是之後無改國稱代之事今魏碑數數有之碑石當時所刻不應妄但史失其事爾由是言之史家闕繆可勝道哉然予於史家非長故書之以待博學君子也嘉祐八年歲在癸卯七月二十日書昔在南嶽自號醉翁晚又更號六一居士右真蹟

又

按魏書文成帝興光二年三月己亥改元太安而此碑書二年三月甲午立蓋立碑後六日乃改元故碑猶得稱二年也其曰闡皇風於五葉者自道武明元太武至於文成纔四世爾太武之弑南安王余立不踰年亦被弑不得成君爲一世而景穆太子文成父也追尊爲帝立廟稱恭宗故以爲世也魏自道武天興元年議定國號羣臣欲稱代而道武不許乃稱魏自是之後無改國稱代之事今魏碑數數有之碑石當時所刻不應妄誤但史失其事爾由是言之史家闕繆多矣右真蹟

後魏孝文北巡碑歲月見本文

右魏孝文北巡碑云太和二十一年脩省方之典北臨舊京又云涉西河出平陽斜順唐達指遊咸櫟路邇龍門遂紆雕軒按後魏本紀是歲正月乙巳北巡二月次太原至平城四月幸龍門以太牢祭夏

禹遂幸長安汎渭浮河迺東歸與此碑所書皆合也碑無題首故依本紀爲北巡碑也治平元年三月廿二日書右真蹟

後魏定鼎碑歲月見本文

右魏定鼎碑景明二年建在今懷州流俗謂之定鼎碑也景明魏宣武年號也碑云定鼎遷中之十年按魏孝文以太和十七年遷都洛陽至此景明三年蓋十年矣右集本

後魏石門銘歲月見本文

右魏石門銘云此門蓋漢永平中所穿自晉氏南遷斯路廢矣皇魏正始元年漢中獻地褒斜遂開假節龍驤將軍梁秦二州刺史羊祠開創舊路詔遣左校令賈三德共成其事起四年十月訖永平二年正月畢功其餘文字尙完而其大略如此石門在漢中所謂漢永平中所穿者乃明帝時司隸校尉楊厥所開也厥自有碑述其事甚詳正始永平皆後魏宣武年號也治平元年五月十日書右真蹟

後魏神龜造碑像記歲月見本文

右神龜造碑像記魏神龜三年立余所集錄自隋以前碑誌皆未嘗輒棄者以其時集本無此字有所取於其間也然思其文辭鄙淺又多言浮屠然獨其集本作以字畫往往工妙惟後魏北齊差劣而又字法多異不知其何從而得之遂與諸家相戾亦意其夷狄昧於學問而所傳訛繆爾然錄之以資廣覽也此碑字畫時時遒勁尤可佳也神龜孝明年號按魏書集本有神龜二年七月辛卯改元正光而此碑是月十五日立不知辛卯是其月何日也當俟治曆者推之嘉祐八年七月十一日書右集本

東魏任城王造浮圖記歲月見本文

右任城王造浮圖記不著其名云武定四年建武定東魏孝靜年號也按後魏書景穆皇帝子雲雲子澄集本有于辨二字相襲爲任城王其後國絕不封其去孝靜時差遠不知武定四年王任城者爲誰

也治平元年八月八日書右真蹟

東魏造石像記歲月見本文

右東魏造石像記其碑云大魏武定七年歲次己巳武定孝靜年號也今世所行曆譜惟龔頴運曆圖與今亳州宋退相紀年通譜爲最詳而以頴所書推之武定七年歲當己巳與此碑合而武定止於八年是歲庚午東魏滅其事與東魏北齊書亦合而通譜以七年爲戊辰八年爲己巳又有九年爲庚午而東魏滅按孝靜以後魏大統十六年滅是歲庚午則知宋公所記甲子不繆惟武定不當有九年而七年不得爲戊辰此其失爾蓋孝靜始即位改元天平盡四年而五年正月改爲元象今通譜天平止於三年以四年爲元象蓋自元象以後遞差一年故以武定七年爲戊辰也苟不見斯碑則運曆圖與通譜一家得失其何以決右集本

魏九級塔像銘歲月見本文 真蹟

右魏九級塔像銘不見書撰人名氏蓋北齊時人所作也其年號見於文者三曰真君九年者後魏太武號也又曰武定四年者東魏孝靜號也又曰天保三年者北齊文宣號也按高洋以後周大統十六年受東魏禪是歲庚午改元天保三年壬申此碑云歲在涪灘是矣碑文淺陋蓋鄙俚之人所爲惟其字畫多異往往奇怪故錄之以備廣覽集本有云字治平元年三月二十三日書

北齊常山義七級碑歲月見本文

右不著書撰人名氏文爲聲偶頗奇怪而字畫亦佳往往有古法碑云常山太守六州大都督儀同三司綦連公以天保九年造浮圖天保齊文宣年號也北齊書有綦連猛而不爲常山太守都督儀同等官不知此所謂綦連公者何人也嘉祐八年九月二十日書右真蹟

又

右常山義七級碑不著書撰人名氏文辭聲偶而甚怪書字頗有古

法其碑首題云慕容儀同麴常山石氏諸邑義七級之碑其文云常山太守六州大都督儀同三司慕容連公以天保九年爲國敬造七級浮圖一區至天統中使持節都督瓜州諸軍事驃騎大將軍儀同三司瓜州刺史常山太守六州大都督頻陽縣開國子樂平縣開國男慕容樂及散騎常侍郎驃騎大將軍前給事黃門侍郎繕州大中正食新市縣幹新除常山太守麴顯貴與功曹石子和等增成之蓋北齊時碑也慕容連公不見其名北齊有慕容連猛不爲常山太守不知此何人而慕容樂官兼刺史太守並封兩縣不可詳也食縣幹入官銜蓋當時之制亦不可詳也義者衆成之名猶若今謂義井之類也右集本

永樂十六角題附出

右永樂十六角題名不著年月列名人甚多皆無顯者莫可考究不知爲何時碑其字畫頗怪而不精似是東魏北齊人所書十六角者庸俗所造佛塔其後又書云造十六角鎮國大浮圖則知爲塔矣其謂之十六角只見此碑而後魏時又有常山義七級碑蓋當時俚俗語類皆如此治平元年八月八日書右真蹟

魯孔子廟碑附出 興和三年

右魯孔子廟碑後魏北齊時書多若此筆畫不甚佳然亦不俗而往往相類疑其一時所尚集本作傳當自有法又其點畫多異故錄之以備廣覽右真蹟

北齊石浮圖記歲月見本文

右齊造石浮圖記云河清二年歲在癸未河清北齊高湛年號也碑文鄙俚而鑄刻訛繆時時字有完者筆畫清婉可喜故錄之又其前列題名甚多而各特奇恠如馮戩耶馮貴買之類皆莫曉其義若名野又伽耶者蓋出於浮圖爾自胡夷亂華以來中國人名如此者多矣最後有馮黑太者予謂太亦音撻意隋未有劉黑闥吳黑闥皆以

此爲名者大闡轉寫不同爾然隋去北齊不遠不知黑闥爲何等語也右集本

後周大像碑 大象三年

右周大像碑宇文氏之事迹無足采者惟其字畫不俗亦有取焉翫物以忘憂者惟恠奇變態真僞相雜使覽者自擇則可以忘倦焉故余於集古所錄者博矣嘉祐八年六月二日書右真蹟

集古錄跋尾卷第四

集古錄跋尾卷第五 集一百二十八

隋老子廟碑開皇二年

右老子廟碑隋薛道衡撰道衡文體卑弱然各重當時余所取者特其字畫近古故錄之唐人二字集本作其碑後所題唐人姓名字皆不俗亦可准也右真蹟

隋介朱敞碑開皇五年

右介朱敞碑敞者榮從弟彥伯之子也按敞傳云字乾羅而此碑字天羅傳云爲金州總管而碑又爲徐州總管碑文雖殘闕然斑斑尚可讀其述徐州事頗多事爲史家不取可也不書其官蓋闕繆也其字不同亦當以碑爲是余於集錄正前史之闕繆者多矣治平元年二月十六日書右真蹟

隋龍藏寺碑開皇六年

君齊開府長兼行參軍九門張公禮撰不著書人名氏字畫遒勁有歐虞之體情開皇六年建在今鎮州碑云大師上柱國大威公之子左威衛將軍上開府儀同三司使持節恆州諸軍事恆州刺史鄂國公金城王孝僊奉勅勸獎州人一萬共造此寺其述孝僊云世業重於金張器識逾於許郭然北齊周隋諸史不見其父子名氏不詳何人也右集本

又開皇六年

右隋龍藏寺碑齊張公禮撰龍藏集本無此二字寺已廢此碑今在常山府署之集本無此二字門書字頗佳第不見其人姓名爾碑以隋開皇六年立後題二字集本作而張公禮猶稱齊按周武帝建德六年虜齊幼主高常齊遂滅後四年隋建開皇之號至六年齊滅蓋集本有己字十年矣集本有不知二字公禮尙稱齊官集本無此字何也嘉祐八年九月廿九日書右真蹟

隋太平寺碑開皇元年

右太平寺碑不著書撰人名氏南北文章至於陳隋其弊極矣以唐太宗之致治幾乎三王之威獨於文章不能少變其體豈其積習之勢其來也遠非久而衆勝之則不可以驟革也是以羣賢奮力嬰闢芟除至於元和然後蕪穢蕩平嘉禾秀草爭出而葩華莫實爛然在目矣此碑在隋尤爲文字淺陋者疑其俚甚庸人所爲然視其字畫又非常俗所能蓋當時流弊以爲文章止此爲佳矣文辭既爾無取而浮圖固吾儕所貶集本作鄙所以錄於此者第不忍棄其君爾治平元年三月十六日書右真蹟

隋李康清德頌開皇十一年

右李康清德頌不著書撰人名氏文爲聲偶而字畫奇古可愛康隴西狄道人也其碑首題云大隋冠軍將軍大中帥都督恆州九門縣令隴西李君清德之頌子在河北時遣人於廢九門縣城中得此碑字多訛闕其後題十一年歲在辛亥大將軍在酉二月癸丑朔十二日甲子建年上有二字訛闕不可識按隋書開皇十一年歲在辛亥其二字乃開皇也大將軍在酉之說出於陰陽家前史不載而此碑見之右集本

隋梁洋德政碑開皇十一年

右隋梁洋德政碑在今蔡州新息隋開皇十一年行參軍事四字集本作參軍裴玉與州人爲息州刺史梁洋建寶塔表德政碑按隋書志後周於新息州置州至大業中州廢也右真蹟

隋韓擒虎碑開皇十五年

右韓擒虎碑不著書撰人名氏而以隋高祖爲今上乃隋人所撰碑文屢言虎字獨於各下去之若避唐諱此不可知也今以碑文考隋書列傳其家世官勳大略多同惟其在齊爲河長防主大都督車騎大將軍開府儀同三司白超防主轉洪超防主傳皆無之又遷和州刺史而傳爲利州皆史官之闕誤當以碑爲是而傳載閻羅王事甚

怪而碑無之使其實有碑不宜集本作應不書以此見史家之妄也
治平元年六月十日書右真蹟

隋陳茂碑開皇十八年

右陳茂碑不著書撰人名氏而字書精勁可喜隋書列傳載茂事尤
多闕繆傳云高祖爲隋國公引爲寮佐及受禪拜給事黃門侍郎在
官十餘年轉益州總管司馬遷太府卿後數載卒而碑歷敘爲高祖
寮佐時官傳雖不書可也其自爲黃門侍郎後又爲行軍元帥長孫
覽司馬又爲蜀王府長史太僕卿判黃門侍郎上開府儀同三司梁
州刺史等官史氏皆不書蓋其闕也又據碑茂爲蜀王長史而傳爲
益州總管司馬碑爲太僕卿而傳云太府皆史家之繆也碑云茂字
延茂史亦闕治平甲辰秋社日書右真蹟

隋蒙州普光寺碑仁壽元年

右蒙州普光寺碑蒙州者漢南陽郡之育陽縣也應劭曰育水出弘
農盧氏南入于沔故後人於育加水爲清陽西魏置蒙州隋仁壽中
改爲清州又爲清陽郡唐爲縣屬金州碑仁壽元年建猶曰蒙州既
而遂改清州矣碑無書撰人名氏而筆畫道美翫之亡集本作志倦
蓋開皇仁壽以來碑碣字書多妙而往往不著名氏惟丁道護所書
常自著之然碑石在者尤少余每與蔡君謨惜之自大業已後率更
與虞世南書始感既接於唐遂大顯矣治平元年正月七日書右真
蹟

隋丁道護啓法寺碑仁壽二年

此書兼後魏遺法與楊家本微異隋唐之交善書者衆皆出一法
道護所得最多楊本開皇六年去此十七年書當益老亦稍縱也
甲辰治平初月十日莆陽蔡襄記

右啓法寺碑丁道護書蔡君謨博學君子也於書尤稱精鑿余所藏
書未有不更其品目者其謂道護所書如此隋之晚年書學尤盛吾

家率更與虞世南皆當時人也後顯於唐遂爲絕筆余所集錄開皇
仁壽大業時碑頗多其筆畫率皆精勁而往往不著名氏每執卷惘
然爲之歎息惟道護能自著之然碑刻在者尤少余家集錄千卷止
有此爾有太學官楊褒者喜收書畫獨得其所書與國寺碑是梁正
明中人所藏君謨所謂楊家本者是也欲求其本而不知碑所在然
不難得則不足爲佳物古人亦云百不爲多一不爲少者正謂此也
治平元年立春後一日太廟齋宮書右真蹟

隋鉗耳君清德頌大業六年

右不著書撰人名氏其碑首題云大隋恆山郡九門縣令鉗耳君清
德之頌大業六年建字畫有非歐虞之學不能至也碑云君名文徽
華陰朝邑人也本周王子晉之後避地西戎世爲君長因地爲姓
曾祖靜仕魏爲馮翊太守祖朗成集二州刺史父康周荆安寧鄧四
州總管別駕安陸龍門二郡守而前史皆不載碑在今廢九門縣中
余爲河北轉運使時求得之右集本

隋廬山西林道場碑大業十三年

右廬山西林道場碑渤海公撰公爲隋太常博士時作不著書人名
氏而字法老勁疑公之書也西林道場者僞趙將竺三氏捨俗出家名
曇現始居於此晉太和二年光祿卿陶範始爲現弟子慧永造寺而
號西林按兩京記隋嘗更名佛寺爲道場此碑大業十三年建也顏
魯公寓題碑陰百餘字尤奇偉今附于碑後右集本

又

右西林道場碑渤海公撰公在隋爲太常博士時作不著書人名氏
字畫道勁世或以爲公自書公時年尙少又字法與公書不同不知
何人書也按集本有章述二字兩京記隋改佛寺爲道場此碑大業
中建故謂之道場也右真蹟

唐孔子廟堂碑武德九年

右孔子廟堂碑虞世南撰并書余爲童兒時嘗得此碑以學書嘗時刻畫完好後二十餘年復得斯本則殘缺如此二字集本作矣因感夫物之終弊雖金石之堅不能以自久於是始欲集錄前世之遺文而藏之殆集本作遠今蓋十有八年而得千卷可謂富哉嘉祐八年九月二十九日書右真蹟

千文後虞世南書歲月未詳

右虞世南所書言不成文乃信筆偶然其字畫精妙平生所書碑刻多矣皆莫及也豈矜持與不用意便有優劣耶集本作也熙寧辛亥續右真蹟

唐德州長壽寺舍利碑武德六年

右德州長壽寺舍利碑不著書撰人各氏碑武德中建而所述乃隋事也其事迹文辭皆無取獨錄其書爾余屢歎文章至陳隋不勝其弊而怪唐家能臻致治之盛而不能遽革文弊以謂積習成俗難於驟變及讀斯碑有云浮雲共嶺松蓋明月與巖桂分叢迺知王勃云落霞與孤鶩齊飛秋水共長天一色當時士無賢愚以爲驚絕豈非其餘習乎

唐幽州昭仁寺碑貞觀二年

右昭仁寺碑在幽州唐太宗與薛舉戰處也唐自起義與羣雄戰處後皆建佛寺云爲陣亡士薦福湯武之敗桀紂殺人固亦多矣而商周享國各集本作皆數百年其荷天之祐者以其心存大公爲民除害也唐之建寺外雖託爲戰亡之士其實自贖殺人之咎爾其撥亂開基有足壯者及區區於此不亦陋哉碑文朱子審撰而不著書人名氏字畫甚工此余所錄也治平甲辰秋分後一日書右真蹟

唐呂州普濟寺碑貞觀二年許敬宗撰

右呂州普濟寺碑呂州者霍邑也唐高祖義兵起太原始破宋老生於此義寧元年乃以霍邑趙城汾西靈石四縣置霍山郡武德元年

更曰呂州太宗十七年遂廢也右集本

唐衛國公李靖碑顯慶三年書載于後同是許敬宗撰附此

右李靖碑許敬宗撰唐初承陳隋文章衰弊之時作者務以浮巧爲工故多失其事實不若史傳爲詳惟其官封頗備史云爲撫慰使而碑云安撫使其義無異而後世命官多襲古號蓋靖時未嘗有撫慰使也由是言之不可不正又靖爲刑部尙書時以本官行太子左衛率其封衛國公也授濮州刺史蓋太宗以功臣爲世襲刺史後雖不行皆史宜書集本有而不書者問也六字其餘略之可也故聊志之治平元年三月二十二日書右真蹟

唐顏師古等慈寺碑貞觀二年

右等慈寺碑顏師古撰其寺在鄭州汜水唐太宗破王世充竇建德乃於其戰處建寺云爲陣亡士薦福唐初用兵破賊處多大抵皆造寺自古創業之君其英豪智略有非常人可及者矣至其卓然信道而知義則非積學誠明之士不能到也太宗英雄智識不世之主而牽感習俗之弊猶崇信浮圖豈以其言浩博無窮而好盡物理爲可喜耶蓋自古文姦言以感聽者雖聰明之主或不能免也惟其可喜乃能感人故余於集本有其字本紀譏其牽於多愛者謂此也治平元年清明後一日書右真蹟

隋郎茂碑貞觀五年

右隋郎茂碑李百藥撰其弟賴亦有碑在今鎮府北大墓林中余爲都轉運使時得之隋書列傳言茂卒於京師此碑云從幸江都而卒史氏之謬當以碑爲正右集本

又

碑在大墓林中余爲都轉運使時得之殆今蓋二十年矣嘉祐八年三月二十二日上御延和放進士許將等及第明日歇泊假閑闕遂書隋書列傳言茂卒于京師此碑云從幸江都而卒史氏之謬當以碑

爲正焉右真蹟

唐郎頴碑貞觀五年

右唐郎頴碑李百藥撰宋才書字畫甚偉頴父名基字世業而李百藥書頴世次但云父世業又書頴兄茂碑亦然考其碑文有皇基締構之言則基字當時公私無所諱避而於書世次四字集本作百藥書頴父字而不名不詳其義也是以君子貴乎博學集本有頴事唐爲大理卿隋唐之時屢定律令蓋法吏也一十九字嘉祐八年九月二十四日書右真蹟

唐郎頴碑陰題名歲月未詳

右郎頴碑陰題名柱國府僚佐三十二人常山公府國官一百七人合一百三十九人爲一卷柱國府長史司馬掾屬各一人諮議記室司倉司功司戶司兵司鎧司司法司田司士參軍事各一人又有參軍事五行參軍十人典籤三人常山國官國令大農各一人常侍侍郎國尉各二人典衛六人舍人四人城局廟長學官各一人食官廐牧各四人典府長一人典府丞二人親事七十五人頴以正觀四年卒此蓋唐制也右集本

唐九成宮醴泉銘貞觀六年

右九成宮醴泉銘唐秘書監魏徵撰歐陽率更書九成宮即隋仁壽宮也太宗避暑於宮中而乏水以杖琢地得水而甘因名醴泉焉右集本

唐歐陽率更臨帖歲月未詳同是率更書附此

右率更臨帖吾家率更蘭臺世有清德其筆法精妙迺其餘事豈止士人模楷雖海外夷狄皆知爲貴而後裔所宜勉旃庶幾不頹其美也右真蹟

唐岑文本三龕記貞觀十五年

右三龕記唐兼中書侍郎岑文本撰起居郎褚遂良書字畫尤奇偉

在河南龍門山山夾伊水東西可愛俗謂其東曰香山其西曰龍門龍門山壁間鑿石爲佛像大小數百多後魏及唐時所造惟此三龕像最大乃魏王泰爲長孫皇后造也右集本

唐孟法師碑貞觀十六年

右孟法師碑唐岑文本撰褚遂良書法師名靜素江夏安陸人也少而好道誓志不嫁隋文帝居之京師至德宮至唐太宗十二年卒年九十七右集本

唐皇甫忠碑貞觀十四年

右皇甫忠碑著作佐郎李儼撰忠爲泰州龍門令歲滿縣民前左勳衛裴公隱等一千三百人申省請留八座報云公等請來遲晚縣令今已替訖好人堪用縣國共須豈一縣士庶獨懷怖或作恚惜所請不允忠以唐太宗時爲令當時臺省文字如此可愛泰州者義寧元年以河中之汾陰龍門置治汾陰武德二年徙治龍門太宗十七年州廢今碑後列縣人姓名有錄事鄉長鄉老里正縣博士助教佐史等今之縣吏惟錄事里正其名在爾右集本

唐辨法師碑顯慶二年當載于後同是李儼撰附此

右辨法師碑李儼撰薛純陀書純陀唐太宗時人集本有也字其書有筆法其適勁精悍不減吾家蘭臺意其當時必爲知名士而今世人無知者然其所書亦不傳於後世余家集錄可謂博矣所得純陀書祇此而已知其所書必不止此而已也蓋其不幸湮沉泯滅非余偶錄得之則遂不見于世矣迺知士有負絕學高世之名而不幸不傳於後者可勝歎哉治平元年閏五月晦日書右真蹟

唐孔穎達碑貞觀二十二年

右孔穎達碑于志寧撰其文磨滅然尙可讀今以其可見者質於唐書列傳傳所闕者不載穎達卒時年壽其與魏鄭公奉勅其脩隋書亦不著又其字不同傳云字仲達碑云字冲遠碑字多殘缺惟其名

字特完可以正傳之繆不疑以冲遠爲仲達以此知文字轉易失其真者何可勝數幸而因余集錄所得以正其訛舛者亦不爲少也乃知余家所藏非徒說好而已其益豈不博哉集本無此六字治平元年端午日書右真蹟

唐薛稷書貞觀永徽之間

薛稷書刻石者余家集錄頗多與墨蹟互有不同唐世顏柳諸家刻石者字體時時不類謂由模刻人有工拙昨日見楊褒家所藏薛稷書君謨以爲不類信矣凡人於事不可一槩有知而好者有好而不知者有不好而不知者有不好而能知者喪於書畫好而不知者也畫之爲物尤難識其精麤真僞非一言可達得者各以其意披圖所賞未必是秉筆之意也昔梅聖俞作詩獨以吾爲知音吾亦自謂舉世之人知梅詩者莫吾若也吾嘗問渠最得意處渠誦數句皆非吾賞者以此知披圖所賞未必得秉筆之人本意也右集本

唐益州學館廟堂記永徽元年顏有意書

高朕之名於義不安頗疑有意得於古碑之訛缺爾存之以俟博學者右集本

唐徐王元禮碑咸亨三年

右徐王元禮碑崔行功撰趙仙客書元禮唐高祖子也以碑考傳年壽官閣悉同而碑云使持節徐譙泗三州諸軍事徐州刺史又云贈太尉使持節大都督冀相具滄德魏博等八州諸軍事冀州刺史傳云爲徐州都督又云贈冀州大都督傳既簡略又都無法而碑之所書亦失也蓋刺史非兼州之官都督非一州之號碑云持節徐譙泗三州諸軍而傳獨爲徐一州刺史此其失也當如前史持節秦涼州諸軍事秦涼二州刺史乃爲得爾其書贈官則如碑之書是矣蓋爲一州刺史而兼督八州軍集本有州字事爾都者有所兼總之名也此特小故而余區區辯之者前史失之久矣又國朝自削方鎮之

權而節度使都督無復兼州而舊名不除是節度都督自施於己此不可不正其失也治平甲辰中元日書右真蹟

唐龍興宮碧落碑咸亨元年

右碧落碑在絳州龍興宮宮有碧落尊像篆文刻其背故世傳爲碧落碑據李璿之以爲陳惟玉書李漢以爲黃公譔書莫知孰是洛中紀異云碑文成而未刻有二道士來集本無此字請刻之閉戶三日不聞人聲人怪而破戶有二白鷓飛去而篆刻宛然此說尤性世多不信也碑文言有唐五十三祀龍集數祥乃高宗總章三年歲在庚午也又云哀子李訓誼譔譔爲妣妃造石像按唐書韓王元嘉有子訓誼譔而無譔又有幼子訥元嘉以則天垂拱四年見殺在總章三年集本有立碑二字後十八年集本有史字有子訥不足性而不應無譔蓋史官之闕也嘉祐八年十月四日書右真蹟

唐智乘寺碑咸亨四年

右智乘寺碑集本有碑字者唐鄭惠王所作也惠王名元懿高祖第十三子也有子十人刻于碑後而第五子樂陵公闕其名按唐書宗室世繫表集本作譔樂陵公名球不知集本有碑字何爲獨闕也今唐書元表以嗣王敬爲璣樂平公珪爲樂安公新平公璩爲遂三者皆史家之失當以碑爲正世繫譜牒歲久傳失尤難考正而碑碣皆當時所刻理不得差故集古所錄於前人世次是正頗多也治平元年清明前一日書右真蹟

唐吳廣碑總章二年

右吳廣碑不著書撰人名氏而字畫精勁可喜廣字黑闥唐初與程知節秦叔寶等俱從太宗征伐後與殺建成有功至高宗時爲洪州都督以卒然唐書不見其名氏惟會要列陪葬昭陵人有洪州刺史吳黑闥亦不知其名廣也其名字事蹟幸見於後世者以有斯碑也碑字稍磨滅世亦罕見獨余集錄得之遂以傳者以其筆畫之工也

故余嘗爲蔡君謨言書雖學者之餘事而有助於金石之傳者以此也治平元年八月八日書右真蹟

唐九門縣西浮圖碑上元二年

右九門縣西浮圖碑唐應詔四科舉董行思文清河傳德節書題云九門縣合鄉城人等爲國建浮圖之碑浮圖在智矩寺中寺今亦廢碑上元三年建按唐有兩上元此碑云歲在丙子乃高宗上元三年也肅宗上元三年歲在壬寅爾右集本

唐陶雲德政碑永淳二年

右唐中州錄事張義感撰雲字夫舉河南伊闕人也高宗時爲恆州刺史碑永淳三年立予爲河北轉運使至真定府見碑仆在府門外半埋地中命工掘出立于廡下字爲行書筆蹟遒麗而不著書者姓名惜哉右真蹟

隋汎愛寺碑大業五年 誤真此

李伯樂集本作樂下同字僅存其下磨滅而書字猶可辨疑此碑伯樂自書字畫老勁可喜秋暑鬱然覽之可以忘勸治平丙午孟夔攝事齋宮書南譙醉翁六一居士右真蹟

集古錄跋尾卷第五

集古錄跋尾卷第六 集一百三十九

唐八都壇寶錄歲月見本文

右八都壇寶錄撰人名元質不見其姓又不著書人名氏其字畫亦可愛碑首題云大唐八都壇神君之寶錄其文云都望八山之始壇也此地名山封龍之類有八因壇立廟遂為號焉封龍山在今鎮州其八七山不見其名又云漢光和中有一碑而今亡此碑垂拱三年立

右集本

唐魏載墓誌銘歲月見本文
右魏載墓誌銘其序云祖徵諡曰文正父叔玉光祿卿載以弘文生對策高甲授太常寺奉禮郎以疾謝職尋調懷州司兵參軍屬惟集本作維下同揚詭道不載斯焚譴及宗姻旋加此累以垂拱二年終於嶺外春秋三十有二所謂惟揚詭道者乃徐敬業起兵於揚州誅武后不克也時敬業以前整屋尉魏思温為軍師集本作帥所謂譴及宗姻者疑敬業敗載坐思温死嶺南耳今據新唐書宰相世系表鄭公諸房都無思温及載而叔玉但著一子膺為秘書丞豈載以官卑貶死無後而歿不見耶載死不幸而家譜不錄史官不書八字集本作家譜史官不錄非事載斯誌而誌錄於余其遂泯滅於無聞乎治平元年四月廿三日書右真蹟

唐乙速孤神慶碑載初元年

右乙速孤神慶碑弘文館學士苗神客撰神慶唐初任三衛高宗時為太子右虞候副率以卒乙速孤氏在唐無顯人惟以其姓見於當時者神慶一人而已元和姓纂但云代人隨魏南徙而已其敘神慶世次又多闕繆而此碑所載頗詳云其先王氏太原人有關文代祖顯為後魏驃騎大將軍賜姓乙速孤氏遂為京兆醴泉人曾祖貴隋河州刺史和仁郡公祖安隋益州都督父晟唐驃騎將軍乙速孤氏世無可稱而其姓出夷狄莫究其詳惟見於此碑者可以補姓纂之

略以備考求故特錄之右集本

唐薛仁貴碑天寶二年

右薛仁貴碑苗神客撰云公諱禮字仁貴河東汾陰人也唐書列傳云仁貴絳州龍門人又不云名禮余家集錄薛氏碑尤多據仁貴子楚玉碑亦云父仁貴爾仁貴為唐名將當時甚顯著往往見於他書未嘗有云薛禮者仁貴本田家子奮身行陣其僅知姓名爾其曰各禮字仁貴者疑後世文士或其子孫為增之也列傳又載仁貴降九姓事云軍中為之歌曰將軍三箭定天山戰士長歌入漢關仁貴卒於永淳中碑以天寶中建不載漢關之歌不應遺略疑時未有此歌五字集本作當時無此歌亦為後人所增爾治平元年端午日書右真蹟

唐尹氏闕文歲月見本文

右尹氏闕文在襄州題云唐孝子尹仁恕闕萬歲通天二年旌表萬歲通天則天之年號也可謂昏亂之世矣然尹氏猶見旌表孔子以謂忠信可行於蠻貊信矣孝悌見尊於昏亂也

唐尹孝子旌表文歲月闕

唐之致治之意深矣嗚呼不得而見矣此碑尤可惜也右集本
唐孝子張常消旌表碣貞觀五年誤雕在此

唐孝子張常消旌表碣貞觀五年誤雕在此

右唐孝子張常消旌表碣文字磨滅僅可見其髣髴蓋孝悌之為名人之所甚慕而旌表非為一世勸也故特錄之者惜其將遂不見於後世也其文辭筆畫亦自可佳然不專取乎此也右集本

唐渭南令李君碑聖曆元年

右鴻州渭南縣令李君清德碑馬吉甫撰按唐書則天天授二年析雍州之渭南慶山置鴻州遂以慶山鴻州渭南高陵櫟陽置鴻州大足二年廢治平二年正月十四日書右真蹟

同前

右渭南令李君碑其首題云大周鴻州渭南縣按新唐書則天天授二年析雍州之渭南慶山置鴻門縣遂以渭南慶山鴻門高陵以置鴻州大足二年州廢矣右集本

唐流杯亭待宴詩歲月見本文

右流杯亭待宴詩者唐武后久視元年幸臨汝湯留宴羣臣應制詩也李嶠序殷仲容書開元十年汝水壞亭碑遂沉廢至正元中刺史陸長源以為嶠之文仲容之書絕代之寶也乃復立碑造亭又自為記刻其碑陰武氏亂唐毒流天下其遺蹟宜為唐人所棄而長源當時號稱賢者乃獨區區於此何哉然余今又錄之蓋亦以仲容之書可惜是以君子患乎多愛右真蹟

同前

右流杯亭待宴詩者唐武后久視元年幸汝州温湯羣臣應制詩也李嶠序殷仲容書開元中汝水壞其碑亭碑亦沉沒貞元中陸長源為刺史以為嶠序仲容書絕代之寶也乃為之造亭立碑自記其事於碑陰武氏亂唐毒流天下其遺蹟宜為唐人所棄而長源當時賢者區區於此何哉然余今又錄之者特以仲容書爾是以君子患乎多愛右集本

唐司刑寺大脚跡勅長安二年

右司刑寺大脚跡并碑銘二閣朝隱撰附詩曰匪手攜之言示之事蓋諭昏愚者不可以理曉而決疑惑者難用空言雖示之已驗之事猶懼其不信也此自古聖賢以為難語曰中人以下不可以語上者聖人非棄之也以其語之難也佛為中國大患非止中人以下聰明之智一有惑焉有不能解者矣方武氏之時毒被天下而刑獄慘烈不可勝言而彼佛者遂見光蹟於其間果何為哉自古君臣事佛未有如武氏之時威也視朝隱等碑銘可見矣然禍及生民毒流王室亦未有若斯之甚也碑銘文辭不足錄錄之者所以有集本無此字

警也俾覽者知無佛之世詩書雅頌之聲斯民蒙福者如彼有佛之威其金石文章與其人之被禍者如此可以少思焉嘉祐八年重陽後一日書右真蹟

唐韓覃幽林思武后時

右幽林思廬山林數人韓覃撰余為西京留守推官時因遊嵩山得此詩愛其辭翰皆不俗後十餘年始集古金石之文發篋得之不勝其喜余在洛陽凡再登嵩嶽其始往也與集本作以梅聖俞楊子聰俱其再往也與謝希深尹師魯王幾道楊子聰俱當發篋見此詩以入集時謝希深楊子聰已死其後師魯幾道聖俞相繼皆死蓋遊嵩在天聖十年是歲改元明道余時年二十六距今嘉祐八年蓋三十二年矣遊嵩六人獨余在爾感物追往不勝二字集本作可為愴然六月旬休日書右真蹟

唐武盡禮寧照寺鍾銘景龍三年

右武盡禮筆法精勁當時宜自名家而唐人未有稱之見於文字者豈其工書如盡禮者往往皆是特今人罕及爾余每得唐人書未嘗不嘆今人之廢學也右真蹟

唐韋維善政論先天元年

右韋維善政論著作即楊齊哲撰維先天下中為坊州刺史齊哲所撰其實德政碑也特異其名爾余嘗思文士不能有所發明以警未悟而好為新奇以自異欲以怪而取名如元結之徒是也至於樊宗師遂不勝其繁矣如齊哲之文初無高致第易碑銘為論贊爾右集本

唐令長新戒開元中

右令長新戒唐開元之治威矣玄宗嘗自擇縣令一百六十二人賜以丁寧之戒其後天下為縣者皆以新戒刻石今猶有存者余之所得者六世人皆忽不以為貴也玄宗自除內難遂致集本作至太平世徒以為英豪之主然不知其興治之勤用心如此可謂為政知本

未矣然鮮克有終明智所不免惜哉新戒凡六其一河內其二虞城
其三不知所得之處其四汜水其五穰其六舞陽嘉祐八年六月十
日書右真蹟

唐華陽頌天寶九年

右華陽頌唐玄宗詔附玄宗尊號曰聖文神武皇帝可謂感矣而其
自稱曰上清弟子者何其陋哉方其肆情奢淫以極富貴之樂蓋窮
天下之力不足以贍其欲使神僊道家之事爲不無亦非其所可冀
矧其實無可得哉甚矣佛老之爲世惑也佛之徒曰無生者是畏死
之論也老之徒曰不死者是貪生之說也彼其所以貪畏之意篤則
棄萬事絕人理而爲之然而終於無所得者何哉死生天地之常理
畏者不可以苟免貪者不可以苟得也惟積習之久者成其邪妄之
心佛之徒有臨死而不懼者妄意乎無生之可樂而以其所樂勝其
所可畏也老之徒有死者則相與諱之曰彼超去矣彼解化矣厚自
誣而託之不可詰或曰彼術未至故死爾前者苟以遂其非後者從
而惑之以爲誠然也佛老二者同出於貪而所習則異然由必棄萬
事絕人理而爲之其貪於彼者厚則捨於此者果若玄宗者方溺於
此而又慕於彼不勝其勞是真可笑也右集本

唐有道先生葉公碑開元五年

右有道先生葉公碑李邕撰并書余集古所錄李邕書頗多最後得
此碑於蔡君謨君謨善論書爲余言邕之所書此爲最佳也右真蹟

唐李邕嵩嶽寺碑開元二十七年

右嵩嶽寺碑唐淄州刺史李邕撰胡英書英之書世所重也其文云
寺後魏孝明帝之離宮初名閑居寺仁壽二年改爲嵩嶽寺也右集
本

唐李邕端州石室記開元十五年

右端州石室記唐李邕撰不著書人名氏考其筆蹟似張庭珪書疑

庭珪所書也右集本

唐獨孤府君碑歲月闕

右獨孤府君碑李邕撰蕭誠書誠書世多有而此尤佳碑在峴山亭
下余自夷陵徙乾德令嘗登峴山讀此碑碑爲四面而一面字完今
人家所傳祇有一面而余所得有一面故其一面頗有訛缺也府君
諱冊字伯謀河南人也其文不完故不見其終始右集本

同前歲月闕

右碑在峴山亭下余自夷陵徙乾德令嘗登峴山讀此碑碑爲四面
而一面字完人家多有之而余所得蓋二面也故其一面頗有訛缺
也蕭誠書世數數有之而此尤佳也右真蹟

唐裴大智碑開元二十九年

右裴大智碑李邕撰蕭誠書誠以書知名當時今碑刻傳於世者頗
少余集錄所得纔數本爾以余之博采而得者止此故知其不多也
然字畫筆法多不同疑模刻之有工拙惟此碑及獨孤冊碑字體同
而最佳冊碑在襄陽而不完可惜也二碑皆李邕撰而誠書集本有
焉字治平元年清明後一日書右真蹟

唐張嘉正碑開元二十六年

右張嘉正碑李邕撰蔡有鄰立書集本有按字李絳論事集言吐突
承瓘欲於安國寺爲憲宗立紀聖德碑乃先立碑建樓請學士撰文
絳疏論以爲不可憲宗遽命以牛百頭拽碑倒蓋未撰文而先立碑
建樓此碑有鄰又三字集本作文云立書亦應先立石矣今人立碑
須鐫刻成文然後建立蓋今昔所爲不同各從其便爾治平元年七
月二十日書右真蹟 已上六碑類李邕所撰不以歲月爲序

唐郭知運碑銘開元十年

右郭知運碑銘蘇頌撰其書知運子四人皆有次第曰英傑英奇英
協英彥而張說亦爲集本有郭字知運撰碑其書知運子與頌集本

有此碑二字正同而唐書知運傳書其子二人而無英奇英協英彥但云二子英傑英又而已十八字集本作英傑英又而無英奇英協英彥而蘇張二碑又無英又英奇等三子在唐不顯史家一本作官闕略而或有之英又嘗為西川節度集本有使字其事甚著史官不應失集本作差其世家而集本有蘇張二字二公作銘在郭知運卒後不遠亦不應闕其子孫莫可究其孰失也姑志集本作誌之以俟知者嘉祐八年十月十八日書右真蹟

唐御史臺精舍記開元十一年

右御史臺精舍記崔湜撰梁昇卿書讀其文則湜於佛可為疑篤信者矣唐書列傳云桓彥範等當國畏武三思使湜陰伺其姦而三思恩寵日盛湜反以彥範等計告之遂勸三思速殺彥範等以絕人望因薦其外兄周利正以害彥範等又云湜貶襄州刺史以譴王事當死賴劉幽求張說救護得免後為宰相陷幽求嶺表諷周利正殺之不果又與太平公主逐張說其餘傾邪險惡不可勝紀世言佛之徒能以禍福怖小人使不為惡又為虛語矣以斯記之言驗湜所為可知也故錄之於此其碑首題名多知名士小字頗佳可愛也治平元年三月九日書右真蹟

唐西嶽大洞張尊師碑開元十四年

右西嶽大洞張尊師碑王延齡撰李慈書尊師名敬忠其事迹余無所取所錄者以慈書爾慈之書體兼虞褚而道麗可喜然不知為何人以其書當時未必不見稱於世蓋唐人善書者多遂不得獨擅既又無他可稱遂至泯然於後世以余集錄之博慈所書碑祇得此爾尤為可惜也治平元年七月廿日書右真蹟

唐景陽井銘開元二十一年

右景陽樓下井銘不著撰人名氏述隋滅陳叔寶與張麗華等投井事其後有銘以為集本作著戒又有唐江寧縣丞王震井記云井在

興嚴寺其石檻銘有序稱余者晉王廣也其文字皆磨滅僅可識其十一二叔寶事前集本無此字史書之其詳不必見於此然錄之以見煬帝躬自滅陳目見叔寶事又嘗自銘以為戒如此及身為淫亂則又過之豈所謂下愚之不移者哉今其銘文隱隱尚可讀處有云前車已傾負乘將沒者又可歎也嘉祐八年十二月二十六日書右真蹟

唐華嶽題名歲月見本文

右華嶽題名自唐開元二十三年訖後唐清泰二年實二百一十年題名者五百集本有十字一人再題者又三十一人集本有錄為十卷四字往往當時知名士也或兄弟同遊或子姪並侍或寮屬將佐之或在或山人處士之相攜或奉使奔命有行役之勞或窮高望遠極登臨之適其富貴貧賤歡樂憂悲非惟人事百端而亦世變多故開元二十三年集本有歲在二字丙午集本作子是歲天子集本有躬字耕籍田肆大赦羣臣方頌太平請封禪蓋有唐極盛之時也清泰二年集本有歲在二字乙未廢帝篡立之明年也是歲石敬瑭以太原反召契丹入自瀋門廢帝自焚於洛陽而晉高祖入立蓋二字集本作自太原五代極亂之時也始終二百年間或治或亂或盛或衰而往者來者先後者雖窮達壽夭參差不齊而斯五百人者卒歸於其盡也其姓名歲月風霜剝裂亦或在或亡其存者獨五集本作有千仞之山石爾故特錄其題刻每撫卷慨然何異臨長川而歎逝者也治平元年清明後一日書右真蹟

唐石臺道德經歲月見本文

右老子道德經唐玄宗注開元二十三年道門威儀司馬秀等請於兩京及天下應脩官齋等州皆立石臺刊勒其經文御書其注皆諸王所書此本在懷州右集本

唐羣臣請立德德經臺奏歲月見本文

右羣臣請立道德經臺奏并書注諸王列名附唐玄宗諸子三十人其一是爲肅宗其七不及得封而早夭唐書列傳所載二十二人以注經列名於此者十八人按集本有明皇所書道德經七字道士尹愔奏請懷州依京樣摹勒石臺乃開元二十五年也皇太子瑛以二十五年廢二十六年始立忠王瑛爲皇太子二十七年始更名紹則當書注時不得有皇太子紹也信王瑛義王玳豐王珙陳王珪涼王璿汴王璿皆以二十一年封當書注時皆年幼集本有疑字未能書而集本作又今經注字皆一體疑非諸王所書而後人追寫其名爾舊唐書以信王瑛爲瑒濟王環爲環壽王瑒爲瑒瑒名集本有別字見於武惠妃碑爲瑒與此同當爲瑒也集本無也字有不疑而二字此碑列名既可疑則瑒瑒二名未知孰是也嘉祐八年癸卯九月十日書右真蹟

唐陝州盧象廳事讚開元二十四年
右盧象廳事讚唐玄宗撰并書象爲陝州刺史玄宗行幸過陝州書其廳壁而刻之右集本

唐鶴鶴頌歲月關
當皇祐至和之間余在廣陵有勅使黃元吉者以唐明皇自書鶴鶴頌本示余把玩久之後二十年獲此石本於國子博士楊褒又三年來守青州始知刻石在故相沂公宅熙寧三年五月二十八日書右集本

唐玄宗謁玄元廟詩歲月關
右謁玄元廟詩唐玄宗撰并書余嘗見世有玄宗所書鶴鶴頌與此字法正同碑在北邙山上洛陽人謂之老君廟也右集本

唐裴光庭碑歲月見本文
右裴光庭碑張九齡撰玄宗御書按唐書列傳云光庭素與蕭嵩不平及卒博士孫琬希嵩意以其用循資格非獎勵之誼證曰克平帝

間特賜證曰忠憲今碑及題額皆爲忠獻傳云撰搖集本作瑤山往則而碑云往記光庭以開元二十一年薨二十四年建此碑玄宗自書不應誤皆當以碑爲是集本有也字治平元年三月二十日書右真蹟

唐萬回神迹記碑開元二十五年

右萬回集本有神迹記三字碑徐彥伯撰其事固已集本作可怪矣玄宗英偉之主彥伯當時名臣也而君臣相與尊寵稱述之如此欲使愚庸之人不信不惑其可得乎世傳道士罵老子云佛以神怪禍福恐動世人俾皆信嚮集本有改僧尼得享豐饒七字而爾徒二字集本作善老於高談清淨遂使我曹寂寞此雖鄙語有足采也治平元年三月八日書右真蹟

唐安公美政頌開元二十九年

右安公美政頌房璠妻高氏書安公者名庭堅其事蹟非奇而文辭亦匪佳作惟其筆畫道麗不類婦人所書余所集本無此字集錄亦已博矣而婦人之筆二字集本作筆畫著於金石者高氏一人而已然余常與蔡君謨論書以謂書之威莫威於唐書之廢莫廢集本作甚於今余之所錄如于頔高駉下至集本有楷書手三字陳游瓊等書皆有蓋集本有唐之二字武夫悍將盤楷書手輩字皆可愛今文儒之威其書屈指可數者無三四人非皆不能蓋忽不爲爾唐人書見於今而名不知於當時者如張師丘繆師愈之類蓋集本有又字不可勝數也非余錄之則將遂泯然於後世矣余於集古不爲無益也夫治平元年正月十三日書右真蹟

唐石壁寺鐵彌勒像頌開元二十九年

右太原府文城縣石壁寺鐵彌勒像頌者集本有林謂撰三字參軍房璠妻高氏書余所集錄古文自周秦以下訖于顯德凡爲千卷唐居其十七八其名臣顯達下至山林幽隱之士所書莫不皆有而婦

人之書惟此高氏一人爾然其所書刻石存於今者惟此頌與安公
美政頌爾二碑筆畫字體遠不相類殆非一人之書疑模刻不同亦
不應相遠如此又疑好事者寓名以爲奇也識者當爲辨之治平元
年端午日書右真蹟

唐郎官石記歲月關

右唐右司員外郎陳九言撰張旭書旭以草書知名此字真楷可愛
記云自開元二十九年已後郎官姓名列于次而此本止其序爾石
集本

唐開元聖像碑天寶元年

右開元聖像碑陳知溫書唐開元之治威矣至於天寶而溢焉方其
盛時人主意氣之驕超然遂欲追其僊於雲表其夢寐恍忽集本作
惚云有見焉者雖是非真僞難明於香藹亦其注心於物精神會通
集本作通會志苟至焉無不獲也唐書著集本作紀玄宗事至於神
仙道家頗集本作類不詳悉而此碑所集本無此字載夢真事最
備故特錄之以見其集本作當時君臣吁俞相與言語者止於如集
本無此字此俾覽者得以迹其威衰治亂云右真蹟

唐大照禪師碑歲月見本文

右大照禪師碑唐吏部員外郎盧僊撰伊闕縣尉集賢院待制兼校
理史惟則書碑天寶元年立唐世分書名家者四人而已韓擇木李
潮蔡有鄰及惟則也右集本

唐舞陽侯祠堂碑歲月見本文

右舞陽侯祠堂碑唐王利器撰史惟則八分徐浩篆額天寶二年縣
令張紫陽修樊噲廟文及書篆皆可愛也右集本

唐崔潭龜詩天寶五年

右崔潭龜詩蔡有鄰書唐世以八分名家者四人韓擇木蔡有鄰李
潮史惟則也韓史二家傳於世者多矣李潮僅有存者有鄰之書亦

頗難得而小字尤佳若石經藏讀崔潭龜詩與三代彝鼎銘何異右
真蹟

唐興唐寺石經藏讀開元中

右興唐寺石經藏讀皆其作者自書而八分者數家惟蔡有鄰著其
姓氏有鄰名重當時杜甫嘗稱之於詩其爲苑咸所書小字與三代
器銘何異可謂名實相稱也余家集錄有鄰書頗多皆不若此讀故
尤寶之余初不識書因集古著錄所閱既多遂稍識之然則人其可
不勉彊於學也治平元年二月晦日書右真蹟

唐蔡有鄰盧舍那珉像碑開元十六年

右盧舍那珉像碑蔡有鄰書在定州唐世名能八分者四家韓擇木
史惟則世傳頗多而李潮及十七字集本作韓擇木等四家爲最而
有鄰特爲難得慶曆中今昭文韓集本作相公在定州爲余得此本
余所集錄自非衆君子共成之不能若此之多也右真蹟

唐植栢頌天寶元年

唐世八分四家而已韓擇木史惟則之書見於世者頗多蔡有鄰甚
難得而李潮僅有亦或作爾皆後人莫及也不惟筆法難工亦近時
學者罕復專精如前輩也右集本

唐美原夫子廟碑天寶八年

右美原夫子廟碑縣令王岳字山甫撰并書碑不知在何縣岳天寶
時人字畫奇怪初無筆法而老逸不羈時有可愛故不忍棄之蓋書
流之狂士也文字之學傳自二代以來其體隨時變易轉相習遂
以名家亦烏有集本有定字去耶至魏晉以後漸分真草而羲獻父
子爲一時所尚後世言書者非此二人集本有則字皆不爲法其藝
誠爲精絕然謂必爲法則初何所據所謂集本無此二字天下孰知
夫正法哉岳書固自放於怪逸矣聊存之以備博覽治平元年八月
十一日書右真蹟

唐鄭預注多心經天寶元年

右鄭預注多心經不著書人名氏疑預自書蓋開元天寶之間書體類此者數家如擣練石韓公井記洛祠志皆一體而皆不見名氏此經字體不減三記而注尤精勁蓋他處未嘗有故錄之而不忍棄矧釋氏之書因字而見錄者多矣余每著其所以錄之意覽者可以察也治平元年夏至日大熱翫此以忘暑因書石真蹟

集古錄跋尾卷第六

集古錄跋尾卷第七 集一百四十

唐開元金錄齋頌天寶九年衛包書撰

右開元金錄齋頌雖不著書人姓氏而字為古文實為包書也唐世華山碑刻為古文者皆包所書包以古文見稱當時甚感蓋古丈世俗罕通徒見其字畫多奇而不知其筆法非工也余以集錄所見二代以來古字尤多遂識之爾右集本

唐龍興七祖堂頌天寶十年

右龍興寺七祖堂頌陳章甫撰胡需然書需然筆法雖未至而媚熟可喜今上黨佛寺畫壁有需然所書多為流俗取去匣而藏之以為奇翫余數數於人家見之其墨蹟尤工非石刻比也右真蹟

唐明禪師碑天寶十年 鄭靈之撰徐浩書

秋暑困甚覽之醒然治平丙午孟饗致齋東閣書右真蹟

唐徐浩玄隱塔銘天寶十一年

右玄隱塔銘徐浩撰并書嗚呼物有幸不幸者視其所託與其所遭如何爾詩書遭秦不免煨燼而浮圖老子以託於字畫之善遂見珍藏余於集錄屢誌此言蓋慮後世以余為惑於邪說者八字集本作之疑余也比見當世知名士方少壯時力排異說及老病畏死則歸心釋老反恨得之晚者往往如此也可勝歎哉右真蹟

唐顏真卿書東方朔畫贊天寶十二年

右東方朔畫贊晉夏侯湛撰唐顏真卿書贊在文選中今較選本二字不同而義無異也選本曰棄俗登仙而此云棄世選本曰神交造化而此云神友右集本

唐畫贊碑陰歲月見本文

右畫贊碑陰唐顏真卿撰并書湛贊開元八年德州刺史韓思復刻于朝天寶十二年真卿始別書之右集本

唐顏魯公題各歲月見本文

右靖居寺題名唐顏真卿題按唐書紀傳真卿當代宗時為檢校刑部尚書為宰相元載所惡坐論祭器不修為誹謗貶破州員外別駕

撫州湖州刺史載誅復為刑部尚書而此題名云永泰二年真卿以罪佐吉州與史不同據真卿湖州放生池碑陰所序云貶破州旬餘再貶吉州蓋真卿未嘗至破遂貶吉而史氏但據初貶書于紀傳耳真卿大曆二年始移撫州當遊靖居時猶在吉也右集本

同前

右魯公題名言五字集本作顏魯公華嚴靖居寺東西二林題名靖居寺在吉州據魯公言永泰二年真卿以罪貶佐吉州據舊二字集

本作按唐書列傳云真卿代宗時為刑部尚書為宰相元載所惡貶破州員外別駕撫州湖州刺史載誅復為刑部尚書不書其貶吉州也按真卿湖州放生池碑陰自敘云貶破州旬餘再貶吉州蓋真卿未嘗至破遂貶吉州集本無此四字而史官闕漏但書其初貶爾嘉祐八年十月廿三日書右真蹟

唐顏真卿麻姑壇記大曆六年

右麻姑壇記顏真卿撰并書顏公忠義之節皎如日月其為人寬嚴剛勁象其筆畫而不免惑於神僊之說釋老之為斯民患也深矣右集本

唐顏真卿小字麻姑壇記歲月闕

右小字麻姑壇記顏真卿撰并書或疑非魯公書魯公喜書大字余家所藏顏氏碑最多未嘗有小字者惟干祿字書注最為小字而其體法與此記不同蓋干祿之注持重舒和而不局蹙此記道峻緊結尤為集本無此字精悍此所以或者疑之也余初亦頗以為惑及把翫久之筆畫巨細皆有法愈看愈佳然後知非魯公不能書也故聊誌之以釋疑者治平元年二月六日書右真蹟

唐中興頌大曆六年

右大唐中興頌元結撰顏真卿書字尤奇偉而文辭古雅世多模以黃絹爲圖障碑在永州磨崖石而刻之模打既多石亦殘缺今世人所傳字畫完好者多是傳模補足非其真者此本得自故西京留臺御史李建中家蓋四十年前磨崖石真本也尤爲難得爾右集本

又

右中興頌世傳顏氏書中興頌多矣然其崖石歲久剝裂故字多訛缺近時人家所有往往爲好事者嫌其剝缺以墨增補之多失其真余此本得自故西臺李建中家蓋四十年前舊本最爲真爾右真蹟

唐千祿字樣大曆九年

右千祿字樣別有模本文注完全可備檢用此本刻石殘缺處多直以魯公所書真本而錄之爾魯公書刻石者多而絕少小字惟此注最小而筆力精勁可法尤宜愛惜而世俗多傳模本此以殘缺不傳獨余家藏之治平丙午九月二十九日書右集本

唐千祿字樣模本歲月見本文

右千祿字樣模本顏真卿書楊漢公模真卿所書乃大曆九年刻石至開成中遽已訛缺漢公以謂一二工人用爲衣食之業故摹多而速損者非也蓋公筆法爲世楷模而字書辨正僞繆尤爲學者所資故當時感傳於世所以模多爾豈止工人爲衣食業邪今世人所傳乃漢公模本而大曆真本以不完遂不復傳若顏公真蹟今世在者得其零落之餘藏之足以爲寶豈問其不完也故余并錄二本並藏之亦欲俾覽者知模本之多失真也右集本

又

右顏魯公千祿字書乃大曆九年刻石至開成中遽已訛缺蓋由公筆法爲世楷模而字書辨正僞繆尤爲學者所資而當時感傳於世爾漢公謂一二工人用爲衣食之業者惜其傳模多而早損然豈止爲工人爲衣食業也今世人多傳漢公模本而大曆真本以不完遂

不復傳若顏公真蹟今世在者得其零落之餘藏之尤足爲寶豈問其不完也故余并錄二本並藏之亦欲俾覽者知模本之多失真也治平元年正月五日錫慶院賜壽聖節宴歸書右真蹟

唐歐陽珪碑大曆十年

右歐陽珪碑顏真卿撰并書余自皇祐至和以來頗求歐陽氏之遺文以續家譜之闕既得顏魯公歐陽珪碑又得鄭真義歐陽謹墓銘以與家所傳舊譜及陳書元和姓纂諸書參較又問於呂學士夏卿夏卿世稱博學精於史傳因爲余考正訛舛而家譜遂爲定本然獨珪碑所失者四顏公書穆公封山陽郡公呂學士云陳無山陽郡山陽今楚州是也當梁陳時自爲南充州而以連州爲陽山郡然則陳書及舊譜皆云穆公封陽山公爲是而顏公所失者一也舊譜皆云堅石子質南奔長沙顏公云自景達始南遷其所失者二也歐陽生自前漢以來諸史皆云字和伯而顏公獨云字伯和二字義雖不異然當從衆又顏氏獨異初無所據蓋其繆爾其所失者三也元和姓纂及謹銘皆云胤約之子而顏公獨以爲紇子其所失者四也珪之世次不應舛亂如此蓋謹之卒葬在咸亨上元之間去率更未遠真義所誌宜得其實珪卒大曆中唐之士族遭天寶之亂失其譜繫者多顏公之失當時所傳如此不足怪也治平元年夏至日書銘闕其末數句不補右真蹟

唐杜濟神道碑大曆十二年

右杜濟神道碑顏真卿撰并書藝之至者如庖丁之刀輪扁之斲無不中也顏魯公之書刻於石者多矣而有精有粗雖他人皆莫可及然在其一家自有優劣余意傳模鑄刻之有工拙也而此碑字畫適勁豈傳刻不失其真者皆若是歟碑已殘缺銖次不能成集本有其字次第錄其字法爾嘉祐八年中元假日書右真蹟

唐杜濟墓誌銘大曆十二年

右杜濟墓誌銘但云顏真卿撰而不云書然其筆法非魯公不能爲也蓋世頗以爲非顏氏書更俟識者辨之右真蹟

唐顏真卿射堂記大曆十二年

右射堂記顏真卿書魯公在湖州所書刻於石者余家集錄多得之惟放生池碑字畫完好如干祿字書之類今已殘闕每爲之歎惜若射堂記者最後得之今僕射相公筆法精妙爲余稱顏氏書射堂記最佳遂以此本遺余以余家素所藏諸書較之惟張敬因碑與斯記爲尤精勁惜其皆殘闕也右集本

唐張敬因碑大曆十四年

右張敬因碑顏真卿撰并書碑在許州臨潁縣民田中慶曆初有知此碑者稍稍往模之民家患其踐田稼遂擊碎之余在滁陽聞而遣人往求之得其殘闕者爲七段矣其文不可次第獨其名氏存焉曰君諱敬因南陽人也乃祖乃父曰澄曰運其字畫尤奇甚可惜也右集本

又

右魯公之碑世所奇重此尤可珍賞也廬陵歐陽脩書右續添

唐顏勤禮神道碑大曆十四年

右顏勤禮神道碑顏真卿撰并書序顏溫二家之盛云思魯大雅在隋俱仕東宮愍楚彥博同直內史省游秦彥將皆典祕閣按唐書云溫大雅字彥弘弟彥博字大臨第大有字彥將兄弟義當一體而各大者字彥名彥者字大不應如此蓋唐世諸賢名字可疑者多封德彝云名倫房玄齡云名喬高士廉云名儉顏師古云名籀而皆云以字行倫喬儉籀在唐無所諱不知何避而行字余於中書見顏氏裔孫有獻其家世所藏告身三卷以求官者其一思魯除儀同制其一勤禮除詹事府主簿制其一師古加正議大夫制思魯制云內史令臣瑀宣者蕭瑀也侍郎臣封德彝奉舍人臣彥將行不應內史令書

名而侍郎舍人書字又必不稱臣而書字則德彝彥將皆當爲名師古制有尙書左僕射梁國公玄齡右僕射申國公士廉又有吏部尙書君集者侯君集也侍郎纂者楊纂也四人並列於後不應二人書名二人書字也則玄齡士廉亦皆當爲名矣又師古與令狐德棻同制不應德棻書名而師古書字則師古亦當爲名也然余家集錄有申文獻公瑩北記是高宗時許敬宗撰云公諱儉字士廉敬宗與士廉同時人而爲其家作記必不繆誤則士廉又當爲字也然告身書字在理豈安今新唐書雖云房玄齡字喬顏師古字籀以高儉瑩北記爲名則喬籀果爲字乎又按元和姓纂封氏舊人隋通州刺史繡生四子曰德潤德興德如德彝又云德彝更名倫亦不知果是否唐去今未遠事載文字者未甚訛舛殘缺尙可考求而紛亂如此故余嘗謂君子之學有所不知雖聖人猶闕其疑以待來者蓋慎之至也

右集本

唐顏氏家廟碑建中元年

右顏氏家廟碑顏真卿撰并書真卿父名惟貞仕至薛王友真卿其第七子也述其祖禰羣從官爵甚詳右集本

唐顏魯公書殘碑歲月關

右顏氏殘碑以家廟碑考之是顏允南碑也家廟碑云允南歷殿中膳部司封郎中司業金鄉男此碑云肅宗入中京遷司封尋封金鄉縣男又云遷國子司業此碑云二子頴頴頴好爲五言詩授校書郎早卒家廟碑亦云頴好五言校書而此碑又云與弟允臧同時臺省則爲允南可知不疑惟書頴事家廟碑云侍郎蔣冽賞其判此碑云爲隄器所賞小不同爾治平元年寒食日書右真蹟

又

余謂顏公書如忠臣烈士道德君子其端嚴尊重人初見而畏之然愈久而愈可愛也其見寶於世者不必多然雖多而不厭也故雖其

殘缺不忍棄之右集本

唐湖州石記歲月關

右湖州石記文字殘缺其存者僅可識讀考其所記不可詳也惟其筆畫奇偉非顏魯公不能書也公忠義之節明若日月而堅若金石自可以光後世傳無窮不待其書然後不朽然公所至必有遺蹟故今處處有之唐人筆蹟見於今者惟公為最多視其鉅書深刻或託於山崖其用意未嘗不為無窮計也蓋亦有趣好所樂爾其在湖州所書為世所傳者惟干祿字放生池碑尚多見於人家而干祿字書乃楊漢公摹本其真本以訛缺遂不復傳獨余集錄有之惟好古之士知前人意之深則其埋沉磨滅之餘尤為可惜者也右集本

唐顏魯公帖歲月關

右蔡明遠帖寒食帖附皆顏魯公書魯公後帖流俗多傳謂之寒食帖集本無此十三字其集本有後字印文曰忠孝之家者錢文僖公自號也希聖錢公字也又曰化鶴之系者丁崖相印也潤州觀察使者錢惟濟也右真蹟

唐顏魯公二十二字帖歲月關

斯人忠義出於天性故其字畫剛勁獨立不襲前蹟挺然奇偉有似其為人右真蹟

唐顏魯公法帖虞世南帖附 歲月關

右顏真卿書二帖并虞世南一帖合為一卷顏帖為刑部尚書時乞米於李大夫云拙於生事舉家食粥來已數月今又罄乏實用憂煎蓋其貧如此此本墨蹟在予亡友王子野家子野出於相家而清苦甚於寒士嘗模帖刻石以遺朋友故人云魯公為尚書其貧如此吾徒安得不思守約世南書七十八字尤可愛在晉永千字文後今附於此右集本

唐元次山銘歲月關

右元次山銘顏真卿撰并書唐自太宗致治之威幾乎三代之隆而惟文章獨不能革五國二字集本作陳隋之弊既久而集本有其字後韓柳之徒出蓋習俗難變而文章變體集本作之又難也次山嘗開元天寶時獨作古文其筆力雄健意氣超拔不減韓之徒也十二字集本作雖少雄健而意氣不俗亦可謂特立之士哉右真蹟

唐呂誼表上元二年

右呂誼表元結撰顧戒奢八分書景祐三年余謫夷陵過荆南謁呂公祠堂見此碑立廡下碑無跌石埋地中勢若將陪惜其文翰遂得斯本而入于地處字多缺滅今世傳元子文編亦有此文以碑考之集本首尾不完中間時時小異嘗以石本為是然石本亦自多亡缺可不惜哉右集本

又

景祐三年余謫夷陵過荆南謁呂公祠堂見此碑立廡下碑無跌石埋地中勢若將陪惜其文翰遂得斯本而入於地處字多缺滅今世傳元子文編所載首尾不完中間時時小異嘗以石本為是集錄實不為無益矣然石本亦自多亡缺可不惜哉書者顧戒奢也余得此碑二十年矣暇日因偶題之嘉祐八年五月中旬休日書右真蹟

唐元結窪鑄銘承泰二年

右窪鑄銘元結撰羅令問書次山喜名之士也其所有為惟恐不異於人所以自傳於後世者亦惟恐不奇而無以動人之耳目也視其辭翰可以知矣古之君子誠取於無聞然不如是集本有人字之汲汲也右真蹟

唐元結陽華巖銘承泰二年

右陽華巖銘元結撰羅令問書元結好奇之士也其所居山水必自名之惟恐不奇而其文章用意亦然而氣力不足故少遺韻集本無此九字君子之欲著于不朽者有諸其內而見於外者必得於自然

顏子蕭然臥於陋巷人莫見其所爲而名高萬世所謂得之自然集
本有者字也結之汲汲於後世之名亦已勞矣嘉祐八年十二月二
十六日書右真蹟

唐元結晤臺銘大曆二年

右斯人之作非好古者不知爲可愛也然來者安知無同好也邪右
真蹟

唐張中丞傳歲月關

右張中丞傳李翰撰嗚呼集本無此二字張巡許遠之事壯矣秉筆
之士皆喜爲之稱述也然以翰所記考唐書列傳及韓退之所書皆
互有得失而列傳最爲疎略雖云史家當記大節然其大小數百戰
屢敗賊兵其智謀材力亦有過人可以示後者史家皆減而不著甚
可惜也翰之所書誠爲大繁然廣記備言所以備史官之采也右真
蹟

唐李陽冰城隍神記乾元二年

右城隍神記唐李陽冰撰并書陽冰爲縉雲令遭旱禱雨約以七日
不雨將焚其祠旣而雨遂徙廟于西山陽冰所記云城隍神祀典無
之吳越有爾然今非止吳越天下皆有而縣則少也右集本

唐李陽冰志歸臺銘乾元二年

右志歸臺銘唐李陽冰撰并書銘及孔子廟城隍神記三碑並在縉
雲其篆刻比陽冰平生所篆最細瘦世言此三石皆活歲久漸生刻
處幾合故細爾然時有數字筆畫特偉勁者乃真蹟也右集本

唐縉雲孔子廟記上元二年

右縉雲孔子廟記李陽冰撰并書孔子廟像之制前史不載開元八
年國子司業郭瓊奏云先聖孔宣父以先師顏子配其像爲立侍配
享宜坐弟子十哲雖得列像而不在祀享之位按祠令何休范擘等
二十二賢猶蒙從祀十哲請列享在何休等上於是詔十哲皆爲坐

像據陽冰記云換夫子之容貌增侍立者九人蓋獨顏回配坐而閔
損等九人爲立像矣陽冰脩廟在肅宗上元二年其不用開元之詔
何也右集本

唐裴虬怡亭銘永泰元年

右怡亭在武昌江水中小島上武昌人謂其地爲吳王散花灘亭裴
鵬造李陽冰名而篆之裴虬銘李莒八分書刻於島石四十六字集
本作怡亭銘李陽冰篆裴虬撰李莒書銘在武昌江水中有小島亭
在其上人謂其地爲吳王散花灘銘刻于島石常爲江水所沒故世
亦罕傳鵬集本以鵬字作亭裴公作不知何人虬代宗時集本有爲
字道州刺史韓愈集本作退之爲其子復墓志云虬爲諫議大夫有
寵代宗朝屢諫諍數命以官多辭不拜然唐史不見其事李莒華第
也治平二年正月十日孟春薦饗攝事致齋中書東閣書右真蹟

唐李陽冰庶子泉銘大曆六年

右庶子泉銘李陽冰撰并書慶曆五年余自河北都轉運使貶滁陽
屢至陽冰刻石處未嘗不裴回其下庶子泉昔爲流谿今爲山僧墳
爲平地起屋于其上問其泉則指一大井示余集本無此二字曰此
庶子泉也可不惜哉右真蹟

唐李陽冰阮客舊居詩歲月關

右李陽冰阮客舊居詩云阮客身何在僊雲洞口橫人間不到處今
日此中行阮客者不見其各氏蓋縉雲之隱者也彼以遁俗爲高而
終以無名於後世可謂獲其志矣然聖人有所不取也陽冰欲稱其
人而不顯其名字何哉豈阮客見稱於當時而陽冰不慮於後世邪
夫士固有顯聞於一時而泯沒於萬集本作後世者矣顧其道何如
集本作如何也陽冰篆字世傳多矣此磨滅而僅存尤可惜也治平
元年四月二十有六日書右真蹟

唐裴公紀德碣銘歲月見本文

右裴公紀德碣銘唐越州刺史王密撰國子監丞集賢院學士李陽冰篆裴公倣為明州刺史密代之為作此文云云皇唐御神器一百四十二年天下大康海隅小寇結亂颶越因言明州當出兵之衝民物殘弊倣撫綏有惠愛而人思之爾按唐自戊寅武德元年受命至己亥乾元二年乃一百四十二年是時肅宗新起靈武上皇自蜀初還史思明僭號于河北是歲洛陽汝鄭等州皆陷于賊不得云天

又

右裴公紀德碣王密撰裴公倣代宗時為明州刺史密代之碣文云皇唐御神器一百四十二載天下大康而海隅小寇結亂颶越按唐自武德元年至乾元二年實一百四十二年是時肅宗新起靈武上皇自蜀初還史思明僭號于河北是歲洛陽汝鄭等州皆陷于賊不得云天下大康而海隅小寇考于史傳又不見其事然密當時人推次唐年不宜有失王回曰大曆八年廣州哥舒晃作亂此所謂海隅小寇者也自武德元年至是歲實一百五十六年中間則天稱周者十四年去之正得一百四十二年矣豈謂此數以事考驗理宜如此又不知密意為如何也姑志其語以俟知者嘉祐八年十月二十日書石真蹟

唐玄靜先生碑大曆七年

右玄靜先生碑柳識撰張從申書李陽冰篆額唐世工書之士多故以書知名者難自非有以過人者不能也然而張從申以書得名於當時者何也從申每所書碑李陽冰多為之篆額時人必稱為二絕其為世所重如此余以集錄古文閱書既多故雖不能書而稍識字法從申所書棄者多矣而時錄其一二者以名取之也夫非衆人之所稱任獨見以自信君子於是慎之故特錄之必待知者石真蹟

唐龍興寺四絕碑首大曆八年

右四絕碑首者李陽冰篆法慎律師碑額也在揚州龍興寺唐李華文張從申書李陽冰篆額律師者淮南愚俗素信重之謂此碑為四絕碑律師非余所知華文與從申書余亦不甚好故獨錄此篆爾右集本

唐滑州新驛記大曆九年

右新驛記李陽冰篆碑在今滑州驛中其陰有銘曰斯去千載冰生唐時冰今又去後來者誰後千年有人吾不知之後千年無人當盡於斯嗚呼郡人為吾寶之不知作者為誰然買就嘗為李騰序說文字源感稱陽冰此記就為滑州刺史因見斯記而稱之耳陽冰所書世固多有可愛者不獨斯記也嘉祐八年十二月廿六日書石真蹟

唐王師乾神道碑大曆十三年

右王師乾神道碑張從申書余初不甚以為佳但怪唐人多稱之第錄此碑以俟識者前歲在亳社因與秦玠郎中論書玠學書於李西臺建中而西臺之名重於當世余因問玠西臺學何人書云學張從申也問玠識從申書否云未嘗見也因此碑示之玠大驚曰西臺未能至也以此知世以鑿書為難者誠然也從申所書碑今絕不行於世惟子集錄有之者吳季子碑陰記崔圓頌德碑并此纒三爾熙寧二年十月二十七日書石真蹟

集古錄跋尾卷第八 集一百四十一

唐徐方回西塘記寶應 年

右西塘記唐徐方回撰方回云寶應中為南陽令得崔子玉所作平子銘末二十一字陷于廳之西塘按今西鄂石本末句見在方回所得乃南陽半石之末也今又亡矣惜哉右集本

唐禹廟碑大曆三年段季展書

崔巨文傳於今者絕少皆不及此碑季展他所書亦不偉於此治平二年上元日書右真蹟

唐崇徽公主手痕詩大曆四年

右崇徽公主手痕詩李山甫撰崇徽公主者僕固懷恩女也懷恩在肅宗時先以二女嫁回紇其一嫁毗伽可汗少子後號登里可汗者是也其一不知所嫁何人唐書懷恩傳及回紇傳皆不載惟懷恩所上書自陳六罪有云二女遠嫁為國和親以此知其又嘗嫁一女爾此所謂崇徽公主者懷恩幼女也懷恩既反引羌渾奴刺為邊患永泰中病死於靈武其從子各臣以千騎降唐大曆四年始以懷恩幼女為集本有崇徽二字公主又嫁回紇即此集本有公主二字也治平元年三月八日書右真蹟

唐僧懷素法帖大曆十二年

右懷素唐僧字藏真特以草書擅名當時而尤見珍於今世子嘗謂法帖者乃魏晉時人施於家人朋友其逸筆餘興初非用意而自然可喜後人乃棄百事而以學書為事業至終老而集本無此字窮年疲弊精神而不以為苦者是真可笑也懷素之徒是已治平元年八月八日書右真蹟

唐重摹吳季子墓銘大曆十四年

右吳季子墓銘自前世相傳以為孔子所書據張從紳疑記云舊石埋滅開元中玄宗命殷仲容模搨其書以傳然則開元之前自有真

本至大曆中蕭定又刊于石則轉相傳模失其真遠矣按孔子平生未嘗至吳以史記世家考之其歷聘諸侯南不踰楚推其歲月蹤跡未嘗過吳不得親銘季子之墓又其字特大非古簡牘所容第以其各傳之久不可遽廢故錄之以俟博識君子右集本

又

右古篆文曰嗚呼有吳延陵季子之墓自前世相傳以為孔子所書據張從紳疑記云舊石埋滅開元中玄宗命殷仲容模搨本遂傳於世然則開元以前已有刻石矣其後正元中鄭播又為記盧國遷建堂樹碑則今本又非仲容所模者字亦奇偉莫知何人所書按孔子未嘗至吳以史記世家考之其歷聘諸侯南不逾楚推其歲月蹤跡無過吳之理不得親銘季子之墓又其字特大非簡牘所容惟博物君子必能辨之右真蹟

唐竇叔蒙海濤誌大曆中

右海濤誌竇叔蒙撰其書六篇一曰海濤誌二曰濤曆三曰濤日時四曰濤期五曰朔望體象六曰春秋仲月漲濤解余嚮在揚州得此誌甚愛之張千座右之壁冀於朝夕見也已而夜為風雨所壞其後求之凡十五年而復得斯本以示京師好事者皆云未嘗見也右集本

唐鹽宗神祠記大曆中

右鹽宗神祠記錢義方撰近時有尚書郎張席自言家寓解州為余言安邑解縣兩池鹽事云夏月鹽南風來池面紫色須臾凝結如雪土人謂之漫生鹽而兩池歲役畦夫數百種鹽公私耗弊而州縣吏緣以為姦利妻漫生鹽不取誣其苦不可食席博學能言漢唐事尤詳為余復言前世鹽皆自生開元中姜師度為河中尹而鹽池涸始置鹽屯故唐格自開元後遂有畦夫營種之課席因上書論鹽漫生之利官遂罷畦夫而公私皆以為然而議者或害其事乃云漫生鹽

味苦不可食或云暫結復銷不可畜聽者方感其事余因讀義方所記乃云若陰陽調和鬼神驅造不勞人而擅其利與夫擊泉煮海不相為謀由是知唐世鹽非營種為決可信義方大曆時為權鹽使余家集錄古文不獨為傳記正訛繆亦可為朝廷決疑議也右集本

唐鴈門王田氏神道碑代宗時

右唐魏博節度使鴈門郡王田承嗣碑管田副使裴抗撰子緒碑節度判官丘絳撰按唐書列傳承嗣十一子維朝華繹綸綽綽純紳縉而緒次當第七此二碑皆以緒為第六子而無緒自緒而下有繪純紛縉與史不同二碑當時故吏所作必不誤蓋史之繆也其文與字皆不嘉故余特錄其世次而已右真蹟

唐李愬碑大曆四年

右李愬碑李紆撰新唐書列傳云愬十餘子江涵瀛等同被害惟源彭免據李紆載愬子見於碑者寔十二人曰右補闕彭汝州刺史深華陰丞瀛左驍衛兵曹瀛破石丞沆洪州別駕解洛陽尉渭司農主簿汶又云公之薨也彭從玄宗南狩次公而歿深授任他郡其在洛陽者長子江第三子涵與華陰驍衛又兩少子合六人皆從公殲於虜刃破石而下與衆孫之在者僅以孩提免如紆所記愬子盡於是矣未嘗有源也紆但言衆孫孩亦不云有未名子也然則源者史家何從而得之據史言源為司農主簿以碑考之源當為汶也又據碑方愬歿於賊也彭深沆瀛汶六子獲免而史惟云源彭此當以碑為正紆當代宗時為愬作碑自云與愬有通家之好幼奉升堂之慶宜知愬事不繆也右集本

唐甘棠館題名歲月見本文

右甘棠館題名自唐德宗貞元以來止於會昌文字多已磨滅惟高元裕韋夏卿所書尚可讀甚矣人之好名也其功德之盛固已書竹帛刻金石以垂不朽矣至於登高遠望行旅往來慨然寓興於一時

亦必勒其姓名留於山石非徒徘徊俯仰以自悲其身世亦欲來者想見其風流夏卿所記留連感愴意不淺也如高韋二子皆當時知名士也史傳載之詳矣昔杜預沉碑漢水謂萬世之後谷或為陵庶幾復出以見於世其為慮深矣然預之功業不待碑而自傳其區區於此者好名之弊也故士或勤一生以自苦或餓死空山之中甚者蹈水火赴刀鋸以就後世之名為莊生所笑者有矣故余於集古每得前世題名未嘗不錄者閔夫人之甚好名也右集本

唐汾陽王廟碑貞元二年

右郭子儀廟碑高參文其敘子儀功業不甚詳而載破墨姓處木討沙陁處密事則唐書列傳無之蓋子儀微時所歷集本作立其後遂立大勳宜乎史略不書也然唐書有處密處月朱耶孤注等皆是西突厥薛延陁別部名號余於五代史為李克用求沙陁種類卒不見其本末而參謂處密為沙陁不知其何所據也按陳翔子儀家傳亦云討沙陁處墨十二姓與參所書頗同唐書轉密為密當以碑為正右真蹟

唐郭忠武公將佐略貞元十二年

右忠武公將佐略陳翔撰忠武公者郭子儀也翔之所書亦為感矣猶言得其六七蓋其官至宰相者七人為節度使者二十八人尚書丞郎京尹者十人廉察使者五人據翔所得而書者實六十人而顯名於世者蓋五十人雖喬琳周智光李懷光僕固懷恩等陷於禍敗然杜鴻漸黃裳李光弼光進之徒偉然各見於當時而垂稱於後世者亦不為少豈惟得失相當而已哉雖汾陽功業士多喜附以成名然其亦自有以得之也其忠信之厚固出其天性至於處富貴保功各古人之所難者謀謀之際宜亦得其助也治平甲辰秋社前一日書右真蹟

唐濟瀆廟祭器銘貞元十三年

右濟瀆廟祭器銘張洗撰碑云置齋即六人唐自高宗以後官不勝其濫矣洗之所記乃開元時事州縣祠廟置齋即六人可知其濫官之繁然史家不能詳載惟於碑刻偶見其一二爾治平甲辰秋分後一日中書東閣兩中書右真蹟

唐神女廟詩貞元十四年

右神女廟詩李吉甫丘玄素李貽孫敬騫等作余貶夷陵令時嘗泛舟黃牛峽至其祠下又飲蝦蟇碛水覽其江山巉絕窮僻獨恨不得見巫山之奇秀每讀數子之詩愛其辭翰遂錄之一有送爲佳玩字右集本

唐馬寔墓誌銘貞元十四年

右馬寔墓誌銘唐歐陽詹撰并書其文辭不工而字法不俗故錄之寔之事迹亦無足紀也右集本

又

詹之文爲韓退之所稱遂傳于世然其不幸早死故其傳者不多刻石之文祇有此與福州佛記耳尤可惜也右真蹟

唐石洪鍾山林下集序貞元二十年

右鍾山林下集序者石洪爲浮圖總悟作也石洪爲處士而名重當集本作一時者以常爲韓退之稱道也唐世號處士者爲不少矣洪終始無佗可稱於人者而至今其名獨在人耳目由韓文盛行於世也而洪之所爲與韓道不同而勢不相容也然韓常歎籍湜輩叛己而不絕之也豈諸子駁難不能入於聖賢之域而韓子集本有獨字區區誨誘思援而出於所溺歟此孔孟之用心也治平元年八月八日書是日上以霖雨不止分命羣臣祈禱余祈於太社既歸而雨遂止某謹記右真蹟

唐房太尉遺愛碑陰記元和六年同是石洪撰附此

石洪文字罕見於後世故特錄之右見錦本拾遺

唐賀蘭夫人墓誌貞元七年

右賀蘭夫人墓誌唐陸贄撰或云贄書也題曰祕書監陸公夫人墓誌銘而贄自稱姪曾孫此石在常州一有陸監名齊望五字右集本

唐陸文學傳咸通十五年

右陸文學傳鴻漸自撰茶之見前史蓋自魏晉以來有之而後世言茶者必本陸鴻漸蓋爲茶著書自其始也至今俚俗賣茶肆中嘗置一叢偶人於竈側云此號陸鴻漸鴻漸以茶自名於世久矣考其傳著書頗多曰君臣契三卷源解三十卷江表四姓譜十卷南北人物志十卷吳興歷官記三卷潮州刺史記一卷茶經三卷占夢三卷其多如此豈止茶經而已哉然其他書皆不傳右集本

唐辨正禪師塔院記貞元中

右辨正禪師塔院記徐峴書賦能行筆而少意思也往時石曼卿屢稱峴書曼卿多得顏柳筆法其書與峴不類而遠過之不知何故喜峴書也余嘗曼卿在時猶未見峴書但聞其所稱曼卿歿已久始得此書遂錄之爾右真蹟

唐韓愈盤谷詩序貞元中

右送李愿歸盤谷序韓愈撰盤谷在孟州濟源縣正元中縣令刻石于其側令姓崔其名泫今已磨滅其後書云昌黎韓愈知名士也當時退之官尙未顯其道未爲當世所宗師故但云知名士也然當時送愿者爲不少而獨刻此序蓋其文章已重於時也以余家集本校之或小不同疑刻石誤集本世已大行刻石乃當時物存之以爲佳翫爾其小失不足較也右真蹟

唐韓退之題名元和四年已下十篇皆韓文公撰故不與別

碑歲月爲敘

右韓退之題名二皆在洛陽其一在嵩山天封宮石柱上刻之集本

有記龍潭遺事六字天聖中余為西京留守推官與梅聖俞遊嵩

山入天封宮裴回柱下而去遂登山頂至武后封禪處有石記戒人遊龍潭者毋妄語笑以贖神龍龍怒則有雷恐因念退之記遇雷意其有所試也其一在福先寺塔下當時所見墨蹟不知其後何人模刻于石也治平元年三月廿二日書右真蹟

唐田弘正家廟碑元和八年

右田弘正家廟碑昌黎先生撰余家所藏書萬卷惟昌黎集是余為進士時所有最為舊物自天聖以來古學漸盛學者多讀韓文而患集本訛舛惟余家本屢更校正時人共傳號為善本及後集錄古文得韓文之刻石者如羅池神黃陵廟碑之類以校集本有余家二字集本舛繆猶多若田弘正碑則又尤甚蓋由諸本不同往往妄加改易集本有今字以碑校集印本與刻石多同當以為正九字集本作初未必誤多為校讎者妄改之乃知文字之傳久而轉失其真者多矣則校讎之際決於取捨不可不慎也

印本云銜訓事嗣朝夕不忘往時用他本改云銜訓嗣事今碑文云銜訓事嗣與印本同知其妄改也

印本云以降命書用他本改為降以命書今碑文云以降命書與印本同知為妄改也

印本云奉我天明用他本改云奉我王明今碑文云奉我天明與印本同知為妄改也此類甚多略舉三事要知改字當慎也 治平元年二月八日書右真蹟

唐韓愈南海神廟碑元和十五年

右南海神廟碑韓愈撰陳諫書以余家舊藏集本校之皆同惟集本云蜿蜿蜿蜒而碑為集本作云蜿蜿蛇蚺小異當以碑為正今世所行昌黎集類多訛舛惟南海碑不舛者以此刻石人家多有故也其妄意改易者頗多亦賴刻石為正也治平元年七月二十日書右真蹟

蹟

唐韓愈羅池廟碑長慶中

右羅池廟碑唐尚書吏部侍郎韓愈撰中書舍人史館脩撰沈傳師書碑後題云長慶元年正月建按穆宗實錄長慶二年二月傳師自尚書兵部郎中翰林學士罷為中書舍人史館脩撰其九月愈自兵部侍郎遷吏部集本有然則據建碑時愈未為吏部沈亦未為舍人字碑言柳侯死後三年廟成明年愈為柳人書羅池事子厚以元和十四年卒至集本有後三年字愈作碑時當是長慶三年考二君官與此碑亦同但不應在元年正月蓋後人傳模者二十三字集本作則二君官當與此碑同其書元年正月蓋傳模者誤刻之爾今世傳昌黎先生集載此碑文多同惟集本以步有新船為涉荔子丹今蕉黃蕉下加子二十五字集本作此文與碑多同惟集本云涉有新船而碑以涉為步荔子丹今蕉子黃碑蕉下無子字當以碑為是而碑云春與猿吟而集本作今秋鶴與飛則疑碑之誤也嘉祐八年六月二日書右真蹟

唐韓愈黃陵廟碑長慶元年

右黃陵廟碑韓愈撰沈傳師書昌黎二字集本作韓集今大行於世而思本不真余家所藏最號善本世多取以為正然時時得刻石校之猶不勝其舛繆是知刻石之文可貴也不獨為訛好而已黃陵碑以家本校之不同者二十餘事如家本言降小君為夫人而碑云降小水之類皆當以碑為正也嘉祐八年十月十八日書右真蹟

唐胡良公碑長慶三年

右唐胡良公碑韓愈撰良公者名珣韓之門人張籍妻父也今以碑校余家所藏昌黎集本號為最精者文字猶多不同皆當以碑為正茲不復紀碑云珣子逞迺巡遇述遷造而集本無巡他流俗所傳本集本有又字有云遇或為巡者皆非集本有也字當以碑為正治平

九年七月晦日書右真蹟

唐韓文公與顛師書歲月未詳

右韓文公與顛師書世所罕傳余以集錄古文其求之既勤且博七字集本只作其求之博蓋久而後獲其以易集本無此字繫辭為大傳謂著山林與著城郭無異等語宜為退之之言其後書吏部侍郎潮州刺史則非也蓋退之自刑部侍郎貶潮州後移袁州召為國子祭酒遷兵部侍郎久之始遷吏部而流俗相傳但知為韓吏部爾顛師遺記雖云長慶中立蓋并韓書皆國初重刻故繆為附益爾治平元年三月十三日書右真蹟

唐高閑草書歲月未詳

高閑草書審如此則韓子之言為實錄矣廬陵歐陽脩右見編本別集二十二卷

唐武侯陰記開成二年

右武侯陰記崔備撰唐劍南西川節度使武元衡及其將佐題名者二十九人楊嗣復再題及其僚屬又六人并嗣復汝士詩兩首合為一卷唐諸方鎮以辟士相高故當時布衣韋帶之士或行著鄉閭或名聞場屋者莫不為方鎮所取至登朝廷位將相為特偉人者亦皆出諸侯之幕如元衡所記裴度柳公綽楊嗣復皆相繼去為本朝名將相亦可謂盛矣哉治平元年初伏休假雨中書右真蹟

唐盧頊禱聰明山記元和二年

右禱聰明山記盧頊撰乃盧從史禱山神之記也閱從史官屬題名見孔戡與為重胤俱列于後而感集本作覺韓退之記戡事云戡屢諫從史不聽卒為重胤所縛掩卷歎息者久之嗚呼禍福成敗之理甚明而先事而言則罕見從事至而言則不及矣自古敗亂之國未始不如此也右真蹟

唐侯喜復黃陂記歲月見本文

右復黃陂記唐侯喜撰黃陂在汝州汝州有三十六陂黃陂最大既田千頃始作于隋記云至貞元辛未刺史盧虔始復之辛未貞元七年也碑元和三年建喜之文辭嘗為韓退之所稱而世罕傳者余之所得此碑而已右集本

又

昌黎先生甚稱侯喜其文罕傳於今余之所見止此一篇爾右真蹟

唐柳宗元般舟和尚碑元和三年

右般舟和尚碑柳宗元撰并書子厚所書碑世頗多有書既非工而字畫多不同疑喜子厚者竊借其名以為重子厚與退之皆以文章知名一時而後世稱為韓柳者蓋流俗之相傳也其為道不同猶夷夏也然退之於文章每極稱子厚者豈以其名並顯於世不欲有所貶毀以避爭名之嫌而其為道不同雖不言顧後世當自知歟不然退之以力排釋老為己任於子厚不得無言也治平元年三月廿二日書右真蹟

唐南嶽彌陀和尚碑元和五年

右南嶽彌陀和尚碑柳宗元撰并書自唐以來言文章者惟韓柳柳豈韓之徒哉真韓門之罪人也蓋世俗不知其所學之非第以當時輩流言之爾今余又多錄其文懼益後人之惑也故書以見余意右集本

唐元稹脩桐柏宮碑大和四年

右唐元稹撰文并書其題云脩桐柏宮碑又其文以四言為韻語既牽聲韻有述事不能詳者則自為法以解之為文自注非作者之法且碑者石柱爾古者刻石為碑謂之碑銘碑文之類可也後世伐石刻文既非因柱石不宜謂之碑文然習俗相傳理猶可考今特題云脩桐柏宮碑者甚無謂也此在文章誠為小瑕病人時有忽略然而後之學者不可不知自漢以來墓碑多題云某人之碑者此乃無

嘗蓋目此石為某人之墓柱非謂自題其文目也今讀云倚桐柏宮碑則於理何稽也右集本

唐虞城李令去思頌元和四年

右虞城李令去思頌李白撰文王通篆唐世以書自名者多而小篆之學不集本作十數家自陽冰獨擅後無繼者其前惟有碧落碑而不見名氏通開元天寶時人在陽冰前而相去不遠集本有亦工八分四字然當時不甚知名雖字畫不為工而一時未有及者所書篆字惟有此爾世亦罕傳余以集本無此字集錄求集本無此字之勤且博厘得此爾今世以小篆名家如卻不疑楊南仲章友直問之皆云未嘗見也治平元年二月七日書右真蹟

唐陽公舊隱碣元和

右陽公舊隱碣胡証撰黎煇書李靈省篆額唐世篆法自李陽冰後寂然未有顯於當世而能自名家者靈省所書陽公碣筆畫甚可佳既不顯聞於時亦不見於他處以余家所藏之博而見於錄者惟此雖未為絕筆亦可惜哉嗚呼士有負其能而不為人所知者可勝道哉右真蹟

唐于真神道碑元和

右于真神道碑盧景亮撰其文辭雖不甚雅而書事能不沒其實實之為人如其所書蓋篤於信道者也碑云司馬遷儒之外五家班固儒之外八流其語雖拙蓋言其集本作真學不駁雜也然則非徒貶去釋老而已自儒術之外餘皆不學爾碑又云其弟可封好釋氏真每非之真于頤父也然可封之後不大顯而真之後甚盛以此見釋氏之教信嚮者未必獲福毀貶者未必有禍也碑言真篤於孝悌守節安貧不可動以勢利其所履如此足以與其後世矣治平元年八月十一日書右真蹟

唐昭懿公主碑元和

右昭懿公主碑孟簡撰皇甫鐸書公主代宗女也號昇平公主嫁郭氏公主之號自漢以來始有謂天子之女禮不自主婚集本作晉以公主之因為名爾後世號某國公主者雖實不以國公為主而各猶不失其義唐世始別擇佳名以加之如昇平之類是也已失其本義矣今此碑乃云諱昇平公主字昇平公主集本無此五字斯莫可曉也已治平元年八月八日書右真蹟

唐李光進碑元和

右李光進碑楊炎撰韓秀實書唐有兩李光進其一光顏之兄其一光弼之兄弟也此碑乃光弼弟也唐史書此兩人事多誤新書各為傳以附顏弼遂得其正右集本

集古錄跋尾卷第八

集古錄跋尾卷第九 集一百四十二

唐樊宗師絳守居園池記長慶二年

右絳守居園池記唐樊宗師撰或云此石宗師自書嗚呼元和之際文章之盛極矣其怪奇至於如此右集本

唐張九齡碑長慶二年

右張九齡碑按唐書列傳所載大節多同而時時小異傳云壽六十八而碑云六十三傳自左補闕改司勳員外郎而碑云遷禮部傳言集本作云張說卒召為秘書少監集賢院學士知院事碑云副知至後作相遷中書令始云知院事其載張守珪請誅安祿山事集本無此字傳云九齡判守珪狀碑云守珪所請留中不行而公以狀諫然其為語則略同碑長慶中立而公薨在開元二十八年至長慶三年實八十四年所傳或有同異而至於年壽官爵其子孫宜不繆當以碑為是也治平元年二月十日書右真蹟

唐田布碑長慶四年

右田布碑庾承宣撰布之事壯矣承宣不能發於文也蓋其力不足爾布之風烈非得左丘明司馬遷筆不能書也故士有不顧其死以成後世之名者集本有猶字有幸不幸集本有焉字各視其所遭如何爾今有道史漢時事者其人偉然其著而市兒俚嫗猶能道之自魏晉以下不為無人而其顯赫不及於前者無左丘明司馬遷之筆以起其文也治平甲辰秋社日書右真蹟

唐沈傳師游道林嶽麓寺詩長慶中

右嶽麓寺詩沈傳師撰并書題云酬唐侍御姚員外而二人之詩不見不知為何何人也獨此詩以字畫傳於世而詩亦自佳傳師書非一體此尤放逸可愛也右集本

唐崔能神道碑長慶二年

右崔能神道碑李宗閔撰能弟從書碑云拜御史中丞持節觀察黔

中仍賜紫衣金印按唐世無賜金印者官制古今集本作古今官制沿革不同而其名號尚或相襲自漢以來有銀青金紫之號當時所謂青紫者綬也金銀者乃其所佩印章爾綬所以繫印者也後世官不佩印此名虛設矣隋唐以來有隨身魚而青紫為服色所謂金紫者乃服紫衣而佩金魚爾宗閔謂賜金印者繆也今世自以賜緋銀魚袋賜紫金魚袋結入官銜集本有矣字而集本作今有階至金紫

光祿大夫者遂於結銜去賜紫金魚袋皆流俗相承不復討集本作計正久矣故因宗閔之失并記之治平元年七月二十日書右真蹟

唐李德裕茅山三像記寶曆二年

右茅山三像記李德裕撰德裕自號上清玄都大洞三景弟子上為九廟聖主次為七代先靈下為一切含識敬造老君孔子尹真人像三軀此固俚巷庸鄙人之所常為德裕為之有不足性然以孔子與老君為伍而又居其下此豈止德裕之獨可罪耶今史記載孔子問禮於老聃集本作問下同聃戒孔子去其驕氣多慾而孔子歎其道集本無此字猶龍之語著于耳目自漢以來學者未有以為非者豈止德裕之罪哉治平元年八月八日書右真蹟

唐李德裕平泉草木記開成五年

已下三篇同是李衛公撰故不與別碑歲月為敘

右平泉草木記李德裕撰余嘗讀鬼谷子書見其馳說諸侯之國必視其為人材性質愚剛柔緩急而因其好惡喜懼憂樂而捭闔之陽開陰塞變化無窮顧天下諸侯無不在其術中者惟不見其所好者不可得而說也以此知君子宜慎其所好蓋泊然無欲而禍福不能動其利害不能誘此鬼谷之術所不能為者聖賢之高致也其次簡其所欲不溺於所好斯可矣若德裕者處富貴招權利而好奇貪得之心不已至或疲弊精神於草木斯其所以敗也其遺戒有云壞一草一木者非吾子孫此又近乎愚矣右集本

唐李文鏡平泉山居詩開成五年

讀山居詩見文鏡夢寐不忘於平泉而終不得少償其志者人事固多如此也余聞釋子有云出家是大丈夫事蓋勇決者人之所難也而文鏡詩亦云自是功高臨盡處禍來名滅不由人者誠哉是言也
熙寧壬子正月二十九日書右真蹟

唐李德裕大孤山賦會昌五年

贊皇文辭甚可愛也其所及禍或責其不能自免然古今聰明賢智之士不能免者多矣豈獨斯人也歟
右集本

唐大孤山賦歲月未詳

右字書頗佳而傷於柔媚世傳墀工小篆此豈其筆耶
右見綿本拾遺

唐辨石鍾山記大和元年

右辨石鍾山記并善權寺詩遊靈巖記附覽三子之文皆有幽人之思蹟其風尚想見其人至於書畫亦皆可喜蓋自唐以前賢傑之士莫不工於字書其殘篇斷彙為世所寶傳於今者何可勝數彼其事業超然高爽不當留精於此小藝豈其習俗承流家為常事抑學者猶有師法而後世偷薄漸趨苟簡久而遂至於廢絕歟今士大夫務以遠自高忽書為不足學往往僅能執筆而間有以書自名者世亦不甚知為貴也至於荒林敗塚時得埋沒之餘皆前世碌碌無名子然其筆畫有法往往今人不及茲甚可歎也石鍾山記字畫在二者間頗為劣而亦不為俗態皆忘憂之佳玩也
右真蹟

唐法華寺詩大和八年

右法華寺詩唐越州刺史李紳撰其後自序題云大和甲寅歲遊寺刻詩於壁詳自序所言似紳自書然以端州題名較之字體殊不類

甲寅大和八年也右集本

唐薛萃唱和詩大和中

右薛萃唱和詩其間馬宿馮定李紳皆唐顯人靈澈以詩名後世皆人所想見者集本有而宿尤有詩名六字然詩皆不及萃豈唱者得於自然和者牽於強作耶
右真蹟

唐僧靈澈詩元和四年

右靈澈詩云相逢盡道休官去林下何曾見一人世俗相傳以為俚諺慶曆中天章閣待制許元為江淮發運使因脩江岸得斯石於池陽江水中始知為靈澈詩也澈以詩稱於唐故其與相唱和者皆當時知名之士包侍郎者估也徐廣州者浩也代宗時為嶺南節度使
右集本

唐李藏用碑大和四年

右李藏用碑王源中撰唐玄度書玄度以書自名于一時其筆法柔弱非復前人之體而流俗妄稱借之爾故存之以俟識者
右真蹟

唐玄度十體書歲月未詳

右唐玄度十體書前本得於蘇氏後本得於李丕緒少卿丕緒長安人各家子喜收碑文二家之本大體則同而文有得失故並存之覽者得以自擇焉
右集本

唐鄭澣陰符經序開成二年

右陰符經序鄭澣撰柳公權書唐世碑碣顏柳二家書最多而筆法往往不同雖其意趣或出於臨時而模勒鐫刻亦有工拙集本無此十八字公權書高重碑余特愛模者不失其真而鋒銳皆在至集本有於字陰符經序則蔡君謨以為柳書之最精者云善藏筆鋒與余之說正相反然君謨書擅當世其論必精故為誌之治平元年二月六日書右真蹟

又已下十篇同是柳誠懸書或撰故不與別碑歲月為敘

余自皇祐中得公權所書陰符經序遂求其經云石已亡矣常意必有藏於人間者求之十餘年莫可得治平二年有鑄工張景儒忽以

此遺余家小吏遽錄之信乎余所謂物常聚於所好也右真蹟

唐山南西道驛路記開成四年

公權書往往以模刻失其真雖然其體骨終在也右見編本拾遺

唐何進滔德政碑開成五年

右何進滔德政碑唐翰林學士承旨兼侍書柳公權撰并書進滔唐書有傳開成五年立其高數丈制度甚闊偉在今河北都轉運使公麻園中右集本

唐李聽神道碑開成五年柳公權書

右李聽神道碑李石撰聽父子為唐名將其勳業昭彰故以碑考傳少所差異而史家當著其大節其微時所歷官多不書於體宜然惟其自安州刺史遷神武將軍史不宜略而不書者蓋闕也右集本

唐李石碑道碑會昌二年

右李石碑柳公權書余家集錄顏柳書尤多惟碑石不完者則其字尤佳非字之然也譬夫金玉埋沒於泥滓時時發見其一二則粲然在目特為可喜爾熙寧二年季夏既望書右真蹟

唐高重碑會昌四年

右高重碑元裕撰柳公權書唐世碑刻顏柳二公書尤多而字體筆畫往往不同雖其意趣或出於臨時而亦繫於模勒之工拙然其大法則常在也此碑字畫鋒力俱完故特為佳矧其墨蹟想宜如何也治平元年正月廿五日書右真蹟

唐康約言碑大中七年

右康約言碑柳公權撰并書約言宦者為河東監軍唐自開元以後職官益濫始有置之名歷五代迄今多因而廢世徒知今之使額非古官襲唐舊號而不知皆唐宦者之職集本有也字約言在大和開成間嘗為鴻臚禮賓使又為內外客省使以此見今之使各自樞密宣徽而下皆唐宦官職也又以見鴻臚卿寺亦以宦者為使於

其間約言又為宣徽北院副使又見當時南北院宣徽皆有副使也治平甲辰秋社前一日書右真蹟

唐復東林寺碑大中十一年

右唐湖州觀察使崔黯撰柳公權書東林寺會昌中廢之大中初黯為江州刺史而復之黯之文辭甚道麗可愛而世罕有之右集本

唐王質神道碑開成四年

右王質神道碑唐太子賓客劉禹錫撰并書質字華卿王通之後也開成中為宣歙池等州觀察使右集本

唐會昌投龍文會昌五年

右會昌投龍文余脩唐本紀至武宗以謂奮然除去浮圖銳矣而躬受道家之錄服藥以求長年以此知其非明智之不惑者特其好惡有所不同爾及得會昌投龍文見其自稱承道繼玄昭明三光弟子南嶽炎上真人則又益以前言為不謬矣蓋其所自稱號者與夫所謂菩薩戒弟子者亦何以異余嘗謂佛言無生老言不死二者同出於貪信矣會昌之政臨事明果有足過人者至其心有所貪則其所為與庸夫何異治平元年五月五日書右真蹟

唐俞珣書陳果仁告身并捨宅造寺疏大中八年

右陳果仁告身并妻軫靜緣捨宅造寺疏附疏後題云明政二年按隋書煬帝本紀大業十一年十月東海賊帥李子通擁眾渡淮僭稱楚王建元明政則明政二年乃大業十二年也唐高祖實錄武德二年四月隋禦衛將軍陳稜以江都降即以稜為總管九月李子通敗稜陷江都國號吳建元明政則明政二年是武德二年矣二說不同如此呂夏卿為余言若以大業十二年為子通僭號之二年則江都方亂煬帝安得南幸而唐實錄陳稜事可據則明政二年當為武德三年也隋書緣矣果仁終始事迹不顯略見於隋書云唐初為隋大僕丞元祐將煬帝已遇弒沈法興果仁共殺祐起兵據江表法興自

稱總管大司馬錄尚書事承制置百官以果仁為司徒其事止見此爾開元中僧德宣為果仁記捨宅造寺載其世家頗詳而其功闕官爵歲月多繆德宣言中壽以死而宅疏言見屠戮當以宅疏為是德宣文辭不足錄獨採其世次事蹟終始著之俾覽者覈其真偽而少益於廣聞煬帝本紀高祖實錄皆唐初人所撰而不同如此何哉右集本

唐圭峯禪師碑大中九年

右圭峯禪師碑唐相裴休撰并書其文辭事跡無足採而其字法世所重也故錄之云右集本

唐濠州勸民栽桑勅碑大中十年

余得劉苜脩兗州文宣王廟碑見大中時中書門下牒又得此碑見大中時勅乃知平章事非署勅之官今世止見中書門下牒便呼為勅惟告身之制僅存焉右集本

唐閩遷新社記歲月見本文

右閩遷新社記唐濮陽守撰其辭云大中十年夏六月關西公命遷社于州坤或作城凡築四壇壇社稷其廣倍丈有五尺其高倍尺有五寸主以石壇風師廣丈有五尺高尺有五寸壇兩師廣丈而高尺云文字古雅甚可愛嗚呼唐之禮樂感矣其遺文有足采焉州縣社稷有主見於此記蓋大中時其禮猶在也按唐書楊發自蘇州刺史為福建觀察使至大中十二年遷嶺南節度以歲月推之關西公者楊發也右集本

又

唐時州縣社稷有主獨此碑見之關元定禮至大中時猶僅存也禮樂廢壞久矣故錄此記以著之右真蹟

唐令狐楚登白樓賦咸通二年

右登白樓賦令狐楚撰白樓在河中之至楚子綯為河中節度使乃刻

于石綯父子為唐顯人仍世宰相而楚尤以文章見稱世傳綯為文喜以語簡為工常飯僧僧判齋綯於佛前跪爐諦聽而僧倡言曰令狐綯設齋佛知蓋以此譏其好簡楚之此賦文無他意而至千有六百餘言何其繁也其父子之性相反如此信乎堯朱之善惡異也右集本

唐百巖大師懷暉碑歲月未詳

右百巖大師懷暉碑權德輿撰文鄭餘慶書歸登篆額又有別碑令狐楚撰文鄭絀書懷暉者吾不知為何人而彼五君者皆唐世名臣其喜為之傳道如此欲使愚庸之人不信不惑其可得乎民之無知惟上所好惡是從是以君子之所慎者在乎所學楚之文曰大師泥洹茶毗之六年余以門下侍郎平章事攝大尉泥洹茶毗是何等語宰相坐廟堂之上而口為斯言集本有邪字舉喪稷契居堯舜之朝其語言尚書載之矣異乎此也治平元年七月十三日雨中書右真蹟

唐孔府君神道碑咸通十二年

右孔岑父碑鄭絀撰柳知微書其碑云有子五人載戮載戰按新唐書宰相世系表岑父六子戰之下又有威表據孔氏譜譜其家所藏碑文鄭絀撰絀自言與孔氏有世舊作碑文時幾等尚在然則譜與碑文皆不宜有失而不同者何也余所集錄與史傳不同者多其功過難以碑碣為正者銘誌所稱有褒有諱疑其不實至於世繫子孫官封名字無情增損故每據碑以正史惟岑父碑文及其家譜二者皆為可據故並存之以俟來者治平元年二月廿二日侍上御崇政疎決繫囚退遂家居謝客因書右真蹟

唐白敏中碑咸通三年

右白敏中碑畢誠撰其事與唐書列傳多同而傳載敏中碑李德裕薦進以獲用及德裕貶抵之甚力以此為甚惡而碑云會昌中德裕

起刑獄陷五宰相竄之嶺外公承是之後一年寃者皆復其位以此爲能其爲毀譽難信蓋如此故余於碑誌惟取其世次官壽鄉里爲正至於功過善惡未嘗爲據者以此也碑又言桑道茂事云桑道慕不知孰是治平元年七月二十日右真蹟

唐子僧翰筆勝經咸通五年

右尊勝經子僧翰書僧翰筆畫雖道勁然失分隸之法遠矣所以錄者亦自成一家而爲流俗所貴故聊著集本作述之庶知博採之不遺爾右真蹟

唐張將軍新廟記龍紀元年

右張將軍新廟記李巨川撰唐彥謙書張魯事史傳詳矣巨川文辭匪工所錄者彥謙書爾彥謙書頗知名於世故略存其筆蹟也右集本

唐王重榮德政碑中和四年周是唐彥謙書附此

右王重榮德政碑歸仁澤撰唐彥謙書重榮當唐之末再逐其帥遂據河中雖破黃巢平朱玫之叛有功於一時而阻兵召亂爲唐患者多矣碑文辭非工而事實無可采所以錄者俾世知求名莫如自脩善譽不能掩惡也考重榮之碑豈不欲垂美名於千載而其惡終暴於集本作于後世者毀譽善惡不可誣故也彥謙以詩知名而詩鄙俚字畫不甚工皆非余所取也治平元年清明前一日書右真蹟

唐礮集本作盤溪廟咸通二年

右礮溪廟記張翔撰高駢書駢爲將嘗立戰功威惠著於蠻蜀筆研固非其所事然書雖非工字亦不俗蓋其明爽豪儁終異庸人至其感妖人呂用之諸葛殷等信其左道以冀長年乃騎木鶴而習凌虛僂去之勢此至愚下品皆知爲可笑而駢爲之惟恐不至者何哉蓋其貪心已動集本作薰於內故邪說可誘於外內貪外誘則亦何所集本增有而二字不爲哉右真蹟

唐梁公儒碑天祐中

右梁公儒碑于廣撰王說書公儒者世爲成德軍將公儒當王鏐時爲冀州刺史以卒其碑首題云唐故成德軍內中門樞密使特進檢校太保使持節冀州諸軍事冀州刺史團練守捉等使軍器作坊使其餘所領事職甚多皆當時方鎮常事不足書惟樞密使唐之末年內官之職其後方鎮遂亦僭置於此見之軍器作坊五代之際號內諸司使皆朝廷官然不見其始置集本有之字時而今見於此豈方鎮之職朝廷因而用之耶將方鎮之威亦僭置也公儒事迹無所取特以此錄之治平元年五月十八日書右真蹟

唐花林宴別記歲月未詳

右花林宴別記唐寶常撰花林寺在滁州全椒縣余在滁陽遣推官陳詵以事至縣見寺旁石澗岸土崩出石崖隱隱有字亟命模得之右集本

唐陽武復縣記貞元十九年

唐衢文世罕傳者余家集錄千卷唐賢之文十居七八而衢文祇獲此爾然其氣格不俗亦足佳也右真蹟

唐崔敬嗣碑景龍二年

右唐崔敬嗣碑胡皓撰郭謙光書崔氏爲唐名族而敬嗣不顯皓爲昭文館學士然亦無聞三字集本作觀其事實文辭皆不足多采而余錄之者以謙光書也其字畫筆法不減韓蔡李史四家而名獨不著此余屢以爲歎也治平元年七月三十日右真蹟

唐潤州陀羅尼經幢歲月未詳

右陀羅尼經幢今在潤州寶墨亭中唐雲陽野夫王奐之書字畫頗爲世俗所重故錄之以備廣採右集本

唐夔州都督府記會昌五年

余嘗謂唐世人人工書故其名埋沒者不可勝數每與君謨嘆息于

斯也如具靈該繆師愈今人尚不知其姓名况其書乎余以集錄之博僅各得其一爾右見綿本拾遺

唐鄧權碑寶曆二年

右姚向書筆力精勁雖唐人工於書者多而及此者亦少惜其不傳於世而今人莫有知者惟余以集錄之博得此而已熙寧辛亥孟夏清心堂書右見綿本拾遺

唐王夔詩沈傳師李德裕唱和歲月未詳

惠泉在今荆門軍余貶夷陵道荆門裴回泉上得二子之詩佳其詞翰遂錄之逮今蓋三十年矣嘉祐八年十一月二十日書右見綿本拾遺

唐人書楊公史傳記歲月未詳

右楊公史傳記文字訛缺原作者之意所以刻之金石者欲為公不朽計也碑無年月不知何時然其字畫之法迺唐人所書爾今纔幾時而磨滅若此然則金石果能傳不朽邪楊公之所以不朽者八字集本作楊公者震也其所不朽者果待金石之傳邪凡物有形必有終弊自古聖賢之傳也非皆託於物固能無窮也迺知為善之堅堅於金石也集本無也字嘉祐八年十一月廿日書右真蹟

唐放生池碑天寶十年

右放生池碑不著書撰人名氏放生池唐世處處有之王者仁澤及於草木昆蟲使一物必遂其生而不為私惠也惟天地生萬物所以資於人集本有也字然代天而治物者常為之節使其足用而取之不過故集本作萬物得遂其生而不天三代之政如斯而已易大傳曰庖犧氏之王也能通神明之德以類萬物之情作結繩而為網罟以佃以漁蓋言其始教民取物資生而為萬世之利此所以為聖人也浮圖氏之說乃謂殺物者有罪而放生者得福苟如其言則庖犧氏遂為集本有人間之聖人五字地下之罪人矣治平元年八月十

日書右真蹟

集古錄跋尾卷第九

集古錄跋尾卷第十 集一百四十三

瘞鶴銘歲月未詳 瘞鶴銘黃庭遺教經雖傳自晉而公疑唐人書故附此

右瘞鶴銘題云華陽真逸撰刻於焦山之足常為江水所沒好事者伺水落時模而傳之往往祇得其數字云鶴壽不知其幾而已世以其難得尤以為奇惟余所得六百餘字獨為多也按潤州圖經以為王羲之書字亦奇特然不類羲之筆法而類顏魯公不知何人書也華陽真逸是顧况道號今不敢遂以為况者碑無年月不知何時疑前後有人同斯號者也右集本

又

右在焦山之足常為江水所沒好事者伺水落時模而傳之往往祇得其數字云鶴壽不知其幾而止世以其難得尤以為奇惟余所得獨若此之多也潤州圖經以為王羲之書字亦奇放然不類羲之筆法而類顏魯公不知何人書也或云華陽真逸是顧况道號銘其所作也右真蹟

黃庭經永和十二年

右黃庭經一篇晉永和和中刻石世傳王羲之書書雖可喜而筆法非羲之所為黃庭經者魏晉時道士養生之書也今道藏別有二十六章者名曰內景而謂此一篇為外景又分為上中下三部者皆非也蓋內景者乃此一篇之義疏爾流俗又有一篇名曰中景者尤為繁雜鄙俚之所傳也余嘗患世人不識其真多以內景三十六章為本經因取永和刻石一篇為之注解余非學異說者哀世人之惑於繆妄爾右真蹟

又

今道藏別有二十六章曰黃庭內景而謂此一篇者為外景又有分為上中下三部者流俗所行又別有中景者皆非也所謂內景者乃

此經之義疏爾中景一篇尤為繁雜蓋妄人之所作也此本晉永和刻石文字時亦脫繆然比今世俗所傳頗為精也右見綿本拾遺

又

右黃庭別本一作刻續得之京師書肆不知此石刻在何處其字畫頗類顏魯公甚可愛而不完更俟求訪以足之治平丁未閏月二日書右見綿本拾遺

又

右黃庭經二篇皆不著書人姓名余初得後本已愛其字不俗遂錄之既而又得前本於殿中丞裴造造好古君子也自言家藏此本數世矣與其藏於家不若附見余之集錄可以傳之不朽也余因以舊本較其優劣而並存之使覽者得以自擇焉世傳王羲之書寫黃庭經此豈其遺法歟右集本

遺教經

右遺教經相傳云羲之書偽也蓋唐世寫經手所書集本有爾字唐時佛書今在者大抵書體皆類此第其精麤不同爾近有得唐人所書經題其一云薛稷一云僧行敦書者皆與二人他所書不類而與此頗同即知寫經手所書也然其字亦可愛故錄之蓋今士大夫筆畫能髣髴乎此者鮮矣右真蹟

小字道德經開元二十七年

右小字八分道德經不著書人各氏亦不知其所自來或云在明州其石今亡矣問今藏書之家皆云未嘗見也其字畫精妙見者多疑為明皇書而知非者以其集本有首字但題御注而不云御書也右真蹟

唐人臨帖

右唐人所臨諸家法帖一卷其前數帖類真卿所書蓋其筆畫精勁他人未易臻此按唐書言褚無量嘗請以當時所藏奇書各畫命宰

相以下跋尾而玄宗不許此乃有宋璟等列名于後又頗多訛繆豈後人妄增加之也然要為可翫何必窮較其真偽今流俗所傳鍾王遺迹多不同然時時各有所得故雖小小轉寫失真不害為佳物由是悉取前後所得諸家法帖分入集錄蓋以資博覽云右集本

小字法帖

此下皆跋法帖蓋模本也故類於唐人臨帖之後

右小字法帖者近時有尚書郎潘師旦者以官法帖私自模刻千家為別本以行於世余因分以為類散入集錄諸秩而程邈衛夫人鍾繇王廙宋儋皆以小字為一類於此余嘗辨鍾繇賀捷表為非真而此帖字畫筆法皆不同傳模不能不失本體以此真偽尤為難辨也治平元年七月二十日書右真蹟

又

近時有尚書郎潘師旦者竊取官法帖中數十帖別自刻石以遺人而傳寫字多轉失然亦時有可佳者因又擇其可錄者分為十餘卷以入集目聊為一時之翫爾其小字尤精故錄於此右集本

十八家法帖

右世傳十八帖者實二十五帖蓋書者十八家爾而流俗又自集本無此字有羲之十八帖然皆出於官法帖也太宗皇帝時嘗遣使者天下購募前賢真蹟集以為法帖十卷鑲板而藏之每有大臣進登二府者則賜以一本其後不賜或傳板本在御書院往時禁中火災板被焚遂不復賜或云板今在但不賜爾故人間尤以官法帖為難得此十八家者蓋官法帖之尤精者也余得自薛公期云是家藏舊本頗真今世人所有皆轉相傳模者也右真蹟

雜法帖六

嚮於薛十三處得法帖一部闕其第一久而始獲 南朝諸帝筆法雖不同大率意思不遠矜然都不復有豪氣但清婉若可佳耳

二

學書不必億精疲神於筆硯多閱古人遺蹟求其用意所得宜多

三

羲獻世以書自名而筆法相去遠甚父子之間不同如此然皆有足喜也

四

吾有集古錄一千卷晚又得此法帖歸老之計足矣寓心於此其樂可涯嘉祐壬寅大霧攝事致齋閑題

五

古今事異一時人語亦多不同傳模之際又多轉失時有難識處惟當以意求之爾嘉祐七年大饗明堂致齋于中書東閣偶題

六

老年病目不能讀書又艱於執筆惟此與集古錄可以把玩而不欲屢閱者留為歸頰銷日之樂也蓋物維不足然後其樂無窮使其力至於勞則有時而歇爾然內樂猶有待於外物則退之所謂着山林與着城郭何異宜為有道德者所笑也熙寧辛亥清心堂書右見綿本別集二十三卷

懷州孔子廟記後魏太和中誤實於此

右宣尼廟記文辭事實皆不足采其書亦非佳獨其字畫多異故特錄之以備博覽右見綿本拾遺

景福遺文

余在夷陵時得之民家見當時縣有驅使官銜直典然云米一作來不者莫詳其語嘉祐七年五月二十六日右見綿本別集二十二卷

卷

浮槎寺八記詩

右浮槎寺八記詩者自云屬門釋僧皎字廣明作集本無此字詩雖

非工而所載事蹟皆圖經所無可以資博覽浮槎山在今廬州慎縣
其上有泉其味與無錫惠山水相上下而鴻漸茶經及張又新等水
記皆不載嘉祐中李留後端愿守廬州以其水遺余因爲之記其事
余甚愛山泉而浮槎水特佳頗怪前世遺而不錄及得僧皎紀浮槎
八事亦無之乃知物之晦顯有時也治平元年七月二十日書右真
蹟

福州永泰縣無名篆

右在福州永泰縣觀音院後山上世俗多傳以爲僊篆太常博士黃
孝立閩人也嘗爲余言其山無名上多頑石無復鐫刻之蹟如人以
手指畫泥而成文隨圓石之形環布之如車輪循環莫知其首尾
又言孝立嘗至廣州見南蕃人以夷法事天日夕焚香拜金書字號
爲天篆者正類此然不能曉也今人亦有以道家之言譯之者曰勤
道守三一中有不死術亦莫知其是非也右真蹟

又

右在福州永泰縣觀音院後山上太常博士黃孝立閩人也爲余說
曰山無名而甚高峻石皆頑無復鐫刻之迹如人以手指畫泥而成
文隨圓石之形環布之又曰孝立嘗至廣州見南蕃人以夷法事
天日夕拜金書字圖號天篆者視其字與此篆正同然不能考也今
世人亦有以道家之言譯之者曰勤道守三一中有不死術亦莫得
而詳焉右集本

謝仙火

右謝仙火字在今岳州華容縣廢玉真宮柱上倒書而刻之不知何
人書也傳云大中祥符中玉真宮爲天火所焚惟留一柱有此字好
事者遂模于石慶曆中衡山女子號何僊姑者絕粒輕身人皆以爲
僊也有以此字問之者輒曰謝僊者靈部中鬼也夫婦皆長三尺其
色如玉掌行火於世間後有聞其說者於道藏中檢之云實有謝僊

名字主行火而餘說則無之由是益以僊姑爲真僊矣近見衡州秦
云僊姑死矣都無神異客有自衡來者云僊姑晚年羸瘦面皮皺黑
第一衰媪也鄉時蘇州有一丐者臥道中相傳云是得僊者也自天
聖中余已聞之後二十餘年尚在其人姓沈舉世皆傳爲沈臥僊云
臥而飲食不漏州縣吏屢使人監守或潛伺察之皆實臥而不起亦
不漏遂相傳以爲神既而亦以病死雖素信感其事喜爲之稱說者
亦不云死時有異也斯二人者皆今世人以爲僊者如此故并載之
右集本

張龍公碑乾寧元年

右張龍公碑趙耕撰云君諱路斯穎上百社人也隋初明經登第景
龍中爲宣城令夫人關州石氏生九子公罷令歸每夕出自戌至丑
歸常體冷且濕石氏異而詢之公曰吾龍也蓼人鄭祥遠亦龍也騎
白牛據吾池自謂鄭公池吾屢與戰未勝明日取決可令吾子挾弓
矢射之繫鬣以青綃者鄭也絳綃者吾也子遂射中青綃鄭怒東北
去投合肥西山死今龍穴山是也由是公與九子俱復爲龍亦可謂
怪矣余嘗以事至百社村過其祠下見其林樹陰蔚池水窈然誠異
物之所託歲時禱雨屢獲其應汝陰人尤以爲神也右集本

又

龍公之事怪哉余嘗以事至百社村過其祠下見其林樹陰蔚池水
窈然誠異物之所託歲時禱雨屢獲其應汝陰人尤以爲神也右真
蹟

周伯著碑

右周伯著碑者在今宿州出於近歲蓋官部春夫開汴渠於泥沙中
掘得之其文字古怪而磨滅無首尾了不可讀伯著不知爲何人其
僅可見者云渤海君玄孫季景長子也其事蹟不可考文辭莫曉而
字畫不工徒以其古怪而錄之此誠好古之弊也治平元年七月三

十日書右真蹟

衛秀書梁思楚碑上元元年

秀筆工之善模者也其自謂集書信矣無足多取也書譬君子皆學乎聖人而其所施為未必同也右集本

裴夫人誌天寶四年

右裴夫人誌辭翰瀟灑固多清思惜乎不見其各氏石在長安之萬年矮槐文亦佳在亳州法相寺二者皆後得故續附于此熙寧二年六月二十有八日青州山齋書右見綿本拾遺

五代時人署字

右五代時帝王將相等署字合一卷前人遺蹟往往因人家告身莊宅券契故後世傳之猶在此署字乃北京人家好事者類而模傳之爾右集本

楊凝式題各李西臺詩附

右楊凝式題各李西臺詩附自唐亡道喪四海困於兵戎及聖宋興天下復歸於治蓋百有五十餘年而五代之際有楊少師建隆以集本改已後稱李西臺二人者筆法不同而書名皆為一時之絕故並錄于此右真蹟

徐鉉雙溪院記

右雙溪院記徐鉉書鉉與其弟鐸皆能八分小篆而筆法頗少力其在江南皆以文翰知名號二徐為學者所宗蓋五代干戈之亂儒學道喪而二君能自奮然為當時名臣而中國既苦於兵四方僭偽割裂皆編迫擾攘不暇獨江南粗有文物而二君者優遊其間及宋興違命侯來朝二徐得為王臣中朝人士皆傾慕其風采蓋亦有以過人者故特錄其書爾若小篆則與鉉同時有王文秉者其筆甚精勁然其人無足稱二字集本作所開也治平元年前上元日書右真蹟

王文秉小篆千字文紫陽石磬銘附

右小篆千字文者江南人王文秉書其後題云大唐庚申歲者建隆元年也偽唐李煜自周師取淮南畫江為界以稱臣遂削去年號奉周正朔然世宗特許其稱帝故文秉猶稱唐而不書年號直云庚申歲也文秉在江南篆書遠過徐鉉而鉉以文學名重當時文秉人罕知者學者皆云鉉筆雖未工而有字學一點一畫皆有法也文秉所書獨余集錄屢得之此本得於太學楊南仲紫陽石磬銘者張獻撰亦文秉書也右集本

王文秉紫陽石磬銘

右紫陽石磬銘余獨錄於此而不附他書者文秉之書罕見於今也小篆自李陽冰後未見工者文秉江南人其字畫之精遠過徐鉉而中朝之士不知文秉但稱徐常侍者鉉以文章有重名於當時故也歲在辛酉晉天福六年李昇之昇元五年也五代干戈之際士之藝有至於斯者太平之世學者可不勉哉右見綿本拾遺

郭忠恕小字說文字源

右小字說文字源郭忠恕書忠恕者集本有五代漢周之際為湘陰公從事十二字及事皇朝其事見實錄頗奇怪世人但知小篆而不知其楷法尤精然其楷字亦不見刻石者蓋惟有此耳故尤可惜也五代干戈之際學校廢是謂集本作為君子道消之時然猶有如忠恕者國家為國百年天下無事儒學咸矣獨於字書忽廢幾於中絕今求如忠恕小楷不可得也故余每與君談歎息於此也石在徐州集本無此四字嘉祐八年十二月廿日書右真蹟

郭忠恕書陰符經

右陰符經郭忠恕書篆法自唐李陽冰後未有臻於斯者近時頗有學者曾未得其髣髴也實錄言忠恕死時甚怪豈亦異人乎其楷書尤精也嘉祐六年九月十五日宴後歇泊假閑覽因題右真蹟

太清石集本作西闕題名

余自至毫始得悉闕太清之碑其佳者皆集本作悉已入余集古錄矣乃知余之集錄所得多矣惟兩石闕題各集本無二字未有今集本無此字續錄于此熙寧元年二月十九日書右真蹟

太清東闕題名

熙寧元年二月十八日余率僚屬謁太清諸殿裴回兩闕之下周視八檜之異窺九井禹步之奇酌其水以烹茶而歸十九日書右見綿本拾遺

襄陽山文太和九年謨寔于此

右跋尾者六人皆知名士也時余在翰林以孟饗致齋唐書局中六人者相與飲弈歡然終日而去蓋一時之盛集也明年夏鄰幾聖俞卒又九年而原甫長文卒自嘉祐己亥至今熙寧辛亥一紀之間亡者四存者二而擇之遭酷吏以罪廢景仁亦以言事得罪獨余頑然蒙上保全貪冒寵榮不知休止然筋骸燼矣尚此勉強而交遊零落無復情懷其盛衰之際可以悲夫是時同脩書者七人今亡者五宋子京王景彝呂縉叔劉仲更與聖俞也存者二余與次道爾次道去年爲知制誥亦以封還李定詞頭奪職因感夫存亡今昔之可歎者遂并書之熙寧四年二月十五日病告中書右見綿本拾遺

集古錄跋尾卷第十

書簡卷第一 集一百四十四

與韓中獻王稚圭 慶曆二年

倚頓首再拜啓仲秋漸涼伏惟觀察太尉尊候動止萬福倚至愚極陋不足以獻思慮於聰明至於倚記以問起居則當大君子憂國之時又非宜輒一作以干視聽是以書牘之禮曠絕一作而逾年然而千里之外威譽之聲日至京師如在耳目可以見作鎮方面懾動羌戎撫循之間優有餘裕此倚不勝西首企望拳拳之誠私自爲慰者也伏念倚材薄力弱不堪世用徒能少一無此字以文字之樂爲事而國家久安於無爲儒學之士莫知形容幸今剪除叛羌開拓西域紀功耀德茲也爲時惟俟凱歌東來函獻獻廟執筆吮墨作爲詩頌以述大賢之功業以揚聖宋之威靈雖曰懦焉亦區區之鄙志也謹奉手啓咨問伏惟俯賜鑒察謹啓八月日太子中允集賢校理歐陽修啓上

又慶曆五年

某頓首啓冬序極寒不審資政諫議尊候動止何若昨者偶趨府下過煩主禮自到郡踰月尙稽候問豈勝愧悚某孤拙多累蒙朝廷保全之恩得此郡地僻事簡飲食之物奉親頗便終日尸祿未知論報之方用此不遑爾瞻望感府數程之近時得通訊下執謹因請緝人行附此以道萬一新歲甫邇伏乞爲國自重下情禱詠之至

又同前

某頓首啓近因州吏請府請緝會拜狀急足至時辱手書爲誨伏審履此凝寒台候萬福豈勝慰怵之誠某此藏拙幸今歲准甸大雪來春二麥有望若人不爲盜而郡素無事何幸如之惟口祿端居未能報國此爲愧爾瞻望旌棨惟願爲國自重以副禱頌

又慶曆六年

某再拜啓山州窮絕比乏水泉昨夏秋之初偶得一泉於州城之西

南豐山之谷中水味甘冷因愛其山勢回抱構小亭於泉側又理其傍爲教場時集州兵弓手閱其習射以警畿年之盜間亦與郡官宴集於其中方惜此幽致思得佳木美草植之忽辱寵示芍藥十種豈勝欣荷山民雖陋亦喜遨遊今春寒食見州人觀裝盛服但於城上巡行便爲春遊自此得與郡人共樂實出厚賜也愧刻愧刻

又同前

某頓首啓季冬極寒伏惟某官尊體動止萬福某幸守僻陋咫尺大府常闕修問左右然幸尸祿奉親職事日益簡少養拙自便遂成習性但時自警而已冬深少雪氣候已春和伏惟爲國自重以副瞻頌之誠

又同前

某啓近急足還嘗略拜問歲暮晴和伏惟台候動止萬福本州張推官欲造棗戟云舊出門下此人泣官廉善謹守其職亦可自了恐不見多年要知本官行止謹此拜聞

又慶曆八年

某頓首仰春下旬到郡領職疎簡之性久習安閑當此孔道動須勉彊但日詢故老去思之言遵範遺政謹守而已其餘解舍城池數世之利無復增修完小小斯不敢廢壞爾今年蝗蝻稍稍生長二麥雖豐兩損其半民間極不易猶賴盜賊不作伏恐要知齷齪之才已難開展又值罷絕回易諸事裁損日憂不濟此尤苦爾南北遠遠音信難頻輒此切切以煩視聽慙慙

又皇祐元年

某頓首啓自去春初到維揚嘗因蔡中孚人行奉狀自後區區不覺踰歲即日春暄不審尊候動止何似某昨以目疾爲苦因少私便求得汝陰仲春初旬已趨官所廣陵嘗得明公鎮撫民俗去思未遠幸遭遺矩莫敢有踰獨平山堂占勝蜀岡江南諸山一目千里以至大

明井瓊花二亭此三者拾公之遺以繼威美爾大明井曰美泉亭瓊花曰無雙亭汝陰西湖天下勝絕養愚自便誠得其宜然尸祿苟安何以報國感愧感愧邊防之事動繫安危伏惟經略之餘爲國自重

又皇祐二年

某頓首啓冬寒伏惟台候萬福修前在穎會一拜狀尋以移守南都苦於當道頗關脩問徒切瞻思專使枉道手書爲賜佩服感慰何可勝言北俗蒙惠邊防有條宜歸大用以及天下不勝禱望之至謹奉狀敘謝

又皇祐二年

修啓辱示諭邊備有倫此已得之傳者久矣閱古事蹟尤見大君子之用心動必有益於人也感製記文并孔子廟嶽廟等記並於杜公處竊覽已獲秘傳然私怪明公見遺獨不見寄謂於庸鄙有所惜者何邪見索亂道敢不勉彊苟得附方尺之木於梁棟間寓名諸公之後爲幸多矣所恨文字汗公好屋爾前在穎承示碑文甚多愧荷之懇已嘗附狀今者人至又惠宋公碑二本事蹟辭翰可令人想慕張迪碑并八關齋記此之所有聊答厚賜某皇恐

又同前

某啓冬候凝寒伏惟某官尊體動止萬福十二日所遣人至伏承賜書誨諭勤動且榮且感嗣以近製石本俾之拭目信所謂未有不求而得之者則前之干請誠不爲非也惶恐惶恐公之德業固已偉然於當世矣而今又以文章筆札垂示不朽伏讀展玩之際因思窮邊武俗耳目乍此矚耀其喧傳驚動宜如何哉後世之見者想公爲人魁傑雄偉又宜如何哉說者謂天不以全美賦人某不信也某自夏入秋苦於親疾以故久不修問謹因人還附此爲謝伏惟幸察

又皇祐二年

某頓首啓自夏迄今以老母臥疾營求醫藥加以京東盜賊縱橫朝

廷督責甚急公私多故遂闕拜狀中間伏承陞職留任亦以無由馳賀但深悚仄而已專人至辱書爲賜具審爲朝自重日膺多福邊隅已熟恩信兵民已安衣食當還廟堂以副公議此非小子之私祝真切真切富公移蔡亦便親而請也恐却以親疾難於移動未嘗求徐然此歲滿得徒亦其幸也某再拜

又皇祐四年

某叩頭泣血罪逆哀苦無所告訴特蒙台念遠賜誨言雖在哀迷實知感咽昨大禍倉卒不知所歸遽來居穎苟存殘喘承賜恤問敢此勉述其諸孤苦不能具道秋序已冷伏冀順時爲國自重哀誠所望

又至和元年

某啓伏蒙寵示閱古堂碑二本豈勝榮幸公之德業當施本朝耀青史而刻金石淹留邊郡閑暇之餘尙足以爲一方故事煥赫塞上竊顧小子亦得列於衆作之間既足爲榮亦可愧也感悚感悚范公文正云亡天下歎息昨其家以銘見責雖在哀苦義所難辭然極難爲文也伏恐要知

又同前

某啓近范純仁寺丞見過得觀所製奏議集序豈勝榮幸文正遺忠獲存於不朽亦勸善之道也某亦爲其子迫令作神道碑不獲辭然惟范公道大材闊非拙辭所能述富公墓刻直筆不隱所紀已詳而羣賢各有撰述實難措手於其間近自服除雖勉牽課百不述一二今遠馳以干視聽惟公於文正契至深厚出入同於盡瘁竊慮有紀述未詳及所差誤敢乞指諭教之此繫國家天下公議故敢以請死罪死罪

又同前

某啓昨日居憂服除便得召乃敢離穎至都見日便乞蒲同朝旨俾留遂領銓筭尋以引人事遽出同州入辭之際恩旨又留且領殘書

既而遂被茲命孤拙多艱無所補報屢招論議常願上聰寵祿難忝若何爲效恐終碌碌以爲知己之羞久不拜狀出處多滯故敢略序范公碑如所教悉已改正但候橋川檢得希文奏議實在賊界恐知之某又上

又同前

修啓昨自服除召還闕出處不定皆由蹇拙使然諒惟悉察自忝此職嘗於遞附啓爲謝某衰病鬢髮悉白兩目昏花豈復更有榮進之望而天下責望過重恨無所爲進不能補益朝廷退不能一作得決去恐碌碌遂爲庸人以貽知己之羞爾夙夜愧懼不知何以見教願聞誨勸之言真切真切

師魯及其兄子漸皆以今年十二月華某昨爲他作墓誌事有不備知公爲作表甚詳使其不泯於後大幸大幸范公表已依所教改正只是大順時檢得希文當初奏議是在賊地中伏恐要知

又嘉祐元年

某頓首啓秋暑尙繁不審三司尙書尊體動止何似伏觀制書以天下之計資天下之才雖未足以施夔稷一作契之業致堯舜之道以興至治以副具瞻而天災水旱之時民困國貧之際上有以寬旰食之憂下有以救饑寒之急此縉紳之君子閭巷之愚民所以聞命之日欣歡鼓舞而引首北望惟恐來朝之緩也修言不足信於人才不足用於世事有不得已而未能力去徒與衆人同其喜慰伏計大旆卽日在塗伏惟爲國自重謹奉啓咨候不宣修頓首再拜

又嘉祐二年

某頓首啓自明公進用雖愚拙有以竭其思慮效萬一裨補之而久無一言甚可責也今竊見國子監直講梅堯臣以文行知名以梅之名而公之樂善宜不待某言固已知之久矣其人窮困於時亦不待某言而可知也中外士大夫之議皆願公薦之館閣梅得出公之門

一笑事也公之薦梅一笑事也朝廷得此舉亦美事也某不敢以一言而讓三美故言之雖公而不敢洩公賜擇焉惶恐惶恐

又嘉祐治平間

某啓兩日不奉宴言豈勝瞻系伏承台候稍爾愆和不審晚來起居何似氣脈小小留滯微行必遂清康旦夕拜見且此拜聞

又同前

某頓首啓數日不奉餘論伏承台候微傷風冷喜已康和秋暑尙有殘敵更冀時加精攝無由咨候賓次謹勸此馳啓上問過旬休必獲瞻奉茲不盡區區

又治平元年

某啓不奉顏色忽已經旬霜寒伏惟台候動履清福竊承表啓累上聖意決不少疑量斯勢也似非辯說可入莫且當勉屈高誼兼副中外人情否某衰病最宜先去者尙此遲疑矧公繫國體重豈可輕議昔人歎好事難必成皆此類也旦夕瞻近姑此以道愚見幸高明裁察也惶恐惶恐

又治平元年

某啓晚來伏承台候萬福辱簡誨俾撰先令公真贊前世文人喜爲聖賢記述蓋欲自託以垂名矧威德清芬借載史牒但恐衰病久廢筆硯不能稱道萬一嘗試勉彊以應嘉命值夜草草

又同前

某啓承教俾作魏國令公真贊屢日杼思不勝艱訥蓋以鉅德難名非委曲莫究萬一而滯於簡拙遂至窘窮實辱嘉命惟負慚恐勉自錄呈

又治平 年

某啓某以私門薄祐少苦終鮮惟存二姪又喪其一衰晚感痛情實難勝仰煩台慈特賜慰卹豈任哀感之至酷暑復感伏承台候萬福

來日參假當奉言侍謹且附此敘謝

又治平 年

某頓首啓不獲瞻奉忽復數日秋暑伏承台候萬福某以餘毒所攻頸頰間又爲腫核第以不入咽喉比前所苦差輕且夕欲且勉出重煩台念特賜存問不勝感愧區區謹奉此敘謝

又治平 年

某啓不獲瞻見等閑數日餘暑尙整不審台候動履何似竊承有外訃之戚方此炎熾伏冀節損悲悼爲朝自愛無由馳謁門屏謹奉此陳慰

又治平 年

某啓至日不獲展慶不勝馳情伏惟履長納吉爲國耆老承副中外之具瞻某所苦悉已平蓋得節假中飽於將理尙煩憂恤手筆存問其爲感激併留面敘人還粗布萬一

又治平 年

某啓日夕風凜伏喜台候萬福重辱手誨仰認意愛之深某所以欲速出者蓋家居不遑安爾謹當更與醫工審議昨亦有一劑乞更寬數日皆寂然所以尤難安處或因方便特爲略言及豈勝大幸承諭曾見與叔平簡拙疾更不復云惟乞不賜憂軫皇恐皇恐

又治平四年

某啓不待台席忽復彌旬經節伏承動履清福杜門俟命已上三表便值休假方欲旦夕馳布懇誠于左右忽辱惠一作誨翰感慰兼深某去就之際不惟果於自決而相知者皆勉以必去不疑亮公見愛素深意必不殊也此來賴君相之明爲之辨別皎然明白中外無所疑惑矣則某之引去不嫌稍速所推恩禮不必過優使災難中遂逃禍谷而保安全於始終蒙德不淺矣區區所欲述者此爾伏惟幸察

又治平四年

某啓早暮遂涼伏承台候萬福昨日辱以相臺園池記爲賜俾得拭目辭翰之雄粲然如見衆製高下映發之麗而樂然如與都人士女遊嬉於其間也榮幸榮幸晝錦書刻精好但以衰退之文不稱爲慚而又以得託名於後爲幸也衆篇一時感事往往佳作咸得珍藏豈勝感愧昨夕偶數客坐中不時布謝皇恐皇恐謹奉此啓

又嘉祐八年誤實此

某頓首啓板橋忽遽攀違忽復旬浹氣節遂爾寒凝伏惟台候萬福龍旌卽路幸此晴明然而跋履之勞事務叢委竊計倍煩神用更乞爲朝自重以副傾依下情區區

又治平四年

某啓冬序始寒不審台候動止何似竊承懇請之堅遂解機政處大位居成功古人之所難公保榮名被殊寵進退之際從容有餘德業兩全讒謗自止過於周公遠矣然而朝廷慮則元老遂去私自計則孤危失恃此不能不惘然爾其他區區非筆墨所可既惶恐惶恐

又同前

某啓自承遂解政機出鎮便郡尋奉拙計已通呈遽審殊命優禮悉已懇辭又當馳賀也某藏拙於此幸亦優閑而衰病侵攻略無寧日歸心愈切然素計亦稍有緒也竊計大旆非晚啓行無由瞻望塞中伏冀爲國自重區區不宣

又熙寧元年

某啓東州難得酒村郡醞不堪爲信惟羔羊新得法造又以傷生不能多作然謂一無此字其味尙可少薦樽俎輕瀆台嚴惶恐惶恐

又熙寧二年

某頓首嚮嘗以拙惡應命深愧唐突乃蒙不鄙以之刻石得子履鉅筆錯之佳處因公勝迹託附之傳其爲榮幸多矣感惕感惕某近秋冬以來目病尤苦遂不復近筆硯小詩亦不會作心志蕭條但思歸

爾承論臟腹多不調更乞節慎飲食酒能少戒尤佳某一向不飲遂不復思無由少侍談席區區不布萬一

又熙寧二年

某啓專使至獲捧台翰伏承經寒動止萬福下情欣慰某以病目艱於執筆稍闕拜問其爲傾嚮之勤則未始少怠也某幸東州歲豐事簡居已踰年已再削乞壽陽蓋陳蔡勢難乞惟壽近賴亦便於歸計爾益遠旌榮新春伏惟爲國保重

又熙寧二年

某頓首啓近昨過鄆瞻望留都纔三四驛因假急足拜問粗布區區不謂遠顧專介直走淮濱誨諭勤勤仰認意愛兼審秋寒台候動止萬福下情豈勝感慰修過賴少留以足疾爲苦不久勉之官守情悰索然素志未遂其餘鄙冗莫道萬一惟乞爲國自重以慰具瞻

又同前

某啓某去秋留賴月餘嘗因急足還府附狀自爾勉力病軀祇赴官所忽忽遂見窮臘卽日凝凜伏惟鎮撫之餘台候動止萬福某昨蒙上恩察其實爲病瘁得蔡如請土俗淳厚本自閑僻日生新事條目固繁然上下官吏畏趨賞不患不及而老病昏然不復敢措意於其間若郡縣平日常事則絕爲稀少足以養獨偷安俟日而去爾甚幸甚幸荷公見愛之深欲知其如此爾歲暮雪寒伏乞爲國加愛

又同前

某啓立朝雖久忝冒實多而未有卓然可稱於人者蒙公愛念贈以嘉篇語重文雄過形褒惜何以當克但祕藏榮感而已拙句唐突大匠出於勉彊慙慙恐某自至蔡遂不曾作詩老年力盡兼亦憂畏頗多冀靜默以安退藏爾

又熙寧四年

某啓近嘗奉記粗布區區竊計已投几格專使忽至特任親翰伏承

經寒鎮撫之餘台候動履萬福豈勝感慰之極某衰病如去年老憂畏日暮未去間免默苟偷如前書所述爾忽忽又見新春惟乞爲國愛重以副中外瞻倚之望

又同前

某啓辱賜齋醞尤爲醇美第小邦鮮嘉客老病少歡意不得如侍台席時豪飲之量爾可歎可歎近以序傳拜呈塵浼聽覽蓋嚮在賴因欲遂留而當權者猜忌聊以自解爾進退之間其難如此可懼也千萬保重以慰勤企

又同前

某頓首再拜近急足還府奉狀粗布謝懇新正令節限以官守無由一廁賀賓之列元勳柱石神明所相百福來臻春氣尙寒伏惟爲朝愛重上副眷倚下情祝頌之至

又同前

某啓昨承龍示歸榮等五篇刻石俾遠拭目豈勝榮幸唐世勳德鉅公爲不少而雄文逸翰兼美獨擅孰能臻於斯也某以朽病之餘事事衰退然猶不量力不覺勉彊者竊冀附託以爲榮爾見索拙惡不能藏默謹以錄呈懇罪懇罪某又上

又同前

某啓向嘗輒以拙詩塵浼台聽尋蒙特賜龍和不惟以慰寂寥而雄文大句固已警動人之耳目屬閑居杜門難偶信便遂稽布謝豈勝感幸愧恐之至也因王郎中詣府的便少道萬一

與富文忠公彥國 天聖期道間

某頓首白彥國自西歸於今已踰月無由一致書蓋相別後患一大疽爲苦久之不暇求西人行者然亦時時有客自西來獨怪彥國了無一書又疑其人不的於段氏僕夫來致幾道書此人最的宜有書又無然後果可怪也始與足下相別時屢一作累累邀聖俞語謂書

者雖於交朋間不以疏數爲厚薄然既不得羣居相笑語盡心有此猶足以通相思知動靜是不可忽苟不能具寸紙數行亦可易致則可頻致猶勝都不致也當時相顧切切用要約如此謂今別後宜馬朝西而書夕東也不意足下自執牛耳登壇先敵降壇而吐之何邪平生與足下語思欲力行者事何限此尺寸紙爲俗累牽之不能勉強嚮所云云使僕何望哉洛陽去京爲僻遠孰與絳之去京師也今尙爾至絳又可知矣自相別後非見聖俞無一可語者思得足下一書不啻饑渴故不能不切切也秋暑差感千萬自愛

又嘉祐元年

某啓暑雨不審台候似有蜀人蘇洵者文學之士也自云奔走德望思一見而無所求然洵遠人以謂某能取信於公者求爲先容既不可却亦不忍欺輒以冒聞可否進退則在公命也

又嘉祐七年

某啓慰疏已具如別春候暄冷不常不審孝履何似伏惟以時順變徇禮節哀上副人主之眷懷下爲士民自重某自承乏東府忽已半歲碌碌無稱厚顏俯仰尙思一有論報而去然勉強庸拙不知所爲苟終止若斯願亦安能遲久不待彈劾當自爲計也未知尙有可教否無由瞻近豈勝下懷時事多端伊洛過客相踵必有能道其大槩者其他委細亦非筆墨可殫也謹因遣人萬不布一某又拜

又嘉祐八年

某頓首啓近馳賀懇少布私誠伏承大旆已及近郊道路感暑竊審台候萬福實慰區區瞻跂之勤朝廷新有大故時事多艱舊德元臣與國同體馳騎奔走不惟出處之節得宜與來者爲法康時濟物愚智所同有望於馬首之來也餘如前書所述也旦夕當得瞻見顏色第因張師遠行不可無書謹奉手啓咨問

又同前

某啓忽承手誨以屢辭新命未得請俾有所開陳敢不如教然愚竊以公自元宰還首西樞懇請而從則恩典未見其過但公以避災爲意思欲深自退抑此與上待元老之意本不相爲謀也亦竊見初一劄自後更不降出上亦未嘗語及豈非事已決定無可商量邪若德音有所詢當具道如所教也秋涼喜承台候萬福謹奉此不宣

又治平二年

某啓餘暑未祛伏承台候動履清福人至辱賜簡豈勝感服自公在告爲常制所拘不得時伸候見固以爲恨今者大旆當西不一造門下竊意不近人情兼料諸公意必同此所以雖承誨勸未敢聞命也皇恐皇恐人還謹此不宣

書簡卷第一

書簡卷第二 集一百四十五

與晏元獻公同叔慶曆七年

某啓孟春猶寒伏惟判府相公尊體動止萬福前急足自府還伏蒙賜書爲報且承臨鎮之餘日有林湖間燕之樂此乃大君子以道出處之方而元老明哲所以爲國自重之意也幸甚幸甚有魏廣者好古守道之士也其爲人外柔而內剛一作內剛而外柔新以進士及第爲榮陽主簿今因吏役至府下非有它求一有也字直以卑賤不能自達欲一趨門仞而已伏惟幸賜察焉不備某再拜

又皇祐六年

某叩首孟春猶寒伏惟留守相公大學士動止萬福某罪逆不孝不
自死滅猶存喘息自齒人曹近者輒以哀誠具之號疏台慈軫惻憐念孤窮亟遣府兵賜以慰答有以見厚德載物無所不容求舊拾遺雖擊不棄捧讀感涕不知自己內惟孤賤受賜有年豈獨茲時乃爾切怛蓋以感激臨紙發於其誠而不能止也留務清閑伏惟上爲邦家精調寢饋下情區區謹因人還附以敘謝某再拜

與杜正獻公世昌慶曆五年

某頓首啓仲夏毒熱伏惟相公閣下尊候動止萬福某蒙國厚恩任責尤重殆此暮歲曠無所聞不惟上辜陶鈞實亦慚愧知己瞻望門館豈勝區區然自東藩下車已累月而尙稽修問左右之禮蓋其進不能爲朝廷辨邪正而使讒言勝於公議退亦何所述其私焉用此彷徨非懈怠也伏以大臣出處自繫時事惟望爲國自重以享多福卑情不任禱頌懇切之至謹奉啓起居伏惟幸察

又慶曆八年

某啓仲夏毒熱不審相公閣下尊體動止何如某昨蒙恩自滌徙楊楊古名都嘗多鉅公臨治憶爲進士時從故胥公自南還舟次郡下游里市中但見郡人稱頌太守之政愛之如父母某時尙未登公之

門然始聞公之威德矣因竊歎慕不已以爲君子爲政使人愛之如此足矣然不知公以何道而能使人如此又不知使己他日爲之亦能使人如此否是時天聖六年冬也去今幾二十年而幸得繼公爲政於此以償夙昔歎慕之心而其材薄力劣復何能爲徒有志爾相公道德材業著于天下一郡之政不足多述因小生之幸遂以及之聊陳始末不覺言繁恐悚拜見未由伏惟爲國自重

又皇祐元年

某啓孟秋猶熱伏惟致政相公閣下尊體動止萬福昨者某以目疾爲苦自楊州來穎至此經時闕於奉狀蓋以目疾一作目病無悰私門多故然其企望門館何日而忘頃自去冬子美之逝賢人不幸天下所哀伏計台慈倍深痛悼某年方四十有二而鬢鬢皆白眼目昏暗慈母垂老羸病厭厭身世若斯國恩未報每以自念慨然興嗟知遇至深敢茲瑣碎皇恐皇恐秋暑未退霖雨爲災伏惟順時倍加保重卑情所望不任區區謹奉啓起居

又同前

某頓首啓季冬極寒伏惟相公閣下尊候動止萬福某幸得守官近郡當時欲奔走候問起居而自秋以來老母臥病郡既僻小絕無醫藥逮冬至之後方得漸安由此踰月曠闕書啓之禮冀爾小子蒙德有年瞻望門牆何日而已伏願順時自重以迎遐福以隆壽考卑情不勝區區謹奉啓咨問

又皇祐四年

某啓前月初專於郡中借人拜問不謂至今不達必以大水爲阻急足至伏喜秋來台候萬福得養善書承頗多故亦云微恙今必已平康諒煩台慮也籠示寄君謨唱和詩并梅書豈勝珍荷梅君困窮晚遇真知不爲否也某此苟活但葬事未有涯大事惟此固難容易自秋來忽患腰脚醫者云脾元冷氣下攻遂勉從教誨食肉古人三年

不食鹽酪誠有愧也不孝不孝延陵葬孔子猶往觀之蓋君子於哀樂喜怒必有可觀以為人法也今世士人居喪不及處多風俗久弊恬不為怪心常患之不意自犯名教然存身亦以奉後此蒙寵誨之意也荷見憂愛至深不覺言多死罪死罪某上

與曾宣靖公明仲 慶曆五年

某啓山郡僻寂習閑成懶凡於人事幾廢絕前者送起居院文字人回特沐手誨違別茲久伏承德履甚休可勝慰浣某居此雖僻陋然奉親尸祿優幸至多愚拙之心本貪報國招仇取禍勢自當然然裨補未有一分而緣某之故事起多端有損無益可為媿歎今而冒寵名飽食自便何以為顏也未期良會冬冷保重

與呂正獻公晦叔 皇祐二年

某啓別後人還兩辱書暑中喜承寢味多福某十二日受命與孫公易地此月下旬當行効官不憚宜力苟為公家何所不可若區區應接人事以避往來之謗祗恐違其天性難久處也西湖宛然再來之計不難圖而與賢者共樂知其不可得也秋涼惟冀保重

又熙寧二年

某啓某以衰病之質幸此優閑中性易習遂成懶墮嚮審召還禁林固與士大夫同其慶抃而久闕馳誠特知之厚必不罪其疎慢也辱書重增感愧未涯瞻邇漸寒為國自重

又熙寧二年

某啓養拙東州久自藏縮加之病苦廢事遂闕拜問比者得請淮西道出治下方俟及疆奉狀行次南郡一作都遽辱賜教其為感愧何可勝言仍審坐鎮之餘動履多福某衰晚之年蒙上信其實病不以避事為責而從其所欲恩出萬幸何感如之餘不復云皆留面布

又熙寧五年

某啓晴陰不常不審動履何似前日四望一賞羣芳之盛已而遂雨

古人謂四樂難并信矣十三日欲枉軒騎顧訪蓋以草堂僅成幸一光飾之爾謹此咨布餘留面敘

又同前

某啓昨昨辱教答承齒疾尚未平若苦不敢勸酒莫可略枉顧否蓋欲少接清論不主於酒食物亦令減滋味也矧茲疾某亦嘗苦每蒙寬假也更此咨啓

與程文簡公天球 皇祐二年

某啓哀誠迫塞不敢時通記問蒙存錄過厚荷知有素不當煩述也賤累往來鎮下特承差人送至及勞賜稠重祇以愧感佳釀拜惠甚頻增醜增醜衰病咫尺未由號一作就見依戀依戀

又至和元年

某頓首啓依戀之懇略布具前大暑中特煩眷接累日連夕不見勸色私懷感著非一二所可陳舟行病酒累日不解府人屢還皆不能奉啓纒過長平遂苦大熱比及都下俗狀益勞瞻想清宴其可再得餘當續具咨目茲少敘依依不悉

又至和二年

蒙頒寄佳醞感愧非一京師日苦俗狀無復清思臨觴之樂未始有之思去歲留奉清歡不覺已暮年矣柳湖陳之甘棠思有所頌述以遺陳人為他日故事以彰公之雅志不惟拙訥直以多事忽忽殊所不暇秋涼必儻素願得次詩榜之末亦大幸矣

又同前

某啓昨得請淮西方作書乞舟謀出府下冀得一奉言色私懷喜幸何可勝言而改職未謝恩旨復留孤拙無庸於時何報進退遑遽莫知所為重以屢煩朝聽未敢輕有所陳覲顏周行碌碌而已荷公愛顧非比他人出處之節不敢自默時事日新未知如何區區非紙墨所布也秋熱惟乞以時為國自重

又同前

某啓忽忽久疎奉問近以被命出疆初緣持送御容須一學士同列五人皆以曾往遂不敢辭繼以虜中凶計義益難免然冒風霜衣皮毛附火食麵皆於目疾有損亦無如之何比者當馳問示諭柳湖嘉致誠願有所述以姓名附見爲榮北行馬上當得抒思偶秘書歸省顧治行計隨分牽率鄙懷不能盡萬一

又至和元年

某頓首伏承台誨欲使撰述先公神道碑豈勝愧恐某才識卑近豈足以鋪列世德之清芬然蒙顧有年義不得辭其如大懼不稱所使以辱執事是用進退惕然餘當請節下受教舟船荷德無已

又同前

某啓辱賜問并錄到贈告屢煩台聽悚仄可知所要碑文今已牽課衰病無餘言無倫理不足以揚先烈愧汗而已某自病起益疲不能復舊豈遂衰邪碌碌處此思去未果但思明公柳湖春色不得陪俊騎爲恨爾大用猶稽時事多端思見舊德物論如此非諛也未聞樽俎爲適亦有嘉趣臨紙區區不能盡惟冀爲國珍重

與孫威敏公元規 皇祐四年

某僦居西郊苟活無求於世號奉几筵而已諸事無便不便也幸無恤祗如下葬茫然未有涯然汲汲須於明年了却某邇來目昏略辨黑白耳復加重恐知之西行漸相遠哀苦中瞻望依依范杜二家之子不歸京西此不足怪人事就易爾仕宦子孫多在北古賢亦皆如此不以去就爲輕重也某亦不忍以先妣有歸子孫以遠不得特省墳墓也哀切哀切

又同前

某叩首急足自徐還辱書承以七月首塗大旆遂西即日秋暑伏惟台候萬福昨日范公宅得書以埋銘見託哀苦中無心緒作文字然

范公之德之才豈易稱述至於辨讒謗判忠邪上不損朝廷事體下

不避怨仇側目如此下筆抑又艱哉某平生孤拙荷范公知獎最深適此哀迷別無展力將此文是其職業當勉力爲之更須諸公共力商權須要穩當承公許作行狀甚善便將請證議官文書有司據以爲議大是一重公據請早揮筆祗見行狀亦當牽率爲之也入對少留應當西邁殘暑千萬保攝時乞惠問以慰孤窮

與蘇丞相子容同前

某啓哀窮苟活奄及仲秋孤苦之心何以自處昨急足還府嘗奉號疏必達秋涼寢味如何昨聞入京今必歸府某此幸幼賤如常相見未涯嚮寒保愛因人奉此不次某再拜推官即學士執事八月五日狀

昨大禍倉卒離南都來不記料錢券曆何在後來須繳納省中不知省中會催否是王仲文手分託與問之

又同前

某啓近急脚子還嘗奉訊專人至辱書審秋寒以來體況佳福修苟自存活諸况前書具之此不繁述職租極荷掛意前者爲料錢曆子承封送王仲文等狀蓋當時作書誤寫本爲添支曆爾更說與問看記得當時離南都時似繳納了恐未曾繳時須要見歸着也此中尋來並不見故也更爲王潤州織紗如何亦告因書批及見解勝喜賢弟被薦歲杪多愛某再拜職田絲十二兩有公文却送還府

又皇祐五年

某啓近累累辱書承夏熱幕中清勝某居此以來事緒累次書內應悉但卜葬心欲速了而事未有涯絕無人相助又無弟姪可使者茫然中心未知所措吾弟替期應亦不遠公租極小事煩挂意悚悚苟圖存活所須至鮮然有不得已處也窮居危坐病目耗然無以度日又爲一妹喪夫惻然無依居處相遠力未相及添此一重煩惱爾人

還作書回謝事多未能子細思渴思渴

又疑

某啓晴色可佳必遂出城之行泥滓竊惟勞頓清明之約幸率唐公見過喫一椀不托爾餘無可以爲禮也專此不宣

又疑

某啓兩晴便苦客多牽強攀和感篇已不能如韻實愧於詩老也早來承見問所聞再二疑惑不審何事彼有所傳幸以爲示也爲客在門前守定寫簡不成悉之

又疑

某啓拙詩越韻有梅二之業病無其工也早來許行香後見過何爲復輟所欲示者何事來日能見顧否行香後乘涼枉駕作一盂飯奉待却有絕品茶數種可試若所說事不妨時幸就近約介甫同來爲幸惟以方上號請告不敢聚飲爾其他並無害批示某再拜

又治平四年

某啓近嘗奉狀急足還并遞中併捧惠問所以慰誨存恤之甚厚兼審經暑動履多福乃誠瞻嚮欣感可量汴流駛激承使舟即日東下得與民吏奔走道左豈勝馳情謹先奉此攀迎伏惟幸察不宣

又同前

某啓某以孤拙蒙上恩憐予之一州俾養衰朽又得在使部遂依公庇頓安危心豈勝天幸某至此已數月幸歲豐盜息民事亦稀蝗蝻不多隨時撲滅承齋於下汴首及弊封當得親受約束面布懇誠謹因迎逐人行姑此上問尊候不宣

余皇祐庚寅歲爲南都從事會樂安公來守留司以余乃昔所舉送進士待遇特厚府中之務皆以見屬嘗謂余曰愛君至誠喜得共事故事事奉諉必不憚煩也又嘗親書余考牒曰才可適時識能慮遠珪璋粹美是爲邦國之珍文學純深當備朝廷之用又其

所遺書簡往往指事詰難盡其底處余亦荷其知照於論議間纖悉無隱前後諸帖雖秘藏之或爲親識攜去者多矣今聞公墓謝感舊愴懷不能已已因索巾褚尙得數十紙命工裝背庶幾藏於久遠爾熙寧五年十月廿五日東陽郡思堂丹揚蘇頌子容題
予在樂安懷府二年日接論議聞所未聞府事之外則章奏書疏悉以見託至於私家細故亦多詢其何如故其簡札丁寧委曲雖至親亦不過如此自公之薨予每與親舊語言未嘗不及之抑其風尙之可懷故彌久而不能忘也蘇頌子容題

與王文公介甫 嘉祐 年

某再拜相別忽焉遂見新歲中間嘗一得附書其如忽遽不盡鄙懷於今猶以爲恨雖然遂使不忽遽區區之懷亦不能盡也賢弟來得相見備審動止即日春寒奉大夫人萬福喜慰無限賢者不能留之朝衰病者不得放去皆失其分歸咎何所某自新春來日益昏耳亦不聰大懼難久於筆硯平生所懷有所未畢遂恐爲庸人以死爾其他細故不足道惟奉親自愛

又嘉祐二年

某啓近託揚州附書必達自拜別無日不瞻企秋氣稍涼伏惟尊候萬福毗陵各郡下車之始民其受賜然及侍親爲道之樂日益無涯矣某快快於此素志都違諸公特以外議爲畏勉相留古之君子去就乃若是也呂惠卿學者罕能及更與切磨之無所不至也因其行謹附此咨起居

又嘉祐元年

近得揚州書言介甫有平山詩尙未得見因信幸乞爲示此地在廣陵爲佳處得諸公錄於文字甚幸也賢弟平甫秀才不及別書愚意同此前亦承惠詩多感多感

與韓獻肅公子華 嘉祐六年

某啓多日思致問近見發遣使臣來請公用物呼渠欲附書待之終不至遂以稽滯不審秋涼所履何似某碌碌無所稱遂爲朋友之差第以體難輕發當更小忍懣爾君謨自南歸幡然一翁但喜其病渴且止遂當安也仲儀頑健如故惟不能屢相見交游索漠子華豈當久外何時來歸未間因風時枉數字猶足以慰衰病之懷竊冒寵榮不知爲樂但覺其勞與負愧爾茶三二種託賢弟致達勿罪少邊州早寒惟爲時自愛 公儀云謝禮閣唱和已失二梅可歎可歎

與韓門下持國 至和二年

承已受命未克馳賀蓋以治行徙居日併率也陰雨體况佳否小詩幸同作以送介甫因出見過思仰思仰某再拜十三日何時可入史院幸先示論爲望

與吳正獻公冲卿 嘉祐六年

某啓奉別忽見新歲辱書承經寒動履休勝某以孤拙之姿不求合世加以衰病心在江湖久矣此友親所共亮之也茲者遽叨誤選實出意外任責已重而無素蘊不敗何待見愛深者但可弔也不然何以教之惶恐惶恐新春保愛以副瞻祝某再拜

又嘉祐八年

某啓公私多故久闕奉狀辱書承經暑動履清和併深慰戀近審將漕京西但欣按部過都當遂瞻見亦承會有章奏必難遂高懷莫且勉就否某自春涉夏以小兒女多病不無憂撓加以待罪碌碌不知所爲情緒蕭索無復前日惟握手一笑庶幾尙慰衰殘豈勝企望也未間感暑爲時自重人還草率爲謝不宣

又同前

某啓公私多故稍闕致問自因山赴役事非素料每見奏削足知勞慮也亦承邇來頗有倫緒諒非精敏不能濟也某以衰朽謬膺器使當此多艱未知何以免於罪戾也卽此衰病之餘與兒婦輩各安恐

知

又治平四年

某啓遠違台席忽復更時秋暑尙繁不審動履何似某向以孤危之迹當羣論汹涌之時獨賴至公遏以清議保全至此恩德可量赴職以來日享安逸茲爲受賜不淺矣乃情傾嚮豈勝區區惟冀以時爲國自重

又熙寧四年

某啓感激之誠已具前幅某十七日受命行裝素具適值久雨積水爲阻三五日始遂東歸某此來恩數出於望外然猶有私門乞恩澤上煩朝廷幸乞留念一作意蓋他門不敢言恃以親契皇恐皇恐某又上

又治平元年

某啓多故稍闕致問辱書感愧新正竊承動履休福貴眷各安某與兒婦等幸如宜第苦殘衰齒牙搖脫飲食艱難殊無情况爾京西忽已踰年承見論謹當誌在下懷也過年賓客書題全集日益區區修報草率不以爲罪春和惟以時慎愛

又熙寧五年

某頓首啓某田野之人自宜屏縮而况機政方繁猶蒙曲記其生日貺之厚禮仰佩眷意之篤感懼交并某以衰病退藏人事或不能勉力交親必賜容恕謹此以代布謝之萬一

又熙寧五年

竊承懇章屢上而中外瞻矚方切恐未能遽遂高懷也近叔平自南都惠然見訪此事古人所重近世絕稀始知風月屬閑人也阿阿有會老堂二篇方刻石續納兒子在宅叨聒感愧感愧

與吳正肅公長文 嘉祐二年

某啓前日齋所却成叨聒累日惛齋不易承手教存問雨勢不減去

年弊居上瀾下浸壓溺是憂更二數日如此當須奔避皇皇不知何適為可居京師其况如此奈何承惠奇物遠來更要新如何可得也呵呵感著感著人還謹此不宣

又同前

某再拜累日不瞻奉渴仰可勝酷暑中承氣體清適某自初旬內嘗冒熱赴宿為暑毒所傷絕然飲不得加以腹疾時時作遂在告數日前下榜子欲見以虛羸未任遂復中止更三五日當出承手教存問感慰感慰謹此奉謝

又同前

某啓在告累日不獲瞻見尤所企渴辱教承餘寒體氣清佳衰病極不自勝左臂疼痛繫衣搯笏皆不得懇告諸公幾乎乞骸也何暇復顧外論如何哉承見諭感仰感仰乍出事叢草草不悉

又嘉祐四年

某啓承奉祠齋宿喜體候清休某參假方三日左眼臉上生一瘡疼痛牽連右目不可忍旦夕未止又須在告屢廢職事豈得安穩諸公不諒未肯令罷奈何奈何承惠佳篇甚釋病思和得納上目痛甚書不得勿訝

又同前

某病中聞得解府事如釋籠縛交朋聞之應亦為愚喜也請外又須更作一節般挈上下重以為勞數日卜居稍定遂得從公游矣拙詩取笑

又此帖乃是嘉祐三年二月誤寫於此

某啓一兩日不奉見伏惟體候清佳孫明復春秋文字知在彼傳錄欲告借一兩冊或彼中已寫了者若或未寫到者皆得此中一二筆吏閑坐必不久滯某遂赴班荆忽忽五七日不相見謹此不宣

又同前

某啓昨日聖俞處見一篇又辱寵示其鋒豈易當也然自此極有工夫却歸人道上也呵呵云百司者尚未見報來不知的否某已有秘閣唐書便更無兼局亦情願臉瘡未愈未得奉見區區不悉

又同前

某啓昨日奉見偶忘咨聞為親戚喬孝本避嫌當易局乞早與施行況武平即君例甚近幸冀留念前時亂道數篇必已寵和專令咨請望付人也忙不詳悉

又同前

某啓在告久不瞻顏采頓涼伏計德履康裕某病體得涼漸愈思欲朝參以奉言宴而假故須初二日方可出昨見新制京朝官不自下文字令審官舉行磨勘朝士唧唧皆為不便某亦思之有數節未便蓋為害甚廣然不知長文曾留意否始初莫與建議否欲有所陳未敢先此咨問幸思而見教

又嘉祐六年

某啓自大旆東出忽復踰時春氣猶寒竊承動履清勝前約臨行少留會話終不克遂至今為恨東土雨雪不愆年豐俗阜為郡之樂想亦無涯某衰病日增勉強碌碌卒無毫分以塞谷責奈何奈何前日賞花釣魚獲侍清宴自景祐三年逮今二十六年獲見盛事獨恨長文不在爾嚮暑政暇惟以時自愛因風惠問以慰瞻渴

又治平二年

某啓以公私多故久不奉疏秋暑伏承孝履支福賢郎來因得聞動靜粗慰瞻企然而倚廬遠去城邑飲食非便亦承臟腑不調諒出蔬食所致某向居憂於頰每每因食素生疾遂且食肉然服除半歲猶未平復此在典禮亦當從權前時傳侍講還朝尤病甚有羸色久之方復公奉侍慈顏尤當勉彊間食少葷味以養助真氣交舊奉祝惟此為切餘不煩言也亦知室居稍亦完緝嚮寒更冀節哀慎護以副

瞻祝

又治平元年

某自春末家中疫疾深夏甫定遽此水災驚奔不暇僅有餘生入今年來兩目昏甚屯滯百端直以京師饑疫復此水患上心憂勞正當竭力未敢請外其如無所裨補其實愈深奈何賜茶數餅表信然亦不宜多飲也

又熙寧元年

某啓暑伏已深不審台候動履何似修赴職已旬餘幸歲豐盜賊衰息地僻人事稀簡蹇拙之迹臨禍獲全荷德已多而又假以寬閑之處俾養衰病之餘其受賜亦不淺矣昨過潁尾蓋十五六年不到矣而風氣之變物產益佳巨蟹鮮鰕肥魚香稻不異江湖之富故毫雖名郡而歸思不可遏也固不待巢成而斂翼矣公方上副聖君眷委之重下爲善人良士所賴惟爲國自重以副區區不宜某再拜

與蘇丞相子容 皇祐 年 已下續添

誠如所諭甚善早來所聞是生開者河道云太淺却高如西面三尺已來更請子細看過或果如此即更須那工開令深峻方可行水仍云大抵近東河底漸高恐流水不快千萬且與掛意某兩日拖病來日方可到城外恐知之某白子容足下

又至和元年

某自去秋扶護南歸水陸往還四千餘里幸無風水之恐得遂安耐哀苦中獨力粗如私願其如水往陸還奔馳勞苦故自春多病僅有餘生中間承改秩召試帖職未遑爲賀亦以哀苦杜門少見人便故也即日供職奉親外氣體休佳某六月嘗勉從人事未知所向何方相見未可期企仰企仰因人不惜垂問此外珍重某又問 哀苦中承示啓事相如何必更如是未禳除稽於復謝諒可情恕也

又嘉祐七年

某啓中間辱書承爲政外體履安和近又沐惠問適以合宮大禮前後事叢不時致謝第深感愧也潁城佳郡足以優賢然當舒發遠大則難久留也未聞湖園亦少資清興某衰病碌碌厚顏已多有名即得引去矣未果談款初寒以時慎愛不宣某再拜知郡子容學士足下十一月一日

與杜正獻公慶曆 年 見英辭類彙

某頓首啓仲秋漸涼伏惟致政相公尊體起居萬福前者所遣人還伏蒙寵賜書答因得備問起居之節進退之宜私心喜幸何可勝道淮南歲旱飛蝗羣下來自淮泗至秋暑毒不解不審治汴如何更望順時倍保尊重

又慶曆 年 見英辭類彙

某頓首山僻少便關於修問伏惟台候萬福進士曾鞏者好古爲文知道理不類鄉閭少年舉子所爲近年文稍與衆後進中如此人者不過一二閣下志樂天下之英材如鞏者進於門下宜不遺之恐未知其實故敢以告伏惟矜察

書簡卷第二

書簡卷第二 集一百四十六

與趙康靖公叔平 至和三年

某啓辱教并高郵二書不勝感刻足以仰見仁人之心惻物垂憫之深也方欲專馳人去請時暑重煩揮翰來且併伸面謝人還姑此

又至和三年七月

某啓累日阻拜見不審尊候何似某爲水所渰倉皇中般家來唐書局又爲皇城司所逐一家惶惶不知所之欲卻且還舊居白日屋下夜間上棧子露宿人生之窮一至於此人馬隨多少借般賤累幸不阻

又嘉祐四年

某頓首啓初夏已熱不審動止何似邛去京師不爲遠而叔平在外宜日走訊問候興居而動輒逾時雖云人事區區實亦可責也某昨衰病屢陳蒙恩許解府事雖江西之請未獲素心而疲憊得以少休豈勝感幸卜居城南粗亦自便自在府中數月以几按之勞凭損左臂積氣留滯疼痛不可忍命醫理之迄今未愈天府孰不爲之獨衰病者如此爾東平風物甚佳爲政之暇想多清趣更冀爲朝自重以俟嚴召遞中謹奉此有懇如別幅

焦千之秀才久相從篤行之士也昨來科場偶不曾入其人專心學古不習治生妻子寄食婦家遑遑無所之往時聞邛學可居所資差厚可以託食而焦君以郡守責侯難以屈迹今遇賢主人思欲往託竊計高明必亦聞此但恐邛學難居今已有入爾若見今無人則焦君不止自託其於教導必有補益亦資爲政之一端也更在高明詳擇可否俟有寵報決其去就也謹於遞中布此懇

又同前

某啓久不奉狀乃以今夏暑毒非常歲之比壯者皆苦不堪况早衰多病者可知自感暑中忽得喘疾在告數十日近方入趨而疾又作

動輒伏枕情緒無悰深思外補以遂初心而唐書不久終篇用是更少盤桓待祠既畢當即決去形容心志皆難勉強矣焦秀才事荷挂念方走淮南欲挈家而其婦翁作省判遂被留連勢不能去然渠感愧非一也某久欲作書屬病今猶居告自叔平兄去後子華作憲遂鮮歡

又同前

某啓近嘗奉狀秋雨早寒不審尊候何似昨辱書言郡封不安勞慮醫藥數日前聞果不起伏惟哀悼之懷何以堪處無由陳慰徒用瞻仰叔平素喜浮圖之說死生之際固已深達茲顧未能頓至無念諒用此可以少寬哀苦之情爾交游無以爲言聊以此塞悲奈何奈何更希爲國自重也謹於遞中附此

又嘉祐五年

某頓首啓伏承榮被制書入司天憲中外欣愜以謂肅政綱以重朝廷於茲有望焉至於朋舊又喜來歸獨不得親款宴言以爲恨爾竊計旌旆已及郊畿無由瞻迎溽暑惟爲國自重

又熙寧二年

某再拜自承榮遂挂冠之請日欲馳賀而病悴無堪事多稽廢其如不勝欣慕瞻仰之誠也即日隆暑伏惟台候動止康福竊惟宴問之樂大愜雅懷視塵瑣必深悶歎也某衰病日增尙此遷延爲愧不淺然亦不晚必能勉追高躅也瞻見未涯惟冀順時加重

又熙寧三年

某衰病退藏人事曠廢理無足怪然亦不承問不勝傾馳屢得君貺書及見唱和新篇粗審動靜喜承台候萬福嚮嘗辱許枉顧雖日企竚乃出於乘興不敢坐邀然又思頽之請決在此春若得自乘一鹿車造門求見亦未爲晚未間春暖惟冀以時衛重

又熙寧四年

某啓自退居杜門人事幾絕養成疎慵稍開問塗中忽辱書頓慰岑寂兼審經寒尊候萬福某衰病如昨日足尤苦殊不少損茲亦老年常態爾閑居之樂無待於外而自足處多惟朋舊相從爲難得自安道得請南臺竊思二公物外得朋之樂不勝羨慕所承寵諭眷首命駕見訪此自山陰訪戴之後數百年間未有此盛事一日公能發於乘興遂振高風使衰病翁因得附託垂名後世以繼前賢其幸其榮可勝道哉在公勉強而成之爾餘具別紙

與馮章靖公當世 嘉祐三年

某頓首區區久闕致問中間辱書爲感何已冬寒伏惟台候萬福某以衰病期一作思得一小郡養拙三二年間謀一歸老之地此願未獲遽被責以吏事精力耗竭何止彊勉不出歲末春初當有江西之行矣薛親幹敏河東風土民間事緒可以詢問得佐幕府甚幸甚幸某爲目病爲梗臨紙草率惟冀鎮撫外以時爲國自重

又嘉祐四年

某啓自承移鎮合肥嘗一得奉狀其後區區更闕附問不審酷暑以來算候何似廬在淮南爲劇郡竊惟下車布治之初當少煩條教既而可樂之趣則有多於他邦也伏惟視政之暇爲時自重俟來歸以慰士大夫朋友之望

又嘉祐五年

某啓伏自移鎮肥上嘗一奉書忽已踰歲續雖乏馳問然瞻企之勤則未嘗懈也即日春寒不審尊候何似某以衰病無堪自解秩天府於今一暮正以唐史殘編爲累今幸成書不久進御遂當南去世事老來益有可厭者矣自當世治肥然大率諸相知皆云不得書某亦以地僻少有來使得詢動止朝廷公議與交親私望皆願還歸未聞向暖惟冀爲國自重

又同前

某啓昨自罷煩劇卜居城南少獲休息然猶此盤桓未遂決去正以唐史將遂終篇然亦不過秋末時事爾廬去京師不遠計可備聞難於紙筆具道也當世據名藩優游文史自足爲樂其餘一付公議但朝多賢士而獨在外與相知之私立欲公來歸之速爾某衰病俱攻去心甚速諸公察其實然而未肯決然放去奈何奈何原父雖歸子華作惠朋友益蕭索當世尙壯及時讀書行樂此外稍隙時當得數奉問大熱更冀自重

又同前

某啓自承移鎮金陵遂疎奉問經暑竊惟體履多福江山之勝實足以資清興而賢者久居於外豈朝廷之意哉朋友區區之私又可知也某衰病迫於歸計唐史奏御遽陳危懇而未蒙聽允進無所補退不獲志負愧周行不知所措一作處相見益無涯惟爲時自愛以副瞻望

又同前

某啓自成書請外所陳哀切冀以危誠有以感動而二三公過爲顧慮曲以見留在意實厚於計則非便也奈何奈何本欲爲郡下客少溷主人復未可得然使少遷延終當必償夙志也濟叔窮居得當世在鎮必以慰意不久當應稍起此公議久所鬱鬱也前承惠碑多佳者甚濟編錄感幸感幸聞金陵有數廳梁陳碑及蔣山題名甚多境內所有幸爲博采以爲惠實寡陋之益也病暑草率

又同前

某啓承惠碑刻既博而精多所未見寡陋益而私藏頓富矣中年早衰世好漸薄獨於茲物厥嗜尤篤而俗尙乖殊每患不獲同好凡如所惠僅得二三固已爲難而驟獲如是之多宜其如何爲喜幸也濟叔公議猶屈乃吾徒之責未嘗少忘于懷而造物者第與衆人同爲嗟歎而已豈賢人君子亨否有命殆非人力能致邪雖然敢不

竭力辱論感愧承專遣人至數召問其還期每云有故未歸遂且於郵中附此俟渠行別當奉狀也

又嘉祐六年

某啓衰病碌碌無所稱徒負愧恥區區強顏人事廢曠久闕致問但深瞻企昨承進寵經筵而尚留居外未足以慰士大夫之望實非交游之私論也辱惠書承經暑涉秋動履清安江山英勝聊助公餘之興未嚴召問希爲國自重

與王副樞景夔 嘉祐五年

某啓自承軒騎歸止屬以多故未克祗謁暄和竊審氣體清安適辱簡誨兼示鄭州書信等偶在院中定題不時爲答深所感愧謹馳此爲謝幸加恕察不宜某再拜景夔舍人閣下八日

與王懿敏公仲儀 嘉祐二年

某啓數日之間併承寄惠蟹栗雖不得書亦喜尊候萬福某居此如魚鳥之池籠歲律忽已適盡衰病日復侵攻交游多在外塊然處此情緒可知今日得蔡大書言久病近方就安人生聚散憂患百端相見何時况開年決求南去遂益爲胡越也惟以時自重臨紙區區

又嘉祐二年

某啓稍不附問新春尙寒不審尊體何似歲月不覺又添一歲目日益昏聽日益重其情悰則又可知嚮者公解錢事知已息就令不息徒喧噪人耳何足恤也邊州無事誠爲可樂然俗吏亦不能也近來班著蕭條羣賢在外皆當召歸而議者不及衰病思去又亦未得守常不變其弊乃爾其他時事不能悉具惟過年益區區但時與韓三吳大相從爾燈夕卻在李端慤家爲會諸君皆奉思也數數附回州人書皆不親付常意不達今偶此人取書適在家湖柑閑寄數十箇去到彼得三四不損尙可表意若遂無可入口亦無如之何也不罪不罪因人幸時惠問

又嘉祐二年

某啓昨日自貢院出得所寄書伏承春暄氣體清福兼知深樂北土之善爲郡處處皆佳况此帥府雄威邊鄙無事固足以優游也某昨被差入省便知不靜緣累舉科場極弊既痛革之而上位不主權貴人家與浮薄子弟多一作爲在京師易爲搖動一旦喧然初不能遏然所得頗當實材既而稍稍遂定去冬求洪井未得便差主文今既喧噪漸息遂復理前請期於必得也中年衰病尤甚自出試院痛不能飲人生聚散安能區區於此進無所補退又不能自遂荏苒歲月有甚于期其他非筆墨可述惟爲國自重因人時枉問以慰無憊

又嘉祐二年

某啓自承有益都之命必謂來朝當得相見不意遂爾西行實增怏怏又聞闕遠卻於沿路盤桓深欲奉狀以莫知旌旆所止不審即日春寒尊候如何計以仲春至鎮在路亦不久留成都風物非老者所宜仲儀雖爲同甲然心意壯銳諒可爲樂難以病夫忖度也諸賢在外者爲復來歸獨公遠去相見何時某非久於此者然素志未遂心往形留因指使來辭得附書新春爲國自重

又嘉祐四年

某啓自去歲秋冬以來益多病加以目疾復左臂舉動不得三劑請洪諸公畏物議不敢放去意謂寧俾爾不便而無爲我累奈何奈何然且告他祗解府事必可得不過月十日且得作閑人爾少緩湯火煎熬有無限鄙懷不能具述薛婆老亦多病於錦繡無用祗是兒婦輩或恐有所要臨時奉煩爾土宜歸日惟好且當正如寬厚之說也阿阿酒絕喫不得聞仲儀日飲十數杯既健羨又不能奉信蜀中碑文雖古碑斷缺僅有字者皆打取來如今祗見此等物粗有心爾餘皆不入眼也遞中續得來書京師自立春泥雪至今凍屍橫路遂罷放燈經節不敢過諸人皆云寂寞恐知恐知疎拙無佳物表意不怪

不怪

又同前

某啓昨在府中區區不時奉問理不爲怪自罷去益忽忽度日不能爲一事公私俱廢此所以日夢南歸視居此如桎梏之思脫也自仲儀到蜀未嘗承問但時見宅中子弟問動靜云起居甚安異方下車必煩條教計今人情習安粗可以爲樂矣因書幸示某昨在府几案之勞氣血極滯左臂疼痛強不能舉罷居城南粗得安養迄今病目尚未復差厭苦人事實不能支抵候夏秋唐書了成禱卻梅二遂決南去未間時得奉問夏熱爲國自重

又同前

某啓區區多故久不附問不審尊體何似自春中會一奉狀尋於遞中見答昨見公謹云得仲儀書怪某久無信蓋亦未嘗得仲儀書也但聞蜀人與自西歸者言善政日新兩川蒙賜聞之竊喜大用之有期也某益多病目昏手顫腳膝行履艱難疾並攻唐書已了抵候寫了進本遂決南昌之請自此可圖一作靈處矣京師事體亦迫促動有嫌忌無復縱適歲暮索然殊鮮歡意惟希公外多愛因暇時作數字以慰瞻企

又嘉祐五年

某啓久不奉狀亦久不辱書惟見諸賢姪得聞動靜前日郵中忽承惠問喜涉夏秋體履休勝深以爲慰也某自罷府又一歲有餘方得唐書了當遽申前請懇乞江西前後累削辭極危苦而二三公若不聞近年眼目尤昏又卻送在經筵事與心違無一是處未知何日遂得釋然一僕素志於江湖之上然後歸老汝陰爾昨蒙詔諭俾請假既以地遠暫歸不能辦事又一請假後難更請郡以此不敢但更少盤桓會當有時得歸爾承見問所以略道一二終日區區不曾勾當得公私一事人事殆廢以此不時作書應不爲怪嚮寒爲國自重

又嘉祐六年

某啓近嘗於遞中拜問辱書承春寒動履佳安兼蒙遠惠佳篇衰病之人豈敢萌心至於自顧惟知憂畏而衆論實可多懼獨見愛之深至於歌詠感愧感愧數十日來茫然未知所爲答問後遂如此其何以免於罪戾老退之心不敢望有所立以希名譽但厚恩當報爾仲儀何以見教寶臣雖不久當發其如遠甚計須夏方得到闕鄙懷千萬不能具述惟期握手爲一笑爾感作少暇當勉強爲答次因書略道區區餘寒爲國自重

又同前

某啓自春以來私門多故遂闕致問兼承歸騎已東但日冀相見也碌碌於此忽焉半歲思去之心雖切而未有以發近外處相知多見問以求罷太速不知何以傳此豈中外人情已欲其去耶不相見數年人事百變前夕清卿之室已與擇之共牢而食士夫聞之莫不竊歎富貴浮名何可久恃至於妻子亦不能保然感衰之理固常如此奚足爲之悲也君謨已歸幡然一翁病勢自到京來頓減前日與余廣州在繁齋閑會坐中相顧歷道諫院中語笑但奉思爾衰病索然百事俱懶惟故人相見庶幾有少清況爾瞻近匪遐跋履之勞更宜避暑慎攝

又同前

某啓人至辱惠以佳篇豈勝珍誦益見治煩餘暇猶能及此繁齋有菊數叢去歲自開便邀諸公比過重陽凡作數會今秋無復一賞軒裳外物爲累於人細較其得失何用區區自仲儀與數公自外歸甚思少奉從容殊未有暇今有會亦不放曠可歎可歎值夜且奉此爲謝

又同前

某啓區區不得數奉言宴可勝瞻勤昨日以疾病發動請告家居不

知賢郎寵過今日見二公言請許此實仲儀附就秉鈞者當以爲慚爾然佳郡不遠且少盤桓聊爲偃息也某衰病漸不能支更見楊樂道長往同甲勾落太半矣深思一作蠶處未有去端爾客多偷隙作此簡鄙懷欲述者多不覺切切

又同前

某啓近以口齒淹延遂作孽兩頰俱腫飲食言語皆不能呼咽醫工並來未有纖効聞仲儀有蜀中真山豆根乞一二兩病苦加以餓損齋然疲臥不暇及他不罪不罪

又嘉祐七年

某啓少別忽已更月秋氣漸清竊惟動履勝常受暑方初宜少煩條教吏民既已蒙惠則湖上清曠浩然放懷可以遺外世俗區區可憎之態至於憂悲煩惱亦自以理遣之某竊位於此不能明辨是非默歛苟且負抱愧恥何可勝言獨於朋友之間常懷區區之願如此而已謹奉啓咨問

又同前

某啓自別日欲致問而公私多故賢郎訪及得聞動靜則云甚安昨日公謹相過迺云近少違和豈非追感悲戚使然耶此事實難遽遣其如無可奈何當推以至理不得不少自寬釋也竊計即日悉已平愈如常不勝瞻想之誠也某至今猶爲風毒所苦情緒蕭然不知各宦何處爲好合宮禮近日益牽忙不勝勉強也其他區區臨別亦嘗少道抵得如公西湖之樂一二歲比謀成歸計遂爲田畝之人矣難信之言不敢爲疎者道也相見末期但增引領因風枉問以慰勤企

又治平元年

某啓公私忽忽久闕奉狀蓋以衰病交攻心力疲耗而憂責無涯日苟一日是以百事皆廢於因循然亦久不承惠問但屢見賢姪賢郎得聞動靜新歲晴和不審尊體何似湖園清曠春物嚮榮然尙在遏

音必未欲會聚其如閒適之趣幽靜尤佳每苦紛勞但深傾羨也老年相知無幾尺書相問略亦無嫌餘暇何惜數字少慰病翁然以自久無書不敢奉恠也嚮暖千萬加愛

又同前

某啓久不蒙惠問方積瞻思指使來忽辱書可勝欣慰兼審靜鎮安閑放懷取適自非嚮用全福何由及此固健羨之久矣某疲病不支憂責無際自匪獲罪譴困廢不能薄展微効捨是三者未有偷安之計自齒牙浮動飲食艱難切於身者惟此一事既已如此其他復何所得然則勉強於茲顧何戀也因仲儀有見懷之言乃略及此經春潤澤稍足相去不遠必同和暖更希爲時自重

與王懿格公君貺 至和二年

某啓日思奉問別後人事益多端倪但見邸報知已禮上秋冷道塗貴眷各安某幸如常昨受命使北初欲辭免蓋以目疾畏風寒兼多著綿纈衣服不得其如受勅之日北人訃音已至由此更不敢辭因改爲賀使行期頗緩正在嚴凝與君旣行時無異也家中少人照管且移高橋去薛家稍近然公期管勾往來須及百餘日但得回來耳靜便是幸也呵呵自大旆西行羣議遂息請無過慮也佳時美景臨觴之樂不可涯得失外物可置而勿問其餘達識以道消息故不待言也

又嘉祐元年

某啓急足至辱書伏承履茲新正台候萬福少慰翹企之素也某尸竊於此思逃罪戾未知其所年齒日增心意日耗歸洛之興何可遏承示許以下鄰亦一時感事但須公功業成爾否泰常理亦難稽久豈止交親之願也陽候嚮和惟冀以時自愛

又嘉祐四年

某啓太祝來得詢動靜甚詳尋又辱惠書承經寒尊候萬福門內諸

貴愛康安深浣瞻想居秦久議者皆謂當還不然遷鎮近甸應在朝夕浮議多端惟靜安可以銷弭修唐史已寫進本然卷秩多須數月方了南去有期心欲飛動過年衰病益侵見論辯欲加收錄此子庸驚詎可出明公門下不奈何爲誤聽但與家人大哈爾徐當議未晚賢郎在都下殊乏祗迎悚愧悚慄漸暖爲時自重因賢郎行謹布區區

又嘉祐五年

某啓近因急足還府略布謝懇卽日春寒仰惟鎮撫外台候萬福某尙此遷延又見春花益盛第以目病眩晃不勝飲酒鮮驚爾不審大府花時如何憶曩在彼不甚盛也前承問及石研今且致三枚續當更求佳者咫尺瞻企惟以時自重

又嘉祐六年

某以衰病碌碌無稱莫塞谷責徒自爲勞區區久不奉記屢見家人得書承夫人尊候微有違和兼知來召夏醫方欲馳問太祝遽至得聞子細喜已漸安兼見過客言花時名園數有家會聞之益用爲慰某自過年兒女多病小女子患目殆今未較日頗憂煎前日太清賞花省自入館惟景祐之會以選人獨不與殆今二十五年始遇茲盛事是日兼承見寄絕品雖有已凋者然所存不勝其麗見之病目開豁勉強飲數酌以當佳惠闕恐知也見太祝言來擇婿茲事難於倉卒宜精慎也多日欲作書適聞有專人立章此其他諸懇俟太祝歸時致狀

又同前

某頓首近於遞中嘗獻拙句急足遽至承賜手書兼惠新笋併增感愧竊審春和體況清福普明寺卅年前亂道宜爲削去以藏醜拙迺蒙刊著何以堪之春早差遠京洛飢民亮煩賑卹計亦不廢行春也某忽忽少貺真蹟如此寫第未能遂去餘無可言爾薛司勳過府下

事有可詢當得其詳惟以時爲朝自重不宜某手啓上留守尙書學士清明日京醞二器聊表意但患人力難致偶薛君有卒擔之爾

又同前

某頓首啓自薛司勳行後更闕奉狀見家人得十四姨夫人書竊知近苦牙痛道家修養先於固下不宜有此病然此患中年以後人皆有之患者醫方亦多難得効某數年來頗以爲苦用藥多殊未有驗近於張唐公處得一方他言親用有効然亦未曾合今粗錄呈可試用也春旱甚闊遠以貽上心焦勞之慮近躬禱太一遂獲嘉澤河洛間應已霑足民歲當有望不審邇日爲政外尊體何如更希慎攝因附藥方遞中謹此咨問

又同前

某啓謝懇已具如右秋寒台候萬福某衰病忝冒以寵爲憂自省蹇拙曷嘗敢萌此望人亦曷嘗期此然事出意外猶竊叨據君貺材望德業三十餘年一日歸副具瞻以快士大夫之願老朽之人當在汝陰田畝與農夫野叟相質人事固常如此所示排擯會何之恤矧洛政善譽初無間言也恐知之以新忝命人事紛紛致謝稽晚皇恐皇恐

又同前

某啓自叨竊非望嘗於郵中致謝懇卽日冬候遂爾凝寒仰惟動履清福某勉強衰病才薄寵益損必隨之親朋見愛何以爲教有望有望見家人言十四姨夫人昨夕違和喜已平愈公期由此專去省候鄙懷區區因話一可詢問凡諸委瑣不復煩言歲晚慄慄惟以時爲國自重

又治平元年

某啓嚮自遭國卹公私事緒既多而衰病之年憂哀並集餘生朽質殆弗能支顧於人事曠闕交親宜以相寬自春不常拜問然昆弟多

在京師薛九與二夫人書信時時獲聞動止即日秋暑猶感不審寢味如何朝家方恃羣賢共此康濟邊寄雖重難恐淹留未候見聞惟以時爲國保重

又治平二年

某啓專人至辱手書承履此春和台候萬福某衰病耗然思一藏拙之地未能遂心日夕勉強不勝其勞其餘幸悉如常承示諭請覲尙未見奏削安道特地以親爲辭必留滯旌車然辭官亦當俟報爾適以私家少故牽忙作書不周謹惟爲朝自重以副區區

又治平三年

某啓近併捧遞中專人所惠二書竊承經暑台候萬福貴眷康寧粗慰瞻企諭以請洛之意甚詳自公留滯於外士大夫之論鬱然而當職者負慚與責久矣今茲所請在理何疑諸公諒不煩丁寧某又可知也有欲知者私門所便備問及爾亦已盡論但奏削尙未至爾某瘠病蕭然昨屢乞懇以經此詆辱於國體非便第顧勢未得遽去以此強顏成何情況事有所激實如來諭其諸多端匪遠可以面敘本末餘當續報惟酷暑爲時自愛

與執政熙寧二年

某再拜啓仲夏炎毒伏惟台候萬福某以官守一作守官居外具瞻之地非時不敢通問今迫以懇悃不能自默某衰病累年中外具察不待煩言自去冬漸難勉強遂有壽陽之請而朝恩未許間以接奉春陽攻注眼目服藥過度渴淋復作遂不能支自二月下旬在假亦兩會奏知不期於病告中忽蒙此恩選事出意外莫不驚憂竊意朝廷必以居東逾歲別無大過遂以爲可委爾其如東州祗是尋常一大郡無兵馬無邊事又幸豐熟其如老病諸事曠廢處自知極多而過往不察其詳反以廢職爲少事此可笑者也并晉一路外鄰二敵使某不病亦不敢當況在悴不能策勵已具劄子細陳乞免此誤

恩敢望台造察其誠實其餘區區常談難信之語更不復云惟早賜允俞免再三煩瀆則大造也不宣

書簡卷第三

書簡卷第四 集一百四十七

與余襄公安道 慶曆元年

某頓首再拜啓爲別五六歲未嘗一日不企而南望然某攜老幼浮水奔陸風波霧毒周行萬三四千里待母幸無恙其如頑然學不益進道不益加而年齒益長血氣益衰遂至碌碌隨世而無稱邪安道又不幸丁家艱窮居極一有處字起居安否不通於朋友况欲施於他邪嗚呼天果欲窮吾人乎承不久服除當早治裝以少解積歲區區之思廣文曾生文識可駭云嘗學於君子略能道動靜因其行聊書此爲問

與王文恪公樂道 慶曆八年

某啓至節方欲拜狀遽辱惠問感愧感愧新陽納慶奮發賢蘊以澤斯民不勝祝願也某近以上熱太威有見教云水火未濟當行內視之術行未逾月雙眼注痛如割不惟書字艱難遇物亦不能正視但恐由此遂爲廢人所憂者少撰次文字未了爾特相知敢布深寒保重

又皇祐初

某頓首啓昨日州吏行嘗奉訊徐君來具道相見甚慰所懷某此幸郡小事稀苟見惡者稍息心此亦安然矣自到此公私未嘗發尺牘惟有書來即答餘外惟自藏於密但時有一二文字此事吾徒斷不得爾進取不可于大禍患當避自餘愛惡豈能周卹也到此極無事所恨漸老益懶情空過日月不會成頭段著得些文字五代史近方求得少許所闕書亦未能了人生多因循已十三年矣足下幕中苟有著述無惜寄示李習之文字序附上冬冷保重

又嘉祐四年

某啓區區久不附問人至辱書具承動靜康和姑以爲慰某衰病處此數月不爲住計遇事在目前者遣之以自免過其他如在郵傳也

自期以半歲求解復尋江西前請比可得亦須來春矣此外毀譽都不會問十年不曾燈下看一字書自入府來夜夜燈下閱數十紙目疾大作一月之內已在告如此安能久於此乎承書果亦以此見憂眼稍開得纔兩日猶在告中惜目力又不可不自書草率保愛

又熙寧元年

某啓自承大旆臨許更闕拜問蓋以衰病無悖人事多廢恃賴相知不以書信疎散爲意爾人至惠教益荷勤養兼審經秋算候康寧并增感慰氣節嚮寒未召用間惟冀爲時自愛以副區區

又同前

某啓病目艱於書字咫尺闕奉狀蒲支使者過府下云得請見顏色尙覺清瘦辱書承手足遂已輕安其慰可量公之功在朝廷不淺所蘊未施萬一賴田謾置之爲他日計亦無害累書具此獻說爾某以決計止在來春亮可奉爲徐求也人事日新閑處尙有所聞然益覺靜勝爾日夕欲奉狀續當馳啓茲不具悉餘乞慎藥食以自輔也

又同前

某拜啓近急足自府回辱書承此初涼動履清福甚慰動企兼審中間小疾爲苦喜已平和仁政清簡歲豐民樂亮足頭神某衰病難名凡老患或耳或目不過一二諸老之疾併在一身所以歸心不得不速也蒙惠藥方益荷意愛已依方合和也咫尺未涯瞻款惟時自愛

又熙寧三年

某啓某以閑僻養成懶慢久闕拜問專人辱書感慰曷已某此幸藏拙極遂優安其如衰病侵凌加以私門煩惱無復情懷亮由福過災生致此爾所以量分知止切於思歸也咫尺莫奉宴言歲暮隆寒伏冀爲時自重

又同前

某年齒日加衰殘日甚理所宜然不足多怪昨者蒙上哀憐信其實

病免并得蔡恩出萬幸兼去穎數程便於歸計再尋前請不遠朝夕承樂道亦有卜居許下之意柴車藜杖歲時往來此自一段好事古人難遂蓋公素蘊未施成年方壯也若某則實難策勵爾

又熙寧四年

某啓昨蒙上恩閱其衰老許遂退休自杜門里巷人事幾廢以是久闕致誠而雅眷不忘惠然垂問誨諭稠重以慰寂寞於交情乃見之時以勵俗風義所及其利博矣非止病夫之荷德也感愧感愧兼審經寒台候萬福閑中優幸實多但交親益難會見此爲區區歲晚凝冽惟宴居頤養以需復用

與滕待制子京慶曆五年

某頓首自夷陵之貶獲見於江寧逮今十年而執事謫守湖濱某亦再逐淮上音塵靡接會遇無期則人事之多端勞生之自困可爲歎息何所勝言急步忽來惠音見及伏承求卹民瘼宣布詔條去宿弊以便人興無窮之長利非獨見哲人明達之量不以進退爲心而竊喜遠方凋瘵之民獲被愷悌之化示及新堤之作俾之紀一作記次其事舊學荒蕪文思衰落既無曩昔少壯之心氣而有患禍難測之憂虞是以言澀意窘不足盡載君子規模闕達之志而無以稱岳人所欲稱揚歌頌之勤勉強不能以副來意媿愧悚悚秋序方杪洞庭早寒嚴召未聞千萬自重

與章伯鎮慶曆五年

某頓首山郡僻絕不與人通每辱誨問何勝感愧某材薄寵過得禍甚輕獲此優安至爲天幸伯鎮尚淹江郡忽已踰年大亨有時先以小抑亦通否之理然也惟冀自愛以副瞻禱

又慶曆六年

某頓首州幹至蒙問以書承此新春履休裕詩文新作金石交奏某處窮僻不接先生長者之論久矣忽然得之開發鄙滯況得見其

人接其道其樂宜如何哉此志未諧惟用瞻企保重保重

又同前

某頓首急足至郡辱誨以書承臨郡之暇寢味休適可勝瞻慰也示及傳記三本文偉意嚴記詳語簡而賞罰善惡勸戒丁寧述作之功正爲此爾欽服欽服某幸閑僻甚可尋繹然獨懶於撰述爾嘉話未卜冬冷千萬保重偃虹隄記滕侯牽強不意取煩餘暇特與揮翰荒惡之文假飾傳久感媿感媿

又皇祐元年

某昨以目病爲梗求頤自便養慵藏拙深得其宜泛舟長淮備然其樂急足遠至辱書爲別且承春暄寢味多福相去益遠瞻望徒勞千萬保重

又同前

某自聞子美之亡使人無復生意友朋淪落殆盡存者不老即病不然困於世路愁人愁人就中子美尤甚哀哉祭文讀之重增其悲爾感作俟至西湖方快吟味淮陽若區區到彼必少祛俗慮尙可勉強以攀作者惠若正爲所少之物多荷多荷自病來絕不飲酒尤爲無聊正藉此物以增清興爾

與王郎中道損 慶曆八年

某啓向在河朔嘗辱書爲誨人事多故未暇復問尋而又聞子野之訃值某遷郡淮南扶挈老幼凡再登舟再出陸始至繁昌用此亦未暇與交游相弔子野之賢難得此天下公議共惜之若相知之難二字一作與相得則某私恨亦有萬萬不窮之意苦事苦事自古賢者無不死惟令名不朽則爲永存矣凡朋友爲子野痛惜者惟可以此一事自寬而已范公誌文詳悉而實錄甚善甚善新歲伊一作甫始千萬保重以慰瞻禱

又嘉祐三年

某啓專人至辱書承經寒爲政外福履清康實慰瞻企某衰病不支遽蒙以煩冗驅策不敢固辭其實非所能亦非所樂又非所堪也居華已逾年當別有美用承見諭敢不如教某病目十年遽爲几案所苦冬至後自當請歷南去矣嚮寒保攝

又嘉祐五年

某啓尋見論碑文及拙詩續當遞中奉寄蓋以唐書甫了初謂遂得休息而却送本局寫印本一字之誤遂傳四方以此須自校對其勞苦牽迫甚於書未成時由是未遑及他事以屢失信於長者不避切切承首塗有日且夕當詣謁人還且此不能盡所懷

與杜大夫慶曆八年

某再拜久不聞問經夏涉秋榮侍外體履多福近爲澶魏河決淮南例令勸誘人戶進納稍草准人既貧而道遠期促絕無應命者朝旨勸誘使人傳宣又令差定莫知所從南京亦必須有指揮不知本府如何擘畫見勸到人戶多少如何誘之孰是差定某才薄能劣受恩厚甚聞朝廷以河事爲急正當竭力補報然苦於事無益而爲國斂怨於准人則重爲可罪也爲遠方不知事體急走此奉咨或有勸誘之術願乞餘矩稍濟其急忙中不予細秋涼保重

又嘉祐四年

某啓閑居之人久不奉問得遞中書承榮侍多福又知有悼嬰之戚斯事無可奈何惟當日寬上慰慈顏也臨政之始勞慮想多前曾託姚教授奉問實錄蓋自居憂日苦閑坐無由度景又近日有一閑人頗能裝裁諒彼視事開決却少暇時以此欲於閑中銷日也不訝不訝及聞近有悲感則猶不可以閑事干聒深悔前言之容易也悚惕悚惕方欲奉疏偶姚教授介來聊述此冬深保重

與張職方嘉祐二年

某啓相聚逾年別來豈勝思戀道塗無阻行已及陳時時得兩舟中

不熱自過界溝地上卑薄桑柘蕭條始知穎真樂土益令人眷眷爾小兒輩望見萬壽塔尙指以爲臺頭聞其語不覺愴然爾過陳恐難附書秋暑多愛

又嘉祐二年

某啓自承遷秩嘗辱惠書迫以多故尋疎奉問近得康一作唐下同屯田信方知已授蘄春日居穎上即日寒凜寢味多福某自至此以親疾厭厭無暇外事欲求一僻地以便侍養而遠處不可迎侍側近又多爲清要所居不敢陳乞區區於此無復情悰非復湖上之時也未涯相見千萬自重因康屯田人回附此相次專馳狀也

又嘉祐六年

某啓久不聞問人至得書爲慰不已六月一日從吉得郡必南正值大熱應須秋初方可離穎輦真病與懶者所宜珍荷珍荷丁太博却有書一封幸爲致達斯人文章君子不幸遭此在憂患中難得信問往來早爲達一作送之已縣境有好碑試爲訪之別後所收必多也閑中無物爲信慚悚慚悚

與劉學士混字子正 嘉祐四年

某叩頭言罪逆餘生護喪假道乃勞台旆枉顧孤窮感愧之誠何以云論限茲凶斯無由詣見斯又重以爲恨也乍遠爲邦自重謹附手疏敘謝

又同前

某啓哀苦中幸得相見辱眷甚厚行計所迫不勝依戀嗣沐手誨併深感作乍遠珍重行次草草爲謝

與知縣寺丞嘉祐五年

某啓自相別後至王回秀才來始一得所惠書承居京師無恙某哀苦如昨近擇得墓地在穎西四十里上厚水深略依山山水向背其餘陰陽家說皆莫能一一如法也卜用今秋恐知恐知示及杜漳州有

事令人感涕不已與之同甲內顧身世可為凜凜此人有材能而氣備宜其與監司違戾然怒者祇能言其率意行事是保無他過矣某閑居無人又不知其所止無處附書信恐知其家屬所居因信切言及千萬千萬徐謝高科今必已決俟見春榜附書也因見仲意某以妻母病家人兒子輩入京相看因得附此不悉已暄多愛不次某再拜

與臨池院主 皇祐五年

某啓小姪人還曾附問邇來暑毒安和某今謀奉太君神柩南歸將遂相見因小姪先行奉此不次某書白七月十六日 小師等各安建茶二角表信

與吳給事名中復 皇祐末

某啓罪逆餘生遠屏郊外特承顧訪感咽何勝仍沐寵惠雄編俛遂榮覽雖在哀迷亦知開警如嘉州清井之作有以見仁言之利博而非文字之空言也欽執一作仰材譽固已有日粗窺高蘊益用歎服限以衣制不能謁謝聊敘此不次某再拜仲庶太博執事二月二十八日

又嘉祐三年

某啓思奉清論不可得徒用企想夏熱承體氣佳裕某此者忽有君命殊出意外不惟才非所長加以他慮不淺昨已懇辭庶可得免如其不獲恐難堅避辱命誌文鄙拙豈足當之第以欣慕忠義樂於紀次因得附名於石末遂不敢辭爾惶悚懷鄙懷區區不能具道某頓首諫院舍人執事

又同前

某啓新令雖許往還尚以職事牽冗未皇抵謁計寒凜體氣清康前承要墓碣久稽應命近因病目在告始得牽強衰朽無意思僅能成文不足以發揚令德慚恐昏眩不能多書謹此

與李留後公謹 至和元年

某啓昨自居穎服除久俟外補既而召見尋乞補同出處倉皇諒聞於外也前日入拜恩旨復留孤生多難鬢髮蕭然心形兩衰豈有榮進之望但區區未能即去爾承坐鎮餘閑甚有清趣然想非久外留當被嚴召老朽或未出都尙得一相見則為幸矣瞻仰瞻仰

又嘉祐二年

某啓嚮以僑寄僧坊公私多故忽忽為別豈勝馳情使至惠書纒承下車經寒動履清福粗慰瞻仰某一守經愚儒爾豈堪適時之用加以衰病勉強實難過裡慶得遂一塵為幸矣公謹為郡誠可樂然賢者遠外於今之時勢必難久目疾得靜安息慮當益清明某昏花日甚書字如隔雲霧亦冀一閑處將養爾深寒惟望為時自重

又同前

某啓自旌旆之南數於他書中承見問中間寄惠八功德水又辱手書及今者人至又辱書感慰何已兼審經寒為政外體履清康某自過年如陡一作頓添十數歲人但覺心意衰耗世味都無可樂百事強勉而已請外決在今春惟不知相見何時爾鄙懷千萬莫能具述惟以時為國自愛瞻仰瞻仰

又嘉祐三年

某再拜近因人還嘗得附狀茲者寄水人至又辱書審春寒體况清康兼惠清泉亟飲甚甘實如不疑所品物固有處於幽晦而發於賢哲者茲鄙夫欣慕樂於紀述也適值館伴契丹人使旦夕到闕頗區區須事畢當馳上也人還謹奉此

又同前

某啓自春氣候不常伏惟攝理清康前承惠浮槎山水俾之作記又於遞中辱書久不為報蓋牽強拙記未成爾某中年多病文思衰落所記非工殊不堪應命文辭已如此不欲更自綴書亮不為罪然得

子履一揮尤幸蓋不敢煩公謹真翰也皇恐皇恐

又同前

某頓首急足至辱書一有惠字承此初暑尊候萬福浮槎拙記託賢第附去多日疑其未至問此急足發來也初深欲自書屢試書數本皆自嫌不過意遂已前書具道必可亮也向時竊見議科場奏甚佳然欲必行其言尤難也論外計刻刺此非守道守官君子孰肯奮然發憤前賴人已受此賜矣若使常人用心皆如君子生民豈有弊病天下豈有不治哉鄆州還闕方一相見京師久雨近方晴乾不審江淮如何向熱以時自重人還謹此不宜某再拜

又同前

某啓自附浮槎拙記去後捧遞中所惠書尋以修報茲者人至又辱賜教某昨承恩俾侍經席輒以近歲員多濫選官以人輕遂至學士例爲兼職用此爲說得以懇辭聖恩矜察特許寢停甚幸也承示啓更不修答也感愧感愧某苦風眩甚劇若遂不止當成大疾作書未竟已數眩轉屢停筆瞑目鄙懷區區不可盡惟爲國慎夏自重

又同前

某啓承誨示至於勤勤所寄浮槎水味尤佳然豈減惠山之品久居京師絕難得佳山水頓食此如飲甘醴所患遠難多致不得厭飲爾此山前世粗有名然皆因僧居以爲勝今所記者特水爾故不及其他也張又新水記與陸羽不同考於二家之書可見矣今更錄往時所作大明并記奉呈庶可知其詳也因人入都小餅時爲致一兩器千里致水恐涉好奇之弊然若不勞煩則亦無害更裁之

與向觀察嘉祐五年

某啓中間辱書承經暑德履清佳深浣遐想足下留遊河朔忽已數年保塞邊要朝廷寄任之重行第嘉績別膺峻用某衰病無堪待罪西府深愧碌碌秋涼珍愛

又至和元年冬

某啓伏自使旆之西及此兩辱書承邗寒爲政外體履清福深慰企渴某居此區區近又領三班坐曹牽冗久闕拜狀仍思舊同局言笑之樂不可復得也請外開春決可去未知款奉何日新正以時自愛

書簡卷第四

書簡卷第五 集一百四十八

與劉侍讀原父 嘉祐二年

某啓專介辱書承此嚴寒爲政外尊體休裕實慰企想某以衰病當此煩冗已三請江西要在正初必可得艤舟亭次寓目平山奉賢主人清論豈不豁然哉伏冀爲時自愛

又嘉祐四年

某啓愚家所藏集古錄嘗得故許子春爲余言集聚多且久無不散亡此物理也不若舉取其要著爲一書謂可傳久余深以其言爲然昨在汝陰居閑遂爲集古錄目方得八九十篇不徒如許之說又因得與史傳相參驗證見史家闕失甚多其後來京師遂不復作適因尋檢少書籍發篋得其故本謹以奉呈庶知所謂黑鬼者雖老鈍之人媚着然亦不爲無益也家無他本幸看畢見付某再拜

又

某啓區區久疎謁奉辱承示千文甚佳多感多感或云此是李靖字唐人集爲千文不知如何也

又嘉祐二年

某啓前承示以蜀素俾寫孝經一章書之墨不能染尋將家所有者試之亦然遽命工匠治之終不堪用豈其未得其法耶幸令善工精治之使受墨可書當爲汗以惡書也糾察題名不罪以閑事聒耳皇恐皇恐

又此帖綿吉本誤作與蘇子容

某啓暖甚果復作陰嘉節豈遂爲雨耶建寧物論益喧當制之人必被收理後日之遊且不欲往幸爲致意人事之難乃爾烏絲欄依前書不染墨今納還當以澄心紙試書一章奉命也金櫻煎謹送却乞真牛膝一二束爲聖俞處所不多爾

又此帖綿吉本誤作與蘇子容

某啓時色可愛不廢佳節之會謂當得同一笑而原父獨不往人事難得如意固常如此邪得介甫新詩數十篇皆奇絕喜此道不寂寞以相告詩軸俟看了馳上適因悶睡起奉答不謹

又此帖綿吉本誤作與蘇子容

某啓時日昏寵和惡詩豈勝感服屬上馬赴西園不時爲答前偶拜聞家居未必不佳此語復何所疑蓋爲泥潭中遠赴官會未必若家居清淨然而郊外少車馬雖雨無泥甚不爲勞而物色晴妍深可愛雖病夫亦動念又思家居未必佳也昨日頗歡飲酒差多今日病適方睡起謹此咨報

又嘉祐四年

某啓昨日奉見後遂之北李園池見木陰葱翠飾物已移而原父獨不在但終席奉思加以風沙益可憎爾輒此奉報前承要介甫詩謹以咨呈其一二篇不當傳者特爲剪去之矣恐知

又同前

某啓數日不奉見餘暑頗甚伏惟起居佳勝昨日羣牧特會以熱中飲冷過多偶爲腹疾兼以少幹故遂且在告抵三兩日當即出參特煩問念感愧曷已乾燥非常何時可飲未嘗如此寥落也人還謹啓爲謝

又同前

某啓承出城勞頓晚來喜佳裕拙疾特辱問念感愧曷已自夜來益注洩今日蕭然遂召張康診云熱中傷冷當和陰陽備用熱藥所以難効遂以黃連乾薑之類爲散服之近午差定亦戲家人云近日入脆事須過防昨日得聖俞簡云小小傷冷然用徐膏乃俚巷庸工爾此公多艱滯更當慎攝今須馳問之也精神稍復承見問不覺書多聊代面話

又同前

某啓特尋問念感愧曷已某腹疾猶未平衰年已覺難支以不敢常食遂且在告熱藥不敢多服惟晨起一服爾蓋自家常服者已頑無效冀新功爾承教當節之也亦聞梅二不安方欲致問

又嘉祐五年

某啓辱問以嬰兒未安勞神然當更審慎藥食有張萬回太保者其術又精第難呼爾不憚懇勤召之也某今日不入正爲凌晨稍涼爲江氏作誌幸語其家勿相煎茲事安敢奉誤且夕當得以方牽強不能悉

又同前

某啓承見諭某爲之翰家遺僕坐門下要誌銘所以兩日不能至局大熱如此又家中小兒女多不安更爲人家驅逼作文字何時免此老業東齋雖狹若心無事可以坐致清涼健羨華事十六日定力當奉見併得敘盡所聞也人還謹此

又嘉祐四年

某啓熇然炎燎中方不知所以逃生忽辱寵示佳作強起疾讀其爲清快難以言傳然賦無屬和之理但當臥誦以代飲冰咀雪爾某兩日爲伯庸趁了詩文蓋其葬日實近恐悞他事然其爲苦不可勝言閑思宜爲劉父所諒然自此當絕筆雖不能如俚俗斷指刺環邀於鬼神以自誓然當痛自懲艾茲時之勞也方執筆得少風稍清故能切切不宜某再拜

又嘉祐五年

某啓適歸自外捧惠佳篇豈勝欣感偶然之會雖草率而縛於文字遂爲他時故事茲敢不勉也然西齋素患寂寞近方稍葺而原父去此稍遠此俗所謂事無恰好也

又同前

某啓自原甫既西雖不爲官制所拘朋遊亦自寂寞况遂當憂責履

畏塗其爲情況可知偶思春物將動故都多佳致爲樂豈復可涯汨沒聲利惟溺惑者不勝其勞而但見其樂粗有識知兼以衰病此事難爲他人道獨不知原甫諒之否因風幸數垂問以慰瞻企

又嘉祐六年

某啓自春首以來兒女輩疾病日益憂煎自顧無補於時而衰病日增咎責四至其何以堪之惟思春物爛然故都遺勝不可勝覽而公專有之猶恐厭厭所見不以難得爲惜也須知有不可得之者也賢弟亦稀相見蓋難得盡從容之適爾公自至鎮一嘗辱問遂絕惠音不知何嫌遽爾見疎也西齋塵土無復人迹偶因連日假故試尋筆研略布此誠以此亦可見其爲貺真贖用此貺字也其他俗事可憎不復多道但布瞻企之勤爾氣候猶未和暢不知西路如何惟爲國自愛某祇拜 初望西物甚衆今寸紙一字不可得况南山竹萌之類耶至於新詩醉墨並棄前約無乃太甚乎

又與前帖相類疑是摹本今兩存之

某啓自春以來苦兒女輩疾病憂煎百端遂闕馳問然亦怪久不承惠音不審何嫌遽見斥外始望西州之物甚衆今一言寸紙猶不可得况於其他乎某老拙無堪自顧恐終無所爲以補萬一而衰病日增咎責四至其將奈何春物爛發故都遺蹟不可勝覽但恐厭厭朝夕不以難得爲可惜須知有羨而不可得者爾賢弟亦稀相見蓋不能得如往日與諸賢忘形取適爾西齋塵土無復人迹幸連日假故略得少布區區然公方享清閑之樂不宜無暇於故人也其他俗事薄惡可不挂耳惟向暖多受以慰傾企頃得子華書言西去當於陔雍留連果能如此否手指拘攣又添左手兩目僅辨物其餘可知

又同前

某頓首啓近寬卹王職方行嘗得附狀然亦久不承惠問春候猶寒不審動履何似但深瞻詠前日崇政賜進士第見賢即在高等伏惟

喜慰某已衰病三四小子未有能獲薦于有司者見之尤所羨慕賢
郎程文甚工爲都人傳誦及第等雖高而人猶以爲未稱然少年微
抑于此未必不爲遠大之本也謹專致此爲賀不宜某再拜原父安
撫侍讀閣下三月十一日

又同前

某啓久不奉狀蓋欲俟賢郎歸而賢郎未歸遂以稽緩然亦未嘗辱
書不審經暑動履何如但西州人士之來者日載政聲盈于都下使
嫉善之言不勝公議聊俾下交快釋其餘存之遠大竊計高明必不
校計於屑屑也餘復何言感熱爲時自重謹因賢郎歸奉此咨問不
宣某再拜六月廿一日謹狀

又同前

某區區於此忽復半歲思有所爲則方以妄作紛紜爲戒循安常理
又顧碌碌可羞不知何以教之哀其不逮實有望於公爲多也至於
常檢拘攣野率之性尤以爲苦然勢難輕動甫及年歲得去爲幸也
蔡君謨自南歸瞻然一叟相見惟互相驚歎而已西齋自去冬逮今
遂不復啓其他可知也故都多登臨之勝新詩醉墨時以爲惠以忘
俗惡之態於理似未爲害不知何避而何嫌鄙懷千萬居常思欲鉅
細布之臨紙則復茫然惟慎復愛護

又同前

某承見教以用快大過此誠中其病然平日所常患衆君子多以爲
言者也若任責至重未知所爲此有望於公者初未蒙賜也至於簡
事爲實爲政之大要此西人所以蒙惠也若曰外名迹自古聖賢所
難莊生之名卓然見於後世若使無迹後世學者何從而師法之蓋
莊生之名以彼周孔之名以此皆不能出名迹之外者第不當汲汲
以求之爾不相見久聊此當握手一笑不罪不罪前日錢聖從與景
仁介甫清坐終日奉思之外惟以鮮歡相顧屢歎而已恐知其近况

故輒及之公來歸未期惟時得數字猶足以爲慰豈以無事爲煩邪

又同前

某啓薛金部自西來辱惠以書承經寒體履清安兼得詳問動止併
以爲慰今歲京師寒甚衰病之軀尤所不堪承諭閑閣無爲豈亦苦
於寒耶春物將動竊思登臨之樂何有窮涯因人時枉問宜道一二
偶薛人還聊奉此不宜某再拜十一月二十日

又嘉祐七年

某啓春氣暄和伏惟鎮撫之餘履况清適某以衰殘勉強有勞無益
公職曠廢私事不脩不獨於書記爲闕也緬懷故都風物之佳當此
陽春暢發之感臨觴覽勝宜不爲厭蓋以賢人在外公議難安一日
來歸遂不復得爾此外惟以時爲國自愛謹奉狀不宜某手狀上二
月十二日

又同前

某啓自過年便欲奉狀只俟薛司勳歸薛既以事滯留遂成稽殆但
時見賢弟詢問動靜以慰懷爾薛君留此屢相見粗悉疲病區區所
爲及其耳目所得歸必能具道更不煩言惟的便無佳物表信蓋西
州所聞惟南味得春多壞不堪寄遠當俟新茶馳獻爾春旱極闕知
陝西尤甚奈何奈何保重保重某頓首

又同前

某啓賈常行嘗附狀辱書承經暑動履康和兼蒙惠以韓城鼎銘及
漢博山槃記二者實爲奇物某集錄前古遺文往往得人之難得自
三代以來莫不皆有然獨無前漢字每以爲恨今遽獲斯銘遂大償
其素願其爲感幸自宜如何屬患膝瘡家居絕客無人爲識古文故
第於郵中粗報已受二銘之賜篆畫當徐訪博識尋繹續得附致其
餘區區萬不述一大執慎護以副瞻動清水安能久滯耶實負愧也

又同前

某啓昨賢弟行嘗奉狀屬合宮大禮前後事叢遂闕致問昨日進奏院送九月十五日所寄書稿承勳履清勝兼復惠以古器銘文發書驚喜失聲羣兒曹走問迺翁夜獲何物其喜若斯信吾二人好惡之異如此安得不爲世俗所憎邪其窮達有命爾求合世人以取悅則難矣自公之西集古屢獲異文并來書集入錄中以爲子孫之藏也幸甚幸甚感律漸寒惟爲時自重

又同前

某啓近嘗兩奉狀專人至辱書竊審經寒體履安和兼沐寄惠蘇梨新笋豈勝珍荷自去冬以來親舊私信一皆謝絕獨思公有所惠理可無嫌又聞近申貢餘之禁則應少費宅庫如此屢寄益無疑也節中人事紛紛使還爲謝不謹不宜某再拜原甫經略侍讀執事十一月一日

與蔡忠惠公君諱

某啓辱惠擲筆翁墨多荷多荷佳物誠爲難得然比他人尙少其二幽齋隙寂時點弄筆硯殊賴於斯雖多無厭也煩聒計不爲嫌矣諸留面敘

又嘉祐八年八月

某啓前夕承惠紅絲硯誠發墨若謂勝端石則恐過論然其製作甚精真爲几格間佳物也昨日以有文書不敢致簡爲謝李敏還又承惠水清泉香餅數十枚聊報厚貺吾儕日以此等物爲事更老應當澹死租庸遂更作一程無由頰面聊當一咲歐陽脩頓首白二司給事廿九日謹狀

又治平二年二月

某啓遂爾大暄不審氣體何似承已對謝應已漸治裝無由詰前日劇瞻企荔枝圖已令崔慙傳寫自是一段佳事碑文好者前已倒篋今又於東退中得此數十本勒李敏送上因出過門爲幸不宜某頓

首君讓端明侍郎二十六日

致范忠文公景仁 治平四年

某啓專人辱書伏承春暄體候清福某蒙恩許解重任得毫便私其爲優幸不可勝述其他謹報中外所聞大略祇如此故不待煩言惟繫舟府下一見主人而過粗釋瞻思之懇爲足矣人選姑此布謝

與常待制夷甫 嘉祐治平間

某啓相別之久書問雖闕而思慕感德未嘗少忘于心不審即日體候何似向蒙寵示威文一編究味意趣殊發蒙陋珍翫秘藏未曾暫釋續更有新作苟賜不鄙無外開示至幸至幸深冬爲道自愛

又

某相別累年書問雖闕而思慕感德未嘗一日而忘于心不審即日體履何似某碌碌於此國恩未報而衰病日侵進無少補於時退未得幅巾間巷以從有道君子豈勝區區深寒爲道外自愛因小姪行附此

又

某前日承枉顧少接餘論殊不從容朝夕人事稍閒當獲款奉未間略布區區茶少許聊助待賓輕浼皇恐

又同前

某啓嚮在頽區區僅得一二聞餘論雖未厭于心而仁人之言獲益已多矣自藏拙于此習成懶慢遂疎奉問亮須幅巾間巷杖屨往還始償夙素傾嚮之心爾未間以時爲道自重因負賤人行謹奉手狀

又熙寧元年

某啓少便久疎致問經寒仰惟德履多福某衰病如昨已再請壽陽旦夕有命西歸漸謀休息必得幅巾衡巷以從長者之遊償其素願然後已也未間惟爲道自愛

又同前

某啓到官忽忽已復窮冬老病疎慵關於致問雪後清冽體况想佳
某幸居僻事簡足以養拙歸心雖切尙少盤桓款悟未期深寒加愛

又熙寧二年

某啓近小史許充行奉狀粗布區區窮臘陰雪忽復新春竊惟養道
燕居動履清福某此忽忽已數月開春遂尋前請竊謂理盡而無嫌
至於幅巾閭巷以從先生長者之遊此實無窮難得之樂爾未間保
重以副瞻動因家兵還謹奉啓

又同前

某啓守官東州僻在海涘久疎致問徒積傾馳氣候已寒不審燕居
動履何如某勉強衰病遷延榮祿又將及暮歲物豐感盜訟稀簡粗
足偷安冬春之交得遂西首獲親長者之遊不勝至樂未間爲道愛
重

又熙寧二年

某啓多病疎懶稍闕致問近兒子自穎還云嘗侍杖屨喜承經書瘦
興萬福兼審尙以足疾未副召命朝廷禮賢之意甚篤而士大夫延
首之望益動然君子出處有道足以鎮止奔競敦厚時俗其功利亦
多矣某尙未得請未遂相從閭巷之間然亦不過一兩月之頃爾時
暑爲道愛重

又同前

某啓霜氣清冷不審燕居動履何似竊承朝旨尙復敦迫出處之際
遂爲世法必有以果於自信者某累牘懇至而上恩未俞素願雖稽
終當如志瞻仰感德惟日增勞衡寒珍重

與沈待制蓮字子山 慶曆三年

某啓素日不奉問苦暑非常歲之比少壯者自不能當衰病之人不
問可知焉辱教承體氣清安甚慰俗以立秋日卜秋暑多少據今日
之勢猶當更猖狂爾然世言春寒秋熱老健爲此二者終是不久長

之物也介甫詩甚佳和韻尤精看了却希示下

又慶曆四年

某頓首啓自承拜命欣喜無量而不時馳問者誠以奔走事下吏承
叢委遲鈍不能迎解非敢有懈幸諒幸諒知二十四日出京計日必
已受事某自保塞回及中山已三日猶須并一作併旬方得拜見他
悉面賦也冬寒千萬保育

與王龍圖益柔字勝之 嘉祐元年

某啓中間辱書承冬凜外體氣清康深慰瞻渴益州張侍郎不久當
至衰病區區猶須更旬浹始遂休息因欲請補江西爾前蒙示諭京
東事備悉早出暮歸臨紙忙迫無暇及他惟新陽自愛前削殊不聞
有議論奈何奈何

又嘉祐二年

某啓急足至辱書承此初暑體氣清和差慰瞻想所云少朋儔宴處
爲樂此乃在處皆然何獨濟也京師固多相識然人事區區病患憂
煎亦無暇於從容料得常態祇如此也求移能少安之爲善會要深
欲續送上爲付一書吏裝褫遂取不得京師吏人頑慢不言可知勿
怪勿怪爲兒子久病羸弱非常人還且此爲謝

又嘉祐二年

某啓專介辱書承涉夏秋體氣清適暑雨爲擊古所未聞救災卹患
專匪一端某言不足爲人信才不足爲時用徒耗廩祿每自咄嗟而
已承見諭實當今之實患也其如言之不見信何他非相見莫盡所
懷稍寒惟當以時保壽

又嘉祐二年

某啓人至辱書承尙留克寒疑喜體况清佳杜公清節篤行每恨文
字不稱不意勝之見愛如此近亦有一二家作誌裴少監家當自寄
去明復當歸葬于故里亦可就得之原叔誌續當錄去會要爲此中

書吏稽遲又且送五冊去不憚煩來取也新詩因人乞數篇亂道亦當錄呈深察公外加愛人還草草

又嘉祐五年

某再拜昨日已入省且喜尊候勝常脚瘡遂愈此正是治內之時亦猶寇賊過後講脩武備雖非先見亦所以禦後來之患也吾儕相戒言難取信蓋各自須有少病痛爾阿阿然非此無以獻忠幸深思也無由相見聊奉此咨問大熱遂如此衰病不能支入夏便患口齒昨日食數大杏今日腮頰腫痛針刺出血不能常食若此是將奈何奈何

又嘉祐八年

某啓前日辱訪別但多愧荷以昭陵虞主未還在禮不當飲酒無由會話少時益以爲恨承已登舟節氣遂爾寒凝惟希加愛爲禱集古錄序鄙文無足采第君謨筆法精妙近時石刻罕有也薄酒四器聊助待賓不罪輕浼皇恐皇恐

又治平二年

某啓公私忽忽久闕致誠辱書感慰兼審經寒動履清勝京東物俗比二浙殊絕必稍爲便然久淹于外此在位者之責而朋友蔽善之罪其何敢逃某竊位于此已六七年白首碌碌初無補報而罪責無量謗咎獨歸自春首已來得淋渴疾癰瘡昏耗僅不自支他人視之若不堪處况以殘骸勉強情緒可知久不通問因書輒敢自道勝之知我必見哀憐深寒事外惟冀以時自愛

又

某啓辱示二詩誦讀數四意趣深遠所謂朋友講習之益正當佩服何謂迂邪然謂賢而能書爲不幸又似過之正宜謂不幸與工同其垂名可也因所示乃知平日論議猶有形迹愚拙所短固多幸當賜教可也苟有未然却當相難正如此然後爲友益矣姑話及此不罪

切切

又熙寧四年

某承見論詩義晚年迫以多病不能精意苟欲成其素志僅且了却頗多疎謬若得一經商榷何幸如之閑居少人力俟錄一二拜呈但慮方居禁職無暇及此也某目足爲苦秋深尤劇尙賴休閑足以安養餘生之幸

與宋龍圖敏求字文道

某啓漸暄竊承履履安和旬休日略邀枉顧家貧冀接清話少時必不以容易見罪悚悚

又

某啓伏承遽有子婦之戚莫遑奉慰豈勝馳情暑鬱方熾更冀爲國自重少節悲悼區區瞻祝謹奉手啓咨問

又

某啓多日不奉見秋冷竊承體氣佳裕嘗託裴如晦致懇欲告借少書籍承不爲難今先欲借九國史或逐時得三兩國亦善庶不久滯也先假通錄謹先歸納煩聒豈勝惶悚

與梅龍圖華字公儀 嘉祐二年

某啓累日瞻渴不審尊體何似唱和詩編次得成三卷共一百七十三首亦有二兩首不齊整者且刪去其存者皆子細看來衆作極精可以傳也感感哉然其中亦有一時乘興之作或未盡善處各白諸公倘換也內刑部竹詩欲告公儀更脩改令簡少爲幸緣五篇各不長故也拙序續呈乞改抹來日拜見

與石舍人楊休字昌言

某頓首啓自到公私冗迫未得一詰門字乃辱雅意先以顧臨猶未克敘謝其爲感愧何以勝顏手翰見貽副之古刻無限珍佩人還遽此餘當面盡

與祖龍學無擇字擇之 嘉祐四年

某啓自擇之使還未嘗一得款奉書局之會幸出偶爾遂成鄙句兼
邀坐客同賦雖老拙非工而諸君感作亦聊紀一時之事謹以附遞
致誠當擇之西行猶在齋禁不得瞻違實深爲恨暑熱道路不審尊
候如何惟冀以時自愛

與沈內翰文通 治平元年

某啓辱書承祁寒動履清休少慰瞻企餘杭德政民俗方期歸厚而
遽此嚴召然去思遺惠亦足以在人亮須春水方可還朝會見尚遙
更冀爲時珍畜

答李內翰疑

某皇恐頓首再拜啓孟冬漸寒伏惟尊候動止萬福准奏院遞角今
日到州伏蒙十八日所賜手書審奉聖恩暫臨近服雖朝廷重違勤
請不得已而驟闕左右竇訪之助其如凋弊之俗爲幸何多某以閒
下生爲幕中吏私願以釋不勝榮輝惟慮車馬未飾已被堅留暫此
郡齋卽膺召命使下吏愚民徒有企躍依庇之心而不得終蒙大惠
爾伏承涓日有期限以職守一無此十七字不獲躬詣界首候迎卑
情瞻望激切之至

書簡卷第五

書簡卷第六 集一百四十九

與梅聖俞明道元年

某再拜聖俞二哥昨日賢第至辱寄書并前所寄二書及夢中詩又五百言詩頻於學士處見手迹每一觀之便如相對別後雖尹氏第兄王三並至然幕中事比聖俞在此時差多蓋東都興造日有須求倉卒供辦未嘗暫休息職此未始得從容聚首獨游蒿事一勝爾然而歷覽中春之遊山水之狀皆如故獨昔之青林翠壑今為橋葉又目前不見聖俞回憶當時之事未一歲間再至尋見前迹已若夢中又河陽咫尺顧足下若萬千里又曩日恨不得同者尹十二王三今反俱遊而聖俞獨不至人生不一歲參差遂如此因思百年中升沈生死離合異同不知後會復幾人得同不得同也自足下去後未嘗作詩前枉製未及和尹十二去應能盡說此中事故略不論知與師魯相見少酒為歡值無酒寄去奈何漸寒千萬自愛不宣某白

又明道元年

某啓藥簡再至兩承示諭八老之名誠一時美事然某本以寒鄉下流後進初學諸君子不知其驚下業已致之交遊一旦坐評賢否欲求純雅沉實之名終不可得而乃特以輕儻裁之是知善譽者不能美無鹽矣子之評人正如是矣夫太雅之稱老成人重於典刑而仲尼謂三十而立某年二十有六尚未能立敢當老耶又今日不在會中自可削也夫人之美惡待其自然之譽乃見其實今縱求而得之是諸君待我素淺可知也所以孜孜不能默受者諸君當世名流為人所重一言之出取信將來使後世知諸君子以輕逸名我復自苦求方以美稱借之益重某之不可也削之益便某再拜七老

又同前

某啓捧來簡釋所以名老之義甚詳某常仰希僑游所望正在規益豈敢求辯博文才之過美哉前承以逸名之自量素行少岸檢直欲

使嘗此釋然伏內思平日脫冠散髮傲臥笑談乃是交情已照外遺形骸而然爾諸君便以輕逸待我故不能無言今若以才辯不若為逸又不足以當之也師魯之辯亦仲尼孟子之功也子聰之後詩所謂譽髦之士乎公慥之慧亦大雅之明哲幾道之循有顏子之中庸堯夫之晦子野之默得易之君子晦明語默之道聖俞之懿是尤為全德之稱矣必欲不遺達字敢不聞命然宜盡發往來問答之簡使後之人以諸君自以達名我而非苦求而得也

又明道元年

某啓承惠詩并序開闢數四紙弊墨滄不能釋手緣文尋意益究益深清池茂林俯仰暢詠宅賜蘊此欲寫未能聖俞所得文出人外昔之山陽竹林以高標自遇推今較古何下彼哉但恐荒淫不及而文雅過之也公操諸君詩未至今當以感作遍呈因督之爾

又明道二年

某頓首再拜初四日陳秀才來自河橋喜聆動靜歲暮慄履况清佳甚慰甚慰又知府公已發薦章聖俞在洛時常言親老南方思一歸侍今應獲素志亦朋友之共榮也然作宰江浙山水秀麗益為康樂詩助誰與敵哉某自奉別以來未嘗作詩亦無文酒之會所謂三日不談道德則舌本強也初六日有少吏事至彭婆約子聰應之信香山獨恨不得與聖俞同爾逢彥國行聊寓此草草

又同前

某頓首再拜聖俞足下去月王侍禁者送及所惠書販傘船至又得書并鮑魚及問傘客知動靜備詳甚慰甚慰僕來京師已及歲矣未與足下別時每相見惟道無慘賴憶洛中詩以為感况爾南北一異雖鬱鬱復誰道邪年來但不病爾住在臨清恨無舊歡今思臨清又不可得事漸不如初人生祇爾大可歎也足下素善南方今居之樂否比比得書甚略不能究所懷訝久不作詩亦疑清興頓損也京

師侍親着衣食欲飲酒錢不可得悶甚時與師魯一高論爾子漸在此每相見欲酌酒飲亦不可得校勘者非好官但士子得之假以營進爾余既與世疎闊人所能為皆不能正賴閑曠以自適若爾奚所適哉取傘者回來索書聊寫區區捨足下欲語誰邪臨紙徘徊不免切切

又景祐五年

某頓首啓去歲西陵會拜狀今春量移此邑得子聰書知已在京尋得所示書伏承榮改京秩伏惟慶慰聖俞久滯州縣今而泰矣下交欣慰何可勝言脩昨在夷陵郡將故人幕席皆前名縣有江山之勝雖在天涯聊可自樂此邑雖便於飲食醫藥然官屬無雅士軍牧虞曹此况不言可知也所幸老幼無病恙而已不知聖俞美任何處囚拘之迹相見未涯思渴思渴自拜別將五歲矣友益日疎俗狀日增篇詠之興略無清思聖俞新作雖京師多事不惜錄示以開昏鈍而慰相思故人之惠莫越於此也至禱至禱賢弟云亡必深痛悲前得謝丈書已知之不勝數悼也因人行速聊拜此冬寒希保愛不宜某頓首○有亂道一兩首在謝丈處為無人寫錄得也聖俞略與臧否之某有少吏事告謝丈望聖俞與咨啓之略語伊法官少為庇隱某自作令每日區區不敢似西都時放縱此來事亦得正但為上官見怒曲有駁議然亦終無可駁縱有亦非大罰其如危辱之跡不欲使有小過也或聖俞問得謝丈一言乞批數字送與附書人也千萬千萬某又上

又寶元二年

某頓首啓前者見邸報有襄城之命乃知當與謝公偕行然糶料舊尹當徙蜀聖俞即留領縣事襄城居孔道音信自此可日置疑是以慢然未能作書及縣走接太守還得手書乃知前至南陽南陽去邑其間一驛爾某當請見直以公新下車方布條教伸威信問生故人

未宜往累於其間須其旬浹少定爾又恐聖俞莫能久留或略命駕見過此大幸也為別五六歲貶徙三年水陸走一萬二千里乃於此處得見故人所以不避百餘里勞君子而坐邀也願俟願俟相見旦夕爾他不復道

又同前

某啓承九月一日就道雖為遲留然清風白牛久雨泥淖尤須大晴然後不阻某自解官觸事不快至今幾五十日未能脫去豈其屯蹇未極邪所幸親老漸安更三五日可以卜行南陽之居依賢主人實佳事但恨聖俞不在爾昨夏中雖喜會於清風然猶未盡區區之懷今茲寓居方欲悉屏他事為聖俞極數日之歡而先後參差若相避然又見聖俞書中言有事欲相見以不克為恨者益令人怏怏爾到官必有日南陽人便無惜寄音一作意相及秋寒自愛

又同前

某頓首前遣公幹馳信迎候蓋初約然亦頗疑酷暑如此非乘輿之時人還得書果爾及急足至又沐榮問承暑中起居無恙甚慰其慰前累求新作今者書尾有自厭之說豈可疾淫哇而欲廢置律呂百花洲唱和必多欲一讀以祛俗累之心何可得也孫書注說日夕浸見已經奏御敢借示否蒙索亂道恰來盡呵呵講席所說何書因信乞示及晝寢之樂當輪閑者聖俞不得獨擅也謝氏詩昨忘附去今又却尋不見候見納去矣早熱可畏千萬保重

又同前

某頓首啓谷正來得所示書及見與謝家書甚詳云買洪氏莊與卜葬市屋業皆其所急者也又云減俸為助此時聖俞患於力弱不能厚報知己而然爾恐於謝氏無益而於聖俞有損爾聖俞若此月減三五千如失萬錢謝氏族大資多得之未覺甚助謝家亦自有書必言幸思之也洪氏莊極佳爾不須聖俞竭囊囊此固親朋好事然幸

其可以自辦爾望聖俞力爲幹之某行必爲帶錢去壘地已就此營
卜及市屋業差有緒然此不可倉卒爾他細故盡論谷正可詢之鄧
氏贖贖已止皆如雅意某年盡必到襄城祭文挽辭極佳冬冷保重

又康定元年

某頓首再拜啓自八月一日至京師及今已兩辱詩并在東都凡三
辱詩皆未還答非惟恃聖俞不以書之疏數爲親疎又以將遣專人
而多事未能便遣故也前知爲水災所苦此常事不足置胸中親老
求官南方此理當然安撫見辭不行非惟奉親避嫌而已從軍常事
何害奉親朋黨蓋當世俗見指吾徒寧有黨耶直以見召掌機奏遂
不去矣文雅處家事方於薛氏求一屋爲貯之勿慮也某於此幸老
幼無恙但尤貧不可住京師非久亦却求外補日一作日夕相識多
忙不暇作詩足下必不憚見寄閑吟者皆錄示千萬冬冷保重

又同前

某頓首啓前謝監簿行附書問差遣書去後兩日知審官擬定湖州
城中監稅不勝喜慰然不即走書專報者意謂勅下自當知及弓手
至得書尚云云始怪何處稽留至今未到然今必至矣不爾當爲督
也俟春入京尤便但不知何處少留某自還館日夕忽忽筆研非答
書簡寫門刺未嘗視昨夕子履偶來會宿聯句數十韻奉寄且以爲
謔又有前奉答長句併錄附去可笑可笑歲陽以來風日慘然土霧
雜下氣候不常萬萬自重

又慶曆四年

某頓首累辱書爲慰何已然久不致問者勞逸不同於理宜然諒不
爲罪經城楊宰來備詢動止承久困輦下何時可赴任所示威編云
已了甚於飢渴也此人回望一信容專令人去取使令致來恐糜費
銘文不煩見督不久納上紙爲須索要好者恐未盡爾呵呵昨在真
定有詩七八首今錄去班門弄斧可笑可笑然相別久無以爲娛爾

前有水谷詩見祁公云子美祕不令人見畏時譏謗吾徒廓然以文
義爲交豈避此輩子美豪邁何乃如此世塗萬態善惡由己所謂禍
福有非人力而致者一一畏避怎生過日月也其他非面不盡近書
見教審聽敢不佩服咫尺更有所聞不惜一一示及有酒少人致去
奈何奈何夏熱千萬保重

又慶曆六年

某頓首貶所僻遠特煩遣人至此并得陳留書新集詩見寄詩見和
詩外雜詩一卷碑文數本千字文等豈勝慰喜瑯琊泉石篆詩祇候
子美詩來已招子美自來書而刻之遊山大詩等即欲更立一石不
惜早見寄也詩序謹如命附去蓋述大手作者之美難爲言不知稱
意否其他事谷正在此數日備見所爲可知居此之况不煩述也閉
戶飽壘之句怎生諱得呵呵相次奉和見寄詩別拜狀次春暖千萬
保重

又慶曆七年

某又啓去年夏中因飲滁水甚甘問之有一土泉在城東百步許遂
往訪之乃一山谷中山勢一面高峯三面竹嶺回抱泉上舊有佳木
一二十株乃天生一好景也遂引其泉爲石池甚清甘作亭其上號
豐樂亭亦宏麗又於州東五里許菱溪上有二怪石乃馮延魯家舊
物因移在亭前廣陵韓公聞之以細芍藥十株見遺亦植於其側其
他花竹不可勝紀山下一徑穿入竹篠蒙密中豁然路盡遂得幽谷
泉名幽谷已作一紀未會刻石亦有詩託王仲儀寄去不知達否告
乞一篇留亭中因便望示及千萬萬

又慶曆七年

某頓首谷僕來捧書得詢動靜又見詩中所道有相遊從唱和之樂
備詳平日幕中所爲可勝慰也某此愈久愈樂不獨爲學之外有山
水琴酒之適而已小邦爲政期年粗有所成固知古人不忽小官有

以也示及飲酒今春來頗覺風寒亦不能劇飲如往時然自作主人後覺已便承見戒多荷多荷他事非獨不挂口亦不關心固無淺深可示人也某母老多病而身纔過四十頓爾心闌出處君子大節有所未果不敢効俗夫妄言爾春暄千萬保重

又慶曆六年

某頓首啓自谷正去後更不會上狀蓋以經夏大暑秋來或聞移南京或云來與刁氏成親一向因循遂成疎懶然中間却得聖俞所寄六詠及桐花啼鳥等詩近又得刁十六所寄詩書即日必已還許冬冷尊候萬福某居此久日漸有趣郡齋靜如僧舍讀書倦即飲射酒味甲於淮南而州僚亦雅親老一二年多病今歲夏秋已來安樂飲食充悅省自洛陽別後始有今日之樂詩頗多不能一一錄去未相見間惟冀保愛多時欲作書無便今託提刑趙學士謹附此不宣

又慶曆初

某啓爲親老久疾仁進仁退醫工不可用日夕憂迫不知所爲蓋京師近上醫官皆有職局不可請他兼亦傲然請他不得近下者又不知誰可用親疾如此無醫人下藥爲人子何以爲心京師相知少不敢託他告吾兄與問當看有不繫官醫人或秀才處士之類善醫者得一人垂報待差人賣書帛去請他幸爲博訪之聖俞聞此必挂意更不奉禱也如有所得亦速遣此人回其他不暇切切

又

某啓近君謨學士行會奉狀尋得邸報承有出身之命士大夫公議未厭皆爲聖俞嗟惋獨某不然未知高明自以爲如何也聖俞卓卓於後世者不以各位爲輕重取重於今世者亦豈以此小得失哉苟以寵辱爲意則布衣之樂有優於華衮之憂畏也老兄應能自達不切切也已寒保愛

又皇祐五年

某啓見謝直言新生小息不安甚憐懷然書中不言難以爲信聖俞居京師宜其不樂然業已至此當少安之某哀告苦殊無生理閑中靜思處世有好處惟當職者自遣之爾云欲來此深荷厚意然恐差遣理當難得遂止爲佳已熱慎疾寬中爲禱

又皇祐五年

某啓徐先輩人至辱書果承有小嬰之念時暑益當自寬爾某孤苦中中外多事偷閑便思一得故人爲會某不可往聖俞不可來奈何奈何惟當一讀新篇若會面而聖俞惜不寄又將奈何奈何陳碑不可增矣斯人不曉文義有二兩處是行狀所無出米脩路等意若果有當書何故而略切丁寧喻之此輩不向道亦終不知近併作書此不一一某再拜四月十九日 賜茶賜醫常事爾諡前面官銜中已有贈官亦然散侍郎作相不足爲榮但問人如何爾若材堪則自胥靡亦作相如不堪則乃是僥倖但如是向道無妨

又同前

某啓謀葬事未得恐遂後時日極撓悶蓋以術者太精自家又全不會祇信他人道不好便疑惑不敢使非效俗流求吉地圖官國山高也夏待中父葬于虜契丹必不與你擇官國山地葬也閑中不會作文字祇整頓了五代史成七十四卷不敢多令人知深思吾兄一看如何可得極有義類須要好人商量此書不可使俗人見不可使好人不見奈何奈何失音可救會記得一方祇用新好槐花尋常市中買來染物者於新瓦上慢火炒令熟置懷袖中隨行隨坐臥譬如閑送一二粒置口中咀嚼咽之使喉中常有氣味久之聲自通病愈新篇幸多爲寄此小簡立焚勿漏史成之語惟道意於君謨同此也失音脚氣皆是下虛吾徒老矣省此斟酌斟酌某此居哀獨宿然以憂惱亦自多病恐知

又皇祐五年

某頓首聖俞博士兄徐無黨人回奉狀陰雪不止體氣若何某爲近得君貶家書報薛家夫人不安老妻日夕憂撓算年久患誠亦可憂但薛宅書來止云無大段疾苦奉煩吾兄因見公期爲與問一的信因便相報吾兄書家人不見略要知其增減又爲妻子要去歸省其母亦欲過中祥遣他去貴先知彼中遠近爾某自要知謝氏有人還幸批數字逼節哀苦中立偶人行草此

又皇祐五年

某啓近謝秀才人行嘗奉狀日來起居清勝某哀苦如昨私門日益多事又爲妻母近病須令家人一往省之前嘗奉託詢問久候來報也近爲子美編成文集十五卷凡述作中人可及者已削去之留其警絕者尙得數百篇後世視之爲如何人也朋友之間可以爲慰爾某益衰病庶事不耐煩惟常守書冊危坐爾聖俞數許新詩不見寄似近日頗以爲難何也因兒子輩行奉此春暄保重

又同前

某啓寄惠鳴脚子甚奇趙二書信已領聖俞詩屢見許甚渴見何必自寫小兒輩可錄某亦厭書字因思學書各有分限殆天之稟賦有人力不可彊者往年學弓箭銳意三四年不成遂止後又見君諫言學書最樂又銳意爲之寫來寫去却轉不如舊日似逆風行船著盡氣力祇在舊處不能少進力竭心勸遂已身老矣安能自苦如此耶乃知古今好筆一作書蹟真可貴重也今後祇看他人書亦可爲樂不能生受得也數日陰悶昏然因作聖俞書頓覺豁然如有所釋若遂一握手可勝爲慰也謝景平文字下筆便佳他日當有立於世何止取一科第而已吾徒可爲希深喜也胥太祝且爲伸意某卜葬地尙未買得相次決定當有書報他也忽忽不宣

又皇祐五年

某啓前日謝氏人還辱書承尊候已復康佳新正必倍清勝某孤苦

如昨爲有一小姪一在象州久不得信一在袁州欲乞渠來賴以辦葬今劉其官位姓名託與問一消息恐難得便但却因謝氏人見示可也吾兄清一作情懷不樂俗事某寡相識煩聒甚悚甚悚

又皇祐五年

某啓忽忽度日無生意衙前行會奉狀徐生人至辱書承春寒尊體清勝爲慰無已某哀苦中尋得葬地欲趁八月十月裏事但庶事少人辦集小姪煩爲問當已有削必得請師魯文字俗本妄傳殊不知昨范公已爲作序李厚編次爲十卷甚有條理厚約春末見過當與之議定別謀錄本也自春陰寒少晴明病體不勝疲勞勸於書字不能周悉

又嘉祐三年

某啓動輒旬浹不奉頽采雪寒如此無復清思區區可知亦怪聖俞未嘗見顧得簡示乃云不登權門若以此見格何望於老兄某每日晚多在家因出望見過幸甚如晦所欲已起妻難於更妻蔡州亦應須得簿書煩擁走此爲答殘雪可愛能見顧尤望

又嘉祐二年

某啓大熱甚於湯火之烈兩日差涼粗若有生意然以家人病患飲食不能自給區區煎迫殊亂情悰久不承問不審尊體何似二十二日欲就浴室或定力錢介甫子固望聖俞見顧閑話恐別許人請故先拜聞禮部詩納上

又嘉祐二年

某啓承惠答蘇軾書甚佳今却納上農具詩不會見恐是忘却將來今再令去取讀軾書不覺汗出快哉快哉老夫當避路放他出一頭地也可喜可喜罰金未下何害不必居家俟命因出頻見過某居常在家居徒爲天下所慕如軾所言是也奈何動輒逾月不相見軾所言樂乃某所得深者爾不意後生達斯理也

又同前

某啓以小兒子傷寒已較因勞復發今日錫慶齋會亦去不得愁坐忽得所示爲之豁然憂煎病患常以爲苦思効榴花之飲不可得也三兩日兒子安聖愈過不惜頻相訪借馬若僑家又何厭也三十年前事信如前生愛樂不同可歎可歎亦約子固子履嘗奉白也祗候兒子稍安爾人還謹此

又嘉祐二年

某啓節節伏惟以時納祜昨日早至薛二家空心飲十數杯遂醉歸家却與諸薛飲承見過仍留刺何乃煩老兄如此既醒不違無以自處也節下外處送酒頗多往時介甫在此每助他爲壽昨抵送王樂道及吾兄爾愚性疎簡人事不能周然意之所至實發於誠心蒙惠簡云有所答則非也恐不知鄙懷故略自陳述二十二日欲同子履和叔閑話少時先白恐他有所適也

又同前

某啓陰雨累旬不審體氣如何北州人有致達頭魚者素未嘗聞其名蓋海魚也其味差可食謹送少許不足助盤餐聊知異物爾稍晴便當書局奉見

又同前

某啓中前在范家坐中已覺不佳所以都無情緒數日勉強有事相役既歸遂倒臥以出汗頗多亦利動臟腑頓覺體虛幸連日不朝免得請告更三兩日不知可出未承問念感愧亦審中酒吾輩年高不獨他事至於飲酒亦不能如故時也更希慎愛

又嘉祐二年

某啓谷正來承惠詩老重深粹不似頃刻間成何其敏妙至此也早來得筆絕佳不圖若此之精其精如此豈常有耶然久無稱手者乍得甚快意多感多感善中絕近文字不得無以度日時因作書簡得

一揮毫尚可銷憂爾人還姑此奉謝

又同前

某啓兩日不出方爲杜公作銘承惠詩絕高恐不可繼且留款曲試和待稍髣髴則將出兩久作奈何天災斯人豈惡之也其亦有以邪昨夜暫止頗緩奔走之計然遲遲何時得遂安居漸涼思奉言笑何可得人還姑此

又同前

某啓自入夏間巷相傳以謂今秋水當不減去年初以爲訛言今乃信然兩夜家人皆屏水并迺翁達且不寐街衢浩渺出入不得更三數日不止遂復謀逃避之處佳京況味其實如此奈何奈何方以爲苦不意公家亦然且須少忍特承惠問存卹多感多感蔡君謨寄茶來否悶中喜見慰人還切切

又嘉祐四年

某啓適至書局承自釋奠處方歸困倦不敢坐邀忽辱惠教兼得唐子方家行狀謹當牽課然少寬數日爲幸其如行狀中泛言行己殊不列事迹或有記得者幸更得數件則甚善又云有尹師魯所作墓誌亦得一本尤幸也尋常人家送行狀來內有不備處再三去問蓋不避一時切切所以垂永久也乞以此意達之

又嘉祐三年

某啓旦夕寒色尤感衰病者殆不能勝矣不知吾兄算候如何昨夜再讀和景仁雪詩甚妙兼以韻難如何可和且祗和得歲日書事一篇其元所示遂留之過節更送他處告別寫去也手筆凍縮書字不得韓范二公詩看了示下印卷子何日了因出見過陰寒公事頗少甚閑恐知

又嘉祐三年

某啓累日不奉見不審體氣如何兼以俗事無由奉詣理固當然聖

俞遂以權門見薄無乃太儻也前承惠白兔詩偶尋不見欲別求一本兼爲諸君所作皆以常一作瞻娥月宮爲說頗願吾兄以他意別作一篇庶幾高出羣類然非老筆不可亦聞有與如晦一篇甚佳皆乞取蘇大挽辭一首閑寫助一笑今日偶在家謹奉此

又嘉祐四年

某啓前日承見過偶他客多不遂款曲快晴意體想佳梅公儀來要杭州一亭記述游覽景物非要務閑辭長說已是難工兼以目所不見勦疆而成幸未寄去試爲看過有甚俗惡幸不形迹也程碑嘗便下手紙如唐書亦須了爾

又嘉祐二年

某啓雨不止情意沈鬱泥深不能至書局體候想佳某以手指爲苦且夕來書字甚難恐遂廢其一支豈天苦其勞於筆研而欲息之邪
閣中謹白

又嘉祐二年

某啓經節陰雨猶幸且晴不審尊候何似閑作歸田樂四首紙作得二篇後遂無意思欲告聖俞續成之亦一時盛事來日食後早訪及爲望

又同前

某啓承寵惠二篇欽誦感愧思之正如雜劇人上名下韻不來須勾副末接續爾阿阿家人見諂好時節將詩去人家廝攪不知吾輩用以爲樂爾後日絕早過喫不托適簡誤云食後這回不是廳子誤也

又嘉祐四年

某啓自承在式告兼以假故多遂阻奉見秋氣稍涼喜承體候清安辱惠建茗此誠近所難得特爲珍貺也然莫妨待客否恐彼闕當却分納一半也原甫高論少抑亦當不復較難來日朝中當面敘人還謹此爲謝某再拜

書簡卷第六

書簡卷第七 集一百五十

與謝舍人絳字希深 寶元元年

某頓首再拜兵部學士三丈久以多故少便不果拜狀春暄尊候萬福省勝至獨遺聖俞豈勝嗟惋任適呂澄可過人邪堪怪聖俞失此虛名雖不害為才士奈何平昔並遊之間有以處下者今反得之觀此何由不痛恨欲作一書與胥親及李舍人宋學士論理之又恐自有失誤不欲輕發不爾何故見遺可駭可駭由是而較科場果得士乎登進士第者果可貴乎日日與師魯相對驚歎不已伏承殿試考校今必已了某替人猶未至拜見未聞伏惟保重因人謹附狀不宜

又寶元二年

某頓首百拜知府舍人三丈三兩日毒暑尤甚不審尊候何似某昨走鈴下久溷賓館早暑交作晏陰方興當君子定心靜事休息之時暑夕屢煩長者其如乘餘閑奉鱗俎泛覽水竹登臨高明歡然之適無異京洛之舊其小別者聖俞差老而脩為窮人主人腰雖金魚而費亦白矣其清興則皆未減也臨別之際感德何勝西禪竹林又辱錢送自夜出南城凡再宿始至弊邑私門老幼往往病暑正如所慮此所以眷眷門下而不候久留者也自鄧至汝陰道出田間由鉅欣橋而西秋稼甚盛時雨已足問之乃覽秀所望而脚正在陋邦然鄧州界二字一作則莫及也豈騎立之神 一作邪憎家雜而愛野雉乎自還縣便苦 一作繁俗事書記未能詳悉謹拜此敘謝伏惟幸察不宣從表姪歐陽倚頓首再拜

與王待制質字子野 慶曆三年

某頓首再拜運使學士子野兄春暄伏惟尊候萬福自去年閏月來東郡以就祿養幸如所欲惟僻陋日益愚鄙爾在都下時子野兄舟行不克攀別其後送者還頗知留客甚歡而飲酒差多親族皆以素羸奉憂不知其後復飲否子野善自攝猶能絕葷血甘淡薄况於酒

邪一別頓爾南北關於候問惟冀自重以慰區區不宜某頓首

與李賢良觀字泰伯 嘉祐初

某啓冗事牽迫久疎奉長者之論不知兩辱過門甚愧甚愧某來日有少事須出即今幸家居可以拂席奉俟軒蓋顯企顯企不然當別拜聞貴不失約也某頓首賢良先生

與曾舍人鞏字子固 慶曆六年

某啓雖久不相見而屢辱書及示新文甚慰瞻企今歲科場偶滯遐舉奮德養志愈期遠到此鄙劣之望也某此幸自如山州少朋友之遊日逾昏塞加之老退於舊學已爲廢失而韓子所謂終於小人之歸乎因風不惜遠垂見教未良會間自重自重

又治平四年夏

某啓奉別忽忽暑候已深不審動履何似某昨假道於穎者本以歸休之計初未有涯故須躬往及至則繁慮地勢喧靜得中仍不至狹隘但易改而新稍增廣之可以自足矣以是功可速就暮年掛冠之約必不愆期也甚幸甚幸昨在穎無所營爲所以少留者蓋避五月上官未能免俗爾毫之佳處人所素稱者往往過實其餘不及陳穎遠甚然俯仰年歲間如傳郵爾初亦不以爲佳蓋自便其近穎爾至此便值酷暑未能多作書相知或有見問者幸略道此意惟慎夏自愛

與蘇編禮洵字明允 嘉祐二年

某啓自足下西歸承有家問忽遽而行時一小子臥病方憂悶中不得相見中間得還蜀後所惠書及今者賢郎人至得書承尊履休康併以爲慰足下文行見推於時豈久羈居於遠方者未相會間千萬自愛

又治平間

某啓承示表本甚佳前所借證法三卷值公私多事近方徧得披閱

文字更不待愚陋稱述第新法增損今別爲一書則無不可矣成一家之言吾儕喜若已出爾謚錄卷秩既多祗欲借草本

又治平二年

某啓多日不奉見承遷居不易初聞風氣不和謂小小爾昨日賢即學士見過始知尙未康平旦夕來體中何似更冀調慎藥食無由馳候專奉此

又治平二年

某啓自以拙疾數日闕於致問不審體中何如必遂平愈孫兆藥多涼古方難用於今更且參以他醫爲善也專此不宣

又同前

某啓數日來尊候必更痊安單藥得效應且專服千萬精審無求速功不欲煩去咨問恐煩勸也亦不煩答簡或賢耶批數字可矣

與費縣蘇殿丞皇祐年

某啓特承書問兼惠篆碑滁陽山泉賦爲勝絕而率然之作文鄙意近乃煩僞筆以傳於遠既喜斯享之不朽又愧陋文莫掩感仰之抱寧復宜陳專人還謹此敘謝 舊用龍尾硯一枚鳳茶一斤聊表意

又

某啓前者辱見顧屬苦多事不得少伸款曲比奉詞則承已歸縣矣但深快快也辱惠書竊審經春體氣清裕某衰病疲憊日自彊勉未知報効不敢言勞咫尺阻闊惟多愛

與澠池徐宰無黨 皇祐五年

某啓久不得書自聞省試日望一信人至忽得所示大慰鄙懷兼喜春寒所履無恙程試賦詩極工矣策贖博而辯論偉然皆當在高等人力所可爲者止於如此耳其他有命然俗言運亨者臨事不感揮翰之際能至此其亦奮發於茲時乎計此書至已在高第故不子細不次脩書白

又至和元年

某啓真陽相別忽以及茲日月不居大祥奄及攀號僻躡五內分崩不孝罪逆蒼天莫訴哀苦哀苦久不得書日與無逸第想望忽捧來示承在道會感疾喜今復常又知淮水淺澀雖深欲相見但恐阻滯遂失赴官之期若於事有妨則不若且就汴流西上如淮水可行與汴不爭遠近即茲來爲善賢弟在此寂寞中相伴大幸某秋涼方卜離此南北未知何適五代史昨見曾子固議今却重頭改換未有了期仍作注有難傳之處蓋傳本固未可傳本則下注尤難此須相見可論改服哀苦中忙迫偶奉接人行聊此

又至和二年

某啓專人至辱書承官下無恙深慰示及誌文甚佳無逸弟又有煩惱可哀適值有人在此誌文當附去又知且權河南澠池本邑自可讀書爲政何必求來府中所云冬末當至京師暫來甚善一作書無欲第居監中時相見焦秀才亦在太學補監生恐知某碌碌於此士大夫有所論當悉以見告庶助其不及實有望也未相見多愛

又同前

某啓人至辱書承官下無恙深慰深慰所云進取之道能具達其如此夫復何患論及富公言范文正公神道碑事當時在穎已共詳定如此爲允述呂公事於范公見德量包宇宙忠義先國家於呂公事各紀實則萬世取信非如兩仇相訟各過其實使後世不信以爲偏僻也大抵某之碑無情之語平富之誌嫉惡之心勝後世得此二文雖不同以此推之亦不足怪也某官序非差但略爾其後已自解云居官之次第不書則後人不於此求官次也幸爲一一白富公如必更換則請他別命人作爾

又嘉祐元年

某啓縣人來得書承寒凝公外體氣無恙深慰深慰所寄近著尤佳

論議正宜如此然著撰苟多他日更自精擇少去其繁則峻潔矣然不必勉強勉強簡節之則不流暢須待自然之至其如常宜在心也代天論既各有篇目不必謂之代天可也某近權省得罷稍閑已有削乞洪井若果得則私便尤多况非要任求之必可得也無欲第在太學見兒子云甚安某一向多事少暇他亦疎及門恐知銓中新制破考之事稍緩若在本州無妨亦可已新年多愛

又嘉祐二年

某啓人至辱書承洎官進學無恙甚以爲慰所寄文字大佳然作文之體初欲奔馳久當收節使簡重嚴正或時肆放以自舒勿爲一體則盡善矣某此待罪賦碌碌然期必有爲而自効士大夫見責者深是待我厚而愛之過爾敢不佩服冬寒自愛在致齋處草草

與焦殿丞千之 皇祐五年

某啓自相別無日不奉思急足辱書深所浣慰然聞不遂解名在俗情豈不快快若足下素所自待與某所以奉待者豈在一得失之間但以科場文字不得專意經術而某亦有人事今足下三數年間且可棄去科場文字而僕亦端居無一事惟於此時可以講訓素所聞未舉者過此恐彼此難得工夫也足下爲人明果以此思之亮可決然北首深恨閑居無人既不能專遣人去奉招當正初兩歸亦不爲久別計但仰首傾望也某於哀苦中奉思諸君子此又不可言已寒多愛

又至和二年

陰雨泥甚不欲煩奉邀蓋知請假甚艱也某恐不久出疆欲且奉託與照管二數小子某來日遂移過高橋宅中俟稍定便去般出學恐先要知仍請具此白胡先生知爲妙至時恐要人般擊請示及待令去晚間可出即見過閑話某再拜

又嘉祐元年

某啓知昨日已差試官庶事便當牽率稍涼體中佳否近晚或能見過閑話少時恐遂難得暇也麤細米各二斛聊餽僮僕輩必不以輕鮮爲恠有無相通亦鄰里之常事慚仄慚仄

又同前

某啓以數日齋祠今早方歸知會來取藥體中佳否見解勝張濂秀才已獲薦不知肯且來此過冬否祇恐他要冬課嫌小兒喧聒不然蒙益則多矣某今日在家隨早晚見過閑話少時

又嘉祐元年

某啓今日見解勝尙疑脫漏姓名然初以得失委命而進則臨事自應不動於懷此孟子之勇也適歸家偶早幸略見過閑話某頓首

又同前

某啓數日大熱不審意思如何適令發至羣牧司云已却歸西園不審何謂此中西位頗寬涼多南風甚可居至於飲食亦可取性固無形迹矣兼時得閑話請更思之勿以爲疑也謹此咨啓俟報某啓

又同前

某啓見兒子言尊候達和豈非患腹臍邪秋後慎生冷爲佳以數日不相見甚思渴某一出參假便有人事區區加以兩日復熱恐彼中窄狹無事且來書院取涼無形迹也前時奉白嚮有策題彼中收得者幸爲錄示或祇檢得本子此中亦有人寫蓋人事易因循也

又嘉祐元年

某數日不承問不審體中如何當漸平和但怪不見過故此奉問凡疾病不欲滯鬱頗須消息有以散釋其效多於服藥若能出入幸相過要人馬來取至於藥物亦當商確乃盡其理謹此咨啓某再拜

又同前

某啓稍寒想益佳裕數日人事忙迫非常前夕至學舍中見狼藉可憎所以未敢便請他張秀才更俟一二日大太祝歸略令灑掃兼庶

事有所備緣某多故不能躬視也兩日欲去報此意亦無暇作簡表
表度日公私不濟一事此京師之態也某奉白

又嘉祐二年

某啓昨日以客多饑疲風眩發作臥不能起承示簡不及時答所言
張先輩但怪其登第後絕不相過餘非所聞也亦欲旦夕召渠相見
但以多事忽忽未暇爾今日知聞喜宴來日約其見過也

又嘉祐六年

某啓有無相通蓋爲常理更不存形迹也船不必白省主自遣人問
當亦可得蘇氏昆仲連名並中自前未有感事感事姚闢詩說請試
看有長處僉出示及爲無工夫細看故也

又嘉祐六年

承惠胡公銘茲人美德固樂爲之紀述第以文字傳遠須少儲思蓋
尋常意思未及爲人強作多不佳也自來日已任併無假故直至旬
休如所論行期甚迫當且前之續可附致潤州諒不爲晚也人還謹
此白知小兒不安且慎調護大熱難將息也

又同前

某啓自相別後方欲作書遠承不疑學士有來歸之命自後更欲附
書則思舟行必已在道無處可附亦以不久相見不必爲書也適得
信喜來甚速且承酷熱中體氣清安其他皆可盡於相見也某爲今
夏病暑不可勝任又得喘疾遂且在告蓋衰老之態自然如此也略
留來人附此草草

又嘉祐六年

某啓自相別更不聞問近得邵學士書云已到家方喜知動靜兼承
所履安和實以爲慰某病衰如昨不惟任責愈難常至於勞苦亦筋
骸不能支持爲可責惟早自知止猶勝彊顏以貪寵利自計非不熟
但恐未得如志遂爲君子之棄而小人之歸爾南方宜多有聞見不

惜垂諭猶勝不知也有望有望前者胡公墓表誤書陵州人嘗問其
家爲改正歲晚寒凜以時自愛因人惠問

又嘉祐末

遽爾大熱病軀殊不可當數日不相見體中佳否知已授樂清果如
何來日見過家飧幸早枉步乘午前稍涼庶幾可坐也無它客姚秘
校劉真蹟至此止

又治平 年

某啓范氏子書來并獲所寄書自承赴樂清後方拜此一書審此居
官下安和稍釋傾想陋巷之士得以自高於王侯者以道自貴也一
從吏事便爲禮法所繩若居人下而欲有設施則世事難如人意更
當屈伸取捨要於濟務此非獨小官自古聖賢尚以爲難所以前世
一節之士以貧賤爲易守也自臨縣治今將及暮諒深諳此態也某
嘗再爲縣令然遂得周達民事兼知宦情未必不爲益某愈覺衰殘
齒牙搖動飲食艱難食物十常忌八九情懷益蕭索物外浮榮信乎
不爲吾儕得失也有名即去矣未相見間公餘慎愛因人時惠問不
宣某書白

與王主簿回字深甫

某啓嚮者深甫在京師則以俗冗不常得相見既去又不時爲信問
視其外豈非疎且慢哉然求諸中則不然也人至惠問承奉太夫人
萬福下情瞻慰某衰病日增殊無世間意趣近買田頰上思幅巾與
二三君往來田間其樂尚可終此餘年爾而其勢未能速去非爲
之不果猶須晚獲也深甫以謂如何賢弟昨西略見爾邪寒更乞自
愛

又

某啓累日以聖節諸事區區未得祗候大熱不審體氣如何來日見
過家殮庶得接清論少時幸早垂訪也專此咨啓不宜某再拜深甫

先輩 常君未及作書續得馳問因見爲伸意千萬千萬

又

某啓人至辱示借書並領昨日少奉清論開沃無限歎良減否師魯文略讀一二篇令人感涕碑并集錄皆納去某又上

與姚編禮蘭字子張 皇祐五年

某頓首閑居絕無人使又不欲煩郡中借人所以久不作書上杜公然哀苦中無限瞻依也因請見爲多道哀懇希文得美謚雖無墓誌亦可况是富公作必不泯味脩亦續後爲他作神道碑中懷亦自有千萬端事待要舒寫極不憚作也只是劣性剛褊平生喫人一句言語不得居喪犯禮名教所重况更有纖毫譬如閑事亦常不欲人擬議况此乎然而不失爲他紀述只是遲着十五箇月爾此文出來任他姦邪謗議近我不得也要得挺然自立徹頭須步步作把道理事任人道過當方得恰好杜公愛賢樂善急欲范公事迹彰著耳因待坐亦略道其所以但言所以遲作者本要言語無屈準備仇家爭理爾如此須先自執道理也餘事不必云云背碑子極奉煩多荷多荷因見杜贊善託問實錄不必封但只恁寄來此中程判官亦爲伸謝將書來後信有書去某再拜

又

某啓專人辱書承守道爲學自如甚善見諭紹嚴事止於如此則又何言君子之言必誠誠久必見凡有諸中未有不形於外者惟當以久見吾子之誠爾禮記雜亂之書能如此指擿其繆其功施後世無窮非止効俗儒著述求一時之名也然其中好語合於聖人者多但當去其泰甚者爾更宜慎重如坊記一篇難破讀更思之然遇所見但且論次不惜錄示

與王幾道復 景祐元年

某頓首白幾道先輩足下段氏家人至蒙示書及詩并子聰聖俞書

與詩後於東山處又見詩何其勤而周也聖俞得詩大喜自謂黨助漸熾又得一豪者然微有饑態幾道未嘗爲此詩落意便爾清遠自古善吟者益精益求精何不戒也阿阿問別後事自彥國去後患一腫疽二十餘日不能步履甚苦之時惟聖俞一來相問臨清之歡何可得耶師魯已有召不宜更俟嫁女幾道與彥國宜督以來走明日就試恐要知之惠詩未暇答以此也

答孔嗣宗字伯紹河南人 皇祐元年

某啓辱書甚善尹君誌文前所辨釋詳矣某於師魯豈有所惜而待門生親友勤勤然以書之邪幸無他疑也餘俟他時相見可道不欲物物於筆墨加察加察某再拜

又同前

東方學生皆自石守道誘倡此人專以教學爲己任於東諸生有大功與師魯同時人也亦負謗而死若言師魯倡道則當舉天下言之石遂見掩於義可乎若分限方域而言之則不苟故此事難言之也察之

與尹材慶曆八年

墓銘刻石時首尾更不要留官銜題目及撰人書人刻字人等姓名祇依此寫晉以前碑皆不著撰人姓名此古人有深意况久遠自知篆蓋祇著尹師魯墓四字

與蔡文皇祐五年

某啓人至辱書感慰何已且承春序履況清休范公襄事倚以孤苦衰困中杜門郊外殊不知端息情禮都闕但得淮西寄到誌銘豈任感涕文正平生忠義道德之光見於誌謚爲信萬世亦足慰也神刻謹如所諭敢不盡心某忝以拙訥獲銘當世仁賢多矣如此文復何所讓但以禮制爲重亦不遲年歲中貴萬全無他議也悉察察述夢後序更當勸尋史傳續報然亦當慎文正所慮至深某亦疑其有

意不用此篇果如所料矣試期不遠付奉賀加愛加愛某再拜

答曾舍人鞏字子固 熙寧四年續添

某自歸里舍以杜門罕接人事少便奉書中間嘗見運鹽王郎中得
問動靜兼承傳誨近又聞曾少違和急足至辱書喜遂已康裕甚慰
甚慰某秋冬來目足粗可勉強第渴淋不少減老年衰病常理不足
怪也餘在別紙某白 見諭乞頽且止亦佳此時尤宜安靜爲得理
也惠碑文皆佳多荷常筆百枚表信不罪不罪

又同前

辱示爲人後議筆力雄贍固不待稱贊而引經據古明白詳盡雖使
聾盲者得之可以釋然矣父子三綱人道之大學者久廢而不講縉
紳士大夫安於習見閭閻俚巷過房養子乞丐異姓之類遂欲諱其
父母方羣口誼譁之際雖有正論人不暇聽非著之文章以要於久
遠謂難以口舌一日爭也斯文所期者遠而所補者大固不當以示
常人皆如來論也某亦有一二論述未能若斯文之曲盡然亦非有
識之士未嘗出也閑居多寫錄須相見可揚推而論也自去年至
蔡遂絕不作詩中間惟有答韓邵二公應用之作不足采惟續思頽
十餘篇是青州以前者并傳記皆石本今納上自歸頽宅文字亦絕
筆不作恐知恐知 青州十餘篇亂道爲說道上石彼近必見矣

書簡卷第七

書簡卷第八 集一百五十一

與丁學士寶臣字元珍 嘉祐四年

某啓自聞南方寇梗思欲附問凶禍閑居難求的便雖在哀頹翹想之心不可道也元珍學行憂深才當遠用違一作罹此不幸古人多然在處之有道爾古之君子所以異於常人者能安常人之所不能安也所恨某居此際不能奔走耳某衰病無復生理今秋欲扶護歸鄉恐趁菲期不及則且權厝鄉寺俟它年耳忽偶黃莘先輩過云賢兄在舒州因得附此草草不能盡鄙懷當續馳訊也秋熱寬中自愛某再拜

又嘉祐四年

元珍淹屈於外交游所宜出力既默無所爲而至於書問亦不能時致其勤其爲慚罪不待言矣某自蒙恩歸院雖稍清閑而忽忽度日公私無所益此處京師者汨汨之常態也幸非甚愚頗知脫此而遠去然事有不得遂去者古人所謂不如意十常八九者殆此類也今歲廷試得人之感中外共慶况在佳壻此豈非久滯中一可喜事哉今因胡推官行謹奉狀相次陸君行當別布懇

又嘉祐四年

某向在府中困於煩冗久不奉狀徒用瞻思專人遽來特辱嘉問承涉夏已來體氣清福深所欣慰元珍才行並高而困蹇如此吾徒之責也某昨被煩使初不敢辭然几案之才素非所長加以早衰多病筋力不支屢自陳乞蒙恩得解去實出天幸然請外之志尚未獲素心又以殘史終篇有期夏秋之交可決南去相見未涯千萬鄙懷臨紙不能悉布惟慎重自愛以順休復

答郭刑部輔

某啓方欲因兒子行奉狀遽中忽辱書可量欣慰兼審春寒動履清勝承諭以蒿少之游豈勝踈羨此樂常爲山人處士得之衣冠仕宦

比其汲汲得如其志不老則病矣雖有登臨之興勉彊而爲之已不勝其勞也若神完氣銳惟意所適如公之樂者百無一二人也如某者目固不能遠望足亦不任登高矣可歎可歎相見未涯嚮暖加愛

與朱職方處約 嘉祐五年

某啓久不奉狀夏熱公外竊惟體履休勝陳誦寺丞佳士也會在滁州同官今其南歸願拜識幸希留念也屬唐史終篇忙迫作書不謹備恕之方暑慎愛

與蔡省副

某頓首公私忽忽久闕致誠辱教字承已登舟遂不復一得敘別可勝瞻戀短景日暮還家客已盈室寢食殆廢習以爲常以此久不奉問數罪愆罪汝陰君子久處疾少間當來歸未見惟寬中自愛審用藥餌不盡區區

與王發運鼎字寶臣 嘉祐二年

某啓中春嘗辱惠問不審涉夏暑毒體氣如何某自出貢院爲羣士誼詬尋而入夏京師旱疫家人類染時氣區區中復有病患憂煎以此久不附狀寶臣治漕南方雖久淹于外然振綱革弊公私所賴者不細比於碌碌於此無所云補者所得多矣某再請洪井未得屢罄所懷期於必得也未相見間惟爲時自重謹於遞中奉此不宜某再拜

又嘉祐二年

某啓衰病無悰難久於此加以私計日思南去未可得者無他近時內外制請便例不得從爾奈何奈何自之翰有事故人零落所存者幾更復何心追後生於紛華某將入貢院時之翰疾已甚比出遂不見遽失斯人爲恨何勝與同年相知尤甚遂及之愁人愁人中間承惠金櫻煎近方開而服之其製一作煎得尤精多荷中年衰病太甚世情已去但猶藉藥力且扶旦夕爾遠中不子細

與馬運判遵 皇祐二年

某啓久別欣此瞻候陰寒道中尊候休勝河役動衆疲民利害繫公處置之耳他俟握手不能具述因人走此不宜某再拜運判裏行執事十二月七日

答韓欽聖宗彥 嘉祐二年

某啓昨使舟行日不及攀別深以爲恨人至辱書伏承署事以來當此祁寒體況清福實以爲慰也外補之樂得之有素伏讀佳作益以起予無用之質衰病颯然造物者畏浮議以見縻奈何奈何歲晚以時自重入還謹奉此爲謝不宜某再拜欽聖提刑學士十一月二日
辱寵惠佳篇欽誦不已且夕和得遞中附上新甘奇味珍荷也珍荷也部頭事藝稍進得賢者齒問更增勉勵也河阿劉守到必還使司當復清談也嘗說襄陽山水一經真賞果如鄙言否

答李學士嘉祐八年

某啓自遭懼國卹哀摧殆無以生伏惟感慕攀號何以堪處伏承遠賜存慰豈勝感咽孤拙遭遇昔與安道皆奉清光今茲衰晚才薄責重未知死所何以論報嚮秋更冀以時加愛

與王學士

某頓首京師區區自朝及夕無益於公私而思接賢者之論亦不時得近兩辱見顧皆不獲迎候豈勝爲恨寒陰不審氣體何似且夕當卜至門未間先此爲謝冀有以亮之而已

又熙寧二年 此帖又載第九卷却云與薛少卿

某啓急足至辱書喜承尊候萬福貴眷各安甚慰企想近入京衙校過賴捧手教尋於遞中奉狀必達視聽某到此以弊止未完固少留以冀然欲遂爲掛冠之請遠近相知皆相督以蔡是自乞須且勉赴到任徐請歸休未遲今遂治行二十一二間上道三四日至蔡別拜狀恐久滯急足忙中作書不悉

答張學士嘉祐 年

某啓中間辱惠書未遑脩答又辱惠書意愛動勤重增感愧某以嘗患兩手中指攣播爲醫者俛服四生丸手指雖不播而藥毒爲擊攻注頤頰閉結核咽喉腫塞感暑中殆不聊生近方銷釋衰朽百病交攻難堪久處茲地漸欲謀爲退縮得免罪戾以疾爲名而去猶是幸人使騎巡歷何時一過都下少遂握手未間以時自愛仰儀喪子應滯行期許事猶煩餘暇冲卿恐猶未歸未及作書爲懇

又嘉祐 年

某啓區區久不馳問豈勝瞻勤暑竊惟體履清福兼承權留務都邑孔道諒少勞神中間嘗辱惠問不特脩報亦可知其冗率也慚感某唐史終篇遂當復尋江西之請衰病無堪爲歸老之謀爾未由握手莫罄鄙懷惟冀爲時自愛以副企詠

又

某啓前日專詣舟次值不在略見賢郎比欲旦夕再祗候而大雨連綿無由出門兼恐已行忽辱手教乃知卽今方行不獲面別惟以時自愛瞻企何已東南應亦有所欲但倉卒不暇續當有信咨煩也蔣同年千萬爲伸意近得書亦當作書也南郡近有書去矣人立待草

又

某啓衰病無堪叨竊過分方深愧懼遽辱誨存兼承惠寄佳篇豈勝珍誦湖園野趣近郡所無夢寐在焉何嘗忘也若得偶逃罪責歸老其間遂養慵拙何勝幸也歲晚寒凜款言未期惟冀以時自重

答陸學士經字子履 至和二年

某啓使北往返六千里早衰多病不勝其勞使者輩往凡七八獨疲劣者尤覺其苦也還家人事日益區區浮生何處得少休息承子履在洛甚安又知來鄭書碑咫尺莫得幸見獨見勝之備知動止辱書

益用爲慰漸暄珍愛人還謹此

又熙寧四年

某啓久闕奉問忽枉以書奚勝感慰兼審經寒履况冲裕某衰病餘生得請歸老而遷官兼職皆出特恩榮幸之愧無以爲論第久疾累年頓難減損然得此閑適足以安養又其幸也遂復田畝無期會見企仰而已千萬加愛

又治平四年

某啓早來辱枉使車重增媿感過午遂熱承動履清和方苦昏乏忽被手教兼惠以藥并方尤荷意愛之厚第藥性差熱當漸漸服之也竊承代歸有期依依之意愚當與賴民同也餘留面布人還少奉此

與刁學士給

某啓前日承寵訪秋暑計尊候康和以居處狹陋欲卜定力約數君奉同閑話一日既稍寬涼又佳水烹一兩盃茶幸告月初約一日恐爲會處多故先次一作此啓

答連職方麻字君錫 天聖中

某惶悚頓首上黨三哥良執少一作久別伏想體中佳好近者兄長行獲奉短札懇悃之素具之如昨洎任進來得二兄信伏知軒車猶未歸仙墅某自返黨間邈然塊處日以賤事相逼魚鱗左右至於筆硯之具視同長物而已前承寵示佳句久欲爲答奈六情底滯不能叩課加之對雷門之前非布鼓之能過也但効曹生游揚季布之名日得傳播於漢東士流之間諷誦傳寫者迨疑使中山兔悲而洛陽紙貴也今勉成一首以報來賜小生學非師授性且冥忝仰賴良交時賜教誘若不爲索其病疵而姑効司馬生言好字則三哥顧我之厚薄可由斯而見矣崢嶸且晏平居寡徒想望故人能不愴恨時因北風幸無忘德音之惠某頓首

又嘉祐五年

某啓近嘗辱惠問不審寒來體履如何京師區區幸時與元禮相見

然衰病鮮悰無復壯年游從之樂也殘史已終篇南歸之思如欲飛爾君錫決然遂獲閑居之適應知此趣真老者之所便也況竊祿甚厚於國無補豈堪碌碌久此乎握手未期聊爲君錫道此感寒多愛

又熙寧四年

某啓令姪過郡辱書相尉積年思企之勤兼得一詢起居康福外絕世欲內養天真宜其極方外之樂享眉壽於無涯某龍祿盈溢心志衰零尙此盤桓未償夙願然亦不出新春歸計可決第思場屋之游四十年之舊零落之餘所存者幾而吾二人者邈焉各在一方未知握手之期用此不勝區區爾歲律適盡寒色嚮深惟以時加愛

又熙寧四年二月

某啓守蔡忽已半歲老年百病交攻賴此閑僻偷安然猶經春在告人事曠廢咫尺相去關於馳問使至辱書既慚且感喜承尊候康裕某以衰殘未遂一丘之願勉彊憂畏惟思高賢遠識早能超出塵累宜享福壽於無涯也企慕企慕相見未期初暄保愛

又熙寧四年四月

某啓相去不遠惠然之顧出於乘興古賢佳事有望於故人但不敢坐邀爾某入新年陡更衰殘昨二月中欲遂伸前請決計歸休封遞角次得闕報陝兵爲孽遠近驚懼朝廷方有西顧之憂遂且少止今已寧息作晚必期得請也若遂還賴則相去益遠至時或一就蔡枉顧可否千里命駕近世未聞亦是一時奇事有望有望亂道思賴詩一卷粗以見志閑中可資一噱

答連郎中岸字元禮

某啓才薄力劣任非其稱初無報効徒自爲勞人事都廢恃親舊見哀而不責小故湖外風土如何嚮承體中亦小不佳今喜清康君錫兄亦久不承問多事忽忽不曾作得一書慙慙慙慙甚佳遠地

難致尤為珍感鳳團數餅聊表信而已歲律遽窮新春多愛

又

某啓承賢郎小娘子見過故人佳兒女朋友所當共慶也兼辱簡字惠以能白并蟠鮓等皆飲酒具獨惠累日苦目昏未能近盃杓也朝暮乘閑道話

答丘寺丞

某頓首今日食後就寢方覺擁被臥讀太白集忽辱惠佳篇豈勝感愧當亦牽強為報恐滯使人且此為謝

答韓宗彥嘉祐四年

本卷前有各韓欽聖二幅即宗彥也

誤實此

某啓專人辱書承此初暑體履清勝實慰瞻勸前在府中嘗辱惠問牽以俗冗不時布款昨以衰病屢自乞蒙恩俾解煩劇雖江西前請未獲素心而疲憊計不能久粗得休息亦不勝其幸方得復從諸公之遊而子華遽遷執憲然命出中外稱愜某既得閑適遂且盤桓過夏秋冬當遂前請相見未涯但聞風采行被嚴召未間暑熱以時自愛因人還謹此為謝

答黎宗孟醇 熙寧二年

某啓近遣家兵至萬壽奉迎有書計達專人惠教乃承路中得疾問來人不能詳言即日必惟已獲痊安旅中有疾亮難久也辱諭尋醫細思皆小小外事不足動懷豈宜輕為去就許昌避疑介至毫又陳曹為梗今又復然足驗世人常態處處如此然則尋醫所至未必見容但當寬度包之爾富丞相奉知必不淺已教他舉留再任莫且隱忍終之否某性自少容老年磨難多漸能忍事前後蒙見教者豈非欲某寬中以忍事耶却敢以此意奉規不怪不怪未敢奉邀必且徑還家也嚮暖加愛不宜某再拜

與裴如晦煜 嘉祐五年

某啓酷暑阻奉見竊惟體氣佳和新事頗動人耳目惟靜處聽聞益覺其喧也聖俞賻助遂獲幾何苟有所得幸且勿送其家也望略批示或約相見為佳謹此咨啓某再拜如晦學士廿四日

答杜植嘉祐五年

某啓公私多故久闕馳誠然亦久不承問忽於遞中辱書喜慰無量兼審經寒動履清勝不相見數年間親舊零落所有無幾在者衰殘老病於理宜然其間不能量力決然早去而留連祿任任過其分勉強碌碌迄無可稱以取責於一時而貽譏於後世則鄙人於數老叟中又獨負此若寵利紛華不惟非素心所溺就令心有所好大抵晚年實能享者於身所得幾何由是言之得失不較可知自去夏迄今病恙交攻尤苦齒牙飲食艱難則嚮所謂於身所得者無復有爾可歎可歎不相見久因書及此聊當一笑爾聖俞家賴諸故人力得不失所漳州兒子輩更在教育他事應在雅懷有以處之不待言也新歲千萬加愛因風不惜惠問以慰瞻仰不宜某再拜

答陸伸

某啓人至辱示長書及古今雜文十軸其研窮六經之旨究切當世之務與其辨論文辭之際如決壅塞闢通衢以瀉浩渺之無窮御駟駿而馳騁然則吾子之所能與其所用心者不待相見而可知矣某衰病廢學多難於時常幸得空閑之處苟樂於自棄而吾子獨不棄之惠然見及何以當之欣慕感愧聊茲為謝幸察其區區

與丁學士見英辭類彙 已下續添

元珍屈處冗務士夫所歎清議尚存自當奮滯惟通塞有時少須之耳某碌碌於此為庸人出處之計前以屢陳矣

又

冗務誠非賢者所處然屈伸之際又非賢者不能安也凡在交舊莫不以此為慮而未知所以為之奈何自古賢達之士固嘗有所屈伸

其所以處之者乃其平生所學者耳足下所存遠大故知必能及此
敢道之

與蔡省副嘉祐元年 見名賢簡啟

某啓昨日無以爲禮深用慙覲宿來動履想佳然中席遽起遂不可
留變此新例他時東齋之會敢不遵用故事也適得冲御簡言原父
已送詩云某殊未有一句欲借一拭目以發衰鈍三日欲去出城送
冲御能往否此不敢強閑及之

又嘉祐 年

某啓昨日知與冲御賞月必有餘樂某亦邀同輩二三人淡坐不飲
殊亦鮮歡但飲冷過多又病真不能追逐少年矣前時烏絲欄輒留
欲書其後尙未有暇適因尋書別得少佳者且納上聊資揮灑章望
之長言試爲一闕疑後日方得奉見謹此咨布

與裴學士名煜字如晦嘉祐八年以秘閣校理知開州 前

有嘉祐五年一帖

某啓公私冗瑣人事多廢不獲奉問忽已逾時專人辱書承經寒氣
體清安稍慰瞻想也某年齒日增心志日耗材薄任重憂責無涯故
人在遠誰與教告誠未知稅駕之所也如晦代歸有期竊承私門多
所憂撓顧知紛紛此世少無事人也惠甘誠爲佳物然不飲已暮年
矣茶須書方敢致謝嚮春和更希慎愛專人還謹奉此不宣某頓首
如晦學士足下二月三日

與趙學士名彥若字元考 熙寧 年

倚啓頃蒙軒騎少留忽殆疎款奉然每親餘論獲益已多少別方
爾傾馳辱書感愧旦夕亮且就道霜月嚮寒千萬愛攝不宜歐陽倚
奉啓太常學士執事八月晦日

承示集古跋尾數事頓發蒙滯恨不早拜呈也

書簡卷第八

書簡卷第九 集一百五十二

與薛少卿公期 景祐二年

某頓首再啓東園一別自夏涉秋今倏冬矣泝汴絕淮泛大江凡五千里一百一十程纔至荆南見家兄言出京時有公期書渴得一見要知別後事然數日尋之不見遂已某自南行所幸老幼皆無病恙風波不甚惡凡舟行人所懼處皆坦然而過今至此嚮夷陵江水極善亦不越三四日可到久聞好水土出粳米大魚梨栗甘橘茶筍而縣民一二千戶絕無事罪人得此爲至幸矣祇是沿路多故舊相識所至牽率又少使人作書入京公期始約今冬赴絳州必非久行矣每憶君謨家會頗如夢中未知相見何時惟自愛而已因人便附書在君貺處乃可達今因遣白頭奴入京謹附狀不宣

又景祐四年

某頓首自公期東門之別忽已踰年南北之殊相去萬里音信疎絕於理固然昨至許州蒙訊問備審官下爲況甚佳邇來諒惟自公之餘與閩內貴屬各保清休某居此爲況皆如嘗親老幸甚安室中驟過僻陋便能同休戚甘淡薄此吾徒之所難亦鄙夫之幸也多荷多荷公期遊宦故鄉其樂可量思昔月中琴弄樽酒之會何可得耶某久處窮僻習成枯淡頓無曩時情悰惟覺病慙漸侵爾斂性懶於作書區區思慕之心非有怠也惟仁者察之讒謗未解相見何由惟慎疾加愛因人至京頓示三兩字爲禱其如方寸莫能盡也不宣

又康定元年

某頓首再拜公期九哥足下比者伏審五丈人丈母相繼傾亡聞訃交至不勝悼懼苦事伏惟懼此酷毒摧痛哀慕奈何奈何孝子之志在於不滅更望節哀就禮以全大孝是於親友爲大願也自去秋質夫有事願俟公期替歸不意遭此凶變知扶護且歸絳州未審何時可至京邑一別數歲某走萬餘里艱險備嘗公期又有此患人生若

此可嗟可嗟八哥在京尚未有差遣亦欲求一住京所貴照管君貺與某亦時時到宅內外如常不慮中前君貺行會有書侬爲有起請不肯附去今同封呈前後累寫下書皆因循不附去得悚息悚息秋寒哭泣扶護千萬寬節以副區區謹奉此致慰

又慶曆三年

某頓首啓自公期到京便欲拜見初期見訪尋以某欲入都遷延至此近以定日必行一夕小兒輒病遂阻行計然猶幸僅存其生至今尙未安所賴有可醫理行既無涯虛滯軒車久阻歸計慚惕料某不往公期便行也企渴企渴他具夫人書記累辱問小兒病無謬中未及奉書市藥甚煩挂意春暖各希保愛瞻祝瞻祝不宣

又皇祐二年

某啓到此已將百日牽率如初以此久不奉問遞中并人至兩辱書承寒來寢味多福需恩進秩不敢爲賀彼此然也某此區區幸事漸少稍息肩奉告作鞍蓋爲郡人晒其太陋爾相次專人附銀去式樣一依官品可也冗事乃煩長者惶恐惶恐餘具後信冬冷保重

又嘉祐年

某啓累日不相見承在軍器庫中必甚勞神喧和體氣喜佳裕玉冊官便當遣去有暇因出見過看漢碑今日私忌家居恐知

又嘉祐年

某啓昨日見奴子自宅中歸云公期猶患腰疼不審旦夕來尊候如何今日欲於軍器庫中奉問又恐不入爲前日所見偷竊者驚家人欲於宅西添一鋪巡警不知有例否夫人言公期宅前曾剏添一鋪不知申報何處施行略希批示因出閑過少話某再拜公期郎中
二日

又嘉祐年

某啓昨夕承過顧經宿熱未解甚可苦也體中安和數日有人將一

馬來行亦快不見驚蹶不知毛骨如何云要百千為定價直否試令牽呈昨夕忘却閑說及幸告批示草薙丸方專令咨請不罪不罪

又嘉祐治平間

某啓昨日作書未及發忽得來介所惠書頓釋月餘憂想之懷家人尤以為慰也所喜涉暑到官軍幼各安寧仍知頗以郡事為意如此日月亦易銷遣某嚮在夷陵乾德每以民事便為銷日之樂苟能如此殊無謫官之意也某偶因用街市淋洗藥拔動風氣左脚疼痛數日在告不意傳報特煩軫念感愧感愧感暑公外加愛家人亦自有書此不多述不宜

又嘉祐治平間

某啓近併捧三書具審至汝以來動靜甚慰企渴爾比日竊惟公外體履清福貴眷各安和今夏京師大熱疾疫尚未衰息頗聞許洛特感幸喜汝獨無之雖然郡事久不治下車之始不無勞心今必稍簡則漸可樂矣崔庠案已斷邸報必見罪狀不若初聞之可駭然刑名亦重舉主多不免茲亦奈何淄州近不得書應是煩惱某今歲病暑飲冰水多目生黑花多在告舉家幼小幸安最後將書來人戒渠來取書輒私去故於遞中致此暑伏方感慎愛不宜

又嘉祐治平間

某啓多事忽忽等閑不奉狀遂復逾月茲者楊氏子來辱書承秋來公外動履清康貴眷各安粗以為慰郡事以太守養疾甚煩裁處然臨以餘刃莫不為勞苦加之歲事豐成盜訟當漸稀簡也某以私門過夏嚮秋幸且安帖祗是孤危之迹勢漸難安羣口籍籍外亦應聞病目愈甚承惠藥方便當精意服之也連日從篤歸遂臥病兼亦筋力去不得也餘俟家人自有書殘暑更冀以時自愛以副瞻企

又治平二年

某啓近以雨水為患舉家驚奔所幸人物苦無傷損偶居定力公私

擾擾久不附問急足忽來惠書承秋來公外體履清福貴眷上下康安稍以為慰報國無狀致此天災皆由時政多闕上貽聖憂方共引咎遽承見教丁寧切至蒙愛之厚愧感銘藏而已知汝極豐郡政倚舉盜訟遂稀應多閑暇之樂也某忽忽無悰病目如在昏霧中作書甚艱餘不遑及嚮寒保重因風時枉問

又同前

某啓新陽納慶伏承動履多福人至辱書感慰無量京師水後繼以陰雪甫近郊禮次開晴青城宿齋雲日澄和人情舒暢遂成大禮衰朽之質執事志勞前此公私事叢久闕致問自是而後應且休息一晴鎮渴無限浮議天幸天幸餘非筆墨可罄人還僅布一二深寒多愛

又治平三年

某啓自承受勅後日與家人望軒騎來歸何久而絕不聞問春夏之交氣候不常不審體況何似想與貴眷各安某此外如常但自春來病渴淋不止在告多日乞一近郡養疾已一劑糲料且夕當至都門故專走兵迎候其他須面敘病中不悉

又熙寧元年

某啓近法曹廳人回特惠書經節竊惟公外氣體安和某到官忽已兩月幸與諸幼如常但老病益衰民間輿利趨公事目百端昏然並不能省若常時公事則絕簡過客亦稀苟祿偷安負愧而已公期臨郡已多時莫須別有差遣某以病苦難久居歸心有素何日遂如所願相見未涯窮冬感寒惟加攝為祝

又熙寧三年 此帖又載第八卷却云與王學士

某啓急足至辱書喜承算候萬福貴眷各安甚慰企想近入京街校過賴捧手教尋於遞中奉狀必達視聽某到此以弊止未完固少留以葦然欲遂為挂冠之請遠近相知皆相督以察是自乞須且勉赴

到任徐請歸休未遲今遂治行二十一二間上道三四日至蔡別拜狀恐久滯急足忙中作書不悉

又熙寧四年

某啓專人辱書承秋暑體候康適貴眷安寧甚慰其慰某茲者告老得請恩典殊優出於萬幸賴蔡至近雖冒大熱信宿便至遂爲閑人庶事皆如素計惟嘗營舍久而僅了族大費廣生事未成倫理頗亦勞心然措置稍定不復更令人耳則是人間無事人爾知幸知幸承冬中當替歸可遂相見豈勝欣願但恐未間別有美命也某此老幼幸如宜聞相去祇四程必時得書問往還殘暑公外多愛

又同前

某啓迺吏過州辱書承經寒體況清裕貴眷各安其慰勸企某與諸幼幸各如宜自還田舍已百餘日庶可稍成倫理粗免勞心始覺漸有閑中趣味然目足之疾初未少損蓋累年舊苦勢難頓減又迫於年齒愈老而益衰其如坐享厚俸飲食無爲傲倖之愧感激而已承美替有期冬末行舟准類當得一會面但恐未間別有美命就移不然豈勝欣望也深寒未相見間多愛多愛

又熙寧五年

某啓自使舟過郡閑門庶事乏力又值雪寒難於舉動加之病齒妨飲遂不成主禮退居屏迹惟交親難相會每以爲恨幸一相見又事多艱滯如此信乎人事如意難得也然尚得靜話數日爾人至辱手教承宿來算候萬福知詰日遂行嚮和惟多愛

又同前

某啓近辱書喜獲平安到京甚慰傾企乍至都下人事必多仍審已謁告歸絳州何其速也不亦少勞乎即日春暄竊惟氣體清適某自相別後令醫工脫去病齒遂免痛苦然至今尚未敢放口喫酒情悰索然但覺一歲衰如一歲爾集序已了祇候更了鐫刻一併納呈閑

居難得人便附書比此書至京計已西去故令人齋轉附至絳故未及其他惟嚮暖保愛早還以副瞻思

與陳比部力 嘉祐治平間

承有家計賢妹有事竊惟悲痛老年親戚間不免時有煩惱人生常理只如此時暑千萬節哀寬中無由奉慰來日令兒子至寺中也五妹且省煩惱時熱圖安也某再拜作坊殿丞良親廿七日

又嘉祐治平間

某啓承昨日寺中舉掛時熱惟希寬中又知喫食所傷更須慎謹辱惠茶具甚精奇多荷多荷藏之他時爲閑居之用爾今則少暇也五妹喜安極熱未敢相邀歸家好將息某再拜作坊國博之右旬休日

又同前

某辱惠答爾承臟腑已安和其慰惠茶籠所作極精至石屏大是奇物可珍可珍但不得中間一片則不成器千萬爲早取之此物他處未嘗見石屏世故多有未有若此簡易而工妙也稍涼見過閑話某再拜作坊虞部 六娘兩日患臟腑今却安也果子自此更不令喫幸荷幸荷

又同前

人至承惠簡喜酷暑中與貴眷各安數日大熱恰值謝官人事紛紛疲朽遂不克支若非昨夕一雨少解煩毒其將奈何煩勞問念多感多感某再拜 住娘近日頗肯忘口亦漸向安謝念及也

又嘉祐治平間

多日不相見天氣叫暖喜與五妹各安和惠簡問及牙疼多感多感兩日稍可雖浮動醫者云取未得須候根脫取之省力恐知恐知驢肉多荷多荷某再拜作坊虞部良親廿二日 兩日却較喫得此物

又同前

某啓承惠蘇家藥多荷多荷亦嘗用之此但治咽喉爾某所苦者齒

牙熱痛兩日來漸較蓋稍節滋味等物遂可爾過承憂念五妹歸家安否後日祠事畢便歸當得相見人還專此為謝某再拜 只前時兩般藥自好方待久使也

又熙寧元年

某啓久不得信方深企想送劉司理兵士至辱書承公外體候安和四郎以下諸幼各安甚慰但以亡妹忽已周祥舉家見書信至重增悲惱爾某此老幼幸亦如常久欲作書只為累表乞致政未允候見去住後發書奉報爾今又忽有青州之命已兩次辭免欲且乞守毫蓋去賴近便於歸計也未知如何也知吾親每多不安遠宦中有此煩惱誠難為情更宜寬心求安為善也亡妹靈柩今冬先送歸晉最為上策嚮寒千萬保愛不宜某再拜知郡比部良親九月八日

與馬著作嘉祐中

牡丹記荔支譜久欲附呈以候刻跋尾數十字以是稽遲不惟不惟病目固不能書然君謨不肯為他人書而獨為某書此朋友間自是一事不可不記故勉自書取笑取笑

又治平四年

某啓近縣人還奉狀新歲布和善人君子自宜享福惟餘齡晚暮益以病衰相見未涯徒積傾鄣抱區區前書粗布政餘加愛某手啓知縣著作足下十二月十九日 寄惠花燭白蠶多荷多荷蠶豈非自種耶甚佳甚佳泉水未為爾必以冰凍賫致未得也

又熙寧元年

某啓專人辱書并以泉水為賦豈勝珍荷兼審新春履味清安河夫之役尚煩神用然處置得宜公私俱濟則所利博矣亮不以為勞也某再乞壽旦夕必見可否未間難為期約也當續咨報尚寒慎愛不宣某手啓知縣著作足下十九日 李集已領泉味皆佳然大祇東州水甘直須於鹹水地飲之然後為貴爾

又

某啓病悴之餘人事疎廢忽辱惠教方承臨莅齊城經暑公餘清適誨諭稠重開發蒙鄙感愧感愧咫尺未期會話欽渴欽渴某再拜病目多書字不得不罪不罪

又熙寧三年

准西支郡蕭條何敢奉屈然吾儕以道為樂亦應不以閑要為計某至賴且少盤桓俟如蔡即當發削若遂所乞衰拙之幸多矣塗次餘未及詳

又同前

最後一削甚懇意謂可以免并遂蔡何幸如之其餘區區未可卒布但不一會見尤為恨爾保愛保愛

又

某啓官守相望咫尺未親言語惠書動眷兼以嘉篇富麗之作老病無憐得以拭目頓增鄙思也欣感欣感高材尚滯一邑秋冷多愛某奉白著作足下

與顏直講長道

某啓嚮傳例罷學職初聞可疑及辱書始駭果然又承有淮陽之命君子出處不違道而無媿則所居皆樂况淮陽近家之便乎亮不動浩然之氣也交年積雪極寒體况想佳計行李不久當東相去逾遠會見何時千萬加愛

又治平四年

某啓嚮在京師會吾子來人事忽忽不能以從容接高論及至毫聞還直學館出處相失誠可悵仰近惟經寒體况清適某退守僻州甚為優幸而衰病侵凌心志昏耗諒難久竊榮寵也目疾為苦臨紙艱於執筆鄙懷莫罄新歲惟冀加愛

又熙寧元年

某啓董君來辱惠音，竊承履況佳適，感慰曷已。學館賦岑寂，然塵事不到，足以專志經籍，則其所得與其所樂，豈不多哉。某今春日疾愈甚，東州民物可樂處多，但自以衰病少，悵爾董君到必爲言也。

又同前

某啓衰病人事多廢，久不奉書，遞中辱問，承經寒體，況清適，學舍久淹然，以道爲樂，必無倦也。某兩目益昏，難久勉強，乞壽已再旦，夕冀得請西歸，近賴爲便，爾相見未涯，鄙誠莫道。

又熙寧二年

某以病昏廢，學情禮亦多闕，東州一任寄委，勉強常憂曠，敗請壽，冀未退休間，苟安於藏，縮爾久不聞道義之益，與諸賢者迹，日漸疎，但飲渴而已。

又熙寧二年

某啓近辱書承，春寒爲道外無恙，甚慰。企仰，竊憶去秋將離青社，曾一奉書未審，得達否。某衰病如昨，幸得閑暇，偷安，但苦病目不能看書，無以度日。詩義未能精究，第據所得，聊且成書，正恐眼目有妨，不能卒業。蓋前人如此者多也。今果目視昏花，若不草草了之，幾成後悔。所以未敢多示人者，更欲與二三君講評，其可否爾，但未知相見何時也。報筆特艱，莫布萬一，漸暖加齋。

又熙寧四年

某啓近辱書承，涉暑，講道外康，和其慰兼蒙以爲，繹先一有生字，集爲示某。自少時，常得傳誦數篇，每恨不見全編，不意茲時，頓歛，饑渴藏家著錄，以傳後世，榮感榮感，某以經春老病，在告近已復尋在毫之請方治裝，以俟命區區，未遑悉布，惟毒熱加愛。

又同前

某茲者得請歸老，恩出萬幸，惟所苦渴，淋自春發，作經此暑，毒尤甚，蓋以累年之疾，勢不易平，然自此安閑，莫漸調養，爾兩目昏甚，艱於

執卷，顧難銷暑，景又親朋之會，邈不可期，恐遂不聞道義，默默，淪爲庸人，爾殘暑加愛。

又同前

某啓近小史一作史，許充行奉書方在，道人自都來，又辱惠問，豈勝感愧。兼承秋暑爲况，多佳，某自蒙恩許，其告老榮幸，感激之懇，前書已粗布，惟乍還里，聞人事少勞，而舊苦目足之疾，得秋增甚，舊書編彙未經一二君商權，今遂復田畝，會見無期，此爲恨，爾餘粗如宜，幸不多恤，嚮冷惟加愛。

與梁直講

某啓衰病退藏，自宜屏迹，忽辱惠問，雅眷不忘，其爲感者，未易遽陳。兼喜春和氣，體清裕，董直講來自學舍，具道羣居之詳，今其還也，亦備見郡齋之况，燕譚之際，諒可及之，病目愈，然於執筆，惟以時加愛。

與直講都官熙寧元年

某啓自離毫，更闕奉問，春氣尙寒，體履清勝，某昨辭青，不獲勉策，病軀東來，而東州士俗，深厚，歲豐盜訟亦稀，甚爲養拙之幸，而獨苦衰朽，老疾日增，爾歸計遷延，更須年歲也。學舍久掩，匪朝必有美命，未間珍愛，某再拜直講都官足下，正月九日。

與曾學士熙寧二年

某啓近因人，還得附拙，記薦昨書，尺其爲愧，荷可勝道也。兼審秋寒，提按之暇，動履清福，某去蔡咫尺，以病足爲梗，少留於此，忽復踰月，匪晚向官所壽，蔡相望，時得拜問，旅寓中，草率爲謝。

與王補之熙寧二年

某啓近者行舟過界上，特辱惠書，喜承秋冷，氣體安和，以至郡道里差遙，不敢曲邀車騎，又失於上問，全乏迎候，豈勝愧恨，某蒙恩得請郡僻事簡，衰年疲病，苟祿偷安，甚爲幸也。欸見未涯，以時自愛。

與謝景初皇祐元年

某拜啓久不作書蓋由無便即日爲政外奉親萬福某幸且安郡僻少事然漸老懶於爲學惟喜睡爾足下爲道方銳著述必多此急足回無惜爲寄春寒保重

論徐嶠稱弟子帖

春首餘寒惟闌黎動止安穩弟子虛乏繆承榮寄蒙恩獎擢授以洛州一歲三遷自南徂北既近都邑忝竊彌深便即祗命未由預謁瞻望山門但增樓斷戰懼之情慙惶失據願珍重不宣弟子徐嶠和南

某啓承惠佳篇豈勝欽服昨日見顧遂當祗詣會不爲言其如清宴佳賓難復多得若曰春秋爲義當得徐嶠筆法何用於闌黎稱弟子自南朝起此繁事遂成風俗其如近日士人佞佛者少宜於此時力與革此繁事惟在賢者爲之禮曰君子動而爲世法然則舉措其可不慎哉金氏世以財雄南方今乃出佳子弟甚可愛也雄漢瀛霸保州粉紙誰謂不可書請試察試察之下尚隱隱有字漫滅不可讀不知與何人帖也

與脩史學士嘉祐三年

某啓辱教開發蒙滯實陋者之幸也早來寧王憲只爲更名與鄉王嗣直數人同須再出封國其它更有易名者偶不徒封爾就中此卷錯處多然捨此更無也某白

又

某啓前日承惠服屬圖寡陋蒙益何勝感愧欲見當年脩真宗實錄人官職姓名差官及書成年月告與檢示不罪相煩八日某拜白晉叔學士

又

多日不奉見春暖康和中間承見真臘雪散者或有更乞少許某再

拜外題簡呈脩史學士

右三篇見秀峯隱居法帖或云與呂夏卿呂字縉叔嘗同脩唐史晉字疑省文

與人

辱留郡兩日偶客多不及款話惟望慎疾自愛俗子多是非難防勉強接納小疾不足過疑却恐過當服藥致生疾耳二者愚慮恃眷舊敢然悚惕惕公議難遏亨復匪遙他不足道也區區某又拜
右不知與何人

書簡卷第九

書簡卷第十 集一百五十三

與十四第煥字大明 皇祐二年

某啓仕宦多故久不附書冬寒計與諸眷安和某爲太君年老多病未能一歸鄉里親拜墳墓祖墳更望與照管餘託鄭齋郎致意此外保愛不宣某書上十四第秀才閏月六日

又皇祐五年

某罪逆深重不自死滅禍罰上延太君以去年三月十七日有事攀號冤叫五內分崩不孝深蒼天罪逆深蒼天見在潁州持服昨者鄭齋郎自鄉中來得十四第書知與骨肉奉親各安某爲於潁州卜葬所以未及歸得只候服闋南歸相見書言回陂樹倒但勿令人斫伐爲幸諸大小墳域且望更與掛意照管年歲間某歸相見餘不多言今因嗣立人回奉此不具兄押書寄十四第秀才四月七日 堯墨 宣筆表遠信

又同前

十四第秀才前者嗣立人力回會附書及筆墨等想得達邇來暑熱上下各安某今者扶護太君靈柩歸葬先遣嗣立歸凡有可幹事爲嗣立少心力吾弟且與同共勾當相見不遠秋熱好將息不次某書 白十四第七月十五日

又同前

十四第昨自扶護南歸得相見庶事頗相牽率自別計安諸姪亦計無恙某初十日已至家一行如常但憂墳塋惟託勤爲照管諸已面諭更不言也此外教諸姪爲學各令謹慎爲佳時寒好將攝因人煩附書來言墳頭子細是切不具兄某書送十四第

又皇祐六年是歲三月改至和元年

十四第別後計與諸眷各安自離吉水後未曾得來書中間景歸曾有書必達八郎近寄信來回陂門垣及水道並已改了不知是否因

書言及今因寒食遣人力去上墳望與至少卿墳頭一轉爲地遠只附錢去與買香紙酒等燒奠小叔西街小大郎諸骨肉並與伸意前曾附書更不寫書也更附錢五伯文與回陂墳頭張旺取伊一領狀封來仍指揮伊脩蓋牆垣看鎖門戶千萬千萬如有事書中細與言來春暄各好將息不次兄押書送十四第

又至和二年

書寄十四第秀才久別計安樂吳榮來得書回陂墳所必與照管今因寒食令人力蕭及去上墳將錢伍伯省請與買酒食去燒奠回陂墳并與觀當垣牆門戶錢一索與看墳張旺仍指揮伊觀當樹木及取領狀一紙來春暖好將息不具兄押書白十四第秀才二月四日外封題云書附吉州小市三院巷兄翰林學士知制誥史館脩撰兼脩唐書勾當三班院某今其玄孫名鈞龜書請鄉舉尚居北巷仍藏公之真蹟

又嘉祐元年

人力來得書知骨肉並安深慰深慰爲今春使契丹寒食不曾遣得人往墳所吾弟並與到諸墳深感深感感見乞洪州亦只爲先墳也未得聞恐吾弟因出入且爲照管兄押書送十四第四月十五日

與十二姪通理 皇祐四年任象州司理

自南方多事以來日夕憂汝得昨日遞中書知與新婦諸孫等各安守官無事頓解遠想吾此哀苦如常歐陽氏自江南歸明累世蒙朝廷官祿吾今又蒙榮顯致汝等並列官裳當思報效偶此多事如有差使盡心向前不得避事至於臨難死節亦是汝榮事但存心盡公神明亦自祐汝慎不可思避事也昨書中言欲買朱砂來吾不願此物汝於官下宜守廉何得買官下物吾在官所除飲食物外不曾買一物汝可安此爲戒也已寒好將息不具吾書送通理十二郎

又

承示近文祗如此作得也但古詩中時復要一聯對屬尤見工夫并問當因書言去昔選人有陳奇者舉上十六人仁宗見其未嘗歷選調特旨不改官以戒駢驚者初官宜少安之

與十二姪奉職皇祐五年

奉職自赴任不會得書到官下想安樂汝孤寡會受辛苦知道官職難得每事當思愛惜守廉守貧慎行則保此寸祿而已十四郎今却令回此子自縣中來見其衣裝單薄汝只親兄弟兩人今食祿庶事宜均給更且戒約勿令出入無事令學書識取些字從來失教訓是事不會男子如此何以養身今遣人去知府舍人處求太君墓誌若此人將得來即更不言若未得來即汝因事至府中面告言吾令汝請文字且與請取求的便附來春寒好將息不具吾押送十三奉職正月十四日 十四郎此中與綿襖子兩領并裹纏錢三索省只十七八程可到恐伊別亂破錢也

與大寺丞發 治平四年

王澤與書未行間孫宗古來得汝書知與幼小各安甚寬憂想惟真所傳神改了甚善梅都官者必已畫了所是韓孟惟真既言自有本便可畫也須是四燈頭面髻鬚一般大小方好看且傳語催伊早畫了才到毫便去取也押付發 宅圖且勿與看 梅須亦帶接籬不然帶楮冠子但取好畫隱士帽亦好

又同前

吾二十五日離穎二十八日一行平安至毫初二日上事臨離穎時累有書去約汝於遞中發書令先至毫及至此兩日查不得一字何故何故以此不無愛想不知爾來汝與諸幼各安樂否迎孫婆孫入夏來長進否婆孫瘡痍較未不瘦否此吾日夕所念也今專遣急脚子去勾當將來山陵發引排祭一事汝宜用心速與問當早令回報蓋慮後時難辦也其餘事更三兩日黃清去別有書也此外夏熱汝

與諸幼各好將息遞中頻發一書來不必須候專人也五月二十九日至毫後第一書押付發 今令急脚子計會王昌及杜延禧問當進奏官及轉問北京定州進春官前次仁宗山陵發引時北京定州排祭用何儀式其祭前排列明器人物等用多少數目祭食味數贈作錢馬數目並令一一問取今體例來今別具畫一劄子汝速召王昌杜延禧令體問早令此急足回來要作準備如杜延禧短使即令王昌用心勾當不管慢事此急脚子回時買明黃羅一疋附來

又同前

初三日遣急脚子發到毫後第一書為問山陵致祭事書必已到此中兩日內却併得遞中來者兩書知汝與諸幼各安只是聞得婆孫患臟府後甚煩惱蓋孩兒三好兩惡已多時且須用心調理及知道姊子亂喫物道不得但向道候到亳州 你不得迎子何不與青黛丸喫此是汝小時服之得効者前時王澤附去者豆蔻丸亦是汝輩患臟府時得効者可與婆孫喫醫人藥中用黃連甘草者與兒喫此中日夕惟是憂煩二孫過夏不易且喜汝今夏一成安樂然更須慎食生冷吾自蔡河舟中大熱食生冷不節所以到穎渴淋復作糲肉誠不及京師仁從京師來誠不好及食之日久亦不覺酒則絕佳於舊日巨魚鮮美蝦蟹極多皆他郡所無以至水泉蔬菓皆絕好諸物皆賤閑居之樂莫此若也吾此只為一歲計不候宅成只候買得材料便決去躬親蓋造必更精潔也此郡閑僻來去間足以頤養孱瘦及食少心頭氣滿與其餘並如在京時汝可勿憂黃清李德今並遣回餘事當續附書此外夏熱汝曹各好將息稍無人便即於遞中附書千萬六月七日第二書付發押 王昌令買明黃羅一疋白生羅二疋已指揮與也要知要知 七郎得書知在京安樂且與頻照管山陵致祭紙錢贈作馳馬等此中可造惟是祭前排立人物此中做不得須令王昌及早商量定令人家依數做下準備使用不可悞

事也 箱場近日如何般墮并出買如何也向後可賺折欠此事常
宜用心 王昌處米麥絹錢索足未今並在何處收附所云趙祐請
米又是何米後信子細說來出京時舊曆上未請物數令王昌錄一
本來仍開說後來已請見今未請 惟真處書四本總了便與附來
黎直講并彭州劉比部書並早與附達見吾省副再三伸意續有
書也近日羣議如何謝上表到後莫有云云否因的書中略說來不
妨會學士書汝去相看自送與

又同前

十八日王昌等到得汝書并寄來生日信物依數並領知汝與諸幼
各安此中上下並如常汝可勿憂只是聞得迎孫患病甚憂得王昌
來時書中只言稍減次日送黃清急脚回書中並不言增減以此不
能無憂才得婆孫稍安又却大姐患病料得煎迫可知醫人須着照
管且頻與錢但於房錢內取及他事少錢使但於房錢內隨多少取
使不須先來問也只是分明上層記數與隨手印押夏陸二人或請
一月米各與五石昨送香合來依常年例各與酒一瓶侯威亦與一
瓶汝昨寄文字比舊甚進可惜中止已得塗轍可以力進也吾此公
事絕少渴已減但瘦少力及耳聽漸重然未甚妨事皆可勿憂此後
恐人便漸少但過十日無人便發書即於遞中附一信來此外夏熱
各好將息六月二十三日押付發 類酒二瓶且可喫毫酒更不及
團茶新舊二餅 紙請取一月九舅作捉箱場亦須照管 排祭事
已指揮王昌也只是祭文不知用不用速與問如用時覓一箇本子
寄來蓋全不知體面也更是靈駕起時百官皆服初喪恐代拜要孝
衣更早擘畫 韓維龍圖昨因何出辭類求襄何故不得而得汝問
冲卿便知書中報來待發書往汝略要知爾 謝上表到多時因何
不傳若傳人言謂何及今諸事有何議論亦問冲卿便知子細報來
此中如井底 焦祕校所論如何且頻與見彼新自南來必載柴米

來如無時速報來 會學士處國史送來足也未或未足早取令足
報來

又同前

昨晚令此防送兵士將書去今早果是送汝兵士回得汝書知到類
安樂頓解千萬憂想自此三五日因人或縣遞頻附一信來也他事
若漸有次緒亦言來謝大伯花園與漕口莊帳會問嘗未花園目見
如果可買亦緩爲之莊難看勿憑說者切在子細也吾今日已在假
餘事續書言去二月二十三日押 所云州官來則復謁思之未便
如倅甚懸宰須一先謁常禮不可闕也寫書了又思得此助役事方
欲議行人戶驚搖見說類亦如此且夕得安撫文移陝西軍賊撲滅
已多其餘些小潰散更俟續報若一成定撰則過聖節可陳乞爾恐
知恐知二哥一向不得書憂損憂損吾却且視事蓋不請假亦自可
下表在毫時如此也此中吳寺丞久不安似虛勞恐知恐知

又同前

近送配軍人行有書去必到尋而急足回得汝書知在類安樂甚慰
甚慰數日無書去爲等姚都官行然家中上下安樂別無事可勿憂
吾在告已十餘日二哥自京有書來言自家求休退都下別無議論
西事亦不如傳聞別無警急但一二相愛者恐時方惡人求馮懼有
不如意事爾若止如此苦無可卸三五日欲遂入削爾恐知恐知候
入削了去報也章保屋必已下手也如前所說甚好只是郭天錫不
可專委須自掛心章保屋了汝且謀歸要去時却去此中近故也州
官盡會看否且與周旋續思類詩何爲却不刻石問得言來更數事
別有畫一向熱好將息頻附書歸三月五日押付大哥 襄州酒二
瓶不甚好但少勝類爾少喫發風物酒亦少飲千萬科場尙遠
勿甚勞也

又同前

初六日姚都官行令急足隨去附書并酒計昨日已到也前日揚嬰入州得汝書并信物等並足知汝在彼安樂甚慰此中內外並如常吾在假已十七八日表并劄子寫下數日遷延未發今日待發凌晨忽聞邊事緊急又却未敢發然素計踉蹌跌身心躁撓無地自容蓋悔恨者去就之計不能自決若去秋在賴便陳乞安有今日之悔到蔡又直遲疑至今是自家做得今欲歸咎何人然昨爲黎教授云云遂陷惑至此初八日決已發表封遞角次又得黎書切怪在假仍戒勿輕發遂又遲疑信知是一冤家冤家邊事未有涯自家退計查未有也汝書言待蓋草堂并庵此不急之務不是汝去時議定且只脩房錢緊急因何又却及此吾此書到切更勿議蓋也那取人工物料錢物等候草保屋脩了更脩取此房錢緊急處千萬千萬今此書只爲言此一事切聽切聽此外好將息頻附書歸三月十一日押付發謝家園子前書已言去莊帳子不要今却附去致莊之說且已候汝歸細議也有說有說

又同前

劉宗去後防送人回得汝書知汝在彼安樂甚慰只是知二十三日方卓立草家屋子約須一月方了不知汝甚時歸得本望聖節前到家爾兼漸向熱宜且歸也此中上下並安可勿憂吾已出廳五六日本爲西賊驚傳今得諸處關報皆云招捉潰散無多也吾之進退自此以後自決於心如事從容希恩禮悠悠之談相悞至此也劉宗去時書中事甚詳此更不多言文論并詩頗作甚好惟愈熟則工矣青州兩料職租不久來當盡送去脩房錢也恐知云遣郭天錫日望其來此外好將息三月廿五日押送大哥 二哥此中亦久不得書可怪可怪

又同前

前日兩步關兵士防送行有書并掩子必到今日蔡州大風微雨陡

寒思汝數日前盡將綿衣寄歸不知彼中陰晴與此同否憂汝驟寒都無綿衣吾與孀憂心不能安今立走急足送綿衣去急足到立便令回或汝歸時帶來亦得未歸先遣回亦得餘事前書已說也好將息四月九日押送大哥

又同前

近兩步關押賣藥人去有書續又專遣急足送綿衣去有書計皆已到今日郭順來得汝書知在彼安樂甚解憂想此中老幼各安可勿過憂蔡人今歲絕不疾疫但寒暑不常昨初九日大風寒所以專令送綿衣去及問郭順乃云九日賴州大熱方解憂心郭順云脩造有次第汝欲二十頭可歸然不知何故更令郭天錫先歸也累書去問汝歸日皆不言孀甚怪然草業了其餘小者可委劉宗大者必下乎未得也此中亦有事要汝歸面議此書到千萬且歸宅事前書已詳餘好將息四月十二日晚押送大哥 二哥十頭出京三五日到家恐知恐知

又同前

前日吳延平來得汝書知安樂近郭天錫來後便遣兵士作子等去望人到汝便離賴至今已八九日並無息耗不免憂疑蓋賴蔡深夏不免人多不安故也此中內外甚安吾十九日已入却致仕文字若近例一削便允則旦暮間便有命尤要汝歸故更遣急足去如人到尚未起來即速且歸草業已了只是屋下生活可委劉宗其餘前書已言候汝歸商量也所是準備吾歸賴之計今更未暇汝但且歸此中且夕專望路中好將息四月廿六日午時押付發

與二寺丞奕 熙寧三年

自聞汝失意便遣郭順去接汝次日又遞中附書去方憂悶次今日劉玉自京來得汝八日書稍知動靜若至賴見了大哥便先歸則今應已在路得失常事命有遲速汝必會得應不甚勞心却是旅中不

如意漸執難行故未免憂想若此書到尙在潁則且先歸爲孃切要
見汝蓋憂汝煩惱也汝切寬心求安如過亳州只約黎曹二君南臺
相見勿入城千萬千萬此外路中好將息此急脚子如路中逢見便
帶取回一路使喚二月二十六日押付二哥奔

書簡卷第十

附錄卷第一

制詞

初任制詞

前鄉貢進士歐陽某右可特授將仕郎試秘書省校書郎充西京留守推官替仲簡來年二月滿闕候見任官月限滿日即得赴任勅前鄉貢進士邵景先等咸以鄉舉踐于貢闈屬親校於藝文俾各升於科級特假雜書之秩式增結綬之榮郡縣佐僚各分其任宜思勗勵無曠乃官可依前件知制誥陳從易行

再任制詞

前西京留守推官承奉郎試秘書省校書郎歐陽某辭擅菁英性推醇茂早登名於仕版遂從辟於賓筵懋學逾博參籌有裕眷吾樞近嘗以薦輪遠課試之爰來固辨麗之可擬宜預屬書之列仍遷管記之資往服清階善持素履可特授宣德郎試大理評事兼監察御史充鎮南軍節度掌書記館閣校勘李敏行

三任讀夷陵制詞

勅鎮南軍節度掌書記宣德郎試大理評事兼監察御史館閣校勘歐陽某舉以藝文擢參雜校固當宿業以荷育材近者范仲淹樹黨背公鼓譟疑衆自干典憲爰示降懲爾託附有初詆欺罔畏妄形書牘移責諫臣恣陳訕上之言顯露朋姦之迹致其奏述備見狂邪令實嚴科用警偷俗尙軫包荒之念抵從貶秩之文往字吾民毋重前悔可降授守峽州夷陵縣令替劉光裔今年七月成資闕散官如故仍放謝辭兼植行

四任重移光化軍乾德縣令制詞

勅宣德郎守峽州夷陵縣令歐陽某以懿辭決科以敏智從事薦承俊選參校秘文偶弗慎於言階迺自貽於官謹遽沿還牒亦既逾年宜遷通邑之良且寄字人之劇余方甄錄爾尙勉勳可特授守光化

軍乾德縣令替張宗尹來年二月成資闕散官如故仍放謝辭王堯臣行

五任復舊官制詞

降授宣德郎守光化軍乾德縣令歐陽某右可特授試大理評事兼監察御史充鎮南軍節度掌書記權武成軍節度判官廳公事替節度推官趙咸寧來年二月滿闕散官如故仍放謝辭勅前降授崇信軍節度掌書記監鄧州酒稅務朝奉郎試大理評事兼監察御史尹洙等嚮者咸以儒才籍於文館旋坐朋游之累自權降謫之科載軫淹沉特惟甄敘或朝闈復秩分寄於縣章或府幕參謀差冠於賓序往度子命彌慎爾爲可依前件王舉正行

六任兼太子中允制詞

勅鎮南軍節度掌書記宣德郎試大理評事兼監察御史充館閣校勘歐陽某朕意尙儒雅博考辭藝使優游並進以光我太平之業恩亦厚矣爾往參典校屬以事謹會從薦引復敘官榮方思技拭而庸寧限陞遷之次官坊美秩冊府清塗嘉乃雋才尙曁來譽可特授守太子中允依舊館閣校勘散官如故嘉冠卿行

七任加騎都尉制詞

勅夫三靈之交莫威乎大旅四海以職畢奉于嚴裡還御端闈均慶絲寓矧待時髦之地素清儒館之遊宜被徽章以甄英俊宣德郎守太子中允充館閣校勘歐陽某雅材毓秀吉履敦方副妙簡於石渠紬秘文於天祿列於俊數光是珍羣屬此推恩遽增勳級益厲夙秉庸對寵嘉可加騎都尉餘如故吳育行

八任知諫院制詞

宣德郎守太子中允充集賢校理騎都尉歐陽某右可特授守太常丞依舊充集賢校理知諫院事散官勳如故勅國家廣闢言路崇設諫垣擇方嚴之蓋臣登爭諫之清列責任尤重眷懷亦深向非練達

民彝精詳國體利權不能易所守貴勢無以搖其心則安可劾厥清
芬補予闕政以爾朝奉郎侍御史判三司都理分司輕車都尉賜緋
魚袋魚周詢等風猷鯁亮器範冲深並繇博古之文皆擢丞臺之選
清心蒞局交負幹才議事飛章第揚風采會詢朝論亟簡朕心宜進
官聯往參諫列爾其勤乃節行厲於忠誠姑務罄諤之辭敷陳而
亡撓豈宜持庸庸之計畏避以自安勉膺寵光式遲明效可依前件
錄折行

九任知制誥仍供諫職制詞

勅夫出納朕命裁成典誥號令風采布為法度所以炳煥皇業羽儀
近著匪我俊乂曷膺是選宣德郎守太常丞充集賢校理同脩起居
注知諫院事騎都尉賜緋魚袋歐陽某高才敏識照依當世特立不
倚拔乎其倫秉心粹中履道夷坦學探系象之表文窮述作之源而
自抱槩書林簪筆螭陛詞皆體達慮不及私俾之代言必能復古用
進七人之列遂參四禁之嚴豈惟序陞斷自余志其於發揮藻潤之
業坦明深厚之體皆汝素蘊不煩訓詞可特授右正言知制誥依舊
脩起居注知諫院事散官勳賜如故李有行

十任充龍圖閣直學士制詞

宣德郎行右正言知制誥騎都尉賜紫金魚袋歐陽某右可特授依
前行右正言充龍圖閣直學士河北諸州水陸節度都轉運按察使
兼西路營田都大制置屯田本路勸農使替張昞之散官勳賜如故
勅朝奉郎守尚書禮部郎中知制誥知兗州輕車都尉賜紫金魚袋
梁適等四方有事才者當為國家馳驚矣自夏人之不賓于廷而王
師外戍天下共其勞夫侍從近列得無同我此憂者歟爾等並以才
名器略為時英俊凡子所以擢爾清切之禁延閣憲臺蓋備艱虞以
為用也三城西路之津會中山北道之吭喉河朔委輸事任尤重靈
昌河上至于平陽皆方面之要害朝廷所屬意處也各遷近職于蕃

于宣王宰之勤以慰予望可依前件張方平行

十一任進階食邑制詞

勅二年而郊所以答天地尊祖考懷柔于百神福惠于庶邦使生生
之類罔不滋殖則吾左右近著宜乎首被凱澤者矣以爾河北都轉
運按察使龍圖閣直學士宣德郎行右正言騎都尉賜紫金魚袋歐
陽某學有師法言無畏避輟辭翰於西掖董賦興於北道而能計國
用詳邊謀擴吏姦舒民困才識參用措紳所推今嚴裡成百禮具有
司其申講舊典導宣明命峻之階品增之封邑以均禮祉以對勤蓋
以承朝家之休可特授朝散大夫依前行右正言充龍圖閣直學士
河北都轉運按察使特封信都縣開國子食邑五百戶勳賜如故仍
放朝謝錄折行

十二任謫滁州制詞

勅夫賞不遺功罰不阿近有邦之彝典也河北都轉運按察使龍圖
閣直學士朝散大夫行右正言騎都尉信都縣開國子食邑五百戶
賜紫金魚袋歐陽某博學通瞻衆所見稱言事感激朕嘗寵用而乃
不能淑慎以遠罪辜知出非己族而鞠于私門知女有室歸而納之
羣從嚮以訟起屢家之獄語連張氏之貲券既弗明辯無所驗朕以
其久參近侍免致深文止除廷閣之名還序右垣之次仍歸禮節往
布郡條體子寬恩思釋前客可落龍圖閣直學士特授依前行右正
言知制誥散官勳封賜如故仍就差知滁州軍州兼管內勸農使替
趙良規仍放謝辭楊察行

十三任以南郊恩進封伯如食邑制詞

勅朕禮天事神以祈生民之佑尊祖親考以席鴻基之隆爰罄齋明
仰膺顧諟乃眷近侍宜均恩典朝散大夫行右正言知制誥騎都尉
信都縣開國子食邑五百戶賜紫金魚袋歐陽某詞藻敏麗風韻俊
豪參列諫垣蔚有敢言之節褒陞詞禁茂昭華國之文委任素煩安

靜攸處屬修大祀俾洽蕃休特疏勳爵之儀並厚邑封之數中外之
寄待遇無殊深體東求勉敦素履可特授依前行右正言知制誥加
上騎都尉進封開國伯食邑三百戶散官賜如故仍放朝謝補額行

十四任知揚州制詞

勅勤求治道優延近著粵惟詞禁之彥久布外邦之政特推渥洽蓋
示眷懷朝散大夫行右正言知制誥知滁州上騎都尉信都縣開國
伯食邑八百戶賜紫金魚袋歐陽某智慮淹通文藻敏麗善談當世
之務旋登近侍之班向直內閣之嚴實分北道之寄爰司方郡屢易
周星軫予意之良深俾官儀而敘進記言動者良史之筆授之以清
階督淮海者廣陵之區委之以會府仍司雅誥尚遠法垣當欽待遇
之榮益務端莊之節遲聞美績用對寵靈可特授行起居舍人知制
誥知揚州軍州事兼管內堤堰橋道勸農使替張奎散官勳封賜如
故仍放朝謝補額行

十五任轉禮部郎中制詞

勅羣臣有常以善道益吾者今雖在外吾不忘也事任有期既未得
即還左右且進升其官秩亦足表待遇之意焉朝散大夫行起居舍
人知制誥知穎州上騎都尉信都縣開國伯食邑八百戶賜紫金魚
袋歐陽某頃用文詞登朝居諫諍之任屢以謇諤之言陳闕失朝奉
耶尚書工部員外郎直龍圖閣知亳州上騎都尉賜紫金魚袋王洙
往由經藝入侍備顧問之職嘗以博洽之學資見聞緣薄疵並領
外寄嚴助守藩久去承明之直望之懷顯應有本朝之思吾嘉才猷
寔用矜爾爰各遷於品秩俾仍預於教條行將召生毋曰留滯詩曰
心乎愛矣遐不謂矣其務淑慎體茲矜懷修可特授尚書禮部郎中
依前知制誥知穎州散官勳封賜如故仍放朝謝洙可特授尚書刑
部員外郎依前直龍圖閣知許州軍州兼管內堤堰橋道勸農事及
管勾開治溝洫河道事替宋祁散官勳賜如故仍放朝謝李鉤行

十六任復龍圖閣直學士制詞

勅思文先朝游心往籍因層構之建設近職之華所以寵名儒訪治
道我圖俊舊之望時惟鯁亮之姿差進禁聯胥協公議翰林侍讀學
士朝散大夫右諫議大夫知揚州騎都尉岐山縣開國子食邑五百
戶賜紫金魚袋楊察精明博洽端粹正方擢在禁林復興典謨而歸厚
實之憲席處論議而不阿朝散大夫尚書禮部郎中知制誥知穎州
上騎都尉信都縣開國伯食邑八百戶賜紫金魚袋歐陽某識達才
長文高行潔篤於信道不讀非聖之書忠於本朝屢條當世之務並
膺左右之選歷宣內外之勞峻節弗渝公議彌勝用進祕圖之拜且
光舊物之還旌乃名臣數于茂典爾身在外朕心弗忘嘉矧來忠切
懇前事察可特授依前右諫議大夫充翰林侍讀學士兼龍圖閣學
士依舊知揚州散官勳封賜如故仍放朝謝修可特授依前尚書禮
部郎中充龍圖閣直學士依舊知穎州散官勳封賜如故仍放朝謝
胡宿行

十七任明堂置恩轉吏部郎中加輕車都尉制詞

勅朕聞王者尊其考欲以配天緣考之意故推而上於祖朕奉若斯
義乃以季秋之選肇種于大寢禮備法物樂和八音三后上帝亦既
顧饗六服羣辟罔不蒙氣眷言祕近之列方殿股肱之郡天地之福
其可不均以爾樞密直學士朝散大夫右諫議大夫上騎都尉京兆
郡開國侯食邑一千戶賜紫金魚袋田况懷誠秉彝博見疆志以爾
龍圖閣直學士朝散大夫尚書禮部郎中上騎都尉信都縣開國伯
食邑八百戶賜紫金魚袋歐陽某議論據古忠正無私並為當世之
宗精究百家之術施之政事罔干譽而從欲立於朝廷不阿尊而事
貴風動全蜀潤流京師古者因禘以發爵祿所以尊廟而貴命况合
宮之事哉左省瑣闥之嚴中臺宰屬之重懋爾述職推吾新恩往哉
生生承此褒愛况可特授給事中依前充樞密直學士加輕車都尉

散官封賜如故仍放朝謝修可特授尚書吏部郎中依前充龍圖閣直學士加輕車都尉散官封賜如故仍放朝謝呂泰行

十八任服闋除舊官制詞

勅人臣之大節曰忠與孝然處之者或過不及故先王設禮以為之制喪者不呼其門盡為子之志也外除而從政即為臣之道也前龍圖閣直學士朝散大夫尚書吏部郎中輕車都尉信都縣開國伯食邑八百戶賜紫金魚袋歐陽某以文章直亮擢居近侍以才略幹屢更劇任自懼家難歸伏閭里今祥禋甫畢貴然斯來文昌清曹淵圖秘職皆爾舊秩往服新命唯是移孝資忠之義爾其懋哉可特授尚書吏部郎中充龍圖閣學士散官勳封賜如故蔡襄行

十九任修書成遷翰林學士制詞

勅帝王之制坦然明白發號出令一日萬微其代子言必資才哲龍圖閣直學士朝散大夫尚書吏部郎中輕車都尉信都縣開國伯食邑八百戶賜紫金魚袋歐陽某言忠信行篤恭文參典護心固金石頃在諫列以直誠盡規彌縫交闕遷登禁省以深詔大冊振起國風出按朔垂罷守列郡免喪還朝即斬外補朕嘉其難進易退有賢者之節又文學舊老宜居禁中是用延登玉堂典司翰墨僉謀四及咸曰得人當使班馬之風弗獨漢邇三代也可特授依前尚書吏部郎中知制誥充翰林學士散官勳封賜如故王洙行

二十任兼史館修撰制詞

勅古者左史記動右史記言得失形於一朝榮辱見於千載今而墨筆操牘總二職之美者不在吾儒雅之臣乎翰林學士朝散大夫尚書吏部郎中知制誥刊修唐書輕車都尉信都縣開國伯食邑八百戶賜紫金魚袋歐陽某學概道真文得天粹凜然風節足為世範休有議論實惟正體更中外之衆務在夷險而一心益知汝賢擢司內命豈特屬文章以煩爾蓋將咨謀慮以弼予復此兼榮亦非貳事夫

一家之法傳信於方來萬世有辭垂裕於不朽尚賴良直以永休明往服茂恩奚假多訓可特授依前尚書吏部郎中知制誥充史館修撰仍舊翰林學士刊修唐書散官勳封賜如故韓絳行

二十一任進封侯加食邑制詞

勅施厚而報豐維人之常誠至而禮簡事天之宜朕承先烈之丕基祗畏勤紹弗敢荒寧重勞維疚於昭降康四海萬靈莫不底豫念所以報必竭其誠迺即太寢之嚴躬尚質之享欽翼虔共陶匏以薦合法大神示格于祖考明靈降監休應顯孚膺受福釐均自近始翰林學士朝散大夫尚書吏部郎中知制誥充史館修撰判太常寺兼禮儀事輕車都尉信都縣開國伯食邑八百戶賜紫金魚袋歐陽某文字復於古雅正直邁于倫類辨論堅確救時為心在湟不淄湜湜自信倚其瀟瀟故置諸內署藉其才識故付之史筆賴其謀用故試之大計沛有餘地左右咸宜庶事思成相儀克允峻其勳等埤厥賦封尚體予衷以孚邦家于休可特授依前尚書吏部郎中知制誥史館修撰充翰林學士加上輕車都尉進封樂安郡開國侯食邑五百戶散官勳賜如故差遣依舊吳奎行

二十二任轉右諫議大夫制詞

勅禁密之重朝廷所優率從四歲之宮俾進兩官之次示異等於流品表殊恩於邇臣推意之明在予則至顯忠之報惟汝為深授受之間善美良盡翰林學士朝散大夫尚書吏部郎中知制誥充史館修撰判太常寺兼禮儀事上輕車都尉樂安郡開國侯食邑一千三百戶賜紫金魚袋歐陽某風誼醇篤謀猷浚明憂天下之心物議許其懇到徇國家之急朕志知其勇為矧夫統體之文綽有雅健之氣特立于世能同於人姑用歲勞升為諫長未厭搢紳之望徒收翰墨之長亦為顯承當益章大可特授右諫議大夫依前知制誥史館修撰充翰林學士散官勳封賜如故差遣依舊仍放朝謝吳奎行

二十三任知開封府制詞

勅京邑翼翼四方是則商頌之明訓也朕念夫神京奧區大衆所聚俗有五方之異吏有百司之繁貴近豪弁輕犯法禁迫蹙則已苛細寬縱則有放紛尹正之才不止乎決事無留當官有守而已維其明智足以照物厚重足以鎮浮先事以銷其萌芽臨文以破其機械俾夫下國有以依放則庶幾乎古之治矣翰林學士朝散大夫右諫議大夫知制誥充史館修撰充宗正寺修玉牒官刊修唐書判太常寺兼禮儀事兼判尚書禮部兼判秘閣秘書省上輕車都尉樂安郡開國侯食邑一千三百戶賜紫金魚袋歐陽某道德仁義固其深蘊文學政事矧乃兼長老於詞禁之中未愜搢紳之望今詳試以煩劇命允釐于浩穰寵以延閣之拜優以京輔之授爾其念古訓而用又毋曰時異稍艱乎施設也可特授依前右諫議大夫知制誥史館修撰充翰林學士兼龍圖閣學士權知開封府兼畿內勸農使仍舊刊修唐書兼判秘閣秘書省散官勳封賜如故吳奎行

二十四任轉給事中同提舉制詞

勅漢制給事中日上朝謁平尚書奏事近世所職雖異而其親近左右爲最要密非得端士不以付焉以爾翰林學士兼龍圖閣學士朝散大夫右諫議大夫知制誥充史館修撰刊修唐書兼判秘閣秘書省上輕車都尉樂安郡開國侯食邑一千三百戶賜紫金魚袋歐陽某性資純良識用明果直道自奮至忠不回向自禁林尹正京邑擢抑權幸崇獎善良獄訟簡稀幾至無事方此眷賴以圖靖嘉而乃屢形奏封求請便郡朕惟亮正之益不可使遠外而煩劇之任宜有以均勞延登銷闈以備顧問爾其祗服體朕意焉可特授給事中依前知制誥史館修撰充翰林學士兼龍圖閣學士提舉在京諸司庫務仍舊刊修唐書兼判秘閣秘書省散官勳封賜如故范鎮行

二十五任加護軍食實封制詞

勅王道之最感者莫如宗廟宗廟之至重者莫如大裕朕祗率舊禮親執祀事神人以和祖考來格此皆辟公卿士肅雍顯相之效也福祉之流朕安敢專翰林學士兼龍圖閣學士朝散大夫給事中知制誥充史館修撰刊修唐書兼判秘閣秘書省兼充羣牧使上輕車都尉樂安郡開國侯食邑一千三百戶賜紫金魚袋歐陽某清識懿議搢紳之表醇文懿行各世之選此所以增朝廷之光參瑚璉之器詩不云乎左右奉璋髦士攸宜夫熙事休成惠澤廣被則賢者宜先矣敘升書勳之籍真食加田之賦於以均七廟之慶慰萬夫之望其庶幾乎可特授依前給事中知制誥史館修撰充翰林學士兼龍圖閣學士加護軍食實封二百戶散官封賜差遣如故劉敞行

二十六任轉禮部侍郎制詞

勅古之爲國者法後王爲其近於己制度文物可觀故也唐有天下且二百年明君賢臣相與經營扶持之其威德顯功美政善謀固已多矣而史官非其人記述失序使興壞成敗之迹晦而不章朕甚恨之故擇廷臣筆削舊書勒成一家翰林學士兼龍圖閣學士朝散大夫給事中知制誥充史館修撰刊修唐書兼判秘閣秘書省兼充羣牧使護軍樂安郡開國侯食邑一千三百戶食實封二百戶賜紫金魚袋歐陽某端明殿學士兼翰林侍讀學士龍圖閣學士朝請大夫守尚書吏部侍郎充集賢殿修撰知鄭州上柱國常山郡開國公食邑二千三百戶食實封六百戶賜紫金魚袋宋祁創立統紀裁成大體朝散大夫尚書禮部郎中知制誥充集賢殿修撰糾察在京刑獄兼權判尚書工部充宗正寺修玉牒官騎都尉高平縣開國男食邑三百戶賜紫金魚袋范鎮朝奉郎守尚書刑部郎中知制誥同勾當三班院上輕車都尉賜紫金魚袋王疇三司度支判官朝奉郎太常博士充集賢校理編修唐書官上騎都尉賜緋魚袋宋敏求罔羅遺逸厥協異同凡十有七年大典乃立閱富精最度越諸子矣皆雖有

功朕將據古鑒今以立時治為朕得法其勞不可忘也皆遷秩一等布其書天下使學者咸觀焉修可特授守尚書禮部侍郎依前知制誥史館脩撰充翰林學士散官差遣勳封食實封賜如故祁可特授守尚書左丞依前集賢殿修撰充端明殿學士兼翰林侍讀學士龍圖閣學士散官差遣勳封食實封賜如故仍放朝謝鎮可特授尚書吏部郎中依前知制誥充集賢殿修撰散官差遣勳封賜如故疇可特授守尚書右司郎中依前知制誥散官勳賜差遣如故敏求可特授尚書工部員外郎依前集賢校理充三司度支判官散官勳賜如故劉敞行

二十七任兼侍讀學士制詞

勅夫堯舜稱治之至莫重於稽古蓋順考前繹以施有政故其聖功大烈後世無以逾焉朕晞風於既往求理於當世留神典冊用資聰明務延道德之老以為勸講之益進讀左右尤任賢碩翰林學士兼龍圖閣學士朝散大夫守尚書禮部侍郎知制誥充史館修撰判秘閣秘書省兼充羣牧使護軍樂安郡開國侯食邑一千二百戶食實封二百戶賜紫金魚袋歐陽某素履夷直懷負忠亮雄詞奧學高視前哲謙讓精識推為國器方且擢處禁近以襄大猷登預經閣庶幾自輔夫維善言古必驗於今援史傳經爾其無讓可特授依前守尚書禮部侍郎知制誥史館修撰充翰林學士兼侍讀學士散官差遣勳封食實封賜如故王疇行

二十八任拜樞密副使制詞

勅夫詩美吉甫以有文武故賢特之士無施不可朕惟天下之重兵本之寄委於廊廟之臣責其講畫之用則待遇之意付畀之際敢不慎乎苟非材英豈易圖任翰林學士兼侍讀學士朝散大夫守尚書禮部侍郎知制誥充史館修撰護軍樂安郡開國侯食邑一千二百戶食實封二百戶賜紫金魚袋歐陽某學通古今之宜性符履道之

直議論明正懷負高爽久居禁近之從屢更中外之事選所踐試悉著聲實今樞筦之地籌勝是經擢貳大猷適竚休績惟公忠可以成務惟寅亮可以就功往其慎哉無廢朕命可特授依前守尚書禮部侍郎充樞密副使加食邑五百戶食實封二百戶散官勳賜如故王疇行

二十九任參知政事制詞

勅夫萬務之理命令之出謀讓於堂上風行於天下使來者可觀而與言無譏者非吾二三相輔乎本兵之所號為樞機布政之方實繫原抵更踐大府參持衡柄向匪全德疇副毗倚樞密副使朝散大夫守尚書禮部侍郎護軍樂安郡開國侯食邑一千八百戶食實封四百戶賜紫金魚袋歐陽某識鑒明遠才猷通劭議論貫前儒之學文章擅獨步之名徧歷清華迭居中外自居重任已試異能忠言不私直道無屈是用易地且俾遷官讓節逾高誠心可諒若夫禮樂未具制度未立基業未固賦用未節昔人有作後世奚艱俾我有宋之治如三代威時者亦惟吾相輔而已力行王道今也其時無謂吾不能行其同心以濟勉之哉可特授依前守尚書禮部侍郎參知政事進封開國公加食邑五百戶食實封二百戶散官勳賜如故張懷行

三十任加柱國制詞

勅合宮大饗明靈居敬敬告神釐蒙所勞矣一二相事之老宜均乃休朝散大夫守尚書禮部侍郎參知政事護軍樂安郡開國公食邑二千三百戶食實封六百戶賜紫金魚袋歐陽某文章瑞時議辨華國進陪大政時欲倚平會資闊儀贊成孝志徹俎而命宜先近班功號崇階副之勳等往膺異數是惟典常可特授正奉大夫依前尚書禮部侍郎參知政事加柱國仍賜推忠佐理功臣封食實封賜如故張懷行

三十一任進階金紫加食邑制詞

勅朕受命先帝付畀大寶始初踐阼居士民之上與二三臣輔講求天下之理恩意之及宜先老成推忠佐理功臣正奉大夫尙書禮部侍郎參知政事柱國樂安郡開國公食邑二千三百戶食實封六百戶賜紫金魚袋歐陽某氣清神深學足以飾經治推忠佐理功臣正奉大夫尙書禮部侍郎參知政事柱國天水郡開國公食邑二千五百戶食實封六百戶賜紫金魚袋趙概性和識遠言足以濟成謀皆杞梓良材廟堂重器久弼亮於大本方倚平於至公尙書地官機政所出往踐厥服思所以致君堯舜之任無俾專美於前人朕所望焉脩可特授金紫光祿大夫行尙書戶部侍郎依前參知政事加食邑五百戶食實封二百戶仍賜推忠協謀佐理功臣勳封如故概可特授金紫光祿大夫行尙書戶部侍郎依前參知政事加食邑五百戶食實封二百戶仍賜推忠協謀佐理功臣勳封如故張懷行

三十二任轉吏部侍郎制詞

勅先皇帝遺大投艱于朕躬俾守宗廟暮年于茲惟是一二政事之臣輔朕不逮以底于治嘉乃勞止是用曠庸推忠協謀佐理功臣金紫光祿大夫行尙書戶部侍郎參知政事柱國樂安郡開國公食邑二千八百戶食實封八百戶歐陽某精識昭於古今高明起於日月文之以禮樂濟之以公忠頃在先朝預聞大政逮予嗣訓之始緊爾定策之先屬哀毀之過差感疾疹之甚戾緊禱備至氣體訖康苟非與在之良曷見仰成之懿宜峻天臺之秩庸昭國棟之隆褒德懋功於是乎在爾其夙夜茂勉左右弼諧用我王家爾亦有無窮之聞豈不休哉可特授行尙書吏部侍郎依前參知政事功臣散官勳封食實封如故宋敏求行

三十三任進階光祿加上柱國制詞

勅朕薦邕清廟懷祖宗之威神升烟紫壇致天地之明察靈心顧享熙事休成臨端闈而肆霽中區奉徽號而推算父母眷言賦政之重

宜首均釐之隆推忠協謀佐理功臣金紫光祿大夫行尙書吏部侍郎參知政事柱國樂安郡開國公食邑二千八百戶食實封八百戶歐陽某道合誠明學窮元本被遇仁考歎休禁塗以經緯之文施於典冊以直亮之節顯於巖廊薦更四近之聯深暢萬機之會邦種肇詣朝務益繁備公衮之華章承祭除之盛禮乃順神福以甄爾勞進文散之崇階衍采田之多邑仍推勳級庸異弼臣顧褒嘉而載優當圖報而毋廢我有明命其懋承之可特授光祿大夫依前行尙書吏部侍郎參知政事加上柱國食邑五百戶功臣封食實封如故宋敏求行

三十四任轉尙書左丞制詞

勅在昔成王有審訓以屬於大卿惟我先帝命冲人實託於四輔眷言莅阼之始宜首懋官之恩推忠協謀佐理功臣光祿大夫行尙書吏部侍郎參知政事上柱國樂安郡開國公食邑三千二百戶食實封八百戶歐陽某鯁亮發中誠明瀑外文蔚典謨之體學通治亂之原弼翼兩朝變熙萬務肆朕纂服載深仰成爰升肅於臺機示曠庸於台佐衍封增幹賜號進階祗式舊章併推異數噫荷祖宗之垂佑既嗣無疆之休賴臣鄰而協恭方求小莖之助益宣賢業茂對寵徽可特授特進行尙書左丞依前參知政事加食邑五百戶食實封二百戶仍賜推忠協謀同德佐理功臣勳封如故宋敏求行

三十五任公因言求去除觀文殿知亳州制詞

勅朕惟國之大臣毗倚於內猶同體之股肱凌雲之羽翼莫之重也至於辭隆自潔則必徇其雅志而尊顯之蓋所以均其勞逸也方朕守文之初而一德耆老以病自乞章數上矣其可留以佐我而崇進退之節乎推忠協謀同德佐理功臣特進行尙書左丞參知政事上柱國樂安郡開國公食邑二千八百戶食實封一千戶歐陽某學通本元邦之謙直名重當世士林師法絲樞密之柄任贊廊廟之全謨

兩受仍凡之託益堅事上之誠踐更三朝出入八載需頭瀝懇守麾是斯雖詔批不可而其請愈確是用進職書殿增秩秋官授符子价藩分憂於閩寄褒渥備矣書不云乎雖爾身在外乃心罔不在王室勉勤所報詎假予訓可特授行刑部尚書充觀文殿學士知亳州軍州事兼管內河堤勸農使及管勾閉治溝洫河道事仍改賜推誠保德崇仁珣戴功臣散官勳封食實封如故呂夏卿行

三十六任轉兵部尚書知青州制詞

勅朕惟北海九州之古郡而東人之都也近世兩府出入為均逸之地非耆德峻望不為倚毗推誠保德崇仁珣戴功臣觀文殿學士特進刑部尚書知亳州上柱國樂安郡開國公食邑二千八百戶食實封一千戶歐陽某以文學自進以器能自任早領樞務旋參大政奏封屢上誠請益堅俾守藩方已逾歲律乃進夏官之秩往臨海岱之區一道兵農惠綏是賴肅予近服無假訓言可特授行兵部尚書依前充觀文殿學士知青州軍州事兼管內勸農使充京東東路安撫使功臣散官勳封食實封如故仍放謝辭李太臨行

三十七任郊祀恩加食邑制詞

勅朕嗣位之初祗見上帝祖考九州四海莫不來祭惟二三元老雖爾身在外乃心罔不在王室推恩行爵必先及之推誠保德崇仁珣戴功臣觀文殿學士特進行兵部尚書上柱國樂安郡開國公食邑三千八百戶食實封一千戶歐陽某文章宿望左右三朝艱難之時實賴其力進退之節不累於位股肱近鎮玉帛勳王茲朕所以推神休而疏朝寵也乃眷舊德奚煩訓辭可特授依前行兵部尚書充觀文殿學士加食邑五百戶食實封二百戶功臣散官勳封如故吳充行

三十八任除檢校太保判河東路制詞

勅國家規制裔邊並建帥領惟河汾之一道益撫狃之二垂爰咨

路之賢往付并門之筦仍遷近府用壯輿藩具官某道德文章為時矜式謀猷忠亮預政累朝自獲解於臺司已再更於郡寄委遠時柄爾雖樂於燕安尊任賢能朕豈忘於鑒寐眷言大鹵方擇守臣俾從表海之邦就改近胡之鎮班通四貴所以褒寵於舊勳節制諸戎所以倚成於外閩惟爾同寅之德體予注意之隆亟即新州毋辭遠略可特授檢校太保宣徽南院使判太原府河東路經略安撫使兼并代澤潞麟府嵐石路兵馬都總管功臣散官勳封如故蘇頌行

三十九任改知蔡州致仕制詞

勅朕惟左右輔弼之臣以道德自任者其去就進退莫不有義與命而朝廷優寵遇待不使之蚤告老以去者非獨朕之恩典為然亦先王之禮意故也以爾推誠保德崇仁珣戴功臣觀文殿學士特進行兵部尚書上柱國樂安郡開國公食邑四千三百戶食實封一千二百戶歐陽某文章學問遠足以知先王德義謀猷近足以宜當世陟降祕近踐揚茲多嚮絲樞庭參決大政乃能熙天之命克勤王家均休外藩年德方茂而乃安於義命以禮請去至於勳懇雖朕之暱遇有加亦終不能易爾志重以先帝顧命輔朕眇躬勳勞問望願可以無報稱哉是用度越常典以榮爾歸俾進東宮之師仍兼祕殿之職尚惟率身善俗以助成王德惟良顯哉可特授太子少師依前充觀文殿學士致仕功臣散官勳封食實封如故仍放朝謝張堯行

公薨贈太子太師制詞

勅大臣還官告老以高秩算爵歸第固朝廷所禮異也矧嘗參決大政有兩朝定策援立之勳德甚感而弗居年未至而辭位遽茲長逝宜厚追褒故推誠保德崇仁珣戴功臣觀文殿學士特進太子少師致仕上柱國樂安郡開國公食邑四千三百戶食實封一千二百戶歐陽某以文章革浮靡之風以道德鎮流競之俗挺節強毅而不撓當官明辯而莫奪三世寵榮一德端亮朕方將圖任舊老曷咨肅義

而雅志冲逸必期退休未閱數歲章踰十上在大義難盡其力茲動請所以不違謂其脫去人間之累當享期頤之壽天遽殲奪會麻愆遺覽奏之日爲之不能臨朝儲坊六傳一作博師惟長首舉以爲贈用紆子哀尙其有知享此嘉命可特贈太子太師王益柔行

以子恩贈太尉制詞

勅朕齊明以祀得敬于神維顯及幽並受多祉奉議郎輕車都尉賜緋魚袋歐陽發父皇任觀文殿學士太子少師致仕贈太子太師某以高文典策冠絕譽髦以重德令名進參機要踐更事任奮發猷爲諒直公忠簡於朕志逝日逾遠賢聲不忘垂裕後昆序朝通籍丁時慶賚敷錫有加尙其營魂膺此明命可特贈太尉王安禮行

追封克國公制詞

勅宗祀之澤充塞穹壤國之故老褒敘有章朝請郎充祕閣校理輕車都尉賜緋魚袋歐陽某通直郎飛騎尉辯故父任觀文殿學士太子少師致仕贈太子太師追封康國公某各世之才出應期運明於輔弼事業而以風節始終餘慶嗣人追命成國直惟不沒尙克享茲可特贈太師追封克國公中書舍人盛陶行

證詰

省司準勅定證據本家發到故推誠保德崇仁珂戴功臣觀文殿學士特進太子少師致仕上柱國樂安郡開國公食邑四千二百戶食實封一千二百戶贈太子太師歐陽某行狀依例牒太常禮院擬證今准回牒連到議狀證曰文忠
宣德郎守太常丞充集賢校理同知太常禮院李清臣

公歸老於家以疾不起將葬行狀上尙書省移太常請證太常合議曰公維聖宋賢臣一世學者之所師法明於道德見於文章究覽六經羣史諸子百氏馳騁貫穿述作千百萬言以傳先王之遺意其文卓然自成一家比司馬遷揚雄韓愈無所不及而有過之

者方天下溺於末習爲章句聲律之時聞公之風一變爲古文咸知趨尙根本使朝廷文明不媿于三代漢唐者太師之功於教化治道爲最多如太師真可謂文矣博士李清臣得其議則閱讀行狀考按證法曰唐韓愈李翱權德輿孫逖本朝楊億皆證文太師固宜以文證吏持衆議曰太常官長官長有曰文則信然不復易也然公平生好諫諍當加獻爲文獻無已則如忠爲文忠衆相視曰其如何則又合言曰忠亦太師之大節太師嘗參天下政事進言仁宗乞早下詔立皇子使有明名定分以安人心及英宗繼體今上即皇帝位兩預定策珂戴有安社稷功和裕內外周旋兩宮間迄于英宗之視政蓋太師天性正直心誠洞達明白無所欺隱不肯曲意順俗以自求便安好論列是非分別賢不肖不避人之怨誹狙嫉忘身履危以爲朝廷立事按證法道德博聞曰文廉方公正曰忠今如忠以麗文宜爲當衆以狀授清臣爲證議清臣曰不改於文而傳之以忠議者之盡也清臣其敢不從遂證文忠謹

議
朝奉郎守尙書工部郎中充祕閣校理直舍人院兼同脩起居注權判吏部流內銓騎都尉賜緋魚袋錢藻宣德郎守尙書刑部員外郎充集賢校理兼同脩起居注權同判吏部流內銓騎都尉賜緋魚袋寶卞伏準太常禮院證議如前

天下文物繁盛之極學士大夫競夫鏤刻組繪日益靡靡以汨沒於倬詭魁殊之說而不復知淳古之爲正也於是時天下曰是太師曰非天下以爲難太師以爲陋學士大夫磨牙淬爪爭相出力以致之危害太師不之顧曰我道堯舜也我言孔子孟軻也而天下不我從將焉往然卒由太師而一歸於醇正故仁義之言其華嘩然獨輝灼乎一代之威遠出二京之上嗚呼偉哉大丈夫東帶立夫人之朝所以大過人者大節立焉不齷齪小節以求曲全可

也佛衆慮彊君以難是爲大節不徇世俗之論而先識以制未形是爲大節太師當嘉祐之間協議建儲正名挈天下之疑而伸之萬世因而若維太山而安不危斯之謂大節諡法道德博聞曰文廉方公正曰忠生平論讓文章務明堯舜孔孟之教於已壞之後可謂道德博聞矣排左右持祿取容之慮特建萬世無窮之策而自不以爲功可謂廉方公正矣太常易名曰文忠庶乎天下有以知公議之不能泯也

省司準例於都亭驛集合省官同參詳皆協令式請有司準例施行謹詳定訖遂具狀中書門下取裁奉宰臣判準申謹具狀奏聞伏候勅旨

附錄卷第一

祭文 行狀

祭文

韓忠獻王琦

維熙寧五年歲次壬子某月某日具官某謹遣三班奉職隨行指使李珪以清酌庶羞之奠致祭於少師永叔之靈惟公之生粹稟一作稟粹元精偶聖而出逢辰以亨歷事三朝翼登太平大名既遂大功既成年未及老一作耆深慮滿盈連章得謝穎第來寧神當昇以福祿天宜錫之壽齡胡不慙遺遽爾摧傾此冥理莫得致詰而天下爲之失聲嗚呼哀哉公之文章獨步當世子長退之偉瞻閱肆曠無擬倫逮公始繼自唐之衰文弱無氣降及五代愈極頹敝唯公振之坐還醇粹復古之功在時莫二公雖云亡其傳益貴譬如天衢森布列緯海內瞻仰日高而偉公之諫諍務傾大忠在慶曆初職司帝聰顏有必犯闕無不縫正路斯闢茲萌輒攻氣勁志忤行孤少同於穆仁廟誠推至公孰好孰惡是焉則從善得盡納治隨以隆人畏清議知時不容各礪名節恬乎處躬二十年間由公變風公之功業其大可記屢殿藩垣所至懷惠嘗尹京邑沛有餘地早踐西掖晚當內制凡厥代言典謨之懿凡厥出令風雷其勢三代炳焉公辭無媿樞樞猷爲台衡弼貳撫御四夷兵戈不試整齊百度官師咸治服勞一心定策二帝中外以安神人胥慰不校讒言懇求去位公之進退遠邁前賢合既不苟高惟戒顛身雖公輔志則林泉七十致政乃先五年上惜其去公祈益堅卒遂其請始終克全嗚呼哀哉余早接公道同氣類出處雖殊趣向何異既忝宰司日親高誼可否明白襟懷坦易事貴窮理言無飾僞或不知公因懼謗忌青蠅好點白璧奚累嗚呼哀哉自公還事心慕神馳徒憑翰墨莫挹姿儀公嘗顧我惠以新詩雖亟酬答柰苦衰疲欲復爲問動已踰時忽承訃音且駭且悲哀誠孰訴肝膽幾壅公之逝矣世鮮余知不如從公焉用生爲遐脩薄薦奠

公一卮魂兮有靈其來監茲尙饗

同前

王荆文公安石

夫事有人力之可致猶不可期况乎天理之冥冥又安可得而推惟公生有聞於當時死有傳於後世苟能如此足矣而亦又何悲如公器質之深厚智識之高遠而輔以學術之精微故形於文章見於議論豪健俊偉性巧瑰琦其積於中者浩如江河之停蓄其發於外者爛如日星之光輝其清音幽韻婁如飄風急雨之驟至其雄辭閎辯快如輕車駿馬之奔馳世之學者無問乎識與不識而讀其文則其人可知嗚呼自公仕宦四十年上下往返感世路之嶇崎雖屯運困躓竄斥流離而終不可掩者以其有公議之是非既壓復起遂顯於世果敢之氣剛正之節至晚而不衰方仁宗皇帝臨朝之末年顧念後事謂如公者可寄以社稷之安危及夫發謀決策從容指顧立定大計謂千載而一時功名成就不居而去其出處進退又庶乎英魄靈氣不隨異物腐散而長在乎箕山之側與潁水之湄然天下之無賢不肖且猶爲涕泣而獻敬而况朝士大夫昔游從又予心之所嚮慕而瞻依嗚呼感衰興廢之理自古如此而臨風想望不能忘情者念公之不可復見而其誰與歸

同前

曾舍人鞏

維公學爲儒宗材不世出文章逸發醇深炳蔚體備韓馬思兼莊屈垂光簡編焯焯若星日絕去刀尺渾然天質辭窮卷盡含意未卒讀者心醒開蒙愈疾當代一人顧無儔匹諫垣抗議氣震回通鼓行無前跋扈非恤世僞難勝孤堅竟室紫微玉堂獨當大筆二典三謨生明藏室頓挫彌厲誠純志壹斟酌損益論思得失輕體慮萌一作明沃心造膝帝曰汝賢引登輔弼公在廟堂尊明道術清淨簡易仁民愛物斂不煩苛令無迫猝棲置木索里安戶逸橫斂兵革天清地謐日進昌言從容密勿開建國本情忠力悉卯未之歲龍駕騰歛再拯大

艱垂紳秉笏乾坤正位上下有秩功被社稷等夷召畢公在廟堂總持紀律一用公直兩忘猜昵不挾朋比不虞訕嫉獨立不回其剛介
乞愛養人材獎成誘掖甄拔寒素振興滯屈以爲己任無有廢弗維
公平生愷悌忠實內外洞徹初終若一年始六十懇辭冕黻連章累
歲乃俞所乞放意丘樊脫遺羈帶沉漫圖史左右琴瑟志氣浩然不
陋蓬華意謂百齡重休累吉還幹鼎軸贊微計密云胡傾殂愆遺則
弗聞訃失聲皆淚橫溢懸冥不敏早蒙振被言絲公誨行絲公率戴
德不酬懷情獨鬱西望轎車莫持詞綽維公學學德義讓述爲後世
法終天不沒託辭敏心曷能髣髴嗚呼哀哉尙饗

同前

范蜀忠文公鎮

惟公平生諒直骨鯁文章在世燁燁炳炳老釋之闢賁育之猛拒塞
邪說尊崇元聖天下四方學子甫定邇來此風勃焉而感如醒復醉
如愈再病粵醒與病有幸不幸排不幸不正嗟余空疎敢處
季孟公計之來淚下屢綆聞公卜宅許洛之境余居在焉儻得同井
異時往來或接光影薄酒一樽非首數盃遠不得前寄此耿耿

同前

蘇文忠公賦通判杭州日

嗚呼哀哉公之生於世六十有六年民有父母國有書龜斯文有傳
學者有師君子有所恃而不恐小有所畏而不爲譬如大川喬嶽
雖不見其運動而功利之及於物者蓋不可以數計而周知今公之
沒也赤子無所仰庇朝廷無所稽疑斯文化爲異端學者至於用夷
君子以爲無與爲善而小人沛然自以爲得時譬如深山大澤龍亡
而虎逝則變怪雜出舞鱗鱗而號狐狸昔公之未用也天下以爲病
而其既用也則又以爲遲及其釋位而去也莫不冀其復用至其請
老而歸也莫不悵然失望而猶庶幾於萬一者幸公之未衰執謂公
無復有意於斯世也奄一去而莫子追豈厭世溷濁潔身而逝乎將
民之無祿而天莫之遺昔我先君懷寶遁世非公則莫能致而不肖

無狀因緣出入受教於門下者十有六年於茲聞公之喪義當匍匐
往救而懷祿不去愧古人以忸怩緘詞千里以寓一哀而已矣蓋上
以爲天下慟而下以哭吾私嗚呼哀哉

同前知頴州日

維元祐六年歲次辛未九月丙戌朔從表姪具位蘇軾謹以清酌肴
果之奠昭告于故太師充國文忠公安康郡夫人之靈嗚呼軾自鄙
亂以學爲嬉童子何知謂公我師晝誦其文夜夢見之十有五年乃
克見公公爲拊掌歡笑改容此我輩人餘子莫羣我老將休付子斯
文再拜稽首過矣公言雖知其過不敢不勉契闊艱難見公汝陰多
士方譁而我獨南公曰子來實獲我心我所謂文必與道俱見利而
遷則非我徒又拜稽首有死無易公雖云亡言如皎日元祐之初起
自南遷叔季在朝如見公顏入拜夫人羅列諸孫敢以中子請婚叔
氏夫人曰然師友之義凡二十年再升公堂深衣廟門垂涕失聲白
髮蒼顏復見賴人賴人思公曰此門生雖無以報不辱其門清穎洋
洋東注于淮我懷先生豈有涯哉尙饗

同前

蘇文定公轍

維年月日具官蘇轍謹以清酌庶羞之奠致祭於故觀文少師贈太
師九丈之靈嗚呼嘉祐之初公在翰林維時先君處於西南世所莫
知隱居之深作書號公曰是知子公應嗟然我明子心吾於天下交
遊如林有如斯文見所未會先君來東實始識公傾蓋之歡故舊莫
隆遍出所爲歎息改容歷告在位莫此蔽蒙報國以士古人之忠公
不妄言其重鼎鍾厥聲四馳靡然向風嗟維此時文律頹毀奇邪譎
恠不可告止剗刺珠貝綴飾耳鼻調和椒薑毒病唇齒嚼荆棘斥
棄羹載號茲古文不自愧恥公爲宗伯思復正始狂詞恠論見者投
棄踴躍元昆與轍皆來皆試於庭羽翼病摧有鑒在上無所事媒馳
詞數千適當公懷擢之衆中羣疑相廝公恬不驚衆感徐開滔滔狂

瀾中道而回匪公之明化爲詠俳公德日隆歷階二府轍方在艱撫視逾素納銘宅德遠存故終喪而還公以勞去公年未衰屢告遲暮自毫徂青迄蔡而許來歸汝陰嘯傲環堵轍官在陳於穎則鄰拜公門下笑言歡欣杯酒相屬圖史紛紜辯論不衰志氣益振有如斯人而止斯耶書來告衰情懷酸辛報不及至凶訃遽臻嗚呼公之於文雲漢之光昭回洞達無有采章學者所仰以克嚮方知者不感味者不狂公之在朝以直自遂排斥姦回罔有劇易後來相承敢隕故事雖庸無知亦或勉勵此風之行逾三十年朝廷算嚴庶士多賢伊誰云從公導其先自公之歸忽焉變遷又誰使然要歸諸天天生物各維其時朝暘薰風春夏是宜凍雨急雪匪寒不施時去不返雖彊莫違矧惟斯人而不有時時既往矣公亦逝矣老成云亡邦國瘁矣無爲爲善善者廢矣時實使然我誰慰矣哭公於堂維其悲矣嗚呼尙靈

行狀

吳正憲公充

故推誠保德崇仁埶戴功臣觀文殿學士特進太子少師致仕上柱國樂安郡開國公食邑四千二百戶食實封一千二百戶贈太子太師歐陽公行狀

曾祖彬累贈金紫光祿大夫太師中書令

祖偃累贈金紫光祿大夫太師中書令兼尙書令

父觀皇任泰州軍事判官累贈金紫光祿大夫太師中書令兼尙書令追封鄭國公

本黃吉州廬陵年六十六

歐陽氏之先本出於夏禹之苗裔少康封其庶子于會稽以奉禹祀歷夏商周以世相傳至越王勾踐傳五世至王無疆爲楚威王所滅諸子皆受封于楚而無疆之子蹄封於歐餘山之陽是爲歐陽亭侯子孫遂以爲氏後稍北徙青之千乘冀之渤海千乘之顯者曰生字

和伯以經爲漢博士所謂歐陽尙書者是也渤海之顯者曰建字堅石所謂渤海赫赫歐陽堅石者是也詢通父子顯于唐自通三世生琮爲吉州刺史又八世生萬爲吉州安福令後世或居安福或居廬陵安福之六世孫卽公會祖也生八男曰儀者中南唐進士第父母皆在鄉里榮之命其鄉曰儒林里曰歐桂坊曰具慶會祖仕南唐爲武昌令檢校右散騎常侍兼御史大夫性孝友鄉里稱之累贈金紫光祿大夫太師中書令曾祖妣劉氏追封楚國太夫人皇祖少以文學稱獻所爲文南唐召試爲南京街院判官累贈金紫光祿大夫太師中書令兼尙書令祖妣李氏累封吳國太夫人皇考少孤力學咸平中進士及第天性仁孝居官決獄主於平恕哀矜終於泰州軍事判官累贈金紫光祿大夫太師中書令兼尙書令追封鄭國公妣鄭氏累封韓國太夫人皇考之損館舍公纔四歲太夫人守節自誓而教公以讀書爲文及公成人太夫人自力衣食不以家事累公使專務爲學及見公之身名偕顯而夫人壽考康寧爲善之報豈虛也哉公諱脩字永叔天聖中進士甲科補西京留守推官用王文康公薦召試遷鎮南軍節度掌書記館閣校勘以書責諫官不論事諫官以聞謫峽州夷陵縣令徙光化軍乾德令改武成軍節度判官范文正公經略陝西辟掌書記辭不就俄遷太子中允館閣校勘方脩禮書命權同知太常禮院辭不受預修崇文總目成改集賢校理遂知太常禮院請補外通判滑州召以爲太常丞知陳院賜緋衣銀魚未幾同脩起居注閱月拜右正言知制誥賜三品服出使河東還改龍圖閣直學士河北都轉運按察使左遷知制誥知滁州改起居舍人知揚州徙知潁州復龍圖閣直學士知應天府兼南京留守司歷尙書禮部吏部郎中丁韓國太夫人憂服除判吏部流內銓入翰林爲學士加史館脩撰勾當三班院請郡改侍讀學士知蔡州留不行判大常寺兼禮儀事權知禮部貢舉拜右諫議大夫判尙書禮部又判祕

閣祕書省加侍讀辭不受同僚玉牒兼龍圖閣學士權知開封府以給事中罷同提舉在京諸司庫務改羣牧使唐書成拜禮部侍郎兼侍讀學士嘉祐五年以本官爲樞密副使明年閏八月參知政事兼譯經潤文歷戶部吏部二侍郎皆參大政進拜左丞出爲觀文殿學士刑部尚書知亳州熙寧初遷兵部尚書知青州京東東路安撫使除檢校太保宣徽南院使判太原府河東路經略安撫監牧使兼并代澤潞麟府嵐石路兵馬都總管三辭不受徙知蔡州熙寧四年六月以觀文殿學士太子少師致仕階特進勳上柱國食邑四千二百戶食實封一千二百戶明年閏七月二十三日薨于汝陰之私第天子聞之震悼爲之一日不視垂拱朝贈太子太師卹孤治賻皆從加等公爲人剛正質直闊廓未嘗屑屑於事見義敢爲患害在前直往不顧用是數至困逐及復振起終不改其操真豪傑之士哉居三朝數十年間以文章道德爲一世學者宗師接人待物誠信樂易不爲表襮諸生進者與之抗聲極談簡直明辨至於貴顯終始如一見者莫不愛服而天資高遠常人自不能與之合公待之一也有所稱薦姑取其一善後或毀公於朝遇其人或其家厄且因必力振之曰吾行己不以喜怒私也於經術務究大本其所發明簡易明白其論詩曰察其美刺知其善惡以爲勸戒所謂聖人之志者本也因其失傳而妄自爲之說者經師之末也今天學者得其本而通其末斯善矣得其本而不通其末闕其所疑可也不求異於諸儒嘗曰先儒於經不能無失而所得固多矣盡其說而理有不通然後得以論正予非好爲異論也其於詩易多所發明爲詩本義所改正百餘篇其餘則曰毛鄭之說是矣復何云乎公幼孤家貧無資太夫人以荻畫地教以字書稍長從閭里借書讀或手抄之抄未畢而成誦公之舉進士學者方爲時文號四六公就視之曰此不足爲然切於養勉爲之而人亦不能及故屢試有司皆第一名聲籍甚及景祐中與尹師魯偕

爲古學已而有詔戒天下學者爲文使近古學者盡爲古文獨公古文既行世以爲模範自兩漢後五六百年有韓愈之後又數百年而公繼出李翱皇甫湜柳宗元之徒不足多也蓋公之文備衆體變化開闢因物命意各極其工其得意處雖退之未能過筆札精勁自成一家當世士大夫有得數十字皆藏以爲寶生平以獎進人材爲己任一時賢士大夫雖潛晦不爲人知者必延譽慰薦極其力而後已後進之士一爲公所稱遂爲聞人篤於朋友尹師魯梅聖俞孫明復皆貧甚既卒公力爲經紀其家表其孤於朝悉錄以官他嘗所與厚者未嘗遺也公既書責諫官以申范文正坐謫夷陵而尹洙余靖亦連貶蔡君謨爲四賢詩世傳之及范公之使陝西辟公偕往朝廷從之時天下久無事一旦西陲用兵士之負材能者皆欲因時有所施設而范公望臨一時好賢下士故士之樂從者衆公獨歎曰吾初論范公事豈以爲己利哉同其退不同其進可也卒辭焉慶曆初公方登朝數論天下事爲策以揣敵情及指陳利害甚衆既而有詔百官上封事公又上疏言三弊五事力陳當時之所宜憂者仁宗增諫官員首預其選是時西師久京東西盜賊羣起中外騷然仁宗既進退大臣欲遂改更諸事公感激恩遇知無不言時范文正公杜正獻公今司徒韓公司空富公皆輔政公屢請召對咨訪責以所爲既而仁宗降手詔出六條虛心以待後遂下詔勸農桑興學校多所更革小人不悅一時知名士見謂爲黨人矣公爲朋黨議以進見集中溫成后方有寵公言前世女寵之戒請加裁損燕王薨議者以國用不足請待豐年以葬公言士大夫家有所待而侈不如及時薄葬況天子叔邪且非所以示四方也卒從公議澧州進柿木成文有太平之道字公言今四海騷然未見太平之象又太平之道其意可推自古帝王致之皆有道德道則太平失道則危亂今見其失未見其得願陛下憂勤萬務漸期致理其瑞木請不宣示于外淮南轉運使呂紹

寧到任進羨餘錢十萬貫公請拒而不受以防剝陝西用兵之後河東困弊芻糧不足言者請廢麟州或請移於合河津或請廢五塞公既使河外爲四議以較麟州利害請移兵就食於瀕河清塞堡緩急不失應援而平時可省餽運麟州得不廢又建言忻代苛嵐火山四州軍沿邊有禁地棄而不耕人戶私糴北界斛斗入中以爲邊儲今若耕之每年可得數百萬石以實邊朝廷從之大爲河東之利自西事後河東賦斂重而民貧道路嗟怨公奏罷數十事以寬民力公自河東還會保州兵叛遂出爲河北都轉運使保州卒既降大將李昭亮私納婦女通判馮博文等竊愾之公發其姦下博文獄昭亮惶恐立出之自保州之變河北兵驕小不如意卽謀爲亂人情務在姑息公乞假將帥權事從鎮重以銷未萌河北卒無事保塞之脅從者二千餘人分隸河北宣撫使恐復生變欲以便宜悉誅之公權知成德軍遇之於內黃宣撫使夜半屏人以告公公曰禍莫大於殺降昨保州叛卒朝廷許以不死今戮之矣此曹本以脅從故得脫奈何一旦殺無辜二千人且非朝旨若諸郡不肯從緩之必生變是趣其爲亂也且某至鎮州必不從命遂止公在河北奏置御河催綱司通糧運邊州賴之置都作院於磁相二州以繕戎器仁宗遇公厚嘗論及當世人材目公曰如歐陽某者豈易得哉常欲大用而未果及使河北陞辭曰上面諭曰無爲久居計有事言來公對以諫官得風聞今在外使事有指越職罪也况不得其實邪上曰有事第以聞勿以中外爲辭及黨論大起公極言請加明辨勢益危初公妹適張龜正龜正無子有女非歐出也妹既嫠無所歸以孤女偕來及笄以嫁宗人晟張氏後以他事下獄小人欲并中公乃搆張氏貲產事窮治久之卒無有猶賤滌上公丁太夫人憂既免喪入見仁宗惻然怪公髮白問在外幾年今年幾何恩意甚至命判流內銓小人恐公且復用僞爲公奏乞汰內臣疏傳之中外宦者人人切齒內官楊承德陰以言

中公出知同州而外議不平論救者衆上尋開悟故馮瑒之命卒不行公在侍從八年多所闡益初河決澶淵陳恭公爲相欲塞商胡關橫壠故道公言功大恐不可成徒勞人未幾陳罷去新宰相復用李仲昌議欲開六塔河公言六塔不能吞伏且復決再爭之不得既而果然濱隸德博數千里大被其害仲昌等得罪流貶至和初公奉使契丹契丹使其貴臣惕隱及北宰相蕭知足等來押宴曰非常例也以公名重故爾其爲外夷所畏如此公在翰林仁宗一日乘閒見御閣春帖子讀而愛之左右曰學士歐陽某之辭也乃悉取宮中帖閣之見其篇篇有意歎曰舉筆不忘規諫真侍從之臣也每學士院進文字必曰何人當直至公之筆必詳覽之每加歎賞嘉祐初公知貢舉時舉者爲文以新奇相尙文體大壞公深革其弊前以怪僻在高格遂變而復正者公之力也公之尹京承包孝肅公之後包以威嚴爲治公一切循理不事風采或以爲言公曰人材性各有短長今捨所長彊其所短以徇俗求譽我不能也至寵貴犯禁令又求苟免者必實於法雖詔命有所不從且請加本罪二等至今行之由公奏請也公在樞密與今侍中曾魯公悉力振舉紀綱革去宿弊考天下兵數及三路屯戍多少地理遠近更爲圖籍之法邊防久闕屯守者大加蒐補數月之間機務浸理嘗因嘉祐水災凡再上疏請選立皇子以固天下根本言甚激切及在政府遂與諸公協定大議而先帝力辭宗正之命公進曰宗室不領職事忽有此除天下皆知陛下將儲以爲嗣不若遂正其名且判宗正寺諸勅付閣門得以不受今立爲皇子止滄一詔書事定矣仁宗以爲然遂下詔及先帝初年未親政事慈壽垂簾公與諸公往來兩宮鎮撫內外而危言密議忠力爲多至先帝親御萬機內外肅然每諸公聚議事有未可公未嘗不力諍臺諫官至政事堂論事往往面折其短英宗嘗面稱公曰性直不避

衆怨嘗稱故相王沂公之言曰恩欲歸己怨使誰當且曰貧賤常思
 高貴富貴必履危機此古人之所歎也惟不思而得既得而不思失
 之者其庶幾乎及彭思永蔣之奇等以飛語汙公公杜門請付有司
 治之上連詔詰問所從來二人辭窮悉逐之上親遣中貴人手詔慰
 安公遂稱疾力解機務自嘉祐以後朝廷務惜名器而進人之路稍
 狹公屢建言館閣育材之地材既難得而又難知則當博採而多畜
 之時冀一得於其間則傑然出爲名臣矣餘亦不失爲佳士也遂詔
 二府各舉五人其後中選者往往在清近朝廷稍收其用矣京師百
 司所行兵民官吏財用之類皆無總數中書一有行移則下有司纂
 集公因暇日盡以中書所當知者集爲總目上有所問宰相以總目
 爲對公以祀假家居上遣中貴人就中書閣取而閱之連典劇郡以
 鎮靜爲本不求赫赫名舉大體而已民便安之滁揚二州生爲之立
 祠公在亳年甫六十表致仕者六不從至蔡而請益堅卒不能奪公
 志其勇退如此公平生於物少所好獨好收畜古文圖書集三代以
 來金石銘刻爲一千卷以校正史傳百家訛繆之說爲多晚年自號
 六一居士曰吾集古錄一千卷藏書一萬卷有琴一張有碁一局而
 常置酒一壺吾老於其間是爲六一自爲傳以刻石嘗被詔撰唐書
 紀十卷志五十卷表十五卷又自撰五代史七十四卷其爲紀一用
 春秋法於唐禮樂志明前世禮樂之本出於一而後世禮樂爲空名
 五行志不書事應盡破漢儒留異附會之說其論著類此五代史辭
 約而事備及正前史之失爲多公之薨上命學士爲詔求書於其家
 方繕寫進御嘗著易童子問三卷詩本義十四卷居士集五十卷歸
 榮集一卷外制集二卷內制集八卷奏議集十八卷四六集七卷集
 古錄跋尾十卷雜著述十九卷諸子集以爲家書總目八卷其遺逸
 不錄者尙數百篇別爲編集而未及成公初娶胥氏翰林學士贈吏
 部侍郎偃之女繼室楊氏集賢院學士諫議大夫大雅之女今夫人

薛氏資政殿學士戶部侍郎贈大尉簡肅公奎之女累封仁壽郡夫
 人男八人女三人長女師蚤卒次發光祿寺丞次女蚤卒次奕光祿
 寺丞次棊大理評事次某蚤卒次辯光祿寺丞次三男皆蚤卒次女
 封樂壽縣君蚤卒孫男四人曰慈曰憲曰恕曰勣皆以公恩試祕書
 省校書郎孫女六人皆幼將以熙寧八年九月二十六日葬公於開
 封府新鄭縣旌賢鄉之原謹狀

熙寧六年七月某日樞密副使正奉大夫行右諫議大夫上柱國
 賜紫金魚袋吳充狀

附錄卷第二

Blank lines for the continuation of the appendix.

附錄卷第三

墓誌銘 神道碑

墓誌銘并序

宋故推誠保德崇仁珣戴功臣觀文殿學士特進太子少師致仕上柱國樂安郡開國公食邑四千二百戶食實封一千二百戶贈太子太師文忠歐陽公墓誌銘并序

淮南節度觀察處置等使開府儀同三司守司徒檢校太師兼侍中判相州軍州事上柱國魏國公韓琦撰

朝散大夫右諫議大夫充集賢院學士史館修撰權判尚書都省判秘閣提舉醴泉觀公事上護軍賜紫金魚袋宋敏求書

翰林侍讀學士龍圖閣學士朝散大夫尚書吏部郎中知河陽軍州事兼管內勸農使上護軍賜紫金魚袋韓維題蓋

熙寧五年閏七月二十三日觀文殿學士太子少師致仕歐陽公薨於汝陰之私第年六十六上聞震恒不視朝贈公太子太師太常諡曰文忠卹後加贈不與常比天下正人節士知公之亡罔不駭然相弔痛失依仰其孤寺丞君乃以樞密副使吳公所次功緒并致治命以墓銘爲請竊惟當世能文之士比比出公門下不屬於彼而獨以

見屬豈公素諒其愚謂能直筆足信後世邪此其敢辭公諱修字永叔唐太子率更令詢四世孫琮嘗爲吉州刺史又八世生萬復爲吉之安福令子孫因家焉曾祖諱柳安福六世孫也孝悌之行鄉里師服任南唐爲武昌令累贈太師中書令曾祖妣劉氏追封楚國太夫人祖諱僊彊學善屬文南唐時獻所爲文十餘萬言召試補南京街院判官累贈太師中書令兼尚書令祖妣李氏追封吳國太夫人父諱觀性至孝力學咸平中擢進士第當官明而尚恕每決重辟尤加審慎苟理有可脫必平反之終泰州軍事判官累贈太師中書令兼尚書令追封鄭國公公自四歲而孤母韓國太夫人鄭氏守志不奪

家雖貧力營贍教公爲學公亦天資警絕經目一覽則能誦記爲文下筆出人意表及冠聲聞卓然天聖中舉進士凡兩試國子監一試禮部皆爲第一逮崇政試雖中甲科人猶以不魁多士爲恨初補西京留守推官洛尹文康王公知非常才歸薦于朝景祐初召試遷鎮南軍節度掌書記館閣校勘時文正范公權尹京邑以直道自進每因奏事必陳時政得失大忤宰相意斥守饒州諫官不敢言公貽書責之坐貶峽州夷陵令余安道尹師魯繼上書直范公復被逐當時天下以四賢稱之俄徙光化軍乾德令改武成軍節度判官康定初召還復館閣校勘遷太子中允預脩崇文總目成改集賢校理同知太常禮院請外補通判滑州事慶曆初仁宗御天下久周悉時弊重以西師未解思欲整齊衆治以完太平登進輔臣必取人望收用端軀以增諫員公首被其選擢太常丞知諫院事賜五品服未幾同脩起居注公素凜忠義遭時遇主自任言責無所顧忌橫身正路風節凜然時正獻杜公文正范公今司空富公皆在一府公每勸上乘間延見推誠諮訪上後開天章閣屢召諸公詢究治本長策大議稍稍施用一作行紀綱日舉僥倖頓絕小人始大不喜相與巧詆必期破壞公常極力左右之俄拜右正言知制誥賜三品服大臣有建白請廢麟州徙其治於合河津以省餽餉首命公親往相視使回奏曰麟州天險正據要害不可廢第減其兵駐並河諸堡有警呼集數舍之近爾兵既減糧自不乏詔從之又奏忻代州背嵐火山軍並邊民田始潘美爲帥患虜時入寇徙其民以空之遂號禁地自景德通好我雖循舊而虜人盜耕不已請募民計頃出了爲兵量入租粟以耕之歲可得數百萬斛邊用給矣不然他日必盡爲虜人所有時并帥取謀不自己沮撓久之其後卒如公請凡賦斂過重民所不堪者又奏罷十數事疲俗以安四年秋壯虜威兵雲州聲言西討朝廷疑其有謀議選文武材臣密爲經畫二府請輟公以往即以公爲龍圖閣直

學士河北都轉運使公至則區別一作分官吏使能者盡力均徒財用而邊計有餘奏廣御河漕運造鐵楸船以絕侵盜置都作院於磁相州一道兵械悉仰給焉方條列北方利病欲大爲措置會文正范公與同時入輔者終爲讒說所勝相繼罷去一時進用者皆指之爲黨公復慨然上書極言論救執政與其朋益怒協力擠之初公有妹適張龜正龜正亡無子妹挈前室所生孤女以歸及笄公爲選宗人晟以嫁之會張氏以失行繫獄言者乘此欲并中公復摺張氏貨產事遂與詔獄窮治上爲命內臣監劾卒辨其誣猶降授知制誥知滁州事執政意不快撫勘官與監劾內臣細故皆被責八年春就改起居舍人知揚州事踰年徙知潁州事皇祐初復龍圖閣直學士二年秋移知應天府兼南京留守司事歷尚書禮部吏部郎中丁太夫人憂去職服除入見上怪公鬚髮盡白惻然存撫恩意甚厚命判吏部流內銓素忌公者恐將大用乃僞爲公疏請汰內臣以激衆怒有選人胡宗堯者當引對改官前任本州嘗以官舟假人已而經赦去官止得循資公與判南曹官對日取旨上欣然令改官宦者楊永德密奏曰宗堯翰林學士宿之子有司援救之私也遂出公知同州事物論一作議不平上亟開悟留公刊修唐書俄入翰林爲學士史館修撰勾當三班院至和二年夏請郡改侍讀學士知蔡州事留不行復除翰林學士判太常寺兼禮儀事遷右諫議大夫嘉祐三年夏兼龍圖閣學士權知開封府事前尹孝肅包公一作包孝肅公以威嚴得名都下震恐而公動必循理不求赫赫之譽或以少風采爲言公曰人材性各有短長吾之長止於此惡可勉其所短以徇人邪既而京師亦治四年春請罷府事改給事中充羣牧使唐書成拜禮部侍郎俄兼翰林侍讀學士五年冬以本官爲樞密副使明年秋參知政事英宗登極遷戶部侍郎治平初特轉吏部侍郎今上嗣位改尚書左丞公自處二府益思報稱毅然守正不爲富貴易節凡大謀議大利

害與同官論辨或在上前必區別一作別是否未嘗少有回屈文武之士陳請百端公常委曲開論曰某事可行某事不可行用是人多怨誹至於臺諫官論事有不中理者往往正色折之其徒尤切齒日欲求疵合攻公自視無他不恤也始一無此字英廟一作宗踐祚按祖宗舊典皇族尊屬之亡者皆贈官改封濮安懿王英宗所生父也中書以本朝未有故事請付有司詳處一作審其當上謙恭慎重命過仁廟大祥下禮院與兩制官同議如期詔下衆乃言王當稱伯改封大國中書以所生父稱伯疑無經據方再下三省議上遽令權罷俾有司徐求典故事久不行臺官挾憤不已遂持此斥公爲主議上章歷詆必請議定及以朝廷未嘗議及之事肆爲誣說欲惑衆聽又相率納告身以示必去上數敦諭知不可留各以本官補外後來者以風憲不勝爲取窺伺愈急今上即位初御史蔣之奇者乃造無根之言一作語欲以汗公中丞彭思永乘虛助之公退伏私居力請公辨上照其誣罔連詔詰問二人者辭窮皆坐貶公遂懇辭柄任上不得已除公觀文殿學士刑部尚書知亳州事熙寧元年秋遷兵部尚書知青州事充京東東路安撫使時散書苗錢法初行衆議皆言不便朝廷既申告誠公猶請除去二分之意令民止納本錢明不取利又請先罷提舉管勾官然後可以責州縣不得抑配不報三年夏除檢校太保宣徽南院使判大原府河東路經略安撫使公累上章辭丐易蔡州大略以久疾昏耗不任重寄復曰時多喜新奇而臣思守拙衆方興功利而臣欲循常執政知終不附己俄詔聽以舊官知蔡州事公在毫已六上章請致政上眷惜之不允至蔡踰年復申前請志益堅確上察其誠命優改官致仕年方六十有五天下士大夫聞公勇退無不驚歎云近古所無也公天資剛勁見義敢爲襟懷洞然無有城府常以平心爲難故未嘗挾私以爲喜怒獎進人物樂善不倦一長之得力爲稱薦故賞識之下率爲聞人惟視姦邪嫉若仇敵

直前奮擊不問權貴後雖陰被讒逐公以道自處怡怡如也平生篤於朋友如尹師魯梅聖俞孫明復既卒其家貧甚公力經營之使皆得以自給又表其孤于朝悉錄以官自唐室之衰文體隨而不振陵夷至于五代氣益卑弱國初柳公仲塗一時大儒以古道興起之學者卒不從景祐初公與尹師魯專以古文相尚而公得之自然非學所至超然獨驚衆莫能及譬夫天地之妙造化萬物動者植者無細與大不見痕迹自極其一作於工於是文風一變時人競爲模範自漢司馬遷沒幾千年而唐韓愈出愈之後又數百年而公始繼之氣韻相薄莫較高下何其感哉所治經術務究大本嘗以先儒於經所得多矣而不能無失惟其說或有未通公始爲辨正不過求聖人之意以立異論嘉祐初權知貢舉時舉者務爲險怪之語號大學體公一切黜去取其平澹造理者即預奏各初雖怨讟紛紜而文格終以復古者公之力也筆翰遒勁自成一家人有得其片幅必寶藏之歷典大郡以鎮靜爲本明不至一作及察寬不至縱吏民受賜既去追思不已滁楊二州皆立生祠嘗奉使契丹其主必遣貴臣押宴出於常例且謂公曰以公名重故爾其爲外夷致服如此至和中陳恭公爲相欲塞商胡決河使歸橫攏故道公言橫攏地已高仰功大不可爲未幾陳罷去有李仲昌者乃議道商胡水入六塔河公復上言六塔素隘狹不能容大河若爲之必潰決害愈甚時執政是仲昌議又不用公言後六塔隄果壞不成自博以下數州皆被水患衆服公先識在侍從八年竭誠補益前後上言百餘事仁宗嘗曰如歐陽某者何處得來故其言多所聽納因嘉祐水災凡兩上疏請選立皇子以固根本及在政府遂與諸公參定大議方英廟過自謙退未即承命事久未決衆悉危之公協心開助忠力爲多及即位之初感病未能聽覽一作斷慈壽預政事出權宜公與諸公往來兩宮鎮安內外卒復明辟人無間言嘗被詔撰唐書紀十卷志五十卷表十五卷又自

撰五代史七十四卷易童子問三卷詩本義十四卷居士集五十卷歸榮集一卷外制集三卷內制集八卷奏議十八卷四六集七卷集古錄跋尾十卷雜著十九卷公於物無他玩好獨好收古文圖書集三代以來金石銘刻爲一千卷用以校正傳記說繆人得不疑晚年自號六一居士曰吾集古錄一千卷藏書一萬卷有琴一張有棊一局常置酒一壺吾老於其間是爲六一因自爲傳以志之初娶胥氏翰林學士偃之女繼室楊氏集賢院學士諫議大夫大雅之女公夫人薛氏資政殿學士戶部侍郎簡肅公奎之女累封仁壽郡夫人男八人長發次奕光祿寺丞次棊大理評事次辨光祿寺丞餘皆早卒女三人皆早卒孫男四人曰遜曰憲曰愨曰愨皆以公恩試祕書省校書郎孫女六人皆幼熙寧八年九月庚申朔二十六日乙酉諸孤奉公之喪葬于開封府新鄭縣旌賢鄉之原銘曰

噫公之節 其剛烈烈 弼違斥茲 義不可折 噫公之文 天資不羣 光輝古今 左右典墳 直道而行 屢以讒蹶 卒寤而知 惟帝之哲 升贊機務 方隅以寧 參議宰政 社稷是經 成此王功 大忠以効 德高毀及 退不吾較 公之來歸 既安且怡 宜報以壽 戾也胡爲 公文在人 公跡在史 茲惟不窮 五千萬祀

神道碑

蘇文定公

熙寧五年秋七月觀文殿學士太子少師致仕一無此十一字歐陽文忠公薨於汝陰八年秋九月諸子奉公之喪葬於新鄭旌賢鄉自葬至崇寧五年凡三十有二年矣公子棊以墓隧之碑來請轍方以罪廢於家且病不能執筆辭不獲命乃曰病苟不死當如君志既而病已謹按歐陽氏自唐率更令之四世孫琮爲吉州刺史後世因家於吉會祖諱郴南唐武昌令贈太師中書令妣劉氏追封楚國太夫人祖諱偃南唐南京街院判官贈太師中書令兼尚書令妣李氏追

封吳國太夫人考諱觀泰州軍事推官贈太師中書令兼尚書令封鄭國公妣鄭氏追封韓國太夫人公諱修字永叔生四歲而孤韓國守節自誓親教公讀書家貧至以荻畫地學書公敏悟過人所覽輒能誦比成人將舉進士爲一時偶儷之文已絕出倫輩翰林學士胥公時在漢陽見而奇之曰子必有名於世館之門下公從之京師兩試國子監一試禮部皆第一人遂中甲科補西京留守推官始從尹師魯遊爲古文議論當世事迭相師友與梅聖俞遊爲歌詩相倡和遂以文章名冠天下留守王文康公知其賢還朝薦之景祐初召試遷鎮南軍節度掌書記館閣校勘時范文正公知開封府每進見輒論時政得失宰相惡之斥守饒州公見諫官高若訥若訥諷范公以爲當黜公爲書賈之坐貶峽州夷陵令明年移乾德令復爲武成軍節度判官康定初范公起爲陝西經略招討安撫使辟公掌書記公笑曰吾論范公豈以爲利哉同其退不同其進可也辭不就召還復校勘遷太子中允與修崇文總目慶曆初遷集賢校理同知太常禮院求補外通判滑州事時西師未解契丹初復舊約京東西盜賊蜂起國用不給仁宗知朝臣不任事始登進范公及杜正獻公富文忠公韓忠獻公分列二府增諫員取敢言士公首被選以太常丞知諫院賜五品服未幾修起居注公每勸上延見諸公訪以政事上再出手詔使諸公條天下事又開天章閣召對賜坐給紙筆使具疏於前諸公惶恐退而上時所宜先者十數事於是有詔勸農桑興學校革磨勘任子等弊中外悚然而小人不便相與騰口誇之公知其必爲害常爲上分別邪正勸力行諸公之言初范公之貶饒州公與尹師魯余安道皆以直范公見逐目之黨人自是朋黨之論起久而益熾公乃爲朋黨論以進言君子以同道爲朋小人以同利爲朋人君但當退小人之僞朋用君子之真朋其言懇惻詳盡其後諸公卒以黨議不得久留於朝公性疾惡論事無所回避小人視之如仇讎而

公愈奮厲不顧上獨深知其忠故右正言知制誥賜三品服仍知諫院故事知制誥必試上知公之文有旨不試與近世楊文公陳文惠公比逮公三人而已嘗因奏事論及人物上目公曰如歐陽脩何處得來蓋欲大用而未果也四年大臣有言河東芻糧不足請廢麟州徙治合河津或請廢其五寨命公往視利害公曰麟州天險不可廢也麟州廢則五寨不可守五寨不守則府州遂爲孤壘今五寨存故虜在二三百里外若五寨廢則夾河皆虜巢穴河內州縣皆不安居矣不若分其兵駐並河清塞堡緩急不失應副而平時可省轉輸由是麟州得不廢又言忻代州崑嵐火山軍並邊民田廢不得耕號爲禁地吾雖不耕而虜常盜耕之若募民計口出了爲兵量入租粟以耕歲可得數百萬斛不然他日且盡爲虜有議下大原帥臣以爲不便持之久之乃從凡河東賦斂過重民所不堪奏罷者十數事自河東還會保州兵亂又以公爲龍圖閣直學士河北都轉運使陞辭上面諭無爲久留計有所欲言言之公曰諫官得風聞言事外官越職而言罪也上曰第以聞勿以中外爲意河北諸軍怯亂驕恣小不如意輒脅持州郡公奏乞優假將帥以鎮壓士心軍中乃定初保州亂兵皆招以不死既而悉誅之脅從二千人亦分隸諸州富公爲宣撫使恐後生變與公相遇於內黃夜半屏人謀欲使諸州同日誅之公曰禍莫大於殺已降况脅從乎既非朝命州郡有一不從爲變不細富公悟乃止公奏置御河催綱司以督糧餉邊州賴之又置磁州都作院以繕一路戎器河北方小治而二府諸公相繼以黨議罷去公慨然上書論之用事者益怒會公之外甥女張嫁公族人晟以失行繫獄言事者乘此欲并中公遂起詔獄窮治張貴產上使中官監劫之卒辨其誣猶降官知滁州事居二年徙揚州又徙潁州遷禮部郎中復龍圖閣直學士留守南京遷吏部郎中丁韓國太夫人憂至和初服除入見鬢髮盡白上怪之問勞惻然恩意甚厚命判吏部流

內銓小人畏公且大用僞爲公奏乞澄汰宦官宦官聞之果怒會選人胡宗堯當改官坐嘗以官舟假人經赦去官法當循資公引對取旨上特令改官宦官有密奏者曰宗堯翰林學士宿之子有司宥之私也遂出公知同州言者多謂公無罪上悟留刊修唐書俄入翰林爲學士自滁州之貶至是十二年矣上臨御既久遍閱天下士羣臣未有以大稱上意上思富公韓公之賢復召寘二府時慶曆舊人惟二公與公三人皆在朝廷士大夫知上有致治之意翕然相慶公以學士判三班院二年奉使契丹契丹使其貴臣宗愿宗熙蕭知足蕭孝友四人押宴曰此非常例以卿名重故爾嘉祐初判太常寺二年權知貢舉是時進士爲文以詭異相高文體大壞公患之所取率以詞義近古爲貴凡以嶮怪知名者黜去殆盡勝出怨謗紛然久之乃服然文章自是變而復古二年加龍圖閣學士權知開封府事所代包孝肅公以威嚴御下各震都邑公簡易循理不求赫赫之譽有以包公之政勵公者公曰凡人材性不一用其所長事無不舉強其所短勢必不逮吾亦任吾所長耳聞者稱善四年求罷遷給事中充羣牧使唐書成拜禮部侍郎俄兼翰林侍讀學士公在翰林凡八年知無不言所言多聽河決商胡買魏公留守北京欲開橫壠故道回河使東有李仲昌者欲道商胡入六塔河詔兩省臺諫集議公故奉使河北知河決根本以爲河水重濁理無不淤淤從下起下流既淤上流必決水性避高決必趨下以近事驗之決河非不能力塞故道非不能力復但勢不能久必決於上流耳橫壠功大難成雖成必有復決之患六塔狹小不能容受大河以全河注之瀕隸德博必被其害不若因水所趨增治隄防疏其下流浚之入海則河無決溢散漫之憂數十年之利也陳恭公當國主橫壠之議恭公罷去而宰相復以仲昌之言爲然行之而敗河北被害者凡數千里狄武襄公爲樞密使奮自軍伍多戰功軍中服其威名上不豫諸軍訛言籍籍公言武

臣掌機密而得軍情不惟於國不便鮮不以爲身害請出之外藩以保其終始遂罷知陳州公嘗因水災上言陛下臨御三十餘年而儲宮未建此久闕之典也漢文帝卽位羣臣請立太子羣臣不自疑而敢請文帝亦不疑其臣有二心後唐明宗尤惡人言太子事然漢文帝立太子之後享國長久爲漢太宗明宗儲嗣不早定而秦王以窺覲陷于大禍後唐遂亂陛下何疑而久不定乎公言事不擇劇易類如此五年以本官爲樞密副使明年爲參知政事公在兵府與魯魯公考天下兵數及三路屯戍多少地里遠近更爲圖籍凡邊防久闕屯戍者必加蒐補其在政府凡兵民官吏財利之要中書所當知者集爲總目遇事不復求之有司時富公久以母憂去位公與韓公同心輔政每議事心所未可必力爭韓公亦開懷不疑故嘉祐之政世多以爲得時東宮猶未定臣僚間有言者然皆不克行最後諫官司馬光知江州呂誨言之中書將因一作因將二疏以請幸上有可意相與力贊之一日奏事垂拱讀二疏未及有言上曰朕有意久矣顧未得其人耳宗室中誰可者韓公對曰宗室不接外人臣等無由知之抑此事非臣下所敢議當出自聖斷上乃稱英宗舊名曰宮中嘗養此人今二十許歲矣惟此人可耳是日君臣定議於殿上將退公奏曰此事至大臣等未敢卽行陛下今夕更思之來日取旨明日請之崇政上曰決無疑矣諸公皆曰事當有漸容臣等議所除官時英宗方居濮王憂遂議起復除泰州防禦使判宗正寺來日復對上大喜諸公奏曰此事既行不可中止乞陛下斷之於心內批付臣等行之可也上曰此豈可使婦人知之中書行之足矣時六年十月也及命下英宗力辭上聽候服除七年二月英宗既免喪稱疾不出至七月韓公議曰宗正之命既出外人皆知必爲皇子矣今不若遂正其名使知愈退而愈進示朝廷不可回之意衆稱善乃以其累表上之上曰今當如何韓公未對公進曰宗室舊不領職事今有此命天下

皆知陛下意矣然誥勅付閣門得以免受今若以爲皇子詔書一出而事定矣上以爲然遂下詔及宮車晏駕皇子嗣位海內泰然有盤石之固然後天下皆詠歌仁宗之聖以及諸公之賢而向之黨議消釋無餘至於小人亦磨滅不見矣英宗卽位之初以疾未親政慈聖光獻太后臨朝公與諸公往來二宮彌縫其間卒復明辟樞密使嘗闕人公當次補韓公會公議將進擬不以告公公覺其意謂二公曰今天子諒陰母后垂簾而二三大臣自相位置何以示天下二公大服而止其後張康節公去位英宗復將用公公又力辭不拜公再辭重位諸公不喻其意而服其難八年遷戶部侍郎治平初特遷吏部神宗卽位遷尙書左丞公性剛直平生與人盡言無所隱及在二府士大夫有所干請輒面諭可否雖臺諫論事亦必以是非詰之以此得怨而公不卹也朝廷議加僕王典禮詔下禮官與從官定議衆欲改封大國稱伯父議未下臺官意公主此議遂專以詆公言者既以不勝補外而來者持公愈急御史蔣之奇并以飛語汙公公杜門求辨其事神宗察其誣連詔詰問詞窮逐去公亦堅求退上知不可奪除觀文殿學士知亳州事熙寧初遷兵部尙書知青州事充京東東路安撫使時諸路散青苗錢公乞令民止納本錢以示不爲利罷提舉管勾官聽民以願請不報三年除檢校太保宣徽南院使判太原府河東路經略安撫使公辭求知蔡州從之公在亳已六請致仕比至蔡逾年復請四年以觀文殿學士太子少師致仕公年未及謝事天下益以高公公昔守穎上樂其風土因卜居焉及歸而居室未完處之怡然不以爲意公之在滁也自號醉翁作亭琅邪山以醉翁名之晚年又自號六一居士曰吾集古錄一千卷藏書一萬卷有琴一張有茶一局而常置酒一壺吾老於其間是爲六一自爲傳刻石亦名其文曰居士集居穎一年而薨享年六十有六贈太子太師諡文忠天下學士聞之皆出涕相弔後以諸子贈太師追封兗國公公之

於文天材有餘豐約中度雍容俯仰不大聲色而義理自勝短章大論施無不可有欲効之不說則俗不淫則陋終不可及是以獨步當世求之古人亦不可多得公於六經長於易詩春秋其所發明多古人所未見嘗奉詔撰唐本紀表志撰五代史二書本紀法嚴而詞約多取春秋遺意其表傳志考與遷固相上下凡爲易童子問三卷詩本義十四卷唐本紀表志七十五卷五代史七十四卷居士集五十卷外集若干卷歸榮集一卷外制集三卷內制集八卷奏議集十八卷四六集七卷集古錄跋尾十卷雜著述十九卷昔孔子生於衰周而識文武之道其稱曰文王既沒文不在茲乎雖一時諸侯不能用功業不見於天下而其文卒不可揜孔子既沒諸弟子如子貢子夏皆以文名於世數傳之後子思孟子荀卿並爲諸侯師秦人雖以塗炭遇之不能廢也及漢祖以干戈定亂紛紜未已而叔孫通陸賈之徒以詩書禮樂彌縫其闕矣其後賈誼董仲舒相繼而起臣西漢之文後世莫能髣髴蓋孔氏之遺烈其所及者如此自漢以來更魏晉歷南北朝文弊極矣雖唐正觀開元之盛而文氣衰弱燕許之流倔強其間卒不能振惟韓退之一變復古闕其類波東注之海遂復西漢之舊自退之以來五代相承天下不知所以爲文祖宗之治禮文法度追迹漢唐而文章之士楊劉而已及公之文行於天下乃復無愧於古於戲自孔子至今千數百年文章廢而復興惟得二人焉夫豈偶然也哉公篤於朋友不以貴賤生死易意尹師魯石守道孫明復梅聖俞既沒皆經理其家或言之朝廷官其子弟尤獎進文士一有所長必極口稱道惟恐人不知也公前後歷七郡守其政察而不苛寬而不弛吏民安之滁揚之人至爲立生祠鄭公嘗有遺訓戒慎用死刑韓國以語公公終身行之以謂漢法惟殺人者死今法多雜犯死罪故死罪非殺人者多所平反蓋鄭公意也一本自公篤於朋友至鄭公意也一段在昔孔子生於衰周之前公初娶胥氏卽翰林學士

偃之女再娶楊氏集賢院學士大雅之女後娶薛氏資政殿學士簡
肅公奎之女追封岐國太夫人男八人發故承議郎奕故光祿寺丞
葉朝奉大夫辯故承議郎餘早亡孫男六人孫故臨邑縣尉憲通仕
郎恕奉議郎勳故宣義郎愿懋皆將仕郎孫女七人皆適士族公之
在翰林也先君文安先生以布衣隱居鄉閭聞天子復用正人喜以
書遺公公一見其文曰此孫卿子之書也及公考試禮部亡兄子瞻
以進士試稠人中公與梅聖俞得其程文以爲異人是歲輟亦中下
第公亦以謂不忝其家先君不幸捐館舍亡兄與輟皆流落不偶元
祐初會於京師公家以公碑諉子瞻子瞻許焉既又至於大故輟之
不敏以父兄故不敢復辭銘曰

於穆仁宗	有臣文忠	自嶮而夷	保其初終	惟古君臣
終之實難	匪不用賢	有璧其間	公奮自南	聲被四方
允文且忠	有煒其光	上實開之	下實梃之	三起三儆
誰實使之	儆而復全	惟天子明	克明克忠	乃卒有成
逮歲嘉祐	君臣一德	左右天造	民用飲食	舜禹相授
不改舊臣	白髮蒼顏	翼然在廷	功成而歸	維公本心
彼其何知	言恐不深	潁水之濱	甲第朱門	新鄭之墟
茂木高墳	野人指之	文忠之遺	忠臣不危	仁祖之思

附錄卷第三

記神清洞

遊嵩山寄梅殿丞書明道元年九月謝舍人緣

聖俞足下近有使者東來付僕詔書并御祝封香遺告嵩嶽太常穆文合用讀祝捧幣二員府以歐陽永叔楊子聰分攝會尹師魯王幾道至自維氏因思早時約聖俞有太室中峯之行聖俞中春時遂往僕爲人閒事所窘未皇也今幸其便又二子可以爲山水游侶然亟與之議皆喜見顏色不戒而赴十二日晝漏未盡十刻出建春門宿十八里河翌日過維氏閱遊嵩詩碑甚大字而未鐫上簇嶺尋子晉祠陟轅轅道入登封出北門齋于廟中是夕寢既興吏白五鼓有司請朝服行事事已謁新治宮拜真宗御容稍卽山麓至峻極中院始改冠服却車徒從者不過十數人輕齋遂行是時秋清日陰天未甚寒晚花幽草虧蔽殿壁正當人力清壯之際加有朋讐談燕之適升高躡險氣豪心果過盤石過大樹必休其上下酌酒飲茗傲然者久之道徑差平則腰輿以行嚙碎卽甚則芒躡以進窺玉女窻搗衣石石誠異則亡有逸邇至八仙壇憩三醉石偏視墨迹不復存矣考乎二君所賦亦各過其實午昃方抵峻極上院師魯體最澄最先到永叔最少最疲於是浣漱食飲從容間躋封禪壇下瞰羣峯乃向所歧而望之謂非插翼不可到者皆培塿焉居樓觀人物之類視若蟻壤世所謂仙人者僕未知其有無果有則人世不得不爲其輕蔑矣武后封祀碑故存自號大周當時名賢皆無姓名於碑陰不虞後代之譏其不典也碑之空無字處觀聖俞記樂理國而下四人同遊鐫刻尤精僕意古帝王祀天神紀功德於此當時尊美甚盛後之君子不必廢之壞之也又尋韓文公所謂石室者因詰盡東峯頂既而與諸君議欲見誦法華經注僧永叔進以爲不可且言聖俞往時嘗云斯人之鄙恐不足損大雅一顧僕強請諸君往焉自峻極東南緣險而徑下三四里法華者栖石室中形貌土木也飲食猿鳥也叩

厥真旨則軟語善答神色辟正法道諦實至論多矣不可具道所切當云古之人念念在定慧何由雜今之人念念在散亂何由定師魯永叔扶道貶異最爲辨士不覺心醉色咋歛歎忘返共恨聖俞聞繆而喪真甚矣是夕宿頂上會幾望天無纖翳萬里在目子聰疑去月差近令人浩然絕世間慮盤桓三清露下直覺冷透骨髮羸體將不堪可方卽舍張燭具豐饌醇醴五人者相與岸幘褫帶環坐滿引賦詩談道間以謔劇然不知形骸之累利欲之萌爲何物也夜分少就枕以息明日訪歸路步履無苦昔覲鼠窮伎能上而不能下豈近此乎午間至中院邑大夫來逆其禮益謹申刻出登封西門道穎陽宿金店十六日晨發據鞍縱望太室猶在後雖由南西則但見少室若夫觀少室之美非絲茲路則不能盡諸邑人謂之冠子山正得其狀自是行七十里出穎陽北門訪石堂山紫雲洞卽邢和璞著書之所山徑極峻捫蘿而上者七八里上有大洞蔭數畝水泉出焉久爲道士所占爨煙熏燎又塗墁其內甚瀆靈真之境已戒邑宰稍營草屋於側徙而出之此間峯勢危絕大抵相向如巧者爲之又峭壁有若四字云神清之洞體法雄妙蓋薛老峯之比諸君疑古言辭自成文又意造化者筆焉莫得究其本末問道士及近居之民皆曰向無此異不知也少留數十刻會將雨而去猶冒夜行二十五里宿呂氏店馬上粗若疲厭則有師魯語怪永叔子聰歌俚調幾道吹洞簫往往一笑絕倒豈知道路之短長也十七日宿彭婆鎮遂緣伊流涉香山上方飲于八節灘上始自峻極中院未及此凡題名于壁于石于樹間者蓋十有四處大凡出東門極東而南之自長夏門入繞松轅一匝四百里可謂窮極勝覽切切未滿志者聖俞不與焉今既還府恐相次便有塵事侵汨故急寫此奉報庶代一昔之談不宣絳頓首

堯臣

希深惠書言與師魯永叔子聰幾道遊嵩因誦而韻之寄梅

聞君奉宸詔瑞祝欽靈岫山水聊得游志願庶可就豈無朋從俱况此一秀方斬建春陌十刻殘晝漏初經緜氏嶺古柏尚鬱茂却過鞭轅關巨石相撐鬪夕齋禮神祠法袞被藻繡畢事登山椒常服更知後從者十數人輕齋不為陋是時天清陰力氣勇奔驟雲巖香虧蔽花草藏潤竇傍林有珍禽驚聒若避殼盤石暫憩休泓泉助吞漱上窺玉女窗嶄絕非可構下玩搗衣礎焜燿金紋透尹子體雄恢攀緣逾習狃歐陽稱壯齡疲軟屢躡蹠競歡相扶持芒屨資踐蹂八仙存故壇三醉孰云謬鄙哉封祀碑數子昔鑄鏤偶誌一時事曷虞來者詎絕頂瞰諸峰險然輕宇宙遙思謝塵煩欲知羣鳥獸韓公傳石室聞之固已舊當時與稍衰不暇苦尋究東崖暗壑中釋子持經呪于今二十年飲食同猿狖尹子聆法音充爾溢膚腠嘗期躡屐過吾儕色先愀叶韻遂乖真諦言茲亦甘自谷中頂會幾望涼蟾皓如畫紛紛坐談謔草草具觴豆清露濕巾裳誰人苦羸瘦便即忘形骸胡為戀纓綬或疑桂宮近斯語豈狂瞽歸來遊少室峭崿沐引脰石室迢遞過探訪仍邂逅捫蘿上岑邃仙屋何廣袤乳水出其間涓涓自成溜凡骨此薰蒸靈真安可觀霞壁幾千尋四字侔篆籀咸意苔蘚文誠為造化授標之神清洞民俗未嘗違忽覺風雨冥無能久瞻扣忽忽遂宵征勝事皆可復俚歌縱喧譁怪說多駸駸凌晨闕塞陽追賞顏匪厚窮極四百里憚疲左右昨朝書報予聞甚醉醇耐所嗟滯遠方心焉倍如疚

又答梅聖俞書

前人

絳白前自嵩嶺回即致書左右本為與足下不得同此勝事諸君所共歎恨自入山至還府凡一登臨一談話一食飲間必廣記而備言之欲使足下覽見本末與夫方駕連轡之不若間可以助發一笑勤勤在此爾及辱報反謂詫茲行而陋中春之遊疑足下遽答使者視前書之未詳也雖諷閱鄭重然秘不示外何則非諸君本意恐傳之

而惑方欲道此以于聰明而未敢也忽得五百言詩自始及末誦次游觀之美如指諸掌而又語重韻險亡有一字近浮靡而涉繆異則知足下於雅頌為深劉賓客有言人之神妙其在於詩以明詩之難能於文筆百倍矣今足下以文示人為略以詩曉人為精吾徒將不足游其藩況敢與與昨也歎感歎感不宣絳頓首謝公諱絳字希深時任尚書祠部員外郎直集賢院通判河南府

小說多載神清洞事公詩亦有鏤樓臺之句信無疑矣其詳則具謝希深與梅聖俞書中昔公自跋集古錄目序謂希深善評文章亦或有所稱皆非余所自得此敘之作惜無謝尹之知音然則公重希深豈減師魯又嘗銘其墓云制誥得西漢體又云以文知名今其集罕傳而二書偶得之英辭類囊附載於此粗見希深之筆力抑公文集既備而使知音者借傳焉是亦公之忠也

附錄卷第四

附錄卷第五

事迹

男發等述

先公爲人天性剛勁而氣度恢廓宏大中心坦然未嘗有所屑屑於
事事不輕發而義有可爲則雖禍患在前直往不顧以此或至困逐
及復振起終莫能掩而公亦正身特立不少屈奪四五十年之間氣
象偉然蓋天下而以文章道德爲一世學者宗師故歷事三聖嘗被
眷倚遂託以天下安危之計而公亦以身許國進退出處士人以爲
輕重至於接人待物樂易明白無有機慮與所疑忌與人言抗聲極
談徑直明辨人人以爲開口可見心腑至於貴顯終始如一不見大
官貴人事位貌之體一切出於誠心直道無所矜飾見者莫不愛服
而天資勁正高遠無纖毫世俗之氣常人亦自不能與之合也平生
學之所得以至文章事業皆明識所及性所自得而無所勉
強而衆人學之者終莫能及其於經術務明其大本而本於情性其
所發明簡易明白其論詩曰察其美刺知其善惡以爲勸戒所謂聖
人之志者本也因其失傳而妄自爲之說者經師之末也今夫學者
得其本而通其末斯盡善矣得其本而不通其末闕其所疑可也又
云今天學者知前事之善惡知詩人之美刺知聖人之勸戒是謂知
學之本而得其要其學足矣又何求焉公於經術去取如此以至先
儒注疏有所不通務在勇斷不惑平生所辨明十數事皆前世人未
有說者如五帝不必皆出於黃帝春秋趙盾弑君非趙穿許世子非
不嘗藥武王之十有一年非受命之年數及力破漢儒災異五行之
說正統論破以秦爲僞閔或以功德或以國地不相臣屬則必推一
姓以爲主之說以爲正者正天下之不正統者統一天下之不一至
於各據地而稱帝正朔不相加則爲絕統惟合天下於一者爲正統
統或絕或續而正統之說遂定焉然亦不苟務立異於諸儒嘗曰先
儒於經不能無失而所得已多矣正其失可也力詆之不可也盡其

說而理有不通然後得以論正予非好爲異論也其於詩易多所發
明爲詩本義所改正百餘篇其餘則曰毛鄭之說是矣復何云乎其
公心通論如此

先公四歲而孤家貧無資太夫人以荻畫地教以書字多誦古人篇
章使學爲詩及其稍長而家無書讀就閭里士人家借而讀之或因
而抄錄抄錄未畢而已能誦其書以至晝夜忘寢食惟讀書是務自
幼所作詩賦文字下筆已如成人兵部府君閱之謂韓國太夫人曰
嫂無以家貧子幼爲念此奇兒也不惟起家以大吾門他日必名重
當世及舉進士時學者方爲四六號時文公已獨步其間天聖七年
補國子監生是秋取解明年南省試皆爲第一人由是名重當世及
景祐中在西京與尹公洙偕爲古文已而有詔戒天下學者盡爲古
文獨公古文既行遂擅天下四十年間天下以爲模範一言之出學
者競相傳道不日之間流布遠近外至夷狄莫不仰服後進之士爭
爲門生求受教誨當世皆以爲自兩漢後五六百年有韓退之退之
之後又數百年而公繼出自李翱柳宗元之徒皆不足比然公之文
備盡衆體變化開闢因物命意各極其工或過退之如醉翁亭記真
州東園記創意立法前世未有其體作尹公洙誌文以爲尹公文簡
而有法取其意而爲之即得其體石先生介墓誌不多假事迹但述
其平生志意所存與其大節氣概讀之如見其人作集古錄敘今王
丞相以謂讀之可辟瘴鬼

先公既奉勅撰唐書紀志表又自撰五代史七十四卷其作本紀用
春秋之法雖司馬遷班固皆不及也其於唐書禮樂志發明禮樂之
本言前世治出於一而後世禮樂爲空名五行志不書事應悉破漢
儒災異附會之說皆出前人之所未至其於五代史尤所留心褒貶
善惡爲法精密發論必以嗚呼曰此亂世之書也其論曰昔孔子作
春秋因亂世而立治法余述本紀以治法而正亂君此其志也書成

減舊史之半而事迹添數倍文省而事備其所辨正前史之失甚多嘉祐中今致政侍郎范公等列言于朝請取以備正史公辭以未成熙寧中有旨取以進御按神宗實錄熙寧五年八月丁亥詔潁州令歐陽某家上其所撰五代史

先公筆札精勁雄偉自爲一家當世士大夫有得數十字皆藏以爲寶而未嘗爲人書石

先公平生以獎進賢材爲己任一時賢士大夫雖潛晦不爲人知者知之無不稱譽薦舉極力而後已既爲當世宗師凡後進之士公嘗所稱者遂爲名人時一作上人皆以得公一言爲重而公推揚誘進不倦至於有一長者識與不識皆隨其所長而稱之至今當世顯貴知名者公所稱薦爲多今湖州孫正言覺爲合肥主簿未與公相識郡守怒之欲捋拾以罪時胡侍講在大學以屬公公爲作手書與其寮佐令保全之遂獲免福州處士陳烈素不與公相識公聞其名知其行義屢薦於朝乞賜召用朝廷卽召烈爲國子監直講

先公嘗言平生爲學所得惟平心無怨惡爲難故於事未嘗挾私喜怒以爲意雖仇讎之人嘗出死力擠陷公者它日遇之中心蕩然無纖芥不足之意嘗曰孔子言以直報怨夫直者是之爲是非之爲非是非付之至公則是亦不報也

先公初貶滁州蓋錢明逸輩爲之自外還朝遇明逸於京師屢同飲宴不以爲嫌其後公在中書明逸罷秦州歸復用爲翰林學士近日小人蔣之奇妄興大謗及公移青州其兄之儀知臨淄縣爲二司所不喜力欲壞之亦以託公公察其實無它力保全之

先公平生文章擅天下未嘗以矜人而樂成人之美不掩其所長詩筆不下梅聖俞而嘗推之自謂不及然識者或謂過之初奉勅撰唐書專成紀志表而列傳則宋公祁所撰朝廷恐其體不一詔公看詳令刪爲一體公雖受命退而曰宋公於我爲前輩且人所見不同豈

可悉如己意於是一無所易書成奏御舊制惟列官最高者一人公官高當書公曰宋公於傳功深而日久豈可掩其名奪其功於是紀志表書公名而列傳書宋公宋丞相岸聞之歎曰自古文人好相凌掩此事前所未有也

先公篤於交友恤人之孤梅聖俞家素貧既卒公贖於諸公得錢數百千置義田以恤其家且乞錄其子增尹龍圖洙已卒公乞錄其子構孫先生復有尊王發微十五卷有旨進內未畢而卒公乞令其家錄進而推恩其子大年尹構孫大年梅增皆蒙錄用以官天聖初胥公在漢陽先公時年二十餘以所爲文謁之胥公一見奇之曰子當有名於天下因館于門下與公偕入京師及公登第乃以女妻之

王文康公知西京先公爲留守推官一日當都廳勸事有一兵士自役所逃歸文康問公曰勸兵士何謂未斷公曰合送本處行遣文康曰似此某作官處斷過甚多推官新作官不須疑公曰若相公直斷雖斬亦可有司則不敢奉行一夜文康夜召問軍人未斷否公曰未文康曰幾至誤事明日遂送所屬處

先公在河南以文學負當世之名前後留守皆名公好賢莫不傾身禮接王文康自西京召歸謂公曰今來有例合舉館職當奉舉遂用王文康公薦自西京留守推官召試

范文正公以言事忤大臣貶知饒州先公一日遇司諫高若訥於余襄公家若訥非短范公以爲宜貶公歸遂爲書與之辨且責若訥一字一作其不能論列若訥繳進其書遂坐貶爲夷陵令既而余襄公尹公洙亦連坐被貶蔡公爲四賢詩述其事天下傳之

先公既坐范公遠貶數年復得滑州職官會范公復起經略陝西辟公掌牋奏朝廷從之時天下久無事一旦西邊用兵士之負材能者皆欲因時有所施爲而范公以天下重名好賢下士故士之樂從者衆公獨歎曰吾初論范公事豈以爲己利哉同其退不同其進可也

遂辭不往其於進退不苟如此以至致位二府惟以忠義自得主知未嘗有所因緣憑藉

先公在館中遇西邊用兵天下多事詰闕上書爲三策以料賊情及指陳天下利害甚衆既而有詔百官許上封章言事公上疏言三弊五事力陳當時之患仁宗增諫官爲四員先公與蔡公襄余襄公靖今致政王尙書素同時選用是時陝西用兵已久京東西盜賊羣起內外多事仁宗既進退大臣遂欲改更闕失方急於求治公遇事感激知無不言范文正公杜正獻公今司徒韓魏公富鄭公四人同時登用公屢請召對訪問責以所爲既而仁宗降手詔出六條以責諸公各亦有所陳述公言諸公所陳宜力主張勿爲羣言所奪而王文安公爲三司使有爲無吝詩中之者公請嚴禁止之以絕小人流言搖動朝政之漸敕出官爵購捕其人時上欲改更朝政小人不便故造作語言動搖及勅勝出自此遂絕是後上遂下詔勸農桑興學校改更庶事之弊

自范文正公之貶先公與余襄公等坐黨人被逐朋黨之說遂起久而不能解一時名士皆被目爲黨人公在諫院爲朋黨論以獻羣言遂息大救當時之弊時天下久安上下失於因循一旦陝西用兵而羣賊王倫張海等所在皆起先公請遣使者按察州縣朝廷命諸路轉運使皆兼按察公言轉運使苟非其人則按察遂爲空名復條陳按察六事於是兩府聚議盡破常例不次用人後來別因一劄于中備言此事其後州縣多所升降內外百職振舉及杜待制杞爲京西轉運使與御史蔡稟同治賊事公言杞可獨任無用稟杞果遂平諸盜京西無事

時張温成方有寵人莫敢言因生皇女染綾羅八千疋先公上言乞裁損其恩寵及其親戚恩澤太頻可以減罷極陳女寵驕恣以至禍敗之戒

皇叔燕王薨議者以國用不足請待豐年而葬先公乞減費而葬以爲不肯薄葬留之以待侈葬徒成王之惡名使四夷聞天子皇叔薨無錢出葬遂輕中國有旨減節浮費而葬

澧州柿木成文有太平之道四字先公上言今四海騷然未見太平之象又曰太平之道者其意可推自古帝王致太平皆有道德則太平失道則危亂今見其失未見其得願陛下憂勤萬務漸期致理其瑞木乞不宣示于外

慶曆二年御試進士以應天以實不以文爲賦題公爲擬試賦一道以進指陳當世闕失言甚切至

淮南轉運使呂紹寧到任便進羨餘錢十萬公乞拒而不受以彰朝廷均恤外方防禦刻剝

前後所上章疏百餘其間斥去姦邪抑絕徼倖以謂任人不可疑節制不可不一當推恩信以懷不服其事往往施行

先公以諫官除知制誥故事知制誥當先試有旨更不召試有國以來不試而受者惟楊文公陳文惠公與公二人公既典制誥尤務敦

大體初作勸農勅既出天下翕然人人傳誦王言之體遠復前古陝西兵役之後河東困弊糧草闕少又有言者請廢麟州或請移于

合河津或請廢五寨朝廷命先公視其利害及訪察一路官吏能否擊劃經久利害及計置糧草公爲四議以較麟州利害請移兵就食

於河濱一作次清塞堡緩急不失應援而平時可省餽運麟州遂不廢又建言忻代苛嵐火山四州軍沿邊有禁地棄而不耕人戶私糴

北界斛斗入中以爲邊儲今若耕之每年可得三二百萬石以實邊朝廷從之此兩事至今大爲河東之利

自西事後河東賦斂重而民貧道路嗟怨先公奏罷十事以寬民力文字見河東奏事請乞罷和糴米三司銀之類

先公自河東還會保州兵叛遂出爲河北都轉運使別得不下司劄

子云河北宜選有文武材識轉運使一員密授經略之任使其熟圖利害豫爲禦備

保州既降總管李昭亮私取叛兵妻女通判馮博文等亦往往効之先公發博文罪置獄推劾昭亮悉懼立令送出

自保州事後河北兵驕少不如意即謀結集處處有之上下務在姑息先公屢乞主張將帥每事鎮重以遏土心河北卒無事

保州叛兵既降其脅從者二千餘人分隸河北諸州富鄭公爲宣撫使恐其復生變欲委諸州同日誅之方作文書會先公權知鎮府遇

富公於內黃富公夜半屏人密以告公公曰禍莫大於殺降昨保州叛卒朝廷許以不死招之今已戮之矣此二千人本以脅從故得不

死奈何一旦無辜就戮且無朝旨若諸郡不肯從命事既參差則必生事是趣其爲亂也且某至鎮州必不從命富鄭公遂止

先公在河北既被朝廷委任之重悉力經營凡一路官吏能否山川地里財產所出兵糧器械教閱陣法一一別爲圖籍盡四路之事如

在目前或問公曰公以文章儒學名天下而治此俗吏之事乎公曰吏之不職吾所愧也繫民休戚其敢忽乎奏置御河催綱司通致糧

運以省入中之數置都作院於磁相二州以省諸州兵器之費既究見河北利害本末一無此二字乃一一條列遍貽書於執政將大爲

經畫未盡行而公罷去慶曆初仁宗既復四諫之職一有而舉二字拔英俊賢能材德之士

並進于朝公負天下之望而居其職仁宗寵異之意獨絕衆人嘗因奏事論及當世人材仁宗不覺謂公曰如歐陽某何處得來公乃盡

心悉力思所補報遇事不避以至犯忤權貴排擊姦佞怨怒隨之常欲大用而未果是時中外多事仁宗意以謂艱難之際非公不足以

辨事故自諫官奉使河東委以一路之利害及保州事作河北轉運使張昞之得罪公自河東還未歲月復出爲河北轉運使及陞辭之

日仁宗面諭曰不久當還無爲久居計有事但言來無以中外爲限公對曰在京師所言尙以風聞或恐失實況於在一作在在外仁宗曰有所聞但言來行與不行則在此及至河北百事振舉小人忌公

恐大用而又杜范韓富同時罷黜小人彙進公上疏極言四人忠實可用而無過辨明小人詭罔之言請加任用於是羣小益懼相與造

爲謗辭及詔獄之起窮究無狀仁宗亦悟止奪職知滁州南京素號要會賓客往來無虛日一失迎候則議論鋒一作羣起先

公在南京雖貴臣權要過者待之如一由是造爲語言達於朝廷時陳丞相升之安撫京東因令審察是非陳公陰訪之民間得俚語謂

公爲照天蠟燭還而奏之上方欲召用而公丁大夫人憂先公初服除還朝惟除本官龍圖閣直學士而無主判入見日仁宗

惻然怪公鬢髮之白問公在外幾年今年幾何恩意甚至公求補外仁宗曰此中見人多矣爲小官時則有肯盡言名位已高則多顧藉

如卿且未要去明日以責大臣即以公判流內銓是時小人忌公且見進用僞爲公乞澄汰內臣劄子傳布中外內臣人人切齒判銓六

日楊承德以差船及引見胡宗堯事中公出知同州而外議紛紜論救者衆上亦開悟適會劉公沆有劄子乞罷宋公祁結絕唐書上曰

莫不須宋祁否劉公曰別未有人上曰歐陽某知同州臣寮已有文字請留劉公曰乞自陛下宜論明日朝辭上殿上曰休去同州且脩

唐書既而會魯公自翰林學士換侍讀學士知鄭州劉公奏歐陽某見未有主判處乞替會某判三班院上曰翰林學士有人未劉公曰

見商量上曰歐陽某不止一好差遣亦好一翰林學士便可替會某遂入翰林爲史官判三班院上書面問公以唐學士院鈴索故事將

議臨幸其於眷待之意甚厚

先公在侍從八年知無不言屢建議多見施行自初還朝唐公介與諸公方居言職所言久之未見聽納公上疏言人君拒諫之失請採

聽言者其後上遂用諫官言進退宰相用唐介等疏罷陳執中

時議者方以河患為意陳恭公在相位欲塞商胡開橫壠回大河於故道先公上疏言其不可未幾恭公罷去新宰相復用李仲昌議欲開六塔全回河流公兩上疏爭之不聽河纔成而決濱 德博數千里大被其害仲昌等議者流竄遠方卒如公議

至和二年先公奉使契丹契丹使其貴臣陳留郡王宗愿惕隱大王宗熙北宰相蕭知足尚父中書令晉王蕭孝友來押宴曰此非常例以卿各重宗愿宗熙並契丹皇叔北宰相蕃官中最高者尚父中書令晉王是太皇太后弟送伴使耶律元寧言自來不曾如此一併差近上親貴大臣押宴

嘉祐初狄武襄公為樞密使狄自破蠻賊之後方振威名而是時仁宗不豫久之初康復而狄得士心京師訛言詢詢先公因水災言武臣典機密得士心而訛言可畏非國之便請且出之於外以保全之未久狄終以流言不已罷知陳州

嘉祐中復用賈魏公為樞密使先公言其為人好為陰謀陷害良士小人朋附樂為其用前任相位累害善人所以聞其再來望風畏恐乞早罷還之舊鎮其命遂止

先公在翰林嘗草春帖子詞一日仁宗因閑行舉首見御閣帖子讀而愛之問何人作左右以公對即悉取皇后夫人諸閣中者閱之見其篇篇有意歎曰舉筆不忘規諫真侍從之臣也自是每學士院進入文書必問何人當直若公所作必索文書自覽先公每述仁宗恩遇多言此事云內官梁實為先公說春帖子詞有云賜進升君子陰消退小人聖君南面治布政法新春至今士大夫盡能誦之及温成皇后閣帖子云聖君念舊憐遺族常使無權保厥家

仁宗嘉祐中先公在翰林富鄭公在中書胡侍講在太學包孝肅公為中丞士大夫相語曰富公真宰相呼先公字曰真翰林學士胡先

生真先生包公真中丞時人謂四真

嘉祐二年先公知貢舉時學者為文以新奇相尚文體大壞僻澀如狼子豹孫林林逐逐之語怪誕如周公伴圖馬操卷舖傳說負版築來築太平之基之說公深革其弊一時以怪僻知名在高等者黜落幾盡二蘇出於西川人無知者一旦拔在高等勝出士人紛紛驚怒怨謗其後稍稍信服而五六年間文格遂變而復古公之力也

先公知開封府承包孝肅公之後包公以威嚴為治各震京師而公為治循理不事風采或謂公曰前政威名震動都下真得古京兆尹之風采公未有動人者奈何公曰人材性各有短長豈可捨己所長勉強其所短以徇俗求譽但當盡我所為不能則止既而都下事無不治

開封府既多近戚寵賈子令犯禁而復求以內降苟免先公既授命屢有其事即上奏論劾乞令復求內降以免罪者更加本罪二等內臣梁舉直私役官兵付開封府取勘既而內降放罪凡三次內降公終執而不行

嘉祐三年閏十二月京師大雪民凍餒而死者十七八明年上元有司以常例張燈先公奏請罷之

故事國史皆在史院近制皆進入內自是每日曆成亦入內而有司惟守空司先公請錄本付外遂如公言今史院之有國史自一作由公請也

甚激切及在政府遂與諸公協定大議而英宗力辭宗正之命堅臥久之諸公同議不若遂正皇子之名奏事仁宗前顧問之際公獨進曰宗室自來不領職事今外人忽見有此除授皆知陛下將以爲子不若遂正其名蓋判宗正寺降誥勅得以不授今立爲皇子只煩陛下命學士作一詔書告天下事卽定矣仁宗以爲然大計遂定及英宗初年未親政事慈聖垂簾危疑之際公與諸公往來兩宮鎮撫內外而公之危言密議忠力爲多以至英宗親御萬機內外睦然

先公天性勁正不顧仇怨雖以此屢被讒謗至於貶逐及居大位毅然不少顧惜尤務直道而行橫身當事不恤浮議是時今司徒韓魏公當國每諸公聚議事有未可公未嘗不力爭而韓公亦欣然忘懷以此與公相知益深或奏事上前衆議未合公亦往返折難無所顧避嘗一日獨對英宗面諭公曰參政英宗於先朝大臣名不以名呼而以官稱性直不避衆怨每見奏事與二相公有所異即便相折難其語更無回避亦聞臺諫論事往往面折其短若似奏事時語可知人皆不喜也宜少戒此而公又務抑絕僥倖有以事干公者或不可行面爲其人分別可否曰此事必不可行以此人多怨謗而公安然未嘗少卹嘗稱故相王沂公之言曰恩欲歸己怨使誰當每亦曰貧賤常思富貴富貴必履危機此古人之所歎也惟不思而得既得不患失之者其庶幾乎及濮園議起非公所獨專朝廷亦未有定議而言者妄以非禮之說指公爲主議公亦不與之較其後小人彭思永將之奇等造爲無根之飛語欲以危公自人主而下朝廷名臣巨公天下有識之士皆知因公亮直不隱得怨於小人故上連降手詔詰問思永之奇二人引服誣罔悉皆貶逐

自嘉祐以後朝廷務惜名器而進人之路稍狹先公屢建言館閣育材之地宜感其選以廣賢路遂令兩府人各舉五人其後中選者十人

嘗因僧官闕人內臣陳承禮以寶相院僧慶輔爲請內降從之舊有著令僧官必試而補諸公相與執奏其事先公進言曰補一僧官至爲小事但內降衝改著令內臣干撓朝政不可啓其端且宦女近習前世常患難於防制乞絕之於漸英宗卽欣然嘉納契丹降人韓舉諱者自言太叔使來言太叔謀取其國乞中國出兵爲應二府會議其事時有意主之者將議從之先公爭曰中國待夷狄宜以信義爲本奈何欲助其叛亂使事不成得以爲辭主議者大笑曰迂儒迂儒公力爭之不已遂止既而虜中太叔舉事不成而死初樞密使闕人先公以次當拜時英宗未親政事二府密議不以告公一日待漏院中公見二相耳語知其所爲問曰得非密院闕人而某當次補乎二公曰然公曰此大不可今天子不親政而母后垂簾事之得失人皆謂吾輩爲之耳今如此則是大臣二三人相補置耳何以鎮服天下二公大然公言遂止及今致政張太師罷樞密使英宗復用公公力辭不拜

京師百司所行兵民官吏財用之類皆無總數中書一有行移則下有司纂集先公因暇日盡以中書所當知者集爲總目一日上有所問宰相以總目爲對公以祀假家居上遣中貴人就中書閣子取而閱之先公平生連典大郡務以鎮靜爲本不求聲譽治存大體而施設各有條理綱目不亂非盜賊大獄不過終一作數日吏人不得留滯爲姦如揚州南京青州皆大郡多事公至數日事十減五六既久官宇闕然嘗曰以縱爲寬以略爲簡則事弛廢而民受弊吾所謂寬者不爲苛急簡者去其繁碎爾故所至不見治迹而民安其不擾既去至今追思不已今滁揚二州皆有生祠而公天性仁恕斷獄常務從寬嘗云漢法惟殺人者死後世死刑多矣故凡死罪非已殺人而法可出入者皆全活之曰此吾先君之志也其在河北一議活二千人之命及晚年在京東奏寬沙門島刑各設法減其人數賴以獲全

者甚衆沙門島罪人塞主舊敢專殺故數不多而易制馬默知登州
務全人命舉察其嚴稍優罪人罪人既多而又不畏本寨漸恣橫
難制京東議者大患之有司之意多欲許令依舊一面處置公以爲
朝廷既貸其命豈可非理殺之奏請將編劄州一併刑名合配沙門
島而情稍輕者只配遠惡州軍見在島多年情輕者放還遂以無事
而人亦獲全

先公初有太原之命令赴闕朝見中外之望皆謂朝廷方虛相位以
待公公六上章堅辭不拜而請知蔡州天下莫不歎公之高節

先公在亳年纔六十一已六上章乞致仕而上方眷留未聽及在蔡
勤請益堅遂如素志公既氣貌康強而年未及禮制一旦勇退近古
數百年所未嘗有天下士大夫仰望驚嘆公雖退居于家士論猶望
以爲輕重

先公平生以直道見忌於羣小再被貶逐而未嘗以介意初在峽州
作至喜亭及自河北以小人無名之謗降知滁州治州南山泉爲幽
谷泉作亭於瑯琊山自號醉翁及晚年又自號六一居士曰吾集古
錄一千卷藏書一萬卷有琴一張有碁一局而常置酒一壺吾老於
其間是爲六一自爲傳以刻石

先公平生於物少所嗜好雖異物奇玩不甚愛惜獨好收蓄古文圖
書集三代以來金石銘刻爲一千卷以校正史傳百家訛繆之說爲
多藏書一萬卷雖至晚年暇日惟讀書未嘗釋卷

先公平生著述易童子問三卷詩本義十四卷五代史七十四卷居
士集五十卷歸榮集一卷外制集三卷內制集八卷奏議集十八卷
四六集七卷集古錄跋尾十卷雜著述十九卷諸子集以爲家書總
目八卷其遺逸不錄者尙數百篇別爲編集而未及成又奉勅撰唐
書紀十卷志五十卷表十五卷在館職日與同時諸公共撰崇文總
目祖宗故事

附錄卷第五

